


Nacom Pejume Diwesi po diwesi pena jume diwesi

xua Jesucristo yabara tinatsi



New Testament in Guambiano

Nacom Pejume Diwesi po diwesi pena jume diwesi xua Jesucristo yabara tinatsi New Testament in Guambiano

copyright © 2010 Wycliffe Bible Translators, Inc.

Language: Guambiano

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guambiano

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
7e6b2dfc-632e-5b6e-aeb4-3ed6877d71c9

Contents

GÉNESIS	1
San Mateo	99
San Marcos	170
San Lucas	214
San Juan	289
Los Hechos	344
Romanos	414
1 Corintios	446
2 Corintios	476
Gálatas	496
Efesios	508
Filipenses	519
Colosenses	526
1 Tesalonicenses	533
2 Tesalonicenses	539
1 Timoteo	543
2 Timoteo	552
Tito	559
Filemón	563
Hebreos	565
Santiago	589
1 San Pedro	597
2 San Pedro	605
1 San Juan	610
2 San Juan	618
3 San Juan	620
San Judas	621
El Apocalipsis	624

Génesis

Srøsrø Pølbasrig

¹ Ke srøtø chigucha chigaaben, Tiusbe srømbalameranba, pirøwanba marig køn.

² Pirøbe mumay kuinguen asamgaig chiguchagaig pasrøben, pimerabe purø trømbø løstiiig pinøgasraig pasrabig køn. Inchen Tiuswei Espiritube pi palawan llirabig køn.

³ Tiusbe trenchibig køn: “Tør kønrrain” cha. Inchen tørbe misrøbig køn.

⁴ Incha Tiusbe tørwane tab kui asha, tørwane løstøyugurri nuingui mendamarøbig køn.

⁵ Tiusbe tørwane “kwaløm” cha wamappe, løstiiigwane “yem” cha wamabig køn. Inchen maabenba løtsøba købig køn, tru srøsrø kwaløm.

⁶ Katø Tiusbe trenchibig køn: “Larrø lendiig chiguchagaig kønrrain cha, tru pimeran nuingui, nuingui tarømartrabig tøbøtag pasrønrrai.”

⁷ Incha Tiusbe tru larrø lendiig chiguchagaigwan marøbig køn, tru pimeran tarømarøbigwan. Tru pimera pala købelanba, umbu købelanba nuin-gui tarømarig kørrømisrtrai.

⁸ Incha Tiusbe tru larrø lendiig chiguchagaigwane “srømbala” cha wam-abig køn. Inchen maabenba, løtsøba køben, pa kwaløm købig køn.

⁹ Katø Tiusbe trenchibig køn: “Srømbalamerai umbu pimera købeløbe kan-balatø misrtrain cha, pur kenamisrtrai.” Inchen treeg kuig køn.

¹⁰ Incha purwane Tiusbe “pirø” cha wamappe, pimera kanbalatø misrig-wane “marmera” cha wamig køn. Incha Tiusbe tabig kui asig køn.

¹¹ Incha Tiusbe trenchibig køn: “Pirøbe misringarubash cha, pilli puzheelø chi kaamera køppe, treeg yellzheelø tøgar, mamig nigab tusrmera, chi tusr køppe, treeg yell truyu tøgar pirau treeg kønrrai. Inchen treeg kuig køn.

¹² Inchen pirøbe pilli puzheelø chi kaamera køppe, treeg yellzhiig nigar, mamig nigab tusrmera yellzheelø truyu nigar misrøbig køn, nø chi tusr køppe, treekke. Inchen Tiusbe tabig kui asig køn.

¹³ Inchen maaben misra, løtsøgualmaben, pøn kwaløm købig køn.

¹⁴ Tiusbe katø trenchibig køn: “Tru srømbala larrø lendiig chiguchagaigube pilabelø kønrrain cha, kwalømwana, yemwana tarømartrabelø, iiløbe chi utømera køben amrrubelan ashib kømig kønrrai, kwalømmerawan, pilamer-awan.”

¹⁵ Incha truuløbe srømbalasrø larrø lendiig chiguchagaigu pilabelø kønrrain cha, pirøwan pilønrrabelø.” Inchen treeg kuig køn.

¹⁶ Tiusbe pagatø pilabelø nørreelan marig køn: tru pilabig larrø tøriibe kwaløm piløben, pilabig tre tør kømíbe yem piløben inchai, katø nøbe kønchabiimeragucha marig køn.

¹⁷ Tiusbe tru srømbalamera larrø lendiig chiguchagaigu iilan pønsrcøppe, pirøwan pilønrrai pønsrcøbig køn.

¹⁸ Kwalømwana lata, yemwana lata pilamburab pilabeløbe nøm pønrrønrrai marig køn, tørwana, løstiiigwana tarømartrabelø. Incha Tiusbe tabig kui asig køn.

¹⁹ Inchen maaben misra, løtsøgualmaben pib kwaløm købig køn.

20 Incha Tiusbe trenchibig kòn: “Pimerabe chigurrimbunø øsiguelø tøgagøbash cha, katø illimera tru pirøbalawan llirabeløgucha kònrrain cha, tru larrø lendiig chiguchagaigu srømbalamerawan amøñibelø.”

21 Incha Tiusbe piyu ushamera kwaaramdø nørreelø marig kòn. Chigurrimbunø øsiguelø kònab purrønnrabelanba, chitøgucha nøm chimera køppe, treelø kònrrai pimerabe treeg misringaruig kòn, katø chigurrimbunø kwaldzariimera tøgargucha nøm chi køppe, treeløtøwein kònrrai. Incha Tiusbe tabig kui asig kòn.

22 Incha Tiusbe truilane mayanguen tabig kònrrai marabe, trenchibig kòn: “Larrø nørro tøgagøb, larrø nørro larrøbitchigay cha, marmerayu netsab, katø illimeragucha larrø nørro larrøbitchigay” cha.

23 Inchen maaben misra, løtsøgualmaben, truike trattrø kwaløm købig kòn.

24 Incha Tiusbe trenchibig kòn: “Pirøbe øsiguelø misringarubash cha, kusreeg ushamera køben, namig ushamera køben, srala ambubelø køben, nøm chimera køppe, treelø kònraingue.” Inchen treeg kuig kòn.

25 Tiusbe namig ushamera nøm chimera køppe, treelø kònrrai marøb, katø kusreeg ushamera nøm chimera køppe, treelø kònrrai marøb, maya ushamera pirau sralig ambubelø nøm chimera køppe, treelø kònrrai marøbig kòn. Incha Tiusbe tabig kui asig kòn.

26 Incha Tiusbe trenchibig kòn: “Møg misag margun cha, nam mailø køben ke tre lataitøwein køb, katø nam lataitøwei isub, marøbelø kònrrai. Incha maryu piyaumeran, srømbala amøñib illimeran, kusreeg ushameran, namig ushameran, pirau sralig ambubelø nøm chimera køppe, treelø nun chinchaingaig, nø ashib tøga pasrønrrain” cha.

27 Incha Tiusbe mowan marøppe nø maig køben ke tre lataitøwein kònrrai marig kòn. Pøs nøbe tre lataitøwein kònrrai marig kòn. Møg misag, ishug misag treeg marig kòn.

28 Incha Tiusbe mayanguen tabig nebuilø kònrrigay chib, trenchibig kòn: “Srøig larrøbitchabig yellmera tøgagøb, srøitø srøitø larrø nørro nemisrtrigay cha. Ñimbe pirøwan netsøgana, pirøwane ñim ashib tøga pønrramisra, chinchaingaig ñim ashib karunnrigay cha, maryu piyaumeran, pala amøñib illimeran, katø maya ushamera pirau srala ambubelan købengue.”

29 Incha Tiusbe trenchibig kòn: “Asay cha, nabe ñimune pirau mamig nigab kauzheelø yellmera tøgartø kònrrai tranar cha. Katø maya tusrmera mamig nigabelø, yell tøgarmera tranar cha, iibe kerriguba ñim mab kømig kònrrai.”

30 Inchen pirau namig ushameranba, pala amøñib illimeranba, katø maya ushamera pirau srala ambubelanba, truilane pilli puzhigwan mab kømig tranar cha. Inchen treeg kuig kòn.

31 Incha kerrigu Tius nø mariilan ashabe, truba truba tabig kui ashibig kòn. Inchen maaben misra, løtsøgualmaben, trattrø y kan kwaløm købig kòn.

2

1 Inchen srømbalameranba, pirøwanba truyu kerriguh chi købelanba chab marig kørømisrig kòn.

2 Incha Tiusbe kerrigu nui maramigwan yandø patsøga, trattrø y pa kwalømybe isrig kòn nø kerrigu chi marigwan.

3 Incha Tiusbe tru trattrø y pa kwaløm kònrrabyuigwane mayanguen tabig kònrrai mara, nuyasig kònrrai tarømara pasrøbig kòn, kaguende nø chigurrimbunø mara pønsra tru kwalømbe nø isrig kua.

4 Srømbalawan køben, pirøwan køben mara pønsrailan øyeeg købig køn cha wamindig iig køn.

Møg Misag Ellmarin Tulyu Inchen Jehová Pirøwanba Srømbalameranba Marmøwatøbe

5 piraube ka nøtø kal-lab tusrmera chigucha kawei, chigucha kaumera kal-laig kawein købig køn, kaguende Jehová Tiusbe piraumay srewan pun-gurumø srø køben. Inchagucha kwallchabig mu møg mugawein køben.

6 Pibe piraugurri webarrub, pirø palawan kerrigu sømarøbig køn.

7 Inchen Jehová Tiusbe pirøyu usrøtøga møg misag mara, trugurrimbe øsiguig kønrrai kimyu urrøben, møøbe øsiguig misrig køn.

8 Incha Jehová Tiusbe Eden taisrø kan ellmarin tul mara pasrøbig køn, tru pørr neeshibgatømayrø. Incha tru nø mari møwan truyu kørømarøbig køn.

9 Incha Jehová Tiusbe chi tusrkurrimbunø chull asamdø tab tusrmera pirau kal-langarubig køn, chull mamdø mamiimera nigabelø. Inchen tru tul tøbøtabe tru kwamø øsig køm tusrwanba, katø tru tabigwanba, kaigwanba nebua asam tusrwanba kal-langarubig køn.

10 Inchen tru Edenyugurrimbe pi webarrubig køn tru tulwan sømarøb lulrrabig. Incha truyugurrimbe katø pippaløh pirisha webibig køn.

11 Tru srøsrø pibe Pisón munchi købig køn, truike tru Havila pirø muba kuimburab pøtøgatanwan pureb ibig køben, trusrømbe oro tøgaike.

12 (Incha pirø muba kuimburab tru pirau orobe larrø tabig købig køn, katø truyube mayzhig irrabig bedelio køben, ónice køben tøgaike.)

13 Inchen tru wendau pibe Kihón taig, truike tru Cus pirø muba kuimburab pureb ibig køn.

14 Inchen tru pøn kønrrabyu pibe Tigris taig køn, Asiria pirau pørr neeshib-gatøwansrø pureb ibig. Inchen tru pib kønrrabyu pibe Eufrates køn.

15 Incha Jehová Tiusbe møwan pera arrua, tru Edén ellmarin tulyu kørømarøbig køn, pirøwan kwallib ashib tsunrrai.

16 Incha Jehová Tiusbe tru møwane trencha karua pasrøbig køn:

—Tru tulyu chi tusryu mamiimerandøgucha ka manrrig cha.

17 Inchendø tru tabigwanba, kaigwanba nebua asamburab asam tus-ryu mamigwane manrrab kømø cha, kaguende tru tusryuigwan ñi mab kwalømbe isa kømø, ñibe kwanrrabguen— cha.

18 Incha trugurrimbe Jehová Tiusbe trenchibig køn:

—Møg nøtø unamiibe chi tab kømøn cha, nun purugunrrabig nø maig palain køben, treegwan martrab— cha.

19 Incha Jehová Tiusbe maya ushameranba, illimeranba pirøwandøwei mara pønsra, møwei merrab pønsrøbig køn, chi munchi pønsramigwan nø asha pønsrønrrai. Inchen møg tru øsiguelan treeg munchi pønsra wamiiløbe tru munchin tøgar kørømmisrig køn.

20 Inchen møøbe maya ushamera namiguelan, pala amøñibelø maya il-limeran, katø tru kusreeg ushameran mayamba munchi pønsrøbig køn. Inchen køben møwan nø maig palain køben, treegwan purugunrrabiibe mugaabig køn.

21 Inchen Jehová Tiusbe møwan purø mur kingarua, nø kib tsumnebe kan tømblu tsutsigwan wesrawa, tru tsutsig wesrub kurigwane katøle treetøweih kasrøbig køn.

22 Inchen Jehová Tiusbe tru tømblu tsutsig wesraigwane ishug misag mara, møweimay pera arrubig køn.

23 Inchen møøbe trenchibig køn:

—libe sí, nain tsutsigugurrin tsutsig køb, katø nai asryugurri asr køb indan cha. “Ishug misag” cha wamig kønrrun chibig køn, kaguende nõbe møweinukkurri wesraig køn— cha.

²⁴Treekkurri møøbe mōskawan, usran tarømisra, sraimba kandø misra, kan asrø kønrrun.

²⁵Møøba, ishuubabe pailøba køsaateelø købig køn. Inchendø chi kørig kui inchimeeløgue.

3

Adanba Evaba Mørmuig

¹Inchen tru ulbe maya ushamera lataguen kømø, chigøben maramigwane purø may isua marøbig købig køn, Jehová Tius nõ mariiløyu. Incha tru ulbe ishuwane trenchibig køn:

—¿Kabe Tiusbe ñimungan tru ellmarin tulyuigwan ni mø tusryuigwanguen kerriguwan mamønrrain taig kuitarru?— cha.

²Inchen ishuube ulwane trenchibig køn:

—“Tulyu pønrrab tusryu mamiimerane ka manrrigay” taig køn cha.

³Inchendø tru ellmarin tul tøbøtag pasrab tusryu mamigwane Tiusbe øyeeeg taig køn cha: “Mamønrrigay cha, ni katøramøwei inchigay taig køn cha, kwamig kømønrrai”.—

⁴Inchene ulbe ishuwane trenchibig køn: —Ñimbe kwamønrrabguen cha.

⁵Tiusbe asha køn cha, ñim tru tusryuigwan mab kwalømbe, ¡katø! chinetø nebua asamigwan ñimui isubig kuren, ñimbe Tius lataitøwein kønrrabguen cha, kaigwanba, tagigwanba nebua ashibelø.—

⁶Inchen ishuube tru tusryuigwan larrø chull mamdiig kui ashib, trurrigu tru tusryu mamiibe larrø mayzhig kønrraptiig kui ashib, katø chiwandøgucha larrø kusrebig kuinrrabna isumig purø chull kønrraptø tusr kui ashib inchibig køn. Incha tru tusryu mamigwan nemøøb, maptinchibig køn. Inchabe kewangucha srørrren, truikkucha mabig køn.

⁷Inchen mõimbe tru pailanba, ¡katø! chinetø nebua asamigwan nõmui isubiibe kurøptinchen, nõmbe køsaateelø købrain kui wetøgorra, nõmbe higuera ishiimeran tsusha, søtøgasrailø marøbelø køn.

⁸Inchen yandø mawab misrøb pishi isig ichibig webarruben, tru ellmarin tulyu Jehová Tiusbe llirab arri mōra, møøbe nui sraimba tusr utumerawan-srø trubabelø køn Tius nõ pasrainukkurri.

⁹Treendingucha Jehová Tiusbe mõwan wamabe, payibig køn:

—¿Ñibe chu pasrøgu?— cha

¹⁰Inchene møøbe trenchibig køn:

—Tru ellmarin tulyu ñi llirab arri nabe møøptindinaben, nane truba kørig køtan cha, kaguende nabe køsaatiig købrain købtinchen, treekkurri nabe trubar— cha.

¹¹Inchene Tiusbe trencha payibig køn:

—¿Ñune køsaatiig køn chabe, mu eshkata? cha. ¿Na mamønrrain taig tusryu mamigwan ñibe mappeendi?— cha.

¹²Inchen møøbe trenchibig køn:

—Tru ñi nan lincha pera uñchai trani ishug tru tusryu mamigwan nan srørrren, nabe mar— cha.

¹³Inchene Jehová Tiusbe ishuwane trenchibig køn:

—¿Øyeebe chi margu?— cha

Inchene Ishuube

—Tru ul nan purø may wamincha isøben, nabe mar cha— trenchibig køn.

14 Inchen Jehová Tiusbe tru ulwane trenchibig køn:

—Ñi øyeeg marikkurrindø maya ushamerai utu ñibe larrø trømbøig nebuig kønrrig cha, kusreeg ushamerai utu lata, namig ushamerai utu lata. Patsøtøgatø sraløb uña, ñi chugatig øsig tsumingatiibe pirøyu usrøwan manrrig cha.

15 Incha ishuuba ñibabe larrø ashig kømuindiyabelø kønrrai maramønrrun cha, ñuinukkurri amrrubeløba, katø ishuweinukkurri amrrubeløba. Incha tru ishug misagweinukkurri srøig srøig kurrab arrubiguig ñune turwan pusøbunøben, ñibe nune talunyu tsatchun— cha.

16 Incha ishuwane trenchibig køn:

—Ñune unø tøgamisrøbyu pusrkwabigwan masken trømbøig pusrkwarrai nemaramønrrun cha. Purø trømbøig pusrkwai incha, ñui ureemeran tøgamisrtrabguen cha. Inchen ñi ureg tøgagukkøb chull isuibe ñui kewein køben, ñui keebe ñune nø karub nø ashchabig køn— cha.

17 Incha møwane trenchibig køn:

—Ñi ñui srawei wamwan manchitanmaptø mørøb pasrøwa, na mamønrrig tain tusryu mamigwan ñibe main køn cha. Ñigurrindø pirøbe larrø trømbøig nebuig pasrønrrun cha. Ñi chugatig øsig tsumnegatiibe ñibe ¡katø! isua møra marøb megawabe, truyugurri manrrabguen cha.

18 Inchen pirøbe tsøshambah, kaldusrmerabatø misren, mappe, kau umbu tusrmerandø manrrigay cha.

19 Ñibe pøsrø, pøsrø mara mamig tøgagønrrig cha, ñi katøle pirøtøwei misramnegatikke, kaguendø ñibe pirøtøga mara pasrig køn cha. Ñibe pirø usrø kuig køppe, katø ñibe usrøtøwei misrtrabig køn— cha.

20 Inchen Adánbe nui srawane Eva munchi pasrøbig køn, kaguende Evabe maya misagwei usrin kønrrabig kuimba.

21 Jehová Tiusbe møweimba, nui sraweimba kemelø ushamerai kaluseran mara, kennøbig køn.

22 Incha Jehová Tiusbe trenchibig køn: “Møøbe mømibe kan møig køben nam lataitøwei misra pasramisrin køn cha, tabigwanba, kaigwanba nebua ashibig. Pøs, nui tasigwan larrøbitchain kømøn, chibig køn, tru øsig køm tusryu mamigwangucha nemøra, truigwan ma, managatig øsig kønrrab.”

23 Incha Jehovábe tru Edén tulyugurri nømun webusrøbig køn. Incha pirøwan kwallchain pasrig køn, tru nun mara pasrin pirøwan.

24 Incha møwan wambig wegucha, Edén tru tulyu pørr kal labgatømay querubinmera pønsra, katø kan espada naarabig amburab, iburab llirabig pasrøbig køn, managatig tru øsig køm tusryumay ambam maywan pumønrrai martrab.

4

Cainba Abelba

1 Adanbe nui srai Evaba unø tøgagønrrab pailø waramisrøbelø køn. Incha Evabe kwanrriig kørrømisra, Cain kal labene, trenchibig køn: “Na unø tøgagømig Jehová treeg kønrrain køben, kan møg-unø tøgaguinatan” cha.

2 Incha katø wendøbe Cainwei nuneg Abelwan tøgamisrig køn. Abelbe ubisha ashibig køben, Cainbe pirøwan kwallibig kuig køn.

3 Inchen kan maya yana køsrøn puraiiben, Cainbe Jehováwan ketamig nui kwaliiløyugurri srua arrubig køn.

4 Inchen Abelgucha nui ubishamera ke srøsrø lluilan srua arrubig køn, sebowanba. Inchen Jehovahé Abelwanba tru nui kettrab srua arrigwanba truba tab kui ashibig køn.

5 Trune Cainwane tab kui ashmuig køn, tru nø keta tranigwan chigucha. Inchen Cainbe truba trømbøig namuben, nui maløbe ke minchiptinchibig køn.

6 Trenchene, Cainwane Jehovahé trenchibig køn:

—¿Chindimbarre namøgu? cha. ¿Chindimbarre ñui maløbe ke peg misrøptinnda? cha.

7 Ñi sølwan isua marig kuimbe, ñibe utsøbasrmø kurraasha pasrabsruinrrun cha. Inchendø ñi sølwan isua marmuikkurrimbeh, kaigwan matrai inchabiibe ñun megambunrrab ¡katø! muniitø pasran cha. Inchen køben ñibe tru kaig marmumigwane ñi kananrrabguen— cha.

8 Cainbe nui nuneg Abelwane trenchibig køn:

—Chugøben lliranrrab amun— cha. Indig yandø tru llirab amønaistrømbe Cainbe nui nuneg Abelwan namappe, kweechibig køn.

9 Inchene Jehovahé Cainwane trencha payibig køn:

—¿Ñui nuneg Abelbe chu unah?— cha. Inchen nøbe trencha løtabig køn:

—Chindindøbeh cha. ¿Nagan nai nunewan ke tru ashib wendautø pasrabig kuitarru?— cha.

10 Inchene Jehovahé trenchibig køn:

—¿Chi margu? cha. Ñui nunewei animbe piraugurri trashib nan wamøtan cha.

11 Ñibe larrø trømbøig nebuinanrrabig kørrømisrøb, tru ñui nuneg Abelwan ñi kweechen ani lusigwan muchib piraugurri ñune webya inrrai wegutsig kørrømisrøb inchabguen cha.

12 Pirøwan kwallib megaingucha, yandø mamig misrmønrrabig køn cha. Inchen ñibe piraube punø panrrø, punø panrrø ka lliraitø, lliraitø chuguen tsub tsumibe chigaig kønrrabguen— cha.

13 Inchene Cainbe Jehovaháwan trenchibig køn:

—Nan øyeeg møra pasrønrrai mariibe purø nuig køtan cha, pasramguen-gaikke.

14 Møi na tsuinukkurri yandø nan weguchen; ñui merrabgurrimbe møimbe trubatø unamønrrun cha, pirø muba kuimburab lliraitø, lliraitø chuguen tsub tsumig chigaikke. Inchen mugøben nan ashibiibe nane kwetchautan— cha.

15 Inchene Jehovahé trenchibig køn:

—Møikkøben Cainwan kweechibiibe siete pijisken purab trømbøig nebuin pasrønrrun— cha. Incha Jehovahé Cainwane kan siñal asamdiig tøgag kønrrai marøbig køn, mugøben ashagucha, nune kweechimønrrai.

16 Incha Cainbe Jehovahé merrabgurri yandø tarømisra ya, Nod tain pirau Edén pørr kalabgatø maysrø tsubig køn.

Cainweinukkurri Amrrub Misaamera

17 Cainbe nui sraimba unø tøgagønrrab pailøba waramisrøbelø køn. Inchen sraimbe kwanrriig kørrømisra, unø tøgamisrig køn, tru Enocwan. Incha Cainbe kan ciuda mara pasrabe, truigwane tru nui nusrkai Enocwei munchin pasrøbig køn.

18 Incha Enoche kan nusrkai Irad taig tøgaguig køn. Inchen tru Iradbe Mehujaelwei møskain køben, Mehujaelbe Metusaelwei møskain køben, Metusaelbe Lamecwei møskain kuig køn.

19 Incha Lameche nuyasig pagatø ishumburmera tøgaguig køn. Kan ishuwei munchibe Ada købene, katøgan ishuwei munchibe Zila købig køn.

20 Adabe kan unø tøgamisrig køn, tru Jabalwan. Tru merrabsrø kølli misag Jabalweinukkurri pølbasa amrrub mendig kuig køn, carpa lasrua pønsrailøyu warab, katø nømbe ushamera karrøgøb inchibelø.

21 Jabalbe kan nuneg Jubal taig tøgagig køben, tru merrabsrø kølli misag Jubalweinukkurri pølbasa amrrub mendig kuig køn, mayeelø arpa kønabeløba, lus urrabeløba.

22 Inchen Zilagucha Tubal-Cainwan tøgaguig køn. Truibe chigurrimbunø bronze tsandzøntøgaba, hierro tsandzøntøgaba larrø tabelø marøbig kuig køn. Katø Tubal-Cainwei nuchaabe Naama købig køn.

23 Kan piji Lameche nui sralan trenchibig køn:

—Adaba, Zilaba, nai wamwan mørtray cha. Lamecwei sralø, nai wamwan tab mørtray cha. Nan kørriinchen, nabe kan møwan kweechib, nan mur kebachen, nabe kan matsinan kweechar cha.

24 Cainwanma siete pijisken purab trømbøig nebunrrai pasrig kuibe, Lameche sietebatø setenta pijisken treetø treetø purab trømbøig nebuin pasrønrrun” cha.

25 Adánbe nui sraimba unø tøgagønrab pailøba waramisrøbelø køn.

Incha Evabe kan nusrkai tøgagua, trunune Set munchi pasrig køn. “Tiusbe nane katøgan nusrkai trandan cha, Cain Abelwan kweetsig købene truburø tøgagønrrai.”

26 Incha Setgucha kan nusrkai tøgagua, truigwane Enós munchi pasrig køn.

Indig truyugurrimbunø yandø møgueløbe Jehováwei munchiwan wamab miabelø køn.

5

Adanweinukkurri Amrrub Uremera

1 Iig køn tru Adánweinukkurri amrrub misaameran munchin merrarrailø, Tius møwan nø mara pasrøb kwalømbe, møwane Tius lataitøweine kønrrai marig køn.

2 Incha møøba ishuuba kønrrai Tiusbe treeg mara pønsra, katø mayanguen tabig nebuilø kønrrai mara, tru nø mara pønsrøb kwaløm “Adan” cha wamig køn.

3 Adanbe pilamera ciento treinta tøgagua kan nusrkai tøgaguig køn chiyutøgucha nø lataitøwei, treeg unø. Incha truigwane Set munchi pasrig køn.

4 Adanbe Setwan tøgaguinukkurrimbunø pilamera ochocientos tøgagig kua, nusrkalø køben, nimbasrmera køben tøgagig køn.

5 Inchawei Adanbe pilamera novecientos treinta tøgagua, yandø kwaig køn.

6 Setbe pilamera ciento cinco tøgagua, nusrkai Enóswan tøgagig køn.

7 Setbe Enóswan tøgaguinukkurrimbunø pilamera ochocientos siete tøgagig kua, nusrkalø køben, nimbasrmera køben tøgagig køn.

8 Inchawei Set kerrigu øsig tsuin kwalømmerabe pilamera novecientos doce kuig køn. Inchen yandø kwaig køn.

9 Enósbe pilamera noventa tøgagig kua, kan nusrkai tøgaguig køn, Cainán taig.

10 Enósbe Cainánwan tøgaguikkurrimbunø pilamera ochocientos quince tøgagig kua, nusrkalø køben, nimbasrmera køben tøgagig køn.

11 Inchawei kerrigu Enós øsig tsuin kwalømmmerabe pilamera novecientos cinco køben, yandø kwaig køn.

12 Cainánbe pilamera setenta tøgagig kua, nusrkai Mahalaleelwan tøgaguig køn.

13 Cainánbe Mahalaleelwan tøgaguikkurrimbunø pilamera ochocientos cuarenta tøgagig tsua, nusrkalø køben, nimbasrmera køben tøgaguig køn.

14 Inchawei Cainán kerrigu øsig tsuin kwalømmmerabe pilamera novecientos diez køben, yandø kwaig køn.

15 Mahalaleelbe pilamera setenta y cinco tøgagig kua, nusrkai Jaredwan tøgaguig køn.

16 Incha Mahalaleelbe Jaredwan tøgaguikkurrimbunø pilamera ochocientos treinta tøgagig kua, nusrkalø køben, nimbasrmera køben tøgaguig køn.

17 Inchawei Mahalaleelbe kerrigu øsig tsuin kwalømmmerabe pilamera ochocientos noventa y cinco køben, yandø kwaig køn.

18 Jaredbe pilamera ciento sesenta y dos tøgagig kua, nusrkai Enócwan tøgaguig køn.

19 Jared Enocwan tøgaguinukkurrimbunø pilamera ochocientos tøgagig tsua, nusrkalø køben, nimbasrmera køben tøgaguig køn.

20 Inchawei Jared kerrigu øsig tsuin kwalømmmerabe pilamera novecientos sesenta y dos køben, yandø kwaig køn.

21 Enoche pilamera sesenta y cinco tøgagig kua, nusrkai Matusalénwan tøgaguig køn.

22 Matusalénwan tøgaguinukkurrimbunø Enoche Tiusba maig unamig køben, treeg uñibig kuig køn, pilamera trescientos tøgagig. Incha nusrkalø køben, nimbasrmera køben tøgaguig køn.

23 Inchawei Enoc kerrigu øsig tsuin kwalømmmerabe pilamera trescientos sesenta y cinco tøgaguig køn.

24 Enoche Tiusba maig unamigwan unig køn. Incha chindinguen asiimíg pinaptindig kuig køn, kaguende Tius nune øsiibatø pera iben.

25 Matusalénbe pilamera ciento ochenta y siete øsig tsua, nusrkai Lamecwan tøgaguig køn.

26 Incha Matusalénbe nusrkai Lamecwan tøgaguinukkurrimbunø pilamera setecientos ochenta y dos tøgagig tsua, nusrkalø køben, nimbasrmera køben tøgaguig køn.

27 Inchawei Matusalén kerrigu øsig tsuin kwalømmmerabe pilamera novecientos sesenta y nueve køben, yandø kwaig køn.

28 Lamecbe pilamera ciento ochenta y dos øsig tsua, kan nusrkai tøgaguig køn.

29 Incha truigwane Noé cha wamig køn, kaguende nøbe trenchibig køn: "Jehová pirøwan larrø trømbøig nebunrrai mara pasrim pirau, nam chi mari-ilyu purø trømbøig murig pui melaigugurri namun i unøbe chairannrrun" chib.

30 Incha Lamecbe nusrkai Noéwan tøgaguinukkurrimbunø pilamera quinientos noventa y cinco tøgagig tsua, nusrkalø køben, nimbasrmera køben tøgaguig køn.

31 Inchawei Lamec kerrigu øsig tsuin kwalømmmerabe pilamera setecientos setenta y siete køben, yandø kwaig køn.

32 Noébe pilamera quinientos tøgagig kua, pøngatø nusrkalø tøgaguig køn: Semwanba, Camwanba, Jafetwanba.

6

Misaamera Larrø Kaig Marøb

1 Inchen yandø mōguelø pirau truøø larrøbichib menda, nōmbe nimbaserma tōgagøb mendig kōn.

2 Inchen Tiuswei nusrkaløbe, tru Tiuswan ashmø misaamerai nimbasermerabe truba truba tabzheelø kua asha, tru utu mas tab ishumburmeran lawa, nōmuyasig sralø marøbelø kōn.

3 Inchene Jehovåbe trenchibig kōn: “Nai Espiritube misag øsig kōnrrai nuinuube managatikucha pasrōnraamōn cha, kaguende mōøbe patsōnrrabig ka treetø kōn cha. Inchawei nōbe øsig tsumibe pilamera ciento veintebe tōgagōnrrun” cha.

4 Tru kwalōmmerawane purø nōrrø mōguelø warabig kōn, larrø nōrreelø. Inchen katø tru Tiuswei nusrkaløbe tru mōguelai nimbasermeraba kasharawa, ureg tōgaguig kōn. Inchen tru i mōgueløbe chish mōguelø chiyugucha kōrmeelø kōbig kōn, truiløbe merrabsrōngurri mumera kuilan nebua asi misaamera.

5 Inchen Jehovåbe ashibig kōn pirau misaamera larrø trōmbøig marøb amrruibe chi lamøtiig kōmø, purø nuig kui, nōmui manrraube chu uragucha kerrigu chi isuiløbe kaigwandø, kaigwandø isubelø kuikkurri.

6 Inchen Jehovåbe yeekkucha kuitamab isubig kōn, pirau misagwan tsunrrai marigwan. Nui manrraube purø kōrrø isub pusrkwabig kōn.

7 Incha Jehovåbe trenchibig kōn: “Misagwan mara pōnsrailan chigucha kaanrrai patsøgōnrrab cha, misagwan lata, ushameran lata, srala amōñibelan lata, pala amōñib illimeran lata. Karrenguitamab isur cha, øsig kōnrrai na mariilan.”

8 Inchen køben Noébe Jehovåwein kabyu nōbe tabig kui asig kuig kōn.

Noé Arcan Marøb

9 Iig kōn, Noéwan maig pureb arrigwan waminchibig:

Noébe sølgandø maig maramigwan marøb, nōbaguetøtø nōrrørawarmerai utu nōbe sølgandø maig maramigwan marøb, katø Noébe Tiusba maig unamig køben treeg uñibig kōbig kōn.

10 Noébe pōngatø nusrkalø tōgaguig kōn: Semwanba, Camwanba, Jafetwanba.

11 Inchen piraube larrø trōmbøig minchib, katø melambuyab kalø marig truitø netsain pasrabig kōn Tiuswei merrab.

12 Tiusbe pirøwan ashene, truyube larrø trōmbøig mincha pasrabig kōn, kaguende maya misaamerabe larrø trōmbøig mincha pasrøben tru nōmui amōnainug.

13 Inchen Tiusbe Noéwane trenchibig kōn:

—Maya misagwan øyandø kōnrrai nabe treeg isur cha. Kaguende nōmgurrindø pirøbe larrø trōmbøitø netsaim pasran cha. Incha nōmune pirøwanbañau pinishinrrab cha.

14 Incha ñibe gofer tsiitøga kan arca mar chibig kōn. Incha truyube cuartomera mara, umbuwan lata, wambigwan lata, pi larraimōnrrai brea srølrrig cha.

15 Incha marøppe, øyeege martrig chibig kōn: Yammaybe ciento cuarenta metrosig, lendømaybe veintitrés metros tōgaig køben, palamaybe catorce metros tōgaikke.

16 Incha arcane pøn itøniisraig mara, pala patsabsrøngurri pinag cincuenta centimetrosyuh pendanarrab pasrtrig cha. Incha mumay malømay køben kan yaskab pasrtrig cha.

17 Kaguende nabe pirau pi pulab arrubig ørtrab kur cha, tru srømbala umbuwan chigurrimbunø øsig warabelan pinishinrrai. Inchawei pirau chigurrimbunø købiibe chishtø pinønrrun cha.

18 Inchendø nabe ñune øyamay pasramønrrun cha, ñibe ñui sraimba, ñui nørskaløba ñui nusrkalai sraløba tru arcayu kebamrrigay cha.

19 Incha chigurrimbunø øsig købigwan trumørig truilan parchig, parchig kebambingarunrrig cha, chi ushamerandøgucha, kan ishuuba, kan møøba, ñiba øsig kønrrai.

20 Chi illimerandøgucha, chi ushamerandøgucha, sraløb amøñibelangucha trumørig parbatø øsig kønrrab ñiba kebamrrun cha.

21 Incha nøm chi mabelø køben, chi mamikkurrimbunø ñi tulisha, esegau cha, truilaimba, ñuimba mab kømig kønrrai.

22 Inchen Noébe Tius maig karuigwan kerriguh treeg marøbig køn.

7

Pirau Pi Pulab Netsab Arrubig

1 Incha Jehovábe Noéwan trenchibig køn: —Ñiba ñui yaueløba arcayu kebinrø cha, kaguendø nai merrab ñundøwei sølgandø tabigwan marøbig kui ashar cha, møi misaamerai utu.

2 Inchen chi ushameratøgucha tabig chishelane trattrø y pagatøbatø møg ushameraba, trattrø y pagatøbatø ishug ushameraba kertrig cha møøba ishuuba, møøba ishuuba. Inchen chi ushameratøgucha chishig kømeelane, kan møøba, kan ishuuba, pagatø, pagatø kertrig cha.

3 Katø treetøwei pala illimerangucha, trattrø y pagatøbatø kertrig cha, møøba, ishuuba, pirau tru illimeran piniimíg tøgagønrrab.

4 Kaguendø trattrø y pa kwalømyube yu pirau kwalømmerra cuarenta, yemmera cuarenta purayamne sre pungarumønrrun cha. Na mariilø chigurrimbunø øsig købigwane kerrigu chish paluuncha pinisamønrrun cha.

5 Inchen Noébe Jehová maig karuigwan kerriguh treeg marøbig køn.

6 Tru uras Noébe pilamera seiscientos tøgag købig køn, tru pi pulab arrubig pirøwan chishtø kasrøb arrub uras.

7 Inchen Noébe nui srain køben, nusrkalø køben, yernamera køben arcayu kebibig køn, tru pi pulab arrubigugurri kwamø, øsig webinrrab.

8 Inchen chi ushameratøgucha tabig chishelø lata, chishig kømeelø lata, pala amøñib illimera lata, katø pirau srala amøñibelø lata

9 Noéba arcayu kebambubelø køn, parbatø, parbatø, møøba ishuuba, møøba ishuuba, Noéwan Tius mandø karuig, treekke.

10 Indig tru trattrø y pa kwalømyu tru pi pulab arrubiibe pirau chishtø kasrøb netsab arrub mendabig køn.

11 Inchen Noéwei øsig tsuin pilamera seiscientos køben, tru pila kebyaig pa pølyu diecisiete kwalømh, tru marmera mas purø nørreelø umbusrøngurri chab wesurrøben, tru srømbalasrø pimeran katab pønrrabelan truilangucha kuren,

12 piraube yemmera cuarenta, kwalømmerra cuarenta purayamne sre arru-
big køn.

13 Inchen tru kwalømh arcayu kebambig køn Noé køben, nui nusrkalø Sem køben, Cam køben, Jafet køben, Noéwei srain køben, nusrkalai pøngatø sralø købengue.

14 Incha nømba kebambubelø køn, tru kau umbu namig ushamera trumørig, kusreeg ushamera trumørig, pirau srala ambub ushamera trumørig, katø illimera trumørikke, katø kwaldzariibarmera købendø pala ammeelø købengue.

15 Øyeeg kebambig køn arcayu Noéba, chigurrimbunø øsig købeløbe parbatø, parbatøgue.

16 Inchen tru kebambubeløbe trumørig ishuuba, møøba kebambig køn, Tius maig karuig, treekke. Inchen Jehovahé yaskabwan yandø kasrøbig køn.

17 Inchen pirau tru pi pulab arrubiibe kwalømmerra cuarenta nemisramnegatig pulab iben; pimera pulab menda, tru pimerabe arcane piraugurri pala kusruig køn.

18 Inchen pimerabe pirau nurabig nurab arruben, arcabe pi palawan uñibig køn.

19 Inchen pimerabe piraube truba truba pulab nebib iben, maya srømbalamerai umbu tunmera purø paleelø pønrrabeløguen chishtøh pinøgasraig kørørmisrøbelø køn.

20 Inchen tru purø pala tunmerawan pimera chab pinøgasrainukkurri katøgucha pimerabe palabunø siete metros purab neguchib pulabig køn.

21 Inchen chigurrimbunø pirau øsig warabeløbe kerriguh chab kwabig køn, illimera lata, ushamera kusreeg ushamera lata, namig ushamera patsøtøga srala ambubelø lata, trugurri maya misaamera lata.

22 Inchen chitøgucha kimrrabmay israbig øsiguelø pirau warabeløbe mayambah chishtø kwaig køn.

23 Øyamay chimeratøgucha pirau øsiguig warabeløbe chab pinisailø kuig køn. Misag lata, ushamera lata, patsøtøga srala ambubelø lata, katø pala amøñib illimera lata pinisaig kørørmisrig køn. Øsig kørørmisrøppe, Noébah tru arcayu tru nøba kebambubeløtøwei øsig kørørmisrig køn.

24 Inchen pimerabe tru pirø palawan kwalømmerra ciento cincuenta nemisramnegatig pi netsaig kørørmisrig køn.

8

1 Tiusbe Noéwanba, truyu kusreeg ushameranba, namig ushameranba kerriguba tru arcayu Noéba purrabelan isubig køn. Incha Tiusbe pirau kan isig ichibig arringaruben, pimerabe kørreb mendabig køn.

2 Pimera pirø umbusrøngurri wesurrabeløbe kasrøben, tru srømbalasarø pimeran katab pønrrabelan kuriiløgucha kasrøben, srømbalasarøngurri sre arrubiibe yandø mas pumøben inchibig køn.

3 Inchen pimerabe pirau lamøh, lamø kørreb ib mendøben, kwalømmerra ciento cincuenta puraiben pimerabe chab lamørabig køn.

4 Inchen tratrø y pa pøl misren, diecisiete kwalømh arcabe Ararat tunmerasrø pasramisrøbig køn.

5 Inchen pimerabe pa tratrø pølgatig kørreibig kørreb arruben, tru pa tratrø pøl ke srøsrø kwalømyuh tru nørø tunmerain pala yuumerabe kenamisrøbig køn.

6 Indig tryugurrimbunø kwalømmerra cuarenta nemisren, Noébe tru nø mari arcayu pendanawan kura,

⁷ kan yalø illiwan øren, truiþe yaitø, arriitø inçhib uñibig køn pimera pirau kølamnegatig.

⁸ Incha katø kan palomangucha inrrai ørøbig køn pirau pimera køliitashchab ashchab.

⁹ Inchen palomabe arcayumay katø arrubig køn, kaguende ni chugucha punamig çhi kaaben. Pimerabe katøgucha pirø palawan kasraig srø køben. Inchen Noébe nui kwalwan yuula, paloman kemøra, katø umbu kesrubig køn.

¹⁰ Incha kan trune muniirawa, paloman arcayugurri katø inrrai ørøbig køn.

¹¹ Indig tru palomabe maaben misrøþ køben arruppe, kan olivo ishiizhig kimsigu mutaig arruptinchen, Noébe pimera pirau yandø chab kølin kui wetøþeñibig køn.

¹² Incha trugurrimbunø katøgan trune muniirawa, katø paloman øriibe, yandø katøle truiþe nuimay arrumøtø, pinab pinabig køn.

¹³ Noé øsig tsuin pilamerabe seiscientosba kan pilaba køben, tru srøsrø pølyu ke pølbærøþ kwalømyuh pimerabe pirau chishtø chab kølabig køn. Inchen Noébe tru arcayu pala kasraigwan kusrua ashene, møimbe pirøþe yandø pur køptinchibig køn.

¹⁴ Inchen katø tru wendø pølyu tru veintisiete kwalømyube pirøþe yandø kerrigu pur købig køn.

¹⁵ Inchen Tiusbe Noéwane trenchibig køn:

¹⁶ —Arcayugurri ñiba, ñui sraimba, ñui nusrkaløba ñui nusrkalai sraløba webambay cha.

¹⁷ Incha ushamera tru ñiba purrabelangucha mayamba chishtøh wer chibig køn; maya illimeran køben, ushameran køben, katø pirau srala amøñibelan køben, pirau ørøþa truørø amrrain cha; pirau yellmera purø nørrø misrøþ purø nu larrøþichib amrrain— cha.

¹⁸ Inchen Noébe nui nusrkaløba, nui sraimba, nusrkalai sraløba webarru-big køn.

¹⁹ Inchen kerrigu ushamera køben, srala amøñib ushamera køben, illimera køben, pirau chimera køben øsig købeløþe trumørig, trumørig arcayugurri webambubelø køn.

²⁰ Incha trugurrimbe Noébe Jehováweyasig kan altar mara, tabig chish ushameran møigwanguen palab kømø, kerriguba, katø chish illimeran møigwanguen palab kømø, kerriguba, altarbala chishtø parrøþ Jehováwan keta tranøþig køn.

²¹ Inchen larrø mayzhig irrabig nuinug puben, Jehovábe trenchibig køn: “Misakkurrindø pirøwane managuen katøleþe larrø trømbøig nebuim pasrønrrai marmumønrrun cha, kaguende møwei manrrøþe shushkurrimbunø kaigwandø, kaigwandø martrab isubelø køn cha. Katø chigurrimbunø øsig købigwane katøleþe kerriguba pinishimumønrrun cha, møi lataibe.

²² Pirøþe ka pasraingatiibe ellmariilø køþ, ellmariilan tulisamelø køþ, chu urastøgucha pächig købig køþ, pishin købig køþ inçhun cha. Chu urastøgucha sre pølmera køþ, kwarø pølmera køþ, katø yemmera køþ, kwalømmera køþ inçhun” cha, trenchibig køn.

9

Tiusbe Noéba Øyamay Kønrrai Martrab Cha Kørrømisrig

¹ Tiusbe Noéwanba nui nusrkalanba mayanguen tabig nebuilø kønrrai trana, nømune trenchibig køn:

—Ureemera nørro tøgagøb pirøwan netsøganrigay cha.

² Pirau chi ushameratøgucha ñimune larrø kørig kuinchib kwartrun cha. Pala illimeran lata, pirau chigurrimbunø øsig warabelan lata, maryu piyaumeran lata, ñim ashib tøgagønrri nabe ñimui tasku pønsrar cha.

³ Chigurrimbunø kønabig øsiguelø kõiiba, katø mamig tusrcheeløbabe ñim mab kørig kønrrun cha. Iigwan kerrigu na ñimun tranar chibig køn.

⁴ Inchendø yau animbaigwan aniwana lusøskaimiigwane mamønrrigay cha, kaguende øsig kømibe aniyuweim pasran cha.

⁵ Inchawei nabe tru ñimui øsig kui aniwane nabe ulø payamønrrun chibig køn. Ushamera pinisaig kui lata, kabe møguelai tasku pinisaig kui lata truigwane ulø payamønrrun cha. Nui mendaigwei øsig kuigwan pinishibigwane mu mowandøgucha ulø payamønrrun chibig køn.

⁶ Inchawei møikkøben misag aniwana lushibigwane nui aniwangucha katøgan møg lusig kønrrain køn cha, kaguende møøbe Tius maig køppe, treetøwein kønrrai marig kuig kua.

⁷ Trune ñimbe ureg nørro tøgagøb, larrø nørro larrøbitsay chibig køn, pirau purø nørro misag karrab, pirau netsøganøb.—

⁸ Incha Tiusbe Noéwanba nui nusrkalanba katø treekkucha taig køn:

⁹ —Nabe ñimba, katø ñuikkurri amrrub misaameraba øyamay kønrrai martrab cha kørøramønrrun cha,

¹⁰ katø tru chigurrimbunø øsig købelø ñimba pønrrabelø, kerrigu tru arcayugurri werrubelø: tru illimeraba, kusreeg ushameraba, namig ushameraba, pirau maya ushameraba.

¹¹ Nabe ñimba øyamay kønrrai martrab cha pasramønrrun cha, nabe kerrigu øsig warabelan pi pulab arrubiitøgabe katølebe chishtø pinishinrrab kømur cha. Ni katø pirøwan pinishinrrab pi pulab attrabig katølebe chigaanrrabig køn— cha.

¹² Incha katø trenchibig køn:

—Tru ñimba, katø trugurri tru chigurrimbunø chi øsig købeløba tru managati na øyamay kønrrai martrab cha pasrigwan isunanøb eshka pasrønrrabiibe iig køn cha:

¹³ Nai køshømbøtøn nabe wañiyu pasrar cha, iibe pirøba na øyamay kønrrai martrab cha pasrigwan treeg kuitamab ashib kømig kønrrai pasrønrrabig.

¹⁴ Inchawei wañiwan na pirau pibøndøzhiibaig arringarubene, tru køshømbøtøbe wañiyu kenamisrtrun cha.

¹⁵ Inchen nabe ñimba katø chigurrimbunø øsig købeløba tru na øyamay kønrrai martrab cha pasrigwan isumønrrun cha. Chigøben øsig købelan pinishinrrabig pi pulab arrubiibe katølebe kaanrrun cha.

¹⁶ Inchawei køshømbøtø wañiyu kenamisrimørig maya misaameraba, katø i pirau kerrigu øsig købeløba tru na managati na øyamay kønrrai martrab cha pasrigwan isumønrrun— chibig køn.

¹⁷ Incha Noéwan trendaig køn:

—Maya misaameraba, pirau chigøben øsig købeløba tru na øyamay kønrrai martrab cha pasrigwan treeg kuitamab asamiibe, iig køn— cha.

Noéwei Nusrkalo

¹⁸ Noéwei nusrkalo arcayugurri webambubeløbe Semba, Camba, Jafetba køn. Inchen Cambe Canaánwei møkain kuig køn.

¹⁹ I tru pøngatøbe Noéwei nusrkalo kuig køn. I tru pønelainukkurri amrrub misaamerayugurri pirau muba kuimburab misag netsaig køn.

²⁰ Incha Noébe pirau kwallib menda kan uvas ellguain tra marøbig køn.

²¹ Indiibe kan piji Noébe vino mucha mutsiirawa, tru nui carpa yau kebya, peña tsumisrøppe, køsaatiig tsuben,

²² tru Canaánwei møskai Cambe, møskai køsaatiig tsui ashabe, nui pa nunelan wambiisrø eshkanrrab webyain købig køn.

²³ Inchen Semba, Jafetbabe kan itøtsinsramig pamisra, nømui kildunyu pinøgucha, wendømaytø amba, møskai køsaatiig tsuben, trutøga kasra trarrøbelø køn. Incha ashmønrrab wendømaytø amba, treeg køsaatiig tsuben nui asr køsagwan ashmuig køn.

²⁴ Incha Noébe tru mutsiguig kib tsua kiagasra, tru mas unø nusrkai treeg indigwan wammørabe,

²⁵ trenchibig køn:

Canaánbe larrø trømbøig nebuinanrrabig kønrrun cha. “Nunelø ka karuindiig megabig mas chigucha kømfīg købash” cha.

²⁶ Incha katø trenchibig køn: “Jehová, Semwei Tiuswane maya nuguen tab indig kønrrain cha. Inchen Canaánbe Sem manchiben, ka karuindiig megabig kønrrain cha.

²⁷ Inchen Jafetwane purø nuig kønrrai Tius kusrua pasrig kønrrain cha. Incha Jafetbe Semwei carpa yamerayu tsubig kønrrain cha. Inchen Canaánbe Jafet manchiben, ka karuindiig megabig købash” cha.

²⁸ Indig Noébe tru pirau pi pulab arrubig arrinukkurrimbunø pilamera trescientos cincuentagatig tsuig købig køn.

²⁹ Inchen Noé kerrigu øsig tsum pilamerabe novecientos cincuenta kuig køn. Inchen yandø kwaig køn.

10

Noéweinukkurri Amrrub Misaamera

¹ Iiløbe tru Noéwei nusrkalø Semweimba, Camweimba, Jafetweimba truilø nøm tøgagui nusrkalø køn, tru pirau pimera pulabig arrua puraiben tøgaguilø.

² Jafetwei nusrkaløbe iilø køn: Gomer køben, Magog køben, Maday køben, Javan køben, Tubal køben, Mesec køben, Tiras købengue.

³ Inchen tru Gomerwei nusrkaløbe iilø køn: Askenaz køben, Rifat køben, Togarma købengue.

⁴ Inchen Javanwei nusrkaløbe: Elisa køben, Tarsis køben, Kitim køben, Rodanim købengue.

⁵ Inchen truilainukkurri amrrub misaamerabe mar puluwan pirømerawansrø warabelø kuig køn. Truiløbe misag nørrø søtømeramørig, katø mu møskalø køben, yau misaamera trumørig nømuin kui, nømuin kui pirømera waramig tøgartø købig køn, katø nømbe trumørig nømuin trigwan wamchibeløgø.

⁶ Inchen Camwei nusrkaløbe iilø køn: Cus køben, Mizraim køben, Fut køben, Canaán købengue.

⁷ Inchen Cuswei nusrkaløbe: Seba køben, Havila køben, Sabta køben, Raama køben, Sabteca købengue. Inchen tru Raamawei nusrkaløbe: Sebaba, Dedánba kuig køn.

⁸ Inchen Cusbe Nimrodwei møskain kuig køn. Tru Nimrodbe pirau mugucha chinchangig ke nø karub pølbæsrig køn, yu pirau ke srøsrøzhiitø.

⁹ Truibe Jehováwei merrab kaambu ushameran pasraarøb kemøramibe ke piaig lataig købig køn. Inchawei misaabe treeg taig tøgær købig køn:

“Jehováwei merrab kaambu ushameran pasraarøb kemøramigwan larrø may kemørammaybe, Nimrod lataig køn” cha.

¹⁰ Inchen nø karub tøgagui ciudamera mas nørreeløbe iilø køn: Babel køben, Erec køben, Acad køben, Calne købengue, tru Sinar pirau.

¹¹ Incha Sinargurrimbe Nimrodbe Asursrømay webya, truyube Ninive ciudameran mara pønsrøbig køn, tru Rehobot ciudawanba, Cala ciudawanba.

¹² Trugurrimbe tru Niniveba tru Calaba tru i pa ciudamerai tøbøtag pasrabig tru Resen purø nu ciudawan mara pasrig køn.

¹³ Inchen Mizraimweinukkurrimbe ludeos misaamera køben, anameos køben, lehabitamera køben, naftuhitamera køben,

¹⁴ patruseosmera køben, casluitas misaamera køben, caftoritasmera køben købig køn. Tru i caftoritasmerai misaamerayurri tru filisteos misaamera amrruig købig køn.

¹⁵ Inchen Canaánbe tru nui mayur nusrkai Sidonweimba, Hetweimba møskain købig køn.

¹⁶ Inchen tru i Canaánweinukkurri amrrub misaamerabe jebuseosmera køben, amorreosmera køben, gergeseosmera køben,

¹⁷ heveosmera køben, araceosmera køben, sineosmera køben,

¹⁸ arvadeosmera køben, zemareosmera køben, hamateosmera køben købig køn.

¹⁹ Inchen tru Canaánweinukkurri amrrub misaamerabe chu pirausrøn køben tru ørø, tru ørø chab ambubelø køn. Inchawei tru Canaán pirø muba kuimburab luløbiibe Sidongurri Gazasrøngatig larrøbichib luløbig køn, tru Gerarguebsrø. Incha trugurrimbe Lesasrøngatig luløbig køn, tru Sodomaba, Gomorraba, Admaba, Zeboimba truguebsrø.

²⁰ Iilø kuig køn, tru Camweinukkurri amrrub misaamera, truiløbe misag nørrø sètømeramørig, katø mu møskalø køben, yau misaamera trumørig nømuin kui, nømuin kui pirømera waramig tøgartø, katø nømbe trumørig nømuin trigwane waminchibeløgue.

²¹ Inchen tru Sem Jafetwei mayur nuneg truiikkucha nusrkalø tøgaguig køn. Semweinukkurri amrrub misaamera kuig køn tru Heberwei maya nusrkaløbe.

²² Semwei nusrkaløbe iilø køn: Elam køben, Asur køben, Arfaxad køben, Lud køben, Aram købengue.

²³ Inchen Aramwei nusrkaløbe: Uz køben, Hul køben, Geter køben, Mash køben kuig køn.

²⁴ Inchen Arfaxadbe Selajwei møskain køben, Selajbe Eberwei møskain kuig køn.

²⁵ Indig katø wendø Eberbe pagatø nusrkalø tøgaguig køn: tru srøsriibe Peleg munchi købig køn, kaguende nø tsuin kwalømmerawan pirøwan pirisaig købig kua. Inchen kan nuneebe Joctán taig købig køn.

²⁶ Inchen Joctánbe Almodadwan køben, Shelefwan køben, Hazarmavetwan køben, Jeran køben,

²⁷ Hadoramwan køben, Uzalwan køben, Diklan køben,

²⁸ Obalwan køben, Abimaelwan køben, Sheban køben,

²⁹ Ofirwan køben, Havilan køben, Jobabwan køben tøgaguig købig køn. Iiløbe kerriguba tru Joctánwei nusrkalø kuig køn.

³⁰ Inchen tru nøm waraig pirømerabe Mesagurri ibiibe, Sefarburabsrø puraya, trugurrimbe tru nørrø tunmera tøga pirømera tru pørr neeshibgatøwansrøngatig ibig køn,

³¹ Iilø kuig kòn, tru Semweinukkurri amrrub misaamera, truiløbe misag nørro sötømeramørig, katø mu møskalø køben, yau misaamera trumørig nømuin kui, nømuin kui pirømera waramig tøgartø, katø nømbe trumørig nømuin trigwan waminchibelø.

³² Iilø kòn tru Noéwei nusrkalainukkurri mu møskalø køben, yau misaamera numeratø købig kuig, katø møyweinukkurri amrrub misaamera købig kuig, misag nørro sötømera møyuelø købig kuig, treekke. Inchawei tru pi pulabig chab pinisha puraiben, truiløbe ambuurab, iburab larrøbichib amba, yu pirø muba kuimburab misaamera nørro sötø misrig købig kòn.

11

Babel Pirau Purø Pala Ya Marøb

¹ Tru urassrømbe misaamerabe pirø muba kuimburab kan wamdø waminchibelø købig kòn.

² Incha tru pørr neeshibgatøsrøngurri webamba ambub kuabe, tru Sinar pirausrømbe kan purø tab chag pirø wetørrawa, yandø nømbe truyu waramisrøbelø kòn.

³ Incha kan kwaløm nømbe kangurri, kangurri trenchibelø kòn: “Naaril-lusmera margun cha. Incha nagu partrab” cha. Incha øyamay sruumeratøga marøbgunrriibe naarillutøga marig køben, chilliitøga marøbgunrriibe asfaltøga maramig købig kòn.

⁴ Incha trugurrimbe trenchibelø kòn: “Kan ciuda margun cha, kan purø palaig marig tøgag, truipe pala patsabsrømbe srømbalærøngatig kachibikke. Treekkurrimbe mugui nebua asiilø nørreelø misra, pirø muba kuimburab ke tru ørøtø amba waramig kaanrrun” cha.

⁵ Inchen Jehovåbe kørraarrubig kòn, tru ciudawanba tru torrenba tru møguelai nusrkalø marigwanba ashchab.

⁶ Incha Jehovåbe trenchibig kòn: “I misaamerabe kandø køb, wangucha kandø waminchib, katø tru maramigwangucha yandø martrab pølbasra kòn cha, trurrigu nøm martrab indigwane muguin katiasamørra cha.

⁷ Inchawei kørraamun chibig kòn, nømui wamindi wamwan ni chiwan wamindi møramgaig misrtrai martrab cha, møykurrindøgucha nømasiitø ni chi tainguen mørtrab kaimanrrai.”

⁸ Incha øyamay Jehovåbe pirø muba kuimburab tru ørø larrøbichib amrrai maren, yandø tru ciudawan marmøtø, yandø lelachibelø kòn.

⁹ Incha treekkurri Babel cha wamig kòn, kaguende pirau muba kuimburab wamindi wamwan Jehová truyuh nøm mandø kuinguen mørmønrrai marig købig kua. Incha trusrøngurri nømunne pirau muba kuimburab tru ørø amba warønrrai marig kòn.

Semweinukkurri Amrrub Misaamera

¹⁰ Iilø kòn tru Semweinukkurri amrrub misaamera: Sembe pilamera cien tøgag kua, Arfaxadwan tøgaguig kòn, tru pirau pi pulab arrubig purayaig pa pila køben.

¹¹ Incha Sembe tru Arfaxadwan tøgaguikkurrimbunø pilamera quinientos øsig tsua, nusrkalø køben, nimbasrmera køben tøgaguig kòn.

¹² Arfaxadbe pilamera treinta y cinco tøgagua, Salan tøgaguig kòn.

¹³ Arfaxadbe Salan tøgaguikkurrimbunø pilamera cuatrocientos treskatig øsig tsua, nusrkalø køben nimbasrmera køben tøgaguig kòn.

¹⁴ Salabe pilamera treinta tøgagua, Eberwan tøgaguig kòn.

15 Incha Salabe Eberwan tøgaguinukkurimbunø, pilamera cuatrocientos tres øsig tsua, nusrkalo køben, nimbasrmera køben tøgaguig køn.

16 Eberbe pilamera treinta y cuatro tøgagua, Pelegwan tøgaguig køn.

17 Incha Eberbe Pelegwan tøgaguinukkurimbunø pilamera cuatrocientos treinta tøgag tsua, nusrkalo køben, nimbasrmera køben tøgaguig køn.

18 Inchen Pelegbe Reuwan tøgagua, Reuwan tøgaguig køn.

19 Incha Pelegbe Reuwan tøgaguinukkurimbunø, pilamera doscientos nueve øsig tøgag tsua, nusrkalo køben, nimbasrmera køben tøgaguig køn.

20 Reube pilamera treinta y dos tøgagua, Serugwan tøgaguig køn.

21 Inchen Reube Serugwan tøgaguinukkurimbunø pilamera doscientos siete øsig tsua, nusrkalo køben, nimbasrmera køben tøgaguig køn.

22 Serugbe pilamera treinta tøgag tsua, Nacorwan tøgaguig køn.

23 Incha Serugbe Nacorwan tøgaguinukkurimbunø pilamera doscientos tøgag tsua, nusrkalo køben, nimbasrmera køben tøgaguig køn.

24 Nacorbe pilamera veintinueve tøgagua Térjawan tøgaguig køn.

25 Nacorbe Térjawan tøgaguinukkurimbunø pilamera ciento diecinueve tøgagua nusrkalo køben, nimbasrmera køben, tøgaguig køn.

26 Térjabe pilamera setenta tøgagua, Abramwan køben, Nacorwan køben, Haranwan køben tøgaguig køn.

Térjweinukkurri Amrrub Misaamera

27 Iilø køn tru Térjweinukkurri amrrub misaamera: Térjabe Abramwan køben, Nacorwan køben, Haránwan køben tøgaguig køn. Inchen Haránbe tru Lotwan tøgaguig køn.

28 Inchen nui møskai Térj kwamøwatø, tru Haránbe Caldeosmeraim pirausrø, tru nø kal-laim pirau kwaig købig køn.

29 Inchen Abramba, Nacorbabe nømuyasig sralø laig køn. Tru Abramwei sraimbe Sarai købene, Nacorwei sraimbe Milca taig købig køn, tru Haránwei nimbasr. Tru Haránbe Milcaimba, Iscaimba møskain kuig køn.

30 Inchen Saraiibe chi ureg tøgagønrabig kømíg kua, chi urekkaig købig køn.

31 Inchen tru Tarébe tru nui nusrkai Abramwanba, katø Haránwei nusrkai nui awelu Lotwanba, nui yerna tru Abramwei srai Saraiwanba, pera webibig køn, caldeosmerai pirau Ur tainukkurri tru Canaán pirausrømay inrrab. Inchendø tru Harán taig pirausrø puabe, truyu kørrømisrøbelø køn.

32 Inchen tru Térj øsig tsuin kwalømmerebe pilamera doscientos cinco kuig køn. Incha Térjabe Harán pirausrø kwaig købig køn.

12

Abramwan Wamig

1 Jehovábe Abramwane trenchibig køn:

—Ñuim piraugurrimba, ñui yau misaamerainukkurrimba, trugurri ñui møskawei yaugurrimba inrrø cha, na ñun eshkam pirausrømay.

2 Nabe ñigurri purø norrø misag sötømera kønrrai marøb, katø mayanguen tabig nebuig kønrrai mara, ñui munchiwane mayeelø nebua asig kønrrai maramønrrun cha, ñibe katøganelayasig maya nuguen tabig kønrrai, ñibe treeg kønrrabguen cha.

3 Nabe ñun mayanguen tabig nebuig kønrrai marøbelane, nømungucha mayanguen tabig nebuilø kønrrai maramønrrun cha. Ñun trømbøig nebunrrai

marøbelane, nømungucha trømbøig nebuilø kønrrai maramønrrun cha. Incha pirau chi misaamera køben pirø muba kuimburab warabeløbe ñuinug mayanguen tabig nebuilø kønrrai mariilø kønrrun— chibig køn.

⁴ Inchen Abrambe Jehová maig chiben ibig køn. Inchen nøbabe Lotgucha ibig køn. Tru Harán piraugurri Abram webib urasbe nøbe pilamera setenta y cinco tøgagig kuig køn.

⁵ Incha Abrambe nui srai Saraiwan køben, nui nunewei nusrkai Lotwan køben pera ibig køn, katø chigurrimbunø nø chi tøgaguilan køben, katø tru Harán pirau nui karuig mendig melab misaameran købengue. Nøbe Canaán pirausrø truiløba pubig køn.

⁶ Incha Abrambe Canaánsrø puabe, tru pirau kerrigu pureb ya, tru Siquénsrø pubig køn, tru Moré Tusr taig pasramnug. Inchen tru urassrø tru cananeo misaamerabe Canaan pirau warabelø købig køn.

⁷ Inchen Jehovábe Abramwan kenamisrabe trenchibig køn:

—Ñuinukkurri amrrub misaameran nabe truilan i pirøwan trananmønrrun — cha. Inchen Abrambe kan altar kusrabig køn tru Jehová nun kenamisrøbigweyasig.

⁸ Incha trugurrimbe tunmeragøba tøga pirømerasømay ibig køn, tru Betel pørr neeshibgatømayrsø. Incha tru nui carpa yawan truyuh lasrua pasrøbig køn. Inchen Betelbe pørr pinebgatømay kørrømisrene, Haiibe pørr neeshibgatømayrsø kørrømisrøbig køn. Incha nøbe Jehováweyasig kan altar kusrua, nui munchiwan isub wamabig køn.

⁹ Incha Abrambe truyugurri webya, ibig køn, kørrømisrøb, kørrømisrøb tru Neguev pirausrøngatig.

Abram Egipto Pirausrø

¹⁰ Tru Neguev pirausrømbe parø arrum mendøben, Abrambe Egipto pirausrømay kørraarubig køn truyu tsunrrab, kaguendø tru Neguev piraube purø trømbøig parø pasrøben.

¹¹ Incha Abrambe ke Egiptosrø chab pub ib pasrøwabe, nui srai Saraiwane trenchibig køn:

—Na ashen ñibe purø tab ishug køn cha.

¹² Egipto misaamera ñun ashippe, trenchinrrun cha: “Ñui srain køn” cha. Incha nane kweecha kuchippe, ñune øsig kønrrai ka uñbashchun cha.

¹³ Inchawei tiusmanda ñibe naimbe nuchag kur chinrrig cha, ñigurri nan chigucha kømø, tab kønrraimba, katø nan kweechimønrraimba.—

¹⁴ Indiibe yandø Abram Egiptosrø kebibene, tru egipciomerabe tru ishube larrø tabzhig kui ashibelø køn.

¹⁵ Inchen tru Faraonwei merrab nørreelø pønrrabelø ashabe, truiløgucha Faraónwei merrab purø tab waminchib køben, tru ishuwane Faraón nø waig yaumay pera ambubelø køn.

¹⁶ Incha tru Saraigurri tru Faraónbe Abramwan larrø tab inchib, ubishamera køben, waaramera køben, burrumera køben, karuindiig mendig melabelø møguelø køben ishumburmera køben, camellomera køben keta, tranøbig køn.

¹⁷ Inchendø tru Abramwei srai Saraigurri Jehovábe tru Faraónwanba nui yau misaameranba murba kebatig køn, purø trømbø kwanrrømeratøga.

¹⁸ Inchen Faraónbe Abramwan wama, trenchibig køn:

—¿Nan øyeebe chi margu? cha. ¿Chindimbarre ñui srain køn cha eshkamugu? cha.

¹⁹ Chindimba trenchigu cha: “Nai nuchag kòn” chabe. Nai srain kònrrai na treeg marig kuimasr cha. Mòimbe ñui sraimbe yu pasran cha. ¡Pereptsu!—chibig kòn.

²⁰ Incha Faraónbe nui karuig pònrrab møguelan ørøbig kòn ¡katø! we-bambi ashib pønrrønrraingue, Abramwanba nui srawanba nui chigurrimbunø købigwanbañau sruaamrrai.

13

Abramba Lotba Mendamisrøb

¹ Incha Abrambe Egiptogurri nui sraimba katø nui chine tøgaguiløbañau Neguev pirausrømay katø arruben, nui kuchiunø Lotgucha nøba arrubig kòn.

² Abrambe ushamera tøga kuiløyu lata, an tøgaguiyu lata, oro tøgaguiyu lata purø pua møg købig kòn.

³ Incha Abrambe Neguevsrøngurri katøle arruppe kørømisrøb, kørømisrøb arrub tsubig kòn tru Betel misag sètømera waraisrøngatig, tru merrabwansrø nø tru carpa yawan lasrua tsuig købiisrø, tru Betelba, Haiba misaamera warabnug tru tøbøtag.

⁴ Truyu kuig kòn tru merrabsrø nø kan altar mara kusruinug. Incha truyu Abrambe Jehovahwei munchiwan isub wamabig kòn.

⁵ Lot tru Abramba lincha ibikkucha ubishamera køben, waaramera køben, carpa yamera køben tøgaig købig kòn.

⁶ Incha pirøbe kanbalatø lincha waramibe truburab tre lendø kømíg kòn, kaguende nøm tøgaguiløbe purø nørø kua, trubalatøbe waramgaig købig kòn.

⁷ Indiibe kan kwaløm Abramwei ushameran ashibeløba, Lotwei ushameran ashibeløba aleguiab kurrabelø kòn. Inchagucha tru urasbe cana-neosmeraba ferezeosmeraba truiløgucha truyu warabelø købig kòn.

⁸ Inchen Abrambe Lotwane trenchibig kòn:

—Nam pailainug lata, katø nai ubisha ashibeløba, ñui ubishameran ashibeløba truiløgucha chi kwayab kømig chi kaanrrain cha, kaguende nabe nunelø ker cha.

⁹ ¿Pirøbe asimburab kerriguba ñui merrab pasrømuitarru? cha. Tiusmanda nainukkurri tarømisrøtra cha, ñi atsimay ibene, nabe kursmay yamønrrun cha, ñi kusrmay ibene, nabe atsimay inrrur— cha.

¹⁰ Inchen Lotbe ashib pasrøwabe, tru Jordan chaabe kerriguba Zoarsrøngatig pizheelø purø tøga pirømera kui ashibig kòn. Jehovahwei ellmarin tul lata tabzhikke; kabe tru Egipto pirømera lataikke. Tru Jordanbe treeg kuig kòn, Jehovah Sodoma ciudawanba Gomorra ciudawanba pinishimøwatøbe.

¹¹ Incha Lotbe kerrigu Jordan chagwan nø merrarrawa, Lotbe tru pørr neeshibguebansrø ibig kòn. Incha øyamay Abramba, Lotba nøørø misrig kòn.

¹² Abrambe Canaán pirau kørømisra tsuben, trune Lotbe tru Jordan chag pirø ciudamerasrø tsunrrab ibig kòn. Incha tru nui carpa yamerane Sodomasrøngatig lasrua pønrsøb ibig kòn.

¹³ Inchen tru Sodoma warab misaamerabe larrø kailø kua, larrø trømbøgølig marøbelø købig kòn, Jehovahwan kalø marøb.

¹⁴ Inchen yandø Lotbe Abramwan tarømisringuen køben, Jehovahbe Abramwane trenchibig kòn:

—Abram, kurrasha cha, ñi pasrainukkurri tab ash cha, waguebwansrø, walliguebansrø, pørr neeshibgatøwansrø, pørr pinebgatøwansrø,

¹⁵ pirøwan muba kuimburab mayamba ñi nebua asigwan ñunba, ñuinukkurri amrrub misaameranba managatigweyasig na ñun tranamønrurun cha.

¹⁶ Ñuinukkurri amrrub misaamerabe nørrø køptø kan pirau usrøtui lataig kønrrai maramønrurun cha. Usrøwanma muguen mundamgaig kuig køppe, ñuinukkurri amrrub misaameragucha mundamgaig kønrrun cha.

¹⁷ Kurra, tru pirø yammay maya yab kuigwanba, lendømay mayan kuigwanba llirab inrrø chibig køn, kaguende nabe ñun tranamig køn— cha.

¹⁸ Incha Abrambe tru nui carpa yameran picha kusrua, Manre tainug nørrø parøndzig encinas tusrmera pønrrabnug tsunrrab ibig køn, tru Hebrønsrø. Incha truyube Jehovahweyasig kan altar kusrubig køn.

14

Lotwan Wesrawa Srua Amben Abram Kerrab

¹ Tru kwalømmerrawan tru Amrafelbe Sinarsrø rey køben, Ariocbe Eleasarsrø rey køben, Quedorlaomerbe Elamsrø rey køben, Tidalbe Goyimsrø rey købig køn.

² Incha truiløbe kwayabbrren købig køn, Sodomasrø rey Beraba køben, Gomorrasrø rey Birsaba køben, Admasrø rey Sinabpa køben, Zeboimsrø rey Semeberba køben, katø tru Belasrø reyba købengue, truike Zoargucha taig.

³ Incha tru i trattrøgatø reymerabe nømui suldaumeraba tru Sidim chagu kanbalatø misrig køn kwayanrrab, tru Mar Trebi taisrø.

⁴ Tru rey Quedorlaomerbe nømune pa trattrø y pa pila nø karub tøgagøben, pa trattrø y pøn pilayube tru trattrøgatø reymerabe tru Quedorlaomerwan mas karuig mørøb melømønrrab mur pønrramisrøbelø køn.

⁵ Incha tru pa tratrø y pib pilayube Quedorlaomerbe tru reymera nuingatø pønrrabeløba Astarot Karnaim pirausrømay amba, truyube refaitasmeran kanawa kørrømarøppe, Ham taisrømbe zuzitasmeran, Save Quiriataimsrømbe emitasmeran,

⁶ Seir tunmerawansrømbe horeosmeran kanawa kørrømara, tru Paran chaamerasrøngatig ambubelø køn, tru misag waraimlig chi misrmø pirø puluwansrø.

⁷ Incha truiløbe katøle amrruabe, tru Gadessrø Enmispat taisrø pua, amalecitasmerai pirømerasrømbe kerriguh chi købigwan chishtø pinisha, katø tru Hazon Tamar pirau amorreosmera warabelan treetøweih mara kørrømarøbelø køn.

⁸ Inchen Sodoma rey køben, Gomorra rey køben, Adma rey køben, Zeboim rey køben, Bela rey køben, Zoarsrø rey køben werrua, Sidim chaasrø tru reymeraba kwayab mendabelø køn.

⁹ Tru Quedorlaomer Elamsrø reyba, Tidal Goyimsrø reyba, Amrafel Sinarsrø reyba, Arioc Eleasarsrø reyba truilø nøm pib reymera tru trattrøgatø reymeraba kwayabelø køn.

¹⁰ Inchen tru Sidim chaasrømbe asfaltos pisumera truba, truba tøgānug kuig køppe, tru Sodoma reyba Gomorra reyba tru kwayabyugurri nui suldaumeraba wegørra lulen, mōiløbe truyu chab kegørrøben, kan reymerabe tunmerasrømay trubab chab luløbelø køn.

¹¹ Inchen tru pib reymera kanabeløbe Sodomaba, Gomorraba ciudayu chigurrimbunø købigwan, mamiimeran nømui mara wesrawabe, yandø truyugurri ambubelø køn.

¹² Inchen tru Abramwei nunewei nusrkai Lotgucha sodomasrø tsubig kuig kōppe, nungucha merrarrowa, tōga srua ambuptinchibelø kōn, nui chi tōgamisrigwanbafiaungue.

¹³ Inchen mōikkōsrōn truyugurri welula arrubiibe, tru hebreo Abramwan igwan kerriguh eshkabig kōn. Inchen Abrambe amorreo tru Mamre taigwei tru nōrrø parōndzig encinas tusrmera pōnrrab puluwan tsubig kuig kōn. Tru Mamrebe Escolweimba, Anerweimba nuneg kōben, truiløbe Abramwanweingatø pōnrrabelø treelø kōbig kōn.

¹⁴ Incha Abrambe tru nui yautōwei kal-lawarmeran trescientos dieciocho tru kwayamigweyasig kusrenani mōgueløba tulaamba, truiløba webya, tru piġgatø reymeran wetōgōnrrab Dansrōngatig pasra ibig kōn.

¹⁵ Incha yandø yem kōben, Abrambe tru kwayamig kusrenni mōgueløba, pesan kōbenh kwayanrrab kegōrra, Hoba taisrōngatig pasra ambubelø kōn, Damasco tru waguebgatømay pasrab ciudadsrø.

¹⁶ Treencha chigurrimbunø wesra srua ambiilan katøle chab kerrab, katø nui kasugunø Lotwan nui chigurrimbunø tōgamisriilanbañau kerriguh chab kerrabig kōn, katø ishumburmeranba, katøgelanba.

Melquisedec Abramwan Mayanguen Tabig Nebuig Kōnrrun Chib

¹⁷ Abrambe Quedorlaomerwanba truigweingatø pōnrrab reymeranba kanawa arruben, Sodoma reybe, tru Save taig chaasrø katōnrrab webibig kōn, truiibe tru Reywein Chagu.

¹⁸ Inchen tru Salemsrø rey Melquisedecbe, Tius Mayeelain Pala Pasrabigwei sacerdotepe pirrimba, vinoba wesrua,

¹⁹ Abramwan mayanguen tabig nebuig kōnrrai marøbig kōn, øyeeg wammeratōga: “Tius Mayeelain Pala Pasrabig Srømbalameranba, Pirøwanba Marøbig

²⁰ Tius Mayeelain Pala Pasrabig Purø Nuigwan maya nuguen tabig wamindig kōnrrain cha, tru ñun ashig kōmui inchibelan ñui tasku tranøbigwan. Inchen Abrambe chigurrimbunø katøle wetōrrawa srua arrigwan cienyugurri diezwane wesrawa, Melquisedecwan tranøbig kōn.

²¹ Inchene tru Sodomasrø reybe Abramwan trenchibig kōn: — Misaamerane nan tranrra cha, chigurrimbunø kōbigwane ñi tōga kōrrømisrtrig— cha.

²² Inchene Abrambe tru Sodomasrø reywane trencha lōtabig kōn:

—Tius Mayeelain Pala Pasrabig Srømbalameranba Pirøwanba Marøbig Jehovahāwan [katø! nabe treebe marmumōnrrun cha, nabe trendaig kuig kōn cha.

²³ Ni kan train pititōguen—, kabe nai alpargatis tsi-unōtōguen nabe ñuiwane chiwangucha nai marmumōnrrun chibig kōn, ñi managuen øyeeg chimōnrrai: “Abrambe nagurrinre pua misrig kōn” cha.

²⁴ Tru na pera pasraig mōguelø mab mutsigwandø srōrri maig kōrrømistrain cha. Inchen tru naba amrrub mōguelø Anerba, Escolba, Mamreba truiløbe si, nōmuiburappe ka utōnrrun— chibig kō n.

15

Tius Abramwan Øyamay Kōnrrai Martrab Cha Kōrrømisrøb

¹ Inchen øyeelø chab puraiben, kan piab lataigu Jehovahēweinukkurri wam Abramwan trenchibig kōn:

—Abram, chi kōrig kui inchimōta cha. Nabe ñun chi kōmōnrrai ashib tōga pasrabig truig kur cha. Ñun tranamibe purø nuig kōnrrabig kōn— cha.

² Inhendø Abrambe trenchibig køn:

—Jehová Tius ¿Ñi nan keta traniibe chi puruguimøriasamørra cha, na chi urekkaigwane? Inchen tru na chine tøgamisriilan merrarranrabiibe tru Damascosrø Eliezer kømuitarru?— cha.

³ Incha katø Abrambe trenchibig køn:

—Ñi nan kan nusrkai tranmuig købene, kan nai yautøwei kal-lawei nai kan karuindiig mendig megabig, truig nai chi tøgaguilan ketig utønrrabig køn— cha.

⁴ Inchen katø Jehovaweinukkurri wam trenchibig køn:

—Ñui chi købigwane truig ashchabig kømøtø, truilane ñui nusrkai utønrrabig køn— cha.

⁵ Incha wambiisrø pera yabe, trenchibig køn:

—¡Au! srømbalaneb nesh cha, kønchabiimeran mundamdø køtamørtrig— cha. Incha katø trenchibig køn:

—Ñuinukkurri katøburø ureemerabe øyeetøwein kønrrun— cha.

⁶ Inchen Abrambe Jehováwan køreben, treekkurri nune Tiusbe chi kaig marmíig lataig, tabig treeg asha pasrig køn.

⁷ Inchene nøbe trenchibig køn:

—Nabe Jehová kur cha, caldeosmeraim pirau tru Ur taisrøngurri wesrabig i Canáan pirøwan na ñun keta tranrab.—

⁸ Inhendø Abrambe trenchibig køn:

—Jehová Tius, ¿tru na truigwan nain kønrraitamappe nabe mandø incha asamerah?— cha.

⁹ Inchene Jehovábe trenchibig køn:

—Kan ishug waara-unøzhig pøn pilaiba, kan cabra pøn pilaiba, kan carnero pøn pilaiba, katø kan palomaba, kan paloma-unøzhiiba srua amø— cha.

¹⁰ Inchen Abrambe tru ushameran kerriguh srua arrua, truilan sølgørrab tab tøbøtag para, tru pariilan tru pinrrøgue, tru pinrrøgue warøbig køn. Inhendø tru illimerane tøbøtag parmuig køn.

¹¹ Inchen yau mab illimerabe tru usha kweetsiilø warabelaimbalawan kørørrub amrruben, Abrambe kwaarøsrøbig køn.

¹² Inchen yandø chab pilliraben, Abrambe truba mur kib tsubenba jmøimbe ke yalø løstøgølig nun itøgasrøptinchen! nøbe truba kørig kui inchibig køn.

¹³ Inchene Jehovábe trenchibig køn:

—Isa kømøtø, ñuinukkurri amrrub misaamerabe, ka peguelaim pirautø warønrrabelø køn cha, nømbe truilø karub sruaguindeelø meløwa, pilamera cuatrocientos nebumne larrø kaig indinab melønrrabelø køn cha.

¹⁴ Inhendø tru nu sötø misaamera pasrabig nømun ka karuptø srua kønrrabelangucha numune møra melønrrai maramønrrun cha. Inchen trugurrimbun tru ñuinukkurri amrrub misaamerabe yandø treeg melainukkurri wegørra ambuppe, purø tøga misaamera webamba amrrun chibig køn.

¹⁵ Trune ñibe ñui møskaløba pishindø tab israb tsumisrøbraguen cha, larrø køllizhig misra kwaben, sørøben.

¹⁶ Inchen tru pimmaygatig srøig srøig misag kurrab amrrubeløbe katøle i pirautøweih amrrunrab køn cha, kaguende truilø pumuatøbe tru amorresomera larrø kaig marøb amrruibe ke awentamgaikkatiibe pumø srø kønrrun cha.

¹⁷ Inchen yandø pørr pinaiben, chab pilliraben, kan horno naguish kuchibiiba kan nag tulun pilabiiba kenamisrøbig køn. Incha truiløbe tru

ushameran kweecha tab tøbøtag pirisha ambumay, imay wari utøwan pu-raambubelø køn.

¹⁸ Tru kwaløm Jehovábe Abrambe øyamay kønrrai martrab cha kørrømarabe, trenchibig køn:

—Ñuinukkurri amrrub misaamerane i pirøwan na tranamig køn cha, Egipto pirau piyugurrimbunø, Eufrates tru nu pistrøngatikke:

¹⁹ ceneosmeraim pirømeran køben, cenezeosmeraim pirømeran køben, cad-moneosmeraim pirømeran køben,

²⁰ heteosmeraim pirømeran køben, ferezeosmeraim pirømeran køben, re-faitasmeraim pirømeran køben,

²¹ amorreosmeraim pirømeran køben, cananeosmeraim pirømeran køben, gergeseosmeraim pirømeran køben, jebuseosmeraim pirømeran købengue.

16

Agarba Ismaelba

¹ Abramwei srai Saraibe ureg tøgagønrab kaimabig kuig køn. Inchende kan nui karuindiig megabig egipcia ishug Agar taig tøgag kua,

² Saraibe Abramwane trenchibig køn:

—Nane Jehovábe ureg chigaig kønrrai treeg martan cha. Inchendø tius-manda tru namui karuindiig megabig tru Agarwan pera, ki chibig køn. Inchippa truikkurri na ureg tøgaguinabgun— cha.

Inchen Abrambe Sarai taigwan mørøbig køn.

³ Inchen Saraibe tru karuindiig megabig Egiptosrø Agarwan pera arrua, Abramwan srai lataig kønrrai tranøbig køn. Abram Canaan pirau pa trattro pila tsuben, øyeeg purayaig køn.

⁴ Inchen Abrambe tru Agarba kib waramisren, tru ishuube kwanriig misra, yandø unø tøgamisarmab isua, nun karub pera købig Saraiwane namig ashib kebibig køn.

⁵ Incha Saraibe Abramwane trenchibig køn:

—Ñigurrindø køn cha, nan mandøguen kømui isui uñchai mørøbiibe. Ñune ñui srai lataig kønrrai nai karuindiig megabigwan na tranig køn cha. Incha mørømbe nøbe unø tøga kønrrab køppe, nane namig ashib kebitan cha. Incha Jehová nø ashchun chibig køn, na kalø marig kuin kui, ñi kalø marig kuin kui.—

⁶ Inchen Abrambe Saraiwane trenchibig køn:

—Ñui ka karuindiig megabiibe ñuin tasku køn cha. Ñun maig mørøg køben, treeg mar— chibig køn. Inchen Saraibe kaig inchib mendøben, Agarbe welula yam nebuig køn.

⁷ Indig Jehováwei ángelbe tru mu misag waraimø pirømerasrø kan pigab menda Agarwane wetørrabig køn, Shursrømay ambi maywansrø.

⁸ Inchabe payibig køn:

—Agar, Saraiwei ka karuindiig megabig, ¿Chugurri arrugu? cha. ¿Chumay inrrab inchigu?— cha. Inchene nøbe trenchibig køn:

—Nan karub pera købig Saraiwan nabe trubab welula arrur— cha.

⁹ Inchen ángelbe trenchibig køn:

—Ñui karub pera købigweimay katøle llirawa ya, tammay mur kurrashmø, nø maig chiben nui tasku treeg mørøbig megau— cha.

¹⁰ Incha katø ángelbe trenchibig køn:

—Ñuinukkurri amrrub misaameran purø nørrø kønrrai maramønrrun cha, purø nørrø køptø mundamguengaiikke.—

¹¹ Incha ángelbe katø trenchibig køn:

—Ñibe kwanrriig køn cha. Ñibe kan nusrkai tøgagønrrun cha. Incha Ismael munchi pasrtrig chibig køn, kaguendø ñi larrø isui miaben, Jehovábe mørig køn cha.

¹² Nøbe muguen kemalamgaig kønrrabig køn cha, kan kaambu mula-unø lataig. Incha nøbe mayeelan kwayam lanrrabig køben, katø nungurringucha mayeelø kwayam lanrrun chibig køn. Inchen nøbe nunelan, ka kwayam lapptø, kwayam lapptø tsunrrun— cha.

¹³ Incha Agarbe Jehovába wamindig køppe, nøbe nune trencha wamabig køn:

—Ñibe tru nan ashib wab Tius køn— cha. Kaguen Agarbe trenchibig køn: “Øsig Wab, katø Nan Ashibigwan nabe ashar” cha.

¹⁴ Incha tru pisuwane treeg wamig købig køn: “Øsig Wab, Nan Ashib Inchibigwein Pisu” cha. Inchen tru i pisube Gadesba, Beredba tøbøtagu kørrømisrøbig køn.

¹⁵ Indig Agarbe Abramwei kan møg-unø tammisren, Abrambe Ismael munchi pasrøbig køn, tru unan.

¹⁶ Inchen tru Agar Ismaelwan tammisrøb uras Abrambe pilamera ochenta y seis tøgaguig købig køn.

17

Tru Srøig Øyamay Kønrrai Martrab Cha Kørrømarigwanba Circuncision Marigwanba Caminchibig

¹ Abram pilamera noventa y nueve tøgagøben Jehovábe kenamisra trenchibig køn:

—Nabe Maramburab Marøbig Purø Nuig tru Tius kur cha. Ñibe nai merrab sølgandø, mu mandamgaig uñ cha.

² Nabe ñiba øyamay kønrrai martrab cha kørrømarøb, katø ñui misamera larrø nørrø larrøbitchai marøb indamønrrun— cha.

³ Inchen Abrambe maløwan pirau kebatamne utsøbasren, Tiusbe nune trenchibig køn:

⁴ —Iig køn cha, tru na ñiba øyeeg maramønrrun cha kørrømariibe, ñibe tru purø nørrø chi misag sötømeraindøgucha ñi møskain kønrrai.

⁵ Ñibe mas Abram munchi kømøtø, ñibe Abraham cha wamig kønrrun cha. Kaguende nabe ñune tru purø nørrø chi misag sötømeraindøgucha ñibe nømui møskain kønrrai pasrar cha.

⁶ Ñuinukkurrimbe purø nørrø misag nemisrtrai maramønrrun cha. Ñuinukkurrimbe misag sötømera nørrø køb, ñuinukkurri katø reymera køb inchen cha.

⁷ Katø nabe, ñiba ñuinukkurri amrrub misaameraba øyeeg martrab cha kørrømaramønrrun cha, katøle srøig, srøig misag kurrab amrruimørig katø øyeeg martrab cha mara pasramønrrun chibig køn, managatig pasrønrrabig, nabe ñuimba, ñuinukkurri amrrub misaameraimba nabe pasrabig pasrøwa, managatig nømuyasig Tius kømønrrun cha.

⁸ Ñunba, ñuinukkurri amrrub misaameranba tru ñi ka arruatiig tsuin pirøwan tranamønrrun cha, Canaán pirøwan muba kuimburab managatig tøgagønrrai. Inchen nabe pasrabig pasrøwa, managatig nømuyasig Tius kømønrrun— chibig køn.

9 Incha katø Tiusbe Abrahamwane trenchibig køn:

—Tru na ñun øyeeg martrab cha kørømarigwane ñibe, maramig køn cha, ñiba, ñuinukkurri katøle srøig, srøig kurrab amrrub misaameraba.

10 Iig køn cha, tru na ñiba øyeeg martrab cha kørømarig, katø ñiba tru wendø ñuinukkurri amrrub misaameraba. Inchen trunun maramig køben, ñimui utube mu møøtøgucha circuncidaig kørørun chibig køn.

11 Ñimbe circuncidanrrigay cha, naba, ñimba tru øyeeg martrab cha kørømarigwan treeg marigu asamig pasrønrai.

12 Trune kwalømyube mu møguelandøgucha circuncidanrrigay cha, katøle katøle ureemera kurrab amrruimørig, ñui yau kal-laweig kui lata, kabe amrrub misaameran peniilø kui lata.

13 Inchawei ñui yau kal-laweig kui lata, kabe kan anwei penig kui lata nømbe circuncidaig kørørabøl køn cha. Inchen, tru asru sifalbe tru treeg martrab cha kørømarigwan managatigwein køn cha eshkabig køn.

14 Inchen tru circuncidamígwane ñimui misag utugurrimbe wegutsig kørørun chibig køn, kaguende na øyeeg martrab cha kørømarigwan itøbunikkurri.—

15 Incha katø Tiusbe Abrahamwane trenchibig køn:

—Ñui sraimbe Sarai cha wamig kømøtø, yandø Sara cha wamig kørørun cha.

16 Nabe nune mayanguen tabig nebuig kørørai maren, nøbe ñui kan nusrkai tøgagørørun cha. Nabe mayanguen tabig nebuig kørørai maren, nøbe nørø søtø misaamerai usrin kørørabig køben, katø ñuinukkurrimbe misag sötømerai reymera werrunrrun— chibig køn.

17 Inchen Abrahambe nui maløwan pirau kebatamne utsøbasrabe, nui manrrø umbutø intsab trenchibig køn: “¿Kan møg pilamera cien tøgag kua, unø tøgä kørørautah? cha. ¿Katø Saragucha pilamera noventa tøgag kua, unø tøgagømdø kørørautah?” cha.

18 Inchene Abrahambe Tiuswan trenchibig køn: —Ñi treeg martrab cha kørømisrigu Ismael truigwane nø tøgä pasrønrai tranø— cha.

19 Inchene Tiusbe trenchibig køn:

—Isa kømø, Sara ñui sraimbe kan nusrkai tøgagørørab køn cha, truigwane Isaac munchi pasrtrig cha. Nabe tru øyeeg martrab cha kørømarigwan Isaacweinukkucha katøle treetøwei marig kørømisrtrai indamørørun cha. Inchawei na treeg marigwane wendø ñuinukkurri amrrub misaameraba managatig tøgä pasramørørun chibig køn.

20 Inchen Ismaelweimburabgucha nabe ñun mørar cha, nungucha mayanguen tabig nebuig kørørai maramørørun chibig køn. Nøgucha ureemera larrø nørø tøgagørørai marøb, purø nørø misag sötø larrøbitchai marøb indamørørun chibig køn. Ismaelbe karub ashilb pørørrørørabøl doce nørreelai møskain kørørun cha.

21 Inchendø na tru øyeeg martrab cha kørømarigwane Isaacba kørørai mara pasramørørun cha, tru Sara katø pila øyan kwalømmerawan tru tøgagørørab kui unøyu.—

22 Incha Tiusbe Abrahamba chab waminchabe, ñuinukkurri tarømisra ibig køn.

23 Inchen Abrahambe nui nusrkai Ismaelwan køben, tru nui karuig mendig melabelø nui yau kal-lawarmeran køben, anwei pena tøgaguilan køben, Abrahamwei yau mu møguelø purrabelane kerriguba wama, tru kwalømdøwei circuncidabig køn, Tius maig karuig køben, treekke.

²⁴ Abraham tru circuncidab urasbe pilamera noventa y nueve tōgaig kōbig kōn.

²⁵ Inchen nusrkai Ismaelbe tru circuncidab urasbe pilamera pa trattro y pōn pilaig kōbig kōn.

²⁶ Inchawei tru kwalōmdō Abraham kōben, nui nusrkai Ismael kōben,

²⁷ mayeelō tru nui yau purrab mōguelō kōben, katō nui yau kal-lawar kui lata, katō amrrub misaameran peniilō kui lata, mayeelōbah circuncidaig kuig kōn.

18

Isaac Kal-lanrrun Cha Kōrrōmisrig Kōbig

¹ Incha Jehovábe Abrahamwan kenamisrōbig kōn tru Mamre tainug nōrrō parōndzig encinas tusrmera pōnrrab pulu, tru nui carpa yau yaskabu waben kwalōm tru mas purō mur pōrr asentab pasrōben.

² Incha mōimbe nō kurraashene, pōngatō mōguelō nuin pinrrōgue pōnrraptinchen, nōbe tru mōguelan amrruy chinrrab yaskabugurri lulōb ya, malōwan pirau kebatamne utsōbasrabe trenchibig kōn:

³—Nai kasuku, na ñui karui megabigwan ñi nan tab indamdiig kui asōnaig kōbene, tube, ib imōtō, lincha kōrrōmisrtra cha.

⁴ Nabe pi srua amrrungarumōnrrun cha, ñimui katiimeran kwalamig. Trugurrimbe tusr umbu isrōnrrigay cha.

⁵ Na ñi maig chiben purugunrraptōwei wabigwei yaburab puramrrab amruig kōbene, nabe lamō mamig manrrai sruaarumōnrrun chibig kōn, ñimui ambamigwan chishtō ambamdō kōnrrai.— Inchen nōmbe trenchibelō kōn:

—Ñi maig taigwan mar— cha.

⁶ Inchen Abrahambe tru Sara waig carpa yausrōmay kōrinatō lulabe, trenchibig kōn:

—Petōzhiitō purō tab harinawan arroba y media menrra, nemōra, hari-nawan masawa, trutōga pirrimera naarrōsryu kar— cha.

⁷ Incha Abrahambe tru waara purrabsrōmay lulōb ya, kan truba tab waara-unōzhigwanh merrarrawa, nui karuig mendig megabigwan tranen, truike mamigweyasig ¡katō! petōzhiitō tamarōbig kōn.

⁸ Incha queso kōben, pitsō kōben, tru waara kweecha tamarigwan kōben, nōmun manrrai pōnsrōbig kōn. Incha Abrahambe nōm mab kōmne tru tusr umbu ashib pasrōben,

⁹ truilōbe payibelō kōn:

—¿Ñui srai Sarabe chu wah?— cha.

Inchen Abrahambe:

—Yu carpa yau wainrrun— chiben,

¹⁰ kan mōig kōsrōnbe trenchibig kōn:

Nabe katō pila katō oyan kwalōmmerawandōwei arrumōnrrun cha. ¡Au! Tru urasbe Sara ñui sraimbe kan nusrkai tōgagōnrrun— chibig kōn.

Inchen Sarabe, nōmui wendau, tru carpa yau kebambi yaskabu tru wamindigwan mōrōb pasrabig kōn.

¹¹ Inchen Abrahamba Sarababe yandō mur kōllireelō, Sarabe yandō pabōguen pinig kōbig kōn.

¹² Inchen Sarabe intragatinchibig kōn, nui umbutō treeg isub: “¡Paare! kan na yan kōlliibe, ke trentatikkucha kōnrrai indamdiig kōnrraitarru cha katō nai kekkucha yan kōlligwein kōben.”

13 Inchene Jehovahábe Abrahamwane trenchibig kòn:

–Sarabe trenchib intsan cha, ¿Kan isa kòmø, treeg kònrrab kø chinder? chib. ‘Na yan køllig købendø, kan unø tøgagømig.’

14 ¿Kabe Jehovaháweingan kaimamdiig chi købig kuitarru? cha. Inchawei katø pila arrubigu tru chu ura treeg kònrrun taiguh, na katø ashchab arrubene, tru urasbe Sarabe kan nusrkai tøgaguen wanrrun— chibig kòn.

15 Inchen Sarabe kwaarøppa, trenchib isabig kòn:

–Nabe intsømuig kòn— cha.

Inchene Jehovahábe trenchibig kòn:

–Ñibe intsabwei indig kòn— cha.

Abraham Sodomayasi Purøwaminchib

16 Incha tru møgueløbe kurra, Sodomaguebsrø ashabe yandø truguebsrø ambub mendøben, Abrahambe ungua chinrrab nømba lincha ibig kòn.

17 Inchen Jehovahábe nuinøtø treeg isubig kòn:

“¿Na chi martrab indigwan nagan Abrahamwan eshkamø maramuitarru? cha.

18 Nøbe purø nørø misag sötømera, trurrigu mu chindamgaig murig, katø nøgurri chi misaameratøgucha pirø muba kuimburab warabeløbe mayanguen tabig nebulø treeg kònrrab køben.

19 Nabe nui ureemeranba nuinukkurri amrrub misaameranba kusrenrrai wesrawa pasrar cha, tru nø martrai karua pønrrailan møra marøppe, tru tabig sølgandø mariguba, nø tabig kui asamig mariguba kònrrain cha, tru øyeeq mariiløgurri Abrahamwan Jehova maig martrab cha kørøømariibe kerrigu treeg nebunrrai”.

20 Incha Jehovahábe Abrahamwan trenchibig kòn:

–Sodomaimburappa, Gomorramburappa, truyu misaamera yeeg kaig martan chib trashib eshkab melaibe masken, masken køben, nømui kaig mariiløgucha masken, masken nuraben, purø trømbøig mindin kòn cha.

21 Møimbe na kørarrumønrrun cha, tru nøm øyeeq, øyeeq køtan chib trashib melaig nainug pubig isa kømøtø, treeg købwei indiitashchab. Treeg kuin kuisruandøbe, trube, na asamønrrun— cha.

22 Inchen tru pailø møgueløbe nøøø misra, Sodomaguebsrø amben, trune Abrahambe Jehovahába pasrabig kòn.

23 Inchen Abrahambe Jehovaháwan kemallabe, trencha payibig kòn:

–¿Sølgandø tabig marøbigwanba, kaig marøbigwanba tøgatø pinishinr-
rapteh?— cha.

24 Inchipa tru ciudayu sølgandø tabigwan marøbelø cincuenta købene, ¿tru ciudawan ka pinishinrrapteh? cha, tru ciudayu sølgandø tabigwan marøbelø tru cincunteeløgurri ciudawan pinishimø, ¿ka købasamdiig kømuitarru? cha.

25 Treekkatig maramibe chigaaguinrrun cha, tabigwanba, kaigwanba kanbalatø kwanrrai indamig, kan pailøba treetø kalø marig kui lataig. ¡Ñibe mana treeg martrab kø! cha. Pirau muba kuimburab kerriguba maig kònrrabigwan ñi asha marøbig køppe, ¿ñibe maig maramigwan sølgandø tab asha marmønrraitirru?— cha

26 Inchene Jehovahábe trencha løtabig kòn:

–Sodoma ciudayu cincuenta sølgandø tabigwan marøbelø wetørrappe, tru-
ilan isua, truyube chinchimø, kagøbasamønrrun— cha.

27 Inchene Abrahambe trenchibig kòn:

–Nabe nai Señorwan ke menrra inchib lata indinatan cha, nabe ka usrø
tuindø kuinabendø.

28 Inchen cuarenta y cincotø købene, trube cincuenta kømuikkurrindø ciudawan kerrigu pinishinrrapteh?— cha.

Inchene Jehovábe trenchibig køn:

—Pinishimumønrrun cha, truyu na cuarenta y cinco sølgandø tabigwan marøbelø wetørrappe.—

29 Inchen Abrahambe katøgucha:

—¿Inchippa cuarenta wetørrappe?— chiben, Jehovábe trenchibig køn:

—Tru cuarenteelan isua, chinchimumønrrun— cha.

30 Inchen Abrahambe katøgucha payibig køn:

—Nai Señor, na øyeech chiben namømørrunrrig cha. ¿Inchippa truyu treinta wetørrabeneh?— cha.

—Tru treinteelan isua, kagøbasamønrrun— chibig køn Jehovábe.

31 Inchen Abrahambe katøgucha:

—Nabe nai Señorwan ke menrra indinatan cha, ¿truyu veinte wetørraimbe maig købsruerah?— chiben,

—Veinteelan isua, nabe pinishimumønrrun— chibig køn.

32 Incha katøle Abrahambe trenchibig køn:

—¡Nai Señor, nan namømørrunrrig cha, i piejindøh na ñun katølø trenchibashibsruguh cha: ¿Inchippa truyu pa tratrø wetørraimbeh?— cha.

Inchene Jehovábe trenchibig køn:

—Tru pa tratrøn isuptø, pinishimumønrrun— cha.

33 Incha Jehovábe Abrahambe øyeeegwan chab waminchabe, yandø truyugurri iben, Abrahambe nui carpa yaumay katø arrubig køn.

19

Sodomanba Gomorranba Pinishib

1 Incha tru pagatø angelesmerabe tru Sodomasrømbe nøsig pineb iben, pubene, Lotbe tru Sodoma ciudayu kebambi yaskabsrø wabig køn. Incha Lotbe truilan ashippe, amrruy chinrrab pasramisrøptincha, maløwan pirausø kebatamnegatig utsøbasrøbig køn.

2 Inchabe trenchibig køn:

—Nai kasukumera, na ñui karui megabigwei yausrø kørrømisrtrab amrruray cha. Incha ñimui katsiimeran kwallchigay cha. Incha srønabe løtsø kurra ñimui ambamigwan amrrigay— cha.

Inchen nømbe trenchibelø køn:

—Kah cha, møi yembe nambe yu umbu puinuutø, ka kørrømisrtrab ker— cha.

3 Inchen Lotbe truba truba inchen, nømbe nøba amba, nui yau kebamben, nøbe tab mamimera tamarøb, pirri chi levaduragailø karøb inchen, nømbe mabelø køn.

4 Inchen nømbe kinrrabguen waramismøwatø, tru ciudayu møgueløbe yawan kerrigu chab tulsrubelø køn, maya misag matsøreløgurrimbunø kølleeløgatikke.

5 Incha Lotwane trenchib trashibelø køn:

—Tru ñui yau kinrrab amrrub møgueløbe chu purra? chib. ¡Wambig webetay! chib. Nambe nømbe ishumburmeraba lataitøwei marøg kuin pønrrer— chib.

6 Inchen Lotbe wambig webya, yaskabwan kasrøb trenchibig køn:

7—Nai misaamera, tiusmanda øyeekkatig trømbøgøliibe martrab inchimøtay cha.

⁸ Nabe pagatø nimbasrmera tøgagig kur cha, managuen kan mu møøba kimeelø. Nabe truilane wertrur chibig køn, ñim truilan maig marøg køben martrigay cha. I møguelane chigucha treebe marmørrunrigay chibig køn. Kaguende truiløbe nai yaambu mugøben kaig martrab inchib kønrrain kømøtø, na ashib tøgaguilø purran— cha.

⁹ Inchene nømbe trenchib løtabelø køn:

—jYugurrimbe mendatsu!— cha. Inchabe treekkucha chibelø køn:

—Ya peesriig namui utu ka tsunrrab arruatiig købendø, jpaare! ¿namune maig maramigwan ke ñi asha karunrrab indirru? cha. Møimbe truilan lataguen kømø, ñune purø trømbøikken martrumøn— chibelø køn. Inchabe Lotwan melambua, yaskabsrø kemalla, yaskabwan wesra kutchab inchibelø køn.

¹⁰ Inchen tru pailø møgueløbe yaambugurri taska kemørøppa Lotwane yaambumay kesrub, trugurrimbe yaskabwan kasrøptinchibelø køn.

¹¹ Incha tru møgueløbe tru yau yaskabu melambub amrrubelane kameran ashmeelø misrtrai marøptinchibelø køn, mas unøtiigwangurrimbunø kølliwangatikke. Inchen nømbe yaskab lab ke mandøguen kømui inchib købig køn.

¹² Incha tru møguelø kørrømisrøbeløbe Lotwan trenchibelø køn:

—¿Ñigan ñui yaelø mas tøgagøtirru? cha. Ñui yernomeran køben, ñui nusrkalan køben, ñui nimbasrmeran køben, yugurri wesru chibig køn.

¹³ Kaguende nambe i ciudawan kerrigu pinisamig køn cha. Tru katøgan misaamera yeeg kaig martan chib trashib eshak melaibe Jehovahø nø waisrø puin køn cha. Inchagurri Jehovahøbe namune ciudawan pinishinrrai ørig køn— cha.

¹⁴ Inchen Lotbe tru nui yerno kønrrabeløba waminchab webibig køn, tru nui nimbasrmeran kasharanrrab misrarmera købeløba. Incha trenchibig køn:

—jMallatø webambay! cha, kaguen Jehovahøbe i ciudawan pinishinrrab køn— cha. Trune nui yerno kønrrabeløbe ka intsab trendaitamaptøh isubelø køn.

¹⁵ Inchen yandø tør— rrab arruben, ángelesmerabe Lotwan mallatø indingarub, trenchibelø køn:

—jMallatø inchi chiben! cha. Ñui srawanba, ñui pagatø nimbasrmeranba yu purrabelan pera inrrø chibig køn, ciudayu trømbøig nebunrrai marigu ñim pinømønrrappe.—

¹⁶ Inchen Lotbe ke peguen inchimuben, tru pagatø møgueløbe nunba, nui srawanba, nui pagatø nimbasrmeranba tasku kemøra, nømune ciudayugurri wambiisrø wesrubelø køn, Jehovahøwei lastima asiitøga.

¹⁷ Incha yandø ciudayugurri wambiisrø wesrawa pasrabe, kane trenchibig køn:

—jÑui øsig kuigwan ñi tøgønrrappe, welula inrrø! cha, wendømay keshmøwei, i chagu chu pasramisrømøweingue. Ñui øsig kuigwan tøgagønrrab tunsrømay lul cha, pinømønrrappe.—

¹⁸ Inchene Lotbe trenchibig køn:

—Kah, cha nai kasuku na ñim maig taigwan megabig tiusmanda, treebe kaimamønrrun cha.

¹⁹ Nabe ñimuin kabyu tab kui asig kuinaig købene, nai øsig kuigwan na tøgagømig kønrrai ñimbe nane purø nu lastima asig køn cha. Inchendø nabe tunsrømaybe lulrrab kaimamønrrun chibig køn, inchippa na trusrø pumuatoø kaig attrabig nan wetøgøben, kwamig kømønrrai.

20 Yu puluwandø kan lamø ciudagøllig køn cha, trusrømaybe lulamønrrun chibig køn nabe. Trusrømay ibashcha cha, pøs, trube lamø ciudagøllig kømuitarru cha— truyu na øsig kømigwan ka tøgagømig kønrrai.—

21 Inchen trenchibig køn:

—Ñi øyeeg miaigwangucha nabe mørar cha. Tru ñi wamindi ciudawane nabe pinishimumønrrun chibig køn.

22 Trube, øsig kug købene, mallatø trusrømay lul chibig køn. Kaguende ñi trusrøpumatøbe, nabe chigucha martrab kaimamønrrun— cha. (Inchagurri tru ciudawane Zoar cha wamig kuig køn.)

23 Inchen Lotbe Zoarsrø pubene, yandø pørrbe neeshib arrubig køn.

24 Inchen yandø Jehovábe srømbalasarøngurri azufreba, naaba sre pubig ørøbig køn Sodomainbalaba, Gomorraimbalaba.

25 Incha tru ciudameranba, katø truyu warab misaameranba, tru chaameranba, katø tru pirau chi kal-lawa pønrrabelanbañau chishtøh pinisaig købig køn.

26 Inchen Lotwei sraimbe møimbe wendømay keeshenba, nøbe maig kuimaytiig tre srug misra pasrambuig køn.

27 Katø kwaløm Abrahambe løtsø kurra Jehovába tru nø waminchib pasraistrømay ya,

28 Sodomaba, Gomorraba katø trusrø muba chag kuimburab truguebsrø ashene, naguishbe kan nu tra pachib lataig piraugurrimbe kurrab pasraptinchibig køn.

29 Øyamay tru muba chag kuimburab ciudameran Tiusbe pinisaig køn. Inchendø Tiusbe Abrahamwane isua tøgø pasrøwa, tru Lot tsuig ciudameran purø trømbøig pinishib arrubigugurri Lotwane wesraig køn.

Lotba Nui Pagatø Nimbasrmeraba

30 Inchen Lotwane Zoarsrø kørrømisra tsumibe kørig køben, nui pagatø nimbasrmeraba tunmera tøgø pirømerasrø tsunrrab ya, nømbe pønəløba kan peña trab pasrabyu warønrrab kørrømisrøbelø køn.

31 Indiibe kan kwaløm køli nimbasrbe tru wendø numøsrwane trenchibig køn:

—Namui møskaimbe yandø kølliizhig køben, yu nam warainuube namba kasharanrrabelø muguen møgueløbe kaagøn cha, yu piraube mutøgucha trendø treeg kasharamig købig købene.

32 Namui møskawan vino mutsøsa mutsiirana, nøba kigun cha, trumay namui møskaweinukkurri amrrub misamera tøgagømig kønrrain— cha.

33 Incha tru yem møskawan mutsiirana, køli nimbasrbe kebya, møskaimba kibig køn. Inchen møskaimbe nune kinrrab tsumisren, mørmøwei, ni katø kurra iben mørmøwei indin købig køn.

34 Incha katø kwalømbe tru køli numøsraimbe wendø numøsrwane trenchibig køn:

—Nabe marig yem nai møskaimba kiaig køn cha, katø møi yemgucha mutsiirana, møimbe ñi kebya kinrrig cha, trumay nam namui møskaweinukkurri amrrub misamera tøgagømig kønrrain— cha.

35 Incha tru yem katø møskawan vino mutsøsa mutsiirana, wendiibe kurra, katø møskaimba kibig køn. Inchen møskaimbe chu uras nøba kinrrab tsumisri mørmøwei, ni chu uras kurra, yai mørmøwei inchibig køn.

36 Incha Lotwei pa mimbasrmerabe pailøba møskawei kwanrreelø kørrømisra,

³⁷ kōli nimbasrbe kan nusrkai tōgamisra, truigwane Moab munchi pasrig kōn. Treekkurri trube mōi ya moabitasmerai mōskain kōn.

³⁸ Inchen wendiikkucha kan nusrkai tōgamisra, truigwane Ben-ammi munchi pasrōbig kōn. Inchen trube tru mōi ya amonitasmerai mōskain kōn.

20

¹ Incha Abrahambe tru nō tsuinukkurri Neguev pirausrōmay ya, trube Gadesba tru Shur ciudadameraba pōnrrabnug tru utu kōrrōmisrōbig kōn. Incha tru Gerarsrōmbe ka purainrrab arrubig lataitō tsuabe,

² trusrōmbe tru nui srai Sarane, “naimbe nōbe nuchag kōn” chibig kōn. Inchen Abimélec tru Gerarsrō reybe Sarane wamōnrrab ōra, nui srain kōnrrai isua kōrrōmarōbig kōn.

³ Inchen tru yem Abimélecebe kan piaig tōgaguiyu Tiusbe arrua, nune trenchibig kōn:

—Ñibe kwanrrabguen cha, kaguende ñi ñui srain kōnrrai ñi kōrrōmari ishuube kasharaweig kōn— cha.

⁴ Inchendō tru Abimélecebe tru ishuwane pera kib chi marmuig kua, nōbe trenchibig kōn: —Señor, ¿chi kalō marmígwangucha ñigan kwetchab indirru? cha.

⁵ Yamba Abraham nōtōwei ¿ōyah chimuig kuitarru? cha: “Naimbe nōbe nuchag kōn” cha. Inchen katō ishug misakkucha: “Naimbe nuchagwein kōn” cha trendaig kōn cha. Nabe nai manrō umbugurri chi kaig isua kōmōtō, nai tasiimeran chishig tōga pasrab, iigwan ōyeeg marig kōn— cha.

⁶ Inchen Tiusbe piaigu trenchibig kōn:

—Nagucha asha pasrar cha, ñui manrō umbugurri tabig isua marigwan. Incha nabe ñi nan kalō marmōnrrai na ñun kebachibashmuig kōn cha.

⁷ Inchawei ñi katōle nui keeba inrrai ibashmuisruandōbe ñibe isa kōmō, kwanrrabguen cha, ñui yau mutō purrabelō kōben truilōbañau. Kaguendō nōbe Tius maig karuigwan eshkabig kōn cha. Incha ñi ōsig kōnrrai ñuimburo purōwaminchun cha—

⁸ Indig katō lōtsōbe Abimélecebe lōtsō kurra, nui tru karub peraguilan wama, truilan mayeelan nun chi purayaigwan kerriguh eshkabig kōn. Inchen tru mōguelōbe purō kōrrō kōrig kui inchibelō kōn.

⁹ Inchen Abimélecebe Abrahamwan wama, trenchibig kōn:

—¿Ñibe namune chi mara pasrōgu? cha. ¿Pōs, nabe ñune chiyu kalō marta? cha. Ñibe naimbalaba, na misagwan karub tōga waimbalaba purō trōmbōig kalō maringarubsrutan cha. Ñibe nane chi maraamígu mara pasrtan cha.—

¹⁰ Incha katō Abimélecebe Abrahamwane trenchibig kōn:

—¿Chi isuarre ñibe ōyeeg marig kō?— cha.

¹¹ Inchen Abrahambe trenchibig kōn:

—Nabe nainetō treeg isuig kōn cha: “Yusrōmbe Tiuswan kōrig tōgar muguen kaagua, nai srawan nōmui mara kōrrōmarōkkōptō nane kwetchaitamab”.

¹² Inchendō chiwei isamō chibig kōn: “nōbe naimbe nuchagwein kōn” cha. Nai mōskaweimbe nōbe nimbasrwein kōn cha, usrimbe katōgan usrin kuindōgucha. Inchagurri nabe nune nai srain kōnrrai marig kōn cha.

¹³ Nai mōskawe yaugurri nan Tius ka truōrōtō, truōrōtō uñchai nan webingarub nabe Sarane trendaig kōn cha: Na ñui keg kuitamab isua ñi tōga pasrōwabe trube, ōyeeg chirrunrrig cha. Nam chu pub ambiisrōndōgucha ñibe ōyah chirrunrrig cha, ‘ñibe nai nuchag kur’ — cha.

¹⁴ Inchen Abimelecebe Abrahamwane ubishamera kòben, waaramera kòben, katò nui karuig mendig melab mòguelan kòben, ishumburmeran kòben tranòbig kòn. Incha katòle nui srai Sarangucha tranòbig kòn.

¹⁵ Incha Abimelecebe trenchibig kòn:

—Nai piròmerabe kerriguba ñui merrab pasran cha, ñun katòguchi tab tsumdònug, truyu kòrròmisra tsu— cha.

¹⁶ Incha Sarane trenchibig kòn:

—Nabe ñui nuchawane tsantsòn anmera mil tranar cha, tru anbe øyeeg purayaigwan truburò trani an kòn cha, trube ñi chi kalò marmíig kuin kui ashchai maya misagwei malau kenamarig kònrrain cha. Trumaybe ñune mugucha kaig waminchippe kònrraamòn— cha.

¹⁷ Inchen Abrahambe Tiusba waminchen, Tiusbe Abimelecwanba, nui srawanba trugurri nui karuig mendig melab ishumburmeranba ureg tógagònrrai tamaròbig kòn.

¹⁸ Kaguende Jehovahé Abrahamwei srai tru Saran øyeeg puraiben Abimelecwei yaelane ureg chigaanrrai mayeelai matrizwan kasraig kua.

21

Isaac Kal-laig

¹ Nò maig taig kòbigwan trumay martrab Jehovahé Saran ashchab arrua, nune tru maig tranrrab kòròmisrigwan treeg marig kòbig kòn.

² Inchen Sarabe kwanrriig kòrròmisra, Abraham kòlli misagwei kan nusrkai tógaguig kòn. Tius tru mana tógagònrrun taig tru uraske.

³ Inchen tru Sara tógaguig unò tru mòg-unò kal-labigwane Abrahambe Isaac munchi pasrig kòn.

⁴ Incha Abrahambe tru nui nusrkai Isaacwan trattò y pòn kwalømyu circuncidaig kòn, Tius maig karuig kòben, treekke.

⁵ Nui nusrkai Isaac kal-laben, Abrahambe pilamera cien tógaiig kòbig kòn.

⁶ Incha Sarabe trenchibig kòn: “Tiusbe nane ka intsòg kònrrai marig kòn cha. Mòikkòben na unò tógaguin kui wammòròbelòbe naba ketòtò intsònrrun cha.

⁷ ¿Abrahamwane mugui trenchinrrautah cha, Sara ureg mutsòsrònrrun? chabe. Inchen kòben, Abraham ya kòllig kòben nabe kan nusrkai tranar” chibig kòn.

Agarwanba Ismaelwanba Abrahamwei Yaugurri Webusriilò

⁸ Inchen Isaache nurab iben, yandò pitsò kuchen, tru pitsò kuchib kwalømbe Abrahambe larrò tab mamiimera tamaròbig kòn.

⁹ Inchen Sara ashene, mòimbe tru Egiptosò Agarwei nusrkai tru Abrahamba tógaguig unò Ismaelbe, nui nusrkai Isaacwane ke ka intsatò ashen,

¹⁰ Sarabe Abrahamwane trenchibig kòn:

—Ñui tru karuindiig megab ishuwane nui nusrkawanba yugurri weguchi cha, kaguende tru ka karuindiig megab ishuwei nusrkaimbe nai nusrkai Isaacbabe chi tógaguigwan keta tranamigube tógatò ashchabig kòmòn— cha.

¹¹ Inchen øyeeg wammerabe Abrahamwane purò murig pubig kòn, kaguen nui trag unan øyeeg nebuben.

¹² Treeg kuindògucha Tiusbe Abrahamwane trenchibig kòn:

—Ñui karuindiig megab ishuweimburab lata unaimburab lata chi isumòta cha. Sara nò maig taigwan kerriguba ka mòra, trunun treeg ka mar cha, kaguende ñuinukkurri amrrunrrab misaamerabe Isaackurri kònrrun cha.

13 Inchen tru ñui karuindiig megabigwei nusrkaweinukkurringucha truba truba nõrrø sõtø misaamera kônrrai nabe treeg maramønrrun cha, kaguende ñuinukkurri arrubig kuimba.—

14 Indig katø kwalømbe Abrahambe lõtsøzhig kurra, Agarwane pirrin køben, pi niguin kalusyu pi køben trana, kildunyu mutøsrø, Ismaelwane yandø ñi ashchig cha nun tranabe, ka amrrigay chibig køn. Inchen nõbe webya ya, Beerseba tru mu misag warab waraimøsrø chu pumikkaig llirab uñibig køn.

15 Inchen tru kalusyu niguin pibe patsaptinchen, unane kan lamø tusr umbusø wanna,

16 usrimbe truygurri kan maya yabgøsrøn ashib wanrrab tarømisrøbig køn. Kaguende nõbe treeg isubig køn: “Nai unan kwai ashig kømøtan” cha. Inchen usri wamisren, unøbe trashib kishibig køn.

17 Inchen Tiusbe unø trashib kisigwan mõren, Tiuswei ángelbe Agarwan srømbalarøngurri wama trenchibig køn:

—¿Agar, chinnda? cha. Chi korig isumøta cha. Kaguende unø nõ wainukkurri kisigwan Tiusbe mõrin køn cha.

18 Kurra ya, unan tasku kemøra, srua pasramisrø cha, kaguende nabe nuinukkurri misaamera purø nõrrø sõtø kônrrai maramønrrun— cha.

19 Inchen tru uras Tiusbe Agarwan kammeran kurøptinchen, nõbe kan pisu waig ashiptinchibig køn. Inchen Agarbe tru pi niguin kalusyu pi netsøgana, unan pizhig srørrøbig køn.

20 Inchen Tiusbe unan lincha pasrøben, unøbe nurab ya, mu misag warab waraimøsrø tsua, nõbe arcotøga søl øramibe kan piaig lataig købig køn.

21 Incha nõbe Paran tru mu misag warab waraimø pirausrø tsubig kuig køn. Inchen usrimbe nune kan Egipto pirausrø ishuuba kasharanig køn.

Abrahamba Abimelecha Øyamay Kônrrai martrab cha Kørrømarig

22 Tru kwalømmerawandøwei Abimelecha katø tru nui suldaumeran nõ asha karubig Ficolba Abrahamwan trenchibelø køn:

—Ñi chi marøb arrigutøgucha Tiusbe ñiba pasran cha.

23 Incha mõi yutøwei ñibe Tiusken ashen ¡katø! nabe treeg marmø kømø, maramønrrun taitøga kalø marmørrumøn chirra chibelø køn, tru nan lata, nai nusrkawan lata, nainukkurri amrrub misaameran lata. Incha ¡katø! treeg maramønrrun chirra chibig køn nanba, mõi ñi yu tsuim pirau misaameranba tru purainrrab arruatiigwan utabelan tab inchib tøgagørrunrig cha, tru ñun mandø tab indig køben tru tab indiitøga treetøwei tab inchib.—

24 Inchen Abrahambe trenchibig køn:

—¡Katø! nabe treeg marmø kømø, maramønrrun— cha.

25 Inchendø Abrahambe Abimelecwane ‘ñibe nane øyeeg kalø marig køn’ cha trunun wesrabig køn, tru Abimelecwei karuig mendig melabelø Abraham tru pirø umbugurri pi wesraizhig købigwan nun kerraigwan.

26 Inchen Abimeleche trenchibig køn:

—Nabe øyeegwane murreendi mõrmur cha. Katø ñigucha nan wammørsøsrømøwei inchene, nabe mõinguen wammørbøb pasrar— cha.

27 Inchen Abrahambe ubishamera køben waaramera køben srua arrua, Abimelecwan tranøbig køn. Incha ambugurri, igurri øyamay kônrrab cha wamincha kørømisrøbelø køn.

28 Inchen Abrahambe nui ubisha sõtømeraygurri ishug ubisha-ureezheelø trattrø y par, nuingui tarømarøbig køn.

29 Inchene Abimeleche trencha payibig køn:

–Iig tru ishug ubisha-ureezheelø trattø y par tru ñi nuingui tarømariiløbe ¿maig punrrabigwan eshkabig køh?– cha.

³⁰ Inchen Abrahambe trenchibig køn:

–Tru iig ishug ubisha-ureezheelø trattø y par ilan na ñun tranen, ñi utiibe tru pirø umbugurri pizhigwane na lalla wesraig købigwan trunun eshkab pasrønrrabig køn– cha.

³¹ Incha treekkurri trusrømbe Beerseba cha wamig køn, kaguende tru pa møguelø truyu ambugurri, igurri øyamay kønrrab cha wamincha kørrømisrig kua.

³² Incha øyamay kønrrab cha kørrømisøbelø køn tru Beersebasø. Incha Abimelecha katø tru suldaumeran nø asha karubig Ficolba katø filistosmerai pirøsrømay katø ambubelø køn.

³³ Incha Abrahambe tru Beersebasø kan tamarisco tusr ellguawa pasrabe, Jehová, tru Managurri Managatig Wabigwei munchiwan isub wamabig køn.

³⁴ Incha Abrahambe filistosmeraim pirausrø purø yana tsuig køn.

22

Tiusweyasig Isaacwan Kwetchai Abrahamwan Tius Karub

¹ Inchen kan maya yanagøsrøn puraiben, Tiusbe Abrahamwane nui isubigwan Tiusweinug tøga pasraibe maig køtashchab ashchab marøbig køn. Incha Abrahamwan trenchibig køn:

–Abraham– cha.

Inchen nøbe:

–Yu pasrar– chiben,

² Tiusbe trenchibig køn:

–Møimbe ñui kandø nusrkai ñi truba undaaraigwan pera, Moriah pirausrømay ya, truyu kweecha, nan keta tranrra chibig køn. Kan tunyu maramigwan na eshkarrumøn– cha.

³ Inchen Abrahambe katø kwalømbe løtsøzhig kurra, nui burrun tsølig pasra, trugurrimbe tru kweecha parramigweyasig trar para, nui karuig mendig melabelø pailanba nui nusrkai Isaacwanba pera, Tius chumay inrrain taisrømay ibig køn.

⁴ Incha pøn kwalømyube Abrahambe kurraashabe yabgurrindø trusrø nebua ashibig køn.

⁵ Inchabe tru nui karub pera kuilane trenchibig køn:

–Ñimbe yutø burrun srua muniiranrrigay cha. Nabe unøbatø trusrøngatig amba, Tiuswan tabig waminchib kua, katøle ñimuimay amrrumønrrun– cha.

⁶ Incha Abrahambe tru kweetsigwan Kerrigu parram trarwan tamara, nui nusrkai Isaacwan niisra, nøbe nagwanba, kuchillunba nemøra srua, pailøba ambub mendabelø køn.

⁷ Inchabe Isaache nui møskai Abrahamwane:

–Papá– chiben, møskaimbe:

–Nai nusrkai ¿chi chinrrab inchigu?– chiben, Isaache trenchibig køn:

–Nambe nagwanba, trarwanbabe tøgaguer cha. Inchendø tru kweecha keta tranam ubisha unøbe ¿chu pasrah?– cha.

⁸ Inchene Abrahambe trenchibig køn:

–Nai nusrkainzhig, tru keta tranam ubisha unane Tius nø ashchab kuinrrun– cha. Incha pailøba ambub købelø køn.

⁹ Incha Tius tru chu taisrø puabe, Abrahambe kan altar kusrua, tru pala trarwan tamara wara, nui nusrkawan lusra, tru pala trarrøbig køn.

¹⁰ Incha Abrahambe nui nusrkawan kwetchab kuchillun srua kwalwan kusrubene,

¹¹ møyimbe Jehováwei kan ángel srømbalarøngurri wamaptinchibig køn:

—¡Abraham! ¡Abraham!— chib.

Inchen nøbe:

—Yu pasrar— chiben,

¹² ángelbe trenchibig køn:

—Ñui tasigwan ñui nusrkaweimbala kusramøta cha. Chigucha marmøta cha. Ñibe Tiuswane kørig tøgag maig købash inchimíig kui ashar cha, kaguende ñui nusrkai kandiigwan treebe marøg kømøtan chimøn— cha.

¹³ Incha Abraham ashene, nui wendaube kan carnero srar kwaliimerayuy iløsrka megaptinchibig køn. Inchen Abrahambe tru carneron kemøra nui nusrkawaimburø, kweecha, kerrigu parrøb Tiuswan keta tranøbig køn.

¹⁴ Incha Abrahambe truyube “Jehová Chi Palabigwane Nø Ashibig Køn” cha munchi pasra wamig køn. Incha møyin kwalømgatig trenchibelø køn: “Tru tunyube chi palabigwane Tius nø ashchun” cha.

¹⁵ Incha Jehováwei ángel srømbalarøngurri Abrahamwan katøle wama,

¹⁶ trenchibig køn:

—Na Jehovábe mui katøganwei merrab kømø, nabe naasiitø marig kørrømisrtrai maramønrrun chib pasrar cha. Kaguende ñibe øyeeg maran cha, ñui kandø nusrkawan øyeebe marøkkømtøtan chib, nan trenchib pasrømtø.

¹⁷ Inchawei nabe ñune mayanguen tabig nebuig kønrrai tranamønrrun cha. Ñuinukkurri amrrub misaamerane purø nørrø kønrrai maramønrrun cha, srømbalarø kønchabiimera pønrrabig lataig, mar menda pisrum lataig kønrrai nørrø køptø. Ñuinukkurri amrrub misaamerabe nøyum ashig kømui inchibelai ciudameran nøyum merrarrowa tøgá pønrramisrtrun cha.

¹⁸ Ñui yellyu misaameragurri chu pirausrøn køben misamera nørrø sötø warabeløbe mayanguen tabig nebuig kønrrun chibig køn, nai wamwan ñi møyikkurri.—

¹⁹ Incha Abrahambe tru pailø nui karui melabelø munig kørrømisrøbelaisrømay katø ibig køn. Incha trugurrimbe ketøtø lincha Beersebasrømay ambubelø køn. Incha Abrahambe yandø trusrø tsumisrig købig køn.

²⁰ Indig wendøsrø Abrahamwane treeg wam pubig køn: “Tru nui nuneg Nacorwei srai Milcabe nusrkalo tøgagøn cha.

²¹ Ke srøsrø tøgagui nusrkaimbe Uz køben, tru wendaube Buz køben, trugurrimbe Kemuel køben købig køn.

²² Tru wendau kal-labeløbe Hazo køben, Pildas køben, Jidlaf køben, Betuel købengue.

²³ Inchen tru Betuelbe Rebecai møykain købig køn. Iilø køn Abrahamwei nuneg tru Nacorwei srai Milca tøgaguig nusrkalo trattø y pøngatøba.

²⁴ Katø Nacorbe nui linchaig Reumába nusrkalo tøgaguig købig køn. Tru- iløbe Teba taig køben, Gaham taig køben, Tahas taig køben, Maaca taig køben kuig køn.

23

Sara Kwaben Søyig

¹ Sarabe pilamera cientoveintisiete tøgag tsua,

² Canaan pirau Hebrón ciudayu Quiriat Arbasrø kwaig købig køn. Incha nøbe Sara kwaben kisha, truba isuin kørrømisrøbig køn.

3 Incha Abrahambe tru kwabig tsunukkurri webya ya, truyu hititasmeran trenchib waminchibig køn:

4—Nabe ñimui utube ka peesrøngurri arruatiig kuinaindøgucha, nai srawan sòramigweyasig yanrra— chib.

5 Inchen hititasmerabe trenchibelø køn:

6—Tiusmanda namui kølli misag namun mørtra cha: Ñibe namui utube chi maramigwan ñi asha karubig kønrrai Tius wesra pasrig møg køn cha. Ñui srawane namuyasig purø tabig tamarig pønrribagu sørø chibelø køn. Namui utube møikkucha ñui srawan tru sora tramigwane ka chimønrrun— cha

7 Inchen Abrahambe kurra pasramisra, hititasmerai merrab utsøbasrøptinchabe trenchibig køn:

8—Nai kwabigwan na yu sørønrrai ñimun tabig asønabene, Zoharwei nusrkai Efrónwan tiusmanda naimburø wamincha kettray cha,

9 tru Macpela tain pirau linderomerayu sòramig srug trab lalig pasrabigwan nan yanrrai. Mayaweyig kønrraptiig køben treezhigwan ñim mayeelø ashen anwan na wartrab tan chirrunrigay cha, trumay nai yau misaam-eran sòramig tøgagønrrab— cha.

10 Inchen tru Efrón hititabe nui misag utu wawabe, truilø mørøb, katø tru nui ciudayu yaskabwan mayeelø kebambubelø mørøb inchai Abrahamwane trenchibig køn:

11—Nai kølli misag, tiusmanda, pirøwane ka kettrumøn cha, katø tru sòramig srug trab lalig tru pirau pasrabigwanba. Nai misaamerabe nømbe asha kørrømisra cha. Na pirøwane ñune ketig køben, ñui srawane ka sørø—chibig køn.

12 Inchen Abrahambe tru pirau maya misagwei merrab utsøbasra,

13 truyu warab misaamerai merrab tru Efronwan Abrahambe trenchibig køn:

—Ñi pirøwan nan yanrrab isuppe, tiusmanda mørtra cha. Tru pirø mayaweyig køn, chiben, nabe treegwan anwan wartrumøn cha. Trumay kørrømisra cha, treebe si, nai srawan na truyu sòramønrrun— cha.

14 Inchene Efrónbe Abrahamwane trenchibig køn:

—Nai kølli—misag tiusmanda mørtra cha.

15 Pirøbe tsandzøn an cuatrocientosweyig køn cha. Inchendø anwan isumøtø tru kwabigwan ka sørø— chibig køn.

16 Inchen Abrahambe tru Efrón trendaigwan trumay kørrømisra, Efrón mayaweyig køn cha eshkaigwan tru hititasmerai merrab Abrahambe cuatrocientos tsantsøn anwan mõi, mõi unaashibig køn, tru penab, yanøb inchibelø maig marøbelø køben treetøweingue.

17 Inchawei tru Efrónweim pirø tru Mamre taisrø pørr neeshibgatømay Macpela taisrø pasrab pirøbe, tru sòramig tru srug trab lalig lata, tru pirau pønrrab tusrmera lata,

18 yandø Abrahamwei kørrømisrig køn, tru hititasmeraba, katø tru ciudayu yaskabwan kebambubeløba ashen.

19 Incha trugurri Abrahambe nui srai Saran tru Mamre pørr neeshibgatømay Macpela tain pirau sòramig tru srug trab lalig pasrabigu sòrabig køn, tru Hebron Canaan pirausrø.

20 Inchawei tru pirøba tru sorig srug trab laliibabe yandø Abrahamweyasig yandø mu kønøgamgaig kørrømisrig køn, truike tru hititasmera Abrahamwan yanig sòrab tøgagønrrai.

24

Abraham Isaacwei Srain Kønrrabigwan Lab

1 Yandø Abrahambe kōlliizhig pilameragucha tsabøtø tōgaig, chiyutøgucha Jehová mayanguen tabig nebuig kōnrrai tranigwan tōgaig kōbig kōn.

2 Incha kan piji Abrahambe tru nui karuig mendig megabig ke managurri peraguig nui chi kōbigwan nø asha marøb pasrabigwan wamabe, trenchibig kōn:

– Nui tasigwan nai srøptsim umbu estsartra cha.

3 Incha tru srømbalameranba, pirøwanba nø ashib pasrab Tiuswei merrab jkatø! treegwan marmø kōmø, nabe maramønrrun chirra chibig kōn. Yu Canaán pirau na tsuinug ishuvan nai nusrkaweyasig srain kōnrrai lab pasramig kōmønrrain cha.

4 Treeg kōmøtø, naim pirausrømay nai yau misaameraimay irrunrrig cha, nai nusrkai Isaácweyasig srain kōnrrabigwan lanrrab.–

5 Inchen tru karub peraguibe trenchibig kōn:

– ¿Inchippa ishug unø i pirausrømay naba arrumønrrab misrene, trube, maig punrrerrah? cha. ¿Trube, ñui nusrkawan tru ñi webarrua arri pirausrømay nabe pera yam punrrautah?– cha.

6 Inchen Abrahambe trenchibig kōn:

– Nai nusrkawane chiweinguen trusrømaybe pera imørrunrrig cha,

7 Jehová srømbalamerai nø Tius, nai mōskawei yaugurrimba, nai yau misaamerai piraugurrimba nan wesrabiibe, jkatø! treegwan marmø kōmø, nabe maramønrrun taitøga nan øyah chib wamindig kōn cha: “Ñuinukkurri amrrub misaameran i pirøwan tranrrumøn” cha. Inchawei nøbe nui ángelwan ñui merrab ørtrun cha, nai nusrkaweyasig srain kōnrrabigwan trusrøngurri ñi pera attrai.

8 Inchene ishug-unø yandø arrumubene, trube, tru jkatø! nabe treegwan maramønrrun cha, ñi kōrrømisriibe ñuimburappe yandø ñibe chi isumikkaig kōrrømisrabguen chibig kōn. Inchendø nai nusrkawanesi trusrømayguimbe pera imørrunrrig– cha.

9 Inchen tru nui karub pera kuibe tru nui karubig Abrahamwei srøptsim umbu nui tasigwan estsarøbig kōn, tru chi martrab taigwan jkatø! nabe treeg maramønrrun chib.

10 Incha nøbe tru nun karub pera kōbig Abrahamwei pa trattø camellosmeran nemøra, tru nui karub pera kōbigwei purø tabelan chine ketamig srua, Nacorwei ciudasarømay ibig kōn, tru Mesopotamiasrømay.

11 Incha ciudayu kōmøtø, wambiisrø camellosmeran kan pisu pulu tōmbønsrøngarubig kōn isrønrrai, yandø maaben køben, tru srusralmera pi kalrrab werrum uras.

12 Inchabe trenchib Tiusba waminchibig kōn:

– Nan karub peragøbig Abrahamwei Tius, møin kwaløm na purø tab purayamig kōnrrai martra cha. Nan karub peragøbig Abrahamwan ñi purø tab indigwan nun kenamar cha.

13 Nabe yu pisu pulu pasrar cha, tru i ciudayu srusralmera pi wesranrrab amrrumne.

14 Incha na tru srusran øyah taig truig kōnrrain cha: “Na lamø pi mutsamig kōnrrai tiusmanda ñui kōtsøn pinøsrø” chiben, nøbe løtappe: “Muchi cha. Katø ñui camellosmeran chigucha na pi mutsøsrāmønrrun” cha trenchibig, truig kōnrrain cha, tru ñi lawa wesruig, ñui karuig megabig Isaácweyasig. Øyamay nabe wetøbenamønrrun cha, ñi nan karub peragøbigwan purø tab indigwan.–

¹⁵ Inchen nø Tiusba chab waminchimøwatø, mømibe kan srusrø nui kòtsøn kildunyu mutaig arruptinchibig kòn, truiibe Rebeca, Betuelwei nimbasr. Tru Betuelbe Milcaimba, Nacorweimba nusrkain kòbig kòn, Abrahamwei nunewei.

¹⁶ Inchen tru srusrøbe truba tab ishug kòbig kòn, mu møøbagucha kia kòmfig kòbig kòn. Tru srusrøbe pisuyu kørraarrub, nui kòtsøn pi netsøganøb katø inrrab iben,

¹⁷ tru Abrahamwei karuig mendig megabiibe truigweimay lulabe, trenchibig kòn:

—Ñui kòtsøyu piwan kuchi srørrøbsrumuguh— cha.

¹⁸ Inchene nøbe:

—Nai kasuku, muchi— chibig kòn.

Incha mallatø kòtsøn pinøsrub, kòtsøn tasku muta pasramisra srørrøbig kòn.

¹⁹ Incha:

—Ñui camellosmeraingucha pi wesranrrab chibig kòn, mutsamburab mutchai.—

²⁰ Incha mallazhiitø tru kòtsøyu piwan tru pi kwarainug kwara treetø, treetø yambiji pi wesrawa, mam camellos kuimba mutsamne kwarøbig kòn.

²¹ Inchen tru Abrahamwei karuig mendig megabiibe chigucha chimøtø, asig pasrabig kòn, kaguende nøbe ke tab wetøbeñchab inchib pasraig kua, tru nø arriibe ka kauløtø kòmø arrig kònrrai Jehová nun puruguig kòtashig køb.

²² Inchen tru camellosmera piwan chab muchen, tru Abrahamwei karuig mendig megabiibe kan oro surtigas seis gramos tøgagwan kimyu mesrønrrai tranøb, katø kwalmurray pagatø orotøga mariilan treetøwei pønrsøb inchibig kòn, kwatsiimaybe cien gramos menrraikke. Inchabe trencha payibig kòn:

²³ —¿Ñibe mui nimbasr kugu? cha. Tiusmanda eshkarra cha. Katø ¿ñui møskawei yaube naba, nan lincha amrrub møgueløba chu kørørmisramdiig kò chinderah?— cha.

²⁴ Inchene nøbe trenchibig kòn:

—Nabe Betelwei nimbasr kur cha, tru Milcaimba, Nacorweimba nusrkawei.—

²⁵ Incha katø trenchibig kòn:

—Namui yaube ñim kørørmisra kiamiitø kòmø, katø camellosmerai pu køben, para kebusriilø menrraguen tøgaguer cha, katø ñimuyasig chigucha.—

²⁶ Inchen tru møøbe tømønrsra utsøbasrabe, Tiuswan trenchib tabig waminchibig kòn:

²⁷ “Jehovábe maya nugucha, tabig kòn cha, nan karub peragøbig Abrahamwei Tius. Nøbe nan karub peragøbigwan, purø nu tab indigwanba managuen elachimumigwanba kenamarøb pasrain kòn cha. Incha nan karub peragøbigwei nømmissamerai yausrø punrrai mariitan” cha.

²⁸ Inchen tru srusrøbe luløbig kòn, tru chi purayaigwan nui yaelan eshkanrrab.

²⁹ Inchen tru Rebeca kan nuchag Laban taig tøgaguibe, truiibe tru mowan lanrrab pisusrøngatig luløbig kòn,

³⁰ kaguende Labanbe nuchawei tru surtigaswan køben, katø tru kwalyu pønrsraigwan køben ashib, katø ‘tru møg øyah, øyah chitan’ chib eshkaigwan mørøb indig kua. Incha Labanbe tru Abrahamwei karuig mendig megabigwein pulusrø kemallibig kòn, truiibe nui camellosmeraba pisu pulusrø srø pasramne.

³¹ Incha Labanbe trusrø pua:

—Jehová maya nuguen tabig nebuig kônrrai indi møg, amø chibig kôn. ¿Ñibe wambiitøbe chinchib pasrønrragu? cha. Nabe yawane ñuyasig chab tamarar cha, katø ñui camellosmerain chigucha.—

³² Inchen tru Abrahamwei karuig mendig megabiibe yamay arruben, nømbe camellosmeran niisrillan chab picha warabe, manrrai pønstrøbig kôn. Incha trugurrimbe pi srúa arrubig kôn, tru Abrahamwei karuig mendig megabiiba, tru nui lincha amrrubeløba nømui srømmeran kwallchai.

³³ Incha manrrai mamiimera pønstrøben, Abrahamwei mendig megabiibe trenchibig kôn:

—Nabe na chi wamindamigwan wammørøsrømøwatøbe uta manrrab kaimamørrun— cha.

Inchen Labanbe:

—Trube, wammørøsrørra— chibene,

³⁴ Tru Abrahamwei mendig megabiibe trenchibig kôn:

—Nabe tru Abrahamwei mendig megab møg kur cha.

³⁵ Nan karub peragøbig Abrahamwane Jehovábe mayanguen tabig nebuig kônrrai marig kôn cha. Nøbe larrø pua møg kôn cha. Nune ubishamera køben, waaramera køben, an køben, orø køben, karuindiig melab møguelø køben, ishumburmera køben, camellosmera køben, burrusmera køben tranig, treeg tøgagøn cha.

³⁶ Inchen, nan karub pera købigwei srai Sarabe, køllimbala nui kan nusrkai tøgamisrig kôn cha. Inchen nan karub peragøbiibe nui chi tøgaguilan kerriguba nui nusrkaweyasig kørømaran cha.

³⁷ Nane nan karub peragøbiibe, ¡katø! nane øyeegwan marmø kømø, maramønrrun tingaru tan cha, øyah chib: “Nai nusrkaweimbe yu Canaán pirau tru na tsuinug ishumburmerai utu ishuvan srai lanrrain kømøn” cha.

³⁸ “Treeg kømøtø, nai møskawei yau misaameraimay ya, nai misagugurri amrrub ishumburmerai utu ishuvan nai nusrkawei srain kônrrai larrunrig” cha.

³⁹ Inchene nabe nun trenchibig kur cha: “¿Inchippa ishug-unø nai mendig arrumønrrab incheneh?” cha.

⁴⁰ Inchen nøbe nane trenchibig kôn cha: “Jehova maig chiben nabe trumay uninabig køben, truig ñune nui ángelwan ñiba inrrai ørtrun cha, ñi webya yaibe mayanguen tab punrrai, tru nai yau misaamerai yau ishug-unan nai nusrkawei srain kônrrai lanrrai, tru nai møskawei yauelainug.

⁴¹ Inchen nai yauelø ishug unan tranøg kømuintcheneguende ñi nan ¡katø! nabe treeg marmø kømø, maramønrrun taigwane trube, yandø ñibe chi isumikkaig kørømisrabguen chibig kôn.” cha.

⁴² Inchen na mõi pisuyu puabe, nabe Jehováwan øyah chib miaig kôn cha: “Nan karub pera tøgagøbig Abrahamwei ñi Tius, ñi na arrigwan nan tab webyamig kônrrain kuabe trube,

⁴³ na mõi pisu pulu pasrøben, øyeeg purainrrain cha, tru pi wesrawa srúa inrrab arrub srusan: ‘Tiusmanda, ñui køtsøyu piwan nan kuchi srørrøbsrumugu’ chiben,

⁴⁴ nan øyah cha løtabig truig kônrrain cha: nan ‘muchi’ cha srørrøb, ‘katø ñui camellosmeraingucha pi wesrunrrur’ chibig, truig kônrrain cha, tru nan karub peragøbigwei nusrkawei srain kônrrai Jehová lawa wesruig ishug unø.”

⁴⁵ Inchen nabe nai umbutø Tiusba chab waminchimøwatø, mømibe Rebecabe pi mutin køtsøn kildunyu mutaig, arruptindi ashibig kur cha. Incha pisuyu pi wesranrrab kørøraiben, nabe trenchibig kur cha: “Tiusmanda, nan pi srøttra” cha.

46 Inchen nõbe tru urastø kòtsøn pinøsrub, nan “muchì” cha srørrøb, “katø ñui camellosmerangucha pi mutsøsrønrrur” chiptinchibìg kòn cha. Na muchib pasramne nõbe camellosmeran pi mutsøsrøbìg kòn cha.

47 Inchen nabe “¿Ñibe mui nimbasr kugu?” cha payene, nõbe nane trenchibìg kòn: “Nabe Betuelwei nimbasr kur cha, tru Nacorweimba Milcaimba nusrkawei.” Inchen nabe nune kan surtigas kimyu mesrøb, kualmerayu pønsraigwan pønsrøb inchibìg kur.

48 Incha nabe Jehovahwan tabìg waminchab tømboñsrøbìg kur. Jehovahwan mayanguen, tabìg kòn chib, nan karub tøgä pasrabìg Abrahamwei Tiuswan, nan tru muba arrum maywan pera arrimburo; tru nõ nan karub peragøbìg Abrahamwei nusrkawan nui trag yau misagwan srain kønrrai tranen.

49 Inchawei nai karub tøgä pasrabìgwan ñim yauelø kermab pesan-nameelø køb, larrø tammayelø køb treelø kuabe, nan eshkarray cha. Inchen treeg kønrrab kømubene, trube, trunungucha eshkarray cha. Trumaybe na mandø indamìgwan na isumìg kønrrautan— cha.

50 Inchene Labánba, Betuelbabe trenchibelø kòn:

—Pøs, øyeebe chiguen kømøtø, Jehovahweinukkurri arriinrrun cha. Nambe søl kòn cha lètamìg kømøwei, kabe kalø kòn cha lètamìg kømøwein kòtan cha.

51 Rebecabe yu wan cha. Ñun karub peragøbìgwei nusrkawei srain kønrrai trube pera inrrø chibìg kòn, Jehovah nõ maìg kønrrai isuìg, trumay.—

52 Inchen Abrahamwei karuìg mendìg megabiibe øyeeg taìgwan mørøppe, Jehovahwei merrab tømboñsra pirausrøngatìg utsøbasrøbìg kòn.

53 Incha tabzheelø orotøgä mariilø køben, andøgä mariilø køben, kemelø køben, wesrawa Rebecan kætøbìg kòn, Incha nuchawanba usranba truilan-gucha, chìgøben ketøbìg kòn.

54 Incha tru Abrahamwei karuìg mendìg megabiibe tru nui lincha pera yailøba uta mab, uta muchib incha, truyu kørromisra kibelø kòn. Incha katø lòtsø kurrabe, tru Abrahamwei karuìg mendìg megabiibe trenchibìg kòn:

—Nan karub peragøbìg Abrahamwei yausrømay ambashchay— cha.

55 Treeg kuingucha Rebecai nuchaaba, usrimbabe trenchibelø kòn:

—Ishug unøbè kan pa tratrø kwalømdøgen namba ka kørromistrain cha. Trugurrimbegundø ka ibwei inchun— cha.

56 Inchen tru Abrahamwei mendìg megabiibe trenchibìg kòn:

—Nan kørromistrain inchumørrunrigay cha, na arrìgwan Tiusbe yangucha tab punrrai marìg købene, trube, tru nan karub pera købìgwei yamay katø ibashchunrigay— cha.

57 Inchen nõmbe trenchibelø kòn:

—Trube, ishug unan wamønrrab cha, nõ manchitashchab— cha.

58 Incha nõmbe Rebecan wama, payibelø kòn:

—¿I møøba inrraguh?— cha. Inchene nõbe:

—Øø, na lincha inrrur— chibìg kòn.

59 Inchen nõmbe nuchag Rebecan ibashibelø kòn, katø Rebecan lamíkkurri ashìb tøgagøb ishüwanba. Abraham karub peraguiba, katø tru nõ lincha pera arriiløba inrrai.

60 Incha Rebecane mayanguen tabìg nebuìg kønrrai nõmbe øyeeg chibelø kòn:

—Ñi, namui nuchag, misaamera purø nõrrø katøyg katøyg amrrubelai usrin kønrrai isuer cha. Tru ñuinukkurri amrrub misaamerabe nõmun ashìg kømüinchibelai ciudameran nõm merrarrawa tøgä pønrramisrtrun— cha.

⁶¹ Incha Rebecabe tru nui karub tøgagui srusralmeraba, yandø camellosmeran itøguana, tru Abrahamwei mendig megabigwei tru mendig ambubelø køn. Øyamay tru Abrahamwei mendig megabiibe Rebecan pera ibig køn, truyugurri.

⁶² Inchen Isaacbe tru “Øsig Wab, katø Nan Ashibig” cha wamim pisuyugurri katø arrin købig køn, kaguende nøbe Néguev pirau tsubig kua.

⁶³ Isaacbe kan maaben wambigwansrø lllanrrab webarrin købig køn. Incha mømbe kurraashene, camellosmera pulu luturaab amrruptinchibelø køn.

⁶⁴ Inchen Rebecagucha kurraasha, Isaacwan ashabe, camelloyugurri pinaarra,

⁶⁵ tru Abrahamwei mendig megabigwan payibig køn:

—¿Mugøh? cha, ø møg namun katønrrab øsrø arrubiibe.—

Inchene nøbe:

—Øibe nan karub pera købig trug køn— chiben, Rebecabe tru malø kasraitøga pinab kasrøptinchibig køn.

⁶⁶ Inchen tru karuig mendig megabiibe nø maitø marigwan kerriguh Isaacwan waminchibig køn.

⁶⁷ Incha Isaacbe tru nui usri Sara tsui carpa ya købiisrømay Rebecan pera arrua, Rebecane nui srain kønrrai marøbig køn. Isaacbe Rebecane truba truba undaarawa, øyamay Isaacbe nui usrin kwabigwan truba pesrøgui uniibe yandø tabgui

25

Abrahamweimba Srai Ceturaimba Ureemeragurri Amrrub Misaamera

¹ Abrahambe katøgan srai tøgaguig købig køn, trugwei munchibe Cetura taig.

² Truibe Zimramwan køben, Jocsánwan køben, Medánwan køben, Madiánwan køben, Isbacwan køben, Súajwan køben tøgaguig køn.

³ Inchen Jocsanbe Sebanba, Dedánwanba tøgaguig køn. Inchen tru Dedánweinukkurri amrrub misaamerabe: asureosmera køben, letuseosmera køben, leomeusmera køben kuig køn.

⁴ Inchen tru Madiánwei nusrrkaløbe: Efa køben, Efer køben, Janoc køben, Abida køben, Elda køben kuig køn, truiløbe mayamba Ceturainukkurri amrrub misaamera.

⁵ Abrahambe nø kerrigu chi tøgaguilane Isaacwan chishtøh kørømarig køn.

⁶ Inchen nui linchatø ishumburmeraba tøgagui ureemerane chigøben ketiilø trana, incha nø øsig wappatø nusrrkai Isaacweinukkurri tarømara, truilane pørr neeshibgatømay pirømerasø warønrrai ørig køn.

Abraham Kwaigwanba, Sørigwanba Waminchib

⁷ Abraham øsig tsuibe pilamera ciento setenta y cinco kuig køn.

⁸ Larrø kølliizhig misra, kwaig købig køn, larrø yam pilamera øsig tsua. Incha nui kølli misaameraba tsunrrab yaig købig køn.

⁹ Inchen nui nusrrkalø Isaacba, Ismaelba misra kusra sørabelø køn, tru Macpela tainug, søramig peñayu trab lalig pasrøbigu tru Mamre taig pinrrøguewansrø, tru Zohar hititai nusrrkai Efrønweim pirau.

¹⁰ Iibe tru Abraham hititasmeran penin pirø købig kuig køn. Truyu Abrahamwan sørig købig køn, Sara sraweim pulutøwei.

11 Inchen yandø Abraham kwaben, Tiusbe Isaac nui nusrkawane mayanguen tabig nebuig kōnrrai inchen, Isaacbe tru 'Øsig Wab, katø Nan Ashibig' taisrø pisu puluwan kōrrømisra, tsubig kōn.

Ismaelweinukkurri Amrrub Misaamera

12 Abrahamwei nusrkai Ismaelweinukkurri amrrub misaamerabe iilø kōn, tru Sarai karuindiig megab ishug egipcia tru Agar Abrahamba tøgagui unai.

13 Iilø kōn tru Ismaelwei nusrkalai munchimera, tru kerrigu mayur kal-labigwei wendautø trumørig kal-lawa amrrubelai. Ismaelwei kerrigu mayur nusrkaimbe Nebayot kōben, trugurrimbe Cedar kōben, trugurrimbe Adbel kōben, Mibsan kōben,

14 trugurrimbe Misma kōben, Duma kōben, Masa kōben,

15 Hadar kōben, Tema kōben, Jetur kōben, Nafis kōben, Cedema kōben kuig kōn.

16 Iilø kōn tru Ismaelwei doce nusrkalo, tru nōmui nōrrø misag sōtømørig ashib pōnrrabelai munchimera. Nōmui pirømeraba nōm chu kōrrømisra warailøbabe tru munchimeratøgatøwei pōnsra wamiilø.

17 Inchen Ismaelwei øsig kuin pilamerabe ciento treinta y siete kuig kōn. Inchen nui israbig luchen, yandø kwaig kōn. Incha nui kōlli misaameraba tsunrrab yaig kōn.

18 Incha ismaelitasmerabe Havilasrøngurri Shur taisrøngatig waraig kōbig kōn, Egipto pinrrøguewansrø, tru Asiriamay ambi maywansrø. Inchen nōbe nunelan, ka kwayam laptø, kwayam laptø tsubig kōn cha.

Jacobpa Esauba Kal-laig

19 Iig kōn tru Isaacweimburab chi pureb arrigwan wamindig, tru Abrahamwei nusrkawan.

20 Isaacbe Rebecaba kasharab uras pilamera cuarenta tøgagui kuig kōn, tru Rebecabe Betuelwei nimbasr Labanwei nuchag kōbig kōn. Inchen Betuelba Labanbabe arameosmera Padan-aramsø warabelø kuig kōn.

21 Rebecabe trendø ureg chigagōnrrabig kōben, Isaacbe nui sraweyasig Jehováwan miabig kōn. Inchen Jehovábe nō miaigwan mōren, Rebecabe kwanrriig kōrrømisrig kōn.

22 Inchen tru pa ureemerabe nui patsautø kwayab purrøben, Rebecabe treeg isubig kōn: "Øyeeg kōbene, ¿chiwein kui øsig uñibig unamøtah?" cha. Incha Jehováwan payrrab ibene,

23 Jehovábe trenchibig kōn:

—Ñui patsaube misaamera purø nōrrøbatø pa sōtø kōn cha. Misagwan ashib karub pōnrrønrrabelø pailø nōrreelø ñui patsau purraisrøngurri nōrrømisrøbguen purran cha. Kane katøgan lataguen kōmø, mu chindamgaig kōnrrabig kōn cha.

Inchen mayur kal-labiibe wendiig nō karuig meganrrabig kōn— cha.

24 Indig yandø kal-lamig ura pubene, nui patsaube møg ureezheelø par kuin kōptinchibig kōn.

25 Inchen tru srøsrø kal-labzhiibe ke pigø isig nabzhig kōbig kōn, trurrigu asr ørøba isikuzhikke. Treekkurri Esau munchi pasrig kōn.

26 Inchen tru wendau nuneebe Esauwei talunwan merrarraweig kal-laben, treekkurri Jacob munchi pasrig kōn. Inchen Isaacbe tru parcheelø kal-labene, pilamera sesenta tøgagui kuig kōn. Nø Mayur Kal-laig Nusrkain Kuimburø Nø Uta Tøgagømigwan Yanøb

²⁷ Inchen ureemerabe nõrrørab amba, Esaube ushameran pasraara kemøramiibe ke kan kaisab lataig inçhibig købig køn, kaambumerawansrø unamig chull møg kua. Trune Jacobpe treeg maramigwane chi isumø ka nuimburab uñibig køn, carpa yau kørrømisra chigøben maramigwan chullig.

²⁸ Incha Isaacbe Esaúwan mas undaarabig køn, kaguen nõ chi kemøra srua arriilan srørrig mabig kua. Trune Rebecabe Jacobwanrre mas undaarabig køn.

²⁹ Indiiibe kan kwaløm Jacobpe pigø mamig may tamariizhig nenøb wabene, Esaube wabigwansrø llirab uña, larrø muraaraig puabe,

³⁰ Jacobwane trenchibig køn:

—Ø pigø mamig may tamara ñi neniizhigwan tiusmanda srøttra cha, kaguende nabe larrø muraaraig war— cha. (Inchagurri EDOM cha wamig kuig køn.)

³¹ Inçhene Jacobpe trencha løtaptinchibig køn:

—Ñi mayur nusrkain kuimburø uta tøgagømigwan møin kwaløm, trube, yunømariyagun— cha.

³² Inchen Esaube:

—Pøs, nane parøgwabiitø ke kwamdø køtan cha. ¿Na mayur nusrkain kuimburø uta tøgaguatøbe chigui indamøtah?— chiben,

³³ Jacobpe trenchiptinchibig køn:

—Møin kwaløm ¡katø! treegwan marmø kømø, maramønrrun chirra— cha.

Inchen nõbe: —¡Katø! treegwan maramønrrun— cha kørrømisra, nõ mayur nusrkain kuimburø uta tøgaguigwan Jacobpa yunømariyabelø køn.

³⁴ Inchen Jacobpe nuimburappe, pirrin køben, tru lentejas tamari mamiizhigwan køben tranen; truigwan uta mab muchib inçhabe, truyugurri kurrab ibig køn. Øyeeg mara, Esaube nõ mayur nusrkain kuimburø uta tøgagømigwan chiguen tabig kømui lataig indig købig køn.

26

Isaacbe Gerarsrø

¹ Tru kwalømmerawan tru pirau parø purø trømbøig arrubig køn, tru Abraham tsub urassrø parø arrub lataitøwei. Inchen Isaacbe Gerarsrømay ibig køn, tru filisteosmerai rey Abimelec tsuisrømay.

² Incha truyu Jehovahæ Isaacwan kenamisra, trenchibig køn:

—Egiptosrømaybe imøta cha. Na chu tsunrrain chiben tru pirau kørrømisra cha.

³ I pirautø ka tsu cha, ka petø purainrrab arruatiig lataitøweingue. Nabe ñiba pasramønrrun cha. Incha nabe ñun mayanguen tabig nebuig kønrrai maramønrrun cha; kaguen ñuinukkurri amrrub misaamerane i pirømeran kerriguh tranamønrrun cha. Øyamay ñui møskai Abrahamwan ¡katø! nabe tru treegwan marmø kømø, martrab taigwane maramønrrun cha.

⁴ Ñuinukkurri amrrub misaamerane kan srømbalasrø kønchabiimera lataig nõrrø kønrrai mara, i pirømeran kerriguh tranamønrrun. Incha chu pirausrøn køben misaamera nõrrø sətø warabeløbe mayanguen tabig nebuig kønrrai marig kønrrun cha tru ñui misaamera amrrubeløyugurri.

⁵ Kaguende Abrahambe tru na maig taig wamwan nan møra, treeg kørrømisrtrai marig køn cha, tru øyeeg kømig køn cha na wamindigwanba, martrai na karua pønsrailanba, mandø kømigwan eshkawa pønsrailanba, katø mu chindamgaig martrai karua pønsrailanba.—

⁶ Incha Isaacbe Gerar pirau kørrømisra tsuig købig køn.

⁷Inchen trusrø warab mōguelø nui sraweimbura payene, nøbe trenchibig køn:

–Naimbe nuchag køn— cha, kaguende nøbe kørig kui inçhibig køn ‘nai srain køn’ tamiibe. Nui srain Rebecan nōmui marøg køptø trusrø mōgueløbe nun kwetchaitamab isubig køn, kaguende nøbe purø tab ishug køben.

⁸Incha kan maya yana køsrøn Isaache trusrø tsuben, tru Abimelec filisteosmerai reybe kan pendanayu ashib pasrøbene, mōimbe Isaache nui srain Rebecane truba tabzhig undaarab pasrai ashiptinchabe.

⁹Abimeleche Isaacwan wamabe, trenchibig køn:

–Chima øibe ñui srain kuirreh cha. Inçhendø nane çchindimbarre, “naimbe nuchag køn” chigu?— cha.

Inçhene Isaache trenchibig køn:

–Kaguende nun nōmui marøg køptø nabe pinisaig kømuitamab isua trendaig køn— cha.

¹⁰Inçhene Abimeleche trenchibig køn:

–Ñibe namune çchindimbarre øyeeg margu? cha. Katøguchimbe namui misagu mōig køben, ñui sraimba kaig marøb waramisrig kuimasrtø cha. Incha treeg kaig mariitøga kangurrindø ñibe namune mayeelan kegørrørka pønsrøbsrutan— cha!

¹¹Incha Abimeleche maya misagwan trencha karua pasrøbig køn:

–Møikkøben i mōwan kui, kabe nui srawan kui chigøben inçhib kalø marøbiibe kwamig kønrrain— cha.

¹²Indiibe Isaac tru pirau ellmara, tru pilawan kan yellzhikkurrindø cien menrrabatø purø nørørellishibig køn, kaguende Jehovah nun mayanguen tabig nebuig kønrrai inchen.

¹³Incha nøbe maskken maskken pua misrøb, larrø nui misrøb ya, muguen treeg tøgagømuinrrunig puag misrig køn.

¹⁴Incha Isaache ubisha sötømera køben, waara sötømera køben, nun mara tranøbelø trurrigu nørø tøgagøben filisteosmerabe pusrkwai ashib mendabelø køn.

¹⁵Incha nui mōskai Abraham øsig wab urassrø, Abrahamwei karuig mendig melabeløbe aljibesmera lalla, pi wesruilan, truilan filisteosmerabe pirøtøga netsø kasra pønsrøbelø køn.

¹⁶Inchen Abimeleche Isaacwane trenchibig køn:

–Ñibe namuinukkurrimbe tarømisra, inrrø cha, kaguende ñibe nam lataguen kømø mu chindamga nuig misrin køn— cha.

¹⁷Inchen Isaache truyugurri ya, Gerar chag pirømerasø tsumisrig køn.

¹⁸Mōskai øsig wab urassrø pisumera lalla, wesruilø købigwan, katøle kura wesrubig køn; mōskai kwaimbala tru filisteosmera kasra pønsraig købelan. Incha tru pisumerane mōskai chi munchi pønsraig købelan tru munchimeratøgatøwein pønsra wamabig køn.

¹⁹Indig kan kwaløm Isaacwei karuig mendig melabeløbe tru chaasrø lallib kuabe, luløb pizheelø wetørrabelø køn.

²⁰Inchen tru Gerar pirau ubisha ashib warabeløbe Isaacwei ubisha ashibeløba ‘i pibe namuin køn’ chib larrø mur aleguiyabelø køn. Incha treekkurri Isaabe tru pisuwane ‘Esek’, (‘Aleguiyaim Pi’) cha munchi pasrig køn, kaguendø nōmbe tru pigurri aleguiyaig kua.

²¹Inchen katøgan pisu lalla wesruben, katø truiukurri treetøwei mur aleguiyabelø køn. Incha truigwane “Sitna” (‘Ashig Kømui Indiyab Kørrømisrin Pi’) cha munchi pasrig køn.

22 Inchen Isaache truyugurri nøøromisra ya, katøgan pisu lalla wesraben, yandø tru pisuwane “Rehobot” cha munchi pasrig køn (‘Pishindø Tab Waramdiig Køn’ chib). “Møimbe chigømø llirab waramig kønrrai Jehovahé trandan cha nam i pirau merraptø webambamig kønrrai”

23 Inchen Isaache truyugurri Beersebamay ibig køn.

24 Inchen tru yem Jehovahé Isaacwan kenamisra, trenchibig køn:

—Nabe ñui mōskai Abrahamwei Tius kur cha. Chi korig kui inchimōta cha. Nabe ñiba pasrar cha. Nai karuigwan marøb megabig Abrahamwan undag køptø nabe ñune mayanguen tabig nebuig kønrrai marøb, ñuinukkurri amrrub misaamerane purø nørro kønrrai marøb indamønrrun— cha.

25 Inchen Isaache truyu kan altar kusrua, Jehovahéi munchiwan wamab tabig waminchibig køn. Incha tru nui tsumig carpa yawan truyu tamara, pasrøbig køn. Inchen Isaacwei karuig mendig melabeløbe katø truyu lalla, pi wesrubelø køn.

26 Inchen Abimeleche Gerarsrøngurri Isaac tsuisrømay arrubig køn. Inchen tru Ajuzat tru nun trag linchib wam purugubiiba, tru nui suldaumeran nø karub pera pasrabig Ficolba lincha amrrubelø køn.

27 Inchen Isaache trenchibig køn:

—¿Ñimbe naimaybe chinchab amrrugue? cha. Ñimbe nane tsalø køptø, ñimui piraugurringuen nan wegucha pønrrøbendøbe?—

28 Inchene nømbe trenchibelø køn:

—Nambe asha ker cha, Jehovahé ñiba pasrain kui. Pøs nambe treeg isuer cha: “Ñiba namba øyamay martrab kandø isua kørrømisram kønrrab kui. Inchen treeg isuigwane ¡katø! marmø kømø nabe øyamay maramønrrun taitøga maramig kønrrain cha. Inchen tru øyamay kønrrai martrab cha kørrømariibe møimbe øyeeg kønrrun cha”

29 Pøs ñibe namun chigucha kaig marmumig kønrrain cha. Pøs namma ñune chigucha chi kaig incha ashmøtø, nambe ñune tab tøgagua, ñune chigucha kømø tab webya inrrai marig kuig køn cha. Pøs møimbe ¡Jehová mayanguen tabig nebuig kønrrai indiibe ñi køn!— cha

30 Inchen Isaache truilayasiig truba truba tab mamiimera tamaren, nømbe mab, muchib inchibelø køn.

31 Incha katø kwalømbe løtsøzhig kurra møingurrimbunøbe ambugurri igurri kwayab kømønrrab cha nømbe treeg kørrømisrøbelø køn, Inchen Isaache yandø ungua chiben, nømbe chi isumø, tab webamba ambubelø køn.

32 Inchen tru kwalømdøwei Isaacwei mendig melabeløbe tru nøm pi wes-ranrrab lallib kuigwan:

—¡Nambe pi wetørrer!— chib eshka b amrruptinchibelø køn.

33 Inchen Isaache i pisuwane “Seba” cha munchi pasrig køn trenchippe: ¡Katø! marmøgømø maramønrrun tain pisu cha. Inchawei tru ciudawane moin kwalømgatig “Beerseba” cha wamig køn.

34 Inchen Esabe pilamera cuarenta tøgagua, Judit taigwan nui srai marig køn, tru hitita Beeri taigwei nimbasrwan. Katø trugurri tru Basematwan srai marig køn, tru hitita Elónwei nimbasrwan.

35 Inchen Isaacweimba, Rebecaimbabe tru i pagatø ishumburmerabe larrø trømbøig isuindø, isuindø melønrrai marøbelø købig køn.

27

1 Indig Isaac yandø larrø kəlliizhig misren, nui kammerabe yandø pilømuben, yandø ashchab kaimabig kəbig kən. Kan kwaløm nui mayur nusrkai Esauwan wamabe, trenchibig kən:

—Nai nusrkain— cha. Inchen nøbe:

—Nabe yu war— chiben,

2 Isaacbe trenchibig kən:

—Nabe yandø kəllig kur cha. Nabe chi kwaløm kwam kui mørmur cha.

3 Pəs, ñibe tru ñui usha kemørøb srua uniilan: tru ñui arconba ñui flechaswanba nemøra srua, wambigwansrø kan usha ørtrab inrrø chibig kən.

4 Trugurrimbe, na maig chullig kuaasha, kan mamig larrø mayzhig tamara, srua attra chibig kən, na manrrur cha. Trugurrimbe na kwamøwatø mayanguen tabig nebuig kənrrai ñuyasig na Tiuswan mianrrab— cha.

5 Inchen Rebecabe Isaac tru nui nusrkai Esaúwan waminchen, mørøb wabig kən. Inchen Esaúbe wambigwansrø ibig kən, møskaweyasig kan ushawan pasraara, kweecha, sruattrab.

6 Inchen Rebecabe nui nusrkai Jacobwane trenchiptinchibig kən:

—¡Au! nabe ñui møskai Isaacbe ñui nuneg Esaúba: “Kan usha kemøra larrø may mamiizhig tamara, srua attrig” chib øyeeg waminchen trunun mørar cha.

7 “Incha nø mamigwan ma, Jehovahēi merrab mayanguen tabig nebuig kənrrai ñuyasig na Tiuswan mianrrab chitan cha, nø kwamøwatø.”

8 Inchawei nai nusrkai na mandø cha karuben, trunun tab mørtra chibig kən.

9 Møimbe ubishameraba cabrameraba purrabsrømay ya, pagatø purø tab cabro ureemeran sruattra cha. Pəs, nabe ñui møskai maig mabig kui asha truilan larrø may mamiizhig tamaramønrrun cha.

10 Inchen ñibe nø manrrai srua inrrig cha, nø kwamøwatø, mayanguen tabig nebuig kənrrabigwan Tiuswan nuyasig miaben, trunun ñi utønrrig— cha.

11 Inchene Jacobpe usri Rebecane trenchibig kən:

—Nai nuneg Esaúbe ya isiitø mөг kəben, nabe ya chigucha isikkaibe cha.

12 Inchippa nai møskaimbe nan katørawa, nan mugui mørabe, nane isa purø may kebenøsrkøptiig kui martrautan cha. Trubeguende nane mayanguen tabig nebuig kənrrai nayasig Tiuswan miai urasbe nane masken larrø kaig nebuig pasramigwanguen miawa pasrtrautan— cha.

13 Inchene usrimbe trenchiptinchibig kən:

—Nai nusrkai, ñun trømbøig nebunrrabiibe nan nebunrrain cha. Na maig taigwan mørøptø møra, srua amø— chibig kən.

14 Inchen nøbe ya srua arrua, usran tranen, usrimbe møskai maig chullig kuaasha, treeg tamarøbig kən.

15 Incha trugurrimbe usrimbe mayur nusrkai Esaú kewa uniilø purø tabig yau purrabelan Jacob wendø nusrkawan kenanøbig kən.

16 Incha trugurrimbe tru usrimbe Jacobwane tasiguba, katø nukaburab chi isikkayube tru cabro ureezhelai kalusmeratøga pinøbula,

17 trugurrimbe tru may mamiizhig tamarigwanba, tru pirrin tamarigwanba Jacobwan tranøbig kən.

18 Inchen Jacobpe møskaweimbulu puabe, trenchibig kən:

—¡Nai Papá!— cha.

Inchene Isaacbe trenchibig kən:

—Nabe yu war cha, nai nusrkai. ¿Ñibe mø nusrkain kugu?— cha.

19 Inchene Jacobpe trenchiptinchibig kən:

—Nabe Esaú, ñui mayur nusrkain kur cha. Nabe ñi maig taigwan marar cha. Kurra, wamisra na kemøra srua arrigwan ma chibig køn. Tru mayanguen tabig nebuig kømigwan nayasig Tiuswan miaben na utønrrab—cha.

²⁰ Inchen Isaacbe nui nusrkawan trenchibig køn:

—Nai nusrkai, ¿Mandø incharre malla wetørragu?— cha.

Inchene Jacobpe trenchibig køn:

—Jhová ñui Tiusbe nan petø wetørramig purugutan— cha.

²¹ Inchen Isaacbe Jacobwan trenchibig køn:

—Nai nusrkai møyimbe kemall cha, na katøranrumøn cha, isa kømø, nai nusrkai Esaú køtamørtrab cha kabe peg kuin kui.—

²² Inchen møykai Isaacwan Jacobpe kemallen, nøybe katørawabe, trenchibig køn: —Wambe Jacobwein købendø, tasiimerabe Esaúwein købwain inndan—cha.

²³ Pøys nøybe møyig kui mørtrab kaimabig køn, kaguende tasiimerabe Esaúwei tasiimera lataig isitielø køben. Incha mayanguen tabig nebuig kømigwan yandø ke trantrab inchabe,

²⁴ Isaacbe katøle payibig køn: —¿Ñigan isa kømø, nai nusrkai Esaú køtirru?— cha.

Inchen Jacobpe:

—Nabe truwein kur— chiben,

²⁵ Isaacbe trenchibig køn:

—Ñi kemøra srua arrigwan na manrrab srua attra cha, na ñun mayanguen tabig nebuig kømigwan tranrumøn — cha. Inchen Jacobpe mamigwan srua kemallen, Isaacbe mabig køn. Incha katø vinogucha srua arruben, trunungucha muchibig køn.

²⁶ Inchen Isaacbe nusrkawan trenchibig køn:

—Nai nusrkai, møyimbe kemalla, nan mucharra— cha.

²⁷ Inchen Jacobpe kemalla, muchaben, Isaacbe tru nui nusrkai kewa pasrallan irrømrøbe, mayanguen tabig nebuig kømigwan tranøb trenchibig køn:

—Nai nusrkaimbe wambigwansrø chi købigwan Jhová mayanguen tabig kønrrai mari lataig irrabig køtan cha.

²⁸ Tiusbe tru ellmariiløyu srømbalasarøngurri serenu peñibzhigwan tranrrun cha. Inchen pirøbe misrampurab misren, tirigumera misrøb, vinomeragucha nørø weguchib inchun cha.

²⁹ Tru misag sötømera nørø pønrrabeløbe ñun utsøbasrtrun cha. Inchen ñibe ñui nunelane ñi karubig kønrrig cha. Inchen truiløbe ñui merrab utsøbasrtrun cha. Ñun ‘trømbøig nebunrrain’ chib pønrrabeløbe, nøm trømbøig nebuilø kønrrun cha. Inchen ñun ‘tabig nebunrrain’ chib pønrrabeløbe, nøm tabig nebuilø kønrrun— chib.

³⁰ Inchen Isaac tru mayanguen tabig nebuig kømigwan Jacobwan chab tranen, Jacobpe møykaweinukkurri webiben latatø, nuneg Esaúbe wambigwansrø usha kemørøb uña puptinchibig køn.

³¹ Incha nøygucha kan mamig mayzhig tamara, nui møykaweimay srua arruabe, trenchibig køn:

—Nai papá, wamisr cha. Na ñui nusrkai kemøra srua arrigwan manrrig cha, ñi nan mayanguen tabig nebuig kømigwan nayasig Tius nan tranrrai miarrunrrig— cha.

³² Inchene Isaac møykaimbe trenchiptinchibig køn:

—¿Trube, ñibe mugugu?— cha.

Inchen nõbe:

—Nabe tru Esaú ñui mayur nusrkain kur— chiben,

³³ Isaacbe itõnab menda, purø korrø kwaarig, trenchibig køn:

—¡Paare! ¿Trube muguig køh? cha, tru usha kemøra srua arrubiibe. Pøs, ñi arrumøwatø, srua arruben, nabe kerrigu chab maig køn cha. Incha nabe mayanguen tabig nebuig kømigwan nun chab tranig køn cha. Pøs, tru mayanguen tabig nebuig kømigwan tranigwane nõbe tøga korrømisrtrun— cha.

³⁴ Inchen Esaube mõskai trendaig wamwan mõrabe, truba mur wamab trashib, purø korrø isui inchib ¡karren kønrrab! chib kishibig køn, trenchib:

—Nai mõskai, tiusmanda nangucha tru mayanguen tabig nebuig kømigwan tranrra— cha.

³⁵ Inchen Isaacbe trenchibig køn:

—Ñui nuneebe arrua, nane purø may isa, tru mayanguen tabig nebuig kømig ñuin kønrrabigwan nõ uta, tøga, yan— cha.

³⁶ Inchene Esaube trenchiptinchibig køn:

—Nune Jacob cha wamappe, trendambuawei trendaig kuin køn cha. Pamayguen køn cha, nan øyeege isa kebenøsrkøb arrig, srøtøbe na mayur nusrkain kuimburo na uta tøgagømigwan nõ kerraig køn cha. Møimbe tru mayanguen tabig nebuig kømig naiwan katø nõtøwei uta tøga yain køn— cha.

Inchabe katø trenchibig køn:

—¿Nayasikkan tru mayanguen tabig nebuig kømigwan tranamig maitøguen tøgagømøtirru?— cha.

³⁷ Inchen Isaacbe trencha løtabig køn:

—Nabe ñune Jacob karub tøgagønrrai Tiuswan miar cha. Incha katø nui misaamerabe Jacob manchiben marøb melabelø kønrrai miar cha. Trurrigu nõbe tirigumera nõrrø tøgagøb, vinomera tøgagøb inchai miar cha. Nai nusrkai, ¡Møimbe yandø ñuyasiibe chi maramig kaatan!— cha.

³⁸ Inchen Esaube mõskawan trenchibig køn:

—Nai mõskai, tru mayanguen tabig nebuig kømigwan tranamiibe kabe ke kanzhiitø kuig kuitarru cha. Nai mõskai, nangucha tru tabig nebuig kømigwan tranrra— cha. Incha srawa, srawaa kishibig køn.

³⁹ Inchene Isaacbe trenchibig køn:

—Ñibe misrøb pirømerasøngurri purø yabsrø tsunrrabguen cha, katø srømbalasarøngurri serenu peñibig nebumøsrø.

⁴⁰ Ñibe ñui espatatøga kwayawatøwei øsig tsunrrabguen cha. Incha ñibe ñui nuneg karuindiig megamig neburrun cha.

Inchendø ñun megangaig misrøb arruben, ñibe truyugurri welulrrabguen— cha.

Jacob Esauwan Kørab Lulamig Nebub

⁴¹ Indig truyugurrimbunø Esaube Jacobwan purø trømbøig ashig kømui inchibig køn, nui mõskai tru mayanguen tabig nebuig kømigwan nun tranikkurri. Incha nõasiitøwei trenchibig køn: “Maya yanayutø namui mõskai pinøben, larrø isuin pønrram kwalømmeragucha attrun cha. Yandø trugurrimbe si, pinisamønrrun cha, nai nuneg Jacobwan.”

⁴² Inchen Rebecabe tru Esaú øyeege martrab isub unigwan wammørabe, Jacobwan wamønrrab øra, trenchibig køn:

—Ñui nuneg Esaube ñun nõgucha lata martrab ñune kwetchab tan cha.

⁴³ Inchawei nai nusrkai na maig taigwan mõra mar cha. Nai nuchag Laban Haran pirau tsuisrømay trubab inrrø chibig køn.

⁴⁴ Trusrø kan maya yana køsrøn tsunrrig cha, ñui nunewan namig købig purayamne.

⁴⁵ Ñui nunewei namig købig yandø patsab, tru ñi nun chi mariilan nõ pesannabene, ñibe katøle attrai, trube, eshkawa øramønrrun chibig køn. Nai pagatø nusrkalan ke kan kwalømyutø parba pini asha wag kømøtan— cha.

⁴⁶ Incha Rebecabe Isaacwan trenchibig køn:

—Nabe nai øsig unigu larrø trømbøig kui uñar cha, tru hititas ishumburmer-agurrindø. Jacob yu Canaán pirau hititasmeraba kasharabene, chinchib øsig tsumuinguen kønrrautan— chibig køn.

28

¹ Isaacbe Jacobwan wama, mayanguen tabig nebuig kønrrai tranabe, trencha karubig køn:

—Nui srain kønrrai yu Canaán pirau ishumburmeran lanrrab kømø cha.

² Kurra, Padan-Aram pirausrømay inrrø cha, tru Betuel ñui usrai møskai waisrømay. Incha ñui kuchimøskai Labanwei kan nimbasrwan ñui srain kønrrai lanrrig cha.

³ Inchen Maramburab Marøb Tiusbe ñune mayanguen tabig nebuig kønrrai mara, ñune ureg larrø nõrrø tøgagønrrai tranøb, ñuinukkurri purø nõrrø misag sötømera nemisramnegatig martrun cha.

⁴ Katø Abrahamwan tru mayanguen tabig nebuig kønrrai tranrrab misrig købigwan ñunba, ñuinukkurri amrrub misaameranba ñun tranrrrain cha. Tru møyia ñi peesrøngurri ka arruatø lataig tsuin pirøwan ñimui mara waramig kønrrai, tru pirøwan Abrahamwein kønrrai Tius nun keta tranrrabmisra kørrømisrig købigwan.—

⁵ Øyamay Isaacbe Jacobwan Padan-Aramsømay inrrai ørig købig køn, tru Betuel arameowei nusrkai tru Labanwei yausrømay. Truibe Rebecaimbe nuchag købig køn, Jacobweimba Esaúweimbabe usrin køben.

⁶ Inchen Esaúbe wammørøbig køn, møskai Isaacbe tru mayanguen tabig nebuig kønrrai tranøb, sraingucha lappe, Padan-aramsø lanrrai chiben. Incha tru mayanguen tabig nebuig kømigwan møskai tranabe, øyeeg karua pasri ashibig køn: “Yu Canaán ishumburmeran ñui srain kønrrai marøb pasønrrab kømø” cha.

⁷ Inchen Jacobbe møskawanba usranba møra, Padan-Aramsømay yai ashibig køn Esaúbe.

⁸ Incha treekkurri nui møskai Isaacbe tru Canaánsrø ishumburmerane chigucha tab kømui ashibig kuin kui wetøbeña,

⁹ Esaúbe Abrahamwei nusrkai Ismael tsuisrømay ya, tru katøgan sralø kømnetø, trusrø Mahalatwan nui srain kønrrai marøbig køn, tru Abrahamwei nusrkai Ismaelwei nimbasrwan, tru Nebaiotwei nuchawan.

Tius Jacobwan Betelsrø Kenamisrøb

¹⁰ Inchen Jacobbe Beersebagurri webya, Haran pirausrømay ibig køn.

¹¹ Inchen yandø kanbalø puabe, pørr pinaiben, truyu yem kørrømisrøbig køn. Incha truyu kan srug tsubigwan kuña mara trarra, truyu kinrrab tsumisrøbig køn.

¹² Inchen truyu nun piappe treeg piabig køn: Kan escalera, srømbalásrøngurri pirausrø punøsrkain pasrappe, tru kappe srømbalásrø kebacha pasrøben, møyimbe truwane angelesmera nebambamba, kørrørrumba inchib køben,

¹³ Jehovábe palasrø pasrøwabe, trenchibashib:

—Nabe Jehová kur cha, Abraham ñui aweluwei Tius, Isaac ñui mōskawei Tius, ñi uyu kib tsuig pirōwane ñunba, ñuinukkurri amrrub misaameranba tranamōnrrun chib.

¹⁴ Ñuinukkurri amrrub misaamerabe purō nōrrō kōptō, pirau kan usrō tui lataig kōnrrun cha, pōrr pinebgatōmaywansrō, pōrr neeshibgatōmaywansrō, walligebwansrō, waguebwansrō, misag larrōbicha warōnrrun cha. Ñui yellygurri pirau muba kuimbura maya misaabe, ñigurri mayanguen tabig nebuilō kōnrrun cha.

¹⁵ Nabe ñiba pasrar cha. Ñi chu yaindōgucha nabe ñun chi kōmōnrrai ashib tōga pasrōwa, katōle i piraumay nabe ñune pera arrumōnrrun cha. Na ñun maig martrab taigwan na trunun maramnegatig nabe ñune elachimōnrrun— taig kōn tru piabyube.

¹⁶ Inchen Jacob tru piab tsuigugurri kiagasrabe, trenchibig kōn: “Isa kōmō, Jehovábe yu pasrōben, nabe treeg kuitamappe isumubrain kōn” cha.

¹⁷ Incha truba kōrig kui inchabe, trenchibig kōn: “Yube si, purō kōrig kōmdiig kōtan cha. Chi peg kōmōtō, Tiuswei yaba, srōmbalarō yaskappa kōn” cha.

¹⁸ Inchen Jacobpe lōtszhhig kurrabe, tru nō kuña mari srugwan kusrua, kan pilar lataig ōlneb pasra, truyu ōyeeg puigwan aschai trubala aceite itōlushibig kōn.

¹⁹ Incha truyube Betel cha wamabig kōn, merrabsrōmbe tru ciudawane Luz cha wamig kōbig kuindōgucha.

²⁰ Incha Jacobpe nuinetō ōyeeg martrab cha kōrrōmisrōbig kōn: “Tius naba lincha pasrab, na mōi ōyeeg inrrab yaigu nan chigucha kōmōnrrai ashib, nan mamig, mutsamig tranōb, pula pasramig tranōb,

²¹ katō na nai mōskawei yausrō chigucha kōmō, katōle pishindō tab ka puinabene, Jehovábe nai Tius kōnrrun cha.

²² Inchen i srugwan kan pilar lataig ōlgandō na kusrua pasriibe, Tiuswei ya kōnrrun cha. Inchen Tius nan chigurrimbunō tranigugurri nabe cienyu diezbatō, diezbatō nun tranamōnrrun” chibig kōn, Jacobpe.

29

Jacob Haran Pirausrō Puig

¹ Jacobpe nō chu yamsrōmay ib ya, pōrr kal-labgatōmaywan misaamerain pirausrō pubig kōn.

² Incha trusrō pua ashene, tru wambigwansrōmbe kan pisu wabig kōn. Inchen tru pisu pulube ubishamera pōn sōtō israb warabelō kōn, kaguen truilōbe tru piwān muchibelō kua. Inchen tru pisube larrō nu sruutōga kasraig pasrabig kōn.

³ Inchen tru ubisha sōtōmera truyu mayamba tuluntsunōbene, ubisham-eran pi mutsōsrōnrrab tru srugwan malsra, katō chab muchene, srugwan katōle kemalsra pisuwan kasrōbelō kōn.

⁴ Inchen Jacobpe tru ubisha ashibelan:

—¡Nai nunelō! ¿Ñimbe chuelō kōgue?— cha payene:

—Nambe Haransreelō ker— chiben,

⁵ Jacobpe katōle trencha payibig kōn:

—¿Nacorwei awelu Labanwan ñimbe ashibelō kōmōgueh?— cha.

Inchen nōmbe:

—Truigwane nambe ashibelōwein ker— chibelō kōn.

⁶ Inchen Jacobpe:

—¿Kwanrrø kømø, tab ka tsubig kuitarru?— cha katøyug payibig køn.

Inchen tru ubisha ashibeløbe trenchibelø køn:

—Nøbe tab ka tsubig køn cha. Au, ñiguen ash cha, møskawei ubishameran merrana nimbasr Raquelbe uyu arrun— cha.

⁷ Inchene Jacobpe trenchibig køn:

—Kwalømdø srø køn cha. Ubishameran kanbalatø mara keramibe menrra tørbatø køn cha. Pi mutsøsrø, pu manrrai katø merranamdiig kømuita— cha.

⁸ Inchen truiløbe trenchibelø køn:

—Treeg maramgaig køn cha, maya ubisha sötømera kerrigu kanbalatø misramne, tru ubisha ashibelø, tru pisu pala srug trarrig tsubigwan malsramne. Malsrøbendøwei ubishameran nambe pi mutsøsrø køn— cha.

⁹ Inchen Jacob truiløba waminchib pasramne, Raquelbe møskawei ubishameran merrana, arruptinchibig køn, kaguende ubishameran nø ashibig kua.

¹⁰ Inchen Jacobpe tru nui usraimbe nuchag Labanwei nimbasr Raquelwanba, katø tru Labanwei ubishameraba arri ashabe, kemalla, tru pisuyu srug kasraig tsubigwan malsra, nui kuchimøskai Labanwei ubishameran pi mutsøsrøbig køn.

¹¹ Incha trugurrimbe Raquelwan muchawabe, truba truba kishibig køn.

¹² Incha nøbe:

—Rebecai nusrkain kur' cha. Labanweimbe kuchiuøn kur— chib waminchen,

Raquelbe nui møskawan eshkanrrab luløbig køn.

¹³ Inchen Labanbe tru nui nuchawei nusrkai Jacobweimburab wamindi mörøppe, katørrab luløb ya, ira, muchawa, nui yamay pera ibig køn. Inchen Jacobpe nun chitø purayaigwan kerriguh eshkabig køn.

¹⁴ Inchen Labanbe trenchibig køn:

—Ñibeguende nai anindøwein køn— cha.

Jacob Leaimba Raquelweimba Marøb Megaig

Inchen Jacobpe yandø Labanba pølguen tsuben,

¹⁵ Labanbe nune trenchibig køn:

—Ñi nai yauig kuimburøtø chi pagaraimig ka mara tranøptø megamig kømøn cha. ¿Mayanzhig pagaramø?— cha.

¹⁶ Inchen tru Labanbe nimbasrmera pagatø tøgäig købig køn, mayurbe Lea købene, wendiibe Raquel.

¹⁷ Leabe kammera larrø tabzhig ashibig købene, trune Raquelbe larrø tab malø pasraig, larrø tab ishuzhig købig køn.

¹⁸ Incha Jacobpe Raquelwan purø chull asha, nui kuchimøskawane trenchibig køn:

—Ñui wendø nimbasr Raquelwan nai srain kønrrai ñi tranamwei trattø y pa pila ñuyasig mara tranøb megarrumøn— cha.

¹⁹ Inchene Labanbe trenchiptinchibig køn:

—Asiimíigwan tranøbgunrriibe ñi yauigwan tranrrumøn cha. Trube, naba kørømisr— cha.

²⁰ Øyamay Jacobpe trattø y pabila Raquelwan tranamwei mara tranøb megabig køn. Nøbe Raquelwane purø chull asha, megaig køppe, nune ni kan maya yanaguen kømub lata inchibig køn.

²¹ Yandø Jacobpe pilamera trattø y par nemisrene, Labanwane trenchibig køn:

—Maya yana mara tranøb meganrrain taigwan yandø nemaran cha. Møimbe nai sräi kønrrai tranrra— cha.

22 Inchine Labanbe truyu maya misaameran tulamrrai wama larrø tab fiesta marøbig køn.

23 Indiibe yandø yem misren Labanbe nui nimbasr Lean pera arrua, Jacobwane truigwan tranøptinchen, Jacobpe pera kibig køn.

24 Inchagucha Labanbe kan karuig mendig megabig Zilpa taigwane Lean purugub meganrrai tranøbig køn.

25 Indiibe løtsøbe, Jacoppe Leaba kib tsuptinchibrain kui ashibig køn. Incha Jacobpe Labanwane trenchibig køn:

—¿Øyeebe nane ñibe chi margu? cha. ¿Yamba Raquelwan tranamwei nabe ñuyasig marøb megaig kømuitarru? cha. ¿Nane chindimbarre øyeege isa kebenøsrkugu?— cha.

26 Inchine Labanbe trenchibig køn:

—Nam waraim piraube kasharanrrai wendiigwanmerrig tranamig kømøn cha, mayurguen ka tsumnetøbe.

27 Leaba tru kasharabyu tabig mab kasrag waramigwan trune neigwan patsøgø chibig køn Labanbe. Trugurrimbe Raquelwangucha tranrrumøn cha, trattrø y pa pila ñi nayasig katøle srøig marøb meganrrab købene.—

28 Inchen Jacobpe treeg marøbig køn. Incha tru Leaba tru kasharabyu tabig mab kasrag waramigwan tru trune neig maramigwan chab nemarene, Labanbe Raquel nui nimbasrwan srain kønrrai tranøbig køn.

29 Inchen Labanbe kan karuig mendig megabig Bilha taigwangucha Raquelwan purugub meganrrai tranøbig køn.

30 Inchen Jacobpe Raquelbagucha kibig køn. Incha truigwane Lean lataguen kømø, masken undaarabig køn. Incha Labanweyasig katøgucha srøig trattrø y pa pila mara tranøb megaig købig køn.

Jacobwei Nusrkælø

31 Jehovahøbe Leane Jacobpe ke palabinø indi ashabe, truigwane ureg tøgagønrrai tranøbig køn. Trune Raquelbe urekkaig kønrrabig købig køn.

32 Incha Leabe kwanrriig kørrømisra, kan nusrkai tøgagua, truigwane Rubén munchi pasrøbig køn, kaguende nøbe trenchibig køn: “Na yeekkucha isui megaben, Jehovahø nan isua ashtan cha. Møimbeguende nai keebe nan undaaranrrautan” cha.

33 Incha katøle kwanrriig kørrømisra, katø kan møg unø tøgaguig køn. Inchabe trenchibig køn: “Jehovahøbe mørin køn cha, nan øyeege undaaramuinab megaigwan. Inchagurri i nusrkawangucha nan trandan” cha. Treekkurri truigwane Simeón munchi pasrig køn.

34 Incha katøle kwanrriig kørrømisra, katø kan nusrkai tøgagua trenchibig køn: “Møimbe nai keebe naba mas trakkandø linchautan cha, kaguen nabe nune chabguen pøn nusrkæløguen tranar” cha. Inchagurri truigwane Levi munchi pasrøbig køn.

35 Incha Leabe katø kwanrriig kørrømisra, katø kan nusrkai tøgaguig køn. Inchabe trenchibig køn: “Møi iyube Jehovahøwan mayanguen tabig wamin-damønrrun” cha. Inchagurri truigwane Judá munchi pasrøbig køn. Incha trugurrimbe yandø kan maya yana køsrøn mas ureg chigaa guig køn.

30

1 Raquelbe Jacobwei ureg tøgagønrrab kaimappe, numøsrwane truba pus-
rkwai asha, Jacobwane trenchibig køn:

—Ureg tøgagønrrab tranrra cha, tren kømuisruandø nabe kwamønrrun—
cha.

2 Inchen Jacobpe truba nama, trenchibig køn:

—¿Nagan Tius kuitarru cha, ñun chi ureg chigaig kønrrai marøbiibe?—

3 Inchene nøbe trenchibig køn:

—Bilha, nai karuig mendig megabigwan na ñun tranar cha. Truiba ki, chibig køn. Inchen truig ureg tøgamisren kal-laben, nai srøbhagu mutikkurrimbe na tøga misri lataitøweih køben, nabe nøgurri ureg tøgaig kømønrrun— cha.

4 Øyamay Raquelbe tru nui karui megabig Bilhan Jacobwan srai lataig kønrrai tranøbig køn. Inchen Jacobpe tru Bilhaba kibig køn.

5 Inchen Bilhabe kwanrriig kørrømisra, Jacobwei kan nusrkai tøgaguig køn.

6 Incha Raquelbe trenchibig køn: “Tiusbe naimburab maig maramigwan sølgandø martan cha. Incha nai miaigwan møra, kan nusrkai trandan cha. Treekkurri Incha Raquelbe tru unane Dan munchi pasrig køn.

7 Tru Bilha Raquel karui mørøb megabiibe, katø kwanrriig kørrømisra, Jacobwei katøgan nusrkai tøgamisrig køn.

8 Incha Raquelbe trenchibig køn: “Tius namun øyeeg kønrrain kuikkurri nabe nai numøsraimba purø murtø melambuyab megawa, na kanar” cha. Treekkurri Raquelbe tru unane Neftalí munchi pasrig køn.

9 Inchen Leagucha yandø mas ureg tøgagønrrab kaimappe, nui karuig mendig megabig Zilpan pera arrua, Jacobwan tranøbig køn, nui srain kønrrai.

10 Inchen tru Zilpa Leai karuig megab ishuube, Jacobwei kan unø tøgamisrøbig køn.

11 Inchen Leabe trenchibig køn: “Yangucha tabig pub attrabigwan tøgaguinatan” cha. Incha treekkurri Gad munchi pasrøbig køn.

12 Inchen Leai karuig mendig megabig tru Zilpabe Jacobwei katøgan nusrkai tøgaguig køn.

13 Incha katø Leabe trenchibig køn: “Nane larrø kasrag køtan cha. Ishumburmerabe: jkan yangucha tabgui unamigwan tøgaguital!” chinrrautan cha. Treekkurri tru unane Aser munchi pasrig køn.

14 Tirigu parøb kwalømmerrawan Rubenbe wambigwansrø llirab yabe, mamig trulmera mandrágoras tailø wetørrawa usri Leayasig lurra, srua arrubig køn. Inchen Raquelbe Leane trenchibig køn:

—Tiusmanda, ñui nusrkai tru mandrágoras tailø srua arriilan srøttra— cha.

15 Inchene Leabe trencha løtabig køn:

—¿Ñibe nai kewan yeeg kerrawa pasraptøga ñungan chigucha kømui lataig mørøraitarru? cha. ¿Møimbe nai nusrkai mandrágoras srua arriilangucha nan kerranrrab indirru?— cha. Inchene Raquelbe trenchiptinchibig køn:

—Tru ñui nusrkai mandrágoras srua arriilan na merrarranrrur cha, truburø mõi yem Jacobpa ñi ki pøs— cha.

16 Inchen yandø maaben køben, Jacob wambigwansrø uña katø arruben, Leabe katønrrab webyabe, trenchibig køn:

—Mõi yembe ñibe naba kiamig kønrrab køn cha, kaguen nai nusrkai mandrágoras srua arriitøga nabe Raquelwan pagarawa, truburø mõi yembe nabe ñiba kiamig køn— cha. Inchen tru yembe Jacobpe Leaba kibig køn.

17 Inchen tru Lea miab megaigwan Tius møren, Leabe kwanrriig kørrømisra, trattrøgatø kønrrabyu nusrkawan Jacobwei tøgaguig køn.

18 Incha Leabe trenchibig køn: “Tiusbe tru na pagaraiukurri nan keta trandan cha, kaguende nabe nai karuig mendig megabigwan nai kewan tranig kua” Incha treekkurri unane Isacar munchi pasrig køn.

19 Incha Leabe katø kwanrriig kørromisra, Jacobwei katøgan nusrkai tøgaguig køn, truipe tru trattrø y kanba kønrrabyu nusrkawan.

20 Incha Leabe trenchibig køn:

“Tiusbe nane purø tabigwan keta trandan cha. Møimbe nai keebe naba kørromisra uñchun cha, kaguende nabe trattrø y kanba Jacobwan nusrkalø tranar” cha. Incha tru nusrkawane Zabulón munchi pasrig køn.

21 Incha trugurrimbe Leabe kan nimbasr tøgagua, truigwane Dina munchi pasrig køn.

22 Inchendø Tiusbe Raquelwan isub tōga wawa, nø miab megaigwan mōra, ureg kønrrai tranig køn.

23 Incha nōbe kwanrriig kørromisra, tru srøsrø nusrkawan tōgamisrabe trenchibig køn: “Na chi urekkaig tsaløbala indinab unig købigwan trunun mōimbe kerratan” cha.

24 Incha treekkurri trunune José munchi pasrabe, trenchibig køn: “Jehová nan katøgan nusrkai tranrra chimubraitā” cha.

Jacob Puamisrøb

25 Yandø Raquel Joséwan tōgamisren, Jacobpe Labanwan trenchibig køn:

—Na tsuig købig tru pirausrømay inrrab, ibashcha cha.

26 Nai sralan tranrra cha, na truilaimburab mara tranøb megailan, nai nusrkalanba, nan yandø ibashcha chibig køn, kaguende nabe ñuyasig yeeg marøb megaigwan ñibe asha køn— cha.

27 Inchen Labanbe trenchibig køn:

—Ñuin kabyu na tabig asōnainabene tiusmanda naba ka kørromisr cha. Pøš Jehová nan øyeeg tabig nebub attrai mariibe ñigurri øyeeg kuin kui nabe tōgandø wetøbeña pasrar cha.

28 Incha eshkarra chibig køn: ñi maya pagar utønrrab isuigwan, nabe tregwan pagaramønrrun— cha.

29 Inchene Jacobpe trenchibig køn:

—Ñibe ashibig køn cha, nabe ñuyasig yeeg marøb megaigwan. Incha ñui ushameran nabe yeeg tab ashib tōgaguigwan.

30 Kaguendø na yu marøb meganrrab arrumøwatøbe ñibe trengatig nørro tōga kōmuig købig, mōimbe yeeg nørro nemisran cha, na yu puikkurri Jehovábe ñune mayanguen tabiitø nebuig kønrrai maran cha. ¿Inchendø nai ureemeraimbe nabe mana marøb pølbasramø?— cha.

31 Inchene Labanbe trencha payibig køn:

—¿Ñun chi tranamø?— cha.

Inchen Jacobpe trenchibig køn:

—Chigucha tranmørrunrrig cha. Na ñun øyeeg martra taigwan ñi tregwan martrab misrene si, nabe ñui ubishameran ashibig asamønrrun cha.

32 Nan mōi ñui maya ubisha sōtø utuwan pureb arruben, tsurø ubishameranba, rayas tōga ubishameranba, yalø ubisha— ureemeranba, katø maya cabra— ureezheelø tsureelanba rayas tōgarmaranba, ñi tarømarømarøb inrrig cha, Nai pagarbe truilø kønrrun cha.

33 Pøš Srøna trumarsrø tru na kanab megaigwan ñi ashchab arruben, tab marigwan kenamartrabibe truig kønrrun cha. Kabe kan ubisha kui, kabe kan cabra-unø kui rayas tōgar kōmøwei, tsureelø kōmøwei, kabe kan ubisha-unø yalig kōmøwei, tru utu ñi treelø wetørrape, trube, nabe ñuyelan nilab megaig kønrrun— cha.

34 Inchene Labanbe trenchibig køn:

—Ñi trendaig tab kòn— cha. Labanbe treeg korrømisrøbig kòn.

³⁵ Inchen Labanbe tru kwalømdøwei møg cabramera sinda tøgarmenanba, tsureelanba, ishug cabramera sinda tøgarmenanba, tsureelanba, katø pullig tøgarmenanba chishtø, katø yalø ubisha-ureemeran kerriguba tarømara, nusrkalai tasku ashchai pønsrøbig kòn.

³⁶ Incha tru ubisha sötømerane Jacob tsuisrøngurri pøn kwaløm ambiisrø srua ambubelø kòn, nøm waraisrø. Trune Jacobpe nuimburappe Labanwei katøgan ubisha sötømeran ashib tsubig kòn.

³⁷ Incha Jacobpe alamo srarmeranba, almendro srarmeranba, palanda tusrwanba para, trugurrimbe kaluswan karrøbig kòn, pulø sindazhig kena kønrrai.

³⁸ Inchabe tru tsig karrilane tru ubishamera pi muchig kemalinug pønsrøbig kòn. Incha ubishamera wambiimisar tru pi mutsinug pubene,

³⁹ tru carneromerabe ubishameran truyu nesraløbelø købig kòn. Incha tru tsig karra pønsrainug nesralig kuig køppe, ubishamera lluiløbe rayas tøgarmena køben, tsureelø køben, pulig tøgær køben, llubelø kòn.

⁴⁰ Incha Jacobpe tru ubisha-ureemerane nørømara, Labanwei ubishamerayu rayas tøgarmenanba yaleelanba Jacobpe nui ubisha sötømerayu keerøbig kòn. Incha yandø nuyasig ubisha sötømera kønrrai marøbig kòn. Labanweimba kanbalatø kømøtø.

⁴¹ Incha tru mas werus asr tøgær ubishamera wambiimisra pønrraimørig, Jacobpe tru tsig karrilan ubishamera pi muchib kemalinug pønsrøbig kòn, tru ushamerain pinrøgue. Tru tsig karrig pønsrailan ashib nesraliilø kønrrai.

⁴² Inchen tru tre asrka ushamera wambiimisra amrrubene, tru tsiimeran pønsrømíig kòn. Inchagurri tru Labanweimbe tre asrkazheelø køben, tru mas werus asr tøgarmena larrø chisheløbe Jacobwein købig kòn.

⁴³ Incha Jacobpe larrø puaig misrig kòn, ubisha sötømera lata, karuig mendig melab møguelø lata, ishumburmera lata, camellosmera lata, burrusmera lata purø nørø tøgaiikke

31

¹ Jacobpe Labanwei nusrkalø øyeech chib amønaigwan wam mørøbig kòn: “Jacobpe namui møskaweiwan kerriguba nø tøgamisrøbig kebya, truitøga mømibe larrø puaig misrin kòn” chib kui.

² Inchagucha Jacob Labanwei maløwan ashene, maløbe ke mindiitø uñibig kòn, merrabwan lataig kømøtøgue.

³ Inchene Jehovahé Jacobwane trenchiptinchibig kòn: —Merrabsrø ñui kølli misamerai pirausrømay katø inrrø cha. Ñui nammisaamera waraisrømay, nabe ñiba pasramønrrun— cha.

⁴ Inchen Jacobpe Raquelwanba, Leanba wamabig kòn, tru nø ubishameran ashib tsuisrømay amrrunrrai.

⁵ Inchabe nømune trenchibig kòn:

—Ñui møskaimbe nan merrabwan lataig kømøtø, maløbe ke mindindø, mindindø uni ashar cha. Inchendø nai møskawei Tiusbe naba pasraig køn chibig kòn.

⁶ Ñimbe ashibelø køn cha, nabe ñimui møskawan na maya chish kuimburab chish kuitøga nabe mara tranøbig megaig køn cha.

⁷ Inchen køben ñui møskaimbe, treeg martrab chib treeg martrab chib marmuig køn cha nai pagarwan ke pa tratrø piejes yunømarøbig køn. Inchen køben Tiusbe na chi tøgaguigwan Laban kaig marmønrrai nan sötø pasraig køn cha.

⁸ Nøbe, “Ñui pagarbe tsurø ubishamera kønrrun” chibeneh, trube, ubishamera lata, cabramera lata mayamba tsurø ureezheelø llubelø køn cha. Inchen: “Ñui pagarbe sindaba ubishamera kønrrun” chibeneh, trube, ubishamera lata, cabramera lata truiløgucha mayamba sindaba ureezheelø llubelø køn cha.

⁹ Øyamay Tiusbe ñimui mōskawei ubishameran lata cabrameran lata nørrø kerrawa, nan tranig køn cha.

¹⁰ Indiibe kan pijibe ubishamera lata cabramera lata wambiimisra pønrrøben, nan piappe, treeg piatan cha: tru møg cabrazheelø cabrameran nesraløbeløbe sindabar køben, tsureelø køben kagømønrraindø tsurøzheelø køben treelø købashib.

¹¹ Inchen tru piabyube Tiuswei ángelbe nane trenchitan cha: “Jacob” cha. Inchen nabe trendainatan cha: “Nabe yu war” cha.

¹² Inchen nøbe nane trenchitan cha: “Ñiguen tab ash cha, tru møg cabrazheelø cabrameran nesraløbeløbe, sindabar køben tsureelø køben, kagømønrraindø tsurøzheelø køben, treelø køn cha. Nabe ashibig kur cha, Labanbe ñune maitø marøb arrigwan.

¹³ Nabe ñi tru srugwan aceite itølusha katø ñi ñuinetø øyeeg martrab cha kørromisirug tru Betelsrø kenamisrøb Tius kur cha. Møimbe kurra, i piraurgurrimbe webya, ñi kal-lain pirausrømay katø inrrø” cha, nane trenchitan—cha.

¹⁴ Inchene Raquelba, Leababe trencha løtabelø køn:

—Nambe yandø namui mōskaweinuube chi ketig utamibe chiga ker cha.

¹⁵ ¿Pøš, namune ka mendailø kui lataig indig kømuitarru? cha. ¿Namune nøbe yana, truburø mara tranøb megaigwane nø chishtø maig kømuitarru? cha.

¹⁶ Inchawei nø purø nørrø tøgaguilan Tius namui mōskawan kerrawa ñun traniiløbe, kerriguba namuimba, namui nusrkalaimba kuig købene, mømimbeTius nø maig mar taigwane ñibe kerrigu treeg mar—chibelø køn.

Jacob Padan-Aramsømay Ib

¹⁷ Inchen Jacobpe tamarøb menda, nui nusrkalanba, nui sralanba camelosmerayu itøguanøšra,

¹⁸ nui ushameran kerrigu merranøbig køn, katø tru nø Padan Aramsrø chigurrimbunø tøgamisriilanbañau. Incha Canaán pirausrømay ibig køn, katøle nui mōskai Isaac tsui pirausrømay.

¹⁹ Inchen tru Labanbe nøøøšrø ubisha isig partrab yaig mugaabenbatø Raquelbe tru yau yau tøgagui tiusmeran søra wesrain købig køn.

²⁰ Øyamay Jacobpe tru Laban arameowane tru webya yamigwane chigucha mørø waminchimøtø, nilø purø may welula ibig køn.

²¹ Incha Jacobpe nø kerrigu chi tøgaguilan srua, ashmøwatø welula ya, Eufrates nu piyu chab larrayabe, trugurrimbe Galaad tun ureemeragøba pirømerawansrø inrrab ibig køn.

²² Indiibe pøn kwalømyube Labanwane eshkaptinchibelø køn: “Jacobpe welula, yain køn” cha.

²³ Indig Labanbe nui nammisaameran lincha pera, Jacobwan wetøgønrrab pasreb mendabig køn. Indigbe trattø y pa kwaløm puraiben tru Gaalad pirau tunmerasrø chab wetøgøb ibig køn.

²⁴ Inchen tru yem tru Laban arameowane Tiusbe kan piabyu kenamisra, trenchibig køn: “Isuptø mar cha. Chigøben martrumøn chib tsag, tsag waminchab kømø.”

²⁵ Indig Labanbe Galaad tunmerasø wetøgøbig køn, tru Jacob nui yaeløba kørømisriisrø. Incha Labangucha trusrøndøwei nui nam misaameraba kørømisrabe,

²⁶ Jacobwane trenchibig køn:

—¿Chi mara pasrøgu? cha. ¿Nane chindimbarre øyeeg may kebenørskøgu? cha. Kan ñigui nai nimbasrmerane kwayabyu kemøri ishumburmeran kui lataig srua yaitan cha.

²⁷ ¿Chindimbarre nane øyeeg kebenørskøb, trubatø nilø welula igu? cha. Nane chigucha eshkamøtøbe. Nan eshkaig kuimbeh, tab amrrigay cha, kantab, palø ichib, arpa kønab kasraatø ñimun treeg ungua cha ørøbsrubraig kuinrrun cha.

²⁸ Ñibe nai awelu uremeran nai nimbasrmeran ungua cha muchanr-rainguengaig maritan cha. Ñibe møimbe ni kan chuguinquen mørmíig lataig marin køn cha.

²⁹ Pøs nabe ñun chi marøg køben maramigwan tøga pasrar cha. Inchendø ñui møskawei Tiusbe mira yem øyah chitan cha: “Jacobwane isuptø mar cha. Chigøben martrumøn chib tsag, tsag waminchab kømø”.

³⁰ Ñui møskawei yauwan truba isub pesrøgøben inrrab yabe, trube, ¿nai tiusmerane chinchab nila sruaigu?— chibig køn.

³¹ Inchene Jacobpe Labanwane trenchibig køn:

—Kaguen nane kørig kuig køn cha, inchippa ñi ñui nimbasrmeran nan namiimay kebya kerraptinchaitamab.

³² Pøs tru ñui tiusmeran møig køben yu tøga wabiibe kwanrrain chibig køn. Nai yaelø testigos kønrrai cha nai chi tøgaguigu, chitø ñuyelø køtashchab ñiashib lau,— chibig køn.

Inchendø Jacobpe Raquel nemøra srua arritamappe chiguen isumuig køn.

³³ Inchen Labanbe Jacobwei carpa yasrø kebya, trugurrimbe Leain carpa yasrø, katø tru pailø karui mørøb melab ishumburmeraisrø lab kebya, kalawa, tru Leai carpayugurri webarruabe, yandø Raquel waisrø lab kebig køn.

³⁴ Inchen Raquelbe tru tiusmeran nemøra kan camelloi tsølig umbu warøppa, trubala wamisrøppa wabig køn. Inchen Labanbe tru carpa yau kerriguh lawa, kalaben,

³⁵ Raquelbe møskawane trenchibig køn:

—Nai møskai, na ñui merrab kurrømbubene, ñi nan namømørrunrig cha, kaguen nabe chillig misraig war cha. Inchen Labanbe tru taska marig tiusmeran wetørranrrab kaima lab uñen,

³⁶ Jacobpe truba nama, øyeeg chib namab mendabig køn:

—¿Nabe ñune chi kalø marta? cha. ¿Naimbe chi kalø mari pasra? cha, ñi nan ke chinchimmørø inchib nan wendautø pasra attraimbe.

³⁷ Ñibe nai chi købeløyu chishtë lawa, ¿ñui yau pønrrabelan chi wetørragu? cha. Inchawei ñi chi wetørrawabe, yu nai yaelai merrappa, ñui yaelai merrappa pønsrø chibig køn, nam pailainug møig søl pasrai kui nøm ashchai.

³⁸ Na møi ya pib trattrø pilamera na ñuyasig marøb megaben, mana ñui ubishamera, ñui cabramera lutø llumuig køn cha. Katø nabe ni managuen ñui ubisha søtømerayugurri carnero kandøguen ma kømøwein kur cha.

³⁹ Nabe managuen kan kaambu namig usha kwabasiilanguen ñune srua arrumíig kur cha. Treeg kømøtø, truburøbe nagen ñun pagaramig købig køn cha. Kan trutø kønrrab kuindø ¿kwaløm niligwan lata, yem niligwan lata ñibe nan, nan ulø payibig kømøtirru? cha.

40 Kwalømbe nabe pachig købiitø kwamdiig kui megab, yemmerawane kørrag købiitø kwamdø kui megainaben, kiguen pumíig køn cha.

41 Pilamera pib trattrøh nabe ñui yau megaig køn cha. Ñui pa nimbasrmeran nan tranamweimbe pilamera pa trattrø y pib pilaba mara tranøb megaig køn cha. Inchen trattrø y kanbabe ñui ushameraimburø megaig købig køn cha. Inchen nan pagaramigwane katø, katø peemayh, peemayh ñibe yunømarøbig køn cha, pa trattrø piejes yunømarig køn cha.

42 Nai mōskai Abrahamwei Tius, nai mōskai Isaac truba korig tōga pasrai Tius naba pasrømuig kuimbeh isa kōmøtø, ñibe nane chigucha chigaig inrrai ørøbsruig kuitan cha. Inchen ñi nan yeeg kaig inchen isui megaig købigwanba, na mandø mara tranøb megaiwan købigwanba, Tiusbe trunun ashib wawa, ñune mira yem øyeebe kalø marmøta chib mur wamindiinrun— cha.

Jacob Labanba Øyamay Kønrrain Cha Kørrømarig

43 Inchen Labanbe Jacobwan trenchibig køn:

—I ishumburmerabe nai nimbasrmera køben, nøm tøgaguig ureemerabe nai awelumera køben, ubishamerabe nai ubishamera køben, cabramerabe, nain cabramera køben chigurrimbunø yu kena købiibe nayelø køn cha. Treeg kuindøgucha nabe nai nimbasrmeranba, katø nøm tøgagui nusrkalanbabe nabe katøle nayelø kønrraimbe yandø chi maramgaig køtan chibig køn.

44 Incha mōimbe amø chibig køn, naba ñiba øyamay kønrrai mara kørrømartrab cha. Tru treeg mariibe nainuuba, ñuinuuba øyah kørrømarigwan isunanøb pasrønrrain— cha.

45 Inchabe Jacobpe kan nu srugwan malsra, ølneb kusrua pasrabe,

46 tru nui yau misaamerane trenchibig køn:

—Sruumera tulisay— cha.

Inchen truiløbe sruumera tulisha, tun pasrabe, tru tun pasrim puluh kanbalatø purramisra mabelø køn.

47 Inchen Labanbe truyu nuin triimaybe ‘Jegar Sahaduta’ cha wamøbene, Jacobpe nui triimaybe ‘Galaad’ cha wamig køn.

48 Inchene Labanbe trenchibig køn:

—I srug tun pasriibe mōi naimba, ñuimba treeg kørrømisrigwan eshkað pasrønrrabig kørrømisran— cha. Inchagurri truyube Galaad taig købig køn.

49 Incha katø Mizpagucha taig købig køn, kaguen Labanbe trendaig købig køn:

—Nam ñiba kanikkurri, kanikkurri yandø katøbe asiyamig nebumuben, nam maig inçibelø køtashchab Jehovah nø ashib pasrønrrain cha.

50 Inchippa nai nimbasrmeran ñi kaig inçib, maig købash inçib, kabe nai nimbasrmera kōmnetø ñi katøgan ishumburmeran pera arrin kui inchen, namune mu katøgan ashib pasrømuingucha, ñuimba, naimba øyah marig køn chib, Tius nø eshkað pasrønrrun— chibig køn.

51 Incha katøgucha Labanbe Jacobwan trenchibig køn:

—Ash cha, i tru srug tun pasrigwanba, katø tru srug ølneb pasrigwanba, na tru naimba, ñuimba tøbøtag pasrigwan.

52 Iig tru srug tunbasriiba, srugwan ølneb kusrua pasriibabe øyah marig køn chib isunanøb pønrønrabelø køn cha, nagurri ñuimay purøbunamig kōmønwei, katø ñigurri naimay purøbunamig kōmøwei kønrrai.

53 Inchen ñui awelu Abrahamwei Tiusba, katø ñui awelu Nacorwei Tiusba maig maramigwan namun nø asha martrain— chibig køn.

Inchen Jacobpe tru nui mōskai Isaac korig tōga pasraig Tiuswei merrab: “¡Katø! marmø kōmø, nabe treeg maramønrrun” chibig køn.

⁵⁴ Incha Jacobpe tru tunbalasrø Tiuswan keta, trannrrai ushamera kweecha, tru nui yau misaameran mamiimeraba manrrab amrrunrrai wamabig kôn. Inchen truyu mayeeløba ma, tru tunyu kibelø kôn.

⁵⁵ Incha katø løtsø Labanbe kia kurra, nui awelu ureemeran, nui nimbasmeran muchawa, trugurrimbe mayanguen tabig nebuilø kônrrigay cha. Yandø nui pirausrømay katøle inrrab ibig kôn.

32

Jacob Esaúwan Katønrrab Inrrab Tamørøb

¹ Inchen Jacobpe nui yamigwan legucha iben, nune Tiuswei kan angelesmera katønrrab werruben,

² Jacobpe truilan ashabe, trenchibig kôn: “Yube Tius nui angeles sötømeraba kørømisra pasrainug kôn” cha. Incha treekkurri truyube Mahanaim cha wamabig kôn.

³ Incha Jacobpe tru Edom pirau tru Seirsømay wan suar merrab amrrai ørøbig kôn, Esaúwan katønrrabelø tru nabe punrrab arrumønrrun cha, nui nuneg eshkanrrabelø.

⁴ Incha øyeeg chinrrai karua ørøbig kôn:

—“Ñi nai mayur nuneg Esaúwan Jacob na ñi maig chiben megabiibe, trendan cha: ‘Nabe mõi øyangatig Labanba kørømisra tsua,

⁵ møimbe waaramera køben, burrumera køben, ubishamera køben, cabramera køben, karuig melabelø møguelø køben ishumburmera køben, tøgagig kur’ tan chinrrai. Pøs ñi nai mayur nunewan nabe ñun øyeeg eshkawa ørar cha, ñi nan truba tabig utig pasramig kônrrai.”—

⁶ Inchen tru wam srua ambubeløbe Jacobweimay katøle amrrua, trenchibelø kôn:

—Ñui nuneg Esaú waisrø ashchab amber cha. Nøgucha ñun katønrrab arrun cha, møguelø cuatrocientos lincha peraig.—

⁷ Inchen Jacob øyeeg taigwan mørabe, truba kørig kui inchib, truba isuin kørømisra, nøbe tru nui misag lincha perayailan pa sötø pirishibig kôn, tru ubishameran, cabramera køben, waarameran, camellomeran chigucha.

⁸ Pøs nøbe treeg isubig kôn: “Inchippa Esaú kan sötøwan kwayanrrab megambuingucha, katøgan sötøbe lulrain” cha.

⁹ Incha Jacobpe Tiuswan trenchib miabig kôn:

—Nai møskai Abrahamwei Tius, nai møskai Isaacwei Tius: “Tru nai pirausrømay, nai yau misaameraisrømay katøle nan inrrø cha. Ñune truba truba tøgagig misrøb inrrai maramønrrun” cha, ñi nan trendaig kuig kôn cha.

¹⁰ Na ñi karuigwan marøb megabiibe ñi larrø tab indigwanba, ñi trendø treeg tabig køppe treeg mariilanba na truigwan utab pasramibe nabe trenगतig truburab kømuiatan cha. Pøs, nabe i Jordan nu piyu larreb urasbe i pøtønain tsiizhiitø srua pasraig køben, trune møimbe nuingui, nuingui pa sötø tarømara pasramig tøgä pasrar cha.

¹¹ Nai nuneg Esaúwei taskugurri chi kømønrrai marøbsrumuguh cha. Nane kørig køtan cha, inchippa nanba, usralmeranba, ureemeranba kweecha pøtønrraitamab.

¹² Ñitøwei nane trendaig kôn cha: “Nane maya nuguen tabig nebuig kônrrai mara, nainukkurri amrrub misaamerabe purø norrø køptø, mar menda kan pisrum lataig kønrrun cha, mundamguengaiikke.”—

¹³ Incha tru yembe Jacobpe truyu kia, nø truyu chi tøgaguigwan nui nuneg Esaúwan ketamig lawa wesrabig kôn.

14 Cabramera doscientas, pib trattrø turmøg cabramera, ubishamera doscientas, turmøg ubishamera pib trattrø,

15 Camellamera ureg perarcheelø treinta, waaramera cuarenta, tororeemera pa trattrø, asnamera pib trattrø, pa trattrø burrusmera.

16 Incha tru nui karuig mendig melabelai tasku tru ushameran nuingui kan sötø, kan sötø pønsra, tru nui mendig melabelane trenchibig køn:

—Nai merrab ambay cha. Incha tru tarømarig sötømerane kanguetøtø kømøtø, yabsrø, yabsrø merranrrigay— cha.

17 Incha Jacobpe tru ke srøsrø merrana ibigwane trencha karua ørøbig køn: —Nai nuneg Esaú ñun kata: “¿Ñibe muinukkurriig kugu chib, chumay inrrab arrugu? chib. ¿Ñi merrana yaig ushamerabe muielø kø?” chib payene,

18 ñibe øyah chib lötønrrig cha: “Ñun ketamig ñi nai ashib karubig ñi Esaúwein køn cha, iilane ñi maig chiben marøb megabig, tru Jacob, keta trana øran cha, nui ushamerayugurri. Inchagucha nøbe namui wendau arrun” chinrrig— chibig køn.

19 Incha tru srøsrøigwei wendau ibigwan lata, pøn kønrrabyu ibigwan lata, tru wendau ambubelan mõilandøgucha treetø, treetø chinrrai karua pasrig køn. Esaúwan katabe, øyeetøh chinrrigay cha.

20 Incha katø trenchinrrigay cha: “Ñui karuig megabig Jacobpe namui wendau arrun” cha. Kaguene Jacobpe treeg isubig køn: ‘Tru na keta trana øriilanmerrig nun pungaruabe, tru nø namig kørrømisrig købig yandø kuchi tammisren, trugurrimbe nui maløwan asamønrrun’ cha.

21 Inchen tru keta tranameløbe merrab chab amben, Jacobpe tru nui misaameraba, nui ushamerabañau kørrømisra tsuinug kinrrab kørrømisrøbig køn.

Jacob Angelba Melambub Kemøriyab

22 Incha tru yemdøwei Jacobpe kurra, nui pagatø sralanba, nui pagatø linchatø melab ishumburmeranba, pa trattrø y kan tru nui nusrkalanba, Jaboc taig nu piyu larraambubelø køn.

23 Incha yandø truilan chab larrøørabe, katø chine købigwan kerrigu lar-røørøbig køn.

24 Incha Jacobpe tru misaameraba, nui ushameraba kørrømisra tsuinug nøtø kørrømisra, kan mõøba tør-rramnegatig kwayab tranrriyabelø køn.

25 Inchen tru mõøbe Jacobwane chinchaguen kullaaranamgaig kui ashabe, srøptsim merrarrab srølwan kebachen safabig køn, tru kemøriyab tranrriyabyu.

26 Inchen tru mõøbe trenchibig køn:

—Yandø chab tør-rrab køn cha. ¡Elatcha!— cha.

Inchene Jacobpe trenchibig køn:

—Ñi nan maya nuguen tabig nebunrrabigwan tranmubene, nabe lelachimømønrrun— cha.

27 Inchene tru mõøbe:

—¿Ñibe chi munchi kugu?— cha payen,

Nøbe:

—Jacob munchi kur— chibig køn.

28 Inchene tru mõøbe trenchibig køn:

—Ñibe yandø Jacob cha wamig kønrrabig kømøtø, Israel cha wamig kønrrabig køn cha. Kaguende ñibe Tiusba, mõgueløba truba melambuyab tranrriyagu, ñibe kullaaramøn— cha.

29 Inchine Jacobpe trencha payibig kòn:

—¿Ñibe chi munchi kugu?— cha.

Inchene tru mòøbe trenchibig kòn:

—¿Nai munchiwane nane chinchab paygu?— cha.

Inchen tru mòøbe truyutøwei tru mayanguen tabig nebuig kònrrabigwan nune tranøbig kòn.

30 Incha Jacobpe truyube Peniel cha wamabig kòn; kaguen nøbe trendaig kòn: “Nabe Tiuswan malaugue ashendø, katøgucha ka øsig pasrainatan” cha.

31 Inchen Jacob Penielsrøngurri puraiben, pørrbe neeshib arrubig kòn. Inchen nui pøytañig safaig pusrkwabem, Jacobpe kebeñiptø, kebeñib arrubig kòn.

32 Incha treekkurri Israelweinukkurri amrrub misaamerabe møingatic tru ushamerayu pøytañig kemørøb srølwane mameelø kòn, kaguen Jacobwane tru srølyu kebatig kuig kua.

33

Jacobpa Esaúba Katøle Chi Kømui Lataig Tab Kørrømisrøb

1 Møimbe Jacob kurraashene, Esaúbe arruptinchibig kòn, tru cuatrocientos møguelan pera. Inchen Jacobpe nui ureezheelan kanelane Leai merrab, kanelane Raquelwei merrab, kanelane pagatø nui tru karuig mendig melab ishumburmerai merrab øyamay pirisha merranøbig kòn.

2 Incha tru nui pagatø karub tøgagui ishumburmeran tru nømui ureeemeran ke merrabsrø pønsra, tru wendaube Lean tru nui ureeemeranba, tru wendaube Raquelwan tru nui Joséwanba pønsrøbig kòn.

3 Incha Jacobpe kerrigu mayeelai merrabsrø puraya, pirausrøngatic tratrø y pagatøgatic utsøbasrøbig kòn, nuneg waisrø punnegatic.

4 Trune Esaúbe nunewan katønrrab luløb ya, naashiburab ira, muchabig kòn. Incha pailøba kishibelø kòn.

5 Incha møimbe Esaú kurraashabe ishumburmeranba, ureezheelanba ashabe, trenchibig kòn:

—Iilø ñiba pønrrabeløbe ¿mumeragøh?— cha.

Inchine Jacobpe trenchibig kòn:

—Na, ñi maig chiben marøb megabigwan, iiløbe Tius nan trani ureezheelø kòn— cha.

6 Inchen tru pagatø karuig melab ishumburmera nømui ureezheeløba amrrua, utsøbasrøbelø kòn.

7 Trugurrimbe Lea nui ureezheeløba utsøbasren, tru wendaube Raquel nui Joséba arrua, utsøbasrøbig kòn.

8 Inchen Esaúbe trencha payibig kòn:

—¿Tru na katab arrigu øyeeg nørrø sötø, merrana amrruiløtøgabe nan chi chinrrab treenchigu?— cha.

Inchen Jacobpe trenchibig kòn:

—Ñi nane kan chigucha inchimø, ñuin kabyu tab kui asig kønrrab øyeeg marar— cha.

9 Inchine Esaúbe trenchibig kòn:

—Nai nuneg, nabe tsabøtø tøgag kur cha. Ñuimbe ñuin kønrrain— cha.

10 Inchine Jacobpe trenchibig kòn:

—Ñuin kabyu na tab kui asig kuinabene, tiusmanda na kettrab srua arrigwan utørra chibig kòn. Na ñui maløwan asiibe Tiuswan asi lataig køtan cha. Ñibe nane kan yangucha tabig utøtan cha.

11 Na ñun ketamig srua arrigwan ka utørra cha. Tiusbe nane øyeeg nørrø tøgagig kønrrai maren, nabe menrrazhikken tøgagur— cha.

Incha Jacobpe utønrrai truba inchen, Esaúbe tru ketiilan ka utabig køn.

12 Incha Esaúbe trenchibig køn:

—Ambamigwan amun cha. Trube, naba lincha amun— cha.

13 Inchene Jacobpe trenchibig køn:

—Nai nuneg, ñibe asiinrrabguen cha, nai ureemerabe kullaguelø srø køn cha. Katø ubishamera køben, waaramera køben, ureezheelø perartø køn cha. Na menrra trømbøig malla merranene, nai ubishamerabe kan kwalømyutø kerriguba chab kwanrrun cha.

14 Ñi, nai ashib karubiibe, ñi karuigwan marøb megabigwei merrabmisra ka ashirrunrraguh cha. Nabe nai ubishameran køben, cabrameran køben, waarameran køben, merraniilø maig amben, nabe tsøndatø treeg arrumønrrun cha. Katø ureezheeløgucha nøm maig ambub meløben, tsøndatø treetø arrumønrrun cha, Seirsrø ñun wetøgamsrøngatig.—

15 Inchen Esaúbe trenchibig køn:

—Trube, treeg ka amrrab cha. Inchendø tru naba lincha amrrub møguelan møilan køsrøn ñiba lincha amrrunrrai kørrømartrab— chibig køn.

Inchene Jacobpe trenchibig køn:

—Truburappe chi isumøta cha. Ñuin kabyu na tab kui asig kuinaig købene, truig mas purø nuig køtan— cha.

16 Incha tru kwaløm Esaúbe Seirsrømay inrrab ibig køn.

17 Inchen Jacobpe Sucotsrømay ya, trusrømbe nuyasig kan ya marøb, nui ushamerai ranchu-ureemera marøb inchibig køn. Incha treekkurri trusrømbe Sucot cha wamig kuig køn.

18 Jacobpe Padan-Aramsøngurri chigucha kømø, katø tab ka pubig køn, Canaán pirau Siquén ciudadsrø. Incha tru ciuda pinrrøguesrø kørrømisra warøwa,

19 kan tul penabig køn, tru Hamorwei nusrkalan. Incha trube Siquénwei møskawan, tsantsøn andøga mari monedamera sulu cien pagaraig køn. Incha truyu nui carpa yawan lasrua tsumisra,

20 truyube kan altar mara, truigwane El Elohe Israel cha wamig køn.

34

Dinan Kan Møg Kemøra, Kaig Marøb

1 Jacob Leaba kan nimbasr Dina taig tøgaguibe tru pirau ishumburmeran ashib pub inrrab webya ibig køn.

2 Inchen tru heveo truyu ashib karubig Hamorwei nusrkai Siquém ashabe, Dinane kemøra, kaig mara mindisha kørrømarøbig køn.

3 Incha nøbe Dinan purø chull ashippø, tabzhib waminchibig køn, Dina undaaraig kønrrab.

4 Incha Siquémbe nui møskai Hamorwan trenchibig køn:

—I srusran nai srain kønrrai møskaløba waminchay— cha.

5 Inchen Jacobpe tru nui nimbasr Dinan Siquémbe kemøra, kaig mara mindisha kørrømarin kui wammørøbig køn. Inchen nui nusrkaløbe tru purugubeløba trausrø ushamera ashib warøben, tru nusrkalø katøle pumne chigucha waminchimig køn.

6 Incha pumøwatø, tru Siquémwei møskai Hamorbe nui nusrkai pa misrtrab isuigwan Jacobpa waminchab arrubig køn.

⁷ Inchen tru Jacobwei nusrkaløbe traugurri chab pua, tru treeg purayaigwan wammørabe, karre øyeeg maritamab isub, larrø namig kuig mørøbelø køn, kaguende Siquénbe Israelwei yau misagwan purø trømbøig mara pasren tru Jacobwei nimbsrwan kemøra, øyeeg mindishib. Pøs øyeebe ni managuen maramig kømígwan.

⁸ Inchen Hamorbe tru møskawanba nusrkalanba trenchib waminchib køn:
–Nai nusrkai Siquémbe ñui nimbasrwan purø chull asan cha, ishug-unø nøba kasharanrrai treegwan isubsumøgue chinrrab inchar cha.

⁹ Yau misamera misrkun chibig køn, ñimbe namui nimbasrmeran sralø maren, namuieløbe ñimui nimbasrmeran sralø martrain cha.

¹⁰ Trumaybe ñimbe namui utu warøben, yu nam waraig pirøbe ñim chu warag køben waramig pasrønrun cha. Ñimbe truyu warab, penab, yanøb, katø pirømera penab inchigay– cha.

¹¹ Inchen Siquémbe nuimburappe tru Dinai møskawanba, nuchalanba trenchibig køn:

–Na ñimuin kabyu tab asønainabene, ñim maig miabendø, nabe tranamønrrun cha.

¹² Tru srusran strain kønrai tranamwei maya nu kuindøgucha, ñim maya miamigwan eshka, maya ketig tranamelan eshka in chay chibig køn. Inchendø tru srusrane naba ka kasharabashchunrrigay– cha.

¹³ Inchen Jacobwei nusrkaløbe tru møskai Hamorwanba Siquémwanba purø may kegørrøsrkønrrab isua løtabelø køn, kaguen nømui nuchag Dinan kaig kui lataig purø trømbøig marøb mindisha kørrømarikkurri.

¹⁴ Incha nømbe trenchibelø køn:

–Name namui nuchawane kan møg circuncidamígwane tranrrab kaimamønrrun cha. Kaguen namuiwan purø trømbøig mindishib kørig marinab pønrramig køn cha.

¹⁵ Pøs, nambe treeg punrrai martrab cha ñim øyamay martrab kørrømisrene, ñimui utu maya møgueløba circuncidawabe kønrrun cha, nam latailøwein kønrrab.

¹⁶ Trumaybe si namui nimbasrmerabe ñimba kasharab, ñimui nimbasrmerabe namba kasharab, nambe ñimui utu warab, kan sətø misaameratø kønrrab cha.

¹⁷ Inchen tru circuncidamigwan 'ka' taingatiibe nambe namui nuchawane perøb, yu ñimui piraugurri ambuptindamønrrun– cha.

¹⁸ Inchene Hamorwanba Siquémwanba tru øyeeg margun taigwane truba tabig mørørai inchibelø køn.

¹⁹ Inchen tru matsinube mallatø circuncidabig køn, kaguen nøbe Jacobwei nimbasrwan purø chull asha kuig kua. Inchagucha Siquembe nui yaube mas nuig kuig asig møg købig køn.

²⁰ Incha Hamorba Siquémba nømui ciudayu kebambi yaskabumay amba, truyu warab misaameran trenchibelø køn:

²¹ –Tru møgueløbe kwa tammayelø køn cha, nømbe yu namuim pirau warønrrab amrrua warab, namuin pirau penab, yanøb inchib kønrrain cha, kaguen pirømerabe nøm kørrømisra waramig tsabøtø lendø køn cha. Nambe nømui nimbasrmeran sralø maren, nømbe namui nimbasrmeran sralø martrun cha.

²² Inchendø namui utu nøm kørrømisra, kan misag sətøtø misra waramibe nam øyamay kønrrab købendøwein kønrrun cha, namui utu møgueløbe mayeeløba circuncidawar kønrrai, nøm mailø køben, nam treeløtøweingue.

23 Inchawei nòm maig tailan ka lètøgun chibig kòn, nòm namui utu warønrrab kørromisrtrain cha, kaguende nòm chi tøgaguiløba, nòmui ushamerababe, namuin kønrrun— cha.

24 Inchen tru chi maramigwan nòm ashibelø maya møguelø tru ciudayu kebambi yaskabu tuluntsunabeløbe tru Hamorba, tru nusrkai Siquémba treegwan martrab pønrramisrøbelø kòn. Incha tru maya møgueløbe circuncidailø kørromisrig kòn.

25 Indiibe pøn kwalømyu tru circuncidailøbe pusrkwilø purrøbenh, Jacobwei pagatø nusrkalø tru Dinai nuchaløbe Simeónba, Levíba nømbe espadan srua ambubelø kòn, tru ciudayumay, truiløbe ni chigucha chi isumø køben, maya møguelan chishtø kweecha petabelø kòn.

26 Incha Hamorwanba nui nusrkai Siquémwanba espadatøga kweecha peta, Dinane Siquémwei yaugurri wesrawa, pera ambubelø kòn.

27 Incha tru Jacobwei katøgan nusrkaløbe amrrua, kwabelaim palawan itøbunab puraamba, ciudayu kegørra chi købigwan chishtø wesrabelø kòn, tru nui nuchawan øyeeg trømbøig mara mindisha kørromarigwan trunun ulø payib.

28 Incha ubishameran køben, cabrameran køben, waarameran køben, burrueran køben, srua ambubelø kòn, ciudayuigwan lata, wambigwan chi købigwan lata.

29 Incha yaambumerayu chi købelane chishtø wesrawa, katø chigurrimbunø chi tøgaguilan køben, møg-uregwan køben, ishumburmeran køben merarrawa, srua ambubelø kòn.

30 Inchen Jacobpe Simeónwanba, Levíwanba trenchibig kòn:

—Ñimbe nane purø nuigu mumayguen kømíig meganrrai martan cha, cananeomeraba, ferezeomeraba i pirau misaamera namun larrø tsalø asiilø pønrramig kønrrai ñimbe treeg marøb. Nabe ya mamdø møguelø tøgagøben, nømbe kanbalatø lincha, namune kwayanrrab melambua, nanba nai yau misaameranba pinisha petønrrautan— cha.

31 Inchene nømbe trencha lètabelø kòn:

—¿Nø isuppe, kabe namui nuchawane trømbøig martrab nui asrwan anwei yanøb ishug kui lataig mara kutchain kuitarru?— cha.

35

Tius Jacobwan Betelsrø Maya Nuguen Tabig Nebuig Kønrrai Marøb

1 Tiusbe Jacobwane trenchibig kòn:

—Kurrab, Betelsrø tsunrrab inrrø cha. Trusrømbe, tru ñui nuneg Esaúwan ñi trubab arruben kenamisrøb Tiuswan kan altar kusrunrrig— cha.

2 Inchen Jacobpe tru nui yaambuelanba, nun lincha amrrubelanba trenchibig kòn:

—Tru katøgan peg tiusmera ñim tøgaguilan ñimbe chishtø webetab, ñimui kalø mariilan chish misrøb, ñimui kewaguilan yunømarøb inday cha.

3 Betelsrømay amun cha, tru nan chine kaig nebuinab arrubengurri purugub Tiusweyasig trusrø kan altar kusrunrrab cha, tru na chu unindøgucha nan lincha pasrabigwan.—

4 Inchen nømbe tru taska marig peg tiusmera nòm tøgaguilan kerriguba Jacobwan tranøbelø kòn, katø kaluyu kandunga melsraguilan chigucha. Inchen Jacobpe kan encina tusr keta truilan sørabig kòn, tru Siquém pulu.

⁵ Inchen nøm truyugurri webamba ambene, tru puluwan warab misaamerabe mayeeløba purø trømbøig kørig kui inchai Tiusbe treg marøbig køn. Inchagurri Jacobwei misaamerane nømbe chi kaig martrab inchimeelø køn.

⁶ Incha Jacobpe maya misaameraba Luz cha wamiisrø pubig køn, tru Betelsrø Canaán pirau.

⁷ Incha nøbe trusrø kan altar kusrua, El Betel cha wamig køn truyube, kaguende Tius trusrø kenamisrig kuig kua, tru nui nunewan trubab welula ib uras.

⁸ Inchen katø truyuh kwaig købig køn, Debora tru Rebeca lamíg køben asam purugubig købig. Truigwane kan encina tusr katsiizhigu sørig køn, Betel pulu. Incha Jacobpe truyube Elon Bacut cha wamig køn.

⁹ Incha Jacob Padan Aramsrøngurri katøle arrubene, Tiusbe nune katøle kenamisra, maya nuguen tabig nebuig kønrrai tranrrab misrøbig køn.

¹⁰ Incha Tiusbe trenchibig køn:

—Ñibe Jacob munchi køn cha. Inchendø mømibe Jacob cha wamig kømøtø, ñui munchibe Israel cha wamig kønrrabig køn— cha. Incha Israel cha wamig køn.

¹¹ Incha katø Tiusbe trenchibig køn:

—Nabe tru Maramburab Marøb Tius kur cha. Misag purø norrø karrab, larrø norrø larrøbichig cha. Ñuinug kan larrø nu misag sötømera kal-lawa, ñuinukkurri misag larrø norrø sötømerabatø kurrab amrrunrrun cha. Incha ñuinukkurri amrrub misaamerayugurrimbe reymera kurrørrun cha.

¹² Incha Abrahamwanba, Isaacwanba tranin pirøwane ñun tranamønrrun cha. Incha ñuinukkurri amrrub misaameran tranamønrrun— chibig køn.

¹³ Incha Tiusbe nuimbulugurri ibig køn, tru nøba waminchib pasrainukkurri.

¹⁴ Inchen Jacobpe kan srug nemøra, ølneb pasrøbig køn, Tius tru nun wamindinug. Incha trubalabe pi lusha, aceitetøga itølushibig køn Tiuswan keta tranøb.

¹⁵ Incha Tius tru nun wamindinuube Betel cha wamabig køn.

Raquel Kwaig

¹⁶ Incha Betelgurri amba, katøgucha Efratasrø pumibe yab paløben, mømibe Raquelbe unøzhigwan ke tammisrtrab kaimabsrua tammisrig køn.

¹⁷ Inchen ke purø lastimazhig pusrkwai inchib megaben, tru patsø kørøørbiiibe trenchibig køn:

—Chi kørig isumøta cha, ñibe katø møg-unøzhig tøgagønrrab køn— cha.

¹⁸ Inchen nøbe yandø ke kwanrrab inchib ke srabe israb megawa, unøzhigwane Ben-Oni cha wamabig køn. Inchendø møskai Jacobpe Benjamin munchi pasrig køn.

¹⁹ Incha Raquelbe øyeeg kwamig nebuig kwaben, Efratamay amrrab ambi maysrø sørig køn, tru Belén.

²⁰ Tru kwabigwan sørimbalabe kan srug nemøra ølneb pasrig køn. Incha tru treg tamara kusrua pasrig købiibe tru Raquelwan sørig købig kui ashchai pasran møingati.

²¹ Incha Israelbe tru nø yamigwane ibig ya, Migdal Edargurri mas yab yaisrø nui carpa yawan lasrua kørømisrøbig køn.

²² Indiibe Israelbe tru pirausrø kørømisra tsubene, Rubénbe ya, Bilhaba kian købig køn, tru nui møskawan lincha tsub ishuuba. Inchen Israelbe øyeeg marigwan wammøøbig køn.

Israelwei nuskałøbe pa trattø y par købig køn.

²³ Leai nuskałøbe iilø køn: Jacobwei mayur nusrkai Ruben, Simeón, Leví, Judá, Isacar, Zabulón.

²⁴ Raquelwei nuskałøbe: Joséba, Benjaminba.

²⁵ Inchen Raquelwei tru karuig mendig megabig Bilhai nuskałøbe iilø køn: Danba, Neftaliba.

²⁶ Inchen Leai tru karuig mendig megabig Zilpai nuskałøbe: Gadba, Azerba. Iilø køn tru Jacobwei nuskałø Padan Aramsø kal-lawar.

Isaac Kwaig

²⁷ Incha Jacobpe Isaac nui mōskawei yausrōmay ibig køn, Mamre taisrōmay Kiriát Arba pulusø, tru Hebrón cha wamiisrōmay, Abrahamba, Isaacba tsuig kōbiisrōmay.

²⁸ Isaacbe tru nø kwab uras pilamera ciento ochenta tōgaig kōbig køn.

²⁹ Inchen Isaacbe yandø larrø kōlliizhig, larrø yana øsig tsua, yandø nui israbig luchen, nui nuskałø Esaúba Jacobpa misra kusra sørøben, nui kōlli misaameraba isrønrrab tsumisrøbig køn.

36

Esaúweinukkurri Amrrub Misaamera

¹ Iilø køn tru Esaúweinukkurri amrrub misaamera, tru Edomwei.

² Esaúbe Canaán ishumburmeraba kasharaig køn. Tru Elon hititai nimbarru tru Adaba katø Aholibamababe Anai nimbarru kōben, truike Zibeón heveowei awela kuig køn.

³ Katø Basematwangucha nui srain kōnrrai marig køn, truike Ismaelwei nimbarru Nebaiotwei nuchawan

⁴ Esaúbe i uremeran tōgaguig køn: Adababe Elifazwan Basematbabe Reuelwan;

⁵ Aholibamababe Jeúswan kōben, Jalánwan kōben, Coréwan kōben tōgaguig køn. Iilø kuig køn tru Esaú Canaán pirau tsub uras tōgagui ureemera.

⁶ Incha Esaúbe nui sralan kōben, nusrkalan kōben, nui nimbarru meran kōben katø tru nōba lincha warab misaameran kōben pera, tru Jacob nui nuneeba tarōmisrøtrab katøgan palōsrōmay ibig køn. Incha ushameran kerriguba katø Canaán pirau nø chi tōgamisriilane chishtøh srua ibig køn.

⁷ Jacobpa Esaúbabe purø nōrrø tōgamisrøptø, pailøba kanbalatøbe waramgaig kōbig køn. Inchagucha tru nōm waraig pirøbe ushameran mannamig truburab tranmíg køn.

⁸ Treekkurri Esaú tru Edom taibe Seir pirau tunmeragøba tōgasø tsunrrab yaig køn.

⁹ Iilø køn tru Esaúweinukkurri amrrub misaamera: edomitasmerai mōskai tru Seir tunmeragøba tōga pirømerasø warab misaamera.

¹⁰ Inchen tru nui nusrkalai munchimerabe iilø køn:

Esaúwei srai Adai nusrkai Elifaz kōben Esaúwei srai Basematwei nusrkai Reuel kōbengue.

¹¹ Inchen Elifazwei nuskałøbe Temán kōben, Omar kōben, Zefo kōben, Gatan kōben, Kenaz kōben kōbig køn.

¹² Inchen Timná ka linchatø ishug tru Esaúwei nusrkai Elifazwei kan nusrkai tōgaguig køn, tru Amalecwan. Iiløbe kerriguba Esaúwei srai Adai awelumera kuin køn.

13 Inchen Reuelwei nusrkaløbe iilø kuig køn: Najat køben, Zera køben, Sama køben, Mizá købengue, truiløbe tru Esaúwei srai Basematwei awelumera købig køn.

14 Inchen tru Esaúwei katøgan srai Anai nimbasr tru Sibeónweimbe awela tru Aholibamai nusrkaløbe iilø kuig køn: Jeús køben, Jalán køben, Coré købengue tru Esaúwei nusrkalø.

15 Iilø kuig køn tru Esaúweinukkurri amrrub misaamera, nørreelø nøm asha karubelø, tru Esaúwei mayur nusrkai Elifazwei nusrkalø: Temán køben, Omar køben, Zefo køben, Kenaz køben,

16 Coré køben, Gatán køben, Amalec købengue. Iilø kuig køn tru Edom pirau Elifazweinukkurri amrrub misaamera nørreelø nøm asha karubelø, truiløbe kerriguba Adai awelumera.

17 Inchen Esaúwei nusrkai tru Reuelwei nusrkaløyu nørreelø nøm asha karubeløbe iilø kuig køn: Najat køben, Zera køben, Sama køben, Mizá købengue. Iilø kuig køn tru Edom pirau Reuelweinukkurri amrrub misaamera nørreelø nøm asha karubelø truiløbe kerriguba, Esaúwei srawei Basematwei awelumera.

18 Inchen tru Anai nimbasr tru Esaúwei srai Aholibamai nusrkalø nørreelø nøm asha karubeløbe iilø kuig køn: Jeús køben, Jalán køben, Coré købengue.

19 Iilø kuig køn tru Esaúweinukkurri amrrub misaamera, katø nune Edomgucha taigwei. Trumørig nømui nørro misag sötømera købelan nøm asha karubelø.

20 Inchen tru horeo Seirweinukkurri amrrub misaamera tru pirausrø warabeløbe iilø kuig køn: Lotán køben, Sobal køben, Zibeón køben, Aná køben,

21 Disón køben, Ezer køben, Disán købengue. Iig tru Seirweinukkurri amrrub misaamera, Edom pirau horeosmeran nøm asha karubelø nørreelø købig køn.

22 Inchen Lotánwei nusrkaløbe iilø kuig køn: Horiba, Hománba. Inchen Timnabe Lotánwei nuchag købig køn.

23 Inchen Sobalwei nusrkaløbe Alván køben, Manajat køben, Ebal køben, Sefó køben, Onam køben kuig køn.

24 Inchen Zibeónwei nusrkaløbe iilø køn: Ayába, Anába. Tru Aná kuig køn, tru misag warab waraimø pirømerasø kuaalab pigammeran wetørrabig nui møskai Zibeónwei burrumeran ashib uña.

25 Inchen Anábe kan nusrkai Disón taig tøgagig købig køn, katø kan nimbasr Aholibama taikkucha.

26 Inchen Disónwei nusrkaløbe iilø kuig køn: Hemdán køben, Esbán køben, Itrán køben, Kerán købengue.

27 Inchen Ezerwei nusrkaløbe iilø køn: Bilán køben, Zaván køben, Acán købengue

28 Inchen Disánwei nusrkaløbe iilø kuig køn: Uzba, Aránba.

29 Inchen horeosmeran nøm asha karubeløbe iilø køn: Lotán køben, Sobal køben, Zibeón køben, Aná køben,

30 Disón køben, Ezer køben, Disán købengue. Truiløbe nøm møitøgucha nømui nørro sötø misaameran nøm ashib karubelø treelø købig køn.

Edomsrø Reymera

31 Israelitasmera rey tøgagømøwatø, tru Edom pirau reymera nebamba karub purrabeløbe iilø kuig køn:

32 Beorwei nusrkai Belabe Edomsrø rey kuig køn, nøbe tru Dinába taig ciudadugurri arrubig.

³³ Inchen Bela kwabene, tru nuimburøbe Zerai nusrkai Jobab karunrrab nebyaig køn, Bosra pirausriig.

³⁴ Inchen Jobab kwabene, tru nuimburøbe Jusán karunrrab nebyaig køn, Temán pirausriig.

³⁵ Inchen Jusán kwabene, tru nuimburøbe Bedadwei nusrkai Hadad karub wanrrab nebyaig køn, truiþe tru Moab piraú madianitasmeran kanawa kørromarøbig. Tru nø tsuig ciudabe Avit taig kuig køn.

³⁶ Inchen Hadad kwabene, tru nuimburøbe Masreca misag sötømera waraisriig Samla karub wanrrab nebyaig køn.

³⁷ Inchen Samla kwabene, tru nuimburøbe Rejobotsrø Saúl karunrrab nebyaig køn, tru Eufrates pi menda.

³⁸ Inchen Saúl kwabene, tru nuimburøbe Acoborwei nusrkai Baal-Janán karunrrab nebyaig køn.

³⁹ Inchen Achborwei nusrkai Baal-Janán kwabene, tru nuimburøbe nusrkai Hadad karunrrab nebyaig køn, tru nø tsuig ciudabe Pau taig køben. Inchen tru Hadadwei sraimbe Mehitabel taig købig køn, Matredwei nimbasr, Mez-abweimbe awela.

⁴⁰ Iilø køn tru Esaúwei karub pønrrab møguelai munchimera, mu mōskalø køben, trumørig truilainukkurri amrrubelø, nøm waraigwan nømui mun-chitøgatøwei wamiilø: Timná køben, Alvá køben, Jetet køben,

⁴¹ Aholibama køben, Elá køben, Pinón køben,

⁴² Kenaz køben, Temán køben, Mibzar køben,

⁴³ Magdiel køben, Iram købengue. Iilø kuig køn tru Edom piraú nørreelø nøm asha karubelø, nøm chu waraig pirømerayu, nømui pønrrabigu.

Edombe Esaútøwein køn, tru edomitasmerai mōskai.

37

Joséwei Piailø

¹ Jacobpe nui mōskai kørromisra tsui piraú truyu kørromisra tsuig købig køn, tru Canaán piraú.

² Iibe Jacobwanba nui yaambu misaameranba maig pureb arrigwan waminchibig truig køn:

Josébe pilamera diecisiete tøgag kua, ubishameranba, cabrameranba nui nuneløba ashib tøgagøbig køn, tru mōskawei ishumburmera Bilhaimba Zilpaimba truiløbe nusrkalø køben. Incha Josébe tru nuneløbe søl kømøtiig marøbelø køn chib mōskawane eshkabig køn.

³ Incha kerrigu maya nusrkalan lataguen kømøtø, tru Israel Jacob taig købiibe Joséwane truba undaguig købig køn, kaguende nø køllimbala tøgagui unø kuimba. Inchagurri pala itø kemig larrø tab tsurøzhig maringarubig køn.

⁴ Inchen nømbe nøm kerriguellan lataguen kømø, Joséwane mas undaarai ashabe, yandø tsalø ashib menda ni kan wamzhikken tammaybe wamømeelø køn.

⁵ Indiibe Josébe kan piji kan piaig tøgagua, nunelan waminchen, trugurrimbe nuneløbe masken tsalø ashibelø køn;

⁶ kaguen nøbe trenchib eshkabig køn:

—Nan piaigwan ñimun eshkanrrab inchar cha, mørtray cha:

⁷ Møimbe nam trausrø warøwa, tirigu lusrømera lusrøb købene, møyimbe nai tirigu lusrøbe pasramisrøppe, ke ølgandøzhig pasramisrøptindan cha. Inchen ñimui tirigu lusrømerabe tru nai tirigu lusrø pøtøgatan pønrramisrøppa, purø tab inchib ke nai tirigu lusrømaygøba utsøbasrøptinchimøh— cha.

⁸ Inchene nuneløbe trencha kusrua løtabelø køn:

—¿Treekkan namui rey misra, namune ke ñi karub tōga pasrønrabb inchib pasrøtirru?— cha. Incha masken ashig kømui inchibelø køn, tru piailan, nø waminchen.

⁹ Incha Josébe katōgan piaig tōgagua nunelan katø treeg eshkabig køn:

—Møimbe katø nan piappe, pørrba, pølba pa trattro y kan kønchabiimeraba nan tab inchib utsøbasrøb piatan— cha.

¹⁰ Incha mōskawanba, nunelanba treeg eshkabene, mōskaimbe øyeebe chisun waminchab arrugu trenchiptinchibig køn:

—¿Tru ñi øyeege piaig tōgaguitōgabe namune manchibrre inchigu? cha. ¿Ñui usrimba, ñui nuneløba, naba, kabe ñun piraugatig utsøbasrtrain kønrrab kø chindah?— cha.

¹¹ Inchen nuneløbe larrø pusrkwai inchibelø køn. Trune mōskaimbe øyeege piaibe chiguermab wetøbefimmørø chu uragucha isub sulu uñibig køn.

Joséwan Nunelø Yanig

¹² Indiibe yandø treeg purayai wendø Siquémsrø nui nuneløbe mōskawe ubishameranba, cabrameranba pu lawa manrrab amben,

¹³ Israelbe Joséwane trenchibig køn:

—Ñui nuneløbe Siquémsrø ubisha ashib waran cha. Amø cha, trusrømay inrrig— cha.

Inchen Josébe:

—ØØ, inrrur— chibig køn.

¹⁴ Inchen Israelbe trenchibig køn:

—Ashchab ya, tru ubishameraba cabrameraba, ñui nuneløba maig warai ashabe, wam srua attrunrrig— cha. Incha Hebrón chaasrøngurri inrrai ørøbig køn.

Inchen Josébe ya, Siquémsrø pubig køn.

¹⁵ Indiibe Josébe trusrø pua, truba lab llirab uña, pella pasrøbene, kan møg katabe, payibig køn:

—¿Chi lagu?— cha.

¹⁶ Inchene Josébe:

—Nabe nai nunelan lab uñar cha. Chu ubisha ashib warai ñibe tiusmanda eshkabsrumuguh— chiben,

¹⁷ tru møøbe trenchibig køn:

—Yugurrimbe chab ambubguen indig køn cha. Inchendø: “Dotánsrømay amrrab” taig nabe mørig køn— cha.

Inchen Josébe nunelan lab ya, Dotán tru misag sötømera warainug kømøtø, wambig nøørsrø wetørrabig køn.

¹⁸ Inchen nømbe yabsrø arri ashabe, nømuimbulu pumøwatø, nømbe kwetchab waminchibelø køn.

¹⁹ Incha kangurri kangurri trenchibelø køn:

—Ñimguen asay cha, tru piainabiibe øsrø arrun cha.

²⁰ Møimbe amrrui chibelø køn, kweecha, kan aljibe laligu kegutchab cha. Incha: “kan namig usha kweecha, main køn chinrrab” cha. Er nui piailøbe maig indashchab— chibelø køn.

²¹ Inchen Ruben iigwan mørabe, nømui taskabe chi marmønrrai isua:

—Kweechimugun chibig køn.

²² Ñimbe ani lushmøtø, mu misag warab waraimønug aljibe lalig pasrabnug kegutsay chibig køn. Inchendø ñimui taskabe chi marmøtay— cha. Rubénbe øyeege chippe, Joséwane katøle wesrawa, mōskaweisrø pegutchab isuig køn.

²³ Inchen José nunelaimbulusrø pubene, nømbe Joséwane tru nø pala itøguewa pasraig tab tsurøzhigwane kerrawa,

²⁴ nune kemøra, tru pi wesramig trab lalig pasrabigu keguchibelø køn. Inchendø tru trab laliibe chi pigaig pur pasrabig køn.

²⁵ Inchabe yandø nømbe manrrab purramisrøbelø køn. Inchen nøm ashene, Galaadsrøngurri kan sötø ismaelitasmera amrruptinchibelø køn, camellosmerayu niisrar larrø may irrabzheelø, balsamo køben, mirra køben tru Egiptosrømay.

²⁶ Inchen Judábe nui nunelan trenchibig køn:

—Namui nunewan kweechabe, chi mariasamø cha, kweecha tre marigan søratø tøgaguabe.

²⁷ Trembe ismaelitasmeran yangun chibelø køn. Namui taskabe chi kaig marmørrrab cha, kaguendø nøbe namui yaundøwei namui nuneg køn— cha. Inchen nuneløbe trumay kørrømisrøbelø køn.

²⁸ Inchen tru medianitasmera chine penab, yanøb inchibelø amrruben, Joséwei nuneløbe tru aljibe trab lalig pasrabigurri wesrawa, pib tratø an pitiswei yanøbelø køn. Øyamay Joséwane Egiptosrømay srua ambig købig køn.

²⁹ Indig yanayu Rubénbe tru aljibe trabsrømay arrubene, møimbe Josébe yandø mugaagøptinchen, nøbe isuptø nui kewa pasraigwan kølsrøptinchibig køn.

³⁰ Incha nunelan trenchinrrab ibig køn:

—Yandø matsinube mugaagøn cha. ¿Nabe møimbe chindamer?— cha.

³¹ Incha nømbe kan cabro unø kweecha, José pala itøguewa unigwane tru aniyu kebisha,

³² tru Joséwei kewaguig tab tsurøzhigwane møskaweimay trana ørøppe, øyeeg cha ørøbelø køn:

—Nambe øyeeg wetørrer cha, ñui nusrkawein kui, ñui nusrkawein kømui muingøtashchab tab ashchig— cha.

³³ Inchen Jacobpe trunun nebua ashippe:

—Nuiwein køn chibig køn. Kan namig usha webarrua kemøra, pitis mara, mainrrun— cha.

³⁴ Incha Jacobpe nui kewa kuigwan kølsra, trøsrkølig kewa, nui unø pinigan purø yanasrøngatig isub kørrømisrig købig køn.

³⁵ Inchen nusrkaløba, nimbasrmeraba isumønrrai maya, maya inchib melaingucha, nøbe trunune mørøg kømui inchibig køn. Incha nusrkawan isub, kishib trenchibig køn:

—Kwabelø israb waraisrø na nøba tsunrrab yamnegatig nai nusrkawane isub tøga kømønrrun— cha.

³⁶ Inchen Egiptosrømbe tru medianitasmerabe tru Josewane Potifarwan yanøbelø køn, tru Faraon lutø tranigwan marøb pasrabig, tru suldaumera reywan chigøben kømønrrai ashib pønrrabelan nø asha karub pasrabigwan.

38

Judaba Tamarba

¹ Tru urassrø Judábe nui nunelan mendamisra, kan Adulamsrø møwei yausrø tsunrrab ibig køn, Hira taigweisrø.

² Incha trusrømbe kan cananeo Súa taigwei nimbasrwan srain kønrrai kabgucha, truigwan nui srain mara, pailø kibebelø køn.

³ Inchen tru ishuube kwanrriig kørrømisra, truigwei kan nusrkai tøgagua, truigwane Er cha wamig køn.

4 Incha katø wendø kwanrriig kørromisra, katøgan nusrkai tøgamisra, truigwane Onán cha wamig køn.

5 Incha katø maya yanayu køsrøn katøgan nusrkai tøgamisra, truigwane Sela cha wamig køn. Truibe tru unan tøgagøb urasbe Kezihsrø tsuig kuig køn.

6 Indiibe Judábe tru nui mayur nusrkai Erweimbe srai labig køn, tru Tamar taigwan.

7 Inhendø tru Er Judáwei mayur nusrkaimbe Jehováwein kabyu larrø kaig kuig køn. Inchen Jehovábe nui øsig unigwan kerraptindig køn.

8 Inchene Judábe tru Onánwane trenchibig køn:

—Ñui nuneg kwabigwei srawan kasharamø kømø, kasharau cha, ñui nuneg kwabig ñigurri ureg tøgag kønrrain— cha.

9 Inchen Onánbe tru ureg kal-labeløbe nuin kuentailø kømønrrab kui asha kua, nui nuneg kwabigwei sraimba kib waramisri mørig, kwanrriig kørromismrønrrai pirautø, pirautø lushibig køn, nuneg kwabigweyasig chi ureg kaanrrai.

10 Inchen Jehováwane treebe chigucha tabig asønamuben, truigwangucha øsig kuigwan kerraptindig køn.

11 Inchen Judábe tru nui yerna Tamarwane trenchibig køn:

—Ñui møskawei yau kasharamø, ka tsunrrig cha, nai nusrkai Sela kølig misramne.— Inhendø Judabe treeg isubig køn: 'Inchippa Selagucha nuneg kwabelø lataitøwei kwanrraitamab.' Incha treekkurri Tamarbe nui møskawei yausrø tsunrrab ibig køn.

12 Indig yandø yana puraiben, tru Súai nimbasr tru Judáwei sraimbe kwabig køn. Inchen nøbe yandø tru isubig puraiben, Timnat pueblosrømay ibig køn, tru nui ubisha isig parøbelø waraisrømay. Inchen tru adulamita Hira taig tru nun linchibiibe nune lincha ibig køn.

13 Inchen Tamarbe tru nui sueeru Timnatsrø nui ubishameran isig partrab yan taig wammørobe,

14 tru piuda kørromisra pala keegwan wesrawa, incha muguinquen ashmønrrai maløwan pinøgasraitøga nøbe pinøgasra, Enaim kebambi yaskabu wamisrøbig køn, tru Timnatsrømay amrrab ambi mayuhke. Inchen nøbe øyeeg marøppe, tru Selabe yandø kølig kui asha, treeg marig køn, inchen køben, nune tru Judábe nune tru nusrkaimba kasharanmuben.

15 Inchen Judá truigwan ashabe, nøbe kaig maramig asrwan anwei yanøb ishug kuitamab isubig køn, kaguen nøbe maløwan pinab kasraig waben.

16 Inchen nøbe tru nui yerna kuitamab isumøø, may menda waben kemallabe, trenchibig køn:

—Ñiba kigun— cha. Inchen nøbe:

—Ñiba, naba treeg maramig, na, øn tamibe ¿chi tranrrunrragu?— chibig køn.

Inchene nøbe trenchibig køn:

17 —Nai ubisha sötømerayugurri kan cabro-unøzhig trana øramønrrun— cha.

Inchene nøbe trenchibig køn:

—Kan chigøsrøn ñuiwan kørromartra cha, ñi tru tranrrab misrigwan na utamnægati.—

18 Inchene Judábe trencha payibig køn:

—¿Chi kørromaramø?— cha.

Inchene nøbe trenchibig køn:

—Ñui sellon tru ilin tsiwanbañau, tru pøtønain tsig ñui tasku srua pasraigwanba kørromartra— cha.

Inchen Judábe truilan tranabe, tru Tamarba kib waramisra treeg maren, nõbe kwanrriig korrømisrig kòn.

¹⁹ Incha nõbe kurra, truyugurri yabe, tru malø kasraigwane pinøsrúa, tru keg kaig korrømisra kewa unigwan katø kebig kòn.

²⁰ Incha mas wendø tru Judábe tru nui tab lynchibig adulamitan tru cabro unan trana ørøbig kòn, tru ishuwan tru nuyelan trana korrømariilan katøle utønrrai. Inchen nõbe tru ishuwane wetørranrrab kaimaptinchibig kòn.

²¹ Inchen nõbe truyu warab misaameran trencha payibig kòn:

—¿Peg møgueløba kaig marøb ishug tru Enaim may menda wabiibe chu wah?— cha

Inchen nõmbe trenchibelø kòn:

—Peg møgueløba kaig marøb ishuuma yube mumaganug kòn— cha.

²² Inchen tru møøbe katøle Judá waisrømay yabe, trenchibig kòn:

—Nabe truigwane wetørranrrab kaimar cha. Inchagucha truyu warab møgueløbe nane trenchitan cha: “Yube peg møgueløba kaig marøb ishuube mugaaguig køppeh”— cha.

²³ Inchen Judábe trenchibig kòn:

—Kerriguba ka tøga korrømisrbashshu cha, namun ke chinetø chib indza asiinab pønrramig kømønrraimbe. Inchendø tør kønrrain cha, nabe cabro unane tru ishuwan trana øren, tru ishuwane ñibe wetørramuigwan— cha.

²⁴ Indiibe yandø pøn pøl puraibene, Judáwane trencha eshkaptinchibelø kòn:

—Tamar ñui yernabe kaig marøb uña, treeg marøb unigu kwanrriig misrin kòn cha, nui asrwan anwei yanøbig lataig misra waikkurrindø.—

Inchene Judábe trenchiptinchibig kòn:

—Nune wesrawa, parray— cha.

²⁵ Inchen yandø tru møgueløbe nun patrab wesranrrab amben, nõbe nui sueerune trencha ørøbig kòn:

“Nabe kwanrriig misra pasrappe, tru na i srúa pasrailan nan tranøbigwei kwanrriig misra pasrar” cha. Inchabe katø trenchibig kòn: “I sellon tru ilintsiwanbañau, i tsigwanba, muin kõtashchab ash” cha.

²⁶ Inchene Judábe nuin kui ashabe, trenchibig kòn:

—Nøbe sølgandø tabigwan maren, nagueen kalø marøbrain kòn cha, nai nusrkai Selaba nabe nun kasharanmub.— Incha nõbe tru ishuuba katøløbe kimuig købig kòn.

²⁷ Indiibe yandø Tamarwan unø tøgamisramig puben, mømibe parchig tøgagig købrain kui wetøbeñibig kòn.

²⁸ Inchen tru yandø kal-lanrrab inchen tru parcheeløyu kane tasiizhiimerig kal-laptinchen, patsø korrøørøbiibe unai tasiizhigu pigø tsizhig lichtiptinchibig kòn trenchib: ‘limerrig webarrig kòn’ chib.

²⁹ Inchen unøbe tasiizhigwan katø kesruben, kanzhiimerig kal-laptinchibig kòn. Inchen tru patsø korrøørøbiibe trenchibig kòn: ‘¡Mandø incharre puraarruh!’ cha. Inchagurri unane Fares cha wamig kòn.

³⁰ Inchen trugurrimbe tru nui nuneg tru tasiizhigu pigø tsi litsig kal-labig kòn. Incha truigwane Zera cha wamig kòn.

39

Joséba Potifarwei Sraimba

¹ Joséwane Egiptosrømay srúa amben, kan egipcio Potifar taig ismaelitasmeran Joséwane penabig kòn, trusrømay truilø srúa amrruin køben. Inchen

Potifarbe tru Faraon lutø tranigwan marøb pasrabig nuig, tru suldaumera reywan chigøben kømønrrai ashib pønrrabelan nø asha karub pasrabig køn.

² Jehovahé Joséwane tarømismø nøba pasrøben, chi mariiløtøgucha tabiitø, tabiitø pub iben, nøbe tru egipcio tru nun penabigwei yau wabig køn.

³ Incha tru nun karub pera pasrabiibe Jehovahá Joséwane chi mariiløyutøgucha merrapøt webinrrai mari ashibig køn.

⁴ Øyamay tru Potifarbe Joséwane chi isumgøig larrø tabikkui asha, Putifar nø chi palai waben trunun ashib pasrønrraimba, katø nui yau chigurrimbunø tøgaguilan nø ashib pasrønrraimba treeg kørømara pasra, nø chigurrimbunø tøgaguilan kerriguba nø asha martrai kørømarøbig køn.

⁵ Inchen yawanba nø chigurrimbunø tøgaguilanba Joséwan ashchai pasrikurrimbunø, Jehovahé tru egipcione Joségurri mayanguen tab inchen, Jehovahéwei maya nuguen tabiitø neburrai indiibe tru egipcio kerrigu chi tøgaguimbala pasrabig køn, yau lata, wambigwansrø chi købigu lata.

⁶ Inchagurri Potifarbe kerriguba Joséwei tasku ashchaim pasra, nune chi isumig chigaabig køn. Isumig køppe, nø mab mutsamigwan trunundøh isumig købig køn.

Inchen Josébe larrø tab asr tøgøig trurrigu larrø tab møg købig køn.

⁷ Indiibe kan maya yanayu kørørn, tru nun pena karub tøgøgøbig tru Potifarwei sraimbe Joséwane chull ashib menda, trenchibig køn:

–Naba waramisrkun– cha.

⁸ Inchen nøbe treegwane marmøtø, tru nun karub tøgøgøbigwei srawane trenchibig køn:

–Pøs, nai karubiibe yu yau chi købigwane nababe chi isumikkaig pasrøwa, treekkurri chi købigwan kerriguba nai tasku ashchai pønraig køn cha.

⁹ I yaube natøwei mas nuig kur cha, chiwanguen ashmønrrai nane meriibe chigaagøn cha, ñundøh na chi asamig kømønrrai nøøø køn taig køn cha, kaguende ñibe nui srain kuimba. ¿Nabe nune øyeeg kaig marøb mandø pasramø cha, Tiuswan purø trømbøig marøb?–

¹⁰ Inchen ishuube kwalømmørig, kwalømmørig Joséwane ‘naba waramisrkun’ chib, nuimbulu lincha wanrrai inchib maya, maya treendingucha, Josébe treegwane kandø, kandø ka chib, webib, webig ibig køn.

¹¹ Indiibe José kan kwaløm yau nui chi maramigwan martrab kebibenba, truyube mugucha kaaben,

¹² ishuube nui kewa pasraigu kemørøppa trenchiptinchibig køn:

–Naba waramisrkun– cha.

Inchene Josébe tru nui kewa pasraigwane nui tasku srua pasrønrraindø yaugurri weluløppa iptinchibig køn.

¹³ Inchen Josébe tru nui kewa pasraigwane nui tasku kørømisrtraindø welula yai ashippe,

¹⁴ yau tru karuig mendig melabelan wamabe, trenchibig køn:

–Au, ñimguen asay cha, tru nai keg kan hebreo pera arriibe namune ke kan chigucha kømeeleø kui lataig mara kørømartrab ka treetø arrin køn cha. Nainug kebarrua, nan kemøtrab inndan cha. Inchen nabe truba truba mur trashiben,

¹⁵ na truba mur trasai ashippe, nui kewaguigwan naimbulu tsumnetø, luløptindan– cha.

¹⁶ Incha tru ishuube tru José kewaguigwane nui keg yau pumnegatig trarra wawa,

¹⁷ kewagucha treetøweih chib eshkabig køn:

—Tru hebreo ñi karub tøgagømig pera arriibe nane kan larrø kaig kui lataig kemøra ka kaig martraptø arrin køn chib.

¹⁸ Inchen nabe truba mur trashiben, nui kewaguigwan naimbulu tsumnetø weluløptindan— cha.

¹⁹ Tru “ñi karub tøgagømig peniibe nan øyeeg martan” chib, sraimbe Potifarwan øyeeg chib eshkaben, nøbe truba trømbøig namabig køn.

²⁰ Inchen tru Joséwan penabiibe reyweimburab kalø marøbelan kemøra keeriilø purramnug, Joséwan truyu keera wannøbig køn.

Inchendø Tru Kailan Keeri Yaugucha

²¹ Jehovahé Joséba pasrøwa, nui lastima asigwane kenamarøbig kenamara, tru keerin pønrrabelan ashib pasrabikken nune chi isumgaig larrø tabikkui ashchai, Jehovahé treeg marøbig køn.

²² Inchen tru keeri pønrrabelan nø karubiibe, tru mayeelø keeriilø pønrrabelan José nø ashchai pasren, katø truyu chi asha maramelane keriguba José nø asha marøbig køn.

²³ Inchen tru keerin pønrrabelan nø karubiibe chi isua asamikken palømig køn, José nø asha marøb pasraigwane. Kaguende Jehovahé Joséba pasrøwa, nø chi mariilane merraptø, merraptø webinrrai marøbig køn.

40

Piailøbe Øyeeg Chib Køn Cha José Tørrarøb

¹ Indig øyeeg chab purayaig yandø yana køben, reywan mutchai srørrøb pasrabiiba, reywei pirri marøbiiba, nømui karubig Egipcio reywane namishi-belø køn.

² Inchen Faraónbe tru i pagatø nørreelan nø lutø tranigwan marøb pønrrabelan namabig køn, tru vino srørrøb pønrrabelan nø asha karubig-wanba, tru pirri marøbelan nø asha karubigwanba.

³ Incha tru suldaumera reywan chigøben kømønrrai ashib pønrrabelan nø asha karubigwei yau nømun keera purrønnobig køn, tru Joséwan keera wanninuutøwei.

⁴ Inchen Faraónwan chigøben kømønrrai ashib suldaumerai nø karubiibe tru pagatø nørreelan keerilane José nø asha purugub pasrøbig køn.

Inchen truiløbe kan maya yanagøsrøn truyu keeriilø purrøwabe,

⁵ Tru pailø nørreelø tru lutø tranigwan marøb, katø tru reywan vino srørrøb pasrabiiba, tru pirri mara srørrøbiiba tru keerin purrabeløbe kan yem nøm kan kan piaig tøgagøbelø køn, tru piailøbe møitøgucha peg, peg eshkabig.

⁶ Inchen Josébe løtsø nømun ashchab ibene, nømbe truba truba isuilø purraptinchen,

⁷ nøbe trencha payibig køn:

—¿Ñimbe møimbe chindimbarre ke peg misriilø purrøgue?— cha.

⁸ Inchene nømbe trenchibelø køn:

—Nambe pailøba piailø tøgagøbendø, muguen kan øyeeg køn cha eshkanrabiibe mugaagøn— cha.

Inchene Josébe trenchibig køn:

—¿Piailan ‘øyeeg køn’ chinrabiibe Tius nø kømuitarru? cha. Er eshkarra pøs— chibig køn.

⁹ Inchen copamerayu srørrøbelan nø asha karubiibe trenchib eshkabig køn:

—Møimbe nane piappe, kan uvas tusr naim pinrøgue pasrabiibe,

¹⁰ srarmera pøn kwaliimera tøgagig pasraptindan cha.

11 Incha trube ishiizheelø wegucha, uzheelø niga tru lusrømerayube uvas-
mera srønan cha. Inchen nabe Faráonwei copan nai tasku muta, tru uvasmer-
ane tru copayu sunna, trugurrimbe natøwei Faraónwei tasku tranøb pían-
cha.

12 Inchene Josébe trenchibig køn:

—Tru pøngatø srarmerabe pøn kwaløm køben,

13 pøn kwalømyube Faráonbe ñi chi kalø marigwan ulø paymøtø, katøle
ñune ñui lutøytøwei pasren, ñibe Faraónwan katøle vinon srøtrabguen cha,
maramigwan maig marøbig købig kuig treetøwei.

14 Inchen ñun treeg tab kørrømarene, trube, nan isurrunrrig chibig
køn. Tiusmanda nan lastima tøgagua, Faraónwan waminchunrrig cha, nan
yugurri wesranrai.

15 Kaguende nane hebreosmerai pirausrøngurri nane namiimay merrar-
rawa, srua amrruig køn cha. Nabe yu Egipto pirau chigøben kalø mara kømur
cha, na yu merrarrawa keerig wamig.—

16 Inchen tru pirri marøbelan asha karub pasrabiibe tru piaigwan ke chi
isumgaig tabig øya kønrrun chib eshkain kui ashabe, trenchibig køn:

—Naimburappe nane treeg pían cha: Nai turbalabe pøngatø tasin-
uremera chi pirrimera køben tøgar pønrrøbashib.

17 Inchen ke pala srabesrø pasrab tasinyube, Faráonweyasig chine larrø
may pirrimera sulu tøggaig pasrøbendø, illimera tru nai turbala tasin pasra-
biguigwan mabashib.—

18 Inchene Josébe trenchiptinchibig køn:

—Iibe øyeeeg cha eshkabig køn cha: Pøngatø tasin ureemerabe pøn kwaløm
køn cha.

19 Inchen pøn kwalømyube Faráonbe ñui turwan paringarua, kan tusryu
mesringaruben, ñui asrwane illimera amrrua, ñune manrrun— cha.

20 Indiibe pøn kwalømyu Faráonbe nui tru kal-lain kwalømgurri mam pila
nemisrigwan trunun isunrrab marøbig køn. Incha nø lutø tranigwan marøb
pønrrabelayasig truba truba kasrag waramig mara, truilai merrab tru co-
pasyu vino srørrøb pønrrabelan nø karub pasrabigwanba, tru pirri marøbelan
nø karub pasrabigwanba tru keera purrønninukkurri wesrangarubig køn.

21 Inchen tru copayu srørrøb pønrrabelan asha karub pasrabigwane katøle
nui lutøwan tøga pasrønrrai tranen, nøbe srøsrø maig marøbig kuig katø
treetøwei copan Faraónwan mutchai yuuløb pasrabig køn.

22 Inchen tru pirri marøbelan asha karub pasrabigwane José maig purain-
run taimbala naashigu tsibasra mesrøngaruig køn.

23 Inchen køben, tru copayu srørrøb pønrrabelan ashibiibe Joséwane isumø,
kerrigu pesannaptindig køn.

41

Faraónwan Maig Piaigwan José Tømarøb Eshkab

1 Indig yandø katøle srørrøb pønrrønrrai pønsrai pa ila puraiben, Faráonbe
kan piaig tøgagøbig køn: Nune Nilo nu pi menda papsrøbashib.

2 Møimbe tru piugurrimbe trattø y parba larrø tabelø, tsal waaramera
werruptincha, junco utuwan pu mab mendabelø køn.

3 Inchen møimbe katø tru wendaube trattø y par treetøwei waaramera
larrø trombøilø, kalargøleelø piugurri werruabe, Nilo pi menda tru srøsrø
werrub waarameraim pulu pønrramisrøptincha,

⁴ tru larrø trømbøilø, kalar waaramerabe katø tru trattro y par larrø tab waaramera tsalelane mabashibgue. Inchen tru treeg piab tsuppa, Faraónbe kasraptindinabig køn.

⁵ Incha nøbe katø kibene, katøgan piaig mørøbig køn: Møimbe tirigu turmera larrø tabelø, larrø may nigar, kan tsutsiizhigutø trattro y par weguchar, treeg nørørailø pønrrøbashibgue.

⁶ Inchen tru wendaube tru tsutsigutøwei katøgan trattro y par weguchibelø køn, larrø pøndøzhig, tru kurag isig arrubig tustam itsiilø.

⁷ Inchen tru trattro y par larrø pøndøzheeløbe tru trattro y par larrø may nigazheelø, larrø tabelan piñiptinchibelø køn. Inchen Faraónbe kia kasraptindinaben, nøbe piabrre tsubrain kui wetøbeñibig køn.

⁸ Inchen nøbe løtsø kia kasrappe, larrø isuig kia kurra, tru Egiptosø mayeelø magia kusrebelø mu mana mariimíguan marøbelanba, larrø kusrebelanba amrrunrai wamabe nui piagwan eshkabig køn. Inchendø truiløbe tru piaigwane ni møkken 'øyeeg køn' cha Faraonwane eshkanrrab kaimabelø køn.

⁹ Inchen tru copayu vino srørrøb pønrrabelan nø karub pasrabiibe Faraonwane trenchibig køn:

—Møimbe si, na chigøsrøn eshkamig tøgaguigwan eshakamubrain kuin isuptinndan cha.

¹⁰ Pøs yanaguen køn cha nam ñui karui melabelan ñi namun nama, nanba tru pirri marøbelan ashib karub pasrabigwanba, tru suldaumeran nø karub ashibigwei yau, nø ashib tøgaguilø purrønrai namune keeringaruig købig køn cha.

¹¹ Indiibe wendø kan piaig tøgaguig køn cha, truigwanba nanba tru yemdøwei. Inchen tru piabwe kane peg peg eshkabig kuig køn cha.

¹² Inchen truyube kan hebreo matsinan merrarrawa keerig namba waig købig køn cha, tru suldaumeran nø karub tōga pasrabigwei karuig megabig. Inchen nambe namui piailan nun eshkabene, nøbe namui piailan øyeeg kønrrabig køn cha eshkabig køn mø piatøgucha maig kønrrabigwan.

¹³ Incha nø maig kønrrun cha eshkaig købiibe trubalawei purayaig købig køn cha: nabe nai lutøyu katøle puinabene, kanune naashigu tsibasra mesraig kuig køn— cha.

¹⁴ Inchen Faraónbe Josewan attrai wamønrrab øren, tru urastø Joséwane kalø marøbelan merrarrawa keeriinukkurri wesraben, Josébe milisigwan mullib, kewaguilan yunømarøb, Faraónweimay arrubig køn.

¹⁵ Incha Faraónbe Joséwane trenchibig køn:

—Nabe kan piaig tøgagøbendø, 'øyeeg køn' cha kelarrab eshkanrabiibe muguen kaagøn cha. Inchendø nabe wammørar cha, ñibe piaigwan wamindi mørabe, 'øyeeg kønrrab' køn cha eshkabig kuin kui.—

¹⁶ Inchene Josébe Faraónwane trenchibig køn:

—Tru treeg maramibe nainug pasrømøn cha. Faraón chi isumø pishindø tab wanrai wam tranøb lötønrrabiibe Tius nø køn cha.—

¹⁷ Inchen Faraónbe Joséwane trenchibig køn:

—Nan piappe, nabe Nilo nu pi menda pasrøbene,

¹⁸ tru piugurrimbe waaramera trattro y par larrø tabelø, tsalelø werruptincha, tru juncos utu pu mab køben,

¹⁹ møimbe katø tru wendaube trattro y par treetøwei waaramera larrø trømbøgøleelø, ke tsutsiiba, kalusbateelø, ¡katø! itapteelø piugurri werrubelø køn cha. Kan managuen Egipto pirau nabe øyeeg kalargølig trømbøgøleeløbe ashmuig køn cha.

20 Inchen tru waaramera larrø trømbøgøleelø kalargøleeløbe tru srøtø trattrø y par tsal waaramera pønrrabelan maptinchibelø køn cha.

21 Inchendø truilan mappē, mabendø, kan chigucha mamøwa lataitøweih pønrrabelø køn cha. Kaguende maig købeløbe treeg trømbøig kalargøleetøweih pønrrabelø køn. Inchen nabe kasraptindinabig køn cha.

22 Inchen nan katø piappe: Møimbe tirigu turmera larrø tabelø, larrø may nigar, kan tsutsizhigutø trattrø y par weguchar, treeg nørøwar pønrrøbashiib piabig køn cha.

23 Inchen tru wendaube tru tsutsigutøwei katøgan trattrø y par weguchibelø køn, larrø pøndøzhig, tru kurag isig arrubig tustam itsiilø.

24 Inchen tru larrø pøndø tirigube tru larrø tab tirigu turmeran kebinab, kebinab piñbashiib piabig køn cha. Inchen nabe tru magia kusrebelø mu mana mariimigwan marøbelan payen, muguen truiløbe tru piaibe øyeg chibig køn chabe eshkamøtan— chibig køn.

25 Inchen Josébe Faraónwane trenchibig køn:

—Faraónwei tru pagatø piailøbe parba trunundøwei eshkabig køn cha. Tiusbe nø maig martrab pasraigwan tru piabyu kenamarin køn cha.

26 Tru truba tab waaramera trattrø y par, katø tru larrø tab tirigu turmera tru trattrø y parbabe pilamera trattrø y parwan eshkan cha. Tru piaibe trutøwei kandø eshkabig køn cha.

27 Inchen tru waaramera larrø trømbøgøleelø kalargøleelø tru tab waaramera-i wendau nerrubeløba, katø tru tirigu turmera larrø pøndøzhig tru kurag isig arrubig tustam itsiiløba, truiløbe pilamera trattrø y par køn cha. Inchendø truike pilamera trattrø y par larrø trømbøig parø attrabigwan eshkabig køn cha.

28 Nabe ñi Faraónwan øyeg eshkar cha, Tiusbe nø maig maramigwan ñune kenamarøb pasran cha.

29 Pilamera trattrø y par Egipto pirau muba kuimburab mamig purø misrøb pilamera kønrrab køn cha.

30 Inchen katø tru wendaube pilamera trattrø y par purø trømbøig parø attrabig køn cha, truba truba mamiiimera misrig købelanguen chi misruiig kui lataig pesannawa kømgue, kaguende tru parø arrubiibe tru Egipto pirøwane purø lastimaig mara kørømartrun cha.

31 Inchawei parø purø trømbøig arruptø, tru merrabwan truba truba mamiiimera misrig købeløbe ni kan kenaguen kønrraamøn cha, purø trømbøig køptø.

32 Pøs, ñi Faraónbe pamay treetø, treetø piaig mørig køn cha, kaguen Tiusbe iigwan ñi asha kønrrai ¡katø! martrab pasran cha, trurrigu chi srarrømøtø.

33 Incha treekkurri ñi Faraónbe kan larrø kusreb møg, chigui asha tab marøb møg lanrrain cha, Egipto pirau kerrigu chi maramigwan nø karub ashib tøga pasramisrtrai.

34 Incha nabe trendamønrrun cha, ñi faraónbe Egipto muba kuimburab tru ellmarig tulisailan ashib amrrabelø wesrawa pønrsrø cha, Egipto pirau ellmarig tulisailan cien cargsyu veintene eseganrraingue tru trattrøba parba truba truba misrøb pilamerawan.

35 Tru mamig misrøbig larrø tab pilamera amrruben, tru Faraón maig chiben trumay tru ellmarig misrigwan ashibeløbe mamigwan kanbalatø tulisha, ciudadmørig esegamig kønrrun, misaamerayasis mamig kønrrai.

36 Inchawei tru i esegawa pønsrai mamiimerabe, tru Egipto pirau pilamera trattrø y par larrø trømbøig parø arrubigu purugunrrun cha, trumay misamera parøgwab kwamønrrain— cha.

José Egipto Pirau Kubenadur

37 Inchen tru øyeebe Faraónwanba tru nø karuigwan marøbelanbabe truba tabig mørøraben,

38 Faraónbe tru nui karuilane trenchibig køn:

—¿Tiuswei espíritu nuinug arrua pasrainabig, katøgan øyeege møg wetørranrrautah?— cha.

39 Incha Faraónbe Joséwane trenchibig køn:

—Ñi lataig kusrebig chigui asha tab martrabiibe mugucha katøgane kaagøn cha. Kaguende Tiusbe ñune kerrigu iigwan nebua asingaruin køn cha.

40 Ñi kønrrabig køn cha, nai purø tab yau na mubøraptø nebua karub tøgaguigwan ashib karub wanrrabiibe, nai maya misaamerabe ñi maig chiben møramig kønrrun cha; ñuimbalabe natøh mas nuig kømønrrun cha, kaguende nabe rey kuikkurri.—

41 Incha Faraónbe Joséwane trenchibig køn:

—Nabe ñune Egipto pirau kerriguba ñi asha karub wanrrai neera wannar cha, naimburø ashib wanrrai.—

42 Incha Faraónbe surtigas sellobañauigwan nui taskugurri wesrawa, Joséwan pasrøbig køn. Incha trugurrimbe keilø linotøga marig purø tabig kenanøb, katø kan oro naashigu iløsrøb inchibig køn.

43 Incha trugurrimbe tru Faraónwei wendau katøgan tru ashib karub wabig unin karryu Joséwane nebingarua misagwan øyah chib trashinrrai karubig køn: “¡Tømbønsray! ¡Tømbønsray!” chib. Øyamay Josébe Egipto pirau kerriguwan nø karub wanrrab nebyaig køn.

44 Incha Faraónbe Josewane trenchibig køn:

—Nabe Faraón kur cha. Inchendø kerriguba Egipto piraube chi maramigwan ñi treeg martrig chimuingatiibe, mugucha kønønrraamøn— cha.

45 Incha Faraónbe Joséwane munchin yunømara Zafenat Panea cha wamababig køn. Incha Asenatwan nui srain kønrrai tranøbig køn, truiibe On ciudadsrø sacerdote lataig Potifera taigwei nimbasrwan. Øyamay Josébe Egipto pirøwan ashchab pasramisrig køn.

46 Josébe pilamera treinta tøgagig købig køn, Egipto rey Faraónwei merrab pera ambul uras. Incha Josebe rey Faraonwei merrabgurri webya, tru Egipto pirau pirø muba kuimburab ashib llirabig køn.

47 Tru trattrø y par misrøb pilamerawane pirøbe truba truba misren,

48 tru trattrø y pa pilamerawan Egipto pirau truba truba misriilan Josébe tulisigarua, ciudaderasrø kan mayangøsrøn esegawa pønsrøbig køn, tru ciudadmørig tru pøtøgatanwan tirigu trameran tulisailan truyu truyu esegab.

49 Josébe tirigumera nørrø køptø kan maryu pisrum lataig nørrø tulishibig køn. Tirigu purø nørrø køptø yandø mayan køn tamgaig køben, ka kørrømarøbig køn, nørrø køptø øyan køn chib eshkaib tøgagømgagig kuikkurri.

50 Tru parø attrab pila ke srøsrø pila pølbasmøwatø Josébe nui srai Asenat, tru Onsrø sacerdote Potiferai nimbasrba, pagatø ureezheelø tøgaguig køn.

51 Incha mayur nusrkawane Manasés munchi pasrig køn, kaguende nøbe trenchibig køn: “Nai møskawei yaugurri webya iben, chine chine nebuinab unig købigwan Tiusbe trunun isubguengaig pishindø unamig kønrrai martan” cha.

⁵² Incha tru wendau katøgan unane Efrain munchi pasrig køn; kaguendø i munchibe: “Na yeeg isuig tsuim pirausrø Tiusbe nane ureg tøgagønrrai marig køn” chibikkurri.

⁵³ Inchen tru Egipto pirau mamig larrø misrøb pilamera trattro y par chab puraihen,

⁵⁴ José maig eshkaimbala tru purø trømbøig parø attrabig tru trattro y pa pilamerabe yandø kebibig køn. Inchen chu pirausrøndøgucha parø arrub mendøben, trune Egipto pirau muba kuimburab mamig købig køn.

⁵⁵ Inchen Egipto pirau kerrigu misaabe parø arrub mendi mørabe, misaamerabe Faraónwan mamig kaatan cha, miab mendaptinchen, Faraónbe maya egipciosmeran trenchibig køn:

—Joséweimay amba, nø maig taigwan maray— cha.

⁵⁶ Inchen parøbe tru pirau muba kuimburab puim pasrøben, Josébe tirigu esegaig pønrrabelømørig kura, egipciosmeran yanøbig køn. Kaguende mamig kaagøb arrubiibe chu pirausrøndøgucha, masken, maskenig trømbøig misrøb arruben.

⁵⁷ Inchen chu pirausrø misaameratøgucha Joséwan tirigu penønrrab amrubelø køn, kaguen tru parø arrubiibe yandø munaørøba arrub pasrøben.

42

Joséwei Nunelø Egiptosrø Mamig Lanrrab Ambub

¹ Inchen Jacobpe Egiptosrømbe mamiimera køn tai wammørabe, nui nusrkalane trenchibig køn:

—Mailø køh cha, kangurri kangurri asiyab purrønrrappe.

² Egiptosrømbe mamig køn tai wammørar cha. Trusrømay kørraamba, namuyasig mamig penay cha, kwamø, øsig waramig kønrraimbe.—

³ Inchen tru Joséwei nunelø tru pa trattroeløbe Egiptosrø mamig penønrrab kørraambubelø køn.

⁴ Inhendø Jacobpe tru Joséwei nuneg Benjaminwane ørmíig køn, tru nui nuneløba: “Inchippa mayu chigøbendø nebugun” cha.

⁵ Inchen Israelwei nusrkaløbe mamig penønrrab ambubelø køn, tru katøganelø penønrrab ambubeløba, kaguende Canaán pirau parø purø trømbøig pasrøben.

⁶ Inchen Josébe tru pirau nø ashib karubig købig køn, katø chu pirausreelan køben maya misaameran tirigu yanøbig. Inchen Joséwei nunelø trusrø puabe, nømui kappalømeran pirausrøngatig kebachib utsøbasrøbelø køn.

⁷ Inchen Josébe tru urastø nømune nui nunelø kui mõi mõi nebua ashibig køn. Inhendøgucha ashmíig misrøppa, nømune purø tsag waminchib trencha payibig køn:

—¿Ñimbe chugurri amrrugue?— cha.

Inchen nømbe:

—Canaán pirausrøngurri tirigu penønrrab amrruer— chibelø køn.

⁸ Inchen Josébe nui nunelø kui ashen, nømgurrimbe ashmeelø køn.

⁹ Inchen Josébe nun tru nømuimburab piaig købigwan isuptinchibig køn. Inchabe trenchibig køn:

—Ñimbe i pirau kwayanrrab mubørab mas may kegørramdiig køtashib ka larønrraptørre amrrun— cha.

¹⁰ Inchen nømbe trenchibelø køn:

—Ñi, namui karubig, chi treeg kømøen cha, nam ñui karuig melabeløbe tirigu penønrrab amrruig køn cha.

11 Nambe mayeeløba kan møskaweindø nusrkalø ker cha, nambe chigøben kalø marøb pønrrømø misaamera, nam ñi karuig melabeløbe maisrøn kətashib kalø martrab larab amøñimø misaamera ker— cha.

12 Inchen Josébe trenchibig køn:

—Kah cha, ñimbe i pirau kwayanrrab mubørab mas may kegørrandiig kətashib trunun ashchaptøwei amrruin køn— cha.

13 Inchen nømbe trenchibelø køn:

—Nam ñi maig chiben pønrrabelø pa trattrø y par købelø kuig køn cha, nambe søteeløba kan møskaweindø nusrkalø Canaán pirau tsubigwei. Inchen mas unøbe namui møskaimba kørørmisren, kane yandø pinig mugaagøn— cha.

14 Inchen Josébe katøle trenchibig køn:

—Na maig taig ñimbe maisrøn kətashchab nilø ka larønrraptørre amrrun cha.

15 Incha isa kømø, ñimui wamindig cierto kuitashchab Faraónwei merrab, jkatø! nabe øyeeg maramønrrun cha, trendamønrrun chibig køn, ñimui wendø nuneg-unan yumay pera amrrumingatiibe ñimbe yugurrimbe webamraamøn cha.

16 Ñim mōigwan køben øray chibig køn, tru ñimui wendø nunewan pera attrai. Inchen katøganelane keera purrønniilø purrønrrain cha, trumaybe asamdiig kønrrun cha ñim sølwan waminchibelø kuin kui.

Inchen ka isatø indin kuisruandøbe, ñimbe maisrøngətashchab ka larønrraptørre amrruar køn cha, nabe Faraónwei munchiyu trendamønrrun— cha.

17 Incha tru nøm pa trattreelane Josébe pøn kwaløm ørøba keerig purrønrrai marøbig køn.

18 Inchabe pøn kwaløm puraibene, trenchibig køn:

—Nabe Tiuswane larrø koriibala pasrabig kur cha. Øyamay maray chibig køn, ñim øsig webamrrappe:

19 Ñim isa kømø, chigøben kalø marøb pønrrømø misaamera kuabe, møikkøben ñimui kan nunewan keera awannig kørørmisra wanrrain cha. Inchen kaneløbe ñim ñimui yau misaameran parø purørmønrrab mamuimera srua ambay cha.

20 Incha ñimui wendø nuneg-unan pera amrrurrnrrigay cha. Trumaybe isa kømø ñimbe sølwan waminchibelø kui asha, ñimbe kwamig kømønrrun— cha.

Inchen nømbe treegwan martrab kørørmisrøbelø køn.

21 Inchabe kangurri kangurri trenchibelø køn:

—Isa kømø, nambe namui nuneweimburaab larrø trømbøig kalø marig køn cha. Pøs øyeekkatiibe marmørrnrrigay chib nø namun truba truba trenchib megaben, nambe trendaigwane ni mørøkkuinguen kømuin pønrraig købig køn cha, yeeg lastima isui indi ashatøgucha. Truburø møimbe øyeeg isuin pønrramig namuimbala itøarrin pønrrer— cha.

22 Inchene Rubénbe trenchibig køn:

—Unane chi kaig marmøtay chiben, ñimwei nan mørmuig køn cha. Møimbeguende namune nui animbe ulø payinab pønrramig kønrrab køn— cha.

23 Inchen Josébe nø wamindi wamwan nui nunelan katøburø lliska waminchabig katøgøn pera pasrabig køn. Inchagurri nuneløbe nøm chi chib pønrrailane Josébe mørøb pasraitamappe isumeelø køn.

24 Inchen Jøsebe nømuim pulugurri tarømisra ya, truba kishababe, trugurri katøle nømuimay arrua, nømbe wamincha, Simeónwane nøøro mara, nøm ashib pønrramne lusingarubig køn.

²⁵ Incha trugurrimbe Josébe nòmui kustalmerayu tirigu netsøganingarua, katøle tru nòmui tiriguburø pagarai anmerane kanun, kanun tru nòmui tirigu kustalyu pusingarub, katø mayuwei ishin tamara traningarub inchibig køn. Inchen treeg marig køn.

²⁶ Inchen nømbe nòmui tirigumeran burrumerayu niisra tuyugurri ambubelø køn.

²⁷ Incha nømbe tru kørrømisra kiamsrø puabe, møikkørøn nui burrun tirigu manrrab kustalwan pichene, mømibe nui anbe kustalrrigu ka wai ashiptinchibig køn.

²⁸ Inchen nømbe nui nunelan trenchibig køn:

—Nai anwane nane katøle pusrin kømøh cha. Yu nai kustalyu ka purran— cha.

Inchene nømbe larrø kørrø kwariilø, nòmui manrrøbe ke webørsrab lata inchen, kangurri, kangurri trendiyabelø køn:

—¿Namun øyeg nebuinab pønrramig kønrrai kabe Tius treeg mara chin-derah?— cha.

²⁹ Inchen nømbe Canaán pirausrø møskai Jacob waisrø chab puabe, nømun kerrigu chi purayaigwan eshka trenchibelø køn:

³⁰ —Tru pirausrø karub wab møøbe namune purø tsag wamincha, nui pirøwan maig køtashib namune larab amrruig treeg kemesrøtan cha.

³¹ Inchen: “Nambe chigøben kalø marøb pønrrømø misaamera, managuen maig køtashib larab amøñimeelø ker cha, nambe trender cha.

³² Incha katø nambe nune trenchibelø ker cha: “Nambe pa trattø y pa nunelø, katø søteeløba kan møkaweindø nusrkalø, kane yandø pinig mugaaben, srabeibe ñiba Canaánsrø kørrømisran” cha.

³³ Inchene tru pirausrø karub wab møøbe namune trenchitan cha: “Nabe ñimune øyamay marigu asamønrrun cha, ñim chigøben kalø marøb pønrrømø misaamera kuitashchab ashchab, møigwan køben, ñimui nunewan yu naba kørrømaray cha, kaneløbe nòmui yauelan parø purammønrrai tirigu niisra amrrai.

³⁴ Inchendø katø amrruppe, wendø nunewan pera amrrunrigay chitan cha. Trumaybe ñim isa kømø chigøben kalø marøb pønrrømø misaamera, ka maig køtashchab ashib ka larønrraptø amrrumuin kui asamønrrun cha. Trugurrimbe ñui katøgan nunewan elachen, ñimbe i pirau mu chi taimig yanøb, penab amønamiig kønrrun” chitan— cha.

³⁵ Inchen tru Joséwei nunelø tru kustalmeran kwarøb mendøbene, nòmui kustalmørig kan talegu-unøzhigu nòmui tru tiriguburø pagarai anbe ka purraptinchen, nøm lata, nui møskai lata tru an pusri talegu-unøzhigwan kura ashabe, purø kørig isubelø køn.

³⁶ Inchene møskai Jacobpe nømune trenchibig køn:

—Ñimbe nane yandø chi nusrkaløgaig kørrømarøb amrrutan cha. Josébe yandø pinig mugaaben, Simeóngucha mugaaben, mømibe Benjaminwan pera amrrab indan cha. Iibe kerriguba naimbalatø pureb attan— cha.

³⁷ Inchen Rubénbe møskawan trenchibig køn:

—Benjaminwane na ashchur cha. Na Benjaminwan ñuimay katøle pera pumubene, nai pagatø nusrkalan kwetchig— cha.

³⁸ Inchene Jacobpe trenchibig køn:

—Nai nusrkaimbe ñimba inrraamøn cha. José nunebe yandø kwaig mugaaben, nømibe nøtøwein kørrømisra megan cha. Mayu chigøben kaig nebubene, chi martrague cha, trube, ñimurrindø kønrrun cha, køllig waacha isubigutø kuabene.—

43

Benjamínwan Pera Joséwei Nuneløbe Egiptomay Katø Ambub

¹ Inchen tru piraube parøbe masken trømbøig misrøb arruben,
² tru Egiptogurri srua amrruin tirigube yandø chab patsøbene, møskaimbe trenchibig køn:

–Egiptomay katøle amba, namuyasig tirigu nubah penønrrigay— cha.

³ Inchene Judábe trenchibig køn:

–Tru møøbe namune ¡katø! ke kandø cha pasrig kuig køn cha: “Tru ñimui wendø nunewan ñim pera amrrumingatiibe trube, nan kumbe kenamismørrunrrigay” cha.

⁴ Ñí namui nunewan ka pera ambasheneh, trube, nambe ñuyasig mamig penønrrab kørraambamønrrun cha.

⁵ Inchen ñi namun nun pera ambashmubene, trube, nambe ambamig kømønrrun cha. Kaguende tru møøbe namune trendaig kuig køn cha: “Ñimui nunewan ñim pera amrrumingatiibe trube, kenamismørrunrrigay”— cha.

⁶ Inchene Israelbe trenchibig køn:

–Ñimgui nane purø trømbøig kalø mariitan cha. ¿Tru møwane katøgan nuneg tøgaguer chabe, chinchabrre eshkainguaasamørra?— cha.

⁷ Inchene nømbe trenchibelø køn:

–Kaguende tru møøbe namuimburappa, namui yaelaimburappa ke chine tab, tab payibig køn cha. Inchabe trenchibig køn cha: “¿Ñimui møskaimbe ka øsig wabig køh? cha ¿Ñimbe katøgan nuneg tøgagøgueh?” cha. Pøs nambe, nø mancha payiilan ka lètamiitøwein kuig køn cha. “Ñimui nunewan pera amrrunrrigay” chinrraitamappe, ¿kan nambe mu isua pønrraig køtah?— cha.

⁸ Inchene Judábe møskai Israelwane trenchibig køn:

–Matsinane na asamønrrun cha. Matsinane naba ka ingaru cha, nambe yandø ambamønrrun cha, ñi lata, nam lata, namui ureemera lata kwamønrrappe.

⁹ Chi kømønrrai nune na asamønrrun cha. Na yumay nun katøle pera arrumuinabene, trube, nagurrindø kønrrun cha, na chu uraskatig nai øsig tsuigu.

¹⁰ Inchawei namun øya srarøbashmuig kuinguen, katøguen amba pubsrui-inrrun— cha.

¹¹ Inchen møskai Israelbe trenchibig køn:

–Pøs mumay katøgan peemay maramdiig chigaaguig købene, trube øyamay ka maray cha: Ñimui kustalmerayu tru møwei ketamelø i pirau chigøben tabig misriilan srua ambay cha, kan lamø bálamo køben, lamø miel køben, mayzhig irrabelø køben, mirra køben, nueces køben, almendras købengue.

¹² Angucha srua ambuppe, maya srua ambig kømnetø katø treetøweih srua ambay cha. Ñimui tirigu kustalyu tru anmeran katøle pusrig købigwane tranrrab katøle srua ambay cha. Inchippa pella treenchib kuin købgun cha.

¹³ Incha ñimui wendø nunewan pera, tru Egipto pirau nø karub wabigweimay katø ambay chibig køn.

¹⁴ Maramburab Marøb Tiusbe tru møg ñimun lastima tøgagønrrai martrain cha. Inchen ñimui katøgan nunewan lelachen, Benjamíngucha katø ñimba attrain cha. Inchen nan nai nusrkalan trubisamig nebubene, chinchibig kui ¡ka treeg nebunrraita!— cha.

15 Inchen nomba tru ketamelanba, katø angucha maya srua ambig kōmnetø katø treetøweih srua, Benjamínwan pera, Egiptosrømay kōrraamba, Joséwei merrab pubelø kōn.

16 Inchen Josébe Benjamín nomba arrin kui ashabe, tru nui yau ashibigwane trenchibig kōn:

—I mōguelan nai yamay pera ya, kan waara kweecha tamaray cha, kaguen i mōgueløbe kwaløm tøbøtaabe naba manrrab kōn— cha.

17 Inchen tru mōøbe José maig taigwan mara, Joséwei yamay nōmune pera ibig kōn.

18 Inchen nomba Joséwei yausrømay pera ambi mōrabe, kōrrø kōriimata trenchibelø kōn:

—Marig merrabwan namui kustalmerayu tru anwan katøle pusrikkurri namune pera ambiinrrun cha. Mōimbe namune merrarrawa, chigøben maramba, namune øyeeg, øyeeg mara pønrran tamba, katø namune nōmui karua srua kuilø kōnrrai maramba inchautan cha, namui burrueranbañau.

19 Incha yandø kebambi yaskabu puabe, tru Joséwei yawan ashibigwan nomba waminchab kemallabe,

20 trenchibelø kōn:

—Tiusmanda, namui karubig, nambe tru srøtø kōrrøruppe tirigu penønrraptø kōrrørruig kōn cha.

21 Indiibe tru nam werrua amrrua, tru yem kōrrømisramsø puabe, namui kustalmeran kura ashene, mōimbe tru tirigu kustalmerayube mōilaindøgucha namui anmerabe kerriguba ka purraptindin kōn cha, maya unaasiibe, treekke. Mōimbe nambe tru anwan tranrrab katøle srua amrruer cha.

22 Incha tirigu penamig anbe katø srøig sruamrruer cha. Inchendø nambe tru srøsrø srua amrrui anwane kustalmerayu mu kebusri mōrmer— cha.

23 Inchen tru Josewei yau chi kōbigwan nō ashibiibe trenchiptinchibig kōn:

—Chi isumøtay cha. Chi kōrig isumøtay cha. Ñimui Tius, katø ñimui mōskawei Tius nøbe ñimui kustalmerayu tru anwan pusriinrrun cha. Nabe ñim pagarai anwane utig kuig kōn— cha. Incha tru Joséwei yau chitø tøgaguilan ashibiibe Simeónwan wesrawa, nōm purraisømay pera arrua,

24 trugurrimbe José waisrømay pera ya, nōmui srømmeran kwalamig pi tranøb, burrueran mannamig pōnsrøb inchibig kōn.

25 Inchen nomba ketamelan tamara, José israyu pumnegatig muniirabelø kōn, kaguen mamiibe truyu kōnrrabig kui nomba wammøra purrøwa.

26 Inchen yandø José yau pubene, nomba tru ketamelø srua amrruilan keta, nomba Joséwei merrab pirausrøngatig maløwan trarrøb utsøbasrøbelø kōn.

27 Inchen Josébe payibig kōn:

—¿Maig meløgue? cha, ¿Tru ñim wamindig ñimui mōskai kōlli misaazhikkan katøgucha ka øsig wabig kuitarru?— cha.

28 Inchene nomba trenchibelø kōn:

—Tru namui mōskai, ñi maig chiben martrabiibe, chigucha kōmø, tab ka wan cha. Ka øsig wabig kōn— chabe, nune tab indig kōnrrai utsøbasrøbelø kōn.

29 Inchen Josébe nuin pøtøgatan ashabe, tru kan mōskaindø, kan usrindø kuikkurri nuimbe trag nuneg Benjamín pasrai ashabe, trenchibig kōn:

—¿I tru ñimui wendø nuneg kuitarru cha, tru ñim nan wamindig?—

Inchabe trenchibig kōn:

—Tius maya nuguen ñun tab indig kōnrrain cha, nai nusrkai.—

30 Inchen nui nunewan ashene, kishig kōbiibe yandø pasramgaig kōben, Josébe mallatø webya, nui kwartuyu kebya, kisamburab kishibig kōn.

³¹ Incha yandø awentawa, nui maløwan kwalla, webarruabe, trenchibig køn:

—Mamiimera nøm manrrai pønsray— cha.

³² Inchen José mab wamisramibe nøørø køben, katø nunelane nøørø tamara purrønana, egipciosmera tru Joséba mabelane katø nøørø mab purramig tamarøbelø køn, kaguende egipciosmerabe nøm kørewa tøgaguigube hebreosmerababe trubalatø purramisra mamig kømíg kua, kaguen nømuimbe treebe larrø trømbøig købig køben.

³³ Inchen Joséwei nuneløbe nui merrab purrabelø køn, José maig purramisingaruben, treekke. Kerrigu mayurmerrig, trugurrimbe tru wendaug treetø, treetø nøm maya yanilø køben, trumay treg purrønøbig køn. Inchen nømbe truba kwaariilø purrabelø køn, nømbe ¡katø! kangurri, kangurri asiya.

³⁴ Incha Josébe tru nui mishatsigu chi mamiimera pønsraigwan tru mamiimeran nømun pirishibig køn. Inchen Benjamínweyasiibe trattreelaimburabigwan nuyasiitø pasrøbig køn, kanelan lataitøguen kømø. Incha nømbe Joséba kanbalatø mab, muchib truba truba kasraarabelø køn.

44

Josewei Copa

¹ Incha mas yanayu Josébe nui yawan ashibigwan trencha karubig køn:

—Tru møguelai kustalmerayu maya kemnegatig tirigun netsøganay cha. Incha nømui pagarai anmeran tirigu kustalmerayu trumørig pusrtrig cha.

² Incha tru wendø nunewei tirigu kustal trigube nai copa andøga marigwan wayrrig cha tru tiriguburø nø an pagaraigwanba kanbalatø.—

Inchen tru yau ashib wabiibe José maig karuigwan marøbig køn.

³ Inchen yandø ke chab tør-rrabendø tru møguelane Josebe ambasingarubig køn, nømui burrumerana.

⁴ Inchen tru møgueløbe tru ciudayugurrimbe ke tre yab ammø, srø køben, Josébe nui yau ashib wab møwane trenchiptinchibig køn:

—Tru møguelan wetøgønrrab møi møi malla inrrø cha. Incha wetøgabe, trenchinrrig cha: “Namgurrimbe yeeg tab inchen, ñimbe chindimbarre kaig mara amgue? cha. ¿Andøga marin copan chindimbarre nila srua amgue? cha.

⁵ Nan karub pera pasrabig truyu muchib, chi purainrrabigwan truyu nebua ashib indin copan. Ñimgui purø kalø marin køn”— cha.

⁶ Inchen tru yau ashib wab møøbe wetøgabe, José maig taigwan treetøweih chibig køn.

⁷ Inchene nømbe trencha løtabelø køn:

—¿Tru namun ashib karubiibe namune chindimbarre øyeeg chinetø tah? cha. ¡Kan! nambe managen treekkøliibe mara kømer cha.

⁸ Yamba nambe Canaán pirausrøngurringuen tru namui tirigu kustalmerayu an wetørrailanguen katøle trannrrab srua amrruig køn cha. Ñui karubigwei yaugurrimbe mas mandø incha tru oro køben, an køben, nila srua amrrunrraitamah? cha.

⁹ Inchen nam ñui karuig melabelainug møigweinug køben, tru copan wetørrainabiibe, truike kwamig kønrrain cha. Inchen namguen ñui karuindiig melabelø kønrrab kørømisramønrrun— chibelø køn.

¹⁰ Inchen tru yau chiwan køben nø ashib wabiibe trenchibig køn:

—Ñim maig taig treeg kørnrain cha. Tru copan wetørrainabiitøh na karub tøgagømig meganrrab kørromisrtrun cha. Inchen ñim kaneløbe chi kalø mara pønrran tamiibe chigar kørromisrtrun— cha.

¹¹ Inchen nømbe mallazhiitø niisraigwan chab pinøsrua, møitøgucha kustalmeran pirau pønra tsusaigwan pichibelø køn.

¹² Inchen tru ya ashibiibe tru mayur nunewei kustalyugurri lab pølbasra, tru srabe nuneg Benjamínweisrøngatig lam mendøbene, møimbe tru copane truigwein kustalyuh wetørraptinchibig køn.

¹³ Inchen nuneløbe nømui kewa pønraigwan larrø isuin pønrrai ashchai kenamartrab kølsrøptinchibelø køn. Incha nøm møitøgucha nømui burrumeran katø niisra, ciudasrømay katøle chab llirabelø køn.

¹⁴ Inchen Judábe nui nuneløba Joséwei yausrø pubig køn, nøbe yau srø wannetø. Inchen nømbe nui merrab maløwan pirausrø kebatamnegatig utsøbasrøbelø køn.

¹⁵ Inchene Josébe trenchibig køn:

—¿Ñimbe øyeebe mumay marøb pønrrøngue? cha. Kan møg chi chippe treegwan kørnrai inchibig na lataibe ñim chi kalø martrab indigwan kabe wetøbefñmønrraitamagueh— cha.

¹⁶ Inchene Judábe trenchibig køn:

—Namui karubigwan, ñune ni chitamguen kømøtan cha. Mumaygucha kan treeg marmuig køn chib pønrramibe kaatan cha. Nam ñui karuig melabelainug trømbøig kalø marigwan Tiusebe kenamaran cha. Møimbe nambe namui karubigwei karuindiig melabelø misramønrrun cha, katø tru copan wetørrainabig chigucha.—

¹⁷ Inchene Josébe trenchibig køn:

—Kan nabe treebe mana marøb pasramø cha. Tru copan nuinug wetørrainabiitøh nai karuindiig meganrrab kørromisrtrun cha. Ñimbe chi isumø, ñimui møskaweisrømay ka ambay— chibig køn.

Judá Benjamínwan Purøwaminchib

¹⁸ Inchen Judábe Joséweimay kemallabe, trenchibig køn:

—Nai karubig, nan namumørrunrig cha. Ñundø na kan chigøsrøn chinrrab, nan tiusmanda utø ketøbsrumuguh cha, kaguende ñibe Faraón køb lataitøwei chi maramigwane martrain karubig køn cha.

¹⁹ Ñi namui karubiibe namune øyeege chib payig købig køn cha: “¿Ñimbe katøgucha møskawan ka wannar køgueh, kabe katøgan nuneg kui tøgær køgueh?” chib.

²⁰ Inchen nambe ñi namui karubigwane øyeege cha løtab pønrraig kuig køn cha: “Nambe namui møskai kølli misazhiiba, kan matsinø nuneg-unøba tøgær ker cha, truiibe namui møskai kølli misag køben kal-lawai. Inchagurri tru i srabeigwane møskaimbe purø undaguig køn” cha; kaguendø kan usraindø nusrkain kuikkurri kan nunebe yandø kwain kaaben, nøtø kørromisra pasran cha.

²¹ Inchene ñi maig chiben nam treeg pønrrabelane ñibe trendaig kømøh cha: “Na ashchab tru wendø nunewane pera amrrunrigay” cha.

²² Inchen nambe namui karubigwan yamba trendaig køppèh cha: “Matsinøbe møskawane chincha elatchaamøn cha, kaguende nø elachene, møskaimbe kwanrrun” cha.

²³ Inchene nam ñui karuig melabelane ñibe trendaig køn cha: “Ñimui wendø nuneg ñimba arrumuingatiibe, trube, kenamismørrunrigay” cha.

²⁴ Incha nambe namui mōskai tru ñi maig chiben marøbigwei yausrø puabe, ñi namui karubig ñi maig taigwan nambe kerrigu eshkabelø ker cha.

²⁵ Inchene namui mōskaimbe namune trenchibig kōn: “Katøle amba, namuyasig tirigu nubah penønrrigay” cha.

²⁶ Inchen nambe namui mōskawane trendaig kōn cha: “Namui wendø nuneg arrumuingatibe nambe chincha ambamgaig kōn cha. Namun nø linchimubene, tru karubigwane asamig kaagōn” cha.

²⁷ Inchen nai mōskai ñui karuig megabiibe trendaig kōn cha: “Ñimbe ashibelø kōn cha, nai sraimbe pagatø nai nusrkalø tōga misrigwan.

²⁸ Indig kane nainukkurri ya yandø pinøben, katøbe managuen ashmur cha. Namig ushamera pitis marig kuitamab isur tan cha.

²⁹ Katø iigwangucha pera amben, katø chigøben kōptinchene, na kōllig waachawan isubiitōgatø kwamig kōnrrai marøbeløbe ñim kōnrrabguen” cha, nane trendaig kōn cha.

³⁰ Nai mōskaimbe matsinø-unøbabe purø trag pōnrrabelø kuig kōppe, nambe katøle amben, matsinø-unø namba arrumubene,

³¹ namui mōskaimbe nun ashmuppe, kwanrrun cha. Inchen nam kōmōnrrun cha, namui mōskai kōlli misagwan isubiitōgatø kwamig kōnrrai marøbeløbe.

³² Incha na ñui karuig megabiibe matsinan na purøbasramisrøb na ashchab misrig kōn cha, nai mōskawei merrab. Incha nabe nai mōskawane trendaig kōn cha: “Na katøle ñuimay pera arrumuinabene, trube, nagurrindø kōnrrun cha, na chu uraskatig nai øsig tsuigu” cha.

³³ Inchawei tiusmanda, nabe ñun treeg marøbsrumu chinrrab cha, matsinaimburø na purøbasramisrur cha, na ñui karuindiig meganrrab, matsinø-unøbe nui nuneløba katø inrrai.

³⁴ ¿Nabe mandø yamø cha, matsinø-unø naba arrumubene? Trube, nane nai mōskawane larrø lastimazhig isui indi ashig kōmōtan— chibig kōn.

45

José Nui Nunelan Nø Muguigwan Eshkab

¹ Inchen Josébe nuim pōtōgatan pōnrrabelai merrab yandø mas awentanrrab kaima, mur wamabig kōn:

—¡Mayeelanba yu nai merrabgurri webambingaruy!— chib. José nui nunelan nøbe ñimui nuneg kur cha eshkabene, nuim pulube ni mugucha mugaaguig kōn.

² Incha nøbe trasha, trasha kishen, egipciosmerabe wammøren, katø Faraónwei yau misaameragucha wammøren inchibelø kōn.

³ Incha Josébe nui nunelane trenchiptinchibig kōn:

—Nabe José kur cha. ¿Nai mōskaingan tab ka wabig kuitarru?— cha.

Inchen nuneløbe larrø kōrrø kwaara, ni chigucha lōtōnrrab kaimaptinchi-belø kōn, nømbe nui merrab ni mumayguen kōmuilø pōnrrøwa.

⁴ Inchen Josébe:

—Naimay kemalay— chiben, nømbe kemallen, nøbe trenchiptinchibig kōn:

—Nabe tru ñimui nuneg José kur cha, tru ñim nan Egiptosrømay yana ørig kōbig.

⁵ Inchendø ñimbe chi kullaarab isui inchimøtay cha. Ñim nan yusrømay yangig kōbigwan karrengucha øyeeg marøbraitamab isumøtay cha. Nane Tius ørig kōn cha, manawei nanmerrig inrrai, misaameran kwamø ka øsig puramrrai martrab.

6 Kaguende pirau pa pilaguen parø arrub pasrøben, katøgucha trattø pila palan cha, tru pilamerawane ellmartrab aramelø kōnrrab kōmøwei, ellmarig tulisamig kōnrrab kōmøwein kōnrrabig kōn cha.

7 Incha Tiusbe manawei nanmerrig ørig kōbig kōn cha, ñim pirau ka øsig warøwa, larrø tab webamba pōnrramig puben, trumay misaamera larrøbichibig larrøbichib kōnrrai.

8 Inchawei nane yusrømay ørøppe, Tius nø ørig kōn cha, ñim kōmøtø. Tru Faraónwan chi maramigu na isum purugubig kōnrraimba, nui yau kerriguwan na ashib tōga wanrraimba, katø kerrigu Egipto pirau na karub wamig kōnrraimba nø pasrig kōn cha.

9 Inchawei ñimbe mallatø incha, nai mōskawei yamay amba, trenchinrrigay cha: “Ñui nusrkai Josébe øyah tan cha: ‘Tiusbe nane Egipto pirau kerriguba na karub wanrrai wandan’ cha. Incha ‘nan ashchab ‘pebatø’ amø’ tan chinrrigay cha.

10 ‘Ñibe nai puluwandø Gosén pirau tsunrrig tan cha, ñui nusrkaløba, ñui awelu ureemeraba, katø ñui ubishamera kōben, cabrasmera kōben, ñui waamera kōben, katø ñui chigurrimbunø tøgaguiløbañau.

11 Nabe ñun truyu ashib tøgagørrumøn cha, kagen katøgucha trattø pila ørøba tru parøbe arrubig attrab kōn cha. Trengømuisruandøbe ñiba, ñui ureemeraba, ñui kerrigu chi tøgaguiløbañau larrø lastimailø misra kōrrømisrtrabguen’ cha.

12 Inchagucha ñim lata, nai nuneg Benjamin lata, ñimashib asha pōnrran’ cha, waminchippe na waminchib pasrai.

13 Nai papáwan eshkanrrigay cha Egipto pirau kerriguwan ashib na karub waigube chigurrimbunø kōn cha katø ñim kerrigu chi asiilanba. ¡Ñimbe mallatø amba!, yusrømay nai papáwan pera amrrunrrigay— chibig kōn.

14 Incha Josébe nui nuneg Benjamínwan ira pasramisra, kishen, katø Benjamín gucha treetøwei nuneg Joséwan ira pasramisra, kishibig kōn.

15 Incha Josébe nunelan muchawa, truba truba kishib irabig kōn. Inchen nunelane wamindamig wam larraibig kōn.

16 Inchen Faraón nø waig yausrømbe wam pubig kōn: “Josewei nunelø chab puin kōn” tan chib. Inchen Faraónba tru nui maramigwan marøb purrabelø nørreeløbabe kasraabelø kōn.

17 Incha Faraónbe Joséwane trenchibig kōn:

—Ñui nunelan Canaán pirausrømay nømui ushamerayu niisra amrrai karu cha.

18 Incha ñui mōskawanba ñui yau misaameranba naimay pera amrrunrrai. Nabe yu Egipto purø tab pirøwan tranamønrrun cha. Inchen nømbe i pirau purø tab mamiimera misriilan manrrun cha.

19 Katø ñibe nømune treeg karunrrig cha: “Yu Egipto pirau carretillas nørreelø weytøga sruilan srua ambingarü cha, nømui sralan kōben, ureemeran kōben ñui mōskawan kōben pera amrrumig.

20 Incha nømui chi tøgaguilan lelacha, amrrumig chi isumønrray cha, kaguende yu Egipto pirau purø tabiibe nømuin kōnrrun”— cha.

21 Inchen Israelwei nusrkaløbe treeg marøbelø kōn. Pøs Faraón maig karubera Josébe carretillas nørreelø weytøga sruilan pōnsrøb, mayuwei ishimera tranøb inchibig kōn.

22 Incha nømun kanun, kanun kemelø srøizhig kan, kan keta trana, Benjamínwane tsantsøn anmera trescientosba, katø yunømarøb kemelø tratrøgatøba keta tranøbig kōn.

²³ Incha nui mōskaweyasiibe iilan trana ørøbig kōn: Egipto pirau purø tabelø tøgaguilan pa trattø burrusmerayu niisra øriiløba, katø pa trattø cargas burramerayu tirigu niisra øriiløba, katø pirrimera kōben, mamiiamera kōben niisra ørøbig kōn, mōskai maywan mab arrumig.

²⁴ Incha yandø amrrai ørøbig kōn. Incha yandø webamba ambene, Josébe trenchibig kōn:

—Mayube chinetø, chinetø tiyab, kwayab amrrab kōmø— cha.

²⁵ Inchen nømbe Egipto piraugurri nebambub amba, Canaán pirausrø pubelø kōn, nōmui mōskai Jacob waisrø.

²⁶ Incha trusrø puabe, trenchiptinchibelø kōn:

—Josébe ka øsig wan cha. Egipto pirau muba kuimburab nø karub ashib wabig kuin kōmøh— cha.

Inchen Jacobwei manrrøbe pasram kwarøptinchibig kōn, kaguen nøbe kōremuig kua.

²⁷ Inchen nømbe José mandø tailan, mandø tailan chishtøh eshkaben, katø nōmun pera ambamig carretillas nørreelø weytøga sruilan trana øriilan ashib inchene, nune asrchiibe katøle chish misrøbig kōn.

²⁸ Incha Israelbe trenchibig kōn:

—Nai nusrkai José katøgucha øsig wabig kuin kui yandø tsabø ashar cha. Na kwamøwatø nabe ashchab yamønrrun— chibig kōn.

46

Jacob Nui Ureemeraba Egipto Pirausrø

¹ Incha Jacobpe mayeelø nøba warabeløba nui chi tøgaguiløbañau webya, yandø Beersebasrø puabe, truyu Jacobpe ushamera kweecha Isaac nui mōskawei Tiuswan trenøbig kōn.

² Inchen Tiusbe yem kan piab lataigu Israelwane trenchib waminchibig kōn:

—Jacob, Jacob— cha

—Inchene nøbe:

—Yu pasrar— chiben,

³ Tiusbe trenchibig kōn:

—Nabe Tius kur cha, tru ñui mōskawei. Tius. Egipto pirausrømay kōrrayamig chi korig isumøta cha. Nabe ñune ñigurri purø nørro misag sötømera kōnrrai maramønrrun cha trusrø.

⁴ Nabe ñiba Egiptosrømay kōrraarua, katø natøwei Egiptogurri werrunrrai maramønrrun cha. Incha ñi kwabene, Josebe nøashib nui taska ñui kammeran kasrønrrun— chibig kōn.

⁵ Incha yandø Jacob Beersebagurri webibene, Israelwei nusrkaløbe nōmui mōskai Jacobwan kōben, nōmui ureemeran kōben, nōmui sralan kōben, tru Faraøn amrrunrrai carretillas nørreelø weytøga sruilø trana øriiløyu amrrab nebambingarubelø kōn.

⁶ Incha katø Canaán pirau tøgamisriilø nōmui ushameran kōben, chine kōbelan kōben, tøga srua ambig kōbig kōn. Øyamay Jacob kerrigu nui yaeløba Egipto pirausrømay yaig kōn.

⁷ Nui nusrkalø kōben, nui nimbasrmera kōben, nui awelu ureemera kōben, nui awela ureemera kōben mayeelø nuinukkurri amrrub misaamera nøba ambig kōn.

⁸ Tru israelitasmera Egipto pirau kebambubelai munchimerabe iilø kōn, tru Jacob nuinukkurri amrrub misameraba:

Rubén Jacobwei mayur nusrkai.

⁹ Katø trugurri Rubenwei nusrkaløbe iilø køn: Hanoc køben, Falu køben, Hezrón køben, Carmí købengue.

¹⁰ Inchen Simeónwei nusrkaløbe Jemuel køben, Jamin køben, Ohad køben, Jaquin køben, Zohar køben, katø kan Canaánsrø isheweí nusrkai Saúl købengue.

¹¹ Inchen Leviwei nusrkaløbe iilø køn: Gersón køben, Coat køben, Merari købengue.

¹² Inchen Judáwei nusrkaløbe iilø køn: Er køben, Onán køben, Sela køben, Fares køben, Zera købengue. (Inchendø Erbaba Onánbabe Canaán pirausrøndø kwaig købig køn). Inchen Fareswei nusrkaløbe Ezrónba Hamulba kuig køn.

¹³ Inchen Isacarwei nusrkaløbe iilø kuig køn: Tola køben Fúva køben Job køben, Simrón købengue.

¹⁴ Inchen Zabolónwei nusrkaløbe iilø køn: Sered køben, Elón køben, Jahleel købengue.

¹⁵ Truilø kuig køn tru Padan-aramsrø warab uras Lea Jacobwei tøgagui nusrkalø, katø tru Dina nui nimbasrba. Inchawei truyugurri amrrub misaamera møguelan køben, ishumburmeran køben munchene kerrigube treinta y tres kuig køn.

¹⁶ Inchen Gadwei nusrkaløbe iilø køn: Zifión køben, Hagui køben, Ezbón køben, Suni køben, Eri køben, Arodi køben, Areli købengue.

¹⁷ Inchen Aserwei nusrkaløbe iilø køn: Imna køben, Isva køben, Isvi køben, Beria køben, katø nòmui nuchag Sera taikkuchague. Inchen tru Beriai nusrkaløbe iilø køn: Heber køben, Malquiel købengue.

¹⁸ Iilø kuig køn tru Zilpa Jacobwei tøgagui nusrkalø. Tru Zilpabe karuindiig mendig megabig kuig køn, tru Laban nui nimbasr Lean keta trani ishug. Tru Zilpainukkurri amrrub ureemerabe kerrigube dieciséis kuig køn.

¹⁹ Inchen Jacobwei srai Raquelwei nusrkaløbe iilø køn: Joséba, Benjamínba.

²⁰ Inchen Joséwei nusrkalø Azenatba tøgagui ureemerabe iilø køn: Manasésba, Efrainba Egipto pirau kal-lawar. Tru Azenatbe Onsrø sacerdote Pötiferai nimbasr kuig køn.

²¹ Inchen Benjamínwei nusrkaløbe iilø køn: Bela køben, Bequer køben, Asbel køben, Gera køben, Naamán køben, Ehi køben, Ros køben, Mupim køben, Hupim køben, Ard købengue.

²² Iilø køn tru Jacobweimba Raquelweinukkurrimba amrrub ureemera kerrigube catorcegue.

²³ Inchen Danwei nusrkaimbe Husin taig køn.

²⁴ Inchen Neftaliwei nusrkaløbe iilø køn: Jahzeel køben, Guni køben, Jezer køben, Silem købengue.

²⁵ Iilø køn tru Bilha Jacobpa tøgagui ureemera. Tru Bilhabe karuindiig mendig megabig kuig køn, tru Laban nui nimbasr Raquelwan keta trani ishug. Inchen tru Bilhainukkurri amrrub ureemerabe kerrigu trattro y par kuig køn.

²⁶ Inchen mayeelø Jacobpa Egipto pirau nuikkurri amrrub misaamerabe pubeløbe sesenta y seis kuig køn, nui aniyugurri ureemera nusrkalai sralan munchimuben.

²⁷ Inchen Joséwei ureemerabe pagatø kuig køn, Egipto pirau kal-lawar. Inchawei Jacobwei yau misaamerabe Egiptosrømbe setenta puig købig køn.

²⁸ Incha Jacobpe Judámerrig Joséweisrø merrab punrrai ørøbig køn, Joséwan eshkaben Gosénsrø nun katønrrab attrai. Incha Gosén pirausrø chab pubelø køn.

²⁹ Inchen Josébe nui møskawan utønrrab yamig niga luløb kaullimera sruigwan tamara, Israel nui møskawan Gosénsrø utønrrab webibig køn. Incha møskawan ashippe, naashiburab ira, pasramisra, truba truba yana kishibig køn.

³⁰ Inchen Israelbe Joséwane trenchibig køn:

—Møimbe ñun na ashib asha, ñi øsig ka wabig kuin kui wetørrawabe, nabe chi isumø, ka kwamønrrun— cha.

³¹ Incha Josébe nui nunelanba nui møskawei yau misaameranba trenchibig køn:

—Na Faraónwan ashchab inrrab inchar cha, nun wammøørskønrrab: “Nai nuneløba, nai møskawei yau misaameraba Canaán pirausrø warabeløbe naba kørømisra warønrrab amrrun chinrrab”.

³² Pøs nømbe ubisha ashibelø waara karrøgøbelø treelø køn chinrrab. Incha nømui ubishameran køben, waarameran køben chigurrimbunø nøm tøgaguilø køben srua amrrun” cha.

³³ Inchawei Faraón ñimun wama: “¿Ñimbe chi marøbelø køgue?” cha payene,

³⁴ ñimbe øya lötønrrigay chibig køn: “Nam ñui karuiløbe matsøreg ureemera kurri møingatig nam lata, namui kølli misamera lata waara karrøgøbelø ker” cha. Trumaybe ñimbe Gosén pirau warønrrabguen chibig køn. kaguende egipciomerabe ubisha ashibelane purø trømbøig kui inchibelø køn cha.

47

¹ Inchen Josébe Faraónwan wammøørskønrrab yabe, trenchibig køn:

—Nai møskaimba, nai nuneløba Canaán pirausrøngurri amrruin køn cha, nømui ubishamera køben, cabrasmera køben, nømui waaramera køben, nømui chi tøgaguilø kerriguba. Incha yandø Gosén pirausrøn chab puaguen køn— cha.

² Incha Goséngurri attraptø trattrøgatø nui nunelan lawa wesrua, Faraónwei merrab pera arrubig køn, ‘nai nunelø køn’ cha eshkanrrab.

³ Inchen Faraónbe trencha payibig køn:

—¿Ñimbe chi marøbelø køgue?— cha.

Inchen nømbe Faraónwan trenchibelø køn:

—Nam ñui karuig melabeløbe ubishamera køben cabrasmera køben karrøgøbelø treelø ker cha, namui merrabsrø møskalø laitaiøwei.—

⁴ Incha katø trenchibelø køn:

—Nambe i pirau kan maya yanatø warønrrab amrruer cha, kaguende nam ñui karuig melabelai ubishameraimbe Canaán pirau nam waraisrømbe chi pu kaagøn cha. Trusrømbe parøbe ni chindamguchagaig pasran cha. Inchagurri nam ñui karuig melabelan tiusmanda Gosén pirau namun warøbashibsrømøgue chinrrab inder— cha.

⁵ Inchene Faraónbe Joséwan trenchibig køn:

—Ñui møskaimba, ñui nuneløba ñiba warønrrab amrruin køn cha.

⁶ Egipto pirøbe ñi asha maramig ñuin tasku pasran cha. Mas purø tab pirau warønrrai war chibig køn, tru Gosén pirau. Egipto pirau truipe purø tab pirø køn cha. Truyu warønrrab kørømisrtrain cha. Truilai utu purø tab asha martraptø møguelø købene, truilan nai ushameran nøm ashib tøgagønrrai nømun pønrsø— chibig køn.

⁷ Trugurri Josébe nui mōskai Jacobwangucha pera ya, Faraónwan, 'iibe nai mōskain kōn' cha eshkabig kōn. Inchen Jacobpe Faraónwan 'mayanguen tabig nebuig kōnrrig' chibig kōn.

⁸ Inchen Faraónbe Jacobwan trencha payibig kōn:

—¿Mam pila tōgaig kugu?— cha.

⁹ Inchen Jacobpe Faraónwan trenchibig kōn:

—Na amburab, iburab lllirab uniibe pilamera ciento treinta kōn cha. Na øsig uniibe menrra yam pilamera kōmøwei, katø murig kuig kōn cha. Tru nai kōlli misaamera nōm lllirab amønain pilamerababe trugatig nebumum kōtan. —cha.

¹⁰ Incha Jacobpe Faraónwan mayanguen tabig nebuig kōnrrig chib, truyugurri ungua cha ibig kōn.

¹¹ Inchen Josébe Egipto pirau purø tab pirømeran tranøbig kōn, truyu warønrrai, Faraón maig karuig, treekke. Treekkurri nui mōskaimba nui nuneløba Ramesés pirau, pirømera tōgaguig kōbig kōn.

¹² Incha katø Josébe nui mōskawanba, nui nunelanba, nui mōskawei yau misaameranba nui karuig peraguilanba mamiimera mab kōmig pōnsrøbig kōn, nōmun kanun, kanun maig paløben, treekke.

José Mandø Asha Maramig Køben Trumay Marøb

¹³ Yandø muba pirø kuimburab chigucha mamig chigaaben, trune parøbe chindamdiig køben, Egipto pirau lata, Canaán pirau lata parø arrubigu yandø misaamerabe kwamitø palabig kōn.

¹⁴ Inchen Josébe tru Egipto pirau misaameraba, Canaánsreeløba tirigu penab pagarai anmeran kerrigu tulisha, tru anwane Faraónwei tab yau esegabig kōn.

¹⁵ Inchen yandø Egipto pirau lata, Canaán pirau lata chigucha anga patsøben, maya egipcimerabe Joséweimay amrrua trenchibelø kōn:

—Namun ñi mamiimera pōnsrørra cha. ¿Namgan ñui merrab kwamig kuitarru? cha, namun kerrigu an patsinukkurrindø.

¹⁶ Inchen Josébe trenchibig kōn:

—Ñimun an chab patsøbene, ñimui ushameran tranay cha. Nabe tru ushameraba yunømarøb ñimune tirigu tranamønrrun cha.

¹⁷ Inchen egipciosmerabe nōmui ushameran srua amrrubelø kōn; kaullimera køben, ubishamera køben, cabrasmera køben, burrumera køben, waramera køben. Incha tru ushameraba yunømara, tru pilawan mamiimera tranøbig kōn.

¹⁸ Inchen tru pila puraiben, wendø pilayu nōmbe amrruabe, trenchibelø kōn:

—Namune an patsøben, namune ni chinchaguen sōramgaatan cha, kōrrømisrmøtø, an patsøtan cha, ñun eshkaig kōn cha. Yandø namui ushameragucha ñuindø misren, nambe chigøben tranamibe chigar misrer cha, namui pirømerabah, katø nambe ka pønrraiteelø pønrrer cha.

¹⁹ Namui pirømerabañau ¿ñigan nam kwanrrai kōnrraindeh? cha. Ñi namunba, namui pirømeranba penørray cha, mamiiba yunømariilø kōnrrai. Tru maybe nambe namui pirømerabañau nambe Faraónwei misra karuindeelø melamønrrun cha. Inchendø yellmera nam mamig køben, ellguamelø køben, trannrra cha, nam øsig waramig kōnrraimbe, katø pirømeragucha lelatsiilø pønrrømønrrai.—

20 Inchen Josébe Egipto pirømeran kerrigu Faraónweyasig penabig kòn, kaguende egipcioomerabe tru parø arrubikkurri nòmui pirømeran yanen. Inchagurri pirømerabe kerriguba Faraónwei tasku purayaig kòbig kòn.

21 Incha egipciosmerabe Egipto pirau muba kuimburab nòmbe ka karuindeelø melønnrab melamisrig kòbig kòn.

22 Inchen pirømera peniimeelø kòrrømisrøppe, sacerdotemeraindøh peniimeelø, ka kòrrømisrig kòn, kaguende nòmbe Faraónweinukkurri mamig tranilø utabelø kuig kua. Inchagurri nòmbe nòmui pirømeran yanmuig kòbig kòn, nòmbe Faraón pønsraigwan mabelø kua.

23 Incha Josébe misaameran trenchibig kòn:

—Møimbe ñimba ñimui pirømerababe Faraónweyelø kòn cha, nabe nuyasig penig kòn cha. Ñimbe yu yellmera tøgagøn cha, pirømeran ellmaray chibig kòn.

24 Incha yandø ellmarig tulisamig pubene, tru cienyugurri veinte tarømarøb tulisai gwane Faraónwan tranrrigay cha. Inchen truyugurri kòrrømisrøbigwane tramerayu tsuramiba, katø ñimba, ñimui ureemeraba, ñimui yau misaameraba, katø mayeelø ñimba warabeløba mab kòmig kònnrain—cha.

25 Inchen nòmbe trenchibelø kòn:

—Ñibe nam øsig warønrrai martan cha. Nø yangucha tab indigwan nambe uta tøgä pønrrer cha. Nambe Faraón karuindø melabelø kòmønrrun—chibelø kòn.

26 Incha Josebe øyeeg marøb kòmig wesrawa pasrig kòn, ellmarigu misriilan tru cien caryugurri veintebatø wesruigwane Faraónwein kònrrai treeg marig kòn, tru mõi kwalømgaaig. Inchen Sacerdotesmerai pirømeratøh Faraónwei kòrrømisrømuig kòbig kòn.

27 Øyamay israelitasmerabe Egipto pirau warønrrab kòrrømisrig kuig kòn, Gosén pirau. Incha nòmbe truyu pirømera merrarrowa waramisra, nòmbe truyube werøg nørø tøgagua, larrø nu misrig kòn.

28 Incha Jacobpe Egipto pirau pilamera dieciete tsuig kòn. Inchen kerrigu Jacob nø øsig tsuin kwalømmmerabe pilamera ciento cuarenta y siete kuig kòn.

29 Israel øsig tsum kwalømmmeraba yandø patsønrrab køben, nui nusrkai Joséwan wamønrrab ørabe, trenchibig kòn:

—Na ñuin kabyu tabig asønaig kuinabene, tiusmanda ñui tasigwan nai srøptsim umbu estsar cha. Treeg marøppe na maig miaigwane trunune martrunrrig cha undaatøga. Incha nan purø nu lastima ashib, martrab kòrrømisrigwane martrunrrig chibig kòn. Tiusmanda nane Egiptosrømbe sørømmørrunrrig chibig kòn.

30 Incha na nai møskaløba israb tsumisrene, Egiptogurrimbe srua ya, nòmun esegawa wariinuutøwei wairrunrrig—chibig kòn.

Inchen Josébe trenchibig kòn:

—Ñi maig taigwan nabe treeg maramønrrun—cha.

31 Inchen Israelbe trenchibig kòn:

—¡Katø! Marmø kømø, maramønrrun' chirra—cha.

Inchen Josébe:

—¡Katø! Marmø kømø, maramønrrun—chibig kòn.

Inchen Israelbe nui pøtønaig tsig pala utsøbasrøptinchibig kòn.

48

Manaseswanba Efrainwanba Jacob Mayanguen Tabig Kønrrai Tranøb

¹ Indig kan maya yanayugøsrøn Joséwane trenchibelø kòn:

—Ñui mōskaimbe kwanrrø tsun— cha.

Inchen Josébe nui mōskawan ashchab ippe, nui pagatø nuskalø Manas-
eswanba, Efraínwanba pera ibig kōn.

² Inchen Jacobwane eshkabelø kōn:

—Ñui nusrkai José ñun ashchab pun— cha. Inchen nōbe ke kaimatøzhig
kōbendø, truba tranrra, camayu kurra, wamisra,

³ Joséwan trenchibig kōn:

—Maramburab Marøb Tiusbe Canaán pirau Luz ciudayu kenamisra, nane
mayanguen tabigwan trana,

⁴ Øyeeg cha kōrrømisrig kōn cha: “Nabe ñune ureg purø nōrrø tøgagōnrrai
marøb, misag sötømera purø nōrrø kōnrrai maramōnrrun cha. Incha nabe
ñuinukkurri amrrub misaamerane i pirōwan tranen, managatig i pirøbe
nōmuin kōnrrun” taig kōn cha.

⁵ Na ñiba tsunrab arrunwōwatø, ñui pagatø nusrkalø yu Egipto pirau
kal-lawa ureemera tru Efraínba, Manasesbabe nai ureemera misran cha,
Rubénba, Simeónba naielø kōb lataitøwei.

⁶ Inchen ñi tru wendau ureemera tøgagui nusrkaløbe ñuielø kōnrrun cha.
Incha nōmbe Efraínweimba, Manasesweimba nunelø kuig kōppe, truilai
munchiyu pirø ketig utōnrrun cha

⁷ Nabe Padan Aramgurri katøle arrub megaben, ñui usri Raquelbe kwaig
kōbig kōn cha, Efrata ciudayu pumig ke lamøtø paløben. Inchen nabe Efrata
may menda sørig kōn cha. Truibe tru Belén kuinrrre.—

⁸ Incha Israelbe Joséwei nusrkalan ashiptinchabe, payibig kōn:

—ǰiløbe mumera kōh?— cha.

⁹ Inchene Josebe trenchibig kōn:

—Iiløbe nai nusrkalø kōn cha, nan yu Egipto pirau Tius keta traniilø.—

Inchen Israelbe trenchibig kōn:

—Naimay kemalingaru cha, na purø tab indigwan tranrrab— cha.

¹⁰ Israelbe yandø purø kōllizhig kuig kua, yandø nui kabzheeløbe tōr
pilømuben, tab ashchab kaimabig kōbig kōn. Inchen Josebe nui ureemeran
nui mōskaweim pulu kemalsrøben, nōbe muchab, irab inchibig kōn.

¹¹ Inchabe Israelbe Joséwan trenchibig kōn:

—Nabe ñun asamuitamappe isumuig kōn cha. Inchendø Tiusbe nane ñui
ureemeranbagen asamig kōnrrai martan— cha.

¹² Inchen Josébe uregwan nui mōskawei srøb utøyugurri tarømarøppa, kap-
paløwan pirausrø kebatamnegatig utsøbasrøbig kōn

¹³ Incha Josébe nui pa nusrkalan Efraínwane nui kusrmay tasiitøga, Manas-
eswane nui atsitøga kemøra mōskawei pulu pōnsrøbig kōn. Tru øyamay Efraínbe
Israelwei atsimaygatømay pasramisren, Manasesbe kusrmaygatømay pas-
ramisrøbig kōn.

¹⁴ Treeg pōnsrainðgucha Israelbe nui kwalmeran ambumay imay
yunømarøppa nui kusrmay tasi gwane Efraínwei turbala estsarøbig kōn,
wendø nusrkain kuindøgucha. Nui atsimay tasi gwane Manaseswei turbala
estsarøbig kōn, truibe mayur nusrkain kuindøgucha.

¹⁵ Incha Joséwane i wammeratøga maya nugen tabiitø, tabiitø nebuig
kōnrrai øyeeg chib tranøbig kōn:

—Nai mōskalø Abrahamba, Isaacba nui merrab amønai Tius, tru nan kal-
lainukkurri mōingatig nan chi kōmōnrrai ashib tōga pasrab, katø na muba
yamigwan esh kab pasrab Tius,

16 tru nan chine kaig pubigugurri wesrub Ángel i pagatø matsøreg-
ureemeran maya nuguen tabiitø nebuig kønrai martrunrrig chib. In-
cha iiløgurri nai munchiba, nai mōskalø Abrahamweimba Isaacweimba
munchimerabe pønrrabig pønrrønrrun cha. Nømbe pirau nørø karrab purø
nørø larrøbitchai.

17 Inchen Josebe nui mōskaimbe nui kusrmay tasigwan Efraínwei tur-
bala estsari ashabe, tab kømui inçhibig køn. Incha mōskawei tasigwan
Efraínwei turbalagurrimba Manaseswei turbalagurrimba yunømara, estsar-
traí inçhibig køn.

18 Incha Josébe mōskawane trenchibig køn:

—Øyan kømøtø cha, iig køn cha, mayurbe iigweimbala ñui kusrmay tasig-
wan estsar— cha.

19 Inchen mōskaimbe treeg marmønrrab trenchibig køn:

—Ashar cha, nai nusrkai, ashar cha. Manaseskucha misag nørø
larrøbitchabiitøwein køn cha, katø nøgucha larrø nuitøwein kønrrabig kua.
Inchendø wendø nuneebe nø lataikken sötømera kønrrun— cha.

20 Incha tru kwaløm Jacobpe mayanguen tabiitø nebuig kømigwan øyah
chib tranøbig køn:

—Israel misaamera mayanguen tabig nebuig kømigwan nøm tranøppe,
ñimui munciwan wamab tōga pønrrønrrun cha: “Efraínwanba, Manaséswanba
lataitøwei, Tius ñimun treeg martrain”— chib. Incha Manaséswan wendau
pasra, Efraínwan merrab pasrig køn.

21 Incha trugurri Israelbe Joséwan trenchibig køn:

—Nabe yandø kwanrrainchar cha. Inchendø Tiusbe ñimba pasrøwa, nøbe
ñimune ñimui mōskalai pirømerasømay katøle amrrai martrun chibig køn.

22 Incha nabe ñui nunelan lataguen kømø, ñibe purab nuig kuikkurri
Siquén pirøwan, amorreosmeraba na truba truba nai espadatøgaba, nai
arcotøgaba kwayawa tøgaguim pirøwan tranar— cha.

49

Jacob Nurskaleimburab Wendøsrø Maig Pub Attrabigw An Waminchib

1 Jacobpe nui nusrkalan wama trenchibig køn:

—Tulaambay cha. Nabe wendø kwalømmerawansrø ñimun maig purainrra-
giban eshkanrrab inchar cha.

2 Kemalay cha, mørtrab, Jacobwei nusrkalø. Møray cha, ñimui mōskai Israel
wamindigwan.

3 Ñi, Ruben, nai mayur nusrkai, na unøtø misag larrø chishig kua ke
srøtø tøgaguig unø, tabig kui asig kømiguba, katø chi maramig nuig kømiguba
ñimerrig køn cha.

4 Ñibe kan pimera kōramdiig latøgushib amrrubig lataig, mōimbe yandø ñi
mayurbe maskucha nuibe kømønrrabguen cha. Kaguende nai kamayu nai
sraimba trømbøig mara, ñui trag mōskawei kamawan, kaig kuig lataig mara
kørrømarig køn cha.

5 Simeónba Leví babe nunelø køben, nømui espadamerabe ka kwayab misag
kweechib tøgagømiitø køn cha.

6 Nøm chigøben kaig martrab waminchib kuigu na truyu pasrønrrab
kømøwei, nøm nørø tuliambinug na linchab kømøwein kur, nai isubig-
wan na chishig tøgaguigwan mindisaig kømønrrab. Kaguende nømbe larrø
namikkøleelø pønrrøwa, misagwan kweecha petab, mørøkkømbiitø ke ka-
gatø, toromerai chambesølmeran para petig køn.

7 Larrø tsag inchib namig kurriiba, nømui namikkøbigu lastimagaig trømbøig mariibabe larrø trømbøig nebuig købash cha.Nabe Jacobwei piraugurrimbe ke nuinguindø misrtraï mara, Israel pirau ke truørø amba warønrrai maramønrrun.

8 Ñi Judábe ñui nunelø chi tamgaig, katø tabig wamindig kønrrabguen. Ñui ashig kømui inchibelane ñi kanawa tøgagønrrun. Inchen ñui trag nuneløguen ñui merrappe utsøbasrtrun.

9 Inchen ñi, nai nusrkai Judábe, kan matsinø leon lataig, nø kemørigwan chab mabe, kan køli leon lataig pirau purø møg ashib tsumisrøptinchibig lataig køn. ¿Nune mugui kebacha ashchautah?

10 Judáwane nui karub srua wain Pørtsigwane kerraig kønrramøn, katø nui karub tøgaguin pørtsigwan lata tru nui srøb utøyugurri, tru cierton rey arrumnegatig. Truiwane yu pirau pirø muba kuimnburab maya misaaba nune mørig kønrrabig køn.

11 Judabe nui burrunne uvas tusryu lichippe, llug lamø burru unøzhigwane purø tab tusr srølyu licha pasran. Nui kewa kuigwane vinotøga tsarøppe, nui pala itø kewa kuigwane uvas anim piyu tsaran.

12 Nui kammerabe vino lataguen kømø, mas yaløbigøzheelø køn. Inchen nui trugulmerabe pitsø lataguen kømø, mas puløzheelø køn.

13 Inchen Zabolónweinukkurri amrrub misaamerabe mar mendawan warønrrabelø køben, truyube barcosmera chi isumgaig pub lliramig kønrrabig køn. Inchen nui linderosmerabe Sidonsrøngatig lulrrabelø køn.

14 Isacarbe kan burru larrø murig lataig køn, kan muba webya yamga tul—unøyu keerig pigaya tsub lataig.

15 Tru muba webya yamga tul-unøbe larrø tabig, pirøbe larrø chull asamdø pirø køb, katø pishindø tab tsumdiig køb køben, nøbe karga niga inrrab lligwan kegucha, ka karuindø megabig misrig køn.

16 Inchen Danbe nui misaameran maig kønrrabigwan asha martrabig køn. Israelwei tru doce nusrkalai misag sötømerayu kan møikkøsrøn lataitøwei.

17 Danbe kan may menda tsub ul lataig køn, tsachippe kwetchab tsachib ul may menda tsubig lataig, kaullin chiñimerayu tsacha, itøguana wabigwan wendømay palasig kebinab kutsingarubig.”

18 “Jehová, ñi kaiyugurri wesraig kømigwan muniirar!”

19 Gadwane kaig marøb misag sötømera amrrua melambub kwayaindøgucha, nøbe mendautø pasraørøb ya, kwayanrrun.

20 “Aserbe larrø may mamiimera mabig kønrrun. Incha nøbe reywei mamiimera lataig manrrai pønrsønrrun.

21 Neftalíbe kan ishug panzhig chi iløsrkaimíig uñibig lataig køn, larrø tab pan-ureezheelø peraig.

22 “Inchen Josébe kan larrø may utiguitsin tusr lataig køn, may utiguichib pi menda pasrab lataig. Tsiurøzheelø nebib ibiibe tru pirøbanrrimerasrø nebib ib lataig.

23 Nune arcostøga kwayabeløbe, lastimaguengaig flechasmeratøga søl ørøb, kwayam laben,

24 nø srua pasrai arcone chigucha kullaaramø srua pasraig køn, tru Jacobwei maramburab marøb kwalmeragurri. ¡Mayanguen ungua ungua tru Jacobwei Mugucha Chindamga Tiuswan. Truikkurrin køn, tru Ubisha Ashibig, tru Israelwei kan peña lataig.

25 ¡Mayanguen ungua ungua ñui møskawei Tius ñun purugubigwan! ¡Mayanguen ungua ungua Maramburab Marøb Tius ñun mayanguen

tabig nebuig kónrrai marøbigwan! ¡Mayanguen tabig nebuig kónrrai Srømbalarøngurri arrubiitøga! ¡Mayanguen tabig nebuig kónrrai maryu purø umbusrøngurri arrubiitøga! Pitsø mutsøsrøb tøgagøb katø usrai patsau tøgagøb indingurri mayanguen tabig nebuig kónrrai arrubiitøgaba.

²⁶ Nui mōskaimbe tru maya nuguen tabig nebuig kōmigwan ñun tranøppe, nai mōskalø tru maya nuguen tabig nebuig kōmigwan nan trani lataitøguen kōmø tranig kōn; managatig tru pōnrrab tunmerasrøngatig. Tru iig mayanguen tabig nebuig kónrrai traniiløbe, Joséwei turbala kónrrain kōn, nui nunelai utugurri tru lawa wesruigweinug.

²⁷ Inchen Benjamínbe kan larrø namig lobo lataig kōn, lōtsøbe nui kemøra mamigwan ma, maabene unchibelan pirishibig.”

²⁸ Iilø kōn tru Jacobwei doce nusrkaløgurri misag nōrrø sōtø amrrubelø, tru nōmunba, katø nuikkurri amrrub misaameranba wendøsrø nōmun kanun kanun maig pub attrabigwan eshkawa pasrig kuig kōn.

Jacob Kwaig

²⁹ Incha katø Jacobpe øya eshkawa pasrøbig kōn:

–Nabe nai misaameraba tsunrrab yamig yandø lutau kōtan cha, nai kōlli misaameraimbulu sōrørrunrrig chibig cha, tru heteo Efronwein pirau peña trab pasrabigu,

³⁰ tru Mamre pinrøguesø Macpela pirau peña trab lalig pasrabigu Canaán pirausrø, Abraham tru Efron hititan peninug nui yau misaameran kwaben, sōrab kōmig nōmui pasrønrrai.

³¹ Truyube Abrahamwanba, nui srai Saranba sōrab, katø Isaacwanba nui srai Rebecanba sōrab indig kōn. Katø nagucha Lean truyu sōrig kuig kōn.

³² Pøs tru pirøwanba tru peña trab lalig pasrabigwanbabe, Hititasmeran penig kuig kōn.—

³³ Incha Jacob mandø marøb kōmigwan chab waminchabe, katøle kamayu tsumisra, neesrappe, kwaptinchibig kōn. Incha merrabsrø nōmui mōskaløba isrønrrab t sumisrig kōn.

50

¹ Inchen Josébe nui mōskawei asrwan ira, kishib muchabig kōn.

² Incha Josébe tru mō marøbelø nun purugub pōnrrabelan nui mōskawei asrwan minchib irrøramønrrai mō marøb tamarøngarubig kōn. Inchen tru mō marøbeløbe treeg marøbelø kōn.

³ Tru treeg tamarøb kōmibe kwalømmæra cuarenta nemisramne kōbig kōn. Inchen egipciosmerabe kwalømmæra setenta nemisramne isub kishibelø kōn.

⁴ Inchen yandø tru isub kism kwalømmæra patsøben, Josébe Faraon karub wainug purrab misaameran trenchibig kōn:

–Ñim truyu purrabelai merrab ñim nan tab indamdiig kuinabene, tius-manda Faráonwan trenchirrunrrigay cha:

⁵ “Nai mōskaimbe nō kwamøwatø, øyee Swan marmø kōmø, ¡katø! nane maramønrrun tingaruig kōn cha: ‘Canaan pirausrø sōramig nō ashib tamarig pasrabigu, nun trusrø sōramig kónrrai.’ Inchawei nai mōskawan trusrø sōrønrrab ibashcha” tan chinrrigay cha, nabe katø arrumønrrun— cha.

⁶ Inchene Faraónbe trenchibig kōn:

–Ñui mōskai øyee Swan marmø kōmø, ¡Katø! Martrurrunrrig cha trendaig-wan ñi treeg martrab misrig kōbene, trube, sōrønrrab inrø— cha.

7 Inchen Josébe mōskawan sōrōnrrab nebiben, Faraonwan tru nō karub waigu purugub purabelō nōrrō kōlli misaameraba, katō Egipto pirau nōrrō kōlli misaameraba, nune linchibelō kōn.

8 Katō Joséwei yau misaamera mayamba, katō nui nunelō kōben, mōskawei yau misaamera kōben, nebambubelō kōn. Gosén piraube nōmui ureemeranbah, ubishameranbah, cabrameranba, waarameranbahtō kōrrōmara.

9 Incha nōbabe kauuli sruin karretillamerayu suldaamera kōben, suldaamera kauuli palār kōben tsimaytō lincha nebambubelō kōn, misag purō nōrrōgue.

10 Incha Atat taigwei tirigu itsiisrō, tru Jordan pi pulusrō puabe, tsusrōmbe mayangucha nu isub kishib treeg marōbelō kōn. Trusrōmbe Josébe mōskainzhig yandō muga misren, tratrō y pa kwalōm isuin inchib kishibig kōn.

11 Inchen truigwan tru Canaán pirau warab misaamera ashabe, tru Atadwei tirigu chish marin tulyu truba truba isuig kishib kui ashabe, trenchibelō kōn:

—Egipciosmera ōyeekkatig kishib kuipe purō nuig kōrren — cha. Inchagurri tru Jordan pi ambōgatōmaysrōmbe Abel Mizraim cha wamig kōn. (Trenchippe: “Egipciosmera purō isui inchib puraambinug kōn” chib.)

12 Inchen Jacobwei nusrkalōbe nōmun maig martrai nō miaigwan treeg marōbelō kōn.

13 Nui nusrkalōbe Canaán pirausrōmay srua amba, Macpela pirau peñayu trab lalig pasrabigu sōrabelō kōn, tru Efron hititan Abraham pirōwanbañau peninug, nui yau misaameran sōrab tōgagōmig, tru Mamre pulusrō.

14 Yandō mōskawan chab sōrabe, Josébe Egiptomay katō nebarrubig kōn, nui nunelōba, katō maya misamera sōrōnrrab lincha amrrubelōba.

15 Inchen Joséwei nunelōbe mōskai kwaig yandō mugaabene, trunun isub mendabe, trenchibelō kōn:

—¿Josébe namune katōgucha namig isub srō unin kōnrrab kō chinderah cha, nam nun ōyeeg kalō marigwan trunun isua?—

16 Inchabe José waisrōmay trencha karua ōrōbelō kōn:

“Ñui mōskaimbe nō kwamōwatō, namune trencha karua pasrig kōn cha:

17 ‘Ñimbe Joséwan ōyeeg chinrrigay cha: Ñui nunelō yeeg kaig marōb, ñun kalō marigwan Tiusmanda ulō paymō pesannarrunrrig cha’ Inchawei mōimbe tiusmanda, nam ñui mōskawei Tius karuigwan marōb melabelōtōwein kuinaig kōbene tru trōmbōig kalō mariilane pesannarrunrrig” cha. Inchen ōyeeg wamindigwan mōrabe, Josébe kishibig kōn.

18 Inchen nunelōgucha Joséwei merrab chab pua, utsōbasrabe, trenchibelō kōn:

—Nambe ñi ka karuindiig melabelō kōnrrer— cha.

19 Inchene Josébe trenchibig kōn:

—Chi kōrig kui inchimōtay cha. ¿Nagan Tius nō marigwan na pasramisra marōb pasramuitarru? cha.

20 Ñimbe nane kaig martrab isua maren, trune Tiusbe tru kaig marigwane tabig punrrai yunōmaran cha, tru mōi nam ashīb pōnrraigwan martrab, misag nōrrō pasrabigwan ōsig tōgagōnrrab.

21 Inchawei ñimbe chi kōrig kui inchimōtay cha, nabe ñimunba, ñimui ureemeranba ashīb tōgagōmōnrrun— cha. Ōyamay nui manrraugurri undaatōga, chi isui inchimōnrrai waminchibig kōn.

²² Josébe nui mōskawei yau misaameraba Egipto pirau tsuig kōbig kōn. Nōbe pilamera ciento diezkatig øsig tsuig kōbig kōn.

²³ Incha Josébe Efrainwei katøburø awelu ureemeranguen nebua ashib, katø Manaséswei nusrkai tru Maquirwei ureemeranguen nai ureemeratøwein misran chib, srøbchagu mutab indig kuig kōn.

²⁴ Incha Josébe wendøsrø nui nunelan trenchibig kōn:

—Nane yandø kwamig lutau kōtan cha. Inchendø Tiusbe ñimune ashchab arrua, purugunrrun cha, Abrahamwanba, Isaacwanba Jacobwanba, ¡Katø! nabe tranmø kōmø, tranamønrrun cha kōrrømisrin pirausrømay ñimune i piraugurri pera inrrab kōn cha.—

²⁵ Incha Josébe Israelwei nusrkalan, ‘¡Katø! nambe treeg maramønrrun’ tingarubig kōn. Incha Josébe nōmun trenchibig kōn:

—Isa kōmø, Tiusbe ñimun ashchab arrua, purugunrrun cha. Treeg pubene, ñimbe nai tsutsiimerane yugurri srúa ambamig kōn— cha.

²⁶ Incha Josébe kwaig kōn pilamera ciento diez nemisren. Inchen nui asrwane minchib irrømønrrai mø marøb tamara, kan taulyu wayig kōn Egipto pirau.

Fin

San Mateo

Jesucristoi merrab misaamera (Lc 3.23-38)

¹ Iibe Jesucristoi merrabsrø misaamerai munchimera køn, tru David-weinukkurrimba, Abrahamweinukkurrimba amrrub misag.

² Abrahambe Isaacwei møskain køben;
Isaacbe Jacobwei møskain køben;
Jacobpe Judába, nui nunelaimba møskain købig køn.

³ Judábe Faresweimba, Zaraimba møskain køben, tru uregwei usrimbe Tamar købig køn.

Faresbe Esromwei møskain køben;
Esrombe Aramwei møskain købig køn.

⁴ Arambe Aminadabwei møskain køben;
Aminadabpe Naasónwei møskain købig køn.
Inchen Naasónbe Salmónwei møskaingue.

⁵ Salmónbe Boozwei møskain køben, nui usrimbe Rahab købig køn.
Boozbe Obedwei møskain køben, nui usrimbe Rut købig køn.

Obedbe Isaíwei møskain køben;
⁶ Isaíbe Davidwei møskain købig køn.

Inchen rey Davidba, Uríaswei srain købiibabe Salomónwei møskalø købig køn.

⁷ Salomónbe Roboamwei møskain køben;
Roboambe Abíaswei møskain køben;
Abíasbe Asaiwei møskain købig køn.

⁸ Inchen Asabe Josafatwei møskain køben;
Josafatbe Joramwei møskain køben;
Jorambe Uzíaswei møskain købig køn.

⁹ Uzíasbe Jotamwei møskain køben;
Jotambe Acazwei møskain køben;
Acazbe Ezequíaswei møskain købig køn.

¹⁰ Ezequíasbe Manaséswei møskain køben;
Manasésbe Amonwei møskain køben;
Amonbe Josíaswei møskain købig køn.

¹¹ Inchen Josíasbe Jeconíasweimba, nunelaimba møskain købig køn, tru israelitasmeran Babiloniamay merrarraawa srua ambub uras.

¹² Øyeeg chab srua amben, Jeconíasbe Salatielwei møskain køben;
Salatielbe Zorobabelwei møskain køben;

¹³ Zorobabelbe Abiudwei møskain køben;
Abiudbe Eliaquimwei møskain køben;
Eliaquimbe Azorwei møskain købig køn.

¹⁴ Azorbe Sadoewei møskain køben;
Sadoebe Aquimwei møskain købig køn.
Inchen Aquimbe Eliudwei møskaingue.

¹⁵ Inchen Eliudbe Eleazarwei møskain køben;
Eleazarbe Matánwei møskain køben;
Matánbe Jacobwei møskain køben;

¹⁶ Jacobpe Joséwei mōskain kōbig kōn. Inchen tru Josébe Maríai keg kōben, tru Mariagurri Jesús kal-laig kōbig kōn, tru Cristo taig.

¹⁷ Inchawei Abraham kōb uraskurri merrabsrō kōlli misaamerai uremera katōle srōig, srōig kurrab arrubig David kōb uraskatiibe catorce kōbig kōn. Inchen David kōb uraskurri tru israelitasmeran Babiloniamay merrarrawa srua ambub uraskatig katōgan catorce treetōwei katōle srōig, srōig misaamera kurrab arrig kōbig kōn. Incha tru israelitasmeran Babiloniamay srua ambub uraskurri tru Cristo kal-lamnēgatiibe misaamera katōgan catorce treetōwei kurrab arrig kōn.

*Jesucristo kal-laig
(Lc 2.1-7)*

¹⁸ Jesucristo kal-laibe ōyeeg kuig kōn: Maríai nui usrimbe Joséba kasharanrrab misra ūnen, Josébe kasharanrrab permōwatō Mariabe Espiritu Santogurri kwanrriig kenamisrōptinchibig kōn.

¹⁹ Inchen José tru nui keg kōnrrabiibe sōlgandō tabig kua, Maríane maya misagwei malau ‘ōyeeg kuin kōn’ chib kenamarmōnrrab, nuinetō nilōtō tarōmisrōptinchab isubig kōn.

²⁰ Nōbe treeg martrab chab isubguen inchen, Señorwei kan ángel piabyu kenamisrabe trenchibig kōn:

—José, ñi Davidwei misagugurri arrubig, Marían ñui srain kōnrrai utamigwan kōrig kui inchimōta cha. Kaguende tru unō tōgagōmibe Espiritu Santoin kōn cha.

²¹ Nōbe kan mōg-unō tōgagōben, truigwane Jesús munchi pasrtrig chibig kōn. Nōbe ōyeeg wamig kōnrrun chibig kōn, kaguende nui misagwan kaig mariilōyugurri wesranrrabig kuimba.—

²² Kerrigu ōyeeg pureppe, Tius maig karuigwan eshkabigwan Señor truigwan ōyah taig nebunrrai treeg kuig kōn:

²³ “Kan srusrō mu mōōbagucha kimīg kwanrriig kōrrōmisra, kan unō tōgagōnrrun taig. Truibe Emanuel cha wamig kōnrrun” cha, trenchibig kōn.

(Tru Emanuel munchibe “Tiusbe namba pasran” taig.)

²⁴ Incha José tru piabyugurri kiagasrabe, Señorwei ángel maig karuig kōben treeg mara, Maríane nui srain kōnrrai kōrrōmarōbig kōn.

²⁵ Incha Josébe Marían nui nusrkawan tōgagōmnēgatig keeba, sraimba lataig nōmui asrtōga chi marmuig kōn. Incha Josébe unane Jesús munchi pasrōbig kōn.

2

Pōrr kal-labgatōsreelō tru estrellameran ashib kusrebelō Jesúswan ashchab amrrub

¹ Jesúsbe Judea pirau Belén puebloyu kal-labig kōn. Herodes tru pirau rey kōb uras. Inchen tru uras pōrr kal-labgatōsrō kusreb mōguelō tru estrellameran ashib kusrebelō Jerusalén puabe,

² trenchib payibelō kōn:

—¿Judíosmerai tru rey kal-labiibe chu tsuh? cha. Kaguende nambre nui estrellan webarri asha, kōriibala nune tabig waminchab amrruer— cha.

³ Inchen rey Herodesbe trendaigwan mōrabe, ni mumaygucha kōmui inchibig kōn. Inchen katō Jerusalén misaamerangucha treetōweim pubig kōn.

⁴ Inchen reybe sacerdotemeran karubelanba, tru Moisés pørigwan kusre-
nanøbelanba wama, payibig køn:

—¿Cristobe chu kal-lanrrabig kø?— cha.

⁵ Inchen nømbe trenchibelø køn:

—Judea pirau Belén cha. Kaguende Tius maig karuigwan eshkabig øyah
pørig køn cha:

⁶ Judea pirau, ñi Belén pueblo-unøbe,
tru pirau purø wamindig ciudamerai utu
ñibe chigucha kømøzhig lataig kønrrab kømø,
purø nuig køn cha.

Kaguende ñuinukkurrimbe misagwan ashib karunrrabig kan webattrun cha,
nai Israel misagwan nø pera marøb ashib pasønrrabig.—

⁷ Inchen Herodesbe tru srømbalasrø estrellameran ashib kusrebelan mu
ashmøwatø wama, estrellabe tappe chu uras kenamisrigwan payibig køn.

⁸ Incha nømune Belénmay ørabe, trenchibig køn:

—Trusrømay amba, tru unaimburab tab payrrigay cha. Incha wetørrawabe,
eshkarrunrrigay cha, nagucha køriibala tabig waminchab inrrab— cha.

⁹ Tru kusrebeløbe rey øyeeg eshkailø ambubelø køn. Inchen estrella tru
pørr kal-labgatøsrø asiibe nømui merraptø ya, yandø tru unø tsuim pala
pasramisren,

¹⁰ tru kusreb møguelø estrellan ashabe, truba truba kasraabelø køn.

¹¹ Incha yau kebambabe, unamba, usri Maríanba ashabe, tømboñsra,
køriibala tabig wamincha, nømui ketamelan kura, oro køben, incienso køben,
mirra køben ketøbelø køn.

¹² Incha yandø nømune piabyu Herodesweimburab ammønrrain cha,
eshkailø kua, nømui pirausrømaybe peg maywan ambubelø køn.

Egiptosrømay trubab ambub

¹³ Yandø tru kusreb møguelø chab amben, Señorwei kan ángel Joséwan
piabyu kenamisrabe, trenchibig køn:

—Kurra, unan usranba perøb Egiptosrømay trubab inrrø cha. Incha trusrø
na eshkamnegatig kørromisrtrig cha. Kaguende Herodesbe unan kwetchab
lanrrab køn— cha.

¹⁴ Inchen Josébe kurra, unan usranba pera, yem Egiptosrømay webya, ya,

¹⁵ trusrø tru Herodes kwamnegatig waraig købig køn. Øyeeg nebuppe, Tius
maig karuigwan eshkabikkurri øyah taig, truig nebunrrain kuig køn: “Nai
Nusrkawan Egiptogurri wamar” taig.

Herodes uregwan kwetchai karub

¹⁶ Inchen Herodes nun tru kusreb møguelø isin kui mørabe, truba truba
nama, tru kusreb møguelø tru ureg chu uras kal-laigwan eshkaigwan,
trunun cuenta mara kal-laingurrimbunø pa pilagatiguelø Belén pøtøgatan
warabelan kerriguba kwetchain karubig køn.

¹⁷ Øyamay nebuig køn Tius maig karuigwan eshkabig Jeremías øyah pørig:

¹⁸ Ramá pueblosrø kan wam mørig køn cha.

Truibe kan truba truba isuig wamab kishib,
tru Raquel nui uregweimburab isua, kishibig køn.

Incha ‘kishmø, ka awentau’ taingucha, awentanrrab kaimabig køn cha,
kaguende yandø ureemera chab kwaikken køben.

Egiptogurri katø amrruig

¹⁹ Inchen yandø Herodes kwaben, Señorwei kan ángel Joséwan Egiptosrø piabyu kenamisra, trenchibig køn:

²⁰ –Kurra, unanba usranba pera, Israel pirausrømay katø inrrø cha. Kaguende unan kwetchab inchibeløbe yandø chab kwan– cha.

²¹ Inchen Josébe kurra, unanba usranba Israel pirausrømay pera, ibig køn.

²² Inchen Herodeswein cuentabe nui nusrkai Arquelau Judea pirau truig karub wan taig mørøppe, Josébe trusrømay yamig køriimatøben, Tius piabyu Judeasrømay imønrrai eshkaben, Galileasrømay ambig køn.

²³ Incha Josébe trusrø puabe, Nazaret pueblsø tsunrrab ibig køn. Iig øyeeg nebuppe, Tius maig karuigwan eshkað møguelø øyah taig nebunrrain kuig køn: “Jesúsbe nazaretsriig cha wamig kønrrun” taig.

3

Juan Bautista mu misag warab waraimønug eshkað kusrenanøð (Mc 1.1-8; Lc 3.1-9, 15-17; Jn 1.19-28)

¹ Tru kwalømmerawan Juan Bautista Judea pirau mu misag warab waraimønug

² trenchib eshkað kusrenanøð arrubig køn:

–Kaig mariilan isua møra, Tiusweimay lliray chib. Kaguende srømbalasrø Tius nø ashib karub waibe lutau pasran– cha.

³ Tru Tius maig karuigwan eshkað Isaiás øyah pørig Juanbe truig kuig køn: Kan wam mu misag warab waraimønug trenchib trasan, taig: “Señorwei maywan tamarøð, nuyasig maymerane ølmarøð inday,” chib.

⁴ Juan kewagúibe camello isiitøga marig købig køn. Inchen nui pørønaiðbe kaluswan marig køben, nui mamibe nørrø chapullba kaambu mielba købig køn.

⁵ Jerusalén misaameraba, mayeelø Judea pirau misaameraba, Jordán pi puluwaneløba nun mørtrab werrubelø køn.

⁶ Incha nømui kaig mariilan ‘kaig marig køn’ chib eshkaben, Juanbe truilan Jordán piyu piu umbu ulsrøbig køn.

⁷ Inchen Juanbe fariseosmera køben, saduceosmera køben, truba nørrø nø piu umbu ulsrailø kønrrab amrrui ashabe, trenchibig køn:

–¿Ñimbe ul lataig inchib misaamera! ¿Ñimune mu eshkata cha, Tiuswei purø kørig kømdiig ñimuim pala attrabig pub pasrabigugurri wegørrønrraimbe?

⁸ Ñimui kaig mariilan isua møra, Tiusweimay llirawar kuy, chibig køn, tørgandø asamdiig kønrrain cha.

⁹ Incha ñimbe ñimasiitø øyeeg chib mendømøtay cha: “Nabe Abrahamwei misaamera ker” chib. Kaguende nabe trendamønrrun cha: Tiusbe i sru-umeranguen Abrahamwei misaamera kønrrai marøg købene, martrun cha.

¹⁰ Katø walømbe tusrmeran srølba para øramig chabguen srølyu pasringuen pasran cha. Chi tusrwandøgucha tab mamig niimígwane para, nagu kegutsan cha.

¹¹ Nabe ñimune ciertonwei pi pinøbulrrai piu umbu ulsar cha, kaig mariilan isua møra, Tiusweimay llirain kønmab asamdiig kønrrai. Trune nai wendau arrubiibe si, Espíritu Santotøgaba, naatøgaba pinøbulrrun cha. Truibe si, na lataguen kømø, maramburab marøbig køben, nabe truburab kømíig kua, nui alpargatiswanguen srua inrrabgaig kur cha.

¹² Nøbe tirigun isig øra tarømartrab tru kala kutsamig tsig utigwan sruaugen pasran cha. Incha truyu tru tirigu chishmari yabaløwan kerrigu chab chishmarabe, tirigune tirigu esegainug esegappe, shauwane mana kwamø nagu patrun— chibig køn Juanbe.

Jesúswan piu umbu ulsrøb
(Mc 1.9-11; Lc 3.21-22)

¹³ Jesúsbe Galileasrøngurri Jordán piyumay arrubig køn, tru Juan uninu-umay nun piu umbu ulsrønrrai.

¹⁴ Srøtøbe Juanbe nune piu umbu ulsrøg kømui incha, trenchibig køn:

—Nane ñiguen treeg marig kømdiig købendø, ¿ñiguen nan attirru?— cha.

¹⁵ Inchen Jesúsbe trenchiptinchibig køn:

—Møibatøbe øyamay ka mar cha. Tius tru sølgandø tabig maramigwane nambe kutøgue øyamay maramig køn— cha.

Inchen Juanbe ka treeg marøbig køn.

¹⁶ Incha Juanbe Jesúswan piu umbu ulsrøben, piyugurri webibig køn. Inchen mømimbe srømbalabe kurøptinchen, Jesúsbe Tiuswei Espiritu nuim pala kan paloma lataig kørraarri ashibig køn.

¹⁷ Inchen srømbalasrøngurri kan wam trenchib waminchibig køn:

—Ibe nai Nusrkai undaaraig køn cha. Nabe nuimburab truba tab kui war— cha.

4

Satanás Jesúswan chinchibig køtashchab inchib
(Mc 1.12-13; Lc 4.1-13)

¹ Inchen Espiritu Santobe mu misag warab waraimøsrømay Jesúswan pera yaig køn, nugwaimandzig nun kebenøsrkønrrab inchai.

² Inchen cuarenta días yem kwaløm chigucha mamøwa, yandø parøgwai mørøbig køn.

³ Inchen tru kebenøsrkønrrab inchibiibe Jesúswan kemallabe, trenchibig køn:

—Isa kømø, tru ñi Tiuswei Nusrkain kuabe, i sruumeran pirri misringaru— cha.

⁴ Inchen Jesúsbe trencha løtabig køn:

—Tiuswei wamwan pørigube trenchibig køn cha: “Møøbe pirringøgatø øsig tsumøtø, kerrigu Tiuswei wamðøgagucha tsumig køn”— cha.

⁵ Incha nugwaimandziibe Jesúswan Jerusalén tru Tiusweindø tarømari ciudasrømay srua ya, tru Tiuswei yau purø palasrø pasrabe,

⁶ trenchibig køn:

—Isa kømø, tru ñi Tiuswei Nusrkain kuabe, pirausrø pørsrau cha. Kaguende Tiuswei wamyube trenchibig pørig pasran cha:

Tiusbe nui ángelesmeran ñun ashchai ørtrun chibig.

Incha ñui srøbwán sruugu srurrengwamønrrai

nømui tasiimeratøga ñun kusranrrun— chibig.

⁷ Inchen Jesúsbe trenchibig køn:

—Katø Tiuswei wamwan pørigube treekkucha chibig køn cha: “Ñui Señor Tiuswane ke chinchibig køtashchab lataikkucha maramig kømøn”— cha.

⁸ Katøbe nugwaimandziibe kan truba pala tunsrømay srua yabe, yu pirau chutøgucha nøreelø tru nøm ashib karub purrailanba, katø nømui chigurrimbunø tabig tørig tøgagúigwanba kenamarabe,

⁹ trenchibig køn:

—Iigwan nabe kerriguba tranrrumøn cha, ñi nan srala, kōriibala tabig waminchene.—

¹⁰ Inchene Jesúsbe trencha lōtabig kōn:

—¡Satanás, mōi mōi iptsu! cha. Kaguende Tiuswei wamwan pōrigube trenchibig kōn cha: “Señor ñui Tiuswandō kōriibala tabig waminchib, nuyasi-tō marōb megamig kōn”— cha.

¹¹ Inchen nugwaimandziibe nuinukkurri tarōmisren, ángelesmera amrrua, purugubelō kōn Jesúswan.

Jesús tru nui maramigwan Galilea pōlbasrōb

(Mc 1.14-15; Lc 4.14-15)

¹² Juan Bautistan kailan keeri yau keerin kōn taig Jesús wammōrabe, Galileamay ibig kōn.

¹³ Incha Nazaret puebloygurri webyabe, Capernaum pueblosrō pisu menda, Zabolónwei misag warainuuba, Neftaliwei misag warainuuba tru pirau tsunrrab ibig kōn.

¹⁴ Øyeeg nebuppe, Tius maig karuigwan eshkabig Isaiás øyah taig nebunrrain kuig kōn:

¹⁵ Zabolónwei misag warainuuba, Neftaliwei misag warainuuba tru pirau, Jordán pi ambōgatō tru nu pisugatōmaysrō, Galilea tru judío kōmeelō warainug,

¹⁶ misaamera lōstøyu warabelōbe kan truba tōrig asan chib.

Kwamig nōmuim pala itøgasraig lataig warabelō kōbelane kan tōrig kebilin kōn, chib pōrig.

¹⁷ Trugurrimbunō Jesúsbe eshkab kusrenanōb trenchibig kōn:

—Kaig mariilan isua mōra, Tiusweimay lliray cha. Srōmbalarō Tius nō ashib karub waibe lutau pasran— cha.

Jesús pibgatō peskabelan wamab

(Mc 1.16-20; Lc 5.1-11)

¹⁸ Jesús Galilea nu pisu mendawan ib pasrōwabe, pa nunelan ashibig kōn, kane Simón, truigwane katō Pedrogucha taig, kane Andrés taig. Truilōbe peskabelō kua, nōmui atarrayameran piyu keguchib warōben,

¹⁹ Jesúsbe trenchiptinchibig kōn:

—Nai mendig amrruy cha. Nabe ñimune misaameran peskabelō kōnrrai maramōnrrun— cha.

²⁰ Inchen tru urastō nōmbe nōmui atarrayasmeran warōb, nōba ambuptinchibelō kōn.

²¹ Incha Jesúsbe katøguchi mas ambuurō yabe, katōgan pa nunelō warai ashibig kōn, truilōbe Zebedeowei nusrkalō, Santiagoba, Juanba. Nōmbe nui mōskaimba barcoyu atarrayamera kōlsrailan tamarōb purrōbene, Jesúsbe tru nusrkalan wamabig kōn.

²² Inchen nōmbe tru urastō barconba, nōmui mōskawanba kōrrōmarōppa, Jesúswei mendig ambuptinchibelō kōn.

Misag truba nuwan Jesús kusrenanōb

(Lc 6.17-19)

²³ Jesúsbe Galilea pirau ørōba llirab ibig kōn, judíosmera tulundzuni yamōrig Tius nō ashib karub pasrainuguig tabig srō wamwan eshkab kusrenanōb. Incha misaameran chi kwanrreelan kōben, chi pusrkwailan kōben tamarōbig kōn.

²⁴ Jesúswane Siria pirausrø kerrigu wammøra kua, mayan kwanrreelan srua amrrubelø køn. Tru chi kwanrrø køben tøgarmèran, katø ni mumayguen tab kømui mørøb inçhibèlan, tru kwaimandziimera tøgarmèran køben, itønab pesannabig tøgarmèran køben, kønønrab kaimabelan køben srua amrrubelø køn. Inçhen Jesúsbe tamarøbig køn.

²⁵ Inçhen misaamera galileasreelø køben, decápolisreelø køben, jerusalénsreelø køben, judeasreelø køben, Jordán pi tru pørr kal-labgatøreelø køben Jesúswei mendigu truba nu ambubelø køn.

5

Jesús nu tunyu wamisra kusrenanøb wamindig

¹ Inça Jesúsbe misag truba truba nuwan ashabe, kan tun pala nebya wamisren, nui kusrenanøb pera uniilø kemallen,

² nøbe øyeeg chib kusrenanøb mendabig køn:

³ —Mayanguen tab kuilø køn cha, tru Tiusweimburabigwan ke kagømønrraindøzhig tøgaguermab isua palai mørøbelaimbe.

Kaguende srømbalasrø Tius nø ashib karub waibe nømuiwein køn cha.

⁴ Mayanguen tab kuilø køn cha, tru truba isuig kishibelaimbe.

Kaguende Tiusbe nømun chi isui inçhimønrrai tab købigwan tranrrun cha.

⁵ Mayanguen tab kuilø køn cha, tru larrø tammayelø lata inçhimeelaimbe.

Kaguende nømbe tru pirøwan Tius tranrrab misrigwan ketig utønrrun cha.

⁶ Mayanguen tab kuilø køn cha, tru sølgandø tabigwan kan parøgwaig mørøb lataig, pi mulgwaig mørøb lataig inçhibelaimbe.

Kaguende maig isua palai melaigwan Tiusbe nømun nørrø traniilø kønrrun cha.

⁷ Mayanguen tab kuilø køn cha, katøganelan lastima ashibelaimbe.

Kaguende nømungucha Tiusbe treetøwei lastima ashib tøgagønrrun cha.

⁸ Mayanguen tab kuilø køn cha, chi kaig isumø manrrømera chishig tøgärweimbe.

Kaguende nømbe Tiuswan ashchun cha.

⁹ Mayanguen tab kuilø køn cha, tru ambugurri igurri tab kømigwan lab marøbelaimbe.

Kaguende truilane Tiusbe ‘nai ureg køn’ chinrrun cha.

¹⁰ Mayanguen tab kuilø køn cha, tru Tius mandø martrai miaigwan marikkurri kaig martraindinab kaig nebui melabelaimbe.

Kaguende srømbalasrø Tius nø ashib karub waibe nømuiin køn cha.

¹¹ Nímbe mayanguen tab kuilø køn cha, nagurrindø misaamera tsalø waminab, kaig marinab, katø ñimun chine, chine isa wamindinab melabelaimbe.

¹² Pøs truba kasraarab tab kui møray cha. Kaguende srømbalasrømbe truba truba nuig ketig utamig tøgagønrrun cha. Nínguen kømøwatøsrøwei tru Tius maig karuigwan eshkabelan øyeetøwei kaig marig købig køn cha, trenchibig køn Jesúsbe.

Tiuswei ureebe yu pirau treba, tørba lataig køn

(Mc 9.50; Lc 14.34-35)

¹³ Nímbe yu pirau tre latalilø køn. Inçhendø yandø tre larrmíig misrabe, ¿katøbe inçhina kui larrøbig misriasamø? Yandø mas chiweingucha larrmíig misrene, wambig petøben, misaamerabe itøbunan, chibig køn.

14 'Ñimbe yu piraueलयasig tər latalilø køn. Kan ciudama tun palasrø pasrabiibe trubønrrab kaiman cha.

15 Katø kan aceite lámparan chigucha piløgøppe, køtsø umbu pasrtrab piløgømøn cha. Treeg kømøtø, masken pala pasrene, mayeelan yau purralbelan pilan chibig køn.

16 Øyeetøwei ñimgucha misaamerai merrab ñimui tər pilønrrai inday chibig køn, ñimui tabig mariilan asha, nømbe ñimui Møkai srømbalasrø wabigwan truba tabig waminchain cha.

Maig maramigwan martrai Moisés pørigwan Jesús kusrenanøb

17 'Nabe arruppe, maig maramigwan martrai Moisés pørigwanba, Tius maig karuigwan eshkabelø kusrenaniilanba na patsøgønrrab arritamab isumøtay chibig køn. Nabe treeg kømøtø, arruppe, tru Moisés pørigu maig chibig køben, trunun newan mara kørrømartrab arrig køn.

18 Pøs nabe ñimun cierton trendamønrrun: Srømbalaba, pirøba pønrrøbenbatøbe, tru maig maramigwan martrai Moisés pørigu maya lamøzhig pørig pønrrabeløguen pinappe, purainrraamøn cha, kerrigu tru pørigu maig taig nebumnegatig.

19 Inchawei møikkøben tru maig maramigwan martrai Moisés pøriiløyu karua pønrsrailan møigu køben maya lamøzhigwandøguen kalø marøb, katø misagwan treetøwei kalø martrai kusrenanøbiibe srømbalasrø Tius nø ashib karub waisrømbe truipe purø lamíg kui asig køn taig kønrrun. Trune møikkøben martrai karua pønrsrailan marøb, katø treetøwei martrai kusrenanøbiibe, truipe si, srømbalasrø Tius nø ashib karub waisrømbe nuig kui asig kønrrun cha.

20 'Inchawei nabe ñimune eshkar: Ñimui sølgandø marigwan tru Moisés pørigwan kusrenanøbeløba, fariseosmeraba marøb pønrrai latalitøguen kømø, katøguchi tabig marmuisruandøbe, srømbalasrø Tius nø ashib karub waisrømbe managuen kebamrraamøn cha.

*Trømbøig namiguelø kømumigwan Jesús kusrenanøb
(Lc 12.57-59)*

21 'Ñimbe mørøbelø kuinrrun ñimui merrabsreelane trendaigwan: "Kweechimøta cha. Møikkøben kweechibiibe kaigyu pasrønrrai pasrig kønrrun" cha.

22 Trune nabe trendamønrrun: Møikkøben nui nunewan namig kørrømisrøbiibe kaigyu pasrønrrai pasrig kønrrun cha. Nunewan tsalø wamabigwane tru Setenteelø maig maramigwan asha marøbelø asha marig kønrrun cha. Inchen møikkøben nunewan trømbøig inçhib: "Larrø kaig chugúi mørmíg køn" chib wamabiibe, tru kwamø nagu møra melamnug kegutsig kømigwan lab pasran cha.

23 'Inchawei ñi Tiuswei tranamigwan altaryumay srua arrua, ñui nunewan ñi chigøben kaig mara tøgagúigwan ñi isuptinchabe,

24 tru ñi Tiuswan tranamigwan altaryu pasrøppa, ñui nuneeba tab kørrømisramigwanmerrig lanrrab yamig køn. Trugurrimbe si, altaryumay arrua, ñui tranamigwan tranø.

25 'Møikkøben ñun kejawa, juezweimay merranene, tru kejabiiba mayu ib pasrappatø, tammay kørrømisrkun cha, petø wamindam lau, tru juezwei tasku tranmønrraimbe. Inchippa juezbe policíameran tranen, truiløbe ñun kailan keeri yau kegutsinamønrrappe.

26 Pøs nabe ñimun cierton trendamønrrun: Truyugurri webinrrappe, maig pagaramigwan chishtø pagarawatøwei webinrrabguen cha.

Kasharawaig itøulumumigwan Jesús waminchib

27 'Merrabsrø øyah taigwan ñimbe mørøbelø kuinrrun: "Møikkøben kasharawaig købendø, peg ishuuba itøulumig kømøn", taigwan.

28 Trune nabe trendamønrrun: Møikkøben kan ishuwan trømbøig mar-trab isub chull ashibiibe nui manrraube yandø chabguen itøulug lataig kørrømisran cha.

29 'Inchawei treekkurri ñui kusrmay kab kaig maringarua, kaigu ñun kebenørkøbene, wesrua, kuchi chibig køn. Trembe ñui asru kanbaløtø palab misrikken chi kømønrrun cha, tru møra melamnug asr ørøba kegutsig købgunriibe.

30 Ñui kusrmay tasig kaig maringarua, kaigu ñun kebenørkøbene, tasig-wane para, kuchi, chibig køn. Trembe ñui asru kanbaløtø palabikken chi kømønrrun cha, tru møra melamnug asr ørøba kegutsig købgunriibe.

Kasharawar petiyamumigwan Jesús waminchib

(Mt 19.9; Mc 10.11-12; Lc 16.18)

31 'Katø merrabsrømbe trendaig købig køn: "Møikkøben nui srawan kucha, tarømisrtrappe, kan kilga tarømisrtrab chibig mara, nun purøramig køn" cha.

32 Trune nabe trendamønrrun: Mu møtøgucha nui srai, itøulumubendø, srawan kucha, tarømisrøbiibe, nui srawane itøululøb uñchai maran cha. Inchen mu møtøgucha kan tarømisra ishuuba kasharabiibe nøgucha treetøwei itøululan cha.

Isa waminchimumigwan Jesús kusrenanøb

33 'Katø ñimbe møriinrrun ñimui merrabsreelan øyah tailan 'Señorwei merrab, ¡katø! marmø kømø, nabe maramønrrun' cha kørrømisrigwane waminditø kømø, maramig køn taigwan.

34 Inchendø nabe ñimun trendamønrrun: '¡katø! marmø kømø, nabe maramønrrun' chib mumaygucha ke treeg chimøtay cha. Srømbalawei merrab pasramisra '¡katø! marmø kømø, nabe maramønrrun' chimøtay cha. Kagunde srømbalabe Tius nø wamisra waig køn cha.

35 Katø ñimbe pirøwei merrab pasramisra, '¡katø! marmø kømø, nabe maramønrrun' chimøtay cha. Kagunde pirøbe Tius itøbuna waig køn cha. Ni katø Jerusalénwei merrab chigucha treeg maramig kømøn. Kagunde truiibe Tius, tru purø nu Reywei ciuda køn.

36 Ni katø ñimui turwan '¡katø! marmø kømø, nabe maramønrrun' chimøtay chibig køn. Kagunde ñimbe pusrugwan ni kandøguen पुलिग martrab kaimabwei, ni kandøguen yaliig martrab kaimabwei inchen cha.

37 Inchen ñimbe martrappe: "Øø" tamig køn. Inchen marmønrrappe: "Ka" tamig køn. Pøs yandø i trendaigugurri mas nemarøb, '¡katø! marmø kømø, nabe maramønrrun' taibe nugwaimandzigweinukkurri arrubig køn.

Kaig inchen lata marmumigwan Jesús kusrenanøb

(Lc 6.29-30)

38 'Katø ñimbe merrabsrø trendaigwan mørøbelø kuinrrun: "Katøganui kabwan mindishibigwane nuin kabwangucha mindisamig køn", taigwan. "Katøganui trugulwan lanchibigwane nuin trugulwangucha landamig køn", taigwan.

39 Trune nabe trendamønrrun: Møikkøben ñun kaig marene, lata inchimøta cha. Treeg kømøtø, møikkøben ñun kusrmay maløbøtø pashene, kandarømayigwangucha yul cha.

40 Møikkøben kejawa kewagúigwan kerranrrab inchene, turiwangucha srua ibasingaru cha.

41 Møikkøben ñun nama, kan kilómetro chigøben niguingarubene, trube, pa kilómetro nig cha.

42 Inchen møikkøben ñun chi miabigwane tranø cha. Møikkøben 'peberra' cha, miabene, 'ka' chimø, peb cha.

Ashig kòmui inçhibelan undaaramigwan Jesús waminçhib
(Lc 6.27-28, 32-36)

43 Ñimbe katø merrabsrø trendaigwan mørig kuinrrun: “Ñui tab linçhibigwane isua, undaaramig køn chippe. Ñun tsaliigwane ashig kòmui indamig køn”, taigwan.

44 Trune nabe ñimun trendamønrrun: Ñimun ashig kòmui inçhibelane undaaray cha. Inchen ñimun kaig martrabgøba inçhibelaimbe nømuyasig Tiusba wamindamig køn cha.

45 Treeg marabe, ñimbe Møskai srømbalasrø wabigwei ureg kønrrabguen. Kaguende nøma nui nøsigwan kailaim pala lata, tabelaim pala lata pørr patingarub, katø sølgandø tabig marøbelaim pala lata, chi sølgandø tabig marmeelaim pala lata sre punrrai ørøb inçhibig køn cha.

46 Kaguende ñimun undaarabelandø undaarawabe, ¿truburøbe chigúi utønrrague? ¿Romasreelayasig an utabeløguen treetøweimbe marøbelø kòmuitarru?

47 Inchen ñimui nunelandø tab wamabiibe, ¿chigúi srøig peg marig kønrrautah? Kaguende ¿Tiuswan ashmeelø tru judíos kømø misaameraguen treetøweimbe marøbelø kòmuitarru?

48 Ñimbe sølgandø newan tabelø kuy, ñimui Møskai srømbalasrø wabig newan tabig køb lataitøweingue.

6

Tabig maramigwan Jesús kusrenanøb

1 Ñimui tabig mariilan misaamerai malau marmøtay, misaamera ka ashchaindø lataig. Ñim treeg marene, ñimui Møskai srømbalasrø wabiibe chigucha truburøbe tranrraamøn.

2 Inçhawei palai inçhibelan ñi puruguppe, mayeelø wammøtrai waminçhib kenamarmøta. Tru palatø tab inçhibelø latawei judíosmera tulundzuni yamerayu, callesmerayu misaamera nømun tabig waminçhai marøbelø lataig marmøta. Kaguende nabe ñimun cierton trendamønrrun: Yandø treeg marøbeløbe nømui truburø ketig utamigwane utabguen indan cha.

3 Inchen palai inçhibelan ñi puruguppe, ñui kusrmay tasig marigwane atsimag tasig asha kønrrai marmøta.

4 Inchen ñi mun kenamarmøtø mariilan Tius ñui Møskai ashibiibe ñun truburø ketamigwan ketrun.

Tiusba mandø wamindamigwan Jesús kusrenanøb
(Lc 11.2-4)

5 Ñim Tiusba waminçhib pønrrappe, tru palatø tab inçhibelø lataig kòmøtay. Truiløma judíosmera tulundzuni yamerayu køben, plazayu ya tsøbmerasrøn køben pønrramisra, Tiusba wamindamig chullelø køn, misaamera ashçhai. Nabe ñimun cierton trendamønrrun: Nømun misaamera tabig waminðiibe, truipe truburø ketig çhabguen utabguen indan cha.

6 Trune ñibe Tiusba waminçhappe, ñui kwartuyu kebya, yaskabwan kasra, ñui Møskai Tiusba waminçhi cha, mu asiimíig truyu ñibatø pasrabigwan.

Inchen ñi mun kenamarmõtø marigwan Tius ñui Møskai ashibiibe ñun truburø ketamigwan kettrun.

⁷ Tiusba waminchib pasrappe, trunundø katøle, katøle ka yandø wama mørmøta, judíos kømeeleø latawei. Kaguende truiløbe truba truba waminchene, Tiusbe katøguchingen mørtraitamab isubelø køn.

⁸ Ñimbe nøm lataløwein kømøtay. Kaguende ñimui Møskai Tiusbe ñim miamøwatø ñimui chi palai indigwane chab ashaguen wan.

⁹ Ñimbe Tiusba waminchib pønrrappe, øyah chinrrigay: Namui Møskai srømbalasrø wabig, ñui munchibe tabigweindø tarømara, newan tab indig kønrrun.

¹⁰ Ñi ashib karub pasraibe pirau larrøbitchab amø, srømbalasrø latawei yu piraugucha, ñi maig maramdiig køben, treegwei marig kønrrai.

¹¹ Kwalømmørig nam mamig maig palabigwan mõi tranøb,

¹² namui kaig mariilan ulø paymø, pesannarrunrig chib, nam namun kaig marøbelan ulø paymø, pesannawa kørrømisrøb latalitøwei.

¹³ Chigøben namun kegørrøsrkønrraptiig pønrrøbene, truwane namun ambashmørrunrig. Masken tru kaigweinukkurrimbe tarømartra. Kaguende, tru ashib karub waiba, maramburab mariiba, purø nuig, purø tabiibabe managatig ñuin køn chib.

¹⁴ Kaguende katøganelø ñimun kaig maren, truilan ñim ulø paymø, ñim pesannabene, ñimui Møskai srømbalasrø wabikkucha ñimun ulø payamigwan paymønrrun cha.

¹⁵ Inchen katøganelan ñim pesannamø, ulø payene, ñimui Møskai srømbalasrø wabikkucha pesannamø, ñimui kaig mariilan ulø payrrun chibig køn Jesúsbe.

Ayunamigwan Jesús kusrenanøb

¹⁶ Ñim ayunappe, malømera kwa isuig lataig misrmøtay. Tru palatø tab inchibeløma malømerabe kwa isuig lataliø kenamarøbelø køn, misaamera nømbe ayunab kui ashchai. Treeløwein kønrrab kømø. Pøs nabe ñimun cierton trendamønrrun: Yandø nømun misaamera tabig wamindiibe, truike truburø keti lataig chabguen utabguen indan cha.

¹⁷ Inchen ñibe ayunappe, maløwan kwalla, pusrugwan tabig tamar cha,

¹⁸ misaamerabe ñun ayunab wain kønmab ashmønrrai. Ñüinetø marigwan ñui Møskai ashib pasraibiibe trunun asha, nøbe ñune truburø tranamigwan tranrrun chibig køn.

Srømbalasrø chigurrimbunø pønrrabig

(Lc 12.33-34)

¹⁹ Yu pirau chine, chine tulishimøtay, pullillamera mab, trerawa pinab, nileelø kebamba nilab indinug.

²⁰ Trembe srømbalasrøwei tøgamisrøb tulisay, pullilla mamøwei, trerawa pinømøwei, nileelø nilønrrab kebammøwei indinug.

²¹ Kaguende ñimui chi tøgagüilø chu esegaig pønrrøbene, ñimui manrrøgucha ke truyutø isub pasrønrrun cha.

Kabmerabe asrwei lámpara køn

(Lc 11.34-36)

²² 'Asru kappe kan lámpara køn cha. Inchawei ñui kab tabig købene, ñui asrube kerriguba tørsulu kønrrun.

²³ Inchen ñui kab kaig kòbene, ñui asrube kerriguba lèstiiig kòrrun. Inchawei tru tór ñuinug pasrabikken lèstiiig kòbene, tru lèstiiibe mas maig lèstògòlig kerah chibig kòn Jesúsbe.

*Mòigwanmerrig mas isua tógagòmig
(Lc 16.13)*

²⁴ 'Nun karunrrabelò muguen pagatòbe tógagòrrab kaimanrrun. Kaguende kanune tsalò ashippe, kanune undaanrrun cha. Kanune chiyugucha truba tab mòròb megappe, kanune kaashib webinrrun cha. Inchawei Tiusweimburabigu maròb pasròrrab isumba, anweimburabigu maròb pasròrrab isumba inchibiibe martrab kaimanrrun cha, pabalòbabe.

*Tiusbe nui uregwan ashibig kòn
(Lc 12.22-31)*

²⁵ 'Inchawei nabe ñimun trendamòrrun: Øsig amònamig, ñim mamigwanba, mutsamigwanba, asru chi kemermab isumigwanba menrra isumòtay cha. Øsig amònamikkan kan mamig lataitò kuitarru cha. Kabe asrkan kan asru keelò lataitò kuitarru cha.

²⁶ Pala amòñibelò illimeran asay chibig kòn. Ellguamòwei, ellmarig tulishimòwei, ellmarig tulisaiawan esegainug esegamòwei inchibelanguen, truilanma ñimui Mòskai sròmbalasrò wabiibe manrrai mannòbig kòn cha. ¿Ñimbe illimera lataguen kòmò, maselò kòmòtirru? chibig kòn.

²⁷ ¿Ñim mòilògòben maya, maya incha katògan tòbò metrotòguen nurab-sruguh? cha.

²⁸ ¿Chindimbarre ñimbe asru keegwan truba truba isubelò kògue? cha. Wambig umeranma asay chibig kòn. Kwallmòwei, kumòwei inchibelò kòbendò, tabig nòrròran cha.

²⁹ Inchendò nabe trendamòrrun: Rey Salomónguen nui chine purò tabzhig tógagua, umera lata tabzhiibe kemuig kòn cha.

³⁰ Wambig kaumera, mò ka pòrròwa, srònabe nagu parrig kòrrabigwanguen Tiusbe øyeeg tabzhig kenanòb lataig maròbiibe, ñimune treetòguen kòmòtò, masken marmòrraitarru cha, ñim ya ñimui isubigwan Tiusweinug pasra ke kagòmòrraindòzhig tògarwan.

³¹ Inchawei øyeeg chib chi isumòtay chibig kòn: “¿Chi mamer?” chib; “¿Chi mutsamer?” chib; “¿Chi kemer?” chib.

³² Kaguende tru Tiuswan ashmeelò judíos kòmò misaamerabe iigwandò isub labelò kòn. Inchen ñimui Mòskai sròmbalasrò wabiibe ñimui chi palabelan ashaguen wabig kòn.

³³ Inchawei Tius nò ashib karub wainuguigwanba, katò tru sòlgandò tabigwanba, truilanmerrig lab maramig kòn. Trumaybe tru katògan chi palabelangucha ñimbe nemarig kerrigu utòrrun.

³⁴ Inchawei sròna kwalòmweyigwane chi isumòtay. Kaguende sròna kwalòmweyigwane sròna isumig nòòrò kòn. Kaguende kwalòmmerig chi pub arrubiitò tsabò kòn isumibe.

7

*Katòganelan 'øyeelò, øyeelò kòn' chimòtay
(Lc 6.37-38, 41-42)*

¹ 'Ñimbe katòganelan 'øyeeg, øyeeg maròbelò kòn' chib waminchimòtay, ñimungucha 'øyeelò kòn' tainamòrrappe.

² Ñim katøganelan ‘øyeelø, øyeelø køn’ chib wamindiibe, ñimungucha treetøwei martrun. Ñim kanelan maig unaasha traniibe, ñimungucha treetøwei unaasha tranrrun.

³ ¿Chindimbarre ñui nunewan kabyu shauzhig wabigwangøba ashku cha, tru ñuin kabyu nu tsig wabigwanguen ashmubendøbe?

⁴ Inchawei ñitøweinguen ñuin kabyu nu tsigwan ashmubendøbe, ñui nunewane chinchø øyeeg chinragu: “Nai nuneg, ¿ñuin kabyu shauzhig wabigwan wesrarruah?” cha.

⁵ Ñi, palatø tabig, ñuin kabyu nu tsig wabigwanmerrig wesru chibig køn. Treenchabe si, ñui nunewein kabyu shauzhig wabigwan wesrumig tab ashchabguen cha.

⁶ Chigøben Tiusweindø tarømarigwane werameran tranmøtay. Katø ñimui perlasmerane kuchimeran kebusrmøtay, inchipa truilan itølula, llirawa, amrrua, kurmillustøga kwanaguchib ñimun pitis marinamønrrappe.

Tiuswan miab, nun lab, katø yaskabu wamab inday
(Lc 11.9-13; 6.31)

⁷ ‘Miabene, Tiusbe ñimune tranrrun. Lawabe, wetørranrrun. Yaskabu wamubene, ñimune kurtrun.

⁸ Kaguende mugucha miabiibe utøben, labiibe wetørraben, yaskabu wamabigwane kurtrun.

⁹ ‘Kabe ñimma møikkøben ñui nusrkai pirri miabene, kabe, ¿kan pillisrugwan tranøbsruguh?

¹⁰ Kabe kan peskau miabene, ¿kan ulwan tranøbsruguh?

¹¹ Pøš ñimma ya kailø købenguen ñimui uregwane tabig keta tranøbelø køben, kan mas ñimui Møskai srømbalasø wabiibe nun miabelane, maig tabig tranrrer chibig køn.

¹² ‘Inchawei ñimma katøganelø ñimuyasig tabig maramig palai inchi-beløbe, ñimungucha katøganelan treetøwei maray chibig køn. Kaguende maig maramigwan martrai Moisés pørigu lata, Tius maig karuigwan eshkabelø pøriiløyu lata iigwanwei martrai karubig køn.

Trag yaskappa, lendø yaskappa
(Lc 13.24)

¹³ ‘Trag yaskabwan kebambay chibig køn. Kaguende tru kan lendø yaskappa, tru lendø maybabe managuen werrumikkaig kegørra pønrramsrømay pera ibig køben, truwane si, møiløgøben truba nu kebamban cha.

¹⁴ Inchen tru trag yaskappa, trag mayba managuen patsømmø øsig purram-srømay pera ibiibe, truiløbe traguelø, trurrigu murelø køben, trunun wetørrabeløbe mamdø køn chibig køn.

Tusrbe mamikkurri asamdiig køn
(Lc 6.43-44)

¹⁵ ‘Tab asha kuy, chibig køn, ‘Tius maig karuigwan eshkabelø ker’ chibelø isa waminchibelan, ñimuiimay kan ubisha lataig amrrubendø, nømui umbube kan namig lobosmera latailø køn cha.

¹⁶ Trune ñimbe nømui maig mariiløyuøguen tsabø ashchun, tusryu mamig niguigwan latawei. Kaguende kal tusryugurrima uvas lurrmøwei, katø kaldø misrøb tusryugurri yashig lurrmøwei indan.

¹⁷ Inchawei kan tab tusrbe tab mamig niguen. Trune kan kaig tusrbe kaig mamitøwei nigan cha.

¹⁸ Inchawei kan tab tusrbe kaig mamig niirrab kaimabwei, katø kan kaig tusrbe tab mamig niirrab kaimabwei indan cha.

¹⁹ Inchawei chi tusrwandøgucha tab mamig niimígwane para, nagu kegut-san.

²⁰ Inchawei nømui mariiløyu ñimbe ashchabguen chibig køn.

*Tius nø ashib karub waisrømbe mayeeløba kømøtø kebamrrun
(Lc 13.25-27)*

²¹ 'Nan: "Señor, Señor" chibelø srømbalasrø Tius nø ashib karub waisrømbe mayeeløba kømøtø kebamrrun. Treeg kømøtø, nai Møskai srømbalasrø wabig maig maringaruben, trunun marøbeløtøwei kebamrrun.

²² Tru srabe kwalømbe nane mõiløgøben truba nu trenchinrrun: "Señor, Señor, yamba nambe ñui munchiyu ñi maig karuigwan eshka, ñui munchiyu kwaimandziimeran webetab, ñui munchiyu maramburab mariilan marig købig køn" cha.

²³ Inchene nabe trendamønrrun: "Managuen nabe ñimune ashmíg kur cha. Ñim larrø kaig marøbeløbe, nainukkurri tarømisray" cha.

*Pailø ya marøbelan kemesra wamindig
(Mc 1.22; Lc 6.47-49)*

²⁴ 'Møikkøben na wamindigwan mørøb, na maig taigwan møra marøbigwane kan møg tab isua marøbig lataig køn chinrrab. Nui yawan srug pala marøbig lataikke.

²⁵ Sre pub, pimera nurab, yawan isig megambub itsingucha, yabe peñmøn cha, kaguen srug pala marig pasrøwa.

²⁶ Inchen nan mørøppe, mørendø, na maig taigwan marmígwane, kan møg tab isua marmíg lataig køn tamønrrun cha, nui yawan pisrum palatø marøbig lataikke.

²⁷ Sre puben, pimera nuraben, yawan isig megambub ichen, yabe peña, purø isumdiig mindisaig kørrømisran— cha, trenchibig køn Jesúsbe.

²⁸ Inchen Jesús ilan Kerrigu chab waminchen, maya misaaba kwaara asha kørrømisrøbelø køn øyeeeg kusrenaniilan.

²⁹ Kaguende nøbe kusrenanøppe, nuinukurrindøwei mu mandamgaig kusrenanøbig køn, tru Moisés pørigwan nømui kusrenanøbelø lata kømø.

8

*Asr trerab kwanrrø tøgagigwan Jesús tamarøb
(Mc 1.40-45; Lc 5.12-16)*

¹ Yandø Jesús tun palasrøngurri kørraaruben, misag truba nu mendig amrrubelø køn.

² Inchene kan møg asr trerab kwanrrø, lepra taig, tøgagig kemallippa, Jesúswei merrab tømønrsabe trenchibig køn:

—Señor, nan ñi tamaramdiig købene, tamartra— cha.

³ Inchen Jesúsbe tasigwan larrøbicha estsarabe, trenchibig køn:

—Tamarøg køtan cha. Tamarig kørrømisr— cha.

Inchen tru urastø nui trerab kwanrrøbe chishig kørrømisren,

⁴ Jesúsbe trenchibig køn:

—Au, mungøben eshkawabesin cha. Inchendø ya, ñui asrwan sacerdotendø kenamara, katø Tiusweyasig tru Moisés tranrrig taigwane srua ya, tranrrig cha, mayeeløba ñui kwanrrøwan chishig kørrømisrin kui ashchain— cha.

Suldau sətəwan nə karub pera pasrabigwei mendig megabigwan Jesús tamarəb

(Lc 7.1-10; Jn 4.43-54)

⁵ Yandə Jesús Capernaumsrə kebibene, romanosmerai suldau cienelan ashibig, kan centurión taig, nuimay arruabe, nun purugurra chib,

⁶ trenchibig kən:

– Señor, nai mendig megabiibe yau kwanrrə tsun cha, truba truba pusrkwai inchib, kerrigu kənərrab kaimaig.—

⁷ Inchene Jesúsbe trenchibig kən:

– Nabe arrua, tamaramərrun— cha.

⁸ Inchen tru centuriónbe trenchibig kən:

– Señor, ñi nai yau kebattraimbe, nabe trengatig kəmuinatan cha. Tammisr cha, treetə chirra cha. Nai karuindiig megabiibe tammisrtrun cha.

⁹ Kaguende nagucha mas nərreelə karuig kur cha. Katə treeg kəben na karub təgagüilə suldaumera təgagur cha. Truilanma na məigwan kəben: “Inrrə” chibene, ib; katə na məigwan kəben: “Amə” chibene, arrub; katə nai karuindiig megabigwan chigəben: “Mar” chibene, marəb inchibig kən— cha.

¹⁰ Jesús iigwan mərə, kwaara asha kərrəmisrabe, nui mendig amrrubelan trenchibig kən:

– Nabe ñimun cierton trendamərrun: Israelsrə məigweinukken isubigwan nainug pasra təgagüig əyangatig nuig wetərramur cha, i məwei lataig.

¹¹ Incha nabe ñimune trendamərrun chibig kən: Pərr kal-labgatəsrəngurrin kəben, pərr kebibgatəsrəngurrin kəben truba nu amrrua, Abrahamba, Isaacha, Jacobpa manrrab purramisrtrun cha, srəmbalasrə Tius nə ashib karub waisrə.

¹² Trune Tius nə ashib karub waisrə purrərrab ureemerabe wambig purə trəmbə ləstəyu webusriilə kənrrun cha. Truyube kishib, trugulmeran tsatsamig kənrrun— cha.

¹³ Incha Jesúsbe tru centuriónwan trenchibig kən:

– Yamay inrrə cha. Ñi maig kəreig treeg kənrrun— cha.

Inchen tru urastə tru mendig megabiibe tammisrig kən.

Jesús Pedroi sueeran tamarəb

(Mc 1.29-31; Lc 4.38-39)

¹⁴ Jesús Pedroi yamay arrua, kebyabe, Pedroi sueerabe camayu pachiiba tsui ashibig kən.

¹⁵ Incha Jesúsbe tru ishuwei tasigwan katərabene, pachiibe weetaptinchen, nəbe kurra, tru pubelayasig chi maramigwan marəb mendabig kən.

Kwanrreelə truba nərrəwan Jesús tamarəb

(Mc 1.32-34; Lc 4.40-41)

¹⁶ Yandə yem misren Jesúsweimay truba yamelan kwaimandzig təgarwan misaabe srua amrruben, kan wamitəgatə tru kwaimandziimeran webetab, katə chi kwanrrə kəben təgarwan mayeelan tamarəbig kən.

¹⁷ Əyeeg pureppe, Tius maig karuigwan eshkabig Isaías əyah taig nebunrain kuig kən:

Nətəwei namui pusrkwabelanba,

namui kwanrrəmeranba kerran, taig.

Jesucristoi mendig ambamibe murig kən

(Lc 9.57-62)

¹⁸ Jesúsbe nuin pətəgatan misaamera truba nu tulsrui kui ashabe, nui kusrenanəb pera uniilane pisu ambəgatəməysrə larramrrai karubig kən.

19 Inchen tru maig maramigwan martrai Moisés pørigwan kan kusrenanøbig kemallabe trenchibig køn:

—Kusrennøbig, ñi chu ibendø, nabe mendig arrumønrnun— cha.

20 Inchene Jesúsbe trencha løtabig køn:

—Zorramerabe waramig trab tøgagøben, katø pala amøñib illimeragucha nømui lemera tøgær køn cha. Trune na, Møg Misra Arrubiibe ni nai turwan chu nerrarramikken chigaig kur— cha.

21 Inchen katøgan møikkøsrøn, Jesúswan mendig uñibiibe, trenchibig køn:

—Señor, nai møskawan sørønrrabmerrig ibashcha— cha.

22 Inchene Jesúsbe trenchibig køn:

—Ñibe nai wendau amø cha. Tiusweimburabigu kwaig lataløbe nømui kwailan sørøbash— cha.

Jesús isig ichibigwanba, pi latøgushibigwanba kønøbashmub

(Mc 4.35-41; Lc 8.22-25)

23 Jesús yandø barcoyu nebiben, nui kusrenanøb pera uniløbe nun lincha ambulø køn.

24 Inchene møimbe maryube truba trømbøig mur isig ichib kurra, pi we-larmera barcoyu mas, mas negutsingucha, Jesúsbe kib tsubig køn.

25 Inchen nui kusrenanøb pera uniløbe kasrønannrab amba, trenchibelø køn:

—¡Señor, namun wesurra chib, chab asentab meler!— cha.

26 Inchen nøbe trenchibig køn:

—¿Chindimbarre kørig køta? cha. Ñim kui ñimui isubigwan nainug ke kagømønrraindøzhig pasra tøgær— cha.

Incha kurrabe, isigwanba, marwanba kønømønrrai kandø wamuben, ¡katø! yandø kerrigu wasrønzhig kørrømisrøbig køn.

27 Inchen nømbe kwaara asha kørrømisra, trenchibelø køn:

—¿Øyeebe chi møg kerah? cha. ¡Isig ichibig lata, mar lata, iiløguen nun mørtrappe!—

Jesús Gadarasrø pailø kwaimandzig tøgarmen tamarøb

(Mc 5.1-20; Lc 8.26-39)

28 Jesús pisu ambøgatø Gadara pirausrø larraibene, pailø kwaimandzig tøgarmen sörin trabmerayugurri werrua, Jesúswan kemallibelø køn. Truiløbe truba namiguelø køptø, tru maywane mugucha puramrrab kaimabelø køn.

29 Inchabe trenchib trashibelø køn:

—Tiuswei Nusrkai, ¿namune chi martrab inchigu? cha. ¿Namun ¡katø! purø trømbøig møra melønrrai martrab attirru cha, tru treeg maramig pumøwatøbe?—

30 Truyugurri maya yab køsrøn kuchimera truba nu lawa mab amøñibelø køn.

31 Inchen tru kwaimandziimerabe Jesúswan trenchib rugabelø køn:

—Nanun webetappe, trube, tru kuchimerayu kebambingarurrinrig— cha.

32 Inchene Jesúsbe trenchibig køn:

—Ambay pøs— cha.

Inchen tru kwaimandziimerabe møguelainukkurri webamba, kuchimerayu kebamben, tru urastø kuchimerabe luløb mendappe, truba trømbø lendeyu lula, chab pinøgørraptincha, larrø nu pisuyu kegørra, pi keesra, chab kwabelø køn.

³³ Inchen tru kuchi ashibeløbe chab lula, pueblosrø puabe, tru kwaimandzig tøgar købelan maig purayaigwan kerriguh waminchib mendabelø køn.

³⁴ Inchen puebloyu maya misaabe Jesúswan katønrrab webamba, nun ashabe, tru piraugurri 'irra' cha, truba rugabelø køn.

9

Jesús kan kønønrrab kaimabigwan tamarøb (Mc 2.1-12; Lc 5.17-26)

¹ Inchen Jesúsbe kan barcoyu nebya, pisu ambøgatøsrø larraya, nui puebloyu pubig køn.

² Inchen truyube kan møg kønønrrab kaimabigwan kan tsigalyu muta amrruben, Jesúsbe nømui isubigwan ke nuinuutø pasra pønrrai ashabe, kwanrriigwane trenchibig køn:

—Nai nusrkai, kullaaramøta cha. Ñui kaig mariilan ulø payamig kømfig, pesannaig kørrømisran— cha.

³ Inchen møiløgøsrøn tru Moisés pørigwan kusrenanøbeløbe treeg isubelø køn: “Nøbe Tiusweimburab purø trømbøig waman” chib.

⁴ Inchen Jesúsbe nøm chi isub kuilan ashabe, trencha payibig køn:

—¿Ñimbe ñimui manrraube chindimbarre øyeeg kaig isub køgue? cha.

⁵ ¿Møigwan mas kørmø trendamdiig købsruerah? cha. Kabe: “Ñui kaig mariilan ulø payamig kømfig pesannaig kørrømisran”, ¿tamiteh? Kabe: “Kurrab, inrrø”, ¿tamiteh? cha.

⁶ Pøs, na, Møg Misra Arrubiibe yu pirau kaig mariilan ulø payamig kømfig pesannaig kønrrai mu mandamgaig marøbig kui møimbe ñim ashchai kenamaramønrrun— chibig køn.

Inchabe tru kønønrrab kaimabigwane trenchiptinchibig køn:

—¡Kurrø! cha. ¡Ñui tsigalwan mutab, ñui yamay inrrø!— cha.

⁷ Inchen kwanrriibe kurra, nui yamay ibig køn.

⁸ Inchen misamera iigwan ashabe, truba kørig kui inchibelø køn, Tiusbe møguelan øyeeg mu mandamgaig maramig tranitamab isua. Incha øyeeg marikkurri Tiuswan truba tabig waminchibelø køn.

Jesús Mateowan wamab (Mc 2.13-17; Lc 5.27-32)

⁹ Jesús truyugurri yabe, kan Mateo taig mōwan romasreelayasig an utabelø purrainug wai ashabe, trenchibig køn:

—Nai mendig amø— cha.

Inchen nøbe kurrab, nui mendig ibig køn.

¹⁰ Indiibe Jesúsbe tru Mateowei yau mab wabene, truba yamelø romasreelayasig an utabelø køben, katøganelø kaig marøb misamera køben puabe, Jesúsba, nui kusrenanøb pera uniiløba mishatsigu trubalatø purrøben,

¹¹ møiløgøsrøn fariseosmera trunun ashabe, nui kusrenanøb pera uniilan trencha payibelø køn:

—¿Ñimui kusrennøbiibe an utabeløba, kaig marøbeløba mab, muchib wappe, øyebe maig marøb wah?— cha.

¹² Inchene Jesús trunun mōrabe, trenchibig køn:

—Tabelø kwanrrøgarbe mō marøbig palain kømøn cha. Kwanrreeløbeguende palain køn cha.

¹³ Amba, i pørigu chi chibig kuigwan kusrey cha, tru Tiuswei wamyu øyah chibigwan: “Animal kweecha, nan tranøb kømøtø, ñimbe lastima ashibelø kønrrai inchar” taigwan. Kaguende nabe sølgandø amøñibelan wamønrrab arrumøtø, kaig marøbelan wamønrrab arrig køn— chibig køn Jesúsbe.

Ayunamigweimburab Jesúswan payib

(Mc 2.18-22; Lc 5.33-39)

¹⁴ Juan Bautistai mendig amøñibelø Jesúswan kemallabe, trencha payibelø køn:

—Namba, fariseosmerababe ayunamigwan katø katø marer cha. ¿Inchen ñui kusrenanøb pera uniiløbe chindimbarre trunun marmeelø køh?— cha.

¹⁵ Inchene Jesúsbe trenchibig køn:

—¿Kan novios yaumay linchai eshkailanma novio nømba wabengan isuin purrønrraitarru? cha. Inchendø yandø novion srua ambam kwalømmera punrrun cha. Inchen ayunabwei inchun cha.

¹⁶ Muguen kan køllin camisanma kølsraigu srø llensu søtiimíggwan waya, tsushimøn cha. Kaguende tru srø llensube kesruppa, kølli llensune kølsrøben, mas trømbøikken kølsraig kørrømisrtrun cha.

¹⁷ Katø srø vinonma køllin kalusmerayu usrmøwei inchibelø køn cha. Kaguende treeg marene, kalusmerabe surrøben, vinobe lushen, yandø kalusmerabe ka pinønrrun cha. Inchawei srø vinone srø kalusmeran marigu usramig køn cha. Trumaybe møigwandøgucha chi mindisaig kømønrrun — chibig køn Jesúsbe.

Jesús kan ishuwan kwanrrøwan tamarøb

(Mc 5.21-43; Lc 8.40-56)

¹⁸ Jesús waminchib pasramne, judíosmeran chi maramigwan kan karubig puabe, nui merrab tømboñsra, trenchibig køn:

—Nai nimbasr ke møindø kwan cha. Øyeeg kuindøgucha, ñi arrua, tasigwan nuim pala estsarene, katø øsiiranrrun— cha.

¹⁹ Inchen Jesúsbe kurra iben, nui kusrenanøb pera uniilø nun lincha amben, nøbe tru møøba ibig køn.

²⁰ Indiibe kan ishug doce años ørøba ani ib kwanrrø tøgag chiguen tab kømui megawa, Jesúswan wendaugurri kemallippa, Jesús nø kewagúig urøzhigwandø katørabig køn.

²¹ Kaguende nøbe treeg isubig køn: “Nui kewagúigwan ka katøraitø tammisrig kørrømisramønrrun” cha.

²² Inchen Jesúsbe keesha asha, tru ishuwan ashabe, trenchibig køn:

—Chi isumøta cha. Nimbasr, ñui isubigwan nainuutø pasra tøgagúikkurri tamarig kørrømisran— cha.

Indiibe tru uraskurri yandø tammisrig kørrømisrig køn.

Kan ishug-unan Jesús øsiiranøb

²³ Incha Jesús tru judíosmeran karubigwei yau pubene, lus urrabelø køben, katø misaamera truba trashib kishib kui ashibig køn.

²⁴ Inchabe trenchibig køn:

—Yugurri webambay cha. Ishug-unøbe kwaig kømøtø, ka kiptø tsun— cha.

Inchen misaamerabe Jesúswane ka indzatø mørøbelø køn.

²⁵ Incha nømun webambingaruben, Jesúsbe kebya, ishug-unan tasigu kemørene, unøbe kurraptinchibig køn.

²⁶ Inchen tru piraube muba kuimburab treeg purayaigwan wammørig kørrømisrøbig køn.

Pailø kabgailan Jesús tamarøb

²⁷ Jesús truyugurri webya ibene, pailø kabgailø trenchib trashib wendautø amrrubelø køn:

—jNamun lastima ashcha chib, merrabsrø Davidwei Nusrkai!—

²⁸ Inchen Jesúsbe yau kebiben, tru kabgailø kemallene, nøbe trencha payibig køn:

—¿Ñimbe na øyeegwan martraitamab køregueh?— cha.

Inchen nømbe:

—Señor, øø— cha, løtabelø køn.

²⁹ Inchene Jesúsbe nømui kabmeran katørawabe, trenchibig køn:

—Ñim ñimui isubigwan nainug maig tøgagúig treeg kønrrain— cha.

³⁰ Inchen nømui kabmerabe ashibelø misren, Jesúsbe trenchib karubig køn:

—Mun køben eshkab kønrrab kømø cha, i marigwan.—

³¹ Trendaingucha nømbe webambuptø, Jesús nø chi marigwan tru pirau mayeelan waminchibelø køn.

Kwaimandzig tøgag waminchab kaimabigwan Jesús tamarøb

³² Inchen tru kabgailø købeløbe webambub kømnetø, møiløgøsrøn Jesúsweimay kan wamgaig kwaimandzig tøgagwan srua amrrubelø køn.

³³ Inchen Jesús tru kwaimandzigwan weguchen latatø, tru wamgaibe waminchiptinchen, misaabe kwaara asha kørrømisra, trenchibelø køn:

—jManaguen nam Israel misaamerai utube øyeekkatiibe ashmer!— cha.

³⁴ Inchen fariseosmerabe trenchibelø køn:

—Kwaimandziimeran ke nøasha karub pasrabikkurri kwaimandziimeran nøbe webusrøbig køn cha.—

Jesús misagwan yeekkucha nebuig melaitamab lastima ashib

³⁵ Jesús maya pueblomerasrø, yamera tsitsø pønrrabsrø, judíosmera tulundzuni yamørig kusrenanøb, tabig srø wam Tius nø ashib karub wainuguigwan eshkab waminchib, chi kwanrrømeragurrimbunø tøgarwan pusrkwabelan tamarøb llirab ibig køn.

³⁶ Incha truba nu sötø misagwan ashabe, lastima isui inchibig køn. Kaguende nømbe truba isuilø, chinchabguen kaimar, kan ubishamera mu ashchabig chigar latalilø køben.

³⁷ Incha nui kusrenanøb pera uniilan trenchibig køn:

—Ellmarig tulisamibe truba nørrø køben, trune tulishinrrabeløbe mamdø køn cha.

³⁸ Inchawei tru ellmarig puaig Tiuswan miay chibig køn, nui ellmarigwan tulishinrrabelø ørtrai.—

10*Jesús nøashib karua øramelø doce lawa wesrub
(Mc 3.13-19; Lc 6.12-16)*

¹ Jesús nui doce kusrenanøb pera uniilan wamabe, mu mandamgaig maramig tøgagønrrai tranøbig køn, trømbøig maringarub kwaimandziimeran webusrøb, katø chine kwanrrømeranba, pusrkwabelanba tamartrai.

² Iilø køn tru doce nøashib karua øriilai munchimera: Srøstriibe Simón truiagwane katø Pedrogucha taig, nui nuneg Andrésba, Zebedeowei nusrkai Santiagoba, nui nuneg Juanba,

³ Felipe køben, Bartolomé køben, Tomás køben, Mateo tru romasreelayasig an utabig køben, Alfeowei nusrkai Santiago køben, Tadeo køben,

4 Simón tru Cananistameraingatiig køben, Judas Iscariote tru wendø Jesúswan ashig kømui inçhibelaingatø misra tranøbig købengue.

*Jesús tru doceelan kusrenanrrai ørøb
(Mc 6.7-13; Lc 9.1-6)*

5 Jesús i doceelan øyah martrigay chib karua ørøbig køn:

–Judíos kømeelø waraisrø ammøwei, samaritanosmerai pueblomerasrø kebammøwei inçhigay cha.

6 Trembe tru Israel misaamerai utu tru ubisha trubiilø latailaimaytø amrrigay cha.

7 Trusrø ambabe, srømbalasrø Tius nø ashib karub waibe lutau pasran chib eshka kusrenanrrigay cha.

8 Kwanrreelane tamarøb, kwailan øsiiranøb, asr trerab kwanrø tøgarwan tamarøb, kwaimandziimeran webetab inçhigay cha ñimbe. Ñimun øyee martra tranigwan ñimma ka ketig utig køn cha, ñimgucha katø treegwei marøppe, anwei marmøtay cha.

9 'Oro køben, an køben, cobre køben ñimui pørønailøyu pusra ammøwei,

10 katø mayuwei murril ila ammøwei, turingucha yunømaramiba kømøtø, kandø tøga; alpargatiskucha keeta kømøwei; ni pøtøinain tsikkucha srua ammøwei inçay cha. Kaguende chigøben marøbiibe nui marimburøbe mu chi chinrainga mamigwane utamig køn cha.

11 'Ñim kan puebloyu kui, ya tsitsø pønrrabyu kui puabe, kan misag chi isumgaig tabigwan lawa, truigwei yau kørrømisrtrigay ñim truyugurri ambnegatig.

12 Yau kebambuppe, 'ñimun chi isumgaig tab køn' chib wamønrrigay.

13 Tru yau misaamera truburab tabelø købene, tru ñimui tab købiibe nømum pala treeg kønrrun. Inchen trengatig kønrrabgailø købene, ñimui tab købiibe ñimuinuutøwein kønrrun.

14 Inchen ñimun wamømøwei, ñim wamindigwan mørmøwei inçhene, nømui yaugurrin kui, nømui puebloyugurrin kui webambuppe, srøbyu usrøwan chishtø kørrøga webamrrigay chibig køn.

15 Inçhawei nabe ñimun cierton trendamønrrun: Srabe kwalømbe tru puebloimbe Sodomaimba, Gomorraimba pirau lataitøguen kømø, Tiuswei tru maig kønrrabigwan asha maram kwaløm attrabiibe mas purø trømbøig kønrrun cha.

Wendøsrø kaig indinab melamig attrabig

16 'Au, nabe ñim ubishamera latailan lobosmerai utu ørar. Chiyugøben kegørrømønrrab ñimbe ul latailø kuy. Inchen chi kaig inçhimeelømaybe palomamera latailø kømig køn.

17 Ashiptø kønrrigay misaameran. Kaguende nømbe ñimune karubelai tasku tranøb, katø judíosmera tulundzuni yamerayy ñimune ichabetab inçhun.

18 Katø karubelø nørreelai merrab, reymerai merrab nagurrindø srua amrrun, trumay ñimbe nømunba, judío kømeelanba naimburabigwan wamin-damig kønrrai.

19 Inchen tru karubelan ñimun tranene, ñimbe mandø løtamigwan chi isumøwei, mandamerab chi isumøwei inçhigay. Kaguende tru wamin-damig pubene, waminamig tøgagønrrai Tius tranrrun, chibig køn.

20 Kaguende ñim waminçhain kømøtø, Tius ñimui Møskawei Espiritu ñimgurri waminçhun.

²¹ Inchen nunebe nōmui nunewandōwei kwetchai tranen, mōskaimbe nusrkawan tranen, ureemerabe mōskalan namig kurra, kwetchai tranrrun cha.

²² Maya misaabe ñimune nagurrindō tsalō indiilō kōnrrabguen cha. Inchen srabe kwalōmgatig chigúingucha megabig megabiibe kebeñchabig kōmíig kaigyugurri wesraig kōnrrun chibig kōn.

²³ Ñimun kan ciudayu chigōben kaig martrab inchene, katōgansrōmay wegōrra ambay. Pōs nabe ñimun cierton trendamōnrrun: Mōg Misra Arru-biibe Israel pirau ciudamerayu ñim kerrigu naimburab eshkaab lliramōwatō atrun cha.

²⁴ Kan kusreb mendig megabiibe nui kusrenanōbigwan purab nuig kōmōn. Katō kan karuindiig megabiibe nui ya puaiḡwan purab nuig kōmōn.

²⁵ Kan kusreb mendig megabiibe nui kusrenanōbig lataitōwei misrabe, trutō tsabō kui mōramig kōn. Inchen tru karuindiig megabiibe tru ya puaiḡ lataitōwei misrabe, trutō tsabō kui mōramig kōn. Yau mōskai ashib wabig-wanguen kwaimandzig Beelzebú cha wamibe, mas nui yau purrabelane chitō tai asamō chibig kōn.

*Mun kōrig tōgagōmig
(Lc 12.2-7)*

²⁶ Inchawei misaameran kōrig kui inchimōtay. Pōs chitōgucha sōriibe sōriitō kōrrōmismō, kenamistrun. Katō kan sōratō tōgagūibe sōratō kōrrōmarig kōmō, wammōrig kōrrōmisrtrun.

²⁷ Na ñimun lōstōyu wamindigwane ñimbe kwalōm tōryu waminday. Katō na ñimun nilō wamindigwane ñimbe yabalasrōngurri trasay.

²⁸ Asrwandō kweechibelane kōrig kui inchimōtay. Kaguende ñui mōsigwane kwetchab kaimanrrun. Treeg kōmōtō, asrwanba, mōsigwanba managatig tru mōra melamnug pinishinrrabigwan, tru Tiuswane si, kōrig tōgaguy, chibig kōn.

²⁹ '¿Pagatō illinzheelan kan centavozhigweindō yanōbelō kōmuitarru? Treweindōzhigwanguen ñimui Mōskai pirau kōrrōbashmubene, ni kanzhikken kōrrōmōn.

³⁰ Pōs, ñimuimburappe ñimui turyu pusruumeranguen kan kan mundzi-izheelō kōn.

³¹ Inchawei ñimbe chi kōrig kui inchimōtay. Truba yam illimera lataitōguen kōmō, ñimbe mas purō nuweyelō kōn.

³² 'Mōikkōben misaamerai merrab 'Jesúsweingatiig kur' chibigwane nagucha nai Mōskai srōmbalarō wabigwei merrab treetōwei truigwane 'ningatiig kur' tamōnrrun.

³³ Inchen misaamerai malau 'Jesúsweingatiig kōmur' chibigwane nagucha nune nai Mōskai srōmbalarō wabigwei merrab 'ningatiig kōmur' cha, trendamōnrrun chibig kōn, Jesúsbe.

*Jesúskurri misaamera nōōtōtō misrōb
(Lc 12.51-53; 14.26-27)*

³⁴ Nabe piraumay arruppe, ambumay imay tab kōbigwan srua arritamab isumōtay. Nabe truigwan srua arrumōtō, kwayab kōmigwan srua arrur cha.

³⁵ Nabe arruppe, mōōbe mōskaimba namig kurrōben, nimbasarbe usrimba namig kurrōben, yernabe sueeraba namig kurrōnrrai martrab arrur.

³⁶ Inchawei mōigwandōgucha ashig kōmui inchibelōbe yaelōtōwein kōnrrun.

³⁷ 'Møikkøben møskawan kui, kabe usran kui, nan lataguen kømø, mas undaarabiibe truburab chincha nain kønrrabgaig køn. Nui nusrkawan, kabe nui nimbasrwan, nan lataguen kømø, mas undaarabiibe truburab chincha nain kønrrabgaig køn.

³⁸ Inchen møikkøben kuruswan mutab nai mendig arrumíbe truburab chincha nain kønrrabgaig køn.

³⁹ Inchen møikkøben øsig kømigwan wetørrabiibe yandø pinab pinamig nebunrrun cha. Inchen nagurrindø kwabiibe managatig øsig kømigwan wetørrawa tøgagønrrun cha.

Ketigwan utab

(Mc 9.41)

⁴⁰ 'Møikkøben ñimun tab wamab utabiibe nan utan. Inchen nan utabiibe nan karua ørøbigwan utan.

⁴¹ Inchen møikkøben Tius maig karuigwan eshkabig kui ashiptø nun tab wamab utabiibe, tru Tius maig karuigwan eshkabigwan ketigwandøwei nõbe Tius tranig utønrrun chibig køn. Katø møikkøben kan sølgandø tabig marøbigwan, sølgandø tabig marøbig kumburø utabiibe, sølgandø tabig marøb mowan ketigwandøwei Tius tranig utønrrun cha.

⁴² Inchen møikkøben nai mendig amøñibelø kui ashiptø trengatig kømøzheelan kan pi pishi pasuzhiitøguen srørrøbiibe, truburø nui ketig utamigwane utømø kømø, utønrrun cha, ñimun trendamønrrun.—

11

¹ Jesús yandø nui doce kusrenanøb pera uniilan øyeeg, øyeeg marøb amøñinrrigay cha, chab kusrenanabe, truyugurri ibig køn, tru pirau katøgan pueblomerasrø nui srø wam tabigwan kusrenanøb katø eshkab waminchib inchab.

Juan Bautistai kusrenanøb pera uniilo

(Lc 7.18-35)

² Juan Bautista kailan keeri yau keerig pasrøwa, Cristo chi marøb uniilan wammørbig køn. Inchabe mõilan kørøn nui mendig amøñibelan Jesúswan trencha payrrai ørøbig køn:

³ —¿Tru Cristo attrabig købiibe ñi kuin kui, kabe nambe katøganun muniiramøh? chinrrai.—

⁴ Inchene Jesúsbe nõmun lötappe trenchibig køn:

—Amba, ñim chi mørigwan, ñim chi asigwan Juanwan eshkanrrigay cha.

⁵ Kabgailøbe ashen, cojosmerabe amben, asr trerab kwanrrø tøgarmereane nõmui kwanrrøwan tamara chishmariilo køben, kalu mørmeeløbe mørøbelø misren, kwailøbe øsiiraben, waachamerane Tiuswei tabig srø wamwan eshkab kusrenaniilo køn cha.

⁶ Mayanguen tab kuig køn chibig køn, nan peg kuitamab isumøtø, na kuitamab isubigweimbe.—

⁷ Inchen yandø nõm amben, Jesúsbe Juanweimburab misagwan trenchib waminchib pølbasrøbig køn:

—¿Mu misag warab waraimøsrømbe ñimbe chi ashchab webamgue? cha. ¿Kan caña ambumay imay ka isig srua yainaptigwande? cha.

⁸ Trube, ¿chi ashchab webamgue? cha. Kabe, ¿kan møg truba tabig keweigwande? cha. Ñimbe ashibelø køn, truba tabig kebeløbe reymerai yau purrabelø kui.

⁹ Trube, treeg købene, ¿chi ashchab webambig kø? Kabe, ¿Tius maig karuigwan kan eshkabigwande? Øø, nabe ñimun trendamønrrun cha:

Treegwanwei ashchab webambig kòn cha, katø treetøguen kòmø, trurrigu Tius maig karuigwan eshkabigwan lataguen kòmø, mas purø nuigwan.

¹⁰ Juanbe tru Tiuswei wamwan pørigu øyah taig truig kòn:

Au, nabe nai wam srua inrrabigwan ñui merrab ørar cha, trube ñui maywan tamartrai ñui merrab.

¹¹ Nabe ñimun cierton trendamønrrun: Maya møguelø kal-laelai utu Juan Bautista lata nuibe muguen kurrømuig kòn cha. Inchendø treeg kuindøgucha, srømbalasø Tius nø ashib karub wainuube chigucha kømíikken mas nuig kòn cha, Juan lataguen kòmø.

¹² Juan Bautista marøb pølbaserø uraskurri møingati srømbalasø Tius nø ashib karub waibe truba kaig indinab pasran. Inchen tru treeg kaig marøbeløbe treeg mara, trunun nøm kanammøø indan.

¹³ Mayeelø Tius maig karuigwan eshkabeløba, tru maig maramigwan martrai Moisés pøriibabe Juan arrumnegati Tius maig karuigwan eshkaig kòbig kòn.

¹⁴ Ñim iigwan kørewa utønrrappe; Juanbe Tius maig karuigwan eshkabig Elías attrabig kòbig, truigwein kòn.

¹⁵ ¡Møramig kalu pønsraibe mør!

¹⁶ ¿Møin kwaløm misaamerane chi latailø kòn chinrrab køh? chibig kòn. Kan plazayu ureemera esherrab purramisra, nømui linchibelan øyah chib trashib purrabelø latailø kòn cha:

¹⁷ Nambe ñimuyasig luswan urringucha,

ñimbe pailamuig kòn chib.

Cantailø isumdeelø cantaben,

ñimbe miirab kishmuig kòn, chib.

¹⁸ Pøs Juan mamøwei, muchimøwei inchibig arrubene, nømbe: “Kwaimandzig tøgai kòn” chibelø kòn cha.

¹⁹ Inchen Møg Misra Arrubig mab, muchib inchibig arrubene, trube, nømbe: “Menrra maptiig kòn”, tamba: “Menrra muchiptiig kòn”, tamba: “Romas-reelayasig an ufabeløba, kaig marøb misaameraba linchibig kòn”, tamba inchibelø kòn nømbe. Inchendø mu møkken nebua isumgaig Tius marøb pasraibe nui mariiløtøga treeg kuitamab ashchai tørgandø kenamaran—chibig kòn.

Isua mørmø misaameran isumdiig nebunrrabig

(Lc 10.13-15)

²⁰ Incha Jesúsbe maramburab mariilan nø truba mari pueblomerasø namig waminchibig kòn, kaguende tru pueblomerayu warab misaamerabe nømui kaig mariilan isua møra, Tiusweimay lliramuikkurri. Incha Jesúsbe trenchibig kòn:

²¹ —¡Ay, ñi Corazín pueblo waacha! ¡Ay, ñi Betsaida pueblo waacha!

Kaguende Tiroso Sidónso tru maramburab mariilan na ñimui utu lataitøwei marig kuimbe, manawei truiløbe nømui kaig mariilan isua møra, Tiusweimay llirabsruig kuinrrun cha. Incha kaig marmønrrab yandø isua mører chib kenamartrab, trøsrkøleelø keb, nagusrøwan itøbusrøb inchisruinrrun cha.

²² Pøs nabe trendamønrrun: Tiuswei tru maig kønrrabigwan asha maram kwalømbe Tiroba, Sidónba misaamera lataitøguen kòmø, ñimbe mas purø trømbøigwan utønrrun cha.

²³ ¿Inchen ñi Capernaum pueblogan, purø tab incha srømbalasøngati kusruig kønrrumab isutirru? Treeg kømøtø, tru møra melamnug kegutsig

kønrrabguen ñibe. Kaguende ñimui utu maramburab marilan Sodomasrø na marig købig kuimbe, møingatig tru ciudadabe pinømubsruinrrun cha.

²⁴ Inchawei nabe ñimun trendamønrrun: Tiuswei tru maig kønrrabigwan asha maram kwaløm attrabiibe tru Sodoma pirausrø misaamerai lataitøguen kømø, ñimuiimbe mas purø trømbøig kønrrun— cha.

Naimay amrrua isray

(Lc 10.21-22)

²⁵ Tru uras Jesús trenchibig køn:

—Nai Møskai, srømbalawanba, pirøwanba ashib karubig, ñun tabig waminchar cha, kaguende ñibe kusrebelø chigúí mørøbelan ashmønrrai tru sorig pønrrabelane tru chigucha kømeeleø kusremeelan kenamarikkurri.

²⁶ Treegwein køn, nai Møskai, ñi treeg kønrrai maramig tab kuig kua.

²⁷ 'Nai Møskaimbe chiwandøgucha nan trandan. Mugucha na Nusrkawane mu ashmuben, Møskaindøwei asan. Mugucha Møskawane mu ashmuben, na Nusrkaimbah, møiløgøben na kenamarilø truiløbatø asan.

²⁸ Ñim mayeeløba ñimui amønailøyu chine chine nebuig truba muraarilø, trurrigu kwatsig nigarbe naimay amrruy, nabe ñimun isramig tranrrumøn.

²⁹ Arau merrarrabig tru nai nukabala trarrigwan kashmø, uta, naba latatø srua amun chibig køn. Incha na maig køben nan treeg asha kusrey cha. Nama purø tammayig, manrraugurri newan tabig chish inchimig, nabe treeg kur cha. Øyamaybe ñimui møsiimerayisig isramig wetørranrrun cha.

³⁰ Kaguende nuka pala trarrig arau merrarrab tsig naimbe kwatsiguig kømø, ka niga ambamdiig køn— chibig køn Jesúsbe.

12

Jesúswei kusrenanøb pera uniilø isrin kwaløm tirigu tur lurrøb

(Mc 2.23-28; Lc 6.1-5)

¹ Inchen tru uras kan isrin kwaløm Jesús tirigu ellmari utuwan pureb ibene, nui kusrenanøb pera uniiløbe parøgwaben, tirigu turwan lurra, trulwan mab mendabelø køn.

² Inchen fariseosmerabe asha, Jesúswan trenchibelø køn:

—Au, ñui kusrenanøb pera uniiløbe isrin kwaløm chigøben marmønrrai merigwan marøb køn— cha.

³ Inchene nøbe trencha løtabig køn:

—¿Ñimngan lemeelø køtirru cha, mana køsrøn Davidwanba nui linchibelanba parøgwaben mandø indigwan?

⁴ Pøs truima Tiuswei carpa ya tabzhigu kebya, nøba nui linchibeløba Tiusweyasiitø tarømarig pirrimeran maig købig køn tan cha, ni nun lata, nui linchibelan lata mamønrrai merigwan, tru sacerdotemeratø mamigwan.

⁵ ¿Kabe ñimngan tru maig maramigwan martrai Moisés pørigu lemeelø køtirru cha, isrin kwaløm kuindøgucha sacerdotesmera Tiuswei yau marøb purrappe, isrin kwaløm kømui lataig, isrømø, marøb purrøben, truigwanma Tiusbe kalø kui asig kuitarru? cha.

⁶ Inchen køben nabe ñimune trenchar: Tiuswei ya lataitøguen kømøtø, mas purø nuikken kur cha, na yu pasrabiibe.

⁷ Ñimbe ni chi tainguen mørmuin køn: “Animal kweecha, Tiuswan tranøb kømøtø, ñimbe lastima ashibelø kønrrai inchar” taigwan. Tru trendaigwan ñim mandø kui mørig kuimbe, kaig mara kømeeleane øyeeg kaig marøbelø køn’ chimubsruinrrun cha.

⁸ Inchawei na, Møg Misra Arrubiibe isrin kwaløm nan nø karunrrain kømøtø, maramdiigwane marøb, maramgaigwane marmub, nabe na asha karubig kur— chibig køn, Jesúsbe.

*Kan møg tasig mul-laig
(Mc 3.1-6; Lc 6.6-11)*

⁹ Incha Jesúsbe truygurri ya, judíosmera tulundzuni yau kebibene,

¹⁰ truyube kan møg tasig mul-laig wabig køn. Inchen kaguen mõiløgøsrøn Jesúswan chigøben chi køptø, Jesúswane trencha payibelø køn:

—¿Isrin kwaløm kan kwanrriigwan ka tamartrain kø chindah?— cha.

¹¹ Inchene Jesúsbe trenchibig køn:

—¿Ñimma mõikkøben kan ubisha tøgagua, isrin kwaløm trabyu kebeñene, ya, kemøra, wesramønrraguh? cha.

¹² Pøs kan mõøbe kan ubisha lataitøguen kømø, purab nuikken køn cha. Inchawei treeg købene, isrin kwalømmerawangucha tabig maramigwane merømø, ka marbasamig køn— chibig køn.

¹³ Incha tru mõwane trenchibig køn:

—Kwalwan larrøbichi— cha.

Inchen nõbe larrøbichene, kandarø kwal latawei tabig kørømisrøptinchibig køn.

¹⁴ Inchen fariseosmerabe webamba, Jesúswan namig kurra, mandø incha pinisamigwan waminchib mendabelø køn.

Jesúsweimburab maig nebunrrabigwan wamindig

¹⁵ Inchen Jesús iigwan wammørebe, truygurri iben, misag truba nu mendig ambubelø køn. Inchen Jesúsbe mayan kwanrreelan tamarøbig køn.

¹⁶ Incha nune mu køn cha, mun køben misaameran mõrø waminchimønrrain karubig køn.

¹⁷ Iibe tru Tius maig karuigwan eshkabig Isaíaskurri øyeeg taig nebunrrain kuig køn:

¹⁸ Iibe tru nai karuig marøb megabig køn cha, tru na lawa wesruig, na undaarraig, truigweimburappe nabe truba tab kui mõrøb kasrag war taig.

Nabe nai Espíritun nuim pala pasren, chu pirausreelø køben maya misaameran tru sølgandø tabigwan nõ eshkab kusrenanrrun taig.

¹⁹ Nøbe kwayam lamøwei, trashimøwei, callesmerayu nui wamwan wamindi mõrmøwei indig kønrrun taig.

²⁰ Kan caña kegurisaigwan nõbe kebinab lanchimøwei, katø mecha ke chab kwab pilab pasrabigwan kweechimøwei inchun taig,

tru sølgandø tabigwan kerrigu kanawa wesrawa pasramnegatig.

²¹ Inchen judíos kømø misaamerabe nui munchiyutø isua muniirab kønrrun, taig.

*Jesúswan kwaimandzigwei maramburab mariitøga maran chib
(Mc 3.20-30; Lc 11.14-23; 12.10)*

²² Inchen Jesúsweimay kan møg kabgaig, wamgaig kwaimandzig tøgagwan srua amben, nõbe nun tamarene, tru wamgaibe waminchib, ashib inchibig køn.

²³ Inchene mayeeløba kwaara ashib trenchib payiyabelø køn:

—¿Iibe tru merrabsrø Davidwei Nusrkain køppeendi?— cha.

24 Inchen fariseosmera iigwan mōrabe, trenchibelø kōn:

—Nugwaimandzig, Beelzebú, tru kwaimandziimeran ke nōasha karubig treeg martrai tranig kua, truikkurri kwaimandziimeran weeran— cha.

25 Inchen Jesúsbe nōm chi isub pōnraigwan ashabe, trenchibig kōn:

—Kan rey karub tōgaweim pirauma misag nōmasiitō nōōrōtō misrōb kurrabe, pinōnrrun cha. Katō kan ciuda lata, katō kan yaelō lata nōmasiitō nōōrōtō misrōb kurrabe, warōnrrab kaimanrrun cha.

26 Ōyeetōwei Satanáskucha Satanáswandōwei weguchabe, nōasiitō nōōrōtō misran cha. Inchen nō ashib karub waibe, trube, ¿chinha pasrabig pasrōnrrab kō? cha.

27 Tru kwaimandziimeran na webetappe, Beelzebúgurri webetig kōbene, trube, ¿ñimui mendig amōñibelōbe kwaimandziimerane mu webetingaruitōgarre webetah? cha. Inchawei, treeg kōbene, maig kuigwan ñimun uyube nōm kusrenrrun chibig kōn.

28 Trune na Tiuswei Espiritutōga kwaimandziimeran webetōbene, Tius nō ashib karub pasraibe ñimui utube puaguen pasran cha.

29 'Kabe kan mōikkōben kan mur mōwei yauma kebya, tru mur mōwan lusrōbmerrig lusrmōwatōbe, ¿nui chi tōgagúigwan chinha kerranrrab kō? cha. Lusra trarratōwei nui chi tōgagúilan kerranrrun chibig kōn.

30 'Naingatō pasrōmíbe, nan tsaleelaingatō maran. Inchen naba tulishimíbe truōrōtō wiitan.

31 'Inchawei nabe ñimun trendamōnrrun: Misaamera kaig mariilan lata, chigōben Tiuswan purō trōmbōig wamab wamindiilan lata Tiusbe kerriguh pesannawa ulō paymōnrrun cha. Trune Espiritu Santon purō trōmbōig wamab wamindiilane si, Tiusbe pesannamō, ulō payrrun chibig kōn.

32 Mōikkōben na, Mōg Misra Arrubigwan chigōben kaig waminchibigwane Tiusbe ulō paymōnrrab pesannanrrun. Trune mōikkōben Espiritu Santon kaig waminchibigwaneguende ni mōi yu lata, ni kansrō lata pesannamō, ulō payrrun cha.

Tusrwane mamikkurri asan

(Lc 6.43-45)

33 'Pōs kan tab tusrbe, tab mamitōwei niirrun. Inchen kan kaig tusrbe kaig mamitōwei niirrun. Kaguende kan tusrwane mamig niguinug asan.

34 ¡U! lataig inchib misaamera! ¿Ñim chinha tabig waminchague, trendō kailōbe? Kaguende nui manrrau chine isua tōgagúilō pinōguchen, nui triibe treeg wamindan.

35 Kan mōg tabiibe tabig isuilan nui manrrau esegabig kua, truyugurrimbe tabig wesrub wamindan. Inchen kan mōg kaibe kaig isuilan nui manrrau esegabig kua, truyugurrimbe kaig wesrub wamindan.

36 Inchawei nabe trendamōnrrun: Chigōben wamindamgailan misag ke ka wamincha mōriilan Tiuswei tru maig kōnrrabigwan asha maram kwalōm mayeelōba tru urasbe kerriguh maig kuigwan eshkamig kōnrrun cha.

37 Pōs ñui wamindiitōgatōwei 'tabig kōn' tain kui, kabe 'kaig kōn' tain kui Tius treeg marig kōrrōmisrtrabguen.—

Jesúswan mu kōremgaig mana asiimtig martrai miab

(Mc 8.12; Lc 11.29-32)

38 Inchen mōilōgōsrōn Moisés pōrigwan kusrenanōbelōba, fariseosmeraba Jesúswan trenchibelø kōn:

—Kusrennōbig, Tius ñiba pasrain kui nam asha kōnrrab mar— cha.

³⁹ Inchene Jesúsbe trencha lötabig kòn:

—Møin kwalòm kaig misaamera, kan kasharawar peebe itölulöpteelö lataitøwei Tiusbatø pønrrømø misaamera kailø, Tius naba pasrain kui ashchab maramig miatan cha. Inchendø asha kønrrai katøgan chigøben peg kenamara tranmøtø, Tius maig karuigwan eshkabig Jonásweiwandø eshkamønrrun cha.

⁴⁰ Tru Jonás truba nu peskau umbu pøn kwalòm, pøn yem wab lataitøwei Møg Misra Arrubikkucha pøn kwalòm, pøn yem pirø umbu wanrrab køn cha.

⁴¹ Tru Nínive ciudasrø misaamerabe Tiuswei tru maig kønrrabigwan asha maram kwalømbe kenamisrtrun cha, tru møin kwalòm misaameran kaiyu pønrsønrrab. Kaguende nínivesreeløbe Jonás eshkaigwan møra, nømui kaig mariilan isua møra, Tiusweimay lliraig køn cha. Inchen yu pasrabiibe Jonás lataitø kømø, mas nuig kur cha.

⁴² "Tru ambø umbu pirausrø reinagucha Tiuswei tru maig kønrrabigwan asha maram kwalømbe kurrønrrun cha. Incha nøbe tru møin kwalòm misaamera ñimun møra melønrrai maringarunrrun. Kaguende nøma purø yab-srøngurringuen pirau arrig købig køn, Salomón, tru purø kusrebig wamindigwan mørtrab. Inchen yu pasrabiibe Salomón lataitø kømø, mas nuikken kur chibig køn.

Kwaimandzig møweinumay katøle arrub

(Lc 11.24-26)

⁴³ 'Kan trømbøig maringarub kwaimandzig møweinukkurri webippe, chugøben purmerasrø isramig lab uña, yandø wetørranrrab kaimappe, treg isun:

⁴⁴ "Katø nai yamay inrrab cha, na chugurri webarrua arrinumaytøwei". Incha katø arruabe, tru mowane kan yawan chiguchagaig chishtø paluuncha tamara pasrig lataig wetørranrrun cha.

⁴⁵ Incha ippe, katøgan kwaimandziimera, nø lataguen kømø, mas larrø trømbøig marøbelan sieteba tulundzuna, søteeløba trubalatø tru møweinig purrønrrab kebamrrun cha. Inchen tru møøbe yandø srabebe mas purø kaikken kørromisrtrun cha, tru srøsrø lataitøguen kømø. Inchawei i møin kwalòm misaameran kailan treetøwei purainrrun— chibig køn Jesúsbe.

Jesúswei usrimba, nui nuneløba

(Mc 3.31-35; Lc 8.19-21)

⁴⁶ Jesús misaameran waminchib srø pasramne nui usrimba, nui nuneløba pua, nøba waminchig kui wambiitø pønrrabelø køn.

⁴⁷ Inchen møikkøsrøn Jesúswan eshkabig køn:

—Ñui usrimba, ñui nuneløba wambig pønrran cha, ñiba waminchab ñun payib.—

⁴⁸ Inchene Jesúsbe tru eshkabigwane trenchibig køn:

—¿Nai usri, nai nuneløbe mumera køh?— cha.

⁴⁹ Inchabe nui kusrenanøb pera uniilan kwaneshkab trenchibig køn:

—Nai usri, nai nuneløbe iilø køn cha.

⁵⁰ Kaguende møikkøben nai Møskai srømbalasarø wabig maig martrai karuben, treg marøbig, triube sí, nai nuneq, nai nuchag, nai usrin køn— cha.

13

Kan ellmarøb kwallibigwan 'øyeeg lataitøwein køn' cha, kemesra wamindig (Mc 4.1-9; Lc 8.4-8)

¹ Tru kwalømdøwei Jesús yaugurri webya, nu pisu menda wamisrøbig køn.

² Inchen misag truba nu tulundzunikkurri, Jesúsbe kan barcoyu kebya wamisren, maya misaabe tru pisu mendatø pønrrabelø køn.

³ Inchen nøbe waminchib pølbærøbig køn 'øyeeg lataitøwein køn' chib wamindiiløtøga chineh kemesra kusrenanøb.

Incha trenchibig køn:

—Kan kwallibiima tsurøb kwallchab webyan cha.

⁴ Incha tsurøb ibene, kanbalø yellbe mayu kørrøben, illimera amrrua, man cha.

⁵ Katøganbaløbe sruurrøldø pirau pirø tre chiganug kørra, pirø palatiikkurri tru yellbe kal-lappe, petø kal-labendø,

⁶ pørr webarruabe, mergurangaruben, srøl tre chigaig kua, mul-laptindan cha.

⁷ Katøganbalø yellbe kal shau utu kørrøben, kalmera nørrørab mendappe, chab kasrøb tsibisan cha.

⁸ Inchen katøganbalø tab pirau kørrabiibe si, tabig ellmarig misra, møiløbe kan yellgurrindø mamig trulzheelø cien niguen, møiløbe sesenta niguen, katøganløbe kan trulzhikkurrindø treinta nigan cha.

⁹ ¡Kalu pønsraibe, mør!— chibig køn.

Mandøgurri 'iilan øyeeg lataig køn' cha Jesús wamindig

(Mc 4.10-12; Lc 8.9-10)

¹⁰ Inchen nui kusrenanøb pera uniiløbe Jesúsuan kemalla, trenchib payibølø køn:

—'Øyeeg lataitøwein køn' chib, ¿misaamerane chindimba øyamay waminchigu?— cha.

¹¹ Inchene Jesúsbe trencha løtabig køn:

—Srømbalarø Tiusbe nø ashib karub wainug mu asiimíig tøgagúilan ñimun ashchai tranan cha. Trune katøganelane treeg kømøn cha.

¹² Kaguende tøgagüwane masken tranen, uñchaguen tøgagønrrun cha. Trune chigaigüwane nui lamøtiig tøgagügwanguen kerranrrun cha.

¹³ Inchawei nabe 'øyeeg lataitøwein køn' chib wamindiiløtøga chineh kemesra waminchar chibig køn. Kaguende: nømbe ashendø, ashmøn cha,

mørendø mørmøwei, ni katø chigüinguen mørmøwei indan cha.

¹⁴ Inchawei nømune øyeeg køben, Tius maig karuigwan eshkabig Isaías øyah wamindig ciertonwei nebun cha:

Maya, maya mørendø, ni chi tainguen mørmønrrun cha.

Ashippe, ashendø, chigüi ashmønrrun cha.

¹⁵ Kaguende i misaamerai manrøbe larrø tranrreelø srug lataig misrin køn cha.

Kalumera, kabmera kasrailø tøgar køn cha,

ashmøwei, mørmøwei,

ni chi tainguen mørmøwei,

nui may amrrumøwei inchai,

katø na tamariilø kømøwein kønrrain taig.

¹⁶ Trune ñimbe mayanguen tab kuilø køn, kaguende ñimui kabmera Tiusweimburabigwan ashib, kalumera nuimburabigwan chigüi mørøb inchibelø tøgarbe.

¹⁷ Inchawei nabe ñimun cierton trenchar: Tius maig karuigwan eshkabelø køben, sølgandø tabig marøb misaamera køben, truilø truba nu, i ñim asigwan asinrrabna kui inchendø, ashmuig køn cha. I ñim mørigwan mørinrrabna kui inchendø, mørmuig køn cha, trenchibig køn.

*'Øyeeg lataig kòn' cha, kemesra wamindigwan Jesús tab eshkab
(Mc 4.13-20; Lc 8.11-15)*

¹⁸ 'Au, ñim mōray, tru kwallibigwan 'øyeeg lataitøwein kòn' cha, kemesra wamincha pasrigwan na eshkanrab.

¹⁹ Tiuswei tru srø wam srømbalasrø karub waisriigwan mōrendø, chigüinguen mōrmeelane tru nugwaimandziibe arrua, tru manrrau ellgwaigwane kerran cha. Inchen truiløbe tru yell mayu kørrelø latailø kòn.

²⁰ Inchen tru sruurrøldø pirau pirø tre chiganug kørreb yellbe tru misag Tiuswei wamwan tru urastøbe truba tab kui mörøb utabelan trunun eshkabig kòn.

²¹ Inchendø srøl tre umbu keetiimíg kua, maya yanaguen amøñimøn. Incha tru Tiuswei wamgurrindø chigøben puben, katø chigøben kaig nebub arruben, mõi møin kørnan.

²² Inchen tsuren, tru kal shau utu kørreb yellbe øyeeg misagwan eshkabig kòn: Tiuswei wamwan mörøppe, mōrendø, i pirau chine købigwan menrra isubiibah, nømui chine palømø tøgagüilø purø tabig lataig asønaikkurrimbatø, tru Tiuswei wamwan mörigwane kerrigu truitø kasrøben, chigucha nømbe ellmarig mismøn cha.

²³ Inchen tru yell tab pirau tsuriiløbe tru misag Tiuswei wamwan mōra, katø tab chigüi mōra, truike sí, tab ellmarig misrigwan eshkabig kòn. Truiløbe tru kan yellgurrindø mamig trulzheelø cien, kaneløbe sesenta, kaneløbe treinta nigabelø latailø kòn— cha, trenchibig kòn Jesúsbe.

Tirigu utu arrucillu kal-labigwan kemesra wamindig

²⁴ Incha Jesús katøgan 'øyeeg lataitøwein kòn' cha eshkawa pasrøb trenchibig kòn:

—Srømbalasrø Tius nø ashib karub waibe kan møg nui trau tab yellwan tsuri lataig kòn cha.

²⁵ Inchen søteeløba kib waramne nun kan ashig kømui inchibig arrua, tirigu tsuri utu kaig yellwan wiitappa, yan cha.

²⁶ Inchen tirigu nørørawa, urø weetøbene, tru kaig kau arrucillugucha kenamisrøptindan cha.

²⁷ Inchen tru tra puaigwei marøb melabeløbe nune trenchinrrab ambubelø kòn: “Señor, ñi trau tru tsurig yellbe tabig købendøbe, ¿tru kaig kaube chugurrin kal-lah?” cha.

²⁸ Inchene tru ellmarig puaibe trenchibig kòn: “Mutø tsaliig øyeeg mariinrrun” cha. Inchen truyu marøb melabeløbe trencha payibelø kòn: “¿Kabe tru kaig kauwan nam kitønrrab ambamøh?” cha.

²⁹ Inchene nøbe trenchibig kòn: “Kagøbasay cha. Inchippa kaig kauwan kitønrrab incha, tirigungucha tøgga kitabgun cha.

³⁰ Trembe paramnegatig trubalatø ka nørørabasay chibig kòn. Tru uras tru tulishinrrabelan øra, tru kaig kauwanmerrig tulisha, lusrø mara, pattrai karumønrrun cha. Incha tirigune nai tirigu esegainug keeringarumønrrun”, tan— cha, trenchibig kòn Jesúsbe.

*Murtasa yellwan kemesra wamindig
(Mc 4.30-32; Lc 13.18-19)*

³¹ Jesús katøgan 'øyeeg lataitøwein kòn' cha, kemesra waminchibig kòn:

—Srømbalasrø Tius nø ashib karub waibe kan murtasa yell lataig kòn cha, kan møg nui trau tsurig.

³² Maya yellmerai utu purø lamø yellzhig købendø, nurappe, tru ellmarig shush tusrmerai utu mas nuibe murtasa køn cha. Yandø kan tusrburabig misren, nuig køptø, illimera pala amøñibeløguen amrrua, tru srarmerayu le marøbelø køn— chibig køn.

*Levaduran 'øyeeg lataitøwein køn' cha, kemesra wamindig
(Lc 13.20-21)*

³³ Katø Jesúsbe katøgan 'øyeeg lataitøwein køn' cha, kemesra waminchibig køn:

—Srømbalasrø Tius nø ashib karub waibe levadura lataig køn cha, kan ishuma pa arruba harina sømara, levaduran pusren, maya sømarigwan trunun ørøba pulingarub lataig køn— cha.

*Mandøgurri 'iilan øyeeg latailø køn' chib Jesús kemesra wamindig
(Mc 4.33-34)*

³⁴ Jesúsbe misaamera nørrø pasrabigwan kerrigu iigwan kusrenanøppe, 'øyeeg lataitøwein køn' chib wamindiitøga eshkabsulu waminchibig køn. 'Øyeeg lataitøwein køn' cha, eshkawa pønsra kømuppe, waminchimig køn.

³⁵ Øyeeg nebuppe, tru Tius maig karuigwan eshkabig maig taig nebunrrain kuig køn, tru øyah taig:

Waminchib kusrenanøppe, 'øyeeg lataitøwein køn' chibgøba eshkað wamin-damønrrun cha.

Tius pirøwan marøb uraskurri sørig pønrrabelan tørgandø eshkað wamin-damønrrun cha.

Tirigu utu arrucillu kauwan kemesra wamindigwan 'øyeeg lataitøwein køn' cha, Jesús tab eshkað

³⁶ Incha Jesús tru nu søtø misagwan ungwa cha, yau kebibene, nui kusrenanøb pera uniløbe kemallabe trenchibelø køn:

—Tru ellmarinug kaig kauwan 'øyeeg lataitøwein køn' cha, namun eshkað wamindigwan tab eshkarra— cha.

³⁷ Inchene Jesúsbe trenchibig køn:

—Tru tab yellwan ellmarøbiibe Møg Misra Arrubigwan eshkaðig køn cha.

³⁸ Inchen tru ellmarig trabe yu pirau maya misagwan eshkaðig køben, tru tab yellbe Tius nø ashib karub waigwei ureemeran eshkaðig køn cha. Inchen tru kaig kaube nugwaimandzigwei ureg køn cha, eshkaðig køn.

³⁹ Inchen tru ashig kømui inchib tsaliig tru kaig kauwan ellguawa pasrøbiibe nugwaimandzigwan eshkaðig køn cha. Inchen tru ellmarig srønøbe sraðe kwaløm patsønrrabigwan eshkaðig køben, tru ellmarigwan tulishibeløbe ångelesmeran eshkaðig køn cha.

⁴⁰ Tru kaig kauwan tulisha, nagu pattraì kebetab lataitøwei sraðe kwaløm patsab uraskucha øyeeg punrrun chibig køn.

⁴¹ Tru Møg Misra Arrubiibe tru katøganelan kaig maringarub pønrrabelanba, ke kaigwandø marøb pønrrabelanba nø ashib karub wainukkurri truilane mayamba nui ångelesmeran tulishinrrai ørtrun cha.

⁴² Inchen nu nag naarabigu kebusren, truyube kishib, trugulmeran tsat-samig kønrrun cha.

⁴³ Inchen tru sølgandø tabig marøbeløbe nømui Møskai ashib karub waisrømbe kan nøsig pilab latailø pilønrrun cha. ¡Kalu pønsraibe, mør! chibig køn.

Purø tabig søra tøgagúigwan kemesra wamindig

44 'Srømbalasrø Tius nø ashib karub wainuguiibe kan chigøben truba tabzhigwan pirø umbu søra pasrig lataig køn. Kan møg tru tabig sorig pasrabigwan wetørrawa, katøle truyutøwei søra pasran. Incha truba kasrag ya, nui chi tøgagúilan kerrigu yanabe, tru pirøwan penaptindan.

Tørguebilab sruuzheelø truba nuweyig lataitøwein køn cha, kemesra wamindig

45 'Katø tru srømbalasrø Tius nø ashib karub wainuguiibe kan tørbilab sruuzheelan lawa, penab, yanøb inchibig lataig køn cha.

46 Incha kan tørbilab sruuzhig truba truba tabzhig nuweyig wetørrappe, ya, nui chi tøgagúigwan kerriguh yana, tru purø tab sruuzhigwan penan, chibig køn.

Atarraya lataitøwein køn cha, kemesra wamindig

47 'Katø tru srømbalasrø Tius nø ashib karub wainuguiibe kan atarrayan maryu keguchen, chi peskaugurrimbunø kemørøb lataig køn cha.

48 Incha atarrayayu peskau netsabene, tru peskabeløbe pi menda wesrua, peskaumeran lawa tarømartrab purramisran cha, tabelane tasinyu pusrøppe, kailane petaptø petan cha.

49 Srabe kwaløm patsab uraskucha øyeetøweih purainrrun, chibig køn. Inchen ángelesmera webamrrun cha, kailanba, sølgandø tabig marøbelanba nørøø tarømartrab.

50 Incha kailane nu nag naarabigu kebetønrrun cha, truyube kishib, trugulmeran tsatsamig kønrrun— cha.

Kusrenaniilø kølliiba, srøiløba

51 Incha Jesúsbe trencha payibig køn:

—¿Nimbe iilan kerriguba chigúi mørgueh?— cha.

Inchene nømbe:

—Señor, øø— cha, løtabelø køn.

52 Inchene Jesúsbe trenchibig køn:

—Mutøgucha Moisés pørigwan kan kusrenanøbig srømbalasrø Tius nø ashib karub wainuguigweimburab kusrebig misrabe, kan ya puai g mōskai latawei nui tabzheelø esegaig tøgagúinukkurri srøilø køben, kølleelø køben wesrub lataitøwei maran— cha.

Jesús Nazaretsrø

(Mc 6.1-6; Lc 4.16-30)

53 Yandø Jesús tru øyeeg lataitøwein køn' chib iilan eshkab chab waminchabe, truyugurri webya ibig køn.

54 Incha nuim pirausrøndøwei puabe, tru judíosmera tulundzuni yau kusrenanøb mendøbene, misaamerabe truba kwaara ashib trenchibelø køn:

—¿I møøbe øyeeløbe churre øyeeg kusreh? cha. ¿Katø tru maramburab mariilan chincharre marerah? cha.

55 ¿Iibe tru tsiimeratøga chine marøbigwei nusrkai, katø nui usrimbe María taig kømuitarru? cha. ¿Santiagoin køben, Joséwein køben, Simónwein køben, Judaswein køben nuneg kømuitarru? cha.

56 ¿Yamba nui nuchaløgucha kerriguba namui ututøwei warabelø kømuitarru? cha. ¿Trube, kerrigu iigwane i møøbe chugurrinre øyeelø tøgauerah?— cha.

57 Treeg isua nune kaashibelø køn. Inchen Jesúsbe trenchibig køn:

—Chutøgucha Tius maig karuigwan kan eshkabigwane tab indan cha. Inchendø nui piraeløba, nui yaeløba, tru iløbe chi tab inchimøn— cha.

⁵⁸ Incha truyube maramburab mariilø tre marmíig køn, kaguende truyu misaamerabe nømui isubigwan nuinug pasrmuikkurri.

14

Juan Bautista kwaig
(Mc 6.14-29; Lc 9.7-9)

¹ Tru kwalømmerrawan Galilea pirau karubig Herodesbe Jesúsweimburabgøba wamindi mørabe,

² nui karuindiig melabelane trenchibig køn:

—Truibe tru Juan Bautista kuinrrun cha, kwailai utgurri katø kurriinrrun cha. Incharre øyeeg maramburab maramig tøgagig kuinrrun— chibig køn.

³ Kaguende Herodesbe tru Juanwan kemøringarua, lusra, kailan keeri yaumay kertrai srua ambingaruig købig køn, tru nui nuneg Felipei srai Herodiaskurrindø.

⁴ Kaguende Juan Bautistabe Herodeswane trendaig købig køn:

—Tru Herodíaswan ñui srai mara tøgagømime merig pasran— cha,

⁵ Herodesbe Juanwan kwetchab inchendø, misagwan køriimatabig køn, kaguende mayeeløba Juanbe Tius maig karuigwan eshkaig kui kørewa køben.

⁶ Inchen tru Herodeswei kal-lain kwalømwana isub kasrag waram kwaløm, tru Herodíaswei nimbasrbe tru linchai eshkailø mayeelø purrabelai merrab pailaben, Herodeswane truba tabig asønaptø, tru srusrane:

⁷ —¡Katø, tranmø kømø! chi miabendø tranrrumøn— chibig køn.

⁸ Inchen tru srusrøbe usri øyeeg chinrrig cha eshkaig køppe, Herodeswane trenchiptinchibig køn:

—Juan Bautistai turwan kan platilloyu tranrra— cha.

⁹ Inchen reybe truba isui inchendø, tru mayeelø lincha purrabelai malau, treeg tranrrumøn cha, tranrrab misrig køppe, traningarubig køn.

¹⁰ Incha Juanbe kailan keeri yau waben, Herodesbe turwan paringarubig køn.

¹¹ Inchen tunwan para, kan platilloyu srua ya, srusran tranen, nøbe usran tranøbig køn.

¹² Inchen Juanwei mendig amøñibeløbe amrrua, Juanwei asrwan srua amba, sørabelø køn. Incha Jesúswan trunun eshkanrrab ambubelø køn.

Tratrø mil misagwan Jesús manrrai tranø
(Mc 6.30-44; Lc 9.10-17; Jn 6.1-14)

¹³ Inchen Jesús Juanwan kweetsin kui wammørabe, truyugurri nøtø kan barcoyu nøøøø mu misag warab waraimøsrømay ibig køn. Inchen misaamerabe truba nu wammørøppe, pueblomerayugurri webamba, nuimay katsikkatø ambub mendabelø køn.

¹⁴ Inchen Jesús barcoyugurri pinaya, truba nu misag pasrai ashabe, nømun lastima køben, nømui utu kwanrreelan tamarøbig køn.

¹⁵ Inchen yandø mawabrab købene, nui kusrenanøb pera uniiløbe Jesúswan kemallabe, trenchibelø køn:

—Yube mu misakkanug køn cha. Inchagucha yandø maabenwein køn cha, misagwan amrrai ‘ungwa’ chi cha, yamera pønrrabsrø amba, nømuyasig mamig pena manrrain— cha.

¹⁶ Inchene Jesúsbe trenchiptinchibig køn:

—Chi ambamibe palømøn cha. Manrrai ñim mannay— cha.

¹⁷ Inchene nømbe trenchibelø køn:

—Nambe tratrøgatø pirrimbah, pagatø peskaubatø tøgaguer— cha.

18 Inchine Jesúsbe trenchibig køn:

—Yu srúa amrrurray— cha.

19 Incha tru nu misagwan pubilayu purramisingarua, tru trattrogatø pirrimeranba, pagatø peskaumeranba, tasku muta, srømbalaneb neesha, Tiuswan ‘mayanguen pay’ chibig køn. Incha pirrimeran pirisha, nui kusrenanøb pera uniilan tranen, nømbe misagwan pirishibelø køn.

20 Inchen mayeeløba øska ma kørømisren, katøgucha pitis undailan tasinmerayu netsøbatø doce tulishibelø køn.

21 Inchen tru mabeløbe ishumburwan, uregwan munchimuben, møgueløtø trattro mil købig køn.

Jesús pi palawan arrub

(Mc 6.45-52; Jn 6.16-21)

22 Incha yandø Jesúsbe nui kusrenanøb pera uniilan pisu ambøgatøsrømay merrab amrrai barcoyu nebamingarubig køn, tru nu misagwan ‘ungwa’ chib pasrappatø.

23 Incha yandø misagwan chab ‘ungwa’ chabe, nøbe nøtø kan tunbalasrø Tiusba waminchab ya, yem køben nøtø trusrø wabig køn.

24 Trune yandø barcoyø pisuyu yabsrønguen iben, pi welarmerabe barcongøba megambubig køn, kaguende isiibe nømui malaugøba megambub ichen.

25 Inchen løtsøzhig yemdø Jesús pi palawan katsikka nømuimay kemallib ibene,

26 nui kusrenanøb pera uniilø pi palawan arri ashippe, truba kwaarøb kørig købiitø trenchib trashibelø køn:

—Kan møsig køn— cha.

27 Inchen Jesúsbe møi møi nømunø waminchib trenchibig køn:

—jKørmø, mur isua purray! cha. Na kur cha. Kørig kui inchimøtay— cha.

28 Inchine Pedrobe trenchiptinchibig køn:

—Señor, trube, ñi kuabe, nan ñuimay pi palawan: “Amø” chirra— cha.

29 Inchine Jesúsbe trenchibig køn:

—Amø pøš— cha.

Inchen Pedrobe barcoyugurri pinaya, pi palawan Jesúsweimay ib mendabig køn.

30 Incha tru mur isig ichibigwan tab ashippe, køriimataptinchibig køn. Inchen nune asentab mendaptinchen trashibig køn:

—jSeñor, wesurra!— chib.

31 Inchine Jesúsbe møi møi tasigu kemørabe, trenchibig køn:

—Ñi kui ñui isubigwane nainug ke ka kømønrraindiitø pasra tøgag cha. ¿Chindimbarre kaimamuitamab isugu?— cha.

32 Incha barcoyu nebamben latatø, isiibe wasrøngandø pasramisrøptinchen,

33 barcoyu purrabeløbe nune køriibala tabig waminchib trenchibelø køn:

—Isa kømø, ñibe Tiuswei Nusrkain køn— cha.

Jesús Genesaretsrø kwanrreelan truba nu tamarøb

(Mc 6.53-56)

34 Incha yandø tru pisuyu chab larraamba, Genesaret pirausrø pubene,

35 misaamera Jesús kui nebua ashabe, wammøøsrøngarubelø køn tru pirau ørøba. Inchen nuimay maya kwanrreelan srúa amrrua:

36 —Ñi pala itøgüewa kuig urøzhigwan namun katørabashcha— chib, rugabelø køn.

Incha mayeeløba katørabeløbe tabig kørørmisrøbelø køn.

15

Møwan trømbøig kaig marøbiibe ¿chi kerah?

(Mc 7.1-23)

¹ Møiløgøsrøn Jerusalénsrøngurri amrrubelø fariseosmeraba, Moisés pørigwan kusrenanøbeløba Jesúswan kemallabe, trencha payibelø køn:

² —¿Ñui kusrenanøbe pera uniiløbe namui merrabsreelø trendø treeg marøb tøgagúigwane chindimbarre itøbunabelø køh? cha; pøø mappe, nømbe tasigwan kinømø mabelø køn— cha.

³ Inchene Jesúsbe trencha payibig køn:

—Trube, ¿ñimgucha Tius maig maramigwan martrai pønsrailane chindimbarre marmeelø kogue cha, ñim ñimuimburab trendø treeg marigwan marøg købiitø?

⁴ Kaguende Tiusbe trendaig køn: “Ñui møkai, ñui usrane maig købash inchimø, tab indamig køn” cha. Katø: “Møskawan kui, kabe usran kui trømbøig nebunrrai wamabigwane trunune kwanrrai pasrig kønrrun” cha.

⁵ Trune ñimbe trenchibelø køn: “Kan møøbe møkawan kui, kabe usran kui trenchinrrun cha: ‘Na ñimun purugumig tøgagúigwan Tiuswan tranar cha. Ñimune purugunrrab kaimamønrrun’ chinrrun cha.

⁶ Incha møikkøben øyee taikkurrimbe, yandø møkawan, usrane lastima ashib purugumibe chi palømøn” cha, ñimbe trenchibelø køn cha. Øyee marøppe, ñimbe Tius martrai karua pasrigwane chigucha kømíig kui lataig mara srua køn cha, ñimui trendø treeg marøb tøgagúilan marøg køptø.

⁷ ¡Palatø tabelø! Tius maig karuigwan eshkabig Isaías ñimuimburab sølwein tain køn øyah chippe:

⁸ I misaamerabe nan ka triitøgatø tab inndan cha.

Inchendø nømui manrrøbe nainukkurrimbe yab pønrran cha.

⁹ Nan køriibala tabig waminchib taibe chiweingucha chi tabig marig kømøn cha,
møguelø martrai karua pønsrailan øyee maramig køn chib kusrenanøb.

¹⁰ Incha Jesús misagwan nuimay wama trenchibig køn:

—Kalutøga møøb, katø chigúi møøb inday cha.

¹¹ Møwan trigu kebibiibe nune chi kaig trømbøig marmøn cha. Treeg kømøtø, møwan kaig trømbøig marøbiibe trigugurri webibig, truike si, nune trømbøig maran— chibig køn.

¹² Inchene nui kusrenanøb pera uniiløbe Jesúswan kemallabe trenchibelø køn:

—¿Ñi øyee tailan fariseosmera mørabe, namig mørigwan ashtirru?— cha.

¹³ Inchene nøbe trenchibig køn:

—Chi tusr køben nai Møkai srømbalasrø wabig ellgwaimúigwane srølbañau kitig kønrrun cha.

¹⁴ Nømunne kagøbasay cha. Kaguene nømbe kabgailø katøgan kabgailandøwei srua ambubelø køn cha. Kan kabgaima katøgan kabgaigwan srua yabe, trabyu pailøba kegørrønrrun— cha.

¹⁵ Inchene Pedrobe Jesúswan trenchibig køn:

—Tru ‘øyee lataitøwein køn’ cha, kemesra wamindigwan namun tab eshkarra— cha.

¹⁶ Inchene Jesúsbe trenchibig køn:

—¿Ñimgucha chigúinguen mormowa pønrrøtirru cha?

17 ¿Chitøgucha trigu kebibiibe patsau kørraigig kui ashmeelø køtirru? cha, katø asrugurri webinrrab.

18 Trune trigugurri webarrubiibe si, møwei manrraugurri arrubig kua, truipe nune trømbøig marøb mindisan cha.

19 Kaguende møwei manrø umbugurrimbe kaig isuilø køben, kweet-samelø køben, kasharawarmera itølulamig køben, kasharameelø købendø ishumburba, møgueløba trømbøig maramelø køben, nilamelø køben, isa wamindiilø køben, tsalø wamiilø køben, øyeelø kerriguh werrun cha.

20 Iiløbe si, mowan kaig trømbøig maran cha. Inchen manrraptø tasigwan kinøमितøbe mowane chi trømbøig marøb mindishimøn— cha, trenchibig køn Jesúsbe.

*Kan ishug peg pirausriig Jesúswan køreig
(Mc 7.24-30)*

21 Incha Jesúsbe truyugurri tarømisra, Tiroba, Sidónba tru ciudadamera pønrrab piraumay ibig køn.

22 Inchen kan ishug canaansriig tru pirau tsubiibe arrua, Jesúswan trenchib wamab kemallibig køn:

—Señor, merrabsrø Davidwei Nusrkai, nan lastima ashcha chib. Nai nimbasrbe kan kwaimandzig ni mumayguen tab uñchaingaug indinab megan— cha.

23 Inchen Jesúsbe chigucha løtømuben, nui kusrenanøb pera uniiløbe kemalabe, trenchibelø køn:

—Tiusmanda, ishuwane ‘inrrø’ chi cha, namui wendautø trashib arrun— cha.

24 Inchene Jesúsbe trenchibig køn:

—Nane Israel misaamerai utu tru ubisha trubiilø latailaimaytø ørig køn— cha.

25 Inchene tru ishuube nui merrab arrua, tømønrsrøb trenchibig køn:

—¡Señor, purugurra!— cha.

26 Inchene Jesúsbe trenchibig køn:

—Pirriwan uregwan kerrawa, wera-ureezheelan kebusramibe søl kømøn— cha.

27 Inchene ishuube trenchibig køn:

—Øø, Señor, treebe treegwein købendø, wera-ureezheeløguen nømui puarwei mishatsigugurri kørnzbigwan man— cha.

28 Inchene Jesúsbe trenchibig køn:

—¡Ishug, ñui isubigwan nainug pasra tøgagúibe purø nuig køn! cha. Ñi maig palain pasraig, treeg kønrrun— cha.

Inchen tru uraskurri nui nimbasrbe tabig kørromisrig køn.

Kwanreelø truba nørøwan Jesús tamarøb

29 Jesús truyugurri webya, Galilea pisu puluwan purayabe, kan tunbalsrø nebya, truyu wamisrøbig køn.

30 Misag truba truba nørø nø wainug tulundzuna, cojosmera køben, kabgailø køben, asru chiyu køben kesruilø køben, waminchab kaimabelø køben, katøgan chi kwanrø køben tøgarmara truba nu treelan køben Jesúswei merrab srua amrrua, pønrsrøben, nøb tamarøbig køn.

31 Treekkurri tru nu misaabe ashippe, ke kwaara asha kørromisrøbelø køn, waminchab kaimabeløbe wamindamba, asru chiyu køben kesruiløbe tabig

kørrømisramba, cojosmerabe ambamba, kabgailøbe asamba indi ashabe, nømbe Israel misaamerai Tiuswan truba tabig waminchibelø køn.

Jesús pib mil misagwan manrrai tranøb
(Mc 8.1-10)

³² Incha Jesús nui kusrenanøb pera uniilan wamabe, trenchibig køn:

—Misaameran lastima køtan cha. Chabguen yu pøn kwalømguen naba warøwa, yandø chi mamig chigar køn cha. Nømui yamay chi mameeløbe ambashig kømøtan cha. Kaguende mayutø pesannabgun— cha.

³³ Inchene nui kusrenanøb pera uniiløbe trenchibelø køn:

—Ya nu misagweimbe ¿nambe chinchamamig wetørrayasamø? cha, ya yu mu misag warab warømsrømbe.—

³⁴ Inchene Jesúsbe payibig køn:

—¿Ñimbe pirri mam tøgagøgue?— cha. Inchene nømbe:

—Pirri sietebah, katø mamdø peskau-ureebatø tøgaguer— chibelø køn.

³⁵ Inchen nømbe misagwan pirau purramisingarua,

³⁶ nui tasigu tru pirri sietenba, peskaumeranba muta, Tiuswan 'mayanguen pay' chabe, pirisha, nui kusrenanøb pera uniilan tranen, nømbe misagwan pirishibelø køn.

³⁷ Inchen mayeeløba øska ma kørrømisren, katøgucha tru pirisaig undailan tasinmerayu sietø netsøbateelø tulishibelø køn.

³⁸ Inchen tru mabeløbe ishumburwan, uregwan munchimuben, møgueløtø pib mil købig køn.

³⁹ Incha Jesúsbe yandø misagwan chab ungwa chabe, barcoyu kebya, Magadan pirausrømay ibig køn.

16

Fariseosmeraba, saduceosmeraba kan mana asiimíig martrai miab
(Mc 8.11-13; Lc 12.54-56)

¹ Fariseosmera køben, saduceosmera køben Jesúswan ashchab ambabe, nun chiyugøben kebenøsrkøg køptø, mana asiimíig miabelø køn Tius nøba pasrain kui ashchab.

² Inchene Jesúsbe trencha løtabig køn:

—Yandø maaben misrene, ñimbe øyah chibelø køn cha: “Tab kwaløm kønrrab asønan cha. Kaguende srømbalabe ke pigøzhig pasran” cha.

³ Inchene løtsøbe ñimbe trenchibelø køn cha: “Møimbe kaig kwaløm kønrrab asønan cha. Kaguende srømbalabe ke wañindø kasrain pasran” cha. Pøs pala wañi maig pasrai asha, ñim 'øyeeg kønrrun' chib, 'øyeeg kønrrun' chib waminchibeløbe, ¡Møin kwaløm chi pureb arrubigwane, trube, 'øyeeg kønrrun' chinrrab wetøgørrørrrab kaimabeløbe mailø køguelø cha.

⁴ Møin kwaløm kaig misaamera, kan kasharawar peebe itøluløpteelø lataitøwei Tiusbatø pønrrømø misaamera kailø, Tius naba pasrain kui ashchab marig miatan cha. Inchendø asha kønrrai katøgan chigøben peg kenamara tranmøtø, tru Jonásweiwandø eshkamønrrun— cha.

Incha nømune pønrramnetø, iptinchibig køn.

Fariseosmeraba, saduceosmeraba kusrenanigwan ashiptø kuy
(Mc 8.14-21)

⁵ Nui kusrenanøb pera uniilø pisu ambøgatøsrø chab larraambabe, pirri srua amrrumigwan pesan amrrubrain kui isuptinchibelø køn.

⁶ Inchen Jesúsbe trenchibig køn:

—Au, ñimbe levadura fariseosmeraiwanba, saduceosmeraiwanba ashiptø kuy— cha.

⁷ Inchene nui kusrenanøb pera uniiløbe kangurrin kangurri trenchibelø køn:

—Nam pirriwan srua amrrumuimbarre trenda chindah— cha.

⁸ Inchene Jesúsbe nøm trenchib purrai ashabe trenchibig køn:

—¿Chindimbarre kangurrin kangurri ‘pirringar ker’ chib purrøgue? cha.

Ñim kui ñimui isubigwan nainug ke kagømønrraindøzhig pasra tøgar cha.

⁹ ¿Katøgucha ni chigúinguen mømmeelø kø chindah? cha. ¿Tru na trattrøgatø pirriwan trattrø mil møgelan pirishiben, undailø mam tasin tulisaiowan ni trunundøguen ke isumeelø kø chindah? cha.

¹⁰ Katø tru siete pirriwan tru pib milwan pirishiben, ¿tru unchibigwan mam tasin tulisaiowan isumeelø kø chindah? cha.

¹¹ ¿Ñimbe mandeelø køh cha, chigúinguen mømønrrappe, na pirriwan waminchib wamubendøbe, nabe tru levaduran fariseosmeraiwanba, saduceosmeraiwanba ashiptø kuy cha, nabe trunun waminche?—

¹² Inchen nømune ‘tru pirriyu pusri levaduran ashiptø kønrrigay’ chimøtø, ‘tru fariseosmeraba, saduceosmeraba kusrenaniilan ashiptø kønrrigay’ tain kui yandø wetøørrabelø køn nømbe.

Pedrobe Jesúsuan: “Cristo køn” chib

(Mc 8.27-30; Lc 9.18-21)

¹³ Jesús Filipino pirau Cesareasrø puabe, nui kusrenanøb pera uniilan payibig køn:

—¿Misaamerabe Møg Misra Arrubigwane mu køn tah?— cha.

¹⁴ Inchene nømbe trencha løtabelø køn:

—Møiløbe ‘Juan Bautista køn’ chiben; møiløbe ‘Elías køn’ chiben; møiløbe ‘Jeremías kuinrrun’ tan cha, kabe møikkøben ‘Tius maig karuigwan eshkabig kui’.—

¹⁵ Inchene nøbe trencha payibig køn:

—¿Trune ñimbe nane mu køn chinrrague?— cha.

¹⁶ Inchen Simón Pedrobe trencha løtabig køn:

—Ñibe tru Cristo, Øsig wab Tiuswei Nusrkain køn— cha.

¹⁷ Inchene Jesúsbe trenchibig køn:

—Ñibe mayanguen tab kuig køn cha, Simón Jonáswei nusrkai. Kaguende ñune iigwane yaumbaig, animbaig, ka møg kenamarøb eshkamøtø, nai Møskai srømbalasrø wabig eshkan cha.

¹⁸ Inchen nagucha ñune, ñibe Pedro køn char cha. Nai iglesian i srug pala mara pasramønrrun cha. Inchen kwamig kønrrai marøb pasrabigwei maramburab marøbikken tru iglesiane ni chinchaguen kananrrab kaimanrrun cha.

¹⁹ Srømbalasrø Tius nø ashib karub wainug llavimeran ñun tranamønrrun cha. Ñi yu pirau lusrøb lataig marene, srømbalasrøngucha lusrøb lataitøwei martrun cha. Ñi yu pirau pichib lataig marene, srømbalasrøngucha pichib lataitøwei martrun— cha.

²⁰ Incha Jesúsbe nui kusrenanøb pera uniilan mungøben eshka kønrrain kømø karua pasrøbig køn, nøbe tru Cristo kui.

Jesús nø kwamigwan eshka

(Mc 8.31-9.1; Lc 9.22-27)

²¹ Incha tru uraskurrimbunø Jesúsbe nui kusrenanøb pera uniilan ‘øyeeg kønrrabig køn’ cha, eshka mendabig køn. Nune Jerusalénsrømay yamig

nebuben, misagwan karubelø kōlli misaamera, sacerdotemeran karubelø kōben, Moisés pørigwan kusrenanøbelø kōben, truba truba kaig indinab megawa, kweetsig kōmig nebunrrun cha. Inchendø pøn kwalømyube katø øsiiranrrun chibig kōn.

22 Inchen Pedrobe nun nøørøsrø pera ya, murtø waminchib mendabig kōn:—Tius ashib wawa, Señor, ñun øyeeg puraimuimbe— cha.

23 Inchen Jesúsbe keeshabe Pedrone trenchibig kōn:

—Satanás, nainukkurri tarømisr cha. Ñibe nane peñchai ke ka srurreng-wangarub attan cha. Kaguende ñibe isuppe, Tius lataig isumøtø, møguelø isuimay isun— cha.

24 Inchabe Jesúsbe nui kusrenanøb pera uniilan trenchibig kōn:

—Møikkōben nai mendig uñig kōbene, nøasiitø nuimburabigwangøba isumøtø, nui kuruswan mutab, nai mendig arrum nebunrrun cha.

25 Inchen mõikkōben øsig kōmigwangøba isubiibe yandø pinab pinamig nebunrrun cha. Inchen nagurrindø kwabiibe managatig øsig kōmigwan wetørrawa, tøgagønrnun cha.

26 ¿Kan møg yu pirau chine kōbigwan kerrigu nuindø maringucha, nui øsig kōmigwan trubisaibe, chiwein kui tabig kōnrrab kø? cha. Kabe ¿kan møøbe kwamønrrophe, chi tranøbsruerah? cha.

27 Kaguende tru Møg Misra Arrubiibe Møskawei purø nuig tørguegwalmabigu nui ánglesmeraba arrua, møilandøgucha nøm maig marig kōben treeg tranrrun cha.

28 Pøs nabe ñimun cierton trendamønrrun: Møiløgøben yu purrabelø tru Møg Misra Arrubig nø ashib karunrrab attrab kenamisren, trunun nebua ashmøwatøbe, kwanrraamøn— cha.

17

Jesús ke peemayig misrøb

(Mc 9.2-13; Lc 9.28-36)

1 Øyeeg taig yandø trunewei kan kwalømdø paløben, Jesúsbe Pedronba, Santiagonba, nui nuneg Juanwanba nøørø kan pala tunsrømay pera ibig kōn.

2 Incha trusrø nømui merrab Jesúsbe ke peg lataig misrøbig kōn. Inchen nui maløbe nøsig lataig tørbilabig misren, nui kewagüiløbe puløzhig pilabig lataig misrøbig kōn.

3 Inchene mõimbe Moisésba, Elíasba, Jesúsba waminchib pønrrai ashiptinchi-belø kōn.

4 Inchen Pedrobe Jesúswane trenchibig kōn:

—Señor, nam yu pønrramibe purø tab kōtan cha. Ñi martrain kōbene, pøngatø ya-ureg na maramøh cha, kan ñui, kan Moiséswei, kan Elíasweingue.—

5 Inchen Pedro waminchib pasramnetø, kan wañi tørbilabig nømun pinøbulen, wañi umbugurri kan wam trenchibig kōn:

—Iibe nai Nusrkai undaaraig kōn cha. Nabe nuimburab truba tab kui war cha. Nune møray— chibig kōn.

6 Inchen iigwan møørøppe, nui kusrenanøb pera uniiløbe truba truba korig kuilø, maløwan pirau kebatamnegatig utsøbasrøbelø kōn.

7 Inchen Jesúsbe nømun kemalla katørab trenchibig kōn:

—Chi kōriimatømøtø, kurray— cha.

8 Inchen nøm kurraashene, mugucha kenamuben, Jesúswane nøtø pasrai ashibelø kōn.

9 Incha tru tunsrøngurri kørørrub amrruabe, Jesúsbe trenchib karubig kōn:

—Mungucha waminchib kōnrrab kōmø cha, tru asigwan, tru Møg Misra Arrubig kwailai utugurri øsiirawa katø kurrarnegatig.—

¹⁰ Inchen nui kusrenanøb pera uniiløbe Jesúswan payibelø kōn:

—Trube, treeg kōbene, Moisés pørigwan kusrenanøbeløbe ¿chindimba Eliasmerrig arrumig kōn tah?— cha.

¹¹ Inchene Jesúsbe trenchibig kōn:

—Eliásbe arrubwei inchun cha. Incha nøbe kerrigu katøyug tamara pønsrønrrun cha.

¹² Inchendø nabe trendamønrrun: Eliásbe arrubguen inchen, nune mu kui nebua ashmøtø, nōmun maig marøg kōbendø, marig kōn cha. Møg Misra Arrubikkucha treetøwei nōmui tasku kaig marinab meganrrun— cha.

¹³ Inchen nui kusrenanøb pera uniiløbe Jesúsbe tru Juan Bautistan wamindin kui wetøgørrabelø kōn.

Kwaimandzig tōga unan Jesús tamarøb

(Mc 9.2-13; Lc 9.28-36)

¹⁴ Misag truba nu pasrainug nōm chab pubene, kan møg pua, nui merrab tømbsnrabe, trenchibig kōn:

¹⁵ —Au, nai nusrkawan lastima ashcha cha. Kaguende pesannabig tōgaig kua, truba trømbøig nebuinab megabig kōn cha. Katø katø nagu kebeñib, piyu kebeñib inchibig kōn cha.

¹⁶ Na ñui kusrenanøb pera uniilaimay pera arrubendø, tamartrab kaiman— cha.

¹⁷ Inchene Jesúsbe trencha løtabig kōn:

—¡Kan ñim mõi misaamera kōrenrrab inchimeelø larrø kailø! cha, ¿nabe managatig ñimba unamig kōnrrerah? cha. ¿Kan øyeeg ashiptø managatig ñimba unamerah? cha. Unan yusrø naimay srua amrruy— chibig kōn.

¹⁸ Inchen Jesúsbe tru kwaimandzigwan nama, unainukkurri wambig weguchen latatø, unøbe tabig kørømisrøbig kōn.

¹⁹ Inchen nui kusrenanøb pera uniiløbe nōmdø nøørø Jesúswan kemalla, trencha payibelø kōn:

—¿Nambe kwaimandzigwan wambig weguchappe, chindimba kaimah?— cha.

²⁰ Inchene Jesúsbe trenchibig kōn:

—Kaguende ñimbe ñimui isubigwan nainug ke ka kōmønrraindiig pasra tōgar kōn cha. Pøs nabe ñimun cierton trendamønrrun: Ñim kan murtasa yellburap-tiitøguen ñimui isubigwan nainug pasra tōgar kuimbe, ñim i tunwan: “Yugurri mendamisra, katøgansrø purainrrø” chibene, tru tunbe purainrrun cha. Pøs ñimuiimbe chitøgucha kaimamdiibe chi kaagøn cha.

²¹ Kaguende øyeeg kwaimandziibe Tiuswan purugurra chib miaitøgaba, ayunab indiitøgaba treeg marendøwei webibig kōn— cha.

Jesús katøle nui kwamigwan eshkab

(Mc 9.30-32; Lc 9.43-45)

²² Galilea pirausrø ketøtø amøñippatø Jesúsbe trenchibig kōn:

—Tru Møg Misra Arrubigwane møguelai tasku tranig kōnrrun cha.

²³ Inchen kweechen, pøn kwalømyube katø øsiirawa kurrønrrun— cha.

Igwan wammørabe, nømbe truba isui inchibelø kōn.

Tiuswei yawan tøgagúimburø an pagaramigwan Jesús pagarangarub

²⁴ Jesúsba nui kusrenanøb pera uniiløba Capernaumsrø pubene, Tiuswei yaburø trendø an pagaranrrain taigwan an utabelø Pedroimay ambabe trenchibelø køn:

—¿Ñimui kusrennøbikkan Tiuswei yaburø trendø truburø an pagarab kømigwan pagaramíig kuitarru?— cha.

²⁵ Inchen Pedrobe:

—Øø, pagarabwei inchibig køn— cha løtabig køn.

Incha Pedro yau kebibene, Jesúsbe øyeemerrig trenchib waminchibig køn:

—¿Simón, ñibe maig isuguh? cha. ¿Yu pirau reymerabe trendø pagaramigwan pagaraig utappe, mumeran utah? cha: ¿Nømui misaamerandøweindeh? Kabe: ¿Peesrøngurri amrrub misaamerandeh?— cha.

²⁶ Inchene Pedrobe trenchibig køn:

—Peesrøngurri amrrub misaameran utabelø køn— cha.

Inchene Jesúsbe trenchibig køn:

—Trube, treeg købene, tru pirau misaameratøweimbe chi pagaramikken palømuinrrun cha.

²⁷ Treeg kuingucha, nambe mungucha namishimønrrab, nu pisuyumay ya, anzuelun ke keguchendø, megamisrøb peskauwan wesrunrrig, chibig køn. Incha peskauwei trigwan kurabe, kan an wetørranrrabguen cha, maya tranamigwan neikke. Incha naimburøba, ñuimburøba srua ya, pagarau—chibig køn.

18

¿Tiuswei merrab mas nuibe mu kerah?

(Mc 9.33-37; Lc 9.46-48)

¹ Inchen tru urastøwei nui kusrenanøb pera uniilø Jesúsban kemallabe, trencha payibelø køn:

—¿Srømbalasrø Tius nø ashib karub waisrømbe mas nuibe mu køh?— cha.

² Inchene Jesúsbe kan unan wama, nømuin tøbøtag pasrabe,

³ trenchibig køn:

—Pøs nabe ñimun cierton trendamønrrun cha: Ñim peemayelø misrøb, ureg lataig misrmuisruandøbe, srømbalasrø Tius nø ashib karub wainuube managuen kebamrraamøn cha.

⁴ Nøasiitø 'nuig kurnab' isumíig, i unø lataig misrøbiibe, srømbalasrø Tius nø ashib karub waigu mas nuig køn cha.

⁵ Inchen møikkøben kan i unø lataigwan nai munchiyu tab wamab utabiibe, nan utan chibig køn.

Kaig mara kebenamibe kørig kømdiig køn

(Mc 9.42-48; Lc 17.1-2)

⁶ 'Møigwan køben i shushmera latailan nan kørebelan kaig mara kebenøsrkøbigweimbe, trembe tru tirigu kitsig nu srugwan naashigu mesra, mar umbusrø kegucha, pi keesra kwangaruinguen søl købsruinrrun cha.

⁷ Yu nam waraig pirøwaimburappe kan yeekkucha kuita, chine pønrrabelø misagwan kaig martrai inchib pønrrøben, trune kaigwan nø pera mara kebenøsrkøb møwaimbe ¿maig kønrrerah?

⁸ 'Inchawei ñui tasig kui, ñui srøb kui kaig maringarua kaigu ñun kebenøsrkøbene, para, kuchi. Managatig øsig wamsrø tasig palabig kui, cojo kui kebyamikken søl kønrrun, pa tasig tøgäig, pa srøb tøgäig tru managuen kwamø nagu kegutsig købgunrriibe.

⁹ Inchen ñui kab kaig maringarua kaigu ñun kebenøsrkøbene, wesrua, kuchi chibig køn, managatig øsig wamsrø kan kaptø tøgäig kebyamikken

søl kōnrrun cha, pa kab pusraig mōra melamnug kwamø nagu kegutsig kōbgunrriibe.

Kan ubisha trubigwan kemesra wamindig
(Lc 15.3-7)

¹⁰ 'Au, i shushmeran mōilandōgucha kashmōtay. Kaguende srōmbalasrō nōmui āngelesmerabe nai Mōskai srōmbalasrō wabigwei malōwan chu urastōgucha ashib pōnrran char nabe.

¹¹ Kaguende Mōg Misra Arrubiibe tru trubig kōbigwan kaigyugurri wesranrrab arrig kōn cha.

¹² ¿Ñimune maig asōnata? chibig kōn. Kan mōg cien ubishamera tōgagua, kan pella ya, trubōbenma, noventa y nueve tunbalawan waramnetō, tru pella trubabigwan kabe ¿chugōben lanrrab imōnrraitarru? cha.

¹³ Incha nabe ñimun cierton trendamōnrrun: Wetōrrappe, tru trubabigweimbura mas purō kasraaranrrun cha, tru noventa y nueve ka amōñibelaimburab lataguen kōmō.

¹⁴ Øyeetōwei ñimui Mōskai srōmbalasrō wabiibe i shushmeran ni kanguen trubōmuimbemab indan chibig kōn.

Ñui nuneg ñun kalø maren, ulø paymø mandø pesannamig
(Lc 17.3)

¹⁵ Inchawei ñui nuneg ñun chigōben kaig marene, ya, ñibe nundø mara, waminchi. Incha nui kalø marigwan kalø marig kui ashchai nebua isungaru. Inchen ñun mōrene, ñibe ñui nunewane tab kōrrōmisrtra i kusrawa pasran.

¹⁶ Inchen ñundø mōrōg kōmui inchene, trube, kandø kui, pagatø kui wamø, chi pub arrubigwandōgucha pailø kui, pōnelø kui maig kuigwan nōm wamindigu treeg kōrrōmarig kōnrrai.

¹⁷ Inchen truilangucha mōrōg kōmui inchene, trube, iglesiayuelan eshkau chibig kōn. Inchen katø iglesiayuelan mōrōg kōmui inchene, trubeguende, yandø Tiuswan ashmūig judío kōmūig lataig, kabe kan romasreelayisig an utaptø wabig lataig mara kōrrōmaray cha.

¹⁸ 'Pøs nabe ñimun cierton trendamōnrrun: Ñim yu pirau lusrōb lataig marene, srōmbalasrōngucha lusrōb lataitōwei martrun cha. Inchen ñim yu pirau pichib lataig marene, srōmbalasrōngucha pichib lataitōwei martrun cha.

¹⁹ 'Nabe katø ñimun trendamōnrrun: Ñim mōikkōben pailø yu pirau chigōben Tiuswan mianrrab lata kandø isua purramisra, miabene, nai Mōskai srōmbalasrō wabiibe ñim miaigwan tranrrun cha.

²⁰ Kaguende pailø kui, pōnelø kui nai munchiyu tulundzuna purrainuube nabe nōmui utu pasrar— cha.

²¹ Inchen Pedrobe Jesúsuan kemalla, trencha payibig kōn:

—Señor, nai nuneg nan chigōben kaig marōbig marene, nabe ¿mam piejegatig pesannab ulø paymumig kōnrrab kō? cha. ¿Kabe sietegatiitōteh?— cha.

²² Inchene Jesúsbe trenchibig kōn:

—Nabe siete nebumnegatiitø chimur cha. Treeg kōmōtø, sietebatø setenta piejeskatig char— chibig kōn.

Karuig megabig larrø kaigwan kemesra wamindig

²³ —Srōmbalasrō Tius nō ashib karub waibe kan rey nui karuindiig melabelø nōmui ulø misriilan mayambatø ulø kōtashchab ashchab wamisrōb lataig kōn.

²⁴ Incha truigwan ashib mendøbene, kan truba truba nu an ulø misraigwan pera amrrubelø køn.

²⁵ Inchen tru i møøbe katøburø anwan ungwa chinrrab kaimaptinchene, nui reybe nunba, nui srawanba, nui uregwanba nui chi tøgagúigwanbañau yanrrai karubig køn, tru ulømisri anwan wartrai.

²⁶ Inchen nui karuindiig megabiibe reywei merrab tømønnsra trenchibig køn: “Au, nai rey, tiusmanda, nan øyeeg nebui megaben lastima ashibsrumugu cha, kerrigu nai uløwan wartrumøn” cha.

²⁷ Inchene reybe waachawan yeeg nebutamab isua, nui ulø misrigwan paymønrrab kaabasha, ka inrrai, ka elachibig køn.

²⁸ Inchen tru karuindiig megabiibe webya ya, katøgan nøba lincha karuindiig megabig nun lamøtiig ulø misraigwan katappe, naashigu merrarrawa, ke chab isrømbuløsrkøb trenchibig køn: “Nai uløwan tranrra” chib.

²⁹ Inchene tru nøba lincha karuindiig megabiibe nui merrab tømbsra trenchibig køn: “Tiusmanda, nan lastima ashcha chib. Uløwan tranrrumøn” cha.

³⁰ Inchen kane kagøbashig kømuptø, kailan keeri yau keeringarubig køn nui uløwan tranamnegatikke.

³¹ Inchen katøganelø tru karuindiig lincha melabeløbe øyeeg inchen trunun asha, nømune truba pusrkwaben, chi purayaigwan kerriguh reywan eshkanrrab ambubelø køn.

³² Inchen reybe tru kagøbashmø ulø payiptiigwan wamønrrab øra trenchibig køn: “¡Karuiindiig megabig, larrø kaig! cha. Ñi nan ulø kuigwan nagurrima ñun ulø paymø, pesannar cha, ñi kaabashcha chib truba truba rugaben.

³³ Pøs ñigucha tru karuindiig ñui lincha megabigwane maindi lastima asambala chibig køn, na ñun lastima ashib lataitøwei.”

³⁴ Incha reybe truba namaptø, maya ulø kuigwan kerrigu anwan waramnegatig kaigy møra meganrrai marøbelan tranøbig køn cha.

³⁵ Inchabe Jesúsbe trenchibig køn:

‘Nai Møskai srømbalarø wabikkucha ñimune øyeetøwei martrun cha, ñim møitøgucha ñimui nunewan manrraugurri kerrigu newan pesannab, kagøbashmuisruandøbe.—

19

Sraimba, keeba petiyamumigwan kusrenanøb (Mc 10.1-12; Lc 16.18)

¹ Jesús øyeelan chab waminchabe, Galileasrøngurri ya, Judea pirausrø pubig køn, Jordán pi ambøgatø pørr kal-labgatøsrø.

² Inchen misag truba nu mendig amben, truyu kwanrreelan tamarøbig køn.

³ Inchen fariseosmera Jesúswan kemallabe, chincha køben kebenøsrkønrrab isua, trencha payibelø køn:

—¿Ka chigurrin køben srawan kutsamig chi merømíig kø chindah?— cha.

⁴ Inchene Jesúsbe trenchibig køn:

—¿Ñingam Tiuswei wamwan pørigu lemeelø køtirru cha, tru srøsrø marøb uras marøbig Tiusbe: “Møwanba, ishuwanba ellmarigwan”?

⁵ Incha Tiusbe trendaig køn: “Øyeekkurri møøbe møskawanba, usranba elatchun cha, nui sraimba kandø kønrrab. Incha tru pailøbe kan asrtø kønrrun” cha.

⁶ Inchawei yandø pailø kømø, kan asrtø køn. Inchawei treeg købene, Tius kandø mara lindisaigwane møøbe tarømaramig kømøn— chibig køn.

⁷ Inchene nømbe trencha payibelø køn:

—¿Trube treeg købene, Moisésbe chindimba kilga mara, purørrain karuig køh? cha, srawan tarømisrtrab— cha eshkabig.

⁸ Inchen Jesúsbe trenchibig køn:

—Ñimui manrrømera isumíg larrø mureløgurri Moisésbe ñimui sralan ka treeg marbasig køn cha. Inchendø srøsrøbe øyeege kømug købig køn cha.

⁹ Trune nabe trendamønrrun: Kan møg, nui sraimbe katøgan møøba trømbøig marøb itølulmubendø, nui srawan kucha, katøgan ishuuba kashara-biibe, itølulan— cha.

¹⁰ Inchen nui kusrenanøb pera uniiløbe trenchibelø køn:

—Srawanba, kewanba øyeege pubig købene, trembe kasharamuinguen— cha.

¹¹ Inchene Jesúsbe trenchibig køn:

—Kasharamønrrab tamibe mayeelain kømøn cha. Tius truburab kønrrai tranilaindøwein køn cha.

¹² Møguelane kasharamumig chigurrin køben øyeege katabelø lataig pønrran cha. Kan utueløbe kasharamigwane chi palai mørtrabgailø usrai patsaugurri treeg kal-lawar køn cha. Inchen kan utuelane sralø palai mørmønrrai kapawa kørømariiilø køben, kan utueløbe srømbalasrø Tius nø ashib karubweimburabikkurri ka trendø nømuinetø tre latailøtøwei misran cha. Møikkøben Tiusweimburabeløyu marøb uñchab treeg kørømisramdiig kui mørabe, treeg kørømisr— chibig køn.

Uregwan Jesús mayanguen tab kuilø kønrrain chib

(Mc 10.13-16; Lc 18.15-17)

¹³ Inchen Jesúsweimay uremeran srua amrrubelø køn, nømuim pala tasigwan estsara, nømuimburab Tiuswan mianrrai. Inchen nui kusrenanøb pera uniiløbe tru srua amrrubelan namaptinchibelø køn.

¹⁴ Inchene Jesúsbe trenchibig køn:

—Uregwane merømø, naimay ka amrrubasay cha. Kaguende srømbalasrø Tius nø ashib karub waibe nøm latailaiwein køn— cha.

¹⁵ Incha tasigwan uregweim pala estsarabe, nøbe truyugurri ibig køn.

Kan pua møg Jesúsba waminchib

(Mc 10.17-31; Lc 18.18-30)

¹⁶ Kan møg Jesúswan ashchab yabe, trencha payibig køn:

—Kusrennøbig, managatig øsig kømigwan na tøgagønrrappe, ¿chigøben tabiibe chi maramø?— cha.

¹⁷ Inchene Jesúsbe trencha løtabig køn:

—¿Ñibe nane tru tabigweimburappe chindimba paygu? cha. Muguca tabiibe kaaben, Tiustøwein køn cha, tabiibe. Inchawei managatig øsig kømigwan tøga pasrønrrappe, Tius maig maramigwan martrai pønraigwan møra, mar— chibig køn.

¹⁸ Inchen matsinøbe:

—¿Møilø køh?— chibene,

Jesúsbe trenchibig køn:

—Kweechimøwei, itølulmøwei, nilømøwei, katøganuimburab isa waminchimøwei,

¹⁹ usri mōskawan maig købash inchimø, tab inchib, katø ñima ñiasiiitøwei maig undaig køppe, nui mendaigwangucha treetøwei undaarab inchi— chibig køn.

²⁰ Inchene matsinøbe trenchibig køn:

—Nabe iilane kerriguh marøbig kur cha. Masbe ¿chitø palerah?— chiben,

²¹ Jesúsbe trenchibig køn:

—Chigucha palømíg newan tabig kønrrappe, ya, ñui chi tøgagúigwan yana, waachameran tranø cha. Treeg marabe, srømbalásrømbe chigurrimbunø tøgagønrrabguen cha. Trugurrimbe arrua, nai mendig amø— chibig køn.

²² Inchen tru matsinøbe iigwan mørøppe, truba isui ibig køn, kaguende truba puag kua.

Chi tøgagúigwangøba isubigweimbe køræmðiig køn

²³ Incha Jesúsbe trenchibig køn nui kusrenanøb pera uniilan:

—Nabe ñimun cierton trendamønrrun cha: Srømbalásrø Tius nø ashib karub wainug kan puag kebyamibe truba murig køn cha.

²⁴ Kan camelloguen tsusain kal trabyu illmø larrayandiig køben, kan puabe Tius nø ashib karub waisrø kebinrrab kaimanrrun— cha.

²⁵ Inchen nui kusrenanøb pera uniiløbe iigwan mørabe, truba kwaarøb trenchibelø køn:

—Treeg købene, ¿kaigyugurrimbe mu kui wesraig kønrrautah?— cha.

²⁶ Inchen Jesúsbe nømun ashabe, trenchibig køn:

—Møgueløbe iigwan martrab kaimanrrun cha. Trune Tiusweimbe si, chitøgucha maramdiitø køn— cha.

²⁷ Inchen Pedrobe trenchibig køn:

—Au, nambe chi tøgagúigwan kerrigu elacha, ñui mendig amrruig køn cha. ¿Nambe, trube, chi utamig kønrrerah?— cha.

²⁸ Inchene Jesúsbe trencha løtabig køn:

—Pøs nabe ñimun cierton trendamønrrun cha: Katøyug chi købigwan srøig tamarøb uras tru Møg Misra Arrubig nø wamisrig tørguegwalmabigu nø wamisrøb uras, ñim nai mendig amøñibeløbe tru purramisra karub purraig doce pønrrabeløyu purramisra, tru doce nusrkalø Israelwainukkurri karrab misaameran ñim ashib karub purramisrtrun cha.

²⁹ Inchen mayeeløba yameran, nunelan, nuchalan, usri møskawan, uregan, pirømeran nai munchigurrindø elachibeløbe cien piejes menrraguen utab, katø managatig øsig kømigwangucha Tius tranig utønrrun cha.

³⁰ Inchen møiløgøben møi ya yu pirau nømmerrig pønrrabeløbe trusrømbe srabe melønrrun cha. Inchen yu pirau srabe melabeløbe, trusrømbe nømmerrig pønrrønrrun— chibig køn Jesúsbe.

20

Uvas trau kwallibelan kemesra wamindig

¹—Srømbalásrø Tius nø ashib karub waibe øyeeg lataig køn, kan pirø puag truba løtsøzhig nui uvas ellguailøyu kwallchabelø lanrrab webibig lataikke.

²Incha tru pionneran mawawan mayan pagaramig køben treeg pagaranrrab misra, incha nui uvas ellgwainug kwallchay øran cha.

³Incha tru løtsø las nueve katøyug webarruabe, katøganelø plazayu chi maramikkar purrai ashabe,

⁴trenchibig køn cha: “Ñimgucha nai uvas ellgwainug kwallchab ambay cha, maig pagaramigwan treeg pagararrumøn” cha. Inchen nømbe ambubelø køn.

⁵Incha puabe katøyug kwaløm tøbøtag webya, katø maaben las treskucha webya, treetøwei marøbig køn.

6 Incha maaben las cinco kòsròn katòyug plazayumay yabe, katò mòilògòsròn chigucha maramikkar purrai ashabe, trencha payibig kòn: “¿Ñimbe mawa òròba chi marmòbe yube chinchib purrògue?” cha.

7 Inchene nòmbe trencha lètabelò kòn: “Namune muguen chi maramig tranmòtan” cha. Inchen nòbe trenchibig kòn: “Ñingucha ambay cha, nai uvas ellgwainug kwallchab.”

8 Inchen yandò yem misren, tru ellmarig puaike nui kwallibelan ashibigwane trenchibig kòn: “Kwallib melabelan wama, pagarau cha. Tru srabe kerrubelanmerrig pòlbasra, sròsrò kerrubelane srabe pagaranrrig” cha.

9 Tru maaben las cinco lutau kòben kebambubelòmerrig kemalla, mòitògucha mawa òròba maròb melòwa lataitòwei neig utabelò kòn.

10 Inchen yandò merrab kebambubelòbe mas utamuitamab isua melòbenba, nòm mòitògucha mawa òròba maròb melaigwandòwei utabelò kòn.

11 Incha tru maròb melaimburò anwan utabe, tru ellmarig puaiwane nòmòdò truba namig waminchib mendabe,

12 tru puaiwane trenchibelò kòn: “I tru srabe kerrubelò kan urazhiitò marendò, ñibe truilangucha nam pòrryu mawa mawa maròb melabelan lataitòwei lata pagaran” cha.

13 Inchen tru tra puaike nòmùn mòigwan kòsròn trenchibig kòn: “Kasuku, nabe ñune chigucha chi kalò marmur cha. ¿Yamba mawa marigwan ñune òyah pagaranrrumòn chiben, ñibe treeg kòrròmismòmmòrgòpphe? cha.

14 Ñui an kanaigwan cha, chibig kòn. Mòimbe inrrò cha. I srabe martrab kebarrubigwan ñun lataitòwei pagarang kòben treeg pagaran cha.

15 ¿Nan maig maramdiig kòben, naiwane nabe na asha maramig kòmuitarru? cha. ¿Kabe na merògòmíig menrra tabig kui ashiptò ñibe pusrkwai ashkuh?” cha.

16 Inchawei mòie ya srabe melabelòbe nòmerrig pònrròben, mòie ya nòmerrig pònrrabelòbe srabe melònrrun— cha.

Jesús nui kwamigwan pònmayguen eshkab

(Mc 10.32-34; Lc 18.31-34)

17 Jesús yandò Jerusalénsròmey nebib yabe, nui doce kusrenanòb pera uniilan nòòrò wama, trenchibig kòn:

18—Au, nambe Jerusalénmay nebambub amber cha. Trusròmbe Mòg Misra Arrubigwane sacerdotesmeran karubelanba, tru Moisés pòrigwan kusrenanòbelanba tranen, truilòbe nune kwanrai pasrtrun cha.

19 Incha nòmbe nun indzatò ashib, kurraguchib, kurusyu mesròb inchai judíos kòmeelan tranrrun cha. Inchen pòn kwalòmuyube katò òsiirawa kurròrrun— chibig kòn.

Santiagonba, Juanwanba pinrrò menda purrònòbsrumugu cha, Señorwan usri treeg miab

(Mc 10.35-45)

20 Zebedeòwei nusrkalai usrimbe nui nusrkalòba Jesúswei merrab chigòsròn mianrrab, nòbe tòmbaròbig kòn.

21 Inchene Jesúsbe payibig kòn:

—¿Chi palòta?— cha.

Inchene nòbe trenchibig kòn:

—Ñi ashib karub wainug nai nusrkalan, kanun kusrmay, kanun ñui atsimay purramisingarurra— cha.

22 Inchene Jesúsbe trencha lõtábig kòn:

—Ñimbe chi miab pønrrermabguen mørmon cha. ¿Na tru copayu mutsam piwan, kabe ñim muchibsrugueh?— cha.

Inchene nømbe trenchibelø kòn:

—Øø, mutsamønrrun— cha.

23 Inchen Jesúsbe trenchibig kòn:

—Na mutsim piwane si, ñimbe muchibwei inchun cha. Inchendø tru kusrmayba, atsimayba purrønnamigwane na tranamig kømøn cha. Tru purramibe nai Møskai tru purrønrrabelayasig tamarilaindøwein kòn— cha.

24 Inchen tru nui kusrenanøb pera uniilø diezeløbe trunun mørabe, tru pa nunelane namabelø kòn.

25 Inchen Jesúsbe nømun wamabe trenchibig kòn:

—Ñimguen ashen, judíos kømø misaameran karub purrabeløbe nøm karub tøgagúilane maig købash inchib ke nøm karub purran cha. Inchen truyu møguelø nørreelø nøm karub purrabeløbe mungucha manchinrraingag karub purrabelø kui ashchai nømbe kenamaran cha.

26 Trune ñimui utube ñimbe øyeelø kømumig kòn cha. Treeg købgunrriibe, ñimui utu mas nuikkug købene, katøganelø karuindiig megamig kòn cha.

27 Inchen ñimui utu møikkøben ñimmerrig melag købene, katøganelø karuindiig megamig kòn cha.

28 Kaguende øyeetøwei tru Møg Misra Arrubikken katøganelø nuyasig marøb melønrrai arrumøtø, nøguen katøganelayasig marøb meganrrappa, nø kwaitøga truba nu misagwan purøbagarawa, kaigyurri wesranrrappa arrig kòn— chibig kòn.

*Pailø kabgailan Jesús tamarøb
(Mc 10.46-52; Lc 18.35-43)*

29 Nøm Jericógurri webamba ambene, misaamerabe truba nu wendautø ambubelø kòn.

30 Inchen pailø kabgailø may menda purrøwabe, Jesús purayai mørøppe, trenchib trashibelø kòn:

—¡Namun lastima ashcha chib, merrabsrø Davidwei Nusrkai!—

31 Inchen misaamerabe niløtø purrønrrai namingucha, nømbe mas mur trashib trenchibelø kòn:

—¡Señor, namun lastima ashcha chib, Davidwei Nusrkai!—

32 Inchen Jesúsbe pasramisra, kabgailan wamabe, trencha payibig kòn:

—¿Ñimuyasig na chi maramig paløta?— cha.

33 Inchene nømbe trenchibelø kòn:

—Señor, namune namui kabmera ashibig misrimbe køtan— cha.

34 Inchen Jesúsbe nømun lastima asha, nømui kabmeran katørabene, tru urastø kabgailøbe ashibelø misra, Jesúswei mendig ambubelø kòn.

21

*Jesús Jerusalénsrø kebib
(Mc 11.1-11; Lc 19.28-40; Jn 12.12-19)*

1 Yandø Jerusalénsrø chab pub amba, Betfagé pueblo tru Olivos Tunsrø chab puabe, Jesúsbe nui kusrenanøb pera uniilø pailan

2 trenchib karua ørøbig kòn:

—Ø pinrrøguesrø yamera tsitsø pønrrabsrømay ambay cha. Trusrømbe pubyutø kan burra, burro-unøzhig peraig, litsig wetørranrrun cha. Incha picha, srua amrrunrrigay cha naimay.

³ Inchippa mōikkōben chigōben chibene, ōyah chinrrigay chibig kōn: “Señor palai indan” cha. Inchen truipe pebrun— cha.

⁴ Ōyeeg pureppe, Tius maig karuigwan eshkabig maig taig treeg nebunrain kuig kōn, tru ōyah chib pōrig:

⁵ Sion ciudayuelan ōyah chib eshkau cha:

“Asay chib, ñimui Rey ñimuimay arruppe, chigucha chi nuig kōmíig lataig kan burroyu,

burro-unōyu itōguana arrun taig, kan carga nigab animal llug unōyu.”

⁶ Inchen nui kusrenanōb pera uniilōbe Jesús maig karuigwan treeg mara,

⁷ burran unanbañau srúa amrrua, nōmbe nōmui kewagúilan burranba, unanba kayen, Jesúsbe itōguanabig kōn.

⁸ Inchen misag truba nu pasrabiibe mōilōbe nōmui kewagúilandōwei maywan kayen, mōilōbe kullag srarcheelō lutiicha kayibelō kōn.

⁹ Inchen merrab amrrubelō lata, wendau amrrubelō lata, ōyah chib trashib amrrubelō kōn:

“¡Rey Davidwei Nusrkai Hosanna! chib.

¡Señor Tiuswei munchiyu nō ōrig arrubiibe mayanguen tab kuig kōn! chib.

¡Srōmbalasrōmbe Hosanna!” chib.

¹⁰ Jesús Jerusalénsrō kebihene, maya misaamera ke chi indi asamgaig inchib, mōilōgōben trenchib payibelō kōn:

—¿libe mu kōh?— chib.

¹¹ Inchen tru nu misag sōtōbe trenchibelō kōn:

—libe Tius maig karuigwan eshkabig Jesús Galilea pirau nazaretsriig kōn— cha.

*Jesús Tiuswei yawan chish marōb
(Mc 11.15-19; Lc 19.45-48; Jn 2.13-22)*

¹² Jesús Tiuswei yau kebya, truyu mayeelō yanōb, penab inchib warabelan sōtōba wambig webetabig kōn. Katō misagwan an yunōmarōbelai mishatsimeran utsōbetab, palomamera yanōbelō purraigwan utsōbetab inchibig kōn.

¹³ Incha trenchibig kōn:

—Tiuswei wamwan pōrigube trenchibig kōn cha: “Nai tab yabe Tiuswan wamindi ya kōn cha, trencha wamig kōnrrun” cha. Trune ñimbe nileelō warain trab marin kōn— cha.

¹⁴ Inchen tru Tiuswei yau kabgailō kōben, cojosmera kōben Jesúswan kemallen, nōbe tamarōbig kōn.

¹⁵ Inchen sacerdotesmeran karubelōba, Moisés pōrigwan kusrenanōbelōba Jesúswei tru purō nōrreelō mariilan ashib katō Tiuswei yau shush ureemera: “¡Rey Davidwei Nusrkai Hosanna!” chib trasai mōrabe, truba namabelō kōn.

¹⁶ Incha Jesúswan trenchibelō kōn:

—¿lilō ōyeeg chib kōben mōrtirru?— cha.

Inchene Jesúsbe trenchibig kōn:

—Ōō, mōrar cha. ¿Ñimgan Tiuswei wamwan pōrigu iig ōyeeg chibigwan mananguen lemeelō kōtirru? cha:

Pitsō muchib shush ureemaran kōben, katō nōrrō ureemaran kōben

ñun newan tabzhig waminchai, ñi Tius treeg marin kōn taigwan.—

¹⁷ Incha nōmun pōnrramnetō, ciudayugurri webya, Betaniasrōmay yabe, trusrō kōrrōmisrōbig kōn.

*Higuera tusr mamig niimigwan Jesús kaig nebunrrai wamab
(Mc 11.12-14, 20-26)*

¹⁸ Incha lōtsō katō ciudayumay arruabe, Jesúsbe parōgwai mōrōbig kōn.

19 Incha kan higuera tusr may pulu pasrai asha, kemallabe, tru higuera tusrbe ka ishiitø tøgagig kui ashabe, Jesúsbe tru higerane trenchibig køn:

—¡Møingurrimbe yandø managucha mas mamig niimubash!— cha.

Inchen tru urastø higerabe mul-laptinchibig køn.

20 Inchen tru chi purayaigwan nui kusrenanøb pera uniiløbe ashabe, truba kwaarøb, Jesúswan trenchib payibelø køn:

—Higerabe mõi mõi mul-lanrrappe ¿mandø indah?— cha.

21 Inchene Jesúsbe trenchibig køn:

—Pøs nabe ñimun cierton trendamønrrun cha: Ñim ñimui isubigwan Tiusweinuutø pasra tøgagua treeg kòmuptinchaitamab isumubene, na higeran øyeeg mari lataitøguen kømøtø, ñim i tunwanma: “Yugurri mendamisra, maryu kebeñ” chibene, treeg purainrrun cha.

22 Inchawei ñim Tiusba waminchib miappe, chiwandøgucha nø martraitamab kørewa, miawabe, ñimbe utønrrun— chibig køn.

Jesúswei karumburab karuig mu mandamgaig

(Mc 11.27-33; Lc 20.1-8)

23 Jesús Tiuswei yau kebya, kusrenanøb wamnetø, sacerdotesmeran karubeløba, misagwan karubelø kølli misaameraba Jesúswan kemallabe, trencha payibelø køn:

—¿Ñi mariilane mu karua pasriitøgarre margu? cha. ¿Ñi øyeeg maramigwane mu karua pasrta?— cha.

24 Inchen Jesúsbe lötappe, trenchibig køn:

—Nagucha ñimun kan chigøsrøn payrrab inchar cha. Ñim iigwan lötøbene, trube, nagucha eshkarrumøn chibig køn, iilan mu karuitøga marar cha.

25 ¿Misagwan Juan piu umbu ulsraibe chugurri arrig køh? cha: ¿Srømbalarøngurrin kønrrab køh? Kabe: ¿Møgueløgurrin kønrrab kø chindah?— cha.

Inchen kangurrin kangurri payiyab mendabelø køn: “‘Srømbalarøngurrin kuig køn’ chibene, nøbe namune trenchinrrun cha: Trube, ‘¿chindimba nune køremøgue?’ cha.

26 Katø: ‘Møgueløgurrin kuig køn’, tamgawein køn cha. Kaguende misagwan namune kørig køtan cha. Kaguen ya mayeeløba Juanbe Tius maig karuigwan eshkabig købig kui asha tøgar køn” cha.

27 Treekkurri Jesúswane trencha lötabelø køn:

—Maig kuindøbeh— cha.

Inchene Jesúsbe trenchibig køn:

—Trube, nagucha eshkamumønrrun cha, iilan na mu karuitøga marigwan.—

Pagatø nusrkalø lataitøwein køn cha, kemesra wamindig

28 Jesúsbe payibig køn:

—¿Ñimbe iigwan maig isugue? cha. Kan møg pagatø nusrkalø tøgagua, kannunmerrig trendan cha: “Nai nusrkai, nai uvas ellgwain trau mõi kwallchab inrrø” cha.

29 Inchene nøbe trencha lötabig køn cha: “Ig kømøtan” cha. Inchendø nøbe yanayube treeg marmønrrurmab isua møra, ka yan cha.

30 Inchen møkaimbe katøgan nusrkaweimay yabe, katø treetøwein chiben, nusrkaimbe: “Øø, Papa, na inrrur” chibendø, imøn cha.

31 Trube, tru i pa nusrkaløyu møkai maig maringaruigwan ¿møig marerah?— chiben, nømbe:

—Tru srøsrø karuinab nusrkai— chibelø køn.

Inchen Jesúsbe trenchibig køn:

—Pøs nabe ñimun cierton trendamønrrun cha: Romasreelayasig an utabeløba, ishumburmera asrwan anwei yanøbeløba Tius nø ashib karub waisrømbe nømmerikken kebamrrun cha, ñimguen kebammøwatø.

³² Kaguende Juan Bautistabe sølgandø tabig mandø amønamiowan kusrenanrrab arruben, ñimbe køremuig køn cha. Trune tru an utabeløba, tru ishumbur an pagarwei trømbøig marøptø warabeløba, truiløguen køreig køn cha. Trune ñimbe iilan kerrigu ashendø, kørenrrab isua mørmuig køn chibig køn.

*Kwallibelø larrø kailan kemesra wamindig
(Mc 12.1-12; Lc 20.9-19)*

³³ 'Incha møray, chibig køn, katøgan 'øyeeg lataitøwein køn' cha, kemesra wamindigwan. Kan møg pirø puaiq uvas tra mara, trugurrimbe panig pasra, uvas piwan chu wesrumigwan truyu tamara pasra, incha tru ellmarigwan ashib laramig kan ya-unø palaig mara pasran chibig køn. Incha nui pirøwan katøganelan misrigwan pirishinrraptø kwallchai tranabe, yabsrømay yan cha.

³⁴ 'Incha yandø tru mamig misrigwan lurramig lutauraben, møilan køsrøn nui karuindiig melabelan tru nuimburabigwan tru kwallchab utabelan mianrrab øriibe,

³⁵ tru kwallibeløbe karua øriilan merrarrawa, kanune kurraguchib, kanune kweechib, kanune sruutøga petab inchibelø køn cha.

³⁶ Inchen tru pirø puaiqe srøsrø lataguen kømø, katøbe karuindiig melabelan mas yam øren, tru kwallibeløbe søteelanba treetøweih maran cha.

³⁷ 'Incha yandø trugurrimbe nui trag nusrkawan ørøbig køn cha, treeg isub: "Nai nusrkawane chinchimønrrun" cha.

³⁸ Treendingucha tru kwallibeløbe nusrkawan ashippe, nõmdø trenchibelø køn: "Pirøwan ketig utønrrabiibe iigwein køn cha. Kwetchab amun chibelø køn, nuimburab nø utamigwan nam tøga kørrømisrtrab" cha.

³⁹ Incha merrarrawa, uvas traugurri wegucha, nune kweechibelø køn cha.

⁴⁰ 'Møimbe, trube, ¿tru uvas tra puaiq arruabe, tru kwallibelane chi martrerah?— chibig køn.

⁴¹ Inchene nõmbe trenchibelø køn:

—Tru larrø kailane treetøwei kaig mara kwetchun cha. Incha tru uvas trawane katøgan mendailan tranrrun cha, lurrimørig nuimburabigwan tranrrai.—

⁴² Inchene Jesúsbe trenchibig køn:

—¿Ñimgan Tiuswei wamwan pørigu øyeeg chibigwan managuen lemeelø køtirru? cha:

Ya marøbelø kaasig sruube

katsiisrø pølbasa wayamig mas purø tab srukken misrin køn taigwan.

Señor Tius øyeeg marene,

namuin kabyube truba tabig asønatan cha.

⁴³ Inchawei nabe ñimune trenchar: Tius nø ashib karub waigwane ñimune kerrawa, katøgan peg misaameran Tius tranrrun cha, ellmarig maig misrtrabig køben, treeg ellmarig misrtrabelan.

⁴⁴ Inchen mõikkøben tru srug pala peñippe, pitis misrtrun cha. Inchen tru srug muim pala køben peñippe, nune usrø tuindø martrun— chibig køn.

⁴⁵ Inchen tru sacerdotemeseran karubeløba, fariseosmeraba tru 'øyeeg lataitøwein køn' chib Jesús eshkað wamindiilan mørabe, nòmun kemesra wamindin kui wetøgørrabelø køn.

⁴⁶ Incha Jesús wan merrarranrrab inchendø, misag sètøwan køriimatabelø køn, kaguende misaamerabe Jesús wane Tius maig karuigwan eshkaðig kui treeg tøgagøben.

22

Kasharab yaumay linchab amrrunrrai eshkai lataitøwein køn cha, kemesra wamindig

(Lc 14.15-24)

¹ Katø Jesús be nòmun 'øyeeg lataitøwein køn' cha, kemesra kusrenaniilan waminchib mendappe trenchibig køn:

²—Srømbalasrø Tius nø ashib karub waibe øyeeg lataig køn cha. Kan rey nui nusrkaì kasharaben fiesta marøbig lataikke.

³ Incha nui karuindiig melabelan novios yaumay linchunrrigay cha eshkailan wamønrrab øriibe, tru linchab amrrunrrai eshkailøbe amrrug kømui indin køn cha.

⁴ Inchen nui karuindiig melabelan katøganelan katøyug trencha karua ørøbig køn: "Nai tsal-lanin toromeran kweetsingarua mamigwane yandø chab tamaraguen war cha, møimbe si yandø Kerrigu ke chab tamarikken pønrran cha, novios yaumay lynchubash tan" chinrrai.

⁵ Trune tru linchai eshkailøbe cuentaguen marmø, møikkørønbe nui trausrømay iben, katøgane penab, yanøb inchað ibig køn cha.

⁶ Inchen katøganeløbe tru reywei karua øriilan merrarrawa, truba kaig marøb kurrabetab køptø kweechibelø køn cha.

⁷ Inchen reybe truba namaptø, tru kweechibelane nui suldaumeran truilane kweetsingarua, nòmui pueblone parringarun cha.

⁸ Incha nui karuindiig melabelane trendan cha: "Isa kømø, tru novios-merai fiesta maramibe chab tamarig pønrrøben, tru linchab amrrunrrai eshkailøbe treegube linchabgailø kuig kua, amrrumuig køn cha.

⁹ Incha mas nørø callesmerawan amba, mun wetørrabashtø novios yaumay linchab amrrunrrai eshkanrrigay" tan cha.

¹⁰ Inchen tru karuindiig melabeløbe callesmerawan webamba, mun wetørrabashtø tulundzunabelø køn, tabelan køben, kailan købengue. Inchen kasharabelø purrai salayube ¡katø! misaatø netsaptinchibig køn.

¹¹ Inchen reybe tru linchab amrrunrrai eshkailan ashchab keyyabe, kan møg noviosyu linchab keegwan keweig pasrømui ashabe, trenchiptinchibig køn:

¹² "Au, kasuku, kasharabyu keegwan keweig kømubendøbe, ñibe ¿chinha kebarrugu?" cha. Inchen nøbe ke wanguen pinim pasramisrøbig køn cha.

¹³ Inchen reybe tru mishatsigu ashib pønrrabelane trenchiptindan cha: "Srøbwanba, tasiimeranba lusra, wambig purø trømbø løstøyu wegutsay cha. Truyube kishib, trugulmeran tsatsamig kønrrun" cha.

¹⁴ Kaguende wamiiløbe truba nu køben, lawa wesruiløbe mamdø køn—chibig køn.

Tiuswein kønrrabigwane Tiuswan tranøppe, Césarwein kønrrabigwane Césarwan tranøb

(Mc 12.13-17; Lc 20.20-26)

¹⁵ Øyeelø chab puraiben, fariseosmerabe nøørø mendamisra, nømdø waminchibelø køn, Jesúswan chigøben payen, kalø lètøbene, kebenøsrkønrrab cha.

¹⁶ Inchabe møilan køsrøn nømui mendig amøñibelanba, Herodesweingateelanba øyah chinrrai ørøbelø køn:

—Kusrennøbig, ñibe ciertonigwan waminchib møg, Tius maig amøñinrrai karuigwan, isa kømø, trunun treeg kusrenanøb, katø misag maig chitanmaptø mørøb pasrømiig kui ashibelø ker cha. Kaguende ñibe mundøgucha nømun mailø kətasha kandarøtø imøwei inchibig køn cha.

¹⁷ ¿Ñune maig købsruerah? cha, namun eshkarra chibelø køn. ¿Tru Romasrø maya misagwan karub wabigwan nam an pagaramig merig køh, kabe merømuig køh, chinderah?— chinrrai.

¹⁸ Inchen Jesúsbe nømun ka kaig martraptø isua inchib pønrrain kui ashabe, trenchibig køn:

—Ñim palatø tabelø, ¿nane chindimbarre kebenøsrkønrrab inchigue? cha.

¹⁹ Tru pagaram anwan eshkarra— chibig køn.

Inchen nømbe kan an srua amrruben,

²⁰ Jesúsbe trencha payibig køn:

—¿I anyu maløba, i munchi pøriibabe muin køh?— cha.

²¹ Inchene nømbe trenchibelø køn:

—Tru Césarwein køn— cha.

Inchene Jesúsbe trenchiptinchibig køn:

—Inchawei Césarwein købene, Césarwan tranay cha. Inchen Tiuswein købene, Tiuswan tranay— cha.

²² Inchen iigwan mørabe, kwaara asha kørømisra, nømbe nune pasramnetø, ambuptinchibelø køn.

Kwawa katø øsiiramigwan payib

(Mc 12.18-27; Lc 20.27-40)

²³ Tru kwalømdøwei kan møiløgøsrøn saduceosmera Jesúswan ashchab ambubelø køn, truiløbe tru kwabeløbe øsiiramønrrun chibelø kuabe, Jesúswane øyeeg payibelø køn:

²⁴ —Kusrennøbig, Moisésbe trendaig køn cha: “Møikkøben kan møg urekkaig kwabene, nuneebe tru piudan kasharam nebunrrun cha, tru nuneg kwabigweimburab ureg kørømartrab.”

²⁵ Pøs yu namui utuma sieteelø nunelø købig køn cha. Indiibe srøstriibe kasharawa, urekkaig kwawa, srawane nunewan kørømaran cha.

²⁶ Katø tru wendø nunewan treetøweim puraiben, katø tru wendau nunewan treetøweim puraiben, sieteealanba treetø treetø puraibig køn cha.

²⁷ Yandø srabebe tru ishukkucha kwan cha.

²⁸ ¿Pøs treeg købene, tru kwabelø katø øsiirabene, tru maya nunelø tru ishuwan kasharaig kuig køppe, nøbe sieteealai utu møigwei srain kønrrerah?— chibelø køn.

²⁹ Inchen Jesúsbe trencha løtabig køn:

—Ñimbe mandø kuinguen mørmøwa, pella pønrran cha, kaguende Tiuswei wamwan pørigwan lata, Tiuswei maramburab marøbigwan lata nebua ashmeelø kua.

³⁰ Kaguende kwailø katøyug øsiirappe, kasharamøwei, kasharanrrab kømøwein kønrrun cha. Treeg kømøtø, srømbalasrø ángelesmera lataløtøwein kønrrun chibig køn.

31 Inchen tru kwailø øsiiranrrun taigweimburappe, ¿ñimgan lemeelø køtirru? cha, Tius nøtøwei øyah taigwan:

32 “Nabe Abrahamwei Tius, Isaacwei Tius, Jacobwei Tius kur” cha, trendaigwan. Inchawei Tiusbe kwailai Tius kømøtø, øsiguelai Tius køn – chibig køn.

33 Inchen misag truba nu pasrabiibe iigwan mørabe, Jesús kusrenanigwan ke kwaara asha kørømisrøbelø køn.

Martrai karua pasrig mas nuig

(Mc 12.28-34)

34 Fariseosmera tru saduceosmeran Jesús niløtø pønrram wamindin kui wammørabe, tulundzuna,

35 kan møikkørøn tru maig maramigwan martrai Moisés pørigwan kusrenanøiibe Jesús kalø løtøbene kebenørkønrrab isua, trencha payibig køn:

36 –Kusrennøbig, ¿maig maramigwan martrai Moisés pørigu karua pønrsailø, mas nuibe møig køh?– cha.

37 Inchen Jesúsbe trenchibig køn:

–“Señor ñui Tiuswane ñui manrraugurri kerrigu newan undaaraitøgaba, kerrigu ñui øsig pasraitøgaba, kerrigu ñui turtøga isumburab isuitøgaba undaarraig køn, chibig køn” cha.

38 Tru maig maramigwan martrai pønrsailøyu, iimerrig køn cha, trurrigu mas nuibe.

39 Inchen tru wendauikkucha treeg lataitøwei chibig køn: “Ñima ñiasitøwei maig undaguig køppe, ñui mendaigwangucha treetøwei undaarraig køn” cha.

40 Tru maig maramigwan martrai Moisés pørigu kerrigu pønrrabig lata, Tius maig karuigwan eshkabelø kerrigu kusrenaniilø lata i pagatø maig maramigwan martrai pønrsailøyugurri pølbasa amrrubig køn – cha, trenchibig køn.

¿Cristobe mui misagugurri arrubig kerah?

(Mc 12.35-37; Lc 20.41-44)

41 Inchen fariseosmera tulaamba srø purramnetø,

42 Jesúsbe trencha payibig køn:

–¿Ñimbe Cristoimburab maig isugue? cha. ¿Mui misagugurri arritamague?– cha.

Inchen nømbe trenchibelø køn:

–Davidwei misagugurri arrub nusrkain køn– cha.

43 Inchen Jesúsbe trenchibig køn:

–¿Trube, treeg købene, Davidbe Cristone chindimba Señor tah? cha, nun Espíritu trendingaruben. Kaguende Davidbe trendaig køn:

44 Señor Tiusbe tru nai Señorwane trendan cha:

“Nai kusrmaygatø wamisr cha, ñui ashig kømui inchib tsalø inchibelan

ñi itøbunønrrai ñui srøb umbu na pønrsramnegatig.”

45 Cristone Davidbe: “Señor” cha, øyeeg wamøbene, trube, ¿mandøgurri Cristobe Davidwei nusrkain kønrrab køh?– chiben,

46 muguen mancha kusrua løtønrrab kaimabelø køn. Incha tru kwalømgurri mugucha chigøben mas payrrab inchimeelø køn.

23

Fariseosmeranba, Moisés pørigwan kusrenanøbelanba Jesús 'øyeelø køn' chib (Mc 12.38-40; Lc 11.37-54; 20.45-47)

1 Øyeelø chab puraißen, Jesúsbe misaameranba, nui kusrenanøb pera uniilanba trenchibig køn:

2 —Moisés pørigwan kusrenanøbeløba, fariseosmerababe tru Moisés pørigwan øyeeg chibig køn cha eshkab nømui marøb purramibe truig køn cha.

3 Inchawei nøm ñimun chi maringaruben, kerrigu møra marøb esegay cha. Inchendø nøm maig marigwane, trunun asha marmønrrigay chibig køn. Kaguende nømbe chigøben tabig martrappe chibendø, peemaytø marøbelø køn cha.

4 Incha nømbe tru pørigu mas nemarøb, mutamguenga kwatsiguelø latailø mara, katøganelane kildunyu muta ambul lataitøwei inchai marendø, nømgurrimbe ni tasig-unøtøgaguen kebachig kømui inchibelø køn cha.

5 Chiwandøgucha marøppe, misaamera ka ashchaidø marøbelø køn, cha. Tiuswei wamwan pørigwan kappaløyu køben, kwalmerayu køben nørriig kena melsra amønami tabig kõi inchibelø køn cha, katø u tulturmera yab srølmera melsra amønami.

6 Lincha tabig mabyugucha nørreelø purrainug purø tabigu purrag kui indamba, judiosmera tulundzuni yamerayube purø tab purramdønug purrag kui indamba inchibelø køn cha.

7 Incha misaamerabe penab yanøb indinug nømune purø tabzhig wamønrrai inchibelø køn cha, trurrigu nømune “Kusrennøbig” cha, wamønrraingue.

8 Trune ñimbe “Kusrennøbig” cha, wamønrrai inchimumig køn. Kaguende ñimbe søteeløba nunelø latailø køn. Incha ñimbe kusrennøbiibe kandø tøgar køn cha.

9 Katø ñimbe yu piraube mungucha, “Møskain” chimøtay. Kaguende ñimbe Møskaimbe kandø tøgar køn, truike srømbalasø wabig.

10 Katø ñimune “Kusrennøbig” cha, wamønrrain kømøwein kui, kaguende ñimuike ashibig mas nuibe Cristo, nøtø køn.

11 Ñimui utu mas nuibe katøganelø karuindiig megami køn.

12 Kaguende nøasiitø ‘nuig kurmab’ isubigwane, ka kørig martrun cha. Inchen chigucha kømig ‘nuig kurmab’ isumigwane ‘i møøbe si, nuig køn’ taig kønrrun, chibig køn.

13 ‘Ay, ñim waachamera Moisés pørigwan kusrenanøbeløba, fariseosmeraba, palatø tabelø! Srømbalasø Tius nø ashib karub wainug kebambam yaskabwan katøganelø kebamønrrai kasrøb, ni ñimdøweinguen kebamøwei, ni katøganelø kebabug kui inchen kebabashmøwei inchibelø køn cha ñimbe.

14 ‘Ay, ñim waachamera Moisés pørigwan kusrenanøbeløba, fariseosmeraba, palatø tabelø! Pøs ñimbe piudasmeran nømui yameran kerrawabe, tabelø misrøb ke ka yandø truba yana Tiuswan waminchibelø køn cha. Øyeekkurri ñimbe møra melami mas nuigwan utanrrun chibig køn.

15 ‘Ay, ñim waachamera Moisés pørigwan kusrenanøbeløba, fariseosmeraba, palatø tabelø! Pirau lata, maryu lata munabatsø ambubelø køn cha, kandøguen ñimuingatø purøsrurab. Incha yandø ñimuingatø purøsrubabe, ñim lataitøguen kømø, purab tabelø chibelø kønrrai mara, truigwane tru managuen kwamø nagu kegutsam unø kønrrai marøbelø køn cha.

16 'iAy, ñim waachamera chigúinguen ashmeelø købendø, katøganelan pera ambubelø! "Møikkøben Tiuswei yawei merrab pasramisra, 'jkatø! marmø kømø, nabe maramønrrun' taigwan treeg marmuingucha, ñimbe chigucha kømøn chibelø køn. Inchendø tru Tiuswei yau oro pasrabigwei merrab pasramisra, 'jkatø! marmø kømø, nabe maramønrrun' taigwan trenchibig, trube, martrab taigwane nune maramig nebunrrun" cha, trenchibelø køn, ñimbe.

17 jTontos, chigúinguen ashmeelø! ¿Møimerrig mas nuig kerah? cha. ¿Oroteh? Kabe ¿tru oron Tiusweyasig tabig kønrrai nøøø tarømarøbig, Tiuswei yateh?

18 Katø ñimbe trenchibelø køn: "Møikkøben, chigøben martrab cha altarwei merrab pasramisra, 'jkatø! marmø kømø, nabe maramønrrun' taigwan, marmuingucha, chigønrraamøn cha. Inchendø tru altar pala Tiusweyasig trana pasrigwan truigwei merrab pasramisra, 'jkatø! marmø kømø, nabe maramønrrun' taigwane, nune maramitøwei nebunrrun" cha, trenchibelø køn.

19 jChigúinguen ashmeelø! ¿Mas nuibe chigø? ¿Tiuswan traniiteh? Kabe ¿tru Tiusweyasig tranigwan tabig kønrrai nøøø tarømarøbig, tru altarteh?

20 Altar merrab pasramisra, 'jkatø! marmø kømø, nabe maramønrrun' chibiibe, altarwandø ke treeg maramønrrun chimøtø, tru pala chi pønrrabigwangucha kerriguba treeg maramønrrun cha, tøga trendan cha.

21 Tiuswei yawei munchiyu 'jkatø! marmø kømø, nabe maramønrrun' chibiibe, tru yawandø kømøtø, Tius truyu pasrabigwangucha tøga trenchib pasran cha.

22 Inchen srømbalawei munchiyu 'jkatø! marmø kømø, nabe maramønrrun' chibiibe, purø tabzhig Tius wamisra waigwanba, katø tru tabzhigu wamisra wabigwanba tøga trencha pasran chibig køn.

23 'iAy, ñim waachamera, Moisés pørigwan kusrenanøbeløba, fariseosmeraba, palatø tabelø! Ñimbe erbabunanba, aniswanba, cominoswanba, truilane Tiusweyasig diezmørig kanzhig, kanzhig wesrawa tranøbelø køn cha. Inchendø tru maig maramigwan martrai Moisés pørigu kusrennøbig mas nørreelø pønrrabigwane marmø, pinab amban cha, tru sølgandø tabig maramigwanba, lastima ashibelø kømigwanba, isubigwan Tiusweinug pasra tøgagømigwanba. Ñimbe marøppe, iilanwei maramig kuig køn cha, tru diezmørig kan kan wesrawa Tiuswan tranamigwangucha pesannamø, tøgatø marøb.

24 jÑim chigúinguen ashmeelø købendø, katøganelan pera ambubelø! Pølømunøzhigwane tøga muchimønrrab larruusra muchendø, camellone kebinab pinan cha.

25 'iAy, ñim waachamera Moisés pørigwan kusrenanøbeløba, fariseosmeraba, palatø tabelø! Pasunba, platillonba wambiimaybe pillmabendø, ñimui umbube ñimbe misagwan kwaarøsrø kerranrrab isuiløba, chigurrimbunø tøgagønrrab parø isuiløba, trutø netsailø køn cha.

26 jFariseo chigúinguen ashmúig! Pasun umbumaymerrig chish mar cha, wambiimaygucha chishig kørrømisrtrai.

27 'iAy, ñim waachamera Moisés pørigwan kusrenanøbeløba, fariseosmeraba, palatø tabelø! Kwaig sørin trabmera wambiimaybe puløzhig pisig latailø tabzhig latailø købendø, umbumaybe kwabelain tsutsiimerabah, chigøben køsøngønrraptiibatø netsailø, ñimbe tre latailø køn cha.

28 Ñimbe øyeeg latailø køn: Misaamerai merrappe sølgandø tabelø lataig asønabendø, wambiimay maig køben treegwein kømøtø, umbumaybe isatø tabig lataig indiiløbah, larrø kaibatø netsailø køn cha ñimbe.

²⁹ ¡Ay, ñim waachamera Moisés pørigwan kusrenanøbeløba, fariseosmeraba, palatø tabelø! Tius maig karuigwan eshkabelai søriiløyu ñimbe tamara pønsrøb, sølgandø tabig amøñibelan sørim pala tabzhig tamarøb inchibelø køn cha.

³⁰ Inchabe ñimbe trenchibelø køn: “Namui merrabsreelø warab uras nam warabelø kuig kuimbe, Tius maig karuigwan eshkabelan kweechib ani lushib nømba tøgatø marøb pønrrømubsrubrainrun” cha.

³¹ Pøs øyeeg taikkurri ñimbe Tius maig karuigwan eshkabelan kweechibelainukkurri amrrub misaamera ker cha ñimðweinguen wamindan cha.

³² Inchawei ñimui merrabsreelø pølbasa marig købigwane, trube, ñimbe pasøga pasray chibig køn.

³³ ¡Ulmera latalø, ñim namig ulmera latalainukkurri karrab misaamera! Inchawei ñimbe tru møra melamnug kebusriilø kømønrrab ¿chinchawegørrønrrague? cha.

³⁴ Inchawei asay chibig køn. Nabe Tius maig karuigwan eshkabelø køben, nørrø kusrebelø køben, Moisés pørigwan kusrennøbelø køben ñimuimay øren, møilan køben ñimbe truilane kweechib, kurusyu melsrøb inchun cha. Katø judíosmera tulundzuni yamerayu maig købash marøb ichabetab, pueblo smørig chu amben, chu amben, ñimbe pasraørøb wendautø amrrun cha.

³⁵ Øyeekkurri tru sølgandø tabig amøñibelan kweetsilai ani mayamba pirau lusiibe ñimuim pala kønrrun cha, tru Abel sølgandø tabigwei ani lusikkurrimbunø, Berequíaswei nusrkai Zacarías tru altarba, santuarioba pønrrabnug, tru tøbøtag pasrøben, ñim kweecha, truigwei ani lusigwangatig.

³⁶ Pøs nabe ñimun cierton trendamønrrun: Kerrigu øyeeg marikkurri Tiusbe møi ya misagwan ulø payrrun cha.

Jesús Jerusalénwan isua kishib (Lc 13.34-35)

³⁷ ¡Jerusalén! ¡Jerusalén! ¡Tius maig karuigwan eshkabelan kweechibig, katø ñimuyasig Tius karua øriilan sruutøga petabig! ¡Nabe yamba, kan piejetø kømø, kan atøwall nui pullichu-uregwan kwaldzarig umbu kanbalatø mara, maatanab latalitøwei ñui uregwan tulundzunønrrab inchen, ñibe nane kaasig køn! cha.

³⁸ Au, ñim waraig yamerabe elatsig muguchagaig kørømisrtrun cha.

³⁹ Kaguende nabe trendamønrrun chibig køn: Nane katøbe mas ashchamøn cha, øya tamnegatig: “¡Señorwei munchiyu nø ørig arrubiibe mayanguen tab kuig køn!” cha.—

24

Jesús Tiuswei yawan pinisaig kønrrun chib (Mc 13.1-2; Lc 21.5-6)

¹ Jesús Tiuswei yaugurri webya iben, nui kusrenanøb pera inuiløbe nun kemallibelø køn, tru Tiuswei yau yameran eshkanrrab.

² Inchene Jesúsbe nømune trenchibig køn:

—¿lilan kerrigu ashke? cha. Pøs nabe ñimun cierton trendamønrrun cha: Yube ni kan srukken katøgan srug palabe kørømisrmønrrun cha. Kerriguba pøtiitsig kønrrun— cha.

Chigurrimbunø købig misaabañau patsam lutau chigøben køb (Mc 13.3-23; Lc 21.7-24; 17.22-24)

³ Incha Jesús Olivos Tunsrø wabene, nui kusrenanøb pera uniiløbe nundø nøørø trencha payrrab kemallabe trenchibelø køn:

—Øyeebe mana purainrrab kui namun eshkarra cha. Katø ñi katøle arrumigwanba, yandø srabe kwaløm punrrabigwanba asamibe ¿chitø kenamisrtrerah?— cha.

⁴ Inchene Jesúsbe trencha løtabig køn:

—Ashiptø kuy cha, mugøben ñimun peløsrkønrrain kømø.

⁵ Kaguende møiløgøben nai munchiyu truba nu amrrua trenchinrrun cha: “Nabe Cristo kur” chib. Trumay misaameran isa wamincha, truba nu peløsrkønrrun cha.

⁶ Incha ‘misaamera katøgan peesrø misaameraba purø trømbøig kørig kømdiig kwayab kweetsiyab køn’ chib, katø ‘purø trømbøig kørig kømdiig kwayanrrab køn’ chib ñim wamindi mørabe, mandøguen kømui inchib kwarmøtay cha. Kaguende øyeebe trendø treeg purainrrabigwein køn cha. Inchendø katøgucha patsamibe pumø srø kønrrun chibig køn.

⁷ Peg misaamerabe katøgan peg misaameraba kwayaben, katø rey karumburab ashib karuim piraueløbe katøgan reywei misaameraba kwayanrrun cha. Trune parø arruben, chusrøn køben pirø trømbøig kønønrnun cha.

⁸ Inchendø kerrigu øyeeb pureb arrubiibe kan ishuwan unø tammisrtrab pusrkwab pølbasri lataitø kønrrun cha.

⁹ Inchen ñimune maig købash inchib kaig marøb srua kønrrai tranen, ñimune kwetchun. Katø chu pirauelø køben maya misaamerabe nagurrindø ñimun tsalø asiilø kønrrun cha.

¹⁰ Inchen tru kwalømmerawane møiløgøben truba nu nan tarømisra, kangurrin kangurri tsalø inchibelai tasku pønsrøb, kangurrin kangurri ashig kømui indiyab inchun chibig køn.

¹¹ ‘Tius maig karuigwan eshkabelø ker’ chib isatø eshkabelø truba truba kurra, isatø misagwan truba nu peløsrkønrrun cha.

¹² Kaibe purø trømbøig larrøbichib arruptø, misaamerabe kerrigu lutau kangurrin kangurri katøganellan isua undaaramigwane yandø isumønrrun cha.

¹³ Inchen srabe kwalømgatig chigúingucha megabig megabiibe kebeñchabig kømfig kaigyugurri wesraig kønrrun cha.

¹⁴ Tius nø ashib karub waigwei tabig srø wambe yu pirau pirø muba kuimburab chi misaamerandøgucha eshka kusrenanig kønrrun, chigúi nebua ashchai misaamera. Inchen yandø srabe kwaløm punrrun chibig køn

¹⁵ Inchawei Tius maig karuigwan eshkabig Daniel wamindig tru pinishinrrabig trømbøig køsøngønrraptiig Tiusweyasiitø marinug marøb pasramisrin kui ashabe, (lebiibe iigwan tab chigúi mør),

¹⁶ yandø treeg pubene, Judea pirau warabeløbe tunmerasrømay wegørra lulay.

¹⁷ Katø nui ya pala wambig wabiibe kørraarua chigucha wesranrrab kebimumig køn.

¹⁸ Katø chugøben trausrø uñibiibe nui itøtsinigwan tranrrab arrumumig køn.

¹⁹ jshumbur waachamera, tru kwalømmerawan patsø kwanrreelø, kabe muchib ureg tøgarmearimbe maig kønrrer! chibig køn.

²⁰ Ñimbe Tiuswan miay cha, pishin kwalømmerawan wegørra lulamig nebumøwei, katø isrin kwaløm nebumøwei inchain cha.

21 Kaguende tru kwalømmerawane purø trømbøig nebuinab melamig at-trun. Pirøwan pølbasa marøb uraskurri møingatig øyeebe kaagúig, katøbe managuen øyeebe kaanrrun chibig køn.

22 Tius tru kwalømmerawan landøranmuisruandøbe, mugucha øsig waramgaig kønrrun cha. Inchendø tru nuyasiitø tarømariiløgurri landøranrrun cha.

Ka isatø 'Cristo ker' chibeløba, 'Tius maig karuigwan eshkabelø ker' chibeløba

23 Incha møikkøben ñimun: "Au, Cristo yu pasran" chib, kabe: "Au, Cristo uyu pasran", taingucha, køremøtay.

24 Kaguende møiløgøben 'Cristo ker' chib isatø inchibeløba, katø, 'Tius maig karuigwan eshkabelø ker' chib isatø inchibeløba amrrunrrun cha. Incha nømui maramburab mariilø truba nørreelø asha kømig kenamariiløba, kwaara asha kønrrai nørreelø mariiløba martrun cha, misagwan treeg incha peløsrkønrrab. Incha Tius nuyasiitø tarømariilanguen kegørrøsrkamdiig kuimbe, kegørrøskønrrab inchun.

25 Au, nabe ñimune øyeelø puraimøwatø chab eshkar.

26 Inchawei ñimun møikkøben: "Au, øsrø mu misag warab waraimønug pasran" chibene, ashchab webammøtay cha. Kabe: "Yu yaambusrø wan", taingucha, køremøtay cha.

27 Kaguende kan palaig pilabig wagurri walli umbusrø kebilab lataitøwei, tru Møg Misra Arrubig arruppe, treeg attrun chibig køn.

28 Kwaig chu tsubene, truyube kallinasumera tulundzunønrrun cha.

*Møg Misra Arrubig mandø arrumigwan waminchib
(Mc 13.24-37; Lc 17.26-30, 34-36; 21.25-33)*

29 Inchen tru treeg isumdø kwalømmera chab puraiben latatø, nøsiibe yandø kwaben,

pøibe yandø pilømuben,

estrellamerabe srømbalarøngurri kørøben,

katø srømbalarø purø nørreelø pønrrabelane kønøgøb sruagutsiilø kønrrun chibig køn.

30 Inchen Møg Misra Arrubig tru arrumigwan eshkabig srømbalarø kenamisren, chu pirausrøn køben misag nørro pønrrabelø truba truba isub kishchun cha. Inchen Møg Misra Arrubiibe maramburab maramig tøgäig srømbalarøngurri purø nuig tørguegwalmabig wañiyu arruben ashchab køn, chibig køn.

31 Inchen trompetan truba mur urrøben, nøbe nui ángesmeran amrrai ørtrun chibig køn, ambugurri, igurri, walligurri, wagurri, srømbalarø kandarømayrøngurri katøgandarømayrøngatig nui lawa wesruilan kanbalatø tulishinrrai.

32 Kan higuera tusrwanma asha kusrey. Nui sramera uturcheelø misrøb, ishiimera weguchene, ñimbe pachig kwalømmera arrumig yandø lutau kui ashibelø køn cha.

33 Øyeetøwei ñim kerrigu iilan ashabe, attrabiibe attrab yaskabuguen pasraitamab isua kuy, chibig køn.

34 Pøs nabe ñimun ciertun trendamønrrun: Møin kwaløm misamera pinømøwatø, øyeeløbe kerrigu purainrrun cha.

35 Srømbalaba, pirøbabe patsøben, na wamindiibe ka wamindiitøbe purainrraamøn cha.

36 'Inchen tru treeg punrrab kwalømwanba, uranbabe mugucha ashmøn cha. Srømbalasrø ángesmeraguen ashmøwei, ni Tiuswei Nusrkai ashmøwei indan cha. Trunun ashippe, Møskainðwei asan chibig køn.

37 Noé tsub kwalømmerawan maig purayaibe tru Møg Misra Arrubig katø arrum kwalømgucha treetøwei purainrrun cha.

38 Kaguende tru kwalømmerawan sre puben pi pulabig attrab srø købenbatø, tru urasma misaamerabe mab, muchib, kasharab, kasharanøb waraig købig køn cha, Noé nui truba nu barcoyu kebyam kwalømgatikke.

39 Incha treeg pumnegatig øyeeg kønrraitamab isumø warøbenba tru pi pulab arrubiibe maya misagwan patsø srua yaig købig køn cha. Øyeetøwei purainrrun chibig køn, tru Møg Misra Arrubikkucha katøle arruben.

40 Incha tru uras pailø møguelø trau warøben, kanune srua iben, kanune kørømarig kønrrun cha.

41 Pailø ishumburmera kitsøsrugu kichib køben, kanune srua iben, kanune kørømarig kønrrun chibig køn.

42 'Nimbe pesannamø, isua, ashiptø kuy. Kaguende ñimui Señor chi kwaløm attrab kui ashmøwa køn.

43 Trube, treeg købene, iigwan isua kuy, kan ya puaima niliig yem chu uras attrab kui mørimbe, ashib megawa, yau nilønrrab kebibashmubsruinrrun cha.

44 Inchawei ñimgucha tamara melay chibig køn. Kaguende tru Møg Misra Arrubiibe chi isumø købenba arruptionchun cha.

Mendig megabig maig taigwan marøbigwanba, maig taigwan marmligwanba kemesra wamindig

(Lc 12.41-48)

45 'Kan karuindiig megabig maig taigwan møra marøb, katø chi maramelan nøtø tsabø asha marøbigwan, ya puaiig nui yau warabelan mannam ura puin kuindø nømui mamigwan srøttrab muniitø wabig kønrrai ashai wanninabiibe ¿møig kerah? cha.

46 Truibe mayanguen tab kuig køn nun karua pasrigwan marøb megabenh ya puaiig puptindinabigweimbe.

47 Pøs nabe ñimun cierton trendamønrrun: Ya puaiibe nui chi tøgagúigwan kerrigu nø asha marøb pasrønrrai tranrrun cha.

48 Inchen karuindiig megabig larrø kaibe nuinetø treeg isubig køn: "Nai ashib karubiibe peguen attraamøn" cha.

49 Katøgan karuindiig melabelan kurrabetab menda, katø mutsigueløba mab, muchib, tsubenba,

50 nui ya puaiibe ni attraitamab isuinguen kømø kwaløm, ni ø uras punrraitamab isumø tsubenba, puptioncha,

51 purø trømbøig ichagucha, palatø tabelø pønrrainug kertrun cha. Tryube kishib, trugulwan tsatsamig kønrrun chibig køn Jesúsbe.

25

Diez srusralmera novian lynchab webambubelø lataitøwein køn cha, kemesra wamindig

1 'Srømbalasrø Tius nø ashib karub waibe øyeeg lataig kønrrun: Diez srusralmera mu møøba kimeelø aceite lámparameran piløga muta, tru keg misrtrabigwan lynchab katønrrab webambubelø lataikke.

2 Truilø tru tratrøgatøbe ni chiguen tre isumeelø køben, katøgan tratrøgatøbe tamara isuatø muniitø melabeløgue.

³ Tru trattrøgatø chi tre isumeeløbe lámparamerane srua ambendø, aceitebe srua ammuin købig køn, tru patsøben katø usramig.

⁴ Trune tru isuptø melabeløbe lámparamerayu usriilø kømnetø, katø usramig nøøø køtsø-ureezhigu srua ambubelø køn.

⁵ Inchen tru keg misrtrabig peguen arrumubene, nømune søteelanba yandø ki kanaben, søteeløba kiptindin købig køn.

⁶ 'Inchen yem tøbøtasrømbe trenchib trasay møran: "¡Keg misrtrabiibe yu arrun cha. Katønrrab amrrab werruy!" chib.

⁷ Inchen søteeløba tru srusralmerabe kurra, nømui lámparameran tamarøb mendabelø køn.

⁸ Inchen tru trattrøgatø tre isumeeløbe, tru trattrøgatø isuatø melabelane trenchibelø køn cha: "Ñimui aceiten kuchi namun ketøbsrumugu cha, namui lámparamerabe ke chab kwab amrrun" cha.

⁹ Inchen tru srusralmera tamara isuatø melabeløbe trencha løtabelø køn: "Kaimaysruandøbe cha. Kaguende ñimui lata namui lata nebunrraamøn cha. Trembe yanøbelaisrø penønrrab ambay chibelø køn, ñimuyasiitøwei."

¹⁰ Inchen tru trattrøgatø srusralmera aceiten penønrrab ambamnetø tru keg misrtrabiibe puptinchen, tru trattrøgatø isuatø melabeløbe keg misrtrabiiba kasharab fiestayumay kebamben, yandø yaskabwan kasrøbig køn.

¹¹ 'Inchen yana wendau tru kan srusralmeragucha trenchib pubelø køn: "¡Señor, Señor, namun yaskabwan kurtra!" chib.

¹² Inchen nøbe trencha løtabig køn: "Pøs nabe isa kømø, ñimune mumera kui ashmīg kur" cha.

¹³ 'Inchawei ñimbe pesannamø, ashiptø melay chibig køn Jesúsbe. Kaguende tru Møg Misra Arrubig arrumigwane ñimbe chi kwaløm attrab kui mørmøwei, ni chu uras attrab kui mørmøwei indan cha.

*Anwan uta øyeeg marøbig lataig køn cha, kemesra wamindig
(Lc 19.11-27)*

¹⁴ "Tius nø ashib karub waibe øyeeg lataig køn cha: Kan møg yabsrømay inrrab, nui karuindiig melabelan wama, nui chi tøgagúilan asha marøb kønrrai trana ib lataikke.

¹⁵ Kan møigwan køsrønbe an trattrø mil tranøppe, møigwan køsrønbe pa mil, møigwan køsrømbe milgue, møigwandøgucha nøm maig martrapteelø køben treg trana, yandø inrrab yan cha.

¹⁶ Tru karuindiig megabig an trattrø mil utabiibe trutøga penab, yanøb incha, katøgan trattrø mil nemaran cha.

¹⁷ Inchen katø tru pa milwan utabikkucha katøgan pa mil nemaran cha.

¹⁸ Inchen tru milwan utabiibe pirau kan trab lalla, tru an tranøbigwei anwane truyu søraptindan cha.

¹⁹ 'Indiibe yandø truba yana misrøb iben, tru karuindiig melabelan treg marøb melønrrai karua pasrøbiibe katø arrua, nøm chitø maritashchab wamisra ashib mendan cha.

²⁰ Inchen tru an trattrø mil utabig puabe, trendan cha: "Nai ashib karubig, ñibe nan trattrø mil tranig kømøh cha. Møimbe tru kømnetø nabe katøgan trattrø mil nemara, yu srua arrur" tan cha.

²¹ Inchen truipe trendan cha: "Øyambesin cha, ñi nai karuindiig megabig tabig, chi isumgaig maig maramigwan marøbig. Ñi lamøtiigwanma chi isumgaig øya søl mariibe, mas nuwan martrai pasrtrumøn tan chibig køn. Incha kebarrua, naba truba kasraarau" tan cha.

22 'Inchen tru karuindiig megabig pa mil utabiibe trendan cha: "Nai ashib karubig, ñi nan pa mil tranig kòmòh cha. Mòimbe katògan pa mil nemara, yu tógagur" tan cha.

23 Inchen tru an tranøbiibe trendan cha: "Øyambesin cha, ñi nai karuindiig megabig tabig, chi isumgaig maig maramigwan marøbig. Ñi lamøtiigwanma chi isumgaig øya søl mariibe, mas nuwan martrai pasramønrrun cha, trendan cha. Kebarrua, incha naba truba kasraarau" tan chibig kòn.

24 'Inchen tru mendig megabig tru milwan utabiibe trendan cha: "Nai ashib karubig, ñibe ñiashib ellgwaig kòmubendø, ellmarigwan tulishib, ñiashib tsurig kòmubendø, parøb, katø ñibe chiwandøgucha chi chippe, ke kandø chibig kui nabe ashibig kuabe, treekkurri nane kørig køben,

25 ñui anwan srua ya, pirau sørig kòn cha. Inchendø ñui anwan utørra" tan chibig kòn.

26 Inchene nui ashib karubiibe trendan cha: "Karuindiig megabig larrø kaig, trurrigu pøig kòn cha. Pøs naashib ellgwainug kòmubendø, ellmarigwan tulishib, naashib tsurinug kòmubendø, parøb inchibig kui ashabe,

27 trube, maindi nai anwan bancoyu an utabelan pastrai tranamdiigwan tan chibig kòn, na katøle arrua, nai anwan nemisirigwanbañau utamig kønrrain cha.

28 Inchawei, nai anwan kerrawa, tru an diez mil tøgagigwan tranay tan.

29 Kaguende tøgagigwane masken tranen, uñchaguen tøgagønrrun cha. Inchen chigaigwane nui lamøtiig tøgagüigwanguen kerranrrun cha.

30 Incha i karuindiig megabig chigucha chi marmígwane wambig purø trømbø løstøyu wegutsay tan chibig kòn. Truyube kishib, trugulwan tsat-samig kønrrun" cha.

Chu pirausrø misaamerandøgucha Tius maig kønrrabigwan asha marøb

31 'Møg Misra Arrubig nui tørguegwalmabigu tru maya ángelesmeraba arrua, wamisra nui ashib karub waig tørguegwalmabigu wamisrtrun.

32 Inchen yu pirau chi misaameratøgucha nui merrab tulundzunøben, nøbe nøørø, nøørø tarømartrun cha, kan ubisha ashibig ubishameranba, kabrameranba nøørø, nøørø tarømarøb lataitøweingue.

33 Incha ubishamerane kusrmay pønrsøppe, kabramerane atsimay pønrsønrrun.

34 'Incha Reybe tru kusrmay pønrrabelane trenchinrrun: "Nai Møskai ñimun mayanguen tab indiiløbe naimay amrruy cha. Incha Tius pirøwan marøb uraskurri ñimuyasig tamarig pasrabig tru ashib karub wainuguigwan ñimuyasig utay chinrrun cha.

35 Kaguende na parøgwai uñen, ñimbe na manrrai nan srørrig kòn cha. Na pi mulgwai inchen, ñimbe pi mutchai srørrig kòn cha. Na arruatiig chugucha pumikkaig uñen, ñimbe tab wamab, ya pebøb indig kòn cha.

36 Asru chi kemig chigaig uñen, ñimbe nan tranig kòn cha. Na kwanrrø tsuben, nan ñimbe ashchab amrruig kòn cha. Kailan keeri yau na pasrøben, nan ñimbe neshchab amrruig kòn" chinrrun cha.

37 'Inchen tru sølgandø tabig marøbeløbe trenchib løtab pønrrønrrun cha: "Señor, ¿ñi parøgwai uñen, nambe mana mamig srørrøb, katø ñi pi mulgwai indi ashabe, nambe pi mutchai mana srørrig køh? cha.

38 ¿Arruatiig chugucha pumikkaig uñen, nambe ñune tab wamab mana ya pebig køh? cha. ¿Asru kemig palai uñene, nambe mana tranig køh? cha.

39 Kabe ¿kwanrrø tsuben kui, kailan keeri yau keerig pasrøben kui, nambe mana neshchab amrrubrah?" chinrrun cha.

⁴⁰ Inchen Reybe trencha lətənrurun cha: “Pəs nabe ñimun cierton trendamənrurun cha: I nai nunelan chigucha kəmözheelə latailan mariibe, nan marig kən” cha.

⁴¹ Incha katə atsimay pənrrelangucha Reybe trenchinrrun cha: “Ñimbe nainukkurri tarəmisray cha; kaigyū pənrənrrai pənsrailəbe, nugwaimandzig-weimba, nui āngelesweimba tru managuen kwamə nag tamarig pasrabigumay ambay cha.

⁴² Na parəgwai uñen, ñimbe mamig srərrmuig kən cha. Pi mulgwai inchen, pi mutchai srərrməwei indig kən cha.

⁴³ Na arruatiig chugucha pumikkaig uñen, tab wamab nan ya pebmuig kən cha. Asru chi kemikkaig uñen, ñimbe nan tranmuig kən cha. Na kwanrrə tsub, katə kailan keeri yau na pasrab inchen, ashchab amrrumuig kən” chinrrun cha.

⁴⁴ Inchen nəmbe trenchib pənrənrrun cha: “Señor, ñune parəgwai uni ashib, pi mulgwai uni ashib, kabe chugucha pumikkaig uni ashib, asru chi kemikkaig uni ashib, kabe kwanrrə tsui ashib, kailan keeri yau pasrai ashib inchendə, ¿namgan ñun purugumuig kuitarru?” chinrrun cha.

⁴⁵ Inchen Reybe trencha lətənrurun chibig kən: “Pəs, nabe ñimun cierton trendamənrurun cha: I nai nunelan chigucha kəmözheelə latailan ñim chigucha marmuibe, nan treeg marmuig kən cha.

⁴⁶ İləbe managatig purə trəmbəig mərə melannumay tarəmisra amrrun cha. Inchen tru səlğandə tabeləbe managatig əsig purramsromay amrrun” chinrrun— cha, trenchibig kən Jesúsbe.

26

Jesúswan keməra kwetchab waminchib

(Mc 14.1-2; Lc 22.1-2; Jn 11.45-53)

¹ Jesús ilan kerrigu chab waminchabe nui kusrenanəb pera uniilan trenchibig kən:

²—Ñimguen ashen pa kwaləmyube Pascua Fiestan martrab kən cha. Inchen tru Məg Misra Arrubiibe kurusyu mesraig kənrrai tranig kənrrun— cha.

³ Inchen tru urastəwei sacerdotsmeran karubeləba, misagwan karubelə kəlli misaameraba Caifás, tru maya sacerdotsmeran nə karub sacerdoti palacioyū tulundzunabelə kən.

⁴ Incha Jesúswan chinchagəben tammaytə chi isa kəben keməra, kwetchab waminchendə,

⁵trenchibelə kən:

—Fiesta utu marmənrrab cha, misamera ke chindi asamgaig inchimənrrain— cha.

Betanasrə kan ishug may irrabigwan Jesúswan itəlushib

(Mc 14.3-9; Jn 12.1-8)

⁶ Betanasrə tru Simón leproso taigwei yau Jesús wabene,

⁷ kan ishug alabastro limetayu truba may irrabig netsiig truba nuweyigwan srua, kemalla, Jesús mishatsigu wamnetə, tru may irrabigwan tur pala itəlushibig kən.

⁸ Inchen nui kusrenanəb pera uniiləbe ashabe, ishuwan trenchib nama-belə kən:

—¿Ke ka yandəbe iigwane chinchabrre lushibig kəh? cha.

⁹ Waachameran purugumig purə nuwei yanəbsruinrrun— cha.

¹⁰ Inchen Jesús wetəbeñabe, trenchibig kən:

—¿Ishuwane chi chibrrren purrøgue? cha. Pøs iig nan mariibe truba tabig maran chibig køn.

¹¹ Kaguende waachamerane chu uragucha ñimui utu tøgagønrrun cha. Trune nane treeg kønrraamøn cha.

¹² Ishug tru may irrabigwan nan asru itølusiibe nan søramigweyasig tamaran cha.

¹³ Pøs nabe ñimun cierton trendamønrrun: Yu pirau chutøgucha Tiuswei tabig srø wam kaigyugurri wesrabigwan eshkab kusrenaniisrømbe tru nø marigwangucha tøgga waminchun cha, nun pesannamø, isuig kønrrain — chibig køn.

Judas Jesúswan ashig kømui inçhibelan tranøb

(Mc 14.10-11; Lc 22.3-6)

¹⁴ Judas, tru Iscariote taig, Jesús doce kusrenanøb pera uniilai utuig, sacerdotsmeran karubelan ashchab yabe,

¹⁵ trenchibig køn:

—¿Jesúswan ñimui tasku tranene, nane chi tranrrunrrague?— cha.

Inchen nømbe an treinta tranøbelø køn.

¹⁶ Inchen tru uraskurri Judasbe Jesúswan mandø incha tranamigwan yandø lab mendabig køn.

Señorwei Pascua mamig

(Mc 14.12-25; Lc 22.7-23; Jn 13.21-30; 1 Co 11.23-26)

¹⁷ Tru Pirri Levaduragaig Maig Fiesta pølbassrøb kwaløm Jesúswei kusrenanøb pera uniilø nun kemallabe, trencha payibelø køn:

—¿Pascua mamigwan ñuimbe nambe chu tamaramø?— cha.

¹⁸ Inçhene nøbe trenchibig køn:

—Ciudayu kan møweimay ambabe trenchinrrigay cha: “Kusrennøbiibe trendan cha: ‘Nai urabe yandø puin køn’ cha. ‘Pascua maramigwan nai kusrenanøb pera uniiløba ñui yau martrab’ tan”— cha.

¹⁹ Inchen nui kusrenanøb pera uniiløbe Jesús maig karuigwan mara, tru Pascuan tamarøbelø køn.

²⁰ Inchen yandø yem køben, nui kusrenanøb pera uniiløba mishatsigu wawa,

²¹ mab wappe, trenchibig køn:

—Pøs nabe ñimun trendamønrrun cha: Ñim møikkøsrøn nan ashig kømui inçhibelaingatø misra, nan tranrrrab køn— cha.

²² Inchen nømbe truba truba isui incha, kan kan nun payib mendabelø køn:

—¿Señor, kabe na købra chinderah?— chib.

²³ Inchen Jesúsbe trencha løtabig køn:

—Kan møikkøsrøn pirriwan i nindagutøwei naba kebishibig, truig nan ashig kømui inçhibelaingatø misra, tranrrrautan cha.

²⁴ Tru Møg Misra Arrubiibe Tiuswei wamwan pørigu maig pørig pasrøben, truwan pureb iben, trune ¡tru møg waacha! tru Møg Misra Arrubigwan ashig kømui inçhibelan tranrrrabigweimburappe, yeekkucha kuita chibig køn, trembe truike kal-lamuig kuinguen søl købsruinrrun— cha.

²⁵ Inchen tru Judas, tru ashig kømui inçhibelaingatø misra tranrrrabiibe:

—¿Kusrennøbig, kabe na købra chinderah?— cha payene, Jesúsbe:

—Ñibe sølwein tan— chibig køn.

Señor nui doce pera uniiløba mab

²⁶ Incha mab purrappatø, Jesúsbe pirriwan muta, Tiuswan ‘mayanguen pay’ cha, pirisha, nui kusrenanøb pera uniilan trenchib srørrøbig køn:

—Cha, may cha. Iibe nai asr kòn— cha.

²⁷ Incha katø copan muta, Tiuswan ‘mayanguen pay’ cha, nømun trenchib purøøøbig kòn:

—Søteeløba i copayugwan mutsay cha.

²⁸ Kaguende iig, nai animbe, Tius tru misagweyasig srø acuerdon mari anin kòn cha. Tru animbe truba nu misagweyasig kaig mariilan ulø paymø pesannaig kønrrai lusig kòn cha.

²⁹ Incha nabe ñimun trendamønrrun chibig kòn: Uvas piwane mas muchimønrrun cha, nai Møskai nø ashib karub waisrø katøyug ñimba mutsam kwalømgatig.—

Jesús Pedron, nan ‘ashmíig kur’ chinrrautan cha, kanmaytø eshkað
(Mc 14.26-31; Lc 22.31-34; Jn 13.36-38)

³⁰ Incha yandø kan himnon chab cantawabe, Olivos Tunsrømay amba,

³¹ Jesúsbe trenchibig kòn:

—Ñimbe mayeeløba nagurrindø mõi yembe nainug isua pønrraigwan trubishinrrun cha. Kaguende Tiuswei wamwan pørigu øyeeg chibig pørig pasran cha:

Übisha ashibigwan na kweecheen,

ubishamerabe nøørotø chab lulrrun, chibig.

³² Inchendø nabe katøyug øsirappe, ñimnguen ammøwatø, nabe Galileasrømay yamønrrun— chibig kòn.

³³ Inchen Pedrobe trenchibig kòn:

—Mayeeløba ñuinug isua pønrraigwan trubisaingucha, na kuimbe managuen tarømisrmumønrrun— cha.

³⁴ Inchen Jesúsbe nune trenchibig kòn:

—Pøs nabe cierton ñun trendamønrrun cha: Mõi yemdøweinguen kallu wamømwatø, ñibe pønmayguen nan ‘ashmíig kur’ chinrrautan— cha.

³⁵ Inchen Pedrobe trenchibig kòn:

—Ñiba nan kwamig nebinguen, nabe managuen ñun ‘ashmíig kur’ chimønrrun— cha.

Inchen mayeeløba nui kusrenanøb pera uniiløgucha treetøwein chibelø kòn.

Jesús Getsemanísø Tiusba waminchib
(Mc 14.32-42; Lc 22.39-46)

³⁶ Incha Jesúsbe nui kusrenanøb pera uniiløba, kanbalø Getsemani taisrømay ambabe, trenchibig kòn:

—Yu purramisray cha, na øsrø nai Møskaimba waminchab yamne.—

³⁷ Incha Pedronba, Zebedeowei nusrkalan pailanba pera yabe, truba isui, ni mumayguen tab kømui inchib menda,

³⁸ trenchibig kòn:

—Nai manraube isubiitø kwabguen ka kwamdiig køtan cha. Ñimbe yutø kørøømisra, naba ñimgucha kimø, purray— chibig kòn.

³⁹ Incha Jesúsbe katøguchi ambuurø ya, nui maløwan piraugatig kebachib sraløptinchabe, trenchib Tius Møskaimba waminchibig kòn:

—Nai Møskai, i copan nan tarømartra cha. Inchendø na maig isuig køben, treeg kønrrain kømøtø, ñun maig maramdiig køben, treeg kønrrain— cha.

⁴⁰ Incha katø nui kusrenanøb pera uniilaimay arrua, kib purrai wetørrawabe, Pedrone trenchibig kòn:

—¿Kan uratøguen kimø, naba kasrig purrønrrab kaimatirru? cha.

41 Kimø, Tiusba waminchib purray chibig køn, chiyugøben kaigyu kegørrømønrrappe. Ñimbe tabigwan martrabwei isuingucha, ñimui asrbe kullaguig køn— cha.

42 Incha katøle Jesús Tius Møskaimba waminchab ya, trenchibig køn:

—Nai Møskai, i copan na muchimønrrai tarømaramgaig købene, trube, ñun maig maramdiig køben treeg martra— cha.

43 Incha katø arruabe, katøguen nui kusrenanøb pera uniilane kiptøweim purrain kui wetørrabig køn, kaguende nømui kabmerabe kigøbiitø ke kanain purrøwa.

44 Incha nømun purramnetø katø pønmay kønrrabyu Tius Møskaimba waminchab ya, srøsrø mandø wamindig treetøweim chib waminchibig køn.

45 Incha nui kusrenanøb pera unilaimay arruabe, trenchibig køn:

—¿Katøgucha ñimgan israb, kib srø warøtirru? cha. Yandø ura pun cha, tru Møg Misra Arrubigwan kaig marøbelai tasku tranamig.

46 ¡Kurray, chibig køn, amrrab! cha. Nan ashig kømui inchibelaingatø pasramisøbig nan tranrrab arrubguen indan cha. ¡Asay!— chibig køn.

Jesúsuan kemøra srua ambub

(Mc 14.43-50; Lc 22.47-53; Jn 18.2-11)

47 Jesús waminchib pasramne, Judas, tru doce kusrenanøb pera unilail utuibe truba truba nu misaaba arrubig køn, nømbe espadamera køben, tsiimera køben sruargue. Truiløbe sacerdotesperan karubeløba, misagwan karubelø kølli misaameraba misra, karua øriilø købig køn.

48 Tru Judas Jesúsuan ashig kømui inchibelaingatø pasramisøbiibe nømune: “Merrarramig kuitamab ñim ashchai, na chi siñal køsrøn maren, ashib pønrrønrrigay cha, eshkain købig køn. Tru na muchaig, truig kønrrun cha. Kemørtrigay” cha.

49 Incha Judasbe møi møi Jesúsweim pulu kemallib trenchibig køn:

—¡Kusrennøbig, yandø yem køn!— cha.

Incha muchabene,

50 Jesúsbe trenchibig køn:

—Nai trendø lincha uñibig, chi martrab arruabe, mar— cha.

Inchen kaneløbe kemalla, Jesúsuan kemøra, sruamrrab merrarrabelø køn.

51 Inchen møikkøsrøn Jesúsba pasrabiibe espadan wesrub, maya sacerdotesperan ø karub sacerdoti karuindiig megabigwan kaluwan kelarrab lutiichtinchibig køn.

52 Inchen Jesúsbe trenchibig køn:

—Ñui espadane wayinug way cha. Kaguende mutøgucha espadatøga kwayabiibe, espadatøgatøwei kweetsig kønrrun cha.

53 Ñi isubgan nai Møskawan miamønrraitamirru cha. Na miabene, nøbe møindøweinguen ángelesmera muguen nebua mundzamgaig ørøbsruinrrun cha.

54 Pøs treeg købene, Tiuswei wamwan pørigu øyeeg purainrrun taibe, trube, ¿chinchincha purainrrab kø?— cha.

55 Incha tru urastø Jesúsbe misaameran payibig køn:

—¿Chindimbarre ñimbe espadamera køben, tsiimera køben suar werrugue cha, nan kemørtrab, nabe kan niliig kui lata? Nabe kwalømmørig Tiuswei yau kusrennøb waben, ñimbe managuen nane kemørmuig køn chibig køn.

56 Inchendø iig kerrigu øyeeg nebuppe, Tius maig karuigwan eshkabelø Tiuswei wamwan pørigu maig taig treeg nebunrrain kuig køn— cha.

Inchen nui kusrenanøb pera uniiløbe nundø elachippa, mayeeløba chab luløptinchibelø køn.

*Jesús tru Setenteelø maig maramigwan asha marøbelai merrab
(Mc 14.53-65; Lc 22.54-55, 63-71; Jn 18.12-14, 19-24)*

57 Incha Jesúswan merrarrabeløbe tru maya sacerdoesmeran nø karub sacerdote Caifáswei yamay nune srua ambubelø køn, tru Moisés pørigwan kusrenanøbeløba, misagwan karubelø kølli misaameraba tulundzuna pas-rainuumay.

58 Inchen Pedrobe Jesúswei wendau yaptø, yaptø tru maya sacerdoesmeran nø karub sacerdotei ya wambiisrøngatig ya, umbu kebyabe, tru ashchay pønsraig pønrrabeløba wabig køn maig kørørmisrtashchab ashchab.

59 Inchen sacerdoesmeran karubeløba, tru Setenteelø maig maramigwan asha marøbelø mayeeløbabe Jesúswan kwanrai pasrtrab møilan køben 'Jesúsbe kaig maren, nambe ashibwei indig køn' chib isa waminchabelø labendø,

60 wetørranrab kaimabelø køn, møiløgøben 'øyeeg køn' chib, 'øyeeg marøbig køn' chib isa waminchibelø, truba werruppe werrubendø. Yandø truinchib køptø, pailø werrua,

61 trenchibelø køn:

—I møøbe øyah taig køn cha: "Nabe Tiuswei yawan pøtiicha, pøn kwalømyutø katø mara pasramønrrun"— cha.

62 Inchen tru maya sacerdoesmeran nø karub sacerdote Caifásbe kurra, Jesúswan payibig køn:

—¿Chigucha løtømønrrapteh? cha. ¿Ñune øyeebe chi kalø maran charre inchib køh?— cha.

63 Inchen trendaingucha, Jesúsbe chigucha løtømuben, tru maya sacerdoesmeran nø karub sacerdotebe trenchibig køn:

—Øsig wab Tiuswei munchiyu nabe ñun, ñi Cristo Tiuswei Nusrkain kuabe, 'trug kur' cha, namun eshkau tamønrrun— cha.

64 Inchene Jesúsbe trencha løtabig køn:

—Ñitøweinguen chab trendan cha. Katø nabe ñimune trendamønrrun cha: Møg Misra Arrubiibe tru maramburab marøb Tiuswei kusrmay waben ñim ashib, katø srømbalarøngurri wañiyu arruben ashib inchun— cha.

65 Inchen tru maya sacerdoesmeran nø karub sacerdotebe nui kewagúigwandøwei kølsrøb, trenchibig køn:

—I møøbe Tiuswane purø trømbøig waman cha. ¿Namun nuimburab waminchabelø mas chiwein kui palønrrab kø? cha. Ñimðweinguen Tiuswan tru purø trømbøig wamab waminðigwan møran chibig køn.

66 Incha ¿ñimune maig asønata?— chiben, nømbe trencha løtabelø køn:

—Kaigwein køn cha. Kwabash— cha.

67 Inchen nømbe malau illimbi itøtutamba, kurramba inchen, katøganeløbe pashaguchib

68 trenchibelø køn:

—¿Cristo, mu kurragutsin kui, namun kelarrab eshkau pøs!— chib.

*Pedro Jesúswan 'ashmíg kur' cha isab
(Mc 14.66-72; Lc 22.56-62; Jn 18.15-18, 25-27)*

69 Inchen Pedrobe ya wambig wabene, kan mendig megabig srusrø kemal-labe, trenchibig køn:

—Ñigucha galileasriig Jesúsba uñibig kuig kømøh— cha.

70 Inchen Pedrobe mayelai merrab 'ashmíg kur' chib trenchibig køn:

—Ñibe ni chi waminchib pasrainguen mørmur— cha.

71 Incha yaskabyu Pedro webibene, katøgan srusrø nun ashabe, katøganelan trenchibig køn:

—Øikkucha Nazaretsrø Jesúsba uñibig kuig kømøh— cha.

72 Inchene Pedrobe katøyug:

—Tiusken ashen, katø nabe isa waminchibgucha pasrømur' chib, trenchibig køn. Nabe tru møwane ashmíig kur— cha.

73 Inchen yanayu truyu purrabeløbe Pedron kemallabe, trenchibelø køn:

—Isa kømø, ñigucha truilai utuigwein køn cha. Waminchibytøguen møramdiig waminchibig køn— cha.

74 Inchen Pedrobe:

—Na isab pasraig købene, trube, nan chigøben nebunrrappe nebubash chib, Tiusken ashen katø nabe isa waminchibgucha pasrømur chibig køn'. Tru møwane nabe ashmíig kur— chib.

Inchen tru urastø kan kallu wamaptinchen,

75 Pedrobe Jesús øyah taig kømørramab isuptinchibig køn: “Kalluguen wamømwatø, ñibe nan pønmayguen ashmíig kur chinrrun”, taigwan. Incha Pedrobe truyugurri webya, truba truba isuig kishibig køn.

27

Jesúsuan Pilaton tranøb

(Mc 15.1; Lc 23.1-2; Jn 18.28-32)

1 Yandø tør-raben, sacerdotemeran karubeløba, misagwan karubelø kølli misaameraba mayeelø Jesúsuan kwetchab treeg martrab kandø isua pønramisrøbelø køn.

2 Inchen nun lusra, srua amba, kubenadur Pilaton tranøbelø køn.

Judas kwaig

3 Judas, tru Jesúsuan ashig kømui inchibelaingatø pasramisrøbiibe, Jesúsuan kwanrrai pasrig kui ashabe, treeg marmumøtømab, truba truba isua, sacerdotemeran karubelanba, misagwan karubelø kølli misaameranba tru an treintan

4 trenchib katø kebusrøbig køn:

—Nabe kaig marar cha, chi kaig marmø møwan kwanrrai tranøb.—

Inchene nømbe trencha løtabelø køn:

—Øibe ñuimburab køn cha, namune trunune manguaasamø— cha.

5 Inchene Judasbe anwan Tiuswei yau kebetappa, truyugurri webya yabe, naashigu tsi pasra, megamisrøppa, kwaptinchibig køn.

6 Inchen tru sacerdotemeran karubeløbe tru anwan tulishabe, trenchibelø køn:

—I anbe yandø ani lushaig kaig an køn cha, Tiusweyasig an pusrinuube pusrmønrrai, merig køn— cha.

7 Incha nømbe tru andøga køtsø marøbigwei tulwan penønrrab cha, treeg martrab kandø isua kørrømisrøbelø køn, tru peesrøngurri amrrub misaam-eran søramig tøgagønrrab cha.

8 Inchawei tru pirøbe møin kwalømgatig “Ani Lusra Tul” cha wamig køn.

9 Øyamay tru Tius maig karuigwan eshkabig Jeremías øyah taig treeg nebuig køn: “Tru an treinta, tru israelitasmera nune an øya pagaranrrab taig anwan nøm srua pønrramisra,

10 trutøgabe køtsø marøbigwei tulwan penan taig, Señor nan maig karuig køben treeg” taig.

*Pilato Jesús*wan ‘¿*ø*yeebe maig kø?’ cha payib
(*Mc 15.2-5; Lc 23.3-5; Jn 18.33-38*)

¹¹ Incha Jesúsbe yandø kubenadurwei merrab pasrøben, nøbe trencha payibig køn:

—¿Ñigan judíosmerai rey køtirru?— cha.

Inchen Jesúsbe trenchibig køn:

—Ñitøweinguen chab trendan— cha.

¹² Inchen sacerdotemeseran karubeløba, misagwan karubelø kølli misaameraba ‘øyeeg køn’ chib, ‘øyeeg marøbig køn’ chib kømne, Jesúsbe chigucha løtømiig køn.

¹³ Inchene Pilatobe trencha payibig køn:

—¿Ñun chigøben yeeg chib kømne mørmøtirru?— cha.

¹⁴ Inchen Jesúsbe ni chi chib kuingucha manchagucha løtømuben, tru kubenadurbe ‘øyeebe maig kermab’ ke kwaara asha kørømisrøbig køn.

*Jesús*wan yandø kwanrrai pasrøb
(*Mc 15.6-20; Lc 23.13-25; Jn 18.38-19.16*)

¹⁵ Tru fiesta kwalømmerawane kubenadurbe kailan keeri yau pønrrabelan misag møigwan elatchai miaben, trendø treeg marøb elachibig købig køn.

¹⁶ Inchen truyu Barrabás taig mayeelø mu kui asig kailan keerig yau pasrabig køn.

¹⁷ Inchen tru nøm tulundzuna kømne, Pilatobe trencha payibig køn:

—¿Ñimbe møigwan na elatsamig palain køgue cha, Barrabáswandeh, kabe Jesús tru Cristo taigwandeh?— cha.

¹⁸ Kaguende Pilatobe Jesúswane uni ashig kømuptø nun tranin kui ashibig køn.

¹⁹ Inchen Pilatobe nø wamisra karub waigu srø wamnetø, nui sraimbe trenchinrrai eshkawa ørøbig køn: “Ñibe ñuimburappe chigucha marmøta cha, ø møwan sølgandø tabigwane. Kaguende mira yem purø trømbøig nan piaig køn cha, ø møkurrindø.”

²⁰ Inchen sacerdotemeseran karubeløba, misagwan karubelø kølli misaameraba misaamerane miamne indingarubelø køn, Barrabáswane elatchai miappe, Jesúswane kweetsingarunrrai.

²¹ Incha kubenadurbe katøle payibig køn:

—¿Ñimbe i pailan møigwan elatsamig palain køgue?— cha.

Inchene nømbe trenchibelø køn:

—jBarrabáswan!— cha.

²² Inchen Pilatobe trencha payibig køn:

—¿Jesús, tru Cristo køn taigwane, nabe mandø indamø?— cha.

Inchene mayeeløba:

—jKurusyu mesraig kønrrain!— chiben,

²³ Pilatobe trenchibig køn:

—¿Chindimba øyeeg martreenchigue? cha. ¿Nøbe chi kalø marig kø?— cha.

Inchen nømbe masken mur trashibelø køn:

—jKurusyu mesraig kønrrain!— chib.

²⁴ Inchen Pilatobe mumaygucha yandø chi maramgaig kui asha, trune mas mas trømbøig inchen, pi tranrrab øra, mayelai malau trenchib tasigwan kinabig køn:

—Nabe naimburappe i kwanrrabigweimburappe, chi marig kaagøn cha. Iibe ñuimburab kønrrun— chib.

²⁵ Inchen maya misaabe trencha løtabelø køn:

—Nø kwawa ani lusiibe namuimburappa, namui uregweimburappa kørnrun— cha.

²⁶ Inchen yandø Pilatobe Barrabáswan ka inrrai elacha, Jesúswane chab ichagutsingaruabe, kurusyu mesrønrrai tranøbig køn.

²⁷ Incha tru kubenadurwei suldaumerabe tru palacioyu Jesúswan mas umburø srua amba, maya suldaur søtø nuim pøtøgatan tulundzunøben,

²⁸ Jesúswan nui kewagúigwan wesrua, kan keeg kørrabig piguiig kørrabig itøguenanøbelø køn.

²⁹ Incha kan kaldiiig corona mara, petsøsrø, kusrmay taskube kan caña tsig trana, nui merrab tømønrsrøbe, ka indzatø ashib trenchibelø køn:

—¡Judíosmerai Rey, viva!— chib.

³⁰ Katø illimbi tutamba, tru cañatøga turbøtø itsamba inchibelø køn.

³¹ Nun øyeeq marøb ka indzatø ashib srua køptø, tru kørrabig kenanigwan wesrua, nuiwan kenanabe, kurusyu mesrønrrab srua ambubelø køn.

Jesúsuan kurusyu mesrøb

(Mc 15.21-32; Lc 23.26-43; Jn 19.17-27)

³² Incha truyugurri webamba amben, kan møg Simón taig cirenesriig arrub pasrain køben, tru møwane Jesúswei kuruswan ke mutamne incha mutøsrøbelø køn.

³³ Incha kanbalø Gólgota tainug pubelø køn (tru trenchippe, “Calaverasrøn” tainug).

³⁴ Incha truyu Jesúswan vinoba, purø trømbø møb piba lindisaigwan mutchai yuuløbelø køn. Inchen Jesúsbe kaizhig muchamørabø, muchimupt-inchibig køn.

³⁵ Incha yandø kurusyu chab mesrøbe, suldaumerabe Jesúswei kewagúilan mu merrarramig køtashchab suerte kuchibelø køn.

³⁶ Inchabe truyu chindashchab ashib purrabelø køn.

³⁷ Inchen nui tur palabe kan pørig mesrøbelø køn, chigurrin kwanrrai mesraig køn cha eshkabig. Trube trenchibig pørig købig køn:

IIBE JÜDIOSMERAI TRU REY JESUS KØN

chibig.

³⁸ Katø pagatø nileelangucha nøba kurusyu melsrøbelø køn, kanun kusrmay, kanune atsimaygue.

³⁹ Inchen truwan puraambubeløbe tsalø wamab, turwandø kønøgøb,

⁴⁰ trenchibelø køn:

—¡Ni tru Tiuswei yawan pøtiicha, katø pøn kwalømyutø kusranrrabiibe ñi kwamønrrab ñitøwei chigøben mar! cha. ¡Tiuswei Nusrkain kuabe, kurusyugurri pinaamø!— chib.

⁴¹ Incha sacerdotemeran karubeløba, Moisés pørigwan kusrenanøbeløba, misagwan karubelø kølli misaameraba misra, ka indzatø ashib trenchibelø køn:

⁴² —Kanelane kaigyugurri wesrubendø, nøasiitøweimbe kaiman cha. Israel misagwei rey kuabe, mømimbe kurusyugurri kørraarrubash cha, treenchene, nambe nun køremønrrun chibelø køn.

⁴³ Nøbe ¡katø! Tiuswandø isun cha. Trube, Tius nun undaguig kuabe, mømimbe nun kwamønrrai marbash cha. Kaguende nøbe: “Tiuswei Nusrkain kur” taig køn— cha.

⁴⁴ Inchen nileelø nøba kurusyu melsraig melabeløguen treetøwei nun tøga tsalø wamabelø køn.

*Jesús kwaig**(Mc 15.33-41; Lc 23.44-49; Jn 19.28-30)*

⁴⁵ Inchen kwalom tóbøtakkurri maaben las treskatig pirø ørø kerrigu løstigi kørømisrøbig køn.

⁴⁶ Tre uras Jesúsbe truba mur trashib trenchibig køn:

—Elí, Elí ¿lama sabactani?— cha. (Trenchippe, “Nai Tius, nai Tius ¿chindimba nandø elachigu?” chib.)

⁴⁷ Inchen møiløgøsrøn truyu pønrrabelø mørabe, trenchibelø køn:

—Øibe Elíaswan wamøtan— cha.

⁴⁸ Inchen møi møi nòmui utu møikkøsrøn kan ñab esponja lataigwan tranrrab lula, trunun køchiibiyu kebisha, kan caña tsigu pucha, trunun mutchai trig pulusrøngatig nun yuuløbig køn.

⁴⁹ Inchene kaneløbe trenchibelø køn:

—Kagøbasay cha. Inchippa kwamønrrai pinøsrannrab Elías attashchab— cha.

⁵⁰ Inchen Jesús katøle mur trashabe, kwaptinchibig køn.

⁵¹ Inchen tru urastø Tiuswei yau tru purø tab llensuzhig kelarrab søtø mesraibe pabaliig misrøb palasrøngurri kørørab kølsrøbig køn. Inchen pirøbe mur kønøben, nørø sruumerabe pushen,

⁵² kwabelan sørin trabmerabe kuren inchibig køn. Inchen Tiuswei tarø mari misaamera truba nørø kwabelai asrmeraguen øsiiraig købig køn.

⁵³ Inchen Jesús kwawa, yandø katø øsiirabene, nømbe tru sørin trabmerayugurri webamba, tru Tiuswei tarø mari ciuda Jerusalénsrø kebambubelø køn. Incha misaameran mamdeelandø kømø, kenamISRøbelø køn.

⁵⁴ Inchen tru Roma suldau cienelan nø karubiiba, truyu Jesúswan chindashchab ashib pønrrabelø katøganeløba pirø kønabigwan køben, chine purayaigwan køben ashabe, ¡katø kørig købiitø! ke chinchimmørø inchib trenchibelø køn:

—¡Isa kømø, iibe Tiuswei Nusrkain købwei indin køn!— cha.

⁵⁵ Inchen truyube ishumburmera truba nu yabsrøngurrindø ashib pønrrabelø køn. Truiløbe Galileasrøngurri Jesúswei mendig amrruar, katø nømbe nun purugub linchibelø købig køn.

⁵⁶ Inchen tru ishumburwei utube María Magdalena køben, katø Santiagoimba, Joséweimba usri María køben, katø Zebedeowei nusrkalai usrin køben pønrrabelø køn.

*Jesúswan sørig**(Mc 15.42-47; Lc 23.50-56; Jn 19.38-42)*

⁵⁷ Yandø yem misren, kan truba pua møg Arimatea pirausriig José taig pubig køn, truiikkucha Jesúswei mendig uñibig købig.

⁵⁸ Truibe Pilatoimay yabe, Jesúswei asrwan miaben, Pilatobe truigwan traningarubig køn.

⁵⁹ Inchen Josébe asrwan srua ya, kan lino llensu chishchiitøga kirra,

⁶⁰ kan peñayu José tru nuyasig søramig trab lalig srøig pasrabigu wayibig køn. Incha tru trabyu truba nu srugwan merrana, kebambinug kasra pasrabe, yandø ibig køn. ⁶¹ Inchen María Magdalenaba, katøgan Mariåba sørinug pinrrøgue purrabelø køn.

Jesúswan sørinug ashib pønrrønrrai pønrrailø

⁶² Inchen katø kwaløm tru isram kwalømweyasig tamarøb kuin kwaløm chab puraiben, katø kwaløm, tru sábadø isrin kwalømbe, tru sacerdotemeran karubeløba, fariseosmeraba kanbalatø misra Pilaton ashchab ambabe,

⁶³ trenchibelø køn:

—Au, namui kubenadur, nambe isua ker cha; tru isa waminchiptiibe øsig uñippatø trendaig køn cha: “Kwawa, pøn kwalømyube katø øsiiramønrrun” cha.

⁶⁴ Inchawei treeg købene, ñibe pøn kwalømgatig sorigwan tab ashib tøgagønrrai karu, chibelø køn. Inchippa nui kusrenanøb pera uniilø yem amrrua, nui asrwan nilabgun cha. Incha misaameran ‘katø øsiirain køn’ chimønrrai. Treeg purayaisruandøbe si, trube, srøsrø isa wamindi lataikken kømø, katøbe purø trømbøig isa wamindig kønrrun— cha.

⁶⁵ Inchen Pilatobe trenchibig køn:

—Suldaumera pønrrabelan pera ambay, cha. Ñim maig tamaramdiig køben, treeg tamartrigay— cha.

⁶⁶ Incha ambabe, tru sörin trabwan mu chinchimønrrai may tamarøbelø køn. Tru kasrøb srugwane kan sello mesrøb, katø truyu suldaumera ashib pønrrønrrai pønrsrøb, treeg inchibelø køn.

28

Jesús kwawa katø øsiirab

(Mc 16.1-8; Lc 24.1-12; Jn 20.1-10)

¹ Indiibe yandø isrin kwaløm puraiben, tru srø trune pølbaserøb kwaløm ullarbatø, María Magdalenaba, katøgan Mariäba tru sörinug ashchab ambubelø køn.

² Inchen møyimbe pirø truba mur kønaptinchibig køn, kaguende Señorwei ángel srømbalaserøngurri køræarruben. Inchabe sörin trabyu kemalla, tru srug truyu kasrøbigwan wemalsra, tru srug pala wamisrøbig køn.

³ Tru ángelbe kan sre pilabig lataig tørbilabzhig købig køn, nui kewagüibe puløzhig kan pulø wañi latazhikke.

⁴ Inchen suldaumerabe trunun ashabe, kørig købiitø itønab, ke kwailø latailø warambuben,

⁵ ángelbe tru ishumburmerane trenchibig køn:

—Kørig kui inchimøtay cha. Ñimbe tru Jesús kurusyu mesraigwan lab kui, nabe ashar cha.

⁶ Yube mu kaagøn cha. Nøbe kwailai utugurri katø øsiirain køn cha, nø maig taig. Nun wayinug ashchab amrruy cha.

⁷ Incha møyimbe malla ambay chibig køn, nui kusrenanøb pera uniilan øyah chinrrab: “Jesúsbe øsiirawa, Galileasrømay ñimguen ammøwatø, nømerrig inrrun tan chinrrigay cha. Trusrø ñimbe nun ashchun tan” chinrrab. Nabe ñimune yandø chab eshkar— cha, ángelbe trenchibig køn.

Jesús ishumburmeran kenamisrøb

⁸ Inchen ishumburmerabe tru sörinukkurri truba kwaariilø webambuppe, webambendø, truba kasrag luløb ambubelø køn, nui kusrenanøb pera uniilan eshkanrrab.

⁹ Inchen trunetø Jesúsbe nøyun kenamisra, wamaptinchibig køn. Inchen nøyimbe Jesúswan kemalla, nui srøbmeran ira, køriibala tabig waminchibelø køn.

¹⁰ Inchen nøybe trenchibig køn:

—Chi kørig kui inchimøtay cha. Nai nunelan Galileasrømay amrrai eshkanrrab ambay chibig køn. Nøyimbe trusrø nan ashchun— cha.

Maig purayaigwan mørø waminchimønrrai suldaumeran an nørø pagarab

¹¹ Incha ishumburmera ambub kømne, suldaumera møiløgøsrøn tru ashib pønrrabelø ciadayumay ambabe, tru chi purayaigwan sacerdotemeran karubelan kerriguh eshkabene,

¹² truiløbe tru misagwan karubelø kølli misaameraba maig maramigwan wamincha kørrømisrtrab tulundzunabe, suldaumerane an truba nørø pagarabelø køn.

¹³ Incha:

—Ñimbe øya chinrrigay chibelø køn: “Nam kib waramnetø, nui kusrenanøb pera uniilø amrrua, Jesúswei asrwane nilin køn” cha.

¹⁴ Inchippa kubenadur wammørøb chinchene, trube, trunune nam asamønrrun chibelø køn. Ñimun chi puraimønrrai.—

¹⁵ Inchen suldaumerabe anwan uta, maig karuben treeg marøbelø køn. Incha øyeeg purayaig køn chib wamindiibe judíosmerai utube møin kwalømgatig wambe larrøbitsig pasrabig køn.

Jesús nui kusrenanøb pera uniilan martrai purø nuig karua pasrig

(Mc 16.14-18; Lc 24.36-49; Jn 20.19-23)

¹⁶ Inchen tru once kusrenanøb pera uniiløbe Galilea pirau tunsrø Jesús eshkainuumay ambubelø køn.

¹⁷ Incha Jesúswan ashippe, køriibala tabig waminchibelø køn, møiløbe ‘¿truig køh? kabe, ¿peg køh? chindermab’ isuatøgucha.

¹⁸ Inchen Jesúsbe nømun kemallabe, trenchibig køn:

—Tiusbe srømbalasrø lata, pirau lata chiwandøgucha mu mandamgaig marøb karumigwane nan tranig køn cha.

¹⁹ Treeg købene, yu pirau maya misaameran mundøgucha na kusrenanigwan marøb melabelø kønrrai martrab amrrigay cha, Møskaweimba, Nusrkaweimba, Espíritu Santoi munchiyuba misaameran piu umbu ulsrøb.

²⁰ Incha na ñimun maig karuigwan kerriguh trunun møra martrai kusrenrigay chibig køn. Inchen nabe naimburappe kwalømmørig srabe kwalømgatig ñimba pasramønrrun— cha, trenchibig køn Jesúsbe.

San Marcos

*Juan misagwan piu umbu ulsrøbig mu misag warab waraimønug eshka
kusrenanøb*

(Mt 3.1-12; Lc 3.1-9, 15-17; Jn 1.19-28)

¹ Tiuswei Nusrkai Jesucristoimburab tru tabig srø wambe øyamay pølbasrig
køn:

² Tru Isaías Tius maig karuigwan eshkabig maig pørimbala:

Au, nabe nai wam srua inrrabigwan ñui merrab ørar cha, trui be ñui maywan
tamartrai.

³ Mu misag warab waraimøsrø kan wam trenchib trasan chib:

“Señorwei maywan tamarøb, nuyasig maymerane ølmarøb inday” tan, chib.

⁴ Trekkurri Juan Bautistabe mu misag warab waraimønug kenamisra,
misaameran mas kaig marmønrrab isua møra, Tiusweimay llirain kønmab
asamig piu umbu ulsrailø kømigwan eshka kusrenanøbig køn, kaig mariilan
ulø payamig kømíg pesannailø kønrrai.

⁵ Inchen maya misag Judea pirausreelø køben, Jerusalén ciudasreelø køben
nuimay mørtrab amrruabe, nømui kaig mariilan ‘øyeeg marig køn’ chib
eshkabene, truilan Juanbe Jordán piyu piu umbu ulsrøbig køn.

⁶ Juan kewagúibe camello isiiøga marig købig køn. Inchen nui pøronaibe
kaluswan marig køben, nui mamibe nørø chapullba, kaambu mielba købig
køn.

⁷ Incha misagwan eshka waminchibig køn:

—Nai wendaube katøgan na lataguen kømø, maramburab marøbig
maskenig attrun cha. Trunune nabe nui alpargatisyu tsiwan utsøbasra,
pichibguen pitchabgaig kur chibig køn.

⁸ Nabe ñimune pi pinøbulrrai piu umbu ulsrar cha. Trune nøbe ñimun
Espíritu Santotøga pinøbulrrun— chibig køn.

Jesús piu umbu ulsraig

(Mt 3.13-17; Lc 3.21-22)

⁹ Inchen tru kwalømmerawan Galilea pirau, Nazaret puebloyurri Jesús
webiben, nune Jordán piyu Juan piu umbu ulsrøbig køn.

¹⁰ Inchen piu umbugurri webarrub latatø, Jesúsbe srømbala kuri ashib,
Espíritu Santo nuim pala kan paloma lataig kørraarri ashib inchen,

¹¹ Srømbalasøngurrimbe kan wam treeg mørø waminchib trenchibig køn:

—Ñibe nai Nusrkai undaarraig køn cha. Nabe ñuimburab truba tab kui war—
cha.

Nugwaimandzig Jesúswan chindashchab inchib

(Mt 4.1-11; Lc 4.1-13)

¹² Inchen tru urastø Espíritu Santobe Jesúswan mu misag warab
waraimøsrø møi møi ingarubig køn.

¹³ Inchen Jesúsbe truyu kwalømmera cuarenta nemisramne tsuben, Sa-
tanásbeобенøsrkønrrab ke chinetø maringarunrrab inchibig køn. Inchen
ángelesmera purugubelø køn, Jesúsbe namig animalmerai utu tsuben.

Jesús Galilea pirau nui chi maramigwan pølbasrøb

(Mt 4.12-17; Lc 4.14-15)

¹⁴ Juanwan kailan keeri yau keeri wendø, Jesúsbe Tiusweimburab tabig srø
wamwan Galilea pirausrø eshka kusrenanøb ya,

15 trenchibig kòn:

—Yandø øyeeg kònrrabig puben, Tius nø ashib karub pasraibe lutau pasran cha. Ñimui kaig mariilan isua møra, Tiusweimay Ilirab, tabig srø wamwan kørey— cha.

Jesús piggatø peskabelan nui mendig amrrunrai wamab

(Mt 4.18-22; Lc 5.1-11)

16 Jesús Galilea nu pisu mendawan ib pasrøwabe, Simónwanba, nuneg Andréswanba, truiløbe peskabelø kua, nømui atarrayameran pisuyu keguchib warai ashibig kòn.

17 Inchabe Jesúsbe trenchibig kòn:

—Nai mendig amrruy cha. Nabe ñimune misaameran peskabelø kònrai maramønrrun— cha.

18 Inchen nømbe mõi mõi nømui atarrayameran waramnetø Jesúswei mendig ambubelø kòn.

19 Inchen Jesúsbe katøguchi ambuurø yabe, Zebedeowei nusrkalø Santiagonba, nuneg Juanwanba ashibig kòn. Truiløbe kan barcoyu nømui atarrayameran tamara tsushib purrabelø kòn.

20 Inchabe tru urastø wamøben, nømbe nømui møskai Zebedeowanba, purgubelanba barcoyu purramnetø, Jesúswei mendig ambuptinchibelø kòn.

Kan møg kwaimandzig tøgagwan Jesús tamarøb

(Lc 4.31-37)

21 Incha Capernaum puebloyu pua, tru isrin kwalømbe Jesúsbe judíosmera tulundzuni yau kebya, kusrenanøb mendøben,

22 nø wamindiilan møra, misaamerabe kwaara ashibelø kòn. Kaguende kusrenanøppe, nuinukkurrindøwei nu mandamgaig kusrenanøbig kòn, tru Moisés pørigwan kusrenanøbelø lata kømø.

23 Inchen tru puebloyu judíosmera tulundzuni yaube kan møg trømbøig maringarub kwaimandzigwan tøgag wawa, trenchib trashibig kòn:

24 —¿Nambabe ñibe chi asamig tøgagugu cha, Nazaretsrø Jesús? ¿Namun pinishinrrab attirru? cha. Nabe ñune mu kui ashar chibig kòn. Ñibe tru Tiuswei Newan Tabig, truig kòn— cha.

25 Inchen Jesúsbe kwaimandzigwan namab trenchibig kòn:

—¿Ñibe trashimøtø, møweinukkurrimbe webinrrø!— cha.

26 Inchen trømbøig marøngarub kwaimandziibe møwan truba mur sru-agucha, tru møweinukkurri mur trashib webibig kòn.

27 Inchen mayeeløba kwaara asha, nømasiyaitø trenchib payiyabelø kòn:

—¿Øyeebe chi kerah? cha. ¡Kusrenanig iibe ke srøig, trurriugu nø maig chippe ke treeg kònrai maran! cha. I møøbe trømbøig maringarub kwaimandzi-imeranguen mu chindamgaig wamøben, nune møran— cha.

28 Inchen petø Galilea pirau ørøba misaamerabe Jesús nø chi marigwan wammøøbelø kòn.

Jesús Simón Pedroi sueeran kwanrrøwan tamarøb

(Mt 8.14-15; Lc 4.38-39)

29 Incha tru urastø judíosmera tulundzuni yaugurri webambabe, Jesúsbe Jacoboba, Juanba, Simónweimba, Andrésweimba yamay amben,

30 Simónwei sueerabe camayu pachiiiba tsuben: “Kwanrrø tsun” cha, tru urastø Jesúswan eshkaben,

31 Jesúsbe kemalla, tasigu kemøøb kusrabene, pachiiibe weetaptingen, nøbe tru pubelayasig chi maramigwan marøb mendabig kòn.

*Jesús truba yam kwanrreelan tamarøb**(Mt 8.16-17; Lc 4.40-41)*

³² Yandø pørr pinaiben, chab pilliraben, Jesúsweimay mayeelø kwanrøø tøgarmenaba, kwaimandziimera tøgarmenaba srua amrruben,

³³ puebloyu maya misaaba yaskabugøba tulundzuna pasrøben,

³⁴ Jesúsbe truba yamelø chi kwanrøø køben tøgarmen tamarøb, katø truba yam kwaimandziimeran misaamerainukkurri webusrøbig køn. Incha kwaimandziimerane waminchibashmíg køn, kaguende truiløbe nune mu kui ashibelø køben.

*Jesús Galilea pirau truøø srø wam tabelan eshkaab kusrenanøb**(Lc 4.42-44)*

³⁵ Incha løtsøzhig ullarbatø, Jesúsbe kurra, ciudayugurri wambig mu misakksrø, trusrø Tius Møskaimba waminchib wabig køn.

³⁶ Inchen Simónba, nui linchibeløba lanrrab webamba,

³⁷ wetørrawabe, trenchibelø køn:

—Mayeeløba ñune lab køn— cha.

³⁸ Inchen nøbe trencha løtabig køn:

—Misaamera puluwandø katøganbalømera warabsrømay amrrab cha. Trusrøngucha srø wam tabelan eshkaab kusrennrrab, kaguende nabe truweiwai arrur— cha.

³⁹ Incha Jesúsbe Galilea pirau ørøba judíosmera tulundzuni yamerayu chutøgucha eshkaab kusrenanøb, katø kwaimandziimeran misaamerainukkurri webusrøb inchibig køn.

*Asr trerab kwanrøø, lepra taig, tøgaiwan Jesús tamarøb**(Mt 8.1-4; Lc 5.12-16)*

⁴⁰ Kan møg asr trerab kwanrøø, lepra taig, tøgaiw Jesúsban kemalla, tømønstrabe trenchibig køn:

—Ñi nan tamaramdiig købene, tamartra— cha.

⁴¹ Inchen Jesúsbe lastima asha, tasigwan larrøbicha estsarabe, trenchibig køn:

—Tamarøg køtan cha. Tamarig kørrømisrø— cha.

⁴² Inchen møi møi nui trerab kwanrøøbe pinøben, nøbe chishig kørrømisren,

⁴³ Jesúsbe yandø 'inrrø' cha, nune kuchi murtø waminchib trenchibig køn:

⁴⁴ —Au, mungøben eshkaabesin cha. Inchendø ya, ñui asrwan sacerdotendø kenamara, tru ñi yandø chishig kørrømisrimburø tru Moisés tranrrig taigwane srua ya, tranrrig cha, mayeeløba ñui kwanrøøwan chishig kørrømisrin kui ashchain— cha.

⁴⁵ Trendaingucha møøbe ya, chi purayaigwan mayeelan waminchib mendøben, treekkurri Jesúsbe chu puebloyutøgucha misag ashene, yandø kebinrrab kaima, mendawansrø misakkanug uñibig køn. Inchen chugurrielø køben nun ashchab amrrubelø køn.

2*Jesús nui maramburab mariitøga kaig marigwan ulø paymumig kønrrai marøbig kui ashchai kenamarøb**(Mt 9.1-8; Lc 5.17-26)*

¹ Mam kwaløm wendau køsrøn, Jesús katø Capernaum puebloyu kebiben, nø yau wan taig wammøøppe,

² misaabe petø truba nu tulundzuna, ni yaskabuguen kemuben, nøbe Tiuswei srø wam tabelan waminchibig køn.

³ Inchen pibgatø møguelø kan møg kønønrab kaimabigwan muta, puben,
⁴ menrra misag køptø, Jesúsweim pulugatig kemallchab kaimappe, tru nø pasraim pala yawan picha, trugurrimbe tru trabyu kwanrriigwane kan tsigalyu kørøøøøbelø køn.

⁵ Inchen Jesúsbe nømui isubigwan ke nuinuutø pasra pønrrai ashabe, Jesúsbe kwanrriigwane trenchibig køn:

—Nai nusrkai, ñui kaig mariilan ulø payamig kømíig, pesannaig kørøømisran— cha.

⁶ Inchen møiløgøsrøn tru Moisés pørigwan kusrenanøbeløbe nømui manr-
 rautø truba isub purrabelø køn:

⁷ “¿Nøbe øyeebe chi waminchib pasrarmah? cha. Øyeege chib pasrappe, Tiusweimburab purø trømbøig wamab pasran cha. Kaig mariilane ulø payamig kømíig pesannaig kønrraimbe ¿mu kuin treeg mariasamø? cha. Tiustøwei øyeege martrun” chib.

⁸ Inchen tru urastø Jesúsbe nømuinetø øyeege isub pønrrailan kelarrab ashabe, trencha payibig køn:

—¿Ñimbe ñimui manrraube chindimbarre øyeege isugue? cha.

⁹ ¿Møigwan mas kørømø trendamdiig købsruerah? cha, tru kønønrab kaimabigwan: “Ñui kaig mariilan ulø payamig kømíig pesannaig kørøømisran” ¿tamiteh? Kabe: “Kurrab, ñui tsigalwan muta, inrrø” ¿tamiteh? cha.

¹⁰ Pøs, na, Møg Misra Arrubiibe yu pirau kaig mariilan ulø payamig kømíig pesannaig kønrrai mu mandamgaig marøbig kui mømimbe ñim ashchai kenamaramønrrun— chibig køn.

Inchabe tru kønønrab kaimabigwane trenchibig køn:

¹¹ —Nabe ñun trenchar cha: Kurrab, ñui tsigalwan mutab, yamay inrrø— cha.

¹² Inchen truike kurrappa, nui tsigalwan muta, mayeelø ashen, truyugurri webibig køn. Inchen trugurrimbe mayeeløba truba kwaara ashib, Tiuswan truba tabig waminchib trenchibelø køn:

—Managuen nambe kan øyeeckatiibe ashmuig køn— cha.

Jesús Levíwan wamab (Mt 9.9-13; Lc 5.27-32)

¹³ Incha katø Jesús nu pisu mendasrømay iben, maya misag nuim pulu kemallen, nøbe kusrenanøbig køn.

¹⁴ Incha pureb ya, Alfeawei nusrkai Leví, romasreelayasig an utabelø purrainug wai ashabe, trenchibig køn:

—Nai mendig amø— cha.

Inchen nøbe kurrab, nui mendig ibig køn.

¹⁵ Indiibe Jesúsbe Levíwei yau mab wabene, truba yamelø romasreelayasig an utabelø køben, katøganelø kaig marøb misaamera køben Jesúsba, nui kusrenanøb pera uniiløba mishatsigu trubalatø purrøben, kaguende truba nu købig køn nui mendig amøñibeløbe.

¹⁶ Inchen fariseosmerai utu tru Moisés pørigwan kusrenanøbeløbe Jesúswane mayeelø tru kaig marøbeløba, an utab purrabeløba mishatsigu mab wai ashabe, nui kusrenanøb pera uniilane trencha payibelø køn:

—¿Nøbe an utaptø purrabeløba, kaig marøbeløba mab, muchib wappe, øyeebe maig marøb wáh?— cha.

¹⁷ Inchene Jesúsbe trunun mørabe, nømun trenchibig køn:

–Tabelø, kwanrrøgarbe mø marøbig palain kømøn cha. Kwanr-reeløbeguende palain køn cha. Nabe tru sølgandø amøñibelan wamønrrab arrumøtø, kaig marøbelan wamønrrab arrig køn– cha.

Ayunamigwan payib
(Mt 9.14-17; Lc 5.33-39)

¹⁸ Juanwei mendig amøñibeløba, fariseosmerai mendig amøñibeløbabe ayunab køben, møiløgøsrøn amrrua, Jesúswan payibelø køn:

–Juanwei mendig amøñibeløba, fariseosmerai mendig amøñibeløbabe tru ayunamigwan katø katø maren, ¿ñui kusrenanøb pera uniiløbe chindim-barre trunune marmeelø køh?– cha.

¹⁹ Inchene Jesúsbe trenchibig køn:

–¿Kan novios yaumay linchai eshkailanma keg mistrabig nømbe wabengan, mamø purrønrraitarru? cha. Keg misrtrabig nømbe wabene, manrrun cha.

²⁰ Inchendø keg misrtrabigwan srua ambam kwalømmera punrrun cha. Tru kwalømbeguende, trube, nømbe ayunabwei inchun cha.

²¹ Muguen kan køllin camisanma kølsraigu srø llensu søtiimíigwan waya tsushimøn chibig køn. Treeg marene, srø llensube kesruppa, kølli llensune kølsrøben, mas trømbøikken kølsraig kørrømisrtrun cha.

²² Katø muguen srø vinonma køllin kalusmerayu usrmøwei indan cha. Kaguende treeg marene, srø vinobe køllin kalusmeran srurrøgøben, vinobe lushen, kalusmerabe ka kølsrønrrun cha. Inchawei srø vinone srø kalusmeran marigu usrøbelø køn– cha.

Isrin kwaløm maramgaigwan maran cha, Jesúswan alegab
(Mt 12.1-8; Lc 6.1-5)

²³ Kan isrin kwaløm Jesús tirigu ellmari utuwan pureb ibene, nui kusrenanøb pera uniiløbe puraambub ambuppe, tirigu tur lurrøb mendøben,

²⁴ fariseosmerabe Jesúswan trenchibelø køn:

–Au, ¿ñui kusrenanøb pera uniiløbe isrin kwalømbe chigøben marmønrrai merigwan chindimba øyeeg marøb køh?– cha.

²⁵ Inchen Jesúsbe trenchibig køn:

–¿Ñimgan managuen lemeelø køtirru cha, mana køsrøn Davidwanba, nui lynchibelanba chindamgaig palabig arruben, parøgwaben, mandø indigwan?

²⁶ Abiatar, tru maya sacerdotemeran nø karub sacerdote køben, Davidbe Tiuswei carpa ya tabzhigu kebya, Tiusweyasiitø tarømarig pirrimera, tru sacerdotemeratø maim pirrimeran mendaibe mu mamønrrai merigwan nø mab, katø nøba purrab misagwangucha srørrøb indigwan.–

²⁷ Incha Jesúsbe katø trenchibig køn:

–Isrin kwalømwane møyewasig marig køn cha, møwan isrin kwalømwewayisig kømøtø.

²⁸ Inchawei na, Møg Misra Arrubiibe isrin kwaløm nan nø karunrrain kømøtø, maramdiigwane marøb, maramgaigwane marmub, isrin kwalømwanguen nabe na asha karubig kur– chibig køn.

3

Tasig mul-laig møwan Jesús tamarøb
(Mt 12.9-14; Lc 6.6-11)

¹ Jesús katø judíosmera tulundzuni yau kebibene, truyu kan møg tasig mul-laig tøgig waben,

² Jesúswan larab kòbelø kòn, isrin kwaløm tamarøbig kòtashchab, chigøben chi kòptø.

³ Inchen Jesúsbe tru tasig mul-laig tøgá mòwane trenchibig kòn:

—Kurra, yu tøbøtag pasramisr— cha.

⁴ Inchabe katøganelan trenchibig kòn:

—¿Tru maig maramigwan martrai Moisés pøriiløyube isrin kwalømbe chiwan martrain taig kòh cha, tabiiteh, kabe kaiteh? cha. ¿Kwamønrrai indamig kòh, kabe kweetsamig kò, chindah?— cha.

Inchen nømbe chigucha chimuben,

⁵ Jesúsbe nuingatan pønrrabelan namig ashìb, truba isui inchibig kòn, kaguende nòmui manrrømerabe purø murelø kuimba. Incha tru mòwan trenchibig kòn:

—Kwalwan larrøbichi— cha.

Inchen nøbe larrøbichene, nui kwalbe tabig kørromisrøbig kòn.

⁶ Inchen fariseosmerabe webamba, tru urastø Herodesweingateeløba Jesúswan namig kurra, mandø incha pinisamigwan waminchib mendabelø kòn.

Nu pisu menda misag truba nuwan Jesús kusrenanøb

⁷ Inchen Jesúsbe nui kusrenanøb pera uniiløba tarømisra, nu pisu mendasrømay iben, misag truba nu Galilea pirausreelø nui mendig ambubelø kòn.

⁸ Inchen nø chinetø nørreelø marigwan wammørabe, judeasreelø kòben, jerusalénsreelø kòben, idumeasreelø kòben, Jordán pi tru pørr kal-labgatøreelø kòben, tirosreelø kòben, sidónsreelø kòben, truba nu ashchab amrrubelø kòn.

⁹ Incha tru treeg nu misakkurri Jesúsbe nui kusrenanøb pera uniilan kan barco ke tamara tøgagønrrai eshkabig kòn, tru nu misag nun menrra trag marmønrrai.

¹⁰ Kaguende Jesúsbe kwanrreelan truba truba tamarin kòben, mayan kwanrreeløba katøranrrab nuimaygøba kemallchab tranrrabelø kòn.

¹¹ Inchen trømbøbig maringarub kwaimandziimera nun ashippe, nui merrab tømboñsra, trenchib trashibelø kòn:

—Ñibe Tiuswei Nusrkain kòn— chib.

¹² Inchen Jesúsbe nune mu kòn cha, mun kòben misaameran mørø waminchimønrrain karubig kòn.

Jesús nøashib karua øramelan doce lawa pønsrøb (Mt 10.1-4; Lc 6.12-16)

¹³ Incha Jesúsbe kan tunsrø nebya, nø wamønrrab asiilan wamøben, nømbe nuimay amrrubelø kòn.

¹⁴ Incha doce wesrawa pønsra treeg kørromara, iilane nøashib karua øriilø kòn cha, wamabig kòn, nøba amøñibelø kønrraimba, katø eshkab kusrenanrrab amrrai øramigweyasiiba,

¹⁵ katø kwaimandziimeran webusramig mu chindamgaig marøbelø kønrraimba.

¹⁶ Tru doce wesrawa pønsrailøbe iilø kòn: Simón, nundøwei katø Pedro cha, munchi pasrig kòben,

¹⁷ Zebedeowei nusrkai Santiagoba, nui nuneg Juanba, truilane Boanerges cha, munchi pasriilø, tru treeg munchibe: “palaig trashibig taigwei nusrkalø”,

18 katø Andrés køben, Felipe køben, Bartolomé køben, Mateo køben, Tomás køben, Alfeowei nusrkai Santiago køben, Tadeo køben, Simón Cananistam-
eraingatiig køben,

19 katø Judas Iscariote, tru wendø Jesúswan ashig kømui inchibelaingatø pasramisra, tranrrabig købengue.

*Møilogørøn Jesúswan Beelzebúwei maramburab marigwan tøgagig køn chib
(Mt 12.22-32; Lc 11.14-23; 12.10)*

20 Inchen Jesús katø nui kusrenanøþ pera uniiløþa kan yau kebiben, katø misag menrra tinmarøþ tulundzunaptø, manrrabguen kaima købig køn.

21 Inchen Jesúswei yaeløþe treeg inchib køn taig wammørabe, nune mer-
rarrowa, sruamrrunrrab ambubelø køn. Kaguende lukiaian køn chib køben.

22 Inchen tru Moisés pørigwan kusrenanøþelø Jerusalénsrøngurri amr-
rubeløgucha trenchibelø køn:

–Nugwaimandzig, tru Beelzebúwan tøgagig køn cha. Treekkurri, tru kwaimandziimeran nøasha karubigwan tøgagig kua, i møøþe kwaimandzi-
imeran weeran– cha.

23 Inchen Jesúswei nømun wama, ‘øyeeg lataitøwein køn’ chib, kemesra wamindiiløtøga trenchib waminchibig køn:

–¿Satanásþe Satanáswandøweimbe chinchawegutchaitamague? cha.

24 Kan rey karub tøgaweim pirau misaama nømasiitø nøørotø misrøþ kurrabe, warabig warønrrab kaimanrrun cha.

25 Katø kan yaelø nømasiitø nøørotø misrøþ kurrabe, chab pinønrrun cha.

26 Inchawei Satanás nøasiitøwei nøørotø, nøørotø misrøþ kurrabe, treegu yandø pasrønrrab kaimaben, truyu patsønrrun, chibig køn.

27 ‘Kabe kan møikkøþen kan mur møþei yauma keþya, tru mur mowan lusrøþmerrig lusrmøwatøþe, nui chi tøgagúigwan kerranrrab kaimanrrun cha. Lusra trarratøwei nui chi tøgagúilan kerranrrun chibig køn.

28 Nabe ñimun cierton trendamønrrun cha: Misaamera chi kaig mariilan lata, chigøþen Tiuswan purø trømbøig wamindiilan lata Tiusþe kerriguh pesannawa, ulø paymønrrun cha.

29 Trune Espíritu Santon purø trømbøig wamab waminchibigwane ulø payamigwane managuen pesannaimúig kønrrun cha. Treeg kømøtø, nui kaig marigwan managatig tøga kørrømisrtrun– chibig køn.

30 Jesúsþe øyah chippe, kaguende nøþbe nun trømbøig marøngarub kwaimandzigwan tøgagig køn chib køþen, trendaig køn.

*Jesúswei usrimba, nuneløþa
(Mt 12.46-50; Lc 8.19-21)*

31 Inchen Jesúswei usrimba, nuneløþa pua, wambiitø pønrramisra, wamønrrab øren,

32 Jesúsweim pøtøgatan truba nu purrabeløþe trenchibelø køn:

–Au, ñui usrimba, ñui nuneløþa wambig pønrran cha, ñun payib.–

33 Inchen nøþe trencha løtabig køn:

–¿Nai usri nai nuneløþe mumera køh?– cha.

34 Incha nuim pøtøgatan purrabelan ashabe, trenchibig køn:

–Nai usri nai nuneløþe iilø køn cha.

35 Kaguende møikkøþen Tius maig martrai karuben, treeg marøþig, truiþe sí, nai nuneg, nai nuchag, nai usrin køn– cha.

4

*Kan mōg mandø kwaligwan trunun Jesús kemesra wamindig
(Mt 13.1-9; Lc 8.4-8)*

¹ Jesús katø nu pisu menda kusrenanøb mendøben, nø wainug misag truba nu tulundzunøben, treekkurri Jesúsbe pisuyu kan barcoyu kebya wamisren, maya misaabe tru pisu mendatø kørømisrøbelø køn.

² Inchen nøbe nømun 'øyeeg lataitøwein køn' chib wamindiiløtøga chineh kemesra, kusrenanøbig køn.

³ Inchabe nui kusrenanigube trenchibig køn:

—Iigwan møray cha. Kan kwallibiima tsurøb kwallchab webyan cha.

⁴ Incha tsurøb ibene, kanbalø yellbe mayu kørøben, illimera amrrua, man cha.

⁵ Inchen katøganbaløbe srug trøldø pirau pirø tre chiganug kørøben, pirø palatiig kua, tru yellbe kal-lappe, petø kal-labendø,

⁶ pørr webarrua, mergurangaruben, srøl tre chigaig kua, mul-laptindan cha.

⁷ Katøganbalø yellbe kal shau utu kørøben, kalmera nørørab mendappe, chab kasrøb tsibishiben, truike chigucha mismøøn cha.

⁸ Inchen katøganbalø tab pirau kørabiibe sí, kal-lawa, tabig nørørawa, truba nu nigan cha. Møiløbe kan yellgurrindø mamig trulzheelø treinta niguen, møiløbe sesenta niguen, møiløbe cien nigan— chibig køn.

⁹ Incha trenchibig køn:

—¡Møramig kalu pønsraibe, mør!— cha.

*Mandøgurri Jesús 'iigwan øyeeg lataig køn' cha, kemesra wamindig
(Mt 13.10-17; Lc 8.9-10)*

¹⁰ Jesús yandø nøtø kørømisren, tru doce kusrenanøb pera uniiløba kanbalatø Jesúsweim pulu pønrabeløbe trenchibelø køn:

—¿Tru 'øyeeg lataitøwein køn' chib kemesra wamindiiløbe chi chibig køh?— cha.

¹¹ Inchen nøbe trenchibig køn:

—Tiusbe nø ashib karub wainug mu asiimíg tøgagúilan ñimune ashchai tranan cha. Inchendø misaamera nøøreelø truyuilø komeelane 'øyeeg lataitøwein køn' chib kemesragøba wamindiiløtøga wamindig køn cha,

¹² nømbe ashippe ashendø, ashmøwa lataig kørømisrøb;

mørøppe mørendø, chi tainguen mormøwa lataig kørømisrøb inchain cha.

Incha isua møra Tiusweimay lliramøwei, nømui kaig mariilan Tius ulø payamigwan pesannamø, ulø payamig kønrrain kuig køn— cha.

*Tru kwaliibe 'øyeeg lataig køn' cha, kemesra wamindigwan Jesús øyeeg køn
cha eshka*

(Mt 13.18-23; Lc 8.11-15)

¹³ Incha katø trenchibig køn:

—Ñimgan 'øyeeg lataitøwein køn' cha, tru kemesra wamincha pasrigwane ¿chigúí wetøgørrøtirru? cha. Katøgan 'øyeeg lataitøwein køn' cha, kemesra tru wamindiilangucha kerriguba ¿chinha wetøgørrørrague? cha.

¹⁴ Tiuswei wamwan waminchibiibe yellwan tsurøbig lataig køn cha.

¹⁵ Inchen tru mayu kørøb yellmerabe iilø latailø køn cha. Nømbe Tiuswei wamwan møren latatø, Satanásbe arrub, tru tab wamwan nømuinug ellmarigwane kerran cha.

¹⁶ Inchen tru srug trøldø pirau pirø tre chiganug tsuri yellmera latailøbe iilø køn cha: Tiuswei wamwan mōra, tru urastøbe truba tab kui utøbendø,

¹⁷ nōmasiitø srøl tre umbu keetiimeelø kua, maya yanaguen amøñimøn cha. Incha tru Tiuswei wamgurrindø chigøben puben, katø chigøben kaig nebub arruben, nōmbe mōi mōin elachiptindan cha.

¹⁸ Inchen katøganeløbe tsuren, tru kal shau utu kōrrab yell latailø køn cha.

¹⁹ Tiuswei wamwam mōrøppe mōrendø, i pirau chine købigwan menrra isubiibah, nōmui chine palømø tøgagüilø purø tabig lataig asønaikkurrimba, trugurri chine tøgagømmørø chull inchib isuiløbatø Tiuswei wamwan mōrigwane kerrigu truitø kasrøben, chigucha nōmbe ellmarig misrmøn cha.

²⁰ Inchen tru tab pirau tsuriiløbe tru Tiuswei wamwam mōra, ellmarig misrøbelø, truilø køn: kan trulzhikkurrindø treinta, kabe sesenta, kabe kan trulzhikkurrindø cien nigabelø latailøgue.—

Lámparan kemesra wamindig (Lc 8.16-18)

²¹ Katø Jesúsbe trenchibig køn:

—¿Kabe kan lámparanma kōtsø umbu pasrtrab, kabe cama umbu pasrtrab srua kerrubelø kuitarru? cha. Treeg kōmøtø, ¿tør kønrraimbe, pala pasramig kōmuitarru? cha.

²² Chigøben sōrig pasrabiibe sōriitø pasrømøtø, kenamaramig kønrrun cha. Katø chinchaguen asamgaig kasra pasrigwane ashchai tōryu wesraig kønrrun cha.

²³ Møikkøben mōramig kalu pōnsraig kuabe, mōr— cha.

²⁴ Incha katø trenchibig køn:

—Ñim chi mōrigwane tab isua kuy cha. Ñim kanelan maig unaasha traniibe, ñimungucha treetøwei unaasha trana, ñimune nemariibaguen tranrrun cha.

²⁵ Kaguende tōgaigwane masken tranen, trune chigaigwane nui lamøtiig tøgagüigwanguen kerranrrun— cha.

Yell nurab lataitøwein køn cha, kemesra wamindig

²⁶ Jesúsbe katø trenchibig køn:

—Tius nō ashib karub pasraibe kan møg pirau yellwan tsuri lataig køn cha.

²⁷ Incha kib tsui lata, kurra uni lata, yem kui lata, kwaløm kui lata, yellbe kal-lawa nuran cha, mōøbe mandø indinguen ashmøwatø.

²⁸ Kaguende pirøbe nōasiitø mamig niguingarubig køn cha. Srøsrøbe ishiimerrig kal-laben, trugurrimbe urø weetøben, urøyube trulmera netsan cha.

²⁹ Inchen yandø trul srønøben latatø, usestøga paran cha, kaguende yandø param kwaløm puin køben.—

Iibe murtasa yell lataitøwein køn cha, kemesra wamindig (Mt 13.31-32; Lc 13.18-19)

³⁰ Katø Jesúsbe trenchibig køn:

—¿Tius nō ashib karub pasraibe chi lataig asøna cha, kabe chiwan kemesra, 'øyeeg lataitøwein køn' chinrrab køh? cha.

³¹ Kan murtasa yell lataig køn cha. Tsurøb uras trube yu pirau maya yellmerai utu purø lamøzhig købendø,

³² tsurinukkurrimbe shush mamig tusrmerai utu katøguchinguen palaig nu tusr-unø srarmerabaig nuraben, illimera pala amøñibeløguen truyu le martrun— cha.

*Jesús 'iibe øyeeg latailø køn' cha, kemesra wamindig
(Mt 13.34-35)*

³³ Jesúsbe Tiuswei wamwan øyamay kusrennøbig køn, 'øyeeg lataitøwein køn' chib, truba yambalø kemesra eshkab. Møi eshkaig latailø, nøm mayangatig chigüi nebua mørtrapeelø køben, treetøh marøbig køn.

³⁴ Øyeeg lataitøwein køn' chib kemesrømøbe, waminchmig køn. Inchendø nui kusrenanøb pera uniilane nømundø nøørø kerrigu tør marøb eshkabig køn.

Isig ichibigwanba, pi welar kurrabigwanba Jesús pasramisingarub

³⁵ Incha tru kwalømdøwei yandø pilliraben, nui kusrenanøb pera uniilan trenchibig køn:

—Pisu ambøgatøsrømay larraamun— cha.

³⁶ Inchen nømbe misagwan 'ungwa' cha, Jesúswan tru nø waig barcoyutøwei pera amben, katøgan barcomeragucha lincha ambubelø køn.

³⁷ Inchen truba mur isig ichibig webarruben, pi welarmerabe barcoyu keguchen, yandø ke pitø netsab arruben,

³⁸ Jesúsbe wendau kan labzhigu ne kib waben, nømbe kasrønnanabe trenchibelø køn:

—¡Au, Kusrennøbig! ¿nam asentarrrenchib melamne, ñigan isubguengaig watirru?— cha,

³⁹ Inchen Jesúsbe kurra, isigwan kønømonrrai kandø wama, piwane trenchibig køn:

—¡Wanrørmø, møi møi wasrørau!— cha.

Inchene isiibe pasramisren, yandø kerrigu wasrønzhig kørrømisrøbig køn.

⁴⁰ Inchen Jesúsbe nui kusrenanøb pera uniilan:

—¿Chindimbarre kørig køta? chibig køn. ¿Ñimui isubigwan nainuutø pasra kømeelø kø chindah?— cha.

⁴¹ Inchen nømbe truba kwaariilø kørrømisra, kangurrin kangurri trenchibelø køn:

—¿libe mu kerah cha, isig ichibig lata, mar lata, nun mørtrappe?—

5

*Gerasasriig kwaimandzig tøga møg
(Mt 8.28-34; Lc 8.26-39)*

¹ Pisu ambøgatømayrø larraamba, Gerasa pirausrø puben,

² Jesús barcoyugurri webiben latatø, kan møg trømbøbig maringarub kwaimandzig tøgaig sørin trabmerayugurri webarrua, Jesúswan kemallibig køn.

³ Tru møøbe sørin tulyutø tsubig, muguen lusrtrab kaimaig købig køn, ni cadenastøgagen.

⁴ Kanmaybe srøbmeran tasiimeran cadenastøga køben, katø chitøga køben lusrendø, lusrimørig pitischig marøb lurren, muguen kaimabelø køn.

⁵ Incha yem kwaløm chu uragucha tunmerasrø, sørin tulmerasrø trashib, sruutøga nøasiitø kørrinchib uñibig køn.

⁶ Incha Jesúswane yabgurrindø asha, lula, nui merrab tømbønsra,

⁷ trenchib trashibig køn:

—¿Ñibe nane chi martrab inchigu? cha, Jesús, Tius Mayeelaim Pala Pasrabigwei Nusrkai. Purø trømbøbig møra megamig kømønrrai Tiuswei munchiyu ka købash cha, chib miarrumøn— cha.

⁸ Pøs øyeeg chippe, kaguende Jesúsbe:

–¡Ñi, trømbøig maringarub kwaimandzig, i møweinukkurri webinrrø! – chib pasrøben, trendaig køn.

⁹ Inchene Jesúsbe nun trencha payibig køn:

–¿Chi munchi kugu?– cha

Inchen nøbe:

–Legión munchi kur, chibig køn. Kaguende nambe purø nu ker– cha.

¹⁰ Inchabe tru piraugurri nørøø peesrømay ørmørrunrig chib, Jesúswan truba truba rugabig køn.

¹¹ Inchen tru tun puluwan kuchimera lawa mab truba nu amøñibelø køn.

¹² Inchen tru kwaimandziimerabe rugab trenchibelø køn:

–Kuchimeraimay ambingarurra cha, nam truilainug kebamrrab– cha.

¹³ Inchen Jesúsbe ka kebambashen, trømbøig maringarub kwaimandziimerabe møweinukkurri webamba, kuchimerayu kebabene, truyu kuchimerabe pa milburab warabeløbe truba trømbø lendeyu lula, chab pinøgørraptincha, larrø nu pisuyu kegørra, pi keesra, chab kwabelø køn.

¹⁴ Inchene kuchi ashibeløbe kwaariilø lula, puebloyu køben, wambig nørøøwansrøn køben eshkab ambubelø køn. Inchen misaamerabe chi purayaigwan ashchab amrrubelø køn.

¹⁵ Incha Jesús waisrø pubene, tru kwaimandzig tøgøig købiibe møimbe køsaatiig kømø, keweig, tabig wai ashabe, truiløbe kørig kui inchibelø køn.

¹⁶ Inchen tru kwaimandzig tøgøig købigwanba, kuchimeranba maig purayaigwan ashibeløbe nømun eshkaben,

¹⁷ nømbe Jesúswan nømuim piraugurri ‘irra’ chib truba rugabelø køn.

¹⁸ Inchen Jesús barcoyu kebibene, tru kwaimandzig tøgøig købiibe:

–¿Ñui mendig arruah?– cha, truba inchen,

¹⁹ Jesúsbe arrubashmøtø, trenchibig køn:

–Ñui yamay inrrø cha, ñui yau misaameraimay Señor ñun yeeg nørriig mara, mandø lastima asigwan nømun eshkanrrab.–

²⁰ Inchen tru møøbe ya, Decápolis pueblosrø Jesús nun yeeg nørriig marigwan truba eshkab mendøbene, mayeeløba kwaara ashibelø køn.

Jesús kan ishuan kwanrrøwan tamarøb

(Mt 9.18-26; Lc 8.40-56)

²¹ Jesús barcoyu katø pisu ambøgatømay larraibene, nuim pøtøgatan misag truba truba nu tulundzunøben, nøbe pisu mendatø kørrømisrøbig køn.

²² Inchen judíosmera tulundzuni yau ashib karubig, Jairo taig, puabe, Jesúswan ashippe, nui srøb pulu tømboñsra,

²³ arrubsrøumugu chib truba inchib, trenchibig køn:

–Nai nimbasr-unø kwanrrab inchib tsun cha. Kwanrrø tammisren, katø øsig uñchai ñui tasigwan nuim pala estsartrab attra– cha.

²⁴ Inchen Jesúsbe nøba iben, menrra misag mendig ambuptø nun trag maren,

²⁵ tru misag utube kan ishug doce años ørøba ani ib kwanrrø tøgøig kua,

²⁶ chu uraskucha purø trømbøig kui uña, mø marøbelai yam tasku pureb megawa, nui chi tøgøigugwan kerrigu patsøgøben, chiweingucha puraimø, kwanrrøbe masken inchib iben,

²⁷ Jesúswan wamindi mørøppe, tru ishube misag utu wendaugurri Jesúsweim pulu kemallippa, nø kewagúigwan katørabig køn.

²⁸ Kaguende nøbe treeg isubig køn: “Kewagúilandøguen katøraitø, tammisrig kørrømisramønrrun” cha.

²⁹ Inchen tru ani ibiibe mõi mõi pasramisrøptinchen, asru nui kwanrrøbe yandø purayai møren,

³⁰ Jesúsbe nõ mun kørørn nui maramburab mariitøga tamarøbrain kui mørabe, nu misag sötøwan keeshabe, payibig køn:

—¿Na kewagúigwane mu katørah?— cha.

³¹ Inchene nui kusrenanøb pera uniløbe trenchibelø køn:

—Misag sötø yeeg trag mari ashatø, ñibe: “¿Mu katørah?” taibe— cha.

³² Inchen Jesúsbe mu katøraitashchab ambumay, imay ashene,

³³ tru ishuube kørig købiitø itønab, nun maig purayaigwan møra, ya, Jesúswei merrab tømønørøb srala, isømø, kerriguwan eshkaben,

³⁴ Jesúsbe trenchibig køn:

—Nimbasr, ñui isubigwan nainuutø pasra tøgagúikkurri tamarig kørømisran cha. Chi isumø, inrø cha. Ñui kwanrrøbe yandø purayaig køn— cha.

Jesús Jairoi nimbasrwan øsiranøb

³⁵ Trune Jesús waminchib pasramnetø, tru judíosmera tulundzuni yau ashib karubigwei yaugurri mõiløgørørn amrruppe, unai mõskawane trenchibelø køn:

—Ñui nimbasrbe kwabguen indan cha. ¿Kusrennøbigwan mas chinrrabrre øyeeg chigu?— cha.

³⁶ Inchen nõm trenchib kuingucha Jesúsbe trunun mørøb pasrømøtø, tru tulundzuni yau ashibigwane trenchibig køn:

—Chi kørig kui inchimøtø, køreptø køreu— cha.

³⁷ Incha mas mungucha amrrubashmøwa, Pedronbah, Jacobonbah, Jacoboi nuneg Juanwanbatø amrrungarubig køn.

³⁸ Incha tru judíosmera tulundzuni yau ashibigwei yau puabe, ke chindi asamgaig misaabe kishib, miirab, trashib inchib kui ashabe,

³⁹ Jesúsbe kebya, trenchibig køn:

—¿Chindimbarre øyeeg inchib, kishib køh? cha. Unøbe kwaig kømøtø, ka kiptø tsun— cha.

⁴⁰ Inchen misaamerabe Jesúswane ka indzatø mørøbelø køn. Inchen Jesúsbe mayeelan mõi mõi webamingarua, mõskawanbah, usranbah, tru nõba ambubelanbatø pera ya, tru ishug-unø tsuinug kebya,

⁴¹ tasigu kemørabe, trenchibig køn:

—Talita, cumi— cha. (Trenchippe: “Ishug-unø, ñun kurrø char” chib.)

⁴² Inchene tru doce años tøga ishug-unøbe mõi mõi kurrappa, llibar mendøben, misaamerabe truba truba kwaara asha kørømisrøbelø køn.

⁴³ Inchen Jesúsbe mun køben eshkab kønrrab kømø cha, unan mamig srøttrai karubig køn.

6

Jesús Nazaret pueblørø

(Mt 13.53-58; Lc 4.16-30)

¹ Jesúsbe truyurri webya, katø nui pirausrømay iben, nui kusrenanøb pera uniløbe nõba ambubelø køn.

² Incha isrin kwaløm pubene, Jesúsbe judíosmera tulundzuni yau kusrenanøb mendøben, mõiløgøben mørøbeløbe truba kwaara asha, trenchibelø køn:

—¿I mōðbe kerrigube churre øyeeg kusreh? cha. ¿Iig nui øyeeg truba truba kusreibe chiguerah? cha. ¡Kan i mōg nui tasiimeratōga maramburab mariilø yeekkucha kuita! cha.

³ ¿Iibe tru tsiimeratōga chine marøbig kōmuitarru? cha, tru Maríai nusrkai. Katø ¿Santiagoimba, Joséweimba, Judasweimba, Simónweimba nøbe nuneg kōmuitarru? cha. ¿Yamba nui nuchaløgucha yu namui ututøwei warabelø kōmuitarru?— cha.

Treekkurri nømbe nune chinetø cha mørøbelø køn.

⁴ Inchen Jesúsbe trenchibig køn:

—Chutøgucha peesrømbe Tius maig karuigwan eshkabigwane tab indan cha. Trune nui piraueløba, nømmissaameraba, nui yaueløbabe chi tab inchimøn — cha.

⁵ Incha truyube maramburab marig chi martrab kaima, mamdø kwanreelan nui tasiitøga estsara, trutøh tamarøbig køn.

⁶ Inchen Jesúsbe yeekkucha køremø misaamera kønrrabmab ke kwaara ashibig køn.

Jesús nui doce pera uniilan kusrenanrrai ørøb
(Mt 10.5-15; Lc 9.1-6)

Incha Jesúsbe tru puluwan yamera tsitsø pønrrabwan kusrenanøb uñibig køn.

⁷ Incha nøbe nui doce kusrenanøb pera uniilan wama, pagatø, pagatø ørøb menda, trømbøig maringarub kwaimandziimeran mu chindamgaig marøb amrrai tranøbig køn.

⁸ Incha treeg karubig køn:

—Mayuweimbe chigucha sruammønrrain cha. Kan pøtønain tsiitø srua amrrain cha. Pirri srua ammøwei, wasr ila ammøwei, pørønailøyu an pusra ammøwei inchain cha.

⁹ Alpargatistø keeta amrrain cha. Pala itøgueikkucha yunømaramiba kømøtø, kandø kewa amrrain— cha.

¹⁰ Incha Jesúsbe katø trenchibig køn:

—Ñim kan yau kebambuppe, tru puebloyugurri ambamnegatig kørømisrtrigay cha.

¹¹ Inchen ñimun wamømøwei, ñimun mørøg kømui indinuube, trube, tru puebloyugurri webamrrappe, ñimui srøbyu usrøwan chishtø kørøgønrrigay cha. Treeg marøppe, trube: “Ñim kaasig købene, møimbe ñim kusrenrrigay” chib eshkab.—

¹² Inchen nømbe webamba, misagwan:

—Ñim kaig mariilan isua mørøb, Tiusweimay lliray— chib eshkab kusrenanøbelø køn.

¹³ Incha misagweinukkurri kwaimandziimeran truba yam webetab, truba yam kwanreelan aceite srøla, tamarøb inchibelø køn.

Juan Bautista kwaig
(Mt 14.1-12; Lc 9.7-9)

¹⁴ Rey Herodesbe Jesúsban wamindi mørøbig køn, kaguende Jesúswei munchiwane misaamerabe nun, nun waminchib køben. Inchen mõiløbe trenchibelø køn:

—Juan Bautista kwailai utugurri katø kurriinrrun cha. Incharre tru maramburab øyeeg maramig tøggaig kuinrrun— cha.

¹⁵ Inchen katøganeløbe trenchibelø køn:

—Tius maig karuigwan eshkabig Elías kuinrrun— cha. Inchen kaneløbe:

—Nøbe Tius maig karuigwan eshkabig kuinrrun, chibelø køn, tru mōikkøben merrabsreelø lataitøwei.—

¹⁶ Inchen Herodes trunun mørabe, trenchibig køn:

—Iibe Juan, na tru turwan paringarui kuinrrun cha. Møimbe kwailai utugurri katø kurriinrrun— cha.

¹⁷ Kaguende Herodesbe tru Juanwane kemøringarua, kailan keeri yau lusra wanningaruig købig køn, tru nui nuneg Felipei srai Herodiaskurrindø. Tru Herodiasbe Herodeswei nuneg Felipei srain købig køn. Inchen Herodesbe truigwane nui srai marin køben,

¹⁸ Juanbe Herodeswane trenchibig køn:

—Ñi ñui nunewei srawan ñui srai mara tøgagømibe merig pasran— cha.

¹⁹ Inchen tru ishug Herodiasbe Juanwan tsalø køptø kwetchab inchendø, kaimabig købig køn.

²⁰ Kaguende Herodesbe Juanwane sølgandø tabig, katø Tiusweindø tarø mari møg kwaasha, køriimata, trugurri nune mu chinchimønrrai ashib tøgagøbig køn. Incha Herodesbe Juan wamindigwane mandøguen kømui inchendø, tammay ka mørøbig køn.

²¹ Indiibe Herodiasbe Juanwan maig maramigwan yandø treeg maramdiig puin kui ashibig køn. Kaguende Herodesbe tru chiwangucha nøm asha karubelaimba, suldaumeran karubelø nørreelaimba, Galilea mas kusreb møguelaimba nui kal-lain kwalømwan isub kasrag waram kwaløm tabig maren,

²² møimbe Herodiaswei nimbasrbe truyu kebya, pailaben, Herodeswanba, truyu mab purrabelanba tru pailaibe truba tabig asønaben, reybe tru srusrane trenchibig køn:

²³ —Ñun chi miag købendø, miarra cha. Na tranrrumøn cha. ¡Katø! ñune tranmø kømø, nabe trunun tranamønrrun chib. Ñi chi miaben, tranrrumøn cha. Na muburab ashib karub waigwan tøbøttakattikken tranrrumøn— chibig køn.

²⁴ Inchen nimbasrbe webya, usran:

—¿Chi miamø?— cha payen, usri Herodiasbe trenchibig køn:

—Juan Bautistai turwan miau— cha.

²⁵ Inchen tru srusøbe tru urastø tru rey waisrø petøzhiitø kebyabe, trenchib miabig køn:

—Møindøwei Juan Bautistai turwan kan platilloyu tranrra— cha.

²⁶ Inchen reybe truba truba isui inchendø, tru mayeelø lincha purrabelai malau 'treeg tranrrumøn' cha, tranrrab misrig køppe, tru miaigwan ka chimø, ka tranøbig køn.

²⁷ Incha tru urastø reybe kan suldauwan Juanwei turwan para, srua arringaruben,

²⁸ truike tru kailan keeri yaumay ya, Juanwei turwan para, kan platilloyu srua arruabe, srusran tranen, nøbe usran tranøbig køn.

²⁹ Inchen Juanwei mendig amøñibelø iigwan wammørabe, amrrua, nui asrwan kusrua, srua amba sørabelø køn.

Jesús trattrø mil møguelan manrrai tranø

(Mt 14.13-21; Lc 9.10-17; Jn 6.1-14)

³⁰ Inchen Jesús nøashib karua øriilø katø amrrua, nøba tulundzuna, nøm chi marigwanba, kusrenanigwanba kerriguh eshkaben,

³¹ Jesúsbe trenchibig køn:

—Nøørørø mu misakkasrø kuchi isrønrrab ñimbe amrruy— cha.

Kaguende menrra misag koptø amben, amrruben inchen, nømune mab purramikken nebumíg køn.

32 Incha Jesúsba, nui nøashib karua øriiløba nømdø kan barcoyu mu misakkasrømay ambubelø køn.

33 Inchen møiløgøben nøm amben asha, Jesúswan mu kui nebua asha, chu puebloyuelø køben trusrømay lula, nømmerrig pubelø køn.

34 Incha Jesús barcoyugurri pinaya, truba nu misag pasrai ashabe, lastima isui inchibig køn, kaguende nømbe ubishamera mu ashchabig chigar latailø køben. Incha chine truba kusrenanøb mendabig køn.

35 Inchen yandø menrra maaben køben, nui kusrenanøb pera uniiløbe Jesúswan kemallabe, trenchibelø køn:

—Yube mu misakkanug køn cha. Inchagucha yandø kwa maaben køn cha.

36 Misagwan amrrai, ‘ungwa’ chi cha, chugøben nøørsrøn køben, pulwandø yamera pønrrabsrøn køben amba, nømuysig chigøben pena manrain— cha.

37 Inchen Jesús lötappe trenchibig køn:

—Manrrai ñim mannay— cha.

Inchene nømbe trenchibelø køn:

—¿Manrrai mannamig kan møg doscientos días ørøba marøb megawa an pagaraig utiitøga pirrim penønrrab ambam neburnrautah?— cha.

38 Inchen Jesúsbe trenchibig køn:

—¿Ñimbe mam pirrin tøgagøgue? cha. Ashchab ambay— cha.

Inchen nømbe ashabe, trenchibelø køn:

—Trattrøgatø pirrimbah, pagatø peskaubatø tøgaguer— cha.

39 Inchen Jesúsbe misaameran kan sötø, kan sötø pillim pubilayu purramisringarubig køn.

40 Inchen kan sötømørig cienbatø, cienbatø purramisren; kan sötømerabe cincuentabatø, cincuentabatø purramisrøbelø køn.

41 Inchen Jesúsbe tru trattrøgatø pirriwanba, pagatø peskaumeranba nui tasku muta, srømbalaneb neesha, Tiuswan ‘mayanguen pay’ chabe, pirrimeran pirisha, nui kusrenanøb pera uniilan misagwan pirishinrrai trana, katø tru pagatø peskaumerangucha mayeelan pirishinrrai tranøbig køn.

42 Inchen mayeløba øska ma kørømisren,

43 tru pirrim pitis, peskau pitis pirisaig undailan tasinmerayu tulishiben, tasinmera doce netsabig køn.

44 Inchen tru pirriwan mabeløbe møgueløtø trattrø mil købig køn.

Jesús pi palawan arrub (Mt 14.22-27; Jn 6.16-21)

45 Incha tru urastø Jesúsbe nui kusrenanøb pera uniilan pisu ambøgatø Betsaidasrømay merrab amrrai barcoyu nebangingarubig køn, nø tru nu sötø misagwan ‘ungwa’ chib pasrappatø.

46 Incha yandø misagwan chab ‘ungwa’ chabe, tunsrø Tius Møskaimba waminchab ibig køn.

47 Incha yem køben, barcobe chabguen pisu tøbøtaasrønguen iben, Jesúsbe nøtø pirau kørømisrøbig køn.

48 Inchen kaguen isiibe nømui malaugøba megambub ichen, nømbe barcoyu amrrab kaima, muraaraig remab melai ashib pasrabig køn Jesúsbe. Incha løtsøzhig yemøbe nøbe pi palawan katsikka nømuimay kemallib ya, purab inrrab lataig inchen,

49 pi palawan arri ashippe, nømbe møsig kønmab isua, trashibelø køn.

⁵⁰ Kaguende mayeeløba ashagurri puro trømbøig kørig kui inchen, Jesúsbe mõi mõi nòmune waminchib trenchibig kòn:

—¡Kørmø, mur isua purray! cha. Na kur cha. Kørig kui inchimøtay— cha.

⁵¹ Incha nø barcoyu nebibene, isiibe wasrøngandø pasramisrøptinchen, kan øyeebe chi maig kermab nømbe truba kwaarøbelø kòn.

⁵² Kaguende tru pirriwan øyee marigwanma katøgucha nømbe tab chigúi mørømwa kørrømisrin købig kòn, larrø mur manrrømera tøgær srø kua.

Jesús Genesaretsrø kwanreelan tamarøb

(Mt 14.34-36)

⁵³ Incha yandø tru pisuyu chab larraamba, Genesaret pirausrø pua, truyu barcon pi menda licha pasrøbelø kòn.

⁵⁴ Incha barcoyugurri nøm webamben latatø, misaamerabe Jesús kui nebua asha,

⁵⁵ nømbe tru pirau truørø lula, Jesús chu wan taig mørøppe, trusrømay kwanreelan tsigalyu muta, amrrub mendabelø kòn.

⁵⁶ Inchen Jesúsbe yamera tsitsø pønrrabsrø, pueblomerasrø, wambig nørørsrø chugøben kebibene, penab, yanøb indiisrø kwanreelan wara:

—Ñi pala itøguewa kuig urøzhigwandøguen namun katørabashcha — chib, Jesúswan rugabelø kòn.

Incha mayeeløba katørabeløbe yandø tamarilø kørrømisrøbelø kòn.

7

Fariseosmerai kusrenaniilø

(Mt 15.1-20)

¹ Inchen fariseosmeraba, Jerusaléngurri amrrubelø møiløgøsrøn tru Moisés pørigwan kusrenanøbeløbabe Jesúsweim pulu kemallibelø kòn.

² Incha truiløbe Jesúswei kusrenanøb pera uniilø møiløgøsrøn nømui tasigwan kinømø mai ashibelø kòn, tru kaigwan chish misrøb chib, tasig kinigwan.

³ Kaguende fariseosmeraba, maya judíosmeraba merrabsreelø maig marøb, amrruilane ke tindøga pønrrabelø kua, maig taigwan tasigwanmerrig kinømuppe, mameelø kòn.

⁴ Katø penab, yanøb indiisrøngurri amrrua chigucha, tru tasig kinønrrain taigwan kinømuppe, mameelø kòn. Katø nømbe chigøben katøgan trendø treeg mariilan pesannamø marøb tøgagøbelø kuabe, mutsim pasumeran pillma, katø køtsømeran, tsandzøn nindaameran pillma, manrab purramisriilan chishmarøb inchibelø kòn.

⁵ Incha fariseosmeraba, katø tru Moisés pørigwan kusrenanøbeløbabe Jesúswan trencha payibelø kòn:

—¿Ñui kusrenanøb pera uniiløbe namui merrabsrø kølleeløgurribunø trendø treeg marøb amrruig købigwan treegwan marøb amøñimøtø, kaigwan chish misrøb tasigwan kinømø, maptø manrrappe, chindimba treelø køh?— cha.

⁶ Inchene Jesúsbe trencha løtabig kòn:

—Tru Tius maig karuigwan eshkabig Isaíasbe ñim palatø tabelaimburab maig kønrrabigwan kanmaytø trenchippe, sølwein tain kòn cha, øyah chib pørøppe:

I misaamerabe nane ka triitøgatø tab inndan cha.

Inchendø nømui manrrøbe nainukkurrimbe yab pønrran cha.

7 Nan kōriibala tabig waminchib taibe chiweingucha chi tabig marig kōmōn cha,

mōguelō martrai karua pōnsrailan ōyeeg maramig kōn chib kusrenanōb.

8 Kaguende ñimbe Tius maig maramigwan martrai pōnsraigwan elacha, mōguelō ka trendō treeg marōb tōgagúilangōba kebasrōbelō kōn— cha.

9 Incha katō Jesúsbe trenchibig kōn:

—Ñimbe ñim trendō treeg marōb kuilan tōgagōbig tōgagug kōptō, Tius maig maramigwan martrai pōnsraigwane elachippa, mōguelō marōb amruigwangōba marōbelō kōn cha.

10 'Kaguende Moisésbe trendaig kōn: "Ñui mōskai, ñui usrane maig kōbash inchimō, tab indamig kōn" cha. Katō: "Mōskawan kui, kabe usran kui trōmbōig nebunrrai wamabigwane trunune kwanrrai pasrig kōnrrun" cha.

11 Trune ñimbe trenchibelō kōn: "Kan mōōbe mōskawan kui, kabe usran kui trenchinrrun cha: 'Na ñimun purugumig tōgagúibe *Korban* kōn cha, (trenchippe, "Tiuswan keta, tranig kōn" chib) ñimune purugunrrab kaymamōnrrun' chinrrun" cha.

12 Treeg chippe, yandō ñimbe usri mōskawane isua ashib purugumibe chi palōmōn tan cha.

13 Treekkurri Tius martrai karua pōnsraigwane chigucha kōmīg kui lataig mara srua kōn cha, ñimui kusrenaniilō kanun kanun puraarrub arrubiitōga. Incha ñimbe katōgan ōyeelō latalitōtōwei truba marōbelō kōn— cha.

14 Incha katō Jesúsbe misagwan nuimay wama, trenchibig kōn:

—Ñim mayeelōba nan mōrōb, katō chigúi mōrōb inday cha.

15 Chitōgucha mōwan wambikkurri kebibiibe truiwane kaig trōmbōig marōb mindishinrraamōn cha. Mōwei manrrōyugurri webarrubiibe sí, nun trōmbōig marōb mindishibwei indan cha.

16 ¡Mōikkōben mōramig kalu pōnsraig kuabe, mōr!— chibig kōn.

17 Incha Jesús misagwan tarōmisra, kan yau kebiben, nui kusrenanōb pera uniiōbe:

—¿Tru 'ōyeeg lataitōwein kōn' chib kemesra kusrenanigwan chi chibig kōh? — cha payene,

18 nōbe trenchibig kōn:

—¿Ñingucha chigúinguen mōrmōwa pōnrrōtirru? cha. ¿Mōwan chitōgucha wambikkurri kebibiibe kaig trōmbōig marōb mindishimīg kui ashmeelō kōtirru? cha.

19 Kaguende manrrau kebimōtō, patsau kōrraya, katō asrugurri webinrrun— cha.

Iigwan ōyah chippe, chi mamitōgucha kaig marmīg 'chishelō' kōn, chibig kōn.

20 Incha katō Jesúsbe trenchibig kōn:

—Mōweinukkurri webarrubiibe sí, nune kaig trōmbōig marōb mindishibwei indan cha.

21 Kaguende umbu manrraugurri webarrubiibe sí, kaig isuilō kōben, ishumburba, mōguelōba trōmbōig maramelō kōben, nilamelō kōben, kweet-samelō kōben, kasharawarmera peebe itōlulamelō kōben,

22 katōganuiwan tōgagōnrrab isumelō kōben, trōmbōig kaig maramelō kōben, may wamincha isamelō kōben, chine kaig marōg kōbiitō srua yaig kōmig kōben, chigurrin kōben pusrkwai asamelō kōben, chi purayailan trōmbōig wam kusramelō kōben, ke puro nuig kōmmōrō indamelō kōben, chugúi mōrmīg lataig unamelō kōben werrun cha.

²³ Iiløbe si, kerriguba umbugurri webarrubig kua, mōwan kaig trōmbøig marøb mindisha kōrrømaran— chibig kōn.

Judío kōmø ishug nui isubigwan Jesúsweinuutø pasra tøgagøb
(Mt 15.21-28)

²⁴ Incha Jesúsbe kurra, truyugurri Tiroba, Sidónba, tru ciudadera pōnrrab piraumayba yabe, kan yau kebya, mugucha wammørmønrraimab isubig kōn. Inchendø trubōnrrab kaimabig kōn.

²⁵ Inchen trōmbøig maringarub kwaimandzig kebyainab ishug-unai usri, tru urastø wammørabe, arrua, Jesúsweim pulu tōmbōnsrøbig kōn.

²⁶ Tru ishuube griega Sirofenicia pirausriig købig kōn. Truibe arrua, nui nimbasrweinkurri kwaimandzigwan wegutcha chib, Jesúswan miab megaben,

²⁷ Jesúsbe trenchibig kōn:

—Nusrkalømerrig pirriwan mamne mabash cha. Kaguende pirriwan uregwan kerrawa, wera-ureezheelan kebusramibe søl kōmøn— cha.

Inchene ishuube trenchibig kōn:

²⁸ —Øø, Señor, pøs treebe treggwein kōn cha. Inchendø tru mishatsig umbu wera-ureezheeløguen pitischigwan man cha, nusrkalø kōrrøgaigwan.—

²⁹ Inchen Jesúsbe trenchibig kōn:

—Ñi ya may isua tab lōtiitøgabe, mōimbe inrrø cha. Tru kwaimandziibe ñui nimbasrweinkurri webyaingen kōn— cha.

³⁰ Inchen nøbe yau pubene, kwaimandziibe unainukkurri webyaingen køben, nui nimbasr-unøbe camayu tsuin købig kōn.

Kalu mōrmøwei, waminchimøwei inchibigwan Jesús tamarøb

³¹ Jesús katø Tiro piraugurri webya, Sidónwansrø pureb ya, trugurrimbe Decápolis pirau publomerawan puraarrub arrua, Galilea nu pisuyu pubig kōn.

³² Inchen truyube kan møg kalu mōrmøwei, tør waminchimøwei inchibigwan srua amrrua, truba inchibelø kōn:

—Ñui tasigwan nuim pala estsarøbsrumuguh— chib.

³³ Inchen Jesúsbe menda nōørsrø pera ya, tasig-uregwan kalumerayu keera, illimbi tucha, niløwangucha katørawabe,

³⁴ srømbalaneb neesha, nu israbe, trenchibig kōn:

—¡Efata!— cha, (trenchippe, “¡Kur!” chib).

³⁵ Inchene tru mōrtrab kaimabigwein kalumerabe mōi mōi kuren, nilø kemendikkucha kōnab tammisren, yandø tab waminchibig kōn.

³⁶ Inchen Jesúsbe nōmune mungucha waminchimønrrain karua, maya eshkamønrrain taingucha, nōmbe masken wam larrøbichibelø kōn.

³⁷ Incha misaamerabe truba kwaara ashib trenchibelø kōn:

—Chiwandøgucha nøbe tab maran cha. Kalugarwanguen mōringarub, waminchimeelanguen wamingingarub indan— cha.

8

Jesús misag pib milwan manrrai tranøb
(Mt 15.32-39)

¹ Tru kwalømmerrawan misag truba nu tulundzuna pasrøben, mamibe chigucha kaaben, Jesúsbe nui kusrenanøb pera uniilan nuimay wamabe, trenchibig kōn:

2 —Misaameran lastima kōtan cha. Chabguen yu pōn kwalōmguen naba warōwa, yandō chi mamig chigar kōn cha.

3 Chi mameelan na nōmui yamay ka ambashendōbe, mayu parōgwab chab pesannanrrun cha. Kaguende kan utuelōbe yabsrōngurri amrruar kōn— cha.

4 Inchen nui kusrenanōb pera uniilōbe trencha lōtabelō kōn:
—¿Yu ya mu misag warōmōnuube pirri manrrai nōmun chinchā srōttrab?— cha.

5 Inchen Jesúsbe trencha payibig kōn:
—¿Ñimbe mam pirrin tōgagōgue?— cha.

Inchen nōmbe lōtappe:
—Siete tōgaguer— chiben,

6 Jesúsbe misagwan pirau purramisingarua, nui tasku tru pirri sieten muta, Tiuswan ‘mayanguen pay’ chabe, pirisha, nui kusrenanōb pera unilān tranen, nōmbe misagwan pirishibelō kōn.

7 Katō peskau-urekkucha mamdō tōgagōben, Jesúsbe trunun Tiuswan ‘mayanguen pay’ chabe, katō trunungucha misagwan pirishinrrai karubig kōn.

8 Inchen mayeelōba øska ma kōrrōmisren, katōgucha pitis undailan tasinmerayu netsōbateelō siete tulishibelō kōn.

9 Inchen tru mabelōbe pib milburab kōbig kōn. Incha Jesúsbe misagwan ‘ungwa’ chabe,

10 nui kusrenanōb pera uniilōba barcoyu kebya, Dalmanuta pirausrōmay ibig kōn.

Fariseosmera Jesúswan kan mana asimig martrai miab
(Mt 16.1-4; Lc 12.54-56)

11 Inchen fariseosmera amrruabe, Jesúswan ‘¿øyeebe maig kōh?’ chib payib menda, nune srōmbalāsōngurriigwan asamig martrai miabelō kōn, Tius nōba pasrain kui ashchab, ke chinchibig kōtashchab ashig kōptō.

12 Inchen Jesúsbe truba isui inchib, nu israbe, trenchibig kōn:
—¿Mōin kwalōm misaamerabe Tius naba pasrain kui ashchab chindimba maramig miah? cha. Nabe ñimun cierton trendamōnrrun cha: Mōin kwalōm misaameran ashig kui indigwane chigucha marig kōmōnrrun— cha.

13 Incha nōbe nōmun pōnrramnetō, katō barcoyu kebya, pisu ambōgatōsrōmay ibig kōn.

Fariseosmerai levadura
(Mt 16.5-12)

14 Inchen nui kusrenanōb pera uniilōbe pirri srua amrrumigwan pesan amba, barcoyube pirri kandō tōgar purrabelō kōn.

15 Inchen Jesúsbe nōmune trenchib eshkabig kōn:
—Au, ñimbe levadura fariseosmeraiwanba, saduceosmeraiwanba ashiptō kuy— cha.

16 Inchen nui kusrenanōb pera uniilōbe kangurrin kangurri trenchibelō kōn:

—Kaguen nam pirrin chigar kuimba, nōbe trendan— cha.

17 Inchen Jesúsbe nōm trenchib purrai ashabe, trenchibig kōn:
—¿Chindimbarre ñimasiyaitō ‘pirringar ker’ chib purrōgue? cha. ¿Katōgucha ni chiguinguen mōrmōwei, chiwan wamingdinguen mōrmōwei inchigueh? cha. ¿Katōgucha ñimui manrrōmerane mur mara tōga pōnrrōtirru? cha.

18 ¿Ñimbe kabmera tōgar kōbendō ashmōwei, kalumera tōgar kōbendō mōrmōwei inchigueh? cha. ¿Yamba isumuitarru? cha.

19 Tru na trattrøgatø pirriwan trattrø mil møguelan pirishib urasma tasinyu netsøbatø ñimbe ¿mam tasin tulisaiḡ køh?— cha.

Inchen nømbe lötappe:

—Doce— chibelø køn.

20 Inchen Jesúsbe trenchibig køn:

—¿Tru na siete pirriwan pib mil misagwan pirishib uras chigucha netseelo mam tasin tulisaiḡ køh?— cha payene:

—Siete— chibelø køn:

21 Inchen nømune Jesúsbe trenchibig køn:

—¿Inchendo katøgucha chigúí mørmoŵa køtirru?— cha.

Betsaidasriig kabgaigwan Jesús tamarøb

22 Incha Betsaida pueblosrø pubene, Jesúsweimay kan kab ashmíḡwan srua amrrua, kabyu katøabsrumugu chib, meløben,

23 nøbe nun tasku kemøra, puebloygurri wambiisrø srua ya, kabyu illim-bitøḡa srøla, nui tasigwan kabgaigweim pala estsarabe:

—¿Maytøguen ashkuh?— cha payibig køn.

24 Inchen tru møøbe ashabe, trenchibig køn:

—Møguelan ashar cha. Tusrmera latailø købendø, amønān— cha.

25 Inchen Jesúsbe katøyug nui tasiimeran kab pala estsarabe, nune asin-garuben, yandø tabig ashibig kørrømisra, chiwandøgucha tørgandø nebua ashibig misrøbig køn.

26 Inchen Jesúsbe nui yamay ørøppe, trencha ørøbig køn:

—Puebloyu kebimøwei, truyu mungucha eshkamøwei inchig— cha.

Pedro Jesúsŵan: “Cristo køn” chib

(Mt 16.13-20; Lc 9.18-21)

27 Incha Jesúsbe nui kusrenanøb pera uniiløba Filipino pirau Cesareasrø yam-era tsitsø pønrrabsrømay webamba ambabe, mayu nømun trencha payibig køn:

—¿Misaamerabe nane mu køn tah?— cha.

28 Inchen nømbe trencha lötabelø køn:

—Møiløbe Juan Bautista køn chiben; katøganeløbe Elías køn chiben; møiløbe møikkøben Tius maig karuigwan eshkabig kuinrrun tan— cha.

29 Inchen Jesúsbe trencha payibig køn:

—¿Trune ñimbe nane mu køn chinrrague?— cha.

Inchene Pedrobe trencha lötābig køn:

—Ñibe Cristo køn— cha.

30 Inchen Jesúsbe nømun mungucha eshkamønrrain karubig køn.

Jesús nø kwamigwan eshkab

(Mt 16.21-28; Lc 9.22-27)

31 Incha nø tru Møḡ Misra Arrubiibe truba truba kaig indinab megamig nebunrrun chib, kusdennøb mendābig køn. Misagwan karubelø kølli mis-amera køben, sacerdotsmeran karubelø køben, tru Moisés pørigwan kusre-nanøbelø køben nune kaasig kømig nebunrrain køn chib. Nune kweechen, pøn kwalømyube øsiiranrrun chib.

32 Iigwane Jesúsbe nømune tørgandø eshkabig køn. Inchen Pedrobe nun nøørørø pera ya, murtø waminchib mendābig køn.

33 Inchen Jesúsbe keesha asha, nui kusrenanøb pera uniilan ashabe, Pe-drone trenchib namābig køn:

—Satanás, ¡nainukkurri tarømisr! cha. Kaguende ñibe isuppe, Tius lataig isumøtø, møguelø isuimay isun— cha.

³⁴ Incha Jesúsbe nui kusrenanøb pera uniilanba, misagwanba wama, trenchibig køn:

–Møikkøben nai mendig uñig købene, nøasiitø nuimburabigwangøba isumøtø, nuiuruswan mutab, nai mendig arrum neburrun cha.

³⁵ Inchen møikkøben øsig kømigwanøba esegabiibe yandø pinab pinamig neburrun cha. Inchen nagurrimba, Tiuswei tabig srø wamgurrimba kwabiibe, managatig øsig kømigwan esegawa tøgagønrrun cha.

³⁶ ¿Kan møg yu pirau chine købigwan kerrigu nuindø maringucha, nui øsig kømigwan trubisaibe, chiwein kui tabig kønrrab kø? cha.

³⁷ ¿Kabe kan møøbe kwamønrrappe, chi tranøsruerah? chibig køn.

³⁸ Inchawei møikkøben i møin kwaløm misaamera itøluløpteelø, kaig marøb misaamerai merrab naimburappa, na wamidiilaimburappa kørig isub kørig kui inchibigwane, nungucha kørig purørtrun, chibig køn, Møg Misra Arrubig tru nui Møskawei tørguegwalmabigu Tiusweindø tarø mari ánglesmeraba arrua.–

9

¹ Incha Jesúsbe katø trendaig køn:

–Nabe ñimun cierton trendamønrrun cha: Møiløgøben yu purrabelø Tius nø ashib karub waig maramburab marøb arri ashmøwatøbe kwanrraamøn– cha.

Jesús ke peemayig misrøb

(Mt 17.1-13; Lc 9.28-36)

² Øyeeg taig yandø trunewei kan kwalømdø paløben, Jesúsbe Pedronba, Santiagonba, Juanwanba nømundø kan pala tunsrømay pera ibig køn. Incha trusrø nømui merrab Jesúsbe ke peg lataig misrøbig køn.

³ Inchen nui kewagúiløbe pulø tørchig tør pilabig misrøbig køn, muguen i pirau kewagúigwan tsara, øyeeg puløzhig mariinrraamønikke.

⁴ Inchen Elíasba, Moisésba kenamisra, truiløbe Jesúsba waminchib pønrrai nømbe ashibelø køn. ⁵ Inchen Pedrobe Jesúswane trenchibig køn:

–¡Kusrennøbig, nam yu pønrramibe purø tab køtan! cha. Pøngatø ya-ureg margun, chibig køn, kan ñui, kan Moiséswei, kan Elíasweingue.–

⁶ Kaguende nømbe kwariilø pønrrøwa, Pedrobe ni chi chib pasrarmabgugen isumig køn.

⁷ Inchene kan wañi nømun pinøbulen, wañi umbugurrimbe kan wam trenchibig køn:

–Iibe nai Nusrkai undaaraig køn cha. Nune møray– cha.

⁸ Inchen mømbe nømuim pøtøgatan ashene, mu katøgan peebe nømbe kenamuptinchen, Jesústø pasrai ashibelø køn.

⁹ Incha tru tunsrøngurri kørrørrub amrruabe, Jesúsbe trencha karubig køn:

–Mungucha waminchib kønrrab kømø cha, tru ñim asigwane, Møg Misra Arrubig kwailai utugurri katøle øsiiramnegatig.–

¹⁰ Inchen nømbe truiwane nømuinetø isub esegabendø, tru kwailai utugurri øsiiramnegatig taigwane, treebe mandø cha trendermab nømdø payiyabelø køn.

¹¹ Inchabe Jesúswane trencha payibelø køn:

–Tru Moisés pørigwan kusrenanøbeløbe ¿chindimba Eliasmerrig arrumig køn tah?– cha.

¹² Inchen Jesúsbe nømun trencha løtabig køn:

—Elíasmerrig arrubwei inchun cha, kerrigu katøyug tamara kørømartrab. Katø Tiuswei wamwan pørigube tru Møg Misra Arrubiibe truba kaig indinab, kaasinab indig kønrrun chippe, ¿mandøgurin trendah? cha.

¹³ Inchendø nabe ñimune trendamønrrun, chibig køn: Elíasbe manawei arrubgusen inchen, nømbe maig marøg købendø nun kerrigu treeg marig køn cha, Tiuswei wamyu Elíasweimburab maig taig treekke.—

Jesús kan unan kwaimandzig tøgagwan tamarøb
(Mt 17.14-21; Lc 9.37-43)

¹⁴ Incha nømbe katøle nui kusrenanøb pera uniilø purrainuumay amrrubene, nømune misag truba nu pøtøgatan tulundzuna kuin købig køn. Inchen truyube katø møiløgøsrøn tru Moisés pørigwan kusrenanøbeløgucha Jesúswei kusrennøb pera unielane øyeebe maig kø chib kuin købig køn.

¹⁵ Incha Jesúswan ashippe, maya misaaba truba kwaara ashib 'manguen attirru' chinrrab luløbelø køn.

¹⁶ Inchen Jesúsbe trencha payibig køn:

—¿Nømbabe chi køn chibrren køgue?— cha.

¹⁷ Inchen møikkøsrøn tru nu misag utu pasrabiibe trenchibig køn:

—Kusrennøb, yu nai nusrkawan kan kwaimandzig waminchimig marig srua arrur cha.

¹⁸ Chugøben pasrøben, kwaimandziibe kemøra, pirausrøn kuchen, nøbe triimay chall kuchib, trugulwan tsachib ¡katø! tinrranrrig misrøbig køn cha. Inchen nabe ñui kusrenanøb pera uniilan kwaimandzigwan wegutcha chiben, nømbe kaiman— cha.

¹⁹ Inchene Jesúsbe trencha løtabig køn:

—¡Kan mõi misaamera øyeebe mailø kwaasamø cha, chigucha køremeeløbe! ¿Nabe managatig ñimba unamig kønrrerah? cha. ¿Kan øyeege ashiptø managatig ñimba unamerah? cha. Unan naimay srua amrruy— chibig køn.

²⁰ Inchen srua amrruben, kwaimandziibe Jesúswan ashippe, unan mõi mõi purø trømbøig sruaguchen, unøbe pirau peña, latøgushib triimay chall kuchibig køn.

²¹ Inchen Jesúsbe møskawan trencha payibig køn:

—¿Øyeege indiibe maya yana køh?— cha.

Inchen møskaimbe trenchibig køn:

—Unøgurri treeg kuig køn cha.

²² Katø katø kwaimandziibe kwetchab nagu kui, piyu kui keguchibig køn cha. Ñi chi maramdiig købene, namun øyeege kui meløben lastima asha, purugurra— chiben,

²³ Jesúsbe trenchibig køn:

—Ñibe: “Chi maramdiig købene, martra” taibe cha, pøs, ke treeg martraitamab kørebigweimbe chitøgucha maramdiitø køn— cha.

²⁴ Inchen tru urastø unai møskaimbe øyah chib trashibig køn:

—¡Treeg martraitamab kører cha. Kørenrrab inchimig kømønrrab purugurra!— chib.

²⁵ Inchen Jesúsbe misag ke kanbalatø tulundzunab amrrui ashabe, trømbøig maringarub kwaimandzigwan trenchib namabig køn:

—Kwaimandzig wamgaig, kalugaig, na ñun i unainukkurri mõi mõi webinrø tamønrrun cha. Katøbe yandø nuinug kebarrumønrragüe.—

²⁶ Inchene kwaimandziibe trashib, unan purø trømbøig sruagucha, webiben, unøbe kwaig lataig kørøomisren, møiløgøben trenchibelø køn: “Kwain tsun” cha.

²⁷ Inchen Jesúsbe kwalyu kemørøb kusrabene, unøbe pasramisrøptinchibig køn.

²⁸ Incha Jesúsbe yau kebibene, nui kusrenanøb pera uniiløbe nundø trencha payibelø køn:

—Nambe kwaimandzigwan wambig weguchappe, ¿chindimba kaimah?— cha.

²⁹ Inchen Jesúsbe trenchibig køn:

—Øyeeq kwaimandzigwane Tiusba waminchib miawatøwei weeramig køn— cha.

Jesús nø kwamigwan katø eshka

(Mt 17.22-23; Lc 9.43-45)

³⁰ Incha truyugurri ambabe, Galileawan puraambub amba, Jesúsbe mugucha wammørmønrri inchibig køn.

³¹ Kaguende nui kusrenanøb pera uniilan trenchib kusrenanøb arrig køn: —Tru Møg Misra Arrubigwane møguelai tasku tranen, nømbe kwetchun cha. Inchendø kwaig pøn kwalømyube katø øsiiranrrun— chib.

³² Inchen nømun treeg wamindigwane nømbe chi tainguen mørmøwa, payamibe korig kui inchibelø køn.

¿Mas nuibe mu kerah?

(Mt 18.1-5; Lc 9.46-48)

³³ Incha Capernaumsrø pua, Jesúsbe yau kebyabe, nui kusrenanøb pera uniilan trencha payibig køn:

—¿Mayube chi charre payiyab amrrub kogue?— cha.

³⁴ Inchen nømbe chigucha lötømeelø køn, kaguende mayube nømui utube møig mas nuig kønrrerah charre payiyab kuig kua.

³⁵ Incha Jesúsbe wamisra, tru doceelan wamabe, trenchibig køn:

—Møikkøben nømerriq merrab pasrag købene, mayelai wendau pasramisra, mayeelø karuindiig megamig køn— cha.

³⁶ Incha kan unan srua ya, nømui tøbøtag pasra, nui kwalyu mutabe, trenchibig køn:

³⁷ —Møikkøben i unø lataigwan nai munchiyu tab wamab utabiibe, nan utan cha. Inchen nan utabiibe, nan utømø, nan karua ørøbigwan utan— cha.

Katøganelaingatiig kømibe namuingatiig køn

(Mt 10.42; Lc 9.49-50)

³⁸ Inchene Juanbe trenchibig køn:

—Kusrennøbig, kan møikkøsrøn ñui munchiyu kwaimandziimeran webusri aser cha. Inchendø namba uñibig kømubene, nambe truigwane merer— cha.

³⁹ Inchene Jesúsbe trenchibig køn:

—Merømøtay cha. Kaguende mugøben kan maramburab marig nai munchiyu mara, katøburøbe nan trømbøig waminchaamøn cha.

⁴⁰ Namun namig kurrømíibe namuingatiig køn cha.

⁴¹ Nabe ñimun cierton trendamønrri cha: Møikkøben ñimun Cristoielø kua asha, kan pi pasutøguen nai muchiyu ñimun srørrøbiibe, truburø nui ketigwane utømø kømø, utønrrun cha.

Katøganun kaig mariiløyu kebenøsrkamibe korig kømdiig køn

(Mt 18.6-9; Lc 17.1-2)

⁴² Møigwan køben i shushmera latalilan nan kørebelan kaig mara kebenøsrkøbigweimbe trembe tru tirigu kitsig nu srugwan naashigu iløsrka, mar umbusrø kegutsig kuinguen søl købsruinrrun cha.

⁴³ Pøs ñui tasig kaig maringarua kaigu ñun kebenøsrkøbene, par, chibig køn. Trembe managatig øsig wamsrø kan tasiitø tøgagig kebyamikken søl kønrrun cha, pa tasig tøgagig tru møra melamnug tru managuen kwamø naasrø kebibgunrriibe;

⁴⁴ truyube nømui yau mab kushimera kwamøwei, katø nag managuen kwamøwei inchibsrø.

⁴⁵ 'Katø ñui srøb kaig maringarua kaigu ñun kebenøsrkøbene, trunungucha par, chibig køn. Trembe managatig øsig wamsrø kandarø srøbgaig kebyamikken søl kønrrun cha, tru møra melamnug pa srøppaig kegutsig købgunrriibe,

⁴⁶ truyube nømui yau mab kushimera kwamøwei, katø nag managuen kwamøwei inchibsrø.

⁴⁷ 'Kabe ñui kab kaig maringarua kaigu ñun kebenøsrkøbene, trunun wesru, chibig køn. Trembe Tius nø ashib karub wainug kan kaptø tøgagig kebyamikken søl køn cha, pa kab pusraig tru møra melamnug kegutsig købgunrriibe;

⁴⁸ nømui yau mab kushimera kwamøwei,
nag managuen kwamøwei inchibsrø.

⁴⁹ 'Kaguende mayeeløba tretøga larrøsrkøb lataitøwei naatøga larrøsrkailø kønrrun cha.

⁵⁰ Trebe tabig køn. Inchendø yandø tre larrmíig misrene, ¿katøbe ñimbe chincha larrøbig martrague? Incha ñimbe ñimasitø tre may larrig latailø kuy. Inchawei ñimbe ambugurri igurri lata tab waramig køn— cha, Jesúsbe trenchibig køn.

10

Keeba, sraimba petiyamumigwan Jesús waminchib (Mt 19.1-12; Lc 16.18)

¹ Jesúsbe truyugurri webya, Judea pirausrømayba, Jordán pi ambøgatø pørr kal-labgatøsrømayba iben, katø trusrøngucha misaamera tulundzunab mendøben, nøbe trendø treeg marøbig kua, katø nømun kusrenanøb mendabig køn.

² Inchen mõiløgsrøn fariseosmera Jesúswan kemallabe, trencha payibelø køn, maig inchibig køtashchab:

—¿Keebe srawan kutsamig chi meriimíig kø, chindah?— cha.

³ Inchen nømune trencha løtabig køn:

—¿Moisésbe ñimune maig karuig køh?— cha.

⁴ Inchen nømbe trenchibelø køn:

—Moisésbe ka tarømisriyabasig køn cha. Srawan treeg martrab cha, eshkabig kilga marabe, ka tarømisramig køn taig køn— cha.

⁵ Inchene Jesúsbe trenchibig køn:

—Moisés treeg marbashippe, ñimui manrrømera isumíig larrø mureløgurri ka treeg martrai ñimun pørig køn cha.

⁶ Inchendø srøsrø kwaløm chiwandøgucha marøb uras: “Tiusbe mõwanba, ishüwanba ellmarig køn cha.

⁷ Øyeekkurri mõøbe mõskawanba, usranba elatchun cha, nui sraimba kandø kønrrab.

⁸ Incha tru pailøbe kan asrtø kønrrun” cha. Inchawei yandø pailø kømø, kan asrtø køn cha.

9 Inchawei treeg kōbene, Tius kandø mara lindisaigwane mōøbe tarømaramig kōmōn— chibig kōn.

10 Incha yausrø purrøwabe, nui kusrenanøb pera uniiløbe trunun katøyug payen,

11 Jesúsbe trencha lōtabig kōn:

—Mōikkōben srawan kucha, tarømisra, katøganba kasharabiibe nune itōlula kōrrōmaran cha.

12 Kabe sraingurringucha kewan kucha, tarømisra, katøganba katø kasharawabe, treetøwei itōlulan— cha.

Uregwan Jesús mayanguen tab kuilø kōnrrain chib

(Mt 19.13-15; Lc 18.15-17)

13 Inchen ureemeran Jesúsweimay srua amrrubelø kōn, nø estsartrai. Inchen kusrenanøb pera uniiløbe tru srua amrrubelane namaptinchen,

14 Jesúsbe trunun ashabe, nama, trenchibig kōn:

—Ureemerane merømø, naimay ka amrrubasay cha. Kaguende Tius nø ashib karub waibe nōm latalaiwein kōn cha.

15 Nabe ñimun cierton trendamōnrrun cha: Mōikkōben Tius nø ashib karub wainuguigwan kan unø latalitøwei utaptinchimibe managuen truyube kebinrraamōn— cha.

16 Incha nui kwalyu muta, tasigwan uregweim pala estsarabe, ‘mayanguen tabelø kōnrrigay’ chibig kōn.

Kan pua mōg Jesúsba waminchib

(Mt 19.16-30; Lc 18.18-30)

17 Jesús nui maywan inrrab ibene, kan mōg luløb arrua, nui merrab tōmbōnsrabe, trencha payibig kōn:

—Kusrennøbig tabig, ¿managatig øsig kōmigwan Tius tranig tōgagōnrrappe nabe chi maramerah?— cha.

18 Inchen Jesúsbe nune trencha lōtabig kōn:

—¿Chindimba nane: “tabig” cha wamøgu? cha. Tabiibe kandø kōben, truiibe Tiustø kōn cha.

19 Ñibe Tius maig maramigwan martrai pōnsrailane yandø ashibig kōn cha: “Kweechimøwei, itōlulømøwei, nilømøwei, katøganelaimburab isa waminchimøwei, may wamincha chiyugøben kebenøsrkømwøwei, ñui usri mōskawane maig kōbash inchimø, tab indamig kōn” tailan.—

20 Inchen tru mōøbe trencha lōtabig kōn:

—Kusrennøbig, nabe iilane kerriguh matsinø—unøgurri marøbig kur— cha.

21 Inchen Jesúsbe tru matsinan tab ashabe, nun undag kōptinchen, nøbe trenchibig kōn:

—Kan chigøsrøndø palan cha. Ya, ñui chi tōgagúigwan yana, waachameran tranø cha. Treeg marabe, ñibe srømbalårømbe chigurrimbunø tōgagōnrrun cha. Trugurrimbe arrua, nai mendig amø— chibig kōn.

22 Inchen tru mōøbe øyeeg taigwan mōrøppe, nui maløbe minchiptinchibig kōn. Incha truba isui ibig kōn, kaguen truba puaig kua.

23 Inchen Jesúsbe pøøburab ashabe, nui kusrenanøb pera uniilan trenchibig kōn:

—jTius nø ashib karub wainug puarmera kebambamibe truba murig kōnrrun!— cha.

24 Inchen nui kusrenanøb pera uniilø trunun mōrabe, truba kwaaren, Jesúsbe katøyug nōmun trenchibig kōn:

—Ñim nai ureezheelø, Tius nø ashib karub wainug kebambamibe truba murig kōn cha.

²⁵ Kan camelloguen tsusain kal trabyu illmø larrayandiig køben, kan puaibe Tius nø ashib karub waisrø kebinrrab kaimanrrun— cha.

²⁶ Inchen iigwan mørabe, nømbe masken kwaara, nømasiyaitø trenchib payiyabelø køn:

—Treeg købene, ¿kaigyugurrimbe mu kui wesraig kønrrautah?— cha.

²⁷ Inchen Jesúsbe nømun ashabe, trenchibig køn:

—Møgueløbe iigwan martrab kaimanrrun cha. Trune Tiusweimbe, chi treeg kømøn cha. Kaguen Tiusweimbe chitøgucha maramdiitø køn— cha.

²⁸ Inchen Pedrobe trenchib mendabig køn:

—Au, nambe chi tøgagúigwan kerrigu elacha, ñui mendig amrruig køn— cha.

²⁹ Inchen Jesúsbe trencha løtabig køn:

—Nabe ñimun cierton trendamørrun cha: Møikkøben nui yawan, nunelan, nuchalan, kabe usri møskawan, ureemeran, pirømeran nagurrimba, Tiuswei tabig srø wamgurrimba elachibiibe,

³⁰ mõi yu piraube cien piejes menrraguen yamera, nunelø, nuchalø, usral, nusrkalø, pirømera utønrrun cha, chigøbendø indinab melamig kuindøgucha. Inchen kansrømbe managatig øsig kømigwan utønrrun cha.

³¹ Inchen mõiløgøben mõi ya yu pirau nømmerrig pønrrabeløbe trusrømbe srabe melønrrun cha. Inchen yu pirau srabe melabeløbe trusrømbe nømmerrig pønrrønrrun— chibig køn Jesúsbe.

Jesús katøyg nø kwamigwan eshka

(Mt 20.17-19; Lc 18.31-34)

³² Katø Jerusalénmay nebambub amba, Jesúsbe nui kusrenanøb pera unilai merrab ib pasrøbene, nømbe truba kwaariilø ambub køben, kaneløbe wendau kørig kuilø ambubelø køn. Inchen Jesúsbe katø tru doceelan nøørø wama, nun chi purainrrabigwan eshka menda trenchibig køn:

³³ —Au, nambe Jerusalénmay nebambub amber cha. Trusrømbe tru Møg Misra Arrubigwane sacerdotemeran karubelanba, tru Moisés pørigwan kusrenanøbelanba tranen, truiløbe nune kwanrrai pasra, judíos kømeelan tranrrun cha.

³⁴ Inchen nune indzaashib, illimbi tuchib, ichib srua kua, kweechen, pøn kwalømyube katøle øsiiranrrun— chibig køn.

Jacoboba, Juanba kan chigøsrøn nømuyasig miab

(Mt 20.20-28)

³⁵ Inchen Zebedeowi nusrkalø Santiagoba, Juanba, Jesúsban kemallabe, trenchibelø køn:

—Kusrennøbig, namuyasig nam kan chigøsrøn mianrreender cha. Kan treeg marøbsrumuguh— cha.

³⁶ Inchen Jesúsbe trencha payibig køn:

—¿Ñimuyasig chi maramig palain køgue?— cha.

³⁷ Inchen nømbe løtappe:

—Ñi wainug tørguegwalmabiisrø namun kanun ñui kusrmay, kanun atsimay purrønøbsrumuguh— cha trenchibelø køn.

³⁸ Inchen Jesúsbe nømune trenchibig køn:

—Ñimbe chi miab pønrrermabguen mørmøn cha. ¿Na tru copayu mutsam piwan kabe ñim muchib, katø nan treeg chine trømbøig nebuløbuløb arrubig na utamigwan ñim trunun utab inchague?— cha.

³⁹ Inchen nømbe løtappe:

—Øø, maramønrrundø— chibelø køn.

Inchene Jesúsbe trenchibig kòn:

—Na mutsim piwane ñimbe muchibwei inchun cha. Katø tru nan purø trømbøig nebub pinøbuløb arrubig na utamigwangucha ñimbe utabwei inchun cha.

40 Inchendø tru kusrmayba, atsimayba purramigwane, na tranamig kømøn cha. Tru purramibe nøm purrønrrabelayasig tamariilaindø kòn— cha.

41 Inchen tru nui kusrenanøb pera uniilø diezeløbe trunun mørabe, Juanwaba, Jacobonba namab mendabelø kòn.

42 Inchen Jesúsbe nømun wamabe, trenchibig kòn:

—Ñimguen ashen judíos kømø misaameran karub purrabeløbe nøm karub tøgagüilane maig købash inchib, ke nøm karub purran cha. Inchen truyu møguelø nørreelø nøm karub purrabeløbe mungucha manchinrraingaig karub purrabelø kui ashchai nømbe kenamaran cha.

43 Trune ñimui utube ñimbe øyeelø kømumig kòn cha. Treeg købgunriibe, ñimui utu mas nuig kukkøbene, katøganelø karuindiig megamig kòn cha.

44 Inchen ñimui utu møikkøben ñimmerriig melag købene, mayeelø karuindiig megamig kòn cha.

45 Pøs tru Møg Misra Arrubikken katøganelø nuyasig marøb melønrrai arrumøtø, nøguen katøganelayasig marøb meganrrappa, nø kwaitøga truba nu misagwan purøbagarawa, kaigyugurri wesranrrappa arrig kòn— chibig kòn.

*Tru kabgaig Bartimeowan Jesús tamarøb
(Mt 20.29-34; Lc 18.35-43)*

46 Incha Jericósrø pua, Jesúsbe tru ciudayugurri nui kusrenanøb pera uniiløba misag truba nu peraig webya iben, kan kabgaig Bartimeo taig Timeowei nusrkai, ‘anzhig kettra’ chib, miab may menda wawabe,

47 Jesús nazaretsriig kemallib arri mørøppe, trashib mendabig kòn:

—¡Jesús, merrabsrø Davidwei Nusrkai, nan lastima ashcha!— chib.

48 Inchen ke møiløgøben niløtø wanrrai namingucha, nøbe trenchib mas mur trashibig kòn:

—¡Merrabsrø Davidwei Nusrkai, nan lastima ashcha!— chib.

49 Inchen Jesúsbe pasramisrabe:

—Wamay— chiben, nømbe kabgaigwane trenchibelø kòn:

—¡Chi isumø, kurraptinchi! cha. Kaguende ñune wamab pasran— cha.

50 Inchene nøbe nui tsina waigwan kuchib, pørtrappe, pasrambua, Jesúsweim pulusrø pubig kòn.

51 Inchen Jesúsbe trencha payibig kòn:

—¿Nuyasig na chi maramig paløta?— cha.

Inchen tru kabgaibe trencha løtabig kòn:

—Kusrennøbig, nai kabmera ashibig misrimbe køtan— cha.

52 Inchen Jesúsbe trenchibig kòn:

—Inrrø cha, ñui isubigwan nainug pasriitøgatø, tabig kørømisran— cha.

Inchen tru urastø tru kabgaibe ashibig misra, Jesúswei mendig ibig kòn maywan.

11

*Jesús Jerusalén kebib
(Mt 21.1-11; Lc 19.28-40; Jn 12.12-19)*

1 Yandø Jerusalénsrø chab pub amba, Betfagèba, Betaniaba pueblomerayu tru Olivos Tunsrø chab puabe, Jesúsbe nui kusrenanøb pera uniilø pailan trenchib karua ørøbig kòn:

² —Ø pinrrøguesrø yamera tsitsø pønrrabsrømay ambay cha. Trusrømbe pubyutø kan burro-unø muguen itøguaniimíig litsig wetørranrabguen cha. Picha, srua amrrunrigay cha.

³ Inchippa mõikkøben: “¿Chinchainchigue?” cha payene: “Señor palai indan cha. Katø petø pegutchun” chinrrigay— cha.

⁴ Inchen nømbe ambene, burrobe mayu kan yaskab pulu litsig pasrain købene, nømbe pichen,

⁵ mõiløgøsrøn truyu pønrrabeløbe trenchibelø køn:

—¿Burrone chinchab pichigue?— cha.

⁶ Inchen nømbe Jesús maig taigwan treeg lètøben, truiløbe ka sruambashen,

⁷ nømbe Jesúsweimay burro-unane srua amba, nømuim pala kewagúilan burron kayen, Jesúsbe itøguanabig køn.

⁸ Inchen truba yamelø nømui pala kewagúilan maywan kayen, kaneløbe chugøben nøørøsrø kullag srarcheelø lutiicha, maywan kayen,

⁹ merrab amrrubelø lata, wendau amrrubelø lata trenchib trashibelø køn: —¡Hosanna! chib;

¡Señor Tiuswei munchiyu nø ørig arrubiibe mayanguen tab kuig køn! chib.

¹⁰ ¡Namui merrabsrø mõskai David nø ashib karub waig købig arrubiibe mayanguen tab indig køn! chib.

¡Srømbalásrømbe Hosanna!— chib, trashibelø køn.

¹¹ Inchen Jesúsbe Jerusalén pua, Tiuswei yau kebyabe, truyu chiwan køben ambumay imay tab ashabe, yandø maaben køben, Betaniasrømay nui doce kusrenanøb pera uniiløba ibig køn.

*Jesús mamig niimø higuera tusrwan kaig nebunrrain chib
(Mt 21.18-19)*

¹² Katø kwaløm Betaniagurri webamba, Jesúsbe parøgwai møra,

¹³ yabgurri kan higuera tusr ishiibaig pasrai ashabe, mamig niga tusr køtashchab ibene, tru higos nigam põlmera kømuben, ka ishiitø tøgaiig wetørrabig køn.

¹⁴ Incha Jesúsbe tru higuerrane trenchibig køn:

—Managuen ñuinukkurri mamig niguigwan muguen manrrab tamibe chi kaanrrun— cha. Inchen nui kusrenanøb pera uniiløbe nø trendaigwan mõøbelø køn.

*Tiuswei yawan Jesús chish marøb
(Mt 21.12-17; Lc 19.45-48; Jn 2.13-22)*

¹⁵ Incha nømbe Jerusalénsrø pua, Jesúsbe Tiuswei yau kebyabe, truyu yanøb, penab inchib warabelan wambig webetab mendaptinchibig køn. Katø misagwan an yunømarøb purraig mishatsiimeran utsøbetab, palomamera yanøbelø purraigwan utsøbetab incha,

¹⁶ katø mungucha truyube chigøben srua puramrramamíig køn.

¹⁷ Incha trenchib kusrenanøbig køn:

—Tiuswei wamwan põrigube trenchibig kømuitarru cha:

“Nai tab yabe mayeelø chu pirausrø misaameraindøgucha

Tiuswan wamindi ya køn cha wamig kønrrun” taig.

Trune ñimbe nileelø waratin trab marin køn— cha.

¹⁸ Inchen sacerdotesteran karubeløba, tru Moisés põrigwan kusrenanøbeløba mørabe, mandø incha kweetsamdiig køtashchab lab mendabelø køn, nun køriimata, kaguende maya misaamera Jesús kusrenanigwan ke kwaara asha køben.

19 Inchen yandø yem køben, Jesúsbe nui kusrenanøb pera uniiløba ciu-dayugurri webya ibig køn.

Higuera tusr mamig niimtig yandø mul-laig

(Mt 21.20-22)

20 Incha katø løtsø truwan puraamben, tru higerabe kutøgue srølbãñau mul-lain kui ashabe,

21 Pedrobe Jesús trendaigwan isua, nune trenchibig køn:

—Au, Kusrennøbig, tru ñi kaig nebubash cha trendaig higerabe chab mul-labguen indin køn— cha.

22 Inchen Jesúsbe trenchibig køn:

—Ñimui isubigwan ke Tiusweinuutø pasra pønrray cha.

23 Nabe ñimun cierton trendamønrrun cha: Møikkøben i tunwanma øyah taimbe: “Yugurri mendamisra, maryu kebeñ” cha. Incha nui manrrøyu treeg kòmuptinchaitamab isumøtø, maig taig ke treeg marig kønrraitamab kørebene, treeg marig kønrrun cha.

24 Inchawei nabe ñimun trendamønrrun chibig køn: Ñim chiwandøgucha Tiusba waminchib miappe, chabguen trunun utabguen indermab kørewabe, ñimbe utønrrun cha.

25 Incha ñim Tiusba waminchib pønrrappe, møigwan køben namig isuig tøgaguabe, nø kaig marigwan ulø paymønrrab, pesannamig køn cha, srømbalasarø wabig ñimui Møskaingucha ñimui kaig mariilan treetøwei ulø paymø, pesannaig kønrraimbe.

26 Kaguende katøgan ñimun kaig maren, ñimma pesannamø, ulø payene, ñimui Møskai srømbalasarø wabikkucha pesannamø, ñimui kaig mariilan ulø payrrun— chibig køn.

Jesúswei karumburab karuibe mu mandamgaig

(Mt 21.23-27; Lc 20.1-8)

27 Incha katøle Jerusalénmay amrrua, Jesúsbe Tiuswei yau llirab uñene, sacerdotsmeran karubeløba, tru Moisés pørigwan kusrenanøbeløba, misagwan karubelø kølli misaameraba nun kemallabe, trencha payibelø køn:

28 —¿Ñi mariilane mu karua pasriitøgarre margu? cha. Kabe ¿øyeeg maramelane mu karua pasrta?— cha.

29 Inchen Jesúsbe trencha løtabig køn:

—Na ñimun kan chigøsrøn payrrab inchar cha. Nan løtøbene, øyeelan martraimbe nan i mu mandamgaig marig chugurriig kuig na ñimun eshkar-mønøn cha.

30 Juan misagwan piu umbu ulsrøb uniibe ¿srømbalasarøngurrin kuig kø chindah, kabe møgueløgurrin kuig kø chindah? cha. Løtørray— chibig køn.

31 Inchene nømdø trenchib payiyab mendabelø køn:

—Trube, nam: “Srømbalasarøngurrin kuig køn” chibene, nøbe namune trenchinrrun cha: “¿Chindimba nune køremøgue?” cha.

32 Kabe: “Møgueløgurrin kuig køn chinrrab ashendø, ¿maig købsruerah?”— cha. Øyan chippe, kaguende nømbe misagwan kørig isuarre inchibelø køn, kaguende mayeeløba Juanwane cierton Tius maig karuigwan eshkaig kui asha tøgagøbelø køben.

33 Treekkurri Jesúswane trenchibelø køn:

—Maig kuindøbeh— cha.

Inchen Jesúsbe trenchibig køn

–Trube, nagucha eshkamumønrnun cha, iilan na mu karuitøga marigwan.–

12

Kwallibelø larrø kailan kemesra wamindi
(Mt 21.33-46; Lc 20.9-19)

¹ Incha Jesúsbe ‘øyeeg lataitøwein køn’ chib kemesra wamindiiløtøga eshka mendanda, trenchibig køn:

–Kan møg nuim pirau uvas tra mara, trugurrimbe panig pasra, uvas piwan wesrumikkucha pirau tamara pasra, katø tru ellmarigwan ashib laramig kan ya-unø palaig mara pasran cha. Incha nui pirøwan katøganelan misrigwan pirishinraptø kwallchai tranabe, yabsrømay yan cha.

² Incha yandø lurramig puben, nui kan karuindiig megabigwan tru kwallchab utabelan tru kanbalø lurrigwan utønrrai karua øriibe,

³ nømbe nun kemøra, kurragucha, chiguchagaig ørøbelø køn cha.

⁴ Inchen tru puaike katøgan karuindiig megabigwan øren, truigwane turyu larrøgucha, nømbe tsalø wamabelø køn.

⁵ Inchen tru ellmarig puaike katøgucha katøgan karua øren, truigwane kweetsin køben, katøbe mas yam øren, kanelane kurrabetab, kanelane kweechib inchibelø køn.

⁶ Inchen srabe yandø katøgucha kandø kørømisrøbig køn, truike nui trag nusrkai, undaaraig. Incha yandø srabebe truigwan ørøbig køn, trenchib: “Nai nusrkawane chinchimønrnun” cha.

⁷ Treendingucha tru kwallibeløbe kangurrin kangurri nømasiyaitø trenchibelø køn: “Pirøwan ketig utønrraiibe iigwein køn cha. Kwetchab amun cha. Pirøbe namuin kørømisrøtrun” cha.

⁸ Incha nusrkawane kemøra, kweecha, asrwane tru uvas traugurri weguchibelø køn– cha.

⁹ Incha Jesúsbe trenchibig køn:

–¿Tru uvas tra puaike chi martterah? cha. Arrua, tru kwallibelane kweecha, tru uvas trawane katøganelan tranrrun cha.

¹⁰ ¿Ñingan Tiuswei wamwan ørigu iigwan mana lemeelø køtirru? cha: Tru ya marøbelø kaasig sruube katsiisrø pølbasra wayamig mas purø tab srukken misrin køn taigwan.

¹¹ Señor Tius øyeeg marene, namuin kabyube truba tabig asønatan cha.–

¹² Inchen Jesúswan merrarawa sruamrrab kemørtrab inchibelø køn, kaguende tru ‘øyeeg lataitøwein køn’ cha waminchippe, nømun kemesra wamindi møra. Inchendø nømbe misag truba nuwan køriimata, kagøbasha, pasramnetø ambuptinchibelø køn.

Tiuswein kønrrabigwane Tiuswan tranøppe, Césarwein kønrrabigwane Césarwan tranøb

(Mt 22.15-22; Lc 20.20-26)

¹³ Incha Jesúsweimay mø fariseosmeran køsrønba, Herodesweingateelanba ørøbelø køn, chigøben wamingingarua, nø kalø lötøbene, turyu kebenørkønrrab isua.

¹⁴ Inchen truiløbe amrrua, trenchibelø køn:

–Kusrennøbig, ñibe ciertonigwan waminchib møg kui aser cha. Katø misag maig chitanmaptø mørøb pasrømiig køn cha. Kaguende ñibe mundøgucha nømun mailø køtasha kandarøtø imøtø, Tiuswei maywan ñibe maig kusrenanamigwan cierton sølwan kusrenanøbig køn cha. Trube, ¿tru

Roma maya misagwan karub wabigwan nam an pagaramig merømuig kòh? Kabe, ¿merig kòh, chinderah? cha. ¿Tranrrautah? Kabe ¿tranmønrrautah?—chibelø kòn.

¹⁵ Inchen Jesúsbe nømune ka isatø, palatø tab inchib chib pønrrai ashabe, trenchibig kòn:

—¿Nane chindimbarre kebenøsrkønrrab inchigue? cha. Kan pagaram anwan srua amrruy cha, na ashchab.—

¹⁶ Inchen srua amrruben, Jesúsbe trenchibig kòn:

—¿I anyu maløba, i munchi pøriibabe muin kòh?— cha.

Inchen nømbe:

—Tru Césarwein kòn— chiben,

¹⁷ Jesúsbe trencha løtabig kòn:

—Césarwein købene, trube, Césarwan tranay cha. Inchen Tiuswein købene, Tiuswan tranay— cha.

Inchen nune ke kwaara ashibelø kòn.

Kwailø katøle øsiiranrab kuigwan payib

(Mt 22.23-33; Lc 20.27-40)

¹⁸ Inchen mø saduceosmera kòsrøn Jesúswan ashchab ambubelø kòn. Tru- iløbe tru kwabeløbe øsiiramønrrun chibelø kuabe, Jesúswane øyeeg payibelø kòn:

¹⁹—Kusrennøbig, Moisésbe namun treeg pøra kørømarig kòn cha: “Møigwei nuneg kòben kwawa, srawan urekkaig kørømarene, trube, tru nuneebe piudaba kasharawa, nuneg kwabigweimburab ureg tøgagømig kòn” chibig.

²⁰ Trube, siete nunelø kòbig kòn cha. Indiibe srøsrribe kasharawa, chi urekkaig kwaben,

²¹ tru wendauikkucha tru piudaba kasharawa, katø chi urekkaitøwei kwaben, katø tru pøn kønrrabyuigwangucha treetøwei nebuben,

²² yandø søteeløba tru ishuuba kasharawa, møikkucha ureg kørømarmøn cha. Inchen yandø srabebe ishukkucha kwan cha.

²³ Trube, tru kwabelø katø øsiirabene, ¿nøbe møigwei srain kønrrerah? cha payibelø kòn, tru sieteeløba nune srai mara tøgagúig købene.—

²⁴ Inchene Jesúsbe trencha løtabig kòn:

—Ñimbe mandø kuinguen mørmøwa pella pønrrappe, ¿Tiuswei wamwan pørigwanba, katø Tiuswei maramburab marigwanba tab nebua ashmeelø kuarre pella pønrrømøtirru? cha.

²⁵ Kaguende kwailø katøyug øsiirappe, kasharamøwei, kasharanmøwei inchun cha. Treeg kømøtø, srømbalasrø ángesmera latailøtøwein kønrrun cha.

²⁶ Inchen tru kwailø katø øsiiramigweimburappe ¿ñimgan Moisés pørigu lemeelø køtirru? cha, tru tusr-unø naarabigugurri Tius nun øyah taigwan: “Nabe Abrahamwei Tius, Isaacwei Tius, Jacobwei Tius kur” cha trendaigwan.

²⁷ Tiusbe kwailai Tius kømøtø, øsiguelai Tius kòn cha. Inchawei ñimbe purø nu pella pønrran— chibig kòn.

Tius karua martrai pønrrailai utuig mas nuig

(Mt 22.34-40)

²⁸ Inchen tru Moisés pørigwan kan kusrenanøbig tru ‘maig kòh’ cha, payiyab kòben mørøb pasrabiibe, Jesúsbe søl løti møra, nun kemallabe, trencha payibig kòn:

—¿Tius martrai karua pønrrailai utuig mas nuibe møig kòh?— cha.

²⁹ Inchen Jesúsbe trencha løtabig kòn:

—Tru martrai karua pasrig mas nuibe iig kòn cha: “Au, Israel misag, mōray cha. Namui Señor Tiusbe, Señor nõtø kòn cha.

³⁰ Señor ñui Tiuswane ñui manrraugurri kerrigu newan undaaraitøgaba, kerrigu ñui øsig pasraitøgaba, kerrigu ñui turtøga isumburab isuitøgaba, katø kerrigu ñui asru chishkømburab chish kuitøgaba undaaramig kòn” tan cha.

³¹ Inchen tru wendauibe iig kòn cha: “Ñima ñiasiiøwei maig undaguig køppe, ñui mendaigwangucha treetøwei undaaramig kòn” cha. Tru maig maramigwan martrai pønsrailø i pagatø lataig nørreeløbe katøgane chi kaagøn — cha, trenchibig kòn.

³² Inchen tru Moisés pørigwan kusrenanøbiibe trenchibig kòn:

—Kusrennøbig, ñibe sølwein tan cha. Tiusbe kandø kòn chib, katøgane mu kaagøn chib,

³³ Tiuswan kerrigu ñui manrrøtøgaba, kerrigu ñui isumburab isuitøgaba, kerrigu ñui asru chish kømburab chish kuitøgaba undaarab, katø mendaig-wangucha nøasiitø lataitøwei undaarab indamig kòn cha trenchippe. Iilan mariibe Tiusweyasig traniiba, katø animalmeran kweecha Tiusweyasig parriiløba lataitøguen kømøtø, mas nuig kòn— cha.

³⁴ Inchen Jesúsbe trube ke tab isua løti ashabe, nune trenchibig kòn:

—Tius nø ashib karub pasrainug pumibe ñibe ke tre yab pasrømøn— cha.

Inchen yandø katøbe Jesúswane mugucha chi payrrab inchimeelø kòn.

¿Cristobe mui Nusrkain køh?

(Mt 22.41-46; Lc 20.41-44)

³⁵ Jesús Tiuswei yau kusrenanøb pasrøwabe, trencha payibig kòn:

—¿Tru Moisés pørigwan kusrenanøbeløbe chindimba tru Cristone Davidwei misagugurri arrubig kòn tah? cha.

³⁶ Kaguende Davidtøweinguen Espiritu Santo eshkaig trendaig kòn cha:

Señor Tiusbe tru nai Señorwane trendan cha:

“Nai kusrmaygatø wamisr cha,

ñui ashig kømui inchib tsalø inchibelan

ñi itøbunønrrai ñui srøb umbu na pønsramnegatig.”

³⁷ Pøs Cristone David nõtøweinguen: “Señor” cha wamøbene, trube, ¿mandøgurri Cristobe Davidwei nusrkain kønrrab køh?— chibig kòn.

Inchen misaamera truba nu pasrabiibe truba chull mørøbelø kòn.

Moisés pørigwan kusrenanøbelan nøm mailø kuigwan Jesús waminchib

(Mt 23.1-36; Lc 11.37-54; 20.45-47)

³⁸ Jesús kusrenanøb pasrøwabe trenchibig kòn:

—Tru Moisés pørigwan kusrenanøbelane ashiptø kuy cha. Truiløbe kørrelø kewa llirab amønamig chullelø kòn cha, katø penab, yanøb indiisrø nømune maig købash kømø, truba tab wamønrrai inchib,

³⁹ katø judíosmera tulundzuni yamerayube purø tab purramdønug purrag kui indamba, katø lincha tabig mabyugucha nørreelø purrainug purø tabigu purrag kui indamba inchibelø kòn cha.

⁴⁰ Incha katø piudasmeran nømui yameran kerrawabe, tabelø misrøb ke ka yandø truba yana Tiuswan waminchibelø kòn cha. Truiløbe møra melamig mas nuigwan utønrrun— chibig kòn.

Waacha piudai an kegutsig

(Lc 21.1-4)

⁴¹ Mana kōsrōn Jesús Tiuswei yau Tiusweyasig an kebusrinug tru pinrrōgue wabene, truba nu misaabe truyu an kebusrōb kōben, truba yamelō puarmerabe truba nōrrōweyig an kebusri ashibig kōn.

⁴² Inchen truyu kan waacha piuda arruabe, truyu pagatō øskō andø purō lamōzhig kebusren,

⁴³ Jesúsbe nui kusrenanōb pera uniilan wamabe, trenchibig kōn:

—Nabe ñimun cierton trendamōnrrun cha: I waacha piudabe caju yu pusrōbelō kanelō lataguen kōmō, mas nu kebusran cha.

⁴⁴ Kaguen mayeelōba nōmbe undaigwandō tranen, trune nōbe waacha kōptō, nui kerrigu tōgagúigwan tranan cha, tru nui øsig tsumig kerrigu tōgagúigwan.—

13

Tiuswei yawan pinisaig kōnrrun cha, Jesús eshka

(Mt 24.1-2; Lc 21.5-6)

¹ Jesús Tiuswei yaugurri webibene, mōikkōsrōn nui kusrenanōb pera unilai utuibe, trenchibig kōn:

—¡Kusrennōbig, ñiguen ash cha, kan yeeg nōrrō sruumera, yeeg nōrrō yamera kuita!— cha.

² Inchen Jesúsbe trencha lōtabig kōn:

—¿Yeeg nōrrō yamera mariilan ñigan ashkuh? cha. Yube ni kan srukken katōgan srug palabē kōrrōmismōnrrun cha. Kerriguba pōtiitsig kōnrrun —chibig kōn.

Señor arrum lutau chigōben kōnrrabig

(Mt 24.3-28; Lc 21.7-24; 17.22-24)

³ Incha Jesús Olivos Tunsrō Tiuswei ya pasrab pinrrōguesrō wabene, Pedroba, Jacoboba, Juanba, Andrésbabe nundō nōrō trencha payibelō kōn:

⁴—Øyeebe mana purainrrab kui namun eshkarra cha. ¿Tru kerrigu treg nebunrrabigwan asamibe chitō kenamisrttrah?— cha.

⁵ Inchen Jesúsbe trenchibig kōn:

—Ashiptō kuy cha, mugōben ñimun pelōsrkōnrrain kōmō.

⁶ Kaguende mōilōgōben nai munchiyu truba nu amrrua trenchinrrun cha: “Nabe truig kur” chib. Trumay misaameran isa wamincha truba nu pelōsrkōnrrun chibig kōn.

⁷ Incha, ‘misaamera katōgan peesrō misaameraba purō trōmbōig kōrig kōmdiiig kwayab kweetsiyab kōn’ chib, katō, ‘purō trōmbōig kōrig kōmdiiig kwayanrrab kōn’ chib ñim wamindi mōrabe, mandōguen kōmui inchib kwarmōtay cha. Kaguende øyeebe trendō treg purainrrabigwein kōn cha. Inchendō katōgucha patsamibe pumō srō kōnrrun chibig kōn.

⁸ Peg misaamerabe katōgan peg misaameraba kwayaben, katō rey karumburab ashib karuim piraelōbe katōgan reywei misaameraba kwayanrrun cha. Trune chusrōn kōben pirō trōmbōig kōnōben, parō arruben, iilōbe kan ishuan unō tammisrtrab pusrkwab pōlbasri laitaitō kōnrrun cha.

⁹ Inchawei ñimasiyaitō tab ashiptō kuy cha. Kaguende ñimune karubelai tasku tranen, katō judiōsmēra tulundzuni yamerayu ichabetab inchun cha. Katō ñimune karubelō nōrreelai merrab, reymerai merrab nagurrindō pōnrramig kōnrrai martrun cha, trumay ñimbe naimburabigwan wamin-damig kōnrrain cha.

¹⁰ Srabe kwalōm pumōwatō Tiuswei tabig srō wamwan yu pirau maya misaameran eshka kusrenanamig nebunrrun cha.

11 Inchen ñimun merrarrawa, tru misagwan ashib karub purrabelaimay tranrrab srua ambene, chi tamerab merrabwei isumønrrigay cha. Tru uras wamincheenchen Tius maig waminchai tranen, treeg waminchigay cha. Kaguende ñim kòmōtø, Espiritu Santo waminchun, chibig køn.

12 Inchen nuneebe nømui nunewandøwei kwetchai tranen, mōskaimbe nusrkawan tranen, ureemerabe mōskalan namig kurra, kwetchai tranrrun cha.

13 Maya misaabe ñimune nagurrindø tsalø indiilø kønrrabguen cha. Inchendø srahe kwalømgatig chigúingucha megabig megabiibe kebeñchabig kòmíig kaigyurri wesraig kønrrun, chibig køn.

14 'Tru pinishinrrabig trømbøig kōsøngønrraptiig truig nø pasramnug kōmubendø, ñim truyu pasrai ashabe (lebiibe iigwan tab chigúi mør), trube, Judea pirau warabeløbe tun palasromay wegørra lulay cha.

15 Inchen tru kwaløm nui ya pala wambig wabiibe chigøben wesrunrrab kōrraarua, umbu kelulmumig køn cha.

16 Katø chugøben trausrø uñibiibe nui itøtsinigwan tranrrab arrumumig køn.

17 ¡Ishumbur waachamera, tru kwalømmerawan patsø kwanrreelø, kabe muchib ureg tøgarmaraimbe maig kōnrrer! chibig køn.

18 Inchawei ñimbe Tiusba waminchib miay cha, trømbøig pishin kwalømmerawan lulamig nebumønrrai.

19 Kaguende tru kwalømmerawane purø trømbøig nebuinab melamig at-trun cha. Tius chigurribunø kōbigwan marøb uraskurri mōingatig øyeebe kaagúig, katøbe managen øyeebe kaanrrun cha.

20 Señor tru kwalømmerawan landøranmuisruandøbe, mugucha øsig waramgaig kønrrun cha. Inchendø nuyasiitø kōnrrai tarømariilø, tru nø lawa wesruiløgurri landøranin køn cha.

21 'Inchawei tru kwalømmerawan mōikkøben ñimun: "Asay, yu Cristo pasran" chib, kabe: "Asay, uyu pasran" taingucha, kōremøtay cha.

22 Kaguende mōiløgøben 'Cristo ker' chib, isatø inchibeløba, katø 'Tius maig karuigwan eshkabelø ker' chib isatø inchibeløba amrrunrrun cha. Incha nømui maramburab marøb mariilø, nørreelø asha kōmig kenamariiløba, nørreelø kwaara asha kōnrrai mariiløba martrun cha, misagwan treeg incha peløsrkønrrab. Incha Tius nuyasiitø tarømariilanguen kegørrøsrkamdiig kuimbe, kegørrøskønrrab inchun, chibig køn.

23 Inchawei ñimbe tab isua ashiptø kuy cha. Nabe ñimune iigwan kerriguba puraimøwatø chab eshkar cha.

Møg Misra Arrubig mandø arrumigwan waminchib

(Mt 24.29-35, 42, 44; Lc 21.25-36)

24 'Inchen tru kwalømmerawan, tru treeg isumdø kwalømmera chab pu-raibene,

nøsiibe yandø kwaben, pølbe yandø pilømuben,

25 estrellamerabe srømbalasarøngurri kōrrab amrruben,

katø srømbalasarø purø nørreelø pønrrabelan

kønøgøb sruagutsiilø kōnrrun chibig køn.

26 Inchen tru Møg Misra Arrubiibe purø nuig maramburab maramig tøgaiig tøguegwalmabig wañiyu Arruben, misaamerabe ashchun chibig køn.

27 Incha nøbe nui ángelesmeran øra, ambugurri, igurri, walligurri, wagurri pirau maya yabsrøngurri kandarø srømbalasarøngatig nui lawa wesruilan kan-balatø tulishinrrun cha.

²⁸ 'Kan higuera tusrwanma asha kusrey. Nui srarmera uturcheelø misrøb, ishiimera weguchene, ñimbe pachig kwalømmerra arrumig yandø lutau kui ashibelø køn cha.

²⁹ Øyeetøwei ñim iilan purayai ashabe, attrabiibe attrab yaskabuguen pasraitamab isua kuy, chibig køn.

³⁰ Pøs nabe ñimun cierton trendamønrrun cha: Møin kwaløm misaamera pinømwatø, øyeeløbe kerrigu purainrrun cha.

³¹ Srømbalaba, pirøbabe patsøben, na wamindiibe ka wamindiitøbe purainrraamøn cha.

³² 'Inchendø tru treeg punrrab kwalømwanba, uranbabe mugucha ashmøn cha. Srømbalarø ángelesmeraguen ashmøwei, ni Tiuswei Nusrkai ashmøwei indan cha. Trunun ashippe, Møskaindøwei asan, chibig køn.

³³ 'Inchawei ñimbe pesannamø, tab ashiptø kuy cha, kaguende ñimbe øyeebe mana purainrrabig kui ashmøwabe.

³⁴ Kaguende iibe kan møg nui yaugurri yabsrømay webya inrraptø, nui karuindiig melabelane nui yawan ashib kønrrai kørømara, kanun kanun nømui maramigwan marøb kønrrai karua pønsra, tru yaskabu ashib pasrabigwane chigøben kømønrrai ashib pasrønrrai karua pasra ibig lataitøwein køn cha.

³⁵ Inchawei ñimbe ashiptø kuy, chibig køn. Ya puaig pilliraben kui, kabe yem tøbøtag kui, kabe kallu wamøben kui, kabe løtsø kui, mana attrab kui mørmøwabe.

³⁶ Inchippa møi møi arrua, kib warøben wetørrainanrrab kømø cha.

³⁷ Inchawei na ñimun maig taibe, mayeelan katø treetøwein tamønrrun: ¡Munig, kasriitø kuy!— cha.

14

Jesúswan mandø incha kemøramigwan waminchib (Mt 26.1-5; Lc 22.1-2; Jn 11.45-53)

¹ Pascua fiestan maramiba, tru Pirri Levaduragaig maig Fiestan maramiba yandø pa kwalømdø paløben, sacerdotesmeran karubeløba, tru Moisés pørigwan kusrenanøbeløbabe Jesúswan kwetchab chigøben isa mandø incha kemøramdiig køtashchab inchib kuabe,

² trenchibelø køn:

—Fiesta utu marmønrrab cha, misaamera ke chindi asamgaig inchimønrrain— cha.

Kan ishug Jesúswan may irrabzhütøga itø lushib (Mt 26.6-13; Jn 12.1-8)

³ Betaniasrø tru Simón Leproso taigwei yau Jesús wabene, kan ishug alabastro limetayu nardotøzhig chi undisaimig, netsiig, truba may irrabig, purø nuweyigwan srua, kemalla, Jesús mishatsigu wamnetø, limetan p-shippa, tru may irrabigwan tur pala itølushibig køn. ⁴ Inchen møiløgøsrøn truyu purrabeløbe nama, nømdø trenchibelø køn:

—¿Purø may irrabzhigwan ke ka yandøbe chinchabrre lusah? cha.

⁵ Waachameran purugumig kan trescientos denarios menrraweinguen yanøbsruinrrun— cha.

Nøbe tru ishuwane truba namig waminchib købelø køn.

⁶ Inchen Jesúsbe trenchibig køn:

—¡Kagøbasay! cha. ¿Chinchabrre inchigue? cha. Nøbe nayasig truba tabzhig maran cha.

⁷ Waachamerane chu uragucha ñimui utu tɔgagua, ñim nɔmun tabig maramdiig kɔbene, tabig martrun cha. Trune nane yube chu uragucha tɔgagɔnraamɔn cha.

⁸ I ishube nun maig maramdiig nebuben treeg maran cha. Nai asrwan manawei kanmaytɔ may irrabzhigwan srɔlan cha, nan sɔramigweyasig.

⁹ Nabe ñimune cierton trendamɔnrrun chibig kɔn: Yu pirau chutɔgucha Tiuswei tabig srɔ wam kaigyugurri wesrabigwan eshkab kusrenaniisrɔmbe, tru nɔ marigwangucha tɔga waminchun cha, nun pesannamɔ, isuig kɔnrrai.

Judas Jesúswan ashig kɔmui inchibelan tranɔb

(Mt 26.14-16; Lc 22.3-6)

¹⁰ Inchen Judas Iscariote, tru doce Jesús kusrenanɔb pera uniilai utuig, sacerdotesmeran karubelan Jesúswan nɔmui tasku tranrrab waminchab ibene,

¹¹ nɔmbe trunun mɔrɔppe, truba kasraarawa, an tranrrab misrɔbelɔ kɔn. Inchen Judasbe Jesúswan mandɔ incha tranamigwan yandɔ lab mendabig kɔn.

Señorwei Pascua mamig

(Mt 26.17-29; Lc 22.7-23; Jn 13.21-30; 1 Co 11.23-26)

¹² Tru Pirri Levaduragaig maig Fiesta pɔlbasrɔb kwalɔm, tru Pascuayasig ubisha-unan kweechib kwalɔm, Jesúswei kusrenanɔb pera uniilɔbe nun trencha payibelɔ kɔn:

—¿Pascua mamigwan ñuimbe chu tamartrab ambamɔ?— cha.

¹³ Inchen nɔbe nui kusrenanɔb pera uniilan pailan trencha karua ɔrɔbig kɔn:

—Ciudayumay ambay cha. Truyube kan mɔg pigɔtsɔ mutaig ñimun katɔben, truigwei wendautɔ amrrigay cha.

¹⁴ Incha truig kebyainug kebambabe, ya puaiwane ñimbe trenchinrrigay cha: “Kusrennɔbiibe ñun trendan cha: ‘¿Nai kusrenanɔb pera uniilɔba pascua mamigwan mab purram salabe chu kɔh?’ ” cha.

¹⁵ Inchene ya puaipe pala pisusrɔ kan nu sala chiguen palɔmíig yandɔ ke chab tamarikken ñimun eshkanrrun cha. Inchen ñimbe namuyasig truyu tamartrigay— chibig kɔn Jesúsbe.

¹⁶ Inchen nɔmbe amba, ciudayu puabe, Jesús nɔmun maig taig treeg wetɔrrawa, tru Pascuan tamarɔbelɔ kɔn.

¹⁷ Inchen yandɔ yem kɔben Jesúsbe nui doce kusrenanɔb pera uniilɔba pua,

¹⁸ mishatsigu mab purrɔwabe, Jesúsbe trenchibig kɔn:

—Nabe ñimun cierton trendamɔnrrun cha: Ñim mɔikkɔsrɔn naba mab wabig nan ashig kɔmui inchibelaingatɔ misra, nan tranrrab kɔn— cha.

¹⁹ Inchen nɔmbe truba isui inchib menda, Jesúswan kan kan payibelɔ kɔn:

—¿Kabe na kɔbra, chinderah?— chib.

²⁰ Inchen Jesúsbe trencha lɔtabig kɔn:

—Ñim doceelai utuig kɔn cha, naba i nindagutɔwei pirriwan kebishibig.

²¹ Pɔs, tru Mɔg Misra Arrubiibe Tiuswei wamwan pɔrigu maig pɔrig pasrɔben, truwan pureb iben, trune ¡tru mɔg waacha! tru Mɔg Misra Arrubigwan ashig kɔmui inchibelan tranrrabigweimburappe, yeekkucha kuita, chibig kɔn. Trembe truike kal-lamuig kuinguen sɔl kɔbsruinrrun— cha.

²² Incha mab purrapatɔ, Jesúsbe pirriwan muta, Tiuswan ‘mayanguen pay’ cha, pirishabe, nɔmun trenchib srɔrrɔbig kɔn:

—Cha, may cha. Iibe nai asr kɔn— cha.

23 Incha katø copan muta, Tiuswan ‘mayanguen pay’ chabe, nømun purøørbig køn. Inchen tru copayuigwan søteeløba muchibelø køn. Inchen nøbe nømun trenchibig køn:

24 —Iig, nai animbe, Tius tru misagweyasig srø acuerdon mari anin køn cha. Tru animbe truba nu misagweyasig lusig køn cha

25 Nabe ñimun cierton trendamønrrun cha: Uvas piwane mas muchimømønrrun cha, nai Møskai nø ashib karub waisrø katøyug ñimba mutsam kwalømgatig.—

*Pedro nan ‘ashmíig kur’ chinrrautan cha, Jesús trenchib
(Mt 26.30-35; Lc 22.31-34; Jn 13.36-38)*

26 Incha kan himnon chab cantawabe, Olivos Tunsrømay amba,

27 Jesúsbe trenchibig køn:

—Ñimbe mayeeløba nainug isua pønrraigwan trubishinrrun cha. Kaguende Tiuswei wamwan pørigu øyah chibig pørig pasran cha:

“Ubisha ashibigwan na kweechen,
ubishamerabe nøørtø chab lulrrun” chibig.

28 Inchendø nabe katøyug øsiirappe, ñimguen ammøwatø, nabe Galileasrømay yamønrrun— cha.

29 Inchen Pedrobe trenchibig køn:

—Mayeeløba ñuinug isua pønrraigwan trubisaingucha, na kuimbe tarømisrmømønrrun— cha.

Inchen Jesúsbe trencha løtabig køn:

30 —Nabe ñun cierton trendamønrrun cha: Møi yemdøweinguen kallu pamay wamømøwatø, ñibe pønmayguen nan ‘ashmíig kur’ chinrrautan— cha.

31 Inchen Pedrobe truba inchib trenchibig køn:

—Ñiba nan kwamig nebinguen, nabe managuen ñun ‘ashmíig kur’ chimømønrrun— cha.

Inchen søteeløba treetøwein chibelø køn.

*Jesús nui Møskaimba Getsemanísrø waminchib
(Mt 26.36-46; Lc 22.39-46)*

32 Incha nømbe kanbalø Getsemaní taisrø puabe, Jesúsbe nui kusrenanø pera uniilan trenchibig køn:

—Yu purramisray cha, nai Møskaimba na wamindamne.—

33 Incha Pedronba, Jacobonba, Juanwanba pera yabe, truba truba isui, ni mumayguen tab kømui inchib menda,

34 trenchibig køn:

—Nai manrraube isubiitø kwabguen ka kwamdiig køtan cha. Ñimbe yutø kørømisra, kimø purray— chibig køn.

35 Incha Jesúsbe katøguchi ambuurø ya, pirau sraløptincha, Møskaimba waminchib miabig køn:

—Tru purø trømbøig attrabig nan treeg punrrain kømubene, treeg pumugasam— chib.

36 Katø Tiuswan trenchib miabig køn:

—Abba, nai Møskain chib, ñuimbe chitøgucha kaimamø, maramdiitø køn cha. I copan nan tarømartra cha. Inchendø na maig isuiig køben, treeg kønrrain kømøtø, ñun maig maramdiig køben, treeg kønrrain— chib.

37 Incha nui kusrenanø pera uniilamay arrua, kib purrai wetørrawabe, Pedrone trenchibig køn:

—Simón, ¿kib watirru? cha. ¿Kan uratøguen kimø, kasriibe wanrrab kaimatirru? cha.

³⁸ Kimø, Tiusba waminchib purray, chibig køn, chiyugøben kaigyu kegørrømønrrappe. Ñimbe tabigwan martrabwei isuingucha, ñimui asrbe kolluiguig køn— cha.

³⁹ Incha katøle Jesúsbe ya, treetøwein chib Møskaimba waminchibig køn.

⁴⁰ Incha katø arruabe, katøguen nui kusrenanøb pera uniilane kiptøwei purrain kui wetørrabig køn, kaguende nømui kabmerabe kigøbiitø ke kanaim purrøwa. Incha nømbe mancha lètønrrab kaimabelø køn.

⁴¹ Inchen Jesúsbe pønmay kønrrabyu arruabe, trenchibig køn:

—¿Katøguen ñimngan israb, kib srø warøtirru? cha. Yandø tsabø køn cha. Ura pun cha. Yandø tranan, chibig køn, tru Møg Misra Arrubigwan kaig marøbelai tasku.

⁴² ¡Kurray, chibig køn. Amrrab! cha. Nan ashig kømui inchibelaingatø pasramisrøbig nan tranrrab arrubguen indan cha. ¡Asay!— chibig køn.

*Jesúsuan merrarrawa srua ambub
(Mt 26.47-56; Lc 22.47-53; Jn 18.2-11)*

⁴³ Incha Jesús waminchib pasramne, tru Judas, tru doce kusrenanøb pera uniilai utuibe truba nu misaaba arrubig køn, nømbe espadamera køben, tsiimera køben sruargue. Truiløbe sacerdotesmeran karubeløba, tru Moisés pørigwan kusrenanøbeløba, misagwan karubelø kølli misaameraba misra, karua øriilø købig køn.

⁴⁴ Tru Judas Jesúsuan ashig kømui inchibelaingatø pasramisrøbiibe nømune: “Merraramig kuitamab ñim ashchai, na chi siñal køsrøn maren, ashib pønrrønrrigay” cha, eshkain købig køn. “Tru na muchaig, truig kønrrun cha. Truigwan kemøra, suldaumeraba sruamrrigay” cha.

⁴⁵ Inchen Judas puabe, møi møi Jesúsweim pulu kemallib trenchibig køn:

—¡Nai Kusrennøbig!— cha.

Inchabe muchabig køn.

⁴⁶ Inchene nømbe Jesúsuan kemøra, sruamrrab merrarrabelø køn.

⁴⁷ Inchen møikkøsrøn truyu pasrabiibe nui espadan wesrub, maya sacerdotesmeran nø karub sacerdotei karuindiig megabigwan kaluwan kelarrab lutiichtinchibig køn.

⁴⁸ Inchen Jesúsbe misaameran trenchibig køn:

—¿Chindimbarre ñimbe espadamera køben, tsiimera køben sruar werrugue cha, nan kemørrab, nabe kan niliig kui lata?

⁴⁹ Nabe ñimba kwalømmørig Tiuswei yau kusrennøb waben, ñimbe managuen nane kemørmuig køn cha. Inchendø Tiuswei wamwan pørigu maig taig treeg nebunrrain kuig køn— chibig køn.

⁵⁰ Inchene nui kusrenanøb pera uniiløbe nundø pasramnetø, mayeeløba chab luløptinchibelø køn.

⁵¹ Inchen kan matsinube køsaatiig llensutø tsinaig tru wendautø iben, nune kemøøptinchen,

⁵² nøbe llensun wesølnnøb, køsaatiig ¡katø! pinaptinchibig køn.

*Jesús tru Setenteelø maig maramigwan asha marøbelai merrab
(Mt 26.57-68; Jn 18.12-14, 19-24)*

⁵³ Incha Jesúsuan tru maya sacerdotesmeran nø karub sacerdoteimay srua ambubelø køn. Inchen mayeelø sacerdotesmeran karubeløba, misagwan

karubelø kølli misaameraba, tru Moisés pørigwan kusrenanøbeløba kerriguh tulundzunabelø køn.

⁵⁴ Inchen Pedrobe Jesúswei wendau yaptø, yaptø tru maya sacerdotemeran nø karub sacerdotei ya wambiisrøngatig ya, tru ashchai pønraig pønrrabeløba pachiirab naabulu wamisra wabig køn.

⁵⁵ Inchen sacerdotemeran karubeløba, tru Setenteelø maig maramigwan asha marøbelø mayeeløba misra Jesúswan kwanrrai pasrtrab, møilan køben 'Jesúsbe kaig maren, nambe ashibwei indig køn' chib, waminchabelø labendø, treeg waminchabelø wetørranrab kaimabelø køn.

⁵⁶ Inchen møiløgøben nuimburab chigøben isa waminchendø, nøm wamindiibe ka peetø, peetø webibig køn.

⁵⁷ Inchen møiløgøben kurra, isatø Jesúswan trenchibelø køn:

⁵⁸ —Nambe nø trendai mørig køn cha: “Nabe i Tiuswei yawan møguelø marigwan pinisha, pøn kwalømyube Tiuswei ya katøgan, møguelø marig kømøtø, mara pasramønrrun” tan— chib.

⁵⁹ Inchen treendingucha, katøgucha nømui wamindiibe peetø, peetø webiben,

⁶⁰ tru maya sacerdotemeran nø karub sacerdotebe mayelai utu kurra pasramisra, Jesúswane payibig køn:

—¿Chigucha lötømønrrapteh? cha. ¿Ñune øyeebe chi kalø maran charre inchib køh?— cha.

⁶¹ Inchen Jesúsbe niløtø pasrøwa, chigucha lötømuben, tru maya sacerdotemeran nø karub sacerdotebe katøyug trencha payibig køn:

—¿Ñigan tru Cristo këtirru cha, tru Tius mayanguen Tab Indigwei Nusrkai?—

⁶² Inchen Jesúsbe trenchibig køn:

—Nabe truigwein kur cha. Inchagucha tru Møg Misra Arrubig tru maramburab marøb Tiuswei kusrmay waben ñim ashib, katø srømbalasarøngurri wañiyu arruben ashib inchun— cha.

⁶³ Inchen tru maya sacerdotemeran nø karub sacerdotebe nø kewagúigwandøwei kølsrøb, trenchibig køn:

—¿Namun nuimburab waminchabelø mas chiwein kui palønrrab kø? cha.

⁶⁴ Ñimdøweinguen Tiuswan purø trømbøig wamab wamindigwan møran cha. ¿Ñimune maig asønata?— chibig køn.

Inchen nømbe mayeeløba treeg kaig kuin kui mara, kwanrrai kørrømara pasrøbelø køn.

⁶⁵ Inchen møiløgøben nun illimbi tuchib, maløwan kasra, nun kurraguchib mendabe trenchibelø køn:

—¿Namun kelarrab eshkau pøs, chib, mu kurragutsin kui!—

Inchen tru Tiuswei yau ashchay pønraig pønrrabeløbe Jesúswan merrarawa, pashaguchibelø køn.

Pedro Jesúswan 'ashmíg kur' chib

(Mt 26.69-75; Lc 22.56-62; Jn 18.15-18, 25-29)

⁶⁶ Inchen Pedrobe pinaamayi yawambig waben, trunetø tru maya sacerdotemeran nø karub sacerdotei mendig megabig kan srusrø puabe,

⁶⁷ Pedro nag pulu pachiirab waben, nun tab ashabe, trenchibig køn:

—Ñigucha tru nazaretsriig Jesúsba uñibig kuig kømøh— cha.

⁶⁸ Inchen Pedrobe trenchib isabig køn:

—Ashmíg kur cha. Ni chi wamindinguen mørmur— cha.

Incha wambig kerruisrø webibene, kan kallu wamabig køn.

⁶⁹ Inchen tru srusrøbe katøle Pedron ashabe, truyu purrabelan katø eshkab mendappe:

—Iibe trulai utuigwein køn— chiben,

⁷⁰ Pedrobe katøguen ‘ashmíg kur’ chib isabig køn. Inchen truyu purrabeløbe yanayutø katøguen Pedrone trenchibelø køn:

—Isa kømø, ñigucha trulai utuigwein køn cha; kaguende ñibe galileasriig køn— cha.

⁷¹ Inchen Pedrobe:

—Na isab pasraig købene, trube, nan chigøben nebunrrappe nebubash chib. Tiusken ashen, katø nabe isa waminchibgucha pasrømur, chibig køn. Ñim waminchib kui møwane ni ashibguen ashmíg kur— cha.

⁷² Inchen trenchiben latatø kallube katøganguen wamaptinchibig køn. Inchene Pedrobe Jesús øyah taig kømørramab isuptinchibig køn: “Kallu pamayguen wamømwatø, ñibe nan pønmayguen ‘ashmíg kur’ chinrrautan” taigwan. Incha trunun isuabe, truba truba isuig kishibig køn.

15

Jesús Pilatoi merrab

(Mt 27.1-2, 11-14; Lc 23.1-5; Jn 18.28-38)

¹ Inchen yandø chab tør-rrabendø sacerdotesmeran karubeløba, misagwan karubelø kølli misaameraba, katø tru Moisés pørigwan kusrenanøbeløba, tru Setenteelø maig maramigwan asha marøbelø kerrigueløba tulundzunabelø køn. Incha nømbe Jesúswane lusra, srua arba, Pilaton tranøbelø køn.

² Inchen Pilatobe Jesúswan trenchibig køn:

—¿Ñigan judíosmerai rey køtirru?— cha.

Inchen Jesúsbe trencha løtabig køn:

—Ñitøweinguen chab trendan— cha.

³ Inchen sacerdotesmeran karubeløbe nune chine, chine ‘øyeeg marøbig kuig køn’ chiben,

⁴ Pilatobe katøyug trenchibig køn:

—¿Chigucha løtømønrrapteh? cha. Ñiguen ash cha, ñune chigøben yeeg waminchib køn cha, nømbe.—

⁵ Inchen Jesúsbe treeg indingucha løtømuben, Pilatobe ‘kan øyeebe maig kermab’ isub kørrømisrøbig køn.

Jesúswan kwanrrai pasrøb

(Mt 27.15-31; Lc 23.13-25; Jn 18.38-19.16)

⁶ Fiesta kwalømmerrawane kubernadurbe kailan keeri yau pønrrabelan misag møigwan eltchai miaben, trendø treeg marøb elachibig køn.

⁷ Inchen tru keeri yaube kan møg Barrabás taibe keerig pasrabig køn, nømbe larrø kailøba sötømisra, ashib karubelan namig kurrabyu misag kweechaig.

⁸ Inchen misaamerabe amrrua:

—Ñi trendø treeg marøbiibe, treeg mar— chib, Pilatone miab mendøben,

⁹ Pilatobe trencha løtabig køn:

—¿Ñimbe judíosmerai reywan na elatsamig palain køgue?— cha.

¹⁰ Kaguende Pilatobe tru sacerdotemeran karubeløbe Jesúswane uni ashig kømuptø nun tranin kui ashibig køn.

¹¹ Inchen sacerdotesmeran karubeløbe Jesúswan kømøtø, nømbe Barrabáswane eltchai inchibelø køn.

12 Inchen Pilatobe katøyug payippe, trenchibig kòn:

—Trube, ¿ñim tru judíosmerai rey kòn taigwane nabe mandø indamø?— cha.

13 Inchen nømbe katø trenchib trashib løtabelø kòn:

—¡Kurusyu mesrø!— chib.

14 Inchen Pilatobe trenchibig kòn:

—¿Nøbe chi kalø marindørre øyeeg martrainchigue?— cha.

Inchen nømbe masken mur trashibelø kòn:

—¡Kurusyu mesrø! ¡Kurusyu mesrø!— chib.

15 Inchen Pilatobe tru nu misagwan ka tab kønrrai inchig køptø Barrabáswan ka inrrai elacha, Jesúswane ichagutsingarua, kurusyu mesrønrrai tranøbig kòn.

Suldaumera Jesúsuan indzatø ashib

16 Inchen suldaumerabe palacioyu mas umbusrø srua amba, maya suldau søtøwan tulundzuningarua,

17 kan yalø piguiig itøguenana, kaldiigwan corona mara, petsørøbelø kòn.

18 Incha trugurrimbe trenchib trashib mendabelø kòn:

—¡Judíosmerai Rey, viva!— chib.

19 Incha cañatøga turbøtø itsamba, illimbi tutamba, tab inchib chib, nui merrab tømbošrsamba inchibelø kòn.

20 Incha øyeeg marøb ka indzatø ashib srua køptø, tru yalø piguiig itøguenanigwan wesrawa, nuiwan katøle kenana, kurusyu mesrønrrab nune wesrubelø kòn.

Jesúsuan kurusyu mesraig

(Mt 27.32-44; Lc 23.26-43; Jn 19.17-27)

21 Kan møg cirenesriig Simón taig, Alejandroimba, Rufoimba møskai wambig nøørøšrøngurri purainrrab arruben, nune Jesúswei kuruswan ke mutamne incha mutøšrøbelø kòn.

22 Incha kanbalø Gólgota taisrømay nune srua ambubelø kòn, (tru trenchippe, “Calaverasrø” tainug).

23 Jesúswane vinoba, mirraba lindisaig yuulingucha, Jesúsbe muchimíig kòn.

24 Inchen kurusyu mesra, suldaumerabe Jesúswei kewagúilan mu merraramig nebutashchab suerte kuchibelø kòn.

25 Inchen løtsø las nuevetø købig kòn, tru Jesúsuan kurusyu mesrøben.

26 Incha kan pørig mesrøbelø kòn, chigurrin kwanrrai mesraig kòn cha eshkabig:

JUDIOSMERAI TRU REY KØN

chibig.

27 Incha katø pagatø nileelangucha kanun kusrmay, kanun atsimay nunba kurusyu melsrøbelø kòn.

28 Inchen tru Tiuswei wamwan øyah chib pøriibe nebuig kòn: “Tru kailai utu nune tøga pasrig kønrrun” taig.

29 Inchen truan puraambubeløbe tsalø wamab, turwandø kønøgøb trenchibelø kòn:

—¡Au, ñi Tiuswei yawan pøtiicha, katø tru pøn kwalømyutø kusranrrabiibe,

30 kwamønrrab ñitøwei chigøben mar! cha. ¡Kurusyugurri pinaamø!— cha.

31 Inchen tru sacerdotemeseran karubeløba, tru Moisés pørigwan kusrenanøbeløba treetøweih nun indzatø ashib kangurrin kangurri trenchibelø kòn:

—Kanelane kaigyugurri wesrabendø, nøasiitøweimbe kaiman cha.

³² Tru Cristo, Israel misagwei reybe, mõi kurusyugurri pinaarrubash cha, nam asha, nø kuitamab kørenrrab— cha.

Inchen nøba kurusyu melsraig melabeløgucha Jesúswan tsalø wamabelø køn.

Jesús kwaig

(Mt 27.45-56; Lc 23.44-49; Jn 19.28-30)

³³ Yandø kwaløm tøbøtag misrene, maaben las treskatig pirau ørøba løstiig kørrømisren,

³⁴ tre uras Jesúsbe truba mur trashibig køn:

—¡Eloi, Eloi! ¿Lama sabactani?— cha. (Trenchippe: “¡Nai Tius, nai Tius! ¿Chindimba nandø elachigu?” chib.)

³⁵ Inchen møiløgøsrøn truyu pønrrabelø mørabe, trenchibelø køn:

—Møray cha. Elíaswan wamøtan— cha.

³⁶ Inchen møikkøsrøn lulabe, ñab esponjan køchiibiyu kebisha, kan caña tsigu pucha, mutchai pulusrø yuuløb trenchibig køn:

—Kagøbasay cha. Inchippa kwamønrrai pinøsrannrab Elías attashchab— cha.

³⁷ Inchene Jesúsbe mur trashippe, yandø isrømuptinchibig køn.

³⁸ Inchen Tiuswei yau tru purø tab llensuzhig kelarrab sötø mesraibe palasrøngurri kørrab kølsra, yandø paig misrøbig køn.

³⁹ Inchen tru Roma suldau cienelan nø karubiibe Jesúsweim pinrrøgue pasrøwa, øyeeg trasaigwan mørøb, mandø kwaigwan ashib inchabe, trenchibig køn:

—Isa kømø, i møøbe Tiuswei Nusrkaiwein kuin køn— cha.

⁴⁰ Inchen ishumburmera møiløgøsrøn yabsrøngurrindø ashib pønrrabelø køn. Tru utube María Magdalena køben, tru Wendiig Santiagoimba, Joséweimba usri María køben, katø Salomé købengue.

⁴¹ Inchen tru ishumburmerabe Jesús Galileasrø uñen, nui mendig amøñib, purugub inchibelø købig køn. Inchen truyube truiløtø kømøtø, katøgan ishumburmera Jerusalénmay Jesúsba nebamba yam pasrabig køn.

Jesúswan sørig

(Mt 27.57-61; Lc 23.50-56; Jn 19.38-42)

⁴² Inchen yandø yem misrøb køben, tru isram kwalømweyasig tamarøb kuin kwaløm købig køn, kaguende katø kwalømbe isram kwaløm kønrrab køben.

⁴³ Inchen José arimateasriig, tru Setenteelø maig maramigwan asha marøbelai utuig truba nuig tabig kui asig møg, nøgucha Tius nø ashib karub wainuguigwan muniirabig arrua, Pilato wainug kørmø kebinrrab isua, nøbe kebya, Jesúswei asrwan miabig køn.

⁴⁴ Inchen Pilatobe, trube, kwabguen inditamab isua, nøbe truba kwaara, kan suldau cienelan nø karubigwan wama, kwabguen inditarru cha, payibig køn.

⁴⁵ Inchen truike nun eshkaben, Pilatobe Jesúswei asrwan Joséwan pinøsrungarubig køn.

⁴⁶ Inchen Josébe kan lino llensutøga kirra, Jesúswei asrwan pinøsrua, truyu pulabe, kan peñayu søraming trab lalig pasrabigu waya, trugurrimbe kan nu sragwan merrana, kebaminug kasrøbig køn.

⁴⁷ Inchen María Magdalenaba, María Joséwei usrimbabe chu sørøben ashibelø køn.

16

*Jesús øsiiraig**(Mt 28.1-10; Lc 24.1-12; Jn 20.1-10)*

¹ Inchen sábedo kwalóm puraiben, María Magdalenaba, katø Jacobwei usri Mariába, Saloméba Jesúswei asrwan srølrrab ambamig may irrabzheelø køn.

² Incha tru srø trune pølbaserøb kwalømbe, ullarbatø ambubelø køn søriisrømay.

³ Inchendø nømbe kangurrin kangurri trenchibelø køn:

—¿Sørin trabyu kebambannug srugwane namune mu tarømara trani-asamø?— cha.

⁴ Incha møimbe ashene, tru sørinug truba nu srug kasraibe truyu kømøtø, manawei malsrainguen tsuptinchen,

⁵ umbu sørinug kebambabe, kan matsinø puliig kørrabig keweig truyu kusrmay wai ashiptinchibelø køn. Inchen nømbe kwaaren,

⁶ truibe trenchibig køn:

—Kwarmøtay cha. Ñimbe Jesús nazaretsriig tru kurusyu mesraigwan lan cha. Øsiirain køn cha. Yube mu kaagøn cha. Ñimguen asay, chibig køn, yu nun wayinug.

⁷ Møimbe ambay, chibig køn, nui kusrenanøb pera uniilanba, katø Pedrongucha øyah chinrrab: “Galileasrømay ñimguen ammøwatø, nømerrig inrrun tan chinrrigay cha. Trusrø ñimbe nun ashchun tan cha, ñimun nø maig taig.”—

⁸ Inchene tru ishumburmerabe sørinukkurri wegørra ambuppe, kwaarøptø ke itønab chab luløbelø køn. Incha mungucha chigucha eshkameelø køn, kaguende kwaariilø kua.

*Jesús María Magdalenan kenamisrøb**(Jn 20.11-18)*

⁹ Tru truaaløm ullarbatø Jesúsbe katøyug øsiirawabe, María Magdalena tru siete kwaimandziimeran webusrinabigwanmerrig kenamisrøbig køn.

¹⁰ Inchen nøbe ya, Jesúsba amøñibelan eshkabig køn, truiløbe isuilø kishib køben.

¹¹ Inchen nømbe ‘Jesús øsiirain køn’ taigwanba, katø María ‘nø ashar’ taigwanba mørabe, nømbe køremeelø køn.

*Jesús nui pagatø kusrenanøb pera uniilan kenamisrøb**(Lc 24.13-35)*

¹² Indiibe iilø chab puraiben, kusrenanøb pera uniilø pailø wambig nørøsrømay ambub pønrrøbene, Jesúsbe, nø kømø, peg lataig kenamisrøbig køn.

¹³ Inchen nømbe amba, katøganelan eshkaben, truiløgucha nømune køremeelø køn.

*Jesús nui pera uniilan nøashib karua ørøb**(Mt 28.16-20; Lc 24.36-49; Jn 20.19-23)*

¹⁴ Indiibe mas wendøbe tru once pera uniilø mishatsigu mab purramnetø Jesúsbe truyu nømun kenamisrabe, namabig køn, tru ‘nø katøle øsiirawa uni aser’ cha eshkabelan nømui manrrømera murelø kuikkurrimbah, katø kørenrrab inchimeelø kuikkurrimbatø.

¹⁵ Inchabe trenchibig køn:

—Ñimbe yu pirau truørø amba, Tiuswei tabig srø wamwan mu misagwandøgucha eshka kusrenanrrigay cha.

¹⁶ Inchen møikkøben køreb, katø piu umbu ulsraig køb inchiibe kaigyugurri wesraig kønrrun cha. Inchen møikkøben køremfigwane kaigy pasrønrrai pasrig kønrrun cha.

¹⁷ Inchen nan kørebelane, nabe nømba pasrain kui asamig iig tru øyeeg asha kønrrai mariiløbe nømba pønrrabig pønrrønrrun cha: nai munchiyube kwaimandziimeran webusrøb, srøig peg wammera waminchib,

¹⁸ nømui taska ulmeran kemørinaingucha, chinchimub, katø inchipa chigøben kwetchaptiig tøgga mutsinaingucha, chi kømub, katø nømui tasiimeran kwanrreelaim pala estsarene, truiløbe tabelø kørrømisrøb inchun—cha, trenchibig køn Jesúsbe.

Jesús srømbalasarømay nebib

(Lc 24.50-53)

¹⁹ Incha Señor Jesúsbe nømun chab waminchene, nune srømbalasarømay kusraben, Tiusweim pulu kusrmay wamisrøbig køn.

²⁰ Inchen nømbe webamba, Jesucristoimburabelan chutøgucha truørø eshka kusrenanøbelø køn. Inchen Señorbe nømba marøb pasrabig køn, nøm wamindigwane nui wam kui asig kønrrai maramburab mariiløtøgga kenamarøb.

San Lucas

Maig kuigwan eshkab pølbasøbig

¹ Pøs møiløgøben maig purayaigwan eshkabig kan pørig tamara korrømartrab indig købig køn lutøgurri, namui utu isa kømøtø, cierton treeg purayeelan.

² Tru srøsrøgurri nømui kaptøga nømashib ashibelø, katø Tiuswei wamwan nøm waminchib pønrrabelø namun maig eshkaig køben, treeg.

³ Inchen nagucha kerriguba chitø purayailø maig kuigwan srøsrøgurriigwan tab nebua ashene, nangucha tabig asønaben, lutøgurri tamara ñun pørtrab inchar, ñi nai purø tab Teófilon,

⁴ tru ñun maig kusrenanig købigwan, tru ciertonigwan ñi tab nebua asamig kønrrai.

Kan ángel Juan kal-lamigwan eshkab

⁵ Herodes Judea rey køben, judíosmerai kan sacerdote Zacarías taig merrab-srø Abíaswei sacerdotesmerai utuig tsubig køn. Sraimbe Aaronwei misagugurri arrubig købig køn, Elizabet taig.

⁶ Tiuswei merrab pailøba sølgandø amøñibelø kua, Señor chi martrain taigwanba, katø chi maramigwan martrai karua pønrrailanba muguen chi tamgaig marøbelø købig køn.

⁷ Inchendø chi urekkar købig køn, kaguende Elisabethe trendø ureg chigaig, pailøba yandø kølleelø kua.

⁸ Indiibe kan kwaløm Zacaríaswei sacerdotes sötøwan Tiuswei merrab Tiusweiwan maramig nømun nebuben,

⁹ sacerdotesmerai utu trendø treeg marøbelø kua, suerte kucha ashene, Zacaríaswan Tiuswei yau incienso patrab kebyamig nun nebugig køn.

¹⁰ Inchen incienso parrøb pasramne, maya misaabe wambig Tiusba waminchib købig køn.

¹¹ Inchen mømibe incienso parri altar pulu kusrmaygatømay Señorwei ángel Zacaríaswan kenamisrøptinchen,

¹² Zacaríasbe ángelwan ashabe, ¡katø! mandøguen kømuptinchen, ke chinchimmørø inchib kørig kui inchibig køn.

¹³ Inchen ángelbe trenchibig køn:

–Zacarías, kørig kui inchimøta cha. Kaguende Tiusbe ñi nun miaigwan mørig kua, ñui srai Elisabethe kan nusrkai tøgagønrrun cha, truigwane ñibe Juan munchi pasrtrig chibig køn.

¹⁴ Inchen ñibe truba tab kui mørøb kasraaraben, nø kal-labene, katøganelø møiløgøben tab kui mørtrun cha.

¹⁵ Kaguende ñui nusrkaimbe Tiuswei merrab truba nuig kønrrun cha, managuen vino muchimøwei, mutsiiranrraptiig kørap pi muchimøwei inchabig. Incha usrai patsau wappatøwei Espíritu Santotø netsaig kua,

¹⁶ møilan køben, Israelwei misaameran nømui Señor Tiusweimay truba nu lliranganrun cha.

¹⁷ Tru Juanbe Señorwei merrab ippe, tru merrabsrø Tius maig karuigwan eshkabig Elías maig isubig køben treetøwei isubig, katø truigwei maramburab marigwan tøgag inrrun cha. Møskaløbe nusrkaløba katøle tabig waramig kønrrai marøb, katø kailø mørmeeløbe sølgandø amøñibelø misaasun marigu

amõñinrab llianrrai inchun cha. Kan nu sətø misaamera Señorwan utønrab ke muniitø melønrrabelø kørnrai tamarøb.–

¹⁸ Inchen Zacaríasbe ángelwan payippe:

–¿Ilgwane mandø incha treeg kørnraitamab isumø? cha, trencha payibig køn. Kaguende nabe yandø køllig køben, nai sraingucha treetøwein køn– cha.

¹⁹ Inchen ángelbe trencha løtabig køn:

–Na, Gabrielbe Tiuswei merrab pasrabig kur cha. Incha nane i tabig srøigwan ñun wammøørskørnrai ørtan cha.

²⁰ Incha mømbe tru treeg nebum kwalømgatig ñibe wamgaig, chigucha waminchab kaimabig kørørmisrtrabguen cha, na maig taigwan køremikkurri. Tru na trendailøbe treeg pum kwaløm punrrun– cha.

²¹ Trune misaabe wambig munig kua, Zacarías Tiuswei yaugurri ke peguen webarrumuben, chindermab isub købene,

²² Zacarías webarruppe, waminchab kaimabig webarruptinchen, Tiuswei yau chitø kenamisren, asiitamab isubelø køn. Inchen nøbe wamgaig kørørmisra, nømune ka señas maratø eshkabig køn.

²³ Inchen Zacaríasbe Tiuswei yau Tiusweiwan maram kwalømmera chab patsøben, nøbe nui yamay iben,

²⁴ tru kwalømmera puraiben, Elisabetbe kwanrriig kørørmisra, nui yaugurri trattrø pøl webimíig køn, øyeeg isub:

²⁵ “Møi i kwalømmerawan Señor nayasig øyeeg tabig martan cha, misaamera kaasiinab megamig kømønrrai martrab.”

Kan ángel Jesús kal-lamigwan eshkab

²⁶ Indiiibe tøbø pilayu ángel Gabrielwan Galilea, kan pueblo Nazaret tainu-umay Tiusbe ørøbig køn,

²⁷ kan managuen mu møøba kimø srusrø, María taigwan ashchai. Truibe kan møg, José taig, merrabsrø rey Davidweinukkurrin karrab misaaba kasharanrrab misraig købig køn.

²⁸ Inchen ángelbe María wainug kebyabe, trenchibig køn:

–¡Ka watirru! cha. ¡Tius mayanguen tab indig! Señorbe ñiba pasran cha. Katøgan ishumburmeran lata kømø, ñundø purø tab indig køn– cha.

²⁹ Inchen Mariábe ángel wamindiilan mørabe, kan øyeeg chib tab wamibe maig kermab isubig køn. Katø ángel øyeeg chib tab wamibe chi chibig kermab isubig køn.

³⁰ Inchen ángelbe trenchibig køn:

–María kørig kui inchimøta cha. Kaguende ñibe Tiuswei merrab mayanguen tabig asønaig køn cha.

³¹ Mømbe kwanrriig kørørmisra, kan nusrkai kal-labene, Jesús munchi pasrtrig chibig køn.

³² Nøbe purø nuig, Tius Mayeelaim Pala Pasrabigwei Nusrkain cha wamig kørnrun cha. Inchen Señor Tiusbe tru møskai David wamisra ashib karub waigwan tranrrun cha.

³³ Inchen nøbe Jacobwei misaameran managatig ashib karub wanrrun cha. Inchen tru nø ashib karub wamibe managuen patsønraamøn– chibig køn.

³⁴ Inchene Mariábe:

–¿Na mu møøbagucha kimílgwane øyeebe chincha purainrrab kø?– cha, payene,

³⁵ ángelbe trenchibig køn:

—Espíritu Santo ñuim pala kørraarruben, Tius Mayeelaim Pala Pasrabigwei maramburab marøbig kan wañi lataig ñun pinøbulen, treekkurri tru newan tabig kal-lanrrabiibe, Tiuswei Nusrkain cha wamig kønrrun chibig køn.

³⁶ Katø ñimui Elisabetgucha ya køllim palasø kan nusrkai tøgagønrrab køn cha. Chi ureg tøgagønrrab kaimabig køn taikken seis mesesken kwanrriig køn cha.

³⁷ Kaguende Tiusweimbe chitøgucha kaimamdiibe kaabig køn — cha, trenchibig køn.

³⁸ Inchene Mariabe trenchibig køn:

—Nabe Señor maig karuigwan marøb megabig kur cha. Ñi nan maig taig treeg kønrrain— chiben, yandø ángelbe truyugurri ibig køn.

Maria Elisabetwan ashchab ib

³⁹ Tru kwalømmerawan Mariabe tamara, Judea pirau tunmeragøba tøgá pirømerasø kan puebloyumay petø ya,

⁴⁰ Zacaríaswei yau kebyabe, Elisabetwan ‘ka undirru’ chibig køn.

⁴¹ Inchen Elisabet María ‘ka undirru’ taigwan mørene, unøbe patsø umbu kønaptinchen, Elisabetbe Espiritu Santo netsaig kørøromisra,

⁴² nøbe truba mur wamab trenchibig køn:

—Tiusbe maya ishumburmerai utu ñune mayanguen tab kuig kønrrai indig køben, katø ñui patsau tøgagúig unangucha mayanguen tab kuig kønrrai indig køn cha.

⁴³ ¿Nan øyeeg lastima asiibe chugurri arrerah? cha, ¿Nai Señorwei usri nan ashchab punrraimbe?

⁴⁴ Kaguende ñi nan ‘ka undirru’ cha wamigwan møren latatø, nai unøbe kasrag køptø nai patsø umbu kønaptinndan cha.

⁴⁵ Kørebiligweimbe mayanguen tab køn cha. Kaguende Señor maig kønrrun cha, chi taibe, nøbe treeg nebunrrai martrun— chibig køn.

⁴⁶ Inchen Mariabe trenchibig køn:

“Nai mõiibe Señorwan maya nuguen tabig wamindan cha.

⁴⁷ Katø nai espíritube Tius nai Kaigyugurri Wesrabigweinug truba kasraaran cha.

⁴⁸ Kaguende Tiusbe na nø karuigwan marøb megabig, na chigucha kømø waachawan isua asin køn cha. Pøs møingurrimbunøbe misaamera srøig srøig kurrrab amrrubeløbe nane mayanguen tab kuig køn chinrrautan cha.

⁴⁹ Kaguende Tius maramburab marøbiibe nan purø nørriig tabelø marin køn cha, nui munchibe newan tabig køben.

⁵⁰ Inchen nui lastima asiibe, nun kørriibala melabelaimbe, srøig srøig misag kurrrab arrimørig truilain kønrrun cha.

⁵¹ Nui taska chigøben purø nørreelø mara, tru nørreelø truba møg inchib, chigøben martrab isuilane chindinguen møriimfig ka isuitø purainrrai kørøromarin køn cha.

⁵² Karumburab karub purrabelane nøm purramisra karub purraigwan kerawa, chigucha kømeeelan tabigu neerin køn cha.

⁵³ Parøgúilane tabig tøgagønrrai unchaguen tranøppe, puarmerane chiguchagar ambasan cha.

⁵⁴ Katø nø karuigwan marøb megabig Israelwan purugun cha, nø lastima asigwan isub,

⁵⁵ tru merrabsrø namui kølli misag Abrahamwanba, nuinukkurri karrab misaameranba maig wamindig managatig treeg kønrrai.”

⁵⁶ Incha Mariábe Elisabetba pøn pølburað kørromisra, nui yamay katø ibig køn.

Juan kal-laigwan waminchibig

⁵⁷ Yandø Elisabetwan unø kal-lam kwaløm puben, kan nusrkai tøgagøbig køn.

⁵⁸ Inchen nui ya pulueløba, nui yaeløba Señor nun truba lastima asin kui ashabe, nømbe Elisabetba truba kasraabelø køn.

⁵⁹ Indiibe ke trune kwalømyube unan circuncidanrrab srua amba, unane munchi pasrøppe, møskawei munchi Zacarías pasrtrab inchen,

⁶⁰ usrimbe trenchibig køn:

—Kah, treeg kømøtø, unøbe Juan munchi kønrrun— cha.

⁶¹ Inchen nømbe trenchibelø køn:

—Mugucha ñimui yaeløbe treeg munchi tøgare kaagøn— cha.

⁶² Incha møskawan: “¿Chi munchi pasrtrab?” cha, señas maratø payene,

⁶³ Møskaimbe pøramig kan tabla-unø miawabe: “Nui munchibe Juan køn” chib, pørøbig køn.

⁶⁴ Inchen tru urastø Zacaríaswane nilø kemendikkucha kurrøben, wam larraiben, Tiuswan tabig waminchib mendabig køn.

⁶⁵ Treekkurri mayeeløba nui ya pulueløbe truba kwaariilø kørromisren, tru Judea pirau tunmeragøba tøga pirømerasø warab misaamerabe, øyeelø purayaigwangøba waminchib købelø køn.

⁶⁶ Inchen mayeelø wammørøbeløbe nømui manrrautø esegab trenchibelø køn:

—¿I unøbe chi maig kønrrabig kerah?— cha.

Kaguende Señorwei tasiibe nøba pasrøben.

Zacarías cantaig

⁶⁷ Zacarías tru unai møskawane Espíritu Santo netsaben, maig pub attrabigwan øyah chib waminchibig køn:

⁶⁸ “Israelwei Señor Tiusbe mayanguen tabig wamindig kønrrain cha. Kaguende namun ashchab arrua, nui misagwane katøle nuielø kønrrai wesrun cha.

⁶⁹ Maramburab Marøbig Kaigyugurri Wesranrrabig kusrain køn cha, tru karuigwan marøb megabig Davidwei yaugurri.

⁷⁰ Tru merrab manasrøngurri tru Tiusweindø tarømariilø Tius maig karuigwan eshkabeløgurri nø maig taig:

⁷¹ Namun tru ashikken kømui inchibelainukkurrimba, katø mayeelø namun tsalø inchibelainukkurrimbe wesranrrab cha trendaigwan.

⁷² Merrabsrø namui kølli misaameran truba lastima asigwanba, katø Tius tru misaaba øyeeg martrab cha, tru newan tabig nuinukkurri nø lata kandø isua martrab pasrigwan isumig kønrraimba,

⁷³ tru namui kølli misag Abrahamwan treeg marmø kømø ¡katø! treeg marig kønrrun cha kørromarig købigwan.

⁷⁴ Tru namun ashig kømui inchibelai taskugurri namun wesraikkurrimbe, chigucha chi kørig kuin kømø, nuiwan marøb,

⁷⁵ katø nam amønain kwalømmerawan kwalømmørig chu urastøgucha nui merrab kerrigu newan tabig, sølgandø marøb kømig kønrrai.

⁷⁶ Inchen ñi nai unøzhiibe, Tius maig karuigwan eshkabig tru Mayelaim Pala Pasrabigweimburað waminchibig køn taig kønrrun cha. Kaguende ñibe Señorwei merrab inrrabig køn cha, nui maymeran tamarøb,

- ⁷⁷ katø kaigyugurri wesrailø kømigwan misaameran nebua ashchai ke-namarøb inchab, tru nømui kaig mariilan ulø paymø pesannab in-dikkurri.
- ⁷⁸ Namui Tius purø nu lastima asikkurri, kan srø kwaløm pørr tørguegwalmabig neeshibig lataig kal-lanrrun cha,
- ⁷⁹ purø løstøyu warabelanba, katø kwamitø itøgasraig warabelanba ke-bilønrrab. Incha ambumay imay tabig amønnam maywan ambamig kønrrai martrab.”
- ⁸⁰ Inchen unøbe nurab ippe, Tiusweimburabeløyu treetøwei mur pasrabig nurab ya, Israel misaameran kenamisram kwalømgatig mu misag warab waraimøsrø tsubig køn.

2

Jesús kal-laigwan eshka (Mt 1.18-25)

- ¹ Tru kwalømmerawan Roma maya misagwan ashib karub wabig César Augustobe treeg maramig kønrrai kan kilga treeg pøra weerig købig køn, chutøgucha misaamera maya nu køtashchab munchimeran tulisamig.
- ² Iig køn, tru srøsrøwan munchimeran tulisingaruig, Cirenio Siria pirausrø kubenadur køb uras.
- ³ Inchen mayeeløba tru trendø nømui pirau pueblomerasrø munchiwan pøra kørømartrab ambamig neubig køn.
- ⁴ Treekkurri Josébe Galilea pirau Nazaret puebloyugurri webya, Judea pirau Belén tru Davidweim pueblo tainuumay ibig køn, kaguende nøbe merrabsrø Davidwei misagugurri arrubig kua.
- ⁵ Incha Mariába Belénsrø nømui munchiwan pøra kørømartrab ibig køn. Mariábe Joséba kasharanrrab misraig kwanrriig købig køn.
- ⁶ Indiibe Belén waramnetø, Mariáne unan tammisramig ura puben,
- ⁷ nui mayor nusrkawan tøgamisra, may pula, animal maig kan patiyau way-ibig køn, kaguende nømuiembe ya pebøbelainuube chu kørømisramig kaaben.

Angelesmera ubisha ashibelan eshka

- ⁸ Inchen tru pirau Belén pulu møiløgøsrøn ubisha ashibelø ubisha ashib yem warøbene,
- ⁹ mømibe Señorwei ángel nømun kenamisren, Señorwei tørguegwalmabig nømui pøtøgatan kebiløben, nømbe truba truba kørig kui inchibelø køn.
- ¹⁰ Inchen ángelbe trenchibig køn:
–Kørig kui inchimøtay cha. Kaguende ñimun wammøøsrkønrrab kan tabig srøig wam srua arrur cha, mayeelø kasraaramig kønrrai.
- ¹¹ Møi Davidwei puebloyu ñimuyasig kan Kaigyugurri Wesrabig kal-lain køn cha, Cristo tru Señor.
- ¹² Incha truig kuitamab asamibe, unane pula, animal maig kan patiyau wayig wetørranrrabguen— cha, trenchibig køn ángelbe.
- ¹³ Inchen mømibe tru urastø ángelweim pulube katøgan ángelesmera srømbalasreelø kenamisra, Tiuswan tabig waminchib trenchibelø køn:
- ¹⁴ “¡Srømbalasrømbe Tiusweimbe purø tabig køn chib kasraarab, katø piraube misaamera Señor nø mayanguen tab kui wamig kønrrai, treeg pønrrabelaimbe ambumay imay mayanguen tab køn!” chib.
- ¹⁵ Inchen ángelesmera katø srømbalasrømay amben, ubisha ashibeløbe kangurrin kangurri trenchibelø køn:

—Chi purayaitashchab, Señor namun chi taitashchab, m̄ind̄wei Belénsr̄ ashchab amun— cha.

¹⁶ Incha malla amba, Maríanba, Joséwanba wet̄orrabel̄ k̄on, unane animal main patiyau wayig.

¹⁷ Incha ashabe, ángel tru unaimburab chi taigwan tru ubisha ashibel̄obe eshkaben,

¹⁸ mayeel̄oba chi eshkaigwan m̄orabe, truba kwaar̄obel̄ k̄on.

¹⁹ Inchen Maríabe chi tailane treebe maig kermab isub, nuinet̄o esegabig k̄on.

²⁰ Inchen ubisha ashibel̄obe kat̄ole ambuppe:

—Tiusbe maya nuguen tabig k̄on chib— truba tabig waminchib ambubel̄o k̄on, n̄om chi m̄origwan n̄om chi asigwan, tru ángelesmera maig taig treeg purayaigwan asha.

Jesús-unan Tiuswei yaumay srua ambub

²¹ Inchen trune kwal̄om̄yube unan circuncidamig puben, treeg mara, Jesús munchi pasr̄obel̄ k̄on. María kwanrriig k̄om̄wat̄o ángel chi munchi pasringaruig, treeg pasrig k̄obig k̄on.

²² Inchen tru maig maramigwan martrai Moisés p̄origu maig chibig k̄oben, tru chilliguig k̄orr̄omisrigwan chish maram kwal̄om̄mera puben, unan Jerusalén ciudayu Señorwan ‘nuin k̄onrrai tranrrum̄on’ chinrrab srua ambubel̄o k̄on.

²³ Tru maig maramigwan martrai Señor pasrigu maig chibig k̄oben treeg: “Mut̄ogucha sr̄sr̄o kal-lab nusrkawane Señorweind̄o tar̄omarig k̄onrrain” taigwan.

²⁴ Tru maig maramigwan martrai Señor pasrigu maig chibig k̄oben, pagat̄o nushin kui, kabe pagat̄o paloma-ureezheel̄o kui Tiusweyasig tranrrab ambubel̄o k̄on.

Simeón cantaig

²⁵ Inchen tru kwal̄om̄merawan kan m̄og Jerusalén Simeón taig tsubig k̄on, s̄ol̄gand̄o tabig, Tiuswan chu uragucha pesannamíig, Israel misaamera tab k̄om̄ui melaigugurri webambamigwan muniirabig. Inchen Espiritu Santobe Simeónba pasrabig k̄on.

²⁶ Incha nune Espiritu Santobe maig k̄onrrabigwan eshkain k̄obig k̄on, Criston tru Señorwan ashm̄wat̄obe ñibe kwanrraam̄on cha.

²⁷ Inchen tru m̄ōobe Espiritu Santo inrrai inchen Tiuswei yaumay ya, tru Jesús-unai m̄oskal̄o tru maig maramigwan martrai Moisés p̄origu maig chibig k̄oben, nuimburab martrab Tiuswei yaumay srua amrrubene,

²⁸ Simeónbe Jesús-unan nui kwalyu muta, Tiuswan tabig waminchib, trenchibig k̄on:

²⁹ “Señor, Mayeelaim Pala Pasrabig,
na ñi karuig megabigwan

chi isum̄o pishind̄o tabig kwabashcha chib,
ñi nan maig eshkaig k̄obiibe yand̄o treeg nebui ashar cha.

³⁰ Kaguende nai kapt̄oga kaigyugurri ñi wesraig k̄om̄igwan ashar cha.

³¹ Truigwane maya misaamera ashen, ñi tamara pasrin k̄on cha.

³² Iibe tru maya misag judíos k̄omeelaimbe ñun kenamaramig t̄or̄ k̄oben,
kat̄o ñui misag israelitasmeraimbe maya nuguen tabig k̄on” cha.

³³ Inchen Joséba, Jesúswei usrimba unaimburab tru Simeón maig taigwan m̄orabe, kan ōyeebe maig kermab isub kwaar̄a ashen,

34 Simeónbe mayanguen tab kuilø kørnrain chabe, Jesúswei usri Maríane trenchibig kòn:

—Au, i unøbe Israel misagwan truba nuwan møilane nørreelø kuigwan chigucha kømeeelø kørnrai marøb, møilane nørreelø kørnrai marøb inchabig, treeg kòn cha. Tiusweimburabigwan nø kenamaren, misaamera nun kashchab kui asamig, nøbe truig kòn cha.

35 Truba nu møilaiwan køben, nømui manrrømerayu maig isubelø kuigwan kenamarig kørnrain cha. Inchen ñibe ñui manrrau isubigube kan espatatøga kelarrab kwani lataig isub pusrkwaig kørromisramig kørnrun— chibig kòn.

Ana maig kuigwan waminchibig

36 Inchen truyu kan ishug, Tius maig karuigwan eshkabig, Fenuelwei nimbasr, Aserwei misagurri arrubig, Ana taikkucha wabig kòn. Truiube yandø truba køllig købig kòn. Truba unø kasharawa, siete años keeba tsua,

37 yandø keg kwaben nøtiig kørromisra, yandø ochenta y cuatro años tøgaig købig kòn. Tiuswei yaugurri managucha tarømisrmíig købig kòn, Tiuswan kørribala tabig waminchib, ayunab, katø Tiusba waminchib yem, kwaløm Tiusweyasig treeg marøb.

38 Inchen Anabe tru urastøwei arrua, Tiuswan ‘mayanguen ungwa, ungwa’ chibig kòn. Incha nøbe tru unaimburab waminchib mendabig kòn tru mayeelø Jerusalén misag Tiusweilø kørnrai kaigyugurri wesrailø kømigwan isub muniirabelane.

Nazaretmay katø ambub

39 Incha tru maig maramigwan martrai Señor pasrigu maig karuilan ker-rig chab marabe, Galilea pirau Nazaretsrømay ambubelø kòn, tru nømuiim puebloyumay.

40 Inchen unøbe nurab ippe, murig chishig, purø kusrebig misrøb iben, Tiuswei tru ka yandø tab indiibe nuim pala pasrabig kòn.

Jesús-unø kusrebeløba waminchib Tiuswei yau

41 Inchen nui møskaløbe Jerusalén pascua fiestayumay pilamørig ambubelø købig kòn.

42 Incha Jesúsbe doce años tøgaig misren, fiestayumay ambubelø kòn, trendø maig marøbelø køben, treeg martrab.

43 Inchen fiesta chab patsøben, nømbe yamay katø amrruben, Jesús-unøbe Jerusalén kørromisrin køben, møskaløbe ashmuin købig kòn.

44 Nømbe tru misag utu unøbe arritamab isua, mawa ambiisrø amba, nømui nømmissaamerai utuba, asiilai utuba lab menda,

45 kalawabe, Jerusalénmay katø llirabelø kòn, trusrø lanrrab.

46 Incha pøn kwalømyube Tiuswei yau tru Moisés pørigwan kusrenanøbelai utu mørøb, nøgurri payib wabyu wetørrabelø kòn.

47 Inchen mayeeløba mørøbeløbe truba truba kusrebig kui ashib, katø nø maig løtiilan mørøb inchabe, ke kwaara ashibelø kòn.

48 Inchen møskalø ashabe, ke kwaara asha, Jesúswei usrimbe trenchibig kòn:

—¿Nai nusrkai, namun chindimbarre øyeeg margu? cha. Ñui møskaimba, nababe truba truba isuilø lab ker— cha.

49 Inchene Jesúsbe trenchibig kòn:

—¿Nane chinchabrre lague? cha. ¿Nabe nai Møskawei chi maramelan na marøb wamigwan ñimgan ashmeelø køtirru?— cha.

50 Inchen nømbe ni chi tainguen mørmeelø kòn.

⁵¹ Inchabe nui mōskalōba Nazaretsrōmay katō mendig ya, maig karuben treeg mōrōb megabig kōn. Inchen nui usrimbe kutōgue iilan nui manrrautō isua esegabig kōn.

⁵² Inchen Jesúsbe trurrigu kusrebig misrōb, nurab ibig kōn, Tius lata, misaamera lata mayanguen tab indinab.

3

Juan Bautista mu misag warab waraimōnug waminchib

(Mt 3.1-12; Mc 1.1-8; Jn 1.19-28)

¹ Roma maya misagwan ashib karub wabig Tiberio chabguen quince años karub waben, Pilatobe Judea pirau kubenadur kōben, Herodesbe Galilea pirau ashib karub wabig kōn. Inchen Herodeswei nuneg Felipebe Iturea pirōwanba, Traconite pirōwanba karub waben, Lisaníasbe Abilinia pirau ashib karub wabig kōn.

² Inchen Anásba, Caifásbabe maya sacerdotesmeran tru uras nōm karubelō kōben, Zacaríaswei nusrkai Juanwan Tius wamindig kōn, mu misag warab waraimōnug tsuben.

³ Inchen Juanbe Jordán pi puluwan chuguen palōmō pureb ippe, misaam-eran mas kaig marmōnrrab isua mōra, Tiusweimay llirain kōnmab asamig piu umbu ulsrailō kōmigwan eshkab kusrenanōbig kōn, kaig mariilan ulō paymō pesannailō kōnrrai.

⁴ Truibe merrabsrō Tius maig karuigwan eshkabig Isaías pōrigu maig taig ōyeeg:

“Kan wam mu misag warab waraimōnug trenchib trasan cha:

‘Señorwei maywan tamarōb, nuyasig maymerane ōlmarōb inday tan chib.

⁵ Kullimera kōbelōbe netsōganiilō kōben, nōrrō tunmeraba, shush tunmer-
ababe kanguelarrōtō chag mariilō kōben,
andul maymerabe ōlmariilō kōben, mitōr maymerabe min mariilō
kōnrrun chib.

⁶ Inchen maya misaabe Tius misagwan kaigyugurri wesranrrai ōrigwan
ashchun’ ” taig kōn.

⁷ Inchen misaamera Juan piu umbu ulsrailō kōnrrab webambene,
trenchibig kōn:

—¿Ñimbe ul lataig inchib misaamera! ¿Ñimune mu eshkata cha,
Tiuswei purō kōrig kōmdiig ñimuim pala attrabig pub pasrabigugurri
wegōrrōnrraimbe?

⁸ Ñimui kaig mariilan isua mōra, Tiusweimay llirawar kuy tōrgandō
asamdiig kōnrrai treelō kua, ñimbe ñimasitiō ōyeeg chib mendōmōtay cha:
“Nambe, Abrahamwei misaamera ker” chib. Kaguende nabe trendamōnrrun
cha: Tiusbe i sruumeranguen Abrahamwei misaamera kōnrrai marōg
kōbene, martrun cha.

⁹ Katō walōmbe tusrmeran srōlba para ōramig chabguen srōlyu pasringuen
pasran cha. Chi tusrwandōgucha tab mamig niimfiigwane para, nagu kegut-
san— cha.

¹⁰ Inchene misaamerabe truba nu pasrabiibe trencha payibelō kōn:

—¿Nambe chi maramō?— cha.

¹¹ Inchen Juanbe trencha lōtabig kōn:

—Mōikkōben pa turin tōgaibe chiguchagaigwan kan tranō cha. Inchen
mōikkōben mamig tōgaibe, chigaigwan pirishi— cha.

12 Inchen katø mōiløgøsrøn tru romasreelayasig an utabelø piu umbu ulsrailø kōnrrab amrruabe, Juanwane trencha payibelø kōn:

—Kusrennøbig, ¿nambe chi maramø?— cha.

13 Inchen Juanbe trenchibig kōn:

—Anwan maya utōnrrai karua pasrigwan menrra utōnrrab kōmø, maig utamigwandø utōnrrigay— cha.

14 Inchen katø mø suldaumera kōsrøn trencha payibelø kōn:

—¿Nambe chi maramig kōnrrerah?— cha.

Inchene nøbe trenchibig kōn:

—Mun kōben ‘chigøben martrumøn’ cha kwaarødra chigøben kerramøwei, katø mun kōben ka isatø chigøben kemesra kebenørskømwøwei inday cha. Ñim chigøben marøb kuimburo ñimun maig pagaraitøgatø kasraaray— cha, trenchibig kōn.

15 Inchen misaamerabe ke nungøba isua ashib kuig kōppe, Juanwane nōmuinetøbe Cristo kōppeendimab isub kōbelø kōn.

16 Inchen Juanbe mayeelan trenchibig kōn:

—Nabe ñimune pi pinøbulrrai piu umbu ulsraar cha. Trune nai wendau arrubiibe si, Espiritu Santotøgaba, naatøgaba pinøbulrrun cha. Truibeguende, na lataguen kōmø, maramburab marøbig kōben, nabe truburab kōmíig kua, nui alpargatisyu tsiwanguen pitchabgaig kur chibig kōn.

17 Nøbe tirigun isig øra tarømartrab tru kalagutsamig tsiig utigwane sruagen pasran cha. Incha truyu tru tirigu chishmari yabaløwan kerrigu chab chishmarabe, tirigune tru esegainug esegappe, shauwane mana kwamø nagu patrab.—

18 Incha maig melamigwan treeg marøb melay chib, katøgan øyeelø lataliøba misaameran waminchibig kōn, Tiuswei tabig srø wamwan.

19 Inchen tru Galilea pirau ashib karub wabig Herodesbe nui nuneg Felipei srai Herodiaswan nø pera tsuma, katø chigurrimbunø kaig mariiløgurrimba Juanbe Herodeswane ‘øyeebe kalø kōn’ chib namuben,

20 Herodesbe møri urasbe, trubalatø mas kaig marøb, Juanwane merrar-rawa, kailan keeri yau pasrøbig kōn.

Jesúsuan piu umbu ulsraig (Mt 3.13-17; Mc 1.9-11)

21 Inchen Juan maya misagwan piu umbu ulsrøb uñib uras, Jesúswangucha piu umbu ulsraig kuig kōn. Inchen Jesús Tius Møskaimba waminchib pasramne, srømbalabe kuren,

22 Espiritu Santobe nuim pala kan paloma lataig kōrraaruben, srømbalásrøngurrimbe kan wam treeg mørø waminchib trenchibig kōn:

—Ñibe nai Nusrkai undaarraig kōn cha. Nabe ñuimbura truba tab kui war— cha.

Jesucristoi merrab misaamera (Mt 1.1-17)

23 Jesúsbe nui maramigwan pølbasrøppe chabguen treinta años kōsrøn tøgag kōbig kōn.

Jesúsbe Joséwei nusrkain kuitamab isubelø kōn.

24 Joséwei møskaimbe Elí kōben,

Elíwei møskaimbe Matat kōbig kōn.

Matatwei møskaimbe Leví kōben,

Levíwei møskaimbe Melqui kōben,

Melquiwei møskaimbe Jana kōben,

Janai mǝskaimbe José kǝbig kǝn.

²⁵ Joséwei mǝskaimbe Matatías kǝben,
Matatíaswei mǝskaimbe Amós kǝben,
Amóswei mǝskaimbe Nahum kǝben,
Nahumwei mǝskaimbe Esli kǝben,
Esliwei mǝskaimbe Nagai kǝbig kǝn.

²⁶ Nagaiwei mǝskaimbe Maat kǝben,
Maatwei mǝskaimbe Matatías kǝben,
Matatíaswei mǝskaimbe Semei kǝben,
Semeiwei mǝskaimbe José kǝben,
Joséwei mǝskaimbe Judá kǝbig kǝn.

²⁷ Judáwei mǝskaimbe Joanan kǝben,
Joananwei mǝskaimbe Resa kǝben,
Resai mǝskaimbe Zorobabel kǝben,
Zorobabelwei mǝskaimbe Salatiel kǝben,
Salatielwei mǝskaimbe Neri kǝbig kǝn.

²⁸ Nerii mǝskaimbe Melqui kǝben,
Melquiwei mǝskaimbe Adi kǝben,
Adii mǝskaimbe Cosam kǝben,
Cosamwei mǝskaimbe Elmodam kǝben,
Elmodamwei mǝskaimbe Er kǝbig kǝn.

²⁹ Erwei mǝskaimbe Josué kǝben,
Josuéwei mǝskaimbe Eliezer kǝben,
Eliezerwei mǝskaimbe Jorim kǝben,
Jorimwei mǝskaimbe Matat kǝbig kǝn.

³⁰ Matatwei mǝskaimbe Leví kǝben,
Levíwei mǝskaimbe Simeón kǝben,
Simeónwei mǝskaimbe Judá kǝben,
Judáwei mǝskaimbe José kǝben,
Joséwei mǝskaimbe Jonám kǝben,
Jonámwei mǝskaimbe Eliaquim kǝben,
Eliaquimwei mǝskaimbe Melea kǝbig kǝn.

³¹ Meleai mǝskaimbe Mena kǝben,
Menai mǝskaimbe Matata kǝben,
Matatai mǝskaimbe Natán kǝbig kǝn.

³² Natánwei mǝskaimbe David kǝben,
Davidwei mǝskaimbe Isaí kǝben,
Isaíwei mǝskaimbe Obed kǝben,
Obedwei mǝskaimbe Booz kǝben,
Boozwei mǝskaimbe Salomón kǝben,
Salomónwei mǝskaimbe Naasón kǝbig kǝn.

³³ Naasónwei mǝskaimbe Aminadab kǝben,
Aminadabwei mǝskaimbe Admin kǝben,
Adminwei mǝskaimbe Arni kǝben,
Arnii mǝskaimbe Esrom kǝben,
Esromwei mǝskaimbe Fares kǝben,
Fareswei mǝskaimbe Judá kǝbig kǝn.

³⁴ Judáwei mǝskaimbe Jacob kǝben,
Jacobwei mǝskaimbe Isaac kǝben,
Isaacwei mǝskaimbe Abraham kǝben,
Abrahamwei mǝskaimbe Taré kǝben,
Taréwei mǝskaimbe Nacor kǝben,

Nacorwei mōskaimbe Serug kōbig kōn.

³⁵ Serugwei mōskaimbe Ragau kōben,
Ragauwei mōskaimbe Peleg kōben,
Pelegwei mōskaimbe Heber kōben,
Heberwei mōskaimbe Sélaj kōben,
Sélajwei mōskaimbe Cainán kōbig kōn.

³⁶ Cainánwei mōskaimbe Arfaxad kōben,
Arfaxadwei mōskaimbe Sem kōben,
Semwei mōskaimbe Noé kōben,
Noéwei mōskaimbe Lamec kōbig kōn.

³⁷ Lamecwei mōskaimbe Matusalén kōben,
Matusalénwei mōskaimbe Enoc kōben,
Enocwei mōskaimbe Jared kōben,
Jaredwei mōskaimbe Mahalaleel kōben,
Mahalaleelwei mōskaimbe Cainán kōbig kōn.

³⁸ Cainánwei mōskaimbe Enós kōben
Enóswei mōskaimbe Set kōben,
Setwei mōskaimbe Adán kōben,
Adánwei Mōskaimbe Tius kōn.

4

Nugwaimandzig Jesússwan chinchibig kōtashchab marōb (Mt 4.1-11; Mc 1.12-13)

¹ Jesús Espiritu Santotø netsaig Jordán piyugurri katø arrubben, Espiritu Santobe mu misag warab waraimōsrōmay pera iben,

² truyu kwalōmmera cuarenta nemisramne tsuben, nugwaimandziibe ke kebenōsrkōnrrab marōbig kōn. Tru kwalōmmerawan chigucha mamōwa, yandø parōgwai mōren,

³ nugwaimandziibe:

—Ñi isa kōmø, Tiuswei nusrkain kuabe, i srugwan ‘pirri misr’ cha, trenchi—chibig kōn.

⁴ Inchene Jesúsbe trencha lōtabig kōn:

—Tiuswei wamwan pōrigube trenchibig pōrig pasran cha: “Møøbe pir-rindøgatø øsig tsumig kōmøn” chibig.—

⁵ Inchen nugwaimandziibe kan tun palasrōmay pera ya, yu pirau chutøgucha nōrreelø nōm ashib karub purrailan kerriguba ke pestø Jesússwan eshkab kenamarabe,

⁶ trenchibig kōn:

—Nabe ñi karumburab karumigwan kerrigu ñun tranøb, katø nōmui chig-urrimbunø purø tabig tōrigwan tranøb inchumøn cha. Kaguende nane iilan kerrigu tranig kōn cha. Incha nabe mun tranøg kōben, tranamønrrun cha.

⁷ Inchawei ñi nan tōmbasra, kōriibala tabig waminchene, iibe kerriguba ñuin kōnrrun— cha.

⁸ Inchene Jesúsbe trencha lōtabig kōn:

—Trenchibig pōrig pasran cha: “Señor ñui Tiuswandø kōriibala tabig waminchib, nuyasiitø marōb megamig kōn” chibig.—

⁹ Inchen trugurrimbe nugwaimandziibe Jerusalén ciudasrōmay pera ya, tru Tiuswei yau purø palasrø pasrabe, trenchibig kōn:

—Isa kōmø, ñi Tiuswei Nusrkain kuabe, yugurri pirasrø pōrsrau cha,

¹⁰ kaguende Tiuswei wamyube trenchibig pōrig pasran cha:

“Tiusbe nui ánglesmeran ñun chinchimønrrai ashchai ørtrun chibig.

11 Incha ñui srøbwan sругu srurrengwamønrrai nømui tasiimeratøga ñiune kusranrrun” chibig.—

12 Inchen Jesúsbe trencha løtabig køn:

—Øyeeg chibig pasran cha: “Ñui Señor Tiuswane ke chinchibig køtashchab lataikkucha maramig kømøn” chibig.—

13 Inchen nugwaimandziibe øyeeg chiyutø kebenøsrkønrrab indamigwan kerrigu chab marabe, Jesúsweim pulugurri maya yana køsrøn tarømisrøbig køn, katøle treeg maramdiig pumnegatig.

Jesús Galilea nui maramigwan pølbasrøb

(Mt 4.12-17; Mc 1.14-15)

14 Jesús Espiritu Santoi maramburab maramigwan tøgaig Galileamay katø arruben, tru pirau tru pøtøgatanbe chutøgucha nungøba, nungøba waminchib købelø køn.

15 Inchen judíosmera tulundzuni yamørig nøbe kusrenanen, mayeeløba nun truba tabig waminchibelø køn.

Jesús Nazaretsrø

(Mt 13.53-58; Mc 6.1-6)

16 Incha Jesúsbe nø nurainuumay Nazaretsrømay ya, nø trendø treeg marøbig køppe, isrin kwalømbe judíosmera tulundzuni yau kebya, lenrrab pasramisren,

17 Tius maig karuigwan eshkabig Isaiáswei pørigwan lenrrai tranen, larrøbicha kurøppe, øyeeg pørig pasrabigu kurøbig køn:

18 “Señor Tiuswei Espiritube naim pala pasran cha.

Kaguende nane waachameran tabig srøigwan eshkanrrai aceite itølusha tarømarig køn cha;

merrarraig pønrrabelan ‘Elatsiilø kønrrun’ chinrraimba,

katø kabgarwan ashibelø kønrrai martraimba,

katø kaig indinab melabelane, amrrai wesrab inchaimba,

19 katø Señorwei truba tab pila attrabigwangucha eshkanrraimba nane ørig køn” chibigwan.

20 Incha Jesúsbe tru pørig tøgaigwan judíosmera tulundzuni yau purugubigwan katøle kirra tranabe, wamisrøbig køn. Inchen mayeeløba judíosmera tulundzuni yau purrabeløbe ke nungøba ashib purrabelø køn.

21 Inchen nøbe trenchib eshkab mendabig køn:

—Na leben ñim mørig, i Tiuswei wam pøriibe, ñimui merrab møi yandø treeg nebun— cha.

22 Inchen misaabe mayeeløba nuimbura tabig waminchib, katø nui trigugurri purø tabzhig wamindi wammeran ke kwaara ashib trenchibelø køn:

—¿libe Joséwei nusrkain kømmørgøppeh?— cha.

23 Inchen Jesúsbe trenchibig køn:

—Ñimbe nane indzabelø chibgunrrig øyeeg chinrrautan cha: “Ñi mø marøbiibe ñiasitøwei mø mar” cha. Katø nane: “Ñi Capernaumsrø chine, chine mariilan nam tru wammørigwan, yu ñuim piraugucha treegwei mar”,— cha.

24 Inchabe katø trenchibig køn:

—Nabe ñimun cierton trendamønrrun cha: Tius maig karuigwan eshkabigwane møigwanguen nui piraueløtøweimbe chi tab indiimfig køn cha.

²⁵ Isa kòmø, Tius maig karuigwan eshkabig Elías uñib uras tru pøn pila y tøbø pila sre pumubenma, tru pirau ørøba truba truba parø pasrøben, Israel misaamerai utube piudamera truba yam waraingucha,

²⁶ Tiusbe Elíaswane Israel pirau warabelan purugunrrab ørmøtø, Sidón ciuda pulu Sareptasø tsub piudan purugunrrab ørig købig køn cha.

²⁷ Katø Tius maig karuigwan eshkabig Eliseo uñib uras chigucha, Israel misaamerai utube lepra kwanrreelø truba nu kuig køn cha. Inchendø truiløbe ni kanguen kwanrrøwan chishmariimeelø køben, Siria pirausrig Naamánwane kwanrrøwan chishmarig købig køn— cha.

²⁸ Inchen iigwan mørøppe, judíosmera tulundzuni yau purrabeløbe namig købiitø ke chinchimmørø incha,

²⁹ kurra pønrramisra, puebloyugurri weera, tru nøm waramig ciuda marim pasrab tunyu pala trømbøsrømay pera ambubelø køn, trusrø pinørtrab.

³⁰ Inchen Jesúsbe nømuin tøbøtagwan pureppa, iptinchibig køn.

Kan møg kwaimandzig tøgagig

(Mc 1.21-28)

³¹ Incha Jesúsbe Galilea pirau Capernaum puebloyumay ya, isrin kwalømmerawan misagwan kusrenanøbig køn.

³² Inchen nø kusrenanigwane kwaara ashibelø køn, kaguende nø wamindiiløbe mu mandamgaig wamindig køben.

³³ Inchen judíosmera tulundzuni yau kan trømbøig maringarub kwaimandzig tøgagig wawabe, mur trashib trenchibig køn:

³⁴ —¡Au! ¿Nambabe ñibe chi asamig tøgagugu cha, Nazaretsrø Jesús? ¿Namun pinishinrrab attirru? cha. Nabe ñune mu kui ashar chibig køn. Ñibe tru Tiuswei Newan Tabig, truig køn— cha.

³⁵ Inchen Jesúsbe kwaimandzigwan namab trenchibig køn:

—¡Ñibe trashimøtø, møweinukkurrimbe webinrrø!— cha.

Inchen kwaimandziibe nøm mayeelai merrab møwane pirau penøsrka, tru møweinukkurri webibig køn, chigucha chi køriinchimøtø.

³⁶ Inchen mayeeløba kwaara, kangurri kangurri:

—¿Kan øyeeg wamindi wammerabe chi køh? chibelø køn. ¡I møøbe mu mandamgaig karuitøgaba, maramburab mariitøgaba trømbøig maringarub kwaimandziimeranguen webingaruben, truilø webamrrappe!—

³⁷ Inchen nune tru pirau ørøba chutøgucha nun, nun waminchibelø køn.

Jesús Pedroi sueeran tamarøb

(Mt 8.14-15; Mc 1.29-31)

³⁸ Incha Jesús judíosmera tulundzuni yaugurri webya, Simónwei yau kebibene, Simónwei sueerabe mur pachiiba kwanrrø tsuben, nømbe kwanrri-igweyasig Jesúswan:

—Purugurra— cha, rugaben,

³⁹ Jesúsbe kwanrriigweimbala utsøbasrabe, pachigwan webinrrai kandø wamøben, pachiibe weetaptinchen, nøbe tru urastø kurra, tru pubelayasig chi maramigwan marøb mendabig køn.

Jesús truba yam kwanreelan tamarøb

(Mt 8.16-17; Mc 1.32-34)

⁴⁰ Yandø nøsig pinaiben mayeeløba chi kwanrrø køben tøgarmaran misaam-erabe Jesúsweimay srua amrruben, kwanrreelømørig nøbe nui tasiimeran nømuim pala estsara, tamarøbig køn.

⁴¹ Inchen katø truyu møilan køben truba yamelainukkurri kwaimandzi-imerabe trenchib trashib webambubelø køn:

—Ñibe Tiuswei Nusrkain kòn— chib.

Inchen Jesúsbe kwaimandziimerane kandø wamab, waminchibashmíig kòn, kaguende nømbe Cristo kui ashibelø køben.

Jesús Galileasrø eshkaab kusrenanøb
(Mc 1.35-39)

⁴² Yandø chab tør-raben Jesúsbe ciudayugurri webya, katøganbalø mu misakkasrø tarømisra iben, misaamerabe lab kua, nø waisrø puabe, ibashmønrrab inchen,

⁴³ Jesúsbe trenchibig kòn:

—Mísag sətømera katøganbaløsrø warabelangucha nabe Tius nø ashib karub pasrainuguigwei tabig srøigwan eshkaab kusrenanamig kòn cha. Kaguende truweiwai ørig kur— cha.

⁴⁴ Incha Judeasrø judíosmera tulundzuni yamerayu Jesúsbe eshkaab kusrenanøb uñibig kòn Tiuswei wamwan.

5

Mana øyeeg asiimíig peskaumera purø nørrø wesrub
(Mt 4.18-22; Mc 1.16-20)

¹ Kan kwaløm Jesús Genesaret nu pisu menda pasrøbene, misaamerabe Tiuswei wamwan mørtrab nuingatan ke nømdø trawaguchib tulundzunøben,

² nøbe tru pisu mendabe pagatø barcomera mu misakkar pønrrai ashibig kòn, kaguende peskabeløbe truyugurri webamba, nømui atarrayameran chishmarøb warøben.

³ Inchen Jesúsbe tru pagatø barcomera pønrrabyu tru Simónwei barcoyu kebyabe, pi mendagurri katøguchi amburøsrø ørtra cha, nøbe tru barcoyu wamisra, truyugurri misagwan kusrenanøb mendabig kòn.

⁴ Incha yandø chab waminchabe, Simónwane trenchibig kòn:

—Barcon amburø mas umbu pisrø øra, peskanrrab ñimui atarrayameran kebetay— cha.

⁵ Inchen Simónbe trencha løtabig kòn:

—Kusrennøbig, nambe kwalma kwalma peskab meløbendø, kanguen wesranrrab kaymer cha. Inchendø ke ñi trendaig køptø, atarrayan kegutchab— cha.

⁶ Incha keguchene, peskaube nu kegørraptø atarrayabe kølsrøb mendøben,

⁷ nømbe nømui lincha amøñibelø katøgan barcoyu purrabelan, purugunrrab amrunrrai keberen, nømbe amrrua, pa barcomeran peskautø netsøganen, barcomerabe piu ke asentanrraptiig inchibelø kòn.

⁸ Inchen trunun ashabe, Simón Pedrobe Jesúswei srøb pulu tømboñsrøb trenchibig kòn:

—Señor, naim pulugurri tarømisrtra cha. Kaguen nabe kaig marøb møg kur— cha.

⁹ Peskau treeg nørrø wesraikkurri Simónbe truyu mayeelø nõba pønrrabeløba kwaarøbiitø ke chindamdiig kui inchibelø kòn.

¹⁰ Katø tru Zebedeowei nusrkalø Jacoboba, Juanba, tru Simónwei trendø lincha peskab amøñibeløgucha treetøwein kørig kui inchibelø kòn. Inchene Jesúsbe Simónwan trenchibig kòn:

—Chi kørig kui inchimøta cha, møingurrimbunøbe misaameran peskabig kønrrig— cha.

¹¹ Inchen nømbe barcomeran pisu mendasrø wesrawabe, kerrigu pønrramnetø, Jesúswei mendig ambuptinchibelø kòn.

Jesús kan lepra kwanrrø tōgaigwan tamarøb
(Mt 8.1-4; Mc 1.40-45)

¹² Jesús mō pueblomerayu kōsrøn tsubene, kan mōg asr trerab kwanrrø, lepra taig, tōgaig pua, Jesúswan ashabe, tōmbōnsra, malōwanguen pirau kebatnnegatig utsōbasrabe, trenchib miabig kōn:

—Señor, nan ñi tamaramdiig kōbene, tamartra— cha.

¹³ Inchen Jesúsbe tasigwan larrøbicha estsarabe, trenchibig kōn:

—Tamarøg kōtan cha. Tamarig kōrrōmisr— cha.

Inchen tru urastø nui trerab kwanrrøbe chishig kōrrōmisren,

¹⁴ Jesúsbe trencha karubig kōn:

—Au, mungōben eshkawabesin cha. Inchendø ya, ñui asrwan sacerdotendø kenamara, tru ñi yandø chishig kōrrōmisrimburø tru Moisés tranrrig taigwane srua ya, tranrrig cha, mayeelōba ñui kwanrrōwan chishig kōrrōmisrin kui ashchain— cha.

¹⁵ Treendingucha Jesúswane ke nun, nun waminchen, nune mas wammørig kōrrōmisren, misaamerabe truba nōrrø nun mōrtrappa, katø nōmui kwanrrōmeran tamariilø kōnrrappa tulundzunabelø kōn.

¹⁶ Inchendø Jesúsbe chugōben mu misakkasrø ya, truyu Tius Mōskaimba waminchibig kōn.

Jesús kōnōnrrab kaimabigwan tamarøb
(Mt 9.1-8; Mc 2.1-12)

¹⁷ Kan kwalōm Jesús kusrenanøb wabene, mōiløgōsrøn fariseosmeraba, tru maig maramigwan martrai Moisés pōrigwan kusrenanøbelōba truyu purrabelø kōn. Truilōbe Galilea pirau maya pueblōsrōngurrimba, Judea piraurōngurrimba, Jerusalēngurrimba amrruar. Inchen Tiuswei maramburab maramibe Jesúsba pasrabig kōn kwanrreelan tamarøb.

¹⁸ Inchen mō mōguelø kōsrøn katōgan mōg kōnōnrrab kaimabigwan tsigalyu muta pua, yau keera, Jesúswei merrab pasrtrab inchendø,

¹⁹ mumayguen kebambamig wetōrranrrab kaimabelø kōn. Kaguende menrra misag pasrōben, trugurri ya pala nebamba, tejameran picha, trab kura, kwanrriigwan tsigalbanau misag utu Jesúswei merrab kōrrōrøbelø kōn.

²⁰ Inchen Jesúsbe nōmui isubigwan ke nuinuutø pasra ashabe, kwanrriigwane trenchibig kōn:

—Au, kasuku, ñui kaig mariilane yandø ulø payamig kōmīg pesannaig kōrrōmisran— cha.

²¹ Inchene tru Moisés pōrigwan kusrenanøbelōba fariseosmerababe treeg isub mendabelø kōn: “I mōg Tiusweimburab purø trōmbøig wamab waminchibiibe, ¿mu kōh? cha. Kaguende kaig mariilan ulø payamig kōmīg pesannaig kōnrraimbe ¿mu kuin treeg mariasamø? cha, Tiustøweimbe treeg martrun” chib, isubelø kōn.

²² Inchen Jesúsbe nōm chi isub pōnrrailan kelarrab ashabe, trenchibig kōn:

—¿Ñimbe ñimui manrraube chindimba øyeeg isugue? cha.

²³ ¿Mōigwan mas kōrmø trendamdiig kōbsruerah? cha. Kabe: “Ñui kaig mariilan ulø payamig kōmīg pesannaig kōrrōmisran” ¿tamiteh? Kabe: “Kurrrab, inrrø” ¿tamiteh? cha.

²⁴ Pøs, na, Mōg Misra Arrubiibe yu pirau kaig mariilan ulø payamig kōmīg pesannaig kōnrrai mu mandamgaig marøbig kui mōimbe ñim ashchai kenamaramōnrrun— chibig kōn.

Inchabe tru kōnōnrrab kaimabigwane trenchibig kōn:

—Nabe ñun trenchar cha: Kurrab, ñui tsigalwan mutab, ñui yamay inrrø— cha.

²⁵ Inchen tru urastø tru kwanrriibe nømui merrabgurri kurra, nø tsuig tsigalwan muta, Tiuswan truba tabig waminchib nui yamay ibig køn.

²⁶ Inchene mayeeløba kwaara asha kørøomisra, Tiuswan truba tabig waminchib, truba kwaariilø:

—Møin kwaløm kan yeekkucha tabelø mari aser— cha trenchibelø køn.

Jesús Leviwan wamab

(Mt 9.9-13; Mc 2.13-17)

²⁷ Øyeeg purayaig wendø Jesús webyabe, kan møg Levi taig, romasree-layasis an utabelø purrainug wai ashabe, trenchibig køn:

—Nai mendig amø— cha.

²⁸ Inchen Levibe chi tøgagúigwan kerrigu kørøomarabe, kurrappa, Jesúswei mendig ibig køn.

²⁹ Incha trugurrimbe Levibe Jesúsweyasig nui yau truba nu fiesta maren, tru romasreelayasis an utabelø truba yameløba, katøganeløba mishatsigu nømba truba nu purrabelø køn.

³⁰ Inchen fariseosmeraba, tru Moisés pørigwan kusrenanøbeløbabe nui kusrenanøb pera uniilane namig, Jesúsweimburab chinetø chib, trenchibelø køn:

—¿An utabeløba, kaig marøbeløba ñimbe truiløbabe chindimba lincha mab, muchigüe?— cha.

³¹ Inchene Jesúsbe nømune trencha løtabig køn:

—Tabelø, kwanrøgarbe mø marøbig palain kømøn cha. Kwanr-reeløbeguende palain køn cha.

³² Nabe tru sølgandø amøñibelan wamønrrab arrumøtø, kaig marøbelan wamønrrab arrig køn cha, yandø nømui kaig mariilan isua mørøb, Tiusweimay lliranrai.—

Ayunamigwan Jesúswan payib

(Mt 9.14-17; Mc 2.18-22)

³³ Inchen kaneløbe Jesúswan trencha payibelø køn:

—Juanwei mendig amøñibeløbe katø katø truba ayunab, katø Tiusba waminchib indamigwan marøbelø køn cha. Katø fariseosmerai mendig amøñibelø treetøwei maren, trune ñuieløbe ka mab, ka muchib inchibelø køn— cha.

³⁴ Inchene Jesúsbe trencha løtabig køn:

—¿Kan novios yaumay linchai eshkailanma keg mistrabig nømba wabengan, mamø purrønrrai inchaitarru? cha.

³⁵ Inchendø yandø keg mistrabigwan srua amban kwalømmera punrrun cha. Inchen tru kwalømmerawane ayunabwei inchun— cha.

³⁶ Incha katø Jesúsbe 'øyeeg lataitøwein køn' cha, kemesra trenchibig køn:

—Mugucha kan srø camisanma para wesrumøn cha, køllin camisayu waya tsushinrrab. Treeg marene, srø camisabe ka minchen, inchagucha srøigwan waya tsusaibe køllin camisayube chi tab punrraamøn chibig køn.

³⁷ Katø muguen srø vinonma køllin kalusmerayu usrmøwei indan cha. Kaguende treeg marene, srø vinobe kalusmeran srurrøgøben, vinobe lushen, kalusmerabe ka kølsran cha.

³⁸ Inchawei srø vinone srø kalusmeran mariguo usramig køn cha.

³⁹ Katø mugucha øl-laig vinon muchibiima srø vinone mugucha muchig kømui indan cha. Kaguende: “Øl-laibe mas mayig køn” chibelø køn— cha, trenchibig køn Jesúsbe.

6

Jesúswei kusrenanøb pera uniilø isrin kwaløm tirigu tur lurrøb
(Mt 12.1-8; Mc 2.23-28)

¹ Kan isrin kwaløm Jesús tirigu ellmarig utuwan pureb ibene, nui kusrenanøb pera uniiløbe tirigu turmeran lurrøb ambabe, tirigu turwan tasiitøga katsøsrø, mabene,

² mø fariseosmera kørørøn nømune trenchibelø køn:

—Ya isrin kwaløm chigøben marmønrrai merigwan ¿ñimbe chindimba øyeg margue?— cha.

³ Inchene Jesús trencha løtabig køn:

—¿Ñimgan lemeelø køtirru cha, tru mana kørørøn Davidwan parøgwab, nui linchibelan parøgwab inchen, nø mandø indigwan?

⁴ Nøbe Tiuswei carpa ya tabzhigu kebya, Tiusweyasiitø tarømarig pirrimera, tru sacerdotesperatø maim pirrimera mendaibe mu mamønrrai meriilan nø mab, katø nøba purrab misagwangucha srørrøb indigwan.—

⁵ Incha katø trenchibig køn:

—Møg Misra Arrubiibe tru isrin kwaløm nan nø karunrrain kømøtø, maramdiigwane marøb, maramgaigwane marmub, nabe na asha karubig kur— cha.

Kan møg tasig mul-laig
(Mt 12.9-14; Mc 3.1-6)

⁶ Indiibe katøgan kwaløm isrin kwalømdøwei Jesúsbe judíosmera tulundzuni yau kebya, kusrenanøb pasrøbene, truyube kan møg nui kusrmay tasig mul-laig tøgag waben,

⁷ tru Moisés pørigwan kusrenanøbeløba, fariseosmerababe Jesúswan larab købelø køn, isrin kwaløm tamarøbig køtashchab, chigøben chi køptø.

⁸ Inchen nøbe chi isub pønrrailan asha, tru tasig mul-laig tøga møwane:

—Kurra, yu tøbøtag pasramisr— cha trenchibig køn.

Inchen tru møøbe nømuin tøbøtag kurra pasramisrøbig køn.

⁹ Inchen Jesúsbe katøgananelan trenchibig køn:

—Na ñimun payrrab inchar cha: ¿Maig maramigwan martrai Moisés pøriibe isrin kwalømbe chiwan martrain taig køh cha, tabiiteh, kabe kaiteh cha; kwamønrrai indamig køh, kabe kweetsamig kø, chindah?— cha.

¹⁰ Incha Jesúsbe mayeelø nuim pøtøgatan pønrrabelan ashabe, tru mowan trenchibig køn:

—Kwalwan larrøbichi— cha.

Inchen møøbe treeg inchen, nui kwalbe tabig kørørmisrøptinchibig køn.

¹¹ Inchen treekkurri kaneløbe truba nama, kangurrin kangurri Jesúswan chi kaig maramdiig køtashchab payib mendabelø køn.

Jesús nøashib karua øramelø doce lawa wesrub
(Mt 10.1-4; Mc 3.13-19)

¹² Tru kwalømmerawan Jesús kan tun palasrø Tius Møskaimba waminchab ya, kwalma ørøba treeg marøb wawa,

¹³ tør-rabene, nui kusrenanøb pera uniilan wama, truilai utu doce lawa, wesrawa, truilane nøashib karua øriilø køn cha, wamabig køn.

¹⁴ Truiløbe iilø køn: Simón, nundøwei katø Pedro cha munchi pasrig køben, Simónwei nuneg Andrés køben, Santiago køben, Juan køben, Felipe køben, Bartolomé køben,

¹⁵ Mateo køben, Tomás køben, Alfeowei nusrkai Santiago køben, Simón Zelote cha wamig køben,

¹⁶ Judas Santiagoi nusrkain køben, Judas Iscariote, tru wendø Jesúswan ashig kømui inchibelaingatø pasramisra, tranrrrabig købengue.

Misag truba nuwan Jesús kusrenanøb
(Mt 4.23-25)

¹⁷ Incha Jesús tun palasøngurri nomba kørraarua, kan chagu pasramisrøbig køn. Inchen truyu nui mendig amønibeløbe truba nu tulundzuna, pasrabig køn, Judea piraelø kerrigu, jerusalénsreelø køben, Tiroba, Sidønba tru mar pulusreelø køben,

¹⁸ truiløbe Jesúswan mörtrab amrruin købig køn, nømui kwanrrømeran tamartraimba. Inchen tru kwanrreelø trømbøig maringarub kwaimandzi- imera larrø trømbøig kuig melønrrai marinabeløbe tamariilø køben,

¹⁹ maya misaabe nun katøranrrab inchibelø køn, kaguende Jesúswei maramburab marøbig nuinukkurri webarrua, mayeelanba tamaren.

Kasrag købiiba, chigucha tab kømība
(Mt 5.1-12)

²⁰ Incha Jesús nui kusrenanøb pera uniilan ashabe trenchibig køn: –Mayanguen tab kuilø køn cha, ñim waachamerabe.

Kaguende Tius nø ashib karub waibe ñimuiwein køn cha.

²¹ Mayanguen tab kuilø køn cha, ñim mõi ya parøgwailøbe.

Kaguende maig palai melaigwan Tiusbe nømun unchaguen traniilø kønrrun cha.

Mayanguen tab kuilø køn cha, ñim mõi ya kishibeløbe.

Kaguende wendøbe indzønrrabguen cha.

²² Mayanguen tab kuilø køn cha,
ñimun misaamera tsalø ashib,
ñimune nøøø kønrrai tarømarøb,
ñimun tsalø waminab,

ñimui munchiwan ke kaigwan lataig indinab,
tru na, Møg Misra Arrubikkurrindø ñimun treeg marene.

²³ Treeg pureb kwalømbe ñimbe truba truba tab kui mørøb, truba kasraarab pørtray chibig køn. Kaguende truburø ñimbe srømbalarømbe truba nuig ketig utamig tøgagønrrun cha. Kaguende merrabsrø nømui kølli misaam- erama Tius maig karuigwan eshkabelan øyeegwei kaig marøbelø kuig køn cha.

²⁴ ¡Ay, ñim waacha, puarmeraimbe!

Kaguende yandø tsabøtø utarguen køn cha, kasrag købigwan.

²⁵ ¡Ay, ñim waacha, mõi ya chi palømø tøgarbe!

Parøgwai mörtrun cha.

¡Ay, ñim waacha, mõi ya indzabeløbe!

Ñimbe wamamøra isub kishchun cha.

²⁶ ¡Ay, ñim waacha, ñimun mayeelø tabig wamindinabelaimbe!

Kaguende ñimui merrabsrø kølli misaam- erama treetøwei tabig waminchibelø købig køn cha, tru ‘Tius maig karuigwan eshkabelø ker’ chib isabelan.

*Ñimun ashig kòmui inçhibelane tsalø ashmumig
(Mt 5.38-48; 7.12)*

27 'Inchendø ñim nan mørøbelane nabe trendamønrrun: Ñimun ashig kòmui inçhibelane undaarab, ñimun tsalø kui inçhibelane tabig marøb inday cha.

28 Ñimun 'trømbøig nebubash' chib wamabelaimbe ñimbe nòmune 'mayangub tabig nebunrray' chib trenday cha. Ñimun kaig marøbelaimbe, nòmuyasig Tiusha wamindamig kòn cha.

29 Møikkøben ñun kandarø maløbøtø pashene, kandariigwangucha yul cha. Møikkøben ñui turiwan kerrabene, ñui camisangucha ka srúa ibasingaru cha.

30 Ñun mu chi miabigwane tranøb, chiwan køben ñuiwan kerrabene, mi-møta cha.

31 Ñimgurrima katøganelø ñimuyasig tabig maramig palai inçhibeløbe, ñimgucha katøganelan treetøwei tab inday chibig kòn.

32 'Ñim ñimun undaarabelandø undaarawabe, ¿ñimbe chigúin tabig mar-trague? cha. Kaguende kaig marøbeløguen nòmun undaguelane nømgucha undaarabelø kòn cha.

33 Ñim ñimun tab inçhibelandøwei tab inçhabe, ¿ñimbe chigúin tabig mar-trague? cha. Kaguende kaig marøbeløgucha treetøweimbe marøbelø kòn cha.

34 Pebas tranøppe, katø utamdeelandø pebøbeløbe, ¿ñimbe chigúin tabig mar-trague? cha. Kaguende kaig marøbeløgucha katøganelø kaig marøbelandøweimbe, katø kerriguwan treetøwei utønrrab pebøbelø kòn cha.

35 Trune ñimbe ñimui ashig kòmui inçhibelane undaarab, tabig marøb, pebøb indamig kòn, katøyug utønrrab isua kømøtø. Treetø marene, ñimui utamibe truba nuig køben, ñimbe Tius Mayeelaim Pala Pasrabigwei ureemera kønrrun chibig kòn. Kaguende nøma chiweinguen ungwaguengarwan, larrø kailan, tab inçhibig kòn cha.

36 Ñimui Tius Møskaima lastima ashibig købene, ñimgucha treetøwei lastima ashibelø kuy cha.

*Katøganelane 'kailø køn' chib
(Mt 7.1-5)*

37 'Ñimbe katøganelan 'øyeeg køn, øyeeg marøbelø køn' chib waminçhimøtay, ñimungucha 'øyeelø, øyeelø køn' chimønrraimbe. Katøganelan kaigyu pønrrønrrai pønsmøtø, ñimun treetøwei kaigyu pønrrønrrai pønsmønrørraimbe. Ñimun kaig maren, ulø paymø pesannay, ñimungucha Tius ulø paymø pesannailø kønrrappe.

38 Katøganelan tranay; ñimungucha tranrrun, talegayu tab unaasig tingandø kørøguana, pinølusam netsøganig. Kaguende ñim kanelan maig unaasha traniiibe, ñimungucha treetøwei unaasha tranrrun— chibig køn.

39 Incha katø Jesúsbe 'øyeeg lataitøwein køn' cha, kemesra trenchibig køn: —¿Kan ashchab kaimabiima katøgan ashchab kaimabigwandøwei srúa inrrautah? cha. ¿Pailøba treeløtøbe trabyu kegørrømønrraitarru? chibig køn.

40 Kan kusreb mendig megabiibe nui kusrenanøbigwan purab nuig kømøn. Inchendø chi kusremigwan ne kusrewabeguende, nun kusrenanøbig lataitøwein kønrrun.

41 '¿Chindimbarre ñui nunewan kabyu shauzhig wabigwangøba ashku cha, tru ñuin kabyu nu tsig wabigwanguen ashmubendøbe?

42 Inçhawei ñitøweinguen ñuin kabyu nu tsigwan ashmubendøbe, ñui nunewane chincha øyeeg chinrragu: "Nai nuneg, ¿ñuin kabyu shauzhig wabigwan wesarruah?" cha. ¡Ñi, palatø tabig! Ñuin kabyu nu tsig

wabigwanmerrig wesru chibig kɔn. Treenchabe si, ñui nunewein kabyu shauzhig wabigwan wesrumig tab ashchabguen cha.

Tusrbe mamikkurri asig kɔn
(Mt 7.17-20; 12.34-35)

⁴³ Kan tab tusrbe kaig mamig niimúig kɔben, katø kan kaig tusrbe tab mamig niimúig kɔn cha.

⁴⁴ Kaguende tusrmørig chi mamig niguen tabig kui, kaig kui truyu asan cha. Kal tusrmerayugurri yashig lurrmøwei, kaldø misrøb tusryugurri uvas lurrmøwei inchibelø kɔn cha.

⁴⁵ Inchawei kan møg tabiibe tabig isuilan nui manrrau esegabig kua, truyugurrimbe tabig wesrub wamindan. Inchen kan møg kaibe kaig isuilan nui manrrau esegabig kua, truyugurrimbe kaig wesrub wamindan. Inchawei nui manrrau chine isua tøgagúilø pinøguchen, nui triibe treeg wamindan chibig kɔn.

Pailø ya marøbelan kemesra wamindig
(Mt 7.24-27)

⁴⁶ ¿Ñimbe nane chindimba: “Señor, Señor” chib wamøgue cha, na maig karuigwane møra marmeelø kɔbendøbe?

⁴⁷ Mugucha naimay arrua, nan møra, na maig taigwan marøbigwane, øyeeg møg lataig kɔn tamønrrun cha:

⁴⁸ Truibe kan møg yawan martraptø pirøwanmerrig sruyu larrayamnegatig umbu lalla, trugurrimbe tru srug pala yawan niga pasrønrrabigwan marøbig lataig kɔn cha. Inchen pibe nurawa, arrua, tru yawan purø trømbøig neguchib megambuagucha, kɔnøgønrrab kaiman cha, kaguende purø may mara pasrig kua.

⁴⁹ Inchen kan møg nan mørendø, na maig karuigwan marmíbe, nui yawan niga pasrønrrabig srug pusrmøtø, ka pirø palatø kusrubig lataig kɔn cha. Pi nurawa arrubig, tru yawan mur megambub neguchene, tru yabe kebeñen, kerrigu pinisaig kørromisran— cha, trenchibig kɔn.

7

Suldau sətøwan nø karub pera pasrabigwei mendig megabigwan Jesús tamarøb

(Mt 8.5-13; Jn 4.43-54)

¹ Yandø misagwan Jesúsbe chab waminchabe, Capernaumsrø kebibene,

² truyu kan romanosmerai suldau, cienelan ashibig, centuriòn taig, kan karuindiig megabig truba undaaraig tøgagúibe, truibe kwanrrøtøga yandø ke pinamdø palabig tsubig kɔn.

³ Inchen tru cien suldaumeran ashibiibe, Jesúswan wamindi mørabe, judío misaameran karubelø kølli misaameran karua ørøbig kɔn, nui kwanrriigwan tamartrab attrai.

⁴ Inchen nømbe amba, Jesúsweim pulu kemallabe, ke tiusmanda chib truba inchib trenchibelø kɔn:

—Tru møwane ñi treeg ka purugumdiig treeg møg kɔn cha.

⁵ Kaguende yu nam warain pirau maya misagwan undaguig kua, nøashib nam judíosmera tulundzuni yawan maringaruig kɔn— chib.

⁶ Inchen Jesúsbe nømbe iben, yandø yau pub lutau ambene, tru suldaumeran ashibiibe nui trendø linchibelan møilan køsrøn trenchinrrai karua ørøbig kɔn:

—Señor, òyangatiizhiitø attra tan chinrrai. Kaguende ñi nai yau kebat-traimbe, nabe trengatig kòmuinatan cha.

⁷ Incha treekkurri ni naashibguen ñun lanrrab arrumur cha. Tammisr cha, treetø chirra chibig kòn. Nai karuindiig megabig tammisrig kònrrai.

⁸ Kaguende nagucha mas nørreelø karua pasrig kur cha. Katø treeg kòben na karub tøgagüilø suldaumera tøgag kur cha. Truilanma na mógigwan kòben: “Inrrø” chibene, ib; katø na mógigwan kòben: “Amø” chibene, arrub; katø nai karuindiig megabigwan: “Chigøben mar” chibene, marøb inchibig kòn cha. Nøbe trendan— chibelø kòn.

⁹ Inchen Jesús iigwan mørabe, tru møwan nøguen kwaara asha, nui mendig truba nu misag amøñibelan keesha ashabe, trenchibig kòn:

—Nabe ñimun trendamønrrun cha: israelitasmerai utuguen isubigwan nainug pasrig øya nuig wetørramur cha, i møwei lataig.—

¹⁰ Indiibe tru karua øriilø katøle yau pubene, tru karuindiig megabiibe tabikken waptinchibig kòn.

Jesús kan piudai nusrkawan katø øsiirangarub

¹¹ Yandø øyeeg chab puraiben, Jesúsbe kan pueblo Naín taisrømay iben, nui kusrenanøb pera uniiløba, truba nu misaaba linchibelø kòn.

¹² Inchen tru puebloyu kebambam yaskab pulu pubene, kan kwaigwan sørønrrab muta, amrrubelø kòn, tru kwabiibe kandø nusrkain kòben, usrimbe piuda.

¹³ Inchen Señorbe tru ishuwan lastima ashabe, trenchibig kòn:

—Kishmøta— cha.

¹⁴ Incha Jesúsbe kemalla, taulwan katøraben, muta ambubeløbe pønrramisren, Jesúsbe kwaigwane trenchiptinchibig kòn:

—Matsinø, na ñun ¡kurrø! char— cha.

¹⁵ Inchen tru kwabiibe kurra, wamisra, waminchib mendøben, Jesúsbe usran tranøbig kòn, pera inrrai.

¹⁶ Inchen iigwan ashene, nòmune mayeelanba korig kòbiitø ke chindamdiig kòben, Tiuswan truba tabig waminchib trenchibelø kòn:

—¡Tius maig karuigwan eshka big purø nuig namui utu kurrin kòn! chib. ¡Tiusbe nui misagwan purugunrrab arrin kòn!— chib.

¹⁷ Inchen Judea pirau kerriguba, katø tru pirau tru pøtøgatanwan kerriguba Jesús chi marigwan wammørbelø kòn.

Juan Bautistai kusrenanøb pera uniilø

(Mt 11.2-19)

¹⁸ Inchen Juanwei kusrenanøb pera uniiløbe øyeeg purayailan kerrigu nun eshkaben, Juanbe nui mendig amøñibelan pailan wama,

¹⁹ Jesúswan trencha payrrai ørøbig kòn: ¿Tru Cristo attrabig kòbiibe ñi kuin kui, kabe nambe katøganun muniiram kuin kui?

²⁰ Inchen tru Juanwei kusrenanøb pera uniiløbe amrrua, Jesúswan kemalabe, trenchibelø kòn:

—Juan Bautistabe, ñun payrrai, namun karua ørtan cha. ¿Tru attrabig kòbiibe ñi kuin kui, kabe nambe katøganun muniiramig kuin chindi?—

²¹ Inchen tru uras, Jesúsbe kwanrreelø truba yamelan tamarøbig kòn, chigurrimbunø kaig kwanrreø tøgarmen kòben, kwaimandzig tøgarmen kòbengue. Katø truba yam kabgailan ashchai tamarøb inchibig kòn.

²² Inchabe Jesúsbe Juan karua øriilan trenchibig kòn:

—Amba, ñim chi mørigwan, ñim chi asigwan Juanwan eshkanrrigay cha. Kabgailøbe ashen, cojosmerabe amben, asr trerab kwanrreø tøgarmenane

nømui kwanrrøwan tamara chishmariilø køben, kalu mørmeeløbe mørøbelø misren, kwaitløbe øsiraben, waachamerane Tiuswei tabig srø wamwan eshkab kusrenaniilø køn cha.

²³ Mayanguen tab kuig køn chibig køn, nan peg kuitamab isumøtø, na kuitamab isubigweimbe.—

Juan Bautistaimburab maig kuigwan Jesús waminchib

²⁴ Incha Juanwei kusrenanøb pera uniiø ambene, Jesúsbe Juanweimburab truba nu misagwan trenchib waminchib pølbaserøbig køn:

—¿Misag warab waraimøsrømben ñimbe chi ashchab webangue? cha. ¿Kan caña ambumay, imay isig srua yainaptiigwandehe? cha.

²⁵ Trube, ¿chi ashchab webangue? cha. ¿Kabe kan møg truba tabig kewigwandehe? cha. Ñimbe ashibelø køn cha, truba tabig kebeløbe nømun kawe marøg købendø marøb, reymerai yau purrabelø kui cha.

²⁶ ¿Trube, treeg købene, chi ashchab webambig kø? chibig køn. ¿Kabe Tius maig karuigwan kan eshkabigwandehe? cha. Øø, nabe ñimun trendamønrrun cha: Treegwanwei ashchab webambig køn cha, trurrigu Tius maig karuigwan eshkabigwan lataitøguen kømø, mas nuigwan.

²⁷ Juanbe tru Tiuswei wamwan pørigu øyah taig truig køn cha: “Au, nabe nai wam srua inrrabigwan ñui merrab ørar taig, ñui maywan ñui merrab tamartrai.”

²⁸ Nabe ñimun trendamønrrun chibig køn: Maya møguelø kal-labelai utu tru Juan lata nuibe muguen kaagüig køn cha. Inchendø treeg kuindøgucha, Tius nø ashib karub wainuube kan møg chigucha kømíikken mas nuig køn cha, Juan lataguen kømø.—

²⁹ Inchen maya misaameraba, tru romasreelayasig an utabeløba Jesús wamindigwan mørøbe, Tiusbe maig kønrrabigwan tabig sølgandø marøbig kuin køn chibelø køn, tru Juan piu umbu ulsrainabeløbe.

³⁰ Trune tru fariseosmeraba, tru maig maramigwan martrai Moisés pørigwan treeg maramig køn chib kusrenanøbeløbabe nømuimburab Tius maig martrab isua indigwan kaashibelø køn, kaguende truiløbe Juan piu umbu ulsraimeelø kua.

³¹ Katø Señorbe trenchibig køn:

—¿Møin kwaløm møguelane chi latailø køn chinrrab køh? cha. ¿Chi lataig asønən chinrrab køh? cha.

³² Kan plazayu ureemera esheerrab purramisra, kangurrin kangurri øyeech chib trashib purrabelø latailø køn cha:

“Nambe ñimuyasig luswan urringucha,

ñimbe pailamøwei;

cantailø isumdeelø cantaben,

ñimbe miirab kishmøwei indan” chibelø latailø.

³³ Pøs Juan Bautista pirri mamøwei, vino muchimøwei inchibig arrubene, ñimbe nune, kwaimandzig tøgäig køn, chibelø køn.

³⁴ Inchen tru Møg Misra Arrubig mab, muchib inchibig arrubene, trube, ñimbe menrra maptiig køn tamba, menrra muchiptiig køn tamba, romasreelayasig an utabeløba, kaig marøb misaameraba linchibig køn tamba inchibelø køn.

³⁵ Inchendø mu møkken nebua isumgaig tru Tius marøb pasraigwane nui ureemerainug ashchai kenamaran— chibig køn.

Jesús Simón fariseowei yau

³⁶ Kan møikkøsrøn fariseo Jesúswan nøba lincha manrrab attrai eshkaben, Jesúsbe truigwei yau kebyabe, mishatsigu wamisrøbig køn.

37 Inchen tru puebloyutøwei kan kaig marøb ishug tsubig, tru fariseowei yau Jesús mab wan tai wammørøppe, kan alabastro limetayu truba may irrab aceite srua puabe,

38 kishib Jesúswei wendau srøb pulu wamisra, nui kappinwan Jesúswei katsig tambal pala kørøgøb sømara, trugurrimbe nui pusruutøga pinømøra, katsigu muchawa, yandø tru may irrab aceiten nui srøb pala itølushibig køn.

39 Inchen tru fariseo Jesúswan manrrab attrai eshkabig ashabe, nuinetø treeg isubig køn: “I møg Tius maig karuigwan eshkabig kuimbe, nun katøraibiibe mu ishug kui, kaig marøb ishug kui asin kømbala” cha.

40 Inchen Jesúsbe fariseowan trenchibig køn:

–Simón, ñun chigøsrøn tamig tøga war– cha.

Inchen fariseobe:

–Kusrennøbig, eshkarra– chiben,

41 Jesúsbe trenchibig køn:

–Kan an pebigwan pailø møguelø nun ulømisrar købig køn cha, kane quinientos denarios ulø købene, kane cincuenta ulø købig køn cha.

42 Indiibe truiløbe chugurringuen tranrrabgailø køben, tru an pebøibiibe pailanba paymørrab kagøbashiitindig køn cha. Treeg købene, ¿i pailøbe tru an pebøbigwan møg mas undaererah?– cha.

43 Inchen Simónbe trenchibig køn:

–Tru mas nu anwan ulø paymø, kagøbasinabig, na møren truig kømmørgøtan– cha.

Inchen Jesúsbe trenchibig køn:

–Sø isua trendan– cha.

44 Inchen Jesúsbe ishuan keesha ashabe, Simónwane trenchibig køn:

–¿I ishuan ashkuh? cha. Nabe ñui yau kebarruben, nai katsigwan kwalamig ñibe nan pi tranmuben, trune i ishube nui kappinwan kørøga sømara, nui pusruutøga pinømørtan cha.

45 Ñibe nan muchamuben, trune nøbe na kebarrinukkurri nai srøbmeran muchab wan cha.

46 Ñibe nai tur pala aceite srølmuben, nøbe may irrab aceiten nai srøb pala itø lushtan cha.

47 Inchawei ñun trendamønrrun chibig køn: I ishubei truba nørø kalø mariilan nun ulø paymø pesannaikkurri nøbe truba truba undaaran cha. Inchen mōikkøben tre nu kōmíggwan ulø paymø pesannainabiibe, tru ulø paymø kagøbashiigwane tre undaaramøn– cha.

48 Inchabe tru ishuwane trenchibig køn:

–Ñui kaig mariiløbe payamig kōmígg, pesannaig kørømisran– cha.

49 Inchen truyu lincha mab nøba purrabeløbe, nōmasiyaitø trenchib mendabelø køn:

–¿Chigøben kaig mariilanguen ulø paymø pesannamig kønrrai marøibiibe, iibe mu møg køh?– cha.

50 Inchen Jesúsbe ishuan trenchibig køn:

–Ñi ñui isubigwan nainuutø pasra tøgagúikkurri, kaigyugurri wesraig kørømisran cha, mōimbe chi isumø, inrrø– cha.

8

¹Yandø iig chab puraiben, Jesúsbe tru tabig srø wam Tius nø ashib karub wainuguigwan eshkab kusrenanøb pueblomerasrø yamera tsitsø pønrrabsrø uñibig køn, nui doce kusrenanøb pera uniiløba.

²Inchen katø mø ishumburmera køsrøn nø kwaimandziimeran webus-riiløba, kwanrrømeran tamariiløba linchibelø køn. Inchen truilai utube tru siete kwaimandziimera webambinabig, María Magdalena køben,

³Herodeswei yau ya ashib tsubig Cuzai srai Joana køben, Susana køben, katøgan ishumburmera køben linchibelø køn. Iiløbe nømui chi tøgagúiltøga Jesúswanba, nui kusrenanøb pera uniilanba purugubelø købig køn.

*Kan kwallibig mandø kwaligwan kemesra kusrenanøb
(Mt 13.1-9; Mc 4.1-9)*

⁴Misag truba nørrø tulundzuna, chu puebloyuelø køben, Jesúswan itømaytø ashchab webamben, nøbe 'øyeeg lataitøwein køn' cha, kemesra waminchib trenchibig køn:

⁵—Kan kwallibiibe nui yellwan tsurøb kwallchab webyan cha. Incha tsurøb ibene, kanbalø yellbe mayu kørrøben, itøbunøben, illimera amrrua, man cha.

⁶Inchen katøganbaløbe srug trølyu kørra, kal-lappe, kal-labendø, pirø søig kømøwagurri mul-lan cha.

⁷Kan utu yellmerabe kalshau utu kørra, kal-laben, kalbe kanbalatø nørrørawa, chab tsibisan cha.

⁸Inchen kanbaløbe yell tab pirau kørra, nørrørawa, tabig misra, kan yellgur-rindø trulzheelø ciengatig nigan— cha.

Iigwan trenchabe, Jesúsbe truba mui waminchib trenchibig køn:

—jMøramig kalu pønraibe, mø!— cha.

*Mandøgurri 'iibe øyeelø latailø køn' cha Jesús wamindig
(Mt 13.10-17; Mc 4.10-12)*

⁹Inchen nui kusrenanøb pera uniiløbe:

—¿Tru 'øyeeg lataitøwein køn' cha wamindiibe tappe, mandø køh?— cha payen,

¹⁰Jesúsbe trenchibig køn:

—Tiusbe nø ashib karub wainug mu asiimíg tøgagúilan ñimun ashchai tranan cha. Trune katøganelane 'øyeeg lataitøwein køn' chib wamindiiløtøga eshkab waminchar cha,

“nømbe ashippe ashendø,
ashmøwa lataig kørrømisrøb;

mørøppe mørendø,

chigúi mørmøwa kørrømisrøb inchain” cha.

'Iibe kan ellmarøbig lataitøwein køn' cha wamincha pasrigwan Jesús tab eshkab

(Mt 13.18-23; Mc 4.13-20)

¹¹Tru 'øyeeg lataitøwein køn' cha, kemesra wamindiibe øyeeg chibig køn cha: Tru yellbe Tiuswei wamwan eshkabig køben,

¹²tru may pulu kørrab yellmerabe, tru Tiuswei wamwan mørøbelan truilan eshkabig køn cha. Inchen nugwaimandziibe arruppa, nømui manrrau tru wam ellmarigwan kerran cha, nøm Tiuswan køreben, kaigyugurri wesrailø kømønrrai.

¹³Inchen srug trølyu kørrab yellbe tru Tiuswei wamwan møra, truba truba tab kui mørøb utabelan, truilan eshkabig køn cha. Inchendø truiløbe

chi srølgar kua, maya yanagatiitø kørwa amøña, chigøben maig inchibelø kətashchab pubene, tarømisrøptinchibelø, truilø køn cha.

¹⁴ Inchen tru kal shau utu kør rab yellbe tru wamindigwan mørøbelan eshkabig køn cha. Inchendø truiløbe nømui ambam maywan ambub køben, tru chine, chine menrra isubiibah, puamistrøg købiibah, chigurribunø marøb kasrag amøñinrrab treeg marøg købiibatø kasran cha. Incha tru ellmarigwane nørørabashmøn cha.

¹⁵ Inchen tru tab pirau kør rabiibe tru nømui manrrau purø tabig isub, trurrigu səlwan isub, Tiuswei wamwan møra, truigwan elachimø, tøgagua, melabig meløwa, ellmarig misrøbelan eshkabig køn cha.

*'Aceite lámpara lataitøwein køn' cha, kemesra wamindig
(Mc 4.21-25)*

¹⁶ 'Mugucha kan aceite lámparan piløgøppe, chitøgagøben kasrømøwei, kabe cama umbu pasrtrab kømøweim piløgøbelø køn cha. Treeg kømøtø, kerrubelan tør kønrrai, pala pasrøbelø køn cha.

¹⁷ Inchawei chitøgucha soriibe soriitø kørømisrmø, kenamistrun cha. Katø chigøben ashmønrrai kasra pasriibe, nebua asiimúg kørømisrmøtø, toryu webattrun cha.

¹⁸ 'Inchawei ñim morigwane tab isua asha kuy cha. Kaguen tøgagwane masken tranen, trune chigaigwane nui lamøtiig tøgagurmab isuiwanguen kerraig kønrrun— chibig køn, Jesúsbe.

*Jesúswei usrimba, nuneløba nun lab
(Mt 12.46-50; Mc 3.31-35)*

¹⁹ Inchen Jesúswei usrimba, nuneløba nø wainug pubendø, menrra nu misag pasrøwa, nuim pulugatig kemallchab kaima køben,

²⁰ møikkøsrøn Jesúswan trencha eshkabig køn:

—Ñui usrimba, ñui nuneløba wambig pønrran cha, ñun ashchab isua amrrua.—

²¹ Inchene Jesúsbe lötappe trenchibig køn:

—Tiuswei wamwan møra, trunun marøbeløbe, nai usri, nai nunelø køn— cha.

*Isig ichibigwanba, pi welarmeranba Jesús kønøbashmub
(Mt 8.23-27; Mc 4.35-41)*

²² Kan kwaløm Jesús nui kusrenanøb pera uniiløba barcoyu kebyabe, trenchibig køn:

—Pisu ambøgatøsrømay larraamun— cha.

Inchabe ambubelø køn.

²³ Incha larraambub ambub købene, Jesúsbe barcoyu kiptinchen, mømibe tru nu pisuyube isig ichibig purø trømbøig namab webarruben, pibe barcoyu michab mendøben, yandø ke asentanrraptiig ichibig køn.

²⁴ Inchen Jesúswan kasrønanabe trenchibelø køn:

—¡Kusrennøbig! ¡Kusrennøbig! ¡Nambe piu ke chab asentab meler!— cha.

Inchen Jesúsbe kurra, isig ichibigwanba, pi welar trømbøig latøgushib kurrabelanba pasrambunrrai kandø wamabig køn. Inchen truiløbe pønrrambuben, yandø kerrigu wasrønzhig kørømisrøbig køn.

²⁵ Inchen Jesúsbe nui kusrenanøb pera uniilan trenchibig køn:

—¿Ñimui isubigwan nainuutø pasra tøgagúigwane chinchigue?— cha.

Inchen nømbe truba kwaariilø, kan øyeebe mandø kermab isub kangurrin kangurri trenchibelø køn:

—¿Iibe mu kerah cha, isig ichibig lata, pi latøgushib kurrabig lata, nø pasrambungarubene, iiløguen nun mørtrappe?—

Kan gadarasriig kwaimandzig tøgaig

(Mt 8.28-34; Mc 5.1-20)

²⁶ Incha yandø gadarenosmeraim pirausrø larraambubelø køn, tru Galilea nu pisu ambøgatømaysrø.

²⁷ Incha Jesús barcoyugurri pirau pinaiben latatø, tru puebloyuig kan møg kwaimandziimera tøgaig katønrrab webibig køn, truike manasrøngurri chigucha kemøwei, yau tsumøwei inchibig, sørin trabmerayutø tsubig.

²⁸ Incha Jesúswan ashippe, nui merrab mur trashib tømbsrøb peñabe, trenchibig køn:

—¿Ñibe nane chi martrab inchigu cha, Jesús, Mayeclaim Pala Pasrabigwei Nusrkai? ¡Ñi nan purø trømbøig møra megamig kømønrrai marmørrurriig!— chib.

²⁹ Kaguende Jesúsbe tru trømbøig maringarub kwaimandzigwane: “Møweinukkurri webinrøø” chibguen indin køben nøbe trendaig køn, kaguende truigwane kwaimandziibe katø katø nø merrarrowa sruaig købig kua. Inchen chu imønrrai, misaamerabe tasiimeran srøbmeran cadenastøga lusra tøgagüingucha, nøbe cadenasmeran lurren, kwaimandziibe mu misag warab waraimøsrø ingarubig køn.

³⁰ Inchen nune Jesúsbe payibig køn:

—¿Chi munchi kugu?— cha.

Inchen nøbe løtappe:

—Nabe: “Legión”, munchi kur— chibig køn, kaguende tru møweinuube kwaimandziimera purø nu kebamba kua.

³¹ Incha tru kwaimandziimerabe ‘tru purø trømbø umbu trabyumay ørmørrurriig’ chib truba rugabelø køn, Jesúswane.

³² Inchen tru tunyube kuchimera truba nu søtø mab llirab amøñiben, tru kwaimandziimerabe ‘tru kuchimerayu kebambingarurra’ chiben, Jesúsbe ka kebambashibig køn.

³³ Inchen kwaimandziimerabe møweinukkurri webamba, kuchimerayu kebambene, tru kuchi søtøbe truba trømbø lendeyu lula, chab pinøgørraptincha, pisuyu kegørra, pi keesra chab kwabelø køn.

³⁴ Inchen tru kuchi ashibelø treeg purayaigwan ashabe, kwaariilø lula, puebloyu køben, wambig nøørowansrøn køben eshkaab ambubelø køn.

³⁵ Inchen misaamerabe chi purayaigwan ashchab werrua, Jesús waisrø pubene, tru kwaimandzig tøga møg købiibe Jesúswei srøb pulu, yandø asru keweig ke yandø tabig wai ashibelø køn. Inchabe truba kørig kui inchibelø køn.

³⁶ Inchen tru treeg purayaigwan ashibeløbe tru kwaimandzig tøga mowan Jesús mandø incha tamarigwan katøganelan eshkaben,

³⁷ tru Gadara pirau maya misaamerabe Jesúswan nømuinukkurri ‘irra’ chib truba rugabelø køn, kaguende nømbe truba truba kørig kuilø kua. Inchen Jesúsbe barcoyu kebya ibig køn.

³⁸ Inchen tru kwaimandziimera webambinab møøbe:

—¿Ñui mendig arruah?— chib truba inchen,

Jesúsbe trenchibig køn:

³⁹ —Ñui yamay katø inrøø cha, ñun Tius chigøben yeeg nørriig mariilan kerriguh eshkanrrab.—

Inchen tru mōøbe, Jesús nun øyeeɔ nørreelø marigwan kerrigu eshkab ibig kōn tru pueblo ørøba.

Kan ishuwei kwanrrøwan Jesús tamarøb
(Mt 9.18-26; Mc 5.21-43)

⁴⁰Incha katø Jesús pisu ambøgatøsrømay larraibene, mayeeløba munig kuig kōppe, misaabe nune truba kasrag utabelø kōn.

⁴¹Inchen kan mōg judíosmera tulundzuni yau chi maramigwan ashibig, Jairo taig, puabe, Jesúswei katsig pulu tømønrsra, nui yamay tiusmanda arrubsrøumugu chibig kōn,

⁴²kaguende nui kandø nimbasr doce añosig tøgagúibe ke kwanrrab inchib tsuben.

Inchen Jesús ibene, nu misag sötøbe nui mendig trag marøb ambubelø kōn.

⁴³Inchen tru ututø kan ishug doce años ørøba ani ib kwanrrø tøgag kua, nui chi tøgagúigwan kerrigu patsøgøben, mugucha tamartrab kaimaig kōbig kōn.

⁴⁴Tru ishuube Jesúswan wendaugurri kemallippa, Jesús nø kewagúig urøzhigwandø katørabene, tru urastø tru ani ibiibe pasramisrøptinchibig kōn.

⁴⁵Inchen Jesúsbe trenchibig kōn:

—¿Nane mu katørah?— cha.

Inchen mayeeløba: “Ñune mu katøramer” chiben, Pedrobe trenchibig kōn:

—Kusrennøbig, misag sötøbe ñun yeeg tinmarøb ambumay imay trawagut-san— cha.

⁴⁶Inchen Jesúsbe trenchibig kōn:

—Møikkøben nan katørainrrun cha. Kaguende nai maramburab marig nainukkurri webrain kui mørar— cha.

⁴⁷Inchen ishuube nø treeg marigwan chi søramgaig kuin kui ashabe, itønab arrua, Jesúswei merrab tømønrsøb srala, maya misagwei merrab chindimba katøraigwanba, katø tru urastø mandø tabig kørørmisrigwanba eshkabene,

⁴⁸Jesúsbe trenchibig kōn:

—Nimbasr, ñui isubigwan nainuutø pasra tøgagúikkurri tamarig kørørmisran cha. Chi isumø, inrrø— cha.

Jairoi nimbasrwan Jesús øsiiranøb

⁴⁹Inchen Jesús waminchib pasramnetø, tru judíosmera tulundzuni yau ashib karubigwei yaugurri møikkøsrøn puabe, unai møskawane trenchibig kōn:

—Ñui nimbasrbe kwabguen indan cha. Kusrennøbigwan mas chi chimøta— cha.

⁵⁰Inchen Jesúsbe mørabe trenchibig kōn:

—Kørig kui inchimøtø, køreptø køreu cha, ñui nimbasrbe tammisrtrun— cha.

⁵¹Incha yau puabe, Jesúsbe mungucha kerrubashmøtø Pedronbah, Jacobonbah, Juanwanbah unai møskalanbatø kerrubashibig kōn.

⁵²Inchen mayeeløba unan isub waminchib truba kishib kōben, Jesúsbe trenchibig kōn:

—Kishmøtay cha, unøbe kwaig kømøtø, ka kiptø tsun— cha.

⁵³Inchen nømbe kwain tsui asha kua, Jesúswane ka indzatø mørøbelø kōn.

⁵⁴Inchen unan Jesúsbe tasigu kemøra, mur wamab trenchibig kōn:

—Ishug-unø, ¡kurrø!— cha.

⁵⁵Inchen espíritube katø nuinug puben, øsiirawa tru urastø kurraptinchen, Jesúsbe manrrai manningarubig kōn.

⁵⁶ Inchen mōskaløbe ke kwaara asha kōrrōmisren, Jesúsbe chi purayaigwan nōmune mungucha eshkamōnrrain karubig kōn.

9

Jesús nui doce kusrenanøb pera uniilan karua ørøb
(Mt 10.5-15; Mc 6.7-13)

¹ Jesús nui doce kusrenanøb pera uniilan wama, tulundzunabe, mayan kwaimandziimeran wambig webusrøb, kwanrømeran tamarøb inchai, maramburab maramigwanba, mu chindamgaig karumigwanba tranøbig kōn.

² Incha Tius nø ashib karub wainuguigwan eshka kusrenanrraimba, kwanrreelan tamartraimba karua ørabe,

³ nōmune trenchibig kōn:

—Mayuweimbe chigøben srua ammønrrigay cha. Pøtønain tsig srua ammøwei, wasr ila ammøwei, pirri srua ammøwei, an srua ammøwei, turingucha pagatø kōmø, kandø kewa ambay cha.

⁴ Chugøben puebloyu yau puppe, webamba ambamnegatig truyutø kōrrōmisrtrigay cha.

⁵ Inchen ñimun wamab utag kōmui indinuube, trube, tru puebloyugurri webamrrappe, ñimui srøbyu usrøwan chishtø kōrrøgønrrigay cha. Treeg marøppe, trube ‘ñim kaasig kōbene, mōimbe ñim kusrenrrigay’ chib eshka.—

⁶ Inchen nōmbe webamba, pueblomørig puraambub ambuppe, Tiuswei tabig srø wamwan eshka kusrenanøb, chutøgucha kwanrreelan tamarøb ambubelø kōn.

Jesúsuan Herodes mu kuinguen mōrmub
(Mt 14.1-12; Mc 6.14-29)

⁷ Inchen Galilea pirau ashib karub wabig Herodesbe Jesúsweimburab wamindi mørøb nø chi mariilan kerrigu wammørabe, chi isum kuinguen mōrmig kōn, kaguen mōiløgøsrøn: “Juan Bautista kwailai utugurri katø kurriinrrun” chiben.

⁸ Inchen kan utueløbe: “Tius maig karuigwan eshka Elías kenamisrin kōn” chiben, kan utueløbe: “Tius maig karuigwan eshka merrabsriig mōikkøben katø øsiirain kōn” chiben, inchibelø kōn.

⁹ Inchen Herodesbe trenchibig kōn:

—Juanwane natøwei turwan paringarui kōn cha. ¿Trube, chigøben na yeeg wamindig wammøriiløbe mu kōnrrab kōh?— cha.

Incha Herodesbe Jesúsuan ashig kui inchibig kōn.

Tratrø mil mōguelan Jesús mamig tranøb
(Mt 14.13-21; Mc 6.30-44; Jn 6.1-14)

¹⁰ Jesús nøashib karua øriilø katø amrruabe, nōm chi marigwan nun eshka aben, nōmune Jesúsbe Betsaida pueblosrømay nōmundø nøørø pera ibig kōn.

¹¹ Inchendø tru nu misag sətøbe wammørøppe, wendautø amben, Jesúsbe tabig wamab uta, nōmun Tius nø ashib karub wainuguigwan waminchib, kwanrøwan tamaramig palai melabelane tamarøb inchibig kōn.

¹² Inchen yandø mawab misrøb arruben, nui doce kusrenanøb pera uniiløbe Jesúsuan kemallabe, trenchibelø kōn:

—Misaameran yandø amrrai, ungwa chi cha, puluwandø yamera pønrrabsrøn kōben, chugøben nøørøsrøn kōben, ya peba kōrrōmisrtrappa, mamig penønrrappa amrrain cha. Kaguende yube nambe mugucha warømønug pønrrer— cha.

¹³ Inchene Jesúsbe trenchiptinchibig kōn:

—Manrrai ñim manray— cha.

Inchen nømbe trenchibelø køn:

—Nambe tratrøgatø pirrimbah pagatø peskaubatø tøgaguer cha. Ya nu misagweimbe srøig penørrab ambatøwein kønrrun— cha.

¹⁴ Kaguende møgueløtø tratrø milburab købig køn. Inchen Jesúsbe nui doce kusrenanøb pera unilan trenchibig køn:

—Kan sötø, cincuentabatø, cincuentabatø purramisringaruy— cha.

¹⁵ Inchen treeg maren, misaabe mayeeløba chab purramisrøbelø køn.

¹⁶ Inchen Jesúsbe tru tratrøgatø pirriwanba, pagatø peskaumeranba nui tasku muta, srømbalaneb neesha, Tiuswan ‘mayanguen pay’ cha, pirrimeran pirishabe, nui kusrenanøb pera unilan misagwan pirishinrrai tranøb big køn.

¹⁷ Inchen mayeeløba øska ma kørrømisren, pitis undailan tasinmerayu netsøbatø doce tulishibelø køn.

Pedrobe Jesúswan: “Cristo køn” chib

(Mt 16.13-19; Mc 8.27-29)

¹⁸ Kan kwaløm Jesús nøørøsrø Tius Møskaimba waminchib wabene, nui kusrenanøb pera uniløbe nøba purrøben, Jesúsbe trencha payibig køn:

—¿Misaamerabe nane mu køn tah?— cha.

¹⁹ Inchen nømbe trencha løtabelø køn:

—Møiløbe: “Juan Bautista køn” chiben, møiløbe: “Elías køn” chiben, møiløbe: “Tius maig karuigwan kan eshkabig merrabsriig katø øsiirainrrun” chiben indan— cha.

²⁰ Inchen Jesúsbe trencha payibig køn:

—¿Trune ñimbe nane mu køn chinrrague?— cha.

Inchene Pedrobe trencha løtabig køn:

—Ñibe Tiuswei tru Cristo køn— cha.

Jesús nø kwamigwan eshkab

(Mt 16.20-28; Mc 8.30-9.1)

²¹ Inchen Jesúsbe iigwane mungøben eshkamønrrain karubig køn.

²² Inchabe trenchibig køn:

—Møg Misra Arrubiibe chinetø kaig indinab megamig nebunrrun cha. Katø misagwan karubelø kølli misaamera køben, sacerdotemeran karubelø køben, Moisés pørigwan kusrenanøbelø køben nune kaasig kømig kønrrab køn cha. Incha kweechen, pøn kwalømyube kusraig kønrrun— chibig køn.

²³ Incha mayeelan trenchibig køn:

—Møikkøben nai mendig uñig købene, nøasiitø nuimburabigwangøba isumøtø, kwalømmørig nui kuruswan muta, nai mendig arrum nebunrrun cha.

²⁴ Inchen møikkøben øsig kømigwangøba esegabiibe yandø pinab pinamig nebunrrun cha. Inchen nagurrindø kwabiibe managatig øsig kømigwan esegawa tøgagønrrun cha.

²⁵ ¿Kan møg yu pirau chine købigwan kerrigu nuindø maringucha, nøasiitø minchib, nøasiitø pinamigwei marøb indiibe, chiwein kui tabig kønrrab kø?

²⁶ Pøs møikkøben naimburappa, na wamindiilaimburappa kørig isub kørig kui inchibigwane, nune kørig purørtrun chibig køn, tru Møg Misra Arru-big tru nui tørguegwalmabiiba, nui Møskawei tørguegwalmabiiba, Tiusweindø tarø mari ángelesmerai tør pilabiiba arrua.

²⁷ Nabe ñimun cierton trendamønrrun chibig køn: Møiløgøben yu purrabelø Tius nø ashib karub pasraigwan ashmøwatøbe kwanrraamøn— cha.

*Jesús ke peemayig misrøb**(Mt 17.1-8; Mc 9.2-8)*

²⁸ Øyeeq taig trune wendau køsrøn Jesúsbe Pedronba, Juanwanba, Santiagonba pera, kan tun palasrø Tius Møskaimba waminchab nebibig køn.

²⁹ Inchen Jesúsbe Tiusba waminchib pasramnetø, nui maløbe ke peg lataig misrøptinchen, nui kewagúiløbe truba puløzhig tørgwalmabelø misrøbig køn.

³⁰ Inchen mømimbe pailø møguelø nøba waminchib kenamisrøptinchibelø køn. Truiløbe Moisésba, Elíasba,

³¹ nømbe tørguegwalmabig pinøgasrailø, Jesús Jerusalénsrø mandø kaig indinab megawa, kwamigwan waminchib pønrrabelø køn.

³² Inchen Pedroba, nui linchibeløba kigøbiitø ke chindamdø kuim purrøwagucha, kimø kasrig ka purrøwa, Jesúswei tørguegwalmabigwanba, tru pagatø møguelø nøba pønrrabelanba ashibelø køn.

³³ Inchen tru møguelø yandø Jesúsweim pulugurri tarømisra ambene, Pedrobe nøtøwei chi chib pasrarmabguen mørmubendø, trenchibig køn:

—Kusrennøbig, jnam yu pønrramibe purø tab køtan! cha. Pøngatø ya-ureg margun cha, kan ñui, kan Moiséswei, kan Elíaswei.—

³⁴ Inchen tru waminchib pasramnetø kan wañi arrua, nømun kasrøben, nømbe wañi umbu kørrømisra, Pedroba, Juanba, Santiagobabe truba truba kørig kui inchibelø køn.

³⁵ Inchen wañi umbugurrimbe kan wam trenchibig køn:

—Iibe nai Nusrkai, nai lawa wesruig køn cha. Nune møray— cha.

³⁶ Tru wambe yandø mas mørø waminchimuptinchen, Jesúsbe katø nøtø pasrai ashibelø køn. Incha nømbe tru chi asigtwane tru kwalømmerawane mungucha maizhikken mørø waminchimeelø køn.

*Jesús kan kwaimandzig tøga unan tamarøb**(Mt 17.14-21; Mc 9.14-29)*

³⁷ Katø kwaløm tunbalasrøngurri kørrørrubene, Jesúswan katønrrab truba nu misag werruben,

³⁸ mømimbe kan møg tru misaamerai utugurri truba mur wamab trenchibig køn:

—Au, Kusrennøbig, kabe tiusmanda nai nusrkawan ashibsrumuguh cha, nai kandø nusrkain køn cha.

³⁹ Nune kwaimandziibe merrarraben, nøbe møi møin trashibig køn cha. Inchen kwaimandziibe pirausrø kucha, itønangarub, triimay chall kutsingarub, purø trømbøig lastimaig marøb, jkatø! elachimøsrøatø inchibig køn cha.

⁴⁰ Inchen ñui kusrenanøb pera uniilan kwaimandzigwan webustrai na rugaben, kaiman— cha.

⁴¹ Inchen Jesúsbe trenchibig køn:

—jKan ñim møi misaamera kørenrrab inchimeelø larrø kailø! cha, ¿Nabe managatig ñimba unamig kønrrerah cha, ñimun øyeeq ashiptø? Ñui nusrkawan yu srua amø— chibig køn.

⁴² Inchen unøbe kemallib iben, kwaimandziibe unan pirausrø kucha, sruaguchen, Jesúsbe trømbøig maringarub kwaimandzigwan nama, webingarua, unane tamara, møskawan tranøbig køn.

⁴³ Inchen Tiuswei purø nuig tabigwan mayeeløba kwaara ashibelø køn.

*Jesús nø kwamigwan katø eshkab**(Mt 17.22-23; Mc 9.30-32)*

Inchen mayeeløba Jesús øyeeg marigwan kwaarøb kømne Jesúsbe nui kusrenanøb pera uniilan trenchibig køn:

44 –Pesannanrrab kømø, iigwan tab møray cha, tru Møg Misra Arrubigwane møguelai tasku tranig kønrrabigwan.–

45 Inchen nømun øyeeg taigwane nømbe chi tainguen mørmeelø køn, kaguende Tius chigúinguen mørmønrrai indiilø kua. Incha nø øyeeg taigwan chi chibig kø cha payamibe nømbe kørig kui inchibelø køn.

Mas nuibe mu kerah

(Mt 18.1-5; Mc 9.33-37)

46 Inchen nui kusrenanøb pera uniiløbe nømui utu nømbe møig mas nuig kønrraptiig kuin kui waminchib payiyab mendabelø køn.

47 Inchen nøm chi isub purraigwan Jesúsbe wetøbeña, kan unan srúa ya, nüm pulu pasrabe,

48 trenchibig køn:

–Møikkøben i unan nai munchiyu tab wamab utabiibe, nan utan cha. Inchen nan utabiibe, nan karua ørøbigwangucha utan cha. Inchawei ñimui utu mas chigucha kømíig lataig kui asiibe, truike si, mas nuig køn— chibig køn.

Namun maig købash inchimúbe namuingatø pasran

(Mc 9.38-40)

49 Inchene Juanbe trenchibig køn:

–Kusrennøbig, kan møikkøsrøn ñui munchiyu kwaimandziimeran webusri aser cha. Inchendø namba uñmíig købene, nambe truigwane merer— cha.

50 Inchen Jesúsbe nun lötappe trenchibig køn:

–Merømøtay cha. Kaguende ñimun namig kurrømíbe ñimuingatiig køn— cha.

Jesús Jacobonba, Juanwanba namab

51 Yandø Jesús srømbalærø utig kømig lutau køben, Jerusalénmay ke punrrab isua ib menda,

52 eshkanrrabelø wam sruar merrab øren, nømbe Samaria pirau kan pueblosrø chigøben nuyasig tamartrab ambene,

53 samaritanosmerabe Jesús wane utømeelø køn, kaguende nøbe Jerusalénsrømay inrrab arri asha.

54 Inchen nui kusrenanøb pera uniilø Jacoboba, Juanba øyeeg indi ashabe, trenchibelø køn:

–¿Señor, nømun pinishinrrab srømbalærøngurri nam nag kørøarringaruh cha, Tius maig karuigwan eshkarb møg Elías latawei?—

55 Inchen Jesúsbe nømun keesha ashabe, namabig køn.

56 Incha katøganbalø yamera tsitsø pønrrabsrømay ambubelø køn.

Jesúswei mendig ambamibe murig køn

(Mt 8.19-22)

57 Nøm maywan ambub købene, kan møg Jesús wane trenchibig køn:

–Señor, ñi chu ibendø, nabe mendig arrumønrrun— cha.

58 Inchen Jesúsbe trencha løtabig køn:

–Zorramerabe waramig trabmera tøgær køben, katø pala amøñib illimeragucha nømui lemera tøgær køn cha. Trune na, Møg Misra Arrubiibe ni nai turwan chu nerraramikken chigaig kur— cha.

59 Incha Jesúsbe katøganun trenchibig køn:

–Nai mendig amø— cha.

Inchen nõbe:

—Señor, nai mōskawan sōrōnrrabmerrig ibashcha— chiben,

⁶⁰ Jesúsbe trenchibig kōn:

—Ñibe nai wendautø amø cha. Tiusweimburabigu kwaig lataløbe nõmui kwailan sōrøbash cha. Inchen ñibe ya, Tius nõ ashib karub wainuguigwan katøanelan eshkaḅ kusrenan— cha.

⁶¹ Inchen katøgangucha trenchibig kōn:

—Señor, ñui mendig arrug kōtan cha. Inchendø nai yauelanmerrig ungwa chinrrab ibashcha— cha.

⁶² Inchen Jesúsbe trencha lōtabig kōn:

—Mutøgucha arauwan kemøra arab pasrøbendø, wendømaygøba keeshibiibe, Tius nõ ashib karub wainuguigwane chi tab martrabgaig kōn— cha.

10

Jesús setenteelan karua ørøḅ

¹ Øyeeg chab puraiben, Señor katø setenta lawa wesrua, pagatø pagatø pueblosmørig katøganbalømerasrø nõ yamsrømay nui merrab ørøbig kōn.

² Incha nõmun trenchibig kōn:

—Ellmarig tulisamibe truba nõrrø kōben, trune tulishinrrabeløbe mamdø kōn cha. Inchawei tru ellmarig puaig Tiuswan miay chibig kōn, nui ellmarigwan tulishinrrabelø ørtrai.

³ Ñimbe ambay cha. Au, nabe ñim ubishamera latalan lobosmerai utu ørar cha.

⁴ An pusramig urasr ila ammøwei, wasr ila ammøwei, alpargatis katø nõørø srua ammøwei, ñim maywan ambuppe, mun kōben wamab waminchib pønrømøwei inchigay cha.

⁵ 'Incha kan yau kebambuppe, øyeemerrig chinrrigay cha: "I yaube chi isumgaig mayanguen tab kōnrrun" cha.

⁶ Inchen truyu chi isumgaig tab kōbigwan tōga mōg wabene, tru: "Chi isumgaig tab kōnrrun" cha ñim trendaibe nuinug kōrrømisrtrun chibig kōn. Inchen treeg mōg kaabene, tru ñim trendaibe ñimuinuutøwei kōrrømisrtrun cha.

⁷ Inchen ñimbe tru yautøwei kōrrømisra, nõm chi srørendø mab, mutchigay cha. Kaguen chi marøbiibe nui marimburøbe mu chi chinrrainga, utamig kōn cha. Yamørig, yamørig ammønrrigay cha.

⁸ Ñim kan puebloyu kebamben, ñimun wamab utøbene, chi srørendø manrrigay cha.

⁹ Incha truyu kwanreelan tamarøḅ, tru misaameran: "Tius nõ ashib karub wainuguiibe ñimuinuube laturab pasran" chinrrigay cha.

¹⁰ Inchen ñim kan puebloyu puben, ñimun wamømubene, trube, callesmerayu webamba, misagwan øyeeg chinrrigay cha:

¹¹ "Ñimui puebloyu usrø namui srøbmerayu mendigwan møimbe trube, ñim kusrenrrigay chib pabørrguer chib. Inchendø møimbe yandø ñimbe isua kuy cha, Tius nõ ashib karub wainuguiibe ñimuinuube laturain kōn" chib.

¹² Inchawei nabe ñimun trendamønrrun: Srabe kwalømbe tru puebloimbe Sodomai latalitøguen kōmø, Tiuswei tru maig kōnrrabigwan asha maram kwaløm attrabiibe mas purø trømbøig kōnrrun cha.

*Isua mørøḅ misaameran isumdiig nebunrrabig
(Mt 11.20-24)*

13 'iAy, ñi Corazín pueblo, waacha! iAy, ñi Betsaida pueblo, waacha! Kaguende Tirosrø, Sidónsrø tru maramburab mariilan na ñimui utu lataitøwei marig kuimbe, manawei truiløbe nømui kaig mariilan isua møra, Tiusweimay lirabsruig kuinrrun cha. Incha kaig marmønrrab yandø isua mører chib kenamartrab, trøsrkøleelø keb, nagusrøyu purramisrøb inchib-sruinrrun cha.

14 Pøs Tiuswei tru maig kønrrabigwan asha maram kwalømbe Tiroba, Sidónba misaamera lataitøguen kømø, ñimbe mas purø trømbøigwan utønrrun cha.

15 Inchen ñi Capernaum pueblogan, ¿purø tab incha srømbalásrøngatig kusruig kønrrumab isutirru? cha. Treeg kømøtø, ñibe tru møra melamnug kegutsig kønrrabguen— chibig køn.

16 Incha nui pera uniilan trenchibig køn:

—Ñimun møøbiibe, nan møran cha. Inchen ñimun kaashibiibe, nan kaasan cha. Inchen tru nan kaashibiibe, nan karua ørøbigwan kaasan— cha.

Karua ørig setenteelø katø amrrub

17 Inchen tru setenteeløbe truba kasrag katø amrruabe, trenchibelø køn:

—Señor, ñui munchiyube kwaimandziimeraguen namune mørtan— cha.

18 Inchene Jesúsbe trenchibig køn:

—Satanásbe srømbalásrøngurri kan palaig peñib lataig peñen, nabe asig køn cha.

19 Nabe mu mandamgaig maramburab maramigwan ñimun tranamønrrun cha, ulmeran, alacránmeran itøbunønrrai, katø tru ashig kømui inchibig, Satanás, nø kanawa, chi martrab kaimanrraimba. Inchen ñimbe chi indiimeelø puramrrun cha.

20 Inchen ñimbe, kwaimandziimera ñimun mørimba kasraaramøtø, ñimui munchimera srømbalásrø pørig pønrraimba kasraaray— chibig køn.

Jesús nuielaimburab kasraarab

(Mt 11.25-27; 13.16-17)

21 Incha tru uras Jesúsbe Espiritu Santogurri truba kasraarawa, trenchibig køn:

—Nai Møskai, srømbalawanba, pirøwanba ashib karubig, ñun tabig waminchar cha, kaguende ñibe kusrebelø chigúi møøbelan ashmønrrai tru sørig pønrrabelane tru chigucha kømeeelø kusremeelan kenamarikkurri. Treewein køn, nai Møskai, ñi treeg kønrrai maramig tab kuig kua.

22 'Nai Møskaimbe chiwandøgucha nan trandan cha. Mugucha na Nusrkawane mu kui ashmuben, Møskaindøwei asan cha. Mugucha Møskawane mu kui ashmuben, na Nusrkaimba, møiløgøben na asingaruilø truiløbatø asan— chibig køn.

23 Incha nui kusrenanøb pera uniilan ashabe, nømundø trenchibig køn:

—Tru ñimui kabmera nebua asigwan ñim ashibeløbe mayanguen tab kuilø køn cha.

24 Kaguende nabe ñimun trendamønrrun cha: Truba nørø Tius maig karuigwan eshkabelø køben, reymera køben, i ñim asigwan asinrrabna kui inchendø, ashmuig køn cha; i ñim mørigwan mørinrrabna kui inchendø, mørmuig køn— cha.

Kan tabig marøb samaritanon Jesús kemesra wamindig

25 Inchen tru maig maramigwan martrai Moisés pørigwan kan kusrenanøbig Jesúsban mandø inchibig køtashchab nøba waminchab kurra yabe, trencha payibig køn:

—Kusrennøbig, ¿managatig øsig kømigwan Tius tranig tøgagønrappe, nabe chi maramerah?— cha.

²⁶ Inchen Jesúsbe trencha løtabig køn:

—Maig maramigwan martrai Moisés pørigube ¿chi pørig pasrah? cha. ¿Ñibe truiwane mandø taitamab isugu?— cha.

²⁷ Inchen nøbe trenchibig køn:

—“Señor ñui Tiuswane ñui manrraugurri kerrigu newan undaaritøgaba, kerrigu ñui øsig pasraitøgaba, katø kerrigu ñui asru chishkømburab chish kuitøgaba, kerrigu ñui turtøga isumburab isuitøgaba undaaramig køn cha. Katø ñima ñiasitøwei maig undaguig køppe, ñui mendaigwangucha treetøwei undaaramig køn” cha, trenchibig pørig pasran— cha.

²⁸ Inchen Jesúsbe trenchibig køn:

—Ñibe sølwei løtan cha. Iigwan mar cha. Treeg marabe si, ñibe managatig øsig kømigwan Tius tranig tøgagønrabguen— cha.

²⁹ Inchen tru møøbe nø payigwan tab webig køb, Jesúswane trencha payibig køn:

—¿Naimbe mendaibe mu kerah?— cha.

³⁰ Inchene Jesúsbe trencha løtabig køn:

—Kan møg Jerusalénmay ambi maywan Jericómay kørraarub arrubene, nileelø merrarrowa, kerrigu nui kewagúigwanbañau nila, kurragucha, kwaig lataig mara trarra ambubelø køn cha.

³¹ Inchen kan judíosmerai sacerdote tru maywandøwei chi isumø purainrrab arrub pasrøwa, tsui ashippe, yabwansrøndø purayan cha.

³² Katø treetøwei kan levitagucha truyu pubendø, ashabe, mendawan-srøndø pureppa ib ibig køn cha.

³³ Trune kan Samariasrø møg tru maywandøwei purainrrab arrua, nun ashabe, lastima isua,

³⁴ møwan kemallabe, nui pisrøwan aceiteba, vinoba srøla, llensutøga lusra, trugurrimbe nui burroyutøwei itøguanøsrø, kan ya pebøbelainuumay srua ya, truyu ashib tøgagúig køn cha.

³⁵ Incha katø kwaløm samaritanobe inrrappe, tru ya puaigwan pagatø an wesrawa, trana: “I møwan ashchunrrig tan cha. Ñi mas kastain købene, katø arruabe, pagararrumøn” tan— cha.

³⁶ Incha Jesúsbe tru Moisés pørigwan kusrenanøbigwane trenchibig køn:

—¿Tru nileelø kemørinab møwan, tru i pønelø nøasi lataitøwei isua ashibiibe, ñune møig trui kønrraptiig køta?— cha.

³⁷ Inchen nøbe løtappe trenchibig køn:

—Tru møwan lastima ashibig, trui kømmergøtan— cha.

Inchen Jesúsbe trenchibig køn:

—Ñigucha ya, treetøwei mar— cha.

Jesús Martaba, Mariaba waminchib

³⁸ Incha Jesúsba, nui kusrenanøb pera uniløba nui maywan amba, yamera tsitsø pønrrabsrø pubene, truyube kan ishug, Marta taig, nui yaumay amø cha, ufabig køn.

³⁹ Martabe kan numøsrø Mariä taig tøgagig købig køn. Inchen truiibe Jesúswei srøb pulu nø chi taigwan mørtrab wamisren,

⁴⁰ trune Martabe, ke chi maram kuinguen mørmíig wawa, Jesúswan kemalabe, trenchibig køn:

—Señor, chi maramelan nai numøsrø ke nandø keguchen, ñungan isumuitarru cha, nan puruguptøguen wau taindø— cha.

⁴¹ Inchen Jesúsbe trenchibig kòn:

—Marta, Marta, ñi kui ke chinsraatø inchib, ñui chigurrimbunø maramelangøba isun cha.

⁴² Inchendø kanbaløtø mas isumig pasran cha. Inchen Mariabe tru mas tabigwan trunun lawa wan cha. Truigwane kerraig kømønrrun— chibig kòn.

11

Jesús Tius Møskaimba mandø wamindamigwan kusrenanøb
(Mt 6.9-15; 7.7-11)

¹ Kan pieje kanbaløsrø Jesúsbe Tius Møskaimba waminchib wawa, chab patsøgøbene, møikkøsrøn kan nui kusrenanøb pera uniibe trenchibig kòn:

—Señor, tru Juan nui kusrenanøb pera uniilan kusrennøb lataitøwei, namungucha Tiusba wamindam kusrenanrra— cha.

² Inchen Jesúsbe trenchibig kòn:

—Ñim Tiusba waminchib pønrrappe, øyah chinrrigay cha:

“Namui Møskai,

ñui munchibe tabigweindø tarømara, newan tab indig kønrrun.

Ñi ashib karub pasraibe pirau larrøbitchab amø.

³ Kwalømmørig nam mamig maig palabigwan namun møi tranøb,

⁴ namui kaig mariilan ulø paymø, pesannarrunrrig chib.

Kaguende namma namun kaig marøbelan mayeelan ulø paymø, pesannabelø ker chib.

Chiyugøben namun kegørrøsrkønrraptiig pønrrøbene, truwane ambashmørrunrrig chib.

Masken tru kaigweinukkurrimbe tarømartra”— chib.

⁵ Incha Jesúsbe katø trenchibig kòn:

—Ñimma møikkøben kan trendø asig tøgagua, yem tøbøtag truigwei yamay ya: “Au, nai kasuku, pøngatø pirrim pebøbsrumugu chinrrun cha.

⁶ Pøs nai trendø asig inrrab arrua, nai yau puben, chigucha srørramig chi kaagur” cha.

⁷ Inchen kane yaambugurri trencha løtimbeh: “Yaskappe yandø kasraig pasran cha. Mas wamab fregamørrunrrig chib. Nabe nai ureemeraba camayuguen warøwa, chigucha pebrrab kurrønrrab kaimamønrrun” cha.

⁸ Pøs nabe ñimun trendamønrrun: Pebrrab kurrappe, nui trendø asig kuimbatø pebrrab kurrømøtø, ke wamabig wamab tsuikkurri kurra, chi palabigwan nøbe kerriguh tranrrun cha.

⁹ Inchawei nabe ñimune trendamønrrun: Miabene, Tiusbe ñimune tranrrun cha. Lawabe, ñimbe wetørranrrun cha. Yaskabu wamubene, ñimune kurtrun cha.

¹⁰ Kaguende mugucha miabiibe utøben, labiibe wetørraben, yaskabyu wamabigwane kurtrun cha.

¹¹ ‘¿Ñimma møikkøben, møskain kua, ñui nusrkai pirri miaben, pisrugwan tranrraitirru? ¿Kabe peskau miabene, ulwan tranøbsruguh?

¹² ¿Kabe kan atøwall srug miabene, alacránwan tranøbsruguh?

¹³ Pøs ñimma ya kailø købenguen ñimui uregwane tabig keta tranøbelø køben, ¿kan mas ñimui Møskai srømbalasø wabiibe nun miabelane Espiritu Santon tranmønrraitarru?— chibig kòn.

Møiløgørøn Jesúswan kwaimandzigwei maramburab marigwan tøgäig køn chib

(Mt 12.22-30; Mc 3.20-27)

¹⁴ Kan mowan kan kwaimandzig wamgaig marigwan Jesúsbe wambig weguchen, kwaimandzig webibene, tru wamgaibe waminchiptinchen, misaamerabe truba kwaara ashen,

¹⁵ kan utueløbe trenchibelø køn:

—Kwaimandziimeran ke nōasha karub pasrabig, tru Beelzebúgurri kwaimandziimeran nōbe webusrøbig køn— cha.

¹⁶ Inchen kaneløbe Jesúswan maig inchibig kōtashchab ashig kōptø, nune srømbalarøngurriig asamig martraí miabelø køn, Tius nōba pasrain kui ashchab.

¹⁷ Inchen Jesúsbe nøm chi isub pønrraigwan ashabe, trenchibig køn:

—Kan rey karub tøgaweim pirauma misag nōmasiitø nōørøtø misrøb kurrabe, pinønrrun cha. Katø kan yaelø nōmasiitø nōørøtø misrøb kurrabe, chab pinønrrun cha.

¹⁸ Inchawei Satanáskucha nōasiitø nōørøtø misrene, nui ashib karub waibe ¿chinchá pasrabig pasrønrrab kø? cha. Kaguende ñimbe nane trendan, chibig køn, Beelzebú martraí tranikkurri kwaimandziimeran webetan cha.

¹⁹ Tru kwaimandziimeran na webetappe, Beelzebúgurri webetig købene, trube, ¿ñimui mendig amøñibeløbe kwaimandziimerane mu webetingaruitøgarre webetah? cha. Inchawei, treeg købene, maig kuigwan ñimun uyube nøm chibig køn.

²⁰ Trune na Tiuswei tasig-unøtøga kwaimandziimeran webetøbene, Tius nø ashib karub pasraibe ñimui utube puaguen pasran cha.

²¹ Kan mur mōoma iitøgabe chinchamamønrrurmab may tamara, nui tab yawan tab ashib tøgagøbene, truyu nui chigurrimbunø tøgagúibe chi isumgaig pasran cha.

²² Inchen katøgan mōg, nø lataguen kōmø, mas murig arrua, nun mer-rarrawa kanawa, tru chinchamamumig, iiløtøgabesimab isua tøgagúilan ker-rawa, tru nø chi tøgagúilane katøganløba pírisan cha.

²³ Naingatø pasrømiibe, nan tsaleelaingatø maran. Naba tulishimúibe truørøtø wiitan cha, trenchibig køn Jesúsbe.

Kaig espíritu katøle mōweimay arrub

(Mt 12.43-45)

²⁴ Kan trømbøig maringarub kwaimandzig mōweinukkurri webippe, chugøben purmerasrø isramig lab uña, yandø wetørranrrab kaimappe, trenchibig køn: “Katø nai yamay inrrab cha, na chugurri webarrua arrinuumaytøwei.”

²⁵ Incha katø arruabe, tru mōwane kan yawan chishtø paluuncha, tamara pasrig lataig wetørranrrun cha.

²⁶ Incha ippe, katøgan kwaimandziimera, nø lataguen kōmø, mas larrø trømbøig marøbelan sieteba tulundzuna, søteeløba trubalatø tru mōweinug purrønrrab kebamrrun cha. Inchen tru mōøbe yandø srabebe mas purø kaikken kørømisrtrun cha, tru srøsrø lataitøguen kōmø.—

Isa kōmø, purø tab købig

²⁷ Jesús iilan waminchib pasramne, misag utu kan ishug øyeeg chib trashibig køn:

—¡Ñun tøgagøb, mutsøsrøb ishuube mayanguen tab kuig køn!— cha.

²⁸ Inchen Jesúsbe trenchibig køn:

—Tius maig taigwan mørøb, maig karuilan mørøbelø, truiløbeguende mayanguen tab kuilø køn— cha.

Kaig misag Jesúswan mana asiimíg martrai miab

(Mt 12.38-42; Mc 8.12)

²⁹ Misaamera Jesúsweim pøtøgatan mas mas tulundzunøben, nøbe trenchib waminchib pølbasrøbig køn:

—Møin kwaløm larrø kaig misaamera, Tius naba pasrain kui ashchab marig mian cha. Inchendø asha kønrrai katøgan chigøben peg kenamara tranmøtø, tru Jonásweiwandø eshkamønrrun cha.

³⁰ Jonásma Nínivesrø warab misaameraimbe chigøben kønrrab kuitamab isua asha kømig kønrrai nune treeg pasrig køn cha. Treetøwei na, Møg Misra Arrubikkucha møin kwaløm misaameraimbe isua asha kømig kønrrai pasrig kønrrun cha.

³¹ Tru ambø umbu pirausrø reinagucha Tiuswei tru maig kønrrabigwan asha maram kwalømbe kurrønrrun cha. Incha nøbe tru møin kwaløm møguelø ñimun møra melønrrai maringarunrrun. Kaguende nøma purø yab-srøngurringuen arrig købig køn, Salomón, tru purø kusrebig wamindigwan mørtrab. Inchen yu pasrabiibe Salomón lataitø kømø, mas nuikken kur chibig køn.

³² Tru Nínive ciudasrø misaamerabe Tiuswei tru maig kønrrabigwan asha maram kwalømbe kenamisrtrun cha, tru møin kwaløm misaameran kaiyu pønstrønrrab. Kaguende Nínivesrø misaamerabe Jonás eshkaigwan møra, nømui kaig maruilan isua møra, Tiusweimay lirraig køn cha. Inchen yu pasrabiibe Jonás lataitø kømø, mas nuig køn— cha, trenchibig køn.

Kabmerabe asru kan lámpara latailø køn

(Mt 5.15; 6.22-23)

³³—Muguen kan aceite lámparan piløga srørrøyu pasrmøwei, ni køtsø umbu pasrmøwei indan, masken kerrubelan tør kønrraimbe, pala pasran.

³⁴ Asru kappe kan lámpara lataig køn. Inchawei ñui kab tabig købene, ñui asrube kerriguba tør kebilig kønrrun. Inchen ñui kab kaig købene, ñui asrube kerriguba løstiig kønrrun.

³⁵ Inchawei ashiptø kuy, ñim tør tøgagúibe løstiig købgunmab.

³⁶ Kaguen asru kerriguba tør køben, katø truyu chigucha løstiig kaabene, ñibe kerriguba tørgandø ashchun chibig køn, kan lámpara purø tørig, ñun piløben lataitøwei.—

Jesús fariseosmeranba, maig maramigwan martrai pørigwan kusrebelanba øyeelø køn chib

(Mt 23.1-36; Mc 12.38-40; Lc 20.45-47)

³⁷ Yandø Jesús chab waminchene, kan fariseo nui yau lincha manrrab attrai eshkaben, Jesúsbe kebya, mishatsigu wamisrene,

³⁸ fariseobe Jesús mamigwan mamøwatø, tasig kinømmø mai ashabe, truba kwaaren,

³⁹ Señorbe trenchibig køn:

—Trube, ñim fariseosmerabe pasunba, platillonba wambiimaybe pillmabendø, ñimui umbube ñimbe misagwan kwaarøsrø kerranrrab isuiløba, chigurrimbunø tøgagønrrab parø isuiløba, trutø netsailø køn cha.

⁴⁰ ¡Ñim chugúinguen mørmeelø! Tiusbe palamay asrwanma marig køppe, ¿katø umbuigwangucha nøtøwei marig kømuitarru? cha.

41 Treeg inchibgunrriibe, tru umbu tøgagúigwan waachameran lastima asha, srørray chibig køn, treenchene, ñimune kerriguba chishig kørørmisrtrun cha.

42 'jAy, ñim fariseos waachamera! Ñimbe erbabunan, rudan, chigurrimbun katøgan shush tusrmeran Tiusweyasig diezmørig kanzhig, kanzhig wesrawa, tranendø, tru sølgandø tabig maramigwanba, katø Tiuswei tru undag købigwanbabe, ñimbe pinab marøbelø køn cha. Ñimbe marøppe, iilanwei maramig kuig køn cha, tru diezmørig kan kan wesrawa, Tiuswan tranamigwangucha pesannamø, tøgatø marøb.

43 'jAy, ñim fariseos waachamera! Judíosmera tulundzuni yamerayu purø tab misaamera purrainug purramig chullelø, katø penab, yanøb indinug ñimune maig købash kømø, purø tabzhig wamønrrai inchibelø køn cha.

44 'jAy, ñim waachamera, kwaig sörin trabmera latailø, chi kenameelø! Misaamera tru sörin palawan chigúinguen ashmø llirab kuilø latailø køn—chibig køn.

45 Inchen tru maig maramigwan martrai Moisés pørigwan kusrennøbiibe trencha løtabig køn:

—Kusrennøbig, ñi øyeeg chippe, namungucha tøga wamøtan— cha.

46 Inchen Jesúsbe trencha løtabig køn:

—jAy, ñim waachamera, tru maig maramigwan martrai Moisés pørigwan kusrennøbelø chigucha! Ñimbe katøganelane niga ambamga kwatsiguelø neguanendø, ñimbe ñimdøweinguen ni kan tasig-unøtøgaguen kuñab kebachig kømui indan cha.

47 'jAy, ñim waachamera! Tius maig karuigwan eshkabelan ñimui merrabsrø misaameratøwei kweecha, sörilø købelan ñimbe tamara pønrsøbelø køn cha.

48 Treeg mariitøga ñimbe ñimui merrabsreelø treeg marigwane lata kandø isubelø kui kenamaran cha. Kaguende nømuimburappe kweechen, ñimuimburappe tru sörin trabmeran tamaran cha.

49 Inchawei Tius nø kusremburab kusrebig kuigu, trendaig køn: “Na maig karuigwan eshkabelanba, katø naashib karua øriilanba nabe øren, truilan kan utuelane kweechen, kanelane kaig martrun” cha.

50 Inchawei piøwan marøb uraskurri Tius maig karuigwan eshkabelan mayeelan kweetsilalai ani lusigwan Tiusbe møin kwaløm misaameran ulø payrrun cha,

51 tru Abelwan kweecha ani lusigwangurrimbunø, tru Zacarías altarba, santuarioba pønrrabnug, tru tøbøtag pasrøben kweetsig, tru Zacaríaswei ani lusigwangatig. Inchawei nabe ñimun trendamønrrun chibig køn: Tru misaameran kweetsilalai Tiusbe møi ya misagwan ulø payrrun cha.

52 'jAy, ñim waachamera, tru maig maramigwan martrai Moisés pørigwan kusrennøbelø! Kaguen tru nebua ashib kusreb kømig kan llavi lataig tøgagúigwan ñim kerrawa tøgagua, ñimdøweinguen kebammøwei, ni kebambug kui inchibelan chigucha kebambashmøwei indan—chibig køn.

53 Jesús truygurri webibene, tru Moisés pørigwan kusrenanøbeløba, fariseosmeraba Jesúswan truba nama, ke chine payib mendabelø køn,

54 kebenørkøg køptø, nø chi kusrua løtøbene, chigøben tamig tøgagønrrab.

12

*Jesús palatø tabelø kømønrrai kusrenanøb
(Mt 10.26-27)*

¹ Trune misaabe truba truba nõrrø tulundzuna, nu køptø ke nõmdø melambub itøbuniyaben, Jesúsbe nui kusrenanøb pera uniilan nõmunmerrig trenchib pølbasrøbig køn:

—Au, fariseosmerai levaduran ashiptø kuy cha, tru palatøbe truba tab indigwan.

² Pøs chitøgucha søra pasriibe søriitø kørrømisrmø, ashchai kenamarig køben, katø wammørmønrrai søra tøgagúibe wammøriimíbe kørrømisrtraamøn cha.

³ Inchawei ñim løstøyu wamindigwane tøryu wammørbøguen inchen, ñim yaskabwan kasra nilø wamindigwane yabalasrøngurri trasaig kønrrun cha.

Jesús møigwan kørig tøgagømigwan waminchib

(Mt 10.28-31)

⁴ 'Na ñim nai linchibelane trenchar: Asrwandø kweechibelane kørig kui inchimøtay cha. Kaguen asrwane kweechendø, mas trømbøibe chi martrab kaiman cha.

⁵ Inchendø nabe ñim møigwan kørig tøgagømigwan eshkarrumøn cha. Kweecha, mu manchinrrainga tru møra melamnug kegutchabig, truigwane kørig tøgaguy cha. Nabe katøle trendamønrrun: Trunune si, kørig tøgaguy cha.

⁶ '¿Trattrøgatø illinzheelan pa centavozhigweindø yanøbelø kømuitarru? chibig køn. Inchendø Tiusbe treelanguen pesannamø, ashbig køn cha.

⁷ Pøs ñimuimburappe ñimui turyu pusruumeranguen kan kan mundzi-izheelø køn cha. Inchawei chi kørig kui inchimøtay chibig køn. Truba yam illimera lataitøguen kømø, ñimbe mas purø nuweyelø køn cha.

Misaamerai malau 'Jesucriston ashmíg kur' chib pønrrømeelø

(Mt 10.32-33; 12.32; 10.19-20)

⁸ 'Katø nabe ñimun trendamønrrun: Møikkøben misaamerai merrab 'Jesúsweingatiig kur' chibigwane na, tru Møg Misra Arrubikkucha Tiuswei ángelesmerai merrab treetøwei truigwane 'nuingatiig kur' cha, nabe trendamønrrun cha.

⁹ Inchen misaamerai malau 'Jesúsweingatiig kømur' chibigwane Tiuswei ángelesmerai merrab nabe nungucha 'nuingatiig kømur' tamønrrun cha.

¹⁰ 'Møikkøben na, Møg Misra Arrubigwan chigøben kaig waminchibigwane Tiusbe uløwan paymønrrab pesannanrrun. Trune møikkøben Espíritu Santon purø trømbøig waminchibigwaneguende pesannamø, ulø payrrun cha.

¹¹ 'Ñimun payrrab judíosmera tulundzuni yamerayumay, kabe juezmeraimay, kabe karubelaimay srúa ambene, mandø cha løtamermab, mancha løtamermab, chi tamermab chi isumøtay chibig køn.

¹² Kaguende yandø wamindamig puben, Espíritu Santobe maig tamigwan ñimun kusrenanrrun— cha.

Kan pua møg chugúi mørmíg lataigwan kemesra wamindig

¹³ Kan møikkøsrøn misag utu Jesúswan trenchibig køn:

—Kusrennøbig, nai nunewan naimburabig kønrrabigwan pirisha, nan tranø chirra— cha.

Inchen Jesúsbe trenchibig køn:

¹⁴ —Au, kasuku, ¿nan kan juez lataig, kabe kan pirø pirishibig lataig kønrraimbe nane mu pasrah?— cha.

¹⁵ Incha katø trenchibig køn:

—Parø indamigwane treenchimønrrab ashiptø kuy cha. Kaguende kan møg øsig kømibe chi nõrrø tøgagúinug pasrømig køn— cha.

16 Incha katø 'øyeeg lataitøwein køn' cha, kemesra waminchib trenchibig køn:

—Kan truba pua mowan nui pirømerayu truba truba ellmarig misren,

17 tru puaipe nuinetø isub mendabe trendan cha: “¿Chindamer? cha. Nai ellmarig tulisailan yandø chu esegamig chigagur” cha.

18 Inchabe treeg isubig køn cha: “Møimbe sí chi maram kui ashar cha. Nai mamig keerøb esegailan picha, mas nørreelø mara, truyu nai ellmarig tulisailanba, chi tøgagúilanba kerrigu esegamønrrun cha.

19 Incha nabe naasiitøwei trendamønrrun tan cha: ‘Møimbe si, chigøben truba nørro esegailø yam pilawei pønsra war cha. Møimbe israb, mab, muchib kasraarau’ tamønrrun” cha.

20 Inchene Tiusbe trendan: “Chugúinguen mørmø møg, mõi yemdøwei ñui møsigwan miaben, kwamig nebuben, ñi esegawa tøgagúibe, ¿muin kørømisrtrerah?” cha.

21 Kan møøbe nuyasiitø chine palømo, tun pønsraindøgucha, Tiusweimbura-bigwan chiguchaga waachawane øyeeg purainrrun— chibig køn, Jesúsbe.

Tiusbe nui uregwane chi palabigwan tranøbig køn

(Mt 6.25-34)

22 Incha Jesúsbe nui kusrenanøb pera uniilan trenchibig køn:

—Ñimune trendamønrrun cha: Øsig amønarnamig, ñim mamigwanba, asru chi kemermab isumigwanba menrra isumøtay cha.

23 Pøs øsig amønarnamikkan kan mamig lataitø kuitarru cha. Kabe asrkan kan asru keelø lataitø kuitarru cha.

24 Pøñiimeranma asay cha, chi ellguamøwei, ellmarig tulishimøwei, mamig esegamig chi kawei, mamig nørroø keera tun pønsra esegamig chi kaweyelanguen Tiusbe manrrai mannøbig køn cha. Ñimbe illimera lataguen kømø, maseløguen køn cha.

25 ¿Ñim møiløgøben, maya maya incha, katøgan tøbø metrotøguen nurab-sruguh? cha.

26 Ñim yandøzhigwanguen martrab kaimabeløbe, ¿katøgan peg maramelane chinchabrre isugue? cha.

27 Umeranma asay chibig køn, kwallmøwei, kumøwei inchibelø købendø, tabig nørørran cha. Inchendø nabe ñimune trendamønrrun: Rey Salomónguen nui chine purø tabzhig tøgagua, umera lata tabzhiibe kemuig køn cha.

28 Wambig kaumera, mõi ka pønrrøwa, srønabe nagu parrig kønrrabigwanguen Tiusbe øyeeg tabzhig kenanøb lataig marøbiibe, ñimune treetøguen kømøtø, masken marmønrraitarru cha, ñim isubigwan Tiusweinug pasra tøgagúigwan ke kagømønrraindøzhig tøgarwan.

29 Inchawei chindamer mab isuptø menrra isui inchib lamøtay chibig køn, chi mamer mab, chi mutsamer mab.

30 Kaguende yu pirau misaamerabe mutøgucha iilan isua labelø køn cha. Trune ñimui Møskaimbe ñimui chi palabelan ashaguen wabig køn cha.

31 Treeg kømøtø, ñimbe Tius nø ashib karub wainuguigwan isua lay chibig køn. Trumaybe tru katøgan chi palabelangucha ñimbe nemarig utønrrun cha.

Srømbalasrø chigurrimbunø pønrrabelø

(Mt 6.19-21)

32 ‘Nai mamdø ubishazheelø, chi kørig kui inchimøtay. Kaguende ñimui Møskaimbe nui karub wainuguigwan tranamig tab kui indin køn.

³³ Chi tɔgagúilan yana, chigarwan tranay, treeg marabeguende, an pusrig urasrmera, pinɔnrrabig kɔmeelɔ tɔgagɔnrrabguen, chi tɔgagúilɔ managuen pinɔnrrabgailan srɔmbalasrɔ eseganrrab. Truyube niliig kebinrrab kaimabwei, ni pullilla parmɔwei inchibnug.

³⁴ Kaguende ñimui chi tɔgagúilɔ chu esegaig pɔnrrɔbene, ñimui manrrɔgucha ke truyutɔ isub pasrɔnrrun cha.

Tamara muniitɔ kɔmig kɔn

³⁵ Ñimbe kewa, tamara, pɔrɔnawa, martrab ke muniitɔ kuy; katɔ ñimui aceite usri lámparamerangucha pilɔga kuy;

³⁶ ñimbe kan mendig melabelɔ latailɔ kɔnrrigay ya puaiɔ novios yaugurri attrab kɔben muniirabelɔ latawei. Incha pua, nɔ yaskabwan pinrrɔgɔbene, kurtrab muniitɔ melabelɔ latailɔ kɔmig kɔn.

³⁷ Mayanguen tab kuilɔ kɔn tru karuindiig melabelɔ ya puaiɔ nɔmun kib kɔben kɔmɔ, kasrig purrabyuh puinabelɔbe. Nabe ñimun cierton trendamɔnrrun: Ya puaiɔ nɔashib tamara pɔrɔnawa, mishatsigu nɔmun purramisingarua, mamigwan nɔashib pirishinrrun cha.

³⁸ Yem tɔbɔtag pui lata, lɔtsɔ pui lata nɔmun kib kɔmɔ, kasrig purrɔben puinabelɔbe mayanguen tab kuilɔ kɔnrrun cha.

³⁹ Kan ya puaima niliig chu uras attrab kui mɔrimbe, yau nilɔnrrab kebibashmubsruinrrun cha.

⁴⁰ Ñimgucha tamara melay chibig kɔn. Kaguende tru Mɔg Misra Arrubiibe chi isumɔ kɔbenba arruptinchun— cha.

Mendig megabig maig taigwan marɔbigwanba, maig taigwan marmíigwanba kemesra wamindig (Mt 24.45-51)

⁴¹ Inchene Pedrobe trencha payibig kɔn:

—Señor, ¿iig ‘ɔyeeg lataitɔwein kɔn’ cha, kemesra wamindigwangan namuyasiitɔ waminchitirru? cha, kabe ¿mayeelain kuitarru?— cha.

⁴² Inchen Señorbe trenchibig kɔn:

—Kan karuindiig megabig maig taigwan mɔra marɔb, katɔ chi maramelan nɔtɔ tsabɔ asha marɔbigwan, ya puaiɔ nui yau warabelan mannam ura puin kuindɔ nɔmui mamigwan srɔttrab muniitɔ wabig kɔnrrai ashai wanninabiibe ¿mɔig kerah? cha.

⁴³ Truiibe mayanguen tab kuig kɔn cha, nun karua pasrigwan marɔb megabenh ya puaiɔ puptindinabigweimbe.

⁴⁴ Pɔs nabe ñimun cierton trendamɔnrrun: Ya puaiɔ nui chi tɔgagúigwan kerrigu nɔ asha marɔb pasrɔnrrai tranrrun cha.

⁴⁵ Inchen tru karuindiig megabig nuinetɔ ya puaiɔbe peguen arrumɔnrraitamab isua, katɔgan karuindiig melabelan mɔguelan lata, ishumburmeran lata kurrabetab menda, katɔ mab, muchib, mutsiirab tsubenba,

⁴⁶ nui ya puaiɔbe ni attraitamab isuinguen kɔmɔ kwalɔm, ni ɔ uras punrraitamab isumɔ tsubenba, puptincha, purɔ trɔmbɔig ichagucha, maig taigwan marmeelɔ pɔnrrainug kertrun cha.

⁴⁷ Inchen tru karuindiig megabig nun karua pasrɔbig ya puaiɔ maig maramig palai indi ashibig kɔbendɔ, tamarmɔwei maig chiben mɔrmɔwei inchibigwane truba yam ichagutsig kɔnrrun cha.

⁴⁸ Inchen tru karuindiig megabig nun karua pasrɔbig ya puaiɔ maig maramig palai indi mɔrmɔwa, kɔrrɔ ichagutsamdiig marɔbigwane trengatig yam ichagutsig kɔmɔnrrun cha. Inchen mɔigwan kɔben maramigwan mas nu

tranøppe, treetøwei nu ulø payrrun cha. Inchen møyigwan køben mas purø nørø maramig traninabigwane, trunune masken nu ulø payrrun chibig køn.

Jesús kurri misaamera ke nørøtø misrøb
(Mt 10.34-36)

⁴⁹ Nabe yu pirau nag lataig kegutchab arrig køn. ¡Nabe yambe manawei pilabguen pasrømønrrammab truba isur!

⁵⁰ Nane purø trømbøig pinøbuløb arrubigu pureb yamig nebunrrautan. ¡Nane purø isutan treeg nebunnegatiibe!

⁵¹ ¿Ñim isubgan nabe piraumay arruppe, ambumay imay tab købigwan srua arritamab isugueh? Nabe treeg kømøtø, nørøtø, nørøtø inchib kønrrai arrur cha trendamønrrun.

⁵² Kaguen møyngurrimbunøbe kan yau trattrogatø purramnuube nørøtø inchib kønrrun cha, pønøbe pailan namig kurra tarømisren, pailøbe pønølan namig kurra tarømisrtrun cha.

⁵³ Møskaimbe nusrkawan namig kurrøben, nusrkaingurrimbe møskawan namig kurrøben, usrimbe nimbasrwan namig kurrøben, nimbasrkurrimbe usran namig kurrøben, sueeragurrimbe yernan, katø yernagurrimbe sueeran namig kurrønrrun— cha, trenchibig køn.

Maig pub attrabigwan wamindig
(Mt 16.1-4; Mc 8.11-13)

⁵⁴ Incha katø Jesúsbe misagwan trenchibig køn:

—Wañimera pørr kebibrø kurrab arrubene, ñimbe trenchibelø køn cha: “Sre punrrun” cha. Inchen pubwei inchibig køn cha.

⁵⁵ Inchen isig ambø umbusrøngurri webarrubene: “Pachig kønrrun” chiben, treegwein købig køn cha.

⁵⁶ ¡Palatø tabelø! Pala wañi maig pasrai asha, pirau maig kui asha ñim øyeeg kønrrun chib, øyeeg kønrrun chib waminchibelø købendø, ¿møin kwaløm chi pureb arrubigwane, trube, øyeeg kønrrun chinrrab wetøgørrønrrab kaimabeløbe mailø køgue? cha.

Ñui ashig kømui inchibiiba ambumay imay lata tab kønrrai mar
(Mt 5.25-26)

⁵⁷ ¿Sølgandø tabig maig kønrrabigwan ñimasiyaitøwei chindimba asha tamarmøgue?

⁵⁸ Ñun maig maramigwan asha marig kønrrai tru kejabiiba, tru maig maramigwan asha marøbigweinumay ambub pønrrappatø, mallatø trunun mayutø nøba tamara kørrømisrtrab inchi. Inchippa ñun juezweimay srua amben, juezbe policíameran trana øren, truiløbe ñun merrarrawa kailan keeri yau keera pasrømønrraimbe.

⁵⁹ Pøs nabe ñimun trendamønrrun: Truyugurri webinrrappe, maya ulø misrigwan ke chishtø pagarawatøwei webinrrabguen— cha.

13

Kaig marmønrrab isua mørtrai wamiilø

¹ Inchen tru urastøwei mõiløgøsrøn truyu pønrrøwabe Jesúswan trenchibelø køn:

—Pilatobe mõ mõguelan køsrøn galileasreelan kweecha, truilai aniwane tru nøm Tiuswan tranamig animal kweetsilai animba lindisain køn— cha.

² Inchen Jesúsbe trenchibig køn:

—¿Ñim isuppe, Galilea mɔguelø treeg nebuinabeløbe, tru nɔmui pirau katɔganelø lataguen kɔmɔ, purab kailø kuimbarre treeg nebutamab isugueh? cha.

³ Nabe ñimune treeg kɔmɔn tamɔnrrun. Ñimdøweinguen ñimui kaig mari- ilan isua mɔra, Tiusweimay lliaramuisruandøbe, ñimgucha mayeeløba truilø lataitøwei kwanrrabguen cha.

⁴ ¿Kabe ñim isubgan Siloésrø tru purøbala ya itɔguebeñen kwabelø tru dieciochoelogan Jerusalénsrø maya misag warabelan purab kailø kuitamatirru? chibig kɔn.

⁵ Nabe ñimune chi treeg kɔmɔn tamɔnrrun. Ñimdøweinguen ñimui kaig mari- ilan isua mɔra, Tiusweimay lliaramuisruandøbe, truilø lataitøwei ñimgucha mayeeløba kwanrrabguen— cha.

Higuera tusr mamig niimtigwan kemesra wamindig

⁶ Incha Jesús katø ‘øyeeg lataitøwein kɔn’ chib, iigwan kemesra waminchibig kɔn:

—Kan mɔg nui pirau kan higuera tusr ellguawa, tɔgagua, higos nigui- tashchab ashchab ya, chigucha wetørramig lataig kɔn cha.

⁷ Inchabe tru pirø ashib mɔwane trendan cha: “Au, na pɔn pilawan mamig lanrrab i tusryu arrua, managuen wetørramur cha. ¡Lutiichi! tan cha. ¿Tusrwan pirøyu ke ka yandøbe chinchib pasrøbashchab?” tan cha.

⁸ Inchen tru pirø ashibiibe trenchibig kɔn cha: “Au, nai ashib karubig, mɔim pilatøbe ka pasrøbashchab cha. Na pirøwan alaraanøb, animal pøy pusrtrab cha.

⁹ Inchippa, treenchene mamig misrøbgun cha. Inchendø katøgucha misr- mubene, trube, lutichig” tan cha, trendan— chibig kɔn.

Kan ishug kesruig kurrashchab kaimabigwan isrin kwaløm Jesús tamarøb

¹⁰ Kan isrin kwaløm Jesús judíosmera tulundzuni yau kusrenanøb pasrøbene,

¹¹ tryube kan ishug dieciocho años ørøba kwanrrø uñibig wabig kɔn, kwaimandzig utsømay kesrungaruig, ni chinchagucha kurrashchab kaimabig.

¹² Inchen Jesúsbe nun asha, wamabe trenchibig kɔn:

—Au, ishug, yandø ñibe kwanrrø kɔmɔ, tabig kørørrømisran— cha.

¹³ Incha nui tasigwan tru ishuweim pala estsarene, ishuube mɔi mɔi ølmisrøb, kurraashibig kɔn. Incha Tiuswan truba tabig waminchib mendabig kɔn.

¹⁴ Inchen tru tulundzuni yau ashib karubiibe, Jesús isrin kwaløm treeg tamarikkurri truba nama, misaamerane trenchibig kɔn:

—Chigøben maramigwan maram kwalømmerabe seis días kɔn cha. Ñimui kwanrrømeran tamarilø kørnrappe, tru kwalømmerawan tamartrai amrrumbala cha, isrin kwaløm kɔmøtø.—

¹⁵ Inchen Señorbe kusrub trenchibig kɔn:

—¡Palatø tabelø! ¿Ñimma møikkøben ñimui weywan, kabe ñimui burron isrin kwaløm pi mutsørørrab sruamrrab pichimeelø køtirru? cha.

¹⁶ I ishug Abrahamwei misagwan Satanás kwanrrøtøga dieciocho años ørøba lusra lataig tɔgagúigwan, ¿Kabe isrin kwaløm kɔn chiptø i kwanrriig- wane øyeeg iløsrkaig megaigugurri elatsamig kɔmɔ, chindah?— cha.

17 Jesús nø øyeelan waminchene, nui ashig kømui inçhibeløbe søteeløba kørïimisra kørromisren, trune katøganeløbe Jesús tabig mana asiimíig mari ashabe, truba kasraarabelø køn.

Ibe murtasa yell lataig køn cha, kemesra wamindig
(Mt 13.31-32; Mc 4.30-32)

18 Incha katø Jesúsbe trenchibig køn:

—¿Tius nø ashib karub pasraibe chi lataig asønän chinrrab køh? cha. Kabe ¿møig lataig køn chinrrab køh? cha.

19 Pøs kan murtasa yellwan kan møg nui trau tsurøb lataig køn cha, nurawa, kan tusr-unøburabig misren, pala amønibelø illimeraguen tru srarmerayu le maran— cha.

Ibe levadura lataig køn cha, kemesra wamindig
(Mt 13.33)

20 Katø Jesúsbe trenchibig køn:

—¿Tius nø ashib karub pasraigwane chi lataig køn chinrrab køh? cha.

21 Pøs levadura lataig køn cha. Kan ishug pa arruba harina sòmara, levaduran pusren, maya sòmariġwan trunun ørøba pulingarub lataig.—

Trag yaskab

(Mt 7.13-14, 21-23)

22 Pueblomerasrømba, yamera tsitsø pønrrabsrømba Jesúsbe kusrenanøb Jerusalénsrømay pureb ibig køn.

23 Inchen møikkøsrøn trencha payibig køn:

—¿Señor, kaigyugurri wesrainänrrabeløgan mamdeelø kønrrab kuitarru?— cha.

24 Inchene nøbe trenchibig køn:

—Trag yaskabwan kebamamigwan ñimbe kebamrrab tranrray cha. Kaguende nabe ñimun trendamønrrun: Mayamba kebamrrab inçhendø, kaimanrrun cha.

25 Ya puaiġ kurra, yaskabwan kasrøbene, ñim wambig kørromisrøbeløbe yaskabwan pinrøgøb trenchinrrun cha: “Señor yaskabwan kurtra” cha. Inchen nøbe ñimune trencha lötønrrun cha: “Nabe ñimune chuelø kui ashmíig kur” cha.

26 Inchen ñimbe trenchinrrun cha: “Nambe ñiba mab, muchib inchen, katø ñibe namui callesmerayu kusrenanøb indig kømøh” cha.

27 Inchene nøbe ñimune trencha lötønrrun: “Nabe ñimune chuelø kui ashmur cha. Kaig marøbeløbe mayeeløba nainukkurrimbe tarømisray” cha.

28 Inchen ñimbe truyube kishib, trugulmerän tsatsamig kønrrun cha, Abrahamwan, Isaacwan, Jacobwan, katø mayeelø Tius maig karuigwan eshabelan, Tius nø ashib karub waisrø nøm trusrø purrøben ñim asha, ñimbe wambig webetiilø kua.

29 Kaguene pørr kal-labgatøsrøngurrielø køben, pørr kebibgatøsrøngurrielø køben, ambøgurrielø køben, igurrielø køben, yu pirau chugurrieløtøgucha amrrunrrun, Tius nø ashib karub wainug purramisra manrrab.

30 Inchen møiløgøben møi ya yu pirau srabe melabeløbe srømbalarømbe nømmerrig pønrrønrrun. Inchen møi ya yu pirau nømmerrig pønrrabeløbe srømbalarømbe srabe melønrrun— chibig køn Jesúsbe.

Jesús Jerusalénwan isua kishib

(Mt 23.37-39)

31 Inchen tru kwalømdøwei mø fariseosmera køsrøn puabe, Jesúswan trenchibelø køn:

—Ñiguen yugurri webya, inrrø cha. Kaguende Herodesbe ñune kweechig kuin køn— cha.

³² Inchen Jesúsbe trencha løtabig køn:

—Ø zorra lataigwan trenchinrrab ambay cha: “Au, møimba, srønaba nabe kwaimandziimeran webetab, kwanrreelan tamarøb, trumarbe nai maramigwan patsøgamønrrun” tan chinrrab.

³³ Inchendø nabe møimba, srønaba, trumarba nai maywan ib yamig køn cha. Kaguen Tius maig karuigwan kan eshkabiibe nøørørørøn kømø, Jerusalénsrø kwamig nebunrrun chibig køn.

³⁴ ‘jJerusalén! jJerusalén! jTius maig karuigwan eshkabelan kweechib, katø ñimuyasig Tius karua ørilan sruutøga petabig! jNabe yamba, kan piejetø kømø, kan atøwall nui pullichu-uregwan kwaldzarig umbu kanbalatø mara, maatanab lataitøwei ñui uregwan tulundzunønrrab inchen, ñibe nane kaasig køn! cha.

³⁵ Au, ñim waraig yamerabe elatsig kørømisrtrun cha. Inchawei nabe trendamønrrun chibig køn: Nane mas ashchaamøn cha, øyah tamnegatig: “jSeñorwei munchiyu nø ørig arrubiibe mayanguen tab kuig køn!”— cha.

14

Kan møg parab kwanrrø tøgawgan Jesús tamarøb

¹ Kan isrin kwaløm Jesúsbe kan fariseo chi maramigwan nø ashibigwei yausrø manrrab kebya wabene, kaneløbe ke chindashchab ashibelø køn.

² Inchene truyube kan møg Jesúswei merrab parab kwanrrø tøgawgan wabene,

³ Jesúsbe tru maig maramigwan martrai Moisés pørigwan kusrenanøbelanba, fariseosmeranba trencha payibig køn:

—jIsrin kwaløm kan kwanrriigwan tamarmønrrai merig kø, chindah, kabe merømuyig kø, chindah?— cha.

⁴ Inchen nømbe chigucha løtømeeleø køn. Inchene nøbe kwanrriigwan srua arrua, tamarabe, yandø inrrai ‘ungwa’ chibig køn.

⁵ Incha nømune trenchibig køn:

—jÑimma møikkøben, ñui nusrkain kui, kabe ñui wey kui pisuyu kebeñenma, isrin kwaløm kuingucha, tru urastø wesramønrraitirru?— cha.

⁶ Inchen nømbe øyeelan chigucha løtønrrab kaimabelø køn.

Novios yaumay lynchab amrrunrrai eshkailø

⁷ Lynchab amrrunrrai eshkaig misaamera mishatsigu mas tab purramdønug, tab purramdønug laben, Jesúsbe treeg indi ashabe, øyeeg kømig køn chib eshkaib waminchibig køn:

⁸ —Møikkøben ñun kan novios yaumay lynchab attrai eshkabene, mas tab wamdønug merrarramøta cha. Inchippa ñi lataguen kømø, mas nuigwan lynchab attrai eshkaig kua, truig puben,

⁹ tru ñunba, truigwanba lynchai eshkabiibe arruppa: “Ñi waigwan ønun tranø” chibene, ñibe kørøimisra wendausrø wanrrab purainrrabguen cha.

¹⁰ Treeg inchimøtø, masken ñun lincha cha eshkabene, wendausrø wamisr cha, tru ñun lincha chibig arrua: “Ñi, kasukube, yu merrabsrø wanrrab puraamø” cha, ñun trenchinrrai. Inchen ñibe tru mishatsigu ñiba purrabelai merrab truba tab indig kønrrabguen cha.

¹¹ Kaguen møikkøben nøasiitø ‘nuig kurmb’ isubigwane, ka kørøig martrun cha. Inchen nøasiitø ‘nuig kurmb’ isumfigwane ‘i møøbe si, nuig køn’ taig kønrrun— chibig køn.

¹² Incha katø Jesúsbe tru lincha cha eshkaib møwangucha trenchibig køn:

—Ñi kan mamig srørrøppe, ñui asiilandø kømøwei, ñui nunelandø kømøwei, ñui misagwandø kømøwei, ñui ya pulu puarmerandø kømøwei wama srør cha. Kaguen truiløbe ñungucha treetøwei linc'ai wama, nømgurringucha treetøwei marene, truburø ñibe utamigwan uta kørømisrtrun cha.

¹³ Treeg kømøtø, ñi kan fiesta marøppe, waachameran køben, kønørrab kaimabelan køben, cojosmeran køben, kabgarmeran køben linc'ab amrrun-rrai eshkawabe,

¹⁴ ñibe mayanguen tab indig kønrrabguen cha. Kaguende truiløbe ñune katøburø treetøwei marmuindøgucha, sølgandø tabigwan marøbelø katø øsiirab kwalømbe, tru ututø ñungucha Señorbe truburø tranamigwan tøgatø tranig kønrrun— chibig køn.

*Inbe mamig truba nu tamara kuigwan kemesra wamindig
(Mt 22.1-10)*

¹⁵ Inchen iigwan mørabe, tru kan mishatsigu wabiibe Jesúswan trenchibig køn:

—Tius nø ashib karub waisrø mamigwan mabiibe mayanguen tab kuig kønrrun— cha.

¹⁶ Inchen Jesúsbe nun trenchibig køn:

—Kan møg truba nørø mamimera mannamig tamara, misaamera truba nu linc'ab amrrun-rrai eshkawa,

¹⁷ yandø mam urasbe nui karuindiig megabigwane tru lincha tailan trenchinrrab ørøbig køn cha: “Yandø ke chab pønsrainguen pønrran cha, amrruy” chinrrai.

¹⁸ Inchene møitøgucha ke chine kemesrøb mendabelø køn cha. Srøtiibe: “Kanbalø pirø ke møindø chab pena, trunun ashchab inrrab war tan cha. Treekkurri kaimamønrrun tan chirrunrrig cha”, trendan cha.

¹⁹ Inchen kane: “Weymera diez arabelø pena, maig marøbelø køtashchab ashchab inrrab war tan cha. Treekkurri attrab kaimamønrrun tan chirrunrrig” tan cha.

²⁰ Inchen katøgane: “Ke srø kasharawa kua, trugurri attrab kaimamønrrun tan, chirrunrrig” tan cha.

²¹ Inchen karuindiig megabiibe ya, tru nun karub pera wabig ya puai-gwan kerrigu eshkaben, nøbe namappe, karuig megabigwane trenchibig køn cha: “Malla inrrø cha, ciudayu calleswanba, maywanba ya, waachameran køben, kønørrab kaimabelan køben, cojosmeran køben, kabgarwan køben yu pera attrig” cha.

²² Inchen mas yanasrø tru karuindiig megabiibe trenchibig køn cha: “Ñi nan karub pera wabig, ñi maig karuigwan maren, katøgucha aldø pasran” cha.

²³ Inchen nøbe tru karuindiig megabigwane: “Ciudayu wambiisrø nørø maymerawan køben, shush maywan køben ya, nai ya netsanrrai katøganelan amrrumø kømø, ke amrrumne wamønrrig cha, trendan cha.

²⁴ Kaguende nabe trendamønrrun: Tru srøsrøelø na lincha cha wamiiløbe møikkucha nai mamigwane maig mamig kuinguen mørtraamøn” cha trendan— chibig køn Jesúsbe.

*Jesúswei mendig yamibe murig køn
(Mt 10.37-38)*

²⁵ Misag truba nørø Jesúswei mendig amben, nøbe keesha ashabe trenchibig køn:

²⁶ —Møikkøben naimay arrua, nui møskawan, nui usran, nui srawan, nui uregwan, nui nunelan, nui nuchalan lataitøguen kømø, nan mas undaarab,

katø nui øsig kømigwan lataitøguen kømø, nan mas isub undaaramíbe nai mendig uñibig kønrraamøn cha.

²⁷ Inchen katø møikkøben nui kuruswan nø muta arrumigwan muta, nai mendig arrumíbe, nai mendig uñibig kønrraamøn chibig køn.

²⁸ Ñimma møikkøben, kan truba pala ya martrab inchabe, ¿patsøgamdiig kətashchab anwanmerriig ashchab wamisrmønrraitirru? cha.

²⁹ Treenchimøtø, pøtøburab pølsrugwandø pølbasra, patsøgønrrab kaimabene, mayeelø ashibeløbe ñune indzatø ashib trenchinrrun cha:

³⁰ “Ø møøbe yawan martrab pølbasra, patsøgønrrab kaiman” cha.

³¹ Kabe kan reyma katøgan reyba kwayanrrab webinrraptø, ¿suldaumera diez mil nø tøgagúitøgaba, katø tru nõba kwayanrrabig suldaumera veinte mil pera arrubiiba, ka kwayamdiig kətashchab trununmerriig isunrrab wamisrmønrraitirru? cha.

³² Pøs kaimappe, tru katøgan rey yabsrø srø pasrøbenbatø, kwayamø, tammay kørromiskun chinrrai karuilø ørtrun cha.

³³ Inchawei ñim møikkøben chi tøgagúigwan kerrigu elachimíbe, nai mendig uñibig kønrraamøn chibig køn.

Tre yandø larrmíig misrøb

(Mt 5.13; Mc 9.50)

³⁴ Trebe tabig køn. Inchendø yandø tru trebe larrmíig misrabe, ¿katøbe chincha kui larrøbig misriasamø?

³⁵ Pirø tamisrtrai pirøyu wiitamdiig kømøwei, animal pøywan abono marigu pusramdiig kømøwein køben, yandø petig kønrrun cha. ¡Møramig kalu pønsraibe mør!— chibig køn.

15

‘Tibe ubisha trubabig lataitøwein køn’ cha, kemesra wamindig

(Mt 18.10-14)

¹ Romasreelayasig an utabeløba, kaig marøbeløba Jesúswn mørtrab mayeelø kemallen,

² fariseosmeraba, tru Moisés pørigwan kusrenanøbeløbabe yeeg marøbig køn chib, trenchibelø køn:

—I møøbe kaig marøbelan wamab, truiløba mab inchibig køn— chib.

³ Inchen Jesúsbe ‘øyeeg lataitøwein køn’ cha, kemesra waminchibig køn:

⁴ —¿Ñimma møikkøben ubishamera cien tøgagua, truilø kan palab misrene, noventa y nueve wambig nõørsrø nõmdø warønrrai warøbashiippa, wetørramnegatig tru ubisha trubabigwan lanrrab imønrraitirru? cha.

⁵ Incha wetørrappe, kasrag købiitø, ñui kildunyu muta, arrua,

⁶ yandø yau puabe, ñui ya puluelanba, ñui trendø asielanba tulundzuna, trenchinrrun cha: “Naba kasraaragun cha. Kaguende nai ubisha trubabigwan wetørrar” cha.

⁷ Inchawei nabe trendamønrrun chibig køn: Srømbalasingucha treetøwei kasraaran køn cha, kan kaig marøbig nui kaig mariilan isua møra, Tiusweimay lliabene, tru noventa y nueve sølgandeelø tabelø isua møramig chi palømeelaimburab lataguen kømø.

An trubigwan kemesra waminchib

⁸ Kabe ¿kan ishuuma anzheelø diez tøgagua, truyu kan trubøbene, kan lámpara piløga, yawan paluunchib wetørramnegatig, tab lamønrraitirru? cha,

⁹ Incha wetørrappe, nui trendø asielanba, nui ya puluelanba tulundzuna, trenchinrrun cha: “Kaguen nai an trubigwan wetørrar cha, naba kasraaragun” cha.

¹⁰ Inchawei kan kaig marøbig nui kaig mariilan isua møra, Tiusweimay lliirabene, Tiuswei ángelesmerai utugucha treetøwei kasraaranrrun— cha trendamønrrun.

Kan nusrkai chi tøgagúigwan maramgaig marøbigwan kemesra wamindig

¹¹ Jesúsbe katø trenchibig køn:

—Kan møg pagatø nusrkalø tøgagúibe,

¹² wendiibe møskawane trenchibig køn cha: “Nai møskai, nan keta tranig naimburab kønrrabigwan pirishirra” cha. Inchen møskaimbe chi tøgagúilan nømun pirisha, tranen,

¹³ mam kwalømyutø tru wendø nusrkaimbe nuimburabigwan kerrigu tulisha, yabsrø katøgan pirausrømay ya, trusrø chigøben kaig marøbyutø patsø pinishibig køn cha.

¹⁴ Inchen nui anwan yandø chab patsøgøbenba, tru pirausrømbe chutøgucha parøbe truba nuig arruben, nune yandø palabig arrub mendabig køn cha.

¹⁵ Inchen tru pirausrø kan møweinug maramig lanrrab ibene, trube nui kuchimera waraisrø, kuchi ashib meganrrai ørøbig køn cha.

¹⁶ Inchen nøbe tru kuchi maig mamimeran øska mainrrabna isuben, nune muguen chi srørrmeelø køn cha.

¹⁷ Inchen nøbe katøle isua mørabe trenchibig køn cha: “¡Kan nai møskawei yau marøb melabeløbe mamig yeeg nørro uncha tøgagøben, trune nabe yu parøgwab kwamønrrun! cha.

¹⁸ Trembe nai møskawei yamay katø kurrab ya, nune trendamønrrun cha: ‘Nai møskai, Tiusweimburappa, ñuimburappa kalø mara pasrar cha.

¹⁹ Møimbe yandø kan ñui nusrkain kui lataig tøgagømgag kur cha, ñui marøb melabelan lataitøwei tøgagørra’ chinrrab tan” cha.

²⁰ Incha møskawei yamay ib mendabig køn cha.

‘Inchen møskaimbe yab arrubendø, nebua asha, kan nai unan yeekkucha nebutamab lastima ashabe, katønrrab lula, irab, muchab indan cha.

²¹ Inchen nusrkaimbe møskawane trendan cha: “Nai møskai, Tiusweimburappa, ñuimburappa kalø mara pasrar cha. Møimbe yandø nai nusrkain køn cha wamig kønrrabgaig kur” cha.

²² Inchen nui møskaimbe nui karuig mendig melabelan wama, trendan cha: “Kenanamelan mas tabelan petø wesrua kenanøb, tasigu surtigas pasrøb, alpargatis keetøsrøb inday cha.

²³ Incha tru ø tsal-lanin toron srua amrrua, kweetsay tan cha. Incha fiesta marøb, mab kasraaragun cha.

²⁴ Kaguen i nai nusrkaimbe kwaig lataig kua, katø øsiirain køn cha, trubig lataig kuigwan katø wetørrar” tan cha. Incha fiesta marøb mendabelø køn cha.

²⁵ Inchen tru mayor nusrkai tru trau uñibiibe arrua, ya pulu pub kuabe, truba may wanrrøb, palø ichib, katø pailab kui mørabe,

²⁶ truyu kan møigwan køsrøn karuindiig megabigwan wama payibig køn cha: “¿Chinchibren køh?” cha.

²⁷ Inchen trube trenchibig køn cha: “Ñui nuneg puben, ñui møskaimbe tru tsal-lanin toron kweetsingarun cha, kaguen chigucha kømø, tabig ka øsig puben.”

28 Inchene mayor nuneebe namaptø, kebarrumønrrab inchen, møskaimbe webya, kebattraí truba inchibig køn cha.

29 Inchen nõbe mõskawane trendan cha: “Yamba nabe ñun yeeg yam pila chu uragucha ñi maig karuigwan mõra marøb megaben, trune nane managuen kan cabro-unøtøguen ketømíig køn cha, nai linchibeløba fiesta maramig.

30 Trune mõimbe ñui nusrkai ñui anwan kaig ishumburmeraba chab patsøga pubene, ñibe tru tsal-lanin toron kweetsin køn” cha.

31 Inchene mõskaimbe trendan chibig køn: “Nai nusrkai, ñibe chu uragucha naba waben, na chigurrimbunø chi tøgagúibe ñuiwein køn cha.

32 Trune ñui nuneebe kwaig lataig kua, katø øsirain køn cha; trubig lataig kuigwan, katø wetørrar cha. Treekkurri mõimbe fiesta marøb, kasraaramibe søl køn” tan— cha, trenchibig køn Jesúsbe.

16

libe tru chi købigwan ashib tsunrrai trarrig søl marmúigwan kemesra wamíndig køn

1 Incha katø Jesúsbe nui kusrenanøb pera uniilan trenchibig køn:

—Kan pua møg nui chi købigwan ashib tsunrrai trarrig tøgagøbig køn cha. Indiibe mõiløgøsrøn tru pua mõwan trencha eshkanrrab ambubelø køn cha: “Tru ñui chi købigwan ashib tsunrrai trarriibe ñi chi tøgagúigwan ke ka yandø chine marøb ka patsøgøb tsun” cha.

2 Inchen tru pua mõøbe tru ashib tsunrrai trarrigwan wamabe, trenchibig køn: “¿Chigúindørre ñune øyeeg waminchib køh? cha. Trube mõimbe, ñi nai chi købigwan ashib tøgagúigwan nan lutøgurri eshkarra tan cha. Kaguen yandø nai chi købigwan ñibe ashib tsumibe mas kaanrrab køn” cha.

3 Inchen tru ashib tsunrrai trarrinabiibe nunetø treeg isubig køn cha: “¿Nan øyeegwan martrai tranøbig tru maramelan yandø nan kerrabene, trube, mõimbe chi maramerah? cha. Yandø kwallchabgaig kur cha. ‘Chigøben kettra’ cha, miab unamibe kørig køtan cha.

4 Nan yandø ashib tsumønrrai weguchene, mugøben nõmui yamerayu nan wamab utønrrai, mõimbe si, nabe chi maram kui asha pasrar” tan cha.

5 Inchabe nui ashib karubigwan ulø misrarwan kan kan wama, srøsrigwane trencha payibig køn cha: “¿Nai ashib karubigwan ñibe maya ulø kugu?” cha.

6 Inchen nõbe: “Olivo aceite cien galones ulø kur” chiben, tru chi maramigwan ashib tsubiibe: “Ñui ulø misrig pørin kilgawan cha chipt-inchibig køn. Petøzhiitø wamisrøb mõimbe cincuentaíndig kørrøørøb pørøptinchi” tan cha.

7 Incha katøganune: “¿Ñibe maya ulø kugu?” chiben, nõbe: “Tirigu cien cargas ulø kur” chiben, tru maramigwan ashib tsubiibe: “Ñui ulø misrig pørin kilgawan utørra chibig køn. Mõimbe ochentaíndig truyu pør” cha.

8 Inchen nui ashib karubiibe tru chi købigwan ashib tsunrrai trarrig maig maramigwan marmúigwane ke chi maramdíig køtasha ashib megawa marin kui ashabe, kan trengucha møg isua marøbig kønrrab tan cha. Pøs yu pirauigwandø isum misaamerabe nõm treeløtø misrøppe, purø møg isua marøbelø køn chibig køn, tøryuelai ureemera lata kømøtø.

9 Nabe ñimune trendamønrrun cha: Yu tabig kømø pirau ñim an tøgamisriiløtøga misaamera asiimeelan asiilø mara tøgagønrrab inday cha.

Treeg maren, ñimui tru chi tøgagúilø chab patsindøgucha, ñim managatig purramnug srømbalarømbe nøm ñimun utønrrabelø purrønrrain cha.

¹⁰ Inchen lamøtiigu søl marøbiibe nuwangucha treetøwei søl martrun chibig køn. Inchen lamøtiigu søl marmíbe nuwangucha treetøwei søl marmønrrun cha.

¹¹ Inchawei yu pirau chi købig tabig kømígwanguen ñim maig maramigwan søl asha marmeelane, ¿mas tru newan tabigwane ashib tøgagønrraimbe ñimune mu traniaasamø? cha.

¹² Ñimuin kømígwanguen ñim chi tab asha marmeelane, ¿mas ke ñimuyasig tøgagønrraimbe mu traniaasamørra? cha.

¹³ Kan karuindiig megabiima muguen pailanbabe tab mara tranrrab kaimanrrun cha. Kaguende kanune tsalø ashippe, kanune undaaranrrun cha. Kanune chiyugucha truba tab mørøb megappe, kanune kaashib webinrrun cha. Inchawei Tiusweimburabigu marøb pasrønrrab isumba, anweimburabigu marøb pasrønrrab isumba inchibiibe martrab kaimanrrun cha, pabaløbabe.—

¹⁴ Inchen fariseosmera anwane ke chinchimmørø inchib undaarabelø iigwan kerrigu mørøb pønrrøwabe, Jesúsuan indzatø ashen,

¹⁵ Jesúsbe trenchibig køn:

—Ñimwein køn cha, misag malaube ñim ñimasiitøwei sølgandø amøñibelø tabelø misrøb pønrrabeløbe. Trune Tiusbe ñimui manrrømerayu chi isuilan asan cha. Kagenen møguelø purø tabig asønai indigwane, Tiuswein kabyube ashikken kønrrabgaig trømbøig køn cha.

Maig maramigwan martrai Moisés pøriiba, Tius nø ashib karub waiba

¹⁶ Maig maramigwan martrai Moisés pørigwanba, Tius maig karuigwan eshkabelø kusrenaniilanbabe Juan arrub kwalømgatig møra maramig købig køn cha. Inchen tru uraskurrimbunøbe Tius nø ashib karub waigwan tabig srø wamwan eshka kusrenanen, mayeeløba kebamrrab tranrrabelø køn cha.

¹⁷ Srømbalaba, pirøba pønrrabelø pinamikken chigucha kømuben, trune tru maig maramigwan martrai Moisés pørigu maya lamøzhig pønrrabikken ka yandøbe, purainrraamøn chibig køn, Jesúsbe.

Keeba, sraimba petiyamumigwan waminchib (Mt 19.1-12; Mc 10.1-12)

¹⁸ Mu møøtøgucha nui srawan kucha, tarømisra, katøganba kasharabiibe, itølulan cha. Inchen katø tru keg kucha ishuuba kasharabiibe, katø treetøwei itølulan— chibig køn.

Pua møøba, Lázaroba

¹⁹ Katø Jesúsbe trenchibig køn:

—Kan truba pua møg købig køn cha, larrø tab yalø pigøzheelø kemba, linotøga mariilø nuweyelø kemba, kwalømmørig purø tab fiestamera maramba inchibig.

²⁰ Inchen katø kan truba waacha møg Lázaro taibe, asru pisrøtø netsaig chu uragucha puaigwei yau wambig kerruinug yaskabu wamisra,

²¹ tru waachabe tru puaigwei mishatsigugurri kørriitøga øska mainrrabna isuben, trune pisrømerane werameratø kemalla, nerab købelø køn cha.

²² Indiibe kan kwaløm tru waachabe kwaben, purø tabzhiisrø Abraham wanrrai ángelesmera pera ambubelø køn cha. Inchen tru puaikkucha kwaben, sørabelø køn cha.

²³ Inchen tru puaibe tru kwabelø amba mōra melainug purø trømbøig kui megawa, kurraasha, yabgurri Abrahamwanba, Lázaronba purrai ashabe,

²⁴ trashibig kōn cha: “Abraham, merrabsrø nai mōskai, nan lastima asha, Lázaron ørtra chib, nui tasig-unandøguen piyu keguana, nai niløwan sōmartrab attrai. Kaguende nabe yu i nag naarabigu mumaygucha kōmui purø trømbøig kui megar” cha.

²⁵ Trenchibig Abrahambe trenchibig kōn: “Nusrkai, ñiguen isu cha. Ñi pirau øsig tsub urasbe ñibe tabiitø, tabiitø utøben, Lázarobe treetøwei kaitø, kaitø utig kōn cha. Mōimbe Lázarobe yube chi isumgaig tabig wamig utøben, ñibe mumaygucha kōmui purø trømbøig kui megan cha.

²⁶ Treeg kōben katøgucha, namuimba, ñimuimba tøbøtag kan purø trømbø umbu kulli pasran cha. Yugurri ñimuimay ambug kui inchibelø puramrrab kaimabwei, katø ñimuinukkurri namuimay purørrug kui inchibelø kaimabwei inchai.”

²⁷ Inchen tru puaibe trenchibig kōn: “Treeg kōbene, trube, Lázaron nai mōskawei yamay inrrai ørtra cha.

²⁸ Trusrø nunelø trattrøgatø tøgagur cha, nōm isua kōnrrai truilan waminchai, nōmgucha yusrø mumaygucha kōmīg purø trømbøigumay amrrumønrrain” cha.

²⁹ Inchen Abrahambe trenchibig kōn: “Nōmbe Tius maig karuigwan eshkabelø pøriilan kōben, Moisés pørigwan kōben tøgar kōn cha. ¡Truilan mōrbash!” cha.

³⁰ Inchen tru pua mōøbe trenchibig kōn: “Nai mōskai Abraham, kah, treeg kōmøtø, mōikkōben nōmuimay kwaitai utugurri kurra ibenesi, nōmbe nōmui kaig mariilan isua mōra, Tiusweimay lliranrrun” cha.

³¹ Inchen Abrahambe trenchibig kōn: “Moiséswanba, Tius maig karuigwan eshkabelanba, truilanma mōrmuibe, kwaitai utugurri mōikkōben katø øsiiraingucha mana kōrenrrab kō” tan— cha, Jesúsbe trenchibig kōn.

17

Kalø marigwan ulø paymumigwan eshkabig

(Mt 18.6-7, 21-22; Mc 9.42)

¹ Jesúsbe nui kusrenanøb pera uniiilan trenchibig kōn:

—Chine chinetø iløsrkøb kegørrøsrkøb attrabigwane arrumønrrai chinha katamgaig kōn cha. Inchendø jmøg waacha! tru kaigwan nø pera mara kebenøsrkøbigweimbe jkan maig kuaasamørra! cha.

² Trembe kan tirigu kitsig nu srugwan naashigu iløsrka, mar umbusrø kegutsig kuinguen søl kōbsruinrrun cha, i shushmeran kaig mara kegørrøsrkøbgunrriibe.

³ Inchawei ñimdøwei ashiptø kuy cha. Ñui nuneg ñun chigøben kaig marene: “Ñi øyeeg marmumbala” cha, alegau, chibig kōn. Inchen nø nui kaig mariilan isua mōra, Tiusweimay llirabene, ñibe trunun yandø mas ulø paymønrrab, pesannau cha.

⁴ Mawawan nøbe katøle, katøle siete nebumnegatig ñun kaig mara, tru kaig marimørig ñun: “Øyeeg maramgaigwan marar” chib arrubene, ñibe trunun mas ulø paymønrrab, yandø pesannamig kōn— cha, trenchibig kōn Jesúsbe.

Isubigwan nainuutø pasra tōga pønraibe maramburab martrun

⁵ Jesús nōashib karua øriiløbe nun trenchibelø kōn:

—Namui isubigwan ñuinug mas tōga melaigwan nemartra— cha.

⁶ Inchen Señorbe trencha løtabig kōn:

—Ñim kan murtasa yellburaptiitøguen isubigwan nainug pasra tøgær kuimbe, i sicomoro tusrwan: “Yugurri ucha, maryu ellgwawa pasrambu” chibene, tusrbe maig chiben mørøbsruinrrun cha.

Karuig mendig megabig chi maramelø

⁷Ñimma møikkøben, kan karuindiig megabig tøgagua arab uña, traugurrin kui, kabe ubisha ashib uña kui pubene: “¿Puraarrua, kabe yusrø manrrab wamisr” chinrraitirru? cha.

⁸Treeg chimøtø: “Nai mamigwanmerrig nena, pala itøgueigwan kewa, pørønawa, na chab mab, chab mutsamnegatig chi palain kuindø purørtrab ashib pasrau cha, treebe chinrrun cha. Incha trugurrimbe si, ñigucha mab, muchib inchig” chinrrun cha.

⁹Kabe nui karuindiig megabigwanma nø maig karuigwan maren, ¿truburø ‘ungwa’ chibelø kuitarru? cha.

¹⁰Ñimgucha treetøwei Tius maig karuigwan kerrigu marabe, trenchinri-gay chibig køn: “Nambe mendig melabelø chiguen trengatig marmeelø ker cha. Kaguende ke maig karuizhigwandø nebua marer”— cha.

Diezelø asr trerab kwanrrø tøgærwan Jesús tamarøb

¹¹Jesús Jerusalénsrømay ippe, Samaria pirøwanba, Galilea pirøwanba pureb maywan pureb ya,

¹²kan yamera tsitsø pønrrabnug pubene, møguelø diezelø lepra kwanrrø asr ørø trerabig tøgær katønrrab werruppe, werrubendø, yaptø pønrramisra,

¹³trashibelø køn:

—Jesús, ñi Kusrennøbig, namun lastima ashcha!— chib.

¹⁴Inchen Jesús ashabe, trenchibig køn:

—Judiosmerai sacerdotsmeran eshkanrrab ambay— cha.

Inchen nøm ambub pønrramnetø nømui kwanrrøbe tammisra, chishmis-rikken kørømmisrøbig køn.

¹⁵Inchen møikkøsrøn nun chishmisrin kui ashabe, truba mur trashib Tiuswan truba tabig waminchib katø arruabe,

¹⁶Jesúswei merrab tømønrsra ‘ungwa, ungwa’ chib maløwan piraugatig utsøbasrøbig køn. Tru møøbe judiøguen kømøtø, samariasriig købig køn.

¹⁷Inchene Jesúsbe trenchibig køn:

—¿Kwanrrøwan chishmariilø kørømmisrøbeløbe yamba diez kømmørgøpph? cha. ¿Nueveeløbe chu ambah? cha.

¹⁸¿Mu katøgan møikken Tiuswan maya nuguen tabig køn chib waminchab arrumuben, i peg pirausriitø Tiuswan ‘ungwa’ chinrrab arru chindah?— cha.

¹⁹Incha tru møwane trenchibig køn:

—Kurra, inrrø cha. Kaguende ñui isubigwan nainuutø pasra tøgagüikkurri tabig kørømmisran— cha.

Tius Nø ashib karub wainuguiibe mõi ya pasrabguen indan (Mt 24.23-28, 36-41)

²⁰Fariseosmera Jesúswan Tius nø ashib karub wainuguiibe chu ura punr-rah cha, payen, Jesúsbe trencha løtabig køn:

—Tius nø ashib karub wainuguig publiibe kaptøga ke asha kønrrai attra-bikkucha kømøn cha.

²¹Kabe: “Yu pasran” chimøwei: “Uyu pasran” chimøwei inchun cha. Kagen Tius nø ashib karub wainuguiibe ñimui umbuguen pasran— cha.

²²Incha nui kusrenanøb pera uniilane trenchibig køn:

—Na, Møg Misra Arrubig ñimui utu unin kwalømmerra, katø kan kwalømhiiitøguen pumønrabmab, ñim isum kwaløm attrun cha. Inchendø treebe asamig kaanrrun chibig køn.

²³ Ñimun: “Yu pasran” tantø: “Yyu pasran” tantø indingucha, ashchab ammøwei, mendig ammøwei inchigay cha.

²⁴ Kaguen kan palaig pilabig kandarø srømbalasarøngurri katøgandarøsrø kebilab lataitøwei, tru Møg Misra Arrubig arrub kwalømbe treeg kønrrun chibig køn.

²⁵ Inchen treeg pumøwatøbe, nabe chigøben marinab, kaashib indig kømig nebunrrun cha, mõi misaamera.

²⁶ Noé tsub kwalømmerawan maig purayaibe tru Møg Misra Arrubigwein kwalømmerawangucha treetøwei purainrrun cha.

²⁷ Misaamerabe chi isumø mab, muchib, kasharab, kasharanøb inchib kuig køn cha, Noé nui nu barcoyu kebib kwalømgatig. Inchen sre kwarømig pub menda, mayeelanba chab pinisaig købig køn cha.

²⁸ Katø Lot tsub uras chigucha treetøweim purayaig køn cha. Misaamerabe chi isumø mab, muchib, penab, yanøb, ellmarøb yamera marøb inchib købenba,

²⁹ Lot Sodoma ciudayugurri yandø webibene, srømbalasarøngurri naaba, azufreba sre pua, mayeelan patsø pinisaig købig køn cha.

³⁰ Na, Møg Misra Arrubig kenamisrøb kwalømgucha treetøwein kønrrun chibig køn.

³¹ Tru kwalømbe ya pala wambig wabiibe, yaambu chigøben tøgaguabe, wesranrrab kørraarumøta cha. Inchen møikkøben trau uñibiibe, yamay arrumøta cha.

³² Lotwei srawanma ñimguen isuy chibig køn.

³³ Inchen møikkøben chigøben køben kwamønrrab inchibiibe pinab pinamig nebunrrun cha. Trune tru kwawa pinabiibe nui øsig kømigwan esegawa tøgagønrrun cha.

³⁴ Inchawei nabe trendamønrrun: Tru arrub yembe pailø kan camayutø kib warøben, kane pera yaig køben, kane kørrømarig kønrrun cha.

³⁵ Katø ishumburmera pailø kitsøsrugu kichib køben, kanune srua iben, kane kørrømarig kønrrun cha.

³⁶ Møguelø pailø trau warøben, kane pera yaig køben, kanune kørrømarig kønrrun— cha, trenchibig køn.

³⁷ Inchen iigwan mørabe, nømbe payibelø køn:

—¿Señor, øyeebe churre purainrreah?— cha.

Inchene Jesúsbe trencha løtabig køn:

—Kwaig chu tsubene, truyu kallinasumera tulundzunønrrun— cha.

18

Maig kønrrabigwan asha marøb wabigwanba, piudanba maig indigwan waminchibig

¹ Chu urastøgucha Tiusba wamindamigwane elachib kullaaramø melamig truba palabig køn chinrrab, Jesúsbe nui kusrenanøb pera uniilan ‘øyeeg lataitøwein køn’ cha, kemesra waminchib

² trenchibig køn:

—Kan puebloyu kan juez wabig køn cha, truipe: “Tiuswan kørmøwei, ni mōguelan naimburab kømøbashtømab” isubig.

³ Inchen tru puebluyutøwei kan piudagucha wabig køn cha. Truibe tru juezweimay trenchinrrab arruptø arrubig: “Nan kalø marøbigwan maig maramigwan tamara kettra” chib.

⁴ Inchen tru juezbe kan maya yana køsrøngatig ke mørøg kømui inchibig køn cha. Inchabe yandø truike treeg isubig køn cha: “Nabe Tiuswan kørmøwei, ni møguelan naimburab kømøbashtømab isubig kuagucha,

⁵ i piudabe ke menrra pub llirab, ke pesrøølig inchib ke katø katø arumønrrai, ka tamara tranrrab isur” tan— cha.

⁶ Inchabe Señorbe trenchibig køn:

—Tru sølgandø tabigwan marmø juezken, nø øyeeg taigwan møray cha.

⁷ ¿Inchawe Tiusbe nuindø kønrrai lawa wesruilø yem kwaløm nun mia-belane, nõmuyasig sølgandø maig kønrrabigwan marøb purømisrmønrraitarru? cha. Kabe ¿muniitø, muniitø melønrrai inchaudah? cha.

⁸ Pøs nabe trendamønrrun cha: Tiusbe sølgandø maig kønrrabigwan petø tamara kettrun cha. Inchen treeg køben, na, tru Møg Misra Arrubig yu piramay katø arrub kwalømbe ¿isubigwan nainuutø tøgä misag pirau katøgucha wetørranrrautah?— chibig køn.

Chigøben tøgagüimburo an utab wabigwanba, Fariseowanba kemesra wamindig

⁹ Møiløgøben nõmdø sølgandiig tabelø kermab isua, katøganelane kaashibelaimburab Jesúsbe ‘øyeeg lataitøwein køn’ chib kemesra waminchib trenchibig køn:

¹⁰ —Pailø møguelø Tiuswei yau Tiusba waminchab ambubelø køn cha, kane fariseo køben, kane romasreelayasig an utabig.

¹¹ Tru fariseobe pasramisra, øyah chib Tiusba waminchibig køn cha: “Nai Tius, unywa, unywa chib, kaguen nabe kanelø lata niliig kømøwei, kalø marøptiig søl marmíig kømøwei, itøluløptiig kømøwei, ni i an utabig lataig kømøwein kur cha.

¹² Nabe truneyu pa kwaløm ayunab, na chi tøgagüigugurri diezmørig kan kan tranøb inchibig kur” chib.

¹³ Trune tru an utabiibe wendausrøndø pasramisra, ni nui kabmeranguen srømbalaneb neeshig kømui inchib, nui pechondø kurrøb, trenchibig køn cha: “Tius, nan lastima ashcha chib. Nabe kaig marøbig kur” cha.

¹⁴ Inchawe nabe trendamønrrun chibig køn: Tru an utabiibe nui yamay katø ippe, Tiusba chi kaig kømíig lataig Tius tabig kørrømarig yan cha. Trune fariseobe treeg kømø yan cha. Kaguen mõikkøben nõasiitø ‘nuig kurmab’ isubigwane ka kørig martrun cha. Inchen nõasiitø ‘nuig kurmab’ isumligwane ‘i møøbe si, nuig køn’ taig kønrrun— cha.

*Uregwan Jesús mayanguen tab kuilø kønrrain chib
(Mt 19.13-15; Mc 10.13-16)*

¹⁵ Ureezheelan chigucha Jesúsweimay srua amrrubelø køn, nø estsar-trai. Inchen nui kusrenanøb pera uniilø trunun ashabe, srua amrrubelan namøben,

¹⁶ trune Jesúsbe ureemerane nuimay wama, trenchibig køn:

—Ureemerane merømø, naimay ka amrrubasay cha. Kaguende Tius nø ashib karub waibe nõm latailaywein køn cha.

¹⁷ Inchawe nabe ñimun cierton trendamønrrun chibig køn: Møikkøben Tius nø ashib karub wainuguigwan kan unø lataitøwei utaptinchimíbe managuen tryube kebinrraamøn— cha.

*Kan pua mōg Jesúsba waminchib**(Mt 19.16-30; Mc 10.17-31)*

¹⁸ Kan mōikkōsrōn chi maramigwan nō ashibiibe Jesúswan trencha payibig kōn:

—Kusrennōbig tabig, ¿managatig øsig kōmigwan Tius tranig tōgagōnrrappe, nabe chi maramerah?— cha.

¹⁹ Inchen Jesúsbe trenchibig kōn:

—¿Chindimba nane tabig cha wamōgu? cha. Tabiibe kandø køben, truiibe Tiustø kōn cha.

²⁰ Tius maig maramigwan martrai pōnsrailane ñibe yandø ashibig kōn cha: “Itōlulmōwei, kweechimōwei, ñilōmōwei, katōganelaimburab isa waminchimōwei, ñui usri mōskawan maig kōbash inchimø, tab indamig kōn” tailan.—

²¹ Inchen tru mōøbe:

—Nabe iilane kerriguh matsinø-unøgurri marøbig kur— chiben,

²² Jesús iigwan mōrabe trenchibig kōn:

—Katōgucha kan chigōsrōndø palan cha. Ñui chi tōgagūigwan kerrigu yana, waachameran pirishi cha. Treeg marabe, srōmbalasarōmbe chigurrimbunø tōgagōnrrabguen cha. Trugurrimbe arrua, nai mendig amø— chibig kōn.

²³ Inchen tru mōøbe iigwan mōrabe, truba isui inchibig kōn, kaguen truba puaig kua.

²⁴ Inchen Jesúsbe nun ashabe, trenchibig kōn:

—|Tius nō ashib karub wainug puarmera kebambamibe purø murig kōn! cha.

²⁵ Kan camelloguen tsusain kal trabyu illmø larrayamdiig køben, kan puaibe Tius nō ashib karub waisrø kebinrrab kaimanrrun— cha.

²⁶ Inchen mōrøbeløbe trenchibelø kōn:

—Trube, treeg købene, ¿kaigyugurrimbe mu kui wesraig kōnrrautah?— cha.

²⁷ Inchen Jesúsbe lōtappe:

—Mōguelø martrab kaimaigwane Tiusbe sí, martrun— chibig kōn.

²⁸ Inchen Pedrobe trenchibig kōn:

—Au, nambe namui chi tōgagūilan elacha, ñui mendig amrruig kōn— cha.

²⁹ Inchen Jesúsbe trenchibig kōn:

—Pøs nabe ñimun cierton trendamōnrrun cha: Mōikkøben nui yawan, sawan, nelan, mōskalan, uregwan Tius nō ashib karub waigweimbura-gigwan isua elachibiibe,

³⁰ mōi yu piraube øyeetøguen kōmø, mas purø nu uta tōgagua, kansrōmbe managatig øsig kōmigwan utōnrrun— cha.

*Jesús katøyug nō kwamigwan eshka**(Mt 20.17-19; Mc 10.32-34)*

³¹ Jesús nui doce kusrenanøb pera uniilan nōørø wamabe, trenchibig kōn:

—Au, nambe Jerusalēnmay nebambub amber cha. Trusrōmbe tru Mōg Misra Arrubigweimburab Tius maig karuigwan eshkabig pōriibe kerrigu maig taig punrrun cha.

³² Kaguende nune judíos kōmeelan tranen, indzaashib, tsalø wamab, il-limbi tuchaashib,

³³ ichaguchib srua kua, yandø kwetchun cha. Inchendø pōn kwalømyube katø øsiiranrrun— chibig kōn.

³⁴ Inchen nōmbe trunin mandø kuinguen mōrmøwei, ni wamindigwan chi tainguen mōrmøwei inchibelø kōn. Kaguende iig wamindiiløbe nōmune sōrin pasrøben, nōmbe ni chiwan tainguen mōrmeelø kōn.

*Jesús kan jericósriig kabgaigwan tamarøb**(Mt 20.29-34; Mc 10.46-52)*

³⁵ Jesús yandø Jericó ciuda pub lutau ibene, may menda kan kabgaig 'anzhig kettra' chib, miab wawabe,

³⁶ misag truba nu puraambi mørabe, kabgaibe:

—¿Chindah?— cha, payene:

³⁷ —Nazaretsrø Jesús pureb yan— cha, trenchiptinchibelø køn.

³⁸ Inchen kabgaibe trenchib trashibig køn:

—¡Jesús, merrabsrø Davidwei Nusrkai, nan lastima ashcha!— chib.

³⁹ Inchen tru merrab ambubeløbe niløtø wanrrai namingucha, nøbe trenchib mas mur trashibig køn:

—¡Merrabsrø Davidwei nusrkai, nan lastima ashcha!— chib.

⁴⁰ Inchen Jesúsbe pasramisra, srua amrrungaruben, nuim pulu pubene, trencha payibig køn:

⁴¹ —¿Na ñuyasig chi maramig paløta?— cha.

Inchen kabgaibe trencha løtabig køn:

—Señor, nai kabmera ashibig misrimbe køtan— cha.

⁴² Inchen Jesúsbe nun trenchibig køn:

—¡Ashibig misr! cha. Ñui isubigwan nainug pasriitøga tabig kørrømisran— cha.

⁴³ Inchen tru urastø kabgaibe ashibig misra, Jesúswei mendig Tiuswan truba tabig waminchib iben, mayeelø iigwan ashibeløbe nømgucha Tiuswan tabig waminchibelø køn.

19*Jesúsba, Zaqueoba*

¹ Incha Jesús Jericó ciudayu kebya, truyu pureb ibene,

² kan truba pua møg romasreelayasig an utabelan nø asha karubig, kan Zaqueo taig,

³ Jesúswan truba ashig kui inchibig wabig køn. Inchendø menrra misag køben ashchab kaimabig køn, Zaqueobe lamøtø møg kua.

⁴ Incha merrab lula, Jesús purayam puluwan, kan sicomoro tusryu ashchab nebiben,

⁵ Jesúsbe tru puluwan puraya, palabunø neeshabe, trenchibig køn:

—Zaqueo, mallatø pinaamø cha. Kaguene mõi ñui yau kørrømisram kønrrab køn— cha.

⁶ Inchen Zaqueobe mallatø pinaarrua, Jesúswan truba tab kui inchib wamab utabig køn.

⁷ Inchen iigwan ashabe, mayeeløba Jesúswan trenchib nømdø namig mullib mendabelø køn:

—Kan kaig marøbigwei yau kørrømisrtrab yan— chib.

⁸ Inchen Zaqueobe pasramisra, Señorwan trenchibig køn:

—Au Señor, waachameran na kerrigu chi tøgagúigwan tøbøtagwan tranrrab cha. Inchipa na møigwan køben isatø menrra utab, na kalø marig købene, trube, katøburø pibmaybatø menrra tranamørrun— cha.

⁹ Inchen Jesúsbe nun trenchibig køn:

—Kaigyurri wesrailø kømig mõi yu yau puin køn cha. Kaguende i møkkuha Abrahamwei misagurrindøwein kal-laweig køn cha.

¹⁰ Kaguende tru Møg Misra Arrubiibe trubigwan lanrappa, kaigyurri wesranrappa arrig køn— cha.

Anmera diez trubigwan kemesra wamindiġ

11 Jesús oyeeg tailan misaamera mørøb pønrramne, nõbe 'øyeeg lataitøwein køn' cha, kemesra waminchibig køn. Kaguene nõbe Jerusaleñ pub lutau iben, nõmbe Tius nõ ashib karub wainuguiibe mõi mõi punrraitamab isubelø køn.

12 Inchen treekkurri Jesúsbe trenchibig køn:

—Kan mõg, truba tab misagugurri arrubig, yabsrø katøgan peg pirausrø 'rey kønrrai mara kørømarig kønrrab ibig køn' cha, katø nuim piraumaytøwei attraptø.

13 'Incha inrraptø nui karuindiġ melabelan diezelan wama, kanun kanun kan kan an truba nuweyelø tranabe, trenchibig køn cha: "I anwan nemisrøb larrøbitchai marøb kønrrigay" cha, na arrumnegatiibe.

14 Inchendø nuim pirau misaamerabe tsaleelø kua, mõilan køsrøn nui wendautø amrrai wesrawa ørøbelø køn cha, øyah chinrrigay chib: "Nambe i mõwane namui rey kønrraimbe palain kømer" cha.

15 'Inchen treeg indingucha, nõbe Rey kønrrai mara kørømarig, katøle nuimbiraumay arruabe, tru nui karuindiġ melabelan tru nõ an traniilan, nuimay amrrungarubig køn cha, tru anwan kan kan utabelø mayambatø mariitashchab ashchab.

16 Inchen srøstriġ arruabe trendan cha: "Nai ashib karubig, ñi nan kan anzhig traniitøgatø mõimbe diez nemarar" cha.

17 Inchen reybe: "Øyambesin tan cha, nai karuindiġ megabig tabig. Ñi lamøtiiguma ñi øya søl mariibe, mõimbe pueblomera diezwan karubig kønrrai martrumøn" cha, trendan cha.

18 Inchen katøgan karuindiġ megabig arrubiibe trenchibig køn cha: "Nai rey, ñi nan kan anzhig traniitøgatø mõimbe trattøgatø nemarar" cha.

19 Inchen trunungucha trenchibig køn cha: "Trube, ñigucha trattø pueblomeran karubig kønrrabguen" cha.

20 'Inchen katøgan karuindiġ megabig arruppe, trenchibig køn cha: "Ñi, nai ashib karubig, ñiguen ash cha, ñui anwane kan pañeluyu pula ka esegawa tøgagur cha,

21 pøs ñun kørig køben, kaguende ñibe chiwandøgucha chi chippe kandø chibig kuimba; pøs ñi pønrsømubendø, ñi merrarrab; ñibe ñiashib ellgwaig kømubendø, ellmarigwan tulishib, treeg inchibig kuimba."

22 Inchen nõbe trenchibig køn cha: "Karuindiġ megabig larrø kaig, pøs ñi nan øyeeg køn chib, treeg køn taig kuig købene, trube, ñui trig maig wamindiitøgatøwei mõimbe ñun trubalawei nebunrrai maig kønrrabigwan marar cha. Nabe chiwandøgucha chi chippe kandø chibig kui ashib, na pønrsømubendø, na merrarrab; na ellgwaig kømubendø, tulishib inchibig kui ashabe,

23 trube, maindi nai anwan bancøyumay srua ya, pasrambala tan cha, na katøle arrua, nai anwan nemisrigwanbañau utabsrubrainrun" cha.

24 Incha truyu purrabelan trenchibig køn cha: "Nune anwan kerrawa, tru diez tøgagigwan tranø" cha.

25 Inchen nõmbe trendan cha: "Namui ashib karubig, truiibe diezken tøgagøn" cha.

26 Inchen tru an tranøbiibe trencha løtabig køn cha: "Nabe trendamønrrun cha: Tøgagigwane masken tranen, trune chigaigwane nui lamøtiġ tøgagúigwanguen kerranrun tan cha.

27 Incha tru nan tsaleelø nõmui rey kømønrrai inchibelane yu nai merrab srua amrrua, kweetsay" tan— cha, trenchibig køn Jesúsbe.

Jesús Jerusalén kebib
(Mt 21.1-11; Mc 11.1-11; Jn 12.12-19)

²⁸ Iigwan chab waminchabe, Jesúsbe Jerusalénmay ibig kòn.

²⁹ Incha yandø Betfagéba, Betaniaba pueblomerayu tru Olivos Tun taisrø, trusrø pub ambabe, nõbe nui kusrenanøb pera uniilø pailan

³⁰ trenchib karua ørøbig kòn:

—Ø pinrrøguesrø yamera tsitsø pønrrabsrømay ambay cha. Truyu puabe, kan burro muguen itøguaniimíg litsig wetørranrrabguen cha. Picha, yumay srua amrrunrrigay cha.

³¹ Inchippa mõikkøben: “¿Chinchab pichigue?” cha payene: “Señor palai indan” chinrrigay— chibig kòn.

³² Inchen nui kusrenanøb pera uniiløbe amba, Jesús nõmun maig taig treeg wetørrawa,

³³ burron pichib pønrrøbenba, puarbe trenchibelø kòn:

—¿Chinchab pichigue?— cha.

³⁴ Inchen nõmbe:

—Señor palai indan— cha løtabelø kòn.

³⁵ Incha Jesúsweimay srua amba, nõmui kewagúilan burro-unøyu kaya, itøguanøsrøben,

³⁶ Jesús pureb ibene, misaamerabe nõmui kewagúilan maywan kayibelø kòn.

³⁷ Incha yandø Olivos Tun lendesrø misrøb ambuppe, mayeelø tru nu sötø nui mendig amøñibeløbe tru maramburab mariilan kerrigu asikkurri Tiuswan truba tabig wamab kasraarab trashib mendappe, trenchibelø kòn:

³⁸ —¡Señor Tiuswei munchiyu Rey arrubiibe mayanguen tab kuig kòn! cha. ¡Srømbalásrømbe mayanguen tab kuinrrun! chib. ¡Srømbalásrømbe tørguegwalmabig kuinrrun!— cha.

³⁹ Inchen mõ fariseosmera køsrøn, tru misag utu pønrrabeløbe trenchibelø kòn:

—Kusrennøbig, ñui mendig amøñibelan niløtø pønrrønrrai namø— cha.

⁴⁰ Inchen Jesúsbe trenchibig kòn:

—Nabe trendamønrrun cha: Iilø chi chimø, niløtø pønrrøbene, sruumer-guén trashinrrun— cha.

⁴¹ Incha Jesús Jerusalén pulusrø pua, ciudadan ashabe, trunun isua, kishib

⁴² trenchibig kòn:

—¡Chi isumgaig tab købig tøgagømigwan kan mõin kwalømdøguen ñigucha nebua isuimbe kòn! cha. Inchendø truigwane mõimbe ñi ashmønrrai sörin pasran cha.

⁴³ Kaguende larrø kaig kwalømmerra ñun puben, ñui ashig kømui inchibeløbe ñuim pøtøgatan chamba mara, ambumay imay ñun kata kønøbashmønrrun cha.

⁴⁴ Incha ñune pirau pøtiicha, tru ñui umbu warab misaameran kweechen, ni kan sruutøguen katøgan srug palabe kørrømisrmønrrun chibig kòn, kaguen ñi, Jerusalénbe, Tius kaigyugurri wesranrrab arrub uras ke ka arrua uni lataitø indikkurri.—

Jesús Tiuswei yawan chish marøb
(Mt 21.12-17; Mc 11.15-19; Jn 2.13-22)

⁴⁵ Incha Jesúsbe Tiuswei yau kebya, truyu yanøb warabelan wambig webetab mendabe,

⁴⁶ nõmun trenchibig kòn:

—Tiuswei wamwan pørigube trenchibig køn cha: “Nai yabe Tiuswan wamindi ya køn” cha. Trune ñimbe nileelø warain trab marin køn— cha.

⁴⁷ Incha Jesúsbe kwalømmørig Tiuswei yau kusrenanøbig køn. Inchen tru sacerdotesmeran karubeløba, tru Moisés pørigwan kusrenanøbeløba, katø maya misagwan karubeløbabe Jesúswan mandø incha kwetsamdiig køtashchab labendø,

⁴⁸ chinchaguen martrab kaimabelø køn, kaguende misaabe mayeeløba Jesús wamindigwane purø tab møren.

20

Jesús karumburab karuig (Mt 21.23-27; Mc 11.27-33)

¹ Kan kwaløm Jesús misaameran Tiuswei yau kusrenanøb, tabig srø wamwan eshkarab pasrøbene, sacerdotesmeran karubeløba, tru Moisés pørigwan kusrenanøbeløba, misagwan karubelø kølli misaameraba kemalabe,

² nune trenchibelø køn:

—Namun eshkarra cha: ¿Ñi mariilane mu karua pasriitøgarre margu? cha. ¿Ñi øyeeg maramigwane mu karua pashta?— cha.

³ Inchene Jesúsbe løtappe, trenchibig køn:

—Nagucha ñimun kan chigøsrøn payrrab cha. Løtørray pøs cha.

⁴ ¿Misagwan Juan piu umbu ulsrøb uniibe srømbalarøngurrin kuig kø chindah, kabe møguelainukkurrin kuig kø chindah?— cha.

⁵ Inchen nømbe nømasiyaitø trenchib payiyab mendabelø køn: “Nam: ‘Srømbalarøngurrin kuig køn’ chibene, nøbe namune trenchinrrun cha: ‘¿Chindimba nune køremøgue?’ cha.

⁶ Kabe: ‘Møguelainukkurrin kuig køn’ chibene, misaamerabe mayeeløba namune sruutøga petønrrun cha. Kaguene misaabe Juanwane Tius maig karuigwan eshkarabig kui ke yandø tsabø asha tøgar køn” cha.

⁷ Incha nømbe trencha løtabelø køn:

—Maig kuindøbeh— cha.

⁸ Inchen Jesúsbe trenchibig køn:

—Trube, nagucha eshkamumønrrun cha, iilan na mu karuitøga marigwan.—

Kwallibelø larrø kailan kemesra wamindig (Mt 21.33-44; Mc 12.1-11)

⁹ Incha Jesúsbe misaameran pølbasa waminchib mendappe ‘øyeeg lataitøwein køn’ chib kemesra iigwan waminchibig køn:

—Kan møg uvas tra mara, trugurrimbe nui misrigwan pirishinrraptø pirøwan katøganelan kwallchai tranabe, yabsrømay truba yana yan cha.

¹⁰ Incha yandø lurramig puben, nui kan karuindiig megabigwan tru kwallchab utabelan tru kanbalø lurrigwan nøm tranrrai karua ørøbig køn. Inchen treeg øringucha, nømbe nun kurragucha, chiguchagaig ørøbelø køn cha.

¹¹ Inchen puaike katøgan karuindiig megabigwan øren, truigwangucha tsalø wama, kurragucha, chiguchagaig inrrai øran chibig køn.

¹² Inchen puaike pønmay kønrrabyu katøgan øren, tru kwallibeløbe trunungucha kørriincha, truyugurri wambig weguchibelø køn cha.

¹³ Inchen yandø tru pirø puaike trendan cha: “¿Chindamer? cha. Nai undaaraig nusrkawan ørtrab tan cha. Nune inchippa chinchimubgun” cha.

14 Inchen tru kwallibelø nun ashabe, nõmdø trenchibelø køn cha: “Pirøwan ketig utørrabiibe iigwein køn cha. Pirøwan namui martrab nune kweechi-gun” tan cha.

15 Inchabe uvas traugurri wegucha, nune kweechibelø køn cha.

¿Trube tru uvas tra puaiibe tru kwallibelane chi martrerah? cha.

16 Arrua, tru kwallibelane kweecha, tru uvas trawane katøganelan tran-run— chibig køn Jesúsbe.

Inchene misaamera iigwan mørabe:

—iManaguen kan trengatikkucha puraimuimbe!— chibelø køn.

17 Inchene Jesúsbe nõmun ashabe trenchibig køn:

—Trube, treeg købene, ¿Tiuswei wamwan pørigu øyah chibiibe mandø cha trendah? cha:

“Tru ya marøbelø kaasig sruube katsiisrø pølbsara wayamig mas purø tab srukken misrin køn” chippe.

18 Inchawei mõikkøben tru srug pala peñippe, pitis misrtrun cha. Inchen tru srug muim pala køben peñippe, nune usrø tuindø martrun— chibig køn.

19 Inchen tru uras tru Moisés pørigwan kusrenanøbeløba, sacerdotesperan karubeløba tru ‘øyeeg lataitøwein køn’ cha waminchippe nõmun kemesra wamindi møra, Jesúswan ¡katø! mõi mõi kemøtrab inchendø, misaameran kørig kui inchibelø køn.

Tiuswein kønrrabigwane Tiuswan tranøppe Césarwein kønrrabigwane Césarwan tranøb

(Mt 22.15-22; Mc 12.13-17)

20 Inchabe kan mõilan køsrøn larønrrai ørøbelø køn, sølgandø amøñibelø misrøb, Jesús chigøben wamindigu kebenøsrka trumay kubenadurwei tasku purøtrab, nu mi mandamgaig mariitøga nõ asha martrai.

21 Inchabe nõmbe payibelø køn:

—Kusrennøbig, ñibe søl waminchib, søl kusrenanøb indi nambe ashibelø ker cha. Ñibe misaameran mumera kətasha asha kusrenmø, Tiuswei maywan ñibe maig kusrenanamigwan cierton sølwan kusrenanøbig køn cha.

22 Trube, ¿tru Roma maya misagwan karub wabigwan nam an pagaramig merig køh, kabe merømuig køh, chinderah?— cha.

23 Inchen Jesúsbe nõmune ka kaig isuatørre inchib pønrrai ashabe, trenchibig køn:

24 —Kan anwan eshkarra cha. ¿I anyu maløba, i munchi pøriibabe muin køh?— cha.

Inchen nõmbe trencha løtabelø køn:

—Tru Césarwein køn— cha.

25 Inchen Jesúsbe trenchiptinchibig køn:

—Césarwein købene, Césarwan tranay cha. Inchen Tiuswein købene, Tiuswan tranay— cha.

26 Inchen misagwei malau nõ chi tailøyu chiyugucha kebenøsrkønrrab kaimabelø køn. Tru nõ løtilan nõmguen kwaara asha, niløtø kørørmisrøbelø køn.

Kwailø katøle øsiiranrab kuigwan payib

(Mt 22.23-33; Mc 12.18-27)

27 Inchen mõiløgøsrøn saduceosmera Jesúswan ashchab amrrubelø køn. Tru saduceosmerabe kwailøbe katøbe øsiiramønrrun chibelø kua, Jesúswane øyeeg chib payibelø køn:

28 —Kusrennøbig, Moisésbe namune øyeeg pøra kørørmariig køn cha: “Møigwei nuneg køben kwawa, srawan urekkaig kørørmarene, trube tru

nuneebe piudaba kasharawa, nuneg kwabigweimburab ureg tögagømig køn” chibig.

29 Trube, siete nunelø købig køn cha. Indiibe srøsrribe kasharawa, chi urekkaig kwaben,

30 tru wendauikkucha tru piudaba kasharawa, katø chi urekkaitøwei kwaben,

31 katø tru pøn kønrrabyuigwangucha treetøwei nebuben, yandø søteeløba tru ishuuba kasharawa, møikkucha urekkar kwabelø køn cha.

32 Inchen yandø srabebe tru ishukkucha kwan cha.

33 Pøs treeg købene, trube, tru kwabelø katø øsiirabene, ζnøbe møigwei srain kønrrerah? cha, payibelø køn, tru sieteeløba nune srai mara tögagüig købene.—

34 Inchen Jesúsbe trencha løtabig køn:

—Møi yu piraube kasharab, katø kasharanøb inchibelø køn cha.

35 Trune tru kansrø kanmaytø kebamrrai tögagüinabeløbe trunun nebub, katø kwabelai utgurri øsiiramigwan nebub incha, truiløbe kasharanrrab kømøwei, kasharanøb kønrrabelø kømøwein køn cha,

36 kaguende nømbe katøle kwanrrabelø kømøwa. Pøs nømbe ángesmera latalø, katø Tiuswei uremera køn cha, kwabelai utgurri øsiirab ureg kua.

37 Inchen tru tus-nø naaraigu maig purayaigwan pøra pasriguma, tru kwabeløbe katø øsiiranrrab kuigwan Moisésken kenamarig køn, tru Señorwan øyah cha wamappe: “Tiusbe Abrahamwei Tius, Isaacwei Tius, Jacobwei Tius køn” cha.

38 Pøs Tiusbe kwailai Tius kømøtø, øsiguelai Tius køn cha. Inchawei mayeeløba nuimbe øsigueløtø køn— chibig køn.

39 Inchen møiløgøsrøn tru Moisés pørigwan kusrenanøbeløbe trenchibelø køn:

—Kusrennøbig, ñibe sølwein tan— cha.

40 Trugurrimbe yandø mas payrrab inchimeelø køn.

ζCristobe mui misagurri arrubig kerah?

(Mt 22.41-46; Mc 12.35-37)

41 Jesúsbe trencha payibig køn:

—ζMisaabe chinch Cristone Davidwei misagurri arrub nusrkain køn tamig kønrrab køh? cha.

42 Kaguende Davidbe nøtøweinguen Salmoswan pørigu trenchibig køn cha: “Señor Tiusbe tru nai Señorwane trendan cha:

43 “Nai kusrmaygatø wamistr cha, ñui ashig kømui inchibelan ñi nebuna wamig na pønramnegatig.”

44 Cristone Davidbe: “Señor” cha, øyeeg wamubene, trube, ζmandøgurri Cristobe Davidwei nusrkain kønrrab køh?— chibig køn.

Moisés pørigwan kusrennøbelø nøm mailø kuilan Jesús waminchib

(Mt 23.1-36; Mc 12.38-40; Lc 11.37-54)

45 Maya misamera mørøb pønrrøben, Jesúsbe nui kusrenanøb pera uniilan trenchibig køn:

46 —Tru Moisés pørigwan kusrenanøbelan ashiptø kuy cha. Kaguen nømbe kørabelø kewa lirab amønami g chullelø, penab yanøb indiisrø maig købash kømø, truba tab wamønrrai indami gwan chullelø køn cha. Katø judíosmera tulundzuni yamerayube purø tab purramdønug purrag kui indamba, katø lincha tabig mabyugucha nørreelø purrainug purø tabigu purrag kui indamba inchibelø køn cha.

⁴⁷ Katø piudasmeran nømui yameran kerrawabe, tabelø misrøb ke ka yandø truba yana Tiusba waminchibelø køn cha. Truiløbe mōra melamig mas nuigwan utønrrun— chibig køn.

21

*Kan waacha piuda Tiusweyasig an tranøb
(Mc 12.41-44)*

¹ Tiuswei yau an kebusrinug, puarmera an kebusrøb køben Jesúsbe ashib wabig køn.

² Inchen katø kan waacha piudagucha, øskø an pagatøtøh kebusri ashabe,

³ Jesúsbe trenchibig køn:

—Nabe ñimun cierton trendamønrrun cha: I waacha piudabe mayeelø lataitøguen kømø, menrraguen tranan cha.

⁴ Kaguen mayeeløba nømbe undaigwandø tranen, trune nøbe waacha køptø, tru nui øsig tsumig tøgagúigwanguen kerrigu tranan— cha.

*Jesúsbe Tiusweiyawan pinisaig kønrrun chib
(Mt 24.1-2; Mc 13.1-2)*

⁵ Møiløgøsrøn Tiuswei yau tru tab sruuzheelanba, chigøben tabzheelø Tiusweyasig tranig pønrrabelanba, truilan waminchib køben, Jesúsbe trenchibig køn:

⁶ —Iig ñim ashib kuigwan pinisam kwaløm attrun cha. Yube ni kan srukken katøgan srug palabe kørrømisrømønrrun cha. Kerriguba pøtiitsig kønrrun— chibig køn.

*Chigurrimbunø købig misaabañau patsam lutau chigøben køb
(Mt 24.3-28; Mc 13.3-23)*

⁷ Inchene nømbe trencha payibelø køn:

—Kusrennøbig, ¿øyeebe mana purainrrerah? cha. ¿Truilø ke yandø treeg purainrrabigwan asamibe chitø kenamistrerah?— cha.

⁸ Ashen Jesúsbe trenchibig køn:

—Inchiptø kuy cha, ñimun peløsrkønrrain kømø. Kaguende møiløgøben nai munchiyu truba nu amrrua trenchinrrun cha: “Nabe truig kur” chib, katø: “Møi ya srabe kwaløm punrrabiibe lutau køn” chib amrrubene, truilan mendig ammøtay, chibig køn.

⁹ Incha ‘misaamera katøgan peesrø misaameraba purø trømbøig kørig kømdiig kwayab kweetsiyab køn’ chib; ‘misaamera tru piraueløtøwei trømbøig namig kurra kwayab køn’ taig ñim wamindi mōrabe, ñimbe kwarmøtay cha. Kaguende iilømerrigwei trendø treeg purainrrabigwein køn cha. Inchendø katøgucha patsamibe ke møi møin kønrraamøn— chibig køn.

¹⁰ Inchabe katø trenchibig køn:

—Peg misaamerabe katøgan peg misaameraba kwayaben, katø rey karumburab ashib karuim piraueløbe katøgan reywei misaameraba kwayanrrun cha.

¹¹ Trune pirø purø trømbøig kønabelø arrumba, chu pirausrøn køben parø amrrumba, kaig kwanrrømera amrrumba inchen, kørig kømdiig chigøben arrumba, katø srømbalæsøngurrimbe chigøben truba nørreelø kenamisrøb inchun cha.

¹² Inchendø øyeelø arrumøwatø, ñimune kemørb, larrø kaig marøb inchun cha. Katø ñimune judíosmera tulundzuni yamerayumay payib sruagønrrab

srua ambamba, kailan keeri yau keera pōnsramba inchun cha. Incha nagur-rindø reymerai merrab køben, karubelai merrab køben srua amben,

¹³ naimburab ñim wamindamig kønrrun chibig køn.

¹⁴ Ñimui manrrøyube øyee Swan isua pōnrrōnrrigay chibig køn, mandø lōtamigwan ke kanmaytø isua tōga pōnrrōnrrab inchimōnrrab.

¹⁵ Kaguen ñimun ashig kōmui inchibelø mayeølø, nōm manchaguen lōtōnrrain kōmōwei, nōm ñimun purab waminchib kasrōnrrain kōmōwei, nabe ñimun muguen øyee waminchimuinrrunig wamindamig tranamōnrrun chibig køn.

¹⁶ Inchen ñimui mōskalø køben, nunelø køben, ñimui ñimmisaamera køben, ñimui trendø linchibelø køben, ñimun ashig kōmui inchibelan tranen, ñimun mōilane kwetchun cha.

¹⁷ Maya misaabe ñimune nagurrindø tsalø indiilø kønrrabguen cha.

¹⁸ Inchendø ñimui turyu kan pusruuzhikken chi indiimig kønrrun chibig køn.

¹⁹ Ñim chi arringucha melabig meløwabe, ñimasiitøwei ñimui mōsiimerane øsiguig wesranrrabguen cha trenchibig køn.

Jerusalénwan pinisaig kōmig

²⁰ Jerusalén ciudawan pōtøburab suldautø tulsruig kui ashabe, petø pini-saig kønrraitamab isua,

²¹ Judea pirau warabeløbe tunmerasrōmay wegørra lulay. Inchen ciudayu warabeløbe truyugurri webambamig køn. Inchen ciudayugurri yabsrø warabeløbe ciudayumay katø ammōtay.

²² Kaguende trōmbøig mōra melōnrrai maram kwalōmmera kønrrun, Tiuswei wamwan pørigu maig taig kerrigu treeg nebunrrai.

²³ ¡Ishumbur waachamera, tru kwalōmmerawan patsø kwanrreelø, kabe muchib ureg tōgarmeraimbe maig kønrrer! chibig køn. Kaguen yu pirau purø isumdiig arruben, katø i misaameraimburab namig købig purø kōrig kōmdiig attrab køn.

²⁴ Mōiløbe espadatōga kweetsiilø køben, mōiløbe chugøben asiimø pi-rausrōmay kemōra srua ambiilø kønrrun chibig køn. Inchen tru judíos kōmeelø Jerusalén ciudawan mindishib itōlulrrun, tru nōmui treeg maram kwalōmmera patsamnēgatiitø.

Tru Mōg Misra Arrubig katø arrumig

(Mt 24.29-35, 42-44; Mc 13.24-37)

²⁵ Inchen chigøben truba nørreelø kenamisrtrun nōsigu køben, pølyu køben, estrellamerayu køben. Inchen pirau misaamera nørro pōnrrabiibe purø trōmbøig isui inchun, mar purø trōmbøig wanrrab mullib, trōmbøig latōgushib kurrøben.

²⁶ Katø misaamerabe yu pirau maig purainrrabelan isubiibah kōrig kōbiibatø pesannanrrun, kaguende srōmbalasrø purø nørreelø pōnrrabelan kōnōgøb sruagutsiilø køben.

²⁷ Inchen tru Mōg Misra Arrubiibe maramburab maramig tōgaig purø nuig tōrguegwalmabig wañiyu arruben ashchun, chibig køn.

²⁸ Inchawei iilø pureb arrub mendøbene, ølgandø pōnrramisra, kurraasay chibig køn. Kaguen yandø ñim kaigyugurri wesruilø kōmig lutau kønrrun—cha.

Higueran kemesra wamindig

²⁹ Incha katø 'øyee g latakōwein køn' cha, kemesra trenchibig køn:

–Higueranma asay cha, katø mayan tusrmeranba,

³⁰ ishiimera weguchib mendøbene, ñimbe pachig kwalømmera arrumig lutau kui asan cha.

³¹ Øyeetøwei ñim iilan purayai ashabe, Tius nø ashib karub pasraibe yandø lutau kuitamab isua kuy cha.

³² Pøs nabe ñimun cierton trendamønrrun chibig køn: Møin kwaløm misaamera pinømwatø, kerriguh purainrrun cha.

³³ Srømbalaba, pirøbabe patsøben, na wamindiibe ka wamindiitøbe purainrraamøn cha.

³⁴ Ñimbe ñimdøwei ashiptø kuy cha, ñimui manrrømerayu øyeeløtø netsailø kømønrrab, mamburab mab, mutsiirab, yu pirau øsig waramig chigøben tøgagømigwangøba isub indiilø, tru Señor arrin kwalømbe ñimun kan ilagu kegørrørskra merrarrab lataig arrindø mørmønrrappe.

³⁵ Kaguen tru kwalømbe yu pirau muba kuimburab mayeelaim pala treeg attrun chibig køn.

³⁶ Inchawei ñimbe ashiptø melay chibig køn, chu uragucha Tiuswan purugurra chib, øyeelø kerrigu pureb arrubigu kullaaramø, mur pønrramig kønrraimba, tru Møg Misra Arrubigwei merrab kemalla, pønrramig kønrraimba.–

³⁷ Incha Jesúsbe kwalømmerawane Tiuswei yau kusrenana, yembe Olivos taig tunsrø kørørmistrab ibig køn.

³⁸ Inchen kwalømmørig ke løtsøzhig, løtsøzhig maya misaamerabe Tiuswei yau nun mørtrab pubelø køn.

22

Jesúsuan kemørtrab waminchib

(Mt 26.1-5, 14-16; Mc 14.1-2, 10-11; Jn 11.45-53)

¹ Pirri Levaduragaig maig Fiesta, tru Pascua Fiesta taig, lutau køben,

² sacerdotesmeran karubeløba, tru Moisés pørigwan kusrenanøbeløbabe Jesúsuan mandø kweetsamigwan labendø, misagwan køriimatabelø køn.

³ Inchen Jesús tru doce kusrenanøb pera unilai utuig, Judas, tru Iscariote cha wamigwan, Satanásbe kebiben,

⁴ Judasbe webya, sacerdotesmeran karubelanba, tru Tiuswei yau ashib pønrrab suldaumeran karubelanba ashchab ya, Jesúsuan mandø incha nømui tasku tranamigwan waminchene,

⁵ nømbe truba kasraarawa, an tranrrab misrøbelø køn.

⁶ Inchen nøbe treeg martrab misra, misag tre nu kaaben Jesúsuan mandø incha tranamigwan yandø lab mendabig køn.

Señorwei pascua mamig

(Mt 26.17-29; Mc 14.12-25; Jn 13.21-30; 1 Co 11.23-26)

⁷ Yandø Pirri Levaduragaig main kwaløm puben, tru Pascua ubisha-unan kweecha tranamig købig køn.

⁸ Inchen Jesúsbe Pedronba, Juanwanba trencha karua ørøbig køn:

–Pascua Fiesta mamigwan manrrab tamartrab ambay– cha.

⁹ Inchen nømbe:

–¿Nambe chu tamaramø?– cha payen,

¹⁰ Jesúsbe trenchibig køn:

–Ñim ciudayu kebambene, kan møg pigøtsø mutaig ñimun katøben, truigwei wendautø amrrigay cha, nø kebyam yaugatig.

11 Incha tru ya puaigwane trenchinrrigay chibig kòn: “Kusrennøbiibe ñun trendan cha: ¿Nai kusrenanøb pera uniiløba pascua mamigwan mab purram salabe chu kòh?” cha.

12 Inchen ya puaipe pala pisusrø kan nu sala chab tamarikken ñimun eshkaben, truyu tamartrigay— chibig kòn.

13 Inchen nømbe amba, Jesús maig taig treeg wetørrawa, tru Pascuan tamarøbelø kòn.

Señor nui doce pera uniiløba mab

14 Incha yandø ura puben, Jesúsbe nui karua øriiløba mishatsigu wamisrabe,

15 trenchibig kòn:

—jNan øyeeg kaig nebuig megamig pumøwatø, Pascua Fiesta mamigwan ñimba manrrab truba truba isuig kòn! cha.

16 Kaguende ñimun trendamønrrun chibig kòn: Tius nø ashib karub wainug katøle ñimba manrrab wamisramnegatig nabe i mamigwane mamumønrrun — cha.

17 Incha copan muta Tiuswan ‘mayanguen pay’ chabe, trenchibig kòn:

—Cha iigwan, larrabelø mutsay cha.

18 Kaguende ñimun trendamønrrun cha: Møingurrimbunøbe uvas piwane mas muchimumønrrun cha, nai Møskai nø ashib karub waisrø katøyug ñimba mutsam kwalømgatig.—

19 Incha pirriwan muta, Tiuswan ‘mayanguen pay’ cha, pirisha, nømun trenchib srørrøbig kòn:

—Iibe nai asr kòn cha, ñimuyasig tranig. Iigwan øyeeg marøppe, nan isunrrab maray— chibig kòn.

20 Inchen chab ma, katø treetøwei copan mutabe, trenchibig kòn:

—Iibe tru nai anindøga Tius tru misagweyasig srø acuerdon marig, tru copa kòn cha, tru ñimuyasig na ani lusig.

21 Inchendø asay chibig kòn. Nan ashig kømui inçhibelan tranrrrabigwei tasiibe i mishatsigtøwei nain tasiiba trubalatrø trarra wan cha.

22 Tru Møg Misra Arrubiibe muwan inrrai pasrig, truwan iben, trune jtru nun ashig kømui inçhibelan tranrrrab møg waachaweimbe, kan maig kønrrer!— chibig kòn.

23 Inchen nømasyaitø:

—¿Treeg martrabiibe mu kerah?— cha payiyab mendabelø kòn.

Møig mas nuig kerah cha payiyab

24 Inchabe nømbe nømui utu møig mas nuig kønrraptiig kerah cha, payib aleguiyab købelø kòn.

25 Inchen Jesúsbe kusrub trencha løtabig kòn:

—Tru reymera judíos kømeelebe nøm karub tøgagúilane maig købash inçhib purran cha. Inchen tru nømun ashib karub purrabelane ‘misaamerayasig tabig marøb møguelø kòn’ chib wamiilø kòn cha.

26 Trune ñimbe øyamay kømøtø kømig kòn chibig kòn. Masken ñimui utu tru mas nuibe matsinø-unø lataitø misramig kòn cha. Inchen tru chi maramigwan nø ashibiibe kan karuig marøb megabig lataitø misramig kòn cha.

27 Pøs trube, øyeeg købene, ¿møig mas nuig kønrrab kòh? cha. ¿Mishatsigu manrrab wamisrøbiiteh? Kabe ¿tru mishatsigu mamigwan pønrsøbiiteh? cha. ¿Pøs mishatsigu manrrab wamisrøbig, truig mas nuig kømuitarru? cha. Øyeeg

kuingucha, nabe ñimui utube tru mishatsigu manrrai pønsrøb megabig lataig kur chibig køn.

²⁸ Ñim køn chu uragucha nan elachimø, chigøben murig pub arringucha treegu wendautø lincha melabeløbe.

²⁹ Incha nai Møskai tru ashib karub waigwan nan tranøb lataitøwei, nabe ñimun tranamønrrun chibig køn,

³⁰ tru na ashib karub waisrø nai mishatsigu mab, muchib, katø tru ashib karub purramigu purramisra, ñim tru doçe nusrkalø Israelweinukkurri karrab misaameran ashib karub purramig kønrrain— cha.

Pedro nan 'ashmíg kur' chinrrautan cha, Jesús eshkaab
(Mt 26.31-35; Mc 14.27-31; Jn 13.36-38)

³¹ Incha Señorbe katø trenchibig køn:

—Au, Simón, Simón cha, Satanásbe ñimun miain køn cha, kan tirigu trulmeran latawei kønishib sruagutcha.

³² Inchendø nabe ñuimburappe ñui isubigwan nainuutø tøga pasraigwan elachib pasrømønrrai ñuyasig Møskawan miar chibig køn 'purugurrnrig' chib. Ñi nan wendøbasra ya, naimay katøle arruabe, ñibe ñui nunelan chiyutøgucha kullaaramø, mur pønrrønrrai purugurrig— cha, trenchibig køn.

³³ Inchene Simónbe:

—Señor, ñun kailan keeri yau keeren, nabe ñiba truyu pasrønrrab treetø attrab pasrømøtø, naguucha ñiba tøga kwanrrab attrab pasar— cha, trencha løtabig køn.

³⁴ Inchen Jesúsbe trenchibig køn:

—Pedro, nabe ñune trendamønrrun cha: Møin kwalømdøwei kallu wamømøwatø, ñibe pønmayguen nan, 'ashmíg kur' chinrrautan— cha.

Purø trømbøig kuim pasramig luturaab

³⁵ Incha Jesúsbe trencha payibig køn:

—Na ñimun wasrkaig, katø an pusramig chigaig, alpargatikaig ørenma, ¿ñimun chi palappuig køh?— cha.

Inchen nømbe:

—Chigucha chi palappumuig køn— cha løtabelø køn.

³⁶ Inchen Jesúsbe trenchibig køn:

—Møimbe treeg kømøtø, an pusrig tøgai, srua inrrø cha. Inchen wasr tøgai, ila inrrø cha. Inchen espadagaibe, trube, nui pala itøgueigwan yana, kan penø cha.

³⁷ Kaguende nabe ñimun trendamønrrun cha: Tiuswei wamwan pørigu naimburab iig øyeeg chibig pasrabiibe treeg nebunrrain køn cha: “Larrø kailai utu treeg kui lataitøwei asha tøgagúig køn” taig. Kaguende naimburab chi nebunrrai pørig pasrabiibe kerriguh treeg nebunrrabig køn— cha.

³⁸ Inchen nømbe:

—Señor, yuguen pagatø espadamera køn— chiben,

Jesúsbe:

—Øiløtø tsabø køn— cha, løtabig køn.

Jesús Getsemanísrø Tius Møskaimba waminchib

(Mt 26.36-46; Mc 14.32-42)

³⁹ Incha Jesúsbe nø trendø treeg marøbig kuig køppe, Olivos Tunsrømay iben, nui kusrenanøb pera uniiløgucha mendig ambubelø køn.

⁴⁰ Incha truyu puabe, trenchibig køn:

—Tiusba waminchib purray cha, chiyugøben kaigyu kegørrab pønrrømønrrappe.—

⁴¹ Incha Jesúsbe kan srug kutsimburab lataitø ya, Tius Møskaimba waminchab tømønnsrabe,

⁴² trenchibig køn:

—Nai Møskai, i copan nan tarømaramdiig købene, tarømartra cha. Inchendø na maig isuig køben, treeg kønrrain kømøtø, ñi nan maig maramdiig køben, treegwan maramig kønrrain— cha.

⁴³ Inchen srømbalasriig kan ángel Jesúswan mas kullaaramønrrai purugunrrab kenamisrøbig køn.

⁴⁴ Inchen truba truba trømbøig køben, katøgucha ¡katø! miabig, miabig køn. Inchen nui pøsrømbiguen pirau kan anim pirrab lataig nørriig pirrabig køn.

⁴⁵ Incha kurra, nui kusrenanøb pera uniilan ashchab yabe, isubiitø kamariilø, kib purrain kui wetørrawabe, Jesúsbe trenchibig køn:

⁴⁶ —¿Chindimba kib køgue? cha. Kurra, Tiusba waminchib purray cha, chiyugøben kaigyu kegørrab pønrrømønrrappe.—

Jesúsuan kemøra srua ambub

(Mt 26.47-56; Mc 14.43-50; Jn 18.2-11)

⁴⁷ Inchen Jesús waminchib pasramne, truba nu misag puben, Judas taig, tru doce kusrenanøb pera uniilai utuibe, truilan pera arrua, Jesúsuan muchanrrab kemallen,

⁴⁸ Jesúsbe trenchibig køn:

—Judas, ¿Møg Misra Arrubigwan nan ashig kømui inchibelan kan muchawa tranrrreendirru?— cha.

⁴⁹ Inchen Jesúsba pønrrabeløbe tru treeg purainrrabigwan ashabe, nune payibelø køn:

—Señor, ¿nam espadatøga kørriincha petamøh?— cha.

⁵⁰ Inchen nømui utu mõikkørøn tru maya sacerdotesmeran nø karub sacerdotei karuindiig megabigwan kusrmay kaluwan kelarrab lutiichtiinchibig køn.

⁵¹ Inchen Jesúsbe trenchibig køn:

—Au, øyeebe marmøtay— cha.

Incha kaluwan katørawa, treetøwei tamarøbig køn.

⁵² Incha sacerdotesmeran karubelanba, misagwan karubelø kølli misaameranba, Tiuswei yau ashib pønrrabelø policíameranba nun tru suamrrab amrrubelan trenchibig køn:

—Nabe kan niliig kui lata ñimbe espadamera køben, tsiimera køben sruar werrunrrappe, ¿chindimba treeg werrugue? cha.

⁵³ Nabe ñimba kwalømmørig Tiuswei yau waben, kemørmuig køn cha. Inchendø yandø mõimbe tru kaig maringarubig tru løstøyuig nø merrarrawa nø karub pasramisren, ñimuimburab ñim maramig ura puin køn— cha.

Pedro Jesúsuan ‘ashmúig kur’ cha isab

(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Incha Jesúsuan kemøra, tru maya sacerdotesmeran nø karub sacerdotei yamay srúa amben, Pedrobe yaptø, yaptø mendig ibig køn.

⁵⁵ Incha tru yawambigu nag urra, tru pøtøgatan purramisren, Pedrogucha nømui utu wamisren,

⁵⁶ kan srusrø mendig megabiibe naabilabig tøryu Pedron wai ashabe, ashib pasraptø, ashib pasraptø trenchibig køn:

—I mõkkucha Jesúsba uñibiitøwein køn— cha.

57 Inchen Pedrobe trenchib isabig kòn:

—¡Paare ishuube, nagan ashibig kuitarru!— cha.

58 Inchen yanazhigutø Pedron katøgan ashabe, trenchibig kòn:

—Ñigucha truilai utuigwein kørreh— cha.

Inchene Pedrobe:

—¡Paare møøbe! nagan truig kuitarru— chibig kòn.

59 Katø kan ura wendau køsrøn katøgan trenchibig trenchig kòn:

—Isa kømø, i møkkucha Jesúsba uñibigwein kørreh cha. Kaguende nøbe galileasriitøwein kòn— cha.

60 Inchen Pedrobe trenchibig kòn:

—¡Paare møøbe! ñibe ni chi waminchib pasrainguen mørmur— cha.

Inchen tru urastø Pedro waminchib pasramnetø, kan kallu wamapt-inchibig kòn.

61 Inchen Señorbe keesha, Pedron ashene, Pedrobe Señor øyah taig kømørramab isuptinchibig kòn: “Møi kallu wamømwatø nan pønmayguen, ‘ashmīg kur’ chib isønrrautan” taigwan.

62 Inchabe Pedrobe webya, truba truba isuig kishibig kòn.

*Jesús tru Setenteelø maig maramigwan asha marøbelai merrab
(Mt 26.59-68; Mc 14.55-65; Jn 18.19-24)*

63 Inchen tru møguelø Jesúswan ashib srua købeløbe nun indza ashib, kurrøb incha,

64 kabwan lusra, maløbøtø pashabe, trenchibelø kòn:

—¿Mu kurragutsin kui? Namun kelarrab eshkau pøs— cha.

65 Incha trømbøig tsalø wamab, katø chineh chibelø kòn.

66 Yandø tør-rraben tru misagwan karubelø kølli misaameraba, sacerdots-meran karubeløba, tru Moisés pørigwan kusrenanøbeløba trubalatømisra, nømui tru Setenteelø tru maig maramigwan asha marøbelai merrab Jesúswan srua amben,

67 nømbe trenchibelø kòn:

—¿Ñi Cristo køtirru? cha. Namun eshkarra— cha.

Inchen nøbe trencha løtabig kòn:

—Na ñimun: “Truig kur” cha, trenchibene, ñimbe køremøwei,

68 katø na chigøben payene, ñimbe løtømøwei inchantan cha.

69 Inchen møingurrimbunøbe na, Møg Misra Arrubiibe tru maramburab marøb Tiuswei kusrmaygatø wamisrtrun— chibig kòn.

70 Inchene mayeeløba trencha payibelø kòn:

—¿Trube, ñibe Tiuswei Nusrkain køtirru?— cha.

Inchene Jesúsbe trencha løtabig kòn:

—Ñimdøweinguen nabe truigwein kòn cha chab trendan— cha.

71 Inchene nømbe trenchibelø kòn:

—¿Trube, nuimburab waminchabelø mas chiwein kuin palønrrab kø? cha. Nui triitøgatøwei wamindigwan namashib mører— cha.

23

*Jesús Pilatoi merrab
(Mt 27.1-2, 11-14; Mc 15.1-5; Jn 18.28-38)*

1 Incha mayeeløba truyu tulundzuna pasrabiibe kurra, Pilatoimay Jesúswan srua amba,

2 truyu ‘øyeeg kòn, øyeeg marøbig kòn’ chib mendabelø kòn:

–I mōøbe namui misagwei isuigwan kaig isubelø kōnrrai ke peemaytø chab yunømarøb, Roma maya misagwan karubig Césarwan nam trendø an pagarab kuigwan pagaramumig kōndamba, katø nøbe tru Cristo, kan rey kurtamba indi aser– cha.

³ Inchen Pilatobe Jesúswane trenchibig kōn:

–¿Ñigan judíosmerai rey kōtirru?– cha.

Inchen Jesúsbe trencha løtabig kōn:

–Ñitøweinguen chab trendan– cha.

⁴ Inchen Pilatobe sacerdotesmeran karubelanba, misaameranba trenchibig kōn:

–I mōwane nabe chigucha chi kaig mariibe wetørramur– cha.

⁵ Inchen nōmbe masken, masken inchib, trenchibelø kōn:

–Judea pirau kerriguba, maya misaameran nui kusrenaniiløtøga ke chindi asamgaig maran cha. Galilea pirausrø pølbasa, mōimbe yusrø treeg inchib arrun– cha.

Jesús Herodeswei merrab

⁶ Inchen Pilatobe trunun mōrabe, trencha payibig kōn:

–¿Trube, nøbe galileasriig kō chindah?– cha.

⁷ Inchen:

–Trusriigwein kōn– chiben,

Pilatobe Jesúswane tru Galileasrø Herodes karub waim pirauig kuin kui ashabe, nune Herodesweimay purøørøbig kōn, kaguen Herodeskucha tru kwalømmerawane Jerusalénsrøwei waben.

⁸ Inchen Herodesbe Jesúswan ashabe, truba kasraarabig kōn, kaguende mas merrabsrøwei ashimmørø inchibig kōbig kua. Pøs Jesúsweimburab chigøben wamindi mørøbig kua, nøgurri Tius maramburab marigwan mari ashig kui inchibig kōn.

⁹ Incha chigøben truba truba payen, Jesúsbe chigucha kusrua løtømuben,

¹⁰ sacerdotesmeran karubeløba, tru Moisés pørigwan kusrenanøbeløbabe ‘øyeeg kōn’ chib; ‘øyeeg marøbig kōn’ chib, truiløbe truba truba trenchib truyu purrabelø kōn.

¹¹ Inchen Herodesbe nui suldaumeraba Jesúswan truba kaig inchib, indzatø ashib srua kua, truba tabzheelø kenana, Herodesbe Pilatoimay katøle ørøbig kōn.

¹² Tru kwalømbe Pilatoba, Herodesba tab linchibelø misrøbelø kōn, merappe tsaleelø kōbig kuig.

Jesúswan yandø kwanrrai pasrøb

(Mt 27.15-26; Mc 15.6-15; Jn 18.39-19.16)

¹³ Inchen Pilatobe sacerdotesmeran karubelan kōben, tru pirau ashib karub purrabelan kōben misaameran kōben tulundzunønrrai wama,

¹⁴ trenchibig kōn:

–Ñimbe nan i mōwan misaameran ke chine martrab isunrrai marøb unan chib, naimay srua amrrutan cha. Inchen nabe ñimui merrab maig kuitashchab ashchab paya ashen, nuinuube chigucha chi kalø mariibe wetørramur cha, tru ñim ‘øyeeg, øyeeg kalø marøptiig kōn’ chib pønrraigwane.

¹⁵ Katø Herodeskucha chi maramgaig kui asha, katøle nøbe namuimaytøwei ørin kōn cha. Ñimnguen ashke cha, ke kwanrraingatig maramdiibe chigucha chi kaig mariibe kaagøn cha.

¹⁶ Treekkurri nun ichaguchabe, elatchab– chibig kōn.

17 Fiesta kwalømmerawane Pilatobe kan merrarrawa keerig pasrabigwan inrrai elatsamig nehubig køn.

18 Inchen mayeeløba trenchib trashib mendabelø køn:

—¡Øigwane patsøgay! cha. ¡Barrabáswan inrrai elachi!— chib.

19 Pøš, tru Barrabásbe tru kailan keerinug pasrappe, tru Jerusalén ciudayu misaameran pera kaig marøb kurrikkurrimba, katø kweetsikkurrimba merrarrawa keerig pasrabig købig køn.

20 Incha Pilatobe Jesúswan elatchab isua, katøyug nømun waminchen,

21 nømbe mas mur trashibelø køn:

—¡Kurusyu mesrø! ¡Kurusyu mesrø!— chib.

22 Inchen pønmayyu Pilatobe katø trenchibig køn:

—¿Chindimba øyeeg martrainchigue cha? ¿I møøbe chi kalø mara pasra? cha. Kwamnegatig maramdiibe nuinuube chigucha chi kaig mariibe nabe wetørramur cha. Ichaguchabe, inrrai lelatchab— chibig køn.

23 Inchen nømbe:

—¡Kurusyu mesrø, mesrø!— chib, mur trashib miab køptø, nøm maig marøg kui indigwan treeg martrab uta pønramisrøbelø køn.

24 Inchen Pilatobe tru nøm miaigwane treeg kønrrai kørømarøbig køn.

25 Incha tru misaameran pera kaig marøb kurrikkurrimba, katø kweet-sikkurrimba tru kailan keeri yau pasrab møwan nøm elatchai miaigwan, trunun inrrai elacha, Jesúswane nømun maig marøg køben martrai tranøbig køn.

Jesúswan kurusyu mesramsømay srua ambub

(Mt 27.32-44; Mc 15.21-32; Jn 19.17-27)

26 Yandø Jesúswan kurusyu mesrønrrab srua amba, kan Cirenesø møg, Simón taig, nøørsørngurri arruben, nun kemørabe, kuruswan mutøsa, Jesúswei wendautø merranøbelø køn.

27 Inchen misaamera truba nu mendig amben, truba yam ishumburmera nun isua wamamøra kishib, isuilø trashib amrruben,

28 Jesúsbe nømun ashabe, trenchibig køn:

—Jerusalén ishumburmera, nan isua kishmøtø, ñimuyasiiba, ñimui ureg-weyasiiba isua kisay cha.

29 Kaguende kwalømmera attrun cha, øyah tamig: “Ureg tøgagønrrab kaimabelø, mana patsø kwanrriig kømeeleø købelø, mana urekkar kua mutsøsrøb nørrøranmeelaimbe mayanguen tab kuilø køn” tailø kømig.

30 Katø misaamerabe nørrø tunmeran: “Namuim pala itøgørrørray” chib, shush tunmerane: “Namun itøgasrørray” chib mendønrrun cha.

31 Kaguen ¿tsøg tusrwanguen øyeeg marøbeløbe, mas mulwane chitø martr-erah?— chibig køn.

32 Katø pagatø kaig marøbelangucha Jesúsba kegøtø kwetchab srua ambubelø køn.

Jesúswan kurusyu mesrøb

33 Incha kanbalø Calavera tainug puabe, truyu Jesúswane kurusyu mesrøbelø køn, tru pagatø nileelangucha, kanun kusrmay, kanun atsimay-gatø.

34 Inchen Jesúsbe trenchibig køn:

—Nai Møskai, nømun ulø paymø, pesannanrrig cha. Kaguende nømbe chi marermabguen isumøn— cha.

Inchen suldaumerabe Jesús kewagúilan suerte kucha, pirishibelø køn.

35 Inchen misaamera truyu ashib køben, tru ashib karubelø købenguen Jesúswan indzatø ashib trenchibelø køn:

—Kanelanma kaigyugurri wesrabiibe nòasiitøwei pinaarrubash cha, nò tru Cristo, Tius Lawa Wesruig kuabe.—

36 Inchen suldaumeragucha indza ashib, køchiibiwán mutchai yuuløb ke-mallabe,

37 trenchibelø køn:

—¡Ñi tru judíosmerai rey kuabe, kwamønrrab ñitøwei chigøben mar!— chib.

38 Inchen Jesús megaim palagucha kan pørig mesraig megabig køn, griego-may køben, latínmay køben, hebreomay købengue:

IIBE JUDIOSMERAI TRU REY KØN

chibig.

Jesúsba, tru pailø kailøba

39 Inchen truyu melsraig melabeløgucha kane trenchib tsalø wamabig køn:

—¡Ñibe tru Cristo kòmøtirru? cha. ¡Kwamønrrab ñitøwei chigøben mara, namungucha treetøwei martra!— cha.

40 Inchen kane tru katøganun namig trenchibig køn:

—Ñigucha treegutøwei mesraig megabendø, ¿ñungan Tiuswan kørig kòmuitarru? cha.

41 Kaguende nambe øyeeg marig melappe melsrambuawei melsrai meler cha. Kaguende nambe kaig marimburo øyeeg melambuawei møra meløben, trune i møøbe chigucha chi kaig marig kòmøn— chib.

42 Inchabe Jesúswan trenchibig køn:

—Jesús, ñi ashib karub wamigwan ñi ashib karub pølbasrabe, nan isurrun-rrig— cha.

43 Inchen Jesúsbe trencha løtabig køn:

—Nabe ñun cierton trendamønrrun cha: Møindøweinguen naba purø tabzhi-
isrø wanrrabguen— cha.

Jesús kwaig

(Mt 27.45-56; Mc 15.33-41; Jn 19.28-30)

44 Inchen yandø kwaløm tøbøtag køsrøn køben, tre uraskurri maaben las treskatig pirau ørøba løstiig kørrømisren,

45 pørbe løtsørabén, Tiuswei yau tru purø tab llensuzhig kelarrab søtø mesraig megabiibe tøbøtakkørrab kølsrøbig køn.

46 Inchen Jesúsbe mur trashib trenchibig køn:

—Nai Møskai, nai espíritun ñui tasku tranar— chib.

Trenchabe yandø isrømuptinchibig køn.

47 Inchen tru Roma suldaú cienelan nò karubiibe øyeeg purayaigwan ashabe, Tiuswan trenchib truba tabig waminchibig køn:

—I møøbe, isa kømø, sølgandø tabig uñibig kuin køn— chib.

48 Inchen maya misaamera øyeeg purayailan truyu ashib pønrrabeløbe, truba isub nømui pechondø kurramørøb truyugurri ambubelø køn.

49 Inchen mayeelø Jesúswei asiiløba, ishumburmera Galileasrøngurri nui mendig amrrubeløbabe yabsrøngurrindø ashib pønrrabelø køn truyu treeg puraiben.

Jesúswan sørig

(Mt 27.57-61; Mc 15.42-47; Jn 19.38-42)

⁵⁰ Kan mōg José taig Judea pirau Arimatea puebloriig kōbig kōn, truipe tru Setenteelō maig maramigwan asha marōbelai utuig truba tabig, katō sōlgandō uñibig.

⁵¹ Katō tru Josēbe Tius nō ashib karub wainuguigwan muniirabigwein kuabe, tru Setenteelō maig maramigwan asha marōbelō ‘ōyeelō martrab’ chib kōrrōmara pōnsraigwanba, nōm chi mariilanbabe chi tab kōmui asig kōn.

⁵² Incha nōbe Pilaton ashchab ya, Jesúswei asrwan miawa,

⁵³ kurusyugurri pinōsrawabe, kan lino llensutōga kirra, peñayu sōramig trab lalig munguen sōriimīg pasrabigu sōrabig kōn.

⁵⁴ Katō judíosmerai isram kwalōm tru sábadoweyasig tamaram kwalōm maaben kōbene, yandō tru sábadō kwalōm pumibe ke pōlbasramitō palabig kōn.

⁵⁵ Inchen ishumburmera Jesúswan Galileasrōngurri mendig amrrubelōbe nōmgucha mendig amba, sōrigwan ashib, Jesúswei asrwan mandō wayigwan ashib inchibelō kōn.

⁵⁶ Incha nōmbe katōle ambabe, may irrabzheelōba, srōlamelōba tamarabe, tru maig maramigwan martrai Moisés maig karuig kōben, tru sábadō kwalōmbe israbelō kōn.

24

Jesús ōsiiraig

(Mt 28.1-10; Mc 16.1-8; Jn 20.1-10)

¹ Srō trune pōlbasrōb kwalōm tru ishumburmerabe ullarbatō lōtsōzhig sōriinumay amrrubelō kōn, nōmui may irrabzheelō nōm tamarilian srua. Inchen nōmba katōgan ishumburmeragucha amrrubelō kōn.

² Incha nōm truyu pua, ashene, tru sōrinug kasraig sruube yandō truyu kōmō, malsrain tsuptinchen,

³ nōmbe kebambabe, Señor Jesúswei asrwane kalaptinchibelō kōn.

⁴ Inchen, treeg kōben, kwaariilō chinchabguen kaima pōnrrōbene, mōimbe pailō mōguelō, tōr pilabelō kewar, nōmuim pulu pōnrraptinchen,

⁵ nōmbe kōrig kōptō malōmeran pirausrōngatig kebachen, tru mōguelōbe trenchibelō kōn:

—¿Ñimbe ōsiguigwane kwaitai utube chindimba lague? cha.

⁶ Yube mu kaagōn cha. Katō ōsiiraig kōn cha. Nō Galileasrō uñib urassrōwei ñimun maig wamindiilan isuy chibelō kōn,

⁷ tru nō ōyeeg taigwan: “Na, Mōg Misra Arrubigwane kaig marōbelai tasku tranig kōmig nebuben, kurusyu mesrōben, pōn kwalōmyube katō ōsiiranrun” taigwan.—

⁸ Inchen ishumburmerabe Jesús chi wamindiilan isua,

⁹ sōrinukkurri katōle amrrua, tru onceelanba, katō mayeeelanba maig purayaigwan kerrigu eshkabelō kōn.

¹⁰ Inchen tru chi purayaigwan tru Jesús nōashib karua ōriilan eshkaib ishumburmerabe iilō kōbelō kōn, María Magdalenaba, Joanaba, Jacoboi usri Mariāba, katōgan ishumburmeraba.

¹¹ Inchen nōmune tru ishumburmera wamindiibe ke ka indzōkken kōnrraptiig mōrōraben, nōmbe kōremeelō kōn.

¹² Inchenōgucha Pedrobe sōriisrōmay ashchab lulōb ya, sōrinug traraashene, tru kirra sōrig llensumeratō waraptinchen, treeg purayaigwan ashabe, ‘kan ōyeebe maig kermab’ truba kwaarig, yamay ibig kōn.

*Jesús Emaús srømay ambi mayu arrub
(Mc 16.12-13)*

¹³ Inchen tru kwalømdøwei pailø Jesúswan lincha amøñibelø købeløbe Emaús taig pueblosrømay ambubelø køn, Jerusaléngurri once kilómetrosburab ambi srø,

¹⁴ tru purayailan nømdø kerriguh waminchib.

¹⁵ Inchen nøm waminchib payiyab ambub pønrramnetø, Jesúsbe nøashib kemalla, nømbe ib mendøben,

¹⁶ nømbe nømui kabmerabe kasrailø latailø kua, nune mu kuinguen nebua ashmeelø køn.

¹⁷ Inchene Jesúsbe trencha payibig køn:

—¿Ambub pønrrappe, ñimbe chiwan waminchibrre amgue?— cha.

Inchen nømbe pønrramisrøppe, isubiitø ke maløguen mindiilø købig køn.

¹⁸ Inchen mõikkørøn, Cleofas taibe, nune trenchibig køn:

—Møin kwalømmerawan Jerusalén chi purayaigwan mayeeløba wammøra køben, ¿ke ñitøgan wammørmig truyu arruatiig pua tsutirru?— cha.

¹⁹ Inchen Jesúsbe:

—¿Chi purayah?— cha payen, nømbe trenchibelø køn:

—Nazaretsrø Jesúsweimburab waminder cha. Truibe Tius maig karuigwan kan eshkabig, nui mariiløyu, nui wamindiiløyu maramburab marøbig købig køn cha, Tiuswei merrab lata, katø maya misagwei merrab lata.

²⁰ Inchen truigwane sacerdotesmeran karubeløba, namun ashib karub purrabeløba kurusyu mesra, kweetsig kønrrai tranan cha.

²¹ Nam isuppe, Israel maya misagwan kaigyugurri wesranrrabiibe nøwein kønrraitamab isua muniiraig købig køn cha. Møimbe yandø kweetsig pøn kwalømguen purayan cha.

²² Inchagucha namui utu ishumburmerabe namune kwaarøsrøtan cha, tru ullarbatø sørriisrø ashchab ambubeløbe.

²³ Incha nui asrwan wetørramuig kuig køppe, namune trenchib amrrubelø køn cha, nømune: “Angelesmera kenamisra: ‘Jesúsbe øsig unan’ chitan” chib.

²⁴ Inchen mõiløgsørøn namui lincha amøñibelø soriinumay amba, ishumburmera maig eshkaig treeg wetørrabwei inchendø, Jesúswane ashmuin køn —chibelø køn.

²⁵ Inchene Jesúsbe trenchibig køn:

—¡Ñim kui, chugúinguen mõrmeelø! cha. ¡Tius maig karuigwan eshkabelø chi wamindiilan kørenraptøgucha ke yaandø, yaandø amøñibelø køn! cha.

²⁶ ¿Nui tørguegwalmabigu nø wamnug kebimøwatø, Cristogan øyeeløyumerrig trømbøig marinab purayamig palømuig kuitarru?— cha.

²⁷ Incha nøbe tru Moisés pøriiløygurri pølbasa Tius maig karuigwan eshkabelø pøriiløyu chishtø eshkaib pureb ya, Tiuswei wamyu nuimburab waminchibig pørig pønrrabelan kerriguba øyeeg køn cha nømun eshkabig køn.

²⁸ Incha tru Emaús pueblosrø pub ambabe, Jesúsbe nui maywan ke merrabmisra, ib inrrab lataig inchen,

²⁹ nømbe ke kørømisri ashchab inchibelø køn. Inchabe trenchibelø køn:

—Namba kørømisr cha. Kaguen yandø maaben køben, yandø pilliranraindan— cha.

Inchen Jesúsbe nømbe kørømisrtrab kebya,

³⁰ nømbe mishatsigu wawabe, pirriwan muta, Tius Møskawan ‘mayanguen pay’ cha, pirishabe, nømun srørrøbig køn.

³¹ Inchen nømbe Jesús kui nebua ashiptindinaben, Jesúsbe waitø kenamuptinchibig køn.

³² Inchen nømbe kangurrin kangurri trenchibelø køn:

—Au yamba, nø namun maysrø Tiuswei wam pørig pønrrabelan øyeeg køn chib eshkaab arrubene, namune namui manrraube ke nøs, nøs indig kømøh—cha.

³³ Inchen nømbe tru urastø Jerusalénmay katø amba, trusrømbe tru once Jesús kusrenanøb pera uniiløba, truyu nømbe lincha purrabeløba tulaamba purrabyuh pubelø køn. Inchen truyu purrabeløbe trenchibelø køn:

³⁴ —Isa kømø, Señorbe katø øsiirain køn cha. Incha Simónwan kenamisrin køn—cha.

³⁵ Inchen tru pailø pubeløbe maysrø maig purayaigwan kerrigu eshkabelø køn, katø Jesús pirriwan pirishiben, yandø nø kui nebua ashiptindigwanba.

*Jesús nui kusrenanøb pera uniilan kenamisrøb
(Mt 28.16-20; Mc 16.14-18; Jn 20.19-23)*

³⁶ Inchen nøm tru waminchib purramnetø, Jesúsbe nømuiin tøbøtag pasramisrøb:

—Ñimun chi isumgaig, tab køn—chibig køn.

³⁷ Inchen nømbe kwariilø truba kørig kuilø kan møsigwan asermab isubelø køn.

³⁸ Inchen Jesúsbe trenchibig køn:

—¿Chindimbarre kørig kui inchigue? cha. ¿Ñimui manrraube chindimbarre na kømuitamab isugue? cha.

³⁹ Nai tasiimeranba, srøbmeranba asay cha. Peg kømø, natøwein kur cha. Nan katørab ashib inday chibig køn. Kan møsiibe yaungawei, ni tsutsikkawayig køn cha, ñim nan asi lataig kømø.—

⁴⁰ Incha iigwan chab trenchabe, tasiimeran srøbmeran eshkaab kenamaren,

⁴¹ nømbe kasrag købiibah kan øyeebe maikkermab kwaarøbiibatø, katøgucha køremø srø pønrrøben, Jesúsbe trenchibig køn:

—¿Ñimbe yu chigøben mamig tøgagømøgueh?—cha.

⁴² Inchen nømbe nun peskau piti tsirigwan srørran,

⁴³ nøbe uta, nømui malau mabig køn.

⁴⁴ Inchabe trenchibig køn:

—Na ñimba uñippatøwei nabe ñimun iilan wamindig køn cha, tru maig maramigwan martrai Moisés pøriiløyu lata, Tius maig karuigwan eshkabelø pøriiløyu lata, Salmosyu lata naimburab waminchibig pønrrabiibe truyu maig taig kerriguh treeg nebunrrabig køn—chib.

⁴⁵ Incha nømune Tiuswei wamwan pørigwan tørgandø øyeeg kuitamab isunrai nømui isubigwan kura,

⁴⁶ nømune trenchibig køn:

—Øyah chibig pørig pasran cha, Cristobe trømbøig marinab megamig nebuben, pøn kwalømyube kwailai utugurri katø øsiiraben,

⁴⁷ mas kaig marmønrrab isua møramigwanba, nømui kaig mariilan ulø paymø pesannailø kømigwanba nui munchiyu eshkaab kusrenanamig kønrrai Jerusalénsrøngurri pølbasa, chu pirausreelandøgucha kerriguba.

⁴⁸ Inchen møi øyeeg purayaigwan ashibeløbe ñim køn chibig køn.

⁴⁹ Au, nai Møskai tranrrab misra kørrømisrigwane nabe øramønrrun cha, ñimuim pala. Inchendø ñimbe yu Jerusalén ciudayutø ka kørrømisray cha, maramburab marøbig srømbalásrøngurri arrua, ñimun pinøbulamnegatig.—

*Jesús srømbalásrømay nebib
(Mc 16.19-20)*

⁵⁰ Incha Jesúsbe ciudayugurri wambig Betaniasrøngatig nui kusrenanøb pera uniilan pera ya, tasiimeran kusruabe, nømuimburab 'mayanguen tabig kønrrain' chibig køn.

⁵¹ Incha trenchib pasrainmaytø nømuim pulugurri tarømisren, nune srømbalasrømay srua yaig køn.

⁵² Inchen nømbe Señorweimburab truba tabig wamincha, Jerusalénmay katø truba truba kasrag amba,

⁵³ nømbe chu uragucha Tiuswei yau Tiuswan tabzhig waminchib købelø køn.

San Juan

Wambe kan mōg misrig

¹ Chigucha kaabenbatø tru Wambe manawei pasrabguen inchibig køn. Tru Wambe Tiusba pasrøben, katø tru Wambe Tius købig køn.

² Tru Wambe srøsrøgurri Tiusba pasrabig købig køn.

³ Tiusbe chiwandøgucha marøppe, tru Wangurriwei marig køn. Inchen chitøgucha Tius mariilø pønrrabiibe, tru Wangurriin kømíbe chigucha mariilø kaagøn.

⁴ Øsig kømibe nuinug pasrøben, tru øsig kømig pasrabiibe mayeelayasig tør købig køn.

⁵ Inchen tru tørbe løstøyu piløben, tru tørwane løstiibe chinchaguen kasrønrrab kaimaig køn.

⁶ Kan mōg købig køn, Tius karua ørig, truike Juan taig,

⁷ tru maig kuigwan waminchabig. Nøbe tru tørweimburab maig kuigwan waminchen, nøgurri mayeeløba kørenrrai.

⁸ Juanbe nøashib tru tør kømøtø, tru tørweimburab maig kuigwan ka waminchaptø arrig købig køn.

⁹ Tru tør ciertonig maya misagwan pilabiibe yu pirau kebarrub arrubig køn.

¹⁰ Inchen truike yu pirau pasrøben, katø Tiusbe pirøwan truikkurri marig kuindøgucha, pirau misaamerabe nune mu kuinguen ashmuig købig køn.

¹¹ Trendø nuinumay nøbe arrubendø, nui misaamerabe utømøtø, kaasig køn.

¹² Trune mutøgucha nun kashmø, utab, nui munchiyu kørebelane Tiuswei ureg misra pønrramig kønrrai tranig køn.

¹³ Truiløbe yu pirau maig kal-labelø køben treeg kal-lawar kømøwei, ureg tøgagug køben tøgagúig ureg latailø kømøwei, katø møwei isuig maig køben, trumay kømøtø, Tiusweinug kal-lawar køn.

¹⁴ Tru Wambe kan mōg misra, namui utu unig købig køn. Inchen nambe tru nui torguegwalmabigwan tab asig købig køn, tru Møskaweinukkurri arrubig Kandø Nusrkawei ka yandø tab indiiba, ciertoniiibatø netsigwan.

¹⁵ Juan truigweimburab maig kuigwan eshkappe, trenchib waminchibig køn:

—Iig køn cha, tru na øyach taig købiibe, nai wendau arrubiibe, na lataguen kømø, nøbe purø nuig køn cha, kaguende nagen kømøwatø, nømerrig købig kua.—

¹⁶ Kaguende tru chigucha palómíg nui tab indigugurri nambe mayeeløba tru ka tab indigwane srøig, srøig itø uter.

¹⁷ Tru maig maramigwan martrai pørigwane Moiséskurri tranig købig køn. Inchen tru ka yandø tab indiiba, newan ciertoniiibabe Jesucristogurri arrig køn.

¹⁸ Tiuswane mugucha managuen ashmuinrrun. Inchendø nui Kandø Nusrkai Tius, managucha Møskaweim pulu trag lincha pasrabig, truig namun kenamaran, Tiuswan ashibelø kønrrai.

*Juan Bautista Jesucristoimburab waminchib
(Mt 3.11-12; Mc 1.7-8; Lc 3.15-17)*

19 Iig kòn, tru Jesúsweimburab maig kuigwan Judíosmeran Juan eshkaig. Judíosmerabe Jerusalénsrøngurri sacerdotesmeranba, levitasmeranba karua ørøbelø kòn, Juanwan: “¿Ñibe mu kugu?” cha payrrab.

20 Inchen Juanbe sørømø, maig kuigwan eshkaib, masken maig kuigwan kelarrab eshkaig kòn.

–Nabe Cristo kømur– chib.

21 Inchen nømbe katøle payibelø kòn:

–Trube, ¿mu kugu? cha. ¿Kabe Tius maig karuigwan tru eshkabig Elíasteh?– cha.

Inchen Juanbe:

–Tru kømur– chibene, nømbe payibig payibelø kòn:

–Trube ñigan, ¿Tius maig karuigwan tru eshkabig køtirru?– cha.

Inchen nøbe:

–Kah– chibig kòn.

22 Inchen:

–Trube, ¿mu kugu? chibelø kòn. Kaguende nambe tru namun karua ørøbelan eshkamig kòn cha. Trube, ¿ñuimburappe, ñibe mu kur chinragu?– cha.

23 Inchen nøbe trenchibig kòn:

–Kan wam mu misag warab waraimønug trenchib trashibig, truig kur cha: “Señorwei maywan ølgandø kuray” chib, tru Tius maig karuigwan eshkabig Isaías maig taig, treekke.–

24 Inchen tru Juanwan payrrai karua ørøbeløbe fariseosmera købelø kòn.

25 Tru karua øriiløbe trenchib payibelø kòn:

–Trube, ¿misagwan chindimba piu umbu ulsrøbig kugu cha, Cristo kømøwei, Elías kømøwei, Tius maig karuigwan tru eshkabig kømøwein købendøbe?–

26 Inchene Juanbe trencha løtabig kòn:

–Nabe pitøga pi pinøbulrrai ulsrøbig kur cha. Inchendø ñimui utube, ñim asiimíg, kan mugøsrøn pasran cha,

27 tru nai wendau attrabig. Nabe trunune nui alpagatisyu tsiwanguen pichib pasramig truburab kømuiñatan– cha.

28 Øyeelø kerrigu pureppe, Betaniasrøn purayaig kòn, Jordán pi ambøgatøsrø, tru Juan misagwan piu umbu ulsrøb uniisrø.

Jesús, tru Tiuswei Ubisha-unø

29 Indiibe katø kwaløm Juanbe Jesús nuim pulumay pub arri ashabe, trenchibig kòn:

–Asay cha, iibe Tiuswei tru Ubisha-unø pirauelø kaig mariilan kerranrra-big kòn cha.

30 Iig kòn, chibig kòn, tru na øyah taig: “Nai wendau attrab møøbe na lataguen kømø, mas nuig kòn cha. Kaguende naguen kømøwatø, nøbe manawei købig kuig kòn” cha.

31 Natøweinguen nabe nune mu kui ashmíg kuig kòn cha. Inchendø Israel misaameran mu kui nebua ashchai kenamartrab, misagwan piyu ulsrøb arrur– cha.

32 Katø Juanbe maig kuigwan trenchib eshkabig kòn:

–Nabe Espíritu Santon kan paloma lataig srømbalásrøngurri kørøarraua, nuim pala pasramisri ashar cha.

33 Inchen nabe katøgucha nune mu kui ashmuig kòn cha. Inchen misaameran pitøga pinøbulrrai piu ulsrønrrai nan Karua Ørøbiibe trendaig købig kòn

cha: “Tru ñi ashen Espíritu Santo nuim pala kørraarrua, pasramisrinabig, truig kørnrun cha, Espíritu Santotøga pinøbulrrabiibe.”

³⁴ Inchen nabe yandø trunun nai kaptøga asha, truiibe Tiuswei Nusrkain kui nabe eshkabig kur— chibig kørn Juanbe.

Jesúswei kusrenanøb pera uniilø srøsreelø

³⁵ Katø kwaløm Juanbe tru nui mendig amøñibelø parba katøle truyu pasrøwabe,

³⁶ Jesús pureb pasrai ashabe, Juanbe trenchibig kørn:

—Au, asay cha, øibe Tiuswei tru Ubisha-unø kørn— cha.

³⁷ Inchen tru Juanwei pailø mendig amøñibeløbe tru trendaigwan mørabe, Jesúswei mendig ambubelø kørn.

³⁸ Inchen Jesúsbe keesha asha, nui mendig amrrui ashabe, trenchibig kørn:

—¿Chi lague?— cha.

Inchen nømbe trenchibelø kørn:

—¿Kusrennøbig, chu wabig kugu?— cha.

³⁹ Inchene Jesúsbe trenchiptinchibig kørn:

—Ashchab amrruy— cha.

Inchen nømbe amba, chu wabig kui ashabe, tru kwalømbe truyu nøba kørromisrøbelø kørn, kaguende yandø las cuatro lutau køben.

⁴⁰ Tru pailø Juan wamindigwan mørøbelø Jesúswei mendig ambubeløbe, kane Simón Pedroi nuneg Andrés købig kørn.

⁴¹ Incha Andrésbe nuneg Simónwanmerrig lanrrab ya, wetørrawabe, trenchibig kørn:

—Nambe si, Mesíaswan wetørrer— cha, (Mesías chippe, Cristo taig).

⁴² Incha Andrésbe Simónwan Jesúsweisrømay pera iben, Jesúsbe Simónwan ashabe, trenchibig kørn:

—Ñibe Simón kørn cha, Juanwei nusrkai. Inchendø mømimbe yandø Cefas taig kørnrun— cha, (trenchippe, Pedro cha wamig).

Felipenba, Natanaelwanba Jesús wamab

⁴³ Katø kwaløm Jesúsbe Galilea pirausrømay inrrab isua, Felipen wetørrawabe, trenchibig kørn:

—Nai mendig attra— cha.

⁴⁴ Tru Felipebe Betsaida pueblosriig købig kørn, tru Andrésba, Pedroba waraisriig.

⁴⁵ Inchen Felipebe Natanaelwan lanrrab yabe, trenchibig kørn:

—Tru maig maramigwan martrai Moisés pøriguba, katø Tius maig karuigwan eshkabelø pøriguba, truiløyu nuimburab pørig pasrab møwan nambe wetørrer cha. Truiibe Nazaret puebloyu Joséwei nusrkai, Jesús kørn— cha.

⁴⁶ Inchen Natanaelbe trenchibig kørn:

—¿Nazaretkurringan chi tappaig webatraitarru?— cha.

Inchen Felipebe trenchibig kørn:

—Trube, ashchab amø pøs— cha.

⁴⁷ Inchen Jesúsbe Natanael kemallib arri ashabe, trenchibig kørn:

—Øibe si, isa kømø, israelita kui asamdiig kørn cha. Nuinuube treeg kørnmab ashchaindø indiibe chigaig kørn— cha.

⁴⁸ Inchene Natanaelbe trencha payibig kørn:

—¿Nane treeg kuimbe mandø incha ashku?— cha.

Inchene Jesúsbe trenchibig kørn:

—Felipeguen ñun wamømøwatø, ñi higuera tusr umbusrø wabenwei nabe ñun asig kørn— cha.

⁴⁹ Inchen Natanaelbe trenchibig kòn:

—Kusrennøbig, ñibe Tiuswei Nusrkai, Israel misagwei Rey kòn— cha.

⁵⁰ Inchene Jesúsbe trenchibig kòn:

—¿Na ñun: “Higuera tusr umbusrø waben ashar” cha, na trendaimba, ñigan nan kòretirru? cha. Øyeetø kømø, purø nørreeløguen ñibe ashchabguen— cha.

⁵¹ Incha katø Jesúsbe trenchibig kòn:

—Pøs nabe ñimun isa kømø, cierton trendamønrrun cha: Srømbalabe kurim pasrøben, Tiuswei ángelesmerabe Møg Misra Arrubigweinukkurri nebambub, katø nuimay kørørrub, inchib køben ñimbe ashchabguen— cha.

2

Caná pueblorø kasharab

¹ Pøn kwalømyu Galilea pirau Caná puebloyu kasharab køben, Jesúswei usrimbe truyu wabig kòn.

² Inchen Jesúswanba, nui kusrenanøb pera uniilanba, truilangucha kasharab yaumay lynchab amrrunrrai eshkaig købig kòn.

³ Inchen vinobe patsaptinchen, Jesúswei usrimbe trenchibig kòn:

—Vinode chab patsøgain kòn— cha.

⁴ Inchen Jesúsbe lötappe trenchibig kòn:

—Ishug, ¿nane chindimba iigwan maringarunrrab inchigu? cha. Kaguende na treeg maramig urabe pumø srø kòn— cha.

⁵ Inchen usrimbe truyu mendig melabelan trenchibig kòn:

—Nø maig chiben, trunun treeg maray— cha.

⁶ Truyube srug køtsømera seis pønrrabig kòn, judíosmera tru nøm kaig marigwan chish misramigweyasig pi usrøb tøgagúilø. Tru køtsømerabe setenta, kabe cincuenta litros kebelø købig kòn.

⁷ Inchen Jesúsbe tru pirishibelan trenchibig kòn:

—I køtsømeran pi netsøganay— cha.

Inchen netsøzheelø netsøganen,

⁸ Jesúsbe trenchiptinchibig kòn:

—Møimbe lamø truyugurri wesrawa, tru novios yau chi maramigwan ashib pasrabigwan srua amba, tranay— cha.

Inchen nømbe treeg marøbelø kòn.

⁹ Inchen tru ashib pasrabiibe tru pibe vino misrigwan mucha mørendø, chugurri srua amrruimbe ashmíg kòn. Truyu purugub pønrrabelø truiløbe asha købig kòn, piwane nøm wesraig kua. Inchen truyu ashib pasrabiibe tru novion wama,

¹⁰ trenchibig kòn:

—Mutøgucha srørøbe tab vinon srørøbelø kòn cha. Inchen yandø tru linchai eshkailø lincha purrabelø tsabø muchene, tab vino kømígwan ka srørøbelø kòn cha. Trune ñibe tab vinon møingatig esegain kòn— cha.

¹¹ Iig, tru srørøzhiitø Tius nøba pasrain kui asha kønrrai Jesús pølbasra mariibe Galilea pirau Caná pueblorø marig kuig kòn. Tru treeg mariitøga nui torguegwalmabigwan ashchai kenamaren, nui kusrenanøb pera uniiløbe nun kørøbelø kòn.

¹² Inchen øyeelø chab puraiiben, Capernaum pueblorømay ambubelø kòn, Jesúsbe nui usrimba, nui nuneløba, nui kusrenanøb pera uniiløba. Incha truyu mam kwalømdø warabelø kòn.

*Tiuswei yawan Jesús chish marøb
(Mt 21.12-13; Mc 11.15-18; Lc 19.45-46)*

13 Yandø tru judíosmerai Pascua Fiestan maramig pub lutau køben, Jesúsbe Jerusalén ciudarsømay ibig køn.

14 Inchen Tiuswei yaube mømibe waaramera køben, ubishamera køben, palomamera køben yanøbelø purrai ashib, katø misagwan an yunømarøbelø køben purrai ashibig køn.

15 Incha trunun ashippe, Jesúsbe ichabetamig kan latigo mara, mayeelanba tru Tiuswei yaugurri webetabig køn, tru nømui ubishameranba waarameranbañau. Incha tru an yunømarøbelai anwane pirau wiita, mishat-siimeran utsøbetabig køn.

16 Incha tru paloma yanøbelane trenchibig køn:

—Iilane yugurri wesruiy cha. Nai Møskaweï yawane kan penab, yanøb indi ya maramig kømøn— cha.

17 Inchene nui kusrenanøb pera uniiløbe Tiuswei wamwan pørigu trenchibigwan isuptinchibelø køn: “Ñui yabe ñuindø kønrraimab isuptø, nane ke chindamdø køtan” chibigwan.

18 Inchen judíosmerabe trencha payibelø køn:

—¿Ñi øyeema mariibe, Tius ñiba pasrain kui asamibe namun chi kenamartrunrragu?— cha.

19 Inchene Jesúsbe kusrub løtappe trenchibig køn:

—I Tiuswei yawan pøtiitsay cha. Inchen nabe pøn kwalømyutø katøyug mara pasramønrrun— cha.

20 Inchene judíosmerabe trenchibelø køn:

—Tiuswei yawane marøb meløwa cuarenta y seis añosyu chab marig købig køn cha. ¿Ñigan pøn kwalømyutø kusranrrurmab isutirru?— cha.

21 Jesúsbe tru Tiuswei yawan waminchippe, nui asrwan wamindig kuig køn.

22 Inchawei Jesús katøyug øsiirabene, nui kusrenanøb pera uniiløbe tru nø trendaigwan isua, Tiuswei wamwan pørigwanba, Jesús nø maig wamindigwanba kørebelø køn.

Jesús mayeelan newan ashibig

23 Jesús Jerusalén ciudarsø Pascua Fiestayu wabene, møiløgøben, truba nu, nui munchiyu kørebelø køn, Tius nøba pasrain kui asamig nørreelø nø mariilan ashabe.

24 Inchendø Jesúsbe ka isatø inchib pønrrai asha køremíig køn, kaguende nøbe mayeelan mailø kuigwan asha pasrøwa.

25 Katø misagweimburab øyeelø køn cha, mu eshkam palaim pasrømíig køn, kaguende nøbe nøashib misaamera maig isubelø kuigwan tørguelarrab asha pasraig kua.

3

Jesús Nicodemoba waminchib

1 Kan fariseo Nicodemo taig købig køn, judíosmerai utu nø karub møg.

2 Truibe Jesúsweimay yem ashchab arruabe, trenchibig køn:

—Kusrennøbig, ñibe kusrenanøbig Tiusweinukkurri arruaig kui asha ker cha. Kaguende mugucha Tius maramburab mariilan asha kønrrai martrab kaiman cha, ñi mari lataibe, Tius nøba pasrømbubene.—

3 Inchene Jesúsbe løtappe trenchibig køn:

—Nabe ñun isa kømø, cierton trendamønrrun cha: Katøyug srøig kal-lamíibe Tius nø ashib karub waisriigwan ashchab kaimanrrun— cha.

4 Inchen Nicodemobe payibig kòn:

—¿Kan møg yandø kølig misra, katøyuube mandø incha kal-layasamø? cha. ¿Kabe katøyug usrai patsau kebinrrautah cha, katøyug kal-lanrrab?—

5 Inchene Jesúsbe trenchibig kòn:

—Nabe ñun isa kømø, cierton trendamønrrun cha: Pigurrimba, Espíritu Santogurrimba kal-lamíibe Tius nø ashib karub wainug kebinrrab kaimanrrun cha.

6 Møskaløgurrin kal-labiibe, misag maig køben treetøwein kòn cha. Inchen Espíritu Santogurrin kal-labiibe, espíritu maig køben treetøwein kòn cha.

7 “Mayeelø katøyug srøig kal-lamig kòn” cha, na trendaigwan, kan treebe maig kermab isub kwaara ashmøta chibig kòn.

8 Isig ichibiima muba køben itsan cha, wanrrimbe mørendø, chugurri arri mormuwei, ni muba yai mormuwei indan cha. Øyeetøwein kòn chibig kòn, mayeeløba Espíritu Santogurrin kal-labeløbe.—

9 Inchene Nicodemobe katøyug payibig kòn:

—¿Treebe maig kønrrab køh?— cha.

10 Inchene Jesúsbe trenchibig kòn:

—¿Ñi Israel misaamerai utu kusrennøb møg købendø, ñigan øyeelan chigúi mormíig køtirru? cha.

11 Nabe ñune isa kømø, cierton trendamønrrun cha: Nambe maig kui asha waminchib, katø namashib namui kaptøga asigwan waminchen, nam eshkaigwan ñim utømøn cha.

12 Na yu pirau chine pønrrabelan waminchen, ñim trununguen køremuibe, trube ¿srømbalarøn pønrrabelan waminchene, chincha køenrrague? cha.

13 ‘Srømbalarømaybe mugucha nebmuben, tru srømbalarøngurri kørraarrubig, tru Møg Misra Arrubiitøwei nebyan cha.

14 ‘Moisésma mu misag warab waraimønug tsandzøn ulwan tsigu mesra kusruibe, øyeetøwei tru Møg Misra Arrubigwangucha mesra kusraig kømig palønrrab kòn cha.

15 Mutøgucha nun kørebiibe tru managatig øsig kømigwan tøgagønrrai.

Tiuswei undag købig maya misagweyasig

16 ‘Tiusbe yu pirau misagwan truba truba isua undag køptø, nui kandø Nusrkawanguen tranig kòn cha, møikkøben nun kørebiibe kaigyu kebeña pinab pinømøtø, masken managatig øsig kømigwan tøgagønrrain cha.

17 Kaguende Tiusbe nui Nusrkawan yu piraumay ørøppe, yu pirau misagwan kaigyu pønrrønrrai pønrrønrrab kømøtø, masken nøgurri yu pirau misaameran kaigyugurri wesranrrai ørig kòn cha.

18 ‘Tiuswei Nusrkawan kørebigwane kaigyu pasrønrrai pasrimíig køben, trune nui Nusrkawan køremíigwane manaweinguen kaigyu pasrønrrai pasrikken kòn cha, kaguende Tiuswei kandø Nusrkawei munchiwan køremuikkurri.

19 Inchen tru kaigyu pønrrønrrai pønrrøppe, treekkurrin kòn cha: tru tømbe piraumay arruben, misaamerabe tømwan kømø, løstiigwangøba undaarabelø kòn cha, kaguen nømui mariiløbe tabig kømø, kailø kuikkurri.

20 Mutøgucha kaig marøbiibe tømwan ashig kømub, tsalø kuinchib, tøryumaybe kemallmøn cha, nømui kaig mariilø kenamisrraitamab kørig køptø.

21 Inchen møikkøben tru ciertonig maig køben, treeg uñibiibe tøryumay kemalan cha, nui mariiløbe Tius maig kønrrain køben treeg mariilø kuin kui tøgandø kenamisrrai.—

Juan Bautista katøyug Jesúsweimburab waminchib

²² Tru øyeelø chab puraißen, Jesúsbe nui kusrenanøß pera uniiløßa Judea pirausrømay ya, truyu maya yana køsrøn nõmba misagwan piu umbu ulsrøß uñibig køn.

²³ Inchen Juangucha treetøwei marøß uñibig køn, Enon taisrø, Salim pulu, kaguende truybe truba pi køben. Misaamerabe nõrrø amrrua, piu umbu ulsrailø købig køn.

²⁴ Øyeeg pureppe, Juanwan kailan keeri yau pasrmøwatø kuig køn.

²⁵ Inchen mõiløgøsrøn Juanwei mendig amøñibeløbe kan judiøba payiyab aleguiyab mendabelø køn, tru kaig marigwan chish maramig køn taigweimburab.

²⁶ Inchabe Juanweimay amrruabe, trenchibelø køn:

—Kusrennøßig, tru mõg Jordán pi ambøgatømayrø ñiba uñibig, tru ñi namun wamindi mõøbe, mõimbe misaameran piu umbu ulsrøß uñen, mayeeløßa nuimaygøßa amban— cha.

²⁷ Inchene Juanbe trenchibig køn:

—Mugucha chi utønrab kaimanrrun cha, srømbalærøngurri tranmubene.

²⁸ Na øyeeg taigwane pøß ñimdøweinguen mõrar køn: “Nabe Cristo kømøtø, nui merrab attrai karua ørig kur” taigwan.

²⁹ Tru srai misrtrabigwan pera pasrabiibe keg misrtrabig truig pera pasran cha. Inchen tru keg misrtrabigwei trendø trag linchibiibe truyu mõrøß pasrøwa, nui wamwan mõrabe, truba truba kasraaran cha. Pøß øyeetøwei, nai kasrag købiibe mõimbe neig køn cha.

³⁰ Nøbe purø nuig misrøß yamigwein køben, trune nabe chigucha kømíig misrøß yamig køn— cha.

Palagurri arrubiibe mayeelaim pala pasran

³¹ Palagurri arrubiibe kerrigu mayeelaim pala pasran. Inchen piraurri arrubiibe, pirauig kua, waminchipe, pirauigwan wamindan. Inchen srømbalærøngurri arrubiibe kerrigu mayeelaim pala pasran.

³² Incha nõbe tru maig asigwan, maig mõrigwan treeg køn chib waminchene, tru nõ treeg køn taigwane mugucha utag kømui indan.

³³ Inchen mõikkøben tru nõ trendaigwan utabiibe, Tiusbe ciertonig køn cha, treeg kørrømara pasran.

³⁴ Kaguende Tius karua øriibe Tiuswei wamwan wamindan, pøß Tiusbe nui Espiritun tøgagømburab tøgagønrri tranøßig kua.

³⁵ Møskaimbe Nusrkawane undaguig kua, chiwandøgucha nõ ashchai nui tasku pønsraig køn.

³⁶ Nusrkawan kørebiibe, managatig øsig kømigwan tøgagønrri. Trune Nusrkawan kaashibiibe srøig øsig kømigwan ashmønrri. Inchen Tiuswei purø trømbøig namig købiibe nuim pala pasran.

4

Jesús Samariasrø ishuuba waminchib

¹ Fariseosmerabe wammørin købig køn Jesúsbe Juan lataguen kømø, mendig amøñibelø mas tøgagømba, piu umbu ulsrailø mas tøgagømba indin kui.

² (Inchendø piu umbu ulsrøppe, Jesús nõashib kømøtø, nui kusrenanøß pera uniiløß marøbelø køn.)

³ Treeg wammøra kuin kui Jesúsbe trunun wammøra, Judea piraugurri webibig køn, katø Galilea pirausrømay inrrab.

⁴ Incha nø pureb yamibe Samaria piraowan pureb yamig nebunrrab købig køn.

⁵ Treekkurri Samariasrø kan Sicar taig puebloyu pubig køn, merrabsrø Jacob nui nusrkai Joséwan tranig pirø pulu.

⁶ Truyube kan pisu, “Jacobwein køn” taig waben, Jesúsbe muraaraig arrua, tru pisu pulu wamisrøbig køn, yandø kwaløm tøbøtag misrøb køben.

⁷ Inchen kan ishug samariasriibe pi wesrunrrab arruben, Jesúsbe trenchiptinchibig køn:

—Nan pi srøttra— cha.

⁸ (Pøs nui kusrenanøb pera uniiløbe mamig penønrab puebløsrømay ambin køben.)

⁹ Inchene tru ishug samariasriig løtappe, trenchibig køn:

—Ñibe judío købendø, na ya samariasriigwan: “Pi srøttra” taibe— cha.

(Kaguende judíosmerabe samaritanosmerababe linchimeelø købig køn.)

¹⁰ Inchene Jesúsbe trenchibig køn:

—Tius tranamigwan ñi nebua ashib, katø tru: “Pi srøttra” chibigwan ñi mu kui ashib indimbe, ñibe nun miabsruinrrun cha. Inchen managuen kølømø piwan srørrøbsruinrrun— cha.

¹¹ Inchene ishuube trenchibig køn:

—Au, kasuku, ñibe piwan chitøga wesramig chigaig wan cha. Katø pisube purø umbu wan cha. ¿Trube, ñibe tru kølømø piwane chugurri wesranrragu? cha.

¹² ¿Tru merrabsrø namui kølli misag Jacob, nø muchib, nui ureemera muchib, nui animalmera muchib indim piwan namun keta kørrømarøbig lataguen kømø, kabe ñigan mas nuig køtirru?— cha.

¹³ Inchene Jesúsbe trencha løtabig køn:

—Møikkøben i piwan muchibiibe katøyug pimulgwai inchun cha.

¹⁴ Trune tru na tranim piwan muchibiibe managuen pimulgwai inchimønrrun cha. Kaguende tru na tranim pibe nuinuube kan pigab pørsrab weguchib lataig kønrrun cha, tru managatig øsig kømigweyasig.—

¹⁵ Inchene ishuube trenchibig køn:

—Trube, kasuku, tru piwan srøttra cha, nagucha pimulgwai mørmøwei, katø mas yusrø wesranrrab arrumøwei inchab— cha.

¹⁶ Inchene Jesúsbe trenchibig køn:

—Ñui kewan wamønrab ya, katø amø— cha.

¹⁷ Inchen ishuube trenchibig køn:

—Nabe kekkaig kur— cha.

Inchene Jesúsbe trenchiptinchibig køn:

—“Kekkaig kur” chippe, ñibe sølwein tan cha.

¹⁸ Kaguende ñibe tratrøgatø kelø tøgag købig køn cha. Inchen mõi ya tøgagúibe ñui keg kømøn cha. Isømø, ñibe sølwein tan— cha.

¹⁹ Iigwan mørøppe, ishuube trenchibig køn:

—Au, kasuku, ñibe Tius maig karuigwan eshkabig treeg møg kømmørgø cha.

²⁰ Namui merrabsreelø samaritanosmerabe i tunyu Tiuswan køriibala tabig waminchibelø køben, trune ñim judíosmerabe Tiuswan Jerusalénsrø treeg martrab ambamig køn chibelø køn— cha.

²¹ Inchene Jesúsbe trencha løtabig køn:

—Ñiguen ishug, iigwan kørerra cha. Møskawan kørribala tabig waminchib maramig ura punrrab kui, i tunyu amrrua kømøwei, kabe Jerusalénsrø amba kømøweingue.

²² Ñim samaritanomerabe chigúi ashmubendø kørribala tabig waminchibelø køn cha. Inchen nambe kørribala tabig waminchippe, chigúi asha marøbelø ker cha. Kaguende kaigyugurri wesraig kømibe judíosmerai mis-agugurri arrubig køn cha.

²³ Pøs treeg maram kwalømbe punrrun cha; Inchen truipe mõiweinguen pubguen indan cha, tru cierton kørribala tabig waminchibelø Møskawan kørribala tabig wamindamig espíritutøga, cierton isua. Pøs Møskaimbe kørribala tabig waminchibelø øyamay marøbelan lan cha.

²⁴ Tiusbe Espiritu køben, kørribala tabig waminchibeløbe, espíritutøga, cierton isua wamindamig køn— cha.

²⁵ Inchen ishuube trenchibig køn:

—Mesías attrab kui, nabe asha kur cha (tru Cristo taig). Truig arruppe, namune maig kuigwan kerriguba tørgandø eshkanrrun— cha.

²⁶ Inchene Jesúsbe trenchiptinchibig køn:

—Truipe nawein kur cha, tru ñiba waminchib wabig.—

Jesús kusrenanøb pera uniilø katø nuimay amrrub

²⁷ Inchen waminchib pasramnetø nui kusrenanøb pera uniiløbe katø amrruabe, truba kwaarøbelø køn, Jesús kan ishuuba waminchib pasrain kui ashippe. Inchendø nømbe møikkucha chigucha payrrab inchimeelø køn: “¿Chi palai inchigu?” cha. Kabe: “¿Nøbabe chi waminchigu?” cha.

²⁸ Inchene ishuube nui pi mutingøtsøn pasrøb, pueblosrømay ya, misagwan trenchib eshkaibig køn:

²⁹ —Kan møywan ashchab amrruy cha. Na maig mariilan kerriguh eshkatan cha. ¿Inchippa Cristo køppeendi?— chib.

³⁰ Inchen puebloyeløbe webamba, Jesúsweisrømay ambubelø køn.

³¹ Trunetø nui kusrenanøb pera uniiløbe Jesúswan truba inchib trenchibelø køn:

—Kusrennøbig, maytøguen manrraurren— cha.

³² Inchen nøbe trenchibig køn:

—Nabe mamig tøgagur cha, ñim asiimíg.—

³³ Inchen nui kusrenanøb pera uniiløbe nømasiitø trenchibelø køn:

—¿Mugøben kabe mamig srua amrrua srørra chindah?— cha.

³⁴ Inchen Jesúsbe trenchibig køn:

—Nai mamibe, tru nan Karua Ørøbig maig kønrrain køben, trunun marøb, katø nui maramigwan patsamnegatig marøb indamig, truig køn cha.

³⁵ Ñimbe trenchibelø kømøtirru chibig køn: “Tirigun paramibe pib pøl palan” cha. Trune nabe ñimun trendamønrrun cha: ¡Ñimguen kabwan larrøbicha tab asay cha, ellmarig warabelan! Kaguende yandø chab øskøraikken waran cha, paramdø palabelø.

³⁶ Parøb, tulishib megabiibe tru parøb megaimburø pagaraig an uta, tru ellmarig misrigwane managatig øsig kømigweyasig tulisan cha, tru tsurøb ellmarøbig lata, parøb tulishibig lata kanguetøtø kasrag purramig kønrrai.

³⁷ Kaguende misamera øyan chippe, sølwein tan cha: “Kane tsurøb ellmaren, katøgaen parøb tulisan” cha.

38 Nabe ñimune parøb tulishinrrai ørar cha, ñim chigucha chi mariimønug. Murig maramigwan marøb kwallibeløbe kanelø køben, truilø kwaligwane ñim tulishinrrab pønrramisrin køn— cha, trenchibig køn Jesúsbe.

39 Samaria puebloyu warabelø truba yamelø Jesúswan kørebelø køn, maig kuigwan tru ishug eshkaikkurri: “Na maig marig købigwan kerriguh eshkatan” chib.

40 Inchen samariasreeløbe amrruabe, Jesúswan nømbe kørrømisr chib truba rugaben, truyu nøbe pa kwaløm nømbe kørrømisrøbig køn.

41 Inchen nø wamindigwan mørabe, masken yamelø kørebelø køn.

42 Inchabe ishuwane trenchibelø køn:

—Møimbe ñi trendaigwan trunun ka møratø kørewa pønrrømtø, møimbe yandø nambe namashib nun møra, isa kømø, i møøbe yu pirau misagwan Kaigyugurri Wesrabig kuin kui aser— cha.

*Kan kusreb møwei nusrkawan Jesús kwanrøwan tamarøb
(Mt 8.5-13; Lc 7.1-10)*

43 Tru pa kwaløm puraiben Jesúsbe Samariagurri Galilea pirausrømay ibig køn,

44 kaguende Jesús nøtøweinguen trendaig købig køn: “Tius maig karuigwan eshkaib møwane nuim piraueløtøweimbe chi tab indimig køn” cha.

45 Incha Galilea pubene, truyueløbe truba tab utabelø køn, kaguende Jerusalén Pascua Fiestayu nømgucha amønaig kua, Jesús tru chine mariilan nømbe ashagurri.

46 Incha Jesúsbe Galilea pirau Canásrømay katø arrubig køn, tru piwan vino kønrrai mariisrømay. Inchen truyube reyweyasig marøb wab møøbe nui nusrkawan kwanrø trarra købig køn, Capernaumsrø.

47 Inchen tru møøbe Jesús Judeagurri Galileasrø pun taig wammørabe, nui nusrkawan tamartrab nui yamay ‘tiusmanda kørraarubsrøumugu’ chinrrab ashchab ibig køn, kaguende yandø ke patsønrraptiig tsuben.

48 Inchene Jesúsbe trenchibig køn:

—Chigøben Tius naba pasrain kui asamig mari ashmøwei, katø purø nørreelø mariilø ashmøwei inchabe, ñimbe managuen kørenrraamøn— cha.

49 Inchen tru reyweyasig marøb wab møøbe trenchibig køn:

—Señor, petø amun cha, nai unø pinømøwatø.—

50 Inchen Jesúsbe trenchibig køn:

—Inrrø cha, ñui nusrkaimbe kwanrraamøn— cha.

Inchen tru møøbe Jesús trendaigwan kørewa ib menda,

51 nui yausrø pub ibene, nui karuindiig melabeløbe katønrrab werruabe, trenchiptinchibelø køn:

—Ñui nusrkaimbe ka øsig tsun— cha.

52 Inchen møøbe nømun payibig køn:

—¿Chu uraskurri tammisrøb ya?— cha. Inchene nømbe trenchibelø køn:

—Pachiibe marig kwaløm la una weetan— cha.

53 Inchene møskaimbe tre uraswei Jesús øyah taig kømøtab isubig køn, tru: “Ñui nusrkaimbe kwanrraamøn” taigwan. Incha nøba, nui yauelø kerrigueløba Jesúswan kørebelø køn.

54 Iig køn, tru srørø marigwei wendau katøgan Tius nøba pasrain kui asamig kønrrai mara eshkaig Jesús Judeagurri Galileasrømay arrua.

5

Betesdasrø kan kwanrriigwan Jesús tamarøb

¹ Yandø øyeelø chab puraiben, Jesúsbe Jerusalénsrømay nebibig køn judíosmerai fiestayumay.

² Inchen Jerusalén ciudayu tru Ubishamerai Yaskab cha, wamim pulube, kan pisu wabig køn, pøtøgatan ya-ureezheelø trattrøgatø wambiiteelø tøgaiç, hebreomaybe Betesda taig.

³ Truiløyube kwanrreelø truba nu warabig køn, kabgar køben, cojosmera køben, kønønrab kaimabelø købengue piwan kønøgamne munig.

⁴ Kaguende kanmay kanmay kan ángel pisuyu kørraarua, piwan kønøgøben, møikkøben nømerrig tru piyu kebibiibe chi kwanrø tøgaitøgucha tammisrig kørrømisrøbig køn.

⁵ Inchen kan møg treinta y ocho años ørøba kwanrø megabig, truyu pirau tsubig køn.

⁶ Inchen Jesúsbe truyu tsui ashabe, øyeetø truba yana kwanrø tsubig kuin kui ashabe, trenchibig køn:

—¿Tammisrøg køtah?— cha.

⁷ Inchene tru kwanriibe trenchibig køn:

—Kasuku, nane muguen srua ya, pisuyu kertrabig kaatan cha, tru piwan kønøgøben. Na kebinrrainchib megamne, katøganguen kebiptø kebibig køn— cha.

⁸ Inchene Jesúsbe trenchibig køn:

—¡Kurrø! cha. ¡Ñui tsigalwan mutab, punab inrrø!— cha.

⁹ Inchen tru urastø tru møøbe tabig kørrømisra, nui tsigalwan muta, punab ib mendabig køn. Inchen tru kwalømbe isrin kwaløm købig køn.

¹⁰ Treekkurri judíosmerabe tru tamarinabigwane trenchibelø køn:

—Møin kwalømbe isrin kwaløm køben, tru maig maramigwan martrai Moisés pøriibe ñui kaya tsuigwan muta inrrain kømø merabig køn— cha.

¹¹ Inchene tru møøbe trenchibig køn:

—Tru nan tamarøbiitøwei trenchitan cha: “Ñui kaya tsuigwan kusrua muta, inrrø”— cha.

¹² Inchene nømbe:

—“Ñui kayigwan tulisha, muta, inrrø” chippe, ñune ¿mu møg trenchita?— chibelø køn.

¹³ Inchen tru tamarinab møøbe mu kuinguen mørmíç køn, kaguende Jesúsbe truyugurri tarømisrin køben, katø truyube purø nu misag pasrøben.

¹⁴ Inchen yanayu Jesúsbe tru tamarig møwan Tiuswei yau ashabe, trenchibig køn:

—Au, ñi møi yandø tabig kørrømisrabe, møingurrimbe katø mas kaig martrab kømø cha, katøbe ñun masken trømbøig nebumønrraimbe.—

¹⁵ Inchene tru møøbe ya, judíosmeran eshkabig køn:

—Tru nan tamarøbiibe Jesús kuin køn— cha.

¹⁶ Incha treekkurri judíosmerabe Jesúsban kaig martrab wendautø lllirab mendabelø køn, kaguende øyeelan isrin kwaløm maren.

¹⁷ Inchen Jesúsbe trenchibig køn:

—Nai Møskaima chu uraskucha nui maramigwane møin kwalømgatig marøb wabig køben, nagucha marøbig kur— cha.

¹⁸ Trenchibene, judíosmerabe masken inchibelø køn Jesúsban kwetchab, kaguende isrin kwalømbe chi maramig kømøn cha, mera pasrigwandø kalø marmøtø, Tiuswangucha: “Nai trag Møskain køn” chib, Tiusba lataig misren.

Jesús nun mu chi tamgaig martrai tranigwan waminchib

¹⁹ Inchen Jesúsbe nømun løtappe, trenchibig køn:

—Nabe ñimun isa kòmò, cierton trendamønrrun cha: Tiuswei Nusrkaimbe ka nimburaþtøbe chigucha marmøn cha. Møskai chi mari asha, trunundø maran cha. Møskai chi marin kuindø Nusrkaingucha treetøwei maran cha.

²⁰ Kaguende Møskaimbe Nusrkawan undaguig kua, nõ chi mariilan kerrigu kenamaran cha. Incha treetø kòmòtø, mas purø nõrreelø marig kenamartrun cha, ñim kwaara asha kørromisramnegatig.

²¹ Kaguende Møskaima kwailan øsiirana øsig kømigwan traniibe, treetøwei Nusrkaingucha tru øsig kømigwan mõilan tranamdiig asønaben, tranan cha.

²² Katø Møskaimbe maig maramigwan mungucha nõ asha marøb wamøtø, tru maig maramigwane Nusrkai nõ asha martrai tranig køn cha,

²³ mayeeløba Nusrkawangucha purø tab inchai Møskawan purø tab inchi tabig lataitøwei. Nusrkawan tab inchiimibe, Møskai karua ørøbigwangucha chi tabig inchiimøn cha.

²⁴ Nabe ñimun isa kòmò, cierton trendamønrrun: Møikkøben na wamindigwan mørøb, nan Karua Ørøbigwan køreb inchiibe managatig øsig kømigwan tøgagønrrun cha. Incha truigwane kaigyu pasrønrai pasrig kømønrrun cha, kaguende kwamigugurri øsig kømigumay yandø puraya pasramirikkurri.

²⁵ Nabe ñimun isa kòmò, cierton trendamønrrun: Treeg maramig urabe punrrun cha. Inchen truiibe mõindøweinguen pubguen indan cha, tru kwabelø Tiuswei Nusrkawei wamwan møramig. Inchen tru mørøbeløbe øsig kønrrun cha.

²⁶ Kaguende Møskaimbe nõashib øsig kømigwan tøgagig kua, Nusrkawangucha treetøwei nõashib øsig kømigwan tøgagønrrai tranan cha.

²⁷ Katø Møskaimbe Nusrkawan maig kørromisrtrabigwan mu mandamgaig maramigwangucha tranan cha, kaguende nõbe Møg Misra Arrubig kuimba.

²⁸ Iig na trendaigwan maig kønrrermab isub kwarmøtay cha, kaguende treeg kømig urabe punrrun cha, mayan kwabelø søriilø purrabelø nui wamwan møra,

²⁹ truyugurri webambamig. Inchen tru tabig marøbeløbe katøyug øsiirawa kurrappe, srøig øsig kømigwan tøgagønrrab kurrøbene, trune kaig marøbeløbe katøyug øsiirawa kurrappe, kaigyu pønrrønrai pønrrailø kønrrab kurrønrrun cha.

Jesúsweingatø waminchib

³⁰ Nabe ka nimburaþtøbe chigucha chi marmíig kur cha. Nabe maig kønrrabigwan na asha marøppe, tru nai Møskai maig taig mørigwandø asha maren, tru maig kønrrabigwan na asha mariibe sølgandø marig køn cha. Kaguende nan treeg marøg kuimba treeg marmøtø, nan karua ørøbig maig martrain køben, trunun marar cha.

³¹ Na naasiitø maig kuigwan ka nimburaþtø wamindiibe, trube, tru na wamindiibe ka wamindiitø købsruinrrun cha.

³² Inchen naimburab maig kuigwan eshkabiibe katøgan køn cha. Inchen nõ tru naimburab eshka wamindiibe isa kòmò, maig kuigwan wamindig kui nabe asha kur cha.

³³ Ñimbe Juanweisrø payrrai øren, nõbe tru newan cierton maig kuigwan eshkaþwei indig køn cha.

³⁴ Pøs nabe kan møg naimburab 'øyeeg køn' cha wamindiitøga pasrømíig kur cha. Inchendø nõ trendaigwan na trenchippe, ñim kaigygurri wesrailø kønrrain trenchar cha.

³⁵ Juanbe kan lámpara naarab pilabig lataig kuig køn cha. Inchen kan maya yanatø ñimbe tru nui tøryu kasraaramig tab kui mørig købig køn cha.

³⁶ Inchendø naimburab Juan wamindi lataitøguen kømø, mas nuig tøgagur cha. Kaguende nai Møskai nan martrai traniiø, truiløtøwei naimburab na maig kuigwan eshkan cha, nane nai Møskai karua ørig kuin kui.

³⁷ Katø nai Møskai nan karua ørøbikkucha naimburab na maig kuigwan eshkan cha. Ñimbe managuen nui wamwan mørmøwei, nui maløwan ashmøwei indan cha.

³⁸ Katø ñimbe nui wamindigwan ñimui manrrau chigar køn cha, kaguende nø karua ørigwan ñim køremuikkurri.

³⁹ Ñimbe Tiuswei wamwan pørigwan ashippe, maig kətashchab truba tab ashib labelø køn cha, kaguende managatig øsig kømigwan truyu wetørranrrab isubelø kua. Inchen tru pøriiløbe nan mu kui ashchai naimburab waminchibelø køn cha.

⁴⁰ Inchendø ñimbe naimay amrrug kømuindan cha, tru srøig øsig kømigwan tøgagørrab.

⁴¹ Nabe misaamera nan maya nuguen tab inchib taiwane utømíig kur cha.

⁴² Inchagucha nabe ñimune mailø kui ashib, Tiuswei undag købigwan ñimuinug chigar kui ashar cha.

⁴³ Nabe nai Møskawei merrab na ñimun 'øyeeg kailø kuig køn' chinrraitamab. Inchen katøgan ka nuimburaab nui munchiyutø arrubigwane si, trube, ñimbe utønrrun cha.

⁴⁴ ¿Ñim mandø incha nan køenrrague? cha, kangurrin kangurri maya nuguen tab indig kømigwangøba ñim labeløbe, Tius kandø wabigweinukkurri maya nuguen tab indig arrubigwan lamøtø.

⁴⁵ Nai Møskawei merrab na ñimun 'øyeeg kailø kuig køn' chinrraitamab isumøtay. Moisés, ñim ke trunundø isua melaig, nui pøriiløtøgatøwei ñimune 'øyeeg kaig marøbelø kømøtirru' chinrrun.

⁴⁶ Kaguende Moisés maig taigwan ñim køreig kuimbe, nan kørebsruig kuinrrun cha. Kaguende Moisésbe naimburabweim pørig køn cha.

⁴⁷ Tru nø pørigwanma ñim køremeeløbe, na wamindigwangucha chincha køenrrague— cha, trenchibig køn Jesúsbe.

6

Jesús trattrø mil møguelan manrrai mamig tranøb (Mt 14.13-21; Mc 6.30-44; Lc 9.10-17)

¹ Incha Jesúsbe Galilea pisu ambøgatøsrømay ibig køn, tru Tiberias pisu taisrømay.

² Inchen truba nu misag Jesúswan mendig ambubelø køn, kaguende Tius nøba pasrain kui asamig kønrrai kwanrreelan tamaren asha kua.

³ Inchen Jesúsbe kan tun palasrø nebya, nui kusrenanøb pera uniiløba truyu wamisrøbig køn.

⁴ Inchen yandø judíosmerai Pascua Fiestabe lutau købig køn.

⁵ Incha Jesúsbe kurraasha, truba nu misag mendig amrruin kui ashabe, Felipene trenchibig køn:

—¿Yeeg nu misagweimbe nambe mamig pirrimbe chu penønrrab?— cha.

⁶ Trenchippe, Felipe ka manchitamørtraptø trenchibig køn, Jesúsbe maig maramigwan asha købendø.

⁷ Inchene Felipebe trenchibig køn:

—Ni kan møg doscientos días ørøba marøb megawa an pagaraig utiitøga pirrim pena, piti piti srørramikken nebunrraamøn— cha.

⁸ Inchen kusrenanøb pera uniilai utuig Andrés, Simón Pedroi nuneebe trenchibig køn:

⁹—Yube kan matsinø-unø trattrøgatø cebada pirrimbah pagatø peskaubatø sruaig pasran cha. Inchendø kan yandiibe ya nu misagweimbe mayanguen kømøn— cha.

¹⁰ Inchen Jesúsbe trenchiptinchibig køn:

—Mayeelanba purramisringaruy— cha.

Truyube pu truba tsitsig køben, møguelø trattrø milburab purramisrøbelø køn.

¹¹ Inchen Jesúsbe tru pirrimera muta, Tiuswan ‘mayanguen pay’ chabe, maya misag truyu purrabelan pirishabe, katø treetøwei peskaumerangucha maya mag kui inchen srørrøbig køn.

¹² Inchen yandø øska maben, Jesúsbe nui kusrenanøb pera uniilan trenchibig køn:

—Pitis unchibelane pirau ka petig warømønrrai, pitiswane tulisay— cha.

¹³ Inchen tru trattrøgatø cebada pirri pirisaigwan maben, yandø tru undailan tulishiben, tasinmera doce netsabig køn.

¹⁴ Inchen misaamerabe Tius maramburab marigwan Jesús mari ashabe, trenchibelø køn:

—Tru Tius maig karuigwan eshka møg tru yu piraumay attrabig køn taibe, isa kømø, iigwein køn— cha.

¹⁵ Inchen Jesúsbe misaamera nun rey martrab ke merrarrowa sruamrrab amrrunrrab kui wetøbefippe, nøbe katøyug tunbalasrømay inrrab nøtø tarømisrøptinchibig køn.

Jesús pisu palawan ib

(Mt 14.22-27; Mc 6.45-52)

¹⁶ Yandø pillirab arruben Jesúswei kusrenanøb pera uniiløbe pisuyu kørrørruabe,

¹⁷ kan barcoyu kebamba, Capernaumsrø larramrrab ambub mendabelø køn. Inchen yandø chab pilliraben, Jesúsbe katøgucha nømuimay arrumø srø køben,

¹⁸ yandø truba mur isig ichibig webarruben, pi welarmera kurrab mendabig køn.

¹⁹ Incha yandø kan trattrø kilómetros, kabe kan seis køsrøn remab ambabe, Jesúswane barco pulusrømay pi palawan arri ashiptinchibelø køn. Inchabe truba kørig kui inchen, Jesúsbe:

²⁰—¡Na kur cha. Kørmøtay!— chibig køn.

²¹ Inchen nømbe barcoyu Jesúswan truba tab kui wamab uta, petøzhiitø tru pum pirausrø pubguen inchibelø køn.

²² Katø kwaløm tru nu misag sötø tru pisu igatømay kørrømisrøbeløbe truyu barco kandøzhiitø pasrabigu Jesúswei kusrenanøb pera uniiløbe tru barcoyu amben, Jesúsbe nømbe tøga imuin kui ashibelø køn.

²³ Inchendøgucha Tiberias ciudasarngurrimbe katøgan barcomera pua põnrrabelø køn, Señor pirriwan ‘mayanguen pay’ chiben, tru maim pulusrø.

²⁴ Incha tru nu misaabe Jesús truyu mu kawei, nui kusrenanøb pera uniilø mu kawein kui ashippe, tru barcomerayu kebamba, Capernaumsrø Jesúswan lanrrab chab ambubelø køn.

Jesús tru øsig kømigwan tranøb pirri

²⁵ Incha pisu ambøgatøsrø chab pua, Jesúswan wetørrawabe, trenchibelø køn:

—Kusrennøbig, ¿yusrømbe ñibe mana pugu?— cha.

²⁶ Inchene Jesúsbe trenchiptinchibig kòn:

—Nabe ñimun isa kømø, cierton trendamønrrun cha: Ñimbe nane lappe, Tius naba pasrain kui asha kønrrai mariilan asha kømøtø, tru pirrimeran øska mamne maig kua, trugurrinre lan cha.

²⁷ Ñim marøppe, mamig ka petø patsønrrabigwandø isua marmøtø, managatig øsig køm mamigwan isua maray chibig kòn. Truigwane tru Møg Misra Arrubig ñimun tranrrun cha. Kaguende treeg maramigwan tranig kui asig kønrrai Tius Møskaimbe nui sellon nuinug pasrig kòn— cha.

²⁸ Inchene nømbe trenchibelø kòn:

—¿Tiuswei maramelan marøb pølbasrtrappe, nambe chi maramig palerah?— cha.

²⁹ Inchene Jesúsbe trenchibig kòn:

—Tiuswei maramibe iig køn cha, Tius tru nø karua ørigwan køremig.—

³⁰ Inchene nømbe trencha payibelø kòn:

—¿Tius ñiba pasrain kui nam ashib, ñun køreb inchaimbe, chi martragu? cha. Trube, ¿chi marøbig kugu? cha.

³¹ Namui merrabsrø kølli misaamerabe mu misag warab waraimønug maná taigwan maig købig køn cha, Tiuswei wam maig pørigu trendaim pala: “Nøbe nømune srømbalasarø pirriwan manrrai tranig kòn”— cha.

³² Inchene Jesúsbe trenchibig kòn:

—Nabe ñimun isa kømø, cierton trendamønrrun cha: Srømbalasarøngurri arrub pirri ciertonigwan nømun tranøbiibe, Moisés kømug køn cha. Treeg kømøtø, tru cierton pirri srømbalagarri arrubigwan ñimun tranøppe, nai Møskai, nø tranig køn cha.

³³ Kaguende Tiuswei pirrimbe tru srømbalasarøngurri yu piraumay kørraarua, katø misaameran srøig øsig kømigwan tøgagønrrai tranøbig, truig køn— cha.

³⁴ Inchene nømbe trenchibelø kòn:

—Señor, chu uragucha tru pirriwan srøttra— cha.

³⁵ Inchene Jesúsbe trenchibig kòn:

—Tru øsig køm pirrimbe na kur cha. Naimay arrubiibe managuen parøgwai mørmøwei, katø nan kørebiibe managucha pimulgwai mørmøwei inchun cha.

³⁶ Inchendø na ñimun trendaim pala ñimbe nan ashippe, ashendø, nane køremøn cha.

³⁷ Møitøgucha Møskai nan traniibe naimay attrun cha. Inchen naimay arrubigwane nabe managuen wambig weguchimumønrrun cha.

³⁸ Pøs, nabe srømbalasarøngurri kørraaruppe, nan maig maramdiig køben treeg martrab arrumøtø, nai Møskai nan karua ørøbig na maig martrain køben, treeg martrab kørraarig køn cha.

³⁹ Inchen nan karua ørøbig martrai isuibe iig køn cha: Nø nan traniilane ni kanguen trubishimø, srabe kwaløm katøyug na nømun øsiirangarunrrain køn cha.

⁴⁰ Nai Møskai martrai isuibe øyeeg køn cha: mutøgucha Nusrkawan nebua asha, nun kørebiibe managatig øsig kømigwan tøgagønrrain køn cha. Inchen nabe srabe kwaløm nun katøyug øsiirangarunrrain køn— cha.

⁴¹ Inchen judíosmerabe namig nømdø nilø chigøben chib mullib mendabelø køn, tru: “Pirri srømbalasarøngurri kørraarubiibe na kur” taikkurri.

⁴² Incha trenchibelø kòn:

—¿Øibe tru Jesús Joséwei nusrkain kømuitarru? cha. Nambe usri møskawan ashibelø ker cha. ¿Møimbe mandøgurri nøbe øyeeg tah cha: “Nabe srømbalasarøngurri kørraarrig køn” cha, trenchippe?—

43 Inchene Jesúsbe trenchibig køn:

—Ñimuen ñimdø mas namig mulla mormøtay cha.

44 Mugucha naimaybe attraamøn cha, Møskai nan karua ørøbig naimay attrai inchimubene. Inchen naimay arrubigwane nabe srahe kwaløm katø øsiirangarumønrrun cha.

45 Tru Tius maig karuigwan eshkabelø pørigube treeg chibig pørig pasran cha: “Mayeelanba Tius nø kusrenaniilø kønrrun” chibig. Inchawei mayeeløba Møskawan mørøb, nuiwan kusreb inchibeløbe naimay amrrunrrun cha.

46 Pøs Møskawane mugucha asiibe kaagøn cha. Tiusweinukkurri arrubig, truitøwei Møskawan ashibwei indan cha.

47 Nabe ñimun isa kømø, cierton trendamønrrun cha: Nan kørèbiibe managatig øsig kømigwan tøgagøn cha.

48 Tru øsig køm pirrimbe na kur cha.

49 Ñimui merrabsrø kølli misaamerabe mu misag warab waraimønug tru maná taigwan mabendø, kwaig købig køn cha.

50 Trune tru srømbalasarøngurri kørraarrub pirrimbe yu pasran cha, møikkøben tru pirriwan mabiibe, kwamønrrai.

51 Tru srømbalasarøngurri øsig køm pirrimbe na kur cha. Møikkøben i pirriwan mabiibe managatig øsig wanrrun cha. Inchen yu pirau tru maya misagwan srøig øsig kønrrai tru na tranam pirrimbe nai asrtøwein køn—chibig køn, Jesúsbe.

52 Inchene judíosmerabe nømasyaitø namig trenchib mendabelø køn:

—¿I møøbe nui asrwandøwei manrraimbe namune mandø tranrrrab indah?— cha.

53 Inchene Jesúsbe trenchibig køn:

—Nabe ñimun isa kømø, cierton trendamønrrun cha: Tru Møg Misra Arrubigwei asrwan mab, katø nui aniwan muchib inchimeeløbe srøig øsig kømigwan ñimuinug tøgagønrraamøn cha.

54 Møikkøben nai asrwan mab, nai aniwan muchib inchibiibe managatig øsig kømigwan tøgagøben, nabe srahe kwaløm nune katø øsiirangarumønrrun cha.

55 Kaguende nai asrbe si, cierton mamig køben, katø nai animbe si, mutsamig ciertonig køn cha.

56 Nai asrwan mab, nai aniwan muchib inchibiibe nainug pasrabig pasrøben, katø nagurringucha nuinug pasramønrrun cha.

57 Nan karua ørøbig Øsig Wab Møskaingurri tru øsig kømigwan na tøgagøb lataitøwei, nagurri nøgucha tru øsig kømigwan tøgagønrrun cha tru nai asrwan mabiibe.

58 Iibeguende tru srømbalasarøngurri kørraarrub pirrin køn cha, tru ñimui merrabsrø kølli misaamera maig lataig kømøtø, nømbe mape, mabendø, kwaig købig køn cha. Trune i srømbalasarøngurrim pirriwan mabiibe managatig øsig kønrrun—chibig køn.

59 Jesús øyeelan kusrenanøppe, judíosmera tulundzuni yau Capernaumsrø kusrenanig køn.

Møiløgøben Jesúswei mendig amba katøyug llirab

⁶⁰ Møiløgøben Jesúswei mendig amøñibelø i kusrenanigwan mørabe, trenchibelø kòn:

—Nø øyeeg kusrenaniibe maramga menrra murig kòn cha. ¿Mu kui móriasamø?— cha.

⁶¹ Inchen Jesúsbe nømdø chigøben chib mullib kui ashabe, trenchibig kòn:

—¿Ñimun øyeeg chibene pusrkwatah? cha.

⁶² Tru Møg Misra Arrubig tru nø srøsrø waisrøndøwei katøle nebiben asimbe, trube, ¿maig købsruerah? cha.

⁶³ Øsig kømigwan tranøbiibe Espíritu køben, asrbe truburappe chigucha chi purugumíig kòn cha. Na ñimun wamindiibe Espíritu køb, øsig kømig køb kòn cha.

⁶⁴ Inchendø katøgucha ñimui utu mõiløbe køremeelø kòn— cha, trenchibig kòn.

Kaguende Jesúsbe manawei srøsrøgurri asig købig kòn, mumeratø nun køremeelø kuigwan, katø tru nun ashig kømui inchibelan tranrrabiibe mõig kuigwan.

⁶⁵ Incha katø Jesúsbe trenchibig kòn:

—Inchawei treekkurri nabe ñimune trenchar cha: Mugucha naimaybe amrrunrraamøn cha, nai Møskai amrrunrrai inchimubene.—

⁶⁶ Inchen yandø trugurrimbe mõiløgøben nui mendig amøñibeløbe chab llirawa, yandø Jesúsba amøñimeelø kòn.

⁶⁷ Inchen Jesúsbe nui doceelan trenchibig kòn:

—¿Kabe ñimgucha treetøwei llirawa ambug kətah?— cha.

⁶⁸ Inchen Simón Pedrobe trencha lətabig kòn:

—¿Señor, nambe muimay kui ambamø? cha. Tru managatig øsig køm wamwane ñitøwein tøgag køben,

⁶⁹ nambe ñun køreb, katø tru Tiuswei Newan Tabiibe ñi kui ashib inder— cha.

⁷⁰ Inchene Jesúsbe trenchibig kòn:

—¿Yamba, na ñimun doce lawa wesrab mørgøppeh? cha. Treeg kuindøgucha ñimui utu kane kwaimandzig kòn— cha.

⁷¹ Øyah chippe, Simón Iscariotei nusrkai, Judaswan waminchibig kòn. Kaguende tru doceelai utuig kuatøgucha, tru Jesúswan ashig kømui inchibelan nø tranrrab pasrøben.

7

Jesúswei nunelø nun køremub

¹ Yandø øyeelø chab purayaig wendø, Jesúsbe Galilea pirausrø uñibig kòn, Judea pirau llirab uñmønrrab, kaguende judíosmera truyube kwetchab lab køben.

² Tru judíosmerai Ya-ureg Maram Fiesta yandø pub køben,

³ Jesúswei nuneløbe nun trenchibelø kòn:

—Yugurri Judea pirausrømay inrrø cha. Ñui mendig amøñibelø ñi chi mariilan ashchain cha.

⁴ Pøs kan mõikkøbenma misaamera mu kui nebua asig kønrrappe, chi-wandøgucha sərətø marmøn cha. Tru ñi øyeelø marøbiibe, trube, maya misaamera ashchai martraurren— cha.

⁵ Pøs Jesúswei nuneløtøweinguen nune køremeelø kòn.

⁶ Inchene Jesúsbe nømune trenchibig kòn:

—Na treeg maramibe pumø srø køn cha. Trune ñimuimbe chu ura marøg køben maramig chi kømøn cha.

⁷ Yu piraeløbe ñimune chi tsalinchab kaimanrrun cha. Trune nane tsalinndan chibig køn; kaguende nøm marøb kuigwan kaig køn cha, na eskaben.

⁸ Ñimbe fiestayumay ambay chibig køn. Nabe katøgucha tru fiestayumaybe nebarrumumønrrun cha, kaguende na treeg maramibe pumø srø køben.—

⁹ Incha trenchabe, Galileasrø kørrømisrøbig køn.

Jesús Ya-ureg Maram Fiestasrø

¹⁰ Inchen yandø nunelø fiestayumay chab amben, Jesúskucha ippe, ibendø, mayeelø ashchain kømøtø, ibig køn.

¹¹ Inchen judíosmerabe fiestayu nun lab kua, trenchibelø køn:

—Tru møøbe ¿chu unerah?— cha.

¹² Inchen misag utube Jesúsweimburab mutøgucha niløzhiitø truba waminchib købelø køn, kaneløbe: “Tru møøbe truba tabig køn” chiben, kaneløbe: “Tabig kømøn cha. Misagwan may wamincha, ka isaptiig køn” chibelø køn.

¹³ Inchendø møitøgucha nuimburab waminchippe, waminchendø, ke mayeelø mørtrain kømøtø waminchibelø køn, judíosmeran kørig køptø.

¹⁴ Yandø fiestabe tøbøtakken pureb iben, Jesúsbe tru Tiuswei yau kebya, kusrenanøb mendaptinchibig køn.

¹⁵ Inchen judíosmerabe truba kwaarøb trenchibelø køn:

—¿I møøbe kan øyeebe chincharre kusrebig køh cha, chu kusreweig kømubendø?— chib.

¹⁶ Inchene Jesúsbe trencha løtabig køn:

—Na kusrenaniibe nain kømø, nan karua ørøbigwein køn cha.

¹⁷ Møikkøben Tius maig martrain køben trunun marøg kui inchibiibe na kusrenaniilane Tiusweinukkurri arrubig kuin kui, kabe naimburaptø kusrenanøbig kuin kui nebua ashchun cha.

¹⁸ Møikkøben nuimburaptø waminchibiibe, misaamera ka nun maya nuguen tab inchaindø lan cha. Inchen møikkøben tru karua ørøbigwan maya nuguen tab indig kønrrai labiibe, truipe si, cierton waminchibig, nuinuube chigucha kalø marig chigaig køn cha.

¹⁹ ¿Tru maig maramigwan martrai pørigwane ñimune Moisés nøwein tranig kømuitarru? cha. Inchen ñimbe møikkucha tru martrai pørigwane møra marmøn cha. ¿Nane chindimba kwetchab lague?— chibig køn.

²⁰ Inchene misaamera nu pasrabiibe trencha løtabelø køn:

—Ñibe kwaimandzig tøgag køn cha. ¿Ñune mu kwetchab lab kø?— cha.

²¹ Inchene Jesúsbe trencha løtabig køn:

—Isrin kwaløm kan mana asiimíg asha kønrrai marigwandø ñimbe mayeeløba kwaarua asha køn cha.

²² Pøs inchawei Moisésbe circuncidanrrai ñimune karua pasrig køn cha, (truipe Moisésweinukkurri arrubig kømøtø, ñimui merrabsrø kølli misaamerainukkurri pølbasa arrubigwan). Inchen ñimbe isrin kwaløm kuindøgucha kan møg-unan circuncidabelø køn cha.

²³ Inchawei tru maig maramigwan martrai Moisés pøriilan maig taigwan kalø mara kørrømarønrraptø, kan mowan isrin kwaløm kuindøgucha ñimma circuncidabelø købendø, na isrin kwaløm kan mowan kwanrrowan kerrigu newan tamarene, trube, ¿ñimbe nane chindimba namøgue cha?

²⁴ Ñimuin kabyu maig misag asønaben ke trunundø asha marøb pønrrømøtø, marøppe, maig kønrrabigwan sølgandø asha maramig køn— cha, trenchibig køn Jesúsbe.

¿Jesús tru attrabig Cristo kø chinderah?

²⁵ Inchen møiløgøben jerusalénsreeløbe trenchibelø køn:

—¿Øigwanweinrre kwetchab lab amøñimuitarru? cha.

²⁶ Au, ya mayeelai malau waminchib pasrøben, mugucha chi chimøn cha. ¿Kabe tru ashib karubeløbe øibe Cristo kui asha treeg mara tøgagø chinderah? cha.

²⁷ Inchendø nambe ø møøbe chugurri arrig kui asha ker cha. Trune Cristo arrubene, chugurri arrin kui mugucha ashchaamøn— chibelø køn.

²⁸ Inchen Jesúsbe Tiuswei yau kusrenanøb pasrøwa, truba mur waminchib trenchibig køn:

—Ñimbe nane mu kui ashib, katø nabe chugurri arrig kui ashawein køn cha. Nabe arrua pasrappe, naimburaptø arrua pasrømøtø, tru ciertonig nø karua ørig pasrar cha, tru ñim mu kui nebua asiimíg.

²⁹ Inchen nabe nune mu kui ashibig kur cha, kaguende nabe nuinukkurri arrub, katø nø nan karua ørig kua.—

³⁰ Inchen nun merrarrawa, sruamrrab inchendø, mugucha merrarrameelø køn, kaguende nun treeg maramig ura pumø srø køben.

³¹ Inchen puebloyu misaamera truba nu nun kørewabe, trenchibelø køn:

—Cristo arruppe, ¿Tius nøba pasrain kui asha kømig mariilø i møg lataig maskucha mana martrab kø?— cha.

Fariseosmera Jesúswan merrarranrrab inchib

³² Fariseosmerabe misag truba nørø Jesúsweimburab niløtø truba waminchamøøb kui mørabe, nømbe judíos sacerdotesmeran karubeløba misra, Tiuswei yau ashib pønrrabelan ørøbelø køn Jesúswan merrarranrrai.

³³ Inchene Jesúsbe trenchibig køn:

—Yu ñimbabe katøgucha kan maya yanatø uñchab kur cha. Trugurrimbe nan karua ørøbigweisromay katø inrrab kur cha.

³⁴ Inchen na ibene, ñimbe labendø, nane wetørranrrab kaimanrrun cha. Katø tru na wanrrab yaisrømbe ñimbe amrrab kaimanrrun— cha.

³⁵ Inchene judíosmerabe nømasiyaitø trenchib payibelø køn:

—Ø møøbe ¿chumay inrraindah? cha, nam wetørramgaibe. Kabe ¿tru judíosmera griegosmerai utusrø amba warabelaisromay ya, tru griegosmeran kusrenanrrab inrrab inda, chindah cha?

³⁶ ¿Øyeebe mandø tah? cha, tru: “Nan lappe, labendø, nane kalanrrun” chib. Katø: “Na waisrømbe ñimbe amrrunrrab kaimanrrun” chippe.—

Øsig kømigwan tranøb pi

³⁷ Incha tru srahe kwaløm, fiesta purø tabig purayam kwaløm Jesúsbe pasramisra, mur waminchib trenchibig køn:

—Møikkøben pimulgwaibe naimay arrua, muchi cha.

³⁸ Tiuswei wamwan pørigu maig taig, møikkøben nan kørebiibe nui manrraugurrimbe managuen kølømoø pimera lulrrun— cha.

³⁹ Øyeech chippe, Jesúsbe tru nun kørebeløbe Espíritu Santon utønrrab køn cha, truigweimburab trendaig køn. Pøs katøgucha Espiritun tranimíg srø køben, kaguende Jesúsbe purø nuig purø tabig tørigwan utømoø srø kua.

Misaamera nøørøtø misrøb

40 Inchen mōiløgøsrøn tru nu misag sətøyuælø nø wamindiilan mørabe, trenchibelø køn:

—libeguende, Tius maig karuigwan eshkabig, tru møg køn— cha.

41 Inchen kaneløbe trenchibelø køn:

—libe Cristo køn— cha.

Inchen katøganeløbe trenchibelø køn:

—¿Cristogan Galileagurri attraitarru? cha.

42 Cristobe Davidwei misagugurri arrub, katø tru David tsui pueblo, Beléngurri attrabig køn cha. ¿Tiuswei wamwan pørigube yamba trenchibig kømuitarru?— cha.

43 Incha misaabe Jesúskurrindø nømdø ke nøørotø misrøb chab tarømisra,

44 mōiløbe kemørtrab inchendø, mōikkucha chinchimeelø køn.

Judíosmeran karubelø Jesúswan kōremub

45 Incha tru Tiuswei yau chigøben puraimønrrai ashib pønrrabeløbe tru sacerdotemesmeran karubeløba, fariseosmeraba purraisrø katø pubene, truiløbe nømune trenchibelø køn:

—¿Jesúswane chindimba sruamrrumøgue?— cha.

46 Inchen tru ashib pønrrabeløbe trencha løtabelø køn:

—¿Kan managuen ø møg lataibe muguen wamindig kaagøn!— cha.

47 Inchene fariseosmerabe trenchibelø køn:

—Kabe ¿may waminchen ñimgucha tabig chitanmab tru kuindø kōrewa pønrrappeendi? cha.

48 Kabe ¿namui ashib karubelø kui, fariseosmera kui mōikkøben truiløma nun kōreitarru? cha.

49 Pøs i misag sətø tru maig maramigwan martrai Moisés pørigwan ashmeeløbe larrø kaig nebuim pønrrønrrai pønrrailø køn— cha.

50 Inchen Nicodemo, tru srøtøzhiitø Jesúswan yem ashchab ibig, tru fariseosmerai utube trenchiptinchibig køn:

51 —¿Tru maig maramigwan martrai namui pørikkan kan mōwan chi marig kuitashchab ashchab, nø wamindigwan mørøbmerrig mørumbendøgan kaigyu pasrønrrai pasrøbig kuitarru?— cha.

52 Inchene nømbe trencha løtabelø køn:

—¿Kabe ñigucha galileasriitøwein kōtirru? cha. Tiuswei wamwan pørigwan maig chibig kōtashchab ñiguen tab ashchig chibelø køn, Tius maig karuigwan eshkab møg Galileagurrimbe muguen kurrømuig kuin kui, ñiguen ashchabguen— cha.

53 Inchabe yandø mōitøgucha yamay chab ambubelø køn.

8

Ishug keebaig kōbendø, katøganba kaig marøb tsuben merrarrainabig

1 Inchen Jesúsbe Olivos Tunsrømay ya,

2 katø kwaløm tør-raben, katø Tiuswei yaumay arrubene, maya misaabe nun kemallen, nøbe wamisra, kusrenanøb mendabig køn.

3 Inchen tru Moisés pørigwan kusrenanøbeløba, fariseosmerababe kan kasharawa ishug kaig marøb tsuin kōben merrarawa, Jesúsweimay srua amrrua, truyu purrabelai tøbøtag pasrabe,

4 Jesúswan trenchibelø køn:

—Kusrennøbig, i ishuwane kaig marøb tsuben ke truyu merrarraig køn cha.

⁵ Trube, tru maig maramigwan martrai Moisés pøriibe øyeeg ishum-burmerane sruutøga peta, kweetsingarubig køn cha. Treeg købene, trube, ¿ñibe manchinrragu?— cha.

⁶ Nømbe øyamay payippe, mandø inchibig kətasha, chigøben chi kəptørre trencha mørøbelø køn. Inchene Jesúsbe utsøbasra, tasig-unøtøga pirau pørøb mendabig køn.

⁷ Inchen ke payibig payen, katø kurraashabe, nømune trenchibig køn:

—Ñim møikkøben kaig marig chigaibe, truimerrig pølbasra sruutøga nun petø pøs— cha.

⁸ Incha katø Jesúsbe utsøbasra, pirau pørøbig, pørøbig køn.

⁹ Inchen nømbe tru nø trendaigwan mørabe, mas kølleelømerrig kan kan pera pølbasra, webamba ambub mendabelø køn, Jesúsba tru ishug truyu pasrabiibatø kørnmisram.

¹⁰ Inchen Jesúsbe kurraashabe, trenchibig køn:

—Au, ishug ¿kaneløbe chu ambah? cha. ¿Mugucha ñune møra meganrrai chi marmuitarru?— cha.

¹¹ Inchene nøbe trenchibig køn:

—Kasuku, mugucha nane treeg marmøtan— cha.

Inchene Jesúsbe trenchibig køn:

—Katø nagucha ñune chi marmumønrrun cha. Inrrø, chibig køn. Møingurrimbe katø kaig martra kømø— cha.

Jesús yu pirau maya misagwei tər

¹² Jesúsbe katø fariseosmeran trenchib waminchibig køn:

—Nabe yu pirau misagwei tər kur cha. Inchen nai mendig uñibiibe man-guen ləstøyu uñimøtø, tru øsig kəmig tərwan tøgagønrrun— cha.

¹³ Inchene fariseosmerabe trenchibelø køn:

—Ñibe maig kuigwan eshkab waminchippe, ka ñuimburaptø wamindan cha. Treekkuri ñui wamindiibe ka isatø køn— cha.

¹⁴ Inchene Jesúsbe trencha lətabig køn:

—Maig kuigwan na naimburaptø wamindinguen, na wamindiibe isa wamindig kømøn cha. Kaguende nabe na chugurri arrigwan ashib, katø chumay yamigwan ashib inchar cha. Trune ñimbe na chugurri arrigwan ashmøwei, ni chumay yainguen ashmøwei indan cha.

¹⁵ Ñimbe maig maramigwan asha marøppe, møguelø maig isua marøbelø køben, ñimbe treeg isua marøbelø køn cha. Trune nabe mungucha maig maramigwan treeg mara ashmøig kur cha.

¹⁶ Inchen tru maig maramigwan na asha maringuen, trube maig maramigwan sølgandø asha marig isa kømø, treeg køn cha. Kaguende nabe natø kømøtø, nai Møskai nan karua ørøbiiba misra marar cha.

¹⁷ Maig maramigwan martrai ñimui pøriiløyuma, trenchibig pørig pasran cha, maig kuigwan ashibelø møguelø pailø treetøweih eshkaikkurrimbe, isa kømøn chibig.

¹⁸ Pøs naimburabigwan maig kuigwan eshkabiibe natøwein køben, katø nai Møskai nan karua ørøbikkucha naimburabigwan maig kuigwan eshkan— cha, trenchibig køn Jesúsbe.

¹⁹ Inchene nømbe trencha payibelø køn:

—Ñui møskaimbe ¿chu pasra?— cha.

Inchene Jesúsbe trencha lətabig køn:

—Ñimbe nan ashmøwei, nai Møskawan ashmøwei indan cha. Nan ashibelø kuimbe, nai Møskawagucha ashibelø købsruinrrun— cha.

²⁰ Iilan waminchib pasrappe, Jesúsbe tru Tiuswei yau Tiusweyasig an pusrim pulu kusrenanøb pasrøwa, trendaig køn. Inchen mugucha kemørtrab inchimeelø køn, kaguende nun treeg maramig pumø srø køben.

“Na yamsrømbe ñimbe amrrunrraamøn”

²¹ Incha Jesúsbe katø trenchibig køn:

—Nabe inrrainchar cha. Inchen ñimbe nane lappe, labendø, ñimbe ñimui kaig marøb amønainuutø kwanrrun cha. Pøs na yamsrømbe ñimbe amrrunrrab kaimanrrun— cha.

²² Inchene judíosmerabe nømdø trenchibelø køn:

—¿Kabe nøasiitø kwanrrainchippeendi? cha: “Na yamsrømay iben, ñimbe amrrunrrab kaimanrrun” chinrrappe.—

²³ Inchene Jesúsbe nømune trenchibig køn:

—Ñimbe yuelø køben, nabe palasriig kur cha. Ñimbe yu pirauelø køben, trune nabe yu pirauig kømur cha.

²⁴ Inchawei treekkurri nabe ñimun trendaig køn cha: “Ñimbe kaig marøb amønailøyutø kwanrrun” cha. Kaguende ñim nan na kuitamab isua køreimuikkurrimbe, ñimui kaig marøb amønailøyutø ñimbe kwanrrun— cha.

²⁵ Inchene nun trencha payibelø køn:

—Trube, ¿ñibe mu kugu?— cha.

Inchene Jesúsbe trencha løtabig køn:

—Srøsrøgurri na ñimun maig eshkab arrig, truig køn cha.

²⁶ Nabe ñimun chigøben wamindamig truba tøgagur cha, ñimbe øyeelø køn tamig. Inchen nan karua ørøbiibe isa kømø, cierton waminchibig køn cha. Inchen na yu pirauelan wamindiibe na nun wamindi mørigwan, trunun waminchar— cha.

²⁷ Inchen Jesúsbe nui Møskawan waminchen, nømbe ni chiwan wamindinguen wetøgørrømeelø køn.

²⁸ Treekkurri Jesúsbe nømune trenchibig køn:

—Ñimbe tru Møg Misra Arrubigwan mesra pala kusrabene si, nabe na kui ñimbe nebua ashib, katø chiwandøgucha marøppe, ka naimburaptø marmøtø, iilan waminchippe, nai Møskai maig kusrenanigwan waminchibig kuin kui nebua ashib inchun cha.

²⁹ Kaguende nan karua ørøbiibe naba pasrab, katø nøbe nandø elachimøwei indig køn cha. Pøs nabe managucha marøppe, nø tab kui wanrrai treegwandø marøbig kur— cha, trenchibig køn.

³⁰ Jesús iigwan waminchene, truba yamelø nun kørebelø køn.

Tiuswei ureemeraba, kaig marøptø amønibeløba

³¹ Incha tru judíosmera nun kørebelane Jesúsbe trenchibig køn:

—Na maig wamindiilan ñim trunun møra marøb pønrrøwabe, isa kømø, nai mendig amønibelø kønrrabguen cha.

³² Incha ñimbe tru newan ciertonigwan nebua ashene, tru ciertoniibe ñimune iløsrkøbeløyugurri elatsiilø kønrrai martrun— cha.

³³ Inchen nømbe trencha løtabelø køn:

—Nambe Abrahamweinukkurri amrrub misaamera ker cha. Nambe managuen mu karua srua kuindiig melømo misaamera ker cha. Nibe øyeebe ¿mandø chigu? cha, ‘namun elatsiilø kønrrun’ chinrrappe.—

³⁴ Inchene Jesúsbe trenchibig køn:

—Nabe ñimun isa kømø, cierton trendamønrrun cha: Mutøgucha kaigwan marøb pasrabiibe, tru kaig marøb pasraig, truitø kanawa srua yaig pasran cha.

³⁵ Kan karuindiig megabiima yaube managatig korrømisrhuben, trune kan nusrkaimbe si, managatig truyu korrømisran cha.

³⁶ Inchawei Tiuswei Nusrkai ñimun kaig marøb melaigugurri elachene, ñimbe isa kømø, newan elatsilø kønrrabguen cha.

³⁷ Ñimbe Abrahamweinukkurri amrrub misaamera kui nabe ashaweim pasrar cha. Inchendø ñimbe nane kwetchab inndan cha. Kaguende na wamindiibe ñimuinuube korrømisrhuben cha.

³⁸ Nabe nai Møskaimba pasrøwa asigwan, truigwan waminchen, ñimbe ñimui møskawan mørigwan trunun maran— cha.

³⁹ Inchen nømbe trencha løtabelø køn:

—Namui møskaimbe Abraham køn— cha.

Inchen Jesúsbe trenchibig køn:

—Ñim Abrahamwei nusrkalø kuimbe, trube ñimgucha, Abraham mari lataigwei marøbsruinrrun cha.

⁴⁰ Inchendø ñimbe mømbe nane kwetchab inndan cha, Tius mandø taig mørigwan na tru newan cierton waminchib møwane. ¡Abrahambe managuen øyeebe marmuig købig køn cha!

⁴¹ Ñimbe ñimui møskai mariilan marøbelø køn— cha, trenchiben, nømbe trencha løtabelø køn:

—Nambe mu mendaigwei tøgamisri ureemeragucha kømer cha. Nambe møskaimbe kandø tøgar ker cha, truike Tius.—

⁴² Inchene Jesúsbe trenchibig køn:

—Ñimui møskai Tius kuimbe, trube, ñimbe nane undaarabsruinrrun cha. Kaguende nabe Tiusweinukkurri arrua, yu pasrar cha. Nabe ka naimburatø arrig kømøtø, nane Tius ørig køn cha.

⁴³ Ñimbe na wamindigwane ¿chindimbarre chugúnguen mørmeelø køh cha? Na wamindigwan ñimbe mørmeelø kuarre treendan cha.

⁴⁴ Ñimbe ñimui møskai nugwaimandzigwei ureg kua, ñimui møskai maig palain køben, ñimbe trunun marøb pønrran cha. Nugwaimandziibe srøsrøgurri kweechiptiig kua, managuen tru newan ciertonigube pasramisra marmuig køn cha, kaguende nuinuube ciertoniibe chigaa kua. Inchawei nø chigøben isa waminchippe, nø maig kua, treeg wamindan cha. Kaguende nøbe purø isaptiig køn cha. Incha nøbe isa wamindigwei møskain køn cha.

⁴⁵ Trune nabe ñimun tru newan cierton waminchene, ñimbe nane køremøn cha.

⁴⁶ ¿Ñim møikkøben na chigøben kaig mara pasrai ashkeh? cha. Trube na isa kømø cierton waminchene, ñimbe nane ¿chindimba køremøgue? cha.

⁴⁷ Kaguende Tiuswei unøbe, Tius wamindiilan møran cha. Trune ñimbe Tiusweyelø kømøwa, treekkurri Tius wamindigwane mørmeelø køn— cha.

Abrahamguen kømøwatø Cristobe manawei købig

⁴⁸ Inchene judíosmerabe Jesúswan trenchibelø køn:

—Ñibe samaritano kan kwaimandzig tøgäig køn chippe, nambe sølwein chibrain køn— cha.

⁴⁹ Inchene Jesúsbe trenchibig køn:

—Nabe kwaimandzig tøgäig kømur cha. Treeg kømøtø, nabe marøppe, nai Møskawan tab indig kønrrai marar cha. Trune ñimbe nane maig købash inndan cha.

⁵⁰ Nabe nan maya nuguen tab inchaindø lamur cha. Inchendø kan køn cha, naimburab nan tab inchai lab, katø maig maramigwan asha marøb inchibig.

⁵¹ Nabe ñimun isa kòmø, cierton trendamønrrun cha: Na maig taigwan møra marøbiibe managuen kwamigwan ashchaamøn— cha.

⁵² Inchene judíosmerabe trencha løtabelø køn:

—Møimbe si, aser cha, ñibe kan kwaimandzig tøgäig kui. Abraham lata, Tius maig karuigwan eshkabelø lata chab kwaben, trune ñibe: “Na maig taigwan møra marøbiibe managuen kwanrraamøn” tan cha.

⁵³ ¿Kabe ñigan namui møskai Abraham lataguen kòmø, mas nuig kōtirru? cha. Trube kwaben, katø tru Tius maig karuigwan eshkabelø lata chab kwaig køn cha. ¿Ñibe mu kurmab isugu?— cha.

⁵⁴ Inchen Jesúsbe trencha løtabig køn:

—Na naasiitøwei maya nuguen tab inchib pasraibe, trembe chi mar-muinguenig køn cha. Nan maya nuguen tab kōnrrai marøbiibe nai Møskain køn cha, tru ñim ñimui Tius køn taig, truig.

⁵⁵ Inchendø ñimbe nune ashmeelø køn cha. Trune nabe si, ashibig kur cha. Na ‘nun ashmīg kur’ taimbe, trube, ñim latawei isaptiig kōbsubrainrrun cha. Pøs nabe nun ashib, katø nø maig taigwan møra marøb inchibig kur cha.

⁵⁶ Merrabsrø ñimui møskai Abrahambe nain kwaløm punrrabigwan asha, truba kasraaräig køn cha. Incha ashabe, truba kasrag kui indig køn— cha.

⁵⁷ Inchene judíosmerabe Jesúswan trenchibelø køn:

—Ni cincuenta añosikken kōmubendø, ¿ñigan: “Abrahamwan nebua ashibig kur?” chitirru?— cha.

⁵⁸ Inchene Jesúsbe løtappe trenchiptinchibig køn:

—Nabe ñimun isa kòmø, cierton trendamønrrun cha: Abrahamguen kōmøwatø, Na Kur— cha.

⁵⁹ Treekkurri nømbe Jesúswan sruutøga petønrrab srug kusruben, nøbe trubabig køn. Incha Tiuswei yaugurri webya, ibig køn.

9

Kan møg kerrigu ashmīgwan Jesús tamarøb

¹ Jesús kanbalø pureb pasrøwabe, kan møg srøsrøgurri kerrigu ashmīg kal-laweigwan ashibig køn.

² Inchen nui kusrenanøb pera uniiløbe trenchibelø køn:

—Kusrennøbig, ¿ø møg ashchab kaimabig kal-lanrraimbe, møig kaig marig kerah? cha. ¿Møskalø kaig marikkurrin køh? Kabe: ¿nøasiitøwei kaig marikkurrin kø, chinderah?— cha.

³ Inchene Jesúsbe trencha løtabig køn:

—Nø kaig marikkurrin kōmøwei, kabe møskalø kaig marikkurrin kōmøwein køn cha. Treeg kōmøtø, Tiusbe nui maramburab mariilø tru ashmīgweinug kenamisrtrain kuig køn cha.

⁴ Kwaløm kōbenbatø nan karua ørøbigwei maramigwan nambe marmø kōmø, maramigwein køn cha; kaguende yembe attrun cha, mugucha maramgaikke.

⁵ Na yu pirau uñippe, piraelai tør kur— cha.

⁶ Incha Jesúsbe øyah chib pasrøwabe, pirau illimbi tucha, tru illimbitøga kaizhig chillig marabe, trutøga ashmīgwein kabyu srøløbig køn.

⁷ Inchabe trenchibig køn:

—Siloé pisusrø maløwan kwallchab inrrø— cha. (“Siloé” chippe, “karua ørig” chib.)

Inchen tru ashmíibe ya, maløwan kwalla, katø arruppe, ashibig arrupt-inchibig køn.

8 Inchen nui ya pulueløba, katø tru 'chigøben kettra' cha, miab wabigwan ashibelø købeløbabe trenchibelø køn:

—¿Tru 'chigøben kettra' chib, miab wabiibe øigwein kømuitarru?— cha.

9 Inchen kaneløbe trenchibelø køn:

—Nøwein køn— cha.

Inchen katøganeløbe trenchibelø køn:

—Truig lataig asønabendø, nø kømøn— cha.

Inchen nøbe nøashib trenchiptinchibig køn:

—Nawein kur— cha.

10 Inchene nømbe trenchib payibelø køn:

—¿Chincha ashibig misrku?— cha.

11 Inchene nøbe trenchibig køn:

—Kan møg, munchibe Jesús taig, chillig mara, nan kabmerayu srølabbe, trenchitan cha: "Siloé pಿಸುಸ್ರømay ya, maløwan kwallchig" cha. Inchen nabe ya, maløwan kwallene, nai kabmerabe ashibig misrøptinndan— cha.

12 Inchen nune trencha payibelø køn:

—¿Tru møøbe chu yah?— cha.

Inchen nøbe:

—Chindindø— chibig køn.

Fariseosmera tru ashmíg købigwan truba payib srua køb

13 Incha tru Kerrigu ashmíg købigwan fariseosmerai merrab pera ambubelø køn.

14 Kaguende tru Jesús chillig mara, ashmígwan tamarin kwalømbe isrin kwaløm købig køn.

15 Incha fariseosmeragucha tru møwan katøyug payibelø køn:

—¿Mandø incha, ashibig misrku?— cha.

Inchene nøbe trenchibig køn:

—Kappala nane chillig srøldan cha. Inchen nabe maløwan kwaliitø, ashibig misrinatan— cha.

16 Inchen møiløggøben fariseosmerabe trenchibelø køn:

—Kan øyeeg marøb møøbe Tiuswein kømuinrrun cha. Kaguende isrin kwalømwan ke isrin kwaløm kømui lataig marøbig køn— cha.

Trune katøganeløbe trenchibelø køn:

—¿Kan kaig marøb møøbe øyeeg Tius nøba pasrain kui asha kømig mariilø mana martrab kø?— cha.

Incha yandø nømdø ke nøørotø misrøbelø køn.

17 Inchawei tru ashmíg købigwane katøle payibelø køn:

—Ñibe, ¿tru møweimbura manchinrragu cha, tru ñui kabmeran tamarig købene?—

Inchen nøbe løtappe trenchibig køn:

—Nabe Tius maig karuigwan kan eshkab møg køn tamønrrun— cha.

18 Inchen katøgucha judíosmerabe kørenrrab inchimeelø køn ke ashmíg købig kua, katøle ashibig misritamappe. Incha tru tamarinabigwei møskalanguen amrrunrrai wama,

19 nømune trenchib payibelø køn:

—¿Ilg tru ñimui nusrkain kuitarru cha, tru ñim Kerrigu ashmíg kal-lan? taig. ¿Trube, møimbe mandø incha ashibig misrah?— cha.

20 Inchene møskaløbe trenchibelø køn:

—Namui nusrkaiwein køn cha, tru Kerrigu ashmíg kal-labig.

21 Inchendø ashibig misrtrappe, mandø indigwane nambe trunune ashmer cha. Katø ya ashibig misrtraimbe kabmerane mu tamarin kui

namgucha ashmer cha. Ñimbe nunashib payay chibelø køn, yandø kølig køn cha, nøashib maig kuigwan eshkanrrun— cha.

22 Møskalø øyeeg chippe, judíosmeran kørig køptørre øyeeg chibelø køn, kaguende judíosmerabe møikkøben: “Jesúswan Cristo køn” chibigwane nømui tulundzuni yaugurri weguttab waminchaguen køben.

23 Incha treekkurri møskaløbe trendaig købig køn:

—Nunashib payay cha, yandø kølig køn— cha.

24 Incha judíosmerabe tru ashmíg køb mōwane katøle wama, trenchibelø køn:

—Tiuswane maya nuguen tabig waminchi cha. Nambe tru mōøbe kaig marøbig kui asha ker— cha.

25 Inchene nøbe trenchibig køn:

—¿Kaig marøbig køh? Kabe: ¿Kaig marmíg kø, chindi? Nabe trunune ashmur cha. Nabe kerrigu ashmíg købig kuig, mōimbe yandø na ashibig misrigwan nabe trunune isua pasrar— cha.

26 Inchen katøyug payibelø køn:

—¿Chi marta? cha. ¿Ashibig misrtraimbe mandinda?— cha.

27 Inchene nøbe løtappe, trenchibig køn:

—Yamba chab eshkaben, ¿mørmeelø kø chindah? cha. ¿Chindimbarre katøyug mōramig palaingøgue? cha. ¿Ñimgucha kabe nui mendig amøñibelø misrøg køtah?— cha.

28 Inchene nømbe nun trømbøig tsalø wamabe, trenchibelø køn:

—Ñibeguende tru mōwei mendig pasran cha. Trune namuimburappe, nambe Moisés maig chiben treegwan pønrrabelø ker cha.

29 Moiséswane Tius wamindig kui nambe ashibelø ker cha. Trune tru mōwane chuig kuinguen nambe ashmeelø ker— cha.

30 Inchen tru mōøbe trencha løtabig køn:

—Pøs, kan øyeegweinrre mandø kuinguen mōramgaig, ke kwaara asamdiig tabig køn cha. Ñimbe chugurri arringuen ashmuben, trune nane kabmeran ashibig martan cha.

31 Nambe trendø ashibelø ker cha, kaig marøbelane Tiusbe mōrmíg kuin kui, trune møikkøben nun køriibala tabig waminchibigwane nøbe mōrøbig kui.

32 Managuen kan kal-lainukkurri ashmíg kal-labigwan mu tamaran taig manasrøngurri mugucha wammøra kømøn cha.

33 Tru mōg Tiusweinukkurri arrubig kømuimbe, chigucha martrab kaimain kømbala— chibig køn.

34 Inchene nømbe trenchibelø køn:

—Ñi, yeeg kaig mariitø netsaig kal-lawaig købendø ¿namungan ñibe kusrenanrrab indirru?— cha.

Incha nømbe nune judíosmera tulundzuni yaugurri weguchibelø køn.

Tiusweiwan ashibelø ker chibendø, ashmeelø

35 Inchen Jesúsbe tru ashmíg købigwan judíosmera tulundzuni yaugurri wegutsin køn taig wammøra, nun katabe, trenchibig køn:

—¿Ñigan tru Møg Misra Arrubigwan køretirru?— cha.

36 Inchene tru mōøbe trencha løtabig køn:

—Au, Kasuku, ¿truike mu køh? cha, na nun kørenrrab— cha.

37 Inchene Jesúsbe trenchiptinchibig køn:

—Ñibe ashibguen indan cha. Ñiba waminchib pasrabig, nabe truig kur— cha.

³⁸ Inchene tru møøbe trenchibig køn:

—¡Señor, nabe ñun kører!— cha.

Incha nun kõiibala tabig waminchibig køn.

³⁹ Inchen Jesúsbe trenchibig køn:

—Nabe yu piraumay arruppe, maig kønrrabigwan asha martrab arrig køn cha, ashmeeløbe ashibelø misrtrai; Inchen ashibeløbe ashmeelø misrtrain—cha.

⁴⁰ Inchen mõiløgøsrøn fariseosmera Jesúsba pønrrabelø tru trendaigwan mørabe, trenchibelø køn:

—¿Kabe namgucha kabgar ashmeelø købra chindah?— cha.

⁴¹ Inchene Jesúsbe løtappe trenchiptinchibig køn:

—Ñim ashmeelø kuig kuimbe, ñim kaig marig chigar købsruinrrun cha. Inchendø mõimbe ñim 'ashibelø ker' chib pønrraikkurri ñimui kaig mariiløbe ñimuinug pasrabwei indan cha.

10

Ubishameran tulisha kanbalatø keerigwan kemesra waminchib

¹ 'Nabe ñimun isa kømø, cierton trendamønrrun cha: Ubishameran tulisha kanbalatø keerinug tru yaskabwan kebinøtø, nørøø pegwan kebibiibe, truipe niliig, katø maig købash marøb wesrabig, treeg køn cha.

² Trune tru yaskabmay kebibiibe si, tru ubisha ashibig køn cha.

³ Yaskab kurøb pasrabiibe nø kebinrrai yaskabwan kuren, ubishamerabe tru ubisha ashibigwei wamwan mørøbelø køn cha. Incha nøbe nui ubishameran nømui munchiwan, nømui munchiwan wama, tru keerinukkurri wambig wesrun cha.

⁴ Yandø kerrigu nuielan chab wesrawabe, nøbe ubishamerai merrab iben, ubishamerabe wendautø ambubelø køn cha, kaguende nui wamwandø tsabø mørøbelø kua.

⁵ Trune kan asiimiig pegwane managuen wendautø amrraamøn cha. Nuinukkurrimbe luløptinchun cha, kaguende asiimeelai wamwane mu kui mørmeelø kua.—

⁶ Jesúsbe iigwan 'øyeeg lataitøwein køn' cha, kemesra waminchene, øyeeg chippe, chiwan waminguenguen mørmeelø køn.

Jesús, tru Ubisha Ashibig Tabig

⁷ Incha Jesúsbe katø nømun trenchibig køn:

—Nabe ñimun isa kømø, cierton trendamønrrun cha: Ubishamera kebam-big yaskappe na kur cha.

⁸ Mayeeløba na arrumøwatø amrrubeløbe nileelø, maig købash marøb nila wesrabelø køben, ubishamerabe nømune mørmuig køn cha.

⁹ Nabe yaskab kur cha. Møikkøben nai yaskabwan kebarrubiibe kaigyugurri wesraig kønrrun cha. Truipe kebib, webarrub llirab uña, pumera mamelø wetørranrrun cha.

¹⁰ 'Kan niliibe nilønrrappah, kwetchappah, ka pinishinrrappatø arruben, trune nabe arruppe, srøig øsig kømigwan tøgagønrrai arrur cha, trurrigu tøgagømburab tøgagønrrai.

¹¹ Nabe ubishameran tru purø tab ashibig truig kur cha. Tru ubishameran tab ashibiibe nui øsig kuigwan ubishamerayasig purøbasran cha.

¹² Trune tru ka anweindø ashibiibe ubisha mabig lobo arri ashippe, ubishamerane chinchaindø luløptinchun cha, kaguende tru ubisha ashibig kømøwei, katø ubishameragucha nuielø kømøwein kuimba. Inchen lobobe

ubisha sətøyu kelula, merrarraben, yandø tru ubishamerabe nøørøtø misran cha.

¹³ Tru anweindø ashibiibe luløptindan cha, kaguende anwandø isubig kua, ubishamerane nøm kusrenrraindø.

¹⁴⁻¹⁵ Nabe ubishameran tru purø tab ashibig truig kur cha. Nai Møskaimbe nan tab ashen, nagucha nai Møskawan tab ashar cha. Øyeetøwei nabe nai ubishameran ashen, nømgurringucha nane ashibelø køn cha. Incha nabe nai øsig kuigwan ubishamerayasig purøbasrar cha.

¹⁶ Nabe katøgan ubishamera tøgagur cha, i tulyuig kømeeelø. Truulangucha nane pera arrumig palønrrautan cha. Truiløbe nai wamwan mørtrun cha. Trumaybe ubisha sətømera kandø misren, ubishameran ashibikkucha kandø kønrrun cha.

¹⁷ Inchawei nai Møskaimbe nan undaguig køn cha, kaguende katøle utønrraptø, nabe natøwei nai øsig kømigwan tranig kuimba.

¹⁸ Nane nai øsig kuigwan mugucha kerranrraamøtan cha. Treeg kømøtø, na naashib tranar cha. Nabe øsig kuigwan nu mandamgaig tranamig tøgagøb, katø mu mandamgaig katøle na utamig tøgagig kur cha. Øyeeg maramigwane nabe nai Møskawan utig køn— cha, trenchibig køn Jesúsbe.

¹⁹ Inchen øyeeg wamindigwan judíosmera mørabe, katøguen nøørøtø misrøbelø køn.

²⁰ Incha møiløgøben trenchibelø køn:

—Kwaimandzig tøgagig kua, chugúinguen mørmíg pasran cha. ¿Chinchabrre mørgue?— cha.

²¹ Trune kaneløbe trenchibelø køn:

—¿Mu kan kwaimandzig tøgagigkan øyeeg waminchaitarru? cha. ¿Kabe kan kwaimandzikkan ashmeelan tamartraitama chindah?— cha.

Judíosmera Jesúsuan kaashib

²² Inchen Jerusalénsrømbe fiesta marøb købig køn, tru merrabsrø Tiuswei yawan Tiusweindø kønrrain cha tranøb marigwan katøle trunin isunrrab. Inchen larrø pishim põlmera købig køn.

²³ Inchen Jesúsbe tru Tiuswei yau tru yaguetawan, Salomónwei yaskab tainug llirab uñene,

²⁴ truyu judíosmera tulsruabe, trencha payibelø køn:

—¿Nam mu kuinguen mørmíg melønrrai managatiirre øyeetø, øyeetø namun tøgagønrragu? cha. Isa kømø, ñi Cristo kuabe, trube, kanmaytø kelarrab eshkau pøs— cha.

²⁵ Inchene Jesúsbe trencha løtabig køn:

—Yamba ñimun eshkaben, ñimbe na Cristo kuitamab køremøn cha. Na nai Møskawei munchiyu na chigøben mariilø, truiløbe naimburab treegwein køn chib eshkan cha.

²⁶ Inchendø ñimbe nai ubisha utuelø kømøwa, nane køremøn cha.

²⁷ Nai ubishamerabe nai wamwan mørøbelø køben, nagucha nømun ashibig kur cha. Incha nømbe nai mendig amrrubelø køn cha.

²⁸ Nabe nømune managatig øsig kømigwan tranen, managuen pinønrrabelø kømøwei, katø nai taskugurrimbe mugucha kerranrraamøn cha.

²⁹ Nai Møskai nan truilan tranøbiibe mayeelan purab nuig køben, Møskawei taskugurrimbe mugucha kerranrrab kaimanrrun chibig køn.

³⁰ Naba, nai Møskaimbabe kandø ker— chibig køn.

³¹ Inchene judíosmerabe kwetchab srug muta petønrrab katøguen srug kusruben,

³² Jesúsbe trenchibig kòn:

—Nabe nai Mòskaweimburabelan ñimui merrab chigòben purò nòrreelò maròb kenamarig kòn cha. ¿Tru na treeg tabig mariilòyu, mòig kalò kuindòrre nane sruutòga petònrainchigüe?— cha.

³³ Inchene tru judíosmerabe trenchibelò kòn:

—Nam sruutòga petappe, ñi tabig marikkurrin kòmòtò, ñi Tiusweimburab purò tròmbòig wamab, tru ñibe ka mòtòt kòbendò: “Tius kur” chib pas-raikkurrindò nambe petònrab inder— cha.

³⁴ Inchene Jesúsbe nòmune trenchibig kòn:

—¿Tru maig maramigwan martraí ñimui pòrigube òyeeg chibig pòrig pasròmuitarru cha: “Ñimbe tiusmera kòn” cha, Tiusbe trendan taig.

³⁵ Tru Tiuswei wam pòrigwan wamindinabelandòguen: “Tiusmera kòn” cha wamig kòbene, (katò tru Tiuswei wamwan pòrigwane ka treeg kònmab ashatò taròmaròptindamig kòmòn cha.)

³⁶ trube, Mòskai nuyasiitò taròmara, yu piraumay karua òrig: “Na Tiuswei Nusrkain kur” chibene: “Ñibe purò tròmbòig wamab pasran” cha, ñimgan trenchib kòtirru? cha.

³⁷ Nai Mòskai mariilan na marmubene, trube, kòremòrrunrigay cha.

³⁸ Inchen nai Mòskai mariilan na marene, trube, nan nui Nusrkain kuita-mab kòremuindògucha, tru na mariilandòguen kòrey chibig kòn. Nai Mòskaimbe nainug pasròben, katò nabe nai Mòskaweinug pasrabig kuin kui nebua ashìb, chigúí mòròb inçhappe.—

³⁹ Inchen nòmbe katòguen Jesúswan merrarrawa, sruamrrab inchen, nòbe nòmui utugurri iptinchibig kòn.

⁴⁰ Incha Jesúsbe tru Jordán pi ambògatòsròmay katò ya, truyu kòrròmisròbig kòn, Juan tru sròtòzhiitò misaameran pi umbu ulsròb uniisrò.

⁴¹ Inchen misaamerabe Jesúsweimay truba nu ambabe, nòmòd trenchibelò kòn:

—Juanbe Tius nòba pasrain kui asha kònrri mariilò maròppe, marmuindògucha, ò mòweimburab nò chi wamindiilòbe kerriguba isa kòmubwei indin kòn— cha.

⁴² Incha misaamerabe Jesúswan truba nu kòrebelò kòn, truyube.

11

Lázaro kwaig

¹ Kan mòg Lázaro taig Betania pueblorriig tru Maríaimba, Martaimba nuchaabe kwanrrò tsubig kòn.

² Tru Maríabe, Señorwei sròb pala tru purò may irrabzbigwan lusha, nui sròbwán pusruutòga pinòmòròbig kòbig, truig kòben, tru Lázaro kwanrrò tsubiibe nui nuchag kòbig kòn.

³ Inchen tru nui pa nuchalòbe Jesúsweisròmay karua òròbelò kòn:

—Señor, ñi undaaraibe kwanrrò tsun— cha, eshkanrrai.

⁴ Inchen Jesúsbe trunun mòrabe, trenchibig kòn:

—Tru kwanrròbe kwam kwanrrò kòmòtò kòn cha. Treeg kòmòtò, Tiuswei maya nuguen tabigwan kenamaramigweyasig kòn cha, treeg mariitòga Tiuswei Nusrkawan maya nuguen tabig marig kònrri.—

⁵ Jesúsbe Martanba, numòsrawanba, nuchawanba truba undaguig kwagucha,

⁶ tru Lázarobe kwanrrò tsun taingucha, tru nò tsuinug katògucha Jesúsbe pa kwalòm srarrabig kòn.

⁷ Incha nõbe nui kusrenanøb pera uniilan trenchibig køn:

—Judeasrømay katø amun— cha.

⁸ Inchene nõmbe trenchiptinchibelø køn:

—Kusrennøbig, judíosmera trusrø yamba ñun srug muta, peta ñun kwetchab inchib kuig yandø yanatø køben, ¿trusrømay katø inrrapteh?— cha.

⁹ Inchene Jesúsbe trenchibig køn:

—¿Kan mawabe doce uras tøgaign kømuitarru? cha. Pøs, kan kwaløm uñibiibe srurrengwamøn cha, kaguende yu pirau tør pilimba.

¹⁰ Trune kan yem uñibiibe srurrengwanrrun cha, kaguende yembe tør chigaig løstiig kua.—

¹¹ Inchabe katø Jesúsbe trenchibig køn:

—Lázaro namui trendø asiibe kiain køn cha. Inchendø nabe nun kasrønanrrab inrrab— cha.

¹² Inchene nui kusrenanøb pera uniiløbe trenchibelø køn:

—Señor, trube, kiptø tsuibe, treebe tammisrtrab kuinrrun— cha.

¹³ Jesúsbe Lázaro kwain køn cha waminchib pasrøben, trune nui kusrenanøb pera uniiløbe: “Ka kib tsun” chitanmab isua pønrrabelø køn.

¹⁴ Inchabe Jesúsbe tørgandø trenchibig køn:

—Lázaro be kwabguen indan cha.

¹⁵ Nane ñimuimburappe tabguen køtan chibig køn, truyu na mu kaagúikkurri, kaguende trumaybe ñim nan kørenrrain cha. Trube, nun ashchab amun— chibig køn.

¹⁶ Inchene Tomás, tru Gemelo taibe, tru katøgan kusrenanøb pera uniilan trenchibig køn:

—Namgucha, trube, amun cha, nõba kegøtø kwanrrab.—

Jesúsbe kwabelanguen øsiiranøbig

¹⁷ Incha Jesús puabe, Lázarone sørig chabguen pib kwalømguen purayain kuin kui ashibig køn.

¹⁸ Betaniabe Jerusalén pulutø købig køn, truyugurri kan pøn kilómetro køsrønsrø.

¹⁹ Inchen judíosmerabe Martanba, Maríanba nuchag kwain køben menrra isui inchimønrrai, lincha purrønrrab truba yam amrruin købig køn.

²⁰ Inchen Martabe Jesús pub arrun taig mørøppe, katønrrab webiben, trune Maríabe yau ka kørrømisrøbig køn.

²¹ Inchabe Martabe Jesúswan trenchibig køn:

—Señor, ñi yu tsuig kuinguen nai nuchag kwamumba cha.

²² Inchendø møingucha Tiuswan ñi chi miabendø, tranrrab kui ashar— cha.

²³ Inchene Jesúsbe Martane trenchibig køn:

—Ñui nuchaabe katøle øsiiranrrun— cha.

²⁴ Inchen Martabe trenchibig køn:

—Nabe ashaweim pasrar cha, tru kwabelø srabe kwaløm katøle øsiiraben, Lázaro be øsiirabwei inchab kui.—

²⁵ Inchene Jesúsbe nune trenchibig køn:

—Katøle øsiiramiba, øsig kømibabe na kur cha. Nan kørebiibe kwawagucha, øsig kønrrun cha.

²⁶ Inchen mutøgucha øsig uñibig nan kørebiibe managucha kwanrraamøn chibig køn. ¿ligwan køretirru?— chibig køn.

²⁷ Inchene Martabe trenchibig køn:

—Nai Señor, øø, cha. Ñibe tru Cristowein kuin kui kørewa pasrar cha, tru Tiuswei Nusrkai yu piraumay attrabig købig.—

Jesús kishib

²⁸ Truigwan chab trenchabe, Martabe numøsrài Marián wamønrrab ya, nundø nilø trenchibig køn:

—Kusrennøbiibe yu pua, ñun waman— cha.

²⁹ Inchen Mariabe møra mallatø kurra, Jesúswan ashchab ibig køn.

³⁰ Inchen Jesúsbe katøgucha puebloyu pumø, tru Marta katinuutø srø pasrabig køn.

³¹ Inchen María truba mallatø kurra, webyai ashippe, judíosmera tru yau nun menrra isui inchimønrrai lincha purrabeløbe wendautø ambubelø køn, sørin tulsrø kishchab yaitamab isua.

³² Inchen Mariabe Jesús pasrainug puabe, nui merrab trenchib tømønnsrøbig køn:

—Señor, ñi yu tsuig kuimbe, nai nuchag kwamumba— chib.

³³ Inchen Jesúsbe Mariaba, katø tru lincha amrrubelø judíosmeragucha kisi ashabe, nuinetø truba truba isui inchibig, kan mandøguen kømui inchib køn.

³⁴ Incha nømun trencha payibig køn:

—¿Chu sørøgue?— cha.

Inchene nømbe:

—Señor ashchab amø— chiben,

³⁵ Jesúsbe kishibig køn.

³⁶ Inchen judíosmerabe trenchibelø køn:

—Au, truba undaguig kwaasøna— cha.

³⁷ Inchen møiløgøsrønbe nømdø trenchibelø køn:

—I møg tru kab ashmígwanma tamarøbiibe, ¿Lázarongucha kwamønrrai inchibsrømøshata?— cha.

Lázaro katø øsiirab

³⁸ Inchen Jesúsbe katøle nuinetø truba truba isuim pasrøwa, tru sørinug kemallibig køn. Truibe kan nu trab købig køn, kebambuube kan nu sruutøga kasraikke.

³⁹ Inchene Jesúsbe trenchibig køn:

—Srugwan kusruy— cha.

Inchen Marta tru kwabigwei nuchaabe trenchibig køn:

—Señor, yandø irrøraig kuinrrun cha. Kaguen kwaiibe chabguen pib kwalømguen køn— cha.

⁴⁰ Inchen Jesúsbe nun trenchibig køn:

—¿Yamba na ñun trenchib mørgøppèh cha, ñi nan kørèwabe, Tiuswei tørguegwalmabigwan ashchabguen?— cha.

⁴¹ Inchen yandø srugwan mendamaren, Jesúsbe srømbalaneb neeshabe trenchibig køn:

—Nai Møskai, mayanguen ungwa, ungwa cha, kaguen nan mørtan cha.

⁴² Ñibe chu uraskucha nane mørøbig køn cha. Inchendø nabe øyeeg chippe, misamera yu pøtøgatan pønrraikkurri trenchar cha, nane ñi karua ørig kui kørenrrai.—

⁴³ Incha iigwan chab trenchabe, truba mur wamabig køn:

—¡Lázaro, webamø!— cha.

⁴⁴ Inchene tru kwabiibe tasiimeran srøbmeran llensumeratøga kirrig, maløwane llensutøga pinappulig webarruptinchibig køn. Inchene Jesúsbe nømun trenchibig køn:

—Picha, ibasay— cha.

*Jesús*wan kemørtrab waminchib
(Mt 26.1-5; Mc 14.1-2; Lc 22.1-2)

⁴⁵Inchen judíosmera truba nu tru Marían ashchab amrrubeløbe, Jesús treeg marigwan asha, Jesúswan kørebelø køn.

⁴⁶Inchen truyu møilogørørn fariseosmeraisrømay ambabe Jesús chi marigwan nòmum waminchen,

⁴⁷sacerdotesmeran karubeløba, fariseosmeraba misra, tru maig maramigwan asha marøbelø Setenteelan wama, tulundzunabe, trenchibelø køn:

—¿Nambe mandø incha? cha. Kaguende tru møøbe Tius nøba pasrain kui asamig truba truba mariilø kenamaran cha.

⁴⁸Øyeetø martrai nam elachene, mayeeløba nun køreben, Romasrø karubeløbe amrrua, namui Tiuswei yawanba, namui maya misagwanba chab pinishinrrun— cha.

⁴⁹Inchen møikkørørn nòmui utuig, Caifás taig, tru pilawan maya sacerdotsmeran nø karub sacerdotebe trenchibig køn:

—Kan ñimbe ni chigúinguen mørmøwa køn cha.

⁵⁰Maya misagwan ørøba pinisailø købgunrriibe, nam maya misagweyasig kan møøtø kwamikken søl kui, treegwandøguen ashmeelø kø chindah— cha.

⁵¹Incha Caifásbe trenchippe, ka nø trenchig køptø trenchimuig køn. Kaguende tru pilawan nøbe tru maya sacerdotsmeran nø karub sacerdote kuig køppe, Tius trenchinrrai isungaruben trendaig køn, maya judíosmerayasig Jesúsbe kwanrrab køn cha.

⁵²Katø tru i maya misagweindø kømøtø, mayeelø Tiuswei uremera truørø amba warabelan kanbalatø tulundzunamig kønrrai, treegweyasiiba køn cha.

⁵³Tru kwalømgurri judíosmeran karubeløbe Jesúswane kwetchab cha waminchibelø køn.

⁵⁴Treekkurri yandø Jesúsbe judíosmerai utube mayeelø ashchai uñmíig køn. Incha Judea piraugurri webya, kanbalø mu misag warab waraimønug tru puluwansrø, Efraín taig puebløsrømay ibig køn. Incha trusrø nui kusrenanøb pera uniiløba kørrømisrøbig køn.

⁵⁵Inchen tru judíosmerai Pascua Fiesta pumig yandø lamø paløben, wambig nøørørøngurri misaamerabe Jerusalénsrømay truba nebambubelø køn, kaig marigwan chish misrtrab, tru Pascua Fiesta pumøwatø.

⁵⁶Jesúswan lab amøña, Tiuswei yau purrøwabe, nømdø kangurrin kangurri trenchib payiyabelø køn:

—¿Ñimbe maig isugue? chib ¿fiestayumaybe ni arrubguen inchimuisruandø?— chib.

⁵⁷Inchen sacerdotsmeran karubeløba, fariseosmerababe karuin købig køn, møikkøben Jesúswan chu wai ashibiibe, eshkanrrain cha, Jesúswan kemørtrab.

12

*Kan ishug purø may irrabzhigwan Jesús*wan itølushib
(Mt 26.6-13; Mc 14.3-9)

¹Pascua Fiesta maramig trunewei pa kwaløm paløbenba Jesúsbe Betanisrømay ibig køn, tru kwabelai utugurri nø øsiirangaruig møg, Lázaro tsu-isrømay.

² Truyube Jesúswan tab inchab kan mamig tamara nena, Martabe pirishiben, Jesúsba mishatsigu purrabelai utu Lázarogucha wabig køn.

³ Inchene Mariabe purø may irrabzhig nardotøzhig marig libraburab srua arrubig køn, truike truba nuweyig. Incha nõbe Jesúswei katsig tambalyu itølushabe, nui pusruutøga pinømørøbig køn. Inchen tru may irrabzhiitø ya ørø kebig køn.

⁴ Inchen Judas Iscariote, Jesús kusrenanøb pera uniilai utuig, tru Jesúswan wendø nun ashig kømui inchibelan tranrrabiibe trenchibig køn:

⁵ —¿Waachameran purugumig i may irrabzhigwan kan trescientos denarioswei yanamdiig kømø, chindah?— cha.

⁶ Inchendø Judasbe waachameran isubig kua kømøtø, niliig kua, trendaig køn. Katøgucha nõmui anwane nõ esegab srua uñibig kua, truyu pusrigwan wesrubrre inchibig køn.

⁷ Inchene Jesúsbe trenchibig køn:

—Ka marbash cha. Nan søram kwalømwei esegawa tøgagúin køn cha.

⁸ Waachamerane chu uragucha ñimui utube tøgagønrrun cha. Trune nane ñimui utube ñimbe chu uragucha tøgagønrraamøn— cha.

Lázaron kwetchab inchib

⁹ Truba nu søtø judíosmera Jesús Betaniasrø unan taig wammørøppe, trusrømay ambulbelø køn, nun ashchab isuatø kømøtø, tru kwaitai utugurri nõ øsiiranig Lázaron ashchappa.

¹⁰ Inchene sacerdotesperan karubeløbe Lázarongucha kwetchab wamincha kørrømisrøbelø køn,

¹¹ kaguende Lázarogurrindø judíosmerabe truba nu tarømisra, Jesúswan køreben.

Jesús Jerusalénsrø kebib

(Mt 21.1-11; Mc 11.1-11; Lc 19.28-40)

¹² Indiibe katø kwaløm Jesús Jerusalénmay attrab køn taig wammørøppe, misaamera tru fiestayumay purø nu søtø amrrua pasrabiibe,

¹³ palma ishiimeran muta, Jesúswan trenchib trashib katønrrab webambubelø køn:

“¡Hosanna! chib.

¡Señor Tiuswei munchiyu nõ ørig arrubiibe,

tru Israel misagwei Rey, mayanguen tab kuig køn!” chib.

¹⁴ Jesúsbe kan burro-unøzhig pasrain køben, trunun itøguana ibig køn, Tiuswei wamyu maig pørig køben treekke:

¹⁵ “Jerusalén, kørig kui inchimøta cha.

Asay cha, ñimui Reybe kan burra lluiig burro-unøyu itøguana attrun” taig.

¹⁶ Srøbatøbe Jesúswei kusrenanøb pera uniiløbe øyeeg mariilane chi chibig kuinguen ashmeelø køn. Inchen yandø Jesúswan purø nuig, purø tabig mara kusruben, truyu wetøgørrabelø køn, tru øyeeg pørig pønrrabiibe, nuimburab pørig pønrrøwa, nun tru øyeeg mariilan eshkabig kuin kui.

¹⁷ Tru Lázaro kwaben sørig truyu waben, tru misaamera Jesúsba pønrrabelø købeløbe nõm maig asigwan eshkab waminchibelø køn.

¹⁸ Inchagurri tru nu misag søtøgucha Tius nõba pasrain kui asamig i tru marigwan wammørabe, Jesúswan katønrrab webambubelø køn.

¹⁹ Inchene fariseosmerabe kangurri kangurri trenchibelø køn:

—Au, chiguen maramgaig køn cha. Ñimuen asay cha. Maya misaabe kerriguba nui wendautø chab amban— cha.

Møiløgøsrøn griegosmera Jesúswan lab

²⁰ Misaamera Jerusalén fiestasrø Tiuswan køriibala tabig waminchab nebambubelai utu truyu møiløgøsrøn griegosmeragucha tøgagøbig køn.

²¹ Incha truiløbe tru Felipe Galilea pirau betsaidasriigwan kemallabe, trenchibelø køn:

—Kasuku, namune Jesúswan ke asinrrabna kōtan— cha.

²² Inchen Felipebe ya, Andréswan eshkaben, nømbe pailøba Jesúswan eshkanrrab ambene,

²³ Jesúsbe trenchibig køn:

—Møg Misra Arrubigweyasig purø nuig, purø tabigwan kenamaramig yandø uta pun cha.

²⁴ Nabe ñimun isa kømø, cierton trendamønrrun cha: Kan tirigu trulma pirau peña kwamøwabe, chu uragucha kan truldø kønrrun cha. Trune pirau peña kwawabe si, truba nu larrøbichib misran cha.

²⁵ Møikkøben nui øsig kømigwan undaguibe yandø pinab pinamig nebunrrun cha. Trune møikkøben yu pirau nui øsig kømigwan tsalø inchibiibe, managatig øsig kømigweyasig esegawa tøgagønrrun cha.

²⁶ Inchen møikkøben naiwan marøb megabiibe, nai mendig arrumig køn cha. Incha na chu pasrøben, nai mendig megabikkucha truyutøwei pasrønrrun cha. Møikkøben naiwan marøb megabigwane nai Møskaimbe nune truba tab inchun chibig køn.

Jesús nui kwamigwan eshkab

²⁷ Møimbe nane manrrau isubiitø purø trømbøig kōtan chibig køn. ¿Nabe mandø chinrrab køh? cha: “¿Nai Møskai, nan øyeeg trømbøig møi pumønrrai purømisrtra” chinrrab kø, chindah? cha. Treeg kømøtø, nabe øyeeg punrrabigu pasrønrrabwei arrur cha.

²⁸ Nai Møskai, ñui munchiwan maya nuguen tabig kønrrai mar— cha, trenchibig køn.

Inchene srømbalærøngurri kan wam mørø, trenchibig køn:

—Nabe nai munchiwan yandø maya nuguen tabig kønrrai marar cha. Katøyukken maya nuguen tabig kønrrai maramønrrun— cha.

²⁹ Inchen misag truyu mørøb purrabeløbe trenchibelø køn:

—Kan palaig trashitan— cha.

Inchen kaneløbe trenchibelø køn:

—Nune kan ángel wamindinrrun— cha.

³⁰ Inchen Jesúsbe trenchibig køn:

—I wam mørø wamindiibe, nayasig kømøtø, ñimuyasig køn cha.

³¹ Møin køn chibig køn, yu pirau maig kønrrabigwan asha maramig. Katø møin køn, chibig køn, yu pirau nø karub pasrabig, Satanáswan wambig wegutsamig.

³² Incha nabe piraugurri kusruig kua, mayeelø naimay amrrug kui inchai maramønrrun— chibig køn.

³³ Øyamay Jesúsbe mandø kwamigwan eshkabig køn.

³⁴ Inchen misaabe nune trenchibelø køn:

—Tru maig maramigwan martrai pøriiløyube trenchibig køn taig nambe mørøbelø ker cha: “Cristobe managatig wanrrabig køn” cha. Inchen ¿ñibe mandø chigu cha: “Tru Møg Misra Arrubiibe kusruig kømig nebunrrun” chippe? ¿Tru Møg Misra Arrubiibe mu køh?— cha.

³⁵ Inchene Jesúsbe nømun trenchibig køn:

—Katøgucha kan maya yanatø tørbe ñimui utu pasrønrrun cha. Tør tøgagøppatø toryu amønay cha, løstiiig ñimun ke ka inchib latatø merraramønrraimbe, kaguende løstøyu uñibiibe chumay ib pasrarmabguen ashmøn cha.

³⁶ Ñim tru tørwan tøgagøppatø, tørwan kørey, chibig køn, tørwei ureemera kønrrappe.—

Øyeelan chab trenchabe, Jesúsbe tarømisra, nømuiukkurri trubabig køn.

Judíosmera Jesúswan tru Cristo kømuitamab køremub

³⁷ Yeeg nørreelø chigøben Tius nøba pasrain kui asha kømig mariilø nømui merrab Jesúsbe kenamaringucha, nune køremeelø køn.

³⁸ Kaguende Isaías, tru Tius maig karuigwan eshkaib mæg øyah chib pørig nebunrrain kuig køn:

“Señor Tius, ¿namui eshkaigwane mu køreitarru? cha.

¿Señor Tiusbe nui maramburab maramigwan mun kenamarah?” cha.

³⁹ Inchawei nømbe treeg kuitamappe køremeelø køn. Kaguende Isaíasbe trencha pørig købig køn:

⁴⁰ “Tiusbe nømun kabmeran ashmeelø kønrrai marøb, katø nømui manrrømeran murelø kønrrai marøb indig køn cha, kaptøga chigúi ashmøwei,

nømui manrrøtøga chigúinguen mørmøwei inchain cha,

nøm nuimay lllirawa amrruben, tamariilø kømønrrain” chib.

⁴¹ Isaías øyah chippe, Jesúswei tørguegwalmabigwan nøbe asha kua, nuimbura treeg wamindig købig køn.

⁴² Treeg kuingucha tru utu ashib karubeløguen nun truba nu kørebelø køn. Inchendø nømbe fariseosmeran kørig køptø nøm kørewa pønrrain kui ashchai mayeelai merrappe chi kenamarmeelø køn, tru judíosmera tulundzuni yaurri webusriilø kømønrrab.

⁴³ Kaguende nømbe misaamera maya nuguen tab indiilø kømigwan chullelø købig køn, Tius maya nuguen tab indig kømigwan kømøtø.

Jesús wamindiibe misagwan maig kønrrabigwan asha mara kørrømarøb

⁴⁴ Inchen Jesúsbe truba mur waminchib trenchibig køn:

—Møikkøben nan kørebiibe nan køremøtø, nai Møskai nan karua ørøbigwan køn cha.

⁴⁵ Inchen nan ashibiibe, nan karua ørøbigwan asan cha.

⁴⁶ Nabe arruppe, yu piraumay kan tør lataig arrig køn chibig køn, mutøgucha nan kørebiibe løstøyu kørrømisra pasrømønrrai.

⁴⁷ Inchen møikkøben nai wamwan mørendø, maig taigwan møra marmígwane, nun maig maramígwane na asha marmur cha. Kaguende nabe yu pirauelan maig maramigwan na asha mara kørrømartrab arrumøtø, misagwan kaigyurri wesranrrab arrig køn cha.

⁴⁸ Inchen møikkøben nan kaashib, na wamindigwan mørmub inchibiibe, maig kønrrabigwan asha kørrømartrabig chabguen nøbe tøgaguen pasran cha. Tru na nun wamindi wamdøwei tru srabe kwalømbe nun maig kønrrabigwan asha mara kørrømartrun cha.

⁴⁹ Kaguende nabe waminchippe, naimburaptø waminchimøtø, Møskai nan karua ørøbig chi tamigwan chiwan wamindamigwan nane nø karuig køn cha.

⁵⁰ Incha tru nø martrai karua pasriibe managatig øsig kømig, treeg kui, nabe ashar cha. Inchawei na waminchippe, nai Møskai nan maig wamindingaruigwan nabe treeg waminchar— cha, trenchibig køn Jesúsbe.

13

Jesús nui kusrenanøb pera uniilan srøbwan kwallib

¹ Yandø tru Pascua Fiesta pumig kan kwalømdø paløben, yandø yu piraugurri Møskaweisrømay yamig puin kui Jesúsbe ashibig køn. Yu pirau amønibelan nuielane chu uragucha nøbe undaarabig kua, mømibe øyeeg newan srabegatig undaarraig køn.

² Inchen mab purramnetø nugwaimandziibe Simónwei nusrkai, Judas Iscariotei manrraube, Jesúswan ashig kømui inchibelan tranrrrai isungarubig køn.

³ Inchen Jesúsbe chiwandøgucha nø asha martrai Møskaimbe nui tasku pønsrain kui ashib, katø nøbe Tiusweinukkurri webarrua arrua, katø Tiusweimaytøwei yamig kui ashib inchibig køn.

⁴ Incha Jesúsbe mab wainukkurri kurra pasramisrøb, pala kewa pasraigwan wesrawa, kan toallan nemøra, pørønawa,

⁵ trugurrimbe kan paila-unøyu pi usrøb, nui kusrenanøb pera uniilan srøbmeran kwalla, nui pørønawa pasraig toallatøga pinømørøbig køn.

⁶ Incha tru Simón Pedron srøbwan kwallchab inchene, nøbe trenchibig køn: —¿Señor, ñigan nan nai srøbmeran kwallchaidirru?— cha.

⁷ Inchene Jesúsbe trencha løtabig køn:

—Na mõi marøb waigwane ñibe chigúinguen ashmøn cha. Inchendø tsøndasrømbe chigúi ashchun— cha.

⁸ Inchen Pedrobe trenchibig køn:

—Nan kuimbe, managuen ñibe nai srøbmerane kwallchaamøn— cha.

Inchene Jesúsbe trenchibig køn:

—Na ñui srøbmeran kwallmubene, ñibe nainuube chi asamig tøgagømønrrabguen— cha.

⁹ Inchen Simón Pedrobe trenchibig køn:

—Señor, trube, treeg købene, srøbwandø kwallmøtø, tasigwan kinøsrøb, turwan chishtø pirtra— cha.

¹⁰ Inchene Jesúsbe trenchibig køn:

—Chab piraiibe srøbwandøwein kwalamig palan cha. Kaguende asr ørøba chishtø køn cha. Ñimbe yandø chishelø køn cha, søteeløbabe treetø kømuingucha.—

¹¹ Nun tru ashig kømui inchibelan tranrrrabiibe nøbe manawei mu kui asha kua: “Søteeløbabe chishelø kømøn” cha trendaig køn.

¹² Yandø Jesúsbe nømui srøbmeran chab kwalla, nui pala kewagúigwan katøle kewa, mishatsigu wamisrabe, trenchibig køn:

—¿Na ñimun øyeeg marigwan ñimbe chigúi mørgueh? cha.

¹³ Ñimbe nane: “Kusrennøbig” cha wamamba, katø: “Señor” cha wamamba indan cha, trumaybe sølwein tan cha. Kagen nabe treegwein kur cha.

¹⁴ Pøs na Señor, na Kusrennøbikken ñimui srøbmeran kwallene, ñimgucha kangurri kangurri srøbmeran kwalamig køn cha.

¹⁵ Nabe ñim asha kusrenrrai mara pasrar cha, na mari lataitøwei ñimgucha martrai.

16 Pøs nabe ñimun isa kømø, cierton trendamønrrun cha: Kan mendig megabiibe nun martrai karubigwan purab nuig kømøn cha. Katø kan karua øriinabiibe tru karua ørøbigwan purab nuig kømøn cha.

17 Ñim iilan chigúi asha, treegwan marabe, mayanguen tab kuilø køn cha.

18 'Nabe ñimun øyeeg waminchippe, søteelanbabe øyeeg chimur cha. Kaguende mõilan na lawa wesruilø kui nabe asha pasrar cha. Inchendø, Tiuswei wamwan pørigu øyeeg pasrabig nebunrrain køn cha: “Tru naba lincha mab wabiibe nan srøb kusrawa eshkan” taig.

19 Inchawei nabe mõingurri nabe ñimun eshkar cha, øyeeg puraimøwatø, øyeeg puraibene, tru Nabe Na kuin kui kørenrai.

20 Pøs nabe ñimun isa kømø, cierton trendamønrrun: Na karua ørigwan tab wamab utabiibe nan utan cha. Inchen nan utabiibe nan karua ørøbigwan utan— chibig køn Jesúsbe.

*Judas ashig kømui inchibelaingatø pasramisrtrab køn cha, Jesús eshkar
(Mt 26.20-25; Mc 14.17-21; Lc 22.21-23)*

21 Jesúsbe iilan chab trenchabe, nune chindamguengaig isuben, maig kuigwan kelarrab eshkar trenchibig køn:

—Nabe ñimun isa kømø, cierton trendamønrrun cha: Ñim mõikkøsrøn nan ashig kømui inchibelaingatø misra, nan tranrrab køn— cha.

22 Inchen nui kusrenanøb pera uniløbe mun waminchib waig mõrmøwa, nõmbe kangurriin kangurri malau asiyabelø køn.

23 Inchen mõikkøsrøn nui kusrenanøb pera unig mas undaaraibe Jesúsweim pulu mab wabene,

24 Simón Pedrobe mun waminchib wain kui pay chib, señas marøbig køn.

25 Inchen tru pulu wabiibe pechoyu kemenda, Jesúswan payibig køn:

—Señor, ¿møig kerah?— cha.

26 Inchene Jesúsbe trenchibig køn:

—Na pirrim pitin kebisha, mõigwan tranen, truig kønrrun— cha.

Incha pirrim pitin kebisha, Simón Iscariotei nusrkai Judaswan tranøbig køn.

27 Inchen Judas pirriwan utøben latatø, Satanásbe nui manrrau kebiben, Jesúsbe trenchiptinchibig køn:

—Tru ñi marøb pasraigwane petø mar— cha.

28 Inchen mishatsigu mab purrabeløbe chindimba trendermab mõikkucha chi tainguen mõrmeelø køn.

29 Katøgucha Judasbe anwan nõ esegawa sruaig købene, mõiløbe treeg isubelø køn: “Jesúsbe fiestayuwei chi palabigwan penøtah, kabe waacham-eran maitøguen tranø” ta, chindermab.

30 Inchen yandø Judasbe pirriwan utaptø webiben, yandø yem købig køn.

Kan srøig martrai karua pasrig

31 Inchen yandø Judas webiben, Jesúsbe trenchibig køn:

—Mõimbe tru Møg Misra Arrubiibe maya nuguen tabig indig kønrrai maren, Tiusbe nuinug maya nuguen tabig indig kønrrai maran cha.

32 Tiusma Cristoinug maya nuguen tabig marig kuig køppe, Tius nõguringucha Nusrkawane nuinuutøwei maya nuguen tabig martrun cha. Tru purø nuig tabig kønrrai maramigwane petø martrun chibig køn.

33 Nai ureezheelø, yandø ñimbabe maya yanatø unamønrrun cha. Ñimbe nane lanrrun cha. Inchendø na judíosmeran trendaig købigwandøwei mõimbe

ñimun trendamønrrun cha: “Na yamsrømay ibene, ñimbe amrrunrrab kaimanrrun” cha.

³⁴ Nabe ñimune kan srøig martrai karua pasrar cha: kangurrin kangurri undaarayamig. Na ñimunma mandø undaaraibe, treetøwei ñimngucha kangurrin kangurri undaaramig køn cha.

³⁵ Ñim kangurrin kangurri undaguelø købene, maya misaamera ñimune nai kusrenanøb pera uniilø kui ashchun— chibig køn.

Pedron Jesúsbe nan ashmíg kur chinrrautan chib

(Mt 26.31-35; Mc 14.27-31; Lc 22.31-34)

³⁶ Inchen Simón Pedrobe Jesúswan trencha payibig køn:

—Señor, ¿Chumay inrrainchigu?— cha.

Inchene Jesúsbe trenchibig køn:

—Na yamsrømay ibene, ñibe nai mendig attraamøn cha mømibe. Inchendø tsøndatøsrømbe si, attrabguen— cha.

³⁷ Inchene Pedrobe trencha løtabig køn:

—Señor, ¿mømibe nabe chindimba arrumønrrain køh? cha. Nabe ñuimburab nai øsig kuigwan tranrraptøweim pasrar— cha.

³⁸ Inchene Jesúsbe trenchiptinchibig køn:

—¿Ñigan isa kømø, naimburab ke kwanrraptø pasrar chitirru? cha. Pøs nabe isa kømø, cierton trendamønrrun cha: Kallu wamømwatø, ñibe pønmayguen nan ‘ashmíg kur’ chinrrautan cha.

14

Jesúsbe Møskaweinug pumig may køn

¹ Ñimbe ñimui manrrau ke kan mandø kuinguen kømui lataig isui inchimøtay cha. Tiuswan køreb, katø nangucha kørey chibig køn.

² Nai Møskawei yaube purramig truba truba pønrran cha. Treeg pønrrømuimbe, trube, kanmaytø eshkabsrubrainrrun cha. Nabe ñimuyasig purramig trusrø tamartrab yar chibig køn.

³ Incha nabe ya, tru purramigwan chab tamarabe, katøle nabe natøwei ñimune pera inrrab arrumønrrun cha, na chu waben, ñimngucha truyutøwei purrønrrai.

⁴ Ñimbe tru na chumay yamigwan ashib, katø maywan ashib inchibelø køn— chibig køn.

⁵ Inchene Tomásbe Jesúswan trenchibig køn:

—Señor, ñibe chumay inrrab kuinguen mørmer cha. ¿Mas maywane nambe mandø incha asig kwaasamørra?— cha.

⁶ Inchene Jesúsbe trenchibig køn:

—Nabe may køb; tru newan ciertonig køb; katø øsig kømig køb kur cha. Inchawei Møskaweimaybe nagurrin kømíibe mugucha attraamøn cha.

⁷ Ñim nan isa kømø nebua ashibelø kuig kuimbe, nai Møskawangucha nebua ashibelø købsruig kuinrrun cha. Møingurrimbe Møskawan nebua asan cha. Mømibe yandø ñimbe kaptøga asin køn— cha.

⁸ Inchene Felipebe trenchibig køn:

—Señor, Møskawan namun asingarurra cha. Trutøgabe tsabø kønrrautan— cha.

⁹ Inchene Jesúsbe trenchibig køn:

—Felipe, ¿katøgucha nane mu kui ashmøtirru? cha, na ñimui utu ya yana uñen. Nan ashibiibe, Møskawangucha asan cha. Treebe ¿ñibe mandø chigu cha: “Møskawan asingarurra” chippe?

¹⁰ ¿Nabe nai Møskaweinug pasrøben, nai Møskaimbe nainug pasrain kui ñigan køremøtirru? cha. Na ñimun wamindiiløbe ka naimburaptø wamindiilø kømøn cha. Treeg kømøtø, Møskai nainug pasrabig nui maramelan marøbig køn cha.

¹¹ Nabe nai Møskaweinug pasrøben, nai Møskaimbe nainug pasrabig kuin kui kørerray cha. Trengømuppe, na mariilandøguen isua asha, kørey chibig køn.

¹² Pøs nabe ñimun isa kømø, cierton trendamønrrun cha: Nan kørebiibe nøgucha na mariilan martrun cha. Incha treetøguen kømø, mas nørreeløguen martrun cha. Kaguende nabe Møskaweisrømay inrrainchar cha.

¹³ Chiwandøgucha nai munchiyu miabene, trunune nabe maramønrrun cha, Nusrkai Møskawan maya nuguen tabig kønrrai martrab.

¹⁴ Chiwan køben ñim nai munchiyu miabene, nabe maramønrrun, chibig køn Jesúsbe.

Jesús Espíritu Santon ørtrab misrøb

¹⁵ Ñim nan undaguelø kuabe, na maig maramigwan martrai pønrrailan møra martrun cha.

¹⁶ Inchen nabe Møskawan miamønrrun cha. Inchen nøbe katøgan chi isumønrrai Purømisrøb Lincha Pasrønrrabig ñimun tranrrun cha, managucha ñimba lincha pasrønrrai,

¹⁷ tru Espíritu newan ciertonigwan. Truigwane tru Tiuswan ashmø misaamerabe utønrrab kaiman cha, kaguende nune ashmøwei, mu kui mørmøwei inchibelø kua. Trune ñimbe nun ashibelø køn cha. Kaguende nøbe ñimba pasrab, katø ñimuinug pasrabig pasrønrrab køn cha.

¹⁸ Nabe ñimundø peta kørrøarmøtø, nabe katøle ñimuimay arrumønrrun cha.

¹⁹ Kan maya yanayutø nane yu pirau misaamerabe nane mas ashmuben, trune ñimbe nan ashchun cha. Na øsig waikkurri, ñimgucha øsiguelø kønrrun cha.

²⁰ Inchen ñimbe tru kwalømbe nai Møskaweinug nabe pasrabig kui ashib, katø ñimbe nainug pønrrøben, nagurrimbe ñimuinug pasrabig kui ashib inchen chibig køn.

²¹ Møikkøben na maig maramigwan martrai karuilan uta tøgagua, trunun møra marøbiibe, truike nan undaguig køn cha. Inchen nan undaguigwane nai Møskai undaarraig kønrrun cha. Inchen nagurringucha nun undaarawa, na maig kuigwan nuinug kenamisrtrai maramønrrun— cha.

²² Inchen Judas (tru Iscariote kømø, katøgan Judasbe) trenchibig køn:

—¿Señor, pirau misaamerane ñi maig kuigwan kenamarmubendø, namune ñi maig kuigwan mandøgurri kenamartrab inchigu?— cha

²³ Inchene Jesúsbe trenchibig køn:

—Møikkøben nan undaguibe na maig taigwan møra martrun cha. Inchen nai Møskaimbe nun undaarannun cha. Incha naba, nai Møskaimba nuinumay amrrua, nambe nuinug purramønrrun cha.

²⁴ Nan undaguig kømibe na maig taigwan mørmig køn cha. Na eshka wamindigwan ñim mørøb kuibe nain kømøtø, nai Møskai nan karua ørøbigwein køn cha.

²⁵ Øyeelan nabe ñimun kerriguh trenchar cha, na ñimba pasrappatø.

²⁶ Inchendø tru Espíritu Santo, tru chi isumønrrai Purømisrøb Lincha Pasrønrrabig, Møskai nai munchiyu øramig, truike ñimun chiwandøgucha kusrenanøb, na chi tailane kerriguh katøle isunanøb pasrønrrun cha.

²⁷ 'Nabe ippe, ambumay imay chi isumgaig purø tab købigwan ñimun kørømarøb, katø nai chi isumgaig purø tab købigwan ñimun tranøb inchar cha. Tru ambumay imay tab købigwan na traniibe, yu piraelø tranig lataig kømøtø køn cha. Ñimui manrrau ke mandø kuinguen kømui lataig isui inchimøwei, kørig kui inchimøwei inday cha.

²⁸ Na ñimun øyeg taigwan ñimbe mørig køn cha: "Nabe ya, katøle ñimuimay arrumønrørun" cha trendaigwan, ñim nan, undaguelø kuimbe: "Møskaweimay inrrainchar" taig mørøppe, ñimbe kasraarabsruinrrun cha. Kaguende nai Møskaimbe na lataitøguen kømø, mas nuig køn cha.

²⁹ Øyeg puraimøwatø, nabe ñimune kanmaytø iigwan eshkar cha, treeg puraibene, nan kørenrrai.

³⁰ 'Møimbe yandø ñimbabe menrra waminchimumønrørun cha. Kaguende Satanäs, yu pirau ke nø karub pasrabiibe yandø arrun cha. Truibe nababe chigucha chi asamig chigaig køn cha.

³¹ Inchendø pirau misaamerabe asam kusremig køn cha, nabe nai Møskawan undaguig køb, trurrigu nabe Møskai maig martrai karuigwan treeg marøbig kuin kui.

'Kurray, chibig køn, yugurri amrrab— cha.

15

Uvas tusrba, nui srarmeraba

¹ Jesúsbe katø trenchib waminchibig køn:

—Tru uvas tusr ciertoniibe na køben, nai Møskaimbe tru ellmarøb kwallibig køn cha.

² Nøbe nainug srarmera uvas niimeelane lutiicha, petappe, trune tru uvas nigabelane katøguchinguen may niirrai tamara parøb chishmarøbig køn cha.

³ Ñimbe yandø chishelø køn cha, tru na ñimun wamindig tru wamgurri.

⁴ Ñimbe naba kanbalatø pønrrabig pønrray cha. Inchen nabe ñimba kanbalatø pasrabig pasramønrørun cha. Kan srara nøasiitøbe chigucha mamig niimøn cha, tusryugue pasrømøwabe. Ñimgucha treetøwei chigucha martrab kaimanrrun cha, naba kanbalatø pønrrabig pønrrømøwabe.

⁵ 'Nabe uvas tusr køben, ñimbe truyu srarmera køn cha. Møikkøben naba kanbalatø pasrabig pasrøben, na nuinug pasrøbene, truibe truba truba mamig nigan cha. Inchen nainukkurri ñim nøørotø pønrraisuandøbe, ñimbe chigucha martrab kaimanrrun cha.

⁶ Nainug naba kanbalatø pasrabig pasrømfigwane srarwan latawei wambig weguchen, mul-lan cha. Incha treeg srarmerane tulisha, nagu parriiø køn cha.

⁷ Ñimbe naba kanbalatø pønrrabig pønrrøben, katø na wamindiilø ñimuinug pønrrabig pønrrøbene, ñimun chi miag købendø, miay chibig køn, ñimune tranig kønrørun cha.

⁸ Ñim øyeg maren, nai Møskaimbe maya nuguen tab indig utønrrun chibig køn, ñim truba truba mamig misrig nigab, øyamay isa kømø nai mendig amøñibelø kui kenamaren.

⁹ Nai Møskai nan undaguig køb lataitøwei, nagu cha ñimun undaarraig køn cha, nai undag købig tøgäguigu truyu pønrrabig pønrray cha.

¹⁰ Na ñimun maig maramigwan martrai pønrsailan møra marabe, nai undag købigu pønrrabig pønrrønrrun cha. Nai Møskai martrai nan karua pønrsailan na møra mara, nui undag købigu pasrabig pasrab lataitøweingue.

11 'Nabe øyeelan ñimun waminchippe, nai kasrag købiibe ñimuinug pasrøben, tru ñimui kasrag købiibe ka palabinøttiig kømø, newanig kønrrai inchar cha.

12 Inchen na maig maramigwan martrai pasriibe iig køn cha, ñim kangur-rin kangurri undaguelø kønrrai, na ñimun undaarab lataitøwei.

13 Kan muguen undag købig iigwan purab nuibe tøgagømuinrun cha, nui øsig kuigwan nui trendø tab lincha amøñibelayasig purøbasra kwamig.

14 Martrai tru na karua pønsrailan marabe, ñimbe nai trendø tab lincha amøñibelø køn cha.

15 Nabe ñimune yandø ka karuindiig melabelø cha wamømur cha. Kaguende kan karuindiig megabiibe nui karub pera wabiibe ni chi marøb uninguen mormøn cha. Treeg kømøtø, nabe ñimune masken nai trendø tab lincha amøñibelø cha wamar chibig køn, kaguende nabe nai Møskawan na chi møriilane ñimune kerriguh eshkab kenamarikkurri.

16 Nane ñim lawa wesrumøtø, nabe ñimunguen lawa wesrua, ñimune amrrai wesrua pønsraig køn cha, truba truba mamig niirrai. Trurriigu tru mamig misriibe pinømø, misrøbig misrtrain cha. Treekkurri ñim chiwandøgucha nai Møskawan nai munchiyu miabene, nøbe ñimune tranrun cha.

17 Nabe ñimun martrai karua pasrøppe, iigwan karua pasrar cha: kangur-rin kangurri undaarayanrrai.

Tiuswan ashmø misaamera Jesúswanba, nuielanba ashig kømui inchib

18 Ñimun yu pirauelø tsaliinchene, nanmerrig tsalø indig købigwan isunrigay cha.

19 Ñim yu pirauelø kuimbe, yu pirau misaamerabe ñimune undaarabsruin-rin cha, nømuielan undaarab lataitøwei. Inchendø nabe ñimune yu pirauelai utugurri lawa, wesruig køn cha. Treekkurri yu pirauelø ñimune ashig kømui indan cha, kaguende yandø ñimbe i pirauelø kømuben.

20 Na ñimun øyah taig købigwan isua kui chibig køn: "Kan mendig megabiibe nui karubigwan purab nuig kømøn" cha, trendaigwan. Inchawei nanguen kaig martrabgøba, kaig martrabgøba indiibe ñimungucha treetøwei kaig martrabgøba inchun cha. Na wamindiilan ñim møra marøbelø kuisruandøbe, ñim wamindiilangucha møra martrun cha.

21 Pøs chine ñimun øyeelø marøppe, nagurri øyeeg martrun cha, kaguende nan karua ørøbigwan ashmeelø kua.

22 'Na arrumøwei, katø na nømun waminchimøwei indig kuimbe, chi kaig mara pønrrømubsruinrun cha. Inchendø mømibe nømui kaig marøb pønrraigwane chigøben kemesratø, øyeekkurin køn chib puraambamig kaanrun cha.

23 Nan tsalø inchibiibe nai Møskawangucha tsalø indan cha.

24 Katøgan mu møkken øyeelø mariimeelan na nømui utu marmuig kuimbe, nømbe chigucha chi kaig marar pønrrømubsruinrun cha. Inchendø na mana asiimeelø mariilan mømibe asha pønrrøbendø, nan ashig kømui indamba, nai Møskawan ashig kømui indamba indan cha.

25 Pøs øyeeg pureppe, tru maig maramigwan martrai nømui pøriiløyu maig pørig pasrabig treeg nebunrrain kuig køn cha: "Chigucha kømubendø, nan ka tsalø indan" taig.

26 Inchendø tru chi isumønrrai Purømisrøb Lincha Pasrønrrabig, tru Møskaweinukkurri na ñimuimay øramig, tru Espiritu newan ciertonig, truiibe Møskaweinukkurri arrubiibe, naimburab maig kuigwan waminchun cha.

27 Inchen ñimgucha naimburab maig købigwan waminchun chibig køn, kaguende ñimbe srøsrøgurri naba amøñibelø kuikkurri.

16

1 'Nabe ñimun iilan waminchippe, ñimui isubigwan nainuutø pasra pønrraigwan ni chindinguen mõrmøwa pønrrømnrrai waminchar cha.

2 Ñimune judíosmera tulundzuni yamerayugurri webetab inchun cha. Inchen mõikkøben ñimun kweechabe, truibe 'Tuchweyasig tabig mararmab' inchib pasramig, treekatikken punrrab køn cha.

3 Ñimun øyeeg marøppe, Møskawan lata, nan lata ashmeelø kuarre, treeg martrun cha.

4 Na ñimun iilan eshkappe, yandø tru øyeelø pubene, ñimbe manawei na tru eshkaigwane isua pønrrønrrai eshkar chibig køn, Jesúsbe.

Espíritu Santoi chigøben maramelø

'Inchendø øyeelane nabe ñimun srøsrøgurri eshkamuig købig køn cha, kaguende nabe ñimba unig kua.

5 Incha mõimbe nan karua ørøbigweisrømay na inrraindingucha, ñimbe mõikkucha nane paymøtan cha: "¿Chumay inrrainchigu?" cha.

6 Na iilan ñimun trenchib eshkabene, ñimui manrrøbe purø isui indan cha.

7 Inchendø nabe ñimun isa kømø, cierton trendamønrrun cha: Na yamibe ñimuimbe mas tabguen køn cha. Kaguende na imubene, tru chi isumønrrai Purømisrøb Lincha Pasrønrrabiibe ñimba pasrønrrab arrumønrrun cha. Inchen na yabe, ñimuyasig nun øramønrrun cha.

8 Inchen nø arruppe, yu pirau misaamerane tru kaig mariibe chi købig kuin kui ashchai tøgandø kenamarøb, misagwan Tiusba sølgandø mandø pønrramigwan kenamarøb, natøwei kaig mara pasraibe chu pasrig kømigwan kenamarøb inchun chibig køn:

9 Tru kaig marigwan kenamarøppe, nan køremuikkurrin køben,

10 misagwan Tiusba sølgandø mandø pønrramigwan kenamarøppe, nabe Møskaweisrømay iben, ñimbe nan mas ashmønrrab kuikkurrin køben,

11 natøwei kaig mara pasraigwan tru chu pasrig kømigwan kenamariibe, tru Satanás, yu pirau nø karubigwan, nune chu pasramigwan pasrønrrai kørrømara pasrabguen indikkurrin køn cha.

12 'Nabe ñimune chigøben eshkamig katøgucha truba truba tøgagøbendø, ñimbe mõimbatøbe trengatig nebua chigúi mõrtrab kaimanrrun cha.

13 Inchen tru Espíritu newan ciertonig arruppe, truike kerriguwan ciertonigumay ñimune pera inrrun cha. Kaguende nøbe ka nuimburaptø waminchimøtø, nø maig mõrigwan kerrigu waminchib, katø chigøben maig pub attrabigwan ñimune eshkanrrun cha.

14 Nøbe nane maya nuguen tabig kønrrai martrun cha. Kaguende nøbe naiwan uta, ñimun maig kuigwan asha kønrrai kenamartrun cha.

15 Chitøgucha nai Møskai tøgagúibe nain køn cha. Inchawei nabe trendaig køn, Espíritube naimburabigwan uta, ñimun maig kuigwan asha kønrrai kenamartrun cha.

Isui melaibe katølebe kasrag købig misrtrun

16 'Maya yanayutø ñimbe nane yandø ashchaamøn cha. Inchendø katø yana kømøwatø ñimbe nane katø ashchun cha. Kaguende nabe nai Møskai waisrømay inrrainchar— cha.

17 Inchen mõiløgøsrøn nui kusrenanøb pera uniløbe nõmdø kangurrin kangurri payibelø køn:

—¿Øyeeg chippe, mandø terah? cha: "Maya yanayutø ñimbe nane yandø ashmønrrun chib; katø yana kømøwatø ñimbe nane katø ashchun chib. Kaguende nabe nai Møskai waisrømay inrrainchar" chib.

18 “Maya yanayutø” chippe, ¿mandø chibrreendah? cha. Nøbe ni chi waminchib pasrainguen mørmer— chibelø køn.

19 Inchene Jesúsbe trunun payig køb inchib kui mørabe, trenchibig køn:

—¿Ñimgan na ñimun øyeeg taigwanrre payib køtirru? cha, tru: “Maya yanayutø ñimbe nane ashchaamøn” taigwan: “Yana kømøwatø ñimbe nane katø ashchun” taigwan.

20 Pøs nabe ñimun isa kømø, cierton trendamønrrun cha: Ñimbe isuig wamamøra kishib kømnebe, yu piraueløbe kasraaranrrun cha. Ñimbe truba isuig kullaaraig melønrrun cha. Inchendø tru isuig kullaaraig melaibe katølebe kasrag købig misrtrun cha.

21 Kan ishuuma tammisrtrappe, truba pusrkwai inchib kullaaran cha, kaguende yandø tru tammisramig ura puben. Inchen yandø unø kal-labene, kasrag købiitø tru treeg pusrkwaigwane isubguen inchimøn cha, kaguende kan srø misaazhig yu pirau kal-laben.

22 Inchawei ñimgucha møimbe øyeetøwei isub kullaaran cha. Inchendø katøle na ñimun ashene, ñimui manrrøbe truba truba kasraaranrrun cha, kasrag købigwan kan muguen kerramgaikke.

23 Tru kwalømbe ñimbe nane yandø chigucha paymønrrun cha. Nabe ñimun isa kømø, cierton trendamønrrun cha: Ñim chiwandøgucha nai Møskawan miappe, nai munchiyu miabene, nøbe ñimune tranrrun cha.

24 Møingatig ñimbe nai Møskawan nai munchiyube chigucha miamuig køn cha. Miay, chibig køn, utønrrabguen cha, ñimui kasrag købigwan chigucha palømíig newanig kønrraimbe.

Jesucristobe yu pirau kaig puingucha, treegu puraya pasramisrøb

25 Nabe ñimun iilan waminchippe, iibe øyeelø latailø køn chib, kemesratø wamindig køn cha. Inchendø øyeelø latailø køn chib kemesra waminchimu-mig punrrun cha, nai Møskaweimburabigwan tøgandø kelarrab wamindamig.

26 Tru kwalømbe ñimbe nai munchiyu Tiuswan mianrrigay cha, pøs nabe ñimuyasig Møskawan miamønrrun chimur.

27 Pøs Møskai nøashib ñimune undaaran cha, kaguende ñimbe nan undaarab, katø nabe Møskaweinukkurri webarrua arrig kui køreb indikkurrimba.

28 Nabe nai Møskaweinukkurri webarrua, yu piraumay arrig køn cha. Incha møimbe katøle yu piraugurri, nai Møskaweimay yamønrrun— chibig køn.

29 Inchen nui kusrenanøb pera uniiløbe trenchibelø køn:

—Møimbeguende ñibe chigøben ‘iibe øyeeg latailø køn’ chib, ka kemesratø waminchimøtø, tøgandø kelarrab wamindan cha.

30 Ñibe chiwandøgucha newan ashibig kuin kui møimbeguende nabe aser cha. Mugøben ñune chi paya ashib pønrramikken palømøn cha. Øyeekkurriwei, ñibe Tiusweinukkurri arrubig kuin kui kørewa pønrrer— chibelø køn.

31 Inchene Jesúsbe trencha løtabig køn:

—¿Møimbese køregueh? cha.

32 Pøs øyeeg punrrab kuig yandø møiwei pubguen indan cha, ñimbe nøørotø, kan kan chab tarømisra, nane yandø nandø kørrømara ambamig. Inchendø nabe natø pasrømur cha, kaguende nai Møskaimbe naba pasrøben.

33 Øyeelan nabe ñimun waminchar cha, naba kanbalatø pønrrøwabe, chi isumø purø tab pønrramigwan tøgagønrrai. Yu piraube chigøben isumdiig puig melønrrabguen cha. Treeg kuinøgucha kullaaramø, mur isua pønrrønrrigay cha. Nama yu pirau chine kaigwan kanawa pasrar— cha, trenchibig køn Jesúsbe.

17

Jesús nui kusrenanøb pera uniilayasig Møskaimba waminchib

¹ Yandø iilan chab trenchabe, Jesúsbe srømbalaneb neesha trenchibig køn:

—Nai Møskai, yandø treeg maramig pun cha. Ñui Nusrkawan maya nuguen tabig indig kønrai mar cha, ñui Nusrkaingucha ñun maya nuguen tabig indig kønrai martrai.

² Tru maya misagweim pala nø karub pasrønrai ñi trana, tru mayeelan ñi nun tranilane managatig øsig kømigwan tranrraima tranig kuig køppe.

³ Inchen tru managatig øsig kømibe iig køn: ñi Tius ciertonig kandø wabigwan mu kui nebua ashib, katø Jesucriston tru ñi karua ørigwan mu kui nebua ashib indamig.

⁴ Nabe yu pirau ñune maya nuguen tabig kønrai marar cha, tru ñi nan martrai karua pasrigwan na chab patsøgøb.

⁵ Trube møimbe, nai Møskai, ñui merrab nan tørguegwalmabig kønrai martra cha, tru chigurrimbunø købigwan marig kaabenbatø manasrøwei ñui merrab tru tørguegwalmabigwan na tøga waig købiitøgatøwei.

⁶ Yu pirauelai utu ñi nan tranrrab lawa wesruilane ñun mu kui ashchai nabe asingarur cha. Truiløbe ñuielø køben, ñibe nan tranen, nømbe ñi maig wamindigwan møra, maran cha.

⁷ Møimbe nømbe ashibelø køn chibig køn, chigurrimbunø ñi nan traniiibe ñuinukkurri arrubig kuin kui.

⁸ Kaguende nabe ñi nan eshkaigwan nømun eshkaben, nømbe mørig køn cha. Incha isa kømøtø, nabe ñuinukkurri webarrua arrig kui nebua ashib, katø nane ñi karua ørig kuin kui nømbe køreb indig køn cha.

⁹ Nabe nømuyasig ñun miar chibig køn. Nabe yu pirauelaimburab mi-møtø, ñi nan traniiilayasig miar chibig køn, kaguende ñuielø kuimba.

¹⁰ Kerriguba naimbe ñuin køben, katø kerriguba ñuimbe nain køn cha. Incha nømgurri maya nuguen tab indig pasrar cha.

¹¹ Yandø nabe naimburappe yu pirau uñmuben, trune nømbe yu pirau amøñibig amøñinrun cha, nabe ñuimay arruben. Nai Møskai Newan Tabig, ñi nan tranilane ñui munchi maramburab marøbiitøga chi nebumønrai ashib tøgagørra cha, naba, ñiba kanbalatø pønrrab lataitøwei nømgucha mayamba kanbalatø pønrrønrrain cha.

¹² Na yu pirau nømba uñib urasma, ñi nan tranilane ñui munchiyu nømune chigøben nebumønrai, nabe ashib tøgagúig køn cha. Na tab ashib tøgagøben, møikkucha nømbe tarømisra, pinømuig køn cha. Tarømisra pinappe, tru manaweitreeg pinønrrab pasrabig truitøwei pinig køn cha, tru Tiuswei wamwan pørigu maig taig, truig neburnrai.

¹³ Incha møimbe yandø nabe ñi waisrømay katø attrainchar cha. Incha na yu pirau pasrappatø iilan waminchar cha, nai kasrag købigwan nømgucha nømuginug newan tøgagønrai.

¹⁴ Nabe ñui wamwan nømun eshkaib waminchen, piraueløbe nømune tsalø kuindan cha, kaguende na i pirauig kømub latawei, nømgucha yu pirauelø kømuimba.

¹⁵ Nabe ñun miappe, yu piraugurri nømun wesrunrai miamøtø, Satanás, tru larrø kaig, nømun chinchimønrai, tregwan miar cha.

¹⁶ Na i pirauig kømub latawei, nømgucha i pirauelø kømøn cha.

¹⁷ Tru newan ciertoniiitøga ñuyasiitø tarømariilø kønrai martra chibig køn. Ñui wambe tru newan ciertonig køn cha.

¹⁸ Ñi nan pirauelei karua ørøþ lataitøwei, nagucha nømun pirauelei karua ørar cha.

¹⁹ Incha nabe naasiitø nømyasig ñuindø kønrrab pasramisrar cha, nømgucha treetøwei tru newan ciertonigu ñuindø kønrrab pønrramisrtrain cha.

²⁰ Inchendø nabe nømyasiitø miamøtø, katø wendøsrø nømwamindigwan møra, nan kørenrrabelayasikkucha tøga miar chibig køn,

²¹ mayeeløba nømgucha kandø lataig kønrrai, ñi nai Møskai, naba, ñiba kandø køb lataitøweingue. Katø nømgucha namuinug kanbalatø pønrrønrrai miar cha, pirau misaabe nane ñi karua ørøþwei indig kui kørenrrai.

²² Ñi nan tørguegwalmabig tranigwane nabe nømun tranar cha, nømgucha mayamba kandø lataig kønrrai, naba, ñiba kandø køb lataitøweingue.

²³ Nabe nømuinug pasrøben, ñibe nainug pasrøben, trumaybe newan ke kanbalatø pønrramigwan nebua tøgagønrrain cha. Pirau misaabe ñi nan karua ørig købig kuin kui ashib, katø ñibe nan undaarab lataitøwei nømgungucha undaguig kuin kui ashib inchai.

²⁴ 'Nai Møskai, ñi nan traniiløbe, na chu waben nømgucha truyutøwei naba purrønrrai inchar cha, tru tørguegwalmabig ñi nan tranig købigwan nømwashchain cha, tru chiwanguen marmøwatøsrøwei ñi nan undaguig kua, tranigwan.

²⁵ Nai Møskai sølgandø tabig, yu piraueløbe ñune mu kui ashmuindøgucha, nabe, ñun ashibig kur cha. Inchen iiløgucha yandø nane ñi karua ørig kuin kui ashibelø køn cha.

²⁶ Nabe nømune ñui munchiwan mu kui nebua asingarur cha. Katøgucha nabe asingarubig asingarumønrrun cha, tru ñui undag købig ñi nayasig tøgagüigwan nømgucha lata tøgagønrrai. Inchen nabe nømuinug pasramønrrun – cha, trenchibig køn Jesúsbe.

18

Jesúsuan merrarawa srua ambub (Mt 26.47-56; Mc 14.43-50; Lc 22.47-53)

¹ Jesús iilan Tiusba chab waminchabe, nui kusrenanøþ pera uniiløba webya ibig køn, Cedrón pi ambøgatøsrø larramrrab. Tru pi ambøgatømysrømbe kan olivos tul pasrøben, Jesúsbe nømbe truyu kebibig køn.

² Inchen tru Judas Jesúsuan ashig kømui inchibelaingatø pasramisrøbiibe nøgucha tru tulwan ashibig købig køn, kaguende Jesúsbe katø katø nui kusrenanøþ pera uniiløba truyu tulundzunabig købig køben.

³ Incha Judasbe kan sötø Roma misaamerai suldaumeraba, policíameraba pubig køn, sacerdotesmeran karubeløba, fariseosmeraba misra karua øriilø, espadamera køben, lámparamera køben sruar, nag piløga mutar.

⁴ Inchene Jesúsbe kerrigu nun øyeeg purainrrabigwan ashaguen kua, nømerrig webippa, payibig køn:

–¿Mun lague?– cha.

⁵ Inchene nømbe trencha løtabelø køn:

–Nazaretsrø Jesúsuan ler– cha.

Inchene Jesúsbe trenchibig køn:

–Truibe na kur– cha.

Inchen Judas, tru Jesúsuan ashig kømui inchibelaingatø pasramisrøbiibe, truyu nømbe pasrabig køn.

⁶ Inchene Jesúsbe: “Truibe na kur” chiptinchene, nømbe wendømay amba, pirausrøn kørrabelø køn.

⁷ Inchene katøle nøbe payibig køn:

—¿Mun lagøe?— cha.

Inchene nømbe:

—Nazaretsrø Jesúswan ler— cha, trenchiben,

⁸ Jesúsbe katøle trenchibig køn:

—Yamba nabe, truibe na kur, chimmørgøppèh cha. Nan lab amrruabe, trube iilane ambasay— cha.

⁹ Øyegg puppe, Jesús nøtøwei øyah taig truig nebunrrain kuig køn: “Nai Møskai, ñi nan tranielane møigwangucha kanguen trubishimur” taig.

¹⁰ Inchene Simón Pedrobe espada srua kua, wesrawa, tru maya sacerdotsmeran nø karub sacerdotei karuindiig megabig, Malco taigwan, kusrmay kaluwan kelarrab lutiichtiptinchibig køn.

¹¹ Inchen Jesúsbe Pedron trenchibig køn:

—¿Espadane painayu way! cha. Tru purø trømbøig punrrabig nai Møskai mutchai tranin copan, ¿nagan muchimumuitarru?— cha.

Jesús Anáswei merrab

(Mt 26.57-58; Mc 14.53-54; Lc 22.54)

¹² Inchen tru Roma suldau sötømeraba, nømun nø karub pera pasrabi-iba, katø Tiuswei yau pønrrabelø judío policíameraba Jesúswan merrarra, lusrøbelø køn.

¹³ Incha tru Anásweisømaymerrig srua ambubelø køn. Anásbe Caifáswei sueeru køben. Katø tru Caifásbe tru pilawan maya sacerdotsmeran nø karub sacerdote købig køn.

¹⁴ I Caifás nø købig køn, øyegg marene tab kønrrun cha, judíosmeran waminchibig: “Maya misagweyasig kan møøtø kwamikken søl kønrrun” chib.

Pedrobe Jesúswan ‘ashmíg kur’ chib

(Mt 26.69-70; Mc 14.66-68; Lc 22.55-57)

¹⁵ Simón Pedroba, katøgan Jesús kusrenanøb pera uniiba Jesúswei wendautø ambubelø køn. Tru kane maya sacerdotsmeran nø karub sacerdotei asig kuig køppe, Jesúsba truigwei ya wambiisrøngatig kebiben,

¹⁶ trune Pedrobe wambig yaskabutø kørrømisrøbig køn. Inchen Jesús kusrenanøb pera unig kane tru maya sacerdotsmeran nø karub sacerdotei nøbe trendø asig kua, katøle webarrua puramrrai, tru yaskab kurøb pasrab srusran wamincha, Pedron umbu pera kebibig køn.

¹⁷ Inchene tru srusrøbe Pedron trencha payibig køn:

—¿Ñigucha tru ø møwei mendig uñibig kømmørgøppèh?— cha.

Inchene Pedrobe trenchibig køn:

—Kah, nabe tru kømur— cha.

¹⁸ Inchen karuindiig melabeløba, tru Tiuswei yau pønrrabelø policíamerababe nag urra kua, pishi yem køben, pønrramisratø pachirrab køben, Pedrogucha truyu nømbe nag pulu pachirrab pasrabig køn.

Maya sacerdotsmeran nø karub sacerdote Jesúswan maig kuitashchab payib

(Mt 26.59-66; Mc 14.55-64; Lc 22.66-71)

¹⁹ Inchen maya sacerdotsmeran nø karub sacerdotebe Jesúswan payibig køn tru nui mendig amøñibelaimburab maitø kuigwanba, kusrenanøppe, chitø kusrenaniilanba, truilan.

²⁰ Inchene Jesúsbe trencha lõtabig kòn:

—Nabe maya misaamerai malau wamindig kòn cha. Judíosmeran tulundzuni yamerayuba, Tiuswei yau judíosmera tulundzuninuuba chu uraskucha kusrenanøbig kur cha. Inchawei chigucha na søratø wamindiibe kaagøn cha.

²¹ ¿Nane chindimba paygu? cha. Tru na maig tailan wamindi mørøbelan pay, chibig kòn. Truiløbe na maig tailan ashibelø kòn— cha.

²² Jesús iigwan trenchibene, kan policia truyu pulu pasrabiibe Jesúswane maløbøtø pashabe, trenchibig kòn:

—¿Maya sacerdotesmeran nø karub sacerdotengan øyeeg lõtamig kuitarru?— cha.

²³ Inchene Jesúsbe trenchibig kòn:

—Trube, na chigøben kaig taig købene, chiyu kalø tain kui eshkau pøs cha. Inchen tru na trendaig chi kalø kømubene, trube, nane ¿chindimba pashku?— cha.

²⁴ Inchen Anásbe Jesúswan lusrimbatiig tru maya sacerdotesmeran nø karub sacerdote Caifásweisrømay ørøbig kòn.

*Pedro katøle Jesúswan 'ashmíg kur' chib
(Mt 26.71-75; Mc 14.69-72; Lc 22.58-62)*

²⁵ Trune Pedrobe tru nag pulu pasramisra, pachiirab pasrøben, trenchibelø kòn:

—¿Ñigucha tru møwei mendig uñibig kømmørgøppeh?— cha.

Inchen Pedrobe trenchibig kòn:

—Kah, nabe tru kømur— cha.

²⁶ Inchene tru maya sacerdotesmeran nø karub sacerdoti kan karuindiig megabig, tru Pedro kaluwan lutiitsinab møwei nømmissaabe, Pedrone trenchiptinchibig kòn:

—¿Nabe ñune tru olivos ellguain tulyu Jesúsba pasrøben ashib mørgøppeh?— cha.

²⁷ Inchene Pedrobe katøyug 'ashmíg kur' cha isøben, mømbe tru urastø kan kallu wamaptinchibig kòn.

*Jesús Pilatoi merrab
(Mt 27.1-2, 11-14; Mc 15.1-5; Lc 23.1-5)*

²⁸ Inchen yandø tør-rray lutauguen køben Caifáswei yaugurrimbe tru Pilato waig palaciosrømay Jesúswane srua ambubelø kòn. Inchendø judíosmerabe tru yaube kebammeelø kòn, trømbøig marig chillig indi lataig kørørmismørrrab, nøm kebammuikkurrimbe tru pascua mamigwan chi kømø ka mamig kønrrai.

²⁹ Inchene Pilatobe nømun payrrab webya trenchibig kòn:

—¿I møwane ñimbe chitø kalø maran chibre inchigueh?— cha.

³⁰ Inchene nømbe trencha lõtabelø kòn:

—Larrø kaig kømuiembe, ñui merrab nam mana srua amrrubsru— cha.

³¹ Inchene Pilatobe trenchibig kòn:

—Ñim srua ambay cha. Tru maig maramigwan martrai ñimui pørig maig chibig køben, treeg asha maray— cha.

Inchene nømbe trenchibelø kòn:

—Nam judíosmerane ka namuimburaptøbe mungucha kweechib pønrrømønrrai merig kòn— cha.

³² Inchen øyeeg puppe, Jesús tru nui kwamig chiyu punrrab pasrabigwan, tru nø maig wamindig treeg nebunrrain kuig kòn.

33 Inchen Pilatobe katøyug tru palacioyu kebya, Jesús swan wamabe, payibig kòn:

—¿Ñigan tru judíosmerai rey kòtirru?— cha.

34 Inchene Jesúsbe trenchibig kòn:

—¿Ilgwangan ka ñiasiitø trenchitirru? Kabe ¿katøganelø naimburab ñun mu trendaimba trenchitirru?— cha.

35 Inchene Pilatobe trenchibig kòn:

—¿Kabe nagan judío kuitarru? cha. Ñui piraeløba, katø tru sacerdotemeran karubeløba naimay ñune sruamruug kòn cha. ¿Chi kalø mara pasrøgu?— chibig kòn.

36 Inchene Jesúsbe trencha løtabig kòn:

—Na ashib karub tøgagúig naimbe yu pirauig kømøn cha. Tru na ashib karub tøgagúig yu pirauig kuimbe, trube, nai mendig melabeløbe nan judíosmerai tasku tranig kømønrrai kwayabsruinrrun cha. Pøs na karumburab ashib karub tøgagúig naimbe yu pirauig kømøn— chibig kòn.

37 Inchene Pilatobe trenchibig kòn:

—Trugan, ¿ñibe rey kòtirru?— cha.

Inchene Jesúsbe trenchibig kòn:

—Ñibe nane rey kòn cha, trendan cha. Nabe truweiwei kal-lab, yu pirau may arruppe, truweiwei arrig kòn cha, tru newan ciertonigwan eshkanrrab. Mutøgucha tru ciertonigweingatø pasrabiibe, nai wamwan møran— cha, trenchibig kòn Jesúsbe.

38 Inchene Pilatobe trenchibig kòn:

—¿Tru newan ciertoniibe, chi kòh?— cha.

*Jesús swan kwanrrai pasrøb
(Mt 27.15-31; Mc 15.6-20; Lc 23.13-25)*

Iigwan chab trenchabe, Pilatobe katøle webya, judíosmeran trenchibig kòn:

—Nabe tru møweinuube chigucha chi kalø mariibe wetørramur cha.

39 Inchendø ñimbe trendø treeg maramig tøgar kòn cha, Pascua Fiesta kwalømbe kan kailan keeri yau pasrabigwan na elacha wertrai. ¿Trube, tru judíosmerai reywan na elatsamig palain køgue?— cha, trenchibig kòn.

40 Inchene nømbe mayeeløba katø trenchib trashibelø kòn:

—¡Øigwan kømøtø, Barrabás swan elachi!— chib.

Tru Barrabásbe niliig købig kòn.

19

1 Inchene Pilatobe Jesús swan merrarrawa, itsingarubig kòn.

2 Inchen suldaumerabe kaldiigwan corona mara, Jesúswei turyu petsøsrá, katø asru kan keeg kørrabig yalø piguiig itøguenanøbelø kòn.

3 Inchabe nuim pulu kemallabe, trenchibelø kòn:

—¡Judíosmerai rey, viva!— chib.

Incha maløbøtø pashagutsamba inchibelø kòn.

4 Inchene Pilatobe katøyug webya, misaamerane trenchibig kòn:

—¡Au! Nun wambiisrø pera arrumønrrun cha, nuinuube chigucha chi kalø marig nabe wetørramuin kui ñim ashchai.—

5 Inchen Jesúsbe, tru corona kaldiigwan marigwan petsaig, tru yalø piguiigwan keweig webibig kòn. Inchen Pilatobe trenchibig kòn:

—¡Asay! cha, i møøbe yu pasran— cha.

6 Inchen tru sacerdotemeran karubeløba, tru policíameraba Jesús swan ashippe, trashibelø kòn:

—¡Kurusyu mesrø! ¡Kurusyu mesrø!— chib.

Inchen Pilatobe trenchibig køn:

—Treeg købene, trube, ñimdøwei srua amba, kurusyu mesray cha. Pøs, nabe naimburappe, nuinuube chigucha chi kalø mariibe wetørramur— cha.

⁷ Inchen judíosmerabe nune trenchibelø køn:

—Nambe maig maramigwan martrai pørig tøgar ker cha. Inchawei truyu maig chibig køben, nøbe kwamitøwein køn cha, kaguende nøbe nøasiitø: “Tiuswei Nusrkain kur” chib pasraikkurri.—

⁸ Inchen Pilatobe tru trendaigwan mørabe, mas kørig kui inchibig køn.

⁹ Incha katøle palacioyu kebya, Jesúswan payibig køn:

—¿Ñibe chuig kugu?— cha.

Inchen Jesúsbe niløtø pasrøben,

¹⁰ Pilatobe trenchibig køn:

—¿Nanguen løtømønrrapteh? cha. Nabe ñun elatsamdiig købene, elachib, kurusyu mesramdiig købene, mesrøb indamig mu mandamgaig maramigwane na asha marøbig kui ¿ashmøtirru?— cha.

¹¹ Inchene Jesúsbe trencha løtabig køn:

—Nan øyee punrrai ñi marøb wamigwane chigaig købsruinrrun cha, ñun srømbalasarøngurri treeg marøb wanrrai tranmuig kuimbe. Inchawei tru nan ñui tasku tranøbiibe purab kaikken mara pasran— cha.

¹² Trugurrimbe Pilatobe Jesúswan mandø incha elatsamdiig køtashchab labig køn. Trune judíosmerabe trenchib trashibelø køn:

—Ñi nun elachabe, Roma maya misagwan karub wabig Césarweingatiig kømøn køn chib. Kaguende møikkøben: “Rey kur” chib pasrabiibe Roma maya misagwan karub wabig Césarweingatiig kømøn— chib.

¹³ Inchene Pilatobe trunun mørøppe, Jesúswan wambig wesrungarua, maig kønrrabigwan asha martrab wamisrinug wamisrøbig køn, tru “Sruutøga Kayig” tainug, hebreomaybe Gabata cha waminug.

¹⁴ Pascua Fiesta maramig kan kwalømdø paløben, kwaløm tøbøtag køsrøn købig køn. Inchen Pilatobe judíosmeran trenchibig køn:

—¡Au, ñimui rey yu pasran!— cha.

¹⁵ Inchene nømbe trashibelø køn:

—¡Kwabash! ¡Kwabash! chib. ¡Kurusyu mesrø!— chib.

Inchen Pilatobe trenchibig køn:

—¿Nagan ñimui reywan kurusyu mesrønrrab waitarru?— cha.

Inchen sacerdotesmeran karubeløbe trencha løtabelø køn:

—Nambe katøgan rey tøgar kønrrab kømøtø, Roma maya misagwan karub wabig Césarwandø rey wannar ker— cha.

¹⁶ Inchen yandø Pilatobe Jesúswan kurusyu mesrønrrai nømun tranøbig køn.

Jesúswan kurusyu mesraig

(Mt 27.32-44; Mc 15.21-32; Lc 23.26-43)

Inchen nømbe Jesúswan kemøra, srua amben,

¹⁷ Jesúsbe nui kuruswan muta, tru Calavera cha wamiisrømay webibig køn, hebreomaybe Gólgota taig.

¹⁸ Incha truyu kurusyu mesrøbelø køn, katø pailan pinrrømenda kan kan, Jesúswane tru tøbøtakke.

¹⁹ Incha Pilatobe kurusyu kan pørig mesrønrrai karubig køn:

JESUS NAZARETSRIIG, JUDIOSMERAI TRU REY KØN

chibig.

20 Inchen tru pøra mesraigwane judíosmera mugøben truba yamelø lebelø køn, kaguende tru Jesúswan kurusyu mesraibe ciuda pulu køben. Inchagucha tru pørig megabiibe hebreamay køben, latínmay køben, griegomay køben pørig købig køn.

21 Incha treekkurri judío sacerdotsmeran karubeløbe Pilatone trenchibelø køn:

—“Judíosmerai rey køn” cha pøra mesrømøta cha. Treeg kømøtø: “‘Nabe judíosmerai rey kur’ cha, nø trendaig køn” chibig, treeg pør— cha.

22 Inchen Pilatobe trencha løtabig køn:

—Na pøriibe, pørig megabasay— cha.

23 Incha suldaumerabe Jesúswan kurusyu chab mesrabe, nui kewagúigwan kusrawa, pippalø pirishibelø køn, kanui kan kangue. Incha trugurrimbe tru pala kewagúigwangucha kusrabelø køn. Inchen truiibe kemesra tsusaimíig kørrappa kandiig pasrig købig køn.

24 Suldaumerabe kangurrin kangurri trenchibelø køn:

—Kølsrø mugun cha. Trembe tru kewagúigwan muin kørrømisrtashchab suerte kucha ashkun— cha.

Øyeeg maren, Tiuswei wamwan pørigu øyah chibig truig nebuig køn:

“Nai kewagúilan nømdø pirisha,
tru nai pala itøgueigwane muin kørrømisrtashchab
suerte kucha asan” taig.
Suldaumerabe øyeeg marig købig køn.

25 Jesúswei kurus pulube nui usrin køben, nui usrai numøsrain køben, Cleofaswei srai María køben, katø María Magdalena køben pørrrabelø køn.

26 Inchen Jesúsbe nui usran ashíb, katø nui undaaraig kusrenanøb pera uniibe nui usraim pulu pasrai ashíb inchabe, usrane trenchibig køn:

—Au, ñui nusrkai lataigwan uyu ñi pera pasran— cha.

27 Inchabe katø tru nui kusrenanøb pera unigwan trenchibig køn:

—Ñui usri lataigwane uyu ñibe pera pasran— cha.

Indig tru uraskurrimbunø tru kusrenanøb pera unig købiibe nui yau pera kørrømisrøbig køn.

Jesús kwaig

(Mt 27.45-56; Mc 15.33-41; Lc 23.44-49)

28 Yandø øyeeg chab puraiiben, Jesúsbe Kerrigu treeg chab nebui ashabe, Tiuswei wamwan pørigu øyah taig nebunrrai trenchibig køn:

—Pimulgwatan— cha.

29 Inchen truyu kan køtsøyu køchiibi netsiig tøgaig pasrøben, kan ñab espunjan tru piyu kebisha, kan hisopo srarchigu pucha, mutchai Jesúswei triisrø yuuløbelø køn.

30 Inchen Jesúsbe tru vinon yuulen, chab webishabe, trenchibig køn:

—Yandø chab marig kørrømisran— cha.

Incha turwan utsøbasra, yandø nui espíritun tranøbig køn.

Kan suldau lanzatøga Jesúswan tømbylu larrab kwanøb

31 Inchen yandø Pascua Fiesta punrrabigweyasig tru tamarøb kuin kwalø m køben, judíosmerabe tru asrmeran isrin kwalømbe kurusyu melsraig melømønrrai inchibelø køn, kaguende tru kwalømbe, tru isrin kwaløm, purø nu kwaløm kønrrab køben. Treekkurri Pilatone, melabelai srøbmeran landiisingarunrrai rugabelø køn, asrmeran kurusyugurri pinøsrumig kønrrai.

³² Inchen suldaumerabe amba, kanunmerrig srøbmeran landiicha, trugurrimbe Jesúsba kurusyu mesraig megabigwan kanungucha landiichibelø køn.

³³ Incha Jesúswan kemalla ashene, yandø kwainguen megaptinchen, treekkurri nune srøbmeran landiichimeelø køn.

³⁴ Inchenøgucha kan suldaube Jesúswane tømbylu lanzatøga larrab kwannen latatø, animba, piba weguchibig køn.

³⁵ Inchen nui kaptøga ashibiibe maig kuigwan wamindan. Inchen maig kuigwan tru nø wamindiibe cierton wamindig køn. Nøbe ka isatø waminchib pasrømurmab isua pasran, ñimgucha Jesúswan køenrrai.

³⁶ Kaguende øyeelø pureppe, Tiuswei wamwan pørigu øyah taig nebunrrain trenchibig køn: “Nui tsutsigwane kanguen landig kømønrrun” taig.

³⁷ Katøganbaløsrø Tiuswei wamwan pørigugucha katø trenchibig køn: “Mis-aamerabe tru lanzatøga kwaninabigwan ashchun” cha.

Jesúswan sørab

(Mt 27.57-61; Mc 15.42-47; Lc 23.50-56)

³⁸ Øyeeg chab puraiben, José Arimatea pueblsriibe Jesúswei asrwan srua inrrab cha, Pilaton miabig køn, tru Josébe judíosmeran kørig køb Jesúswan nui isuigutø uñibig kuagucha. Inchen Pilatobe ka srua ibashen, Josébe asrwan srua ibig køn.

³⁹ Inchen tru Nicodemo, tru merrabsrø Jesúswan yem waminchab ibikkucha, kan treinta kilosburab may irrabzhig mirraba, åloesba lindisaig srua arrubig køn.

⁴⁰ Incha Joséba, Nicodemoba Jesúswei asrwan srua amba, llensutøga kirrøbelø køn. Tru may irrabzheelantøga, judíosmera sørønrrab maig marøbelø køben, treeg tamara sørabelø køn.

⁴¹ Inchen Jesúswan kurusyu mesraim pulube kan tul ellmarig pasrabig køn. Tru tulyube søramig kan trab srøig mungucha wayiimíg, ka pasrabig køn.

⁴² Kaguende yandø judíosmerai isrin kwaløm pølbasmamig lutau køben, katø tru søramikkucha pulutø køben, truyu Jesúswei asrwan wayibelø køn.

20

Jesús øsiirab

(Mt 28.1-10; Mc 16.1-8; Lc 24.1-12)

¹ Incha tru srø trune pølbasmam kwaløm María Magdalenabe løtsøzhig søriisrømay ullarbatø ibene, tru sørin trabyu nu srug kasraibe kusruim pasraptindi ashibig køn.

² Inchen nøbe luløb ibig køn tru Simón Pedroba, katøgan kusrenanøb pera unig, tru Jesús undaarraig købiiba, truillø purrainuumay. Inchabe Mariåbe trenchiptinchibig køn:

—Sørinukkurri Señorwei asrwane srua ambin køn cha. Nambe chu srua amba wayig mørmer— cha.

³ Inchene Pedroba, tru katøgan kusrenanøb pera uniibabe webamba, søriisrømay ambubelø køn.

⁴ Pailøba kegøtø luløb ambendø, kane Pedro lataguen kømø, katøguchinguen mur lula, tru søriisrø nømerrig luløb pubig køn.

⁵ Incha trusrø trarraasha ashene, tru llensu kirriiløbe truyu warai ashibig køn. Inchenø kebimíg køn.

⁶ Inchen nui wendautø Simón Pedrobe pua, sørin trabyu kebyabe, tru llensumerane truyu warai ashibig køn.

7 Inchagucha tru Jesúswei turwan pinøbulig llensugucha, tru kirri llen-
sumeraba trubalatø kømø, nøøøø kurisaig trarrig tsubig køn.

8 Inchen tru kusrenanøb pera unig tru sørinug nømerrig merrab pu-
bikkucha, yandø umbøsrøngatig kebya, ashabe, kørebig køn.

9 Pøs katøgucha nømbe tru Tiuswei wamwan pørigu Jesúsbe kwabelai
utugurri katøle øsiiramig palønrrab køn taigwane chigúi mørmuin købig køn.

10 Incha tru kusrenanøb pera uniiløbe nømui yamay katø ambubelø køn.

Jesús María Magdalenan kenamisrøb
(Mc 16.9-11)

11 Inchen Maríabe sørim pulu wambig kishib pasramisrabe, kishib sørin
trabyu trarraasha ashene,

12 pagatø ángelesmera puliig kørrabig kewar, tru Jesúswei asrwan wayig
købigube kane turgabøryu, kane katsigu purrai ashiptinchibig køn.

13 Inchen ángelesmerabe payibelø køn:

—Ishug, ¿chindimba kishku?— cha.

Inchene nøbe trenchibig køn:

—Pøs nai Señorwan srua ambin køn cha. Incha chu wayig mørmur— cha.

14 Iigwan chab trencha, nø keesha ashene, truyu Jesúsbe pasraptinchibig
køn. Inchendø, nøbe Jesús kuitamappe isumíg køn.

15 Inchene Jesúsbe payibig køn:

—Ishug, ¿chindimba kishku? cha. ¿Mun lagu?— cha.

Inchene nøbe tru tulyu ellmarig ashibig kuitamab isua, trenchibig køn:

—Au, kasuku, inchippa ñi srua yabe, trube, chu wayigwan eshkarra cha.
Na srua inrrab— cha.

16 Inchene Jesúsbe trenchiptinchibig køn:

—¡María!— cha.

Inchene nøbe keesha ashabe, hebreomay:

—¡Rabuni!— chibig køn, (trenchippe, “Kusrennøbig” chib).

17 Inchene Jesúsbe trenchibig køn:

—¡Elatcha! cha. Kaguende nabe nai Møskai waisrø nebimø srø pasarar
cha. Inchendø ñibe ya, nai nunelan trenchinrrig cha: “Naimba, ñimuimba
Møskaweisrømay, naimba, ñimuimba Tiusweisrømay nabe inrrab kur tan” cha,
eshkanrrab.—

18 Inchen María Magdalenabe yabe, tru kusrenanøb pera uniilan:

—¡Nabe Señorwan ashar!— chibig køn.

Incha Señor nun maig tailangucha nømun eshkabig køn.

Jesús nui kusrenanøb pera uniilan kenamisrøb
(Mt 28.16-20; Mc 16.14-18; Lc 24.36-49)

19 Tru truaalømdøwei yandø yem misren, Jesúswei kusrenanøb pera uni-
iløbe tulundzuna purrabelø køn, yaskabmerane mu kurtraingaig kasra
pønsra, judíosmeran kørig køb. Inchene Jesúsbe truyu kebib, nømuin tøbøtag
pasramisrøb, trenchibig køn:

—¡Chi isumgaig tab købiibe ñimba kønrrain!— cha.

20 Incha chab trenchabe tasiimeranba, nui tømbulwanba kenamarene, nui
kusrenanøb pera uniiløbe Señorwan ashippe, truba truba kasraarabelø køn.

21 Inchen Jesúsbe katøle trenchibig køn:

—¡Chi isumgaig tab købiibe ñimba kønrrain! cha. Nabe ñimun karua ørar cha,
nai Møskai nan karua ørøb lataitøwei.—

22 Incha iigwan chab trenchabe, Jesúsbe nømuim pala urra, trenchibig køn:

—Espíritu Santon utay cha.

²³ Ñim mōilan kōben nōmui kaig mariilan ulō paymō kagōbashene, truilai kaig mariilōbe ulō payamig kōmīg kōrrōmisran cha. Inchen ñim truilai kaig mariilan pesannamō ulō payene, nōmune pesannamō ulō payamig kōnrrun—chibig kōn.

Jesúsba, Tomásba

²⁴ Inchen Tomás, Gemelo taig, tru doce kusrenanōb pera uniilai utuig, truipe tru Jesús arrubene, nōmba wamuig kuig kōn.

²⁵ Inchen tru kusrenanōb pera uniilō kanelōbe trenchibelō kōn:

—Nambe Señorwan aser— cha.

Inchene Tomásbe trenchibig kōn:

—Nabe nui tasku kōlabus larrōoriilan ashmōwei, katō tru kōlabus larrōoriilōyu tasig-unan kegwanmōwei, katō tru nui tōmbulyu nai tasigwan kegwanmōwei inchimuppe, nabe kōremumōnrrun— cha.

²⁶ Indig trune wendau tru kusrenanōb pera uniilōbe katōle umbu tulundzuna purrōben, Tomás kucha nōmba wabig kōn. Inchene yaskabmerabe mu kurtraingaig kasrailō pōnrraingucha, Jesúsbe kebya, nōmuin tōbōtag pasramisrōb, trenchibig kōn:

—¡Chi isumgaig tab kōbiibe ñimba kōnrrain!— cha.

²⁷ Inchabe Tomáswane trenchiptinchibig kōn:

—Ñui tasig-unan yu kegwanōb, nai tasiimeran ash cha. Incha ñui kwalwan larrōbicha, yu nai tōmbulyu tasigwan kegwan cha. Ke truiig kōmuitamaptō isub uñmōtō, ñiguen kōrebig ku— cha.

²⁸ Inchene Tomásbe trencha lōtabig kōn:

—¡Nai Señor! ¡Nai Tius!— cha.

²⁹ Inchene Jesúsbe trenchibig kōn:

—Tomás ¿mōi ke nan ashagan kōretirru? cha. Mayanguen tab kuilō kōn cha, ashmōwagucha, kōrebelōbe.—

Mandōgurri i kilgameran pōrig

³⁰ Jesúsbe truilōtō kōmōtō, katōgan Tius nōba pasrain kui asha kōmig mariilō truba kenamarōbig kōn nui kusrenanōb pera uniilai merrab. Truilōbe i kilgamerayube pōrig kaagōn.

³¹ Inchendō iilan pōriilō kōppe, Jesúsbe tru Cristo Tiuswei Nusrkain kuin kui kōrenrrain pōrig kōn. Incha tru treeg kōreitōgabe srōig ōsig kōmigwan nōgurri tōgagōnrrai indig kōn.

21

Nui kusrenanōb pera uniilan Jesús Galileasrō kenamisrōb

¹ Inchen treeg chab puraiben, Jesúsbe nui kusrenanōb pera uniilan katōle kenamisrōbig kōn Tiberias nu pisu menda. Nōbe ōyamay kenamisrig kōn:

² Simón Pedro kōben, Tomás tru Gemelo taig kōben, Natanael tru Galilea pirau canásriig kōben, Zebedeōwei nusrkalō kōben, katōgan pailō Jesúswei kusrenanōb pera uniilōba, trubalatō lincha warōben.

³ Incha Pedrobe trenchibig kōn:

—Nabe peskanrrab inrrainchar— cha.

Inchene nōmbe trenchibelō kōn:

—Namgucha ñiba amrrunrrab— cha.

Incha ambabe, kan barcoyu nebamba, tru yembe chigucha wesrunrrab kaimabelō kōn.

⁴ Inchen yandō tōr-rrab arrubene, Jesúsbe pi menda nōmun kenamisren, tru kusrenanōb pera uniilōbe nune mu kui ashmeelō kōn.

⁵ Inchene Jesúsbe trenchibig kòn:

—Au, nai ureezheelø, ¿chigucha chi peskau kemørtrab kaimatirru?— cha.

Inchene nòmbe:

—Kah— chibelø kòn.

⁶ Inchene Jesúsbe trenchiptinchibig kòn:

—Atarrayan barcoyu kusrmaygatømay kegutsay cha. Trenchabe ñimbe wesranrrabguen— cha.

Inchen nòmbe atarrayan keguchibelø kòn. Inchabe piyugurri atarrayan wesranrrab kaimaptinchibelø kòn, peskau nu køptø.

⁷ Inchene tru kusrenanøb pera unig Jesúswei undaaraipe Pedrone trenchibig kòn:

—¡Au, Señor kòn!— cha.

Inchene Pedrobe: “Señor kòn” taig mørøppe, nui pala itøgueigwan wesrawa tsuig køppe, truigwan kewa, pørønab, piyu pørstapinchibig kòn.

⁸ Inchen tru kusrenanøb pera uniilø kaneløbe barcon srua pubelø kòn, atarrayan peskautø netsiig keetab sruar. Kaguende nòmbe pi mendagurri cien metros køsrøndø waraig købig kòn.

⁹ Incha nòmbe pirau pinaambabe, kan trøsr nag pasrai ashibelø kòn, tru palabe peskauba, pirrimba warig.

¹⁰ Inchen Jesúsbe trenchibig kòn:

—Mamdø tru ñim mõi wesruim peskaumeran srua amrruy— cha.

¹¹ Inchen Simón Pedrobe barcoyu nebya, atarrayan nørøø peskaumeratø ciento cincuenta y tres netsiig tøgagigwan pi mendagatig keetab srua ibig kòn. Inchen maya nu kuingucha, atarrayabe kølsrømiig kòn.

¹² Inchene Jesúsbe nømun trenchibig kòn:

—Manrrab amrruy— cha.

Inchen møikkucha kusrenanøb pera uniiløbe: “¿Ñibe mu kugu?” cha payamig kørig kui inchibelø kòn, kaguende nòmbe Señor kui asha kua.

¹³ Inchene Jesúsbe kemalla, pirriwan nui tasku srua pasramisrabe, nømun srørrøbig kòn, katø peskauwan chigucha.

¹⁴ Iibabe chabguen pønmay købig kòn, Jesús kwaitai utugurri katøle øsiirawa kurra, nui kusrenanøb pera uniilan nø kui ashchai kenamisrig.

Jesús Simón Pedroba waminchib

¹⁵ Yandø chab mabe, Jesúsbe Simón Pedron payibig kòn:

—Simón, Juanwei nusrkai, ¿iilø lataguen kømø, nan mas undaguig kuguh?— cha.

Inchen Pedrobe trenchibig kòn:

—Øø, Señor, nabe ñun undaguig kui ñibe ashibig kòn— cha.

Inchene Jesúsbe trenchibig kòn:

—Nai ubisha-ureemeran mannøb ashib tøgagørrunrig— cha.

¹⁶ Katøle Jesúsbe payibig kòn:

—Simón, Juanwei nusrkai, ¿nan undaguig kuguh?— cha.

Inchen Pedrobe trenchibig kòn:

—Øø, Señor, nabe ñun undaguig kui ñibe ashibig kòn— cha.

Inchene Jesúsbe trenchibig kòn:

—Trube, nai ubishameran tab ashib tøgagørrunrig— cha.

¹⁷ Pønmay kønrrabyu katøle payibig kòn:

—Simón, Juanwei nusrkai, ¿nan undaguig kuguh?— cha.

Inchen Pedrobe kullaarab isui inchibig kòn, kaguende chabguen pønmayguen: “¿Nan undaguig kuguh?” chib payen. Inchen nøbe trenchibig kòn:

—Señor, ñibe chiwandøgucha kerrigu ashibig køn cha. Nabe ñun undaguig kui ñibe ashibig køn— cha.

Inchene Jesúsbe trenchibig køn:

—Nai ubishameran mannøb ashib tøgagørrunrig cha.

¹⁸ Nabe ñun isa kømø, cierton trendamønrrun cha: Ñibe matsinøtiig køb urasbe, ñui pørønaigwan ñiasiitø pørønawa, ñun chuikkøben ibig kuig køn cha. Inchendø yandø ñi køllig misrene, ñui kwalmeran ñi larrøbichen, katøgan mendaig ñune pørønana, ñi ig kømui indiisrømay srua inrrun— cha.

¹⁹ Øyan chippe, Pedro nø mandø kwamig nebuben, treeg kwaitøga Tiuswan maya nuguen tabig indig kønrrai martrab køn cha, trendaig køn Jesúsbe. Inchabe Pedrone trenchibig køn:

—Nai mendig amø— cha.

Jesús kusrenanøb pera unig tru undaaraig

²⁰ Inchen Pedrobe keesha ashene, Jesús tru kusrenanøb pera unig undaaraibe nui wendau arri ashibig køn. (Truibe tru mab purrab uras Jesúswan pechoyu ne tsumisra: “Señor, ¿ñun ashig kømui inchibelan tranrrabiibe mu køh?” cha, payibig, truig købig køn.)

²¹ Inchen Pedrobe truigwan ashabe, Jesúswan payibig køn:

—Señor ¿inchen øigwane ñibe mandø inchainchigu?— cha.

²² Inchene Jesúsbe trencha løtabig køn:

—¿Na arrumnegatig nune ka uñchai indingucha, ñuimburappe treegwane chi asamig kaagøn cha? Ñibe nai mendig amø— chibig køn.

²³ Indiibe tru trendaigwane nunelai utube treeg wam larrøbitsig købig køn, tru kusrenanøb pera unig, truibe kwamønrrab køn tan cha. Inchen Jesús trenchippe: “Truibe kwamønrrab”, køn cha kømøtø, trenchippe, ka: “Na arrumnegatig nune ka uñchai indingucha, ñuimburappe treegwane ñibe chi asamig kaagøn” cha, treebe taig købig køn.

²⁴ Tru kusrenanøb pera unig trendainabig nøtøwei iilane maig kuigwan eshka wamincha, katø nøtøwei pørøb indig køn. Incha maig kuigwan nø eshka wamindiibe isatø kømø, cierton kui asha pønrrer.

²⁵ Katø chigøben Jesúsbe truba truba marig købig køn. Lutøgurrih trumørig pørimbe, tru pørig kilgamerabe yu pirau ørøbaguen kemubsruitamab isur.

Los Hechos

Jesucristo Espiritu Santon tranrrab misrig

¹ Nai Teófilo, nai srøsrø pørigube maig purayaigwan eshkað pørig kuig køn, Jesús tru chigurrimbunø marøð pølbasiilanba kusrenaniilanba.

² Katø nøashib karua øramelø lawa wesruilan Espiritu Santogurri chitø maramelan martrai karua pønsra, srømbaløsrømay srua yain kwalømgatig købigwan pørig køn.

³ Incha nøbe kwaig tsua, øsiirawa, nømune øsiguig kenamisrøbig køn, nø kuin kui asamdiig kønrrai chine marøð. Incha nøbe kwalømmerra cuarenta nemisramne nømun kenamisrøð uña, Tius nø karub waigweimburabigwan waminchibig køn.

⁴ Incha Jesúsbe nømba trubalatø purrøwabe:

—Jerusalénsrømaybe ammønrrigay cha karubig køn, nai Møskai tranrrab misra kørørrømisrigwan treeg punnegatig munugunrrain cha,

⁵ tru ñim nan øyah taig mørig købigwan. Pøs Juanbe isa kømøtø, pitøga pinøbuliilø kønrrai ulsrain køn cha. Trune ñimbe mam kwalømyutø Espiritu Santotøga pinøbuliilø kønrrun— chibig køn.

Jesús srømbaløsrømay ib

⁶ Jesúsba truyu tulaamba purrøwabe, trencha payibelø køn:

—¿Señor, Israel misaamera merrabsrø nøm ashib karub tøgagúig købigwan katøle treetøwei nøm karub tøgagømig punrrai møi yan tamara pasr-traindirru?— cha.

⁷ Inchene Jesúsbe trencha løtabig køn:

—Treeg maramibe mana punrrabigwanba, Møskai nøashib nui maram purab mariitøgatøwei chi kwaløm treeg punrrai mara kørørrømaramigwanbabe, ñimbe wammøra kømig chi palømøn cha.

⁸ Inchendø Espiritu Santo yandø ñimuim pala arrubeneguende maramburab maramigwan ñim uta, Jerusalénsrø, Judea pirau kerrigu, Samaria piraurø, pirø muba kuimburab purø yabsrønguen naimburab maig kuigwan waminchab webamrrun— chibig køn.

⁹ Incha yandø iigwan chab waminchene, nøm ashib pønrramne, Jesúswane pala kusruben, kan wañi arrua, nun pinøbulen, yandø mas ashchab kaimabelø køn.

¹⁰ Inchen Jesús iben, nøm srømbalaneb neeshib pønrramnetø, møimbe pagatø møguelø puløzheelø kewar nømuim pulu kenamisrabe,

¹¹ trenchibelø køn:

—¿Galileasrø møguelø, chindimba srømbalaneb neeshib kørørrømisrke? cha. I Jesústøwei ñimui utugurri srømbaløsrømay srua yainabiibe, ñim maig yai asig katø nøbe treetøweih attrun— chibelø køn.

Judasweimburø purøbasramig Matíaswan lawa wesrab

¹² Inchen tru nøashib karua øriiløbe tru Olivos taig tunsrøngurri Jerusaléngatig katø ambubelø køn, tru maig maramigwan martrai Moisés pørigu isrin kwalømbe maya yabgatig amrrain chibig køben, treezhiitø.

¹³ Jerusalén ciudayu puabe, tru nøm pui yau, pala pisusrø nebambubelø køn, truyube Pedro køben, Juan køben, Jacobo køben, Andrés køben, Felipe køben, Tomás køben, Bartolomé køben, Mateo køben, Alfeowei nusrkai Jacobo

køben, Simón Zelote køben, Jacoboi nusrkai Judas køben, tru iilø ya peba warainug.

14 Truiløbe Tiusba wamindamigwane sətøba kandø isua, maikken elachimø marøbelø købig køn, Jesúswei usri María køben, nui nunelø køben, katøgan ishumburmera køben kanbalatø misra.

15 Inchen tru kwalømmerawan Jesucristo kusrenanigwan marøbelø kan ciento veinte køsrøn tulundzuna køben, Pedrobe truilai utu pasramisra trenchibig køn:

16 —Nai nunelø, Tiuswei wamwan pørigu maig taig, truike nebumig palaig kuig køn cha. Tru pørigube Espíritu Santobe David wamindigu kanmaytø Judasweimburab treeg nebunrrun cha wamindig kuig køn. Jesúswan kemøra, sruamrrabelan mandø indamigwan eshkarab pasrabigwan.

17 Pøs Judasbe namui utuitøwei, katø namui marameløyu maramig tøgäig købig køn cha.

18 (Indiibe tru nø kaig marimburø an utiitøga kan tul penig køn cha. Inchabe ippa, turmay peñippe, patsøwan srurram peñen, pøitsimerabe kerrigu webølabig køn cha.)

19 Inchen Jerusalén mayeelø warabelø wammørabe, tru pirøwane, “Acéldama” cha wamabelø køn, nømuin trikkabe, “Ani Lusin Tul” chibig.)

20 Kaguende Salmosyube trenchibig pørig pasran:

“Nui yabe mugucha waraimíig kutsi ya kørrømisren, katø truyube muguen tsunrrabig kaanrrain” cha.

Katø:
“Nø chi marøb pasraig købigwane katøgan peg utønrrain” cha.

21 Inchawei øyeeg købene, tru namui utu Jesús trendø namba lincha llirab uñen,

22 tru Juan Jesúswan piu umbu nun ulsraikkurrimbunø, katø nun namuinukkurri kusraben, nun srømbalasrø utig kømnegatig namba managucha tin lincha amøñibelø yu møguelø køn cha. Incha kan treeg lincha uñibigwan, tru Jesús kwawa, katøle øsiiraigwan treeg køn chib waminchib, namba tøgatø pasrønrrai maramibe ke søldøwein køn— chibig køn.

23 Incha pailan wesrawa pønsrøbelø køn: Matíaswanba, Joséwandøwei Barsabás cha wamab (katø Justo cha wamab indi) møwanba.

24 Inchabe øyeeg chib Tiusba waminchibelø køn:

—Señor, ñibe mayelai manrrømeran ashibiibe, i pailan ñi mønun lawa wesrua tøga pasraigwan eshkarra chib,

25 Cristo nøashib karua ørigwei maramigwan uta pasramisra martrabiibe mu kuin kui. Kaguende Judasbe nui yamsrømay inrrab, tru maramigugurrimbe tarømisra pella, peg maywan yaig køn— cha.

26 Inchawei møigweim pala pendashchab suerte kuchene, Matíasweim pala peñen, truike yandø tru Cristo once nøashib karua ørilai utuig kørrømisrig køn.

2

Espíritu Santo arrigwan waminchibig køn

1 Judíosmerai Pentecostés taig tru kwaløm yandø puben, nømbe mayeeløba kanbalatø tulundzuna købene,

2 mømbe ¡katø! srømbalasrøngurrimbe wanrrabig kan truba mur isig ichibig lataig arrubig køn, tru purrainuube ¡katø! ya ørø tru wanrrabiitø kasramgue.

3 Inchene nømun kanun kanun traniilø kan nagurømera latailø kenamisra, nømun kanuim pala, kanuim pala pønrramisrøbelø køn.

⁴ Inchene nōmbe mayeelōba Espiritu Santotō netsailō kōrrōmisra, peg, peg wammera waminchib mendabelō kōn, Espiritu nōmun maig wamindin-geruben.

⁵ Inchen Jerusalēnsrōmbe judíos misaamera warabelō kōn, Tiusweimbura-belan maizhikken elachimō marōbelō, chu pirausrōngurringuen palōmiikke.

⁶ Inchen tru misag sōtōbe tru wanrrabigwan mōrabe, tulundzunabelō kōn. Inchabe jpaare! kan ōyeebe chi mandō kermab isubelō kōn, kaguende nōm mōrene, tru Jesucriston kōrebelōbe mōitōgucha peg wam peg wam tru nōm mōrōb pōnrrabelai wamwan, trunun, trunun waminchiptinchene.

⁷ Inchen nōmbe truba kōrrō kwaariilō, kangurrin kangurri jpaare! kan mandō kermab isub, trenchibelō kōn:
—¿I mayamba waminchib pōnrrabelōbe Galileasrō misaamera kōmuitarru? chib.

⁸ Pōs kan namuin triimay, namuin triimay nam wamindi mōrtrappe ¿mandō kerah? cha.

⁹ Yube Parto pirausreelō kōben, medosmera kōben, elamsreelō kōben, mesopotamiasreelō kōben, judeasreelō kōben, capadociasreelō kōben, pontosreelō kōben, Asia pirausreelō kōben,

¹⁰ frigasreelō kōben, panfiliasreelō kōben, egiptosreelō kōben, tru Cirene pirō pulu Libia pirausreelō kōben, katō Romasrōngurri amrrubelō ka petō amrruarteelō judíosmera kōben, judíos kōmeelō Tiusweiwan judíosmera marigu pōnrrōnrrab purōruwarmera kōben,

¹¹ katō cretasreelō kōben, arabiasreelō kōben, treeg yam palōsreelō kōbendō, nambe mayeelōba Tius truba nōrreelō mariilan namuin triimay, namuin triimay wamindi mōrer— chibelō kōn.

¹² Incha mayeelōba nōmbe kwariilō jkan paare! ōyeebe mandō kermab isub kangurrin, kangurri trenchibelō kōn:

—¿Kan ōyeebe chi kerah?— chib.

¹³ Trune kanelōbe indzatō ashib trenchibelō kōn:

—Mutsiguelōrre inchib waran— cha.

Espiritu Santo kōrraaruben, Pedro misagwan maig kōnrrabigwan waminchib

¹⁴ Inchen Pedrobe Cristo tru once karua ōriilōba kurra pasamisra, nōbe mur waminchib trenchibig kōn:

—Judea mōguelō kōben, katō mayeelō yu Jerusalēn warab misaamera kōben, iigwan ñim chigúii nebua ashchain kōn cha. Na wamindamigwan tab mōrtrai chibig kōn.

¹⁵ Ya lōtsō las nuevetō kōben, i mōguelan ñimbe mutsiguelō kōnmab isuinrun cha,

¹⁶ treeg kōmōtō, Tius maig karuigwan eshkabig Joegurri Tius tru ōyee taig kōbig, iibe tru kōn cha:

¹⁷ “Sra-be kwalōmmerawane treeg pub attrun cha,

Tiusbe trendan chib,

mu misagweim palatōgucha nai Espiritun uncha tōgagōnrrai ōramōnrrun cha.

Ñimui nusrkalo, ñimui nimbasrmerabe

Tius nōmun chi eshkaigwan eshkaben,

ñimui matsōrelōbe kan piab lataigu chigōben ashen,

ñimui kōlleelōbe piailō tōgagōnrrun cha.

¹⁸ Tru kwalōmmerawane katō ishumbur lata, mōguelō lata, nai karuindiig melabelaim pala

nai Espiritun uncha tōgagōnrrai tranen,

nōmbe na nōmun chi eshkaigwan eshkanrrun cha.

19 Inchen srømbalasarømben nabe kwaara asha kønrrai mariilø marøb, katø yu piraube na maramburab mariilan asha kømig kenamaramønrrun cha, anin køben, nag køben, naguish kurrabig købengue.

20 Nøsiibe larrø løstigi misren, pølbe ani lataig misrtrun cha. Señor arrum kwaløm truba nuig purø tab kwaløm pumøwatø, treeg kønrrun cha.

21 Inchen Señor Tiuswei munchiwan wamab, purugurra chib miab pasrabiibe, kaigyugurri wesraig kønrrun” cha, trendaig. Iibe tru køn, chibig køn.

22 Ñim Israel misaamera, na wamindigwan møray chibig køn: Nazaretsrø Jesúsbe Tius nø karua øri møg kui ashchai, nø treeg trani møg købig køn cha, nøgurri ñimui merrab maramburab mariitøgaba, kwaara asha kønrrai mariitøgaba, Tius nøba pasrain kui asha kømig mariitøgaba. Pøs ñimdøweinguen ashibelø køn cha.

23 I møwandøwei Tiusbe merrabsrøngurri manawei nø maig martrab isuilane tøgaguen kua, ñimun tranen, ñimbe nune kurusyu mesra, ñim kweet-sig køn cha, tru larrø kailai tasku purøøra.

24 Inchen nune kwailai utugurri Tiusbe kusraig køn cha, øyee purø trømbøig indinawa kwaig tsuigugurri. Kaguende tru kwab kwanrrai marøb pasrabiibe nune chinchagucha nø merrarrawa tøgagønrrab kaimaig køn cha.

25 Pøs merrabsrø rey Davidbe Jesúsweimburab waminchippe, trendaig købig køn cha:

“Nabe Señorwane chu uragucha nai merrab wai ashibig kur cha.

Kaguende nøbe nai kusrmay pasran cha, nan amburab, iburab sruagutsig mandøguen kømui pasramig chigaanrrai.

26 Treekkurri nai manrrøbe truba kasraaraben, nai niløbe truba truba tabig waminchib kasraaran cha.

Inchen nai asrken, chi isumø muniiramigwan muniirab isrønrrun cha.

27 Kaguende ñi, Tiusbe, nan kwabelø pønrrainug pasrønrrain kønrrain kømøwei, katø ñui Newan Tabigwan trerab tsunrrain kønrrain kømøwei inchun cha.

28 Ñibe nan øsig køm maymeran nebua asingarua, ñi naba waikkurri nane truba truba kasraarangerunrrautan” taig køn cha, trenchibig køn.

29 Ñai misaamera, nabe maig kuigwan tørgandø kelarrab ñimun trendamønrrun: Merrabsrø namui kølli misag Davidbe kwaben, sørig køn cha. Inchen tru nui søriibe møin kwalømgatig namui utu pasran cha.

30 Inchendø Davidbe, Tius maig karuigwan eshkabig købig kua, tru kan nuinukkurri kurrab misagwan David nø wamisra karub wainug wanrrai wannamigwan, Tiusbe: “¡Katø! treeg marmø kømø, treeg kønrrai maramønrrun” cha, trendaigwan ashibig kuig køppe,

31 Davidbe manawei Cristo øsiiramigwane chab asha kua, tru Cristo katø øsiiramigwan trencha wamindig købig køn cha ‘kwabelø pønrrainug truyutø pasrønrrai kørømarig kømøwei, katø nui asrbe treraig kømøwein kønrrai indig kønrrun’ cha.

32 Inchawei Tiusbe tru Jesús wandøwei katø øsiirangeruben, nambe mayeeløba tru øyee purayaigwane namashib asha pønrrer chibig køn.

33 Incha nune Tiusweim pulu kusrmay wanrrab attrai kusraben, Møskai tranrrab misra kørromisrig tru Espiritu Santon uta, uncha tøgagønrrai trunun tranan chibig køn. Inchen ñim mõi ashib, mørøb inchib kuibe, tru køn cha.

34-35 Kaguende Davidbe srømbalasrømaybe nebimuig køn cha. Inchendø Davidbe trendaig køn cha:

“Señor Tiusbe nai Señorwane trendan cha:

‘Nai kusrmaygatø wamisr cha,

ñun ashig kømui inchib tsalø inchibelan

ñi ñui srøbmeran truilaim pala nebuna wamig kønrrai na pønsramnegatig.’

36 ‘Israel misaamera mayeeløba treeg kømuitamab asha pønrray cha, tru Jesús ñim kurusyu mesraigwandøwei Tiusbe nune Mayeelaim Pala Pasrabig kønrrai maramba, Cristo kønrrai maramba indin køn— chibig køn, Pedrobe.

37 Incha øyeeq tailan mørøppe, truba kullaarab isui inchibelø køn nømui manrrau kebachen. Inchabe Pedronba, trugurri Cristo nøashib karua ørig katøganelanba payibelø køn:

—Ñim nai misaamera, ¿nambe chi maramig kønrrerah?— cha.

38 Inchen Pedrobe trenchibig køn:

—Ñim møitøgucha nimui kaig mariilan isua møray cha. Incha Tiusweimay llirawa, Jesucristoi munchiyu piu umbu ulsrailø kuy chibig køn, ñimui kaig mariilan ulø payamig kømíq, pesannaig kørromisrtrambe. Inchen Tiusbe ñimune Espiritu Santon tranrrun cha.

39 Kaguende i tranamigwan nø tranrrab misra kørromisriibe, ñimuyasig køb, ñimui ureemerayasig køb, katø mayeelø chu uras tsøndatøsrø kønrrabelayasig køb, katø mayeelø namui Tius nun mun wamag køben wamamelai, truilayasig køb køn— chibig køn.

40 Incha Pedrobe øyeelø wamindig kømnetø, katø srøitø waminchib, øyamay melamig køn chib trenchibig køn:

—Yeeg larrø kaig marøb misaamerainukkurrimbe wemallib ambay— cha.

41 Inchen tru nø wamindigwan møra utabelane piu umbu ulsrailø kørromisren, tru kwalømbe Jesucriston kørewa pønrramisrøbeløbe kan pøn mil køsrøn nemisrig købig køn.

42 Incha nømbe mayeeløba Cristo nøashib karua øriilø kusrenanigwane tindøga marøb pønrrabelø køn, kanbalatø lincha kømigu lata, mamig pirisha kanbalatø mab kømigu lata, katø kanbalatø misra Tiusba waminchib kømigu lata.

Jesucriston kørebelø srøsrøelø mandø waraig

43 Inchen nømune mønundøgucha ka nøs nøstø købig køn, tru Cristo nøashib karua øriiløgurri kwaara asha kønrrai marøb, katø Tius nømbe pasrain kui asha kønrrai truba truba marøb inchen.

44 Inchen mayeeløba Criston kørebeløbe kanbalatø lincha tulundzunab, katø chimerandøgucha ke kanguelarrøtø tøgagøb inchibelø køn.

45 Incha nømui pirømeran, yameran, katø chi tøgagúilan køben yana, søteelan pirishibelø køn, møitøgucha maig palain køben, treetø.

46 Incha kwalømmørig, kwalømmørig Tiuswei yau søteeløba tulundzunabelø køn. Incha mamigwan nømui yamørig truba truba kasrag, kanbalatø lata pirisha mabelø køn, tabig isua, ka treeg maranmab ashchaindø kømø,

47 manrraugurri tabig isub Tiuswan truba tabig waminchib, katø nømbe maya misaamera truba tabig wamindinabelø køn. Inchen Señorbe

kaigyugurri wesraig kōnrrabelan wesrawa, kwalōmmōrig nōmuinuube srōitō, srōitō nemarōbig kōn.

3

Kan uñchab kaimabigwan tamarōb

¹ Kan kwalōm Pedroba, Juanba, maaben las tres pailōba kegōtō Tiuswei yaumay nebambubelō kōn, Tiusba wamindam uras kōbene.

² Inchene truyube kan mōg tru kal-lainukkurri uñchab kaimabig wabig kōn. Truigwane Tiuswei yau tru “Tab Yaskabzhig kōn” cha waminug kebambubelan ‘an kettra’ cha miab wanrai, kwalōmmōrig srua amba wannig wabig kōn.

³ Inchen tru uñchab kaimabiibe Pedronba, Juanwanba Tiuswei yau kemrrrab inchen ashabe ‘an kettra’ cha miaben,

⁴ nōmbe nun ashabe, Pedrobe trenchibig kōn:

—Namun ash— cha.

⁵ Inchen tru uñchab kaimabiibe chi tranrrrab indermab isua, truba tab ashene,

⁶ Pedrobe trenchibig kōn:

—Angawei, orogawein kur cha. Inchendō na tōgagúigwaneguende tranrrumōn cha. Nazaretsrō Jesucristoi munchiyu kurrab, inrrō— chibig kōn.

⁷ Incha Pedrobe kusrmay tasigu kemōra kusrabene, tru urastō nui srōbmeraba, nui yetōlōmeraba mur misren,

⁸ tru uñchab kaimabiibe įkatō! kan pōrsrappe pasrambua, ib menda, Tiuswan ‘Tabiibe ñitō kōn’ chib, trashib, pōrsrab Tiuswei yau Pedroba, Juanba kebibig kōn.

⁹ Inchen maya misaamerabe nune uñibig misrin kui ashib, katō Tiuswan ‘Tabiibe ñitō kōn’ chib, truba tabig wamindi ashib inchibelō kōn.

¹⁰ Incha tru Tiuswei yau tru “Tab Yaskabzhig” cha waminug tru ‘an kettra’ cha, miab wabigwan truig kui ashabe, truba kwaarōbelō kōn, įkan paare! ōyebe mandō kermab isub tru treeg purayain kōben.

Pedro maig pub arrigwan Tiuswei yau waminchib

¹¹ Inchen tru uñchab kaimabig kōbiibe Pedronba, Juanwanba kemōra pasramnebe, misaabe mayamba kwariilō lulōbelō kōn Pedromeraimay, tru Tiuswei yau Salomōnwei Yaskabumay.

¹² Inchen Pedro iigwan ashabe, misagwan trenchibig kōn:

—Namui Israel misaamera ōyeegwan asha ñimbe chindimbarre kwargue? cha. Kabe tru maramburab maramigwan nam namashib tōgar kua, kabe nam Tiuswei merrab purō tabelō kuikkurri i mōwan uñibig kōnrrai nam mari lata ōchindimbarre namungōba ashke? cha.

¹³ Treeg kōmōtō, Abrahamwei, Isaacwei, Jacobwei Tius namui merrabsrō kōlli misaamerai Tiusbe tru nui marōb megabig Jesúswane tōrguegwalmabig kōnrrai maran cha. Truigwane tru misagwan ashib karub purrabelan ñimbe kemōra, tranōb, katō Pilatobe nune elatchab inchen, ñimbe elachibashmub indig kōbig kōn cha.

¹⁴ Tru Newan Tabig katō Kerriguwan Sōlgandiigwane ñimbe kaasha, tru kweechiptiigwane, trube, kelachai miaig kōn cha.

¹⁵ Incha tru ōsig kōmigwan nō tōga pasrabigwane ñimbe kweechen, truigwan Tiusbe kwailai utugurri katōle ōsiirangaruben, nambe tru treeg purayaigwane namashib ashibelō ker chibig kōn.

16 Pøs Jesúswei munchibe tru ñim trendø asi møg ñim mõi ashib pønrraigwan øyah chishig kønrrai tamaran cha, nui isubigwan tru munchiyu pasrikkurri. Tru isubigwan Jesús tøgagønrrai marig, truike nune newan tamaran cha, pøs ñim mayeelø asiinrrabguen chibig køn.

17 Pøs, trube, mømibe ñim nai misaamera, ñimbe chugúi mørmøwa, øyeeg marøb pønrrain kuin kui ashar chibig køn, katø ñimun ashib karub purrabelø chigucha.

18 Inchendø mayeelø Tius maig karuigwan eshkabelø wamindiitøga nui Cristobe kwamnegatig purø trømbøig indinab meganrrun cha, manawei Tius eshkawa pasrig købigwan treeg nebunrrai marig køn cha.

19 Inchawei treeg købene, nimui kaig mariilan isua møra, Tiusweimay lliray chibig køn, ñimui tru kaig mariilan chi kaig mariimíg lataig kørørmisrtraimbe. Trumaybe Señorbe chi isumø, tabig pishindø waram kwalømmera ørøb,

20 katø tru muniirab kui Criston, tru Jesúswan, ñimuyasig manawei nø tarømara wesrua pasrigwan trunungucha ørtrun cha.

21 Inchendø nøbe møimbatøbe srømbalasrø ka wamig køn cha, Tius tru chiwandøgucha lutøgurri tamara pønrramnegatig, tru Tius nuindø tarømariilø nø maig karuigwan eshkabeløgurri nø manasrøwei maig taig, treeg.

22 Inchawei Moisésma trendaig købig køn: “Señor ñimui Tiusbe ñimui misag utugurrindøwei Tius maig karuigwan kan eshkabig na lataitøwei katøgan kusranrrab køn cha. Inchawei nø maig wamindiilane chiyutøgucha møramig køn cha trendaig købig køn.

23 Kaguende møikkøben Tius maig karuigwan tru eshkabigwan mørmígwane, Israel misaamerainukkurri kanguen kaagøm, pinisaig kønrrun” taig køn cha.

24 Inchawei Samuel tsub uraskurrimbunø mayeeløba Tius maig karuigwan eshkabelø truilø chigucha møin kwalømmera øyeeg punrrabigwan wamindig købig køn cha.

25 Pøs ñimbe tru merrabsrø Tius maig karuigwan eshkabelai uremera køb, katø tru namui kølli misaameran tru nuinukkurri acuerdo marigwan tøgagøb indan cha. Abrahamwan tru trenchib uras: “Ñigurri karrab larrøbichib misaamerabe pirau maya misaaba mayanguen tab indiilø kønrrun” chib.

26 Inchawei Tius nui Marøb Megabigwan kusrua, trugurri Tiusbe ñimuimaymerrig ørig købig køn, ñim møitøgucha tru kaigwan marmønrrab llirawa pønrramisren, mayanguen tab indiilø kønrrain— chibig køn, Pedrobe.

4

Pedroba, Juanba tru Setenteelø maig maramigwan asha marøbelai merrab

1 Pedroba, Juanba misagwan waminchib srø pønrramne, judíosmerai sacerdotsmera køben, Tiuswei yau policiamera ashib pønrrabelan nø karub pasrabig køben, saduceosmera køben truba namikkøleelø pubelø køn,

2 kaguende Pedroba, Juanba misaameran kusrenanøb, katø tru kwabeløbe katøyug kwailai utugurri øsiiramibe Jesucristoinug køn chib, eshka kusrennimba.

3 Incha tru karubeløbe Pedronba, Juanwanba kemøra, yandø maaben købene, katø kwalømgatig kailan keeri yau keerøbelø køn.

4 Inchendø møiløgøben Tiuswei wamwan wamindi mørøbeløbe Criston køreben, møguelandø munchen trattrø milburab nemisrig købig køn.

⁵ Incha katø kwalømbe tru nømun ashib karub purrabelø køben, misagwan karubelø kølli misaamera køben, tru Moisés pørigwan kusrenanøbelø køben, Jerusalén tulundzunabelø køn.

⁶ Truyube maya sacerdotesperan nø karub sacerdote tru Anás køben, Caifás køben, Juan køben, Alejandro køben, maya sacerdotesperan karubigwei yauelø køben mayamba, truya purrabelø køn.

⁷ Incha Juanwanba, Pedronba nømuin tøbøtag pønrsabe payibelø køn:

—¿Ñimbe iigwane maramburab marig muindøgarre margue? cha. ¿ilane mui munchiyurre margue?— cha.

⁸ Inchen Espiritu Santotø netsaig Pedrobe trenchibig køn:

—Misaameran ashib karub purrabelø, katø ñim misagwan karubelø kølli misaamera,

⁹ kan møg kwanrriigwan nam tabig marigwan chi wetøgørramdiig køtashchappa, i mowan mandø incha tamarig kuitashchappa, ñim namun payib srua kuig købene,

¹⁰ trube, ñim mayeeløba, katø Israel maya misaameraba nebua asig kønrrai eshkanrrab cha. Tru i møg ñim mayelai merrab pasrabiibe tru Nazaretsrø Jesucristoi munchiyu tabig tammisrig kuig køn cha, tru ñim kurusyu mesra kweecheen, Tiusbe katø øsirangaruig, truigweinug.

¹¹ Jesúsbe ñim

“ya marøbelø tru kaasig srug køn cha.

Inchendø tru katsiisrømbe pølbasa wayig mas purø tab srukken misrin køn” cha.

¹² Pøs nam kaigyugurri wesrailø kømibe mu katøgan pegwei munchiyube chi kaagøn cha; kaguende kaigyugurri wesramigwane yu piraube mungucha treeg martrai tranig kaagøn— chibig køn.

¹³ Inchen tru payibeløbe Pedronba, Juanwanbabe chigucha chi kørig kuin kømø, løtab pønrrai ashib, katø mana chu kusreb purrømeelø, chigucha kømeelø kuin kui ashib inchabe, truba kwaara asha, nømune Jesúswei mendig amøñibelø kuin kui nebua ashibelø køn.

¹⁴ Inchagucha tru tamari møøbe nømuim pulu kurra pasrabwei indi ashabe, treekkurri Pedronba, Juanwanbabe chigucha chi tamgaig købig køn.

¹⁵ Incha nømune tru Setenteelø maig maramigwan asha marøbelø purrainukkurri webamingarua, nømdø kangurrin kangurri payiyab waminchib kørrømisrabe,

¹⁶ trenchibelø køn:

—¿Møguelane nambe chi martrab? cha. Kaguende Jerusalén mayeelø warab misaaimeraimbe Tius nømbe pasrain kui asamig marig kan truba nuig kenagøn cha, nømgurri marig. Inchawei nambe chinchagucha chi treeg kømøn tambegaig køn cha.

¹⁷ Inchendø tru treeg marigwan misag utu mas mas wam larrøbichimønrraimbe, møingurrimbunøbe mungucha Jesúswei munchiyube waminchimønrrai ‘chigøben ñimune maramønrrun’ chinrrab— cha, nømbe trenchibelø køn.

¹⁸ Incha Pedronba, Juanwanba katø wamabe, chiweingucha Jesúswei munchiyube waminchimøwei, kusrenanmøwei inchai, ¡katø! kandø mera pasrøbelø køn.

¹⁹ Trune Pedroba, Juanbabe trencha løtabelø køn:

—Ñimguen tab isuy cha, Tiuswei merrab søl købig kuitashchab nun mørmøtø, ñimun mørøb pønrramig.

²⁰ Kaguende nam ashib, nam mørøb indigwane nambe elachimø, wamin-damønrrun— chibelø køn.

²¹ Inchen tru karubeløbe:

—Ñim namun mørømøwabe, mømibe chi maramigwane nam asamønrrun— chatø, elachibelø køn, tru maya misaameragurri chinchaguen ichabetønrrab kaima. Kaguende truiløbe tru treeg purayaigwan asha, Tiuswan truba tabig waminchib købelø køn.

²² Pøs tru purø nuig tabig marøb, tamarinab møøbe cuarenta años menrra tøgag købig køn.

Tiuswei uremera nundø kemenda kormø pønrrønrrab Tiuswan miab

²³ Pedroba, Juanba yandø ka elatsiilø kua nømui lincha amøñibelaisrømay ambabe, tru sacerdotesperan karubeløba, misagwan karubelø kølli misaameraba nømum maig taigwan kerrigu eshkaben,

²⁴ tru lincha amøñibelø nøm iigwan mørabe, søteeløba ke kandø isua pønrramisra, Tiusba trenchib waminchibelø køn:

—Ñi mayelaim pala ñi ashib pasrabig srømbalawan lata, pirøwan lata, marwan lata, chigurrimbunø truyu chi purrabelan chigucha marøbig,

²⁵ Espíritu Santogurri namui merrabsrø David, ñi karuigwan marøb megabigwan ñi øyeeg chib wamingingaruiig købig køn cha:

“¿Judíos kømeeelø truba truba namig kurramba,

katø chi misaamera køben ke ka yandø chi marmuinguenig martrab kurramba inchippe, chindimbarre indah? cha.

²⁶ Pirau reymerabe yandø kwayanrrab lutømaytø pønrramisren,

katø tru ashib karubeløgucha wamincha kanbalatø misra,

Señor Tiuswanba, nui Cristonba

kaig martrab namig kurran” cha.

²⁷ Kaguende isa kømøtø, Herodesba, Poncio Pilatoba, judíos kømø misaameraba, katø maya israelitasmeraba ñui newan tabig marøb megabig, Jesúswan, tru ñi aceitetøga itølusig lawa wesraigwan tsalø køb, chigøben martrab isub i ciudayu tulundzunig kuig køn cha,

²⁸ ñi Tius manasrøwei øyeelø purainrrai maig martrab isua tøgagúilan treeg nebunrrai, martrab.

²⁹ Señor mømibe tru nøm namun chigøben øyeelø martrumøn cha trencha pønrsailan ashib, katø nam ñuiwan marøb melabelan maikkucha kullaaramø ñui wamwan kormø waminchib pønrramig kønrrai tranrra chib.

³⁰ Ñui tasigwan larrøbichi cha, tru ñui newan tabig marøb megabig, Jesúswei munchiyu kwanrreelan tamarøb, ñi namba pasrain kui ashchai mara kørømarøb, katø kwaara asha kørømistrai marøb inchi— cha, trenchibelø køn.

³¹ Incha Tiusba chab waminchene, tru nøm tulaamba purrainuube mur kønøben, mayeeløba Espíritu Santotø netsailø kørømisra, Tiuswei wamwan maikkucha kullaaramø nømbe waminchibelø køn.

Kanguelarrøtøgagøb

³² Incha tru nu misag søtømera mayeeløba tru Jesúswan kørebeløbe møitøgucha lata kan manrrøtø lataig lincha pønrrab, kandø isubelø køn. Møitøgucha nømui chi tøgagúigwane ‘nain køn’ chimøtø, chi købigwane kanguelarrøtøgagøbelø køn.

³³ Inchen Cristo tru nøashib karua øriiløbe Señor Jesús øsiirawa kurrigweimburab maig kuigwan waminchippe ¡katø! muguen chindamgaig waminchibelø køn. Incha nømbe warappe, kan møitøgucha tab købigwan tøgagømburab tøgagønrrai traniilø purø tab warabelø køn.

³⁴ Inchawei nòmui utube chigøben palai inchibiibe muguen kaabig køn. Kaguende møiløgøben pirømera, yamera tøgærbe yana, maig yanigwan anawe srua amrrua,

³⁵ Cristo tru nøashib karua øriilø nøm ashchai tranøbelø køn. Inchen nømbe trunune nømun maig palain køben kanun kanun treeg pirishibelø køn.

³⁶ Inchen kan levita José taig pi tøbøtag pirø pasrabig Chipre pirausriig, Cristo tru nøashib karua øriiløbe truigwane Bernabé cha wamig (trenchippe, “Isui meløben, isui inchimønrrai tabig waminchib nusrkain køn” taig).

³⁷ Tru møøma kan pirø tøgagua trunun yanabe, anwane srua arrua Cristo tru nøashib karua øriilø nøm asha martrai tranøbig køn.

5

Ananíasba, Safiraba isønrrab indigwan waminchib

¹ Inchen kan møg Ananías taiba, srai Safiraba kan pirø tøgagúigwan yanøbelø køn.

² Inchabe i møøbe nui sraimba misra, tru anwane tøbøtø tranrrab cha, wamincha, tøbøwane kørømara, Cristo tru nøashib karua øriilamay tøbøwandø nøm ashchai tranrrab srua ibig køn.

³ Inchen Pedrobe trenchibig køn:

—Ananías, ¿Satanás ñui manrrau nø kebya pasramisra, ñigan øyeekkatig martramab pasrøtirru? cha, ñi Espiritu Santon isab pasramig kønrrai, tru pirø yani anwan kerriguwan tranmøtø kørømara tranrrappe.

⁴ ¿Pirøbe ñuiwein kømuitarru? cha. ¿Katø yanen, tru angucha ñi asamig kømuitarru? cha. ¿Ñui manrrau chindimba øyeeg martrab isua pasramisrku? cha. Ñibe møguelan isab pasrømøtø, Tiuswan isan— chibig køn.

⁵ Inchen Ananíasbe iig trendaigwan mørabe, kwain peñiptinchibig køn. Inchen mayeeløba trunun wammøreløbe truba truba kørig kui inchibelø køn.

⁶ Inchen matsøreløbe amrrua, asrwan tamara pula, sørønrrab srua ambubelø køn.

⁷ Indiibe pøn ura wendau kørønyu Ananíaswei srai tru treeg purayaigwan chi wammørmø, kebarrubenba,

⁸ Pedrobe payibig køn:

—Eshkarra cha, tru ¿ñim pirøwan øyawei yaner cha trendaigwan trewei yangueh?— cha.

Inchen nøbe trenchibig køn:

—Øø, treweiwei yanøbwei indig køn— cha.

⁹ Inchene Pedrobe trenchiptinchibig køn:

—¿Ñim pailømisra chindimbarre treeg martrab isua pønrramisrke? cha, Señorwei Espiritun ke maig inchibig køtashchab ashchab inchib. ¡Ñiguen mør! cha, ñui kewan sørønrrab srua ambubeløbe chabguen yaskabyuguen amrrutan cha, mømbe ñungucha sørønrrab srua amrrun— cha.

¹⁰ Inchen tru urastø Pedroi srøb pulu Zafiragucha kwain peñiptinchibig køn. Inchen tru matsørelø kerruabe kwaikken wetørrawa, srua amba, keweim pulu sørabelø køn.

¹¹ Inchen tru iglesian kerriguelanba, katø mayeelø tru treeg purayaigwan wammøreløbelanba purø trømbøig kørig kui indamig arrubig køn.

Cristo nøashib karua øriilø chine asha kønrrai marøbelø

¹² Cristo nøashib karua øriiløbe misaamerai utu chine Tius nømbe pasrain kui ashchai mariilan maramba, kwaara asha kønrrai maramba inchibelø

køn. Inchen Tiuswei ureemerabe Salomónwei Yaskabyu mayeeløba maig isuppe, treeg kandø isua tulundzunabelø køn.

¹³ Inhendø katøganeløbe nøm̄babe linchab inchimeelø køn, tru maya misaamerabe nømune truba truba tab inchib tøgagúingucha.

¹⁴ Inchen misamera Señorwan kør̄ebeløbe møguelø lata, ishumbur lata katøguchinguen katøguchinguen nemisrøb ambubelø køn.

¹⁵ Incha kwanrreelanguen tru puraambub lliraiḡ calleswan camamerayu, tsigalmerayu srua amrrua pøn̄srøbelø køn, Pedro puraiḡben, nui pør̄r mõiitøguen møigwan køben kwanrreelaim pala kasrøn̄rai.

¹⁶ Inchen Jerusalén ciuda puluwansreelø misag truba nør̄rø amrrubelø køn, kwanrreelø køben, trømbøiḡ maringarub kwaimandziimera tōgar kan mandøguen køm̄ui inchibelø, treelø køben sruar. Inchen mayeeløba tamariilø købelø køn.

Pedroba, Juanba kaig indiilø

¹⁷ Inchen maya sacerdotesperan nø karub sacerdoteba, saduceosmeraingateelø truyu nøba purrabeløba purø pusrkwai ashptø namig kurra,

¹⁸ Cristo nø ashib karua øriilane merrarrawa tru kailan keeri yau keerøbelø køn.

¹⁹ Inchen kan Señorwei ángel tru keeri yau yaskabmeran yem kura, wambiisrø wesrawabe, trenchibig køn:

²⁰ –Amba, Tiuswei yau pøn̄ramisra, i srøiḡ øsig køm̄igweimburab wamwan misaameran trunun kerrigu eshkab waminday– cha.

²¹ Inchen nøm̄be iigwan mør̄abe, yandø tør̄-rabene, Tiuswei yau kebamba, kusrenanøb mendabelø køn.

Tru inchib køm̄netø tru maya sacerdotesperan nø karub sacerdoteba, truyu nøba purrabelø katøganeløba amba, tru Setenteelø maig maramigwan asha marøbelan tulundzuningarubelø køn, katø tru maig maramigwan ashibelø israelitasmerai kølli misaameran mayamba. Inchabe tru kailan keeri yau purrabelan nøm̄uimay merrana, amrrunrabelø ør̄obelø køn.

²² Inchen policíamerabe amba, tru kailan keeri yausrøm̄be muganug pua, katøle amrruppe, treeg wam srua amrrubelø køn:

²³ –Truyube mugucha chindamgaig kasraig pasrøben, wegør̄røm̄n̄rai, ashibeløgucha yaskabmerayu pøn̄røbendø, yaskabmeran nam kurene, umbusrøm̄be mugucha kaagøptindig køn– cha.

²⁴ Inchen iigwan mør̄abe, tru Tiuswei yau policíameran ashib pera pasrabiiba, sacerdotesperan karubeløba, jkan paare! øyeebe mandø kermab isubelø køn, kan øyeebe chugatig punrrai indamab isubgue.

²⁵ Trunetø møikkøsrøn trenchib puptinchibig køn:

–Ñim tru merrarrawa keerig møgueløbe Tiuswei yau misagwan kusrenanøb purran– cha.

²⁶ Inchene Tiuswei yau policíameran ashib pera pasrabiibe, nui policíameraba ya, Pedronba, Juanwanba katø merrana ambendø, maig købash tsag inchimøtø merranøbelø køn, kaguen misamera nøm̄mun srug muta petamigwan køriimata.

²⁷ Incha merrana amrruabe, tru Setenteelø maig maramigwan asha marøbelai merrab pøn̄srøben, maya sacerdotesperan nø karub sacerdotebe, trenchib payibig køn:

²⁸ –Yamba nambē ñimune Jesúswei munchiyube kusrenanmøn̄rai, ¿kandø mera pasrøb mørgøppeh? cha. ¿Ñimbe chi margue? cha. Ñimbe Jerusalén

ørøba ñimui kusrenanigwan larrøbitsingarua, tru mōwan kweecha ani lusigwane namungøba, namungøba kemesrøtan— cha.

²⁹ Inchen Pedroba, katøgan Cristo nøashib karua øriiløba løtappe trenchibelø køn:

—Namuimbe Tiuswanmerrig møramig køn cha, møguelø taigwan kømøtø.

³⁰ Ñim kurusyu mesra kweetsig tru Jesús wandøwei namui merrabsrø kølli misaamerai Tiusbe katø øsiirangaruig køn cha.

³¹ Incha Tiusbe nune purø nuig kønrrai marøb nui kusrmay wanganua, Kerrigu Nø Merrab Pasrabig, Kaigyugurri Wesrabig kønrrai marig køn cha, Israel misaameran nømui kaig mariilan isua møra, Tiusweimay Iliranrrai marøb, katø nømui kaig mariilan ulø payamig kømønrrai marøb inchaimba, treeg marig køn chibelø køn.

³² Nambe øyeeg purayaigwane namashib asha pønrrer cha. Inchen nun tru mørøbelan Tius tranig Espiritu Santo chigucha asha pasrainrrun— cha.

³³ Inchen iigwan mørøbeløbe, truba trømbøig nama, kwetchab inchibelø køn.

³⁴ Inchen kan møg tru Setenteelai utuig kan fariseo Gamaliel taig, tru maig maramigwan martrai Moisés pørigwan kusrennøbig, maya misag nune mu chi taimig, kurra pasramisra, tru Cristo nøashib karua øriilan kan petøzhiitø wambig wesrangaruabe,

³⁵ nømune trenchibig køn:

—Namui Israel møguelø, purø ashiptø maray cha, i møguelan ñim chi martrappe.

³⁶ Ñimnguen isuy cha, mana kørøn kan Teudas taig ‘kan truba nu kusreb møg kur’ chibig kurrøben, truigwanma møguelø cuatrocientos mendig amønaig køn cha. Inchendø nune kweechen, mayeeløba mendig amøñibeløbe chab tarømisren, chab pinig køn cha.

³⁷ Katø wendøsrø misag mayan køtashchab munchi tulishib kwalømmerawan galileasrig Judas kurra, misag nui mendig amøñinrrabelø truba nu pera kurrig købig køn cha. Indig truig chigucha kwaben, mayeeløba mendig amøñibeløbe nørøtø chab tarømisrig købig køn cha.

³⁸ Inchawei møi øyeeg puim pasrøbene, nabe ñimun trendamønrrun cha: Tru møguelane kagøbanshippa, ñimnguen ka ambasay cha. Kaguende tru nøm chi martrab isua tøgagúig nøm chi marøb amønaibe, ka møguelaindø kuisruandøbe, patsønrrun cha.

³⁹ Inchen Tiuswein kuisruandøbe, ñimbe pinishinrrab kaimanrrun cha. Inchippa ñimbe Tiusba kwayanrrab inchib pønrrabgun— chibig køn.

⁴⁰ Gamaliel wamindiibe treegwein kuitamab isua, Cristo nøashib karua øriilan wama, ichabetabe, Jesúswei munchiyube mas waminchimønrrai mera, yandø elachibelø køn.

⁴¹ Inchen nømbe tru Setenteelø maig maramigwan asha mørøbelai merrabgurri, truba kasrag webamba ambubelø køn, Jesúswei munchigurri øyeeg kaig indinab pønrrambuawei pønrrønrrai Tius i nømun treeg pønnsraig kuitamab isua.

⁴² Incha nømbe kwalømmørig, kwalømmørig Tiuswei yau kusrenanøb, katø yamørig kusrenanøbelø køn, tru tabig srø wambe, Jesúsbe tru Cristo køn chib, maikken elachimøgue.

6

Tiuswei ureemeran chi palabigwan ashchabelø sieteelø wesrawa pønrsailø

¹ Inchen tru kwalømmerawan Jesucristoi kusrenanigwan marøb melabeløbe nørro nemisrøb iben, judíosmera griegosmerai wamwan waminchibeløbe mørønnatø waminchib namig kurrabelø køn tru judíosmerai wamwan waminchibelane. Tru kelø peta kwailø nømui utueløbe, kwalømmerig mamig pirishiyu chi lata asiimeelø køn chib.

² Inchen Cristo nøashib karua øriilø tru doceeløbe, tru nu misag Jesucristoi kusrenanigwan marøb melabelan tulundzuningarua trenchibelø køn:

–Nam Tiuswei wamwan eshka kusrenanamigwan elacha, mishatsigu tru mamig pirisamigu ashib pønrramibe søl kømøn cha.

³ Inchawei, namui nunelø, ñimui utu siete mөгuelø lawa wesruy cha. Muguha øyeelø køn tainab pønrrømeelø, Espiritu Santotø netsailan, maig kønrrabigwan asha maram kusrebelan. Incha truilan i maramigwan trana pønrsønrrab cha.

⁴ Inchen nambe namuimburappe Tiusba wamindamigwan elachimø marøb, katø Tiuswei wamwan eshka kusrenanøb amøñibig amøñinrrab—cha trenchibelø køn.

⁵ Øyeeg chibene, tru misag sötø nu pasrabigwane truba tabig mørøraben, Esteban tru nui isubigwan Tiusweinuutø newan tøgä pasrabig Espiritu Santotø netsaig mөwan lawa wesrabelø køn. Trugurri Felipen køben, Procoron køben, Nicanorwan køben, Timónwan køben, Parmenaswan køben, kan mөг antioquíasriig tru Tiusweiwan judíosmera marøb pønrraigu puraarruaig Nicoláswan købengue.

⁶ Incha yandø tru Cristo nøashib karua øriilø docelaimay pera amrruben, nømbe Tiusba wamincha, nømui tasiimeran truilm pala nөmun tabig kønrrai estsarøbelø køn.

⁷ Inchen Tiuswei wambe mas mas larrøbichib iben, Jesucristoi kusrenanigwan marøb melabeløbe Jerusalénsrø nørro nemisrøb arruben, sacerdotsmeraguen truba yam nømui isubigwan Tiusweinug pasra tögagønrrab pønrramisøbelø køn.

Estebanwan kailan keeri yau pasrtrab srua ambub

⁸ Inchen Esteban Tiuswei tru ka yandø tab indigwanba, katø maramburab maramigwanba newan tögä, trube kwaara asha kønrrai maramba, Tius nøba pasrain kui ashchai purø nørreelø mariilø maramba inchibig køn, tru misaamerai utu.

⁹ Inchen mөilögösrøn mu karuimig “Elatiilø” cha wamiilai tulundzuni yagurrielø namig kurrabelø køn, sirenesreelø køben, alejandriasreelø køben, ciliciasreelø køben, Asia pirausreelø køben misra, Estebanwan ‘¿Maig kø?’ chib, payiyab.

¹⁰ Inchendø Esteban kusremburab kusrebig kuigwanba, Espiritu nun wamingingaruitøga wamingigwanbabe, muguen kanab waminchab kaimabelø køn.

¹¹ Inchabe kan mu mөгuelan køsrøn an keta tranøbelø køn nөmuingatø misra, øyeeg chinrrai: “Nambe Moiséswan purø trømbøig wami mørøb, Tiuswan purø trømbøig wami mørøb inder” chinrrai, tru Estebanbe.

¹² Inchabe truiløbe misaameran køben, katø misagwan karubelø kølli misaameran køben, tru Moisés pørigwan kusrebelan køben, ke nөm isuigwan marøb kønrrai inchen, truiløbe namig amrrua, kemøra, tru Setenteelø maig maramigwan asha marøbelaimay srua ambubelø køn.

¹³ Katø trugurrimbe nømui kaptøga maig kui ashmubendø, isa waminchabelø øyeeg chibelø pera amrrubelø køn:

—I mōðbe chu uragucha i Tiusweyasiitō tarōmarig tab yawanba, katō tru maig maramigwan Moisés pōriilanba, trōmbōig tsalō wami mōrer chib.

¹⁴ Kaguende nambe trendai mōrer chib: “Tru Nazaretsrō Jēsūsbe i Tiuswei yawane pinishib, Moisés namun maig martrai karua kōrrōmariilane chishtō yunōmarōb inchun” tan mōrōb inder— chibelō kōn.

¹⁵ Inchen mayeelō tru Setenteelō maig maramigwan asha marōb purrabelō Estebanwan ashene, nōmbe nui malōbe kan āngelwei malō lataig kui ashibelō kōn.

7

Esteban nō ‘treeg mara pasrōmur’ chib waminchib

¹ Inchen tru maya sacerdotesteran nō karub sacerdotebe Estebanwan trencha payibig kōn:

—¿Isa kōmō, nōm trenchib kuibe treeg kuitarru?— cha.

² Inchen nōbe trencha lōtabig kōn:

—Nai misaamera, nai kōlli misaamera, nan mōrtray cha: Tius tōrguegwalmabiibe namui kōlli misag Abrahamwan Harán pirausrō tsunrrab imōwatō, Mesopotamia pirau kenamisrig kōn cha.

³ Inchabe trendaig kōbig kōn cha: “Nui pirōwan elachib, ñui yauelan elachib, na eshkam pirōsrōmay inrrō” cha.

⁴ Inchen Abrahambe Caldea misaameraim piraugurri webya, Haramsrō tsunrrab iben, yandō mōskai kwabene, Tiusbe Abrahamwan mōi ñim waraim pirausrō tsunrrai ōrig kōbig kōn cha.

⁵ Inchendō nune i pirōwan nui srōb trarramikken, nuyasiibe keta tranmuig kōn cha. Inchendō nune ‘i pirōwane tranrumōn’ cha kōrrōmisrig kōbig kōn cha, katō nuinukkurri karrab misaameraimba. Tru urasbe Abrahambe nusrkainguen chigaig kōbenbatōsrōwein kōbig kōn.

⁶ Incha Tiusbe trendaig kōbig kōn cha: “Nuinukkurri karrab misaamerabe peg pirausrō ka ambatō warōben, nōmune ka karua srua kuindiig melabelō kōmig kōnrrun cha, larrō kaig indinab cuatrocientos años ōrōba.”

⁷ Inchendō Tiusbe: “Tru nōmun karua srua kuindiig melōnrrai marōb misaameran nōmune maig kōnrrabigwan asha maramōnrrun cha. Inchen trugurrimbe yandō tru pirausrōngurri webamba, nōmbe i pirautōwei nane kōriibala tabig waminchib kōnrrun” cha.

⁸ Incha Tiusbe Abrahamwan tru circuncisión maram acuerdon tranig kōn cha. Treekkurri nui nusrkai Isaac kal-labene, Abrahambe Isaacwan trune kwalōmyube asru circuncidabig kōn cha. Inchen Isaackucha nui nusrkai Jacobwan treetōwei maren, Jacobgucha nui nusrkalan treetōwei marig kōbig kōn cha, tru doce nusrkalō Israelweinukkurri karrab misaamerai mōskalan.

⁹ Tru Jacobwei nusrkalō namui merrabsreelōbe nōmui nuneg Joséwan pusrkwai ashib tsalō kōptō, Egipto pirausrōmay srua amrrai yanōbelō kōn. Inchendō Tiusbe Joséba pasrōwa,

¹⁰ nune chine puben isuig megainukkurri treetō megamōnrrai wesrawa, Egiptosrō rey Faraónwei merrab nōbe tab indamdiig kui asig kōnrraimba, katō larrō kusrebig kōnrraimba Tiusbe tranen, Faraónbe Joséwane Egipto pirau maya misagwan ashib karub wanrrai neera wannig kōn cha, katō nui purō nuig purō tab yawan chigucha kerriguwan nō ashchai.

¹¹ Inchen tru urassrō parō arrubig kōn, purō trōmbōig isuig melamig Egipto pirau ōrōba, katō Canaan pirausrōn chigucha. Inchen namui kōlli misaamerabe chigucha mamig kalawa kōbelō kōn.

12 Inchen Jacobpe Egiptosrømbe tirigu pønrran tai wammørabe, nui nus-
 kkalø, tru namui kølli misaameran ke srøsrøzhiitø ørøbig køn.

13 Incha katø wendø ambene, Josébe nui nunelane nøbe tru nømui nuneg
 kuin kui asingaruben, øyamay tru Egipto rey Faraónbe Joséwei misagwane
 numera kui nebua asig købig køn cha.

14 Incha Josébe nui mōskai Jacobwanba, nui yauelan mayamba Egiptomay
 amrrunrrai pertrab ørig købig køn cha, Kerrigu yauelø setenta i cincuelan.

15 Pøs øyamay Jacobpe Egiptomay yaig købig køn cha, tru nø lata namui
 merrabsrø kølli misaamera lata chab kwaisrømay.

16 Inchen nømui asrmerane Siquemsrømay srua ambig købig køn cha, tru
 merrabsrø Abraham Hamorwei nusrkalan søramig anwei penig pasrabigu,
 Siquem pirausrø sørønrrab.

17 Inchen yandø, Tius Abrahamwan nø treeg tranrrab cha kørømisriibe
 pumig yandø lutaurab køben, Israel misaamerabe Egipto pirau nørø
 larrøbichib nurab yaig købig køn cha.

18 Inchen Egiptosrømbe kan rey Joséwan ashmíig ashib karunrrab pølbasa,

19 tru reybe sèratø purø møg isua, namui misaameratøga møg inçhib
 pasrøwa, namui kølli misaamerane maig købash indig købig køn cha, tru
 nømui srø kal-laig møg-ureezheelan kweetsingarub.

20 Inchen tru kwalømmerawan Moisés kal-labig køn cha, tru unøbe Tiuswein
 kabyu larrø tab unøzhig. Inchen mōskaløbe nømui yau pøn pølgatig nurana,

21 yandø kwanrrai elatsamig nebuben, Egipto reywei nimbasr tru unan
 wetørrawa, nui nusrkawan lataitøwei nuranig købig køn cha.

22 Inchen Moisésbe tru Egipto misaamera maig kusrebelø køben, treeg
 kusrenanig kusreweig købig køn cha, trurrigu wamindiløyu lata nui çhi
 mariiløyu lata purø nuikke.

23 Incha yandø cuarenta años tøgaig misra, Moisésbe nui manrraube nui
 misag israelitasmeran ashchab inrrab isuig købig køn cha.

24 Inchen truyu kan egipcio israelitan truba kaig inchen ashabe, purømisra,
 Moisésbe truburø ulø payib tru egipcione kweetsig købig køn cha.

25 Øyeeg kaig indinab melainukkurri Moisés nømun pera webinrrai Tius
 pasrigwan nui misaamera truigwan nebua ashçhaitamab isua inçhene,
 nømbe treeg kønrrabig kuitamappe isubguen inçhimeelø køn cha.

26 Inchen katø kwalømbe pailø israelitasmera kwayab kuin køben, Moisésbe
 tammay kørømartrab isua, trenchibig køn: “¡Au ñimbe! ¿Mu peguelø kømøtø,
 ñimisaatøwein køn cha, kangurrin kangurri chindimbarre øyeeg kaig inçhib
 køgue?” cha.

27 Inçhene tru kanun kaig marøbiibe Moiséswane trawagucha trenchibig
 køn: “¿Ñi namun ke ñi asha karubig kønrraimba, katø maig kønrrabigwan ñi
 asha marøbig kønrraimbabe ñune treebe mu pasrta? cha.

28 ¿Kabe nangucha marig kwaløm egipcion latawei ñune kweechig køtah?”
 cha.

29 Inchen Moisés trunun mørabe, Madian pirausrømay trubab ya,
 trusrømbe kan peg pirausrig lataig tsubig køn. Incha trusrø pagatø nusrkalo
 tøgagúig købig køn.

30 Indig truig yandø cuarenta años puraiben, Sinaí Tun pulu mu misag
 warab waraimønuç Moiséswan kan ángel kaldusr naarabigu kenamisrig køn
 cha.

31 Inchen Moisésbe tru treeg kenamisrigwan ashabe, truba kwaara, ashchab katøguchi kemallene, Señorwei wam trenchib mørø waminchibig køn cha:

32 “Nabe ñimui merrabsrø møskalai Tius kur cha, Abrahamwei, Isaacwei, Jacobwei Tius”. Inchene Moisésbe kørig køb itønab menda, kurrashmīg køn cha.

33 Inchene Señorbe trendaig købig køn cha: “Ñui srøbyu alpargatiswan wesru cha. Kaguende ñi pasraig pirøbe Tiusweindø tarømarig køn cha.

34 Nabe nai misag Egiptosrø yeeg isuig kullaarailø melaigwan tab ashib, katø purø murig nebuptø ke mulliptøø tranrrab melailan mørøb incha, wesranrrab kørraarrur cha. Møimbe jamø! taig købig køn, ñune Egiptomay ørtrumøn” cha.

35 “¿Ñi asha karubig kønrraimba, katø maig kønrrabigwan ñi asha marøbig kønrraimbabe ñune treebe mu pasrta?” chib, nøm trenchib kaashib kuig Moiséswandøwei, Tiusbe nømun nø asha karubig kønrraimba, katø treeg kaigyugurri pera webattraimba ørig køn cha, tru kaldusr naarabigu ángel kenamisrøbikkurri.

36 Inchen nøbe Tius nømbe pasrain kui ashchai maramburab mariilan marøb Egiptosrøngurri wesruig købig køn cha, mar Rojoyu lata, mu misag warab waraimønug lata cuarenta años ørøba treeg marøb.

37 Mu peg kømøtø, iibe tru Moiséstøwein køn cha israelitasmeran øyah chibig: “Tius maig karuigwan kan eshkabig nan kusrub lataitøwei, Tiusbe ñimui misag utugurrindøwei kusrunrrun” cha trenchibig.

38 Moisés nøtøwein kuig køn cha, mu misag warab waraimønug, tru israelitasmera kanbalatø amrrub købeløba pasrab, katø Sinai Tunyu ángelba waminchib, katø nømui merrabsrø kølli misaameraba pasrab inchibiibe. Incha nøbe tru øsig køm wammeran utig købig køn cha, tru namun tranrrab.

39 Inchen namui kølli misaamerabe mørøg kømui inchib, kaasha, nømui manrrøwane ke Egiptosrøndø pasra købelø købig køn cha.

40 Incha Aarónwane trenchibelø køn cha: “Namui merrab amrrabelø namuyasig tiusmera mar cha. Kaguende Egipto piraugurri namun wesrabig Moiséswane chindinguen mørmer” cha.

41 Inchabe tru kwalømmerawan kan toro-unø mara pasra, truigweyasig animalmera kweecha, tranig købig køn cha. Inchabe tru nømui tasiitøga mari tiuswane truba kasraarab tøgagøbelø køn cha.

42 Treeg inchen, Tiusbe nømuinukkurri tarømisrøppa, chigøben srømbalasarø chigurrimbunø pønrrabelan tius kui lataig kørribala tabig waminchib warønrraindø elachiptindig køn cha, Tiusbe. Inchawei Tius maig karuigwan eshkelai pøriiøyu maig taibe treeg køn cha:

“Israel misaamera ¿ñim mu misag warab waraimønug

cuarenta años ørøba ambub kua,

animal kweetsiilan tranøb,

katø chigøben nayasig kabe nan tranig kø chindah? taig.

43 Nan trani urasbe tru tius Moloc pasraig carpa yawan muta ambub,

tius Refánwei estrellan muta ambub inchibelø kømøgue taig,

kørribala tabig waminchib kønrrab,

ñimashib ñimui taska mariilan.

Treekkurri Babiloniatøguen kømø,

purø yabsrø warønrrai webetamønrrun” cha.

Tius trendaig købig køn cha.

44 'Merrabsrø namui kōlli misaamerabe mu misag warab waraimørø amøñib uras, Tius nø pasrai carpa ya tabzhigwan tōgar kōbig kōn cha, Tius tru Moiséswan maig karuig kōben treekke, Moisés maig asigwan tru treezhigwei maringaruigwan.

45 Inchen merrabsrø namui kōlli misaamerabe tru yawan nōmun ketig uta, Josué tru nø karubig kōben, tru judíos kōmø misaamera waraisrø muta kebambig kōn cha, Tius tru namui kōlli misaamerai merrabgurri tru judíos kōmø misaameran nōmuim piraugurri webetiisrø. Inchen tru carpa yabe David tsub kwalømmerawangatig trusrø pasraig kōbig kōn.

46 Tiuswein kabyu Davidbe tabig kui asig kua, nōbe Jacobwei Tius truyu pasrønrrai kan ya tranøbsrumugu cha, miaig kōbig kōn cha.

47 Inchendø Tiuswei yawan marøppe, Salomón marig kōbig kōn cha.

48 Inchen kōben Tius Mayeelaim Pala Pasrabiibe, mu mōguelø taska mari yamerayu pasrømlig kōn cha. Tius maig karuigwan eshkabig øyah taimbala:

49 "Srømbalabe na wamisra waig kōbene,
pirøbe na itøbuna waig kōn cha.

¿Nayasiibe maig ya martrab inchigue? cha.

¿Na israb wamibe chu kōh? cha, Señorbe.

50 ¿Kerrigu ilane nai tasiitōga marig kōmuitarru?" cha trendaig.

51 'Incha waminchibig wamincha Estebanbe trenchibig kōn: Ñim kui ke purab, purab pønrramisrøb misaamera kōn cha, manrraube nōsken kebati mørmeelø, mōramig kalugailø latalilø. Incha chu uragucha Espiritu Santone mōrøg kōmub purø mur pønrrabelø kōn cha. Ñimui kōlli misaamera mailø kōbig kōben, ñim treeløtøwein kōn cha.

52 ¿Ñimui kōlli misaamerama Tius maig karuigwan eshkabelan kabe kاندوغuen chi kaig marmeelø tabelø kōbig kuitarru? cha. Tru Kerriguwan Sølgandiig attrabigweimbura manawei eshka amrrubelane nōmbe kweet-sig kōbig kōn cha. Inchen mōi truig arrubene, ñimbe kailø kōptø tsaleelain-gatø pønrramisra, kweetsan cha.

53 Tru maig maramigwan martrai Moisés pøriilan ñimbe ángelesmeragurri uta tōgar kōbendø, truigwane chiweinguen mōra marmeelø kōn – cha, trenchibig kōn Estebanbe.

Esteban kwaigwan waminchib

54 Inchen øyeeg tailan mørøppe, nōmui manrraube ke kan chinchimmørø inchib purø trømbøig namig kuilø, ke trugulwandø tsacha mørøbelø kōn, Estebanwan namig kōbiitø.

55 Trune Estebanbe Espiritu Santotø netsaig srømbalaneb neeshabe, Tiuswei tōrguegwalmabigwan ashib, katø Jesúswane Tiuswei kusrmaygatø pasramisra pasrai ashib inchibig kōn.

56 Inchabe trenchibig kōn:

—¡Asay! cha. ¡Srømbalamerabe kurin pønrrøben, Møg Misra Arrubiibe Tiuswei kusrmay pasrai ashar!— cha.

57 Inchen nōmbe nōmui kalumeran kasrøb truba mur trashib, ¡katø! mayamba Estebanweim palatø itø ambubelø kōn.

58 Incha ciudayugurri wegucha, sruutōga petabelø kōn. Inchen tru øyeeg punrrai waminchib kurrabeløbe nōmui kewagúilan wesrua, kan matsinø Saulo taigweim pulu warøbelø kōn.

59 Inchen tru nōm sruutōga petab kōmne, Estebanbe Tiuswan trenchib wamab miabig kōn:

—Señor Jesús, nai espíritun utørra— chib.

⁶⁰ Incha yandø tømønnsra mur trashib wamab trenchibig køn:

—¡Señor, nøm øyeeg kaig marigwan chi treeg marmuig kui lataig kørrømar!

— cha.

Yandø chab trenchabe, kwaptinchibig køn.

8

Saulo Jesucriston kørebelan kaig martrab pasraarøb

¹ Inchen Saulobe Estebanwan kweechen, kan øyeeg maramigweim palaig kuig kømømab isub pasrabig køn.

Inchen tru kwalømdøwei Jerusalénsrømbe iglesiyuelan purø trømbøig martrab yandø kønab kurrab mendøben mayeeløba Judea pirausrømay køben, Samaria pirausrømay køben, ke kan ørøtø chab ambubelø køn, Cristo nøashib karua øriiløtøh ammø Jerusalén ka kørrømisrøbelø køn.

² Inchen mø møguelø køsrøn Tiusweimburabelan maizhikken elachimø marøbelø Estebanwan isub truba kishib sørabelø køn.

³ Inchen Saulobe iglesiyuelan purø trømbøig inchib, pinishinrrab inchib, yamørig kebya, ishumburwan lata, møguelan lata kemøra, unchib waramatø srua webya, kailan keeri yausrø pønsrøbig køn.

Tiuswei wam Samariasrø larrøbitsig

⁴ Inchen tru Jerusaléngurri webamba ke kan ørøtø chab ambubeløbe chu amatøgucha Tiuswei tabig srø wamwan eshka kusrenanøbelø køn.

⁵ Inchen tru utuig Felipe Samaria ciudadsrømay ya, trusrø Cristoimburabigwan eshka kusrennøbig køn.

⁶ Inchen misaamerabe tulundzuna, Felipe maig wamindigwan mørøb, Tius nøba pasrain kui ashchai Felipe tru mariilan ashib, mørøb inchabe, mayeeløba ke kandø isub, Felipe wamindigwane truba truba tab mørøbelø køn.

⁷ Kaguende truba yam misaamerainukkurri trømbøig maringarub kwaimandziimera purø trømbøig trashib webamben, katø truba yam kønønrab kaima warabelø køben, cojosmera køben, tamariilø købig køn.

⁸ Trugurri misaabe tru ciudadyube truba truba kasraarabelø køn.

⁹ Inchen manasrøngurri kan møg Simón taig tru ciudadyube tsubig køn, kaig libron kusrewa, kwaimandzigweimburabigwan marøbig. Samaria misaameran chine mariiløtøga chull asøskøb, nøbe purø nuig misrøb tsubig køn.

¹⁰ Inchen nune mu amrubiitøgucha, kusrebelø lata, chi treeg kømeelø lata nø chi martashchab ke nundø ashibelø kua, trenchibelø køn:

—I møøbeguende Tiuswei tru maramburab marig truig køn cha, tru “Purø Nuig”, kui asig.—

¹¹ Incha nune ke chi martashchab ashib melabelø køn, kaguende tru nø magia kusrewa mariiløtøga manasrøngurri nømune keerøba, kwaara ashib kønrai mara srua køben.

¹² Inchen Tius nø ashib karub wainuguig tru tabig srø wamwanba, Jesucristoi munchiwanba Felipebe eshka kusrennen, trunun kørewabe, ishumbur lata, møguelø lata piu umbu ulsrøbelø køn.

¹³ Inchen tru Simóndøweinguen trunun køreb, piu umbu ulsraig køb incha, Felipeba lincha, uñibig køn. Tius nøba pasrain kui ashchai Felipe mariilanba, katø nø maramburab truba nørreelø mariilanba ashabe, Simónbe truba kwaarøb uñibig køn.

14 Inchen Cristo nøashib karua øriilø Jerusalénsrø warabelø tru samarias-reelø Tiuswei wamwan uta pønrramisrin køn tai wammørabe, Juanwanba, Pedronba trusrømay ørøbelø køn.

15 Inchen nømbe trusrø puabe, tru kørebelø Espíritu Santon utønrrai, Tiusba waminchibelø køn.

16 Kaguende møigwandøgucha nømuim palabé Espíritu Santo køræarrumø srø køben, Señor Jesúswei munchiyutø piu umbu ulsrailø købig køn.

17 Incha Pedroba, Juanba truilaim pala tasigwan estsaren, Espíritu Santon utabelø køn.

18 Inchen Cristo nøashib karua øriilø tasigwan truilaim pala estsara, Espíritu Santon kanelan trani ashabe, Simónbe ‘an pagararruah’ chibig køn:

19 –Nangucha øyeeg maramburab maramigwan tranrra cha, nangucha møigweim pala køben nai tasigwan estsarene, truiþe Espíritu Santon utønrrain – chib.

20 Inchene Pedrobe trenchibig køn:

–Ñui anbe ñiba tøgatoþ pinøbash cha. Kaguende Tius keta tranigwane ñibe andøga pena tøgagømdiig kuitamab indan cha.

21 Ñibe namui utube chi asamig kawei, chi marøþ unamig kawein køn cha. Kaguende ñui manrrøbe Tiuswein kabyube chi sølgandø tabig kømøn cha.

22 Inchawei iig øyeeg trømbøig isuigwan isua møra, Tiusweimay llirau cha. Incha ñui manrrau øyeeg isuigwan Tius ñun ulø payiimig kønrrai treeg mara kørromartashchab Tiuswan miau chibig køn.

23 Kaguende ñibe purø trømbøig kan køndzø srurri lataig møbgøliitø netsaig kui ashib, katø kaig maramigugurrimbe webinrraingaiþ pasrig kui ashib inchar– cha.

24 Inchene Simónbe trencha løtabig køn:

–Señorwan nayasiþ ñim miarray cha. Ñi møi øyeeg chib pasrailøbe møikken nan treeg nebumønrrain– cha.

25 Incha nømbe maig købigwan eshkaþ, katø Tiuswei wamwan eshkaþ waminchib kuabe, Jerusalénmay katø amrrubelø køn tru Cristo nøashib karua øriiløbe. Incha Samariasrø truba yambalø misaamera tsitsø warabsrø, tru tabig srø wamwan eshkaþ kusrenanøbelø køn.

Felipeba, kan Etiopíasrø møþba

26 Inchen Felipeimburappe kan Señorwei ángel Felipene trenchib waminchibig køn:

–Kurra, Jerusaléngurri Gazamay kørreb maywan tru pørr pineppurab inrrø– cha. Truiþe tru mu misag warab waraimø may køn.

27 Inchene Felipebe kurrab ibene, mayube kan Etiopía pirausrø kan møg eunuco katabig køn. Truiþe, Etiopíasrø reina Candacei kan møg karubig nui reinai anwan kerriguba nø esegabig købig køn. Nøbe Jerusalénsrø Tiuswan køriibala tabig waminchab ya,

28 trusrøngurri katøle arrub pasrappe, kaullimera sruiþ karruyu Tius maig karuigwan eshkaþig Isaíaswei pørigwan leþ arrub pasrabig køn.

29 Inchen Espíritu Santobe Felipene trenchibig køn:

–Wetøga ø karruyu kemalla linchi– cha.

30 Inchen Felipebe luløþ ya, wetøgabe, Tius maig karuigwan eshkaþig Isaías pørigwan leþ arri mørøþig køn. Inchabe Felipebe trenchibig køn

–¿Ñi leþ arrigwan chi taig mørtirru?– cha.

31 Inchene nøbe trenchibig køn:

—¿Kan nan mu ‘øyeeg køn’ cha eshkamubene, nabe mandø kui møramø?—
cha.

Incha nøbe Felipen:

—Tiusmanda naim pulu wanrrab nebamø— chibig køn.

³² Tru Tiuswei wam pørigwan nø leb arriibe iig købig køn:

“Kan ubishawan latawei kwetchab srua ambig køn cha.

Inchen isig parøb kømne,

kan ubisha-unø niløtø tsub lataitøwei,

nøgucha manchibgucha inchimuig køn cha.

³³ Incha nømui merrab israbig luchimubashtø niløtø megaben,
tru sølgandø tabigwan nune treeg asha martrab inchimøtø,

kagøbashiptindig køn cha.

Nuinukkurri katø srøig misag karrab kurrønrrun tamibe kaanrrun cha.

Kaguende nui øsig kuigwane yu piraube kerraig købig køn” taigwan.

³⁴ Incha tru eunucobe Felipen payibig køn:

—Tiusmanda eshkarra cha, ¿Tius maig karuigwan eshkabig nøasiitøwein
trenda chindah, kabe mu katøganun trenda chindah?— cha.

³⁵ Inchen Felipebe tru nø Tiuswei wam pørigwan leb yaigwan truyugurri
pølbasa, Jesúswei tabig srø wamwan eshka kusrenanøbig køn.

³⁶ Incha maywan ambub kua kan pi wabnug puabe, tru møøbe trenchibig
køn:

—Yube pi wan cha. ¿Na piu umbu ulsraig købsrutah?— cha.

³⁷ Inchen Felipebe trenchibig køn:

—Ñi ñui manrrau newan kørebene, treeg marig kønrrun— cha:

—Inchen møøbe trenchibig køn Jesucristobe Tiuswei Nusrkain kui isua
pasar— cha.

³⁸ Incha nøm ambub kuin karrun Felipebe tru mowan pasramisingaru
chibig køn. Incha pailøba piunday pinaamba, Felipebe nun piu umbu ulsrøbig
køn.

³⁹ Incha piugurri webambene, Señorwei Espiritube møi møi Felipen kusrua,
srua iben, tru møøbe Felipen mas ashippe ashmendø, nui maywan kasrag
inraubig køn.

⁴⁰ Incha Felipebe Azoto ciudasrø pasraptindinaben, trusrø Jesucristoi
tabig srø wamwan ciudamørig eshka kusrenanøb pureb ya, Cesarea ciu-
dasrø pubig køn.

9

Saulon Tiusbe peemayig kønrrai yunømarig

(Hch 22.6-16; 26.12-18)

¹ Trune Saulobe tru Jesucristoi kusrenanigwan marøb melabelane kaig
maramigwanba, kweecha petamigwanbabe namig købiitø ke chinchimmøø
inchib uña, treekkurri maya sacerdotesmeran nø karub sacerdoten ashchab
yaig køn.

² Incha Damascosrø tru judíosmera tulundzuni yamerasrø treeg marøb
kebyamig kilgamera pøriilø tru sacerdotesmeran karubigwan miabig køn,
tru srø maywan amrrab pønrramisra pønrrabelane ishumbur kui lata møguelø
kui lata, Jerusalénsrø kailan keeri yau pønrrønrrab srua yamig kønrrai.

³ Incha ib menda yandø Damasco pub lutausrø ibene, ¡katø! møi møi
ningatanbe srømbalarøngurrimbe kan tørgwalmabig arrua, nuin pøtøgatan
piløben,

⁴ Saulobe pirau peña tsua, kan wam trendaig mørøbig køn:

—¿Saulo, Saulo chindimbarre nane kaig marøb lliragu?— cha trenchibig.

⁵ Inchene Saulobe trenchibig køn:

—¿Señor, ñibe mu kugu?— cha. Inchene nøbe trenchibig køn:

—Nabe Jesús tru ñi nan kaig marøb unig, truig kur cha.

⁶ Kurrab, Damasco ciudayu kebinrrø chibig køn. Truyube ñi chi maramigwan ñune eshkanrrun— cha.

⁷ Inchen møguelø Sauloba ambubeløbe truyutø pønrrambua, ¡katø! wamguen piniilø pønrrabelø køn, mungucha ashmubendø, wamindigwan møra.

⁸ Inchen yandø Saulone piraugurri kusraben, kabwane kurendø, chigucha ashchab kaimabig køn. Inchen kwalyu kemøra, srua Damascosrømay ambubelø køn.

⁹ Truyube pøn kwaløm ørøba ashchab kaimabwei, manrrab kaimabwei mutchab kaimabwei inchibig køn.

¹⁰ Damasco ciudadyube kan Jesucristoi kusrenanigwan marøb megabig Ananías taig tsubig køn. Inchen truigwane Señorbe kan piab lataigu kenamisra, trenchibig køn:

—¡Ananías!— cha. Inchene nøbe lötappe:

—Señor, yu war— cha trenchiben,

¹¹ Señorbe nune trenchibig køn:

—Kurra, “Ølgandø” cha wamin callewan pureb inrrø cha. Incha Judaswei yau puabe: ¿Kan møg tarsosriig Saulo taig wah? cha, payrrig chibig køn, truipe Tiusba waminchib wan cha.

¹² Tru møøbe kan piab lataigu asin køn cha, kan møg Ananías taig kebarruabe, nui kabmeran katøle pilønrrai, nuim pala tasigwan estsarøbig.—

¹³ Inchene Ananías iigwan mørøppe trenchibig køn:

—Señor, i møweimburappe, mugøben wamindi wammøra kur cha, ñui misaameran Jerusalénsrø chitø, chitø kaig marøb uniilan.

¹⁴ Møima yusrønguen mayeelø, ñui munchiwan wamab tøga pønrrabelane merrarranrrab sacerdotesmeran karubelø nun treeg martraí ørig arrin køn— cha.

¹⁵ Inchene Señorbe trenchibig køn:

—Inrrø cha. Kaguende i møøbe na øyeeg marøb tøgagønrrab na lawa wesruig møg køn cha, judíos kømø misaameran køben, reymeran køben, Israelwei misaameran køben nai munchiwan asingarunrrabig.

¹⁶ Kaguende nabe nun kenamaramønrrun cha, nai munchigurri chugatig kaig nebuig megamigwan.—

¹⁷ Inchene Ananíasbe tru Saulo tsui yamay yabe, kebya, tasigwan nuim pala estsarabe, trenchibig køn:

—Cristogurri nai nuneg Saulo, Señor Jesús mayu arrub pasrøben kenamisrøbiibe ñi katøle ashibig misrøb, katø Espíritu Santotø netsaig kørømisrøb inchainba nan ørtan— cha.

¹⁸ Inchen tru urastø Sauloi kabmerayugurrimbe kalus pitis latailø kørøben, katø ashibig misrig køn. Incha kurrøben, Saulone piu umbu ulsraig køn.

¹⁹ Incha Saulobe maben, katøle nui asrbe tammisrøbig køn. Incha Damascosrø Jesucristoi kusrenanigwan marøb melabeløba mam kwaløm kørøben tsubig køn.

Saulo Damascosrø Tiuswei wamwan eshka kusrenanøb

20 Incha tru urastø Saulobe judíosmera tulundzuni yamerayu Jesúsweimburab eshkaab waminchib pølbarsøbig køn: “I Jesúsbe Tiuswei Nusrkain køn” chib.

21 Inchen mayeeløba mørøbeløbe truba truba kwaariilø trenchibelø køn:

—¿I møg kømmørgøppeh cha, tru Jerusalénsrø purø trømbø inchib pinish-inrrab inchibig, i munchiwan wamab tøga pønrrabelane? ¿Yusrømaybe tru inchabwei arrub mørgøppeh? cha, judíos sacerdotesteran karubelaimay merrarrowa nømun srua inrrab— chib.

22 Inchen Saulobe kusrenanøb eshkaimørig katøguchinguen katøguchinguen mur pasramisrøb ya, judíosmera Damascosrø warabelane, jkan paare! øyeebe mandø kuinguen mørmøwa kønrrai marøbig køn, Jesúsbe tru Cristo muniirab kuig, tru køn chib kenamarøb.

Saulo judíosmeran chinchamamub

23 Inchen yandø yam kwalømyu judíosmera Saulon kwetchab wamincha køben,

24 Saulobe wammørin købig køn. Incha nømbe yem, kwaløm ciudayu yaskabmerayubaguen larab, kwetchab muniirabelø køn.

25 Inchen nui kusrenanigwan marøb melabeløbe Saulone yem pera amrua, tru ciuda pøtøganat sruubirøbanrrig palaig marinug kan nu tasinyu waya, kørrøøreløbelø køn.

Sauloba, Señorurri nuneløba Jerusalénsrø

26 Incha Saulobe Jerusalénsrø puabe, Jesucristoi kusrenanigwan marøb melabeløba linchab inchen, mayeeløba kørig kui inchibelø køn. Kaguende nømbe køremeelø køn Saulobe Jesucriston kørewa unitamappe.

27 Trune Bernabébe nune kashmø uta Cristo nøashib karua øriilaimay pera ya, Saulobe Señorwan maysrø mandø nebua asigwan, Señor nun mandø wamindigwan, Jesúswei munchiyu Damascosrø chigucha kørmø eshkaab kusrenanigwan nømun eshkaabig køn.

28 Øyamay Saulobe nømbea Jerusalénsrø kebib, katø webarrub llirab uñibig køn.

29 Inchen Señorwei munchiyu chigucha kørmø, Tiuswei wamwan eshkaab kusrenanøb, katø judíosmera griegosmerai wamwan waminchibeløba waminchib, øyeebe maig kø chib payib inchen, trune nømbe nune kwetchabgøba larabelø køn.

30 Inchen nunelø trunun wammørabe, Saulon Cesarearøngatig lincha amba, truyugurrimbe Tarsosrømay øreløbelø køn.

31 Inchen Judea pirau kerrigu, katø Galilea pirausrø, Samaria pirausrø kerrigu iglesiabe ambumay imay tab købigwan tøgagøbelø køn. Incha nømbe Tiusweimburabeløyu nørrørab, Señorwei merrab køriibala amøñib inchibelø køn. Inchen Espíritu Santo purugub waminchib pasraitøgabe purø nørrø nemisrøb ibig køn.

Pedro Eneaswei kwanrrøwan tamarøb

32 Pedrobe truøø llirab uñabe, katø Tiuswei misaameran Lidasrø warabelangucha ashchab ibig køn.

33 Inchen trusrømbe kan møg Eneas taig kønønrrab kaimabig kua, ocho años ørøba camayu kwanrrø tsuben, Pedrobe pubig køn.

34 Incha Pedrobe trenchibig køn:

—Eneas ¡Jesucristobe ñune tamaran! cha. Kurrab, ñui tsuigwan kusru— cha. Inchen Eneasbe tru urastø kurrøben,

³⁵ mayeelø Lida pirausrømba, Sarón pirausrømba warabeløbe trunun asha, Señorweimay llirawa, pønrramisøbelø køn.

Dorcac øsiiraiowan waminchib

³⁶ Tru urassrø Jupe ciudayu kan ishug Jesucristoi kusrenanigwan marøb megabig Tabita taig, griegomaybe Dorcas cha wamig, tsubig køn. Tru ishube chigøben tabig maramelangøba marøb, katø chugurrin kømui melabelane purugub inchibig købig køn.

³⁷ Indiibe tru kwalømmerawan Dorcasbe kwanrø peñippa, kwaptinchen, yandø asrwan chab pirabe, pala katøgan pisorø kan salayu trarrøbelø køn.

³⁸ Inchen tru Lida ciudabe, Jope pulutø købene, Pedrobe Lidasrø unan tai wammøra, tru Jesucristoi kusrenanigwan marøb melabeløbe pailø møguelan trenchinrrai ørøbelø køn:

—Ke tiusmanda yu nam warainukkatig peba attra tan— chinrrai.

³⁹ Inchen Pedrobe truiløba kurrab ya, trusrø pubene, tru kwabig tsu-
isrømay pera amben, mayeelø kelø peta kwailøbe Pedroim pulu tulundzuna,
tru Dorcas øsig uña, kewa amønamelø køben, katø pala itøgueelø køben mari-
ilan eshkab truba truba kishibelø køn.

⁴⁰ Inchen Pedrobe mayeelan wambig webamingarua, tømønra, Tiusba wamincha, tru kwaig tsubigwan keesha ashabe, trenchibig køn:

—Tabita ¡Kurrø!— cha.

Inchen nøbe larraashippa, Pedron ashabe, kurra, wamisrøptinchibig køn.

⁴¹ Inchen Pedrobe tasigu kemøra, kusrua, Tiuswei misaameranba, tru kelø
peta kwailanba wama, øsiguig nømun kenamarøbig køn.

⁴² Inchen øyee marigwane Jope ciuda ørøba wammøra, møiløgøben
Señorwan truba nu kørebelø køn.

⁴³ Inchen Pedrobe yam kwaløm tru Jope ciudayu kørrømisrøbig køn, kan
møg Simón taig tru kalusmeran kullaarana, tabzhig tamarøbigwei yausrø.

10

Cornelio kan piab lataig asigwan waminchibig

¹ Cesarea ciudayu kan møg Cornelio taig tsubig køn, suldau “Søtøwan
Italiano” cha wamig søtøyu, tru suldau cienelan nø karub pera pasrabig.

² Truibe Tiuswan truba isua pasrabig Tiuswan køriibala marøb megabig
købig køn, mayeelø nui yueløba kerrigu. Katø misaameran chugurrin
kømuilian isua asha purugub tabig marøb, katø managucha Tiusba wamin-
damigwane pesannamø, marøb megabig købig køn.

³ Indiibe kan maaben las tres køsrøn kan piab lataigu Tiuswei ángel
tørgandø kenamisri ashibig køn, nø wainug kebarrua trenchibig:

—¡Cornelio!— cha.

⁴ Inchen Corneliobe ángelwan ke tab ashabe, truba kwaarig trenchibig køn:

—¿Señor, chinda?— cha.

Inchen ángelbe trenchibig køn:

—Tiusbe ñi nøba wamindiilan mørøb, katø tru chugurrin kømuilian ñi isua
asha purugub tabig mariilan pesannawa, wamøwei indan cha.

⁵ Møimbe Jope ciudasrømay møguelø ør cha, Simón taigwan wamønrrab,
katø nøbe Pedrogucha munchi køn cha.

⁶ Truibe katøgan Simónwei yau, ya peba tsun cha, Simónbe tru kalusmeran
kullaarana tabzhig tamarøbig mar pulu ya pasraig køn— cha.

⁷ Inchen tru ángel nun waminchibig iben latatø, Corneliobe pagatø nui karuindiig melabelanba, katø kan suldau nui trendø trag melabelai utuig Tiuswan truba isua pasrabigwanba wamabig køn.

⁸ Incha maig kuigwan nømun kerrigu eshkawabe, Jopemay amrrai ørøbig køn.

⁹ Indiiibe katø kwaløm Cornelio øriiø maywan ambub kua, yandø Jopesrø pub ambub køben, Pedrobe kwaløm tøbøtag lutau køsrøn wambig yabala Tiusba waminchab nebibig køn.

¹⁰ Inchen nune truba mag isub parøgwaben, nuyasig mamig nenøb kømne, kan piab lataig tøgagøbig køn.

¹¹ Srømbalabe kurim pasrøben, kan nu llensu lataig pib tsøbmerayu litsig piraumay kørraarri ashibig køn.

¹² Inchen tru llensuyube chi animalgurrimbunø tøgaig købig køn, pib srøppar køben, pirau srala amøñibelø køben, pala amøñib illimera køben ke.

¹³ Inchen kan wam trendai mørøbig køn:

—¡Pedro kurrab, kweecha, ma!— cha.

¹⁴ Inchene Pedrobe trenchibig køn:

—¡Señor, paare, kan treekkucha mana maramø! cha. Kan nabe managuen maimiig mamønrrai merigwan ma kømøwei, chish mariimiigwan ma kømøwein kur— cha.

¹⁵ Inchen tru wambe katøyug waminchippe trenchibig køn:

—Tius tabig chishig mara kørrømarigwane, ñibe mamgaig trømbøbig kønma abasha tøgagømøta— cha.

¹⁶ Treetø treetø pønmay kenamisren, tru llensune ¡katø! møi møi srømbalarømay kusruptindig købig køn.

¹⁷ Inchen Pedrobe tru nø piab lataig asiibe chi chibig kønrrabgøma ab isub, nuinetø mumayguen kømui wamnetø, Cornelio ørig møgueløbe Simónwei ya chuguín kui paya, yaskabu chabguen pubguen inchibelø køn.

¹⁸ Inchabe:

—Kua je chabe, payibelø køn: ¿Kan Simón, katø nundøwei Pedrogucha taig, yu ya peba tsuita?— cha.

¹⁹ Inchen Pedrobe tru nø piab lataig asigwan maig kermab isubsrø wamnetø, Espiritu Santobe nun trenchibig køn:

—¡Au! ñune pøngatø møguelø lab køn cha.

²⁰ Kurrab, yugurri kørraya, kan mandø inchab kømab isuptø pasrømøtø, nømba inrrø cha. Kaguende nømune na ørar— cha.

²¹ Inchen Pedrobe tru Cornelio øri møguelan wamønrrab ashchab kørraarruabe, trenchibig køn:

—Tru ñim lab kuibe, na kur cha. ¿Kan chindamig lataig palai amrrugue?— cha.

²² Inchen nømbe trenchibelø køn:

—Nambe Cornelio ørig amrruer cha. Truibe suldau søtø cienwan nø karub pera pasrabig, katø sølgandø tabig, Tiuswan køriibala pasrabig, katø truigwane maya judiosmera truba tabig køn chib wamindinab møg køn cha. Truigwane kan Tiusweindø tarømari ángelgurri maig indamigwan kenamarin køn cha, ñun nui yamay arringarua, tru ñi wamindigwan nø mørtraí.—

²³ Inchen Pedrobe kebera, ya peba kørrømara, katø kwalømbe nøbe truiløba kurra iben, nunelø tru Jopesrø warabeløgucha Pedron lincha ambubelø køn.

²⁴ Incha katø kwalømbe Cesareasrø pubelø køn, Cornelio nui nammisaam-eran køben, nui ke trendø linchibelan køben lincha cha pera munig waben.

25 Inchen Pedro yau pubene, Cornelioabe wamønrrab webarrua, nui merrab tømboñsrøb, kõiibala tabig waminchen,

26 trune Pedrobe nun trenchib kusrabig kòn:

—¡Kurra, pasramisr! cha. Nagucha ñi lataitøwei ka møøtø kur— cha.

27 Incha Pedrobe Cornelioaba waminchib, waminchib kebyabe, truba nu misag tulundzuna pasrain kui ashibig kòn.

28 Inchabe Pedrobe trenchibig kòn:

—Ñimbe ashibelø kòn cha, kan judíobe judío kømeelebabe linchimønrrai, merig kui. Inchendø nane Tiusbe kenamartan cha, mu misagwandøgucha chigucha kømíig kui lataig mara wamømøwei, køsøgønrrapteelø kòn tamig kømøwein kòn cha.

29 Inchawei treekkurri nan wamøben latatø, chi chib pasrømøtø, arrur cha. Inchawei ñimun payrrab inchar chibig kòn. ¿Chigurri nan wama ørig kuin kui?—

30 Inchene Cornelioabe løtappe trenchibig kòn:

—Pib kwaløm kòn cha, øya uras lata, tru las tres Tiusba wamindam ura købig købene, nai yau treuras na Tiusba waminchib wabene, mømimbe kan møg tørgwalmabig keweig nai merrab pasramisra,

31 trenchitan cha: “Cornelio, Tiusbe ñi nun wamindiilan mørøb, katø chigøben palai melabelan isua ashib purugub indiilan chigucha, Tiusbe pesannamø, isua kòn cha.

32 Inchawei Jope ciudasrømay karua ør chibig kòn, Simónwan wamønrrab, katøgan munchibe truigwane Pedrogucha taig. Truibe tru Simón kalusermeran tabzhig kullaarana tamarøbig mar pulu ya pasraigweinug ya peba tsun” cha.

33 Inchen nabe tru urastø ñuimay øriibe, manguen arrin kòn cha. Mømimbe mayeeløba nambe Tiuswei merrab purrer chibig kòn, Señor ñun chitø wamindingaruigwan nam kerriigu mørtrab.—

Pedro Cornelioi yau waminchib

34 Inchen Pedrobe waminchib pøllbasra, trenchibig kòn:

—Mømimbe ciertonwei wetøbeñar cha, Tiusbe møilane ørømara katøganelandø tab inchimøtø lata isubig kuin kui.

35 Misaamera nørro pønrrabig chu pirausreeløtøgucha nun kõiibala marøb, sølgandø tabig marøbigwane Tiusbe kashmíig kòn cha.

36 Tiusbe Israelweinukkurri amrrub misaameran chi isumø tab amønarnamig kønrrai marøbig tabig srø wamwan Jesucristogurri eshkab kusrenananig kòn cha. Nøbe Mayeelaim Pala Nø Karub Nø Ashib Pasrabig kòn cha.

37 Pøs ñimbe ashibelø kòn cha, tru srø wamwane Galileasrø pøllbasra, Judea pirau kerriguba wammøra kønrrai marig kòn cha, tru piu umbu ulsramigweimburaigwan Juan eshkab kusrenanikkurrimbunø.

38 Nabe tru Nazaretsrø Jesúsweimburab truigwan waminchar cha, Tiusbe nune Espiritu Santotøgaba, nui maramburab mariitøgaba itølushen, nøbe tabig marøb, nugwaimandzig mandøguen kømui melønrrai srua kuilan tamarøb unig købig kòn cha, Tius nøba pasraikkurri.

39 Inchen nambe Judea pirausrø lata, Jerusalénsrø lata, Jesús chitø mariilane nambe namashib chishtø ashibelø ker cha. Katø nune kurusyu mesra, kweetsig købig kòn cha.

40 Inchendø Tiusbe pøn kwalømyube katøle kusrua, nune kenamisringaruig kòn cha.

⁴¹ Ke maya misagwangucha kenamismøtø, tru maig kuigwan nømashib ashib pønrrabelan Tius tru manasrøwei nø lawa wesruilandø kenamisrig køn cha, Jesús tru kwaig tsua, katøle kwaitai utugurri kurra, tru namba lincha nøba mab muchibelan.

⁴² Incha Tiusbe namune misaameran eshkaab kusrenanrrai karuig køn cha, tru øsiguelan lata, kwabelan lata maig kønrrabigwan asha martrai Tius pasriibe nø køn chib, nam waminchib eshkanrrai.

⁴³ Katø mayeeløba Tius maig karuigwan eshkabelø Jesúsweimburab waminchippe, tru mayeeløba nun kørebeløbe Jesúswei munchiyu kaig mariilan ulø payamig kømíig pesannaig kørrømisrtrun taig køn— cha.

Judíos kømeelø Espíritu Santon utab

⁴⁴ Inchen Pedro øyeeg waminchib pasramnetø, Espíritu Santobe kørraarubig køn, tru mayeelø Tiuswei wamwan wamindi mørøb pønrrabelaim pala.

⁴⁵ Inchen Pedroba amrrubelø tru circuncidawar kørewarmerabe, truba kwaarilø kørrømisrøbelø køn, judíos kømø misaamerangucha Espíritu Santon keta nømuim pala itølushib uncha tøgagønrrai trana kørrømaren.

⁴⁶ Kaguende nømbe møriimíig peg wam wamindi møramba, Tiuswan tabig wamindamba indi ashibelø køn.

⁴⁷ Inchene Pedrobe trenchibig køn:

—¿I misaameran piu umbu ulsrailø kømønrrai kabe mu købgan merønrarritarru? cha, nam latatøwei Espíritu Santon nøm utøben.—

⁴⁸ Incha Pedrobe Jesucristoi munchiyu nømun piu umbu ulsrøngarubig køn. Inchen nømbe Pedron:

—Katøgan mam kwaløm køsrøn tiusmanda namba kørrømisr— chibelø køn.

11

Pedro Jerusalénsrø chitø purayaigwan eshkaab

¹ Cristo nøashib karua øriiløba, nunelø Judeasrø warabeløba tru judíos kømø misaameragucha Tiuswei wamwan utin kui wammørøbelø køn.

² Incha Pedro Jerusalénsrø katø nebibene, tru asru circuncidawar kørewarbe nune øyebe maig marøb pasrøgu chib,

³ trenchibelø køn:

—¿Kan ñibe judíos kømø misaamera tru circuncidameelai yau kebya, tru- iløba lincha main køn!— cha.

⁴ Inchen Pedrobe lutøgurri maig purayaigwan eshkaab, trenchibig køn:

⁵ —Na Jope ciudasrø tsua, na Tiusba waminchib wabene, kan piab lataigu na øyeeg kenamisri ashibig kur cha. Truyube kan nu llensu lataig pib tsøbmerayu litsig srømbalasarøngurri kørraarub arrua, naim pulugatig kørraarubig køn cha.

⁶ Inchen umbu chi tøgag køtashchab na tab ashene, animalmera pib srøb tøgailø køben, namiguelø køben, pirau srala ambubelø køben, pala amøñib illimera køben tøgag asinabig køn cha.

⁷ Katø kan wamgucha trendai mørinabig køn cha: “Pedro, kurrab kweecha, ma” cha.

⁸ Inchene nabe trenchibig kur cha: “¿Señor, paare, kan treekkucha mana maramø! cha. Kan nabe managuen nai trigube mamønrrai merigwanba, chish mariimíigwanbabe mugabguen muga kømur” cha.

9 Inchen srømbalasarøngurrimbe wambe nane katøle løtab trenchibig køn cha: “Tius tabig chishig mara kørømarigwane ñibe mamgaig trømbøig kønmb asha tøgagømøta” cha.

10 Truipe pønmay treetø treetø incha, katø kerriguba srømbalasarømay nebibig køn cha.

11 'Inchen trunetø pøn møguelø Cesareasarøngurri nan lanrrab øriilø nam purrai yau puptinchibelø køn cha.

12 Inchen Espiritu Santobe nane: “Mandø inchab kømab isuptø pasrømøtø, nømbe inrrø” chiben, katø i seiselø nuneløgucha naba lincha amrruig købig køn cha. Incha nambe sətøba Cornelioi yausrø kebambubelø ker cha.

13 Inchen nøbe nui yau kan ángel pasramisra, tru nun øyah chib pasraig asigwan namun eshkabig køn cha: “Jopesrømay ør cha, Simónwan, trunundøwei katø Pedrogucha taigwan attrai wamønrrab.

14 Truipe ñiba, ñui yauelanba kaigyugurri mandø incha ñimun wesrailø køm wammeran waminchun” chitan, chibig køn.

15 'Inchen na pua, truyu waminchib mendøbene, tru srøsrøzhiitø Espiritu Santo namuim pala kørraarrub lataitøwei nømumim pala kørraarruptinchibig køn cha.

16 Inchene nane Señor øyah taigwan isuptinchibig køn cha: “Juanbe piu ulsra pitøga pinøbulingaruben, trune ñimbe Espiritu Santotøga pinøbuliilø kønrrun” taigwan.

17 Nam judíosmera Señor Jesucriston kørbelan Tius keta tranigwan nøm judíos kømeeLangucha trunundøwei keta tranene, ¿Tiuswan treeg marmøta chib pasrønrrappe, nabe mu købrai køh?— chibig køn.

18 Inchen Tiuswei misaamera jerusalénsreelø iilan mørabe, yandø chi chimøtø, Tiuswan truba tabig waminchib trenchibelø køn:

—Trube, Tiusbe judíos kømø misaamerangucha øsig kømigwan nebua tøgagønrrai kaig marigwan isua møra, nuimay liranrrai marin køn— chib.

Siria pirau Antioquíasrø Tiuswei ureemera

19 Inchen tru Estebanwan kweechen isumdiig kaig pub mendøben trugurri, ke kan ørøtømisra chab ambubeløbe, Feniciasrøn køben, Chipresrøn køben, Antioquíasrøn køben øyasrøngatig ambig købig køn, mungucha mendailane Tiuswei wamwan waminchimøtø, judíosmerandø waminchib.

20 Inchendø nømui utuelø mõiløgøsrøn, chipresreeløba, cirenesreeløba Antioquía ciudayu puabe, griegosmerangucha waminchibelø køn, Señor Jesúsweimburab eshkab kusrenanøb.

21 Inchen Señorwei tasiibe nømbe pasrøben, misaabe truba nu kørewa, Señorweimay llibelø køn.

22 Inchen Jerusalénsrø iglesiayueløbe trunun wammøra, nømbe Bernabéwane Antioquíasrøngatig ørøbelø køn.

23 Inchen Bernabé trusrø puabe, Tius ka yandø tab indin kua asha, nøbe truba kasraarawa, Señorwei mayu pønrrappe nømui manrrau tab isua mur pønrrønrrai mayeelan waminchibig køn.

24 Kaguende Bernabébe tabig, Espiritu Santoba, nui isubigwan Cristoinug pasriiba truitø netsaig købig køn. Inchen Señorweyasig misaabe nørøø nemisrig købig køn.

25 Incha yandø Bernabébe Saulon lanrrab Tarsosrømay ya, yandø wetørrawabe, Antioquíasrømay pera ibig køn.

²⁶ Incha nømbe trusrø pila ørøba iglesiayueløba tulundzunab kua, misagwan nørø kusrenanøbelø køn. Tru Antioquíasrøn kuig køn, tru Jesucristoi kusrenanigwan marøb melabelan ke srøsrøzhiitø pølbásra “Cristoielø” cha munchi pasra wamig.

²⁷ Inchen tru kwalømmerawan møiløgøsrøn Tius maig karuigwan eshkabelø Jerusalængurri Antioquíamay kørørrubelø køn.

²⁸ Inchen kan tru ambulelai utuig Agabo taibe, Espíritu Santo nun maig tamigwan isunrrai inchen, trenchibig køn:

—Pirau ørøba parø truba nuig attrab køn— cha. Indiibe treeg kønrrun taibe Claudio karubig køben treeg purayaig købig køn.

²⁹ Inchawei Antioquíasrø Jesucristoi kusrenanigwan marøb melabeløbe nømun kanun kanun maig tranamdiig køben an treeg purugua trana, ørtrab chibelø køn, nunelø tru Judeasrø warabelayasis.

³⁰ Incha treeg mara, Judeasrø Tiusweimburabelan pera marøb pønrrabelan tranrrai, Bernabéwanba, Saulonba tru ketamig tulisaiigwan trana ørøbelø køn.

12

Jacobo kwaigwanba, Pedron kailan keeri yau keerigwanba waminchib

¹ Inchen tru kwalømmerawan rey Herodesbe møyilan køsrøn iglesiayuelan kemøøbig køn, kaig inchib srua kønrrab.

² Incha Juanwei nune Jacobone espatøga kweetsingarubig køn.

³ Treeg marigwane judíosmerane truba tabig asønain køben, Herodesbe Pedrongucha merrarrangarubig køn. Truibe tru Pirri Levaduragaig Maig Fiesta kwalømmerawan purayaig køn.

⁴ Incha Pedron merrarrawabe, Herodesbe kailan keeri yau keerøbig køn, suldaumera pib sötø ashib pønrrønrrai pønsra kan sötøyu pib suldaubatø. Herodesbe tru Pascua Fiesta puraiben, Pedrone misagwei merrab wesranrrab isua treeg inchibig køn.

⁵ Inchawei Pedrobe kailan tru keeri yaugurri webimønrrai truba may ashib tøgagúig waben, iglesiabe nuyasig ¡katø! elachimø, Tiusba waminchib miab købelø køn.

Pedron kailan keeri yaugurri Tius wesrab

⁶ Herodes Pedron misagwei merrab løtsø wesramig køben tru kwalmab yem, Pedrobe pagatø suldaumerai tøbøtag pa cadenatøga merrarraig, kib tsuben, katøgan suldaumerabe yaskabu tru kailan keeri yawan ashib pønrrabelø køn.

⁷ Inchen møyi møyi kan Señorwei ángel kenamisren, tru kailan keeri yaube kan tørguegwalmabig kebiløben, ángelbe Pedron tømbylyu kønøga kasrønabe, trenchibig køn:

—¡Mallatø kurrø! — cha. Inchen cadenasmerabe Pedroi taskugurri køraptinchibig køn.

⁸ Inchabe ángelbe trenchibig køn:

—Tamara pørønab, ñui alpargatiswan keetab inchi— cha.

Inchen Pedrobe treeg marene, ángelbe trenchibig køn:

—Pala itøguewagúigwan keb, nai mendig amø— cha.

⁹ Inchen webyabe ángelwei wendautø ibendø, tru ángel øyeeg punrraig marigwane ka inditamaptø isub, nøbe tab chigúi nebua ashmiig køn, pøs øyebe nune kan piaig lataitø køben.

10 Incha suldaumera ashib pønrrainug srøtiigu puraamba, trugurrimbe katøganbalø puraamba, trugurri yandø wambig callegatømayrsø tsandzøn yaskabyu pubene, tru yaskappe nøtø kurøptinchibig køn. Inchen webamba, kan yabgatig ambene, tru ángelbe nøtø inrrai tarømisrøptinchibig køn.

11 Inchen Pedrobe yandø chigúi møra trenchibig køn:

—Møimbeguende, Señor nui ángelwan øra, Herodeswei taskugurrimba, katø maya judosmera nan maig martashchab ashig kui inchib pønrraigugurrimba wesratan— cha.

12 Incha Pedrobe yandø iigwan maig kui ashabe, Maríaí yamay ibig køn, tru Juanwan katø Marcoskucha taigwei usrainmay. Inchen truyube truba yamelø tulundzuna, Tiusba waminchib købelø køn.

13 Incha Pedrobe yagueta pua, yaskabwan pinrrøgøbene, kan srusrø-unø truyu mendig mendabig, Rode taibe, mu køtashchab arruabe,

14 Pedroi wam kui mørøppe, kasrag købiitø yaskabwanguen kurmøtø, katøle umbusrø kelula:

—jPedro yaskabu pasrøtan!— cha, eshkabig køn.

15 Inchene nømbe trenchibelø køn:

—jPaare! ñibe loca asønan— cha.

Inchen nøbe:

—jTruigwein køtan!— chiben, nømbe trenchibelø køn:

—Pedro kømøtø, nui møsig kuinrrun— cha.

16 Trune Pedrobe katøgucha yaskabwan pinrrøgøbig, pinrrøgøben, kura ashabe, truba kwaarøbelø køn.

17 Inchen nøbe 'niløtø kønrray' siñal mara, tru kailan keeri yaugurri Señor mandø wesraigwan eshkawabe, trenchibig køn:

—Jacobonba, nunelø katøganelanba iigwan wammørøsrkønrrigay— cha.

Incha webyabe, peesrømay ibig køn.

18 Inchen yandø tør-rraben, suldaumerabe jkatø! mamdøguen kømuilø truba truba waminchib købig køn, Pedrone ni chindinguen mørmøwa.

19 Inchen Herodesbe langarua, wetørranrrab kaimappe, tru suldau ashib pønrrabelan maig purayaigwan nømun paya ashib srúa kuabe, kweetsin-garuig købig køn. Incha Herodesbe Judeagurri webya, Cesareasrømay ya, trusrø tsubig køn.

Herodes kwaigwan waminchib

20 Herodesbe Tiroba, Sidønba warab misagwan larrø namig tsuben, trusreeløbe søteeløba maig maramigwan lata ke kandø isua pønrramisra, tru rey Herodeswei yau ke nøashib trag megabig Blastø taigwan nømuingatø mis-rrai ubønanøb wamincha, truikkurri ambugurri, igurri lata tab warønrrab cha miabelø køn. Kaguende Tiroba, Sidønbabe tru reyweim piraugurri mamig weerigwan purøsrubelø købig kua.

21 Inchen Herodesbe kan kwalø m treeg martrab cha wesrua pasra, tru kwalømbe Herodesbe tru keilø purø tabelan kewa, tru wamisra ashib karub wainug wamisra chull møramdiig purø may waminchibig køn.

22 Inchen misaamerabe trashib mendappe, trenchibelø køn:

—jligwan waminchibiibe møg kømøtø, kan tius køn!— chib.

23 Inchen tru urastø Señorwei kan ángel Herodeswane kwanrrø penøsrkøbig køn, kaguende tru maya nuguen tab kønrrai indigwan Tiuswein kønrrain kømøtø, nuyasig kønrrai inchib wabenba. Incha nøbe pølømmera maig kwabig køn.

24 Trune Tiuswei wambe larrøbichib nurab ibig køn.

²⁵ Inchen Bernabéba, Saulobabe tru ketamig tulisha trana øriilan chab peguchabe, Jerusalénsrøngurri Antioquíasrømay katø ambubelø køn Juanwan pera, truitøwei Marcos taigwan.

13

Bernabéwanba, Saulonba lawa wesrub

¹ Antioquía iglesiyube Tius maig karuigwan eshkabelø køben, kusrennøbelø køben købig køn: Bernabé køben, Simón (trunundøwei Níger taig) køben, cirenesriig Lucio køben, Manaen køben (tru misagwan ashib karubig Herodesba trubalatø nuraweig), Saulo købengue.

² Indiibe kan kwaløm Señorwan nøm køriibala tabig waminchib, ayunab købene, Espíritu Santobe trenchibig køn:

—Bernabéwanba, Saulonba tarømartray cha, na nømun chi martrai wamigu marøb pønrrønrrain— cha.

³ Inchen nømbe ayunab, Tiusba waminchib kuabe, tab kønrrai tasiimeran nømuim pala estsara, yandø, ‘trube, ka amrrigay’ cha ørøbelø køn.

Bernabéba, Sauloba Chipre pirausrø

⁴ Inchen Espíritu Santo øriilø Bernabéba, Sauloba Seleucíasrømay amba, truyugurrimbe barcoyu Chipre pirausrømay ambubelø køn.

⁵ Incha Salaminasrø puabe, judíosmera tulundzuni yamerayu Tiuswei wamwan eshka kusrenanøbelø køn. Incha Juanwangucha nømun purugub uñchai pera amøñibelø køn.

⁶ Incha tru pi tøbøtag Chipre pirø pasrabigu kandarømayrø Pafos-srøngatig larraambabe, truyube kan judío Barjesús taig, kaig libron kusrewa, kwaimandzigweimburabigwan marøbig, ka isatø ‘Tius maig karuigwan eshka big kur’ chibigwan wetørrabelø køn.

⁷ Tru møøbe Sergio Paulo kubenadur maig kømigwan purø tab isua marøbig treeg møøba, tsubig køn. Inchen tru Sergio ashib karubigwane Tiuswei wamwan nune mørøg køben, Bernabéwanba, Saulonba wamønrrab ørøbig køn.

⁸ Inchen tru Barjesús, griegomaybe Elimas cha wamig, tru kaig libron kusrebig, truipe tru karubig nui isubigwan Tiusweinug pasrmønrrai truba sötø luløb megabig køn.

⁹ Inchen Saulo, katø Pablogucha taibe, Espíritu Santotø netsaig, tru Elimaswan malau ke tab ashabe, trenchibig køn:

¹⁰ —¡Kan ñi kui! ¡Misagwan kegørrøsrkamig, isatø indiibah, larrø kaig maramibatø netsaig møg, nugwaimandzigwei nusrkai! ¡Chigurrimbunø sølgandø tabigwane larrø tsaliig ashig kømui inchib pasrabig køn! cha. ¿Ñibe Señorwei tab maymerane managatig mindishibig mindishinrragu? cha.

¹¹ Møimbe Señorwei tasiibe ñun trømbøig neburrai martrun cha. Møimbe maya yanagatig kabgaig kørrømisra, pørrwan ashchab kaimanrrabguen—chibig køn.

Inchen møi møi nune kabyu wañim peñib løstigi misren, srølamøratø ibig misra, møikkøben tasku nun kemøra srua amrrai labig køn.

¹² Inchen treeg purayaigwan ashabe, tru kubenadur Señorweimburabelø kusrenaniilan ke kwaara asha, Señorwan kørebig køn.

Pablo Antioquía ciudasrø tsuig

¹³ Pabloba, nui linchibeløba Pafos ciudayugurri barcoyu nebamba amba, Panfilia pirau Perge ciudasrø puben, trune Juanbe truyu nømun tarømisra, katø Jerusalénsrømay arrubig køn.

14 Incha Pergegurrimbe nømbe Pisidia pirau Antioquía ciudasrømay amba, truyu sábadø isrin kwalømm judíosmera tulundzuni yau kebamba, purramisrøbelø køn.

15 Inchen tru maig maramigwan martrai Moisés pørigwanba, Tius maig karuigwan eshkabelai pøriilanba chab lebene, judíosmera tulundzuni yau chi maramigwan ashib karubeløbe møigwan køsrøn øyeeg chinrrab, 'inrø' chibelø køn:

–Ñim, namui misaamera, mandø melamigwan øyeeg melønrrigay chib misagwan wamindamig tøgaguabe, waminday– chinrrai.

16 Inchen Pablobe pasramisra, tasigwan kusrawabe, trenchibig køn:

–Ñim, Israelwei misaameraba, katø ñim Tiuswan køriibala tøga pønrrabeløba mørtray cha.

17 Iig Israel misaamerai Tiusbe, namui merrabsrø kølli misaameran lawa wesrawa, tru misaamerane truba nørreelø kønrrai marig købig køn cha, nømbe Egipto pirausrø ka ambateelø warøben. Incha tru Egipto pirausrøngurri nui tasiitøga ashig kui ashchai marøb wesruig købig køn cha.

18 Incha mu misag warab waraimønug Tiusbe cuarenta añosburab nømune ka awentab tøgagúig købig køn cha.

19 Incha Tiusbe Canaan pirausrø misaamera siete nørø sətø pønrrabigwan pinisha, truilaím pirømera købelan nømui mara tøgagønrrai tranig købig køn cha.

20 kan cuatrocientos cincuenta añosburab.

Inchen trugurrimbe tru maig kønrrabigwan asha marøb purrønrrabelø 'asha martrabelø' cha wamiilø Tiusbe tranig købig køn cha, Tius tru maig karuigwan eshkabig Samuel køb uraskatig.

21 Inchen trugurrimbunøbe, israelitasmerabe nømun ashib karub wanrrabig kan rey miaben, Tiusbe Benjaminweinukkurri karrab misagúig Quiswei nusrkai Saulwan cuarenta años ørøba karub wanrrai tranig købig køn cha.

22 Incha trugurrimbe Tiusbe rey Saulwan nø ashib karub waigwan kerawa, Davidwan rey kønrrai kusruig købig køn cha. Incha trunune Tiusbe nuimburab trendaig købig køn cha: "Isaíwei nusrkai Davidbe na maig isubig køben, treeg isub møg kui asha kur cha. Truibe na chi martrai inchen, treeg martrun" cha.

23 Tru Davidweinukkurri srøig karrab misaameran nø maig martrab cha kørrømisrig købig maig køben, Israel misaamerayasig kan Kaigyugurri Wesranrrabig Jesúswan ørig købig køn cha.

24 Inchen Jesús nø arrumøwatøbe, mayeelø Israel misaameran Juanbe mas kaig marmønrrab isua møra, Tiusweimay llirain kønmab asamig piu umbu ulsrailø kømigwan eshkab kusrenanøb arrig købig køn cha.

25 Incha Juanbe nui maramigwan yandø chab patsøgøb arruabe trendaig købig køn cha: "¿Nabe mu kuitamab isugue? cha, nabe tru ñim isub kuig truig kømur cha. Inchendø nai wendaube katøgan attrun cha, trunune nabe nui alpargatiswan tsiwan pitsamikken truburab kømuinatan" cha, Juanbe trendaig købig køn cha.

26 Ñim, nai misaamera, Abrahamweinukkurri srøig larrøbicha amrubeløba, katø ñimui utu Tiuswan køriibala marøb melabeløba: tru tabig srø wam kaigyugurri wesrabigwane yamba namuiwei ørig kuin køn cha.

27 Kaguende Jerusalénsrø warab misaameraba, katø nømun ashib karub purrabeløbabe, Jesúswane mu kuinguen nebua ashmøwei, katø tru isrin kwalømmørig Tius maig karuigwan eshkabelø wamindi wamwan leigwan

chigucha, nømbe truigwan chi mørøg kømuintiig kua, nøm Jesúswan øyeeeg kwanrrai marøb pønrrappe, tru pørig maig taimbala nømbe treeg nebunrrai marig købig køn cha.

²⁸ Jesúswan chigurri kwanrrai maramdiig nuinuube chi kalø marig wetørrrambendø, Pilaton nømbe kwetchai miaig købig køn cha.

²⁹ Inchen nuimbura maig pørig pønrrabelø kerrigu treeg puraiben, kuryugurri pinøsrua, sørabelø køn cha.

³⁰ Inchendø Tiusbe katø kwaitai utugurri øsiirangarubig køn cha.

³¹ Inchen Jesúsbe kwamøwatø, tru Galileasrøngurri Jerusalénsrøngatig nun lincha nerrubelane katø øsiirappe, nømune truba yam kwalømgatig kenamisrøb unig købig køn cha. Incha truiløbe mømibe nømashib maig asigwan misagwei merrab nuivan waminchibelø, nøm køn cha.

³² Inchawei namgucha tru merrabsrø namui kølli misaameran Tius tranrrab misra kørrømisrig, tru tabig srø wamwan ñimun wammørsrøb eshker cha.

³³ Nam tru trulai ureemerane treeg martrab kørrømisrigwane maran cha, Jesúswan Tiusbe øsiirangarua. Inchen katø Salmo dosyugucha øyeeeg pørig pasran cha:

“Ñibe nai Nusrkain køn cha.

Møi nabe ñui Møskai misra pasrar” cha.

³⁴ Katøbe mana trerannrabig kømíig Tiusbe Jesúswane kwaitai utugurri katøle kusrua, tru treeg marigweimburappe Tiusbe trencha pasrig købig køn cha:

“Tru newan tabig, ciertonig treeg martrab cha,

Davidwan tranrrab kørrømisriilane ñun tranrrumøn” cha.

³⁵ Inchawei katøganbaløsrøngucha trenchibig køn:

“Ñui Newan Tabigwei asrwane trerabashmønrrun” cha.

³⁶ Pøs Davidbe Tius maig kønrrain køben tru nø tsuin kwalømmerawan misaameran ashib purugub wawa, yandø kwawa, nui møskaløba tsumisrene, nui asrbe treraig købig køn cha.

³⁷ Trune Tius tru kwaitai utugurri katøle kusruigwei asrbe treramuig købig køn cha.

³⁸ Inchawei ñim, nai misaamera, ñim nebua asig kønrrai inder cha, tru kaig mariilan ulø payamig kømíig pesannaig kønrrun chib eshka kusrenniibe Jesúscurrin kui.

³⁹ Inchawei tru maig maramigwan martrai Moisés pøriiløtøga chi kaig kømíig lataig, tabig kørrømisra pønrrønrrab kaimaigwane, mutøgucha Jesucriston kørebeløbe nuinuubeguende chi kaig kømeeleø lataig, tabig kørrømisrrun cha.

⁴⁰ Inchawei ashiptø kuy chibig køn, Tius maig karuigwan eshkabelø øyeeeg chib pøriibe ñimun nebuig warønrrab kømøtø:

⁴¹ “Au, ñim chiwandøgucha ke ka indzatø mørøbelø,

¡katø! ke kwaara ashib kenaguen kømø, pinay taig.

Kaguende nabe, ñim warain kwalømmerawan purø nuig maramønrrun taig,

ñimun mugøben treeg købig køn chib wamingdugucha,

treeg marig købig kuitamappe ke køremgaikke.”—

⁴² Incha Pabloa, nui linchibeløba judíosmera tulundzuni yaugurri webambene:

—Wendø truwan isrin kwalømgucha øyeelandøwei waminchurrunrigay—chibelø køn.

⁴³ Incha truyu misag tulundzuna pasrabigwan yandø nømbe 'ungwa' cha ambene, møyiløgøben truba yam judíosmeraba, katø møyiløgøben judíosmera nøm Tiusweiwan marøb pønrraigu purørrua Tiuswan purø isua melabeløbabe, Pablonba, Bernabéwanba mendig amben, nømbe:

–Tiuswei tru ka yandø tab indigu maizhikkucha elachib pønrrønrrab kømøtø, melabig melønrrigay— chib waminchibelø køn.

⁴⁴ Inchen wendø truwän isrin kwaløm tru ciudayu ke maya misag lutau Tiuswei wamwan mørtrab tulundzunøben,

⁴⁵ judíosmerabe misag truba nørø tul yai ashabe, truba namig pusrkwai asha, Pablo tru trenchib wamindigwane 'treeg kømøn' chib, tsalø wamabelø køn.

⁴⁶ Inchen Pabloba, Bernabébabé chigucha kømø trenchibelø køn:

–Tiuswei wamwane ñim judíosmeranmerrigwei eshkamig kuig køn cha. Inchendø ñim yandø kaashib, managatig øsig kømigwan ñim tøgagømig truburab kømui indig kuig købene, trube, nambe møyimbe judíos kømeeaimay katø amrrab chibelø køn.

⁴⁷ Kaguende Señorbe namun trencha karua pasrig køn cha:

“Judíos kømø misaamerayasis kan tør lataig kønrrai ñune pasrar cha, kaigyugurri wesrailø kømigwan eshkab pirau munabatsø srua inrrai.”—

⁴⁸ Inchen iigwan mørabe, judíos kømø misaamerabe truba kasraarawa, Señorwei wamwan truba tabig waminchibelø køn. Incha tru managatig øsig kømigwan tøgagønrrai chabguen tarømarilø købeløbe møyiløtøgucha Jesucriston kørebelø køn.

⁴⁹ Inchen Señorwei wambe tru pirau kerrigu larrøbichibig køn.

⁵⁰ Inchen judíosmerabe tru ciudayu møyiløgøsrøn ishumburmera, Tiuswan purø isua melabelø trurrigu nøm mailø kui asilanba, katø ciudayu møyuelø nørreelø ashib karubelanba kaig marøb kurrønrrai nømune ke treeg isumne incha, Pablonba, Bernabéwanba nømum piraugurri webusrøbelø køn.

⁵¹ Inchen nømbe nømui srøbyu usrøwan pabørrgøbelø køn, ñim øyeeløgurri uyube møyimbe ñim kusrenrrigay chib eshkab. Incha Iconio ciudasrømay ambubelø køn.

⁵² Inchen tru Jesucristoi kusrenanigwan marøb melabeløbe kasrag købiibah, Espiritu Santobatø netsailø købig køn.

14

Pabloba, Bernabéba Iconio pirausrø

¹ Iconiosrø Pabloba, Bernabéba judíosmera tulundzuni yau kegøtø kebamba, purø may waminchib kusrenanen, judíosmera køben, griegosmera køben truba nørø Jesucriston kørebelø køn.

² Trune judíosmera Jesucriston kømeealøbe tru judíos kømeealane ke kaig isumne inchibelø køn tru Pabloimburappa, Bernabéweimburappa.

³ Inchen treeg kuingucha, Pabloba, Bernabébabé truyu yana warøwa, Tiuswei wamwan chigucha chi korig kuin kømø waminchibelø køn. Inchen nui wamwan tru ka yandø tab indigwan treegwein kui ashchai, Señorbe nømui tasiimeratøga mariilø truba nørreelø marøb, kwaara asha kønrrai mariilø marøb inchai tranig køn.

⁴ Inchen tru ciudayu misaamerabe kan utueløbe judíosmeraingatø køben, møyiløbe Cristo nøashib karua øriilangatø købig køn.

⁵ Inchen judíosmera køben, judíos kòmeelø køben, nòmun ashìb karub purrabeløba kandø misra, nòmun trømbøig kaig inchib, sruutøga petønrrab kurrøben,

⁶ Pabloba, Bernabébabe trunun wammøra Licaonia pirau tru Listraba, Derbeba, publomerarømayba, katø tru puluwan katøganbalømerarømayba trubab ambubelø køn.

⁷ Incha trusrø tru tabig srø wamwan eshkaab kusrenanøbelø køn.

Listrasø Pablon sruutøga petab

⁸ Inchen Listrasømbe kan møg kal-lainukkurri managuen uñchab kaimabig srøbmera tulundzunig wabig køn.

⁹ Inchabe tru møøbe Pablo waminchen mørøb wabig køn. Inchen Pablobe nun ke tab asha, ke tamarig kòmuitamab isub wai ashabe,

¹⁰ mur wamab trenchibig køn:

—jØlgandø kurrab, pasramisr!— cha.

Inchene tru møøbe pørsrappe, pasrambuu, llirab mendabig køn.

¹¹ Inchen misaamerabe Pablo chi marigwan ashippe, nòmui Licaonia triimay trenchib trashib mendabelø køn:

—jMøguelø lataig, tiusmera namuinug kørørruin køn!— chib.

¹² Incha Bernabéwane tius Zeus køn chippe, Pablone tius Hermes køn cha wamabelø køn, kaguende Tiuswei wamwan waminchibiibe Pablo køben.

¹³ Inchen tru tius Zeuswei tab ya, tru ciudayu kebambinuutø pasrabigu ashìb wab sacerdotebe, toromera køben, umera purø tabzheelø tamarilø køben, tru ciudayu kebambi yaskabmerarø srua arrua, tru toromeran kweecha, misaamerabamisra, Pablonba, Bernabéwanba, nòmune tiusmera kui mara tranrrab mendabelø køn.

¹⁴ Inchen Cristo nøashìb karua øriilø Bernabéba, Pabloba nòmun treeg martrab indi mørabe, nòmui kewagúilan kølsrøb, misag utusrø kegørra,

¹⁵ trenchibelø køn:

—jAu, yu mayeelø pønrrabelø! ¿Chindimba øyeeg martrab inchigue? cha. Nambe ñim latailøtøwei ka møgueløtø ker cha. Ke ka treeg maranmab ashchaidø mariilan elacha, øsig wab Tius srømbalawan køben, tru pirøwan køben, marwan køben, chigurrimbunø truyu pønrrabelan marøbigweimay llirawa pønrramisrtrai, tru tabig srø wamwan nambe ñimun waminchab amrruer chib.

¹⁶ Merrabsrø misag srøig, srøig kurrab amrrubelane misaamera nørø pønrrabelan chuelandøgucha kerriguelan, nòmun maig amøñig køben, treeg ka amøñibasig køn cha.

¹⁷ Inchen køben managucha nuimburabigwane maig kuigwan eshkaab wamindig købig køn cha, tabig marøb. Srømbalarøngurri srewan ørøb, ell-mariilø misram pølmera pubene, tru kuindø, tru kuindø misringarunrrun cha, chi palømø unchaguen mamig tøgagønrrai tranøb, ñimui manrømeran truba kasraaranøb.—

¹⁸ Inchen nøm øyeeg chib waminchagucha, nømbe misaameran ke trendø merønrrab kaimabsrubelø køn, tru nòmun tiusmera kui mara toromeran kweecha tranmønrrai.

¹⁹ Inchen Antioquíagurrimba, Iconiogurrimba møiløgøsrøn judíosmera puabe, misag purø nu pasrabigwan ke kaig maramne inchai wamincha, Pablon kwetchab srug muta peta, ciudayugurri wambiisrømay ke paluunchib megam srua webambubelø køn, yandø kwaig kønmab.

²⁰ Trune Jesucristoi kusrenanigwan marøb melabeløbe nuin pøtøgatan tulundzunøben, nøbe kurra, katø ciudayu kebibig køn. Incha katø kwalømbe Pabloba, Bernabéba Derbesømay ambubelø køn.

²¹ Incha Derbesøw Jesucristoi tabig srø wamwan eshka kusrenana, Jesucristoi kusrenanigwan marøb melabelø nørrø nemisrtra mara, trugurrimbe Listramayba, Iconiomayba, Antioquíamayba katø amrruig købig køn.

²² Incha trusrømbe tru Jesucristoi kusrenanigwan marøb melabelan kulaa ramø mur pønrrønrrai waminchib, isubigwan Tiusweinug pasragúigwane elachib pønrrømø, tindøga pønrrønrrai chib waminchibelø køn. Incha nømune trenchibelø køn: “Tius nø ashib karub waisø kebambamibe chineto chineto murelø puben, truyu puraambub meløwawei kebambamig køn” cha.

²³ Incha iglesiamørig nømbe Tiusweimburabelan pera marøb pønrrabelø wesrawa pønsra, Tiusba waminchib, ayunab kuabe, nømune tru nøm kørewa pønrraig Señor nø ashchai pønsrøbelø køn.

Antioquia ciudasømay katø ambub

²⁴ Incha trugurrimbe Pabloba, Bernabéba Pisidia pirauwan puraambub amba, Panfilia pirau pubelø køn.

²⁵ Incha Perge ciudayu Tiuswei wamwan eshka kusrenana, trugurrimbe Ataliasømay amrrubelø køn.

²⁶ Incha truyugurrimbe barcoyu nebamba, Siria pirau Antioquíasømay ambubelø køn. Tru nøm mõi ya patsøga pønrraigwan martrab amrrai Tiuswei tru ka yandø tab indiitøga tabig ashib tøgagúilø kønrrigay chib, tru nømun pønsraig købiisømay.

²⁷ Incha trusrø puabe, iglesiyuelan tulundzuningarua, Tius nømbe chineto, chineto mariilanba, tru judíos kømø misaameragucha isubigwan Señorweinug pasra tøgagønrrai yaskabmeran mandø kurøb arrigwanba waminchibelø køn.

²⁸ Incha Pabloba, Bernabéba Jesucristoi kusrenanigwan marøb melabeløba truyu truba yana kørrømisra waraig købig køn.

15

Jerusalén waminchab tulundzunab

¹ Inchen tru uras mõiløgøsrøn Judeagurri Antioquíasømay amba, nunelan treeg kusrenanin købig køn:

—Moisés kusrennig tru circuncisión maramigwan marmøwabe, kaigyugurrimbe wesrailø kønrraamøn— chib.

² Inchen Pabloba, Bernabéba tru treeg kusrenanøbelan ‘øyebe maramig kømøn’ chib, nømbe puro mur aleguiyabelø køn. Treekkurri Pablonba, Bernabéwanba katø truyu nømui utuelø mõilan køsrønbamara, Jerusalénsømay ørtrab wesrawa pønsrøbelø køn, tru øyeeg pub arrigwan Cristo nøashib karua øriiløba, Tiusweimburabelan pera marøb pønrrabeløba trusrø waminchib.

³ Inchen tru iglesiyuelø tru amrrai karua øriiløbe Fenicia pirøwanba, Samaria pirøwanba puraambub ambubelø køn, judíos kømø misaamera nømui trendø marøb kuilan elacha, Tiuswei maywan amøñinrrab nøm mandø pønrramisrigwan eshka. Treekkurri trusrø tru mayeelø nuneløbe truba kasraarabelø køn.

⁴ Incha Pabloba, Bernabéba, tru lincha ambubeløba Jerusalénsø chab pubene, trusrø iglesiyueløba, Cristo nøashib karua øriiløba, katø truyu Tiusweimburabelan pera marøb pønrrabeløba nømune wamab utøben, nømbe Tius maig marigwan kerrigay waminchibelø køn.

⁵ Inchene m̄oil̄oḡsr̄on merrappe fariseosmeraingateel̄o k̄obel̄o kua, m̄oimbe Jesucriston k̄orebel̄obe trenchibel̄o k̄on:

—Tru judíos k̄om̄o misaamera Jesucriston k̄orebelane tru circuncidamigwan maringarub, kat̄o tru maig maramigwan martrai Moisés p̄oriilan maringarumig palan— cha.

⁶ Inchen Cristo n̄oashib karua øriil̄oba, Tiusweimburabelan pera mar̄ob p̄onrrabel̄oba tru øyeeg puigwan maig k̄otashchab ashchab tulundzunabel̄o k̄on.

⁷ Inchen pur̄o tr̄omb̄oig mur aleguiyab k̄om̄ig puben, Pedrobe kurra pasramisra, trenchibig k̄on:

—Nai nunel̄o, ñimbe sr̄osr̄o kwal̄om̄merawangurri ashibel̄o kuinrrun cha, Tiusbe ñimui utugurri nan lawa wesruig k̄on cha, judíos k̄om̄o misaamera tru tabig sr̄o wamwan na waminchen m̄ora, k̄orenrrai.

⁸ Tiusbe n̄omui manrr̄omeran ashibig kuabe, nam judíosmeran tran̄ob latait̄owei Esp̄iritu Santon n̄omungucha tran̄ob, n̄omuingat̄o pasrar chib kenamariig k̄on cha.

⁹ Tiusbe n̄omun n̄oøro mara namuingat̄ot̄o inchib pasr̄omuig k̄on cha, n̄omui isubigwan Tiusweinug pasra t̄ogaguit̄ogato n̄omui manrr̄omeran chishmarig k̄obig kua.

¹⁰ ¡Ñim kui! ¿Ke Tiuswane chinchibig k̄otashchab inchib p̄onrr̄otirru? cha, tru nam lata, namui merrabsr̄o k̄oilli misaamera lata, øyeeg maramigwan mar̄ob k̄onrrab kaimaigwane tru Jesucristoi kusrenanigwan mar̄ob melabelan, trunun n̄om niga amrrai m̄oimbe n̄omun neguan̄ob.

¹¹ Treeg k̄om̄ot̄o, Señor Jesús tru ka yand̄o tab incha ketiit̄ogato nambe kaigyugurri wesrail̄o kermab k̄orewa p̄onrrer cha, n̄om latait̄owei.—

¹² Inchen truyu maya misag tulundzuna pasrabiibe nil̄ot̄o k̄orr̄omisra, m̄or̄ob purrabel̄o k̄on, Bernabéba, Pabloba tru judíos k̄om̄o misaamerai utusr̄o, Tiusbe n̄omba pasrain kui ashchai n̄omgurri mariilanba, kwaara asha k̄onrrai mariilanba waminchen.

¹³ Inchen n̄om chab waminchen, Jacobobe trenchibig k̄on:

—Nai nunel̄o, m̄ortray cha:

¹⁴ Simónbe wamindan cha, judíos k̄om̄o misaameran sr̄ot̄ogurri n̄omungucha isua pasranmab ashchai, truilai utugurri nui ureg s̄ot̄omera k̄onrrai mara, nui munchin n̄omuinug t̄ogaḡonrrai marigwan.

¹⁵ P̄os m̄oi øyeeg publiibe, tru merrabsr̄o Tius maig karuigwan eshkabel̄o maig p̄oriiba ke kand̄o k̄on cha. Tru øyeeg p̄orig pasraimbala:

¹⁶ “Øyeeg purayaig wend̄obe tru Davidwei ya penin tsuigwan kat̄ole kusrua pasram̄onrrun chib.

Chab pinabsruigwan kat̄ole tamara kusrub, sr̄oig mara pasram̄onrrun taig.

¹⁷ Maya misaamera kat̄oganel̄o uncha p̄onrrabel̄o Señorwan lanrrain cha,

mayeel̄o judíos k̄om̄o misaamerainug nai munchiwan n̄omuinug pasra wamig k̄onrrun cha.

¹⁸ Tru Señor iilan mar̄obig øyeeg tan taig, tru manasr̄ongurri øyeeg martrab isua t̄ogaguen waig k̄obigwan.”

¹⁹ “Inchawei nabe, ke treeg maramne inchib p̄onrramgaig kui ashar cha, judíos k̄om̄o misaamera n̄omui merrabsr̄o mar̄ob kuilan elacha, Tiusweinug p̄onrr̄onrrab llirawa amrrubelan.

20 Treeg kòmõtø, taska mari tiusmera tøgagúilan pønsraig mamimeran mamøwei, katø møguelø lata ishumbur lata larrø trømbøig marøb kømigwan marmøwei, kweetsig kòmõtø, ka melamisratø kwaig animalmerai yauwan mamøwei, katø aniwana mamøwei indamig køn chibig, treegwan eshkawa, pøramitø palan cha.

21 Kaguende merrab manasrøngurri Moiséswei pøriilan ciudamørig judíosmera tulundzuni yamerayube eshkaab kusrenanøbelø tøgagøben, truiløbe isrin kwalømmørig tru maig maramigwan martrai pørigwane lebelø købig køn— cha.

Pabloba, Bernabéba Siria pirau Antioquíasrømay katø ambub

22 Inchen Cristo nøashib karua øriiløba, Tiusweimburabelan pera marøb pønrrabeløba, katø iglesia mayeeløba tru nømui utugurri lawa wesrawa, øramig tabig asønai inchibelø køn, Antioquíasrømay Pabloba, Bernabéba amrrai. Incha Judas, katø nundøwei Barsabás taigwanba, Silaswanba amrrai wesrubelø køn, nunelai utu tru mas nørreelø kui asi møguelan.

23 Incha nømune ørøppe, kan kilga øyeeg chibig pøra, trana ørøbelø køn:

Nam Cristo nøashib karua øriiløba, Tiusweimburabelan pera marøb pønrrabelø, nam ñimui nunelø ñim judíos kømeeelø Antioquíasrømba, Sira-srømba, Ciliciasrømba warabelø nunelan 'ka amøñiguel' chinrrab inder.

24 Møiløgsrøn yu namui utuelø amba, namma chigucha treebe marøb kønrrai karumubendø, chinetø cha, ñimune ¡katø! kan ørøba mandøgucha kømuielø melønrrai marin køn.

25 Incha treekkurri nam mayeeløba kandø isua pønrramisra, namui utuelan mø møguelan køsrøn lawa wesrua, namui undaaraig nunelø Bernabéba, Pabloba kegøtø nømun ñimuimay ørtrab inder.

26 Tru Pabloba, Bernabéba Señor Jesucristoi munchigurri ke kwamig nebuinanrraptiikken inchib meløwar køn.

27 Incha nambe Judaswanba, Silaswanba ñimuimay ører. Truiløbe nam pørigwan, nømashib trunundøwei waminchun.

28 Espíritu Santon lata, namun lata tabig asønatan katøgan srøig, srøig maramelø ñimun negwanmøtø, iig tru maramig palønrrapteelandøh martrai karumig:

29 tru taska mari tiusmeran animal kweecha pønsrai yaumeran mamøwei, katø aniwana mamøwei, kweetsig kòmõtø ka melamisratø kwaig animalmerai yauwan mamøwei, katø møguelø lata ishumbur lata larrø trømbøig marmøwei indamigwan. Ñim øyeelan marøb pønrrømuikkurrimbe, søl marøb pønrrønrrabguen.

Trube, ungwa, mayanguen tab kuilø kønrrigay, chib pørig køn.

30 Incha yandø nømun, 'trube, ka amrrigay' cha øren, Siria pirausrø Antioquíamay amba, tru asamigwan ashchab eshkailø tulundzunøben, tru kilga ørigwan nømbe tranøbelø køn.

31 Incha trunun nøm lewabe, truba kasraarabelø køn øyeeg purugub wam tabig wamindigwan møra.

32 Inchen Judasba, Silasba nømgucha Tius maig karuigwan eshkabeløtøwein kua, tru tabig purugub wam nu wamincha ketiitøga trusrø nunelan kullaaramø ambub melamig kønrrai kørrømarøbelø køn.

³³ Incha truyu maya yana kørørn nømbe kørømisra warøben, nuneløbe ‘chi isungai tab kuilø kørnrigay’ chib, nømun karua ørøbelaisromay ‘ungwa’ cha, katøle ørøbelø køn.

³⁴ Inchen Silasbe trusrø nø kørømisramig tab punrrab kui isubig køn.

³⁵ Inchen Pabloba, Bernabébe Antioquíasrø kørømisrøbelø køn, trusreelø truba yameløba Señorwei wamwan kusrennøb, katø trunun wammørørøb.

Pablo nui martrab yamigwan katøle marøb pølbasrøb

³⁶ Yandø mam kwalømyu kørørnøbe Pablobe Bernabéwan trenchibig køn:

—Ciudamørig nam Señorwei wamwan eshkab kusrenaniisrø nunelan maig inchib meløtashchab katø ashchab amun— cha.

³⁷ Inchen Bernabébe Juanwan, katø nundøwei Marcos taigwan, pera inrrab inchen,

³⁸ trune Pablobe pera ambamgaig kui ashibig køn, kaguende tru srøsrø ambenma Marcosbe Panfiliatø nømun tarømisra, nømbe tru maramigwan martrab imuinukkurri.

³⁹ Inchen ke mumayguen kømíig peemaytø puptinchen, møikkurrindøgucha tarømisra, Bernabébe Marcoswan pera barcoyu Chipresømay ibig køn.

⁴⁰ Incha Pablobe nuimburappe Silaswan lawa wesrawa, tru nunelø: “Señorwei ka yandø tab indiitøga tabig ashib tøgagüilø kørnrigay” cha øriilø ambubelø køn.

⁴¹ Inchen Siria pirauwanba, Cilicia pirauwanba pureb ibig køn, Tiuswei ureemera tru iglesia truøø pønrrabelan kullaaramø, mur pønrrønrai purub waminchib.

16

Timoteo Pablonba, Silaswanba lincha ib

¹ Pablo Derbesømba, Listrasømba pueblomerayu pubene, truyube kan Jesucristoi kusrenanigwan marøb megabig Timoteo taig tsubig køn, truipe Criston kørøweig judía ishugwei nusrkai. Inchendø møskaimbe griego købig køn.

² Inchen Timoteobe tru Listrasø, Iconiosrø nunelai utu, chigucha tamgaig tabig købig køn.

³ Inchen Pablobe Timoteowan nøba lincha attrai incha, tru trusrø warabelø judíosmeragurri nune asru circuncidamigwan marøbig køn, kaguende mayeeløba møskaimbe griego kui ashibelø kuimba.

⁴ Incha nømbe tru pueblomerawan puraambub ambimørig, Cristo nøashib karua øriiløba, Tiusweimburabelan pera marøb pønrrabelø tru Jerusalénsrø purrabelø, maig marøb kørnrai karuulane isua mørøb kørnrai eshkab ambubelø køn trusrø Tiuswei ureemeran.

⁵ Inchen trusrø tru iglesiamera pønrrabeløbe nømui isubigwan Tiusweinug pasra pønrramigu, kullaaramø, mur pønrramisren, misaabe kwalømmørig nemisrøb ibig køn.

Kan møg macedoniasriig Pablon piab lataigu kenamisrøb

⁶ Incha nømbe Frigia pirøwanba, Galacia pirøwanbabe ka purab ambubelø køn, kaguende Asia piraursømbe Espiritu Santo Tiuswei wamwan waminchibashmuben.

⁷ Incha Misia linderosrø puabe, Bitinia piraursø kebamrrab inchen, Jesúswei Espiritube trusrø kebambashmuben,

⁸ Misia pirø puluwan yabwandø puraamba, Troassrø kørraambubelø køn.

9 Indig trusrø Pablobe yem kan piab lataig asig tøgagúig køn. Truyube kan møg Macedonia pirausrig pasramisra trenchib miab pasrai ashibig køn: “Macedoniasrømay larraamø cha, namun purugunrrab.”

10 Inchawei Pablobe tru piab lataigu treeg asin køben latatø, nambe Macedoniasrømay amrrab inchibelø ker, namun Tius nui tabig srø wamwan eshka kusrenanrai wamitamaptøwei isua.

11 Indiibe Troaskurri barcoyu nebamba, Samotraciasrømay kanmaytø ke purab amba, katø kwalømbe Neápolisrø pua,

12 truyugurrimbe Filipossrø pubelø ker. Tru ciudadbe Macedonia pirau mas nuig køb, katø kan sètø Roma misaamera truyube kebamba warab inchibelø køn. Incha tru ciudayu nambe mam kwaløm kørømisrøbelø ker.

13 Inchen kan isrin kwaløm tru ciudayu nu yaskabu wambiisrø webambubelø ker kan pi mendasrømay, truyube judíosmera Tiusba waminchab tulundzuninug kuitamab isua. Incha nambe truyu purramisra, ishumburmera tulaamba purrabelan waminchibelø ker.

14 Inchen tru utube kan ishug, Lidia taig mørig waben, Señorbe nui manrøwan kurøbig køn Pablo chi chitamørtrab ke tab mørig wanrrai. Truibe, Tiatura ciudadsiig, yalø pigø llensumera purø tabig yanøbig, trurrigu Tiuswan kørribala tabig waminchib megabig købig køn.

15 Incha nøba, nui yaeløba piu umbu ulsrailø kørømisra, ke tiusmanda chib namune trenchibig køn:

—Na, Señorwan cierton kørøin kui ashabe, trube, ñim nai yamay amrrua, kørømisrøtrigay— cha.

Incha namune ke kørømisramne inchibig køn.

16 Nam Tiusba wamindinumay ambub købene, kan srusrø karuindiig megabig, kebasra tranøb kwaimandzig tøgagig namun katønrrab arrubig køn. Truibe tru nun karub pera købelane truba nørø an asingarubig købig køn, nø misagwan kebasra ketiiløtøga.

17 Incha tru srusrøbe Pablonba, namunba wendautø trenchib trashib arrubig køn:

—¡I møgueløbe Tius Mayeelaim Pala Pasrabigwei karuindiig melabelø, kaigyugurri wesrailø køm maywan ñimun eshka kusrenanøbelø køn!— chib.

18 Inchen ke treetø treetø purø yam kwaløm uñen, yandø Pablon ke pesriikken inchen, nøbe keesha, tru kwaimandzigwane trenchibig køn:

—Jesucristoi munchiyu i srusrainukkurri nabe webinrrø tamønrrun— cha. Inchen tru urastø kwaimandziibe elachibig køn.

19 Inchen tru karub pera købelø tru treeg an marøb pønrramibe yandø patsi asha, Pablonba, Silaswanba kemøra, misag tulundzuninumay ke palunchib waram srua ambubelø køn, tru misagwan ashib karubelaisrømay.

20 Incha merrab pønrsabe, trenchibelø køn:

—¡Kan i møgueløbe ya judioskøleelø købendø, namui ciudadwane ke chi maringuen asamgaig marøb amrrun! cha.

21 Nøm waminchib kusrenanøppe ke peemaytø mariilø nam uta tøgagømig kømøwei, katø treegwan marøb kømig kømøwei inchai namune meriilan kusrenanan cha, nam ya romanosmeran.—

22 Inchen misaabe mayamba kanbalatø misra namig kurrøben, maig kørnrrabigwan asha marøb purrabeløbe, Pablomera kewagúilan tsakkandø wesrawabeta, tsitøga itchai karubelø køn.

23 Incha nømune truba yam ichabeta, kailan keeri yau kebusra, truyu ashib pasrabigwane webamrraingag purø may ashib tøgagungarubelø køn.

24 Inchen tru treeg martrai karuigwan mørabe, truyu ashibiibe katøguchi umbusrø keera, srøbmeran cepoyu kegwana, purrønnobig køn.

25 Inchen yem tøbøtasrømbe Pabloba, Silasbabe Tiusba waminchib, Tiusweyasig cantab køben, katøganelø truyu keerig pønrrabeløbe mørøbelø køn.

26 Inchene jkatø! møin kagúitø mur pirøgønabig arruptinchen, tru kailan keeri yawan niga pasrabigwan truilanguen punø panrrø sruaguchen, jkatø! tru urastø truyu maya yaskabmeraba kurig pønrramisren, tru keerig pønrrabelai cadenasmerabe mayeelaimba picha kørrelø køn.

27 Inchen truyu keeriilan ashib pasrabig kiagasrøbene, møimbe tru kailan keeri yau yaskabmerabe kurim pønrraptindi ashabe, nui espadan wesrawa, jkatø! nøasiitø ke yandø kwanrrab inchibig køn, kaguende truyu pønrrabelø chab wegørra chab lulitamab isua.

28 Inchene Pablobe mur trashib trenchibig køn:

—jÑiguen øyeeeg kaig marmøtø kagøbash! cha. jSøtøba nambe yu ka purrer!— cha.

29 Inchene tru kailan keeri yawan ashib pasrabiibe kan pela piløgaig miawa, umbusrø luløb kebya, Pabloimba, Silasweimba merrab itønab tømboñsrøbig køn.

30 Incha wambig pera webyabe, payibig køn:

—jAu kasukumera! ¿na kaigyugurri wesraig kømibe chi maramig palønrrerah?— cha.

31 Inchene nømbe trenchibelø køn:

—Señor Jesucriston køreu cha. Incha ñiba, ñui yaeløbañau kaigyugurri wesrailø kønrrabguen— cha.

32 Inchen nømbe Señorwei wamwan nunba, nui yau purrabelø søteelanba waminchibelø køn.

33 Incha nømun ichabeta tru pisrø mariilan tru yemdøwei tre uras pillmawa, tru urastø nøba, nui yaelø kerrigueløba piu umbu ulsrailø købig køn.

34 Incha trugurrimbe Pablonba, Silaswanba nui yamay pera ya, manna, nøba, nui yaeløbañau Tiuswan køreikkurri truba kasraarabelø køn.

35 Indiibe tør-rabene, tru maig maramigwan asha marøb purrabeløbe tru policíameran karua ørøbelø køn, tru kailan keeri yawan ashib pasrabigwan, trenchinrrai: “Pablonba, Silaswanbabe elatchain” cha.

36 Inchen tru yawan ashib pasrabiibe Pablone trenchibig køn:

—Tru maig kønrrabigwan asha marøb purrabeløbe yandø ñimun weeriilø kønrrai karua ørin køn cha. Pøs treeg købene, webamba, chi isumøtø, ka ambay— cha.

37 Trune Pablobe trenchibig køn:

—Nam ya Roma pirausrø kal-lawar køb lataitøwei kal-lawarwan, namun maig kuitashchab payaguen ashmubendø, maya misagwei merrab namun ichabeta, namun kailan keeri yau kebusra ¿møingan mugucha wammøriimøzhig namun nilø wertrab inditarru? cha. jPøs chi treeg kønrraamøn! chibig køn. Pøs truiløtøwei namun wesrunrrab amrrubash— cha.

38 Inchen tru policíamerabe tru maig kønrrabigwan asha marøb purrabelan tru treeg taigwan eshkabene, truba kwaarøb kørig kui inchibelø køn, truiløbe Roma kal-lawar lataitøwei kal-lawar kuin kui wammøropppe.

39 Inchen nømbe Pablonba, Silaswanba ‘kan nambe treeg kømui tamab isua indig køn’ chib amba, kailan keeri yaugurri wesrawabe, ‘ciudayugurri ke tiusmanda amrray’ chibelø køn.

40 Incha truyugurri webambabe, nòmbe Lidiai yamay amba, truyu Jesucristogurri nòmui nunelan ashabe, maig melamigwan treeg marøb melønrrigay chib wamincha, yandø ambubelø køn.

17

Pabloa, Silasba Tesalónicasrø

1 Pabloa, Silasba ambuppe, Anfípoliswanba, Apoloniawanba puraambub amba, Tesalónica ciudasrø judíosmerai kan tulundzuni ya pasrabnug pubelø køn.

2 Incha Pablobe nøbe trendø treeg marøbig kua, tru judíosmera tulundzuni yausrø nòmun ashchab kebya, pøn sábadø ørøba tru judíosmeraba Tiuswei wamwan pørigugurri 'øyeeg køn' chib, 'øyamay køn' chib, waminchibig køn.

3 'Øyeeg kuig køn' cha, tab eshka:

—Tru Cristo ñim muniirab kuibe truba kaig indinai megawa, kwawa, katø kwailai utugurri kurrab indamig, trendø treeg purayamig palønrrabig kuig køn— chib.

Incha nøbe trenchibig køn:

—I Jesús na ñimun eshka wamindiibe, Cristo truitøwein køn cha, tru ñim muniirab kuig.—

4 Inchen mõiløgøsrøn tru Pablo wamindigwan yandø treegwein kuitamab isua, Pablonba, Silaswanba linchen, katø griegosmera Tiuswan truba isua melabelø truba yameløba, katø ishumburmera truba kusrebelø yameløba truiløgucha linchibelø køn.

5 Inchen judíosmerabe truba pusrkwai namig kui asha, larrø kaig mõguelø ka lliraptø pønrrabelan wama, kan nu sətø trubalatø misra, ciudayu misaameran chinetø isunrrai trømbøig inchib kurrabelø køn. Incha Jasønwei yau kegørrabelø køn, Pablonba, Silaswanba merrarrawa, misaamerai merrab wesrunrrab.

6 Incha truyu wetørranrrab kaimappe, Jasønwanba, nunelø katøganelanba kemøra, paluunchib waram srua ambubelø køn, ciudayu misaameran ashib karub purrabelaimay, trenchib trashib:

—Yu pirau kerriguba maya misaameran ¡katø! kan ørøba mandøgucha kømuielø melønrrai marøb mõgueløbe yusrøngucha amrruin køn chib.

7 Inchen Jasønbe nui yau wama pera wain køn cha. Iiløbe tru Roma maya misagwan ashib karub wabig César tru maig maramigwan martrai pøra wariilane, mõrøg kømub utsøbetab ka nømui mburaptø marøbelø køn cha, katøgan rey køn chib, kan Jesús taig.—

8 Inchen iigwan mõrabe, maya misaameraba katø tru misagwan ashib karub purrabeløbabe truyu nømgucha ke mandøguen kømui inchibelø køn.

9 Inhendø Jasønwanba, tru kanelanba elatsamig kønrrai truburø an utabe, elachibelø køn.

Pabloa, Silasba Berea ciudasrømay ambub

10 Inchen nuneløbe ke pillirabendø Pablonba, Silaswanbabe Bereasrømay webambingaruben, trusrø puabe, judíosmera tulundzuni yau kebambubelø køn.

11 Tru Bereasrø judíosmerabe tesalónicaelø lata kømø, maig isumigwan isummay isubelø kuabe, Jesucristoi wamindigwan truba chull inchib uta, tru nøm trendaibe ka isatø mõmuitashchab ashchab, kwalømmørig Tiuswei wam pørigwan chi køtashchab maig køtashchab ashibelø køn.

12 Inchawei treekkurri truiløbe Criston truba nu køreben, kusreb ishumburmera griegasmera køben, katø mõguelø truba yameløba kørebelø køn.

13 Inchen Tesalónicasrø judíosmerabe, Tiuswei wamwan Bereasrøngucha Pablo eshka kusrenanøb unan taig wammørøppe, trusrø misag nørø pørrrabigwan namig kui inchi kurrønrrai martrab ambubelø køn.

14 Inchen tru urastø nuneløbe Pablone mar pulusrønmay øren, Silasba, Timoteobatø Berea kørømisrøbelø køn.

15 Inchen Pablon pera ambubeløbe Atenassrøngatig pera amba pegucha, yandø tru Silaswanba, Timoteowanba ke petø nøba tulundzunønrrab amrrunrrain cha, Pablo trencha karuigwan mørabe, nømbe katøle Bereamay legucha amrrubelø køn.

Pablo Atenassrø

16 Incha Pablobe Silaswanba, Timoteowanba Atenassrø muniirab uña, ke taska mari tiusmeratø netsaig ciuda kui ashabe, nuinetø chiguen tab kømui inchi køn.

17 Incha treekkurri judíosmera kusrenani yau judíosmeraba, katøganelø Tiuswan truba isua melabeløba ‘iibe øyeeg køn’ chib, ‘iibe øyamay køn’ chib ambugurri igurri waminchibelø køn, katø mayeelø misaamera tulundzunug kwalømmørig truyu amrrubeløba chigucha.

18 Inchen nørø kusreb møguelø, tru filøsofos “epicúreosmera” tailø, nømui nørø isuigu asran ka tab kønrrai marøb tøgagúinuutø tabig køn chibeløba, katø tru filøsofos “estoicosmera” tailø nørø isuigwan kusrebeløba ‘iibe øyeeg køn’ chib; ‘iibe øyamay køn’ chib, Pabloba waminchibelø køn. Inchabe kan utueløbe trenchibelø køn:

—¿I møg ya wamdø nigaipe namune chi wamincherah?— cha.

Inchen kaneløbe:

—Katøgan peg pirausrø tiusmeraiwan eshka kusrennøbig køb asønan— chibelø køn, kaguende Pablobe Jesúswei tru tabig srø wamwanba, kwawa katø øsiiraigwanba eshka kusrenanen.

19 Incha nune kanbalø Areópago taig, tru kusrebelø tulundzuninumay merrarrawa pera amrrua, trencha payibelø køn:

—¿Tru srøig peetø kusrenanøb ñi waminchib arrigwan namun wammørøsrkøbsrumuguh? cha.

20 Pøs namui kalumerayube ñibe chigøben ke ka peesrøtiitø waminndan cha. Inchawei trunun tab chi chibig kui wetøgørrag kuin ker— cha.

21 Kaguende mayeeløba Atenas warab misaameraba, katø tru petø ka amrruatø warabeløba ¡katø! chi peg isumøtø, chigøben ke srøig isuigwandø waminchib kua, nømbe truigwangøba wamindi mørøg kui inchi købig køn.

22 Inchen Pablobe Areópago taig tru kusrebelø tulundzuninug nømuin tøbøtag pasramisra, trenchibig køn:

—Atenas misaamera, ñimbe chiyutøgucha Tiuswan isuer taigu ke maizhikken pinab marmønrrab inchi belø kuin kui ashar cha.

23 Kaguende na truøø lliirab ashib uñene, tru tiuswan køriibala tabig waminchib mariiøsrø, kanbaløsrømbe altargucha wetørrar cha. Truyube trenchibig pørig tøgag,

TIUS ASIIMIIGWAN

chibig. Tru ñim ashmubendø køriibala tabig waminchib marøb tøgagúig, tru Tiuswan nabe ñimun eshka waminchar, chibig køn.

24 I Tius køn cha, tru pirøwan marøbig, katø truyu chine købelan chigucha. Inchawei srømbalawan lata, pirøwan lata, nøwei ashib pasrabig kuig køppe, nøbe møguelai taska marig tab yamerayu wamiig køn cha.

²⁵ Katø misag nòmui taska mariiløtøga tab inchaim palai wamíig kòn cha, chi palai wamíig kuabe. Kaguende nø kòn cha, mayeelan øsig kømigwan tranøb, israb amønamig kønrrai tranøb, katø chigurrimbunø tranøb inchibiibe.

²⁶ 'Kan møkkurrindø truyugurri chi misaatø larrøbichib inrrabigwan nøbe marig købig kòn cha, pirø muba kuimburab warønrrai. Incha merrabsrøwei nøm maya yana waramigwanba, chutø, chutø waramigwanba kanmaytø chab asha pønraig købig kòn cha.

²⁷ Øyeeg marøppe, ka srølamøratøguen Tiuswan lawa inchippa, wetørratashchab indig kòn cha. Pøs isa kømø, Tiusbe nam møigweinuutøgucha chi yab pasrømøn cha.

²⁸ Kaguende nambe Tiusweinug øsig pønrrab, nøgurri llirab amønñib, nøgurri misag pønrrer cha. Katø kan ñimui utuitøwei, chiwan køben purø tabzhig isua waminchibiima trendaig købig kòn cha: "Nambe Tiusweinkurri larrøbicha amrrub misaamera ker" cha.

²⁹ Pøs trube, nam Tiuswei uremera kuig køppe, Tius nø trendø maig kuigwane kabe oron, kabe anwan, kabe srugwan møguelai isuitøga taska purø tabzhig mari lataig kuitamab isumgaig kòn.

³⁰ Chigucha nebua ashmeelø køb urassrø øyeeg waraig købigwane, Tiusbe ka treeg purainrraindø kagøbashippa, møi yan kwalømmerawane maya misaameran chuelandøgucha nòmui kaig mariilan isua møra, Tiusweimay lliranrrai karua pasran cha.

³¹ Kaguende nøbe pirau maya misaameran maig asha maramig kan kwaløm wesrua pasran cha, tru sølgandø tabig maig kønrrabigwan maramig tru kan møg treegwan martrai nø lawa wesrua pasriitøga martrab. Incha treeg purainrraitamab isua pønrramig kønrraimbe, tru møwane kwaitai utugurri kusruig købig kòn— cha.

³² Inchen tru møøbeløbe, tru kwailø katøle øsiiranrrun taigwan mørøppe, kan utueløbe ke ka indzatø møren, katøganeløbe trenchibelø kòn:

—I wamindigwane katøwan chi mørtrumøn— cha.

³³ Inchen yandø Pablobe nòmui utugurri webya ibig kòn.

³⁴ Inchen køben, møiløgøsrøn møguelø Pablon mendig amba, Tiuswan kørebelø kòn. Inchen tru ututø Dionisio tru Areópago yu kusreb møguelai utuiba, katø kan ishug Dámaris taiba, katøganeløba Tiuswan kørebelø kòn.

18

Pablo Corintosrø

¹ Inchen treeg puraiben, Atenaskurri Pablobe Corinto ciudadsrømay webibig kòn.

² Incha trusrømbe kan judío Aquilas taig Ponto pirausriigwan wetørrabig kòn, tru Aquilasba, nui srai Priscilababe Italiagurri Corinto ke srø puatø warøben. Kaguende tru Roma maya misagweim pala ashib karub wabig Claudiobe treeg karuin købig kòn, judíosmerabe mayamba Romagurri webusriilø kønrraingue. Incha Pablobe truilaimay ibig kòn.

³ Inchen Aquilasba, Priscilababe Pablo nø marigwandøwei tru carpas ya-ureg marøb tsushibelø købene, nømbe kørromisra tru marøb warabelø kòn. Pøs nøbe carpas ya-ureg marøb tsushibiitøwein købig kua.

⁴ Incha judíosmera tulundzuni yau isrin kwalømmørig Pablobe øyeeg kòn chib, øyamay kòn chib waminchibig kòn, judíosmeran, griegosmeran maig kuigwan nebua asøskønrrab inchib.

⁵ Inchen Silasba, Timoteoba Macedoniagurri pubene, Pablobe Jesúsweimburab eshkaab kusrenanamigutø kebya pasramisrøbig køn, tru judíosmeran: “Jesúsbe tru ñim muniirab kuig tru Cristo køn” cha eshkaab.

⁶ Inchen judíosmerabe mørøg kømub chi treeg kømubendø indan chib namig kurra, nun tsalø wamøben, Pablobe nui kewagúilan pabørrgøb trenchibig køn:

—¡Ñimui animbe ñimuim palatøwei peñchai mømimbe ñimdøwei lawa pønrramisran! cha, ¡Yandø mømimbe tru animbe naim pala attraingaig chishig webya pasrar! cha. Møingurrimbunøbe judíos kømø misaamerairsømay yamønrrun— chibig køn.

⁷ Incha truyugurri webya, kan møg Tito Justo taigwei yamay ibig køn. Truipe Tiuswan køriibala tabig waminchibig købig køn. Inchen nui yabe tru judíosmera tulundzuni ya mendatøweim pasrabig køn.

⁸ Inchen tru judíosmera tulundzuni yau ashib pera pasrabig, Crispobe, nui yaeløba kerrigu Señorwan køreben, møiløgøben truba yamelø corintosreeløgucha Pablo wamindigwan mørøbeløbe Criston kørewa, piu umbu ulsrailø kuig køn.

⁹ Inchen Señorbe Pablon yem kan piab lataigu trenchibig køn:

—Kørig kui inchimøta cha; waminchibig waminchi cha; ka købashiptinchimøtø.

¹⁰ Kaguende nabe ñiba pasrar cha, ñune mugucha kaig martrab kebatachab kaimanrrun cha. Kaguende i ciudadube nabe misag truba nu tøga pasrar— cha.

¹¹ Inchen Pablobe Corintosø pila y tøbø pila kørrømisrøbig køn, Tiuswei wamwan kusrenanøb.

¹² Galiòn Acaya pirau maya misagwan ashib karubig køb uras judíosmerabe søteeløba ke kandø isua pønrramisra, Pablon ashig kømub namig kurra, tru maig maramigwan asha marøb purrainuumay srúa ambubelø køn,

¹³ trenchib:

—Tiuswan køriibala tabig wamindamig tru maig maramigwan martrai Moisés pørig maringaruimay kømøtø, nøbe misaameran ke peemay maramne inchib unan— chib.

¹⁴ Inchen Pablobe ke waminchabguen inchen, Galiònbe judíosmeran trenchibig køn:

—¡Au, ñim judíosmera! Kan chigøben truba nu kalø marig kui, kabe purø trømbøig marig treeg chigúimbe, trube na ñimun treegwan mørøb wab-srubrainrrun cha.

¹⁵ Inchendø iibe chi treeg kømøtø, ka wamindiilanbah, katø tru munchimera chabah, tru ñimui maig maramigwan martrai pøra warilø chabatørre inchib kuig købene, uyube ñim asay cha, øyeegwane nabe asha tranrrabgucha wamur— chibig køn.

¹⁶ Incha tru maig maramigwan asha marøb purrainukkurri wambig weguchibelø køn.

¹⁷ Inchen mayeelømisra judíosmera tulundzuni yau ashib pera pasrabig Sósteneswan kemøra, tru maig maramigwan asha marøb purraig merrab truba kurraguchibelø køn. Inchen Galiònbe trunune chigucha isua ashmø, chinchibgucha warøbashmab ashibig køn.

Pablo katøle Siria pirau Antioquíasømay ib

¹⁸ Inchen køben Pablobe katøgucha truyu yam kwaløm kørrømisra, nunelan yandø ‘ungwa’ chibig køn. Incha yandø Siria pirausrømay barcoyu

iben, Priscilaba, Aquilasba nõba ambubelø køn. Incha Cencreasrømbe Pablobe pusrugwan chishchig parøbig køn, Tiuswan 'nø maig martrab cha kørrømisrigwan treeg maramønrrun' chib.

¹⁹ Incha Efeso ciudasrø puabe, Priscilanba, Aquilaswanba tarømisra, judíosmera tulundzuni yau kebya, judíosmeraba maig kuitashchab payiyab waminchibig køn.

²⁰ Inchen nõmbe katøguchi nõmba truyu kørrømisrtrai tiusmanda chib kuin-gucha, nõbe kørrømisrmøtø,

²¹ nõbe yandø:

—Ka inrrab inchar cha 'ungwa' chabe, trenchibig køn: Tius nan katø kusrømay attrain købene, katø arrumønrrun— cha.

Incha barcoyu nebya, Efesogurri ibig køn.

²² Incha Cesarea ciudasrø puabe, tru iglesian 'ka warøgueh' chinrrab nebya, trugurrimbe Antioquíamay kørraarribig køn.

²³ Incha truyu kan maya yana køsrøn tsuabe, Galacia pirauba, Frigia pirauba, trusrø lutøgurri lirrab inrrab webibig køn, mayeeløba tru Jesucristoi kusrenanigwan marøb melabelan kullaaramø, mur pønrrønrrai purugub waminchib.

Apolos Efeso ciudasrø eshkab kusrenanøb

²⁴ Inchen tru uras kan judío alejandriásriig, Apolos taig, purø may waminchib møg Tiuswei wam pørigwangucha treetøwei purø nu nebua ashibig, Efeso pubig køn.

²⁵ Nøbe Señorwei maywan muba amønamigwan kusrenanigwan kusreweig kua, nõbe jkatø! treegwan martrab isua marøb, Jesúsweimburab waminchib kusrennøppe, maig kuigwan treeg kusrenanøbig køn. Juan tru misaameran piu umbu ulsrailø kømig kusrennigwandø nebua ashibig kuagucha.

²⁶ Incha Apolosbe judíosmera tulundzuni yau mungucha kørmø waminchib kusrennøb pølbarsen, Priscilaba, Aquilasba tru wamindigwan mørabe, Apoloswane nõørø pera amba, Tiuswei maywan katøguchinguen tab nebua asingarub maig kuigwan eshkabelø køn.

²⁷ Inchen Apolos Acaya pirausrømay inrrab inchen, nuneløbe masken ka martrai inchib, trusrø tru Jesucristoi kusrenanigwan marøb melabelan kan kilga pørøbelø køn, Apoloswan nõm tabig wamab utønrrai. Inchen nõbe Acayasrø puben, Tius tru nõ ka yandø tab indiitøgatø Tiuswan kørebelayasiibe kan maya nuguen tab købig køn.

²⁸ Kaguende judíosmera tru nõm 'treeg kømøn' chib amrruigwane mayee-lai merrab Apolosbe mu mandamgaig 'treeg køn' chib waminchibig køn. Tiuswei wamwan pørigu treeg chibig køn cha eshkab: "Jesúsbe tru Cristo ñim muniirab kuig, truig køn" chib.

19

Pablo Efeso ciudasrø Jesucristoiwan eshkab kusrenanøb

¹ Apolos Corinto tsumne, Pablobe tru piraupandøwei pureb ya, Efesosrø kørraarrua, kan møiløgøsrøn Jesucristoi kusrenanigwan marøb melabelan wetørrabig køn.

² Inchabe trencha payibig køn:

—¿Ñimbe Criston køreb uras Espíritu Santon utøgueh?— cha.

Inchene nõmbe:

—Espíritu Santo købig kuin kui nambe wammørøbguen wammørmeelø ker— cha trenchibelø køn.

³ Inchene Pablobe trenchibig kòn:

–Trube, ñimun tru piu umbu ulsraibe ¿chi kòn chibigwan utig kòh?– cha.

Inchene nòmbe trenchibelø kòn

–Nambe Juanwei piu umbu ulsraigwandø utig kòn– cha.

⁴ Inchen Pablobe trenchibig kòn:

–Juanbe nòm mas kaig marmønrrab isua møra, Tiusweimay llirain kònmbab asanig piu umbu nòmun ulsrailø kuig kòn cha, tru nui wendau attrabig Jesúswan nø kuitamab isua, misaamerabe nun køreinrrain– chib.

⁵ Inchen misaamerabe øyeeqwan mørabe, Señor Jesúswei munchiyu piu umbu ulsrailø købelø kòn.

⁶ Incha Pablo tasigwan nømuim pala estsarene, nømuim palabe Espiritu Santo kørraaruben, møriimø wammera waminchib menda, Tius maig karuigwan nømbe waminchibelø kòn.

⁷ Truiløbe kerrigube møguelø doceburab købig kòn.

⁸ Incha Pablobe pøn pøl ørøba judíosmera tulundzuni yau nøbe chigucha kørømø kusrenanøb ‘øyeeq kømøn’ chib, ‘øyamay kòn’ chib waminchibig kòn, maig kuigwan nebua asamne inchib Tius nø ashib karub pasraigweimburab.

⁹ Inchen kan utueløbe nømui manrrømeran mur marøb, trunun treeg kømuitamab isub kaashib, maya misagwei merrab trømbøig wamabelø kòn tru srø maywan. Inchen Pablobe nòmun tarømisra, tru Jesucristoi kusrenanigwan marøb melabelan nøørø pera ya, kan Tirano taigwei kusrenani yau kwalømmørig ‘iibe øyamay kòn’ chib eshka waminchibig kòn.

¹⁰ Treetø pa pila ørøba maren, trugurri Asia pirau warab misaamerabe mayeeløba, judíosmera lata, griegosmera lata Señorwei wamwan mørøbelø kòn.

¹¹ Incha Tiusbe Pabloi tasikkurri maramburab mariilø purø nørreelø marøbig kòn.

¹² Pabloi pañelumeran katø chigøben marøb pasramisrtrab pala itøgueelø nui asr kebatiilan, truilanbagueen kwanrreelain pala wartrab srua amben, treetøgatø nømui kwanrrømerabe chab tammisriilø kørømisren, kwaimandziimera nømuinukkurri webamben inchibelø kòn.

¹³ Inchen mø judíosmera køsrøn kwaimandziimeran tru misaamerainukkurri webusrøb truørø, truørø amøñibeløgucha tru treeg maramig Señor Jesúswei munchitøga mara ashchab inchibelø kòn, tru kwaimandziimeran trenchib:

–¡Tru Pablo eshka kusrenanig Jesúswei munchiyu, nabe webambay tamønrrun!– chib.

¹⁴ Inchen tru iigwan marøbeløbe kan judío Esceva taig, tru sacerdotemeran karubigwei nusrkalø siete købig kòn.

¹⁵ Inchendø nøm treeg maren, tru kwaimandziibe nømune trencha løtabig kòn:

–Jesúswane mu kui ashib, katø Pablongucha mu kui ashib inchibig kur cha. ¿Inchen ñimbe mumera kermah?– cha.

¹⁶ Inchen tru kwaimandziitøga møøbe nømuim pala itøbørswa, nømune mayeelanba kamaren, ¡katø! nømbe tru yaugurri kegøsaateelø kørriindiilø chab luløbelø kòn.

¹⁷ Inchen tru øyeeq purayaigwane tru Efeso warab misaamera mayeeløba wammørig kørømisrøbig kòn, judíosmera lata, griegosmera lata. Inchen mayeeløba truba truba kørimatøben, Señor Jesúswei munchibe masken, masken wammørig kørømisrøb ibig kòn.

18 Inchen m̄ōil̄oḡoben truba yamel̄o Criston k̄orebel̄obe øyeeg maramgailan-re mar̄obel̄o ker chib mayeelai merrab eshkaab amrrubel̄o k̄on.

19 Inchen tru kaig libron kusrewa, kwaimandzigweimburabelan mar̄obel̄obe truba yamel̄o truil̄oḡucha treet̄ōwei tru n̄omui kaig libromeran srua amrrua, mayeelai merrab chab parr̄obel̄o k̄on. Inchen tru libro peni anmeran mayan k̄otashchab ashene, cincuenta mil k̄ōbig k̄on.

20 Incha øyamay Señorwei wambe larr̄ōbichib nurab, mu chindamgaig k̄orr̄omisr̄ōb ibig k̄on.

21 Inchen øyeel̄o chab puraiben, Pablobe Macedonia pirauwan k̄oben, Acaya pirauwan k̄oben llirab yabe, nuinet̄o Jerusal̄énsr̄omay inrrab isua, trenchibig k̄on: “Jerusal̄énsr̄omay yabe, Romasr̄omaygucha yamig tab punr- rautan” cha.

22 Incha Macedoniamaybe nui pagat̄o purugubelan Timoteowanba, Eras-tonba øra, n̄obe Asia pirau kat̄o kan maya yana k̄osr̄on k̄orr̄omisr̄ōbig k̄on.

Efeso misaamera ke chindi asamgaig inchib kurrab

23 Tru kwal̄ømmerawan tru sr̄o mayweimburappe truba namig waminchib kurrabel̄o k̄on.

24 Kaguende kan m̄oḡ, Demetrio taig, and̄oga chiḡoben mar̄ōbiibe, tiusa Dianai ya-ureemera and̄oga mariil̄o tabzheel̄o mar̄ōbig kua, tru kat̄oganel̄o treel̄ōwei mar̄obelane tru yaniil̄ot̄oga pur̄o k̄orr̄o anmera maringarubig k̄ōbig k̄on.

25 Incha tru treeg mar̄obelanba, kat̄oganel̄o treeg latait̄ōwei mar̄obelanba tulundzuna, Demetriobe trenchibig k̄on:

—¡Ñim mayeel̄o! nam puarmera misr̄ōb ambamibe øyeeg mariil̄ōyugurri an arrubig kui ñimbe ashibel̄o k̄on cha.

26 Kat̄o ñimbe ashib, m̄or̄ōb indiinrrun cha, Efesot̄o k̄om̄ot̄o, Asia pirau kerrigu lutau Pablobe: “M̄oguel̄o taska mariil̄obe tiusmera k̄om̄on” chib, ke treeg kuitamab isumne inchib wamincha, misagwan truba n̄orr̄o tar̄ōmarin k̄on cha.

27 Kan nam iit̄oga yeeg yan̄ōb an mar̄ōb kuibe øyeeg inchene, chi tabig k̄omui ashib kaashib kebamben nambe keḡorr̄amsun k̄on cha. Kat̄o trut̄o k̄onrrab kuind̄o, tru pur̄o nu tiusa Dianai tab yagucha, chigucha k̄om̄ig lataig k̄orr̄omisr̄ōb iben, Diana, tru pur̄o nuig, pur̄o tabiibe pet̄o pinab inrrun chibig k̄on, Asia pirau mayamba, yu pirau kat̄o maya misaameraba, nun k̄oriibala tabig waminchib t̄ogaḡuig.—

28 Inchen øyeeg wamindiilan m̄orabe, pur̄o tr̄omb̄ōig nama, trenchib trashibel̄o k̄on:

—¡Efesosmerai Dianabe pur̄o nuig k̄on!— chib.

29 Inchen tru ciudayu maya misaabe ke chindinguen asamgaig inchib mendappe, misaabe ke kanbalat̄o amba, Pabloi linchibel̄o Macedoniasr̄o m̄oguelan, Gayonba, Aristarconba kem̄ora, ¡kat̄o! paluunchib waram srua ambubel̄o k̄on, tru chiḡoben waminchab misag tulundzuniisr̄omay.

30 Inchen Pablobe truyu misagwan waminchab kebinrrab inchen, Jesu-cristoi kusrenanigwan mar̄ōb melabel̄obe kebibashmeel̄o k̄on.

31 Kat̄o m̄ōil̄oḡosr̄on Asia pirau misaameran ashib karub purrabel̄o Pabloi trend̄o asiil̄o chigucha, nuimay ør̄obel̄o k̄on: “Tru chiḡoben waminchab tulundzuniisr̄ombe tiusmanda kebin̄onrrig” cha eshkanrrai.

32 Inchen misaamera truyu tulundzuna pasrabiibe ke chindinguen asam-gaig inchib kuig k̄ōppe, kanel̄obe peg chib trashiben, kat̄oganel̄obe kat̄o peg

chib trashiben, tru mayeelø lutau tøbø pasrabiibe chinchab tulundzunin kuinguen mormøwa købig køn.

³³ Inchen tru nu misag pasrabigwei utuelø møiløgøsrøn Alejandron webingarumdiig køn chib eshkaben, judíosmerabe maya misaamerai merrab-srøngatig purainrrai trawaguchen, Alejandrobe maya misagwei merrab maig kuigwan eshkab waminchab, 'niløtø kuy' cha, tasig kusrubig køn.

³⁴ Inchendø judío kui wetøgørrappe, katøle sötøbah, sötøbah trashibelø køn, kan pa ura purab trenchib:

—¡Efesosmerai Dianabe purø nuig køn!— chib.

³⁵ Inchen tru ciudayu tru chigurrimbunø mariilanba, maramelanba kilga pørøb wabiibe misagwan yandø mas trashimumne inchib megaptø, yandø wasrørangaruabe trenchibig køn:

—Efeso misaamera, tru purø nuig tiusa Dianai tab yawanba, katø tru nø lataigwei srømbalasarøngurri peñibigwanba, yamba i Efeso ciudabe truilan chi kømønrrai ashib pasrabig kui ¿kan mube wammørmig kønrraitamabelø kø chindah? cha.

³⁶ Inchawei treeg kømubendø chib kan mugucha isan tamgaig købene, ñimbe yandø wasrøramdiig køn chibig køn, chiwandøgucha ke kan chinchaptø inchib marmøtø.

³⁷ Kaguende i møguelø ñim srúa amrruiløbe namui tiuserai tab yamer-ayugurri nilab wesrub kømøwei, namui tiusan purø trømbøig chi wamab pønrrømøwei indan cha.

³⁸ Inchawei Demetrioba, katø tru nøba treetøwei marøb pønrrabeløba muba køben aleguiyaig tøgaguabe, truweiwei maig kuigwan nøm asha martrai truyu purøra pønramelø pønrrab, katø maig kønrrabigwan asha marøbelø purrab indan cha. Møitøgucha truyube kangurrin kangurri ñimun maig punrrabigwan treeg asha martra tay, chibig køn.

³⁹ Inchen ñim katøgan peg wamindamig tøgaguabe, trube, treegwan waminchab tulaamba, trunun purramisra asamig palønrrun cha.

⁴⁰ Kaguende møi øyeeg puigwane namune ka kailø køptørre, øyeeg martrab kurrig kui inchaptiikken køn cha, kan chigurri nambe øyeeg inchib kurrig køn cha eshkab pønrramig chigaabendøbe.—

⁴¹ Incha nøbe øyeeg taitøga misag tru tulya pasrabigwane chab tarømarøbig køn.

20

Pablo Macedoniamayba, Greciamayba ib

¹ Yandø tru øyeeg chindinguen asamgaig marøb kuig wasrøraben, Pablobe Jesucristoi kusrenanigwan marøb melabelan wamingarua, maig melamigwan treeg marøb melønrrigay chib wamincha, trugurrimbe nømun 'ungwa' cha, Macedoniasrømay inrrab ibig køn.

² Incha tru pirau truørø llirab uña, Tiuswei ureemeran maig melamigwan treeg marøb melønrrigay chib truba nu wamincha ketabe, Greciasrømay ibig køn.

³ Incha nø trusrø pøn pøl kørrømisra, yandø katøguen Siriamay barcoy ke inrrabguen incha, judíosmerabe nilø trubatø nun kaig martrab inchib kui wammøøbig køn. Incha treekkurri katøyug Macedoniawandøwei purainrrab ibig køn.

⁴ Inchen bereasriig Pirroi nusrkai Sopater kōben, tesalónicasreelø Aristarco kōben, Segundo kōben, Derbe pirausreelø Gayo kōben, Timoteo kōben, Asia pirausreelø Tíquico kōben, Tróximo kōben Pablon linchibelø kōn.

⁵ Incha nōmbe namui merrabguen webamba, Troas ciudasrø namun muniirain kōbig kōn.

⁶ Pirri chi levaduragaig main kwalømmera chab patsōben, nambe Fili-poskurri barcoyu webamba amba, trattro kwaløm wendau Troas ciudasrø nōmun wetōgōbelø ker. Incha truyu trune kōrrømisrōbelø ker.

Pablo Troassrø ashchab ib

⁷ Incha nambe truaalømbe tru pirriwan pirishinrra manrrab tulundzuna kōben, Pablobe waminchab pōlbasrōbig kōn. Kaguende katø kwalømdø nūimbe webyamig kōben, nui wamindamigwan waminchipe, yem tōbōtakkatig waminchibig kōn.

⁸ Inchen pala pisusrø nam tulundzuna purrainuube, lámparamera truba yam pilab melōben,

⁹ kan matsinø, Eutico taig, pendana pala wabigwane yandø ki kanab arruben, Pablobe ¡katø! waminchibig waminchen, tru matsinøwane yandø ke kīgōbiitø kamarig kib wawa, tru pōn pisusrøngurri kebinabya, kwabeñen, kwaig kusrabelø kōn.

¹⁰ Inchen Pablobe kōrraarua, tru matsinan irab kusrawabe, trenchibig kōn: –Øsiiran cha, kwarmōtay– cha.

¹¹ Incha Pablobe katøle palasrø nebarrua, tru pirriwan pirisha mab kua, katø nōmui mamigwan chab mabe, tōr-rramnegatig wamincha, yandø ibig kōn.

¹² Inchen tru matsinane øsiguig pera amben, mayeeløba truba isuin kua, kasrag kuilø kōrrømisrōbelø kōn.

Troassrøngurri Miletosrømay ambub

¹³ Incha nambe merrab misra amba, Asón ciudasrøngatig barcoyu ambubelø ker, Pablon trusrø katōnrrab, kaguende nōbe barcoyu kōmōtø, kat-sikkatø inrrab misra, nōbe treeg kōrrømisrig kōben.

¹⁴ Incha Pablobe namba Asónsrø asiyaben, nambe barcoyu nun nebera, Mitilene ciudasrømay ambubelø ker.

¹⁵ Incha truyugurri webamba, katø kwalømbe Quío ciuda pinrøguesrø pubelø ker. Incha wendø kwalømbe Samos ciudasrø pua, katø kwalømsrømbe Mileto ciudasrø pubelø ker.

¹⁶ Incha Pablobe Efeso ciudasrømbe barcoyu purab inrrab isuig kōn, kaguende Asia pirau menrra yana kōrrømisrømnrrab isua. Pøs treeg nebubene, Pentecostés kwalømbe Jerusalénsrø wanrrab isuig kua, mallatø inchib megaig kōbig kōn.

Iglesiyau ashib pōnrrabelan Pablo inrrab ‘ungwa’ taig

¹⁷ Pablobe Miletosrøngurri wamōnrrai ørōbig kōn, tru Efeso iglesiasrø tru Tiusweimburabelan pera marøb pōnrrabelan.

¹⁸ Incha amrrubene, trenchibig kōn:

–Ñimbe na srøsrø kwaløm Asiasrø puinukkurrimbunø, nabe chu urastøgucha ñimui utu na maig uñibig kuigwan ñimbe tab ashibelø kōn cha.

¹⁹ Ñimui utu Señorweimburabelan maig kōben inchimø, tammay marøb, truba kappin kōrrøgøb, judíosmera nan chinetø kaig martrab kurrøben, treeløyu pureb arrigwan.

²⁰ Treeg kuingucha, ñimuyasig chigøben tabig kørnrabigwane nabe kørig kui inçhib sørab pasrømø, maya misagwei merrab lata, truørø yamørig eshka kusrenanig købig kørn cha,

²¹ judíosmeran lata, griegosmeran lata, nømui kaig mariilan isua møra, Tiusweimay liramigwanba, nømui isubigwan namui Señor Jesúsweinug pasra tøgagømigwanba eshka waminchib.

²² 'Incha møimbe nabe Jerusalénsrømay inrrab inchar cha, ¡katø! nan trusrømay Espiritu ke inrrai inchen, trusrø nan chi purainrrab kuinguen mørmubendø.

²³ Ciudadørig na yaisrømbe nane chi peg punrrabig pønrrømøtø, ka kailan keeri yau pasramibah, kaig nebuben isuig megamibatø treeg nebunrrab kørn cha. Espiritu Santo eshkaigwan trunundøwei nabe asha pasrar chibig kørn.

²⁴ Inchendø nai øsig kømigwangøba isub pasrømøwei, øsig kømibe nayasiibe purø tabig kuitamab isub pasrømøwei inchar cha. Nai chu pumigwan pumsrøngatig pub, katø Tiuswei tru ka yandø tab indig tru tabig srø wamwan eshka waminchab na Señor Jesúswan utigwan patsøgøb indikkurrimbunøbe chi kømønrrautan cha.

²⁵ Inchawei mayeeløba møimbe ñim Tius nø ashib karub pasrainuguigwan na eshka kusrenanøb pureb yaisreeløbe nai maløwane katølebe managuen ashchaamøn cha.

²⁶ Inchawei møimbe kanmaytø nabe kelarrab trendamønrrun cha: Mayee-lai ani naim pala attrain kømø, naimburappe yandø chi isumikkaig chish pasrar cha.

²⁷ Kaguende Tius maig martrab isua tøgagúigwane nabe kørig kui inçhib chi sørab pasrømø, kerriguh eshka wamindig kuig kørn cha.

²⁸ Inchawei ñimbe ñimasiitøwei tab ashiptø kuy cha, katø ñim ashib tøgagúig Tiuswei iglesia mayeelan chigucha. Truilan ñim Tiusweimburabelan ashib pera pønrrønrrai Espiritu Santo pønnsraig købene, mayeelø Señorwei iglesiyuelan maig ashib tøgagømigwan treeg ashib tøgaguy cha. Kaguende truiløbe nuyasig nui anindøga peniilø kørn cha.

²⁹ Kaguende na yugurri webya ibene, ñimui utube mendailø kerrunrrun cha, ñim ashib tøgagúu ubisha sötøwan pinishinrrabelø, kan lobosmera larrø namiguelø latailø.

³⁰ Inchen ñimui utueløtøweinguen nømui kaig kusrenaniiløtøga, tru Jesucristoi kusrenanigwan marøb melabelan peløsrka nømui mendig amøñibelø kørnrrai martrabelø kurrønrrun cha.

³¹ Inchawei treeg købene, pesannamø tab ashiptø, katø isua kuy cha, tru na pøn pila ørøba yem, kwaløm ñimun møigwandøgucha maig melamigwan ke isuppatø melønrrai, ñimun chu uraskucha kanun kanun na kappin kørøgøb wamindig købig kørn cha.

³² 'Trube, møimbe øyeeg købene, Señor Jesucristogurri nunelø, ñimun Tius nø ashib tøgagønrraimba, katø nui tru ka yandø tab indig wamyuba pønrsar cha. Truibe tabig nørørab amrrai maramburab marøbig køb, katø tru keta tranrrab kørømisrigwan, nuyasiitø tarømariilø mayamba trunun utamig kørnrrai marøb inçhibig kørn cha.

³³ Nabe anwan lata, oron lata, asru keelan lata, muiwangucha naimarømmørø inçhib chull incha kømur cha.

³⁴ Ñimbe ashibelø kuinrrun cha, naimburab chi palabelanba, yu purra-belai chi palabigwanba tøgagønrrai, marøbiibe i nai tasiimera kui.

³⁵ Chiyutøgucha nabe øyeeg mariiløtøga, truburab kømeeelan kuñab puru-gunrrab, øyamay kømig købig kuitamab asha kønrrai marøb ñimun kena-marig købig køn cha. Señor Jesús øyah tailane nai turyube ke tindøgague: “Tranamibe, utamig lataguen kømø, mayanguen tab kuig køn” cha, tru trendaigwan.—

³⁶ Incha iigwan chab trenchabe, Pablobe tømboñsra, søteeløbamisra Tiusba waminchibelø køn.

³⁷ Inchen søteeløba truba truba isub kishib, Pablon irab, muchabelø køn.

³⁸ Incha truba isui kishib waminchibelø køn, kaguende Pablobe nune yandø mas ashmønrrautan chib wamindikkurri. Incha barcosrøngatig lincha ambubelø køn.

21

Pablo Jerusalénsrømay ib

¹ Incha yandø nambe nømun ‘ungwa’ cha, tarømisra amba, barcoyu nebam-babe, Cossrømay sølgandø amba, katø kwalømbe Rodasrømay, truyugurrimbe Pátarasrømay ambubelø ker.

² Incha Pátarabe kan barco Feniciasrømay inrrabig pasrain køben, truyu nebamba ambubelø ker.

³ Incha puraambub amba, mar tøbøtag pasrabig tru Chipre pirowan nebua asha, truigwane yandø atsimaygatø kørromarøb, Siriasrøngatig puraambub amba, Tirosrø pubelø ker, kaguende tru barcobe tru chi niga arrigwan truyu pinøramig køben.

⁴ Incha nambe truyu trune kørromisrøbelø ker, Jesucristoi kusrenanigwan marøb melabelø truyu warain køben. Inchen nømbe Espíritu Santogurri eshkailø kua, Pablone Jerusalénsrømay imønrrain chibelø køn.

⁵ Inchen yandø tru waram kwalømmera nemisren, nambe werruben, mayeelø nømui sraløba, ureeba ciudayugurri wambiisrø werrumnegatig namune lincha werrubelø køn. Incha truyu pi menda sötøba tømboñsra, nambe Tiusba waminchibelø ker.

⁶ Incha nambe kangurrin kangurri ‘ungwa’ chabe, barcoyu nebamben, nømbe nømui yamay katø ambubelø køn.

⁷ Incha nambe piu treeg puramrrub amrrua, Tirogurrimbe Tolemaidasrø pubelø ker. Incha tru nunelan ‘ka lincha warøgue’ chib puabe, nømbe truyu kan kwaløm kørromisrøbelø ker.

⁸ Incha katø kwalømbe, truyugurri webamba amba, Cesarea ciudasrø puabe, Felipe tru Tiuswei tabig srø wamwan eshkaub uñibigwei yau pubelø ker. Trube tru srøsrø siete wesrawa pønsrailai utuig købig køn. Incha nambe truigwei yau kørromisrøbelø ker.

⁹ Inchen Felipebe piगतø nimbasrømera nømdeelø tøgaig købig køn, truiløbe Tius maig karuigwan eshkabelø.

¹⁰ Nam truyu yam kwaløm warøbene, Judeagurri kan møg, Agabo taig, Tius maig karuigwan eshkaubig kørarrubig køn.

¹¹ Incha namuinug puabe, Pabloi pøronaigwan kusrua, nøasiitøwei katsig-wanba, tasigwanba lusrabe, trenchibig køn:

—Espíritu Santoe trendan cha: “Jerusalénsrømbe judíosmerabe i pøronaig puai gwane øyeeg lusra, judíos kømø misaameran tranrrun”— cha.

¹² Inchen trunun mørabe, nambe truyueløba misra, Pablon ‘Jerusalénsrømay imøta’ chib truba inchibelø ker.

¹³ Inchen Pablobe trenchibig køn:

—¿Chinchabre kishib kogue cha, nai manrrowan kullaaranob ke nan ka isui inchai inchib? Pøs nabe ka lusriitø kønrrab kømøtø, kwamig nebubene, Jerusalénsrø ka kwanrraptø pasrar cha, Señor Jesúswei munchigurri.—

¹⁴ Inchen nambe imønrrai maya, maya inchib meløwa kaimappe, trenchibelø ker:

—Trube, Señor maig kønrrain køben, treeg kønrrain— cha.

¹⁵ Incha yandø truyu treeg warøwa, maig palønrrabigwan srua ambamig chab tamarabe, Jerusalénsrømay nebamben,

¹⁶ katø møiløgøsrøn Jesucristoi kusrenanigwan marøb melabelø cesareas-reeløgucha namba amrrubelø køn, kan chipresriig Mnasun taigwan perar. Tru Mnasunbe manasrøwei Cristoimburabelan marøbig købig køn. Inchen nambe trugwei yausrø pua, kiamig købig køn.

Pablo Jacobon ashchab ib

¹⁷ Incha nam Jerusalénsrø pubene, nuneløbe namune truba tab wamab kasarag utabelø køn.

¹⁸ Incha katø kwalømbe Pablobe namba Jacobon ashchab amben, truyu tru Tiusweimburabelan pera marøb pønrrabeløgucha kerrigu tulundzunabelø køn.

¹⁹ Inchen Pablobe 'ka lincha warøgue' chabe, lutøgurrih waminchibig køn, tru judíos kømø misaamerai utu nui maramelan marøb uniiløtøga Tius chitø mariilan.

²⁰ Inchen trunun mørabe, Tiuswan truba tabig waminchibelø køn. Inchabe Pablon trenchibelø køn:

—Trube, namui nuneg, judíosmerai utube purø norrø Jesucriston kørewa, truiløbe mayeeløba tru maig maramigwan martrai Moisés pøriilane nømbe chiwanguen pinab marmønrrab ke chinsraatø inchibelø kuigwan ñibe ashibig køn cha.

²¹ Pøs nømune ñuimburab treeg wammøøsrkain pasran cha, ñibe tru judíos kømø misaamerai utusrø maya judíosmera warabelane Moisés pørigwan kusrenaniiløyugurri tarømisrøb amrrai treeg kusrenana, nømui ureemerane asru circuncidamøtay chib, katø namui trendø marøb amønailan treeg marøb amñimøtay chib kusrenanin kui.

²² Trube, ¿møimbe chi martrab? cha, pøs misaabe ñi arrin kui wammøøptøwei inchun cha.

²³ Inchawei øyeeg købene, nam maig taigwan mar cha. Yu namui utu pibgatø møguelø køn cha, Tiuswei merrab maig martrab taigwane treeg martrab kørromisar.

²⁴ Truilan ñiguen pera ya, tru nøm kaig marig chigaig kønrrab chish misrøb marigwan nømbe truguegøtø treegwan ka marøb, nømui pusrugwan køsaazhig partrai tru pusrug parøbigwan ñi pagarab inchi cha. Ñi treeg marene, tru ñi treeg inchibig køn chib tru nøm wammøra kuigwane ka isatø inchib kui mayeeløba wetøgørra, ñigucha tru maig maramigwan martrai Moisés pøriilan maig tailan marøbig kuin kui ashchun chibelø køn.

²⁵ Inchendø tru judíos kømø misaamera Criston kørebelaimburappe tru nam isua treeg martrab cha kørromisrig, trunundø nambe nømun pørig kuig køn cha: tru animal kweecha taska mari tiusmeran pønrrai yaumeran mamøwei, katø aniwan mamøwei, urkawa kweetsi yauwan mamøwei, katø møguelø lata, ishumbur lata trømbøig marmøwei indamig køn— chib.

Tiuswei yaugurri Pablon merrarrawa, srua ambub

26 Inchen Pablobe tru pibgatø møguelan pera ya, katø kwalømbe truiløba kegøtø tru chish misrøb marigwan nøm̄ba kegøtø treeg mara, Pablobe Tiuswei yau kebibig køn, tru kaig marig chigaig kønrrab marøb kuin kwaløm̄mera chi kwaløm̄ nemisren, nøm̄mui kanui Tiuswan tru keta tranamigwan chi kwaløm̄ tranamigwan eshkanrrab.

27 Tru treeg marøb kuin trune patsønrrab kwaløm̄be, Asia pirausrø warab judíosmerabe Pabløn Tiuswei yau ashabe, maya misag ke chindi asamgaig namig kurrønrrai mara, Pabløn kemøra,be,

28 trashibelø køn:

—¡Namui misag, israelitamera purugurray! chib. Chutøgucha mayeelan namui misagweimburappa, tru maig maramigwan martrai pøra wariilaimburappa, katø Tiuswei yaweimburappa tsalø køb ka nøørotø kusrenanøb uñibiibe, i møg køn cha. Incha kan treetø kønrrab kuindø, Tiusweyasiitø tarømarig i nui tab yau kan treeg ya køm̄mui lata kaig trømbøig marøb, griegosmeran yu kertrab arrin køn— cha.

29 Nøm̄ øyeeg chib køppe, kaguende mana køsron Jerusalén ciudayu kan efesosriig Trófimoba lincha uni ashibelø kua, trunun Tiuswei yau Pablobe kertrab arritamab isuarre inchibelø køn.

30 Inchen ciudayu misaabe ke chindi asamgaig inchib kurra, mayeeløba namig kurra, kan tulundø misra, luløb amrrua, Pabløn kemøra, Tiuswei yaugurri wambiisrømay ¡katø! paluunchib megam srua amben, tru urastø yaskabmeran kasrøbelø køn.

31 Incha yandø kwetchab inchib køben, Romasrø maya suldau sötømeran ashib karub wabigwan, yu Jerusalén maya misag chindi asamgaig inchib namig kurrin køn chib eshka wam puben,

32 mõi mõi tru maya suldaumeran nø karubiibe suldaumeran køben, katø suldau cienbatø nøm̄ karubelan køben, pera luløb kør̄raarubig køn. Inchen tru maya suldaumeran nø karubigwanba, suldaumeranba judíosmera ashabe, yandø Pablone mas kurraguchimeelø køn.

33 Inchen tru maya suldaumeran nø karubig puabe, Pabløn merrarrawa, pagatø cadenastøga lusingarubig køn. Incha nøbe mu kuin kui, chi marøb unig kuin kui payibig køn.

34 Inchen tru nu misag sötøbe, møiløbe peg chib trashiben, katøganeløbe katø peetø chib trashiben, treegu chi tainguen mørtrab kaima, suldaumera waraig muguen chindamga yaumay srua ambingarubig køn.

35 Incha tru nebunab nebambiisrøngatig srua pubene, tru nu misag sötø purø trømbøig inchen, treekkurri yandø truyugurrimbe suldaumerabe Pablone pala muta ambam nebubig køn.

36 Kaguende truyu tru nu misag sötøbe mayeeløba wendautø trenchib trashib amrrubelø køn:

—¡Kweechi!— chib.

Pablo misagwei merrab 'treeg mara pasrømur' chib waminchib

37 Incha Pabløn tru suldaumera waraig muguen chindamga yau yandø ke kertrab inchen, tru maya suldaumeran nø karubigwan Pablobe trenchibig køn:

—¿Na chigøsron chinrrab, waminchibashchunrraguh?— cha.

Inchen tru nø karubiibe trenchibig køn:

—¿Ñibe griego wamwan waminchibig kōtirru? cha.

38 Trube, tru mariizhiitø, misaameran kaig marøb pera kurra, tru pib mil ka kweechabetaptø amøñibelan mu misag warab waraimøsromay pera webibig ¿ñibe tru egipcio kōppeendi?— cha.

³⁹ Inchen Pablobe trenchibig kòn:

—Isa kòmõtø, nabe judío kur cha, Cilicia pirau Tarso ciudayu kal-laweig, chigucha kòmø ciudazhigu kòmõtø. Tiusmanda misagwan ka waminchibashcha—chibig kòn.

⁴⁰ Inchen tru suldaumeran nø karubiibe ka wamindingaruben, Pablobe tru nebnab nebambinug kurra pasramisra, misaameran niløtø kørnrai tasiitøga siñal maren, yandø wasrønzhig pinøben, hebreomay trenchib waminchib pølbasrøbig kòn:

22

¹—Ñim, nai nunelø, nai møskalø, na treeg mara pasrømuigwan waminchab inchar cha, ¡Møtray!—chib.

² Inchen nøm wamindig hebreomay wamindi mørøppe, masken wasrønzhig kørømisren, Pablobe trenchibig kòn:

³—Nabe judío kur cha, Cilicia pirau Tarso ciudayu kal-laweig. Inchendø nurappe, yu Jerusalén nurawa, katø nabe kusrebgucha Gamaliel maig kusrenanigwan kusreweig, tru maig maramigwan martrai Moisés pøriilan merrabsrø namui kølli misaamera kan maizhikken pinab marmø, marøb tøgagúigu treegwan kusrenanig kur cha. Tiusweimburabigwan kalø marmønrrab ñim møin kwaløm mayeelø ke chinsraatø inchib pønrrab lataitøweingue.

⁴ Nabe merrappe tru i srø maywan amøñibelane kwamnegatig marøb, møguelan køben, ishumburwan køben merrarrowa, kailan keeri yau keeriin-garub indigwan,

⁵ maya sacerdotsmeran nø karub sacerdote lata, katø mayeelø misagwan karubelø kølli misaamera lata treegwein kuig kòn chib nøm eshkanrrab kuinrrun cha. Inchen nømbe nane kilga pøriilø tranøbelø kòn cha, tru nammisag judíosmera Damascosrø warabelan tru na chi martrab isuigwan martrai. Inchen Damascosrømay ibig kur cha, Jesucriston kørebelø trusrø warabelan merrarrowa, yu Jerusalénsrømay sruattrab, ichabetiilø kørnrai.

Pablo nø Tiuswei mayu mandincha pasramisrigwan waminchib

⁶ Indiibe na ib pasrøwa, kwaløm tøbøtag kørørn Damascosrø na pub lutau ibene, ¡katø! møi møi naingatan srømbalårøngurri purø nuig tørig pilabig kòn cha.

⁷ Inchen nabe pirausrø peñabe, kan wam trendaig mørinabig kòn: “Saulo, Saulo ¿nane chindimbarre kaig martrabgøba inchib arrugu?” chib.

⁸ Inchene nabe trencha løtabig kur: “¿Señor ñibe mu kugu?” cha. Incha nøbe nan løtappe: “Nabe Nazaretsrø Jesús ñi kaig martrabgøba inchib arrig, truiig kur” chibig kòn.

⁹ Inchen naim pulu pønrrabeløbe tru tørwan ashippe ashendø, tru naba waminchibigwei wamwane, chi tainguen mørmeelø kòn cha.

¹⁰ Inchen nabe trenchibig kur cha: “¿Señor chi maramøh?” cha. Inchen Señorbe nane trenchibig kòn: “Kurra, Damascosrømay inrrø cha. Truyube chi maramigwan karua pasrigwan kerriguh eshkanrrun” cha.

¹¹ Inchen nane tru purø tør pilabiibe ashmíig kørømarig køppe, tru Damascosrøbe naba lincha amrrubelø tasku kemøra, srua ambindiig kebibig kur cha.

¹² Inchen tuyube kan møg Ananías taig, tru maig maramigwan martrai Moisés pørig maig chibig køben, Tiuswan purø isua marøb megabig,

judíosmera Damascosrø warabelaimbe nøbe chiyuguen chi tamga tab uñib møg,

¹³ truipe nan ashchab arrua, puabe, trenchibig køn: “Cristogurri nai nuneg Saulo, katøyug ashibig misr” cha. Inchen nabe katøle ashibig misra, nun asinabig køn cha.

¹⁴ Inchen Ananíasbe nane trenchibig køn: “Namui merrabsrø mōskalai Tiusbe, nø maig marøg kuig waigwan ñi nebua ashchai ñune manasrøwei kanmaytø wesrawa pasrig købig køn cha, tru Kerrigu Sølgandiigwan nebua ashib, katø nui triitøga wamindigwan mørøb inchai.

¹⁵ Kaguende ñibe Tiusweyasig maya misagwei merrab maig kuigwan waminchib pasrønrrabig køn cha, ñi asigwan ñi mörigwan.

¹⁶ Treeg købene, ¿chi munig tsunrragu? cha. Kurrø, chibig køn. Incha piu umbu ulsrø cha. Katø ñibe Señorwei munchin wamab ñui kaig mariilan chish misr” chibig køn nane.

Pablon judíos kōmeelaisrømay ørig

¹⁷ Inchen Jerusalénsrømay katø yabe, Tiuswei yau Tiuswan waminchib wawa, kan piab lataig asamig tøgagüinabig køn cha.

¹⁸ Incha truyu na Señorwan ashen, nøbe nan trenchibig køn cha: “Mallatø incha, mõi mõi Jerusaléngurri webinrrø cha. Kaguende yube ñi naimburab maig kuigwan waminchen mørtraamøn” cha.

¹⁹ Inchen nabe trenchibig kur cha: “Señor, nømbe ashibelø køn cha, nabe judíosmera tulundzuni yamørig ya, ñun kørebelane merrarraua kailan keeri yau srua yamba ichabetamba indiilan.

²⁰ Katø ñuimburab maig kuigwan waminchibig Estebanwan kweechib ani lushen, tru uraskucha nabe ‘ka kweetsay’ chib truyu pasrøwa, kweechibelø nømui kewagüilan wesra waren, nabe truilanguen ashib pasrabig kui nømbe ashibelø køn” cha.

²¹ Inchene nane Señorbe trenchibig køn: “¡Inrrø! cha. Kaguende nabe ñune yabsø judíos kømø misaamerairsømay inrrai øramønrrun”— cha.

Pablo tru maya suldau sötømeran nø karubigwei merrab

²² Inchen judíosmerabe tru iig srahe trendaigwan ke chab trendamnegaatiitø mørabe, trenchib trashib mendabelø køn:

—¡Øyeeg mōwane yu pirau uñmønrrai kweetsay! chib. ¡Kaguende øyeegwane chinchibguen uñbasamgaig køn!— chib.

²³ Incha trashibig trasha, nømui pala kewagüilan wesrawa petamba, usrøwan pala petamba ichibelø køn.

²⁴ Inchen maya suldaumeran ashib nø karub wabiibe, tru suldaumera waraig muguen chindamga yau Pablon keeringarua, ichaguchib maig kuigwan payingarubig køn, misaamerabe chindimbagurrinre nun tsalø køb øyeeg trashib kuigwan ashchab.

²⁵ Inchen lusra srua kua ke yandø ichagutchabguen inchen, Pablobe tru suldau sötø cienwan nø karub pera pasrabigwane trenchiptinchibig køn:

—¿Roma pirau kal-laweigwan chi kalø marig kōtashchab paya ashibguen paya asiimígwan ñim treeg ichaguchib pønrramibe merig kōmuitarru?— cha.

²⁶ Inchen truigwan mørabe, tru suldau cienwan nø karub pera pasrabiibe tru maya suldaumeran nø karubigwan trenchib eshkabig køn:

—¿Ñi chi marøb pasraigwan ñigan maig kui asha pasrøtirru? cha. ¡Kan! i mōøbe Roma pirauig kuin køn— cha.

²⁷ Inchene tru maya suldaumeran nø karubiibe arrua, Pablon payibig køn:

—Ñibe Roma pirauig kuin chindi, eshkarra— cha.

Inchene Pablobe trenchibig kòn:

—ØØ, treegwein kur— cha.

²⁸ Inchen tru maya suldaumeran nò karubiibe trenchibig kòn:

—Nama kan Roma pirau kal-lawei kòb lataitøwei misrtrappe, tsabøtø nu an petabe treeg misrar— cha.

Inchene Pablobe trenchibig kòn:

—Nabe treeg mara kòmøtø, kal-lainukkurri trendø truig kur— cha.

²⁹ Inchen Pablon payrrab inchib srua kòbeløbe møi møi nuinukkurri chab tarømisrøptinchen, tru maya suldaumeran nò karubiitøweinguen Roma pirauig kuin kui ashippe, truba kwaarøbig kòn, keerøba cadenastøga merrar-rawa, srua kuikkurri.

Pablo treeg mara pasrømur chib waminchib

³⁰ Incha katø kwalømbe tru maya suldaumeran nò karub pasrabiibe tru judíosmera chigurrinre øyeeg marøbig kòn chib kuigwan ke tab ashchab isua, Pablon elacha, sacerdoesmeran karubelanba, katø tru Setenteelø maig maramigwan asha marøbelan mayamba tulundzunønrrai karua, yandø Pablon wesrua, truilai merrab pasrøbig kòn.

23

¹ Inchen Pablobe tru Setenteelø maig maramigwan asha marøbelan ke tab ashabe, trenchibig kòn:

—Nai nunelø, nabe møin kwalømgatig Tiuswei merrab nai isub kebachib pasrabigu chi kalø kòn chibig chigaig, chishig uñibig kur— cha.

² Inchene tru maya sacerdoesmeran nò karub sacerdote Ananíasbe Pabloim pulu purrabelane triibøtø Pablon pashagutsingarubig kòn.

³ Inchene Pablobe trenchibig kòn:

—¡Ñi ya pirøbanrrig pullin itsig lataigwan! ¡Tiusbe ñunguen pashagutchun! cha. ¿Ñibe uyu wappe, tru maig maramigwan martrai Moisés pørig maig chibig kòben, nan treeg asha martrab wamøtirru? cha. ¿Ñibe tru pørigwane utsøguchib ka itøbunab ñigan nan pashagutsingarub watirru?— cha.

⁴ Inchen truyu purrabeløbe trenchibelø kòn:

—¿Maya sacerdoesmeran nò karub sacerdote Tiusweiwan marøb pasrabigwan, ñigan øyeeg tsalø wamøtirru?— cha.

⁵ Inchene Pablobe trenchibig kòn:

—Nai nunelø, maya sacerdoesmeran nò karub sacerdote kòben, nabe ashmø inchibrain kòn cha. Kaguende Tiuswei wamwan pørigube trenchibig kòn cha: “Ñui misaameran ashib karub wabigwane kaig nebubash chib trømbøig wamamig kòmøn”— cha.

⁶ Incha Pablobe tru Setenteelø maig maramigwan asha marøbelø, tøbøbe fariseosmera kòben, tøbøbe saduceosmera kui ashabe, tru Setenteelan truba mur trashib trenchibig kòn:

—Nai nunelø, nabe fariseo kòb, fariseowei nusrkain kòb kur cha. Katø kwabelø katøle øsiiramigwan muniirabig kuikkurri, øyeeg indinab payib sru-ugúinab pasrar— cha.

⁷ Inchen nò trenchibene, fariseosmeraba, saduceosmeraba nømdø aleguiyab mendappe, ke nøørøtø misra, tru Setenteelø maig maramigwan asha marøbelø tulaamba pasrabiibe chab tarømisrøbelø kòn.

⁸ Kaguende saduceosmerabe tru kwabeløbe katølebe øsiiramøwei, ángelesmera kawei, møsiimera kawein kòn chibelø kòben, trune fariseosmerabe treelane kerriguh treeg kòbig kuitamab isubelø kòbig kòn.

9 Inchen mayeeløba trashib mendøben, møiløgøsrøn tru Moisés pørigwan kusrenanøbelø fariseosmeraingateelø kurra pønrramisrabe, trømbøig aleguiyab trenchibelø køn:

—I møwane kaig mariibe chigucha wetørramer cha. Inchippa kan møsig kui, kabe kan ångel kui wamindin købgun cha, Tiuswane esheerrab inchimugun—chibelø køn.

10 Inchen ambumay imay ke nømdø aleguiyab kurra nøørotø misren, maya suldaumeran nø karub pasrabiibe Pablone ke pitis marøbgunmab isua køriimata, suldaumeran kørraambingarubig køn, nømui utugurri mallatø merrarraa wesrawa, suldaumera waraig mu chindamga yaumay katø pera amrrai.

11 Inchen katø yembe Pablon Señorbe kenamisra trenchibig køn:

—Pablo, kullaaramø, kørmø mur pasrau cha. Kaguende yu Jerusalénma naimburabigwan maig kuigwan wamindiibe Romasrøngucha naimburabigwan katø treetøwei ñune wamindamig nebunrrun— cha.

Pablon kwetchab inchib

12 Katø løtsø judíosmerabe kaig martrab nømdø nilø wamincha: “Nam treeg martrab taigwan marmubene, namundøwei trømbøig nebubash chib pønrramisra, ¡katø! Pablon kweechimuppe, mamøwei, muchimøwei inchab” chibelø køn.

13 Inchen tru: “Treegwan marmø kømø, ¡katø! martrab” cha, pønrramisøbeløbe cuarenta menrra lata købig køn.

14 Incha truiløbe sacerdotesperan karubelainuumayba, katø misagwan karubelø kølli misaamerainuumayba ambabe, trenchibelø køn:

—Nam martrab taigwan nam marmubene, namundøwei trømbøig nebubash chib pønrramisrer cha. ¡Katø! Pablon kweechimuppe, nambe chigucha mamønrrab ter cha.

15 Inchawei møimbe ñimbe tru Setenteelø maig maramigwan asha marøbeløbamisra, tru maya suldaumeran nø karubigwan maig chitashchab waminchab ambamdiig køn cha, ñimui merrab Pablon srøna wesrai chinrrab, nun tru øyeeg puigwan maikkurrin kuitashchab ke tab paya ashchab chibelø misrøb. Trune nambe nø trusrø pumøwatø, ke kwetchab tamara munig kømønrrun— cha.

16 Inchen Pabloi nuchawei nusrkaimbe tru chi isumø amrrub køben, larab warøwa, tru kaig martrab inchib kuigwan wamindi, tru suldaumera waraig mugucha chindamga yausrø nøbe kebya, Pablon eshkaben,

17 Pablobe tru suldau sötø cienwan nøm karub pønrrabelan kan møigwan køsrøn wamabe, trenchibig køn:

—I matsinan maya suldaumeran nø karubigweimay pera inrrø cha. Kaguende chigøsrøn eshkamig tøgagøn— cha.

18 Inchen truipe maya suldaumeran nø karubigweimay, pera yabe, trenchibig køn:

—Pablo kailan keeri yau keerig wabiibe nan wama tiusmanda i matsinan ñuimay pera irra chitan cha, ñun kan chigøsrøn eshkamig tøgagøn— cha.

19 Inchen tru maya suldaumeran nø karubiibe tru matsinan tasku kemøra srua ya, nøørø pera yabe nundø mara payibig køn:

—¿Nan chi eshkamig tøgagugu?— cha

20 Inchen matsinøbe trenchibig køn:

—Judíosmerabe Pablon srøna tru Setenteelø maig maramigwan asha marøbelai merrab ke tiusmanda ñun wesrabsrumugu chinrrab, ke kandø isua pønrramisrin køn cha, nuimburab maig kurrin kuitashchab ke tab paya ashchab chibelø misrøb.

21 Trendaingucha koremønrrig cha. Kaguende nømui utu møguelø cuarenta menrra lata, kaig martrab larønrrab nilø tamarøb køn cha. “Nam treeg martrab taigwan marmuinabene, namundøwei kaig nebubash chib pønrramisra, jkatø! Pablon kweecha kuchimuppe, mamøwei, muchimøwei inchab” chib køn cha. Incha nømbe ke yandø chab tamara, mømibe ke ñi mancha løtamigwandø munig køn— cha.

22 Inchen tru maya suldaumeran nø karubiibe tru matsinane trenchib ‘ungwa’ cha, ørøbig køn:

—Ñi nan eshkaigwane nan eshkar cha, mungucha eshkanrrab kømø— cha.

Pablon Félix kubenadurweimay pera ambub

23 Inchen maya suldaumeran nø karubiibe tru suldau sötø cienwan nøm karub pera pønrrabelan pailan wama, trenchibig køn:

—Yem las nueve webambamig katsikka amrrabelø suldau doscientosba, kaulli palar setentaba, lanza sruar doscientosba Cesareamay amrrai tamar— cha.

24 Incha katø maya suldaumeran nø karubiibe kaulli itøguanamelø Pabloyasig tamingarua, kubenadur Félixweimay chi indiimíg, tabig pera amrrai inchibig køn.

25 Incha øyeeg chibig kilgagucha pøra trana ørøbig køn:

26 Na Claudio Lisias, ñi nai purø tab kubenadur Félixwan ‘ka uñgu’ chinrrab inchar.

27 Judíosmerabe i mowan kemøra srua kua, kwetchab inchen, trune nabe nune kan Roma pirauig kuin kui wammørabe, nai suldau sötøba ya, truyugurri wesrar.

28 Incha nabe chi charre payib srua kuitashchab ashchab isua, Pablone judíosmerai tru Setenteelø maig maramigwan asha marøbelai merrab pera kørrayar.

29 Incha nabe tru nømui maig maramigwan martrai Moisés pørigwan ka kalø maran chatørre inchib kuin kui wetøbeñendø, nune kwanrrai maramdiibe nøbe treekkatig chi trømbøig mara pasrømøwei, katø kailan keeri yau keera tøgagømdiig kømøwein kuin køn.

30 Inchen tru mowan søratø kaig martrab inchib køn taig nane wammørsrøben, nabe tru urastø ñuisrømay ørar cha, katø tru nun øyeeg mara pasrømøtirru chib payib srua købelan chigucha chigøben tamig tøgaguabe, trube, ñui merrab tørgandø eshkanrrigay cha, nømune trenchar cha nabe.

31 Inchen suldaumerabe nømun maig karuig køben treeg mara, Pablon wesrawa, yem Antipatrissrøngatig pera ambubelø køn.

32 Incha katø kwalømbe Pablone kaulli pala ambubeløtø lincha amrrai, suldaumera katsikkateeløbe tru nøm waraig mu chindamga yaumay katøle legucha amrrubelø køn.

33 Incha Cesareasrø pua, kubenadurwan tru kilga pøra ørigwan tranabe, Pablongucha nui merrab pera kemallibelø køn.

34 Inchen kubenadurbe tru kilga ørigwan ashabe, Pablone:

—¿Chu pirausrig kugu?— cha payibig køn. Incha ciliciasriig kuin kui ashabe, trenchibig køn:

35 —Trube, ñun øyeeg puigwane tru ñun øyeekkurrin kuig køn chibelø amrruben, trunun ashchab— cha.

Inchabe Herodeswei purø tab yau Pablone keera wanna, tab ashib tøgagønrrai karubig køn.

24

Pablo Félixwei merrab 'øyeeg mara pasrømtirru' tainab

¹ Trattro kwaløm wendau maya sacerdotesperan nõ karub sacerdote Ananíasba, mõiløgøsrøn misagwan karubelø kõlli misaameraba, trugurri kan purø maig waminchibig Tértulo taiba Cesareasrø kørraambubelø kõn. Incha truiløbe tru misaameran ashib karub wabigwei merrab Pablon tsalø kõb 'øyeeg, øyeeg mara pasran' chinrrab amrrua kemallibelø kõn.

² Inchen yandø Pablon wamøben, Tértulobe Pablone 'øyeeg, øyeeg marøbig kõn' chib menda, Félixwane trenchibig kõn:

—Namui purø tab kubenadur Félix, kan nambe ñigurri ambumay imay tab warer cha, ñun mayanguen ungwa, ungwa chinrrab inchar cha. Incha ñibe purø tab asha marøbig kuikkurri, nam i pirau mayeelø warabelayasiibe, srøitø, srøitø yunømarøb tammisøb arrun cha.

³ Kan ñi namui Félix purø tabig, chusrøndøgucha katø chu uratøgucha, ñune kashmø mayanguen ungwa, ungwa chibelø ker cha.

⁴ Inchendø ñun menrra trømbø inchib menrra waminchimønrrab, kan petøzhiitø tiusmanda kalu pebøbsrumugu chinrrab inder cha, ñibe chiwandøgucha yan tammay mara tranøb wabig kõbene.

⁵ Kaguende i møwane nambe kan larrø kaig kwanrrø lataig wetørrer cha. Yu pirau chutøgucha judíosmerai utu misaamerane ke nõørøtø marøb namishib pera kurramba, katø tru Nazarenos taig sötømeran ke nõ pera marøb chib pasrabig kõmba indan cha.

⁶ Katø Tiuswei yawan chigucha, Tiuswei yaambu kõmui lataig kaig trømbøbig martrab indamba inchen, nambe nun kemørig kõn cha. Incha nambe tru maig maramigwan martrai Moisés pørig maig chibig kõben, treeg martrab inchen,

⁷ tru maya suldaumeran nõ karubig Lisiasbe nui suldaumeraba arrua, tsakkandø namui taskugurri Pablone kerraig kõn cha,

⁸ tru øyeeg mara pasrømtirru chib srua kõbelane ñuisrømay ambay chib amrrai ørøppa.

'Trube, 'øyeeg, øyeeg mara pasrømtirru' chib kuigwan, ñiashib iigwan kerrigu tab ashabe, maig kuigwan tab ashchabguen— chibig kõn.

⁹ Inchen judíosmera truyu pønrrabeløgucha:

—libe kerriguba isa kõmø, treegwein kõn— chib truba inchibelø kõn.

¹⁰ Inchen tru kubenadurbe Pablon waminchai señas maren, Pablobe trenchibig kõn:

—Ñi ya yam pila i pirau maig maramigwan asha marøb wabig kui ashabe, kalø mara pasrømuigwan nabe chi kõrmø eshkanrrab inchar cha.

¹¹ Ñitøweinguen asiinrrun cha, na Jerusalénsrø Tiuswan kõriibala tabig waminchab arriibe kwalømmerra docetøwei purayan cha.

¹² Pøs Nane Tiuswei yau muba kõben aleguiyab pasrai ashmøwei, namishib misag sötø peragurri ashmøwei, katø judíosmera tulundzuni yamerayu treeg marøb pasrai ashmøwei, kabe chugøben ciudadasrø treeg marøb pasrai ashmøwei indig kõn cha.

¹³ Inchawei i misaamerabe mõi nan øyeeg mara pasrømtirru chibeløbe øyeeg marøbig kõn chib kuigwane treeg kõn chinrrappe kaimanrrun cha.

¹⁴ Inchendø nabe maig kuigwan kelarrab, trendamønrrun cha: Nabe merrabsrø namui kõlli misaamerai Tiuswan kõriibala tabig waminchibig kur cha, tru nõm Tiusweiwan peemaytø marøbelø cha wamig, tru srø may maig kõben treekke. Tru maig maramigwan martrai Moisés pøriilan lata, katø

Tius maig karuigwan eshkabelø pøriilan lata isa kømø, kerrigu treegwein kuitamab kører cha.

¹⁵ Nabe Tius mandø taigwane treeg kønrraitamab isua munig megabig kur cha, tru nøm muniirab kuigwandøwei, tru kwabelø sølgandø tabelø lata, katø tru sølgandø tabelø kømeeelø lata katøle øsiirawa kurramigwan.

¹⁶ Inchawei treekkurri nabe Tiuswei merrab lata, møguelai merrab lata chigøben kalø mara treegwan nai isub kebachib pasrabigu chi kalø køn chibig chigaig kønrrab inchib megabig kur cha, chu urastøgucha.

¹⁷ Nabe truba yam pila peesø llirab uñabe, ketamig tulisaiigwan naim pirau misaameran ketrappa, katø Tiuswan keta tranrrappa arrubig kur cha.

¹⁸ Incha nabe tru maig maramigwan martrai pørig maig chibig køben, Tiuswei yau tru chish misrtrab marigwan chab mara pasrøben, møiløgsrøn judíosmera Asia pirausreelø pubelø køn, na misagwan namishib pera kurra kømøwei, kabe chindinguen asiimíg maringarub pera kurra kømøwein pasrøben.

¹⁹ Inchawei mømimbe, truilø nømwei amrrumig køn cha, yu ñui merrab nan øyeeg mara pasrømøtirru chib nan tsalø køb chigøben tamig tøgaguabe.

²⁰ Kabe katø tru Setenteelø maig maramigwan asha marøbelai merrab na kemalla pasrab uras nan chi kalø marig wetørraig købene, trube, truburappe nømøwei yu tømrbash cha.

²¹ Nabe tru nømui utu pasrøwa tru urasbeguende mur trashib øyeeg chibwei indig køn: “Kwabelø katøle øsiiramigwan na muniirabig kuikkurri, mø ñim øyeeg indinab paya asinab pasrar”— cha.

²² Inchen Félixbe tru srø maywan tab wammøraig kuabe:

—Maya suldaumeran nø karubig Lisias arruben, iigwan na maig kõtashchab katøwan ashchab— chippa, patsøgøbig køn.

²³ Incha Félixbe suldau sötø cienelan nø karub pera pasrabigwane Pablone elachimø, ashib tøgagønrrai karubig køn. Inchendø nui chi maramdeelane mu merønrrain kømø marøb, katø nui asiilø møiløgøben nun purugunrrab inchene merømøwei inchain karubig køn.

Cesareasrø Pablon kailan keeri yau keerøb

²⁴ Mam kwaløm wendau køsrøn Félixbe nui srai judía Drusilaba katø pua, Pablon pertrab ørabe, isubigwan Jesucristoinug pasra tøgagømigwan waminchen mørøbig køn.

²⁵ Inchen Pablobe tru sølgandø tabigwanba, chiyugucha srua irramamø amønamiigwanba, katø maig kønrrabigwan treeg asha maramig punrrabigwanba waminchen, Félixbe truba kwaara, trenchibig køn:

—Mømibatøbe ka inrrø cha. Inchendø katøwan nan utø køben, wamørrumøn— cha.

²⁶ Inchagucha Pablo nun elatchai kabe kan maya an tranrrua chinrraitamabrre muniirabig køn Félixbe. Incha treeg isua, Félixbe nuimay Pablone katø katø wamabig køn waminchab.

²⁷ Inchen yandø pa pila puraiben, Félixbe webiben, Porcio Festo truigwan purø wamisrtrab kubenadur kebibig køn. Incha Félixbe judíosmeraba ka tab kørømisrøg køptø Pablone kailan keeri yau ka wabashippa, webibig køn.

1 Inchen tru pirau karub wanrrab uta kebyaig pøn kwaløm wendau, Festobe Cesareagurri Jerusalénmay nebiben,

2 maya sacerdotesmeran karubeløba, katø judíosmeran ashib karubeløba Pabloimburab tru treeg puigwan katøle kønøgønrrab Festoimay ambubelø køn,

3 Pablon tsalø køb, Jerusalénmay pegutcha chib. Kaguende nømbe Pablone mayu lara kwetchab isua tamarøb købelø køn.

4 Inchen Festobe lötappe trenchibig køn:

—Pablone Cesareasrø ashib tøgagúig wan cha. Naashib trusrømay menrra yana kømøwatø inrrab isur cha.

5 Inchawei ñimui utu maig maramigwan ñim asha marøb pønrrabeløbe Cesareasrømay naba kørørruy chibig køn. I møweinug chigøben kalø marig pønrrøbene, trube øyeeq mara pasran chib truyu waminchab.—

6 Incha Festobe Jerusalénsrø trune køh, kabe trune y pa kwaløm kø chigøsrøn nømbe kørømisra, Cesareasrømay katø ya, katø kwalømbe tru maig maramigwan asha marøbelø purrainug wamisra, Pablon pera amrrunrai karubig køn.

7 Inchen Pablo trusrø pua kebarrubene, tru judíosmera Jerusalénsrøngurri amrrubeløbe tulsrua, nune chigøben truba truba trømbøig marøbig køn chibendø, chigucha ke treeg mariiløbe, wetørranrrab kaimabelø køn.

8 Inchen Pablobe nøbe ‘treeg mara pasrømur’ chib, trenchib waminchibig køn:

—Nabe i tru maig maramigwan martrai Moisés pørig judíosmeraimburabigwan lata, Jerusalén Tiuswei yaweimburab lata, katø Romasrø maya misagweim pala ashib wabig Césarweimburab lata chi kalø mara pasrømur— cha.

9 Inchendø Festobe judíosmeraba ka tab kørømisrøg køptø, Pablone trencha payibig køn:

—Jerusalénmay attragu? cha, tru øyeeq wamindiilan ñimburabigwan maig kønrrabigwan trusrø ashchab— cha.

10 Inchene Pablobe trenchibig køn:

—Roma maya misagweim pala ashib wabig César maig maramigwan asha marøb wainug nabe truyuweim pasrar cha, tru maig kønrrabigwan nan asha maramnug. Pøs judíosmeran chigucha chi kalø mariibe chigagøn cha, ñiguen tab asiinrrun cha.

11 Kabe na chigøben kalø mara pasrain kui, ñim nan kwanrrai maramdiig na treekkatig kaig mara pasrøbene, nabe kwanrraptøweim pasrar cha. Inchendø nøm øyeeq mara pasrømøtirru chib kuig ka isiitø webibene, mugucha nane truilane tranrrappe kaimanrrun cha. Nabe Romasrø tru maya misagweim pala ashib karub wabig César maig maramigwan nø asha martrai miamønrrun— chibig køn.

12 Inchen Festobe tru maig maramigwan nun isum purugub purrabeløba chab waminchabe, trenchibig køn:

—Ñi maya misagwan ashib karub wabig César nø asha martrai miaig kuig købene, trube, Césarweimay inrrig— cha.

Pablo rey Agripai merrab

13 Inchen yandø mam kwaløm køsrøn puraiben, rey Agripaba, Bereniceba Feston ‘ka uñgu’ chib tabig wamab punrrab, Cesareasrømay ambubelø køn.

14 Inchen trusrø nøm truba yam kwaløm waraig køppe, Festobe tru Pablon øyeeq nebuigwan reywan trenchib eshkabig køn:

—Yube kan mōg wan cha, kailan keeri yau Félix kōrrōmara wannig.

15 Na Jerusalénsrōmay ya wabene, truigweimburappe sacerdotesmeran karubelōba, judiosmeran karubelō kōlli misaameraba, ke chinetō kōn chib nan eshka amrrubelō kōn cha, Pablon truyu mōra pasrōnrrai kōrrōmara pasramdiig kōn chib.

16 Inchen nabe nōmune trencha lōtig kōbig kōn cha: “Tru ‘ōyeeg kaig mara pasran’ tainabig; tru ‘ñi ōyeeg maraweim pasrōmōtirru’ chibelō nui malaugue trenchib amrruben, ‘ōyeeg kōmuig kōn’ chib; ‘ōyeeg mara pasrōmur’ chib nōashib waminchimōwatōbe, romanosmerabe mu mōwangucha mana treebe marmeelō kōn” cha.

17 Incha truilō nōm yusrōmay naba amrruben, chi srarrōmōtō, katō kwalōmdō, nabe tru maig maramigwan asha marōb wainug wamisra, tru mōwan pera amrrunrrai karuig kōn cha.

18 Inchendō tru ‘ōyeeg mara pasrōmōtirru’ chibelōbe amrrubendō, chigōben trōmbōig kalō mariilō tre latailōbe marig wesrumeelō kōn cha, pōs nabe nō treeg trōmbōig mara pasraindōweinrre inditamab isubene.

19 Treeg kōmōtō, tru nuimburab waminchib kuibe, tru Tiusweimbura-bigwan nō marōb unigwan truikkurrin chabah, katō kan mōg, Jesús taig, kwaig kōbigwan, Pablobe trunon kwaig kōmōtō, ka ōsig wan cha, trenchibre inchen, trugurribatōrre inchib kuin kōn chibig kōn.

20 Inchen nabe ōyeeg maramigwane mandō maram kui mōrmōwa, Jerusalénsrōmay inrra kuh chibig kur, tru maig kōnrrabigwan trusrō asha marig kōnrrig cha.

21 Inchendō Pablobe tru maig kōnrrabigwan Augusto César asha marig kōnrrab cha, ka ashib tōgagūig wanrrab cha nō miaig kōbene, treekkurri Césarweisrōmay na ōramnegatig nune tab ashib tōgagōnrrai karuig kōbig kōn—cha.

22 Inchene Agripabe Feston trenchibig kōn:

—Nangucha tru mōwan mōrinrabna kōtan— cha.

Inchene Festobe trenchibig kōn:

—Srōna wamindi mōrtrabguen— cha.

23 Indiibe katō kwalōm Agripaba, Bereniceba puppe, purō tabig tamarar ke kan chull asamdiig amrruabe, tru chigōben waminchappa, katō wamindilan mōrtrappa tru tulundzuniisrō kebambambubelō kōn, tru suldaumeran karubelō nōrreelō kōben, katō nōrreelō ashib karubelō ciudayuelō kōbengue. Inchen Festobe Pablon pera amrrungaruben, pera pubelō kōn.

24 Inchabe Festobe trenchibig kōn:

—Rey Agripaba kōben, ñim maya mōguelō yu namba purrabelō kōben, i mōwan asay cha. I mōweimburappe maya judiosmera sōteelōba Jerusalénsrō lata, yu Cesarea lata ‘yeegwane ōsig uñbasamgaig kōn’ chib, trashib amrrubelō kōn cha.

25 Inchendō nabe nun kwanrrai maramdiig chigucha chi kaig marmuin kui wetōrrab, katō tru maig kōnrrabigwan asha marig kōmigwan Augusto nō asha martrai nōtōwei miaig kuig kōbene, trusrōmay nabe ōrtrab isuig kōn cha.

26 Inchendō tru Pabloimburabigwan treeg treeg kōn chib nai ashib karub wabig Augusto purō nuigwan na pōra ōramig kan chiguen wetōrramur cha. Incha treekkurri ñimuinuamay pera arrur cha, ñi nai tab rey Agripa. Maig kōnrrabigwan tab asha kōrrōmarene, na maitōguen Auguston eshka pōramig kōnrrautan chibig kōn.

²⁷ Pøs kan kailan keeri yau keerig wabigwan chiburøgurri ‘øyeeg kuig køn’ chib kuigwan chi cha eshkamubendø, na øramibe ke kan ka wainguenig marig lataig punrrautan— chibig køn Festobe.

26

Pablo nuimburabigwan rey Agripai merrab eshkab

¹ Inchene Agripabe Pablon trenchibig køn:

—Ñuimburabigwan maig kuigwan ñitøwei waminchi— cha.

Inchen Pablobe yandø waminchab tasigwan kusrawabe, tru nuimburab ‘chi kalø mara pasrømur’ tamigwan waminchab pølbærøbig køn:

² —Møi na naimburab ‘treeg mara pasrømur’ chib waminchib pasramig mayaguen tab kuim pasrar cha, nai rey Agripai merrab, nan judíosmera chigurrimbunø ‘øyeeg mara pasrømøtirru’ chib kuigwan.

³ Inchagucha ñibe judíosmera chitø, chitø marøbelø kuigwan kerrigu ashib, katø nam judíosmera mandø melambuyab amrruigwan chigucha ñibe tab nebua ashibig kuig købene, trube, tiusmanda tammay mørtra chinrrab inchar cha.

⁴ Maya judíosmera na matsinø-unøgurri nabe nai misaamerai utu Jerusalénsrø maig tsubig kuigwan ashibelø køn cha.

⁵ Truiløbe manasrøngurri ashibelø køn cha, nømun eshkamdiig købene, øyeeg købig køn chib maig kuigwan ñun eshkamdiig kuinrrun cha, Tiusweiwan kan chizhigwanguen pinab kømø marøb misag sötømerayug nabe fariseo købig kur cha.

⁶ Incha mømbe tru merrabsrø namui kølli misaameran Tius tru tranrrab misra kørrømisrigwan muniirabig kuikkurri, mømbe øyeeg paya ashib srua kuinab pasrar chibig køn.

⁷ Tru Israelweinkurri namui doce srøig, srøig karrab misaamera Tius tru tranrrab kørrømisrigwan nømbe nebunrrab isua, yem kwaløm Tiuswan køriibala tabig waminchib kuigwan, nagucha truigwan muniirabig kuinukkurri, judíosmerabe yu ñi øyeeg kaig marøbig kømøtirru tainab pasrar chibig køn, nai rey Agripa.

⁸ ¿Tiusbe kwabelan kwailai utugurri kusrumibe kaimanrretamab isubelø kø chindah ñimui utube?

⁹ Pøs isa kømø, nagen Nazaretsrø Jesúswei munchiwane tsalø køb chinetø martrab isua,

¹⁰ Jerusalénsrøma treeg marøbig kur cha. Sacerdotesmeran karubelø nan treegwan martrai karuigwan uta, Tiuswei misaameran kailan keeri yau pønsrøb, katø kweecha petøbene, nabe truilaingatøtø inchib pasrabig købig kur cha.

¹¹ Incha katø, katø judíosmera tulundzuni yamørig truilane ichabetab ibig kur cha, Tiuswan purø trømbøbig nømun wamingarummørø inchib. Incha ¡katø! kan nømun namig købiitø ke chinchimmørø inchib, nabe peg pirau ciudamerasrønguen kaig martrab wendautø ibig købig kur cha.

Pablo mandøgurri Tiuswei mayu pasramisrigwan waminchib

¹² Nabe øyeeg martrab isua, Damasco ciudasrømay ørig ibig kur cha, tru sacerdotemeran karubelø maramburab martrai traniitøga treeg martrab inrai karua pasrig.

¹³ ¡Nai tab rey! mayu kwaløm tøbøtaabe srømbalasarøngurri kan tørbilabig pørr lataguen kømø, purø tørig naingatanba, tru naba ambubelainngatanba piløben,

¹⁴ nambe pirausrø sətøba kørninabig køn cha. Inchen kan wam hebreomay trenchib wamindi mørøptindinabig køn cha: “Saulo, Saulo cha, ¿Chindimbarre nane kaig martrabgøba inchigucha? cha. Ñibe kan wey kəlabus tsøb pənsrailøyu səl yatab lataitøwei incha, ñibe ka ñiasitø kørriindan” cha.

¹⁵ Inchene nabe: “¿Señor mu kugu?” chiben, nane Señorbe trenchibig køn cha: “Nabe Jesús, ñi møi kaig martrabgøba indig, nabe truig kur cha.

¹⁶ Inchendø kurra, pasramisr chibig køn. Kaguende nabe ñun kenamisrøppe, naiwan marøb megabig kənrri wesrawa pasrtrappa, katø møi naimburab ñui kaptøga ñi asigwan waminchibig kənrriimba, katø wendøsrø naimburab maig kuigwan kenamaramigwan eshkabig kənrriimba treeg martrab kenamisrar cha.

¹⁷ Inchawei nabe ñui misaamerai taskugurri kaig marmənrri wesrab, katø judíos kəmə misaamerai taskugurri kaig marmənrri wesrab indamənrri chibig køn. Pəs nabe møi tru misaamerayasigwei ørar cha,

¹⁸ nebua ashchai ñi nəmui kabmeran kuren, ləstøyu aməñibelø kəbig kuig, tøryumay werrub, katø Satanás maramburab mariilø kua, Tiusweimay purərrunrai. Tru nəmui kaig mariilan ulø payiimrig pesannaig kəmigwan uta, tru nəmui isubigwan nainug pasrikkurri tru Tiusweyasig tarəmariiløba tøgatø, tru keta tranamig tøgagúigwan utamig kənrriin” chibig køn.

Piab lataigu Tius kenamisra maig taigwan Pablo møra marøb

¹⁹ Inchawei, nai rey Agripa, tru srømbalasarøngurri piab lataigu kenamisren asigwan nabe mərmənrriab inchimøtø,

²⁰ Damascosrø warabelaisrømaymerrig ibig kur cha. Incha trugurrimbe Jerusalənsrømay, trugurrimbe Judea pirau kerrigu truøø ya, katø trugurrimbe judíos kəmə misaameraisrømay ya, nəmui kaig mariilan isua møra, Tiusweimay llirawa, yandø tru kaig marmənrriab isua mərini kui asamdiig kənrriab tabig marøb inday chib eshkab waminchibig kur cha nabe.

²¹ Incha na øyeeqwan marikkurri judíosmerabe Jerusalənsrø Tiuswei yau nane merrarrowa, kwetchab indig køn cha.

²² Inchendø məin kwaləmgatig Tius nan purugúitøga nabe yu pasrar cha, kusrebelan lata, kusremeelan lata maig kuigwan na waminchib. Nabe waminchippe, ka nøørotø peetø waminchimøtø, Tius maig karuigwan eshkabelø maig purainrrun taigwanbah, katø Moisés maig purainrrun cha eshkaigwan, truigwanbatø waminchar chibig køn:

²³ Tru Cristobe truba truba kaig nebuinab megawa, trugurrimbe kwawa, nəmerrig katø øsiirawa, namui judíosmeran lata, judíos kəmə misaameran lata kaigyugurri webambamig tərwan eshkab kusrenrrun chib trendailan.—

²⁴ Pablobe ‘kaig mara pasrømur’ chib, waminchib pasramnetø, Festobe øyah chib trashibig køn:

—¡Pablo ñibe chugúí mərmíig misriasəna! chib. ¡Menrra kusreptø chugúinguen mərmíig misrin kən!— chib.

²⁵ Inchene Pablobe trenchibig køn:

—Nai purø tab Festo, nabe chugúinguen mərmíig kəmətø pasrar cha. Na waminchippe, ka isatø waminchib pasrøməwei, katø chiwan waminchib pasrarmab isua waminchib pasrar cha.

²⁶ Pəs rey Agripabe, iilane kerrigu ashibig kuimba, nui merrab chigucha chi kərig kuin kəmə waminchar cha. Kaguende nøbe iilane ashmíig kənrriab kəmətø, nebua ashibig kuitamab isua pasrar cha. Kaguende iilane kan turiumbu mu sərətø marikkucha kəmən cha.

²⁷ ¿Nai rey Agripa, Tius maig karuigwan eshkabelø maig taigwan ñigan treeg kuitamab køretirru? cha. Ñibe kørewa wain kui nabe asha pasrar— cha trenchibig køn Pablobe.

²⁸ Inchene Agripabe trenchibig køn:

—¡Ke yandiitøgatø Tiuswei mayu puraarrua pasramisrtrai indiibe!— cha.

²⁹ Inchene Pablobe trenchibig køn:

—Yandiitøgatø kui lata, kabe nu wamindiitøga kui lata, ñitø kømøtø, mõi yu mørøb purrabelan chigucha kerrigueløba na latailøwei misra pønrraimbemab isutan chibig køn, inchendø nan lata cadenatøga øyeeg merrarraimeelø.—

³⁰ Inchen rey kurra pasramisren, kubenadurgucha, Bereniceba kurrøben, truyu nømbe purrabeløgucha kurra, yandø webamba,

³¹ nømdø nørørørø ambabe, kangurrin kangurri trenchib waminchibelø køn:

—I møøbe chiburø kwanrrai maramdiig kømøwei, katø kailan keeri yau keera tøgagømdiig kømøwei marøbig kuin køn— cha.

³² Incha Agripabe Feston trenchibig køn:

—Pablo nøashib César asha marig kønrrab chib miamuig kuimbe, pøs nøbe elatsikken købsruinrrun— cha.

27

Pablon Romasrømay ørig

¹ Yandø Italiasrømay amrrai treeg wamincha kørrømisren, kan suldau tru cienwan nø karub pera pasrabig tru Augusto maya misagwan ashib wabigwei suldau søtømerayuig Julio taigwan ashib tøgagønrrai tranøbelø køn, Pablonba, katøgan kailan keeri yau pønrrabelanba.

² Incha adramitiosriig kan barco Asia pirau, tru barcos puisrømay webinrrab inchib pasrøben, nambe truyu nebambubelø ker. Inchen nambabe Aristarco kan Macedonia pirausrøig Tesalónica ciudayuikkucha arrubig køn.

³ Incha katø kwaløm Sidøn tru barcos puisrø nam pubene, truyube Juliøbe Pablon truba tab inchib, nune nui trendø asiilaisrømay ibashibig køn, tabig wamab utab tøgagüig uñchai.

⁴ Incha Sidøngurri webambabe, Chipre pirø pi tøbøtag pasrabiisrø isig srørrø ketawan puraambub ambubelø ker, kaguende isig ichibiibe ambamgaig merrammay megambub ichen.

⁵ Incha yandø tru nu pi tøbøtaasrø Cilicia pirauba, Panfilia pirauba pinrøguesrø misrøb ambabe, yandø Licia pirau Mira ciudayu pubelø ker.

⁶ Incha truyu suldau søtø cienwan nø karub pera pasrabiibe kan barco Alejandría pirausrøig Italiamay inrrabig pasrain kui wetørrawa, truyu amrrab, namun nebambingarubig køn.

⁷ Incha tsøndatø truba yam kwaløm ambub meløwa, isig ichibig namun merrammaygøba megambub ichen, ke trendø pumubsruatø Gnido pinrøguesrø pubelø ker. Incha Salmón pinrøguesrø Creta isig srørrø ketawan puraambub ambubelø ker.

⁸ Incha mendawandø ke trendø chab kaimab purørrub amrrua, kanbalø Buenos Puertos taisrø pubelø ker, Lasea ciuda pulusrø.

Maryu kørig kømdiig pi namab kurrab

⁹ Inchen amrrub kuig yandø yanaguen misrøb arruben, yandø tru barcoyu ambamikkucha purø kørig kønrraptiig misrøb arrubig køn. Kaguende tru ayunain kwaløm puraiwei inchen, yandø tru sre pøl kebinrrab købig køn. Incha Pablobe øyeeg maramdiig køn chib waminchibig køn:

10 —Nai lincha amrrubelø, i barcoyu ambamibe barcon mindisainab, katø purø nørøø ka yandø pinønrrab kui ashar cha, barco chigøben niga arrilø lata, barco lata yandø ka pinøben, katø namdøweinguen kwamigwan lanrrun—chib.

11 Inchen tru suldau sətø cienwan nø karub pera pasrabiibe øyeeg maramdiig køn cha Pablo wamindigwane mormøtø, tru barco srubigwanba, barco puaigwanba, truilangøba mørøppe, Pablone mormiig køn.

12 Inchagucha barcos puinug sre pubweimbe tab kømøtønug køben, soteelø lutauba truyugurri webamrrab isubelø køn, Creta pirau Fenice ciudasrø tru barcos puinug puin chindi. Inchen truipe pørr neeshibgatømayba, pørr pinebgatømayba pinrøguesrøn købig køn.

Maryu purø trømbøig isig ichibig webarrub

13 Inchen sursrøngurri kan kaizhig isig ichibig webarruben, chu punrrab isuigwan yandø ke nebuermab isua, barco imønrrai merrarrabig kuatsig tsandzønwan piugurri wesrawa, yandø tru Creta pirø pulusrø kemallib ambubelø køn.

14 Indiibe yanazhigutø Euraquilón cha wamig isig purø trømbøig pøtømay pailab ichibig tru pørr kal-labgatømaygurri webarrua, barcon yamgaig megambub arruben,

15 yandø barcobe isig ichibig srua yaig kuig køppe, tru isig ichibigwane kamara ambamgaig køben, yandø isig ichibig srua inrraindø ka purrabelø ker.

16 Incha kan pirø, pi tøbøtag pasrabig Cauda tainug isig srørrøgatømay purørrub amrrua, truba truba inchib meløwa, tru kwamønrrab webambig tru kan lamø barcozhigwan nemørøbelø ker.

17 Incha trunun barcoyu neerabe, nu barco nørørtiig misrmønrrai, manilastøga pøtøburab kurrøb mendabelø køn. Inchendø piu umbu pisrum tunmerayu kegalrraitamab kørig køben, barco inrrai isig utabig velas taigwan kørøøra, tru mur isig ichibig barcon ka srua inrraindø ka purrabelø køn.

18 Indig katø kwalø m purø trømbøig namab isig ichib kurrøben, barco niga arrigwan pinøbusrøb menda,

19 pøn kwalømyube tru barcoyu chi palabelan trendø truyu tøgagúilan nømashib pinøbusrøbelø køn.

20 Inchen truba yam kwalø m kan pørr kenamismøwei, estrellamera kenamismøwei inchen, purø trømbøig isig ichib pi welarmera namab kurrøben, yandø øsig webammumuitamaptøwei isub melabelø ker.

21 Nambe yandø yam kwalømguen mamø ambig kuig køppe, Pablobe nømui utu pasramisra, trenchibig køn:

—Au, nai lincha amrrubelø, na maig taigwan møra Cretagurri werrumuig kuinguen, barcon øyeeg trømbøig mindisainamøwei, øyeeg nørøø pinisha pønrrømøwei inchibsrinrrun cha.

22 Treeg kuindøgucha tru isuptø chi kullaaramugun chinrrab inchar cha; kaguende barcobe chab pinindøgucha, ñimbe møikkucha kwanraamøn cha.

23 Kaguende nan tru nuin kønrrai inchib pasrab, katø nui maramigwan nan maringarub inchib pasrab Tiuswei kan ángel mira yem nan kenamisrtan cha.

24 Incha nane tru ángelbe trenchitan cha: “Pablo, chi kørig kui inchimøta cha. Kaguende ñibe Roma maya misagwan karub ashib wabig César purø nuigwei merrab pasramig palønrrab kuimba, barcoyu ñiba amrrub købelan Tiusbe mayeelamba øsig webambamig kønrrai martrun” chitan cha.

25 Inchawei, nai lincha amrrubelø, chi kullaarab trunun isumøtay cha. Kaguende nabe Tiuswandø isua pasrar cha, nø maig taibe treeg kønrraitamab isuague.

26 Inchen køben, kan pi tøbøtag pirø pasrabiisrø barco namunbañau srua ya trusrø kebusriilø kømig nebunrrun— chibig køn.

27 Indiibe parru kønrrab yembe nam Adriatico maryu ke pi muba srua yaindeelø ambub kua, yem tøbøtasrø tru barcoyu ambubeløbe yandø ke pirø pulu pub yain kui mørabe,

28 piwan maya umbuig køtashchab tsiwan kegucha ashene, treinta y seis metros køben, katøguchi ambuurøsrø katø kegucha unaashene, veintisiete metros købig køn.

29 Inchen nørrø sruumerayu melambumuitamab kørig køben, barcon imønrrai merrarrabig pibgatø wendaumay kuatsiguelø piu kebusriilan ke-beta, ke kan petø tør-rraimbemab isub munig melabelø køn.

30 Inchen tru barco srubelø barcoyugurri wegørra amrrab isua, tru merrabmay piu kebusriilø tru kuatsig tsandzønmeran merrarrab tsimeran yabranøbelø misrøb, tru kwamø øsig webambam barco-unan piu kebenøsrkøbelø køn.

31 Inchen Pablobe suldau sötø cienwan nø karub pera pasrabigwanba, suldaumeranba trenchib eshkabig køn:

—Iilø yu barcoyu ka purrømotø wegørra ambisruandøbe, ñimbe øsig webamrraamøn— cha.

32 Inchene suldaumerabe tru øsig webambam barco-unan merrarrab tsimeran para, piyu ibashiptinchibelø køn.

33 Inchen yandø tør-rrab arruben, mayeelanba maytøguen chi isumø, ka may chib, Pablobe trenchibig waminchibig køn:

—Yandø mõi chabguen parruguen køn cha, chi puraitashchab muniiraptø ñim chigucha mamø melaig.

34 Inchawei nabe tiusmanda ka may tamønrrun cha, pøs ñimui asr tabig chishtø kønrrai. Kaguende ñimune møigwandøgucha kan pusruutøguen mindisaig kønrraamøn— cha.

35 Trunun chab waminchabe, Pablobe nui tasku pirriwan muta, mayeelai merrab Tiuswan ‘mayanguen pay’ cha, pirisha, trugurrimbe mab pølbarsen,

36 mayeeløba ka mamøtømab isua, nømøgucha mabelø køn.

37 Inchen tru barcoyu nam mayeelø amrrubeløbe doscientos setenta y seis købelø ker.

38 Incha yandø mamne ma, tirigun maryu kebetabelø køn, barco chairanrrai.

Barco piu umbu ulsra pasrambub

39 Incha tør-rrabene tru pirøwane chu pirau kuinguen ashmubendø, kanbalø barco kebambig wambiitiig pisrum chaabaig nebua asha, trusrø pasrambundiig købene, barcon trusrø pasrambungarunrrab inchibelø køn.

40 Incha barcon imønrrai merrarrabig tru kuatsig tsandzøn piu kegutsigwan piu wamnetø tsimeran parøppa, trugurrimbe tru barcon muba inrrai lliskaigwan lusrig pasrabigwan alaraanøb, tru isig utabig vela taigwan kusrubene, tru barcobe pisrum chaasrømay ib mendabig køn.

41 Inchendø tru pi ambugurri igurri megambuinug pisrum tunyu pasrambunrrab iben, barcone trusrø kegaløsrka pasrambungarubelø køn. Inchen merrabmayiibe pisrum tunyu ulsra kønømiig pasrambuben, wendaumayiibe tru nørrø pi welarmera purø trømbøig megambuben, barcobe ke nøørøtiig misrøb ibig køn.

⁴² Inchen suldaumerabe tru kailan keeri yau pønrrabelan srua amrruilan kwetchab isubelø køn, wegørra amba møikkucha lulumønrrai.

⁴³ Inchen tru suldau sətø cienwan nø karub pera pasrabiibe Pablone kweechimønrrai isua, nøm isuigwane ka isuitø purainrrai marøbig køn. Incha møiløgøben nadam kusrebeløbe truilømerrig kegørra ambingarubig køn pürsrø webamrrai.

⁴⁴ Inchen katøganelane:

—Tablamerayu kui, kabe tru barco nøørøtiig misra wegørriløyu kui ambay— chibig køn. Øyeeg inchib meløwa mayeeløba pirausrø øsig pubelø køn.

28

Pablo Maltasrø chitø marøb purayailø

¹ Incha yandø sətøba øsig webambabe, tru pi tøbøtag pirø pasrabiibe, Malta cha wamim pirø kuin kui nebua ashibelø ker.

² Inchen trendø truyu warab misaamerabe namun kwa tab inchib tab wama, srebus kwa pishin køben, nømbe nag urra, namun soteelanba kemallchai wamabelø køn.

³ Inchene Pablobe trar mul nu tulisha, nagu kebusrene, mømbe kan ul nag pachiiiraben truyugurri webarruppe, Pabloi tasku tsacha megambuben,

⁴ trendø truyu warab misaamerabe ul Pabloi tasku tsacha megai ashabe, kangurrin kangurri trenchibelø køn:

—I møøbe chiguen kømø kweechaitøwein kuinrrun cha. Maryugurrimbe chindimíig ka øsig webarrindøgucha, tru maig kønrrabigwan asha mariibe pinab ashmíig kuabe, øsig uñbashmønrrab asønän— chibelø køn.

⁵ Inchen Pablobe ulwan nagu pabørrgøbene, chigucha inchimíig køn.

⁶ Inchen nømbe parab mendøtashchab, kabe møi møi kwain tsumbu-tashchab ashib muniirab købelø køn. Inchendø tru chindashchab truba yaana ashib køben, chigucha inchimui ashabe, katøbe peemaytø isua, Pablone 'kan tius køn' chib mendabelø køn.

⁷ Inchen tru warainug trugatanbe Publio taigweim pirømera købig køn, tru pi tøbøtag pirø pasrabigu misagwan ashib karubigwei. Truibe namun truba tab wamab uta, pøn kwaløm ørøba truba tab inchib kørørmisringarubig køn.

⁸ Inchen tru Publio møskaimbe pachiiibaig, ani larraibiibaig camayu kwanrø tsuben, Pablobe ashchab ya, Tiusba wamincha, tasigwan kwanrriig-weim pala estsarene, tammisrøbig køn.

⁹ Inchen trugurrimbe katøgan kwanrreeløgucha tru pi tøbøtag pirø pasrabigu warabeløbe Pabloimay amrrua, tamariilø købelø køn.

¹⁰ Incha chigøben truba ketiiløtøga namun truba truba tab incha, nam amrrab barcoyu nebammøwatø, ambamig chi palønrrabigwan nømbe chishtø tranøbelø køn.

Pablo Romasrø pub

¹¹ Incha tru pi tøbøtag pirø pasrabigu pøn pøl warøwabe, kan barco alejandriasriig tru srebus pølmera chab purayanne, truyu pasrabigu ambubelø ker. Tru barcobe Cástorwanba, Póluxwanba marig tøgäig købig køn, chiyuilø kui asamig kønrrai.

¹² Incha barcos puinug Siracusasrø puabe, truyu pøn kwaløm warabelø ker.

¹³ Trugurrimbe pirø puluwandø purørrub amrrua, Regio ciudadsrøngatig amben, katø kwalømbe sursrøngurri, isig ichib kurrøben pa kwaløm kønrrabyube Puteolisrø pubelø ker.

14 Incha trusrømbe nunelø warabelø kuin kui wetørrabelø ker. Inchen nømbe namun truyu kørromisray chiben nambe kan trune lincha kørromisrøbelø ker. Incha øyeeg amba Romasrø pubelø ker.

15 Inchen Romasrø nuneløbe nam amrrunrrab kui wammøraguen kua, Apio ciudadsrø misag amrrua tulunduniisrømbe, katø tru Tres Tabernas taisrømbe namun wamab utønrrab amrruin købig køn. Inchen Pablobe nømun ashabe, Tiuswan ungwa, ungwa cha, chi kømui lataig katøle truba tab kui mørøbig køn.

16 Incha nam Roma chab pubene, Pablone trusrømbe nuin kui nøøøø yau tsubashibig køn, kan suldauwan nun ashchai pasra.

Pablo Romasrø Tiuswei wamwan eshkaab kusrenanøb

17 Incha tru puig pøn kwalømyube judíosmeran ashib karubelan Pablobe linchab amrrunrrai eshkangarua, yandø truyu chab tulundzunøbene, trenchibig køn:

—Nai nunelø, nabe judíosmeran tsalø køb chi kaig marmøwei, katø namui kølli misaamera nømui trendø chigøben marøb tøgagüilan treelane marmumig køn chib pasrømøwei inchendø, Jerusalénsrøwei nane merrarrowa, romanosmerai tasku tranig køn cha.

18 Inchen truiløbe nan maig kuigwan tab ashabe, elatchab inchibelø køn cha, kwanrrai maramdig nainug chigucha chi kalø marig kaaben.

19 Trune judíosmerabe nan elachimønrrai sətølulen, nane treeg marøg kømuindøgucha nan maig punrrabigwan César asha martrai nane miamig nebuig køn cha, kabe na naim pirau, nai misaameraimburab chi køn chinrrab isua kømøtø.

20 Inchawei øyeeg puikkurri ñimun ashchappa, waminchappa nabe wamig køn cha. Nam israelitasmera muniiraigwan muniirabikkurri møy yu i cadenastøga merrarrowa pasrar— chibig køn.

21 Inchene nømbe Pablon trenchibelø køn:

—Nambe Judeagurri ñuimburab eshkabig chi kilga pøra ørig utømøwei, katø namui misag judíosmera trusrøngurri amrrubelø møykkucha ñi kalø maran chib ñuimburab namune chigucha waminchamøwei indig køn cha.

22 Inchendø ñi maig isuigwan wamindi mörinrabna kuin ker cha. Kaguende tru i sətø Tiusweiwana srøig peemay kusrenanøb marigwane chutøgucha 'kaig køn' chib, wamindi ashibelø ker— cha.

23 Incha nømbe kan ø kwaløm Pablona tulundzunønrrab cha wesrawa pasra, tru Pablo ya peba tsuinuamay truba nu amrruben, løtsøgurri maabengatig 'Tius tru nø ashib karub wainuguigwan øyeeg, øyeeg køn' chib eshkaab, nøbe maig kuigwan waminchibig køn. Jesucristoimburab ke treegwei købig kuin kønmab nøm nebua isumne inchib, tru maig maramigwan martrai Moisés pøriilan pølbasra, Tius maig karuigwan eshkabelø pøriilanbañau waminchibig køn.

24 Inchen kan utueløbe Pablo wamindigwan treegwein købig kuin kui isuben, trune kan utueløbe køremeelø køn.

25 Incha nømbe nømui ututøwei lata kandø isumuig køppe, tarømisra ambub køben, yandø ke srabe Pablobe trenchibig køn:

—Espiritu Santobe tru Tius maig karuigwan eshkabig Isaíaskurri tru merrabsrø ñimun kølli misaameran øyah chib, waminchippe, sølwei wamindin køn cha:

26 "I misaameran iigwan waminchab inrrø cha:

Ñimbe mørøppe, mørendø, managuen chigüi mørmønrrun chib.

Ashippe ashendø, chigúinguen nebua ashchaamøn chib.

²⁷ Kaguende i misaamerai manrrømerabe nasrkwailø,
katø mørøppe, mørendø, tab chigúinguen mørmeelø køn chib.

Nømui kabmerabe kasrailø køn cha,
kabmeratøga ashmøwei, nømui kalumeratøga mørmøwei inchai.

Katø nømui manrrøtøga mandø kuinguen mørmøwei,
katø naimay llimamøwei,

katø na tamariilø kømøwei kønrrun chinrrig,” taimbala.

²⁸ Pøs øyeeg købene, ñimbe isua kuy cha. Judíos kømø misaameran tru kaigyugurri wesrabig Tiusweiwane wammørøsrailø køben, truiløbe mørtrun — chibig køn.

²⁹ Inchen Pablo øyeeg chibene, judíosmerabe nømdø truba truba payiyab waminchib ambubelø køn.

³⁰ Inchen Pablobe tru an pagarawa pebi yau pa pila ørøba kørrømisra, nun ashchab ambubelane mundøgucha wamab utab wabig køn truyu.

³¹ Tius nø ashib karub wainuguigwan waminchib, Señor Jesucristoimburabigwan eshkaab kusrenanøb inchibig køn, mui malautøgucha trurrigu chi sətø luliimikke.

Romanos

'Ka amõñiqueh' chib pørig

¹ Na Pablo, Jesucristoi marøb megabig, Jesucristo nøashib nan karua ørig kønrrai nan wama pasrøb, Tiuswei tabig srø wamwan eshkað kusrenanø pasrønrrai nan tarømara pasrøb indig, i kilga pørigwan ørar.

² Iig tru tabig srø wambe Tius maig karuigwan eshkabeløgurri nui newan tab wam pøriiløyu tru merrabsrøwei Tius tranrrab misra kørømisri wam køn

³ tru nui Nusrkaweimburab. Tru Nusrkai nø misag kuigweimburappe, nøbe Davidwei misagugurri arrubig køben,

⁴ tru Espiritu Newan Tabigweimburappe, tru maramburab mariitøga nune Tiuswei Nusrkain køn cha eshkawa pasrig. Treeg køn, tru kwabelai utugurri nø katøle øsiirawa kurrig kuikkurri, truike Jesucristo, tru namui Señor.

⁵ Incha nøgurri tru ka yandø tab indigwanba, nøashib karua ørig kømigwanba nambe utig køn, judíos kømø misaamera chu pirausreelandøgucha nømui isubigwan nuinuutø pasrikkurri nø maig taigwan mørøbelø kømigwan nam waminchib ambamig kønrrai, Cristoi munchiweyasig.

⁶ Inchen tru maig taigwan mørøbelai utu Jesucristoielø kønrrai wamiiløba ñimgucha truyu tøga pønrran.

⁷ Ñim mayeelø Romasrø warabelø Tius undaarailø, Tiuswei misaamera kønrrai wamiilan ka yandø tab indiiba, chi isumgaig tab købiiba ñimba kønrrai inchar, Tius namui Møskaweinukkurrimba, Señor Jesucristoinukkurrimba ar-rubigwan.

Pablo Romasrømay yainrrabna kui inchib

⁸ Señor Jesucristogurri nai Tiuswanmerrig ungwa, ungwa chinrrab inchar ñim mayeelaimburab. Kaguende ñim ñimui isubigwan Cristoinuutø pasra tøgagüigwane chutøgucha tabig waminchibelø køn.

⁹ Pøs nai manrraugurri kerrigu newan isua, nui Nusrkawei tru tabig srø wamwan eshkað kusrenanø, nuiwan na marøb pasraig Tiusbe nane asha pasran, tru na nøba wamindigube managuen pesannamø ñimun isubig kuigwan.

¹⁰ Nabe nai Tiuswan 'purugurra' cha, miabig kur, Tius nan inrrain køben, yandø na chinchagøben ñimun ashchab arrumig may kurtrai.

¹¹ Kaguende nane ñimun asinrrabna køtan, Tiusweimburabeløyuigwan chitøguen ñimun pirishinrrab, ñim mas mur pønrramig kønrrai,

¹² masken tru ñim lata, na lata namui isubigwan Jesucristoinug kangue-larrøtø tøga pønrraitøga nam ambugurri, igurri kuñab pønrramig kønrrai.

¹³ Pøs nabe ñim, nai nunelan, wammøra kønrrai inchar, nabe ñimuisrømay ñimun ashchab katø katø attrab isub megaigwan, na judíos kømeeelø katøgan misaamerai utusrø kan ellmarig tulishib latawei, ñimui utugucha maitøguen tulishinrrab. Inchendø møingatig arrumgaig pasrambuig megabig kur.

¹⁴ Nabe griegosmeran lata, griegos kømø misaameran lata, kusreb misa-ameran lata, chi kusremø misaameran lata ulø pasrar Tiuswei wamwan eshkað kusrenanamig.

¹⁵ Inchawei treekkurri ñim Romasrø warabelangucha nabe Tiuswei tabig srø wamwan truba truba eshkað kusrenanøg kuim pasrar.

Tiuswei tabig srø wambe kaigyurri wesramig maramburab marøbig køn

16 Pøs Tiuswei tabig srø wamweimburappe nabe chi korig kui inchib pasrømur, kaguende truiibe Tiuswei maramburab marøbig køn kaigyugurri wesrailø kønrrai mutøgucha Jesucriston kørebigweimbe, judíosmeramerri, trugurrimbe katø griegosmeragucha.

17 Kaguende tru tabig srø wamyu kenamisran tru chi kaig marmeelø lataig tabig kørrømisra pønrramig Tiusweinukkurri arrubig, truiibe isubigwan Cristoinuutø pasra pønrraikkurrimba, katø isubigwan nuinuutø pasra pønrramig kønrraimba. Tru Tiuswei wamwan pørigu maig taimbala: "Tiusba tru mandø pasramigwan sølgandø treeg tabig pasrabiibe nui isubigwan Tiusweinug pasra tøgagüitøgatø uñchun" taig.

Maya misamera kaig mara pønrraig

18 Tiuswei purø trømbøig namig købiibe srømbalarøngurri kenamisrøb arrun, tru møguelø larrø trømbøig mariilaim palaba, tru sølgandø tabig kømíggwan mariilaim palaba, tru treeg sølgandø tabig kømíggwan mariiløtøga tru newan cierton tabigwan sötøgatø pønrrabelan.

19 Kaguende Tiusweimburabig kui asamigwane nømbe tørgandø ashibelø køn, pøs Tiusbe nøashib trunun nømun kenamarig kua.

20 Kaguende tru chigurrimbunø pirøwan mara pasrøb uraskurri Tiusweimburabigwan tru kaptøga nebua asiimeelø, tru managurri managatig nui maramburab marøb pasrabiiba, nø trendø Tius køppe, treeg kuibabe tørgandø chigüi nebua asamdiig kenamisran tru nø chi mariiløyu. Inchawei treekkurriwei chi kemesra køben 'ashmeelø ker' chib pønrramibe chigagøn.

21 Kaguende nømbe Tiuswan nebua ashippe ashendø, Tius kui ashabe, Tiuswan lataig tabig inchib tøgagømøwei, mayanguen ungwa, ungwa chimøwei inchibelø købig køn. Treeg kømøtø, nømui isubigube chi purugunrrabgailø isumguengailan isuben, nømui chugúinguen mørmubendø isub manrrøbe løstøraig kørrømisrig købig køn.

22 Nømbe truba truba kusrebelø kermab inchendø, chugúinguen mørmeelø kørrømisrig købig køn.

23 Tius managuen pinønrrabig kømíggwei tru tørguegwalmabigwane møg kwawa pinønrrabigwei asrwan tre lataitøwei maramba, illimera latailø maramba, pib srøptøga animalmera latailø maramba, pirau srala ambub animalmera latailø maramba inchib, øyeeløtøga yunømarøbelø købig køn.

24 Inchawei treekkurri nømui manrrau møgueløba, ishumburmeraba trømbøig marøg købig arrubigu trømbøig marøb chinchibgucha warønrrai Tiusbe elatsig køn, nømui asrmeran nømasiyaitø larrø trømbøig marøb kønrrai.

25 Nømbe Tiuswei tru newan ciertonig køreigwane lelacha, isa wamindigwan kørewa, Tius tru mara pønrrailan køriibala tabig waminchib, truilayasis marøbelø købig køn, tru chigurrimbunø kønrrai Tius mara pønrrøbig, Tius tru managatig mayanguen tabig wamindigwan tabig wamindi urasbe. Treeg kønrrun.

26 Inchawei øyeekkurri nømunne purø trømbøig kørikken kønrraptiig marøb kønrrai Tiusbe elatsig købig køn, ishumburmerabe nømui asrwan møguelan tranamig købigwan treeg marmøtø, ishumburmerasiyaitø trømbøig marøb kebaben.

27 Katø møgueløbe treetøwei nømui asrtøga ishumburba trendø treeg marigwan elacha, kanikkurri kanikkurri trømbøig marøg købiitø kan chinsraatø inchib, møgueløbe nøm møgueløsiyaitø purø trømbøig kørikken kønrraptiig

marøb kebambig købig køn. Nøm treeg trømbøig marøb pønrraimburø nømui asrutøwei nøm møra melamigwan utig købig køn.

²⁸ Inchagucha nømbe Tiuswane ni Tius kuitamabguen isug kømui inchen, Tiusbe elachiptindig købig køn, nømui isubigwane larrø kaig mindiilø tøgagøbashchab chi maramgaigwan marbashib.

²⁹ Nømbe kalø marøb amrruiløtø netsailø, purø trømbøig marøbelø, pareelø, trurrigu yandø larrø kailø, treelø køn. Nømbe chigurrin køben pusrkwai asamig køben, misagwan kweecha petamelø køben, kwayam lamelø køben, isatø may wamincha kegørrøsrkamelø køben, katøganun kaig martrab isumelø køben, trutø netsailø køn.

³⁰ Katøganuimbuburab chine wamincha mørøbelø, wam kusrupteelø, Tiuswane larrø tsaleelø, møramguenga trømbøig wamabelø, purab nørreelø mørørai inchibelø, nømasiitø purab nørreelø misrøb waminchibelø, chigurrimbunø kaig maramigwane srøitø, srøitø isua wesrubelø, usri mōskalan chigucha mørmeelø,

³¹ larrø chugúi mørmeelø, chi martrab waminchendø ka wamdø waminchibelø, manrrøga latailø, mungucha lastima ashmeelø, treelø køn.

³² Tru øyeeg marøbeløbe kwamig kønrrai Tius treeg nebunrrai mara pasrigwan nømbe ashibelø købendø, katøgucha nømbe treegwan ka mariitø kønrrab kuindø, katøganelø treeg marene, 'øyambe søldøwei maran' chibelø køn.

2

Tiusbe mayeelan maig maramigwan asha martrab pasrainrrun

¹ Inchawei treeg købene, au, ñibe chi kemesra køben 'ashmíg kur' tamibe chigagøn, ni mu kuingucha, ñi katøganun 'øyeeg, øyeeg marøbig køn' chib pasraibiibe. Kaguende ñi katøganun 'øyeeg marøbig køn' chib pasrappe, ñibe ñiasiiitøwei kebeñib pasran. Pøs katøganun ñi 'øyeeg, øyeeg marøbig køn', chib pasraptøga ñigucha treetøwei marøb pasran.

² Inchawei nambe ashibelø ker, tru øyeeg marøbelane Tiusbe maig kønrrabigwan treeg kønrrai mara pasrøppe, tru newan ciertonig maig køben treeg marig kui.

³ Au, ñi tru katøganelø treeg marøbelan 'øyeeg, øyeeg marøbelø køn' chib pasraptøga, ñigucha treetøwei marøb pasrøbendø, ñi isuppe, ¿Tius tru maig kønrrabigwan treeg kønrrai mara pasriggurri chi indiimíg ñigan welulrrur-matirru?

⁴ ¿Kabe Tiuswei tru purø tab indig tøgagømburab tøgagúilanba, nø chindingucha tammayig kuigwanba, tammay munugubig, munugubig kuigwanba, truilan kashchab inchib pasrøtirru, Tiuswei tru purø tab indiibe ñui kaig mariilan isua møra, Tiusweimay lliranrrai inchib pasrøben, trunun isua ashmøtø?

⁵ Inchendø ñibe ke ñi isuigwandø martrab inchibikkurrimba, mas kaig marmønrrab ñui manrrau ñi isua mørmuikkurrimba, ñibe Tiuswei namig købigwan nui sølgandø maig kønrrabigwan asha maram kwalømwei ñuyasiitøwei tunbasrøb yan, Tiuswei tru maig kønrrabigwan sølgandø asha marig kenamisram kwalømweyasig.

⁶ Tiusbe mōigwandøgucha nøm maig marig køben kanun kanun truburø nø maig tranamigwan treeg tranrrun.

⁷ Managatig øsig kømigwan tranrrun Tiusbe, tru managuen elachimø, tabig marøbig marøb melaigu tru maya nuguen tab indigwanba, tabig kui asha tab indigwanba, managuen patsønrrabig kømígwanba labelane.

⁸ Inchendø tru nøm maig isuppe, ke treegwandø kønrrai isua marøb, tru newan ciertonigwan møra marmøtø, tru sølgandø tabigwan møra marmee-laim pala attrun Tiuswei tru purø trømbøig namig købiibe.

⁹ Tru kaig marøbelaimbe muim palatøgucha purø trømbøig chine nebui melamiba, ni mumayguen kømíig isui melamiba attrun, judíosmeranmerrig, trugurrimbe judíos kømø misaameran.

¹⁰ Trune mønundøgucha tabig marøbelaimbe tru maya nuguen tab indiiba, tabig kui asha tab indiiba, chi isumgaig tab købiiba kønrrun nømuimbe, judíosmeranmerrig, trugurrimbe judíos kømø misaameran.

¹¹ Kaguende Tiusbe muingatøgucha wamøtø, lata ashibig køn.

Tru maig maramigwan martrai Moisés pørig

¹² Inchawei maig maramigwan martrai Moisés pørigwan chigarmera kua, mutøgucha kaig marøbeløbe tru maig maramigwan martrai pørigu asha mariilø kømuingucha, pinab pinamnuumay amben, katø tru maig maramigwan martrai Moisés pørigwan tøgartera kua, kaig marøbeløbe, trube, tru nømui pørig tøgagúitøwei maig kønrrabigwan asha mariilø kønrrun.

¹³ Kaguende maig maramigwan martrai pørig maig tailan ka møratø amøña, Tiuswein kabyu sølgandø tabelø kønrrab kømøtø, tru maig maramigwan martrai Moisés pørig maig tailan møra marøbelø, truiløbeguende Tius tabig kørromariilø kønrrun.

¹⁴ Pøs tru judíosmera kømeeelø tru maig maramigwan martrai pørig chigarguen tru pørig maig martrain chibigwan nømbe ka trendø treeg marøbe amøñippe, nømbe tru maig maramigwan martrai pørigwane chigarmerabe købendø, nømui mariiløyu tru maig martrai karuigwane pøri latailø købig køn nømashib.

¹⁵ Nømbe tru maig maramigwan martrai pørigwane nømui manrrau pøri lataig tøgkar kuin kui kenamaran. Tru nømui isub kebachib pasrabiibe nøm maig kuigwan eshkaben, tru nømui isubiibe, 'ñibe kalø mara pasran' tain kui, kabe 'tabig mara pasran' tain kui indan.

¹⁶ Inchen øyeebe tru møguelø nømui manrrau mu asiimíig nømuinetø tøgagúilan Cristo Jesúskurri Tius maig kønrrabigwan asha marøb kwaløm treeg kønrrun, Tiuswei tru tabig srø wamwan na wamindig maig køben.

Judíosmeraba, tru maig maramigwan martrai Moisés pøriiba

¹⁷ Ñi, judío misag cha wamig, tru maig maramigwan martrai Moisés pørig maig chibig køben ñibe ke truiwandø kemenda pasrøwa, 'Tiusbe namunwei lawa wesrailø ker' chib, ñi nuig misrøb møg inchib pasrab,

¹⁸ katø ñibe Tius maig martrai palai waigwan nebua ashib, katø tru purø tabigwane ñibe 'tabigwein køn' chib, pasrab inchibig køn, kaguende ñibe tru Moisés pørigwan kusrenanig kua.

¹⁹ Ñibe tru chi ashmeelø kabgar latailan muba ambamigwan 'nabe sí, pera ibig kurwab' isua pasrab, katø løstøuelaimbe ñibe 'tør kurwab' isub,

²⁰ katø, 'chugúi mørmeelan maig kuigwan kusrenanøb, ureg latailan kusrenanøb inchibig kurwab' isuinrrun, kaguende tru maig maramigwan martrai Moisés pørigube nebua ashib kusreelanba, tru newan ciertonigwanba maig kuigwan newan trendailan ñibe tøgaga.

²¹ Ñi katøganelanguen kusrenanøbig købendø ¿ñiasiitøweimbe kusrennrrab inchimøtirru? 'Nilamig kømøn' chib, ñi eshkab kusrenanendø, ¿ñigan niløtirru?

22 Katø 'itøulumumig køn' chib, ñi waminchendo, ¿ñigan itøuldirru? Ñibe taska mari tiusmeran larrø tsaliig købendo, trube, truilø pønrrai yau chi pønrrabigwane ¿ñigan nila wesratirru?

23 Tru maig maramigwan martrai Moisés pørigu ñibe truba nuig misrøb waminchib pasrøbendo, ¿tru pørigwandøwei kalø marøb itøbunab pasraitøga, Tiuswane kaigwan lataig inchib ñigan maig købash marøb pasrøtirru?

24 Tiuswei wam maig pørig pasraimbala: "Ñimgurrindø judíos kømø misaamerabe Tiuswei munchiwan purø trømbøig wamig køn" taig.

25 Pøs ñi circuncisiónwan mara tøgagúibe, tru maig maramigwan martrai Moisés pørig maig chibigwan møra mareneguende, purugubwei indan. Inchendo tru maig maramigwan martrai Moisés pørigwan ñi kalø marøb itøbunøbene, tru ñi circuncidawa pasrab taibe chi circuncidamuiq lataitøwein køn.

26 Inchawei tru circuncisiónwan marmíikken tru maig maramigwan martrai Moisés pørigu maig chibigwan treeg marene ¿circuncidamíig kuingucha, Tiuswein kabyube nui misag kui asamig circuncidaweig kui lataitøwei kørromarig kømuitarru?

27 Inchen tru judío kømø misag, asru tru circuncidamíig købendo, tru maig maramigwan martrai Moisés pørig maig taigwan marøbiibe, ñi, judío, tru Moisés pørigwan tøgag, katøgucha circuncidaweig købendo, tru pørigwan kalø marøb itøbunøbene, nø maig uniitøga ñune nøguen ñi kalø marøptiig kui kørromartrun.

28 Kan judío kømibe, ka palatø judío kønrrab kømøwei, asru ka palatø circuncidaweig kuikkurri judío kønrrab kømøwein køn.

29 Treeg kømøtø, kan cierton judíobe nui umbugurri treeg køn. Katø tru circuncisiónwan Espíritu Santogurri manrrau marig køn, tru maig maramigu pøriiløgurriin kønrrab kømøtø. Inchen tru treeg møwane maya nuguen tabig wamindiibe møguelainukkurrin kømøtø, Tiusweinukkurri arrubig køn.

3

1 Trube, treeg købene, ¿kan judíoimbe chiyutørre mas tabig kerah kan judío kømíigwei lata? ¿Katø tru circuncisión mariibe chi purugub pasrah?

2 Pøs, kan judío kømibe chiyutøgucha truba truba tab køn. Srøtøbe, Tiuswei wamwan nømunwei asha marøb tøgagønrraimab isua trana pasrig købig køn.

3 Pøs nøm møiløgøben Tiusba maig pønrramigwan treeg pønrrømuingucha, tru nøm Tiusba treeg pønrrømuikkurrindø, Tius nø maig tabig kuigwane treeg kømønrrai mana treeg martrab kø.

4 ¡Kah! mumaygucha chi treeg kønrraamøn. Treeg kømøtø, Tiusbe nø maig martrab taigwane isømø, treeg marøbig køn, misaabe mutøgucha isapteelø kuingucha. Tiuswei wamwan maig pørig pasraimbala:

"Ñi wamindiiløyu sølwan waminchibig kui asig kønrrain køn taig.

Katø ñun 'øyeeg, øyeeg marøbig køn' tainab pasraigan ñibe tab puraya webyan" taig.

5 Inchen tru nam sølgandø tabig marmub pønrraibe Tius nø sølgandø tabig kuigwane masken tab nebua asig kønrrai kenamarene, trube, ¿nambe chi chinrrab køh? ¿Tru Tius nui namig købiitøga namun møra melønrrai marøppe, søl marmiig køptø, treeg marig kønrrab kø chindah? (Nabe iigwan trenchippe, møguelø maig isubelø køben, trumay isua trenchar.)

6 ¡Kah! mumaygucha chi treeg kønrraamøn. Trube, øyamay kuimbe ¿pirau maya misaameran tru maig kønrrabigwan Tiusbe chinha asha martrab kø?

⁷ Inchen tru nai isa wamindiibe Tiuswei newan ciertonigwane masken maya nuguen tabikken kōnrrai marendøbe, trube ðnane katøgucha chindimbarre kaig marøptiig kuig mara kōrrømarah?

⁸ Trube, øyah chinrrauta (tru mōiløgøsrøn namuimburab trømbøig waminchib itø amrrubeløma namun ke øyeeg chib pōnrrabelø kui marøbelø kōn): “Kaigwan margun cha, tabig attraimbe”. Tru trenchibelane mōra pōnrrørrai maramig sølwein kōn.

Tabig sølwan marøbeløbe kanguen mu kaagøn

⁹ Trube, treeg købene, ðnam judíosmerabe katøguchi tabelø købra chindah? ¡Kah! mumaygucha chi treeg kōmøn. Kaguende: “Judíosmeran lata, judíos kōmeelan lata, kaibe mayeelanba nø karub tōga pasran” cha. Yandø nambe: “Treeg kōn” cha chab trendaig kuig kōn.

¹⁰ Tiuswei wamwan pørigu maig taimbala:

“Sølgandø tabiibe ni kan kandøguen mu kawei,

¹¹ maig kuigwan chi chibig kui mørtrabig muguen kawei,

Tiuswan isub lanrabiibe muguen kawein kōn cha.

¹² Mayeeløba peeburabgøba amba, mōitøgucha chi martrabgaig kailø misrin kōn cha.

Tabig marøbiibe muguen kaagøn cha, ni kan kandøguen mu kaagøn cha.

¹³ Nømui mōrambe kan kwaig sōrin trabwan kura pasri lataig køben, nømui niløtøgabe may wamincha, isa kegørrøsrkøbelø kōn.

Nømui trikkalusyube ulmerai venenon muga latailø, treelø kōn cha.

¹⁴ Katø nømui trigube kaig nebunrrai trømbø wamamibah, larrø pusrkwanrraptiig wamamig mōbgølig lataibatø netsailø kōn cha.

¹⁵ Nømbe kweechib, ani lushib luløb pōnrramig srøbmerabe unchaguen tōgar kōn cha.

¹⁶ Nømui amønailøbe purø isumdiig kōrrømisra waramig kōnrraimba, chugurringuen kōmuielø isuiig kōrrømisra waramig kōnrraimba, treeg marøbelø kōn cha.

¹⁷ Ambumay imay tab amønamiigwane ashmø misaamera kōn cha.

¹⁸ Nømbe Tiuswan kørig tøgagømigwane

ni managuen isumeelø, treelø kōn” cha, trenchibig kōn.

¹⁹ Pøs nambe ashibelø ker, tru maig maramigwan martrai Moisés pøriibe tru pørig maig chiben truigwan marøb melabelaimburab waminchibig kui, mumeratøgucha chi chinchab kaima pōnrramig kōnrraimba, katø Tiuswei merrab pirau maya misaamera kerriguba nømui chi mariilan eshkaib pōnrramig kōnrraimba.

²⁰ Kaguende tru maig maramigwan martrai Moisés pørig maig chibig køben trunun marikkurri Tiuswei merrab chi kaig marmiiig lataig munguen tabig kōrrømarig kōnrraamøn. Treeg kōmøtø, tru pøriibe nambe kaig marøbelø kui trunun kenamarøb pasran.

Kaigyugurri webambamibe isubigwan Jesucristoinug pasra tøgagüikkurrin kōn

²¹ Inchen mōimbe tru chi kaig marmeelø lataig tabig kōrrømisra pōnrramig kōnrrai marøbig Tiuswei yandø kenamisrin kōn, tru maig maramigwan martrai Moisés pøriiba chi asamikkaig, Tius maig karuigwan tru eshkabeløba,

katø tru maig maramigwan martrai Moisés pøriguba, tru truigweimburab maig wamindig køben, treeg.

²² Iig tru chi kaig marmeelø lataig tabig kørrømisra pønrramig kønrrai marig Tiusweimbe, isubigwan Jesucristoinug pasra pønrraikkurri arrubig køn mayeelø nun kørebelaimbe, mungucha nøørø marøb kandarøtø inchimø.

²³ Kaguende mayeeløba kaig mara, Tiuswei tørguegwalmabigwane chinchanebumøn.

²⁴ Incha tru chi kailø komeelø lataig tabig pønrramig keta traniibe Tius ka yandø tab indikkurrin køn, Cristo Jesúscurri Tiusweyelø kønrrai wesruilø kuikkurri.

²⁵ Tiusbe Cristone kan animal kweecha tranøb lataitøwei marig køn, Cristoi ani lusinug nømui isubigwan pasrikkurri misag kaig mariilan Tius ulø paymumig kønrrai. Øyeeg marøppe, Tius nui tru sølgandø tabigwan ashchai kenamaran, kaguende tammay muniirabig køptø, tru merrabwan kaig mariilane chi ulø paymønrrab pesannawa.

²⁶ Nøbe øyeeg marøppe, tru mõi øyan kwaløm nui sølgandø tabigwan kenamartrab indig køn. Katø nøbe isubigwan Jesúsweinug pasrøbigwane chi kaig kømíig lataig tabig kørrømisrtrai marøbig køn.

²⁷ Trube, treeg købene, ¿chiyu møg inchib pønrrønrrerah? Pøs treeg indamibe yandø patsan. Trube, ¿trunune mumay martrai pasriitøga patsøga pasrah? ¿Chigøben tabig mariiløtøga kønrrab kø chindah? Kah, treeg kømøtø, trube isubigwan Cristoinug pasrtrai indiitøga patsøgan.

²⁸ Pøs nabe øyamay køn chibrrer pønrrer, tru chi kaig kømíig lataig tabig pasramibe isubigwan Cristoinug pasra tøgagúikkurrin køn cha, tru maig maramigwan martrai pørigu truilan mariiløgurrin kønrrab kømøtø.

²⁹ ¿Kabe Tiusbe judíosmerayasiitø Tius kønrrab kø chindah? ¿Nøbe judíos kømø misaameraingucha Tius kømuitarru? ¿Pøs yamba treegwein kømuitarrul Judíos kømø misaameraingucha nøbe Tius køn.

³⁰ Kaguende Tiusbe nøtø kandø køn, isubigwan nuinug pasrikkurri judíosmera, tru asru circuncidawarmeran chi kailø komeelø lataig tabig pønrramig marøb, katø judíos komeelø, tru asru circuncidawa komeelangucha nømui isubigwan nuinug pasrikkurri chi kaig komeelø lataig tabig pønrramig marøb inchibig.

³¹ Pøs treeg købene, ¿isubigwan Tiusweinug pasra tøgagúitøga tru maig maramigwan martrai pørigwane chigucha kømíig mara kørrømartrautah? ¿Kah! mumaygucha chi treeg kønrraamøn. Masken nabe tru maig maramigwan martrai pørigwane maig købiibe, treeg kønrrai inchib pønrrer.

4

Abraham isubigwan Tiusweinug pasrikkurri Tiuswei merrab chi kaig kømíig lataig kørrømarig

¹ Treeg købene, ¿nam judíosmerai tru merrabsrø namui kølli misag Abrahambe chi wetørraig køn, chinrrab?

² Pøs Abraham chigøben tabig mariitøga chi kaig kømíig lataig tabig pasramig kuig kuimbe, møg inchib waminchib pasramig købwei inchibsruiinrun, inchendø Tiuswei merrab kømøtø.

³ ¿Tiuswei wamwan pørigube mandø chibig køh?: “Abrahambe Tiuswan køreben, treekkurri nune Tiusbe chi kaig kømíig lataig, tabig treeg asha pasrig køn” cha, trenchibig køn.

⁴ Pøs møikkøben kan chigøben marenma, truburø traniibe keta tranig kømøtø, nui marimburø tranamigwan tranig, treeg køn.

⁵ Inchen Tiusba tab pørrørrrab chi marmuindøgucha, tru kaigwan chi kaig kømíig lataig tabig kørømarøb Tiuswan kørebene, tru nui isubigwan nuinug pasrigwane Tiusbe sølgandø tabig kui asan.

⁶ Davidbe katø treetøwein taig køn: “Maya nuguen tab kuig køn cha, kan møg nui tabig mariiløgurrin kømøtø, Tius ka yandø chi kaig kømíig lataig tabig treeg asha treeg kørømarinabigweimbe.”

⁷ Øyah chib:

“Mayanguen tab kuilø køn cha,
kaig mariilan Tius nømun chigucha chi ulø paymørrrab pesannab,
katø nømui kaig mariilan chi isua ashmø kasra kørømarinabelaimbe.

⁸ Mayanguen tab kuig køn cha,
Señor nui kaig marigwan trunun isua ashmøtø, Señor kagøbasinab møøbe.”

⁹ Inchen iig tru mayanguen tab købiibe ¿circuncidawarmeraindø kønrrab kø chindah, kabe circuncidameelaingucha kønrrab kø chindah? Pøs nambe trendaig kuig køn: “Abrahambe isubigwan Tiusweinuutø pasra tøgagúikkurri nune Tiusbe chi kaig kømíig lataig tabig treeg asha pasrig kuig køn” cha.

¹⁰ Inchen ¿tru treeg mara kørømarøb urasbe nøbe maig uñen kuig køh? ¿Nøbe circuncidaweig køben kuig køh, kabe circuncidamíig srø køben kuig kø chindah? Nøbe circuncidaweig køben kømøtø, nøbe circuncidamíig srø købenbatøsrøwei treeg kørømarig kuig køn.

¹¹ Inchen Abrahambe tru isubigwan Tiusweinuutø pasra tøgagúikkurri chi kaig kømíig lataig tabig treeg asha kørømari wendøsrø, truigweimburab tru circuncisiónwane kan siñal, kan sello lataig utig køn. Treekkurri Abrahambe circuncidameelø mayeelø Tiuswan kørebelaimbe nøbe møskain køn, nømgucha kaig kømeeelø lataig tabig treeg asilø kømig kønrrai.

¹² Katø Abrahambe tru circuncidailaingucha møskain køn, tru treegwan ka mariitø kømøtø, tru namui møskai Abraham circuncidamíig køppatøsrøwei nui isubigwan Tiusweinuutø tøga unigu truwandøwei trappunabelaimbe.

Tius nø martrab kørømisriibe isubigwan nuinuutø tøgagúikkurri utønrrun

¹³ Kaguende Tius tru treeg tranrrab cha kørømisrigwan Abrahamwanba, nuinukkurri karrab misaameranba pirøwan ketig utønrrun chib urasbe, tru maig maramigwan martrai pøra wesruitøga tranmøtø, nø isubigwan Tiusweinuutø pasra tøgagúigu chi kaig kømíig lataig nø treeg kugu tranig køn.

¹⁴ Kagen tru keta tranrrab misrigwan utønrrabeløbe tru maig maramigwan martrai pørig maig taigwan marøbelø, truiløtø kuig kuumbe, trube, tru isubigwan Tiusweinug pasra tøgagúibe chi tøgagømuinguenig køben, katø tru treeg tranrrab cha kørømisriikkucha ka treeg martrab taitø purebsruinrrun.

¹⁵ Pøs kaguende tru maig maramigwan martrai pøriibe Tiuswei trømbøig namig købigwan tøgag arrubig køn mørmeelaim palabe. Inchen tru maig maramigwan martrai pøra wesruig chiganuube, kalø marøb itubunab kømikkucha chigagøn.

¹⁶ Inchawei Tius tru treeg tranrrab cha kørømisriibe misaamera nømui isubigwan Tiusweinug pasrikkurri arrubig køn, trube Tiuswei tru ka yandø ketig kønrrai. Incha tru Abrahamweinuukkurri amrrub misaamerai mayeelaimba maig marigwane mu kønøgamgaig treeg marig kørømisrtrain kuig køn. Tru maig maramigwan martrai pørig maig taigwan marøbelaindø kømøtø,

tru isubigwan Tiusweinuutø pasrig Abraham tøgagúigwandøwei tøgarweimbe nømuingucha kønrrai. Inchawei Abrahambe Tiusweimburabigu nam mayee-lai møskain køn.

¹⁷ Tiuswei wamyu maig chibig pørig pasraimbala: “Truba yambalø peesrøn, peesrø warønrrab misamerai ñune møskain kønrrai marar” taig. Tru Abraham kørewa pasraig Tiuswein kabyube Abrahambe namui møskain køben, tru Tiusbe kwaitan øsiirangarub, chi marig kaabendø, chabguen marig pønrrai lataig wamabig, treeg Tius køn.

¹⁸ Chi treeg kønrraitamab isua muniiramig chigagúingucha, Abrahambe kørewa, muniirab megaig køn. Treekkurri truba yambalø peesrøn, peesrø warønrrab misamerai møskai misrig køn, Tius øyah taimbala: “Ñuinukkurri karrab misaabe øyeeg nørrø kønrrun” taig.

¹⁹ Abrahambe isubigwan Tiusweinug pasra tøgagúigube treeg kòmuptinchaitamab nui asrwan isua, kullaaramuig køn, nøbe yandø kwai lataig kuinaindøgucha. Kaguende nøbe yandø cien años lutauig købig køn. Katø Saragucha ureg tøgagømibe kwai lataitøwein købig køn.

²⁰ Øyeeg køben Tius tru treeg martrab cha kørørmisrigwane Abrahambe treeg kòmuptinchaitamab isumuig køn. Treeg kømøtø, nui isubigwan nø Tiusweinuutø pasra tøgagúibe masken mur pasrønrrai marig pasrøwa, Tiusweyasig maya nuguen tabig marøbig køn.

²¹ Abrahambe treeg kønrrab kui newan isua pasrabig køn, Tius treeg martrab cha kørørmisrigwane maramburab maramigwan tøgä Tius kui.

²² Incha nui isubigwan Tiusweinug pasrikkurri Tiusbe Abrahamwane chi kaig kømíig lataig tabig kui asha utig køn.

²³ Inchen tru: “Chi kaig kømíig lataig tabig kui asha utig køn” cha pøriibe Abrahamweyasiitø kømøtø,

²⁴ namuyasikkucha tøgä pøra pasrig køn, tru nam chi kaig kømeeleø lataig tabig kui asha Tius utiilø kønrrabelaimbe, tru namui Señor Jesucriston kwaitai utugurri katøle øsiirangarub Tiuswan nam kørebelaimbe.

²⁵ Cristobe namui kaig mariilaimburø kwanrrai tranig kua, katø nune katøle øsiirangaruig køn, Tius namun chi kaig kømeeleø lataig tab kui asiilø kønrrai.

5

Kaig marig chigar kønrrai yandø tabig kørømarig

¹ Inchawei isubigwan Cristoinug pasra pønrraikkurri chi kailø kømeeleø lataig tabig pønrramig kua, Tiusba chi isumgaig tab pønrramigwan tøgaguer, Señor Jesucristogurri.

² Pøs katø nambe nøgurri namui isubigwan nuinuutø pasriitøga øyeeg tru ka yandø tabig tranigu kebamba, truyu pønrrøwa, Tiuswei tøgüegwalmabigwan namgucha tøgagønrrab, treegwan isua muniirab tab kui mørøb pønrrer.

³ Incha øyeetø kømøtø, namun chigøben isumdiig nebuben, katø nambe mayanguen tab kui kasraarelø ker, kaguene tru chigøben isumdiig nebui pønrramig arrubiibe maig kuingucha tammay melam kusremig arruben,

⁴ tru maig kuingucha melabig melaigugurri arrubiibe, chine pub arrubigu chi kømui lataig pønrrabelø kømig arruben, tru treeg chi kømui lataig pønrrabelø kuigyugurri arrubiibe, tru tøgagømigwane yandø tøgaguen pønrrermab isua pønrramig arrubig kui isubelø kuig køppe.

⁵ Inchen nam tru tøgaguermab isua munig melaibe, treeg kòmuptincha namun ka isuindø pønrramig kønrrai kørromartrabig kòmøn. Kaguende Tiusbe namui manrrøwan nui undag kòbiitøga netsøgana pasrig køn, Espiritu Santon namun tøgagørrai tranikkurri.

⁶ Pøs nambe chigucha chi martrabgailø pønrrøben, Cristobe kailayasig kwaig køn, yandø ke treeg maramig puben.

⁷ Tabig sølgandø uñib møweimburø kan mugøben nø purøbasramisra kwanrrab indamibe purø murig køn, ke kan larrø tabig marøb møweimburøgan pøs kan mube nø purøbasramisra kwanrrab pasramisrøbwei inchibsruitarru køben.

⁸ Trune Tiusbe nui undag købig namuyasig tøgagúigwan øyeeg marigu kenamaran, nam kaig marøbelø købenbatørsøwei, Cristo namuimburø nø purøbasramisra kwaigu.

⁹ Møimbe yandø Señor Jesucristoi ani lusiitøga nam chi kaig kømeeleø lataig tabig pønrraig køppe, mømibeguende Tiuswei trømbøig namig købig namuim pala attrabig pasrabigwan Cristogurri treeg pumønrrai mariilø kòmønrrun.

¹⁰ Pøs nam Tiuswan ashig kømui inchib pønrrab urassrøweinguen, nui Nusrkai kwaikkurri Tiusba tammay tabig kørromisra pønrramig kønrrai mariilø kuig køppe, mømibeguende, yandø nam nøba tabig kørromisra pønrrønrrai mariiløbe, nambe kaigyugurri wesrailø kòmønrrun Nusrkai øsig kuikkurri.

¹¹ Incha katø iitø kømøtø, nambe Tiusweinug maya nuguen kasrag pønrrer namui Señor Jesucristogurri. Pøs nøgurri nambe Tiusba tru tammay tabig kørromisra pønrramigwan mømibe utig kuig køn.

Adánweiwanba, Cristoiwanba waminchibig

¹² Pøs kaig mariima kan møkkurrindø yu pirau kebarruben, kwamibe tru kaig marikkurri arrig købene, øyeetøwei tru kwamibe maya misagwan puraarrub arrig køn, kaguende mayeeløba kaig marig kua.

¹³ Tru maig maramigwan martrai pørig chigaabenbatøwei, kaig mariibe yu piraube pasrabguen indig køn. Inchendø tru maig maramigwan martrai pørig kaabene, kaig marigwangucha chi isua asamig kaabig køn.

¹⁴ Treeg kuindøgucha, tru kwamibe Adán tsub urassrøngurri Moiséskatig mayeelaim pala pasrøben, mayeelanba kwamig arrig køn, Tius karua pasrigwan kalø marøb itøbunab Adán mari lataitøwei marigwan marmeelaim palaguen. Adánbe tru wendau attrabigweimbe tre lataitøwein kuig køn.

¹⁵ Inchendø Tius nø keta traniiba, tru karua pasrigwan Adán kaig marøb itøbuniibabe treetøwein kømøtø, peg køn. Kaguende Tius karua pasrigwan kan møg kalø marøb itøbunikurrindø misag truba nørro kwamima kuibe, treetøguen kømø, Tiuswei tru ka yandø tab indiibe misag nørro pønrrabelaim pala arrumburab arrig køn, tru Jesucristo kan møweinukkurrindø ka yandø keta tranig arrubig.

¹⁶ Inchagucha Tius tru keta traniibe, tru kan møøtø kaig marigugurri arrubig lataig kømøtø køn. Kaguende tru kaig marimburø maig kønrrabigwan asha mariilø pønrramig arrubiibe, kanbalø kalø marikkurrindø arrua, misagwan kailø kui kørromara pønrsrailø kømigwan tøgag arrig køn. Trune Tius tru ketiibe møguelø purø nørro kalø mara pønrrøben, treekkurri arrua, Tiuswein kabyu nam chi kaig kømeeleø lataig tabig pønrramig kønrrai mariilø kømigwan tøgag arrig køn.

¹⁷ Pøs Tius tru karua pasrigwan kan møg, nøtø kaig marøb itøbunikurrindø maya misagweim pala tru kwamig nø karub pasrønrraima, tru kan møøtø øyeeg mariibe, treetøguen kømøtø, tru Jesucristo, nø kan møkkurrindø nøm

øsig kuigube chigurrimbunø arrubigwan nøm kanawa puraambub amrrun, tru Tiuswei nørø ka yandø tab indigwanba, tru chi kaig kømílg lataig kømig ketigwanba Tius tranig utabelø.

¹⁸ Pøs Tius karua pasrigwan kan møg kanbalø kaig marøb itøbunikkurrindø maya misaameran møra pønrrønrrai pønrrailø kømima kuibe, katø treetøwei kan møg kanbalø sølgandø tabig mariitøgatø maya misaameran tru chi kaig kømeeleø lataig tabig kørømisramigwan maran, truike nømuyasig øsig kømigwan tøgai arrubig.

¹⁹ Kaguende kan møøtø maig karuigwan møra marmuikkurrindø misaamera truba nørø kaig marøbelø kønrrai mara kørømariibe, katø treetøwei kan møøtø tru maig karuigwan møra mariibe truba nørø chigucha chi kaig kømeeleø lataig tabig kørømariilø kønrrun.

²⁰ Tru maig maramigwan martrai pøriibe tabigwane tabig kui ashchaimba, kaig marigwane kaig kui ashchaimba asøskønrrab kebarrubene, tru kaig marøb itøbunab kømibe masken nurab larrøbitsig køn. Tru kaig marig mas larrøbichib nurabene, Tiuswei tru ka yandø tab indiibe treetøguen kømø, purab nuikken nurab larrøbitsig køn.

²¹ Inchawei tru kaig mariibe misagwan Tiusweinukkurri tarømara, kwamigumay srua ib truig kerriguwan nø karub pasrab lataitøwei, tru ka yandø tab indikkucha tru sølgandø tabig mariitøga kerriguwan nø karub pasrønrrain kuig køn, managatig øsig kømigwan tøgai Jesucristo namui Señøgurri.

6

Kaig marøb melaigugurri yandø wesrailø

¹ Trube, treeg købene, ¿mandø chinrrab? ¿Tiuswei tru ka yandø tab indig mas nurab larrøbichib attraimbe, trube, kabe kaig maramigwan marøbig martrab køh?

² ¡Kah! mumaygucha chi treeg kønraamøn. Kaguende nam kaig maramigweimburappe yandø kwailøbe tru kaig maramigu katøgucha chincha øsig pønrrønrrab.

³ ¿Kabe ñimbe ashmeelø køtirru, nam mayeelø Cristo Jesúswei munchiyu piu umbu ulsrøbeløbe, tru nø kwaigu namgucha nøba kanguegøtø nø kwab lataitøwei mara pønrrain kui?

⁴ Kaguende nambe piu umbu ulsraitøga nøba kanguegøtø søri latailø kuig køn, nø kwaigu namgucha kwanrrab, Møskawei tørguegwalmabiitøga kwabelai utugurri Cristo katøle øsiirawa kurrab lataitøwei, namgucha katøgan srøig peemay øsig amønarnigwan tøgagønrrab.

⁵ Cristo kwaiguma trakkandø kanbalatø nam nøba pønrrain kuabe, treetøwei nø øsiirawa kurrigugucha nambe øsiirawa pønrramig kønrrun.

⁶ Kaguende nambe ashibelø ker, tru nam trendø kaigwan tøga kal-laig tru køllig namui umbu pasrabigwane Criston tru kurusyu mesrøben, tøga mesrøb lataig marigwan, tru namui umbu kaig martrai isungarubigwan pinisaig kønrrai, nam kaig maramigutø melabig melamig kømønrrai.

⁷ Kaguende yandø kwabiibe, treeg kaig marøb megamigugurrimbe treeg marmønrrab webya pasran.

⁸ Pøs namgucha Cristoba kanguegøtø kwab lataitøwei marabe, katø nøba øsig purramigwangucha purramig kønrrab kui isua pønrrer.

⁹ Kaguende nambe ashibelø ker, Cristobe kwabelai utugurri katøle øsiirawa, yandø kurrikkurrimbe katøbe yandø mana kwamønrrabig køben, tru

kwangarub pasrabiibe yandø nune katøbe chigucha martrab kaimanrrab kui.

¹⁰ Cristobe kwappe, tru kaig marigweimburab kan pijitø managatigweyasig kwawa, katø mõi øsig wappe, Tiusweyasig øsig wan.

¹¹ Inchawei treetøwei ñimbe kaig maramigweimburappe yandø kaig marmønrrab kwailø kermab isua pønrray. Inchendø Tiusweyasiibe Cristo Jesúsba kanbalatø pønrraikkurri øsiguelø kermab isuague.

¹² Trube, treeg købene, tru kaig maringarub pasrabig tru ñimui patsønrrab asru nø karub pasrønrrain kømøtø kuig, tru kaig marøg købig arrubigwan ñim tru kuindø maramig kømønrrai.

¹³ Katø ñimui asru tasiimera, srøbmera, øyeelø chine tøgagúilan kaig maramigweyasig tranrrab inchib pønrrømøtay. Treeg kømøtø, masken ñimbe kwailø latailø kua, katøle øsiirawa latailøsun Tiusweyasig tranrrab inchib, ñimui asru chi pønrrabigwane trurrawa sølgandø tabig marøb kømigweyasig tranrrab inday.

¹⁴ Pøs tru kaig mariibe ñimune yandø nø karub pasrømønrrun. Kaguende yandø ñimbe tru maig maramigwan martrai pørig truig karuig melømøtø, Tius nø ka yandø tab indig truig karuin pønrran.

Møimbe yandø kaigwan kømø, tabig maramigwan marøb melabelø.

¹⁵ ¿Trube, treeg købene, mandø inhab? ¿Tru maig maramigwan martrai pørig truig karuig melømøtø, Tiuswei tru ka yandø tab indig karuig pønrraig køppe, kabe kaigwan marøb kønrrab køh? ¡Kah! mumaygucha chi treeg kønrraamøn.

¹⁶ ¿Ashmeelø køtirru, ñimma mungøben nø maig karuben treeg karui mørøb melørrumøn cha melamisrabe, nø maig karuben ñim møra marøb melai møwaimbe nø karuindiig melamig købig kuin kui? Pøs, tru kaig maramig nø karub tøga pasraibe kwamigumay srua iben, Tius maig karuigwan møra marig truig karub tøga pasraibe Tiusba tab pønrramigumay srua ibig køn.

¹⁷ Inchendø Tiuswan mayanguen ungwa, ungwa chinrrab. Pøs ñimbe merrappe tru kaig marig karuindø melabelø kuagucha, tru tabig kusrenanigwan ñim maig utig køben, treeg marøb kømigu pønrramisra, ñimui manrraugurri newan isua tregwan møra marig køn.

¹⁸ Ñimbe kaig marigugurri yandø wesrailø kua, møimbe ñimbe tru sølgandø tabigweyasig karuindø melønrrabelø misrin køn.

¹⁹ Nabe waminchippe, misaamera wamindimay waminchar, kaguen ñim misaamera kuig køppe, isuigu kullaguelø kuimba. Pøs tru merrabwanma ñimui asru tasiimera, srøbmera øyeelø chine tøgagúilan køsøngønrraptigweyasig tregwandø, tregwandø katøguchinguen, katøguchinguen trømbøig marøb kømima kuibe. Møimbe treetøwei ñimui asru chine pønrrabigwan tru sølgandø tabig marøb kømigweyasig tregwandø marøb kømig tranrrab inday, ñimuyasiitøwei Tiusweindø tarømarig pønrramig kønrrai.

²⁰ Pøs tru ñim kaig maramigu trutø trutø marøb køb urasma tru sølgandø tabig maramig ñimun truig nø karuimíg amøñibelø kuig køn.

²¹ ¿Inchen tru kaig marigugurrimbe tabiibe chi wesrawa pønrrøgue? Møi yambalarømbe ñimune kørikken kuim pønrramitø køn. Pøs truiibe srabebe ka kwamitøwei srua arrubig køn.

²² Trune møimbe ñimun kaig marøb melaigugurri yandø wesrailø, Tius karuindø melabelø misrikkurrimbe, Tiusweyasiitø tarømarig pønrramig tøgagøn. Inchen truikkurri arrubiibe tru managatig øsig kømig, truig køn.

23 Kaguende kaig mariibe tru kaigwan marimburo nò tranøppe, kwamigwane tranan. Trune Tius keta traniibe managatig øsig kømig, truig køn, namui Señor Jesucristoba kanbalatø pønrraigu.

7

Kasharawarmera maig køben, treetøwein køn cha wamindig

1 Nai nunelø, tru maig maramigwan martrai karuigwan ashibelan nabe waminchar. ¿Ñimbe ashmeelø køtirru, tru maig maramigwan martrai karuibe kan møwane øsig unamnegaatiø nø tøga pasrabig kui?

2 Kaguen kan kasharawa ishuwanma tru maig maramigwan martrai pasriibe keeba nøøro kønrrain kømø, kandø mara tøgagøn keg øsig wamnegaatibe. Inchendø yandø keg kwabene, tru pørig nui keeba nøøro kønrrain kømø, mara kørrømarig købigwane nøbe yandø truburappe chi asamikkaig kørrømisran.

3 Inchawei keg øsig wamne, katøgan møøba kasharabene, truigwane 'ke-wan itøluløptø ishug køn' cha, nune treg wamig kørrømisrtrun. Inchen nui keg kwabeneguende, tru maig maramigwan pasrig nui keeba nøøro kønrrain kømø, kørrømarig købigwane, yandø nøbe truburappe, chi asamikkaig kørrømisran. Katøgan møøba ya, kasharaingucha, yandø kewan itøluløptø ishug kønrraamøn.

4 Katø treetøwei ñim, nai nuneløgucha, Cristoi asruelø kuikkurri tru maig maramigwan martrai pørigweimburappe ñimbe yandø kwai latailø kørrømisrig kuig køn, tru katøganwei misra pønrrønrrab, Cristo tru kwailai utugurri øsiirabigwei, nam øyamay Tiusweyasig tabig marøbelø kønrrab.

5 Kaguende trendø kaig marøb asr namun nø karuim pønrrab urasbe, tru maig maramigwan martrai Moisés pørigu kaigwan marmønrrai tru mera pasriibe namune kaigwan martrab isunrrai masken kiagasrønänen, tru kaig marøg købiibe namui asru marøb pasrabig køn, namun øyamay kwamigumay srua inrrabigweyasig marøbelø kønrrai marøb.

6 Inchendø mømibe tru Moisés pørig nø karub tøgagúigweimburappe nambe yandø kwaikkurri, nambe truigweimburappe chi asamikkaig kørrømisrig køn, Espiritu Santoinug peemay øsig kømig srøizhigu nam Tiusweyasig marøb melamig kønrrai, tru maig maramigwan martrai merrabsrø køllin pørigu kømøtø.

Tabigwan martrab inchen kaigwan martrai inchibig namui umbu pasrabig

7 ¿Trube, treg købene, mandø chinrrab? ¿Tru maig maramigwan martrai pøriibe kaig marøbig kønrrab kø chindah? ¡Kah! mumaygucha chi treg kønrraamøn. Kaguende tru martrai pørig kømuimbe, kaig mariibe maig købig kuin kui nabe nebua ashmubsrubrainrrun. Pøs tru maig maramigwan martrai pørig: "Mendaigweiwane chull asamig kømøn" cha, trenchimuig kuimbe, trube, tru mendaigweiwane chull asamibe kalø købig kuig nabe nebua ashmubsrubrainrrun.

8 Inchen kaig maramibe tru øyeeg marmønrrai karua pasrinug nø kelula, pasramisra, nane chigurrimbunø chull ashib pasramig kønrrai nane masken isunrrai kiagasrønänig køn. Kaguende tru maig maramigwan martrai pørig chi kaabene, tru kaig mariibe chi martrabgaig, kwaig lataig køn.

9 Tru maig maramigwan martrai pørig maig maringaruigwan merrabsrø chigaig køppatøbe, nabe øsiguig købig kur. Inchen tru maig maramigwan martrai pasrig arrubene, tru kaig maramibe nainuube ke øsiirab lata inchen, nabe kwai lataig kørrømisrinabig køn.

10 Pøs tru maig maramigwan martrai pøriibe tru øsig kømigumay pera inrrabig kuig købendøbe, nane masken kwamikken kønrrai marøptinndan.

11 Inchen kaig maramibe tru maig maramigwan martrai pasrinug nø kelula, pasramisra, nane purø may kebenøsrka, tru karua pasriitøga nane kwiag lataig mara, Tiusweinukkurri tarømartan.

12 Inchawei tru maig maramigwan martrai pøriibe newan tabig køben, katø tru martrai karua pasriibe newan tabig, sølgandø maig maramigwan marøbig, tabig køn.

13 ¿Trube, tru treeg tabig købendøbe nane kwamig kønrrai marøb pasra chindah? ¡Kah! mumaygucha chi treeg kømøn. Treeg kømøtø, tru kaig mariibe tru tabig martrai pørigwan nø merrarawa marøb pasraitøga nane kwanrrai mara, øyamay kaig mariibe kaig marigwein købig kuin kui ashchai kenamarig køn. Inchen tru maig maramigwan martrai pasriibe tru kaig marigwane newan kaig købig kui kenamaran.

Møøbe kullaguig køn

14 Pøs tru maig maramigwan martrai pøriibe Tiuswei newan tabigwe-imburaibigwan nambe asamig køben, trune nabe asr mumay srua iben treeg kuinawa, trumay isumøtø, kaig marigu trunundø, trunundø marøb meganrrai yani lataig kur.

15 Pøs natøweinguen na marøb pasraigwane ni mandø kuinguen mørmuinatan. Kaguende na marinrrabna indigwane marmubendø, tru tsalø kømddiig na marmønrrab isuigwane, trube, marøptø marinabig køn.

16 Pøs tru nai isub kebachibigu kalø kui mørendø, na trunun marøptø marinaig købene, trube, tru maig maramigwan martrai pøriibe chi kaig kømøtø, nabe truiwane tabig kui asha pasrar.

17 Pøs treeg købene, tru treeg kaig marigwane yandø narre marøb pasrømøtø, tru nainug kaig martrai inchib pasrabig, truirre marøb pasran.

18 Pøs Tiusba kømfiibe trendø na kaig kuinaigube chigucha tabiibe pasrømuin kui ashar nabe. Kaguende tabigwan nabe martrappe isuin-abendø, truiwane martrappe kaimainatan.

19 Pøs tru na mariibe tru tabig martrab isuigwan marmøtø, tru kaigwan marmønrrumab isuigwane marøptø marinatan.

20 Inchawei tru na marmuinrrabna indigwan na mariibe, narre marig kømøtø, nainug kaig martrai inchib pasrabig, truirre marøb pasran.

21 Inchawei nainug kaig martrai inchib pasrabig købig kuin kui nebua ashar, nabe tabigwan martrab indingucha, tru kaig maramibe nainuube nømerrig, nømerrig pasrabig kuin kui.

22 Kaguende nabe nai umbube truba truba tab kui mørøb kasraarar tru maig maramigwan martrai Tius pasrigu kaigwane marmub, tabigwane marøb indamigwan nebua asha.

23 Inchendø nai asru tasiimera, srøbmera øyeeg chine pønrrabigu øyeegwan martrai inchibig katøgan nuin kui nainug kaig maringarub pasrabig kuin kui ashar, tru nai turtrawa isuigu maringarub pasrabig tabig karuigwane marmønrraingøba inchib pasrabiiba kwayab, tru nai asru chine pønrrabigu kaig maringarub pasrabig, truiig køn, tru nan iløsrka meganrrai nø merrar-rawa srua ibig.

24 ¡Karrengucha kuita kan na waachawane! ¿I tru kaig maringarub pasrabig kwamigumay srua ibigugurrimbe nane mu wesranrrerah?

25 ¡Pøs Tiuswan mayanguen ungwa, ungwa char, namui Señor Jesu-cristogurri nan wesranrrab kui! Inchawei natøweinguen nai turyu isuitøgabe

Tius martrai karua pasrigu isub megainabendø, tru na trendø kaig kuinaitøgabe kaig martrai karua pasrigu marøb megainatan.

8

Tiuswei Espiritu maig kønrrain køben amøñibeløbe yandø tabigu webamba pønrran.

¹ Inchawei mømibe Cristo Jesúsba kanbalatø pønrrabelaimbe møra melønrrai maramibe yandø chigaagøn.

² Kaguende Espiritu tru martrai karua pasrig øsig kømig Cristo Jesúsweinug pasrabiibe, tru kaig marøbig kønrrai indamba, kwamig kønrrai indamba tru martrai karua pasrig treeg inçhibigugurri nane wesruig køn.

³ Kaguende tru maig maramigwan martrai Moisés pøriibe truburab martrab kaimaigwan Tiusbe marig køn, pøs tru pøriibe yandø truburab martrabgaig køben, tru namui trendø kaig kuinaigu truikkurri. Inchen Tiusbe nui trag Nusrkai managuen kaig marmigwan kan kaig marøb møg kui lataig, kaig mariilaimburø kwanrrai øra, øyamay tru kaig marøb kømig namuinug maringarub pasrabigwane chinchaingaig kørrømara pasran,

⁴ Tru maig maramigwan martrai pørigu sølgandø maig marøb kømigwan karuilø namuinug marig kørrømisrtrai, tru namui trendø kaig kuinaigu marøb amønainug kømøtø, tru Espiritu Santo maig kønrrain køben marøb amøñibelainug.

⁵ Tru trendø kaig kuinaigu treegwan marøb amøñibeløbe, ka truburabig-wandø isuben, trune tru Espiritu Santo maig amøñinrrai inchen treegwan marøb amøñibeløbe, Espiritu Santoimburabigwan isubelø køn.

⁶ Inchen tru trendø kaig kuinaigu isub pasraibe Tiuswan tarømisra, kwaig lataig pasraig, treeg køben, trune Espiritu Santo maig kønrrain køben treegwan isub pasraibe srøig øsig kømiba, Tiusba chi isumgaig tab kømiba, treeg køn.

⁷ Pøs tru trendø kaig kuinaigu treeg isub tøgø pasraibe Tiuswan tsalø isub pasran, kaguende Tiuswei tru maig maramigwan martrai karulan møra martrab inçhimøwei, katø truilan martrab kaimabwei indig kua.

⁸ Incha tru trendø kaig kuinaigu isubig maig karuben treegwan møra marøb amøñibeløbe, Tiuswane tab kui wanrrai martrab kaiman.

⁹ Inchen ñimbe tru ñimui trendø kaig kuinaigu isubig maig karuben treegwan møra marøb amøñibelø kømøtø, Espiritu Santo maig amøñinrrain karuben treeg amøñibelø køn. Treetøgucha Tiuswei Espiritu ñimuinug pasrøbene kønrrun. Pøs møikkøben Cristoi Espiritun chigaibe, Cristoin kømøn.

¹⁰ Inçhendø Cristo ñimuinug pasraikkurrimbe asrbe kaig mariiløgurri kwamig kuindøgucha, Tius nøba ñimun kaig marmeelø lataig tabig kørrømara pønrraikkurri, ñimui espiritube øsig pasran.

¹¹ Inchen Tiuswei Espiritu Jesúswan kwaitai utugurri katøle øsiirangarubig ñimuinug pasrøbene, Criston kwaitai utugurri tru katøle kusrubiibe ñimui ka pinørrab asrmerangucha tru nui Espiritu Santo ñimuinug pasrabiitøgø øsig kømigwan tranrrun.

¹² Inchawei, nai nunelø, nambe uløbe pønrrøbendø, tru trendø kaig kuinaigu tru kaig maramigwan uløgucha pønrrømer, truig maig marøg kuinchen marøb pønrrønrrab,

¹³ Kaguende tru trendø kaig kuinaigu isubig maig karuben treegwan marøb amønabe, ñimbe kwanrrun Tius malø asamikkaig. Inçhendø tru ñim asru kaig marøb tøgø pønrraigwan Espiritu Santotøgø kwai lataig kønrrai kørrømarabe, ñimbe managatig Tiusba øsig kønrrun.

14 *Mayeeløba* Tiuswei Espiritu maig amøñinrain køben truwan ambubeløbe Tiuswei ureemera køn.

15 Pøs ñim Espiritu Santon utiibe ke larrø kwaarøsrø srua kuilø lataig kørig kuindø katøle treeg melønrrai marøbigwan uta pønrrømøtø, kan trag ureemera lataig kønrrai marøb Espiritu Santon utig køn. Incha nambe nøgurri Tiuswan: “Abba, nai Møskain” chib wamabelø ker.

16 Inchen tru Espiritu Santotøwei namui espiritune eshkabig køn, nambe Tiuswei ureemera kui.

17 Trube, nam nui ureemera kuig køppe, nø keta tranamig tøgagúigwangucha utønrrabelø ker, Tius tru keta tranamigwan nam utønrrabelø køb, katø Cristo utigwan namgucha kanguelarrøtø utønrrabelø købgue. Pøs ka yandø kømø, cierton nun chine nebuinab megaigwan namgucha chine puraambub meløwabe køn, nøba kanbalatø tørguegwalmabiisø purramig kønrraimbe.

Tru purø tabig wendøsrø attrabig

18 Pøs mõin kwaløm nam chine kaig nebuinab melaibe tru tørguegwalmabig namun kenamarig kønrrabiibabe, ni kan ‘øyeeg køn’ cha waminchibguen wamindamgaig purø nuig køn.

19 Tius chigurrimbunø mara pønrrailøbe truba truba ashig kui muniirab køn Tiuswei ureemera tørguegwalmabelø kenamisramigwan.

20 Kaguende tru chigurrimbunø mara pønrrailøbe øyeeg mumayguen tab pumuig pønrramig kønrrain kuig køn, nõm treeg pønrrønrrab indikkur-rin kømøtø, Tius nø trendø treeg kønrrai marikkurri. Inchendø treetø kørrømisrtrain kømøtø muniiramigwan tøgag marig kua,

21 tru chigurrimbunø mara pønrrailøtøweinguen minchib trerab inrrai marigugurri mas treramønrrai wesrailø kønrrun, tru Tiuswei ureemera purø nuig purø tabigu webamba pønrraigu truiløgucha pønrrailø kønrrab.

22 Pøs tru chigurrimbunø mara pønrrailøbe mõin kwalømgatig kan ishu-umisag unø tammistrab truba truba mullib pusrkwai inchib lataig indi aser.

23 Pøs tru treeg tab kømui pønrrappe, tru chigurrimbunø mara pønrrailø truiløtø kømøtø, Espiritu Santon namun pølbasa tranigwan uta tøgarmøra namdøweinguen namui umbu truba truba mullib pusrkwai inchib lataitøweim pønrrer, Tius tru namun nui trag ureg lataig mariilø kømigwan truba truba muniirab, tru namui pirau asrmeran kaigyugurri wesruilø kømigwan.

24 Kaguende treeg kønrraitamab isua muniirab melaigu kaigyugurri wes-railø pønrrer. Pøs tru nam muniirab melaigwan nam chab ashaguen pønrraimbe, trube, tru muniirab melamigwane chinchab muniiramubsruin-run. ¿Kaguen yandø chab ashaguen pønrraigwane chiwan muniiraiasamørra?

25 Inchen nam chi nebua asiimligwan ke tøgagønrrurmab isua muniirab meløwabe, munig melabiitø munig meler.

26 Katø treetøwei Espiritu Santobe namui kullag kuigu purugubig køn. Pøs nambe Tiusba wamindigu chi wamindam kuinguen mõrmuben, Espiritube namuimburo nø purøbasramisra miappe, wamdøgabe ni mandø chibguen miamgailan truba truba nu israb miabig køn.

27 Inchen Tius namui manrrømeran maig køtashchab umbusrøngue tab ashibiibe, Espiritu Santo nø maig isua pasraigwan ashibig køn. Kaguende Espiritube Tius maig kønrrain køben, trumay Tiuswei misaamerai purøwaminchib miabig køn.

Tius namun kaigyugurri wesranrrab øyeeg marig

28 Tiuswan undaguelaimbe chitøgucha pub arrubiibe tabguen kønrrai Tiusbe treeg marøbig kui nambe ashibelø ker, tru nø martrab isua tøgagúig truig maig køben trumay treeg wamiilaimbe.

29 Tius tru manasrøwei nø asilane manasrøwei kanmaytø lawa wesrabgucha wesraig kuig køn, nui Nusrkai maig køben, treeløtøwei misrtrai, Nusrkaimbe truba nõrrø nunelø mayelai utu nõmerrig kønrrai.

30 Incha tru manasrøwei kanmaytø treelø kønrrai lawa wesrailane katø nõbe nui misaamera misrtrai wama, katø tru nø wamiilane chi kaig kømeeelø lataig tabig pønrrønrrai mara, tru treeg tabelø kønrrai kørømarilane nui torguegwalmabigugucha tøgatø pønrrønrrai marig køn.

31 ¿Trube, iibe øyeeg købene, nambe mandø chinrrab køh? Tiusbe namuingatø pasrøbene ¿namune mugøben sètøbasamisrøb kurringucha, chigúin kønrrautah?

32 Tiusbe nui trag Nusrkawanguen namun tranmønrrab inchimøtø, nam mayelayasig kwanrraima traniiibe, ¿chigurrimbunø tranamburab namun tranamigwangucha tranmønrraitarru, Nusrkaimba kegøtø?

33 ¿Tius nø lawa wesruilane mu kui 'øyeeg, øyeeg kaig marøbelø køn' chinrrautah? Pøs, chi kaig kømeeelø lataig tabig pønrsrøbiibe, Tius, nø køn.

34 Trube, ¿kaigyu pønrrønrrai, mu pønrsrønrraitama chindah? Pøs Cristo Jesúsbe mana treeg martrab kø. Kaguende nõbe kwawa, katø trutø kømøtø, nõbe katøle øsiirawa, Tiuswei kusrmaygatø wan, katø namuyasig purøwaminchib.

35 ¿Cristoi undag købigugurri namune mu kui tarømartrab kø? ¿Chine isui melamig pub arrubiiteh, kabe chigøben murig pui melamig arrubiiteh, kabe kaig indinab melamig arrubiiteh, kabe mamig kaagøbig parø arrubiiteh, kabe asru kemig chigucha kaagøb arrubiiteh, kabe chigøben kørig kømðiiig pub arrubiiteh, kabe kweecha petiilø kømig arrubiiteh?

36 Pøs Tiuswei wamwan pøriguma trenchibig køn:

“Nambe ñigurri chu urastøgucha kwaitø, kwaitø meler cha.

Namune ubishameran kweetsamsrømay srua ambamig kui lataig mara tøgagúilø ker” cha.

37 Inchendø chigurrimbunø øyeeg pub arrubigu chinchangaig kanawa webamba pønrrer, tru namun undaarabikkurri.

38 Pøs Tiuswei undag købigwane ni chigucha tarømartrab kaimanrrab kui nabe asha pasrar, kwamig lata, øsig kømig lata, ángelesmera lata, nõm asha karub pønrrabelø lata, møin kwalømig lata, katø wendø attrabig lata, katø maramburab marøb pønrrabelø lata,

39 purø palasriig lata, purø umbusriig lata, chigurrimbunø Tius mara pønrsrailøyu købeløbe møikkucha namune chinchagucha tarømartrab kaimanrrun tru Tiuswei undag købig namui Señor Cristo Jesúsweinug pasrabigugurrimbe.

9

Tius Israelwan lawa wesraig

1 Na Cristoinug pasrawa cierton waminchar. Nabe isa waminchimur. Tru nai isub kebachib pasrabiibe Espíritu Santogurri isa kømø, treegwein kui eshkatan,

2 tru nai manrraube truba nu isui pasrab chu uraskucha nabe pusrkwai isuin pasrabig kui.

³ Pøs nai misag israelitasmera, nai nunelø nammisamera, nøm Criston yeeg kaashene, nøm kaigyurri webamrrai nane Cristoinukkurri tarømisra, Tius trømbøig nebunrrai pasrigu naasiitøweinguen truyu pasrønrrab indamdiig kuimbe, treeg maramdiig køtan.

⁴ Truiløbe Israelweinukkurri amrrub misamera, nømbe Tiuswei trag ureemera kønrrai kørrømarilø, Tius nui tørguegwalmabigwan kenamarig lata, Tius nømbe tru acuerdomera mara kørrømisriilø lata, tru maig maramigwan martrai Moisés pørigwan utig lata, Tiusweiwan marøb tulundzuni yau nun mandø tabig marøb kømigwan eshkaig lata, katø Tius tranrrab kørrømisriilan tranamig lata nømunwei tranilø køn nømbe.

⁵ Tru merrabsrø kølli misamera nørreeløbe nømuin køben, katø Cristo møg lataig misra arriibe tru misaamerayurri arrig køben, Cristobe, nø Tius chigurrimbunø købigweim pala pasrabig, jmanagurri managatig mayanguen tab indig køn! Treeg kønrrun.

⁶ Pøs Tiuswei wambe treeg kønrrabigwan martrab kaimaig kømøtø køn. Kaguen Israelweinukkurri amrrub misaamerabe mayambagucha nømbe Tiuswei misaasunelø kømøn.

⁷ Maya Abrahamweinukkurri amrrub misamera kuagucha, mayambagucha nui ureemera kømøn. Treeg kømøtø, Tiusbe Abrahamwan trendaig køn: “Nuiukkurri karrab misamerai utu Isaackurri larrøbichib ambubelandø Abrahamweinukkurri amrrub misamera cha, wamiilø kønrrun” cha.

⁸ Pøs øyeege chippe, tru Abrahamwei misagurri amrruitøgatø Tiuswei ureg kønrrab kømøtø, Tius tru tranrrab kørrømisrii unø Isaackurri larrøbichib amrrub ureemerabeguende Abrahamweinukkurri amrrub misamera kui asilø køn.

⁹ Kaguende Tius tru tranrrab kørrømisriibe Abramwan øyeege taig kuig køn: “Øyan kwalømmerawan na arruben, Sarabe kan nusrkai tøgagønrrun” cha.

¹⁰ Katø treetø kømøtø, Rebeca ureg tøgagüiløma kan møskaindø tøgarmera købig køn, tru merrabsrø namui møskai Isaacwei.

¹¹ Inchawei tru pa ureemera tru urastø parchig kal-lanrrabelø kal-lamøwatø, tru ureezheelø tabig marig kawei, kaig marig kawein købenbatøwei, Tius nø tru martrab isua tøgagüig pasramistraimbe nø lawa wesruigu, trumay kønrrai indig køn,

¹² kabe chigøben tabig maragurrin kømøtø, Tius tru lawa wesrua wamikkurrin kønrrai. Pøs Tiusbe Rebecane trendaig købig køn: “Tru srøsrø kal-labiibe wendau kal-labigweyasig karuig marøb meganrrabig køn” cha.

¹³ Tru Tiuswei wamwam pørigu maig taimbala: “Jacobwane nabe un-daarappe, Esaúwane tsalø indig købig køn” taig.

¹⁴ Trube, treeg købene, ¿mandø chinrrab? ¿Tiusbe sølgandø tabig marmüig køn, chinrrab kø chindah? ¡Kah! mumaygucha chi treeg kømøn.

¹⁵ Kaguen Tiusbe Moiséswane trendaig købig køn:

“Nan mun lastima ashig køben,
 truigwan lastima ashib,
 nan mun tab inchig køben,
 truigwan tab indamønrrun” cha.

¹⁶ Inchawei treeg købene, Tius tru lawa wesruig kømibe møg nø treeg kønrrab isuigu kømøwei, kabe møg nuinetø treegwan nebunrrab inchib megawa kømøwein køn. Treeg kømøtø, Tius lastima asiitøgatø køn.

¹⁷ Pøs Tiuswei wamwan pørigube Faraónwanma Tiusbe trenchibig køn: “Øyeege martrab ñune rey kønrrai kusraig køn cha, ñi øyeege inchib pasraigu tru nai

maramburab mariilan kenamartrappa, katø nai munchiwan pirø muba kuimburab nan mu kui nebua asig kønrrai martrappa.”

¹⁸ Inchawei Tiusbe mun lastima ashig køben, truigwan lastima ashib; møigwei manrrøwan køben murig marøg købene, murig marøb inchibig køn.

Tiuswei lastima asiiba, nui namig købiiba

¹⁹ Pøs ñimui utu mõiibe nane trenchinraabe: “Trube, treeg købene, ¿katøgucha Tiusbe namune chindimbarre kailø køn tah? cha. Kaguende ¿nø martrab indigwane mu kui treeg marmønrrai indiasamørra?”

²⁰ ¿Ñi, møøbe, mu kurmagu? Tiuswan: “¿Øyeebe mumay margu?” chib wamincha mørtrappe. Kabe kan pirøgøtsøma tru marøbigwan øyeeg chinrautah: “¿Chindimba nan øyeeg margu?” cha.

²¹ ¿Chilliitøga chigøben marøbiima tru chilliitøgatøwei kan køtsøne tabigutø katørab srua kømig marøppe, katøgan køtsøne chiyugøben katørab srua kømig nun maig maramdiig køben treeg maramig kømuitarru?

²² Inchippa Tiusbe nui namig købigwanba, katø nui maramburab marigwanba kenamartrab inchib weig køppeendi, tru manasrøwei kaigu pønrrønrrab amrrai tamariilø nun yeeg namig kømdø misaameran yeeg tammay awentab.

²³ Pøs kabe Tiusbe nui tørguegwalmabigu chine nørro købigwan tru nø las-tima asilan kenamartrab indig køppeendi, manasrøwei nø tamariilan tru tørguegwalmabigweyasig.

²⁴ Inchen tru wamiiløbe namgucha ker. Pøs tru nam wamiiløbe, judíosmerai utugurrindø wamiilø kømøtø, judíos kømø misaamerai utugurringucha wamiilø ker.

²⁵ Katø Oseaswei pørigu Tiusbe trenchibig køn:

“Nai misag sətø kømeelan: ‘Nai misaamera køn’ tamønrrun cha.

Undaaraimig købigwan: ‘Undaraig’ cha, wamamønrrun cha.

²⁶ Katø tru: ‘Ñimbe nai misaamera kømøn’ chib pasrainuutøwei:

Ñimbe: ‘Øsig Wab Tiuswei nusrkalø køn’ chib, wamiilø kønrrun’ taig køn.

²⁷ Israelitasmeraimburab Isaíasbe trenchib trasaig købig køn:

“Israelweinukkurri amrrub misaamera nu køptø,

maryu kan pisrum lataig købendø,

nui misagugurri kan lamø kørrømisrøbiitø

kaigyugurri wesrailø kømigwan tøgagønrrun cha,

²⁸ kaguende Señorbe yu pirau øyeeg nebuløgucha warøbash cha,

nø trencha pasrigwane petø kanmaytø newanig martrun” chib.

²⁹ I wendaugwan trenchimøwatø, mas merrabsrøwei Isaíasbe nøtøwei trendaig købig køn:

“Señor, Mayeelaim Pala Pasrabig,

tru nam israelitasmeran srøig larrøbichib kurrønrrai kørrøarmuig kuimbe,

nambe Sodoma lataitøwei nebulø køb,

Gomorra lataitøwei kerriguwan pinisailø købsrubrainrrun” cha.

Judíosmeraba, Tiuswei tabig srø wamba

³⁰ ¿Øyeeg købene, trube, nambe mandø chinrrab køh? Judíos kømø misaamera tru chi kaig kømeelø lataig Tiusba tab pønrramigwan neburnrab chi tranrrømeeløguen treeg Tiusba tabig pønrramigwan nebuig køn, tru isubigwan Cristoinug pasra tøgagúikkurri.

³¹ Trune israelitasmera Tiusba tab pønrramigwan nebunrrab maig maramigwan martrai pørigu maig taigwan tru kuindø martrab tranrrabeløguen, tru truigwane chinchu nebua tøgagønrrab kaimaig købig køn.

³² ¿Chindimba? Kaguende tru isubigwan Tiusweinug pasra tøgagúigu lamøtø, chigøben tabig mariitøga nebunrrab inchibelø køn. Incha tru “srur-rengwam srgu” srur-rengwaig købig køn. Tru sruube Cristo nøm kaasig, truig køn.

³³ Pøs Tiuswei wamwan pørigube øyah chibig køn:

“¡Au! Nabe tru Jerusalén Sionsrø kan srug srur-rengwangerubig trar-ramønrrun cha,

kan srug tru misagwan kørrøsrkønrrabig.

Inchen nun kørebiibe chi køriimisa kørrøsmisrønrrun” cha.

10

¹ Nai nunelø, na nai manrrau truba isuiba, nai Tiuswan na truba miab wamindiibe israelitasmera kaigyurri wesrailø kønrraimab isua inchar.

² Pøs nabe nømuimburappe, ‘treeg køn’ cha, tømardø wamindamønrrun. Nømbe Tiusweiwane truba truba marøb meløbendø, Tius nø maig martrain kuigwane chigúi møra marøb pønrrømøn.

³ Pøs misamera mandø incha Tiusba tab pønrramig Tius nø mara pas-rigwane israelitasmerabe ashmeelø misra, tru Tiusba tab pønrramigwane nøm marøb tøgagúigu ke treeg nebunrrab inchibelø kuabe, tru chi kaig kømeeelø lataig tabig pønrramig Tiusweinukkurri arrubig maig køben, treeg møra martrab inchimeelø købig køn.

⁴ Kaguende tru maig maramigwan martrai pørigwan øyangatiitø kønrrai mara pasrøbiibe, Cristo, nø køn, mutøgucha isubigwan nuinug pasrøbigwane Tiusba tabig kørrømisra pønrramig kønrrai.

⁵ Tru chi kaig kømeeelø lataig Tiusba tab pønrramig maig maramigwan martrai pørig maig taigu kømigwane Moisésbe øyeeg cha pørig køn: “Møikkøben øyeeg karua pønrrailan marabeguende, truikkurri øsig uñchun” cha.

⁶ Trune tru isubigwan Tiusweinug pasra tøgagúikkurri Tiusba tab kørrømisra pønrramigwan waminchibiibe Tiuswei wamwan pørigu øyeeg chibig køn: “Ñui manrraube øyeeg cha, mørmøta cha: ‘¿Srømbalsrømaybe mu nebinrrerah?’ cha, Criston kørratrain inchib lataig.

⁷ Kabe: ‘¿Tru purø umbusrø mu kørrainrrerah?’ cha, tru kwabelø pønrraisrø truilai utugurri Criston nebatrain inchib lataig.”

⁸ Treeg chib kunriibe, trube, ¿Tiuswei wamwan pøriibe mandø chibig køh?: “Tiuswei wambe ñuim pulu, ñui trigu, ñui manrrau pasran” tan, tru isubig-wan Cristoinug pasra tøgagøm wam, i tru nam øyeeg eshkab kusrenanig:

⁹ Ñi ñui triitøga: “Jesúsbe Mayeelaim Pala Nø Karub Pasrabig køn” chib, katø Tiusbe Cristone kwailai utugurri kusraig købig kuin kui ñui manrrau køreb inchabe, ñibe kaigyurri wesraig kønrrabguen cha.

¹⁰ Kaguende tru chi kaig kømíig lataig tabig kørrømarig kømigwan nebua tøgagømibe, manrrau køreitøga køben, katø kaigyurri wesraig kømigwan nebua tøgagømibe, triitøga: “Jesúsbe Mayeelaim Pala Nø Karub Pasrabig køn” taigu køn.

¹¹ Pøs Tiuswei wamwan pøriguma trenchibig køn: “Mutøgucha Tiuswan kørebeløbe chi kørig misra kørrøsmisrønrrun” cha.

¹² Kaguende judíosmera lata, judíos komeelø lata, møitøgucha chi peg kørnab kòmøtø, treetø køn. Pøs tru Señortøwei mayeelaim pala nø ashib karub pasrabig kua, mayeelø nun wamab waminchibelane truba truba tab inchibig køn.

¹³ Kaguende: “Mutøgucha Señorwei munchiwan wamabiibe kaigyugurri wesraig kørnrun” chibig køn, Tiuswei wambe.

¹⁴ ¿Inchendø nømbe mandø chib wamiasamø nun koremubendøbe? ¿Katø tru nuimburabigwan wamindi møra kømøwabe, korebgucha mandø incha koreasamø? ¿Katø nuimburabigwan mu eshkaab kusrenanmubene, mørøbgucha chinha møriasamø?

¹⁵ ¿Katø tru Tiuswei wamwan eshkaab kusrenanrrai nømun mu karua ørmubendøbe, nømbe mandø incha eshkaab kusrenaniasamørra? Øyeeg pørig pasraimbala: “Tabig srøigwan wammørøskønrrab srua amrrubelaimbe yeekkucha kasrag kømndiig køn” taig.

¹⁶ Inchendø tru tabig srø wamwanma israelitasmera mayeeløbabe møra marmuig køn. Kaguende Isaíasbe trendaig køn: “Señor, ¿nam waminchib eshkaigwanma mu kørøig kuitarru?” cha.

¹⁷ Inchawei isubigwan Cristoinug pasra tøgagømibe wamwan wamindi mørikkurrin køben, tru wamwan wamindi møriibe Cristoimburabigwan eshkaab kusrenanikkurrin køn.

¹⁸ Inchendø nabe payrrab: Trube ¿nømbe mørmuig kørnab kø chindah? cha. ¿Nømbe mørøbwei indig køn! Pøs Tiuswei wamwan pøriguma trenchibig køn:

“Tiuswei wamwan eshkaab kusrenanøbelai wambe pirau truørø wamindi mørig køben,

katø nømui wamindiiløbe yu pirau maya yabsrøngatikken puig køn” cha.

¹⁹ Pøs nabe katøyg payrrab: ¿Trube, israelitasmerabe chi purainrrab kui mørmuig kørnab kø chindah? cha. Tiusbe Moiséswanmerrig trendingaruig køn tru israelitasmeran:

“Israelitasmera, nai misag sötø komeeløtøga ñim namig ashib kørnrai marøb, chugúinguen mørmø misag sötømeratøga ñim namig kui inchib kørnrai indamønrrun” cha.

²⁰ Katø Isaías kucha tsakkandø kelarrab trendaig køn:

“Nan Tiuswan lameelø israelitasmera komeeløguen nan wetørraben, truilø nan paymeelanguen nabe kenamisrig køn” cha.

²¹ Inchen israelitasmeraimburappe Tiusbe trendaig køn:

“Nabe nømun utønrrab nai kwalmeran chu urastøgucha nabe larrøbicha pasraig køn cha, yeeg mørmø misaamera, trurrigu nøm maig isuigwandø martrab inchibelan.”

11

Israelwei misagugurri unchibelan Tius nørø lawa wesruilø

¹ Trube, treeg købene, nabe payrrab: Pøs, ¿Tiusbe nui misag sötømera israelitasmeran kaasig kørnab kø chindah? ¡Kah! mumaygucha chi treeg kømøn. Kaguende nama natøweinguen israelita tru Abrahamwei misagugurri arrubig, Benjaminwei misag karrabigugurri arrubig kur.

² Tiusbe israelitasmera nui misaameran kanmaytø manasrøwei tru nø asha tøgagúilane chi kashmuig købig køn. ¿Ashmeelø kőtirru? Pøs Tiuswei wamwan pørigu nø maig karuigwan eshkaabig tru Elíasweimburab waminchibigu, Elías Tiusba waminchib israelitasmeran ‘øyeelø køn’ chib, mandøtø taigwan:

3 “Señor, ñi maig karuigwan eshkabelan kweetsamba, ñui altarmeran pøtiitsamba inchen, nabe natøzhiitø øsig kørømisra pasrøben, nangucha kwetchab inchib køtan” chib, trendaigwan.

4 Inchen ¿Tiusbe nune mandø cha løtig køh?: “Tru taska marig tius Baalwei merrab tømbønsrømø møguelø siete mil nayasig tarømarar” cha, trencha løtig køn.

5 Pøs treetøwei møin kwalømgucha israelitasmera kan tøbø uncha kørømisrøbelø køn, Tius ka yandø tab indiitøgatø lawa wesruilø.

6 Trube, tru lawa wesruilø kømibe ka yandø tab indiitøga kuig købene, yandø chigøben tabig mariiløtøga kømøtø køn. Pøs trumay kuig kuimbe, tru ka yandø tab indiibe, trube, chi tab indig kømubsruinrrun.

7 ¿Trube, treebe mandø kerah? Tru israelitasmera unchibelø Tius tru lawa wesruiløbeguende Tiusba tab pønrramigwan nebua tøgagøben, trune tru lawa wesruimeelø Tiusba tab pønrramigwan ke chinsraatø inchib lab melaigwan nømbe nebumuig køn, nømui manrrømerabe larrø murelø misriilø kua.

8 Tiuswei wamwan pørigu tru nø lawa wesruimeelaimburab maig taimbala:

“Nømui isubig tøgagúigube chigucha isumeelø nasrkwailø,
 kabmerabe chi ashmeelø latailø,
 kalumeragucha mørmø kalumera kønrrai
 møin kwalømgatig Tius treeg mariilø køn” cha.

9 Incha Davidbe nømuimburaptøwei trendaig købig køn:

“Nøm tulundzuna kasrag warønrrab
 mab, muchib waraibe

nømm truyutøwei ka iløsrka melamibah,

kegørra waramibah, treegu srurrengwamibah,

øyege marøb kuimburø møra melamigweyasiibatø misrbash cha.

10 Nømui kabmerabe ashmønrrai løstørailø kørømisren,
 nømui lliibe chu urastøgucha kurraashibguen

kurrashmeelø murigu marøb melamig nebuilø købash” cha.

Judíos kømø misaamera kaigyurri webambub

11 Trube, treeg købene, nabe payrrab inchar: ¿Judíosmera treeg srurrengwawa kørøppe, katølebe managuen kurrønrrabikkaig kørørig kø chindah? cha. ¡Kah! mumaygucha chi treeg kønrraamøn. Tru Tius karua pasrigwan nøm kalø marøb itøbunab kuibe judíos kømø misaamera kaigyurri wesrailø kømigweyasig arrin køn, judíosmera nømguen pusrkwai ashib kømig kønrrai.

12 Inchen judíosmera kalø marøb itøbunab kuibe yu pirau katøgan misaamera Tiusweimburabigwan nørrø tøgagømigweyasig køben, katø judíosmera nøm ke ka kømønrraindøzhhig tøga pønrraibe judíos kømø misaamerayasiibe tru Tiusweimburab purø tabigwan nørrø tøgagømig kønrrai marøb inchene, ¡mas maig tabig kønrrerah tru judíosmera maig pønrramigu nøm newan pønrramisren, truyugurri arrubiibe!

13 Nabe møimbe ñim judíos kømø misaameran waminchar. Pøs judíos kømø misaamerai Cristo nøashib nan karua ørig kuikkurri, tru na marøb tøgagúigwane truba tabig kui asha tøga pasrar.

14 Pøs nabe nai misag judíosmeran pusrkwai ashib kønrrai mumay køben kiagasrønarrab isua inchar, truilø møiløgøben kaigyurri wesrailø kønrrai.

15 Inchen judíosmeran Tius kaashen, yu pirau tru katøgan misaamera nø Tiusba tabig kørømisra pønrramima kuibe, trube, judíosmeran Tius yandø utøbene, ¡ke kwailø latailø kuig, katøle øsiiraig latailø kønrrun!

16 Pøs tru harina masaigugurrima piti lurra, truigwanmerrig pirri mara, Tiusweindø kørnrai tranene, tru masaibe kerriguba Tiusweindø kørromisran. Inchen katø tru srølwanma Tiusweindø tarømarig kuig købene, srarmergucha nuindø tarømariiløtøwein køn.

17 Pøs tru israelitasmera lawa wesruimeeløbe tab olivo tusryu srarmera latalilø kua kegølsrailø latalilø køben, trune ñibe, judío kømíig, kan kau umbu olivo, nøtø peña kal-lab tusryu srar-unø lataigwan, tru tab olivo tusryu kal-lanrrai kemesra pasren, ñibe tru ellmarig tab olivo srølyu tab piwan mõimbe tøgatø utab pasran.

18 Inchendø tru olivo tusryu trendø truyu srarmerane ñibe purab tabig kurbab ka isaba inchimøta. Inchen ñi treeg ka isaba inchib pasrøwabe, trube, srølwan øsig kømigwan ñi tranøb pasrømøtø, øsig kømigwane srølguen ñun tranøb pasrain kui isuagu.

19 Pøs ñibe inchippa trendaisruandøbe trenchinrrun: “Tru olivoyu mõ srarmerane kegølsrailø kuig køn cha, truyu nan kemendøsrka kal-lannrrab.”

20 Pøs treebe treegwein køn. Judíosmerabe chigucha chi kørnrrab inchimuben, treekkurri kegølsrailø købwei indig køn. Inchen ñibe isubigwan Cristoinug pasra tøgagúikkurri truyu pasran. Pøs inchawei purø nuig kømmørø inchib pasrømøtø, ñibe køriibala isuatø pasrau.

21 Kaguende Tiusbe tru srarmeran trendø truyuelanguen ka pønrrøbasmøtø, para petiibe, ñungucha ka pasrøbasmøtø, treetøwei para kutchun.

22 Pøs isua ash, Tius nø yeeg tammayig kuigwanba, nø chi chippe, kandø wamabig kuigwanba, tru kørra pønrrabelaimbe nøbe kandø kandø wamabig købendø, trune ñune tammay indan. Inchendøgucha tru nø tammay indigu ñi truyu pasrabig pasrøbene kørnrrun. Treeg kømuisruandøbe, ñigucha kegølsraig kørnrrabguen.

23 Inchen judíosmera nøm køremø, treetø melønrrab inchimøtø, nøm kørebene, katøle tru olivoyutøwei nuranrrai kemesra pønrsrailø kørnrrun. Kaguende Tiusbe maramburab marøbig køn, katøle kemesra pønrsramig.

24 Pøs ñi, judío kømíig, tru ñi kau umbu ka trendø nøtø peña kal-lab olivo lataigwan para, mana treeg mariimíigwan tru ellmari tab olivo tusryu nuranrrai truigwanma kemesra pasriibe, kan mas tru ellmari tab olivo tusryu srarmera kegølsrailø købelane katøle tru tusryutøwei nørørranrrai kemesrailø kømønrraitarru, tru judíosmeran.

Israel misagweyasig Tius maig martrab isua tøgagúig

25 Nai nunelø, israelitasmera kømeele, Tiuswei tru mu asiimíig pasrabigwan tab chigúí møra kørnrai inchar, ñim ñimuinetø purø nørreelø misrøb pønrrømønrrai. Israelitasmerabe ke mayambagucha kømø, kan tøbøtø nømui manrrømeran mur marøb pønrraigu kegørra pønrrappe, tru judíos kømø misaamera kaigyugurri webamrrabelø mayeeløba kaigyugurri webambamnegatiitø køn.

26 Inchen øyeeg nebubene, israelitasmerabe mayamba kaigyugurri wesrailø kørnrrun, Tiuswei wamwan pørigu maig taimbala:

“Tru Kaigyugurri Wesrawa Pønrsønrrabiibe Jerusalén Sion Tunsrøngurri ar-
rua,

Jacobweinukkurri amrrub misaamerane nømui kaigwan kerranrrun
cha.

27 Inchen tru kaig marigwan na kerrabene,
tru nomba na acuerdo marig, truig kørnrrun” cha.

28 Pøs judíosmerabe Cristoi tabig srø wamwan kaasikkurri, truburappe Tiusbe tsalø indiiløwein købig køn, tru ñim judíos kømeealimburab tabguen kønrrai. Inchendø nømun Tius lawa wesruikkurri, truburappe tru nømui merrabrsø Tiuswan mørøbelø kølli misaameragurri nømbe Tius undaarilø køn.

29 Pøs Tiusbe nø keta tranilane katø kerranrrab kømøwei, katø nø wamigwane wamømuig kui lataig martrabgucha kømøwein køn.

30 Inchen ñim judíos kømeeøgucha treetøwei merrabwansrømbe Tiuswan larrø mørmeelø købig kuig, mømibe Tiuswei lastima asigwan nebua tøgagøø, judíosmera mørmeelø kuikkurri.

31 Inchen tru ñim judíos kømeealan Tius lastima asigwan ñimun tranikkurri nøm judíosmeragucha mõi yambe nømbe larrø mørmeelø misrin køn, nømgucha Tiuswei lastima asigwan nebua utamig kønrrai.

32 Pøs Tiusbe maya misaameran larrø mørmeelø misra melamigu mu-maygucha wegønønrraingaig pønrrailø pønrran, tru maya misaameran nø lastima asha tøgagøørrab.

33 ¡Tiuswei kusremburab kusrebig kuiba,
kusrebig kua nebumburab nebua asiløbabe
purø nørriig muguen nebua isumgailø køn!

¡Nø maramig tøgagúilane ni mandøguen 'øyeeg køn' tamgailø,
nø mandø martrab isuiløbe maig kermab nebua isumgailø, treelø køn!

34 Tiuswei wamwan pørigube trenchibig køn:

“¿Señor isua tøgagúilane mu nebua asitarru cha?

¿Kabe Señorwane 'ñi øyamay marambala'
chinrrabig mu købig kuig kø chindah cha?

35 ¿Kabe Tiuswanmerrig mugøben chi tranig kø chindah cha,
truburø katøle Tius nun tranrrai?”

36 Kaguende chitøgucha købiibe Tiusweinukkurri arrubig køb,
katø nøgurrim pønrrab, katø nuyasig køn.

Tiuswane managatig tørguegwalmabig kønrrun.

Treeg kønrrun.

12

Tius tab kui wanrrai nam tabig amønaig

1 Inchawei nai nunelø, Tiuswei lastima asiitøga nabe ñimun tiusmanda trenchinrrab inchar, ñim mõitøgucha ñimui asrmeran kan øsiguig keta tranøb lataig Tiuswan keta tranay cha, Tiusweindø kønrrai tarømarig, nuin kabyu truba tab kui asig, treekke. Iig køn, tru ñim øsig amønaigu Tiusweimburab køriibala tabig maramibe.

2 Møin kwaløm pirau maig pub arrubigu ñimgucha trumay ambub pønrrønrrab kømøtø pønrray. Treeg kømøtø, Cristogurri ñimui srøig peemay isuitøga ñimui amønarnamigwan yunømariilø kuy. Treeg marabe, Tiuswei isuigube ñim maramig nø mõigwan maramig palaiwein kui ñimbe nebua ashchabguen, tru purø tabigwanba, nuinug truba tab kui asigwanba, newan tabigwanba.

3 Tius nui ka yandø tab indigwan nan traniiitøga nabe ñim mayealan trendamønrrun: Møitøgucha ñim mayangatig kuigugurrimbe mas nuig kurmb inçhib pasrønrrab kømø cha. Masken treeg kømøtø, tab isua pasramig køn cha, Tius mõigwandøgucha pirisha ketig, tru isubigwan Cristoinug maya pasra tøgagúi maig køben, treetøh kuy cha.

4 Pøs nambe mōitōgucha asrbe kandø købendø, namui asrube chine pønrran. Inchendø truiløbe chi maramigwan mayambabe truigwandøwei marøbelø kømøn.

5 Øyeetøwei namgucha truba nu købendø, Cristoinuube nambe kan asrtø misra, nambe mayeeløba nøørø kønrrab kømøtø, kangurrin kangurri kanbalatø misra pønrrer.

6 Tiusbe namun chigøben peg peg marøbelø kønrrai keta tranøppe, nui ka yandø tab indig maig køben, treeg tranig køn. Pøs trube, Tius maig eshkan-garuigwan wamindamigwan ketig uta tōgaibe nui isubigwan Cristoinug maya pasra tōgagūig maig køben, treetø waminchi.

7 Katōganelan purugub megamigwan ketig uta tōgaibe purugumigu purugu. Kusrenanøbig kømigwan ketig uta tōgaibe kusrenanamigwan kusrenan.

8 Katōganelan øyamay maramdiig køn chib waminchibig kømigwan uta tōgaibe, øyamay maramdiig køn chib waminchi. Chigøben palai melabelan tranøbiibe, merøbala kømø, treeg tranøb; chi maramigwan nø pera marøb pasramigwan uta tōgaibe, trunun martrab isua pera marøb; lastima ashibig kømigwan uta tōgaibe, larrø tab kui kasraatø marøb; treeg maramig køn.

Tiuswei ureemerabe øyamay marøb kømigwan waminchibig

9 Ñimui undag købiibe ka palatø kømø, cierton kømig køn. Kaig maramigwane trømbøig kui mørøb, tabig maramigwane si, merrarrawa maray.

10 Ñimbe kangurrin kangurri trag nunelø lataig undaarayay. Nayasig tab kønrrain kømø, katōganelayasig tab kønrrai, ñimbe treeg marøbelø kuy, ambugurri igurri maig købash kømø.

11 Ñui chi maramigwane marig kørømisrtrai marøb, pøilø kømumig køn, Señorweiwane martrurmba isua marøb.

12 Cristoba purø tabig tørbilabigu pønrramigwan ñim isua munig melaigu kasrag pønrrab, chigøben isumdiig murig pub arrubigu tammay melabig melab, Tiusba wamindamigwane elachimø, marøbig marøb inday.

13 Tiuswei misaameran chigøben palabig arrubigu purugub, mōiløgøben ñimui yau pubelane tabig wamab, treeg maramig køn ñimbe.

14 Ñimun kaig marøbelane 'chigøben trømbøig nebubash' chib, treeg inchimøtø; 'mayanguen tabig nebunrrun' chib, treeg indamig køn.

15 Kasraatø purrøbene, tru kasraatø purrabeløba lata kasraarab; kishib purrøbene, tru kishib purrabeløba lata kishib inday.

16 Ambugurri, igurri lata tabig lincha warab, truba nørreelø kømmørø inchimøtø, chigucha kømø misaazheeløba chi pesriig kui mørmø linchibelø kømig køn. Ñim ñimuinetø truba kusrebelø kermab isumøtay.

17 Ñimun mugøben kaig maren, truburø ñimgucha treetøwei marøb kønrrab kømøtø, ñimbe maya misaamerai merrab tabigwan marøbelø kønrrab inday.

18 Ñimuimburappe, ñimun mayangatig tabig waramdiig køben mu misaamerabatøgucha ambugurri, igurri tabig warønrrab inday.

19 Ñim, nai undarailø, kaig marimburø ñimashib treetøwei pagaranrrab inchimøtø, Tiuswei namig købigwan nømumim pala arrubasay. Kaguende Tiuswei wamyube øyeeg chibig pørig pasran: "Kaig marimburø pagaramibe nain køn cha. Truburøbe na asha maramig køn" cha, Señorbe trendan.

20 Masken treeg inchimøtø:

"Ñun ashig kømui inchibig chugurri mamig kaagúin købene, manrrai tranøb, pi mulgwai inchene, mutchai pi srørrøb indamig køn cha.

Treeg marabe, tru ñun kalø marimburø nune nuba kørriimarøb may parra kørromartrabguen” cha.

²¹ Tru chigurrimbunø kaibe ñun nø kananrrain kømøtø, tru chigurrimbunø kaigwane tabiitøga kanamig køn ñibe.

13

¹ Misagwan ashib karub purrønrrai purrønnilane nõm maig chiben mayeeløba truulan møramig køn. Kaguende ashib karub purrønrrai purrønniløbe Tiuskurrin kømibe purrømøn. Inchen treeg purrabeløbe nõ treeg kønrrai mariiløgurrin burran.

² Inchawei tru ashib karub purrabelan sətø pasramisrøb kurrabiibe Tius treeg kønrrai mara pasrigwan treeg kømønrrai sətø pasramisrøb kurrin. Inchen tru treeg marøb kurrabeløbe nõmuyasiitøwei tru møra pønrramig kønrrai marinab kømigwan lab pønrran.

³ Kaguende tru ashib karub purrabeløbe tru tabig marøbelan truba kwaarøsa tøgagønrrab purrømøtø, kaig marøbelane nõmbe treeg martrab purran. ¿Ashib karub wabigwan chi kørig isumø, ñune treeg uñig kətah? Pøs, trube, tabigwan mar, trumaybe nõ tabig wamindig kønrrabguen.

⁴ Kaguende tru ashib karub wabiibe Tiusweimburø mara tranøb wan, ñuimburab tab kønrrai. Inchendø ñi chigøben kalø marabe, trube, kørig tøgagu. Kaguende tru ashib karub wabiibe nui espadane kagatø tøgagømøn. Kaguende nõbe Tiusweimburø mara tranøb pasrappe, kalø marøbigwane Tius øyamay martrai palai waitøga møra melønrrai marøbig køn.

⁵ Inchawei tru ashib karub purrabelane nõm maig taigwan møramig køn, møra melønrrai mariilø kømigwan kørig isuatø kømøtø, namui isub kebachib pasrabigu chi isumig kaanrraingue.

⁶ Inchawei øyeekkurri ñimbe an pagaramigwan pagarabelø køn. Kaguende tru ashib karub purrabeløbe Tiusweimburø marøb purran, tru nõm mandø maramigwan çu urastøgucha trunun merrarrawa marøb.

⁷ Pøs mõnundøgucha ñim maig pagaramigwan trunun treeg pagaramig køn: chi tøgagüimburø chi pagaramigwane trunun pagarab; yanøb, penab indimburø pagaramigwane treeburø pagaramig køn. Inchen tab inchib tøgagømelane tab inchib; maig købash inchimumelane tab inday.

⁸ Mungucha chigøben ulø kømøtay. Kangurrin kangurri undaguelø kømigwan, truigwane ulø pønrramig køn. Kaguende mendaigwan undaaraabiibe tru maig maramigwan martrai Moisés pørig maig taigwan, trunun maran.

⁹ Kaguende tru maig maramigwan martrai pønrrailø, tru: “Itølulmøwei, kweecha petømøwei, nilømøwei, ñui marømmørø inchib chull ashmøwei indamig køn” chib, tru katøgan maramig karua pasrig chigucha, tru: “Ñui mendaigwan ñiasiitø lataitøwei undaaramig køn” cha, trencha karua pasrigu, truyutø chishtë tøgä trendain pasran.

¹⁰ Pøs tru undag købiibe mendaigwan chi kalø marmøn. Inchawei undag købiibe tru maig maramigwan martrai Moisés pørig maig taigwan treeg marig kørromisrtrai maran.

¹¹ Pøs ñimbe øyeegwane maramig køn, mõi yambe maig kwalømmerra kui ashabe. Pøs yandø ñim kiagasramig puin køn. Kaguende nam kaigyugurri wesrailø kømibe mõimbe katøguchinguen lutau pasran, tru nam Criston srøtø køreb uras lataguen kømø.

¹² Yandø yana yemguen purayain køben, Cristo arrumig tør-rram lutau lataig misrøb arrun. Chigøben kaig marig løstøuelane yandø elacha, tøryu

kwayab kewa pønrrailan kewa pønrrøgun, tru tabig sølgandø marig tøryu marøb pønrrailøtøga.

¹³ Nambe kan kwalømyu amøñib lataig maig amønamigwan sølwan amøñigun, mabgucha mamburab mab, mutsiirab, ishumburmeraba, møgueløba trømbøig marøb, chugatig trømbøig marøg køben treeg marøb, kwayam lab, pusrkwai ashib treeg marøb kømøtø.

¹⁴ Masken, Señor Jesucristo nø pinøbuliilø kønrrab inday, trendø kaig kuinaigu asr maig marøg kui inchen, treegwan martrab inchab kømøtø.

14

Cristoimburab nuneløbe kullaateelane isuptø maramig køn

¹ Møikkøben nui isubig Cristoinug pasra tøgagúigu newan kømíig kullaatiigwan utappe, nø chigøben øyamay kui tamab isua tøgagúigwane 'øyeeg, øyeeg køn' chib wam lamøtø, utamig køn.

² Pøs møibe chi mamigwandøgucha maben Tiusweimburappe chi kømíig kui treeg isubene, møibe nui isubigwan Cristoinug pasragúigu kullaatiibe ka mamizhiitø man, kaguende yau mabene, Tiuswein kabyube kalø kønrrai tamab isua.

³ Inchawei mõikkøben chi mamigwandøgucha lutøgurri mabiibe tru mø mamimerandø mabigwane kashmumig køn. Inchen tru mø mamimerandø mabiibe, trube, tru chi mamimerandøgucha lutøgurri mabigwane kalø køn chib chinetø cha mørmumig køn. Kaguende Tiusbe nune kashmø, utig køn.

⁴ Kan karuindiig megabig katøganuiwan ñi 'øyeeg, øyeeg køn' chinrrappe, ¿ñibe mu kurmagu? Pøs nø kebenin kui, kabe kebeñmuin kui tru nø karub pera wabig uyube nø ashchab kuinrrun. Inchen karuig megabig Señorweimbe kebeñmø pasrønrrun. Kaguende Señorbe maramburab marøbig køn nune mur pasrønrrai maramig.

⁵ Pøs møibe treeg isun, mø kwalømbe katøgan kwaløm lata kømø, mas tabig kuitamab. Inchen katøgane mø kwalømmeratøgucha treetø kuitamab treeg isun. Pøs øyeeg isuilan ñim mõitøgucha maig isua tøgagúigwane chigurri øyan købig kuin kui ashabe, trube, kanmaytø treeg isua kømig køn.

⁶ Inchen mõikkøben mø kwalømbe tabig kuitamab isubiibe tru kwalømwane Señorwan tab indig kønrrai isua maran. Inchen chi mamigwandøgucha mabiibe Señorwan tab indig kønrrai isua man. Kaguende Señorwan ungwa, ungwa tan. Inchen tru mø mamigwan mamíig, truikkucha Señorwan tab indig kønrrai isua trunun mamøwa, Señorwan ungwa, ungwatøwein tan.

⁷ Kaguende nambe mõitøgucha nayasiitøwei øsig uñmøwei, katø kwabgucha nayasiitøwein kwamøwei indan.

⁸ Pøs nambe øsig warappe, Señorweyasig øsig warab; kwamig nebubene, Señorweyasig kwamig kønrrun. Inchawei øsig waramig nebui lata, kwamig nebui lata, nambe Señorweyelø ker.

⁹ Kaguende Cristobe øyeeg kønrraiwei kwawa, katøle øsiiraig køn, kwabelai lata, øsiguelai lata mayeelaim pala nø Ashib Karub Pasrabig kønrrab.

¹⁰ Trube, treeg købene ¿ñibe ñui nunewane chindimbarre 'øyeeg, øyeeg marøbig køn' chigu? ¿Katø ñui nunewane chindimbarre kashku? Kaguende nambe mayeløba tru maig kønrrabigwan Tius nø asha marøb wainug kalamig kønrrab køn.

¹¹ Kaguende Tiuswei wamyube trenchibig pørig pasran: "Señorbe trendan cha: 'Na øsig wamma waibe,

treeṭōwei nai merrappe mayeelōba tōmbōnsrōben,

katō mui nilōtōgucha “Tiuswan tabig kōn’ chib, waminchun’ ” cha.

12 Inchawei nambe mōitōgucha naimburabigwan Tiuswan eshkamig nebunrrun.

13 Pōs treeg kōbene, nambe kangurrin kangurri mas ‘ōyeeg, ōyeeg kōn’ chimugun. Masken treeg kōmōtō, katōganelan ka srurrengwangerub, sōtōbasramisrōb nui nunewein kabyu kalō kui asigwane marmōnrrab isumig kōn.

14 Nabe Señor Jesúsweinuube kerrigu newan ōyeeg kuitamab isua pasrar, chi mamimeratōgucha ka yandōbe kaig kōmuin kui. Inchendō mōikkōben ‘i mamibe kaig kuitamab’ isubigweimbe, nuimbe kalōwein kōn.

15 Inchen ñi kan mamigwan maikkurrindō ñui nunewan ka isui uñchindō mariibe, yandō ñibe undag kōbiitōga marōb pasrōmōn. Ñui mamikkurrindō ñui nunewan kerriguwan mindisha kōrrōmarmōta, Cristo nuyasig kwaig kōbigwan.

16 Ōyeeg marigwan tru ñuimburappe sōl kui asha, ñi treeg tōgagūigwane katōganelōbe chine kaig wamincha mōrōb kōnrrain kōmōtō kuy, tru ñi ōyeeg mariitōgatō.

17 Kaguende Tius nō ashib karub waibe mamimeragurri chi asamig kōnrrab kōmōwei, mutsiilōgurri chi asamig kōnrrab kōmōwein kōn. Treeg kōmōtō, Tius tru nō ashib karub waibe tabig sōlgandō mariiba, chi isumgaig tab kōbiiba, kasrag kōbiiba, truilō kōn, Espiritu Santogurri.

18 Kaguende Criston ōyeeg mariitōga nuyasig marōb pasrabiibe Tiuswan truba tab kōnrrai marōb, katō misaameragucha nune chi tamgaig marōbig kui asig kōn.

19 Inchawei treeg kōbene, ambumay imay tab kōnrrai marōb, ambugurri igurri puruguyab Señorweimburab nōrrōrab ambamigwan tōgagōnrrab inchi-gun.

20 Tiuswei mariilan mamimeragurrindō ka mindisha kōrrōmarmōta. Isa kōmōtō, chi mamimerane Tiusbe mamōnrrain cha meriibe kaaben, tru kalō kōppe, tru mamimeragurrindō kan mōg katōganelan treegu ka srurrengwanrrai indig, truirren kalō kōn.

21 Pōs trembe yau mamōwei, vino muchimōwei, katō ñui nunewan penōsrkōnrrabig chigōben marmōwei indikken, sōl kōn.

22 Pōs ñui isubigwan Cristoinuutō tōgagūigwane ñiba Tiusbatō tōgagu. Pōs nō chi marōb pasraigu nui manrrau isub kebachibigube chi kalō kui mōrmō marōb pasrabigweimbe mayanguen tab kōn.

23 Trune tru kalō kōnrraitamabgōba isubendō mabiibe, maikkurrindō kaig mara pasramisran. Kaguende nui isubigwan Cristoinug tōgagōmubendō maran. Inchawei chitōgucha isubigwan Cristoinug pasra tōgagūigugurrin kōmōtō arrubiibe, kaig kōn.

15

Ñuimburab kui lataitōwei mendaigwan tab kōnrrai marōb

1 Inchawei nam Señorweimburabigu tabig mur pōnrrabelōbe tru Señorweimburabigu kullaateelan nambe purugumig kōn, nam namasiitōwei tab kui mōrōb pōnrrōmōtō.

2 Nambe mōitōgucha namui nuneg kullaatiigwan tab kui mōrtrai maramig kōn nuimburab tab kōnrrai, Señorweimburabigu nurab inrrai marōb.

³ Kaguende Cristo kɔbenguen nɔasiitɔwei tab kui mɔrɔb pasramigwan lamɔtɔ, Tiuswei wamwan pɔrigu Cristo maig taimbala kuig kɔn: “Tru tsalɔ wamabelɔ ñi Tiuswan tsalɔ wamiilɔbe naim palatɔ arrig kɔn” taig.

⁴ Kaguende kerrigu tru merrabsrɔ Tiuswei wamyu pɔriibe namun kusrenanrrab pɔrig kɔbig kɔn, tru nam tammay melabig melaikkurrimba, tru Tiuswei wam pɔrig namun tabig purugub wamgurrimba, nam Tiuswei tɔrguegwalmabigu nam Cristoba kanbalatɔ pɔnrramigwan isua muniiramig tɔgagɔnrrai.

⁵ Inchen tru namun tammay melabig melamigwan tranɔb, katɔ tru namun tabig purugub Tiusbe ñim kanikkurri kanikkurri kandɔ isua pɔnrramigwan tranrraimab isur; Cristo Jesús nɔ maig isuiɔ kɔben, treetɔwei,

⁶ ñim mayeelɔba kandɔ isua, kan wamdɔ misra namui Señor Jesucristoi Mɔskai Tiuswan truba tabig wamindamig kɔnrrai.

Tiuswei tabig srɔ wambe mu misaameraindɔgucha kɔn

⁷ Inchawei ñimbe ambugurri, igurri wamab utay, Cristo ñimun utab lataitɔweingue Tiusweyasig tɔrguegwalmabig kɔnrrai.

⁸ Pɔs nabe ñimun trendamɔnrrun: Cristobe judíosmera, tru circunci-dawarmeran purugub meganrrab arrig kɔn cha, tru Tiuswan mɔrɔbelɔ merrabsrɔ kɔlli misaameran nɔ maig martrab kɔrrɔmisrig kɔbigwan treeg marig kɔrrɔmisrtrai, ɔyamay Cristobe kenamartrab indig kɔn, Tiusbe nɔ maig martrab taigwane treeg marɔbig kui ashchai.

⁹ Incha katɔ trutɔ kɔmɔtɔ, Cristobe arruppe, tru judíos kɔmɔ misaamera nɔmun Tius lastima asimburɔ Tiuswan maya nuguen tab indig kɔnrrai arrig kɔn. Tiuswei wamwan pɔrigu maig taimbala:

“ɔyeekkurri nabe judíos kɔmɔ misaamerai utu

ñi, Tiuswan tabig waminchib,

ñui munchiwan cantab indamɔnrrun” cha, trendaig.

¹⁰ Katɔ katɔganbalɔsrɔ trenchibig kɔn:

“Ñim, judíos kɔmɔ misaamera, Tiuswei misaameraba truba kasraaray” cha.

¹¹ Incha katɔganbalɔsrɔ katɔ trenchibig kɔn:

“Mayeelɔ judíos kɔmɔ misaamera Señorwan purɔ tabig waminchib, mu misaameratɔgucha nun purɔ tabig waminday” cha.

¹² Katɔ Isaiaskucha ɔyeeg taig kɔn:

“Isaiweinukkurri arrubig kan tusrwan srɔldɔ pasram parig lataigugurri srɔig kal-lab lataitɔwei katɔgan srɔig kurra,

judíos kɔmɔ misaameran ashib karub pasrɔnrrab pasramisren,

truilɔbe nɔm isua muniirab melaigwan ke nuinuutɔ pasra tɔgagɔnrrun” cha.

¹³ Pɔs tru nam isua muniirab melamigwan tranɔb Tiusbe tru ñim nun kɔreikkurri maya nu kɔmburab kasrag kɔbigwanba, chi isumgaig tab kɔbigwanba ñimun netsɔganrrai isur; tru isua munig melaig, truitɔ tɔgagɔmɔburab tɔgagɔnrrai Espiritu Santoi maramburab mariitɔga.

Jesucristo maig karuilan Pablo mariilɔ

¹⁴ Pɔs, nai nunelɔ, nabe ñimuimburab ɔyeeg kuin kui asha pasrar, tab inchibelɔ kɔmitɔ netsailɔ, chigurrimbunɔ nebua asamig truitɔ netsailɔ, ambugurri igurri maig maramigwan waminchib eshkaɔb pɔnrrɔnrrapteelɔ, ñimbe treelɔ kui.

¹⁵ Inchendɔ nabe ñimun iigwan pɔrɔppe, kanmaytɔ murtɔ trencha pɔrar, tru chimerayube maig kɔmigwan ñimun katɔle isunanrrab isua, nui ka yandɔ tab indigwan Tius nan tranikkurri,

16 tru na Cristo Jesúsweiwan judíos kómø misaamerayasig na marøb meganrrai. Pøs, na Tiuswei tru tabig srø wamwangøba eshka kusrenanøbig kur, kan sacerdote Tiuswan keta tranøb latawei tru judíos kómø misaameran na Tiuswan keta tranen, nø ka utamdeelø kønrrai, nuyasiitø tarømariilø Espiritu Santogurri.

17 Inchawei nabe Cristo Jesúsweinuube truba tab kui mørøb pasramig tøga pasrar, na mariilø Tiusweimburabeløyu.

18 Pøs nabe katøgan chi pegwan waminchab inchimøtø, na waminchippe, tru judíos kómø misaamera Tiuswan møra marøbelø kønrrai, tru nagurri Cristo chi mariilandø wamindamønrrun. Iigwane nabe marøppe, wamindiiløtøgaba, mariiløtøgaba,

19 Tius naba pasrain kui asamig nørreelø mariiløtøgaba, kwaara asha kønrrai mariiløtøgaba, ilai tru maramburab mariitøga marøb, katø Tiuswei Espiritui tru maramburab mariitøga marøb indiilan, nabe trunundø wamindamønrrun. Øyamay Jerusalénsrøngurri chutøgucha Ilirico pirausrøngatig kerrigu chigucha palømiig na Cristoi tabig srø wamwan eshka kusrenanig købig køn.

20 Pøs nabe Criston tru mana wamindi møriimøsrø, treegu tru tabig srø wamwan eshka kusrenanøb pasramigwan mas isua martrab inchibig kur, Cristoi tabig srø wamwan møikkøben eshka kusrennøbig pølbasa marinug srøig itø marøb kebimønrrab.

21 Masken Tiuswei wamwan pørig maig taimbala:

“Managuen nuimburabigwan mu wammørsraimeelø købelø nun nebua ashib,
wamindigwan mana mørmeelø købelø chigúti nebua mørøb inchun” taig.

Pablo Romasrømay inrrab isub

22 Inchawei øyeekkurri nabe katø katø ñimun ashchab attrab inchen, arrumønrrai marinab pasrabig kur.

23 Inchendø møimbe yu na tsuim pirausrømbe naimbe yandø chu maramig kawein køben, katø merrab pilamerawansrøngurri ñimun ashchab truba arrug kui megaig køppe,

24 Españasrømay na inrrab arrua, pua purainrrab inchar. Kaguende nabe ñimun asha purainrrab isur, tru petø purainrrab arrua, kan maya yana ñimba lindigu truba kasraatø puraya, na trusrømay yamigwan ñim nan purugunrrai.

25 Inchendø møimbe nabe Jerusalénsrømay inrrab yar Tiuswei misaameran an purugúigwan tranrrab.

26 Kaguende macedoniasreeløba, acayasreeløbabe tru Jerusalénsrø Tiuswei misaamerai utu waachameran purugumig an tulisamig nømune tabig asønaig køn.

27 Pøs nømbe tabig martrab isua marig køn. Inchagucha nømbe judíosmerane uløweim pønrran. Kaguende tru judíos kómø misaamerama Tiusweimburabig purø tabig tru judíosmeraiwan nøm tøga utab pønraibe, nømgurringucha nøm chi tøgagúiløtøga judíosmeran tranøb pirisamig ulø pønrran.

28 Incha i maramigwan nabe yandø chab mara, tru kan mamig misrizhig latawei tru an purugúigwan nømun purøøraibe, Españasrømay inrrab arrua, ñimun ashchab arrumønrrun.

29 Incha na ñimuisrømay arruppe, Cristoi mayanguen tabigwan ñimun pirishinrrab tøgagømburab tøga arrum kui nabe asha pasrar.

³⁰ Inchendø nabe, nai nunelan, namui Señor Jesucristogurrimba, Espíritu Santoi undag købikkurrimba, naimburab ñim Tiusba truba rugab wamindigu, tiusmanda naba kanbalatø misrtraí chinrrab, Tiuswan truba truba miab melamigu.

³¹ Pøs tru Judea pirau Jesucriston chi køenrrab inchimø misaamerai tasku na kebeñmønrraimba, katø tru Jerusalénsrø Tiuswei misaamera tru an purugúig srua yaigwan tabig kui ashíb utønrraimba Tiuswan miarrunrrigay,

³² pøs Tius treeg kønrrain købene, na ñimuisrø arruppe, truba truba kasrag pua, ñimba kanbalatø pishindø tab wamig kønrrai.

³³ Inchen Tius tru chi isumgaig tab købiibe ñim mayeeløba pasrønrrai isur. Treeg kønrrun.

16

'Tab ka amøñigüeh' chib, Pablo wam øriilø

¹ Cristogurri tru namui nuchag Feben tabig ashíb tøgagørrunrrigay chinrrab inchar, tru Cencrea iglesiayu chi maramigu purugubigwan.

² Señorwein kuimba ñimbe nun truba tab wamab utønrrigay chinrrab, Tiuswei misaameran maig utamig køben, trumay. Katø ñimgurri nun chi purugumig palain købene, purugub inchigay. Kaguende nøma truba yamelan truba truba purugub megabig køn, katø nan chigucha.

³ Cristo Jesúswei maramigu lincha marøb melabelø, Priscilanba, Aquilanba 'tab ka amøñigüeh' tan chirrunrrigay.

⁴ Truiløbe naimburab nan chi kømønrraindø kwam labguen inchibelø køn. Truilane nabe mayanguen ungua, ungua tamønrrun. Katø natø kømøtø, judíos kømø misaamerai iglesiameragucha mayamba nømune ungua tan.

⁵ Katø iglesia tru nømui yau tulundzunabelangucha 'ka amøñigüeh' tan chirrunrrigay. Katø tru Epeneto, nai undaraig, Asia pirausrø ke srøsrøzhiitø Criston nømerrig kørewa pasramisrøbigwangucha 'ka uñgu' tan chirrunrrigay.

⁶ Katø ñimuyasig truba truba marøb megabig Mariangucha 'tab ka uñgu' tan chirrunrrigay.

⁷ Andróniconba, Júniaswanba, nai misaameran 'ka amøñigüeh' tan chirrunrrigay, kailan pønsraig yau merrarrawa keeriilø naba lincha pønrrabelø købelan. Truiløbe Cristo nøashíb karua øriilø nømune tabelø mumera kui asiilø, katø nømbe Criston naguen køremøwatø, nømerrig kørewa pønrrabelø, treelø køn.

⁸ Señorweimburab nai undaraig Ampliaswan 'ka uñgu' tan chirrunrrigay.

⁹ Katø Cristoi maramigu namun lincha marøb megabig Urbanonba, katø nai undaraig Estaquiswanba 'ka amøñigüeh' tan chirrunrrigay.

¹⁰ Apeles, Cristoimburabigu chine nebuinab puraya møwanba, katø Aristóbuloi yauelanba 'ka amøñigüeh' tan chirrunrrigay.

¹¹ Nai misag Herodiönwanba, Narcisoi yauelø Señorwan kørewa pønrrabelanba 'ka amøñigüeh' tan chirrunrrigay.

¹² Señorwei maramigu truba marøb melabelø Trifenanba, Trifosanba 'ka amøñigüeh' tan chirrunrrigay, katø Pérsida, truba undaraig, tru Señorwei maramigu truba truba marøb megabigwanba.

¹³ Señorweinug purø tabig kui asig Rufonba, nui usranba 'ka amøñigüeh' tan chirrunrrigay, pøs truipe nai usri lataig kuig køn.

¹⁴ Asíncriton køben, Flegonten køben, Hermeswan køben, Patrobaswan køben, Hermaswan køben, katø nunelø nømbe warabelan køben 'ka amøñigüeh' tan chirrunrrigay.

15 Katø 'ka amøñigüeh' tan chirrunrrigay Filólogon køben, Julian køben, Nereowan køben, katø nui nuchawan køben, Olimpaswan køben, katø tru nøm̄ba warabelø mayeelø Tiuswei misaameran købengue.

16 Kangurrin kangurri 'ka amøñigüeh' chib tabig wamab Tiuswei undag købiitøga tasig traniyay. Cristoi iglesiamerabe mayamba ñimun 'ka amøñigüeh' cha øran.

17 Pøs nabe ñim, nai nunelan, ashiptø kønrrigay chinrrab inchar ñimun nøørøtø misrtrai indamba, Cristoi maywan sötøbønrramisramba inchibelan. Truiløbe tru ñimun kusrenanigwan ka peemaytø punrrai marøbelø køn. Ñimbe truilane tarømisray.

18 Kaguende treeg misaamerabe namui Señor Cristoiwan marmeelø køn. Treeg kømøtø, ka nøm̄uimburaptø tab kønrrai labelø kua, waminchibgucha purø tabzhig wamincha, mørøptø wamdiig tabzhig wamincha, chigucha trunun nebua ashmø misaazheelan kegørrøsrkøbelø køn.

19 Pøs tru tabig srø wam maig taigwan ñim møra marøbelø kuigwane mayeeløba nebua asha køn. Treekkurri nane ñimuimburab truba kasrag køtan. Inchendø ñimbe chigøben tabigwane purø nu kusrebelø, kaigwane kan isubgüen isumeelø kuimbe køtan.

20 Inchen Tius tru chi isungaiig tab købiibe kan maya yanayutø Satanáswane nøbe tambalørtrun ñim itøbuna pønrrønrri. Namui Señor Jesúswei ka yandø tab indiibe ñimba kønrrun.

21 Timoteo, maramigu nan lincha marøb megabig, ñimune 'ka amøñigüeh' cha øran, katø trugurri tru nammisaamera Lucio køben, Jasón køben, Sosípater køben, truiløgucha.

22 Na, Tercio, Pabloi kilga pøøbikkucha 'ka amøñigüeh' cha ørar, Señorwei munchiyu.

23 Gayogucha ñimun 'ka amøñigüeh' cha øran, tru nan truyu tsumig ya pebøb, katø iglesia mayeelanba pebøb inchibig. Inchen katø Erasto tru ciuday an asamigwan nø ashibiiba, katø trugurri namui nuneg Cuartogucha 'ka amøñigüeh' cha øran.

Tiuswan srabe tabzhig wamindig

24 Namui Señor Jesúswei ka yandø tab indiibe ñim mayeeløba kønrrun. Treeg kønrrun.

25 Møimbe Tiuswan maya nuguen tabig waminchigun, Tiuswei tru tabig srø wamwan na wamindiiba, Jesucristoimburab na eshka kusrenaniiba iilø maig køben treegu mur pønrrønrri marøbigwan. I tru tabig srø wambe tru manasrøngurri mu asiimíig pasrabig Tius nø maramigwan nuinetø tøgagüigwan tru kenamarig maig køben, treeg køn.

26 Inchendø møimbe Tius tru maig karuigwan eshkabelø pøriiløgurri tru mu asiimíig pasrabigwane kenamaran judíos kømeeelø chu pirausrø misaamerandøgucha, Tius tru manasrøngurri managatig wabig nø maig maramigwan martrain pasrig, treeg, nøm̄ui isubigwan Cristoinug pønsra tøgagüigu maig taigwan møra marøbelø kønrrai.

27 ¡Tius tru nøtø kandø wabig, tru muguen nebua kusremgaiig newan kusrebígwan managatig tøgüegwalmabig kønrrun Jesucristogurri! Treeg kønrrun.

1 Corintios

Pablo pørøb

¹ Na Pablo, Tius nan trendø treeg kønrrain køben, Cristo Jesús nøashib karua ørig kønrrai wamig, nai nuneg Sóstenesba misra, i kilgawan pørar,

² Corintosrø iglesiayuelan, Cristo Jesúskurri tru Tiusweyasig tarømariilø, nuyasiitø newan tabelø kønrrai wamiilanba, katø tru mayeelø chutøgucha namui Señor Jesucristoi munchiwan wamabelanba, trube namuimba, nømuimba Señorwan.

³ Namui Møskai Tiusweimba, Señor Jesucristoimba tru ka yandø tab indigwan køben, chi isungag tab købigwan køben ñim tøgagønrri inchar.

Cristogurri tabig tranigwan 'ungwa, ungwa' taig

⁴ Chu urastøgucha nabe Tiuswane ñimuimburab 'ungwa, ungwa' chibig kur, Cristo Jesúskurri ñimun Tius ka yandø tab indigwan tranikkurri.

⁵ Kaguende chiyutøgucha ñimbe nuinug purø nørrø tøgagønrri traniilø køn, kerrigu wamindigu lata, kerrigu nebua ashib ambigu lata.

⁶ Trumay Cristoi tru srøig tabigwan wamindiibe ka wamindiitø kømø, ñimuinuube cierton kørrømisrin køn,

⁷ Tiusweiwan marøbelø kømigwan keta tranig chigucha chi palømeelø kømnegatikke, Jesucristo kenamisramigwan ñim munig melappe.

⁸ Katøgucha srabegatig ñim kørrømmø mur pønrrønrri nøbe tōga pasrønrrun, namui Señor Jesucristo katø arrub kwaløm chi kaig mariilø chigar pønrramig kønrrai.

⁹ Tiusbe nøbe maig martrab chippe, treegwan marøbig køn. Ñimbe nøgurri wamiilø kuig køn, nui Nusrkai Jesucristo namui Señorba lincha pønrramig kønrrai.

Corintosrø Tius wami misaamera nøøøtø inchib tarømisrøb

¹⁰ Nai nunelø, Señor Jesucristoi munchiyu maig maramigwan tiusmanda øyeeeg marøb melørrunrigay chib waminchab inchar. Peg peg isub kømøtø, kandø isuy cha, ñimui utu mas nøøøtø inchib tarømisramig kaanrrai. Masken treeg kømøtø, newan kanbalatø lincha kandø isub, maig marameløyu kandø isub inchigay cha.

¹¹ Nai nunelø, møiløgøsrøn Cloéwei yaeløbe nane eshkatan, ñimbe kwayam labrre waran cha.

¹² Pøs nabe trenchinrrab inchar, møiløgøsrøn ñimbe trenchibrren køn tan cha: "Nabe Pabloingatiig kur" chiben, katøgane: "Apolosweingatiig kur" chiben, katøgane: "Nabe Cefasweingatiig kur" chiben, katøgane: "Cristoingatiig kur" chib. Treeg inchib køn tan cha.

¹³ Trube, treeg købene, ¿Cristobe nuin kui, nuin kui misra pasra chindah? Kabe ñimuyasig kurusyu kwanrrai mesrøppe, ¿na Pablon mesraig kø chindah? Kabe ñimun piu umbu ulsrøbgucha ¿nai munchiyu piu umbu ulsraig kø chindah?

¹⁴ Tiuswan nabe 'mayanguen ungwa, ungwa' tamønrrun, ñimun møigwangucha na piu umbu ulsrømuigwan. Nabe piu umbu ulsrøppe, Crispobah, Gayonbatøwei treeg marig kuig køn,

¹⁵ nai munchiyu 'piu umbu ulsrailø ker' chib mugucha trenchib kømønrrai.

16 (Katø Estéfanaswei yauelandøbe piu umbu ulsrøbwei indig køn. Inchendø katøgan mas mungucha piu umbu ulsraibe nane isumøtan).

17 Kaguende nane Cristobe misagwan piu umbu ulsrøb uñchai ørmøtø, Tiuswei tru tabig srø wamwan eshkab kusrenanrrai ørig køn. Incha nabe waminchibgucha, nørrø wammeratøga purø may waminchimur, Cristo kuryu kwaigwane chigucha kømfíg kui lataig marig kømønrrai.

Cristobe tru Tiuswei muguen nebua kusremgaig kusreiba, maramburab mariiba køn

18 Cristo tru kuryu kwaigweimburab tru eshkab kusrenaniibe yandø tru kaigyu kegørra pønrrabelaimbe chigucha kømfíg, ke chugúinguen mørmubendø wamindi lataig køn. Inchen nam yandø kaigyugurri wesrailaimbe tru wamindiibe Tiuswei tru maramburab marig, truig køn.

19 Kaguende trenchibig pørig pasran:

“Purø kusreb møguelø chigurrimbunø nebua kusrewa tøgagúilane pin-
isamønrrun cha.

Kusrebelø nøm chigúi møra tøgagúilane chigucha kømfíg mara kaasha
kørrø maramønrrun” chibig

20 ¿Pøs, tru purø kusrebiiba, katø kusrennøbiiba, katø møi i kwaløm nørrø kusrewa ‘treeg, treeg køn’ chibeløbabe chu pønrrah? ¿yu pirau chine purø nørrø kusreigwane chugúinguen mørmubendø marig, Tiusbe treeg mara tøgagømutarru?

21 Kaguende Tiusbe, tru nui muguen nebua kusremgaig kusrebig kuigu, yu pirau misaamerabe nømui tru purø nørrø kusrewa tøgagúitøgabe nun nebua ashmønrrai indig køn. Pøs tru chugúinguen mørmubendø wamindig mara tøgagúigwan eshkab kusrenaniitøga nun kørebelane kaigyugurri wesramig, Tiuswane tabig asønaiig køn.

22 Kaguende judíosmerabe kan møg Tius nøba pasrain kui ashchai mariilan miaben, griegosmerabe tru purø nørrø kusreig wamindiilan mørog kui inchibelø køn.

23 Trune nabe Cristo kuryu kwaigwan eshkab kusrenanøbelø ker. Truibe judíosmeraimbe ke ka srurrengwangerubig køben, judíos kømø misaameraimbe ke chugúinguen mørmubendø wamindig, treeg køn.

24 Trune Tius tru wamilayasiibe, judíosmerai lata, griegosmerai lata, Cristobe tru Tiuswei maramburab mariiba katø Tiuswei tru muguen nebua kusremgaig kusreiba, truig køn.

25 Kaguende Tiuswei tru chugúinguen mørmubendø wamindi lataig asønabiibe møguelø purø may isua wamindi lataig kømøtø, mas purab nuig køben, katø Tius tru itønaptiig lataig kuibe, kan møwei fuerzas lataikken kømøtø, purab murikken køn.

Corintosrø Tiuswei misaamera mailø kuig

26 Inchawei, nai nunelø, tru ñimun wamab uras ñim mailø købelø kuigwan isua asamig køn. Misaamerain kabyu kusrebeløbe ñimbe ke kan kandøwein køben, katø ashib karub purrabelø nørreeløbe mamdø køben, katø tab misagugurri amrrub misaamerabe mamdø køn.

27 Yu pirau chugúinguen mørmubendø wamindi lataig tøgagúigwan Tiusbe truigwan wesrawa pasrig køn, tru purø nørrø kusrebelan kørig mara kørrømartrab. Katø yu pirau kwa kaizheelø kønmab asha tøgagúilan Tiusbe truigwan wesrawa pasrig køn, nørreelan kørig mara kørrømartrab.

²⁸ Yu pirau misagwein kabyu larrø kaizheelø kōnmab asha tōgagúilanba, katø kaashib indiilanba, tru chigucha kōmōzheelø kui asilan, Tiusbe truilan lawa wesraig kōn, tru nōrreelan chigucha kōmeelø mara kōrrōmartrab,

²⁹ mugucha Tiuswei merrab nōrreelø misrøb mōg inchib pōnrrōmōnrrai.

³⁰ Ñimbe Tiuskurri Cristo Jesúsba kanbalatø pōnrran. Cristo Jesúsbe namimbe tru mu nebua kusremgaig kusremiba, katø sōlgandø tabiiba, katø Tiusweyasiitø tarōmariilø kōmiba, kaigyugurri wesruilø kōmiba, treeg kōn nōbe.

³¹ Inchawei Tiuswei wamwan pōrigube trenchibig kōn: “Mōikkōben truba nuig kōmmōrø inchib waminchib pasrag kōbene, Señorweimburappe mōg inchib waminchib pasrøbash” cha.

2

Criston kurusyu mesraigwan wamindig

¹ Inchawei nai nunelø, Tiusweimburabig mun kenamariimig pasrabigwan na ñimun eshkab kusrenanøb arrub urasma, ke kan chull mōramdiig purø may waminchib, katø purø nōrrø kusreb nebua asilan waminchib arrumuig kōn.

² Pōs nabe ñimui utube katøgan chi pegwan isub pasrōnrrab kōmōtø, Jesu-cristonba, nun kurusyu mesra kweetsigwanba, trunundø isua pasrōnrrab isuig kōn.

³ Incha nabe ñimui utu uñib urasbe truburab chish kōmōwei, trurrigu kōrig kuig ¡katø! itōnab pasraig kōbig kōn.

⁴ Inchawei na wamindigu lata, katø Tiuswei wamwan eshkab kusrenanigu lata, purø nōrrø nebua ashib kusreig wamdōga purø may kōremdiig waminchimuig kōn. Treeg kōmōtø, Tiuswei Espíritui maramburab mariitōga kenamarøb wamindig kōn,

⁵ tru ñimui isubigwan Jesucristoinuutø pasriibe mōguelø purø nōrrø kusreigu pasrig kōnrrain kōmōtø, Tiuswei maramburab maramigu pasrig kōnrrai.

Tiusbe nui Espiritugurri nebua ashchai marøbig kōn

⁶ Treeg kuingucha, Tiusweimburabeløyu yandø tsabø nōrrōrawarwei utubeguende nōrrø nebua kusreigwan waminchibwei inchibelø ker. Nambè waminchippe, tru nōrrø nebua ashib kusreigwan mōi nam warain kwalōmigwan kōmōwei, kabe mōin kwalōm yu pirau nōm ashib karubelø nōmguen patsab ambulaiwan kōmōwei wamindig kōn.

⁷ Treeg kōmōtø, nambè waminchippe, Tiuswei tru muguen nebua kusremgaigwan asiimig, sōrig pasrabigwan wamindig kōn, tru chi pōnrrabikken kaabenbatōsrøwei namuyasig maya nuguen tab kōnrrai kanmaytø manasrøwei Tius treeg martrab isua tōgagúigwan.

⁸ Inchen mōi yu pirau nōrreelø karub purrabeløbe mōitōgucha iig tru muguen nebua kusremgaigwane chigúinguen mōrmuig kōn. Pōs iigwan chigúí mōrig kuimbe, namui Señor tru tōrguegwalmabigwane kurusyu mesra kweechimubsruig kuinrrun.

⁹ Inchendø Tiuswei wamwan pōrigu taimbala:

“Mugucha kaptøgabe nebua ashmōwei,

muguen kalutøgabe nebua mōrmōwei,

ni muguen øyeeg kuitamappe isubguen isumōwei indigwan,

Tiusbe nun undaguelayasiibe trunun tɔgagɔnrrai tamara pɔnsrain kɔn”
cha.

¹⁰ Inchendø Tiusbe sɔrig pasrabigwan nui Espiritugurri namune kenamarig kɔn, kaguende tru Espiritube maig kuigwan kerriguh chishtø ashibig kua, Tiuswei tru muguen nebua asimig nɔ purø umbusrø tɔgagúilanguen kerrigu.

¹¹ Pɔs ¿kan mɔwanma nui manrrau umbusrøngue chi isub pasraigwan nebua ashibiibe nui espiritutøweimbe nebua ashmuitarru? Øyeetøwei Tius nɔ purø umbusrø tɔgagúilane mugucha nebua ashmuben, Tiuswei Espiritutøwei nebua asan.

¹² Nambe espiritu yu pirauigwan utømøtø, utappe, Tiusweinukkurri arrubig Tiuswei Espiritun utig kɔn, nɔ ka yandø keta tranigwan chigúi mørøbelø kɔmig kɔnrrai.

¹³ Inchawei nam iigwan waminchippe, mɔguelø yu pirau kusremburab kusrebelø kusrenani wamðøga waminchimer. Treeg kɔmøtø, Espiritu Santo kusrenaniitøga Tiusweimburabelan øyeeg kɔn chib waminchippe, Espiritu Santon tɔgarmeran waminchibelø ker.

¹⁴ Kan mɔg Tiuswei Espiritun chigaibe, Tiuswei Espirituimburabigwane utønrrab kaiman. Pɔs nuimbe ke chugúinguen mørumbendø mari lataig kɔben, ni mandø kuinguen mørmon, kaguende Espiritu Santo purugubendøwei, øyeeg, øyeeg kɔbig kuin kui nebua asamig kua.

¹⁵ Inchen Tiuswei Espiritun tɔgaibe chiwandøgucha øyeeg, øyeeg kɔbig kuin kui nebua isumig tɔgaig kɔn. Inchen nungurrimbe mugucha ‘øyeeg, øyeeg kɔn’ chinrrab kaimanrrun.

¹⁶ Pɔs Tiuswei wambe trenchibig kɔn:

“¿Señorwei isuilan kabe mu nebua asitarru? cha.

¿Señorwane kabe mu kusrenrrautah?” cha.

Inchendø nambe Cristo nɔ isuimay isumigwan tɔgar ker.

3

Tiusweimburabeløyu lincha maram purugubelø

¹ Inchawei nai nunelan, nabe Tiuswei Espiritu maig kɔnrrain kɔben treeg isubelan lataig waminchab kaimaig kuig kɔn. Treeg kɔmøtø, tru maig amøñig kɔben amøñibelan lataig, trumay wamindig kɔn, Cristoimburabigube kan shush ureezheelø latalailan.

² Nabe ñimune pitsøtø mutsøsrraig kɔn, tranrrø mamig manrrai manmøtø, kaguende katøgucha truiwane utønrrabgailø srø kuimba. Ni mõi yanguen katøgucha treeg mamigwane manrrabgailø srø kua,

³ katøgucha ñimbe ñimui asr maig marøg kui inchen treegwan marøbelø srø kɔn. Pɔs ñimui utube pusrkwai ashib kɔmig, aleguiyam lab treeg inchib pønrraibe, ¿ñimui asr maig marøg kui inchen treegwan marøb, maig kɔbash amøñibelø lataig marøb amøñimøtirru?

⁴ Kaguende ñim mõi:be: “Nabe Pabloingatiig kur” chiben, katøgane: “Nabe Apolosweingatiig kur” chiben, øyeeg inchib pønrrappe, ¿maig amøñig kɔben amøñibelø lataig marøb pønrrømøtirru?

⁵ ¿Trube, treeg kɔbene, na Pabloba, Apolosbabe chimera kɔbrah? Pɔs nambe ka marøb melabeløtø kɔben, ñimbe namgurriwei kɔrewa pønrran, namun møigwandøgucha Señor maig martrai karua pønssraig kɔben, treegwan marøbelø.

⁶ Nabe ellguaben, Apolosbe pi kuchen, tru tusrwan nurangaruppe, Tius nɔ nurangarun.

7 Inchawei ellguabig lata, pi kuchibig lata chigucha komeelø køben, kalawa nuranrrai marøbiibe Tius, nø køn.

8 Ellguabig lata, pi kuchibig lata, møibe kabe peg kønrrab kuindø trunundøwei marøb køn. Inchendø nøm møitøgucha nømui maramigwan maig marig køben, Tiusbe tru marimburo pagaraben, utønrrab kuinrrun.

9 Kaguende nambe maramigwan Tiusba lata lincha maren, ñimbe Tiuswei ellmari tul køb, katø Tiuswei ya køb indan.

10 Tius nui ka yandø tab indigwan nan maya traniitøga, kan møg yawan purø may maram kusrebig lataitøwei yawan niga pasrønrrabigwan nabe pølbasa pasren, katøgane tru na pølsrugwan mara pasrim pala, kusrub yan. Inchendø møitøgucha marøb ambuppe, mandø marøb yainatashchab asha maramig køn.

11 Pøs kaguende yawan niga pasrønrrabigwan chab marig pasrøbene, mugucha katøgane katø srøig peg nøørø maramig kømøn. Kaguende tru chab mara pasriibe Jesucristo køn.

12 Inchen tru yawan niga pasrønrrai pølbasa marim palabe: orotøga marin kui, andøga marin kui, kabe purø tab sruuzheeløtøga marin kui, tsiitøga marin kui, putøga marin kui, kabe ka shautøgatø marin kui inchun.

13 Inchen tru nøm treeg mariiløbe møigweindøgucha torgandø chigúi asamdiig kenamisrtrun tru maig kønrrabigwan asha marøb kwaløm. Kaguende maig køtashchab naatøga parra ashen, tru naabe kanuin kanui nøm maig marigwan chigúi ashchai kenamartrun.

14 Inchen møikkøben tru yawan niga pasrønrrabigwan marim pala nø marøb kusrab yaig chi kømø, nagu ka puraihene, truburo nøbe tru utamigwan utønrrun.

15 Inchen møigwein køben nø chi marøb megaig pachiptinchene, tru nø treeg marigwane kaptøashchun. Nøbe truyugurri weluløppe, weluløbwei inchendø, treetøgucha welulrrab kan nag pilab utuwan purøluløb ib lataig welulabe kønrrun.

16 ¿Ñimbe ashmeelø kōtirru? yamba ñimdøweinguen Tiusweimbe tab ya køben, Tiuswei Espiritube ñimuinug pasrabig kuin kui.

17 Inchawei møikkøben i Tiuswei yawan pinishibigwane Tiusbe nungucha pinishinrrun. Kaguende Tiuswei yabe newan tabig nuyasiitø køben, tru Tiuswei yabe ñimdøwein køn.

18 Kusrebelø kermab ñimasiitø kegørrab pønrrømøtay. Ñimui utu møikkøben misaamera møin kwaløm yu pirau isuigu truba truba nu kusrebig kurwab isubiibe, chi nebua ashmig lataig misramig køn, cierton kusrebig kønrrappe.

19 Kaguende kusremburab kusreig yu pirauibe Tiuswein kabyube ke chugúinguen marmubendø marig treeg køn. Pøs øyee chibig pørig pasran: “Nøm truba truba kusrebelø kermab isuigutøwei Tiusbe iløsrka kegørrønrrai marig køn” chibig.

20 Katø treekkucha chibig køn: “Señorbe ashibig køn cha, tru nørrø kusrebelai isuiløbe chi isumuinguen isuilø kui.”

21 Inchawei mugucha, ø møøbesin chib, truba truba møg inchib waminchib pasramibe chigagøn. Pøs kerriguba ñimuin køn:

22 na Pablo lata, Apolos lata, Pedro lata; iig waraig pirø lata, øsig kømig lata, kwamig lata, møin kwaløm lata, katø wendø attrabig lata; pøs ñimuiwein køn kerriguba.

23 Katø ñimbe Cristoielø køben, Cristobe Tiuswein køn.

4

Cristo nõashib karua øriilø nõm marøb kuilan waminchibig

1 Ñimbe mutøgucha namune Cristoi maramigwan marøb, katø Tiuswei tru mu asiimlig sorig pønrrabigwan nam asha marøb, kusrennøb pønrrønrrai pønrsrailø kui, namune ka treetø isua tøgagørrunrigay.

2 Pøs tru maramigwan nõm asha marøb kønrrai pønrsrainabeløbe møitøgucha nui mariløyu chi isumgaig marøbelø kønrrain køn.

3 Nane naimburappe, chi menrra isumøtan, ñim kui, kabe yu pirauelø mugøben tru maig kønrrabigwan asha marøb purrabelø, truilø kui, nan 'ñibe øyeeg, øyeeg marøbig køn' tainab pasramig. Kaguende nabe naasiitøweinguen 'øyeeg, øyeeg kur' chimur.

4 Pøs nabe naimburappe, nai manrraube chi kalø marig kebachibiibe chigaig pasrar. Inchendø na treeg pasraitøga 'chi kalø marmlig kur' tamig kaagøn. Kaguende nan maig kønrrabigwan asha marøbiibe Señor, nõ køn.

5 Inchawei treeg købene, treeg maramig pumøwatøbe 'ñibe øyeeg, øyeeg kuin køn' chib, treeg kui mara kørromarmøtay. Muniiray Señor arrumnegatig. Tru sorig pønrrabig løstøyuelan nõbe toryu wesrawa, møguelø nõmui manrrømerayu chi martrab isua tøgagúilan kuragutchun. Inchen møitøgucha Tius tabig wamindig kømigwan utønrrun, nõm maig marig køben, treekke.

6 Nai nunelø, iigwan kerrigu øyeeg pørøppe, Apoloswanba, nanba asha kusrenrrai indig køn ñimuyasig tab kønrrai, ñim namun asha kusrewa, pørig maig chibigwan purab marøb pønrrømønrraimba, kanune kaig køn chib, kanuingatøgøba inchib ñim truba møg inchib nõrreelø misrøb pønrrømønrraimba.

7 ¿Ñun mu kui nebua asig kønrraima ñune mu treeg mara pasrta? ¿Tius tranigwan utiimíbe ñibe chi tøgagugu? Inchen nõ tranigwan ñi uta tøgagúig købene, trube, ¿chindimbarre møg inchib nuig misrku, tranigwan uta kømøwa lata?

8 ¡Paare, ñim waachaalleeløbe! Yandø ke newanelø, katø ñimbe yandø chiyutøgucha palømlig ke newan tøgar køppeendi, ñimbe namun palain kømø, yandø reymera, yandø ñimdø ke tsabø asha karubelø. ¡Kan waachaalleelø! Ñim isa kømøtø, reymera kua, ke ñim karub pønrraimbe, namgucha treetøweim pønrrønrrab, ñimba ke amøñigasamig køtan.

9 Pøs nam Cristo nõashib karua øriilane yandø wendau ke srabesrø melab lataig treeg pønrrønrrai pønrsrailø ker, yandø kwanrrai wesrawa pønrsrailan latawei. Pøs nambe yu pirau mayeelai merrab misagashib srua küilø kømig køtan, ángelesmera lata, misaamera lata.

10 Nambe Cristoimburabikkurri ke chugúinguen mørmeelø lataitø køben, trune ñimbe Cristoimburabeløyu purø kusrebelø latailø køn. Nambe ke itaptø kaizheelø køben, trune ñimbe purø mur chibelø latailø køn. Ñimbe tabelø kønmab asiilø køben, trune nambe kaasiilø ker.

11 Pøs nambe møin kwalømgatig parøgwai mørøb, pi mulgwai mørøb øyeeg nebuig meler, asru kemig truburab kømuilø, ichabeta kørriindiilø, katø chu waramig ya kaweyelø.

12 Nambe namui tasiimeratøga muraara, muraara marøbelø ker. Namune trømbøig tsalø wamøben, namgurrimbe nõmune mayanguen tabig nebuilø kønrrai inchibelø ker. Namun kaig maringucha, namgurrimbe awentabelø ker.

13 Namune kailø kønmab ashchai isa waminchen, namgurrimbe maig købash inchimø, tammay løtabelø ker. Nambe møi øyan kwalømgatig yu pirau

yandø kaasha kørromarig chillirrørør kørreibig latailø ker, mayeelai kaasi shau.

¹⁴ Nabe ñimun iigwan pørøppe, ka korig martrab inchimøtø, masken tabig melønrrai waminchar, nai undaaraig ureemera latailø kuimba.

¹⁵ Pøs ñimbe Cristoimburabigu kusrenanøbeløbe diez milburab tøgagüindøgucha, kan møkai lataibe kandø tøga køn. Kaguende Cristo Jesúsweinuube Tiuswei tru tabig srø wamgurri nabe ñimuimbe møkai misrig køn.

¹⁶ Inchawei nabe ñimun øyeeg marøb melørrunrigay cha waminchar, na maig marøbig køben, ñimgucha treegwei marøb kønrrai.

¹⁷ Inchawei nabe Timoteowan ñimuimay ørig køn, nai undaaraig nusrkai lataig Señorwan maikkucha tarømisrmø megabigwan. Nøbe na Cristo Jesúsweimburab maig marøb uñibig kuigwan ñimun isunanrrun, na chutøgucha iglesiamørig maig kusrenanøb yailan.

¹⁸ Inchen ñim møiløbe na ñimun ashchab arrumønrraitamab purø nørreelø misrøb møg inchibelø misrin køn.

¹⁹ Inchendø nan Señor inrrain købene, peba ñimun ashchab arrua, nøm truba naba nørreelø misrøb wamindiilan ashmøtø, tru nømui marøb kuigwan asamønrrun.

²⁰ Kaguende Tius nø ashib karub waibe wamindigu pasrømøtø, maramburab marigu pasran.

²¹ ¿Nabe ñimuimay tsig srua arrumig palain køgueh? ¿Kabe undag købitøga larrø tammay waminchab arrumig palain køgueh? ¿Ñimbe møigwan palaingøgue?

5

Møgueløba, ishumburmeraba trømbøig marmumigwan waminchibig

¹ Ñimui utube ishumburmeraba, møgueløba trømbøig marøb kuigwan truba wam køn, ñimui utube møikkørønbe panabusrandøwei pera tsuin kui, judíos kømeelø Tiuswan ashmø misaameraguen kan øyeekkatig trømbøig maramigwane purø trømbøig kui asha treeg marbasiiimigwan.

² ¡Trune treeg kømnebe ñimbe chi kømui lataig nørreelø misrøb ka møg inchippe pønrran! ¿Ashene, øyeeg pubene, ñimbe isuig kishibguen pønrrømø, chindah? Tru øyeeg kaig marøb mowane ñimui utugurrimbe wegutchai inday.

³ Pøs nabe ñimba kømøtø, nai asr pasraigube yabsrø nørø pasraindøgucha, nai isuigube ñimba pasrøwa, tru treeg kaig marøb mowane nun maig itø attrabigwan treeg kønrrai kørromara pasrøbguen inchar, na ñimui utu pasrøwa lataitøwei.

⁴ Namui Señor Jesucristoi munchiyu ñim tulundzunøben, na maig isubig kuigube ñimba pasrøben, Señor Jesúswei maramburab maramig truyu pasrøben,

⁵ tru larrø kaig marøb mowane Satanás nø tøgagønrrai pasrtrigay, nui asrwan pinisaig kønrrai, Señor arrub kwaløm nui espíritune kaigyugurri wesraig kønrrai.

⁶ Ñim nørreelø misrøb waminchib pønrraibe chi tabig kømøn. ¿Ashmeelø køtirru, harinayu levaduran lamøtø pusriitø maya sømarigwan larrøb pulingarubig kui?

⁷ Tru kølli levadura lataig tøgagüigwan wegutsay, harina sømarig chi levadura larriimig latawei ñim chishelø kønrrab, ñimbe yandø chabguen

treelø kuig kōppe. Kaguende Criston, tru namui Pascua Fiestayu Ubisha-unø kweetsamig kōbigwane namuimburø kweetsig kōbig kōn.

⁸ Inchawei nambe tru Pascua Fiestan marōppe, tru kōlli levadura lataigwan tōga marøb kōmōgun, tru kaig martrabgōba isub, chine trōmbōig maramigwangōba isub indi levaduran. Treeg kōmōtō, tru pirri chi levadura chigaig lataitōga fiesta margun, tru pirriyu chi lindisaimīg chi sōrig chigaig, ciertongue.

⁹ Nabe ñimun kilgayu pōrōppe, asrtōga trōmbōig marøb ishumburmeraba, trōmbōig marøb mōguelōba linchimōtay cha pōrig kōn.

¹⁰ Inchendō nabe iigwan trenchippe, yu pirau tru Tiuswan ashmō misaameran truilaimburab waminchimur, tru ishumburmera lata mōguelō lata trōmbōig marōbelan, tru larrō pareelan, chi isa kōben an nila wesrabelan, katō chiwangōben kan tius kui lataig inchibelan. Pōs treeg misaameraba kerri-guwan linchimumig kuimbe, trube, ñimbe yu piraugurrimbe webambam nebubsrinrun.

¹¹ Pōs nabe ñimun pōrōppe, ‘ñimui nuneg kur’ chib pasrōbendō, menda ishumburba trōmbōig marōptiig, larrō pariig, katō chiwan kōben kan tius kui lataig inchibig, kabe isa waminchib wam kusruptiig, mutsiiraptiig, purō may isa nila wesraptiiba, oyeelōba lindamig kōmōn cha pōrar. Treeg inchibiibabe mabguen lincha mamumig kōn.

¹² ¿Pōs nagan Tiuswei misaamera kōmeelō nōrēelane maig kōnrrabigwan Tius nō asha martrab kuinrun. Inchendō: “Tru ñimui utu tru larrō trōmbōig marōbigwane ñimbe wegutsamig kōn” cha, trenchibig kōn Tiuswei wamwan pōrigube.

¹³ Kaguende Tiuswei misaamera kōmeelō nōrēelane maig kōnrrabigwan Tius nō asha martrab kuinrun. Inchendō: “Tru ñimui utu tru larrō trōmbōig marōbigwane ñimbe wegutsamig kōn” cha, trenchibig kōn Tiuswei wamwan pōrigube.

6

Tiuswei ureemera ambugurri, igurri aleguiyab

¹ ¿Maig marøb pōnrrabelō kuaasamō, ñim mōikkōben Cristogurri nui nuneeba aleguiyam laig tōgagua, Tiuswei misaamerainug kōmōtō, tru sōlgandō tabigwan marmeelaisrō tru kwayam laigwan ‘tamara kettra’ chib, treeg inchib pōnrrōnrrappe?

² ¿Ñimgan ashmeelō kōtirru Tiuswei misaamerabe yu pirau misagwan maig asha maramigwan nōmguen asha martrabelō kui? ¿Inchen yu pirau misaameran treegwan ñimguen asha martrabelō kōbendōbe, trube, chigōben kwayam lailō yandōzhig pub arrubigwane treetōwei asha martrab kaimabelō kō chindah?

³ ¿Ashmeelō kōtirru ángelesmeranguen maig asha maramigwan nam asha martrabelō kuibe, mas yu pirau chigōben pub arrubigwandōbe chinchā asha marmōnrrab kō?

⁴ Inchawei tru kwayam lailō yu pirau chigōben pub arrubigwane iglesi-ayuelō kōmeelan ¿mandōgurri truilan asha martrai pōnrsōbelō kōh?

⁵ Nabe ñimune kōrig purōtrab trenchar, tru nunelai utu kwayam lailan maig kuigwan paya ashib martrabig chigúi mōrōb isum kusrebig ñimui utube, jpaare! ¿ni kandōguen mu kaagō chindah?

⁶ Inchen kan treeg martrab isui urasbe kan nuneeba katōgan nuneeba kwayam lawabe, juezmeran ‘tamara kettra’ chib, eshkab ambubelō kōn Tiuswan kōremō misaameran.

7 Ñimbe ñimuimburappe chiguen kòmø, yandø newan kegørra pønrran, ñimui ututøwei øyeeg kwayam lab pønrraikkurri. ¿Trembe ñimun sølwan marmø kalø marindøgucha, treegu ka puraambub melamdiig kòmø, chindah? ¿Ñimun isa wamincha nilindøgucha, trembe ka awentamdiig kòmø, chindah?

8 Treeg inchibelø kui urasbe sølwan marmø ñimguen kalø marøb, isa wamincha nilamba inchibelø køn, kan trutøgucha nunelandøwei.

9 ¿Tius nø ashib karub waigwan tru sølgandø tabigwan marmeeløbe tru ketig utamigwan utømønrrabelø kui ashmeelø kø chindah? Ñimguen ñimdøwei kegørrab pønrrømøtay: møguelø lata, ishumburmera lata trømbøig marøbeløba, chiwangøben kan tius kui lataig inchibeløba, itøluløpteeløba, møkkølig købendø ishug lataig inchibeløba, møgueløbe møgueløasiyaitø, ishumburmerabe ishumburasiyaitø trømbøig marøbeløba,

10 nileeløba, larrø pareeløba, mutsiirapteeløba, isa waminchib wam kusrupteeløba, purø may isa an nila wesrapteeløba, tru Tius nø ashib karub waigwan truiløbe ketig utømønrrab kui.

11 Ñimgucha møiløbe merrappe øyeeløwei inchibelø købig køn. Inchendø mømibe yandø chishtø pillmailø, ñimbe Tiusweyasiitø tarømariilø, chi kaig kømeeelø lataig tabig kørømariilø køn, Señor Jesucristoi munchiyuba, namui Tiuswei Espiritugurrimba.

Asrbe trømbøig maramigweyasig kømøtø køn

12 “Chiwandøgucha nan meriimíg, na ka maramdiig købendø”, kerigubabe chi purugunrrabgailø køn. “Chiwandøgucha nan meriimíg, na ka maramdiig købendø”, na treeg marøb megamig kønrrai na øyeeg marameløyu ni møyutøgucha truiig srua yaig pasrønrrabgucha kømur.

13 “Mamibe patsauweyasig køben, patsøbe mamigweyasig køn”. Inchendø Tiusbe mønundøgucha i pabaløwanba chigaanrrai pinishinrrab køn. Asrbe ishumburmeraba, møgueløba trømbøig marøb tøgagømigweyasig kømøn. Treeg kømøtø, asrbe Señorwein køben, Señorbe asrweyasig kømøn.

14 Pøs Tiusbe Señorwanma katøle øsig kønrrai kusraig køppe, namungucha katø treetøwei øsig kømig kønrrai nui maramburab mariitøga kusranrrun.

15 ¿Ñimgan ashmeelø køtirru, ñimui asrmerabe Cristoi asrutøwei pønrrabelø kui? ¿Inchen nabe Cristoi asru pønrrabelan wesrawa, kan kaig ishug nui asrwan anwei yanøbigweinug kandø misrtraí mara, truyu pønstrønrraitamaguh? ¡Managuen treebe kømønrrun!

16 ¿Kabe ashmeelø køtirru, tru treeg kaig ishumba kandø misra kaig mariibe, yandø kan asrtø lataig kørømisrig kui? Kaguende trenchibig pørig pasran: “Tru pailøbe kan asrtø kønrrun” cha.

17 Inchen møikkøben Señorba kandø misriibe, nøba kan espíritutø køn.

18 Ishumburba, møgueløba trømbøig maramigugurrimbe wegørray. Møguelø katøgan chinetø kalø mariiløbe nømui asrutøwein kømøtø, nøøø køn. Inchen ishumba, møøba asrtøga trømbøig mariibe, nui asrwandøwei trømbøig maran.

19 ¿Kabe ashmeelø køtirru, ñimui asrbe Espiritu Santo nø kebya pasraig tab ya kui, ñimuinug pasrabig tru ñim Tiuswan uti Espiritu? Ñimbe ñimdøwei ñimuyasig kømøn.

20 Kaguende Jesucristo nuwei peniilø køn. Inchawei ñimbe ñimui asrtøga Tiuswan maya nuguen tabig indíg kønrrai maray.

7

Kasharawarbe maig kōmigwan waminchibig

¹ Trube, mōimbe ñim nan kilga pōra paya ørig kōbigwan trencha lōtōnrrab inchar: Pōs tab kōn cha, kan mōg kasharamø, nōttiig kōmig.

² Inchendø ishumburmeraba, mōguelōba purø trōmbøig marøbelø kuikkurri, mōgueløbe mōitøgucha nui srain tōgaig kōmig kōben, ishumburmerabe mōitøgucha nui keg tōgaig kōmig kōn.

³ Pōs keebe srawei asrwan tab kōnrrai maramig kōben, sraimbe nui kewei asrwan tab kōnrrai maramig kōn.

⁴ Kaguende sraimbe, nui asr kuimba nuimburaptø tōgagømig kōmøtø, keg nø asamig kōben, katø kekkurringucha nui asr kuimba nuimburaptø tōga kōmøtø, srai nø asamig kōn.

⁵ Inchawei tru ñim Tiusba wamindamigutø kebamrrab, kan maya yanagatig ñim pailø lata tru treegwan marmønrrab wamincha kōmøwabe, kanikkurri kanikkurri asrwan tranmønrrab inchimumig kōn. Tiusba wamindamigwan chab wamincha, trugurrimbe ñimui asrwane katø treetøwei tranamig kōn, tru treegwan marmuikkurrindø Satanás ñimun kegørrøsrkønrrab chigøben mara ashmønrrai.

⁶ Nabe iigwane ka øyamay maramdiig kōn chatø eshkar. Ke treeg maramig kōn cha, karua pasrmøtø.

⁷ Pōs maya mōguelōba na lataitøwei nōmdeelø kuimbemab isur. Inchendø mōitøgucha tru nōm trendø treeg kōmigwan keta tranig uta tōgar kōn Tiusweinukkurri arrubigwan, mōibe øyamayig kōbene, katø mōibe peemayikke.

⁸ Nōmdeelanba, piudameranbabe trendamønrrun: Na lataitøwei natø kōrrømisrimbe tab kōbsruinrrun cha.

⁹ Inchendø kaig marmø uñibig uñchab kaimabiibe, kaig marøg kōbiitø ke chinsraatø inchib uñibgunrriibe kasharaikken søl kōnrrun cha.

Kasharawarbe petiyamumig

¹⁰ Inchen kasharawarmerane iigwan karua pasrar; na karua pasrig kōmøtø, Señor nø karua pasrig kōn: Sraimbe kewane kuchimumig kōn cha.

¹¹ Inchen srai kuchippe, trube, nōtø tsumig kōn. Trengømuppe, nui keeba katøle tammay kōrrømisra lindamig kōn. Inchen keebe nui srawane tarømisrøb kutsamig kōmøn.

¹² Inchen katøganelane Señor trendaig kōmøtø, naimburab na trendamønrrun: Mōikkōben kan nuneg, nui sraimbe Tiuswan kōremíig pera kua, nø ka lincha Meganrrab megabene, keebe tarømisrøb kutsamig kōmøn cha.

¹³ Inchen kan srai, keebe Tiuswan kōremíig tōgagua, nø ka lincha uñchab inchene, sraimbe tarømisrøb kutsamig kōmøn cha.

¹⁴ Kaguende tru keg Tiuswan kōremíibe nui sraingurri Tius kaasiimíig kōben, katø Tiuswan kōremø sraimbe, nui kekkurri Tius kaasiimíig kōn. Pōs treeg kōmumibe ñimui ureemerabe kaiba lindig kōbsruben, mōimbe yandø Tius tabig kui asilø kōn.

¹⁵ Inchendø mōikkōben tru pailøyu Tiuswan kōremíig tarømisra ibene, ka ibasamig kōn. Pōs øyegube, kan srai lata, kan keg lata Tiuswan kōrebeløbe imønrrai inchib ke treegutø melønrraingucha pōnsrailø kōmøn. Kaguende Tiusbe ñimun wamappe, chi isumø pishindø tab waramig kōnrrai wamig kōn.

16 Pøs, ¿ñi sraimbe ashtirru, ñi ñui kewan inchippa kaigyugurri wesram kønrrab kui? Kabe ¿Ñi kekkucha ashtirru, ñi ñui srawan kaigyugurri wesram kønrrab kui?

Tiuswan ashibig maig kømigwan waminchibig

17 Inchendø ñim møigwandøgucha ñimun Señor maig uñchai marig køben, treegutø unamig køn, tru ñi Tiuswan nebua ashib uras maig købig kuibe, trumaytø ka unamig køn. Chu iglesiamerayuelandøgucha iigwan øyamay marøb kønrrai nabe treeg karua pasrar:

18 ¿Tru ñui isubigwan Cristoing pasra tøgagønrrai wamab uras yandø circuncidaweikken købig kõtirru? Trube, circuncidaweig kømønmb ashchai inchimøta. ¿Ñim møikkøben ñui isubigwan Cristoing pasra tøgagønrrai wamab uras asru circuncidamig køben wamig kõtirru? Trube, treeg marmig købig kuabe, circuncidanrrab inchimøta.

19 Kaguende circuncidaweig kui chi kønrrab kømøwei, circuncidamig kui chi kønrrab kømøwein køn. Tius maig maramigwan martrai pønrrailan møra marig, truike tabig køn.

20 Tius ñimun wamab uras møitøgucha ñim mailø køben, treeg wamiiløbe, trumaytø ka kørromisramig køn.

21 ¿Tru ñun wamab uras karuindiig megabig kõtirru? Trube, trunune chi isumøta. Inchendø ka karuindø megabig kømønrrab indamdiig købene, trube, treegwan mar.

22 Inchen karuindiig megaben Señor waminabiibe, Señorweimburappe yandø webya pasran. Inchen katø treetøwei ka karuptø srua kuig megabig kømøtø, nuimburab uñen waminabiibe, Cristo karuindiig meganrrabig køn.

23 Kaguende ñimbe Tius nuwei penilø kuig køppe, møguelø karuindiig melabelø kømøtø kuy.

24 Inchawei, nai nunelø, ñim møitøgucha ñim maigu pønrrøben wamiiløbe, Tiusba treegutø ka kørromisray.

Nømdeelan wamindig

25 Inchen tru kasharameelø nømdeelaiburappe, Señor nø karua pasriibe chigagur. Inchendø Señor nan lastima asigwan nebua tøgagúikkurri, na maig taigwan ñim treeg kuitamab isumdiig kuinawa, naimburab ñimun øyamay maramdiig køn chinrrab inchar.

26 Pøs møi ya øyee chinetø isumdiig købene, maig pasrabiibe trumaytø kørromisramig søl lataig kui ashar.

27 Inchen ñi srain tøgag kuabe, trube, tarømisrtrab inchimøta. Kabe chi sraingaig, ñitiig kuabe, trube, srai tøgagønrrab lamøta.

28 Inchendø ñi kasharaikkucha, chi kaig marig kømøwein køben, katø kan srusø kasharaikkucha, chi kaig marig kømøwein køn. Inchen køben tru kasharabeløbe chinetø nebuig pønrramig arruben, isui melamig kønrrab køn. Pøs nane ñim treeg nebuig melai ashmuinrrabna køtan.

29 Inchendø nabe, nai nunelan, ñimun trenchinrrab inchar: Srabe kwalømmera pumibe purø landøraim pasran cha. I landøzhig pasrabigwan Tiusweimburabigwan martrab, sralø tøggarbe sralø tøggar kømøwa lataig pønrray.

30 Inchen truba isui kishib melabeløbe isuig kishib pønrrømøwa lataig pønrrøben, truba kasrag pønrrabeløbe chi kasrag pønrrømøwa lataig pønrrøben, chigøben penabeløbe chigucha penømøwa lataig pønrrøben,

³¹ katø yu pirau chine købigu tab kui mørøb amøñibeløbe ke truitø srua yailøgucha amøñimutig køn. Kaguende yu pirau øyeeg pasrabiibe ka pureb arrubiitø køn.

³² Nane ñim chigucha chi isumikkaig treeg amønaimbemab køtan. Kaguende kan kasharamíig nøtiibe Señorweimburabigwan katøguchinguen isun, Señor tab kui wanrrai maramigwan.

³³ Trune kasharaweibe yu pirau chigøben købigwan mas isun, nui srawan mandø tab kui wanrrai maramigwan.

³⁴ Incha nø chi martrab isuibe pabalø, pabalø isuim pasran. Inchen kan ishug kasharamíig, nøtiig, kabe kan srusrø nøtiibe Señorweimburab marøb megamigwan mas isun, nui asru lata, nui espíritu lata Señorweyasiitø kønrrab isua. Trune kasharawa ishuube yu pirau chi købigwan mas isun, nui kewan mandø tab kui wanrrai maramigwan.

³⁵ Iigwan na Kerrigu ñimun trenchippe, ñimundøwei tab kønrrai trenchar. Kabe ñimun ke truyutø iløsrka melønrraingucha inchimøtø, masken mumay amønamiigwan treeg marøb amøña, Señorweimburabigwan tab chi iløsrkaimíig marøb melamig kønrrai inchar.

³⁶ Inchen mu møøba kimø srusran kan møg kasharanrrab misraig, nø tab marmurmab kørig isub, katø tru srusrøgucha yandø køligwein køben, treekkurri møøbe yandø kasharam kui ashabe, trube, maig maramdiig køben treeg maramig køn. Treebe chi kaig marøb pasraig kømøtø køn. Ka kasharay.

³⁷ Inchen kan møg nui manrrau nø maig isuigwane treeg martrab kandø isua pasrabig, katø nui asru maig marøg købig arruben, truig mumaygucha srua irramamø, tru nø maig isua tøgagúigwan isua møra tøga pasrøwa, tru srusrøba kasharamønrrab nø treeg isua pasrabiibe, kasharamuig søl køn.

³⁸ Inchawei tru kasharanrrab misri srusrøba kasharaig søldøwein køben, katø kasharamuibe mas tabguen køn.

Piudameraimburab waminchibig

³⁹ Keg øsig uñene, sraimbe nøøø kønrrab kømø, kandø køn. Inchen keg kwabeneguende, yandø nuin kuin køben, mubagøben ka kasharamig køn, Tiuswan ashibiibabe.

⁴⁰ Pøs na isuibe øyeeg køn: katøle kasharamø, nøtø kørrømisrikken, mayanguen tab kønrrab kui. Nagucha Tiuswei Espiritun tøgagurmb isua, trenchib pasrar.

8

Cierton tius kømeeelan trani yaumeran mandø indamigwan waminchibig

¹ Animalmera kweecha tru yauwan taska mari tiusmeran trana pønrsraigweimburappe nambe mayeeløba nebua ashibelø ker. Pøs tru nebua ashib kusreibe ka nørreelø misrøb pønrrønrrai maren, trune tru undag købig Tiusweinukkurri arrubiibe Tiusweimburabigu nørrøram purugubig køn.

² Møikkøben maitøguen nebua ashibig kurmba isubiibe, tru maig kuigwan tab nebua asamigwane katøgucha tab ashmø srø køn.

³ Trune møikkøben Tiuswan undaguigwane Tiusbe nune mu kui nebua asan.

⁴ Trube, tru taska mari tiusmeran pønrsraig yaumeran maigweimburappe ¿mandø chinrrab? Pøs tru taska mari tiusmerabe yu piraube chigucha kømeeleø kui nambe ashibelø ker, katø Tiusbe nøtø kandø kui.

⁵ Pøs srømbalasrø lata, pirau lata tiusmera cha wamiilø møiløgøben købwei indan ('tiusmera køn' cha, wamiiløba, katø chiwandøgucha nøm karub purra-belø cha wamiiløba truba nørrø køb lataitøwei).

⁶ Treeg kuingucha, namuimbe Tiusbe kandø nøtø køn, tru Møskai. Tru chigurrimbunø arrubiibe nuinukkurrindø arruben, katø nambe nuyasig øsig amøner. Katø Señor Jesucristo kandø køben, chitøgucha købiibe nøgurriwei pønrrøben, namgucha nøgurriwei øsig amøñibelø ker.

⁷ Inchendø mayeeløbabe iigwane chigúi nebua ashmeelø køn. Møiløbe katøgucha tru taska mari tiusmeran tøgagøm kusreelø købig kua, tru mamimeran mape, tru tiusmeran trani mamig kønmb isua mabelø køn. Incha tru nømui isub kebachib pasrabigu kullaguelø kuikkurri, yandø kaig mararmab isub kørørmisrøbelø køn.

⁸ Pøs mamibe Tiusweinug nam katøguchi kemalla pønrramig kønrrai marmøwei, katø nam tru mamuikkurri mas kailø misrtrab kømøwei, kabe nam truigwan maikkurri mas tabelø kønrrab kømøwein køn.

⁹ Inchendø ñim tru chi kalø kønrraitamab isumikkaig marøb tøgagúigwane kullaateeløbe truyu srurrengwanrrain kømøtø ashiptø maray.

¹⁰ Kaguen møikkøben nui isub kebachib pasrabigu kullaatiig tøgagig, ñi tru maig kuigwan yandø tab nebua ashib kusrebig, tru taska mari tiusmerai tab yausrø ñun mab wai ashabe, ¿nøgucha tru taska mari tiusmeran trani mamimeran ka manrrurmab isumønrrab køh?

¹¹ Inchawei tru maig kuigwan ñi nebua asha kusrewa tøgagúig, truiikkurrindø kan nuneg kullaatiibe yandø kebeña, pinab pinønrrun, Cristo nuyasig yamba purøgwaig købigwan.

¹² Inchawei øyamay tru nunelan kaig marøb, nømui isub kebachib pasrabigu kullaguigwan kørriincha kørørmarøb pønrrappe, ñimbe Criston kaig marøb pønrran.

¹³ Inchawei mamibe nai nunewan kebenøsrkamitø kønrrab købene, managuen nabe yawane mamumønrrun, nai nunewan ka srurrengwan-garumønrrappe.

9

Cristo nøashib karua ørig maig marøb pasramig

¹ ¿Maig maramdiig køben treegwan maramig nabe tøgagig pasrømubra chindah? ¿Nabe Cristo nøashib karua ørig kømubra chindah? ¿Kabe nabe Jesús namui Señorwan ashmuig kuig kø chindah? ¿Señorweimburab na marøb pasraigu yell kørørmisrøbeløbe ñimwein kømøtirru?

² Pøs møilaimbe nabe Cristo nøashib karua ørig lataig utig kømuinaindøgucha, isa kømøtø, ñimuimbeguende nøashib treeg karua ørig kur. Kaguende Señor nan nøashib karua ørig kui asamdiibe ñimwein køn.

³ Nan møiløgøben 'øyeeg marin køn' chib, payibelane 'øyan køn' chib, kusra løtamønrrun.

⁴ ¿Kabe nam købgan mab, muchib indamig kømuitarru? cha.

⁵ ¿Kabe nam købgan Tiuswan ashibigwan srai mara, pera pønrramig kømuitarru? cha, tru katøganelø Cristo nøashib karua øriiløba, katø tru Señorwei trag nuneløba, katø tru Pedroba, truilø lataitøweingue.

⁶ ¿Kabe naba, Bernabébatøgan namui taska maramigwan elatsamig kømønrrain kuitarru, namui øsig waramig marøb kuigwan?

⁷ ¿Kan suldauma maig kuaasamø nø suldau pasraptøga, chi palabigwan nui andøgatøwei penabiibe? ¿Kan mu kuaasamø uvas tusrmera ellguawa, uvas

misren, truigwanguen mamíibe? ¿Kan mu kuaasamø kabramerane ashib tøgagøbendø, pitsøn sunna muchimíibe?

8 Kabe na øyeeg chib pasrappe, ¿møguelø isuimay trendaig tamagueh? ¿Tru maig maramigwan martrai Moisés pørikkucha treetøwein chibig kømuitarru?

9 Kaguende tru maig maramigwan martrai Moisés pøriguma øyeeg chibig pørig pasran: Kan wey tirigun kwattraí itøbunab megabigwane mabashig kømub pusalgutsamig kømøn cha. ¿Kabe Tiusbe weymeran isua trendaig kø chindah?

10 Øyeeg chippe, ¿namuimburab trendaig kømønrrab kø chindah? Pøs namuyasigwei pørig kuig køn. Kaguende pirowan arab megabiibe mamuitamab isuawei kwallib megaben, katø mugøben tirigun kwattraí itøbunab megabiibe tru misrigwan manrrab isuawei marøb megan.

11 Inchawei nama ñimuinug Tiusweimburabelan ellmarig købene, trube, ¿ñim chigøben tøgagúigwan maitøguen nam utamig menrra indig kønrrab kø chinderah?

12 Tru kaneløma nømui chi palabigwan ñimur utambuawei utig købene, ¿nambe treetøguen kømø, utamigwein kømuitarru? Inchen køben, nambe tru treeg utamigwane managuen treebe marmuig køn, Cristoí tabig srø wamwan chigøben iløsrkøbelø pønsrømønrrab, chigúindøgucha ka puraambub melaig køn.

13 ¿Ashmeelø køtirru, Tiuswei yau marøb melabeløma truyugwan maben, katø Tiuswei altaryu marøb pønrrabeløbe truyugwan mabelø kui?

14 Inchawei Señorbe treetøwei karua pasrig køn, Tiuswei tabig srø wamwan eshka kusrenanøbeløbe trutøga øsig warønrrain cha.

15 Inchendø øyeeg maramdeelø kuindøgucha, nabe managuen trunune marmuig køn. Katø iigwan na pørbøgucha, nan treeg martraimab isua pørmur. Pøs na chi treeg marmøwagurri na øyeeg purø tab kui mørøb møg inchib waminchib pasraigwan nan mugøben kerramøwatø, kwamikken søl kønrrautan.

16 Pøs Tiuswei tru tabig srø wamwan na eshka kusrenanøbe pasraibe nainetø møg inchib waminchib pasramig kømøtø køn. Kaguende nane truigwane martraim pasrig kur. ¡Pøs Tiuswei tabig srø wamwan na eshka waminchimuinaisruandøbe, nane maig kuaasamø!

17 Inchawei maramigwan na naashib martrab isua marabe, truburø utamigwane utamønrrun. Inchen treeg kømøtø, ke nan trunun martrai inchendø marinaisruandøbe, trube, tru karua pasrigwan ka marmøn chimønrraindø marig kørørrmisrtrun.

18 ¿Pøs trube, tru na marøb pasraimburo utiibe chi kønrrab kø? Na Tiuswei tabig srø wamwan eshka kusrenanøppe, truburø chi tranrrain kømø, na ka yandø waminchib pasraig, truig køn, tru Tiuswei tabig srø wamwan waminchib uña, na miambuawei miamigwan treeg utab pasrømø kagøbasig.

19 Nabe mu karuig megamíig kuagucha, nabe natøwei mayeelø karuindiig meganrrab pasramisrar, maya nebuingatig Cristoyasig misag nørøø nebua tøgagønrrab.

20 Nabe judíosmerai utu uñippe, kan judío lataitøwei uñibig kur, nøm Criston nebua ashchai martrab. Tru maig maramigwan martrai Moisés pørig maig chibig truig ke nø karuig natøweinguen ke treeg pasrømuinaindøgucha, tru pørig maig chibig køben treeg melabelai utube, trube, tru pøriilan marøb megabig lataig uñibig kur, tru pørig maig chiben treeg melabelan Criston nebua ashchai martrab.

²¹ Inchen Moisés pørigwan tøgagømeelai utube, treetøwei nagucha chigaig lataitøwei uñibig kur, tru maig maramigwan pørig chigaig melabelan Criston nebua ashchai martrab. (Tius maig maramigwan martrai pørigwan na chi asamig chigaig kønrrab kømøtø, Cristo maig martrai karuigwan trunun nabe marøb megabig kur.)

²² Kullaateeløbabe nagucha kullaatiig lataitøwein pasrabig kur, tru kullaateelan Cristoin kønrrai martrab. Mu misaamerabatøgucha, nøm mailø køben, treeg kønrrab inçhibig kur, møilandøguen chinchagøben kaigyugurri wesranrrab.

²³ Iigwan na kerrigu øyeeg marøppe, Tiuswei tabig srø wamgurri øyeeg marøbig kur, truyugurri purø tabig tøgagig arrubigwan nagucha trunun tøgatø utønrrab.

²⁴ ¿Ashmeelø këtirru misaamera nørro tulaamba ashib purrainug møig kanab luldashchab luløbeløma luløppe, søteeløbawei lulendø, tru kanaigwan utabiibe kandø købig kui? Inchawei ñim luløppe, tru kanawa utamigwan Tius tranig utønrrumab isua lulay.

²⁵ Inchawei møikkøben treeg lulameløyu kebya pasramisrøbiibe, chiyutøgucha nui asr maig marøg kətanmaptø marøb megamøn. Pəs truiløbe kan corona ka petø minchib pinønrrabigwan utønrraptø treeg maren, trune nambe corona managuen minchib pinønrrabig kømfigwan utønrrab Tiusweiwan marøb meler.

²⁶ Inchawei nabe luløppe, chu pumgüinguen mørmbendø, luløbig lataig luløb megamøwei, katø kan kwayabig nøørotø, nøørotø kurrøb kwayab lataig pasrømøwei inchar.

²⁷ Treeg kømøtø, nabe naasiitøwei nai asrwane purø murigu purayam kusrenrrai kusrenanøb ke treegwan kønrrai inçhibig kur. Inchippa na katøganelan eshka kusrenanøb pera pasrøwa, natøweinguen kaiman fainab megamønrrappe.

10

Taska mari tiusmeran Tius kui lataig mara tøgagømumig

¹ Nabe, ñim nai nunelan, tru merrabsrø namui kølli misag, judíosmera, mayeeløba wafi umbu melab, katø mayeeløba mar Rojoyu larraambub indigwan pesannamø, isua kønrrai inchar.

² Incha nømbe mayeeløba tru wañimba, marba pinøgasrøb pinøbuliilø kuikkurri Moisésba kanbalatø pønrran.

³ Incha katø treetøwei mayeeløba Tiusweimburab mamigwandøwei mab,

⁴ katø mayeeløba Tiusweimburab piwandøwei muchib indig købig køn. Kaguende tru nu srug nømun lincha ibig Tius tranigugurri webarrub piwan nømbe mutsig køn. Inchen tru nu sruube Cristo kuig køn.

⁵ Inchen treeg amrruig kuindøgucha, misagwane kerrigu lutauwan Tiusbe chi tab kui ashmuig købig køn. Incha nømui asrmerabe mu misag warab waraimønug truøø kwaig waramig nebuig køn.

⁶ Øyeeg pureppe, nam trunundøguen asha kusremig kønrrain kuig køn, nam ke chinchimmøø inçhib chigøben kailan isub pønrramig kømønrrai, israelitasmera ke chinchimmøø inçhib isub pønrrab lataitøwei.

⁷ Pəs nøm møiløgøben chiwangøben kan tius kui lataig inçhibelø lataitøwei marmøtay ñimbe. Pəs tru uras nøm øyeeg marigwan treeg chibig pørig pasran: “Tru misaamerabe manrrab, mutchab purramisra, trugurrimbe pailamburab pailanrrab kurrig køn” cha.

⁸ Katø nambe menda mōguelōba, menda ishumburmeraba namui asrtōga trōmbōig marōbelō kōmumig kōn, tru mōilōgōben truilō treeg marōb latawei. Incha treekkurri kan kwalōmyutō misaamera 23.000 kwaig kōbig kōn.

⁹ Katø Señorwangucha ke chinchibig kōtamōrtrab kaig inchimumig kōn, tru mōilōgōben truilō ke chinchibig kōtashchab inchibelō latawei. Pōs truilōma ulmera tsatsiilō kwamig nebuig kōbig kōn.

¹⁰ Nilō waminchib ñimuinetō namig, Tiuswan mulla mōrmōtay, tru mōilōgōben truilō treeg marōbelō lataitōwei. Truilanma tru kweechib ángel arrua, nōmune pinisaig kōn.

¹¹ Israelitasmeran øyeeg pureppe, nam trunudōguen asha kusremig kōnrrain kuig kōn. Incha nam kusremig kōnrrai pōriilō pōnrran, nam yandō tru srabe kwalōmmera pui warab misaamerasig.

¹² Inchawei mōikkōben Tiusweinug yandō ke tab pasrarmab isua pasrabiibe, trube, peñchab kōmō, purō tab isua pasrau.

¹³ Ñim kebenōsrkōnrrai indinab chigōben puinab pōnrraibe, ke mun treeg nebuí asiimíig kōmōtō, mundōgucha treeg nebuí asig kōn. Inchendō Tiusbe managucha nō maig tabig kōppe, trendō treeg kua jkatō! ke ñim kaima melōnrraingatikkucha treeg pōnrrōbashmōnrrun. Ke chinchibelō kōtashchab puim pōnrrōbene, truguetōtō treegugurri wegōrramigwan tōgatō tranōbig kōn, ñim kōrrmōm, ka puraambamig kōnrrai.

¹⁴ Inchawei treeg kōbene, nai undaarailō, tru taska mari tiusmeraimburabigwane kerriguwan tarōmisray.

¹⁵ Nabe ñimun waminchippe, yandō tab chigúí mōrōbelan lataig waminchar. Na wamindigwane sōl kōtashchab isub purray.

¹⁶ Tru copa mayanguen tabig, tru nam, ‘mayanguen pay’ tain copabe, ¿tru Cristoi ani namgucha kanguelarrōtō lata nōba pōnrraig truíg kōmuitarru? Katō nam pirriwan pirisha maibe nam kanguelarrōtō Cristoi asru kanbalatō pōnrraig ¿truíg kōmuitarru?

¹⁷ Kaguende pirrima kandō kuig kōppe, namgucha truba nu kōbendō, nambe kan asrtō ker, pōs mayeelōba kan pirriwandō mabelōgurri.

¹⁸ Tru israelitasmeranma ñimguen isua asay: Tru kweecha tranig animalmerai yauwan mabelō, treeg marōppe, ka yauwandō mamōtō, ¿altarweimburbigwangucha tōga marōb pōnrrōmuitarru?

¹⁹ Iigwan na øyeeg chippe, tru taska mari tiuswan trani yaumbe chi kōn chib, kabe tru taska mari tiusbe chi marōbig kōn chib pasrōmur.

²⁰ Pōs nabe treeg kōmōtō, Tiuswan ashmō misaamera judíos kōmeelō tru animal kweecha traniibe Tiuswan kōmōtō, kwaimandziimeran tranig kōn cha trenchar. Incha nabe ñimune kwaimandziimeraba kanbalatō marōb pōnrrōmōnrrai inchar.

²¹ Ñimbe Señorwei copayugwan mutsamba, kwaimandziimerai copayugwan mutsamba inchimumig kōn. Katō Señorwei mishatsigúigwan mamba, kwaimandziimerai mishatsigúigwan mamba inchimumig kōn.

²² ¿Kabe nambe peg tiuswan keesha pōnrramisrōb Señorwane ke larrō namishinrrab inchab kō? ¿Kabe nambe nō lataguen kōmō, purab marptaeelō kōbra chindah?

Chiwandōgucha marōppe, Tiuswan tabig wamindig kōnrrai maramig kōn

²³ Pōs: “Chiwandōgucha meriimíig, ka maramdiig”, kōbendō, chiwandōgucha lutōgurri maramibe chi tabig kōmōn. Pōs: “Chiwandōgucha meriimíig, ka maramdiig”, kōbendō, lutōgurri truilōbe Tiusweimburab nōrrōramigube chi purugunrrabgailō kōn.

24 Mutøgucha ñuimburabigwandø tab kørnrai lamøtø, katøganelaimburab tab kørnrai lamig køn.

25 Yau yanøbyu maig yau yanbashtø ka pena may, ñimui isub kebachib pasrabikkurri chi paya mørøb pønrrømøtø.

26 Kaguende: “Pirøba, truyu chi pønrrabeløbañau kerriguba Señorweindø køn.”

27 Inchen møikkøben Tiuswan køremíg nui yamay manrrab ñimun amrunrrigay chiben, ñim ambabe, ñimun chi manrrai pønrsøbendø, mamig køn, ñimui isub kebachib pasrabikkurri chi payib purrømøtø.

28 Inchen ñimun møikkøben: “I yaumbe tru taska mari tiusmerai kweetsi yaun køn” cha, trenchibene, trube, mamumig køn, tru treeg yaun køn cha eshkabigwan mindisha kørrømarmønrrappa, katø trugurri isub kebachib pasrabigu kalø køn chibig tøgagømønrraimba.

29 Inchendø nabe tru isub kebachib pasrabig ñuinus pasrabigwan waminchib pasrømøtø, nabe tru katøganuinuiguigwan waminchib pasrar. Na chi iløsrkaimíg pasraigwan katøgan møweinug isub kebachib pasrabig nan kalø marøptiig kui mara, chiburø treeg marinab pasramibe chigagøn.

30 Mamigwan na Tiuswan ‘mayanguen ungwa, ungwa’ cha maben, trube, çnane chindimbarre ‘kalø marøptiig køn’ tah, tru na ungwa taig mamigwan maikkurri?

31 Inchawei mabyu lata, muchibyu lata, kabe chi peg marøbyu lata, chi marigutøgucha Tiuswan maya nuguen tab indig kørnrai maramig køn ñimbe.

32 Pøs mu misaamerandøgucha, judíosmeran lata, griegosmeran lata, Tiuswei iglesian lata ka srurrengwanrrai marmøtay,

33 na mundøgucha chiyutøgucha lata tab kørnrai inchib megab lataitøweingue. Nabe naimburaptø tab kørnrai lamøtø, misaamera truba nørrowan tab kørnrai inchibig kur, nøm kaigyugurri wesrailø kørnrai.

11

1 Na maig marøbig køben, ñimbe trunun asha marøb melønrrigay, Cristo maig marøbig køben, na trunun asha marøb megab lataitøweingue.

Tiuswei yau maig kømigwan waminchibig

2 Nabe ‘ñimune tabig marin køn’ chib mayanguen tabig waminchar, kaguende ñimbe chiyutøgucha nane isua melab, na ñimun maig waminchib kusrenniilane ñimbe elachimø, tøgga pønrraimba.

3 Inchendø nabe iigwan nebua asha kørnrai inchar, Cristobe maya møguelaim pala nø ashib pasrabig, nø tur køben, katø møøbe ishuwan nø ashibig, nø tur køben, Tiusbe Criston nø ashib pasrabig, nø tur kui.

4 Mu møøtøgucha turwan nebetsa Tiusba waminchib, kabe Tius maig karuigwan eshkab waminchib, treeg pasrabiibe, Cristo, tru turwane chigucha kømíg kuig lataig marøb pasran.

5 Inchen mu ishuutøgucha chi nebetsømø, turtiig Tiusba waminchib, kabe Tius maig karuigwan eshkab waminchib, treeg pasrabiibe, møømisag, tru turwane chigucha kømíg kuig lataig marøb pasran. Kaguende pusrugwan mulla, parig lataitøwein køn.

6 Inchen ishug nebetsømíibe, trube, pusrugwan mulla, paramig køn. Inchen ishuwan pusrugwan mulla, pariibe kørig kørnrraptiig købene, trube, turwan nebetsaig kømig køn.

7 Inchen møøbe turwan kasrøb nebetsamig kømøn. Kaguende møøbe Tius nø maig køben treetøwein køb, katø Tiuswei tru purø nuig tørguegnabigwan

nuinug kenamarøbig kòn. Inchen ishuumisaabe møwei tru tørguegurnabigwan kenamarøbig, treeg kòn.

⁸ Kaguende møøbe ishuumisagweinukkurri arrubig kømøtø, ishukken møweinukkurri arrubig kòn.

⁹ Inchagucha tru srøsrø Tius mowan marøppe, ishuumisagweyasig marmøtø, ishuwanguen møømisagweyasig marig kòn.

¹⁰ Inchawei treekkurri ishuube møg maig chiben treeg megabig kui ashchai, ánglesmeragurri nui turwane nebetsaig kømig kòn.

¹¹ Inchendø Señorweinuube møømisag ka nuimburaptø kønrrab kømøwei, ishuumisag ka nuimburaptø kønrrab kømøwein kòn.

¹² Inchawei ishuuma møweinukkurri arrub lataitøwei, møkkucha ishuumisagweinukkurri kal-labig kòn. Inchendø kerriguba arruppe, Tiusweinukkurri arrubig kòn.

¹³ Inchawei ñimdøwei maig kətashchab isuy: ¿Ishug misaabe turwan chi nebetsømfig Tiusba waminchib pasramig søl købsru chinderah?

¹⁴ ¿Inchen kan mowane pusrugwan yabig wanøsrkøb tøgagømibe trømbøtiig kørikken kønrraptiig købig kui, tru trendø treeg kønrrai chine mara pønrsrailøtøweinguen kusrennøbig kømuitarru?

¹⁵ Trune ishuwane pusrugwan yabig wanøsrkamibe nuimbe truba tabig kòn, kaguende ishuwane turyu nebetsig lataitøwei pusrugwan tranig kua.

¹⁶ Inchen møikkøben 'øyeelan treeg kømøn' chib, chinetø chib waminchig kui indindøgucha, nambe øyeelanwei maren, katø Tiuswei iglesiamera chigucha treetøwei marøbelø kòn.

Señorwei mamigwan mabyu maramgailan marøb

¹⁷ Na øyamay maramig kòn chib yu wamindamigube, '¡kan waachaalleelø! yangucha tabig marøb melain kòn' chinrrab inchimur. Ñim tulundzunappe, ka trømbøig martrab tulundzunabelø kuin kòn, chi tabig martrab kømøtø.

¹⁸ Na pølbasa wamindamibe øyeemerrig kørre, ñim kan iglesiasun tulundzunøbendø, ka nøørø nøørø misra warønrraptørre tulundzunabelø kuigwan, pøs møyube nabe treegwein købwei inditamar.

¹⁹ Pøs øyeeg nømuin kui nøørø misrøb ñim treeg inchib waramig palabwei indan, ñimui utu møilø sølwan isua marøbelø kuitashchab truyu asamig kønrrai.

²⁰ Pøs ñim kanbalatø lynchib tulundzunappe, Señorwei mamigwan manrrab tulundzunømøtø,

²¹ møitøgucha ñimui mamigwanmerrig manrrab tulundzunabelø kòn, katøganelan munugumøtø, kane parøgwaig wannebe, kane mutsiguikken wanrrab.

²² ¿Kabe ñimbe yamera chigargøtirru mab, muchib purramig? ¿Kabe Tiuswei iglesiane kaashib, chigar purrabelane korig purørtrab inchigueh? ¿Nabe ñimune mandø chinrrab køh? ¿Kabe, ¡waachaalleelø, yangucha tabig marin kòn! chinrrab kø chindah? ¡Øyeeg marigwane kan waachaalleelø truba tabig marin kòn! chinrrab pasrømur.

Señorwei pirriwanba, copayu mutsigwanba mandø maramigwan Pablo tab eshkab

(Mt 26.26-29; Mc 14.22-25; Lc 22.14-20)

²³ Kaguende tru na ñimun katøle kusrenanigwane nabe Señorwan utig kuig kòn: Señor Jesús wan tru ashig kømui inchibelan tranrrab yem, nøbe pirriwan muta,

²⁴ yandø ‘mayanguen pay’ cha, pirishabe, trendaig køn: “Iibe nai asr køn cha, tru ñimuyasig kwanrrai tranig. Iigwan øyeeg marøppe, nan isub kønrrab martrigay” cha.

²⁵ Incha tru mamigwan chab mabe, katø copangucha mutabe, trendaig køn: “I copabe tru nai anindøga Tius tru srø acuerdo mara pasrig, truig køn cha. Iigwan mutsimørig, chu uraskucha nan isub kønrrab martrigay” cha.

²⁶ Inchawei chu uraskucha i pirriwan mab, i copayuigwan muchib indimørig, Señorbe namuimburø kwaig købig køn cha ñimbe eshkað pønrran nø arrumnegatig.

Señorwei mamigwan sølwan maramig

²⁷ Inchawei møikkøben maig købash inchendø, Señorwei pirriwanba, copayuigwanba mab, muchib inchibiibe, Señorwei asrwanba, aniwana nuinug trømbøig marøb pasran.

²⁸ Inchawei møitøgucha ñimashib maig pønrrabraitashchab isummerrig isuy. Trugurrimbe pirriwan mab, copayuigwan muchib indamig køn.

²⁹ Kagunde møikkøben Señorwei asrwane ni kan maig kerahmabguen isua ashmøtø, tru mab, muchib indiibe nuyasiitøwei lab pasran trømbøig nebui pasramig kønrrai.

³⁰ Inchawei øyeekkurri ñimui utube kwanrreelø, kullaarailø truba nørrø køben, møiløbe kwaig, mu kaagøn.

³¹ Inchendø nam namashib møitøgucha nam mandø pønrramigwan treeg pønrrabraitashchab tab isubene, trube, Tius namun maig maramigwan asha mara, kørørmariilø kømubsruinrrun.

³² Inchendø Señor namun maig maramigwan asha mariilø pønrrappe, nam kalø marigwan nø namun ølmartrab mariilø pønrrer, pirau nun ashmeeløba tøgatø namun kaigyu pønrsrailø kømønrrab.

³³ Inchawei, nai nunelø, ñim tru mamigwan manrrab tulundzunabe, kangurri kangurri muniiramig køn.

³⁴ Ñimun møigwan køben parøgwabene, trube, ñimui yausrø mamig køn, tru ñim tulundzuna waraiibe Tius ñimun møra pønrrønrrai marinab waramig kømønrraimbe. Inchen nøøøø katøgan maramelane, na trusrø pua, maig kønrrabigwan tamara pønrsramønrrun.

12

Espíritu Santo møigwandøgucha Tiusweyasig peg peg marøbelø kønrrai pirisha ketig

¹ Nai nunelø, Tiusweimburabeløyu iglesiayasig marøbelø kønrrai Espiritu Santo keta tranigweimburappe, chigúinguen mørmeelø kørørmisrønrrai inchar.

² Ñimbe isua kuinrrun, ñim judíos kømeeelø Tiuswan ashmeelø køb urasbe, mumay køben srua amrramabelø købig kuigwan tru chi wamgailø taska mari tiusmeraimay.

³ Inchawei nabe ñimun eshkanrrab inchar, Tiuswei Espiritu trendingaruben waminchibiibe, mugucha øyeeg chinrraamøn cha: “Jesús wane kaig nebubash” chib. Katø Espiritu Santo trendingarumubene, mugucha øyeeg chinrraamøn cha: “Jesúsbe tru Señor køn” cha.

⁴ Pøs Tiusweimburabigu marøbig kønrrai keta traniiløbe peg, peg købendø, tru traniiløbe Espiritu Santoinukkurrindøwei arrubig køn.

5 Katø chi purugub marameløgucha, peemay, peemay maramig kuindøgucha, Señorbe kandø køn.

6 Katø chi marameløgucha peemay, peemay maramig købendø, tru marameløyu chiwandøgucha trumørig mayeelainug marøb pasrabiibe, tru Tiustøwein køn.

7 Inchendø Espiritu Santo nømøigweinuutøgucha øyamay marøb kena pasrabig køn, mayeelan kelarrappa tab kønrrai.

8 Kaguende møigwane Espiritu Santo nøgurri nui wamindiiløyu maig kømigwan purø may isua waminchibig kønrrain tranøppe, katøganune maig kuigwan tab chigúi møra waminchibig kønrrai tranan tru Espiritu Santotøwei.

9 Inchen tru Espiritu Santotøwei katøganune nui isubigwan Jesucristoinug tøgagømburab tøgagønrai tranen, katøganune kwanrreelan tamarøbig kømigwan tru Espiritu Santotøwei tranan.

10 Katøganune Tius maramburab mariilan marøbig kømigwan tranen, katøganune Tius maig karuigwan eshkabig kønrrai trunun tranen, katøganune Tiuswei Espiritu kuin kui, kabe treeg kømuin kui tøgandø nebua ashibig kømigwan, trunun tranan. Inchen katøganune peg, peg wammera waminchibig kønrrain tranen, katøganune tru peg wammera wamindiilan: “Øyeeg tan” cha eshkabig kønrrai, treeg tranan.

11 Inchen iilan kerriгу øyeeg marøb pasrabiibe, nøtø kandø, tru Espiritu Santotøwein køn, møigwandøgucha nun maig tranamdiig køben, treeg tranøbig.

Asrbe kandø købendø, truyube chine pønrran

12 Asrma kandø købendø, tru asrube chine tøgagig køn. Inchen tru asru pønrrabeløbe truba nu købendø, kan asrtø køn. Inchawei Cristogucha treetøwein køn.

13 Kaguende nambe mayeeløba kan asrtø misrtrab kan Espiritutøgatø pinøbuliilø kuig køn, judiosmera lata, griegosmera lata, karuindiig melabelø lata, treeg melømeelø lata. Incha namune mayeelanba tru Espiritu Santondøwei utønrrai tranig køn.

14 Inchawei asrbe kanbaløtiig kønrrab kømøtø, chine, chine pønnsraig tøgagig køn.

15 Inchawei srøbma øyeeg taimbeh: “Tasig kømuikkurri asruig kømur” cha. ¿Treekkurri, trube, asruig kømøtø, nøøriig kønrrautah?

16 Inchen kalugucha øyeeg taimbeh: “Nabe kab kømuikkurri asruig kømur” cha. ¿Treekkurri, trube, asruig kømøtø, nøøriig kønrrautah?

17 Inchen asr ørøba kaptø kuimbe ¿trube, mandø incha mørøbsruerah? Inchen kerriguba kalutø kuimbe ¿trube, mandø incha irrømørøbsruerah?

18 Pøs Tiusbe asru chiwandøgucha nøm chu pønrrønrrabelan truyu, truyu pønrrønrrai pønnsraig køn, nun maig asønaben, treekke.

19 Kaguende asru chi pønrrabig kerriguba kanbaløtiig kuimbe ¿trube, asrbe chu pasrabsruerah?

20 Inchawei nuin kui, nuin kui truba yambalø købendø, asrbe kandø køn.

21 Pøs kappe tasigwane øyeeg chinrraamøn: “Ñune chi palømøtan” cha. Katø tur chigucha srøbmeran øyeeg chinrraamøn: “Ñimune chi palømøtan” cha.

22 Inchawei treeg kømøtø, asru murguen kebatamgailøbe masken palabig køn.

23 Inchen asru tre tabig kømø lataigwane nambe katøguchinguen tab tøgagøbelø ker. Inchen asru tre tabig kømiig asønabelane nambe masken tabig kasra tøgaguer.

²⁴ Pøs namui asru chi kørig isumgaig tøgagüiløbe tre isua asamig palain kømøn. Inchendø Tiusbe namui asrwan øyamay pønrsøb tamaran, tru tren-gatig tab inchib tøgagüimeelane mas tab inchab.

²⁵ Øyamay møibe nøørø, nøørø kørnrrain kømøtø, masken asru pønrrabeløbe møitøgucha ambugurri, igurri lata isunrrain køn.

²⁶ Asru pønrrabelø møikkøben pusrkwai inchene, truyu pønrrabeløgucha kerriguba truiaba pusrkwai møran. Katø asru møigwan køben tab inchene, truyu pønrrabeløbe mayamba truiaba tab kui mørøb kasraaran.

²⁷ Pøs inchawei ñimbe Cristoi asr kua, ñimbe møitøgucha kan kan nui asruelø køn.

²⁸ Incha Tiusbe nui iglesiayu Cristo nøashib karua øriilan nømunnerrig wesrawa, pønrsraig køn. Incha tru wendaube Tius maig karuigwan eshkabelan wesrawa, pønrsra, yandø tru wendaube kusrenrrabelan wesrawa, pønrsøbig køn. Incha trugurrimbe maramburab mariilø treeg marøbelan, trugurrimbe kwanreelan tamarøbelø kørnrai keta traniilan, trugurrimbe tru purugubelan, trugurrimbe chi maramigwan asha marøb pønrrabelan, katø møilane peg, peg wammera waminchibelø kørnrai keta traniilan, treeg pønrsraig køn.

²⁹ ¿Kabe mayeeløba Cristo nøashib karua øriiløtø kuitarru? ¿Kabe mayeeløba Tius maig karuigwan eshkabeløtø kuitarru? ¿Kabe mutøgucha kusrennøbeløtø kuitarru? ¿Kabe mayamba maramburab mariilan marøbeløtø kuitarru?

³⁰ ¿Katø mayeeløba kwanreelan tamarøbelø kømigwan keta tranig utartø kuitarru? ¿Kabe mayamba peg wammera waminchibeløtø kuitarru? ¿Kabe mayamba peg peg wammera wamindiilan 'øyeeg tan' cha, eshkabeløtø kuitarru?

³¹ Inchendø ñimbe tru keta traniilan mas tabigwan nebua ke tøgagønrrab isua lab melamig køn.

Chiwandøgucha purab nuibe tru undag købig køn

Inchen nabe treetøguen kømø, kan may mas tabigwan eshkanrrab inchar, truwan ambamig.

13

¹ Chi wammera køben møguelø wamindi wamwan na waminchib, katø ångelesmera wamindi wamwanguen na wamindindøgucha, tru na undag købigwan chigaig kuinaisruandøbe, nabe kan tsandzøn wanrrøbig lataig, kabe kan tsandzøn platilloswan ichen ka wanrrøbig lataitø kømønrrun.

² Tius maig karuben na trunun eshka pasramig keta tranig tøgagig køb, katø mu nebua asiimígg sorig pønrrabigwan kerriguba chigüi mørøb, katø nebua asamburab kerriguan nebua ashibig køb, katø nai isubigwan kerriguba Jesucristoinuutø na tøgagømburab tøgagüikkurri nørø tunmeranguen nøørøsrø puraamba pønrrønrrai marøbig, na treeg tøgagøb indinaindøgucha, undag købigwan chigaig kuinaisruandøbe, nabe chigucha kømur.

³ Na chi tøgagüilan kerrigu ketøb, katø nai asrwanguen parrig kørnrai na tranø indindøgucha, undag købigwan na tøgagømuinainruandøbe, treeg maratøbe nabe chigüi wesramø.

⁴ Undag købiibe chi puindøgucha tammay ka megabig kømig, larrø tab inchibig kømig, treeg køn. Undag købiibe katøgan chigøben tøgagøben pusrkwai ashib pasrømígg kømig, katø purø møg inchib chib waminchimígg kømig, katø undag købiibe purab nuig misrøb pasrømígg kømig, treeg køn.

⁵ Undag kōbiibe larrø tsag inchib maig kōbash inchimíig kōmig, nuimbu-raptø tab kōnrrai inchimíig kōmig, ke kuchingurrindø namømíig kōmig, kalø marig chab purayeelan katøle isub namig kōrrømisrmíig kōmig, treeg kōn.

⁶ Undag kōbiibe chigøben sølgandø tabig mariimeeløyu tab kui mōrøb kasrag pasramig kōmøtø, isa kōmíig, søligube tab kui mōrøb kasrag pasramig, treeg kōn.

⁷ Undag kōbiibe ‘øyangatiitø kōtan’ chimø, awentabig kōmig, kerrigu kōrewa pasrabig kōmig, katø chiwandøgucha ka muniirabig kōmig, chine nebub arruben, treegu ka pureb megabig kōmig, treeg kōn.

⁸ Undag kōbiibe managuen patsønrraamøn. Trune Tius tru maig karuigwan eshkameløbe patsab, katø peg, peg wammera wamindiiløbe yandø patsab, trugurri tru kusremburab kusrewa nebua asiiløgucha patsab inchun.

⁹ Kaguende nambe newan kōmø, mayandøwei nebua asha kōben, katø Tius maig karuben nam eshkailøgucha newan kōmø, mayandøwei nebua eshkailø kōn.

¹⁰ Inchen Señorwein kwaløm tru newanig tabig pubene, tru newanig kōmíig mayandøwein kōbiibe yandø pinønrrun.

¹¹ Na unø kōb urasbe unø wamindimay waminchib, unø isuimay isub, øyamay kuitamab unø isuimay isub inchibig kōbig kur. Inchen yandø kōlig misrabe, unø kua maig kōbig kuigwane elachar.

¹² Møimbe nambe kan espejo tre tør kenamíigu ashib lataitø aser. Inchendø tru urasbe nambe malaugue asamig kōnrrun. Møi yambe nabe mayan-gatiitø nebua ashibig kuinaindøgucha, tru urasbe kerrigu newan nebua asamønrrun, na maig kuigwan Tius nan asig kōb lataitøwei.

¹³ Inchen møi yambe pøngatø pønrrabig pønrran: isubigwan Jesucristoinu-utø pasriiba, katø isua munig melaiba, trugurri tru undag kōbiiba. Inchendø tru í pøngatøyu purab nuibe tru undag kōbig kōn.

14

Peg wammera waminchibig kōnrrai traniiløba, Tius maig karuigwan eshkailøba

¹ Ñimbe undag kōbigwan tōga pønrrabig pønrrab, katø Tiusweimburabeløyu marøbelø kōmig nø keta traniilan tøgagømigwan isub inday. Inchendø Tius tru maig karuigwan eshkabelø kōmigwan, trunun tøgagønrrab indamig kōn.

² Kaguende peg wam mōriimíig waminchibiibe mōguelan kōmøtø, Tiusba waminchen, mugucha ni chi tainguen mōrmøn, pøs Espiritu Santogurri chinchaguen wetøgørramgailø waminchen.

³ Trune Tius tru maig karuigwan eshkabiibe misagwan wamindan, Tiusweimburab mas nōrrørab ambamigweyasiiba, maig melamigwan treeg marøb melønrrai wamindamigweyasiiba, chigúindøgucha ka puraambub melønrrai purugumigweyasiiba.

⁴ Møikkøben kan peg wam mōriimíig waminchibiibe Tiusweimburabigu nōasiitøwei nuraben, trune Tius maig karuigwan eshkabiibe iglesian Tiusweimburabigu nōrrøranrrai wamindan.

⁵ Pøs nane ñim mayeeløba peg wammera waminchibelø kuimbemab isutan. Inchendø Tius maig karuigwan ñim trunun eshkabelø kuimbe kōtan. Kaguende treegwan waminchibiibe mas nuikken kōn. Inchendø peg wam wamindikucha tabiitøwein kōn, tru peg wam wamindigwan møikkøben ‘øyeeg tan’ cha eshkabene, iglesiabe Tiusweimburabigu nōrrøranrrai.

6 Pøs inchawei, nai nunelø, na ñimuisrømay arrua, peg wam wamindimbe ¿ñimune chigúi purugunrrab kø? Tius maig kenamarigwan eshkamøwei, chigúi mørøb nebua asiilan waminchimøwei, kabe Tius maig karuigwan eshkamøwei, kabe chi kusrenmøwei inchene.

7 Kan chimera køben øsiguig kømeelanguen, luswan lata, arpan lata chiwan urramigwan chi wanri mørtrain kønømbene ¿trube, tru lus urrigwan chi urri mørangawei, arpa kønigwan chiwan køni mørangawei kømønrraitarru?

8 Inchawei katø kan trompetanma tru chi maramigwan chigúi mørtrai truigwan urrømbene ¿kwayanrrab webamrrab mu kuin tamartrab kø?

9 Inchawei ñimgucha treetøwein køn. Ñim tru peg wamwan wamindigu chi tai møramdiig treeg waminchimubene, ¿ñim waminchib pønrraigwane mandincha chi tai møríasamø? Ñimui wamindiibe isig ichibigu wamindi lataitø purainrrun.

10 Pøs yu pirauma chi wammera køben purø nørø køn. Inchendø chi wamdøgucha tru wamwan waminchibigweimbe chi taig møramdiig køn.

11 Inchawei nama møikkøben peg wam wamindigwan ni chi tainguen mørtrab kaima pasrappe, nabe tru waminchibigweimbe nuim piraug kømøtø, peesriig lataig kømønrrun. Inchen nøgurringucha naimbe peg pirausriig lataig kønrrun.

12 Inchawei ñim tru Tiusweimburabeløyu maramig nø keta tranigwan tøgagønrrab inchib melabeløbe, truilan masken, masken tøgagønrrab inday, iglesian Tiusweimburabigu nørøram purugumig.

13 Inchawei møikkøben kan peg wam møriimlig waminchibiibe, trube, tru peg wam wamindigwan 'øyan tan' cha katøburø eshkabig kønrrab, Tiuswan trunun tranrra cha miamig køn.

14 Kaguende na peg wamdøga Tiusba waminchib pasrøbene, nai espíritu Tiusba wamindingucha, nai turyu isubigube chigucha chi kørrømismønrrun.

15 ¿Trube, treeg købene, nabe mandø inchab køh? Nai espírituøga na Tiusba waminchipe, nai turyu chigúi mørøb isuitøgagucha Tiusba wamindamønrrun. Katø nai espírituøga cantappe, katø turyu chigúi mørøb isuitøgagucha Tiuswan cantamønrrun.

16 Inchawei ñibe ñui espírituøgatø 'Tiuswan mayanguen tabig køn' chib, 'ungwa' chib pasrøben, møikkøben Tiusweimburabigwan chi kusremiibe ñi trenchib pasraigwan chi tainguen mørmuig køppe 'treegwein køn' chib, maana trenchinrrab kø.

17 Pøs ñibe Tiuswan mayangucha tabig ungwa taingucha, treeg mariibe kanune Tiusweimburabigu nuramig chi purugumøn.

18 Nabe Tiuswan 'mayanguen ungwa, ungwa' char; kaguende nabe peg wammera mas yanguen waminchibig kur, ñim mayeelø lataitøguen kømø.

19 Inchendø iglesiyube trattrøgatøitøgucha chi taig møramdiig treeg wamindinguen køtan, kaneløgucha chigúi mørøb kusrenrrai, peg triimay diez milburab chi taig mørangaig waminchib pasrabgunrriibe.

20 Nai nunelø, ñim maig isumigube ureezheelø latailø kønrrab kømøtø, chigøben kaig maramigwan isua asamigube shushcheelø latailø kømig køn. Inchen maig isumigube yandø køleeløsun isubelø kømig køn.

21 Pøs tru maig maramigwan martrai Moisés pøriguma trenchibig køn: "Señorbe trendaig køn cha:

"I misaameran møguelø peg triimay wamindiiløtøga na wamindamba, peg pirausrø misaamera nøm wamindigu na wamindamba inchen, ni treekken nane mørønrrautan" cha.

22 Inchawei tru peg wammera mōriimīg wamindiilōbe Tiuswan kōrebelayasig kōmōtō, Tiuswan kōremō misaamerain kōn, Tius truyu pasrain kui asamig kōnrrai. Trune tru Tius maig karuigwan eshkaibe Tiuswan kōremō misaamerain kōmōtō, Tiuswan kōrebelayasig kōn.

23 Inchawei ñim iglesia mayamba tulundzuna, mayamba peg triimay mōriimīg waminchib kōben, tru peg wammera waminchibig kōnrrai Tius keta tranigweimburabigwan kusremeelō kui, kabe Tiuswan kōremeelō kui mōin kebambatō pōnrrabelōbe, çñimune ‘chab lukiaian kōn’ chimōnrrab kōh?

24 Trune ñim mayeelōba Tius maig karuigwan trunun eshkabene, Tiuswan kōremīg kui, kabe mōikkōben Tiusweimburabigwan kusremīg kui kebya pasrabiibe, mayeelō wamindiitōga nōbe kaig marōbigwein kōbairrenmab isunrrai marōb, mayeelō wamindiitōga nune kaig marōbig kuin kui asha kōrrōmarōb inchun.

25 Inchen nui manrrau nuinetō chi isua tōgagūilōbe tōrgandō kenamarig kōnrrun. Inchen øyeekkurri nōbe pirau srala, Tiuswan kōriibala tabig waminchib, trenchinrrun: “¡Isa kōmōtō, Tiusbe ñimui utu pasrabwei indan!” cha.

Tiusweyasig marōb tulundzuninug maig maramigwan tabig marōb

26 Trube, treeg kōbene, nai nunelō, çmandō chinrrab kōh? Pōs ñim tulundzunnape, mōitōgucha kane cantamig tōga kuin kui, kabe mōibe kusrennamig tōga kuin kui, kabe mōibe Tius nun kenamarigwan wamindamig tōga kuin kui, mōibe peg wam mōriimīg wamindamig tōga kuin kui, kabe mōibe tru peg wam wamindigwan ‘i wamindiibe øyeeg chibig kōn’ cha, eshkamig tōga kuin kui, ñimbe treeg purrabelō kōn. Trube, truigwan marōppe, chiwandōgucha iglesiane Tiusweimburabigu mas nōrrōrab ambamig kōnrrai maramig kōn.

27 Inchawei tru peg wamwan waminchippe, pailō kui, kabe pōnelōgatig, treetō wamindamig kōn. Treetōgucha kan kan waminchen, kane ‘i wamindiibe øyeeg chibig kōn’ cha eshkamig kōn.

28 Inchen tru peg wamwan wamindigwan ‘i wamindiibe øyeeg tan’ cha eshkanrrabig mu kaabene, trube, iglesiayube truigwane esegappa, nuinetō waminchib katō Tiusbatō wamindamig kōn.

29 Inchen katō Tius maig karuigwan eshkabelōgucha pailō kui, pōnelō kui treetō wamindamig kōn. Inchen kanelōbe tru wamindigwan Tiuswein kōh, kabe Tiuswein kōmō chinderamab isub purramig kōn.

30 Inchen mōigwan kōben truyu wabigwan inchippa, chigōben waminchai Tius eshkararuben wamincheenchene, trube, tru waminchib pasrabiibe mas waminchimumig kōn.

31 Kaguende ñimbe mayeelōba Tius tru maig karuigwan eshkappe, kan kan wamindamig kōn, mayeelōba kusreb, katō mayeelōba tab melamigwan utab inchai.

32 Inchagucha Tius maig karuigwan eshkabelai espīritumerabe nōm maig kōnrrain kōben, treegwan martrab pōnrran.

33 Kaguende Tiusbe chi maringuen asiimīg marōb Tius kōmōtō, ambugurri, igurri chi isumgaig lata tab kui mōramig, treeg Tius kōn.

Tru Tiuswei misaamera maya iglesiamera maig marōbelō kōben,

34 treetōwei ishumburmerabe iglesiayube nilōtō purramig kōn. Kaguende truyube ishuumisagwane waminchimōnrrai indiilō kōn. Pōs tru maig maramigwan martrai Moisés pōrigu chigucha trenchibig kōn, nōmbe maig chiben treeg melamig kōn cha.

³⁵ Nòm chiwan kòben nebua kusremig palòbene, nòmui kelan nòmui yau payamig kòn. Kaguende kan ishug iglesiayu waminchab indamibe chi sòl kòmòn.

³⁶ ¿Tiuswei wambe kabe ñimuinukkurri pòlbasra arrig kò chindah? ¿Kabe ke ñimuinuutò puig kò chindah?

³⁷ Pòs mòikkòben ‘Tius maig karuigwan eshkabig treeg kurmab’ isub, kabe ‘Tiusweimburabigwan maramig keta tranig tògaig kurmab’ isub inchabe, trube, tru iig na ñimun pòrigwane Señor nò karua pasròbwei indig kui, treeg isua asamig kòn.

³⁸ Inchen òyeeg kui ashatògucha, nò ashmíig misrene, nungucha treetòwei isua ashmuinab pasrònrrun.

³⁹ Inchawei treeg kòbene, nai nunelò, Tius maig karuigwan eshkamigwan martrab inchib melay. Katò tru peg wammera mòriimíig wamindamigwan-gucha meròmòtay.

⁴⁰ Inchendò chiwandògucha maròppe, tabig sòlwan marammay maramig kòn, ambumay, imay ke chi maringuen asamgaig martrab kòmòtò.

15

Cristo kwawa, katòle òsiiraigwan waminchibig

¹ Mòimbe, nai nunelò, na Tiuswei tabig srò wamwan eshka kusrenanig kòbigwan katòle ñimun isunanrrab inchar, ñim trunun uta, truigwan elachimò, truyu mur pònrraigwan.

² Ñimbe tru Tiuswei tabig srò wamgurriwei kaigyugurri wesrailò kòn, na ñimun maig eshka kusrenanigwan trunun elachimò, tindòga pònrròwabe. Trengòmuisruandòbe, tru ñim kòreibe chi kòremui lataitòwein kuin kònrrun.

³ Nabe ñimun kusrenanòppe, tru nan mas nuig purò tabig kusrenanig utig kòbigwan ñimun kusrenanig kòn, Tiuswei wamwan pòrigu maig chibig kòben, namui kaig mariilògurri Cristobe treeg kwawa,

⁴ katò nòbe, Tiuswei wamwan pòrigu maig chibig kòben, treeg sòrig kua, pòn kwalòmuyube katòle òsiirawa,

⁵ Pedron kenamisròb, katò trugurrimbe tru nòashib karua òriilò tru doceelan kenamisra,

⁶ trugurrimbe albiji nunelò quinientos menrrawan kenamisrig kòbigwan. Tru ashibelòbe mayeelò lutau ka òsig amònan, kan kandòwei yandò kwaig mu kaaben.

⁷ Incha trugurrimbe Santiagon kenamisra, trugurri mas wendòbe tru nòashib karua òriilan mayeelanba kenamisrig kòn.

⁸ Incha yandò kerrigu srabebe katò nan kenamisrig kòbig kòn, na tru kalam kwalòb kòmò, kal-lawa lataigwan.

⁹ Pòs nabe Cristo nòashib karua òriilai utube truburab kòmíig, purò lamíig kur. Trurrigu Cristo nòashib karua òrig kòn cha trenchaguen wamig kònrrabgaikke, kaguende nabe Tiuswei iglesian larrò kaig maròbig kòbig kur.

¹⁰ Inchendò na mòì òyah pasrappe, Tius nan ka yandò tab indiitògatò na treeg pasrainatan. Inchen nui tru ka yandò tab indiibe kagatò purayaig kòmòtò kòn. Treeg kòmòtò, nabe masken tru Cristo karua òriilò mayeelò nòm lataguen kòmò, marinabig kòn. Inchendò na marig kòmòtò, Tiuswei tru ka yandò tab indig naba pasraikkurri marig kòn.

¹¹ Pòs na wamindig kui lata, kabe nòm wamindig kui lata, nambe iigwan eshka kusrenanen, ñimbe iigwan treeg kòreig kòbig kòn.

Kwabelò katòle òsiiramigwan waminchib

12 Pøs trube, Cristobe tru kwailai utugurri katøle øsiirag købigwan eshka kusrenanig købendøbe, trube, ¿ñim møiløggøben ñimui utu mandøgurrinre øyee chib køh, kwabeløbe katøle øsiirawa kurrømønrun chibren kønrrappe?

13 Pøs, tru kwabelø katøle øsiirawa kurrømuig købene, trube, Cristogucha katøle øsiirawa, kurrømuig køn.

14 Trube, Cristo katøle øsiirawa, kurrømuig kuig købene, nam Tiuswei wamwan eshka kusrenaniibe ka yandiig kørrømisren, katø treetøwei ñimui isubigwan Cristoinug pasra pønrraikkucha tøgagømuingueniitø purayan.

15 Katøgucha treetø kømø, nambe Tiusweiwan ka isatø waminchib pønrrabelø kuig, treeg webinrrun. Kaguende nambe "Tiusbe Cristone katøle øsiirangaruig køn" chib pønrraig kuig køn. Inchen kwailø øsiiramønrrab kui cierten webibene, trube, Tiusbe katøle Criston øsiirangarumuig, treeg køn.

16 Pøs kwailø katøle øsiiramuiig købene, Cristogucha, trube, øsiiramuiig køn.

17 Inchen Cristo katøle øsiiramuiig købene, trube, ñimui isubigwan nuinug tøga pønrraikkucha, tøgagømuinguenig tøgagüig puraiiben, trube, ñimbe katøgucha kaig marøb srø amønnan.

18 Trube, treeg købene, Criston tru kørewa kwabeløgucha pinab pinamsrø pønrrønrrab amban.

19 Nam yu øsig amønaigu ka pirauweyasiitø Criston isub muniirabelø kuisruandøbe, nambe maya misaamerai utu trembe misag kømuinguenelø ker.

20 Inchendø treeg kømøtø køn. Cristobeguende kwabelai utugurri katøle øsiirabwei indig køn, tru kwabelai utugurri ke srøsrøzhiitø ke nømerrig pølbasra øsiirab.

21 Pøs kwamima kan møkkurrindø arrig købene, katø kwabelø katøle øsiirawa kurramikkucha kan møkkurrindø arrig køn.

22 Inchawei Adángurrima mayeeløba kwaben, katø treetøwei Cristogurri øsig kømigwangucha mayeeløba tøgagønrrun.

23 Inchendø møitøgucha nøm møimerrig pølbasra øsiinrrabig køben, treeg kønrrun: Cristo ke srøsrøzhiitø nømerrig pølbasra øsiiraben, trugurrimbe nø katøle arruben nuilø øsiiranrrabelø køn.

24 Trugurrimbe yandø tru srabe kwaløm punrrabig køn, Cristo tru nørreelø nøm asha karub purrabelan køben, mugucha manchinrraingai nøm karubelan køben, nørreelø maramburab marøb purrabelan køben, yandø truilan kerriguwan chigucha martrabgailø kørrømara, tru Cristo ashib karub waigwan yandø Tius Møskawan nø ashchai purøøren.

25 Kaguende Cristobe nun tru ashig kømui inchibelø tsaleelan nui srøb umbu nø maig chiben treeg pønrrønrrai, Tius nun pønrsramnegatig, nøbe ashib karub wanrrabig køn.

26 Inchen tru ashig kømui inchib tsalø inchibig srabeig pasrabigwan pini-saig kønrrabiibe, tru kwamig køn.

27 Kaguende Tiuswei wamwan pørigube trenchibig køn: "Chigurrimbunø købigwan kerriguba nui srøb umbu nø maig chiben treeg pønrrønrrai Tius pønrsraig køn" cha. Pøs: "Chigurrimbunø købigwan", nui srøb umbu pønrsraig køn chippe, Tiuswangucha truyu tøga pasrig køn cha trenchimuig kui tørgandø asamdiig køn. Kaguende Tius nøwein køn tru chiwandøgucha kerribga Cristo maig chiben treeg pønrrønrrai marøbiibe.

28 Inchen Tius chiwandøgucha kerriguba Cristo maig chiben treeg pønrrønrrai, nun chab pønrsrøbene, Cristo, tru Nusrkaindøweinguen, tru chigurrimbunø købigwan nø maig chiben treeg pønrrønrrai, nun pønrsrøbig

Tiuswan maig chiben, nõbe treeg pasrønrrab pasramisrtrun, chiyutøgucha kerriguwan Tius nõ ashib karub pasrønrrai.

²⁹ Pøs trube, ζtru kwabelayasisg piu umbu ulsrailøbe chi martreherah? Tru kwabelø kerriguwan øsiiramønrrab købene, trube, ζchinchabrre tru kwa-belaimurab isua piu umbu ulsrøbelø køh?

³⁰ Inchen ζnameb chu urastøgucha chindimbarre kwam lab pønrrabrah?

³¹ Nai nunelø, nabe kwalømmørig ke kwamigu puitø, puitø ka megar. Iibe isatø kømøtø, namui Señor Cristo Jesúsweinug na purø nuig mørøraim pasramibe ñim køn.

³² Pøs møg kuinawa, ka treekkurrindø tru Efesosrøma larrø namig animal lataig inchib misaameraba namig aleguiyab, na treeg marøb megaiibe chi marmui lataitøwei webinrrautan. Pøs tru kwabelø katøle øsiiranrrab kømubene, mugøsrøn chibgunrrig, trube:

“¡Mab, muchib inhab køh,
pøs srønato kwamig købashtø!”

³³ Ñimbe chi isa køben sruamrramamøtay. Mugøsrøn chibgunrrig: “Kaig marøbeløba lynchib pønrraibe tabelø kuigwan ka mindishibig køn.”

³⁴ Ñimbe katøle tab chugúi møra sølgandø pørrønrrab inday, mas kaig marøb pønrrømøtø. Kaguende møiløbe Tiusweimburabigwane ni maig kuinguen ashmeelø køn. Iigwan na trenchippe, ñimun kwaarøsrøb kørig purørtrab trenchar.

Katøle øsiiraig asrbe øyeeg kønrrabig køn

³⁵ Pøs møibe øyeeg chinrraabe: “ζKwabeløbe mandø øsiiranrrerah? cha. ζKatøle øsiirawa amrruppe, maig asrmera tøgær amrrunrrerah?” cha.

³⁶ Kan ñi kui chugúinguen mørmíg, kan yellwanma ñi ellguabene, kwamøwabe, øsig kømigwan tøgagønrraamøn.

³⁷ Tru ñi ellguappe, tru tusr maig kønrrabigwan ellguamøtø, trulzhigwandø ellguan, tirigu kui lata, kabe katøgan chi peg yell kui lata.

³⁸ Pøs Tiusbe i yellwanma chi tusr kønrrai marøppe, nun maig maramdiig køben, treeg marig køn, chi yelldøgucha trumørig chi tusr kønrrabiibe tru tusr kønrrai.

³⁹ Chi asrmeratøgucha lata treeg asrmeratø kømøn, kane misag asr køben, kane animalmerai asr køben, kane illimerai asr køben, kane peskaumerai asr køn.

⁴⁰ Inchen katø treetøwei srømbala pønrrabelan maig kønrrabelan treeg mari-ilø køb, katø pirauelan maig kønrrabelan treeg mariilø køb indan. Inchendø tru srømbala pønrrabelai tabzhig tør pilabiibe katøgan køben, yu pirau pønrrabelai tabzhig tør pilabiibe katøgan peemayig køn.

⁴¹ Inchen nõsigwei tabzhig tør pilabiibe peemayig køben, katø põlwei tabzhig tør pilabiibe peemayig køn. Katø estrellamerai tabzhig tør pilabiibe peemayig køben, tru utu mø estrellamerai tabzhig tør pilabiibe katø peemayig køn.

⁴² Inchawei øyeetøwein køn tru kwabelø katøle øsiiramikkucha. Tru asrwan søriibe treranrrabig køben, katøle truig øsiirabiibe yandø managuen treranrrabig kømøtø køn.

⁴³ Yandø chigucha kømígwan pirau søra trarrig, katøle truig øsiirappe, tør pilab tabig øsiiranrrun. Chigucha martrabgaig pirau søra trarrig, katøle truig øsiirawa kurrappe, maramburab marøbig kurrønrrun.

⁴⁴ Trendø yu pirau tøgær pasrai asrwan sørig, katøle øsiirawa kurrappe, asr espíritu kurrønrrun. Asr yu pirauig køb, katø asr espíritugucha køn.

45 Katø Tiuswei wamwan pørigugucha treeg chibig køn: “Tru srøsrø møg Adánbe kan misag øsiguig misrig køn” cha. Inchen Adán tru Srabe Arrubig, Jesucristobe, espíritu køn, nøbe øsig kømigwan tranøbbig.

46 Inchawei espírituimburaibimerrig arrumøtø, asr trendø maig kønrrabig truimerrig arruben, trugurrimbe yandø espírituimburaibig arrig køn.

47 Tru srøsrø møøbe pirøtøga marig yu pirauig køben, tru wendau møøbe srømbalasø Tiusweisriig køn.

48 Inchawei tru pirøtøga mari møg maig købig køben, yu piraeløbe treeløtøwein køn. Inchen tru srømbalasø møg maig køben, tru srømbalasreeløbe truig lataitøwein køn.

49 Yu pirau møg maig køben, nam treelø kømigwanma tøgagúibe, katø tru srømbalasø møg maig køben, nambe truig lataitøwei kømigwangucha tøgagømønrrun.

50 Inchawei nabe, nai nunelan, trendamønrrun: Tius nø ashib karub waigwane asr yaumbaig animbañauibe chinha tøgagønrrab kaimanrrun cha. Katø tru trerawa patsønrrabiibe tru mana trerab patsønrrabig kømígwane chinha nebua tøgagønrrab kaimanrrun cha.

Tru kwamigwan yandø srabe kanawa puraambamig

51 ¡Au! mømibe kan chigøsrøn mu asiimíig sørig pasrabigwan na ñimun eshkanrrab inchar: Nambe ke mayeeløbabe kwamig kømønrrab køn cha. Inchendø nambe mayeeløba yandø kerriguwan peemayelø kønrrai yunømariilø kømig kønrrun,

52 ¡katø! mõi mõi, kan kab kasrøb lataitøgue, tru trompeta srabe urrig wanrrøben. Kaguende trompeta wanrrøbene, kwabeløbe øsiirangaruilø kønrrun katøbe managuen treranrrabelø kømíkke. Inchen nambe mayeeløba yandø kerriguwan peemayelø kønrrai yunømariilø kømig kønrrun.

53 Kaguende tru treranrrab asrbe trerab minchabgaitøga pinøbulig kønrrain køben, katø iig tru patsønrrabigwane tru patsønrrabgaitøga pinøbulig kønrrain køn.

54 Inchen tru treranrrabigwane yandø tru managuen trerab minchabgaitøga pinøbulig køb, katø iig tru patsønrrabigwane tru managuen patsønrrabgaitøga pinøbulig kørrømisrøb inchene, iig tru øyeeg cha pøra pasriibe yandø treeg nebunrrun: “Tru kwamigwane yandø kanawa kenaguen kømíig, pinisan” taig.

55 “¿Ñi, kwangarub pasrabig, ñi kanawa pasraibe mømibe chu pasra? taig.

¿Ñi, kwangarub pasrabig, ñi pusrkwananøb pasraibe mømibe chu pasra?”

56 Kaguende tru kwamigwei pusrkwangarub pasrabiibe tru kaig marig, truig køn. Inchen tru kaig marig maramburab marøbiibe tru maig maramigwan martrai Moisés pørig, truig køn.

57 Inchendø Tiuswan ‘mayanguen unywa, unywa’ chinrrab, namui Señor Jesucristogurri nam kerriguwan kanawa pønrramig kønrrai tranigwan.

58 Inchawei treeg købene, nai undaaraig nunelø, kørrønrrabgaig mur pønrrab, mumaygucha wemaløsrkønrraingaig pønrrab, chu uratøgucha Señorwei marameløyube katøguchinguen, katøguchinguen marøb melay, kaguende Señorweimburaibeløyu ñim nøba marøb melaiibe, ka treeg marøb melaitø puraimønrrab kui ashabe.

16

Jerusalénsrø Tiuswei misaameran purugumig an utig

¹ Tru Jerusalénsrø Tiuswei misaamerayasig an purugúig utamigweimbu-
rappe, tru Galacia pirausrø iglesiameran na mandø martrai karua pønsraig
køben, ñimgucha treetøwei martrigay.

² Ñim møitøgucha an maya tulishabe, truyugurri tarømara, esegab amrrigay
truaalømmørig, na trusrø puben, ñim ke møin tulishib mendaptindamig
kømonrrai.

³ Incha ñim møilan karua øramdeelø kui asha kørørø mariilan, na trusrø puabe,
tru Jerusalénsrø may trana øramig ñim an ketigwan nømun trana ørøppe, kan
kilga pøra, tøga trana øramønrrun, tru i karua øriiløbe chi isumga møguelø kui
nøm ashchai.

⁴ Inchen naimburab nagucha yamig søl kønrraptig købene, trube, na iben,
nømbe naba amrrunrrun.

Pablo nui lincha amrrabeløba mandø ambamigwan wamindig

⁵ Nabe Macedonia pirauwansrø pureb arrua, yandø ñimuisrø pumønrrun,
kaguende nabe Macedoniawansrø pureb yamig kua.

⁶ Inchippa kan maya yanagatig kørørmisrisruandøbe, ñimba ka
kørørmisramønrrun, kabe tru pishim pølmera chab purayamnegatikken,
nan chumay yamig nebuben, nai yamigu ñim purugumig kønrrai.

⁷ Kaguende møimbe ñimun ke ka petø asha purainrraptø arrug kømøtan.
Pøs Señor nan treeg kønrrain købene, kan maya yanagatig ñimba kørørmisrø
atrab isur.

⁸ Inchendø Pentecostés kwalø m pumnegatig nabe yu Efeso kørørmisrø
kur.

⁹ Kaguende yube kan yaskab purø nuig nayasig kurin køn, Tiusweiwan
wamindig nu larrøbichaptiikke. Inchendø marmønrrai nan sötølulrabelø
truba truba køn.

¹⁰ Inchippa Timoteo trusrø pubene, ñimui utu chi kørørig kui inchimønrrai
inchigay. Kaguende nøgucha Señorwei maramølyu na lataitøwei marøb
megabig køn.

¹¹ Inchawei nune møitøgucha palabinøtø inçhib kønrrab kømø, masken chi
isumø inrrai purugua ørtrigay, naimay katø attrai. Kaguende nabe namui
nunelanba, nunba munig megar.

¹² Inchen namui nuneg Apolosweimburappe, tru nunelø ñimuisrø may am-
rrabeløba nungucha na tiusmanda maya lincha irra taingucha, møimbatøbe
nøbe chi inrrab inçhimøn. Inchendø nun chu uras yamig pubene, inrrab
kuinrrun.

Maig amønamiwan treeg melønrrai wamindiiløba, 'ka amøñigüeh' tailøba

¹³ Tab ashiptø pønrray. Pesan amøñimøtø, isubigwan Cristoinug tøga
pasra pønrrayu mur pønrrab, chishkandø møgueløsun pønrrabelø køb, trurrigu
murelø kuy.

¹⁴ Incha chiwandøgucha ñim marøppe, undag købiitøga maramig køn.

¹⁵ Nai nunelø, ñimbe ashibelø køn tru Acaya pirausrø Estéfanaswei yaueløbe
ke srøsrøzhiitø nømmerrig Tiuswan nebua ashibelø misra, Tiuswei misaam-
eran nømbe purugunrrab pønrramisrigwan.

¹⁶ Inchawei nabe ñimun øyeeg melørunrrigay chinrrab inchar, tru øyeeg
melabelane nøm maig chiben mørøb melønrrigay cha, katø tru mayeelø i
maramigwan purugub marøb melabelan treetøweingue.

¹⁷ Nane truba kasrag kətan Estéfanas kəben, Fortunato kəben, Acaico kəben amrruin kəben. Kaguende ñim mu kaagua, purugunrrab kaimaigwan nəmbe nan purugua,

¹⁸ pəs truiləbe nai isubigu lata, ñimui isubigu lata chi isumikkaig, tab kənrrai marig kən. Oyeeg məgueləbe mayanguen tab indig kənrrabelə kən.

'Ka aməñigüeh' taiba, 'ungwa' taiba

¹⁹ Tru Asia pirausrə iglesiamera ñim corintosreelan 'ka aməñigüeh' cha əran. Aquilaba, Priscilaba, katə iglesia nəmui yau tulundzunabelə, truilə chigücha Señorwei munchiyu 'mayanguen tab ka aməñigüeh' cha əran.

²⁰ Katə mayeelə nuneləgücha ñimun 'ka aməñigüeh' cha əran. Ñimbe kangur-rin kangurri 'ka aməñigüeh' chib, Tiuswei undag kəbiitəga tasig traniyay.

²¹ I 'ka aməñigüeh' taigwan na Pablo ñimun naashib nai taska pərar.

²² Məikkəben Señorwan undaguig kəmfıgwane Tiuswei namig kəbig nuim pala kəbash. ¡Namui Señor Jesucristo amə!

²³ Señor Jesúswei tru ka yandə tab indiibe ñimba pasrənrrai inchar.

²⁴ Cristo Jesúsweinug nai undag kəbiibe ñim mayeeləba pasrənrrun. Treeg kənrrun.

2 Corintios

'Ka amõñiguh' chib pørig

¹ Tius nan trendø treeg kønrrain kuikkurri, na Pablo Cristo Jesús nøashib karua ørig, namui nuneg Timoteoba misra, Corintosrø iglesianba, katø tru Acaya pirau muba kuimburab Tiuswei misaamera warabelanba i kilgawan pørar.

² Tius namui Møskaweimba, Señor Jesucristoimba tru ka yandø tab indig køben, chi isumgaig tab købig køben ñimba kønrrai inder.

Chine isumdeelø nebuingucha Pablo Tiuswan 'ungwa, ungwa' tailø

³ Tru namui Señor Jesucristoi Møskai, Tiusbe mayanguen tabig wamindig kønrrun, tru lastima ashib pønrrabelø kømigwan tøga Møskai, katø isui meløben chiyutøgucha isui inchimønrrai purugub Tiuswan.

⁴ Truibe nam chine puig meløben, namun tab kui mørtraï purugubig køn, katøganelø chiyugøben treetøwei isui meløben, Tius namun isui inchimønrrai puruguitøgatøwei namgucha purugubelø kømig kønrrai.

⁵ Criston tru chine, chine kaig nebuilø namuinug treetøwei itømaytø nehub arrubene, katø treetøwei tru isui inchimønrrai purugüikkucha tru kuindø, tru kuindø Cristoinukurrindøwei arrubig køn.

⁶ Inchendø namun chine puig melamig arrubiibe, ñim chi isui inchimø tab kui pønrramigweyasiiba, kaigyugurri wesrailø kømigweyasiiba køn. Inchen namun tru isui inchimø pønrramig kønrrai publiibe, tru ñim chi isui inchimø pønrramig kønrrain kua, tru namun isui melamig nehub lataitøwei ñimun treeg nehub arruben, ñim chigüingucha melabig melamig truiibe treeg attrun.

⁷ Inchaweï nam ñimuimburab øyah kønrrunmab isuiibe treeg kønrrab køn. Pøs nam chine kaig nebuinab melaiguma treetøwei ñimgucha pønrrabelø kuig køppe, nam chi isumø tab kui pønrraigugucha, ñimbe treetøwei tab kui pønrrønrrab kui asha pønrrer.

⁸ Namui nunelø, namun Asia pirausrø purø isumdiig nebui melaigwan ñim wammøra kønrrai inder. Yandø mu melamgaig trømbøig arruptø, namuinetøbe yandø chinchia melamgaig purø trømbøig køben, yandø ke øsig webammumuitamab isubelø ker.

⁹ Pøs nambe ke yandø kwamigu puermaptøwei isub melabelø ker. Pøs øyeeg puppe, nam namasiitø namdø tsabø kermab isubelø kønrrain kømøtø, Tius tru kwailanguen katøle øsiirangarub kusrubigwan isua pønrrabelø kønrrain kuig køn,

¹⁰ tru øyeeg trømbøig ke kwamitø palab melaigugurri nø namun ka pu-raambingarub, katø namun ka puraambub ambamig kønrrai martrabigwan. Incha nambe ke nuinuutø isua meler, ka puraambub ambamig katøgucha namun ashib pasrønrrab kui,

¹¹ ñim Tiuswan namuyasig 'purugurra' chib miab meløbene. Øyamay truba yamelø namuimburab Tiuswan 'mayanguen ungwa, ungwa' chib kønrrun, pøs truba yamelø misra Tiuswan namuimburab miaben løtigwan nam truba nu purugüig utikkurri.

Pablo Corintosrømay chindimba imuigwan eshkab

¹² Kaguende nam tab kui mørøb pønrraibe iig køn: yu pirau namui isub kebachib pasrabigu 'chi kalø marig køn' chibig chigaig pønrraig, mas ñimui

utube katoguchinguen isupto amonaig kōbig kōn. Amōñippe, tru newan chishchiitogaba, sōratō kōmō, sōlwan marig Tiusweinukkurri arrubiitogaba nambe amonaig kōn, chine nōrrō kusreelō mōguelainukkurri arrubiitōga marmōtō, Tiuswei ka yandō tab indiitōga marōb.

13 Pōs nam ñimun kilga pōrōppe, chi peg waminchibikkucha kōnrrab kōmōtō, ñim chi leb kuigwan ñim chigúi nebua mōrōb kuigwan truigwan newan chigúi mōrtraimab isua pōrer.

14 Inchawei namuimburab mayandōguen nebua chigúi mōrig kōppe, pōs ñimbe tab newan chigúi mōrtrun, ñim namuimburab tab kui mōrōb pōnrramig kōnrrai, tru nam ñimgurri tab kui mōrōb pōnrramig kōnrrab kōb lataitōwei tru Señor Jesús arrub kwalōm.

Pablo Corintosrō ashchab inrrab waminchib

15 Inchawei nabe iigwan treeg kōnrraitamab isua, ñimuisrōmaymerrig attrab isuig kōn, ñim srōsrō truba tab kui nan utig kōmnetō katōle nan tab kui utamig kōnrrai.

16 Incha Macedoniasrōmay pureppe, ñimuinug pua puraya, katōle trusrōngurri arruppe, ñimuinug puatōweim purainrrab isuig kuig kōn, ñim nan Judeasrōngatig yamigwan purugunrrai.

17 Tru na oyeegwan martrab isuibe, ¿kabe nabe ke mōi mōi martrab kurrig kōnrrab kō chindah? ¿Kabe tru na oyeeg martrab indiibe, nai isuigu Tiuswan ashmō misaamera lataig martrab inchibig kua, mōindō ke: “Martrab” taitō, katō: “Marmōnrrab” taitō inchab inditamagueh?

18 Pōs Tiusbe nō maig chippe, nōbe treegwan marōbig kōb lataitōwei, nam ñimun wamindiibe mōindō: “Ōn” taitō: “Ka” taitō indig kōmōtō kōn.

19 Kaguende ñimui utu na kōben, Silvano kōben, Timoteo kōben, nambe Tiuswei Nusrkai Jesucristoimburab eshkab kusrenanig kōn: “Ōn” tantō: “Ka” tantō indig kōmōtō, nuinuube chu uraskucha: “Ōn” taig. Nōbe truig kōn.

20 Kaguende Tius kerrigu nō chi martrab cha kōrrōmisriilōbe Cristoinuube: “Treeg martrab” taig, truig kōn. Inchawei nambe Cristogurri: “Treeg kōn” chibelō ker, nangurri Tiusbe mayanguen tabig wamindig kōnrrai.

21 Inchen Tius nōtōwein kōn Cristoinug mur pōnrramig kōnrrai marōbiibe namun lata, ñimun lata. Incha namune nuindō kōnrrai tarōmara pōnsra,

22 nuielō kōnrrai sellotōga sellawa, namui manrrau pasrōnrrai Espiritu Santon katsig pasra tranōbguen indig kōn, tru tranrrab kōrrōmisrigwan kutōgüewan tranrrab kui asamig kōnrrai.

23 Pōs nabe Tiusken ashen trendamōnrrun: Na Corintosrōmay katōgucha arrumuppe, na ñimun kalugueetōmōnrrab lastima ashiptō arrumuig kōbig kōn cha.

24 Kaguende ñimui isubigwan Cristoinug pasra pōnrramigwane treeg pōnrrōnrrai inchib ke nam karub pōnrrōnrrab kōmōtō, masken ñim kasrag pōnrrōnrrai nambe purugubguen pōnrrer. Kaguende ñimbe tru isubigwan Cristoinug pasra pōnrraikkurriwei ñimbe mur pōnrran.

2

1 Inchawei na katōle ñimuisrōmay arruppe, nabe ñimun truba truba isui inchain kōmōtō, attrab isuig kuig kōn.

2 Kaguende na ñimun isui inchain marene, trube, ¿nane mu kasraarani-asamō? ¿Tru na isui inchain mariilōtōwei kasraaranmōnrraitarru?

3 Inchawei nabe oyeekkurri tru merrab kilgawan na pōrōppe, tru nanguen kasraaranrrabelō na trusrō puben, nan isui indingarumōnrraim pōrig kōn.

Pøs na kasrag pasrøbene, ñimgucha chiguen kømøtø, mayeeløba treetøwei pønrrønrraimab isuague.

⁴ Kaguende nabe ñimun pørøppe, truba truba isui pørig kuig køn, nai manrraube purø tab kømui, truba kappin kørøgøb. Kabe na ñimun truba truba isui inchai martrab kømøtø, nabe ñimun truba truba undaguig kui ashchai indig købig køn.

Kalø marøbigwan Pablo truburo ulø paymub

⁵ Tru øyeeg isuim pasrønrrai møikkøben treeg marøbiibe, nandø kømøtø, kan mayangatig ñim mayeelanba isui inchai mara pasran tamønrrun, ke menrra inchimønrraptø.

⁶ Inchawei tru mowan ñim mayeelø lutaelø misra, nui kalø marigwan øl martrab ñim asha mariibe yandø tsabø køn.

⁷ Truigwane yandø ulø payib kømø, pesannab, masken kuñab purugumig køn, isubiitø yandø kerriguwan mandøguen kømui inchimønrrai.

⁸ Inchawei nabe ñimun tru møweimburab ñimui undag købigwan katøle tiusmanda kenamaray tamønrrun, ñim undaguelø kui nø ashchai.

⁹ Kaguende na ñimun pørøppe, øyeegwan isua pørig køn, chiyutøgucha maig taigwan ñim mørøbelø køtashchab ashchab isua.

¹⁰ Inchawei chigøben kalø marøbigwan ñim chi ulø paymø pesannanrrab isua kørømarene, nagucha nune treetøwei ulø paymø kørømmisramønrrun. Pøs chi kalø marigwan na ulø paymø, pesannappe, (ulø paymumig chi pønrraig kuig køh chindindøbe køben) ñimgurri treegwan marig køn, Señor Jesucristoi merrab,

¹¹ namun Satanás kegørrørskøb nø kanailø kømønrrab. Kaguende nambe tsabø ashibelø ker nøbe chitø martrab inchibig kuigwan.

Cristotøgabe kanawa puraamba pønrramig

¹² Na Troas ciudasrø, Cristoi tabig srø wamwan eshkab kusrenanrrab pubene, Señorweimburabelan maramig yaskappe tabig kurøppe kurendø,

¹³ nai nuneg Tito trusrø mu kaagøptinchene, nane nai isubigube ni mumayguen kømuben, nabe trusrøngurri nømun ungwa chippa, Macedoniasrømay ibig kur.

Tiuswan 'ungwa, ungwa' taig

¹⁴ Inchendø Tiuswan 'mayanguen ungwa, ungwa' chinrrab, Cristoinuube nam kaigwan kanawa ¡katø! luchimíig tsimaytø puraambub ambamig kønrrai marøb, katø tru Cristoimburab nebua asiiløbe purø may irrabzhig lataig chutøgucha namgurri larrøbitchai marøb Tiuswan.

¹⁵ Kaguende Tiusweimbe nambe Cristoi tru purø may irrabzhig latailø ker, kaigyugurri wesraig pønrrabelai lata, tru managatig pinab pinamsrømay amrrab pønrrabelai lata.

¹⁶ Incha møilø tru pinab pinamsrømay amrrabelaimbe tru irrabiibe kwaitø irrøben, katøganelø kaigyugurri wesrailaimbe tru may irrabiibe øsig kømigwan irrabig køn. ¿Inchen øyeegwan marøb pasrønrraptiibe mu kø chinderah?

¹⁷ Katøganelø misaamera truba nørø tru Tiuswei wamwan kan chigucha kømíig kui lataig an marøb srua llirabelø latawei, nambe treetøwei marøb pønrrømeelø ker. Treeg kømøtø, Tiuswei merrab waminchippe, maig wamin-damigwan søra kømø, sølwan waminchib, Tius øriilø kermab isua, Cristogurri waminchibelø ker.

3

Tru srøig 'øyeeg, øyeeg martrab' cha kørørmisrig

1 ¿Kabe nambe katøguen namashib chi isumgaig 'tabelø ker' chib waminchib pønrrabra chindah? ¿Kabe nambe katøganelø latawei chi isumgaig tabelø kui ashchai, kilga pøriilø ñimun tranamig, kabe ñimgurri kilga pøriilø namun tranamig palaim pønrrabra chindah?

2 Nam mailø kuigwan treeg asønanrrabelø tru namuyasig kilga pørig latailøbe ñimwein køn, tru ñim purø tabig amønaig, tru namui manrrømerayu pørig pasrabig, mu misaameratøgucha ñimun mumera kətashib, mailø kətashib ashib tøgauilø.

3 Ñimbe tørgandø asamdeelø køn, kan kilgayu Jesucristo nøashib pøri latailø, tru namui maramigwan marøb pønrrailøygurri ñim srøig kurrabelø, tintatøga pørig kømøtø, øsig wab Tiuswei Espiritutøga pøriilø. Kabe srug tambalmerayu pøriilø kømøtø, misaamerai manrrømerayu pøriilø køn.

4 Nambe iigwane Cristogurri Tiuswei merrab treeg kuitamab isua pønrrer.

5 Kabe nam namashib øyeegwan martrapteelø namdø tsabø marøbelø kua, chi arrubiibe namuinukkurri arrubig kui lataig inchib pønrrømøtø, nam øyangatig tsabøtø marøb pønrramig arrubiibe Tiusweinukkurri arrubig køn.

6 Incha Tius nøtøwei namune tru srøig acuerdo marigwan nam sølgandø marøbelø kønrrai mara pønsraig køn, tru acuerdo merrabsriig maig maramigwan martraim pørigwan kømøtø, tru Espiritu Santoiwan. Kaguende tru maig maramigwan martrai pørigwan mørmiigweimbe kwamigwan srua arruben, trune Espiritu Santobe tru srøig øsig kømigwan tranøbig køn.

7 Inchen tru maig maramigu marøptøga pønrraig kwamigwan srua arrubig, srug tambalmerayu pørikken tørguegwalmabig køptø, Israel misaamerabe Moiséswan malauguen ashchab kaimaig købig køn, nui malø tørguegwalmabig køben, tru tørguegwalmabiibe kwab yaindøgucha.

8 Inchen tru øsig kømigwan srua arrubigwan marøb pønrraig tru Espiritu Santoimbe, ¿kan treetøguen kønrrab kømø, maig tørguegwalmabig kuaasamø?

9 Inchen tru maig maramigwan marøptøga pønrraig misagwan kaigyu pønrrønrrai kørømara pasrøbikken treeg tørguegwalmabig kuibe, tru marøptøga pønrraig misagwan Tiuswei merrab chi kaig kømeeelø lataig tabig kønrrai marøbiibe, ¿kan treetøguen kønrrab kømø, mas purø tørig tørguegwalmabig køn!

10 Kaguende truig tørguegwalmabig lataig kuikken tru iig purø tørguegwalmabiibamara ashene, truiibe chi tørguegwalmabig kømøn.

11 Inchawei tru tørguegwalmabig kwab ibikken kan treeg tørguegwalmabig tøgaig arriibe, tru mana pinømø pasrabig pasrønrrabiibe ¿mas maig tørguegwalmabig kuaasamørra!

12 Inchawei tru tøgagønrrurmab isuigwan nam tøgaguen pønrraig køppe, nambe chi kørømø maig tamigwan tørgandø waminchibelø ker.

13 Kabe tru Moisés lataig inchib pønrrømer, tru Israel misaamera nui malau tørguegwalmabig kwab arrubig yandø patsi ashmønrrai, malø kasraitøga kasrøb lataig.

14 Inchendø nømui turmerayube yandø chi wamindikken kebyainameelø murig misriilø kua, møin kwalømgatig tru merrabsrø Tius acuerdo marig købigwan leben, chi tainguen mørmeelø køn, tru malø pinøgasrøb pasrabiitøwei pasrabig pasraikkurri. Kaguende tru pinøgasrøbigwane Cristotøwei kerranrrun.

15 Incha mōin kwalōmgatig tru maig maramigwan martrai Moisés pōriilan asiimōrig, tru malōwan pinōgasrōbig lataig pasrabiibe nōmui manrrōmerayube kasrain pasran.

16 Inchendō mōikkōben Señorweimay llirawa pasramisrene, tru pinōgasrōbig lataig pasrabiibe nuinukkurrimbe kerraig kōnrrun.

17 Kaguende Señorbe tru Espiritu kua, Señorwei Espiritu chu pasrōbene, Tiuswei merrab kemalamig truyube chigucha ilōsrkōnrrabiibe chi kaagōn.

18 Inchawei nambe mayeelōba malōwan chi kasra kōmō lataig ashīb pōnrrabelōbe, kan espejo latailō ker, Señorwei tru tōrguegwalmabigwan kegurnabelō, nō maig kōben nam treelōtōwei misrōb, katōguchinguen, katōguchinguen tōrelō misrōb amber. Treebe Señorweinukkurri arrubig kōn, tru nō Espirituinug.

4

Jesucristoimburabigwan eshkabelō

1 Inchawei nambe Tius namun lastima asiitōga i tru marōb pōnrramigwan tōga pōnrraig kōppe, nambe chi kullaarab melōmer.

2 Pōs chigōben ke kōrikken kōnrrapteelō sōratō mariilane nambe yandō wendōbasar ker, sōratō larrō mōg isua marōb pōnrrōmōwei, Tiuswei wamwan lliska peemaytō marōb pōnrrōmōweingue. Treeg marōb pōnrrōmōtō, tru newan ciertonigwane maig kuigwan tōrgandō kenamarōb pōnrraikkurri, nam tabelō kuigwan namashīb kenamarōb pōnrrer, maya misaamerai isub kebachi pasrabigu ka inchib pasrōmugumab isumig kaanrai Tiuswei merrab.

3 Inchen tru tabig srō wamwan nam eshka kusrenanig katōgucha pinōgasraig lataig chugūi mōriimig kōrrōmisrōppe, tru yandō pinab pinamnuumay amrrabelaimbe pinōgasraig lataig kōrrōmisran.

4 Kaguende tru mōin kwalōm yu pirau tius, tru nugwaimandziibe, tru chi kōremeelane nōm chigūi mōramig isubig tōgagūigwane chigūi mōrmeelō kōnrrai kasra pasrin kōn, tru Cristo tōrguegwalmabigwei tabig srō wam tōrbilabigwan nōm nebua ashmōnrrai; tru Cristobe Tius maig kōben, truig kōn.

5 Kaguende nambe namuimburabigwandōwei eshka kusrenanmōtō, Cristo Jesúsbe mayelaim pala nō ashīb karub pasrabig kōn cha eshka kusrenanōbelō ker. Katō nambe Jesucristoyasig ñimuimbe ka karuindō melabelō ker.

6 Kaguende: “Tru lōstōyugurri tōr pilōnrrain” cha, trenchib Tius nōtōwei namui manrrōmerayu nūi tōrtōga kebilin kōn, tru Tiuswei tōrguegwalmabig Jesucristoi malau pilabigwan nebua asam tōrwan namun tranig kōnrrai.

Chigōben trōmbōig puingucha mur pōnrrab

7 Inchendō nambe iig tru purō tabigwane namui asr kan pirō kōtsō lataigutō tōgaguer, tru iig maramburab marōbig purō nuig tabiibe namuin kōmōtō, Tiuswein kui kenamartrab.

8 Chiyutōgucha chine chine pui melamig nebuingucha, ke truyutō tambal ambagucha warōmer. Ke kan chindamerab isumig pui melōbendō, yandō ke kaimamuitamappe isuilōgucha melōmer.

9 Namundō marōb amruindōgucha, namundō elatsiilō melōmer. Pōtiitsiilōbe kuinabendō, kerriguwan pinisailōbe kōmuinatan.

10 Inchawei nambe chu ambuptōgucha, namui asru Jesucristo kwaigwane tōga amōner, katō Jesucristo oisig waikkucha namui asru kenamisrtrai.

11 Kaguende nam øsig pønrrabeløbe Jesucristogurri chu urastøgucha ke kwaitø, kwaitø melamig nebutan, namui ka pinønrrab asru Jesucristoi øsig pasraikkucha kenamisrtrai.

12 Inchawei namuinuube kwamig marøb pasrøben, trune ñimuinuube srøig øsig kømig marøb pasran.

13 Tiuswei wamwan pøriguma trenchibig køn: “Kørewa, treekkurri waminchar” cha. Pøs namgucha namui isubigwane Cristoinug treetøwei pasra pønrrøwa, treekkurri nambe kørewa, Tiuswei wamwan waminder.

14 Pøs nambe ashibelø ker; Señor Jesúsuan kwailai utugurri Tius tru katøle øsiirangarubiibe, namungucha Cristo Jesúsba tru kanbalatø pønrraikkurri kusrua, Tiusbe nui merraptøwei nam ñimba kanbalatø pønrramig kønrrai martrab kui.

15 Pøs kerrigu øyeeg pub arrubiibe ñimuyasig tab kønrrain køn, tru ka yandø tab indig misagwan katøguchinguen, katøguchinguen nebut ibene, ‘ungwa, ungwa’ tameløgucha nuramburab nuranrrai, Tiusweyasig maya nuguen tab kønrrai.

16 Inchawei nambe chi kullaaramer. Kaguende namui asrbe patsab yaingucha, namui umbube kwalømmørig, kwalømmørig srøig misrøb inrrun.

17 Pøs nam chigøben puinab melamig ka petø pureb arrubig, kan yangucha murig køtanmab isub mur kui melaiibe managuen patsønrrabgaig kan tørguegwalmabig maya nuibaguen øyeeg lataig køn cha, kemesra trendamgaig tabigwan tøgagig arrubig køn.

18 Kaguen nambe namui kaptøga asigwan asha pønrrømøtø, chi nebua asiimigwan asha pønrrer. Kaguende kaptøga nebua asiløbe ka purainrrabitøwein køben, trune tru kaptøga nebua asiimeeløbe managatigweyelø køn.

5

1 Pøs nambe yandø ashibelø ker, yu pirau nam øsig pønrraig tru namui asr ka petøweindiig kan rancho-unø mara pasrindø lataig, yandø minchib patsindøgucha, katøgan srø asr purø tab ya lataig, mu møguelø taska mari ya kømøtø, srømbalasrø managuen patsønrrabig kømig Tius tranig tøgagømigwan.

2 Inchawei nambe yu pønrrappe, tru srømbalasrø kewa purramitøga pinøbuliilø kømigwan, mana kønrrermab truba truba nuisrab isubelø ker.

3 Treebe namune srø asrtøga kenanen, nambe yandeelø asr chigar kømø, tøgar kømønrrun.

4 Inchawei i asr kan carpa ya lataigu nam øsig pønrrabeløbe larrø tab kømui, truba truba nuisrab isuig melabelø ker. Pøs namune kwamuinrrabna køtan nam tøga pønrraig asrwan trubalatø srøig itøguenniilø kømøwatøbe, tru yandø pinab patsønrrabigwane tru srøig øsig kømibe yandø nøtø kerriguwan pinabgasra pasramisrtrai.

5 Inchen namun øyeeg pønrramig kønrrai marøbiibe Tius nø køn, tru treeg kønrrai Espiritu Santon katsig pasra namun tranøbguen inchibig, tru tranrrab kørømmisrigwan kutøguewan tranrrab kui asamig kønrrai.

6 Inchawei nambe chu urastøgucha chi isumø pønrrer, tru namui asru øsig amøñipatøbe, Señorweim pulu kømøtø, nambe yabsrøndø pønrrabelø kui nebua asha.

7 Kaguende nambe amøñippe, namui isubigwan Cristoinug pasriitøgatø amøner, namui kabrrawa nebua ashagurrin kømøtø.

⁸ Inchendø nambe treeg kørnraitamab chi isumø pønrrer, masken namune asrugurri tarømisra ambinrrabna kətan, Señorba kanbalatø purrønrrab am-rab.

⁹ Inchawei namui asru øsig pønrrøwa lata, asrugurri tarømisra amba lata Señor nø tab kui mørøb wanrrai marøbelø kəmig namuimbe truig kən.

¹⁰ Kaguende nambe tru maig maramigwan Cristo asha marøb wainug mayeeløba kemalamig kən, namui asru amøña tabig marig kuin kui, kaig marig kuin kui maig marigwan nam møitøgucha truburø utønrrab.

Tiusba katøle tab kørømisramig

¹¹ Inchawei Señorwan mandø kørig tøga pønrramigwan nam ashibelø kuig kəppe, misaamera Señorwan kørenrrai inchib melabelø ker. Pəs Tiuswei merrabma nam mailø kuigwan tørgandø kenagūibe, katø ñimui isub kebachib pasrabigugucha treetøwei tørgandø kenagønrraimab isur.

¹² Kabe nambe namasiitø katøguen ñimui merrab 'truba tabelø ker' chib pønrrømøtø, ñim namgurri tab kui mørøb kasrag pønrramigwan tøgagønrrai treeg isua inchib pønrrer, ñim tru mandø lətamigwan tøgagønrrai, tru manrrau-gurri isua kəmøtø, ka palatø treeg maranmab ashchaidø mөг inchib chib pønrrabelan.

¹³ Namun 'locos kən' tainab pønrraibe, Tiusweyasig kən. Inchen maig pønrramigwan chugūi møra pønrraibe, ñimuyasig kən.

¹⁴ Kaguende Cristo undag kəbiibe namune martrai trawaguchibig kən. Pəs iigwan nam isua ashene: Cristoma kwappe, mayeelaimburø kwaig kəbene, treekkurri mayeeløba kwaig kən.

¹⁵ Inchen Cristobe kwappe, mayelayasig kwaig kən, tru øsig amøñibeløbe ka nømuyasiitøwei øsig amøñimøtø, nuyasig amøñibelø kənrrai, tru kwawa, katøle nømuyasig øsiirabigwei.

¹⁶ Inchawei nambe yandø møingurrimbunøbe mundøgucha yu piraelø isuimay ka treetø isua ashib pønrrømeeleø ker. Pəs nambe merrappe Cristone yu piraelø isua asimay ashibelø kuatøgucha, møimbe yandø treetø nebua asha tøga pønrrømer.

¹⁷ Inchawei møikkøben Cristoinug pasrabiibe, yandø nøbe kerrigu srøig kən; merrabiibe yandø chab puraiben, møimbe yandø kerrigu srøig marig peemayig kən.

¹⁸ Inchen kerriguba øyeeg arrubiibe Tiusweinukkurrin kən. Pəs nam kailø kua nøbatøwei tab kørømisramigwan Cristo Jesúscurri treeg kənrrai mara, kailø kua, Tiusba tru tab kørømisram wamwan nam marøb pønrrønrrai, nø tranig kən.

¹⁹ Tru wambe iig kən: Tiusbe nøbatøwei Cristogurri pirau maya misaamer-aba kailø kua, tab kørømisramigwan marøb pasraig, nømui chi kaig mariilan ulø payrrab isua ashmøtø. Tru øyeeg nøba tab kørømisram wamwane namun waminchai trana pənsraig kən.

²⁰ Nambe Cristo munchiyu, misag utu Cristo nø waminchib pasrab lataitøwei nui wamwan waminchib pønrrønrrai pənsrailø ker. Namgurri Tius nøashib treeg maray chib pasrab lataitøwei, nambe Cristo munchiyu ñimun tiusmanda øyeeg martrunrrigay tamønrrun: ¡Tiusba tab kørømisramigwan maray! cha.

²¹ Cristobe chigucha chi kaig marig chigaigwan, Tiusbe namuimburø nune kaig marøbig kui lataig treeg mara pasrig kən, nam kaig marmua lataig pønrramig kənrrai Cristogurri treeg martrab.

6

1 Nam Tiusba marøb pønrrabelø kuig kōppe, ñimune øyeeg marøb kōrrunrigay chinrrab, Tiuswei tru ka yandø tab indigwane ke chi martraamøbendø uta tōgagōmōtay cha.

2 Kaguende nui wamwan pørigube Tiusbe trenchibig kōn:

“Yandø tru purugum kwalōmmera puim pasrøben, ñun mōrig kōn cha.

Kaigyugurri wesrailø kōm kwalōm puim pasrøben ñun purugúig kōn”
cha.

¡Møi yan kōn, tru tabig purugúigwan utamibe! ¡Møi yan kōn, tru kaigyugurri webambam kwalōmbe!

Pablon chine chine nehub arrilø

3 Mugøben Tiuswei tabig srø wamwan kaashib, nam marøb pønrraigwan kaig kōn chib wamindig kōmønrraimbe, nambe kaig marøb mungucha srur-rengwangerub pønrrømer.

4 Masken treeg inchimøtø, nambe chiyutōgucha Tiusweiwan marøb melabelø kui asiilø kōnrrab treeg kenamarøbelø ker: chu uraskucha elachimøtø, marøbig marøb melamigu lata, chine kaig pub arrubigu lata, chine palai mōrøb, isui melamig arrubigu lata,

5 ichagutsiilø kōmig nebui lata, kailan pōnsrai yau keerig pønrramig nebui lata, kanbalatōmisra kaig martrab namig kurrøben treegu melamig nebui lata, maramga murelan marøb melamig nebui lata, kibguen kimø melamig nebui lata, chigucha mameelø puraambub melamig nebui lata,

6 chi kaig marmø chishig amōnamigu lata, nebua ashib ambigu lata, chine indindōgucha tammay ka melabig melab, tab inchibelø kōmigu lata, Espiritu Santo namba pasraigu lata, nam ka inchib kōmø, cierton undaguelø kuigu lata

7 cierton wamindamigwan treeg waminchibelø ker. Tiuswei maramburab marøbiitōga marøb, tru chigurrimbunø tabig sōlgandø marøb pønrraitōgabe nambe kusrmayba, atsimayba srua kwayab pønrrer, kan suldau kwayab turiamig kusrmaybe espadan atsimaybe escudon srua kwayab pasrab lataitōweingue.

8 Kanmaywane truba tab indinab, kanmaywane maig kōbash indinab, kanmaywane truba tabelø kōn chib wamindinab, kanmaywane larrø kailø kui mara wamindinab, maig kuigwan nam cierton waminchendø, larrø may wamincha isapteelø kui marinab,

9 nambe mumerā kui nebua asiilø kuinabendø, asiimeelø kui lataig tōgagúinab, yandø kwawa pinanmab asha tōgagúindōgucha, øsig amōñibig amōñibelø, trōmbøig ichabetiilø kuinabendø, kwamø ka øsig amōñibelø,

10 truba isiilø meløbendø, purø tab kui kasrag pønrrabelø, larrø waacham-
era kuinabendø, misag truba nōrrøwan tabigwan tōgagōmburab tōgagōnrrai
marøbelø, chugurringuen kōmeelø kerrigu chiga latailø kuinabendø, ker-
riuh tōgar treelø kuinatan.

11 Nambe, ñim corintosreelan, maig wamindamigwan tōrgandø treeg wa-
minder. Nam ñimuimburab isumibe namui manrrømerabe ke kurindø pasran.

12 Ñimuimburab nam isumibe chugatikkucha kurin pasrøben, ñimweinrre
kasrøb tōgagōn namuimburab.

13 Ambugurri igurri lata treeg kōnrraimab isua, kan nai ureg kui
lataitōwei nabe ñimune trenchar: ¡Ñimui manrrømerangucha treetøwei kura
tōgagōrrunrigay! cha.

Nambe øsig wab Tiuswei ya ker

¹⁴ Ñim Tiuswan kørebeløbe Tiuswan lata køremeeløbabe lincha maramgaigube chi lincha maramig kòmøn. ¿Kaguende tru tabig sølgandø maramiba, sølgandø kòmø mariibabe chincha kandø kønrrab kø? ¿Katø løstiiba, tøbabe chincha trubalatø kønrrab kø?

¹⁵ ¿Cristoba, Belialbabe chincha kandø isunrrab kø? ¿Criston kørebiiba, Criston køremiibabe chincha kandø isub pønrramdiig kønrrab kø?

¹⁶ ¿Katø Tiuswei yaba, taska mari tiusmerababe chincha trubalatø kønrrab kø? Kaguende nambe tru managuen kwamø øsig wab Tiuswei ya ker. Pøs nøbe trendaig køn: “Nabe yandø nømuintug pasrabig pasrab, nømui utu uñib indamønrrun cha. Nabe nømui Tius køben nømgurrimbe nai misaamera kønrrun” cha.

¹⁷ “Inchawei treeg købene:
Tru kaig marøb misaamerai utugurrimbe webamba,
yandø nøørømisray” cha,

Señorbe nui misaameran trendan.

“Chigøben køsøngømdiigwane katøramøtay cha.

Pøs marmubene, nabe ñimun utamønrrun” cha.

¹⁸ “Incha nabe ñimuimbe møskai misren,
ñimgurrimbe naimbe nai nusrkalø,
nai nimbasmøra misrtrabguen” cha,
Tius Newan Maramburab Marøbiibe trendan.

7

¹ Inchawei ñim, nai undaarailø, tru Tius tranrrab misra kørrømisriilan tøgärb, namui asru lata, namui espíritu yata, kaig marig køsøngønrrapteelan kerriguwan chish misrkun, Tiuswan køriibala pønrraigu kerriguwan nuindø newan tabelø kønrrab.

corintosreelø yandø mas kaig marmønrrab isua mørøb

² Namun ñimui manrraugurri isua utørray chinrrab inchar. Nambe møigwangucha ñimun sølwan marmø kalø mara pønrrømøwei, kaig marøb ñimun møigwangucha mindisha kørrømarmøwei, kabe nam ñimgurri nam tøgämsmøwei indig køn.

³ Nabe iigwan ñimun øyeeg chippe, ñimbe øyeeg kailø køn chinrrab kømøtø inchar. Nabe yamba trendaig kuig køn, nambe ñimune namui manrrau tøgä pønrrer cha, øsig amøña lata, kwamig kui lata ñimun namui manrrau tøgägnrrab.

⁴ Nabe ñimune chi isumgailø kui isua pasrab, chiburø køben ñimgurri na truba tab kui mørøb pasramigwan tøgägnø inchar. Nan truba tab kønrrai mari pasrar, chine isui pønrramig puindøgucha, kasrag købigwan tøgägnøburab tøgä.

⁵ Nam Macedoniasrø puabe, namui asrwane kan pishindø tabguen israb tøgägnømig nebumiig køn. Treeg kømøtø, chiyutøgucha ka isui melamitø, isui melamitø arrubig køn namune, namuim pøtøgatanbe chinetø indinab melamig arruben, namui manrraube kørig isub melamig.

⁶ Inchendø Tius tru larrø kullaarai isui melabelan isui inchimønrrai marøbiibe, Tito arriitoga namune truba tab kui melønrrai marig køn.

⁷ Katø Tito arrikkurrindø kømøtø, nøgucha ñimgurri truba tab kui mørøb pasramigwan utikkurrimba køn. Nøbe namun wammørsrkøtan, ñimbe nan truba ashig kui melaigwanba, ñim tru merrab kalø marig købigwan isua møra kappin kørrøgaigwanba, ñim naimburab truba truba isub melaigwanba. Treekkurri nane katøguchinguen kasraaranrrai martan.

⁸ Pøs na ñimun tru kilga pøra øriitøga ñimun truba isuilø kørromisrtrai marig købigwane nane chi isumøtan. Pøs tru urasbe nane isubwei indig køn, kaguende tru na kilga pøra øriibe kan maya yanagatiitøbe ñimun isui melønrrai marøbwei inchen.

⁹ Møimbe nane kasrag køppe, tru ñim truba isui melaigwan, trunun isua kasrag kømøtø, tru ñim truba isui indiibe ñimui kaig mariilan isua møra, Tiusweimay lliaranrrai marikkurri nane kasrag køtan. Pøs ñim truba isui inchib pønrrappe, Tius trendø treeg kønrrain køben kuig kua, nambe ñimune chigucha chi kalø punrraimbe marmuig køn.

¹⁰ Tius maig palain køben nam trumay isui inchib pønrraibe ñimui kaig mariilan isua møra, Tiusweimay lliaranrrai marøbig køn, kaigyugurri wesrailø kømigweyasig trembe kaabashmøtømab isumig chigaikke. Trune isui inchib pønrramig arrubig yu pirauibe, kwamibe tøggaig arrubig køn.

¹¹ Tius maig palai inchen, ñim trumay isui inchib pønrraigwan ñimguen asay: ñimuinug truba marøg kui inchib pønrramig arrub, øyeekkølig kalø marøbrain køn chib tør marøb pønrramig arrub, kalø maren namig isub pønrramig arrub, køriibala pønrramig arrub, truba truba asinrrabna kui inchib pønrramig arrub, tabigweimburab ke chinsraatø inchib pønrramig arrub, kaig marøbigwane møra meganrrai marøb pønrramig arrub, treeg arrin køn. Inchawei kerrigu øyeg purayaigu ñimbe chi kalø mara pønrrømuin kui kenamarøb pønrran.

¹² Inchawei tru kilgawan pørøppe, tru sølwan marmø kaig marøbigwan isua, truikkurrim pørmøwei, kabbe tru kalø marinabigwan isua, truikkurrim pørmøwei indig køn. Treeg kømøtø, tru ñim namuimburab truba isubelø kuigwan ñimui utu Tiuswei merrab nebua asig kønrrai indig kuig køn.

¹³ Inchawei nambe chi isumø tab kui pønrramig kønrrai mariilø ker.

Nam tru treeg tab kui pønrraig kømnetø, Titon truba truba tab kui pasrai ashabe, nambe larrø tab kui truba kasrag pønrrer. Kaguende Titone nui isubigu katøle truba tab kui mørøb pasrønrrai, ñim søteelømisra purugúin køn.

¹⁴ Pøs ñim corintiosmeraimburab truba tab kuim pasrar chib Titon na waminchib pasraigwan, chi køriimisra kørromismur. Nam ñimun kerriguba chigøben wamindiima chi isa wamindig kømuig køppe, ñimuimburab truba tab kui mørøb Titon nam waminchib pønrraikkucha treetøwei isa kømø wamindig webyan.

¹⁵ Inchawei Titobe mømibe ñimune katøguchinguen undaguig køn, tru nø maig karuigwan ñim mayeeløba mørøb, nun utabgucha, køriibala ke itønab utig købigwan isua.

¹⁶ Chiyutøgucha ñimbe chi isumgailø kuimba mayanguen nane tab køtan.

8

Merø kømø, tranamburab tranigwan waminchibig

¹ Trube, mømibe ñim nai nunelø, wammøra kønrrai inder, tru Macedonia pirausrø iglesiameran Tius nui ka yandø tab indigwan øyeg tranigwan.

² Yeeg chine kaig nebuinab melamig pub arrubig ututø, nømui kasrag købigwan kasrag kømburab tøgagúiba, larrø chugurringuen kømuilø melaibabe, merøbala kømø, tranamburab tranøbelø kønrrai marin køn.

³ Inchawei nabe maig kuigwan wamindamønrrun, tru nømun maig purugundiig køben treeg purugua, nebumbaigwanguen nebua tranig køn cha, nømun mu tranrrai indig kømøtø.

⁴ Pøs namune truba rugabelø køn: “Tru Jerusalénsrø Tiuswei misaameran namgucha truilan tøga purugúig kønrrai treeg marbashibsrømøgue” chib.

5 Incha nam treeg martraitamab isuigwandø marmøtø, nømbe Señorweyasimerrig pønrrønrrab nømashib pønrramisra, trugurrimbe namun treetøwei pønrrønrrab pønrramisrøbelø køn, Tius maig kønrrain køben treeg.

6 Inchawei nambe Titone øyeegwan martrunrrig cha waminchibelø ker: “Iig truba tab indigwan ñi maig marøb pølbashiibe, katø treetøwei tru corintiosmera jerusalénsreelayasig tranigwane tabig marøb patsøgørrunrrig” cha.

7 Pøs ñimbe isubigwan Jesucristoinug pasra tøgagømigu lata, Tiusweimburabigwan nebua ashib waminchib ambigu lata, Cristoi maramigwan tab asha maramigu lata, ñim namuimburab undag købig tøgagúigu lata, chiyutøgucha ñimbe ya merrabguen melaig køppe, lastima asha tranøbelø kømigu chigucha iyu treetøwei merrabguen webamrrab inchigay.

8 Maig martrain chippe, ke kandø chibig lataig nabe treeg karua pasrmur, treeg kømøtø, ñim undag købigwan chaon tøgagúitashcab ashchab inchar, katøganeløma treeg tab marøbelø køn cha trunun eshka.

9 Kaguende ñimbe namui Señor Jesucristoi tru ka yandø tab indigwan nebua ashibelø køn, nøbe chigucha chi palømiig tøgag købendø, ñimun undag købiitø larrø waacha misra, tru nø treeg waacha misriitøga ñimun Tiusweimburabigwan chigucha chi palømeelø kønrrai marigwan.

10 Incha iigube nabe ñimun øyeeg maramdiig køn chinrrab inchar: tru purugunrrab tulisamigwan ñimbe marig pilawei tranamigwan ñimmerrig tranø, katø trutø kømøtø, maramigwan ñimwei isuig kuig købene,

11 trube, ñim pølbasa marigwane mømibe tabig marøb patsøgamig køn cha. Tru ñim purugunrrab indamigwanma ñim ke martraptø pønrraig køppe, trube, tru maramigwane treetøwei marøb patsøgamdiig køn cha, ñimun maig nebubendø.

12 Kaguende møikkøben ke tranrrab isua, mayanzhig tranamdiig køben treeg tranigwane Tiusbe chi kashmø utabig køn, ke chugurrin kømuingucha tranrrai inchimøtø.

13 Inchendø nabe øyeeg chippe, kaneløbe chairailø kørømisren, ñimbe purugub meløwa, ke chugurringuen kømui inchib kønrrain kømøtø,

14 mumaytøgucha lata kønrrai inchar. Møin kwalø ñim chigucha chi palømiig uncha tøgagúibe nømun purugumig køben, katøwan ñim palai meløbene, tru nøm uncha tøgagúibe ñimun purugumig kønrrai. Trumaybe mumaytøgucha lata kønrrun.

15 Tiuswei wamwan pørigu maig taimbala: “Nu tulishibiibe ke unchagøm tøgagømøwei, lamøtø tulishibiibe palappuin kømøwein køn” taig.

Titon Corintosrømay karua ørøb

16 Namui Tiuswan ‘mayanguen ungua, ungua’ chinrrab, ñimuimburab na isui lataitøwei Titoi manrraugucha isunrrai pasrigwan.

17 Pøs na nun Corintosrømay ya, øyeeg maramdiig køn cha, na wamindigwan ka møriitø kømøtø, nøbe maramigwane ke marøg kuindø megaig kuig køppe, nøashib treeg martrab isua, ñimuisrømay yan.

18 Incha kan nuneg, Tiuswei tabig srø wamwan eshka kusrenanøb pasraigu, chu iglesiameratøgucha nune truba tabig wamindinabigwan nambe Titoba lincha inrrai ører.

19 Incha katø treetø kømøtø, tru iglesiameragucha nun lawa wesraig kuig køn, tru jerusalénsreelai tab indig purugúigwan nam srua amben, nø namun lincha attrai. Nambe Señorwan maya nuguen tab indig kønrraimba, nam

purugug kui pønrraigwan katøganelan kenamartrappa, tru an tulisai gwane nam asha marøb pønrrabelø ker.

²⁰ Mugøben namun 'øyeeg kalø marøpteelø køn' tainab pønrramig kømønrrai inder, tru yeeg nørro keta traniiilan nam asha marøb tøgga pønrrønrrai tranigwan.

²¹ Kaguende nambe chiwandøgucha maig maramigwan sølwan martrab inchib melabelø ker; Señorwei merraptø kømø, misaamerai merrabgucha treetøweingue.

²² Incha nambe katøgan namui nunewan nømun lincha inrrai ører, nui mariiøyu chiyugøben ke martraptø pasrabig kui katø katø treeg møg kui nam asigwan. Incha mømibe nøbe katøguchinguen tru maramigube ke martraptøweim pasran, ñim chi isungailø kui nø truba isua tøgagúikkurri.

²³ Pøs Titobe, naimbe nan lincha megabig, katø ñimui utu chi maramigu purugub megabig, treeg køn. Inchen tru katøgan lincha ambub nuneløbe, tru iglesiamera karua øriiø, Cristoyasiibe maya nuguen tabig kønrrai pønrrabelø, nømbe treelø køn.

²⁴ Inchawei ñimbe tru møguelane truba undaguelø kuin kui ashchai kenamartrigay, iigwan tru iglesiamera mayeeløba asha kønrraingue. Katø na ñimuimburab tab kui mørøb pasraibe chigurrin kui ashchai inday.

9

Cristogurri nunelan purugumig an tulisai g

¹ Inchen tru Tiuswei misaameran purugumig tru an tulisamigweimburappe ñimune chi pøramikken palømøtan.

² Pøs tru purugumigwane ñimbe purugunrrab ke muniitø pønrrabelø kui nabe ñimune ashbig kur. Incha nabe treegwan ñimuimburab macedoniasreelai utu truba tab kui waminchib pasraig køn, ñim acayasreeløbe tru tranamigwane marig pilasrøwei tranrrab chab tamara kuig købene. Inchen tru maramigwan ¡katø! marig kørømisrtrai isua ñim marøb kuibe, nøm tru macedoniasreelø truba yamelø treetøwei martrab isunrrai indin køn.

³ Øyeeg kuindøgucha tru ñimuimburab nam øyeegu truba tab kui mørøb waminchib pønrraibe, ka wamindiitø pureptinchibgunmab isua, i nunelan ørar, tru ñimuimburab na maig waminchib arrig, masken tamara kønrrai,

⁴ inchippa macedoniasreelø møiløgøben naba amrrub chi inchene, ñim chigucha marmø, pesan køben puinab melømønrrai. Pøs, kan treeg pubene, namune purø nu kørriimisram nebunrrab køn, ñim chab tamara melaitamappa nam ñimun chi wammørøsrøsmøikkurrindø. Pøs, ñimune masken kørriimisram nebunrrun.

⁵ Inchawei øyeekkurri, i nunelan ñimuisrømay merrab ashchab amrrai øramig nabe palai asig kuig køn tru purugumburab purugunrrab misrig købigwan tulisam purugua yandø ke chab tamara munig kønrrai. Trumay tru ñim purugumig tulisaiibe merøbala kømø, tranig kui asamdiig kønrrai, ke tranrrai inchendø, tranig kømøtø.

'Merø kømø, purugumigwan øyeeg maray' chib wamindig

⁶ Incha ñimbe iigwan isua kuy: møikkøben ke kagømønrraindiig ellguabiibe, katø treetøwei kagømønrraindiig tulishinrrun. Inchen møikkøben ellguamburab ellguabiibe, katø ellmarigwan tulisamburab tulishinrrun.

⁷ Ñim møitøgucha tranamigwan tranøppe, ñui manrrau maig tranrrab isua tøgagúig køben, treeg tranamig køn, ke tranmuinrrabna købendø, tranmøwei,

kabe ke treeg tranamig kuikkurrindø tranmøweingue. Kaguende Tiusbe kasraatø tranøbigwane undaguig køn.

⁸ Inchen Tiusbe maramburab marøbig køn chigurrimbunø tøgagømigwan ñimuinug tøgagømburab unchaguen tøgagømig kønrrai, treeg maramig, chiyutøgucha ñim chi palabigwan chu urastøgucha palømø tøgagua, chigøben tabig maramigu kerriguba ñim purugub kømig unchaguen tøgagønrrai.

⁹ Inchawei Tiuswei wamwan pørigube trenchibig køn:

“Larrøbitchai tsurøb, waachameran tranøb indig køn cha.

Inchen nui tru tabig sølgandø maramibe managatig pasrabig pasran”
cha

¹⁰ Inchen Tius tru ellmarøbigwan yell tranøb, pirri manrrai tranøb inchibiibe, maig palabigwan tranøb, ñimui yellwan nørrø larrøbitchai marøb, tru ñim tabig sølgandø maramibe kan ellmarig misrøb lataitøwei nørrø larrøbichib inrrai martrun.

¹¹ Trumaybe ñimbe chiyutøgucha chi palømíig tøgagønrrai mariilø kønrrun, chiyutøgucha purugumigu merøbala kømø, tranamburab tranøbelø kønrrai. Inchen ñim tru purugúigwan nam nømun tranen, nømbe Tiuswan ‘mayanguen ungwa, ungwa’ chib kømig kønrrun.

¹² Kaguende ñim øyeeg marøb kuibe Tiuswei misaameran chi palabigwan treeg purugúitø kørromismøtø, Tiuswan ‘mayanguen ungwa, ungwa’ chib kømikkucha truba truba kønrrun.

¹³ Inchen tru ñim øyeeg purugúigu ñimbe mumera kui asilø køn. Katø nømbe Tiuswan truba tabig waminchun, Cristoi tabig srø wamyu pønrrøwa, truig maig taigwan ñim møra, truigwan kenamarikkurrimba, katø ñimbe nømun merøbala kømø purugub, katøganelø mayeelan treetøwei purugub indikkurrimba.

¹⁴ Katø nøm tru ñim purugúigwan utabeløbe ñimuyasig Tiusba waminchippe, ñimuimburab truba nu undaatøga martrun, Tius nui ka yandø tab indigwan tøgagømburab tøgagønrrai ñimun tranikkurri.

¹⁵ ¡Tiuswan ‘mayanguen ungwa, ungwa’ chinrrab, wamindiitøgabe kan mandøguen tamgaig purø nuig tabig keta tranigwan!

10

Pablo Tiusweiwan nø marøb pasraigwan chinhaingag waminchib

¹ Na Pablo ñimun øyeeg martrigay chib waminchar, Cristoi tru purø tamayig kuitøgaba, purø tab inchibig kuitøgaba. Tru na ñimui malau pasrappe, chi tre chish waminchib pasrømig køn tainab, trube, peesrøn pasrappe, maig tamigwan kelarrab, kelarrab trenchibig køn tainabig.

² Na ñimun trenchinrrab inchar, na ñimuisrømay arrua, namun møiløgøsrøn ka namuimburaptø isub yu pirau maig købashtiig amøñibelø køn chibelan kelarrab, kelarrab tamig tøgagúigwan tiusmanda ñimun trendamig kømønrrai inchunrrigay cha.

³ Pøs nambe misag kuinabwei inchendø, yu pirauelø maig kwayabelø køben, treeg kwayab amøñimeelø ker.

⁴ Kaguende tru chitøga kwayamig nam tøgagúibe, møguelain kønrrab kømøtø, trube Tiusweinug maramburab marøbig, treeg køn, ni mumaygucha chindanga murelø nugwaimandzig pønnsraig pønrrabelan pøtiitsamig.

⁵ Pøs truitøga nambe tru kusremburab kusrewa wamindiilanba, katø tru purab nørreelø isuilø misaamera Tiusweimburabigwan nebua ashmønrrai

søtø pasramisrøb kurrabigwanba pøtiitser, tru chigurrimbunø isuilane Cristo maig kønrrai inchen, treegu pønrrønrrai merrarrowa pønrsøb.

6 Incha ñim newan mørøbelø misra pønrramisrene, tru maig taigwan mørmeelane nambe møra melønrrai mara kørømartrab pønrrer.

7 Ñim kui ñimui kabyu maig kenagøben, ka palatø isua ashibelø. Møikkøben, isa kømø Cristoin kurmab isua pasrøwabe, trube, iigwan isua kømig køn: Nøma Cristoin kuig købene, namgucha Cristoieløtøwein kuin kui.

8 Maig maramigwan nam karub tōga pønrrønrrai Señor namun trana pønrsraigwan, iigwan na purø møg inçhib waminçhib pasrab lataig indinaindøgucha, nabe chi kørig misrabe pasrømumønrrun. Pøs tru maig maramigwan karub pønrrønrrai Señor namun trana pønrsrøppe, ñimun mindishaguen kørømartrain kømøtø, Tiusweimburabigu nørøram purugunrrauguen tranig kuig køn.

9 Pøs na kilgamera pøra, ñimun truiløtøga ke kwaarøsrøg køb lataikkucha indig kømønrrai inchar.

10 Pøs møyiløbe trenchibelø køn: “Tru Pablo kilga pøriiløbe purø murtø tranøbig, ke menrra mur waminçhibig treelø køn cha. Inçhendø nøashib namba pasrappe, chi trengatig kømøøllig, waminçhibgucha chi may waminçhimfig køn” cha.

11 Pøs tru treeg chibeløbe, trube, iigwan isua kømig køn: nam yabsrøm pønrrøwa, kilga pørigu mandø chib pørbeløbe, ñimui utu amrrua, marøbgucha treetøwei martrab kui.

‘Nuig misrøb møg inçhibig køn’ taigwan løtab

12 Pøs nambe tru nømasiitø ‘truba tabelø ker’ chib pønrrabelø truilø mailø køben, namgucha nømbe latailø ker chib pønrrømøwei, kabe nøm maig tabelø køben namgucha treeløtøwein tabelø købraitashçab inçhib pønrrømøwei inder. Trune truiløbe nømasiitø kangurrin kangurri mayangatig køtashib, katøganelø lataitøwein købraitashçab inçhib pønrrappe, çugúinguen mørmeelø køn.

13 Inchen nambe møg inçhib ke purabgucha waminçhib pønrrønrrab kømøtø, Tius namun mayangatig martrai pønrsraigwan nambe treegwandø marøb pønrrer, katø ñimuisrøngatikken pumig kønrrai tranigwan marøb.

14 Kaguende nambe namuinukkurri webunagucha pønrrømer, pøs nam ñimuisrø pumuig kuig lata. Pøs nambe ñimuisrøngatig Cristoi tabig srø wamwan nammerrigwei srua amrruig købig køn.

15 Kabe katøganelø nøoreelø marigu kebamba, purab møg inçhib waminçhibgucha pønrrømer, namuinukkurri webambub. Masken treeg kømøtø, ñimui isubigwan Jesucristoinug pasra tøgagúigu katøguchi nørørab amrraimab isua muniirab meler, namui maramig ñimui utube nørø larrøbichib inrrai,

16 Tiuswei tru tabig srø wamwan ñim corintoelainukkurri mas yabsrønguen eshkab kusrenanig kønrrai; peenug katøganelø kebamba marinug trusrø nam kebuna møg inçhib waminçhib pønrrømønrrab.

17 Inchen møikkøben nui misrøb møg inçhib waminçhib pasrag købene, nøasiitø kømø, Señorweiwane tab kui mørøb tabig waminçhib pasrøbash.

18 Kaguende nøasiitø ‘truba tabig kur’ chib, nuimburaптø waminçhibigwan tabig kui asha kørømarig kønrrab kømøtø, tabig køn cha, Tius nø wamindig, trube tabig køn.

11

Pabloa, 'Cristo nõashib karua øriilø ker' chib ka isatø inchibeløba

¹ Ke na chugúi mormíig lataig na mayandø wamincha mørtrab ñim trunun ka awentaimbe kòtan. Pøs na treeg indingucha ñimun ka awentarray chinrrab inchar.

² Kaguende ñim møygweyasig pønrrappe, ke truigweindø kònrrai, na treeg inchib truba isub pasrappe, Tiusweinukkurri arrubiitøga treeg inchib pasrar. Muba kasharanrrab misrabe, truibatø kasharanrrai nabe ñimun treeg mara tøga pasrar; truike tru Cristoba, tru nõ perainrrab arrub kwaløm nui merrab kan mu møyøbagucha kimø srusrø newan chishig lataitøwei na ñimun nun treeg kenamartrab.

³ Inchendø nane korig isutan, tru ul purø may kebenøsrkamig tøgagúitøga tru Evan kebenøsrkøb lataitøwei ñimugucha mumay køben ñimui isubigu peløsrkøngarunrraitamab tru ñim isa kømø pønrraigwanba, tabig chishchig Cristoinug pønrraigwanba.

⁴ Kaguende møykkøben ñimun tru nam eshkab kusrenani lataig kømøtø, Jesúsweiwan peemay eshkab kusrenanøb arrin kui, kabe tru ñim Espíritu Santo uta tøgagúigwan kømøtø, katøgan peg espíritu waminchib arrin kui, kabe Tiuswei wamwan ñim uta tøgagúigwan kømøtø, pegwan waminchib arrin kui inchibigwane, trube, ñimbe chi chimø melabelø køn.

⁵ Cristo nõashib karua øriilø misrøb, tru purab nõrreelø chib pønrrabelai merrab chiyugucha lamíig kømur nagucha.

⁶ Pøs nabe nai wamindigube kan mørøptø purramdiig, may waminchimíig kuinaindøgucha, nebua kusreb asigube nabe maig kuigwan nebua ashibig kur. Iigwane chiyutøgucha ñim tørgandø ashchai kenamarig køn.

⁷ Ñim nõrreelø misrtrai, nabe naasiitø chigucha kømíig misrøb, Tiuswei tabig srø wamwan truburø chi utømø eshkab kusrenanøb pasrappe, ¿kabe nabe kaig marøb pasrabraig kø chindah?

⁸ Na ñimun purugub pasrønrrab, nabe katøgan iglesiameranguen kerrab lataig utamig nehubig køn, nai chi palab arrubigwan tøgagønrrab.

⁹ Pøs na ñimui utu Corintosrø uñib urasma nan chi palab arringucha, mungen tranrra cha, miamuig køn. Kaguende nan chi palab arrubigwane namui nunelø Macedoniasrøngurri amrrua, tranig køn. Chiyutøgucha nabe ñim ke nan tranrraindø, tranrraindø inchimønrrab, nabe purø ashiptø megaig køn. Pøs katøgucha mun miamø, nabe treetø ka megabig megamønrrun.

¹⁰ Cristoi newan ciertonig nainug pasrai møra lataitøwei, na chi an purugúig utømø, tru møyg inchib tab kui mørøb waminchib pasraigwane Acaya pirausrøngucha nane muguen waminchimønrrai katønrraamøn.

¹¹ ¿Chindimbagurri? ¿Pøs kabe na ñimun undaguig kømubra chindah? ¡Pøs Tiusbe asha pasran, nabe ñimun undaguig kui!

¹² Nabe tru purugurray chib miamø maig marøb arrigwane marøbíg maramønrrun, an utab pønrrøbendø, tru nam lataitøwei marøbelø ker chi køptø tru kemesratøguen møyg inchib waminchib pønrramigwan labelan marbashmø kanmaytø kata pasrtrab.

¹³ Kaguende tru treeg inchibeløbe, Cristo cierton nõashib karua øriilø kømøn. Tru marøbeløbe ka may wamincha isatø marøbelø, Cristo nõashib karua øri lataillø misrøb treeg inchibelø køn.

¹⁴ Inchen øyeegwane ke kwaara asamikkucha kømøn. Kaguende Satanástøweinguen kan ángel tabig tørigwan tøgagúig lataitøwei misrøbíg køn.

15 Inchawei øyeebe kwaaramdiikkucha kòmøn, pøs tru Satanás karuigwan marøb pønrrabeløgucha tru sølgandø tabigwan marøbelø misrøb pønrrøben. Pøs nømui kaig marimburø maig utamig køben, treegutøweim patsønrrun.

Pablo chine chine kaig nebuinab megaig

16 Pøs nabe katøle trenchinrrab inchar: mugucha nane ke chugúi mormíig kui lataikkucha mara srua kòmørrunrigay cha. Inchendø ñim nan treeg isua tøgaguabe, trube, na chugúi mormíig kuingucha, nan treeg ka utørray chinrrab, na maitøguen møg inchib pasramig kønrrai.

17 Tru na naasiitø truba tab kui mørøb møg inchib waminchib pasraibe, nan Señor wamindingaruben wamindig kòmøtø, chugúinguen mormubendø wamindi lataig, treeg køn.

18 Pøs truba yamelø møiløgøbenma pirauig maig køben treegu nòmasiitø purø nørreelø mørørai inchib pønrrøbene, nagucha treetøwei purø nuig kui mørørai inchib pasrønrrab.

19 Ñimbe ya kusrebelø købendø, chugúinguen mormeelane, trube, ñimbe ke mørøguen isrømøzhig melabelø køn.

20 Møikkøben ñimun maig martrain chippe, ke treeg marøb melønrrai inchibigwanba, ñimun sötø pønsra nø tøga kørørmisrtrab marøbigwanba, ñimun chi isa køben kerrawa, nui marøbigwanba, ñimune chigucha komeelø marøb nuig misrøb pasrabiigwanba, ñimun maløbøtø pashaguchib, treeg inchibigwanbabe, trube, truigwane ñimbe ke chi chimøzhiitø melabelø køn.

21 Pøs nambe øyeege kenamarøb pønrramibe yangucha kullaguelø købrain køn tamig, nane kørikken køtan.

Kaneløma ke nòmasiitø chinetø møg inchib wamincha mørenene, treetøwei nagucha martrab, treeg wamindamibe na chugúi mormøgølig lataig wamindig kuindøgucha.

22 ¿Nømbe hebreosmera kø chindah? Nagucha hebreotøwein kur. ¿Nømbe Israelwei misaamera kø chindah? Nagucha Israelwei misaatøwein kur. ¿Nømbe Abrahamwei misaamera kø chindah? Nagucha Abrahamwei misaatøwein kur.

23 ¿Nømbe Cristoiwan marøb melabelø kø chindah? (Pøs chugúi mormíig lataitøwei waminchar) Nabe nøm lataitøguen kømø, masken marøb, marameløygucha mas mur marøb, kailan keeri yau nømun lataitø kømø, katø katø merrarrawa keeriinab, ichaguchibgucha, mam ichagutsamigwan nømun lataitø kømø, ichagutsamburab ichagutsinab, katø katø ke yandø øsig kømurmab isui megamig pub,

24 katø tratrø pijibe judíosmera maig ichaguchibelø kuigwan treinta y nuevebatø ichagutsinab megabig kur.

25 Katø pønmay tsiitøga ichib srua kuinab, katø kan pijibe kwetchab sruutøga petinab, katø pønmay barco pitis misrøb chab mincha, piu asentaben, kan pijibe kwalma y mawa nane mar tøbøtaasrø pi srua yaig megamig nebug køn.

26 Chu urastøgucha naimbe webya yamitø, yamitø nebuben, kanmaywane nørøø pimerayu chine purayaig megamig nebuben, kanmaybe nileelai utuwan chi kuinanrraptiig purayamig nebuben, kanmaybe naim pirau misaameratøwei chigøben marinarrraptiig pureb yamig nebuben, kanmaywane judíos kømø misaamera chigøben marinarrraptiig purayamig nebubig køn. Inchen kanmaywane ciudayu kørig kømdiig inchibeløyu purayamig nebuben, katø kanmaywane mu misag warab waraimøsrø kørig kømduigu purayamig nebuben, kanmaywane maryu chigøben kuinanrraptiig treegu

pureb megamig nebuben, katø kanmaymerawane ka isatø 'Cristogurri nunelø ker' chibelø chigøben marinarrraptiig, treeg unamig nebubig køn.

²⁷ Marameløgucha purø murig, trurrigu ni mandøguen kømui megamig, treeg nebubig køn. Katø katø kibguen kimøwei, katø parøgwai mørøb, pi mulgwai mørøb, katø katø chigucha mamíig megamig nebub, kørrag kui megamig nebub, asru kemig chigagúinab megamig nebub inchibig køn.

²⁸ Inchen tru kømnetø kwalømmørig na isuim pasramibe iglesiamerabe mayamba chinchib kermab isub pasramig, truig købig køn.

²⁹ Møikkøben kullaarain pasrøbene, nan kullaaraig kui lataig købig køn. Inchen møikkøben kaigu srurrengwanguarainab megabene, nan pusrkwabig køn.

³⁰ Na møg inchib waminchib pasramig nebubene, na truburab kømíig kullaguig kuigu, truyube møg inchib waminchib pasramønrrun.

³¹ Namui Señor Jesucristoi Møskai, Tius tru managurri managatig mayanguen tabig waminchinabiibe nabe ka isatø inchib pasrømui asha pasran.

³² Rey Aretas karuigwan marøb wabig, tru Damasco ciudayu kubenadurbe tru damacenosmerai ciuda pøtøgatan laringaruin købig køn, nan kemørtrab.

³³ Inchen nane tru ciudayu pøtøgatan srug pirøbanrrig marigugurri kan pندانayu kørrøørøbelø køn, kan tasinyu waya. Øyamay nabe truigwei taskugurri welula, ibig kur.

12

Pablon Tius nuimburabig mu asiimíig pønrrabelan kenamarøb

¹ Nabe katøgucha naasiitø møg inchib waminchib pasramig køtan, treeg mariibe chi purugumíig kuindøgucha. Nabe piab lataigu na chigøben asilanba, Señor nuimburabelan nan kenamariilanba, trunun waminchab.

² Nabe kan møg ashibig kur, Criston kørewa pasrabigwan, mõi ya catorce añosken køn. Truigwane tru pøn srømbalarøngatig srua yaig købig køn. Nune asrbañau srua yaig køh, kabe asrbañau kømø, srua yaig køh, chindindø, truigwane maig kui mørmur. Trunune Tiustøwei asan.

³⁻⁴ Tru mōwane tru srømbala Tiuswei purø tabzhiisrømay srua yaigwan nabe asha kur. (Nune asrbañau srua yaig køh, kabe asrbañau kømø, srua yaig køh, chindindø, truigwane maig kui mørmur. Trunune Tiustøwei asan.) Inchen trusrømbe ni kan mandø chaguen trendangailø nøbe wamindi mørig køn, treegwane kan mōwane waminchimønrrai meriilan.

⁵ Pøs nabe tru mōweimburappe si møg inchib waminchib pasrabwei indamønrrun, pøs truiibe nawein kuinaben. Inchendø nabe naasiitø møg inchib waminchib pasrømøtø, na trengatig kømíig kullaguig kuinaigube møg inchib pasramønrrun.

⁶ Pøs nan møg inchib waminchib pasrag køben, na treeg inchib pasrainguen, nabe ke chugúi mørmíig lataig indig kømubsruinrrun. Kaguende nabe cierton waminchisrubrainrrun. Inchendø nabe treebe marmumønrrun, na maig kuigwan asig tre lataitø kømøwei, na waminchen ñim møri lataitø kømøwei, mas nuikken kuin kui mugøben nan treeg isumønrrai.

⁷ Øyeeg chigøben purø nørreelø nan kenamarig, truילו nan purab nuig kurmb isub pasramig marmønrrai, nane nai asru chu uragucha kan kal lataig kebuchib pasrønrrai pasrig køn, Satanás ørig, ni mandøguen kømui pasramig kønrrai martrabig, na purab nuig misrøb pasramig kømønrrai.

⁸ Inchen nabe iigwan Señorwan pønmay ‘tiusmanda kerrarra’ cha miaben,

⁹ Señorbe nane trenchibig kòn: “Tru nai ka yandø tab indig truitø ñune tsabø kòn cha. Kaguende tru nai maramburab marøb pasrabiibe ñi truburab kømíig kullaguig kuigu masken tab kenamisran” cha. Inchawei treeg købene, na truburab kømíig kullaguig kuigu mayanguen tab kui mørøb møg inchib waminchib pasramønrrun, Cristoi maramburab marøbig nainug pasrørrai.

¹⁰ Inchawei nabe na truburab kømíig kullaguig kuigu lata, nan tsalø waminab pasraigu lata, nan chi palabigu lata, Cristogurri nan kaig martra-bgøba indinab megaigu lata, nabe truba tab kui mørøb kasraarar.

Pablo corintosreelan isub

¹¹ Pøs nabe kan chugúi mørmíig lataig indig kòn. Inchen na treeg inchaimbe nane ñimweinrre indig kòn. Naimburab tabig waminchippe, ñimguen tabig wamindig kønrraptiig kur. Kaguende tru Cristo nøashib karua øriilø misrøb purab nørreelø chib pønrrabelaimbe nabe chiyugucha lamíig kømur, nabe maya chigucha kømíig kuinaindøgucha.

¹² Cristo nan nøashib karua ørig kuin kui asamig, maig kuindøgucha tam-may nabe ñimui utu kenamarig kòn: Tius naba pasrain kui ashchai mariilø marøb, kwaara asamdeelø marøb, maramburab mariilø marøb, treeg.

¹³ Tru katøgan iglesiameran lataguen kømø, ¿nabe ñimun chiyurren lameelø marøb kørøra pønsrøbrah? Na ñimun tranrrai miamuig, trutøwein kòn. Pøs na miamub kalø marigwan ulø paymø pesannarrai chinrrab inchar.

¹⁴ ¡Au! Nabe katøguen chab tamaraguen megar ñimun ashchab attrab, møimbabe chabguen pønmayguen kønrrab køben. Treetøwei katø na ñimun mianrrab kømø arrumønrrun. Kaguende nabe ñim chi tøgagúigwan isua lamøtø, ñimun isur. Pøs kaguende ureemera møkalayasi esegab tulisamig kømøtø, uregweyasig esegab tulishib melamibe møkalainguen kòn.

¹⁵ Inchawei nabe tab kui kasraatø naiwan kerrigu kastamønrrun, naasi-itøweinguen ñimuyasig patsønrrai marøb. Na ñimun mas undaarabene, ¿ñimgurrimbe nane tre undaaramønrrapteh?

¹⁶ Pøs trube, naimburappe ñimbe ashibeløguen na ñimun tranrrai mi-amuigwan. Inchendø nabe ke chi maramdiig køtashib ashib megabig køndainabig kuig køppe, trube, ¿ke chi isa køben kabe ñimun chi wesrabraig køppeendi?

¹⁷ ¿Kabe na tru møilan køsrøn na ñimuisrømay karua øriiløtøga chi isa køben, kabe ñimun chi wesrabraig kø chindah?

¹⁸ Nabe Titone: “Tiusmanda ashchab irrunrrig” cha, Cristogurri namui katøgan nunewanba nun lincha inrrai ørig kuig kòn. ¿Kabe Titobe ñimune chi isa køben chi wesraig køppeendi? ¿Nambe yamba pailøba treetøwei kandø isua marøb, katø pailøba yamba tru maywandøwei pønrrammørgøppeh?

¹⁹ Nambe ñimui merrab ka tab wegørrag køptørre inchib pønrrabelø kui, ¿ñimbe katøgucha møi øyangatig kabe treeg asønain pønrrøgueh? Treeg kømøtø, nabe waminchippe, Cristoinug pønrrabelø kui asamdiig Tiuswei merrab waminchib pønrrer. Inchen nam kerrigu mariiløbe, ñim, nai undaarailø, Tiusweimburab ñim nørørrab amrrain kòn.

²⁰ Pøs nane køristø køtan na ñimuisrø puben, na ñimun mailø kønrrai isua pasraig ñim treelø kømøwei, katø ñimgurri nan maig kønrrai isua pønrraig treeg kømøwein køptinchen tsaatø indinab pønrrainabgunmab. Nane køristø køtan ñimui utu alegiyam lailø, møkøkøben chi tøgagøben pusrkwai asilø, purø trømbøig namig kui indiilø, nøøøø katøgan sətømisrøb tarømisrøb ambiilø, katøganuimburab wam kusrub wamindiilø, isa wamincha møriilø,

purø nørreelø misrøb pønrrailø, mumaygucha kømíig mara pønrsrailø, treeg kønrraitamab.

²¹ Incha nane kørig isutan na ñimun katø ashchab puben, Tiusbe ñimui merrab nan kørig purøøren, truba yamelaimburø nan kisamig nebunrraitamab isua, tru merrabwan nømui køsøngønrraptiig mariilanba, møgueløba, ishumburmeraba trømbøig mariilanba, mu mandimíig chi marøg køben trømbøig maramitø srua ambiilanba isua mørmuin køben.

13

'Isua ashiptø melønrrigay' chib wamindiilø srabeig

¹ Na ñimun ashchab arrumig møimbabe pønmayguen kønrrab køn. Chigøben kalø puigwan asha marøppe, kan pailø kui, pønælø kui 'maig purayaigwan treeg køn' cha nømashib eshkabendøwei, maig kønrrabigwan asha maramig køn.

² Nabe tru pamay kønrrabyu marig merrabwan arrua, ñimba pasrøwa, kanmaytø isua kønrrai eshkaig købig kuig køn. Na mõi katø ñimba pasrømøwagucha katøle katø eshkanrrab inchar, tru merrabwan kaig marøbelanba, mayeelø katøganelanba na katøle arruppe, kan waachaalleelø chib mun lastima ashchab attrab kømur cha,

³ kaguen ñimbe Cristo nagurri waminchib pasrabig kuitashchab ashig køb ñimbe frurre lab kuig køben. Cristobe ñimba mumay kømíigwane chi martrabga kaizhikkucha kømøtø, nøbe ñimui utu maramburab marøbig køn.

⁴ Pøs isa kømø, Cristobe misagwei asr lataitøwei kullag kua, kurusyu mesrøben, kwaig køn. Inchendø Tiuswei maramburab marøbiitøga øsig wan. Pøs katø treetøwei nambe Cristoinuube kullaguelø kuinabendø, Tiuswei maramburab marøbiitøga Cristoba øsig pønrramønrrun ñimuyasig marøb pønrrønrrab.

⁵ Ñimui isubigwan Jesucristoinug pasra pønrraigu pønrrabraitashchab tab isua ashib, maig købraitashchab ñimasiitøwei paya mørøb inday. ¿Jesucristo ñimuinug pasrabig kuin kui ñimbe ashmeelø kø chindah? tru ñim maig pønrraitashchab isub pønrraigu chi kalø webammuikkurrimbe.

⁶ Pøs namui isubigwan Cristoinug pasra tøgar kua nam tabig webamba pønrraigwan ñim nebua ashchun.

⁷ Incha nambe Tiuswan purugurra cha mier, ñim chigucha chi kalø marøb kømønrrai. Kabe tru namun mailø kuitashchab ashen, tab webambigwan ashchai isua kømøtø, ñim tabigwan marøbelø kønrrai isua inder, ñimuin kabyube nambe kegørra pønrrai lataig asønaindøgucha.

⁸ Kaguende nambe tru newan ciertonigwane chi treeg kømønrrai martrab indamgaig køn. Treeg kømøtø, tru ciertonigweimbura nam marøb pønrramibe køn.

⁹ Inchawei namun kullaatø mørøraingucha, ñim tabig mur pønrrøbene, kasraarabelø ker. Incha nambe Tiuswan iigwan miabelø ker: ñim newan tabelø kønrraimab isua.

¹⁰ Inchawei øyeekkurri nabe yabsrø pasrappatøwei iigwan pørar, tru na ñimuisrø pua, nai maramigwan na tsakkandø marøb pasrønrrab arrumig kømønrrai. Señor nan ashib karub pasrønrrai tranøppe, pinishib inrrain kømøtø, kusrua pønrsrøbguen inrrai tranig køn.

'Ka amøñiqueh' chib wamindiilø srabeig

¹¹ Trube, m̄imbe yand̄o, nai nunel̄o, maya nuguen kasraaray. Ñimbe newan tabel̄o k̄onrrab inchib, na '̄oyeeg, ̄oyeeg mel̄onrrigay' chib wamindigwan m̄ora mar̄ob, kat̄o p̄onrrabgucha kand̄o isua p̄onrr̄onrrigay. Kat̄o kangurrin kangurri tab war̄onrrigay. Tius tru undag k̄obig tru chi isumgaig tab k̄obiibe ñimba pasr̄onrrun.

¹² Kangurrin kangurri 'ka am̄oñiguh' chib tabig wamab, Tiuswei undag k̄obiit̄oga tasig tranay.

¹³ Tiuswei misamera mayeel̄oba yuel̄o ñimun 'ka am̄oñiguh' chib wam̄oran.

¹⁴ Señor Jesucristoi ka yand̄o tab indiiba, Tiuswei undag k̄obiiba, Esp̄iritu Santoi tru trakkand̄o lincha pasraibabe ñim mayeel̄oba pasr̄onrraimab isur.

Gálatas

'Ka amõñigüeh' chib pørig

¹ Na Pablo Jesucristo nõashib karua ørig, mu møguelø nõmuimburab karua ørig kømøwei, mu katøgan inrraincha karua pasrig kømøwein kur. Treeg kømøtø, Jesucristoba, katø Tius Møskai Jesucriston kwailai utugurri øsiirangaruibiiba karua ørig kur.

² Namui nunelø mayeelø naba warabeløba Galacia pirausrø iglesiameran i kilgawan na pørar.

³ Namui Tius Møskaimba, Señor Jesucristoba nui ka yandø tab indigwan køben, chi isumgaig tab købigwan køben ñimun tranrrun.

⁴ Truibe nam kaig mariilaimburab nõashib kwanrrab pasramisrig køn, nam warain kwaløm larrø kaig pasrabigugurri namun wesraig kønrrai, tru namui Tius Møskai maig kønrrain køben, trumay.

⁵ Truigwan tørguegwalmabig kønrrun managatig. Treeg kønrrun.

Kaigyugurri wesrab wam katøgan peebe chi kaagøn

⁶ ¡Paare! Kan øyeeg misaamerabe mailø kermab ashar, Tiuswei tabig srø wamwan peemay yunømara srua pønrrønrrab, tru Cristoï ka yandø tab in-diitøga ñimun wamabig Tiuswan chabguen yandø yanayutø tarømisrøbguen ambin køben.

⁷ Tabig srø wam katøgan peg kuimba kømøtø, mõiløgøben ñimune ke ka iløsrkøb, Jesucristoï tabig srø wamwane ke kan mumaygucha kømíig kønrrai mindisha pønsrøg køb indan.

⁸ Namdøwein kui lata, kabe kan ángel srømbalasriig kui lata, tru tabig srø wamwan nam ñimun eshkaib kusrenani lataig kømøtø, katøgan peemaytø yunømara waminchibiibe, managatig trømbøig nebuig pasrønrrai pasrig købash.

⁹ Nam ñimun eshkaigwan, mõi katøle katø nabe eshkanrrab inchar: tru ñim uti lataig kømøtø, mõikkøben tru tabig srø wamwan yunømara peemaytø eshkaib kusrenanøbiibe, managatig trømbøig nebuig pasrønrrai pasrig købash cha.

¹⁰ ¿Nabe misaamera nan tab inchamab lab pasrabrah, kabe Tius tab inchai lab pasrabrah chindah? ¿Kabe misaamera tabzhig inchai lab pasrabra chindah? Pøs na katøgucha misaamera tab kui mõrtrai na nõmun tabzhig inchib pasrabig kuimbe, trube, nabe Cristoï marøb megabig kømubsrubrainrrun.

Pablon Tius martrai karua pasrig

¹¹ Iigwan ñim, nai nunelan, wammøørøsrkønrrab inchar, tru tabig srø wamwan na eshkaib kusrenaniibe møguelø nõmdø isua wesruigwan wamindikkucha kømøn.

¹² Pøs nabe, kan mõwan utig kømøwei, katø kan møg kusrenanig kømøwein kur. Treeg kømøtø, nan Jesucristo ashchai kenamaren, treeg utig købig køn.

¹³ Kaguende ñimbe manawei nane wammøørelø kuinrrun, judíosmera Tiusweyasig maig marameløyu, na trunun marøb uñib uras na merrabsrø maig inchib uñibig kuigwan: kan namig købiitø ¡katø! chindinrabna kui inchib, Tiuswei iglesian kaig martrab wendautø lllrab, nõm tru treeg marøb tøgagúigwan kerriguwan pinishinrrab truba truba inchib unig købigwan.

¹⁴ Namui misag utu, naba ketøtø nõrrørawarwei utu mõilan køben nabe kanab kusrebig købig kur, judíosmera Tiusweyasig maig marameløyube,

kaguende nabe merrabsrø namui kølli misaamera maig marøb amrruigwane maikken purøbuniimíig kønrrai inchibíig kóbíig kua.

¹⁵ Inchendø Tiusbe nane nai usrai patsø umbu wabenbatøsrøwei nane tarømara, nui ka yandø tab indiitøgatø nane wamíig køn. Incha nun tabíig asønaben,

¹⁶ nui Nusrkawan na nebua ashchai kenamaríig køn, judíos kømø misaamerai utu nuimburabíigwan na eshkaab kusrenanamíig kønrrai. Inchen nabe tru urastø mu møwan paya mørmøwei,

¹⁷ katø nagueen treeg kømøwatø Cristo nøashíib karua øriilan payrraab Jerusaleñsrømay nebíimøwei indíig køn. Treeg inchimøtø, Arabia pirausrømay ya, trugurrimbe katøle Damascosrømay arríig kóbíig køn.

Jesucristo nøashíib karua øriilø katøganeløba Pablo lincha waminchíib

¹⁸ Indiibe yandø pøn pila puraiben, Jerusaleñsrø nabe Pedroba waminchab ya, trusrø nøba parru kørømisrøbíig kur.

¹⁹ Cristo nøashíib karua øriilan nabe trusrømbe møígwangucha ashmur. Ashippe, Señorwei nuneg Jacobondøh ashar.

²⁰ Na ñimun pøriibe, Tiuswei merrab isa kømøtø, treeg køn cha, treeg pørar.

²¹ Incha trugurrimbe Siria pirausrømayba, Cilicia pirausrømayba íbig kur.

²² Nane Judea pirausrø Cristoi iglesiamerabe malauguebe ashmeelø srø kóbíig køn.

²³ Truiløbe øyeegwandøwei wammørbelø køn: “Tru merrabsrø namun kaig marøb llirab uñíbig købíibe, møimbe tru Jesucristoi tabíig srø wamwan eshkaab kusrenanøb unan taig, tru merrabsrømbe nø pinishinrraab inchíib uníig kóbíigwan.”

²⁴ Incha nagurri Tiuswan truba tabíig waminchíibelø køn.

2

Cristo nøashíib karua øriilø Pabløn chi chimø ka utab

¹ Indiibe yandø catorce años misren, katø Jerusaleñmay Bernabéba íbig kur, katø Titongucha tøgatø pera.

² Inchendø nabe trusrømay ippe, Tius nan trusrømay inrrai nan kenamaren, nabe treekkurri yaig køn. Incha tru Tiuswei tabíig srø wamwan judíos kømø misaameran na mandø eshkaab kusrenanøb uníigwan nømun eshkaabíig kur. Nabe truigwan marøppe, tru tabelø kui asha tøgagúig nørreeløba, namdø nørøø tulundzuna trunun wamindíig køn, na tru møi marøb pasraíigwanba, na tru marøb uníig kóbíigwanba, ka treeg marøb uníitø puraimønrrai.

³ Inchendø na pera yaig Titon købenguen griego kuingucha, nune circunci-daweíig kønrrai inchimuíig køn.

⁴ Tru treegwan martrai inchíibeløbe ka isatø Cristogurri namui nunelø chib ísabelø sølwan kømø, peemaytø kusrenanøbelø, ashmøwatø nilø kegørrin kóbíig køn, nam Cristogurri chí iløsrkaimeelø melaíigwan maíig inchíibelø køtashchab larønrraab, katøle truyutøwei kegørra melønrrai martrab.

⁵ Inchen nambe nøm chí tailan ni kan petøzhiitøguen alrranmeelø ker, Tiuswei tabíig srø wam newan ciertoniibe ñimui utu maíig købíibe treetø pasrabíig pasrønrrai.

⁶ Tru tabelø kui asha tøgagúig, tru nørreeløbe, nane øyeeg martríig cha, srøibe chígucha eshkawa pasrmuíig køn. Tru truilaimburappe, nøm nørreelø kuíigwane naimburappe trunun isua ashíib pasramíibe chígaagøn. Pøs Tiusbe muíngatøgucha pasrømíig køn.

⁷ Masken treeg inchibgunrriibe Tiuswei tru tabig srø wamwan judíos kømø misaamera, tru circuncidameelan na eshkab waminchib unamig kønrrai, nan trana pasrig kuin kui ashibelø køn, judíosmera circuncidawarwan kusrenanøb waminchib uñchai Pedron pasrig køb lataitøweingue.

⁸ Pedron tru judíos misaamerayasig Jesucristo nøashib karua ørig kønrrai, tru nø marøb uniløyu marøb pasrab Tiustøwei na marøb uniløyugucha marøb pasraig køn, tru judíos kømø misaamerayasig Cristo nøashib karua ørig kønrrai.

⁹ Nan øyeeg kønrrai tranig kuin kui nebua ashabe, Jacoboba, Pedroba, Juanba tru tabelø kui asiilø, kan pilarmera latailø kui asha tøgagüløbe, nanba, Bernabéwanba kusrmay tasigwan tranøbelø køn, yandø møimbe lata lincha marøb amøñibelø kønrrab cha, treeg kenamarøb, nambe judíos kømø misaameraisrømay amben, nømbe judíosmera circuncidailaimay ambamig kønrrai.

¹⁰ Namune eshkappe, waachameraimburab pesannamø isua kønrrai, trunundh eshkabelø køn. Pøs nabe trununwei truba truba isua marøb megabig kur.

Pablo Antioquíasrø Pedron 'kalø marin køn' cha namab

¹¹ Inchendø wendø Antioquía ciudadsrø Pedro puben, nabe nun malaugue 'øyebe maig margu' chib truba mur namabig kur, kaguende nø treeg mariibe, pella marøb pasraig køben.

¹² Kaguende Jacobo karua øriilø møiløgøsrøn amrrumøwatøbe, judíos kømø misaameraba ka lincha mab uñabe, truilø yandø pubene, trube, nøørøtø inchib, yandø linchimb kebibig køn, tru judíos kømø misaamera kørebelane, trube, treeg lindamig køn chib, treeg inchib søtømeran kørig køptø.

¹³ Inchen Jesucriston kørewa pønrrabelø katøgan judíosmeragucha, Pedro tru kalø marøb pasraigutøwei marøb kebamben, tru nømguen treeg marmubendø, treeg marøbelø misrøb pønrraigu Bernabéguen tøga kebeña pasraig køn.

¹⁴ Inchawei Tiuswei tru tabig srø wam newan ciertonig maig køben treegwan sølgandø amøñimuin kui ashabe, nabe mayelai merrab Pedrone trenchibig kur: "Ñi ya judiøguen yandø kan judío kømíig lataig marøb uña, ¿judíos kømø misaamerane, trube, ñigan judíosmera latailø kønrrai martrab inchib pasrøtirru?" cha.

Isubigwan Jesucristo pasra tøgagükkurri kaigyugurri webambamigwan tøgagøb

¹⁵ Nambe kal-lainukkurri trendø judíos misaamera ker, judíos kømø misaamera kaig marøbelø kømøtø.

¹⁶ Inchendø nambe ashibelø ker, tru maig maramigwan martrai Moisés pørig truig maig karuilan treeg mara, ni kan muguen chi kaig kømíig lataig tabig kørømartrab kaimaigwan. Treeg kømøtø, isubigwan Jesucristoinuutø pasrikkurri, treeg køn. Namgucha Cristo Jesúswan køreig køn, isubigwan Cristoinug pasra tøgagükkurri chigucha chi kaig kømeeelø lataig kørømarig kønrrab, tru maig maramigwan martrai Moisés pørig maig martrain chibig køben trunun mara kømøtø. Kaguende tru maig maramigwan pørig, truig maig chibig køben treelan mariitøgabe, muguen chi kaig kømíig kui lataig tabig kørømarig kønrraamøn.

¹⁷ Pøs nambe Cristogurri chigucha chi kaig marmøwa lataig kønrrab inchib meløben, trube, møi Cristoinuube katø nambe kaig marøbelø kuin kui treeg

puptinchene, trube, ¿Cristobe kaig martrainguen inchib pasrabig køn ta chindah? ¡Kah! mumaygucha chi treeg kønrraamøn.

¹⁸ Tru maig maramigwan martrai Moisés pørig maig chibig køben trunun na mas treeg marøb pasrømønrrab pinishib patsøgaigwan, katøle trunundøwei kusrua pasrøb kebyabe, tru na treeg marmønrrab cha wamindigwane natøwei itøbunab pasraig webinrrun.

¹⁹ Tru maig maramigwan martrai Moisés pøriibe yandø nane chi martrab-gaikkurri truigweimburappe yandø nabe kwaig lataig kur, na Tiusweyasig øsig pasrønrrab.

²⁰ Kaguende nabe Cristoba kegøtø kurussyu mesraig lataig kuig køn. Incha mømibe nabe yube naimburab naasiitø øsig uñmøtø, Cristo nainug pasran. Møi ya na øsig uniibe, Tiuswei Nusrkaweinug isubigwan pasrikkurri øsig pasrar, nøbe nan undaarawa, nøashib nayasig kwaig køn.

²¹ Nabe Tiuswei ka yandø tab indigwane kashmur. Kaguende tru maig maramigwan martrai Moisés pørig maig taigwan treeg mariitøga, chi kaig kømíig lataig tabig pasrønrrab indamig kuig kuimbe, trube, Cristo kwaibe ka kwag køptø kwaig lataig webibsrinrrun.

3

Isubigwan Jesucristoinuutø pasra pønraiba, maig maramigwan martrai Moisés pøriiba

¹ ¡Ñim Gálatasmera larrø chugúi mørmø misaamera! ¿Ñimune øyeetø mumaygucha wegønønrraingaig lataig melønrraimbe ñimune murre may sotiicha pønrsøta? Jesucristone tru kurussyu mesraig køn cha, ñimun ke tab asha kønrai kusrennøb wamindigwan øyeeg martraimbe.

² Nabe ñimuimburab chi mas kømøtø, iigwandøh wammørinrrabna køtan: ¿Tru maig maramigwan martrai Moisés pørig maig chibig køben treegwan mara, Espiritu Santon utig køh, kabe isubigwan Cristoinuutø pasra, tru tabig srø wamwan mørikkurrin kø chindah? cha.

³ ¡Kan ñim kui, larrø chugúi mørmø misaamera! Espiritu Santotøga marøb pølbasa, ¿trube, mømibe chu punrrab indamigwane ka ñimuimburab ka ñim mariiløtøgatø punrrab inchib køtirru?

⁴ ¿Ñim chinetø chinetø maig kuig mørøb puraambiibe, trube, chiweingucha chi purugumuig kønrrab kø chindah? Pøs purugubwei indig kuinrrun.

⁵ ¿Kabe Tiusbe nui Espiritun ñimun tranøb, katø tru maramburab mariilan ñimui utu marøppe, tru maig maramigwan martrai pørig, truig maig chibig køben trunun ñim marikkurri treeg mara chindah? ¿Kabe tru tabig srø wamwan ñim møra køreikkurrin kø chindah?

Abraham nui isubigwan Tiusweinug pasrikkurri Tiusbe nune kaig kømíig lataig tabig kui asig

⁶ Abrahamma Tiuswan øyeetøwei køreben, nune chi kaig kømíig lataig tabig kørrømarig købig køn.

⁷ Inchawei isua asamig køn, isubigwan Tiusweinug pønrsøbeløbe si, Abrahamwei ureemera kuin kui.

⁸ Inchawei Tiuswei wamwan pørigube manasrøwei trendaig købig køn: Isubigwan Tiusweinuutø pasrikkurri judíos kømø misaamerangucha chi kaig kømeelø lataig tabig kørrømariilø kønrrain cha. Tiusbe kanmaytø nui tru tabig srø wamwane Abrahamwan eshkaig købig køn, øyah chib: “Judíos kømø misaamera chu pirausreelandøgucha ñigurri mayanguen tab indiilø kønrrun” cha.

9 Inchawei kørebeløbe tru Abraham Tiuswan køreb møøba kanbalatø mayanguen tab indiilø køn.

10 Kaguende mayeeløba tru maig maramigwan martrai Moisés pørig, truig maig chibig køben treeg mariitøga trumay kaigyurri webamrrab inchibeløbe, trømbøig nebuig pønrrønrrai pønrsrailø køn. Kaguende treeg pørig pasran: “Mundøgucha trømbøig nebuig pønrrønrrai pønrsrailø kønrrun cha, tru maig maramigwan martrai pørin kilgayu maig taigwan marøbig marmeelane.”

11 Inchawei tru maig maramigwan martrai pørig maig chibig køben, treeg mara, Tiuswei merrappe, chi kaig kømeeelø lataig muguen tabig kørørmisrmuig kuin kui tøgandø asamdiig køn. Kaguende: “Sølgandø tabig uñibiibe isubigwan Tiusweinuoø pasra tøgagúikkurri øsig uñchun.”

12 Inchen tru maig maramigwan martrai pøriibe, tru isubigwan Tiusweinuoø pasra pønrraigugurri arrumíig køn. Treeg kømøtø, tru maig maramigwan pøriibe trenchibig køn: “Truig maig karuulan marabe, treeg mariiløtøga øsig uñchun” cha.

13 Cristobe nø namun pena, kaigyurri wesruig køn, tru maig maramigwan martrai pørig namun trømbøig nebuig pønrrønrrai indigugurri, tru nø namuimburab nøashib larrø trømbøig nebuig pasramisra. Kaguende Tiuswei wamwan pøriibe trenchibig køn: “Mutøgucha kan tusryu mesra kweetsinabiibe larrø kaig kui asig kønrrun” cha.

14 Øyeeg marøppe, Abrahamwan tru mayanguen tabigwan tranig købiibe Cristo Jesúsukurri tru judíos kømø misaameran tøga nebunrrai indig kuig køn, isubigwan Jesucristoinuoø pasra, Espíritu Santon tranrrrab kørørmisrig købigwan nam utamig kønrrai.

Maig maramigwan martrai pøriiba, Tius tranrrrab misriiba

15 Nai nunelø, møimbe misag maig waminchibelø køben nabe trumay isua waminchab inchar: ‘Øyeeg marig kørørmisrtrai treeg martrab’ cha, kan møg wamindigwan købenguen yandø treeg marig kørørmisrtrai pøra kørørmarigwane, utsøgutsamig kømøwei, kabe srøitø nemaramig kømøwein køn.

16 Inchawei Tiusbe Abrahamwan ‘øyeeg marig kørørmisrtrai treeg martrab’ cha kørørmisriilane Abrahamweinukkurri arrub misagwein kønrrai tøga trencha pasrig køn. Nui wambe: “misaamera srøig srøig kurrab amrrubelø” chimíig køn, purø nørrøø kui lataig. Treeg chimøtø: “ñuinukkurri kandøzhiitø arrub misagwein” taig køn, trube Criston.

17 Inchawei nabe trenchinrrab inchar: Tius Abrahamwan manasrøwei tru nuinukkurri acuerdon treeg martrab cha kandø isua nø kørørmisrigwane, tru maig maramigwan martrai Moisés pørig 430 años puraiben wendau arrubiibe, treeg marig kørørmisrmonrrai martrab kaimanrrun cha, Tius tru øyeeg martrab cha kørørmisrigwan treeg marmuig kui lataig mara kørørmartrab.

18 Inchawei tru namun keta tranamig tøgagúigwan tru maig maramigwan martrai pørig truikkurri utamig kønrrab kui kuimbe, trube, tru ketig utamigwane tru ‘tranrrumøn’ cha kørørmisrikkurri utamig kømubsruinrrun. Inchendø Abrahamwane Tiusbe keta tranamig tøgagúigwan ka yandø keta tranig købig køn, tru ‘tranrrumøn’ cha kørørmisrig truikkurri.

19 Trube, treeg købene ¿tru maig maramigwan martrai Moisés pøriibe chindamigweyasig kerah? Pøs trunune tranøppe, tru kalø marigwan chigúí nebua ashchai treekkurri tranig købig køn, tru ‘tranrrumøn’ cha kørørmisrig, tru Abrahamweinukkurri arrubig arrumnegatig truigwan

marøb kómig kónrai. Inchen tru maig maramigwan martrai pørigwane Tiusbe ángelesmeragurri kan møg katøganelayasig purøwaminchabigwan tranrrai tranig køn.

²⁰ Inchawei Tiusbe Abrahamwan tru 'treeg martrab' cha wamincha kørømisrøppe mu katøgan purøwaminchabig palain kømøtø marig køn, pøs Tiusbe nøtø kandø kua.

Tru maig maramigwan martrai pørigwan Cristobe patsøgøb

²¹ Trube, treeg købene, ζtru maig maramigwan martrai pøriibe, Tius tru 'treeg martrab' cha kørømisriilane treeg marmuig kuig lataig, kabe sötø pasramisrøb nøørotø kutchab inda chindah? ¡Mumaygucha chi treeg kønraamøn! Pøs maig maramigwan martrai tøgagúig, tru øsig kómigwan tranrraptiig kuig kuimbe, trube, tru sølgandø tabig mariibe tru maig maramigwan martrai pørikkurrin købsruinrrun.

²² Inchen Tiuswei wamwan pøriibe trenchibig køn, maya misaamerabe kaig maramigutø melønrai merrarrawa tøgagúilø køn cha, tru isubigwan Jesucristoinuutø pasra pønrraikkurri Tius tru tranrrab misrigwan nun kørebelane tranamig kónrai.

²³ Inchen tru isubigwan Jesucristoinug pasra tøgagømig arrumøwatøbe, tru maig maramigwan martrai pøriibe namune nø merrarrawa tōga pasrabig køn, isubigwan Jesucristoinuutø pasra pønrramigwan ashchai kenamariilø kømnegatig wegønømø pønrrønrai.

²⁴ Inchawei tru maig maramigwan martrai pøriibe namune Cristoinug pegutchab nø pereb pasrabig lataig kuig køn, isubigwan Jesucristoinuutø pasra tøgagúikkurri nam chi kaig marmeelø lataig tabig kørømisra pønrramig kónrai.

²⁵ Trune mømibe yandø tru isubigwan Jesucristoinuutø pasra tøgagømig puikkurrimbe peguchib pera lliraindeelø melømer.

²⁶ Inchawei isubigwan Cristo Jesúsweinug pasra tøgagúikkurrimbe ñimbe mayeeløba Tiuswei ureemer køn.

²⁷ Incha Cristoba kanbalatø misrtrab mayeeløba ñim piu umbu ulsrailøbe, yandø Cristotøga pinøbuliilø misrin køn.

²⁸ Mømibe yandø 'judío køn' tamig kawei, 'griego køn' tamig kawei, 'karuindiig megabig køn' tamig kawei, 'mu karuimíg nuimburab uñibig køn' tamig kawei, 'møg køn' tamig kawei, 'ishug køn' tamig kawein køn. Kaguende Cristo Jesúsba kanbalatø pønrraikkurri ñimbe mayeeløba kandø køn.

²⁹ Incha ñimbe Cristoielø kuikkurrimbe, yandø ñimbe tru Abrahamweinukkurri amrrub misaamera køn, Tius tru keta tranrrab misrig truig maig køben treeg ketig utønrrabelø.

4

Mømibe karua srua kuindiig melabelø kømøtø, yandø nusrkalø ker

¹ Incha nabe trenchinrrab inchar: Kan yauma, tru chi købigwan ketig utønrrab unø lamíg srøbatøbe, kan karuindiig megabig maig køben, treetøwein køn cha, tru chigurrimbunø købigwan puaiibe nøwein købendø.

² Masken treeg kømøtø, tru unøbe nøm mõilø ashib pera kønrrab kørømisrøbeløba, katø tru unaimburab chi købigwan nøm ashib kønrrab pønrramisrøbeløba truilø ashib pera kuindiig køn, mõskai tru maya yanagatig treeg kønrrain cha pasrig truig nebunnegatikke.

³ Inchawei namungucha treetøwei, nam ureemera latailø srø købenbatøbe, yu pirø muba kuimburab mandø isua marøb kømig tøgagúilø truig nø merrarrowa tøgagúig melabelø købig ker.

⁴ Inchen ke yandø treeg maramig pubene, Tiusbe nui Nusrkawan ørig købig køn, ishug misagweinug kal-laweig, tru maig maramigwan martrai Moisés pørig maig chibig køben treegwan marøb megabig.

⁵ Tru maig maramigwan martrai pørig maig martrain karuben, treegwan marøb melabelan, namun pena wesranrrai ørig køn, nam nui trendø trag ureemera latailø kømigwan utamig kønrrai.

⁶ Incha yandø møimbe Tiuswei ureemera kuig købene, Tiusbe nui Nusrkawei Espiritun namui manrrømerayu pasrønrrai ørig køn. Inchen tru Espiritu Santobe truba truba miabig køn: “Abba, nai Møskain” chib.

⁷ Inchawei treeg købene, møimbe yandø ñibe karuindiig megabig kømøtø, nusrkain køn, trube, yandø nusrkai misra korrømisrikkurrimbe, tru keta tranamigwangucha utønrrabig kønrrai marig køn Tiusbe.

Tru maig maramigwan pørig ke truig srua ambiilø melømønrrai wamindiilø

⁸ Pøs ñimbe Tiuswan nebua ashmeelø køb uras merrabsrømbe chi cierton tiusmera kømeeelan karuindiig melabelø købig køn.

⁹ Trune møimbe yandø ñim Tiuswan nebua ashen, kabe Tius ñimun yandø mumera kui asiilø kuig køppe, trube ζyu pirø muba kuimburab mandø isua marøb kømig tøgagúilø truig nø merrarrowa pasrabigwan katøle truigwan chinchab marøb kebamgue? Yeeg chiweingucha chi purugunrabgaig, kaizheeløyu, ζñimungan katøle truilandøwei marøb melag kuitarru?

¹⁰ Ñimbe katøgucha mø kwalømmerawane øyeeg marmumig køn chib, i pølmerawane iigwan maramig køn chib, øyeeg pølmera arrubene, øyeelan maramig købig køn chib, i pilamera pubene, ilan maramig køn chib, ñimbe treeg inchibelø køn.

¹¹ Nane ñimuimburab truba kørig isutan, na ñimuimburab tab kønrrai marøb megaiibe, ke ka treeg marøb megaitø purainrrab kø chindermab isua.

Nun chitø purayailø

¹² Nai nunelø, tiusmanda na lataitøwein kørnunrigay chinrrab inchar, nama ñim lataitøwein kønrrab pasramisrig købene. Pøs ñimbe nane chigucha chi kaiibe marmuig køn.

¹³ Pøs ñimbe ashibelø køn, na srøsrøwan Tiuswei tabig srø wamwan ñimun eshka kusrenanøb uras nai asru kwanrrøbe Tiuswei wamwan wamindig kønrrai treeg puig købigwan.

¹⁴ Inchen nai asru tru treeg kwanrrøbe ñimune ke chindashig køb lataig indingucha, ñimbe nane køsøn kui inchimøwei, kashmøwei indig køn, masken ñimbe treeg inchimøtø, nane kan Tiuswei ángel kui lataig, kabe Cristo Jesús kui lataig utig købig køn.

¹⁵ ζTru ñim treeg tabig kasrag købig tøgagúig købigwane, møimbe chu chinha pønrrøgue? Pøs nabe ñimuimburab treeg tamig tøgagur: ke ñimbe ñimui kabmeranguen wesrua, nan tranamdiig kuimbe tranømmørø inchibelø købig kuig køn cha.

¹⁶ Maig købig kuigwan na waminchib pasrappe, ζkabe na ñimun tsalø køb ashig kømui inchibig misrarre inchib pasrabra chindah?

¹⁷ Tru kusrenanøbelø katøganeløbe ñimune nømui marøg køb ke chinsraatø inchibelø køn, chi tabig isua kømøtø. Masken ñimune namuinukkurri nørøø

misrtrai inchib kòn, ñim nòmuingatø misra nòmun ke chinsraatø inchib pønrrønrαι isua.

18 Pøs tab kønrraimab isua, chu uraskucha ke chinsraatø inchib isub pønrraimibe tabigwein kòn, na ñimui utu uñendø kømøtø.

19 Nai ureezheelø, kan ishuumisag unø tammisrtrab pusrkwai inchib lataitøwei, katøle pusrkwai isuim pasrar, Cristo ñimuinug ke newan tab pasramisramnegatig.

20 Kan mõiwei nane ñimui utu pasrammørø køtan, øyeeg murtø waminchimøtø, peemay waminchab. Pøs nane ñimuimbura ni chi isumgúinguen møramgaig køtan.

Agarwanba, Saranba kemesra wamindig

21 Tru maig maramigwan martrai pørig maig chibig køben ñim treegwan marøb melag kui inchibeløbe, trube, ζtru martrai Moisés pøriibe maig chibig kui ashmeelø kø chindah?

22 Kaguende Abrahambe pagatø nusrkalo tøgagúig kòn chibig pørig pasran Moisés pørigu: kan nusrkaimbe tru karuindiig megab ishuwein købene, kane mu karuimíg megab ishuwei nusrkai.

23 Inchen tru karuindiig megabigwei unøbe, mutøgucha maig tøgagøbelø køben treeg kal-laig tøgagúig unø køben, trune tru mu karuimíg megabig tru srawei unøbe, Tius 'treeg tranrrumøn' cha kørømisrig købig kua treeg kal-laig købig kòn.

24 Iig tru øyeelø purayaibe 'øyeeg lataig kòn' cha eshkabig kòn: Tru i pagatø ishumburmerabe Tiuskurri pabalø acuerdo marigwan trunun eshkabig kòn: Agar tru ureemera karua srua kuindiig melabelø kønrrai tøgagøb ishuube Tius tru Sinai Tunsrø nø øyeeg martrab cha kandø isua kørømisrig, truig kòn.

25 Kaguende Agarbe Arabia pirausrø Sinai Tunyu maig purayaigwan eshkabig kua, tru møin kwaløm Jerusalénwan eshkabig kòn, truiibe truyu nui ureebañau karua srua kuindiig megabigwan.

26 Trune tru Jerusalén srømbalasriig tru namui usrimbe, mu karua srua kuig kømøtø kòn.

27 Kaguende øyeeg chibig pørig pasran:

“Ureg tøgagønrrab kaimab ishug,
managuen ureg tøgagømíbe,

truba tab kui mørøb kasraarab trashi cha,

unø tammisrtrab pusrkwabigwan ñi mana maig kui mørmíbe.

Kaguende kan ishug nundø elatsigwei ureebe mas nu kòn,

keg tøgø ishuwei lataguen kømø.”

28 Trube, mømibe nai nunelø, Isaac latawei ñimgucha Tius 'treeg tranrrumøn' cha kørømisrig tru ureemera kòn.

29 Inchendø tru urassrøma mutøgucha maig tøgagøbelø køben treeg kal-lab unøbe Espiritu Santo maig kønrrain køben treeg kal-lab unane ashig kømui inchib kaig martrabgøba inchibig kòn. Møingucha treetøwein kòn.

30 Inchendø ζTiuswei wamwan pøriibe mandø chibig køh? “Karuindiig megab ishuwane unanbañau weguchi chibig kòn. Kaguende tru karuindiig megab ishuwei nusrkaimbe, tru mu karuimíg megab ishuwei nusrkawan chi købigwan keta tranamigwan tøgatø utamibe managuen chi kaanrrun” cha.

31 Inchawei, nai nunelø, nambe tru karuindiig megab ishuwei ureemera kømøtø, tru mu karuimíg megab ishuwei ureemera ker.

5

Cristo chigucha ilósrkaimeelø kónrrai marigu wemallmø pónrramig kón

1 Cristo namun chigucha ilósrkaimeelø kónrrai mara, treegu pónrrónrrai pónsraigurri mur pónrray. Katø tru maig maramigwan martrai pørig, truig maig karuben trunun martrab kebamba, tuyutø srua kuindiig melónrrab kómøtø.

2 ¹Au ñimguen møtrai! Na Pablobe ñimun trenchar: Ñim asru circuncidar-ramaysruandøbe, trube, Cristobe ñimune chiweingucha chi purugumíig kui lataig webibsruiñrrun cha.

3 Nabe katøle maig tamigwan katø trendamónrrun: Møikkøben circuncidarramabiibe, trube, tru maig maramigwan martrai Moisés pørig maig karuigwan kanguen pinab marmø, kerriguwan martrai indig kónrrun cha.

4 Tru maig maramigwan martrai Moisés pørig maig karuigwan ñim treeg mara, chi kaig kómeeelø lataig tabig kórrømistrab inchibeløbe, Cristoinukkurri tarømisrøb, katø Tius ka yandø tab indiitøga pónrramigugurrimbe tarømisramba indin kón.

5 Kaguende nambe isubigwan Cristoinuutø pasra truba muniirab meler, Espiritu Santogurri chi kaig kómeeelø lataig tabig kórrømariilø kómigwan muniirab.

6 Kaguende nam Cristo Jesúsba pónraikkurrimbe circuncidaweig kui chi kónrrab kómøwei, circuncidamíig kui chi kónrrab kómøwein kón. Treeg kómøtø, isubigwan Cristoinuutø pasra undag kòbiitøga marøb pónrraig treeg mariibe tabig kón.

7 Ñimbe yamba tsabøtø tab ambub melaigwan, ¿tru newan ciertonig maig taigwan ñim mørøb melómónrraimbe, ñimune murre ilósrkøb søtø pónrramisrta?

8 Øyeeg maramne inchib pasrabiibe, tru ñimun wamabigweinukkurri arumíig kón.

9 Pøs: “Levaduran kan lamøzhig pusriitø harinawan maya sømarimba kerrigu larrøbig kón.”

10 Nabe Señortøgabe ñimuimburab chi isumø pasrar, na maig isubig køben ñimguicha treetøwei isunrrab kui. Inchen ñimun øyeeg punrrai marøbigwane mu kuindøgucha møra meganrrai marig kónrrun.

11 Nai nunelø, naimburamma na katøgucha circuncidamig kón chib eshka kusennøb unimbe, ¿trube, nane kaig martrab lliramubsruinñrrun? Pøs na treeg inchib uñibig kuimbe, trube, tru Cristo kurusyu kwaigwan wamindiibe nømune yandø chi ilósrkøb namishimubsruinñrrun.

12 Ñimun asrwan circuncidangarub, ilósrkøb søtø pónrramisrøb llirabelane, nømundøweinguen kanmaytø kapainguen kón.

Asr maig marøg kui mariiløba, Espiritu Santogurri mariiløba

13 Nai nunelan, ñimun wamappe, ñimbe chiyugucha ilósrka melónrrain kómøtø wamig kón. Inchendø tru ñim chigucha chi ilósrkaimeelø kómig tøgagúigwane, treeelø ker chiptø tru kemesra, ñimui asr maig marøg kui inchen trømbøig maramigweyasig tøgagømumig kón. Masken treeg inchimøtø, undag kòbiitøga kanikkurri kanikkurri mara tranay.

14 Kaguende tru maig maramigwan martrai Moisés kerrigu pøriibe iigwan martrai karua pasrigu chishtø tøga pasran: “Ñui mendaigwan ñiasi lataitøwei undaarau” cha, trendaigu.

15 Inchen ñim namig købiitø kanikkurri kanikkurri lasruyab ke chab mab lataig inchib amøñabe, ñimbe kangurrin kangurri yandø chab pinammay inchib amøñinrrun.

Tiuswei Espíritu maig kønrrain køben amønaig

16 Inchawei nabe ñimun trendamønrrun: Espíritu Santo maig martrain køben trunun marøb amønay cha, trumaybe ñimui asr maig marøg kui inchen, treegwan marmeelø kønrrabguen.

17 Kaguende asr maig marøg kui inchen kaig marøg købiibe Espírituimburbigwane chi marbashmø katøben, katø Espíritube asr kaig marøg kui inchen marbashmø katan. Inchawei møikkurrindøgucha sötø pønrramisrøb marbashmø katab pønrran, ñimun maig marøg køben treeg marmønrrai.

18 Trune tru Espíritu Santo maig martrai isunanen treegwan marøb meløwabe, tru maig maramigwan martrai pørig truig karuig kømøtø marøb melønrrun.

19 Inchawei asr maig marøg kui inchen treeg mariiløbe tørgandø asamdiig øyeelø køn: møgueløba, ishumburmeraba trømbøig mariilø, køsøngønrraptiig mariilø, maramburab trømbøig mariilø,

20 chiwan køben kan tius kui lataig mara tøgagüilø, misag purrønna kwaimandzigweimburbabelan mariilø, ashig kømui inchib tsalø asiiyailø, kwayam lailø, naiwan katøgan kerranrraitamab isub pusrkwai asiilø, namig købiitø ke kan chinchimmørø indiilø, chiyutøgucha ke na pasrainrrabna kui isub indiilø, nøørø katøgan sötømisrøb tarømisrøb ambiilø, kanuingatøtø inchib trugatø misrøb ambiilø,

21 møikkøben chigøben tøgagøben pusrkwai asiilø, mutsiirab indiilø, mabgucha maya mag køben mamburab maig øyeelø køn. Katøgan øyeeg latailan nabe ñimun treeg marøb kømønrrai kanmaytø waminchar, marigwansrø waminchib lataitøwei. Inchen øyeelan marøbeløbe Tius nø ashib karub waigwan utamibe chi kaanrrun.

22 Trune tru Espíritu Santoinukkurri arrubiibe øyeeg køn: undag købig tøgagømig, kasraatø unamig, chi isumø tab unamig, chine arringucha tam-may ka megamig, maig købash inchimø purø tammayig kømig, larrø tab inchibig kømig, maikkucha tarømisrømø megamig,

23 chish inchimíg, tammayig kømig, asr mumay srua itanmaptø kømø isua møra uñibig kømig. Øyeeg mariilan 'kalø køn' chinrrabiibe wesrua pasrig chi kaagøn.

24 Kaguende Cristo Jesúsweyeløbe tru trendø kaigwan tøga kal-laig asr-wane chine kaig marøg købig arrubigwanba, katø treetø treetø kaig marøg købigwanbañau marmønrrab elachar køn, tru kurusyu tøgatø mesrøb lataig.

25 Inchen mõimbe nam Espíritu Santogurri øsig amøñibeløbe, trube, Espíritu Santo namun maig amøñinrrain køben treegwan amøñigun.

26 Purø nørreelø misrøb ka isaba inchibelø kømugun, kangurrin kangurri namisiyab, kanikkurri kanikkurri chigurrin køben ka pusrkwai asiya.

6

Kangurrin kangurri puruguyamig

1 Nai nunelø, inchippa møikkøben chiyugøben kaig mara kebeña megabene, Espíritu Santo maig maringaruben ñim treeg pønrrabeløbe, katøle treetøwei

tab pasramisrtrai maig kɔbash inchimø, tammay puruguy. Inchendø ñiasiitøwei ashiptø mar, ñigucha treegutøwei kebefiib megamønrrappe.

² Chinetø puig meløben kangurrin kangurri lata kuñam puruguyamig kɔn. Treeg marabe, Cristo maig martrai karua pasrigwan ñimbe marøb kɔnrrabguen.

³ Kaguende møikkøben truburab kømíig kɔbendø, truba truba nuig kurmab inchibiibe, chi treeg kømubendø incha, nøtøwei ka kebefiib pasran.

⁴ Inchawei ñim møitøgucha chi marigwan ñuimburabigwan søl kɔtashchab tab isua asamig kɔn, trumaybe ñibe ñiasiitø tab kui mørøb pasramig kɔnrrun, na marigwanba, katøgan marigwanba, maig kɔtashchab ashib pasramig kømøtø.

⁵ Kaguende møitøgucha nui chi maramigwane mu mendaig kømøtø, nøashib srua yamig kɔn.

⁶ Tiuswei wamwan kusrebig kɔnrrai møikkøben ñun kusrenanøbigwane chigurrimbunø ñi tabig tøgagúitøga nun purugub pirisamig kɔn.

⁷ Chigøben kømønrraitamab ñimguen ñimasiitø treeg isumøtay, Tiusbe nun maig kɔbash inchib ka indzatø mørtraingucha kømøtø kɔn, kan møg nø maig ellmara kørømariibe katøburø trunundøwei tulishinrrun.

⁸ Kaguende ñim asrwan tab kɔnrrai ellmarøb pønrraibe, truiikkugurrimbe trømbøig marig utønrrun. Inchen Espíritu Santon tab kɔnrrai ellmarøb pønrraibe, truikkurrimbe managatig øsig kømigwan uta tøgagømig kɔnrrun.

⁹ Tabig maramigwane muraaramø marøbig marøb meløgun. Kaguende tru treeg marigwan utamig yandø pubene, treeg marigwan utamig kɔnrrun, nam kullaaramø marøb meløwabe.

¹⁰ Inchawei treeg kɔbene, chigøben maramdiig købenbatø, mayeeelanba tabig margun. Inchen mas Tiuswei misag, tru isubigwan Cristoinug pasra tøgarmarane katøguchinguen tabig maramig kɔn.

Mandø kømigwan Pablo srabe wamindiilø

¹¹ ¡Au, ñimguen asay! Nabe nai taska ñimuyasig øyeeg nørriig pørar.

¹² Møiløgøben truba tabig marøbelø kønmba asiilø kɔnrrab inchibeløbe, ñimune asru circuncidamne inchibelø kɔn, Cristo kurusyu kwaigwan waminchen, kaig martrab wendautø llirailø kømønrrab.

¹³ Pøš tru circuncidawar kɔbenguen, tru maig maramigwan martrai pørig maig karuben trunun marmeelø kɔbendørre inchibelø kɔn. Inchendø nømbe ñimune asrwan circuncidanrrai indan, nømbe ñimui asru truba tab kui mørøb, ka møg inchib pønrramig kɔnrraindø.

¹⁴ Pøš naimburappe namui Señor Jesucristo kurusyu kwaigweimburab kømubene, managuen katøgan chi pegube, møg inchib pasramig pumuumbe kɔtan. Jesucristo kurusyu kwaikkurri naimburappe yu pirauibe yandø kwai lataig patsig køben, katø nagurri pirauigweimburappe kwawa lataitøwei patsig kur.

¹⁵ Asru circuncidaweig kui chi kɔnrrab kømøwei, circuncidamíig kui chi kɔnrrab kømøwein kɔn, treeg kømøtø, kerrigu srøig peemay amønamig trube-guende tabig kɔbwei indan.

¹⁶ Tru iig maig karuigwan treeg amøñibelane tru chi isumgaig tab købiiba, lastima asiba, nømum pala kɔnrrai inchar; katø tru cierton mayeelø Tiuswei israelitasmeraim palagucha.

¹⁷ Møingurrimbunøbe mugucha nan chinetø pui pasramig kɔnrrai marmørrunrigay. Kaguende nabe nai asru Jesucristogurri kaig indinab kørriindiilan nai asru asamdiig tøga pasrar.

¹⁸ Namui Señor Jesucristoi ka yandø tab indiibe, nai nunelø, ñimba pasrønrainab isur. Treg kønrrun.

Efesios

'Ka amõñiqueh' chib pørig

¹ Na Pablo, Tius trendø øyeeg kønrrain kuikkurri Cristo Jesús nõashib karua ørig, Tiuswei misaamera, Cristo Jesúswan tarømisrmø pønrrabelø, Efesosrø warabelan, truילayasiג i kilgawan pørar.

² Tius namui Møskaimba, namui Señor Jesucristoba tru ka yandø tab indigwan køben katø chi isumgaig tab købigwan køben, ñimun tranrrun.

Tiusbe Cristogurri chigøben tabigwan tranøb

³ Namui Tius Señor Jesucristoi Møskaimbe mayanguen tab indig kønrrun, srømbalasrø tru chigurrimbunø nuimburabelø tabig pønrrabiitøga Cristogurri namune trutøga mayanguen tab kuilø kønrrai marøbigwan.

⁴ Pøse Tiusbe tru chigurrimbunø pønrrabigwan nõ mara pønstrømøwatø manasrøwei namune Cristogurri tarømara wesraig købig køn, tabigweindø tarømariilø, kaig mariitøga chillig inchar kømeeleø, nui merrab pønrramig kønrrai.

⁵ Nøbe namune undag købiitø Jesucristogurri nui trag ureg kønrrai maramig manasrøwei nõ treeg mara tøgagúig købig køn, tru nõ trendø treeg martrab isua tøgagúig truig maig køben treekke,

⁶ tru nui ka yandø tab indig purø nuig purø tabigwan maya nuguen tabig wamindamig kønrrai, tru nui truba undaraig Nusrkaingurri namun ke ka yandø tab indig tranigwan.

⁷ Nuinug nambe nui aningurri nuielø kønrrai kaigyugurri wesrailø ker, namui kaig mariilan ulø payimeelø, Tiuswei tru ka yandø tab indig tøgagømburab tøgagúig truig maig køben treeg.

⁸ Tru ka yandø tab indigwan tranøppe, Tius namun tøgagømburab tøgagønrrai tranig køn, tru chiwandøgucha nam purø tab asha maram kusrebelø kømigwanba, katø tørgandø chigúi mørøbelø kømigwanba.

⁹ Nøbe tru nõ trendø treeg martrab isua tøgagúig tru muguen asiimíg pasrabigwan namun kenamarig køn, Cristoinug nõ treeg maramig nun maya nuguen tabig asønaben tru treeg tøga waig købigwan,

¹⁰ tru treeg maram kwalømmerra pubene, trunug treeg maramig pasrønrrai: tru srømbalasrø chi pønrrabigwan lata, katø pirauigwan lata kanbalatø mara, maig maramigwan Cristo kerriguwan nõ asha martrai pønstrønrrab.

¹¹ Katø nambe tru namuimburabigwan nõ ketig tranamig tøgagúigwane Cristoinuutøwei utig købig køn, manasrøwei namun treegwan utønrrain kønrrai marig købig kua, tru chiwandøgucha Tius nun maig maramdiig asønaben tru treeg kønrrai marøbig, maig martrab asig køben trumay treeg.

¹² Tru srøsrø ke nammerrig Criston muniirab melabelø kuikkurri, tru nui tørguegwalmabigwan namgurri maya nuguen tabig wamindig kønrrai.

¹³ Katø treetøwei ñimbe nuinug tru wam newan ciertonig, tru tabig srø wam kaigyugurri wesrabigwan ñim møra, nun køreben, tru tranrrab misra kørømisrig Espiritu Santotøga Tiusweyelø kuin kui asiilø kønrrai ñimbe sellailø kuig køn.

¹⁴ Truibe tru namuimburabig kønrrabigwan ketig utamig kønrrai katsibasra tranøbguen indig truig køn, tru Tius nuyasiג tøgagønrrab wesrailan

ke tab webamba pønrramnegatig, nui tørguegwalmabigwan maya nuguen tabig wamindamig kønrrai.

Pablo Tiuswei ureemerayasig Tiuswan miab

15 Inchawei treekkurri tru ñimui isubigwan Señor Jesucristoinug pasra tøgagúigwanba, katø Tiuswei misaameran mayeelanba ñim truba undaguelø køn taig na wammørabe,

16 chu urastøgucha na Tiusba wamindigu tøgatø isub palømo, ñimuimburab 'ungwa' chibig kur.

17 Nabe tru namui Señor Jesucristoi Tius tru tørguegwalmab Møskawan miabig kur, ñimun Espíritu Santogurri øyeeqwan tranrrai, kusrebelø kømigwanba, katø nebua asiimíqwan tørgandø tab chigúí nebua ashchaimba, newan nun tab nebua asamig kønrrai.

18 Katø chigúí mørøb nebua asamig ñimui isubigu tørgandø kebiliilø kua, tru ñim tøgagønrrurmab isua muniirab melønrrai ñimun wamigwan, øyeeq købig kuin kui nebua ashchaimba, tru nui misaameran keta tranrrab misrig chigucha palømíq purø nuig purø tabigwan øyeeq købig kuin kui nebua ashchaimba,

19 katø tru nam nun kørebelainug maramburab marøbiibe, purø nuig købig kuin kui nebua ashchaimba, miabig kur. Inchen tru nui purø nuig maramburab marøb pasrabiibe,

20 Tius tru Criston kwailai utugurri katøle øsiirangarua, tru srømbalærø nø wainug nui kusrmay wamisrtrai maramburab mariitøgatøwei marøb pasran.

21 Mayeelaim pala nøm asha karubelaim pala køben, katø mugucha manchinrraingaiq karubelaim pala køben, katø maramburab marøbelaim pala køben, katø maya misagwan nøm asha karubelaim pala køben, nørø kusrebelø kuikkurri nørø munchimera tøgagønrrai tranilaim pala køben, kerrigu ilaim pala nun wannig køn, møi i kwalømweindø kømøtø, katø wendøsrø attrabiguwein chigucha.

22 Incha Tiusbe tru chigurrimbunø købigwanguen Cristo nø maig kønrrain køben treeg pønrrønrrai pønsra, iglesiaimbe chiyutøgucha nø tur kønrrai pasrig køn.

23 Inchen truiibe Cristoi asr køn, Cristo nøtøwei tru chigucha chi palømíq netsiig pasraig. Cristobe treetøwei chi købigu mumaytøgucha nøtø netsiig pasrabig køn.

2

Tius ka yandø tab indikkurri kaigyugurri wesrailø

1 Ñimbe ñimuimburappe, martrai karua pønrrailan mørmø, itøbunab maruiløyubah, katø kaig marøb amønailøyubatø kwailø købig køn.

2 Kaguende ñimbe merrabsrømbe yu pirau maig arrub pasrøben trunun marøb, katø tru srømbala chiguchagayú nø muba karumburab nø karub pasrabig, tru nugwaimandzig, maig maringaruben treeg marøbelø købig køn, tru møi ya Tiuswan mørmø misaameran nø kaig maringarub pasrabig karuig.

3 Namgucha merrabsrømbe mayeeløba namun asr maig trømbøig marøq kui inchen nømui utu treetøwei marøb amønibelø købig ker, namui asr maig srua itanmaptø, tru kuindø kaig marøb, kailan isub. Kaigwan nam trendø

tøgagúikkurri, Tiuswei purø trømbøig namig købigwan utørrabelø købig ker, katøganelø mayeelø latawei.

⁴ Inchendø Tiusbe yeeg purø nuig lastima asamburab isua ashibig køptø, tru purø nuig undag købig tøgagúitøga namun undag køptø,

⁵ tru martrai karua pønsrailan møra marmuiløyutø kwailø amøñibenbatøsrøwei, tru øsig kømigwane Cristoba kanbalatø tøgagønrrai namun tranig købig køn. ¡Tius tru ka yandø tab indiitøgatø ñimbe kaigyugurri wesrailø køn!

⁶ Incha Tiusbe namune Cristo Jesúsba kegøtø øsiirangarua, nøba srømbalasrø Tius waisrø purramisringaruig købig køn,

⁷ tru wendøsrø attrabigu nui ka yandø tab indig tøgagømburab tøgagúigwan kenamartrab, nø namun purø tabig køptø Cristo Jesúskurri.

⁸ Kaguende ñimbe Tius ka yandø tab indiitøgatø kaigyugurri wesrailø køn, ñimui isubigwan Jesucristoinuutø pasrikkurri. Iibe ñim chigøben marikkur-rin kømøtø, iigwane Tiusbe ka yandø keta tranig køn.

⁹ Kabe nam chigøben tabig marikkurrin kømøtø køn, ‘tabig marikkurrin køn’ cha, mugucha møg inchib pønrramig kaanrrai.

¹⁰ Kaguende nambe Tius nø mariilø ker, Cristo Jesúskurri srøig peemayelø kønrrai mariilø tabigwan marøbelø kønrrai mariilø, tru treegwan marøb amøñibelø kønrrai Tius manasrøwei pønsrailan.

Cristogurri kanguelarrøtø lincha pønrramisrig

¹¹ Inchawei ñim tru trendø judíos kømø misaamerane merrabsrømbe tru judíosmera nømui asru taska circuncidailøbe ñimune: “Circuncidaimø mis-akkølleelø” cha wamab tøgagúilan isua kuy.

¹² Ñimbe tru urasrømbe Cristone chigar, Israel misaamera chitø marøbelø køben, ñimbe treegwan maramig chigar kønrrai tarømariilø, katø Tius nui misagwan øyeeg tranrrab kørrømisri acuerdosmera mariilane chi asamig chigar, katø chiwan muniirab melamig chigawei, yu pirau ñimbe Tius kaweyelø købig køn.

¹³ Inchendø mømibe Cristo Jesúsba kanbalatø pønrraikkurri Tiusweimay kemalsrailø køn, Jesucristoi anindøga, ñim merrabsrømbe yabsrø pønrrabelø købig kuigwan.

¹⁴ Kaguende tru ambugurri igurri chi isumikkaig tab købig namuinug pasrabiibe Jesucristo nøwein køn, tru pa sötø købigwan kan sötøtø kønrrai marøbig. Tru ashig kømui indiyab waraig købig kan pirøbanrrig sötøbasrab lataig pasrabigwan pøtiichippe,

¹⁵ tru maig maramigwan martrai Moisés pøriiløyugurri wesrawa, øyeeg, øyeeg maramig køn chibig pørig pønrrabigwan chi asamig kaanrrai mara pasra, treeg mariitøga patsøga pasrig kuig køn, Cristo nø kurusyu kwawa, tru pa sötø nøørotø købelan nuinug srøig kandø mara pasrtrab, øyamay ambugurri igurri tabig kørrømisrtrai marøb.

¹⁶ Incha katø Cristobe tru pabalø købigwan kan asrtø lataig mara, Tiusba katøle treetøwei katø tab kørrømisrtrai marig køn, tru ashig kømui indiyab pønrraigwan yandø mas treeg kømønrrai nø kurusyu kwaiitøga patsøga kørrømarøb.

¹⁷ Incha Cristobe arrua, tru ambugurri igurri tab waramigwan eshka kusrenanig køn: ñim judíos kømeeelø Tiusweinukkurri yabsrøn pønrrabelan lata, pulutø pønrrabelø judíosmeran lata.

¹⁸ Kaguen nõgurriwei nam lata, nõm lata, Tius Mòskawan tru Espíritu Santotògatòwei kemalamig tòga pònrrer.

¹⁹ Inchawei yandò ñimbe peg pirausreelò kòmòwei, ni pestò ka pua puramrappò amrruateelò kòmòwein kòn. Mòimbe treeg kòmòtò, Tiuswei misaameraba kanguelarròtò maròb tògagòmigwan tògar, Tiuswei misaameraba kan yautò latalò,

²⁰ Cristo nõashib karua øriilaim palaba, katò Tius maig karuigwan eshkabelaim palaba ñimbe pòlbasra kusrub mariilò kòn, tru katsigugurri niga pasrab sruube Cristo nõtòwein kòben.

²¹ Inchen nuinug tru yawan, purò may tamara waròb tabig kusrub marene, tru yabe kurrab ippe, Señorweyasiitò taròmari ya kònrrab kurrab yan.

²² Inchen tru utu ñimungucha kanbalatò kusrub maròb ambiilò kòn, Espíritu Santogurri Tius truyu nõ pasramig kònrrai.

3

Nui tabig srò wamwan judíos kòmeelan waminchib inrrai Pablon Tius pasrig

¹ Øyeekkurri na Pablobe Cristo Jesúsweiwan maròb megabig kuikkurri kailan keerig yau pasrar, ñim judíos kòmeelayasig tab kònrrai.

² Pòs ñimbe manawei wammòraguen kuinrrun, Tius ka yandò purò tab inchibig kòptò ñimuyasig tab kònrrai nan iigwan martrai pasrigwan.

³ Iibe tru mu asiimíg pasrabigwan nan ashchai Tius kenamarig truíg kòn, tru na ñimun landòtiig pòròbguen indig.

⁴ Inchawei ñim iig tru pòrigwan ashabe, muguen asiimíg pasrabig Cristoiwan, øyeeg chigúí mòramgailan nabe nebua ashibig kuin kui ñimbe wetògòrrònrrabguen.

⁵ Iig, tru muguen asiimíg pasrabigwane merrabsrò misaamerane munguen kenarmuig kòbig kòn, tru mòí ya Cristo nõashib karua øriilò, Tiusweindò taròmariilanba, katò Tius maig karuigwan eshkabelanba, Tius nui Espíritu Santotòga kenamaròb lataibe.

⁶ Iig, tru muguen asiimíg pasrabiibe, tru judíos kòmò misaameragucha judíos misaameraba tògatò tru ketigwan utamig tògagòb, tru asryutòwei pònrramig kòb, katò Jesucristoinug tru tranrrab misra kòrròmisrigwan tògatò utamig tògagòb indamig truíg kòn, tru Tiuswei tabig srò wamgurri.

⁷ Nane Tius ka yandò tab incha ketikkurri, iig tru tabig srò wamwan waminchib maròb meganrrai pasrig kur, nui maramburab marig maig kòben truitòga.

⁸ Nabe Tiuswei misaamerai utu tru chigucha kòmò waachawan tru Cristoi chine chine purò tabig, kan øyangatiitò kòn tamgaig Tiuswei tru tabig srò wamwan eshkab kusrenanòb pasramig kònrrai pasrig kur, tru judíos kòmò misaameran,

⁹ katò trugurri tru mu asiimíg pasrabigwan maitò maròb attrabigwan, Tius tru chiwandògucha mara pònrsòbigweinug tru manasròngurri sòrig pònrrabigwan.

¹⁰ Iigwane tru iglesiagurri kerriguba mòí ya asig kònrrai kenamartrab isua indig kuig kòn, nui tru muguen nebua isumgaig purò nuig kusrebig kuigwan tru sròmbalasrò nõm asha karubelanba, katò mugucha manchinrraingaig karubelanba.

¹¹ Tius øyeeg maròppe, tru nõ trendò manasròngurri treeg martrab isua tògagua, trunun treeg marig kòbig kòn namui Señor Jesucristoinug.

¹² Inchawei nambe chigucha katønraingaig chi isumø nøgurri Tiusweinug kemalamig tøgaguer namui isubigwan Jesucristoinuutø pasra tøgagúikkurri.

¹³ Inchawei nan øyeeg trømbøig isumdiig puig megaigwan, trunun isuptø kullaaramørrunrigay chinrrab inchar. Masken nan øyeeg puibe ñimuyasiibe maya nuguen tab kønrrain køn.

Cristoi undag købig

¹⁴ Inchawei nabe Tius Møskawei merrab tømønstrøbig kur,

¹⁵ tru srømbalasrø lata, yu pirau lata, kan sətø, kan sətø købelan trumørig munchi pønra wamabigwei merrab.

¹⁶ Tru nø chigurrimbunø nui tørguegwalmabig chi palømig maya tøgagúig, truig maig køben, truyugurri tru ñimui manrrau chishkandø mur pasrønrrai, nui Espiritugurri maramburab mariitøga martraï miar,

¹⁷ Cristo ñimui manrrømerayu pasrønrrai tru isubigwan nuinuutø pasra tøgagúikkurri. Pøs øyangurrimbe ñimbe umbu srøl keetiilø, undag købigutø pønrramisra,

¹⁸ Jesucristoi undag købig maya nuig kuigwan ñim mayeelø nui misaameraba kanbalatø pønrramisra, tru Cristoi undag købiibe lendømay treetøwei, yamay treetøwei, palamay treetøwei, lendegørrab treetøwei nuigwan ñim tab chigúï mørtraï miar.

¹⁹ Katø tru Cristoi undag købig mu newan nebua isumgaigwan ñim nebua ashchai miar, ñim øyamaybe Tius nø maya nu kømburab kuig truig ñimuinug netsiig pasrønrrai.

²⁰ Inchen tru chiwandøgucha nøbe marøppe, tru nam miaigwandø kømøwei, kabe nam isuigwandø kømøtø, ke uñcha køm tøgagønrrai marøb Tius, tru nui maramburab marøb pasrabig maig køben namuinug treeg marøb pasrabigwan,

²¹ Tiuswei iglesiyuba, Cristo Jesúsweinuuba tørguegwalmabig kønrrun, manगतig. ¡Treeg kønrrun!

4

Criston kørebeløbe Espiritugurri kandø køn

¹ Inchawei Señor Jesucristogurri tru kailan keeri yau na pasrabiibe, ñimun trenchinrrab inchar: Tius ñimun treeg amøñinrraiwei wamiilø kuig køppe, maig amønamiigwan trumay treeg amøñinrrunrigay cha,

² maig køben inchimeelø larrø kørøteelø, maig købash indingucha larrø tammayelø, maig køben kuingucha tammay melabelø, kanikkurri kanikkurri chigúingucha lata inchimøtø undag købiitøga chi kømui lataig pønrrabelø.

³ Espiritu Santoinug newan kanbalatø pønrrønrrab indamiigwan treeg pønrrønrrab inday, tru kanbalatø pønrramiig ambugurri igurri tab købiitøga,

⁴ kan asrtø, kan Espiritu Santotø køn, tru ñim muniirab melønrrai ñimun wamig kandø køb lataitøwei.

⁵ Señor kandø køb, tru isubigwan Jesucristoinug pasra pønrramikkuha treetøwei kandø køb, piu umbu ulsraikkucha treetøwei kandø køb indan.

⁶ Tius kandø, trurriig mayeelai Møskai, nøbe mayeelainu pala nø pasrabig køb, mayeelainu trumørig nø pasrab, mayeelainu pasrabiibe nøtø køn.

⁷ Inchendø namune kanun kanun Tiusweyasig chigøben marøbelø kønrrai keta tranig køn, Cristo pirisha keta tranig maig køben, treeg.

⁸ Inchawei Tiusbe trendaig køn:

“Tru srømbalasarømay ippe,
tru merrarrowa srua kuig melabelan
nø merrarrowa, nø pera yaig køn cha.

Incha misaamerane Tiusweyasig chigøben marøbelø kønrrai keta tranø
indig køn” cha.

⁹ Tru øyeeg: “nebyaig køn” cha trenchippe, ζtru wallibirø umbugatig
kørrebmerrig kørrayaig køn cha trenchimuitarru?

¹⁰ Tru kørraibiibe nøtøwein køn, tru maya srømbalamera pønrrabigu purø
palasrø nebibig, kerriguwan nøtø netsiig pasrønrrab.

¹¹ Incha truig nøtøwei mõilane nøashib karua øriilø kønrrai marøb, mõilane
Tius maig karuigwan eshkabelø kønrrai marøb, mõilane Tiuswei tabig srø
wamwan truørø srua llirabelø kønrrai marøb, mõilane tru Criston kørebelan
tab ashib pera pønrrabelø kønrrai marøb, katø kusrenanøbelø kønrrai øyeeg
pønsraig køn,

¹² tru Tiuswei misaamera nõmui marøb pønrramigu purø may kusrenniilø
kønrrai isua, Criston kørebelø, tru nui asr, nurab inrrai martrab.

¹³ Tru nam mayeeløba tru isubigwan Jesucristoinuutø pasra kanbalatø
pønrramiguba, katø Tiuswei Nusrkawan tab nebua asamiguba nam kanbalatø
pønrramigwan nebumnegatig martrab, kan møg ne nuraig lataig misrøb,
Cristo maig køben treeg misramnegatig nebumig kønrrai.

¹⁴ Øyangurrimbe nabe yandø mas shush uremera latailø kømumønrrun,
kan pi latøgushibig amburab iburab srua ambi latailø, chine srøig peemaytø
kusrenaniilø kan isig ichibig lataig arrubig punø, panrrø sruabetiilø,
møguelø kaig maramigwandø isubelø kaigu kegørrøsrkamig purø may isua
pønrrailøtøga kegørrøsrkaimeelø.

¹⁵ Masken treeg kømøtø, tru newan ciertonigwan undag købiitøga
waminchib, chiyutøgucha nørøragun tru tur Cristoinug nõba kanbalatø.

¹⁶ Pøs nøgurriwei asr ørøba kandø misra, tru kønabigu merrarrab srølmørig
ambumay imay lata purugubene, nõm mõitøgucha chi maramigwan trunun
trunun marøb pønrramisren, nurab yan, katø undag købiitøga nørørab am-
bamig kønrrai.

Cristogurri srøig peemay amønamiigwan tøgagøb

¹⁷ Inchawei nabe iig øyeegwan ñimun eshkappe, marmø kømø, martrai
karunrrab inchar Señorwei munchiyu: mõimbe yandø amøñippe, Tiuswan
ashmeelø judíos kømø misaamera nõm chiweingucha chi purugunrrabgaig
isub amønailøyu ñimngucha amøñimøtay cha.

¹⁸ Nõmui isubiibe løstørailø, nõmui manrrømera purø murelø kuikkurri
chugúinguen mõrmeelø kua, øsig kømig Tius tøgagúigugurrimbe nõmbe purø yab
pønrran.

¹⁹ Yandø chi kørikkengar misrikkurrimbunøbe, yandø kaig maramigwandø
martrab kebambubelø køn, chigurrimbunø køsøngønrraptiig marøg købig
arrubigwan neguen kømuig marøbig marøb pønrrønrrab.

²⁰ Trune ñimbe Cristoiwan kusreppø, øyeeg marøbelø kømønrrab kusreig
køn.

²¹ Ñimbe isa kømø, tru newan ciertonig Jesúsweinug pasrabigwan cierton
mørøb, nuinug kusrenaniilø kuig kuinrrun.

²² Tru ñim merrabsrø Tiuswan ashmeelø køb uras marøb tøga amønaig
købigwane wegutsay, tru køllig ñim trendø kaigwan tøga kal-laig, chi tabig
pummørø chull isubig purø trømbøig marøg købig trutø srua yaig, ñimui
umbu kaig pasrabigwan,

²³ tru ñimui isubigu srøig peemay isubelø kønrrab.

²⁴ Ñimbe tru srøig øsig kømigwan kewa pønrray, truipe Tius nø maig køben treetøwein kønrrai marig køn, cierton sølgandiitøgaba, newan chishchig tabitøgaba.

²⁵ Inchawei øyeekkurri ñimbe isa wamindamigwane yandø elacha, masken ñim møitøgucha ñimui mendaigwane isa kømø, sølwan wamindamig køn. Kaguende nambe mayeeløba kangurrin kangurri kan asrtø ker.

²⁶ Namappe, namubendø, namig køtanmaptø chigøben kaig marmøwei, namig købigwane ke pørr pinayamnegatikkuha tøga amøñimøwei indamig køn.

²⁷ Katø nugwaimandzig ñimuinug kelulrrain kømøwein kuy.

²⁸ Nilaptiig købiibe yandø mas nilømøta. Masken treeg inchimøtø, ñui tasiitøga chigøben tabig maramigwan mar, møikkøben chi palai inchene, purugumig tøgagønrrab.

²⁹ Ñimui trigugurrimbe mørøbguen møramgaig trømbøig webinrrain kømøtø kuy. Treeg kømøtø, Tiusweimburabigu maig palaim purrøben purugunrraptiig, treeg wamindamig køn, mørøbelanguen purugunrraptiig, treeg kønrrai.

³⁰ Tiuswei Espiritu Santon isuim pasrønrrai marmøtay, tru kerrigu yandø newan kaigygurri wesram kwalømweyasig truitøga ñimbe Tiusweyelø kui asamdiig kønrrai sellailø køn.

³¹ Ñimui manrrau chu uraskucha møbraindø pønrramig kønrrai marøb pasrabigwanba, ke chab srurrab namig købigwanba, trømbøig namig købig pasrabigwanba, trømbøgølig namig trasamigwanba, trømbøig tsalø wamab indamigwanba, chigurrimbunø kaig pønrrabigwan kerrigu truilanbañau chishtø elatsay.

³² Masken treeg inchibgunrriibe, ñimbe larrø tab inchibelø, lata lastima asiyabelø, Tius ñimun Cristogurri kaig marigwan ulø paymub pesannab lataitøwei, kangurrin kangurri ñimgucha ulø payiyab pønrrømumig køn.

5

Tiuswei ureemera mandø amønamiig

¹ Inchawei ñimbe Tiuswei undaraig ureemera kuig køppe, nø maig køben treetøwein kønrrab inday.

² Amøñippe, undag købigwane tøga amønay, Cristo namun maig undaguig køben treetøwei. Nøbe nøashib namuyasig purøbasramisra kwaig køn, kan animal kweecha purø may irrabzhig Tiuswan keta tranøb lataig.

³ Ñimbe ñimui utube, møgueløba, ishumburmeraba chigøben trømbøig maramigwanba, katø chineto køsøngønrrapteelanba, katø chiwandøgucha ke chinchimmørø inchib parø indamigwanba, øyeelane mørøguen wamincha mørømumig køn, Tiuswei misaamera kuig køppe.

⁴ Mørøbguen møramgaig wamincha ashib pønrrømøwei, chugúinguen mørømubendø wamincha mørømøwei, trømbøig wamindamgailan wamincha indza mørømøwei indamig køn, treeg indamgailan maraashib pønrrømøtø, masken ñimbe Tiuswan 'ungwa' chib kømig køn.

⁵ Kaguende ñimbe yandø iigwane tsabø ashibelø køn: møguelø ishumburmeraba trømbøig marøbeløba, katø chigøben ashikken kønrrabgaig trømbøig marøbeløba, chiwandøgucha ke chinchimmørø inchib parø inchib, pønrramigwane ke tius mara tøgagøbeløba, treeløbe Tiusba, Cristoba nøm ashib karub purraisrømbe mugucha chi ketig utamig chigar kønrrab kuin kui.

Tørwei ureemera maig amønamiḡwan waminchibig.

6 Chiweingucha chi purugunrrabgailø wamindiiløtøḡa muḡøben keḡørrørskainab kønrrab kømø, kaguende øyeekkurrindøwei Tiuswei purø trømbøig namig købiibe tru mørømø misaameraim pala arrubig køn.

7 Inchawei ñimbe treeg marøbeløba lincha tøgatø marøb kønrrab kømø.

8 Kaguende ñimbe merrabsrømbe løstøyuelø købig kuig, møimbe Señorweinuube tøryuelø køn. ¡Ñimbe amøñippe, tørwei ureemerasun amønay!

9 Kaguende tru tøryugurri chi arrubiibe maya nuguen purø tab indiiba, sølgandø tabig mariiba, ciertoniiiba øyeeg køn.

10 Señorwan tab kui wanrrai maramigwan, mumay maren tab kui mørtashchab treegwan lab melamig køn.

11 Chi tabig marig kørømmisrtrabig chigaig løstøyuigwan mariilan ñimḡucha tøgatø marøb kønrrab kømø, masken ñimbe treeg inchibgunrriibe øyeebe kalø køn cha eshkabguen pønrramig køn.

12 Kaguende nømui chigøben søratø mariiløbe wamindamikken kørig kønrraptiig trømbøig mariilø køn.

13 Inchen tru chigurrimbunø købigwan tøryu pønrsøbene, maig kuigwan tørgandø asamig kenamisran. Pøs tru chiwandøḡucha maig kuigwan asha kømig kønrrai tørgandø kenamarøbiibe tru tør køn.

14 Inchawei øyeeg chibig køn:

“Ñi, kib lataig tsubiibe, kiagasra,
kwaitai utugurri kurrø cha.
Cristobe ñun kebilønrrun” cha.

15 Inchawei tab isuamøra amønay ñim mandø amønamiḡwane. Kan chugúinguen mørmeelø lataig amøñimøtø, maig amønamiḡwan tab isuamøra amøñibelø kuy.

16 Chigøben tabig maramdiig pubene, treegwan ka purainrraindø ashato pønrrømøtay. Kaguende purø kaig kwalømmøra køn.

17 Inchawei ñimbe ke chugúinguen mørmeelø kømøtay. Treeg inchimøtø, Señor nam chiwan martraim palai watashchab trunun nebua ashchab indamig køn.

18 Vino mucha; mutsiiramøtay. Truiibe chugatig kaig marøḡ køben kaig martrai srua ibig køn. Masken treeg kømøtø, Espíritu Santotø netsailø kømig køn.

19 Ñimbe salmostøḡa, himnostøḡa, Tiusweimburabelan cantailøtøḡa kangurrin kangurri waminday. Ñimui manrraugurri newan isua cantab, Señorwan maya nuguen tabig køn chib waminchib.

20 Chu uragucha Tius Møskawan ‘mayanguen ungwa, ungwa’ tay chiwandøḡucha lutøgurri namui Señor Jesucristoi munchiyu.

Tiuswei ureemera keeba, sraimba mandø kømigwan waminchibig

21 Ñimbe kanikkurri kanikkurri lata mørøb melamig køn, Criston kørribala tøgagúikkurri.

22 Sraløbe, kelø maig chiben treeg mørøb melamig køn, Señorwan lataitøweingue.

23 Kaguende keebe srawane nø asha karubig tur køn, Cristo nui iglesiai, tru nui asrwein tur køb lataitøwei, truigwane tru Kaigyugurri Wesrabig nøtøwein køn.

24 Cristo nø maig karuigwan iglesia møra marøb melab lataitøwei, sraløḡucha kelane treetøwei mørøb melamig køn chiyutøḡucha.

25 Keløbe nōmui sralane undaguelø kōmig kōn. Cristoma nui iglesian undag kōptø, nui øsig kuigwan nōashib tranig kōn,

26 tabig nuyasiitø tarōmari misaamera kōnrrai martrab, tru nui wamdøga piu umbu ulsraitøga pillmawa, chish mara,

27 iglesia tōrgegurnabig, kaig mariitøga chigucha chillig inchaig kōmīg, maig kōbendiig trōmbōtiig mindig kōmōwei, chi tre lataibe chiguchagaig, masken treeg kōmōtø, tabigweindø tarōmarig, kaig mariitøga chillig inchaig kōmīg treeg pasramig kōnrrai nuyasiitøwei øyamay kenamartrab indig kōn.

28 Øyeetøwei keløbe sralan undaguelø kōmig kōn, nōmui asrwan lataitøweingue. Nui srawan undaguibe nōasiitø undaaran.

29 Kaguende mugucha nui asrwane managuen nōasiitøweimbe tsalinchimōn. Treeg kōmōtø, asr maig palai inchen mab muchib, maig kōben kōnrrain kōmō ashib tōgagø, Cristo iglesian ashib tōgagø lataitøweingue.

30 Pøs kaguende nambe nui asruelø kuimba, namungucha treetøwei ashib tōgagø.

31 “Inchawei treekkurri mōøbe usri mōskawane elacha, sraimba kandø misrtrun. Incha tru pailøbe kan asrtø kōnrrun.”

32 ¡Øyeebe mandø kuinguen mōramgaig purø nuig kōn! Inchendø iigwan waminchippe, ‘Cristonba, nui iglesianba treeg kōn’ cha waminchar.

33 Inchawei treeg kōbene, ñim keløbe mōitøgucha sralane ñimui asrwan lataitøwei undaguelø kōmig kōn. Inchen sraløgurrimbe kelane maig kōbash inchimø, kōrig tōgar kōmig kōn.

6

1 Señorwan undag kōbiitø ureemerabe ñimui mōskalane mandø chiben treeg mōramig kōn. Kaguende iibe treeg maramig sōl kōn.

2 “Ñui usri mōskawane maig kōbash kōmō, purø tab inchib tōgagu,

3 yu pirau purø tabig kasraatø tsumig kōnrraimba, øsig kōllirab tsumig kōnrraimba.” (Tru maig maramigwan martrai karua pōnsrailøyu iimerrig kōn, tabig tranrrab misra kōrrømisrigwan utamibañauibe.)

4 Inchen ñim mōskaløbe ñimui uregwane namishib namig kōtanmaptø menrra inchimōtay namig isumōnrrai. Treeg kōmōtø, sōlwan maram kusrenrrai kusrenanøb, Señor maig kusrenaniitøga ‘øyeeg maramig kōn’ chib waminchib kusrenanamig kōn.

Ka karuindø melabeløba, karub pera kōbeløba

5 Ñim, karuindiig melabelø, yu pirau ñimun karub pera kōbelane mōramig kōn, kōriibala, maig kōbash inchimø, manrraugurri tabig isua, Criston mōrøb melab lataitøweingue.

6 Marøppe, nōmba ka tab kōrrømisrtraptø marmumig kōn, nōm ñimun ke ashib pōnrrøbendø. Cristo karuindiig melabelø kōppe, Tius maig martrain kōben palabinøtø kōmō, tabig martrurmab isua maramig kōn.

7 Maramigwane ka palabino inchib, mōguelayasig marøb pōnrrermab isua marmōtø, marøppe, martrab isua Señorweyasig lataig maray.

8 Yandø ñimbe ashibelø kōn, karuindiig megabigwan lata, kabe mu karuimīg nuimbura uñibigwan lata, mōigwandøgucha chi tabig marigwan tru marimbura Señor nō tranrrab kui.

9 Inchen ñim karub pera kōbeløbe ñimui karuig mōrøb melabelane ñimguringucha tabig tōgaguy ‘yeegwane chigøben martrumøn’ chib, chineto chimōtø. Kaguende ñimbe ashibelø kōn, tru nōmun ashib karub pasrabig tru

Señortøwei ñimun ashib pasrabiibe srømbalasrø wabig kui. Kaguende Tiusbe møigwane purømisrøb, kandarøtø inchimíg køn.

Tiuswei uregwan kwaimandziiba chitøga kwayanrrai traniilø

10 Trube, mømbe yandø Señorweinuuba, nui maramburab marøb tøgagúig purø nuiguba kørrønrrabgaig mur pønrramisray.

11 Tius tru chitøga kwayanrrai kerrigu traniiløtøga tamara pønrramisray, nugwaimandzig purø may kegørrøsrkønrrab tamara pønsra kua kegørrøsrkønrrab inchen, maig kuingucha kørmø kwayawa, truyu puraambub ambamig kønrrai.

12 Kaguende nambe kwayab puraambub ambamibe yu pirau misag yaumbaig, animbaig, treeløba kwayamig kømøtø, tru nøm asha karubeløba, katø mugucha manchinrraingaig karubeløba, tru løstøyu nøm muba karumburab karub pønrrabeløba, tru kwaimandziimera larrø trømbøig marøbelø srømbalasrø pønrrabeløba, treeløba kwayamig køn.

13 Inchawei øyeeg købene, Tius chitøga kwayanrrai traniilane truigwane kerrigu tøga pønrray, kaig kwaløm pubene, kullaaramø pønrramig kønrrai, incha yandø øyeegwan kerrigu chab mara pønrramisrikkurrimbe kørrønrrabgaig mur pønrrønrrab.

14 Inchawei kørrønrrabgaig mur pønrray, tru newan cierton wamindiitøga pørønawa lataig. Trugurrimbe tru sølgandø tabig amønaitøgabe, tru pechoburab chinchimønrrai katabigwan kewa lataig pønrray.

15 Tiuswei tru tabig srø wam chi isumgaig tab købigwane waminchab amrrab muniitø pønrramig, srøbyu keetigwan lataitøwei tøga pønrray.

16 Kerrigu iilø kømnetø, tru isubigwan Jesucristoinuutø pasra pønrraigwane sølburramamønrrab katab srua pasraigwan lataig tøga pønrray, tru nugwaimandzig flechameran piløga petiilø, chigurrimbunø amrrubigwan kweetsamig kønrrai.

17 Katø tru kaigyugurri wesraig kømig tøgagúigwane chinchimønrrai turyu petsig kan tsandøyon cascon lataig tøga pønrray. Espíritu Santoi espadane srua pønrray, trube Tiuswei wamwan.

18 Tiuswei Espíritu maig maringaruben, Tiusba waminday, chu urastøgucha ñim mumay køben Tiusba waminchib, miab indiiløyu. Isua ashiptø kuy, Tiuswan 'purugurra' cha miab, nui misaamerai mayeelayasig maikkucha pesannab kønrrab kømøtø.

19 Katø naimburabgucha Tiuswan 'purugurra' chib miarrunrrigay, na ke waminchab inchen, tru na maig tamelan nan tranrrai, tru Tiuswei tabig srø wam sørig pasrabigwan nebua ashchai chigucha chi kørig kuin kømø, wamindamig kønrrai.

20 Truigwan Jesucristo nø waminchib pasrab lataitøwei yu pirau nui wamwan na waminchib pasrønrrai pasrig kur. Katøgucha kailan keeri yau pasrar. Tiuswei wamwan na maig wamindamigwan chigucha kørmø wamindamig kønrrai Tiuswan miarrunrrigay.

'Ka amøñiguh' cha wamindig srabeilø

21 Trube, treeg købene, Tíquico, namui undaaraig nuneg, Señorwei maramigu chu uragucha tarømismø, chi maramelan nø asha marøb megabiibe, na maig tsuigwanba, katø na chi marøb megaigwanba, kerriguba ñimun eshkanrrab wam srua inrrun.

22 Nabe nune truweiwei ørar, nam mandø melaigwan ñimun wammørøsrønrraimba, ñim truba tab kui mørøb kørrømisrtraimba.

²³Tius Møskaweinukkurrimba, Señor Jesucristoinukkurrimba tru ambugurri igurri tab købig arrubigwan nunelan tranrrai inchar, undag købig tru isubigwan Jesucristoinuutø pasra tøgagúigwanbañau.

²⁴Tiuswei tru ka yandø tab indiibe tru namui Señor Jesucriston undaaramigwane managucha patsønrraingaig undaarabelø mayeeløba pasrønrrun.

Filipenses

Pablo kailan keeri yaugurri Filipos iglesian pørøb

1 Pabloba, Timoteoba Señor Cristo Jesúsweimburabigwan marøb melabelø Cristo Jesúskurri Tiuswei misaamera mayeelø Filipos ciudarsø warabelan pørar, tru Tiusweimburabelan ashib pera pønrrabelanba, Tiuswei yau puru-gunrrai wesrawa pønrsailanbañau.

2 Namui Tius Møskaweimba, Señor Jesucristoimba tru ka yandø tab indig-wanba, chi isumgaig tab købigwanba ñim tøgagønrrai inder.

Pablo Tiuswei ureemerayasiq Tiuswan 'purugurra' cha miab

3 Na ñimun isuimørig nai Tiuswan 'mayanguen ungwa, ungwa' chib,

4 chu uraskucha na Tiusba wamindimørig ñim mayeelaimbura kasraatø miabig kur,

5 kaguende ñimbe tru Tiuswei tabig srø wam tabigweimburabigu srø pøbasrøb kwalømgurri moin kwalømgatig lincha marøb melabeløgurri.

6 Nabe iigwan treegwein kønrrab kui asha indig køn: ñimuinug tabig marøb pøbasrøbiibe Jesucristo arrum kwalømgatig ñimune newanelø kønrrai tamarøb pasrønrrab kui.

7 Ñim mayeelaimbura na øyamay isumig søl køn. Kaguende nabe ñimune nai manrraube tøgä pasrabig kur. Na kailan keeri yau pasraigu lata, mui merraptøgücha Tiuswei tabig srø wamwan purømisrøb, maig kui ashchai 'øyeeg køn' chib, waminchib pasraigu lata, Tius tru ka yandø tab indigwane ñimbe naba tøgatø utab køn.

8 Inchawei Tiusbe asha pasran, na ñimun mayeelan pesannamø, truba truba isubig kuigwan Señor Jesucristoi undag købiitøgä.

9 Inchawei na Tiusba waminchippe, ñimui undag købiibe katøguchinguen katøguchinguen nurab inrraimba, katø purø nu nebua ashib kusreb amr-raimba, maig køb arrubigwan tøgandø nebua ashib amrraimba miabig kur.

10 Chiwan mas tabig kui nebua ashibelø misra, kaig marig chigar chishelø 'ñibe øyeeg kalø mara pasran' tainab pønrramig chigar kønrrai, Jesucristo katø arrub kwaløm.

11 Jesucristoinukkurri arrubig tru tabig sølgandø marig, treeg ellmarig arrubiitø netsaim pønrrønrrai inchar, Tiusweyasig maya nuguen tab indig kønrraimba, purø tabig wamindig kønrraimba.

Na øsig unamibe Cristo køn

12 Nai nunelø, nan chi pub arrubiibe, Tiuswei tabig srø wamweimburappe masken purugubguen inchib arrin kui, ñim wammøra kønrrai inchar.

13 Inchawei tru palaciøyu suldaamera lata, katø maya misaamera lata, kailan keeri yau na pasrappe, Cristogurri keerim pasrai asha køn.

14 Inchen nan treeg pasrønrrai keerikkurri, nai nuneløbe, kerrigu lutauba, chigücha kullaaramø pønrramisra, Tiuswei wamwan chigücha chi kørmø waminchibelø køn.

15 Pøs ka isatø kømø, møiløbe Cristoimbura bigwan eshka b waminchippe, pusrkwai ashib tsalø køppah, ka kwayam lag køppatø marøbelø køn. Trune kaneløbe tabig isua, marammay maran.

16 Incha iiløbe Cristoimburab eshkaab waminchippe, undaguelø isuar kua waminchibelø køn, Tiuswei tabig srø wamwan waminchib purømisrøb pasrønrrai, nan pasrig kui asha.

17 Trune tru kaneløbe Cristoimburab eshkaab waminchippe, ka kwayam lag køptø maran, tabigwan isua kømøtø, ka indzaashig køptørre marøbelø køn, kailan keeri yau na pasramnebe katøguchinguen isuim pasrønrrai martrab isua.

18 ¡Inchendø chigúin kønrrautah! Ka isatø inchib Cristoimburabigwan ka wamincha møri lata, kabe cierton wamindi lata, pøs mumaytøgucha Cristoimburab waminchib, kusrenanene, nane kasrag køtan. Incha nabe katøgucha kasraarabig kasraaramønrrun,

19 ñim Tiuswan nayasig miab melaikkurrimba, Jesucristoi Espíritu nan purugúikkurrimba, øyeeg pub arrubiibe na øyeeg keerig pasraigugurri wesraig kømig punrrab kui, nabe asha pasrar.

20 Chiyugucha na chi kørig misrmø purayamuitamab isua pasraig, treeg punrrab kui, masken chi kullag isumøtø, møi lata, chu urastøgucha, Cristobe nai asru purø nuig marøb tabig wamindig kønrrun, na øsig pasrai lata, kabe na kwaimbala lata.

21 Kaguende naimbe øsig unamibe Cristo køben, kwamibe maya nuguen tabig tøgag køn.

22 Inchen na asru øsig uniibe, Tiuswei marameløyube tsabøtø truba nørø kønrrai maramdiig kønrrautan. Trube, ¿nabe møigwan merrarrowa pasramisrtrab køh? Pøs mandøguen kømøtan.

23 Inchawei nabe mumay yam kuinguen mørmøwa pasrar. Nane yugurri webya, Cristoba wanrrab yainrrabna køtan. Kaguene trumaybe naimbe masken tab kønrrautan.

24 Inchendø na øsig pasramibe katøguchinguen tab kønrrab køn ñimuimburappe.

25 Inchawei øyeeg kønrrab kui ashabe, chiguen kømøtø, ñimba unamuitamab isur, ñim mayeeløba kørrømisrtrab, katøguchinguen katøguchinguen nebua asamigwan ñim nebua ashib, isubigwan Jesucristoinug pasra tøgagúigwan kasrag tøga pønrramig kønrrai.

26 Ñim naimburab Cristo Jesúsweinug maya nuguen tab kui pønrramig punrrai, na ñimui utu katøle arrua pasraikkurri.

Jesucristoi srø wam tabig maig chibig køben treeg marøb amønamiig køn

27 Jesucristoi srø wam tabig maig køben, trumay treeg amønamiirre mas palan, na ñimun ashchab arri lata, ashchab arrumui lata, ñimbe masken kanbalatø ke tab pønrramisra, tru isubigwan Cristoinuutø tøga pasra pønrramig Tiuswei srø wam tabigweimburappe, ñimbe kanbalatø mayeeløba ke kandø isub truba truba marøb køn tai wammørinrrabna køtan.

28 Katø ñimun ashig kømui inchibelø 'chigøben martrumøn' cha, kwaarøsrø tøgagúilø kømøweingue. Tru ñim truilø kwaarøsrøimig pønrraibe nòmuyasiibe managatig pinønrrab ambamnuumay amrrab pønrrain kui asamig kenamisren, trune ñimbe truyugurri wesrailø pønrrain kui asamig kenamisran. Inchen iibe Tiusweinukkurri arrubig køn.

29 Pøs ñimune Cristogurri øyeekkatig tabig pønrrønrrai marøppe, nun ka kørewatø pønrrønrrai marmøtø, nuimburab chinetø nebuig melamiig kønrraingucha marig kuig køn.

30 Nan maig kaig nebub arri asigutøwei ñimgucha melan. Katø møi ya nan øyeeg kaig puig pasraigwangucha ñimbe wammøra køn.

2

Jesucristo maig kuigwan nam asha kusremig

1 Inchawei ñim Cristoinug kanbalatø pønrraikkurri kuñab purugumig tøgagøb, nui undag købig chi isumig kaanrrai marøbig tøgagøb, Espiritu Santogurri kanguelarrøtø lincha pønrramig tøgagøb, ñim larrø tab inchibelø, trurrigu lastima ashibelø kømigwan ñim tøgagøb indig købene,

2 trube, nai kasrag købig palabigwan ñim nemartrunrrigay, mayeeløba kandø isub, undag købigwan mayeeløba trunundøwei tøgagøb, kandø lataig pønrrab, kandø lataig isub tøgagøb indiitøga.

3 Chiyutøgucha ke nøtø kønrrab inchimøwei, purø nuig kømmørø inchib marøb kønrrab kømøwein kømig køn. Masken treeg kømøtø, larrø tammayig, katøganelane ñim lataitøguen kømø, katøguchinguen nørreelø kønmba asha tøgagømig køn.

4 Møitøgucha ke nømuimburabigwandø tab kønrrai marøb kebammøtø, katøganelayasikkucha tab kønrrai maramig køn.

Cristobe managuen nuig misrmøtø, masken lamíig misrig

5 Cristo Jesús maig isubig købig køben, ñimgucha treetøwei isubelø kømig køn:

6 Nøbe trendø Tius købendø, nø treeg kuagucha,

Tiusba lataig kønrrab inchimuig køn, treeg kurmaptø elachimønrrab.

7 Masken treeg inchimøtø,

nø treeg kuigwane mendamara pasrøb,

kan karuindiig megabig lataig kønrrab treeg misra,

møguelø mailø køben treetøwein kørromisra,

8 yandø møg lataitøwei misra pasrøwabe,

nuig kurmab inchimøtø,

nøasiitø chigucha kómíig lataig misra,

maig taigwan mørøbig køptø,

kwamnægatig maig taigwan marig køn,

trurrigu kurusyu mesraig kwamig.

9 Inchawei treekkurri Tiusbe nune purø nuig kønrrai mara,

maya munchimeraim pala, nui munchiwane mu kui nebua asig kønrrai tranig køn,

10 Jesúswei munchiwan wamindi møra, mutøgucha tømboñsramig kønrrai,

srømbalasrøm pønrrabelø lata, yu piraelø lata, pirø umbuelø lata.

11 Mu misaameratøgucha Jesucristobe Señor tru Mayeelaim Pala Nø Ashib

Pasrabig køn chib waminchain kuig køn,

Tius Møskawan maya nuguen tab indig kønrrai.

Tiuswei ureemerabe yu pirau kan tøm latailø kømig køn

12 Inchawei ñim nai undaarailø, na ñimba pasrøben, chu uratøgucha mørøb melabelø, na mõi ñimba pasrømubene, katøguchinguen mørøb melabeløbe, kaigyugurri wesruigwan ñim tøga pønrraigu nørørabig nørøranrrab marøb ambay, køriibala, purø isuptø.

13 Kaguende Tius, nø køn, tru maramigwan martrab isunrraimba, katø marøbelø kønrrai ñimuinug tranøb inchibiibe, tru nø maig martrab isuigwan treeg marig kønrrai.

14 Chiwandøgucha marøppe, ñimuinetø chinetø chib mulla mørmøwei, chinetø aleguiyab pønrrømøtø maray.

15 Møgøben ñimun 'ñibe øyeeg køn' tainab pønrrømeeelø, kørøteelø, misaam-era larrø minchar, purø kaig misaamerai utu, ñimbe Tiuswei ureemera

chigucha kaig mara chillig inchar komeelø, ñimbe truilai utube yu pirau pala pilab pørrabelø latailø kuy,

¹⁶ Tiuswei wam øsig kømig tranøbigwane elatchab kømø, tab tøgä pørrabelø. Treekkurrimbe Cristo katø arrub kwaløm truba truba tab kui pasramig kønrrautan nane, na larrø muraaraig pasrønrrab luløb lataitøwei, na truba muraaraig marøb megaibe ka yandiig kørørmisrmøwei inchen.

¹⁷ Ñimui isubigwan ñim Jesucristoinuutø pasra tøgäguikkurri marøb kuibe kan animal kweecha Tiuswan keta tranøb lataig marøb tøgäguig køben, trubala na øsig kuigwan itølusig kønrrai tranamig nebuingen mayanguen tab kuimørøb tranamønrrun, ñim mayeeløba mayanguen kasraarab.

¹⁸ Inchawei ñimgucha treetøwei mayanguen tab kui mørøb, naba mayanguen kasraaray.

Timoteoba, Epafroditoba

¹⁹ Señor Jesús treeg kønrrain købene, Timoteowan petø ørtrab isur, ñimuisrøngurri wam srua arruben nagucha ñim maig waraigwan wammørabe, katøle tab kuimørøb wamig kønrrai.

²⁰ Pøs katøgan mungen nø lataibe tøgägømur, ñimuimburab tab kønrrai inchib, treegwan martrab truba truba isubig, trurriugu ka isatø inchib pasrømig.

²¹ Kaguende mayeeløba nømuimburab tabig pub attraingøba labelø køn, Cristoimburab tab kønrrain kømøtø.

²² Pøs ñimbe Timoteowane yandø mu kui ashibelø køn, kan nusrkai møskawan lataitøwei Tiuswei tabig srø wamwan wamindamigu naba marøb pasrabig køn.

²³ Inchawei yu naimburab chi pub arrubig maig kørørmisri ashabe, nun ørtrab isur.

²⁴ Inchendø nagucha naashib ñimun ashchab peba arrumigwan isua tøgä pasrar, Tius naba pasraikkurrimbe.

²⁵ Treeg kuindøgucha namui nuneg Epafroditon ñimuimay katøle øramig truba palai ashar, maramigu nan purugub, kan suldau lataitøwei tru maramigu naba lincha megabig, katø ñimuisrøngurri naimay wam srua arrubig, na chi palai megaben nan ashchai ñim ørigwandøwei.

²⁶ Nøbe ñimune asinrrabna kui truba isui inchib unig kuig køn, kaguende nø kwanrø tsuin kui ñimbe wammøra kuimba trurrewi isub.

²⁷ Isa kømøtø, yandø ke kwamdø palabig tsubwei indig kuig køn. Inchendø Tiusbe Epafroditon lastima asig køn. Katø nundø kømøtø, nangucha lastima asig køn, na yeeg isuig megamne, srøitø srøitø isuig megamig arrumønrrai.

²⁸ Inchawei nabe nune mas peba ørtrab isur, ñim katøle Epafroditon ashabe truba kasraaraben, na chi isumø tab wamig kønrrai.

²⁹ Señorgurri nune truba kasraatø utay. Katø Epafrodito lataitøwei melab møguelane truba tab inchib tøgägømig køn.

³⁰ Kaguende Cristoi maramelan marøb megaikkurri nøbe yandø ke patsønrraptiig tsuig kuig køn, ñim ñimashib trugatig nan purugunrrab kaimailøyu kwam lab nøguen purugub.

3

Ka namuimburab isuitøgatø Tiuswan nebunrrab inchimumig

¹ Møimbe trube, nai nunelø, Señorweinug truba kasraaray. Nane chigucha chi pesriig kømøtan, na ñimun pørigwan katøle trunundøwei pøramibe, øyamaye ñimuingen chi isub kørørmisramig kaanrrai tabguen køn.

² Tru wera lataig inchib misaamera, chi tabigwan kōmō, kaigwan marōb amōñibelō, tru asrwan parōb mindishibelan ñimbe purō ashiptō kuy.

³ Kaguende tru treeg circuncidailōbe nam ker, Tiuswei Espiritutōga kōriibala tabig waminchibelō, Cristo Jesúsweinug purō tab kui mōrōb kas-rarabelō, asru chi mariitōga 'ōyangurrimbesin' chib pōnrrōmeelō.

⁴ Kaguende naimburabgucha asru treeg mariitōga 'ōyangurrimbesin' chib pasramig tōgagur. Pōs asru treeg mariitōga 'ōyangurrimbesin' chib mōg inchib pasrōnrraptiig mube kōbwei inditarru kōben, nabesi katōguchinguen 'treeg kur' tamig tōgagur.

⁵ Naneguende kal-laig trune kwalōmyube circuncidaig kōbig kōn. Nabe katō israelitasmerai misagugurri arrubig, tru Benjaminwei misag karra-bigugurri arrubig kōb, hebreo, trendō hebreomerai anin nusrkain kōb, katō tru maig maramigwan martrai Moisés pōrig maig chibig kōben trunin purab punōmō marōb pasrabig, katōgucha fariseo kōbig kur.

⁶ Inchen na maig chull isuijwan ke chinchimmōrō inchib maramibe, tru iglesiayuelan kaig maramig naimbe truig kōbig kōn. Inchen tru maig maramigwan martrai Moisés pōrig maig chibig kōben truigwan na sōlgandō tabig kuigube 'kalō maran' chib muguen chi tainamō mōg kōbig kur.

⁷ Merrappe ōyeelōbe naimbe truba truba nōrriig tabig kōbig kuig, Criston nebua asikkurrimbe mōimbe truilōbe chigucha kōmfiig kōbig kuin kui mara tōgagur.

⁸ Inchagucha treetōguen kōmō, Cristo Jesús nai Señorwan na nebua asiibe, kan chibaguen ōyeeg kōn cha, kemesra eshkamgaig purō nuig purab tabig kōben, tru na tōgagūigwane chigucha kōmeelō mara tōgagur. Inchawei nōgurri nabe kerrigu trunune chi asamig kaanrrai, wendōbasra ōyeegwane chigucha kōmfiig kan kōsōngōmdō shau lataig mara tōgagur, Criston na nebua tōga pasramisra,

⁹ nuinug na pasramig kōnrrai. Tru na naashib tabig sōlgandō marōb taig tru maig maramigwan martrai pōrigugurri arrubiitōga inchimōtō, tru isubigwan Jesucristoinuutō pasra tōgagūikkurri arrubigwan tōgagōnrrab inchar, tru tabig sōlgandō marig Tiusweinukkurriigwan.

¹⁰ Nane Criston mas nebua ashib, nō kwawa, katōle ōsiiranrrai maram-burab marōbigwan nebua ashib indinrrabna kōtan, katō nō chine isumdiig puinab megamigu treetōwei puinab megawa, kwamigugucha nō lataitōwein kōmig nebuben,

¹¹ nagucha mumay kōben kwailai utugurri ōsiirawa kurramigwan nebua tōgagōmig kōnrrai.

Nabe tru pumsrō pumigwandō asha yar

¹² Nabe ōyeeg chippe, 'kerrigu newan yandō nebua tōga pasar' cha, kabe 'yandō chigucha palōmfiig newan tabig kur' cha trenchimur. Inchendō nabe ibig ibig yamōnrrun tru nebumigwan nebuinatashchab, kaguende Cristo Jesús nōmerrig nan nebua tōga pasramisrig kōbig kōn.

¹³ Nai nunelō, kabe nabe 'iigwan yandō nebuaguen pasar' chimur. Inchendō nabe iigwan marinabig kōn: yandō wendau kōrrōmisrōb arrubig-wane pesannawa, nai pumsrō pumigwan neburrab tranrab megar.

¹⁴ Incha nabe chu pumsrō pumigwan punrrab isua lulōb megar, tru lulimburo na kanaigwan utamig kōnrrai, tru treegwan utamig kōnrraiwei Tius nan Cristo Jesús kurri srōmbalasarōmay wamisrōmay.

15 Nam mayeeløba Tiusweimburabeløyu newan nørørawarbe øyamay isumig køn. Inchen ñim chigøben peemay isua kuin købene, trube, Tiusbe ñimune trunungucha tømarrøb kenamartrun.

16 Inchen nam yandø nebua tøga pønrramisrigwane truig maig køben trunun tarømisrmø, amøñibig amøñigun.

17 Nai nunelø, na maig uñibig køben, treetøwei amøñib, katø nam maig amøñibelø køben treetøwei amøñibelane asha kuy.

18 Nabe møindø kømøtø, ñimune katøle, katøle eshkaig kuig køn, møimbe kappin kørrøgøbguen eshkar, Cristo kurusyu kwaigwan tsaleelø ashig kømui inchibelø truba nu amønaimba.

19 Nømuimbe pønrrønrrab ambamibe, pinab pinønrrab ambamsrømay ambamig pasran. Nømuimbe mab muchib waramibe kan tius lataig køben, kørikken kønrraptiig mariitøga nømbe purø nørreelø misrøb pønrrabelø, nømbe ka yu pirauigwandø isua pønrrabelø køn.

20 Trune tru nam purramibe srømbalasarøn køn, tru Kaigyugurri Wesrabig, Señor Jesucristo, trusrøngurri tru nø arrumigwan nam truba truba munig melaig nø waisrø.

21 Nøbe namui asr trengatig kømíigwan peemayelø kønrrai yunømara, nui asr tørguegwalmabig lataitøwein kønrrai martrun, tru chiwandøgucha nø ashib karub wamig kønrrai tru nui maramburab marøbig truitøga.

4

1 Inchawei, nai nunelø, truba undaarailø, na truba asinrrabna kui inchib isub unilø, ñimgurri na truba kasrag kui indiilø, katø ñimbe naimbe kan corona lataig tøgagüilø, øyeetø Señorweinug tarømisrmø melabig melønrrigay.

'Øyeeg melønrrigay' chib wamindiilø

2 Evodianba, Síntiquenba Cristogurri numøsralan peg peg isub pønrrømtø, Señorgurri kandø isua pønrrørrunrrigay chinrrab inchar.

3 Katø nai maramigu elachimø maram purugub megabigwan ñungucha purugurrunrrig chinrrab inchar, tru iig ishumburmeran ñui nuchalan, na Tiuswei tabig srø wamwan waminchib uñen, nømbe nai mendig lata tranrrab lincha lírab melaig købig køn, katø Clemente køben, katøganelø naba lincha marøb melabelø købengue. Truilai munchimerabe tru managatig øsig purrønrrabelai munchimeran pøri libroyu pørig pønrran.

4 ¡Chu uraskucha Señorba pønrraikkurri kasraaray! Katøyug trendamønrrun: ¡Kasraaray! cha.

5 Ñimbe truba tab inchibelø kuigwane mayeelø nebua asig kønrrai inday. Señor arrumibe lutau køn.

6 Ke ka yandø chinsraatø inchib, ke chab pureb kui lataig inchimøtay. Masken treeg inchimøtø, chiyutøgucha Tiuswei merrab, 'øyeeg palai meler' chib, nøba waminchib, 'øyeeg purugurrunrrig' chib miamig køn, trurrigu 'ungwa, ungwa' chib.

7 Inchen Tius tru chi isumgaig tab købig chi isulan purab nuibe tru ñimui manrrømeranba, ñimui turyu isubigwanba Cristo Jesúsweinug pønrrønrrai tøga pasrønrrun.

8 Trube, møimbe yandø, ñim nai undaarailø, chiyutøgucha ciertonigwanba, chiyutøgucha maig købash inchimumigwanba, chiyutøgucha sølgandø tabigwanba, chiyutøgucha newan tabig chishigwanba, chiyutøgucha larrø tammayig kømigwanba, chiyutøgucha yeeg tabig kønrrab chib wamindigwanba

isumig kòn. Katø chigøben purø tabig tøgagüin kui, kabe tabig wamindig kønrraptiig treeg købene, trunungucha, trube, tōga isuy.

⁹ Na chigurrimbunø kusrenaniilanba, na chi marigwan ñim uta, na maig kuigwan, na maig mariilan ñim ashib, ñim mørøb indiilanba, ilane marøb ambamig kòn. Inchen Tius tru chi isumgaig tab købiibe ñimba pasrønrrun.

Filipossrø Cristogurri nunelø Pabloyasig an purugüig

¹⁰ Nabe Señorweinug truba kasraarar, ñim katøle nan isunrrab indin køben. Pøs ñimbe isuppe, isubwei inchendø, tru øyeeg maramibe pumø srø kuig kuinrrun.

¹¹ Nabe øyeeg chippe, palain pasraptø trenchimur. Kaguende nabe nan maig pub arrindøgucha treegu kasraatø purayam kusrewa kur.

¹² Chi palain pasramig maig kui mørøb, chigucha palømø uncha tōga pasramig maig kuig mørøb inchibig kur. Maig pub arrindøgucha kerrigu treegu purayamigwan kusreweig kur: patsau chi palønrraingaug tōga wamig nebui lata, parø purayamig nebui lata, uncha tōga wamig nebui lata, chuguringuen kømui wamig nebui lata.

¹³ Cristo naba pasrøbene, chiwandøgucha kaimamø maramønrrun, kaguende nø nan purugub pasraikkurri.

¹⁴ Inchendøgucha na truba isui megaben, ñimgucha treetøwei lata naimburab isub purugub melaibe mayanguen tabig kòn.

¹⁵ Katø ñim filipossreelø isua kuinrrun, Tiuswei tabig srø wam ke srø kebyaindø køben, tru Macedoniasrøngurri na yandø inrrab inchen, mu katøgan iglesiabe purugumuben, ñimbeguende nan an purugub, nagurri purugüigwan utab indamig kønrrai marig købig kòn.

¹⁶ Incha trutø kømøtø, na Tesalónicasrø uñenguen, ñimbe pamayguen purugua ørig købig kòn, nai chi palabøløyu nan purugunrrab.

¹⁷ Kabe ñim nan ke ka tranrraindø isua trenchimøtø, tru ñim mariiløbe katøguchinguen ñimuindøwei nurab inrraimab isua trenchar.

¹⁸ Inchendø nabe chi palabigwan kerriguh uta tøgagur, unchaguengue. Tru ñim nan keta trana øriilø Epafrodito srua arrua traniløbabe, ¡katø! chigucha palømøzhig tøgagur. Tru ñim keta traniibe kan animal kweecha Tiuswan tranig, purø may irrabzhig lataig kòn, Tius truba truba tabig kui asha utamdiig.

¹⁹ Inchawei nai Tiusbe ñimune chi palabigwan lutøgurrih tranrrun, nui tru chigurrimbunø chigucha palømíig tørguegwalmabigu maya købigwan Cristo Jesúsukurri.

²⁰ Namui Tius Møskawan managatig tørguegwalmabig kønrrun. Treeg kønrrun.

Wamindiilø srabeig

²¹ Cristo Jesúsukurri Tiuswei misaamera mayeelanba ‘ka amøñigueh’ chirrunrrig. Katø namui nunelø naba amøñibelø chigucha ‘ka amøñigueh’ cha øran.

²² Katø Tiuswei misaamera katøganeløgucha ñimun ‘ka amøñigueh’ cha øran, trugurri katø mas ‘ka amøñigueh’ cha øøppe, tru Roma maya misagwan ashib karub wabig Césarwei yau purrabelø, truilø øran.

²³ Namui Señor Jesucristoi ka yandø tab indiibe ñim mayeeløba pasrønrrun. Treeg kønrrun.

Colosenses

Pablo 'ka amõñiqueh' chib pørig

¹ Tius trendø treeg kønrrain køben na Pablo Jesucristo nøashib karua ørig nai nuneg Timoteoba misra, i kilgawan pørar,

² ñim Tiuswei misaamera chu uragucha tarømismø melab nunelø Cristo Jesúsba kanbalatø pønrrabelø Colosassrø warabelan. Namui Møskai Tiuswei ka yandø tab indiiba, chi isumgaig tab kõiiba ñimba kønrrai inchar.

Pablo Tiuswan 'ungwa, ungwa' chib

³ Chu uraskucha nambe ñimuyasig Tiusba waminchippe, nun 'ungwa, ungwa' chibelø ker Señor Jesucristoi Møskawan.

⁴ Kaguende ñim ñimui isubigwan Cristo Jesúsweinug pasra tøgagúigwanba, katø Tiuswei misaameran mayamba ñimbe truba undaguelø kuigwanba wammører,

⁵ tru ñimuyasig srømbalarø esegaig pasrabigwan ñim muniirabelø kuikkurri treeg kuigwan. Truigwane Tiuswei tabig srø wam newan ciertonigwan waminchen, ñimbe mørig købig køn,

⁶ tru ñimuisrø kebiben. Inchawei yu pirau chutøgucha tru tabig srø wambe truba nurab, kan yell larrøbichib ib lataitøwei, ñimui utugucha treetøwei larrøbichib arrun, tru ñim Tiuswei wamwan mørøb, katø Tiuswei tru ka yandø tab indigwan maig kuigwan ñim tab chigúii mørøb indin kwalømgurribunø.

⁷ Epafra maig kusrenanig køben, trunun ñim kusreig køn. Truibe namui undaaraig, tru marameløyu namba lincha marøb megabig, Cristoiwan maizhikken elachimø, ñimuyasig tab kønrrai marøb megabig køn.

⁸ Katø, Espiritu Santogurri ñim undag købig tøgagúigwan nøgucha namun eshkatan.

⁹ Incha treekkurri namgucha trunun wammørin kwalømgurribunø chu urastøgucha ñimuyasig elachimø, Tiusba waminchib miabelø ker, Tius tru nø maig martraí palai waigwan ñim nebua asamburab nebua ashibelø kønrrai Tiusweimburabigu, newan nebua asamig kusreitøgaba, katø tab chigúii møriitøgaba.

¹⁰ Amõñippe, Señorweyelø kui asamdeelø amõñinrrai miabelø ker, chiyutøgucha nø tab kui mørøb wamig kønrrai marøbelø, ñimui chigøben tabig mariiløbe, yell larrøbichib ib, katø Tiusweimburabigwan nebua asamigu nørørab ambamig kønrrai.

¹¹ Nui mayanguen tabig maramburab marig kerrigu maya tøgagúig, truitøga kullaaramø, ka melamig kønrrai martraí miabelø ker, maig pub arindøgucha mur isua melaptø melamigweyasiiba, maig indindøgucha tamay melabig melamigweyasiiba.

¹² Tius Møskawan 'maya nuguen kasraatø ungwa' tay, tru nø ashib karub waisrø tørguegwalmabnug nui misaamera ketig utamigwan ñim tøgatø utønrrabelø kønrrai tamara pønsraigwan.

¹³ Kaguende nugwaimandzig løstiigu nø karub pasrabigugurri Tiusbe wesrawa, namune nui undaaraig Nusrkai nø ashib karub waisrø purøørig køn.

¹⁴ Nø nuielø kønrrai nambe kaigyugurri wesrailø ker, namui kaig mariilan yandø pesannab chi ulø payimeelø.

Cristo tru chiwandøgucha purab nuig

15 Tius, tru namui kaptøgabe asiimígwán øyeeɡ kuitamab asamig, Cristobe truiɡ køn, chigurrimbunø pønrrabigwan marmøwatøsrøwei tru srøsrø nømerrig pasrabig.

16 Kaguende Tiusbe Nusrkaingurri mara pønraig køn tru srømbalasø chi købigwan lata, pirau chi købigwan lata, kaptøga asigwan lata, asiimígwán lata, reymera purramisra karub purraigwan lata, kerriguwan nøm merrarrawa karuigwan lata, katø nøm asha karuigwan lata, katø mugucha manchinrraingaiɡ karuigwan lata, kerriguba nøɡurri mara pønraig køn, trurriɡu nuyasiɡ kønrrai.

17 Nøbe chiwangucha marig kaabenbatøsrøwei manawei købig kua, chigurrimbunø pønrrabiibe pinømø, nøɡurri pønrrabig pønrran.

18 Inchagucha nøbe asrwei tru tur køn, tru iglesiai. Nusrkaimbe manawei nømerrig købig, kwailai utugurri katø nømerrig øsiiraig køn, chiyutøgucha nø purab nuig kømig kønrrai.

19 Kaguende Møskawane mayanguen tabig asønaiɡ køn, nø maya nu kømburab kuigwan Nusrkaweinuɡ pasrønrrai pasramig.

20 Incha nui Nusrkaingurri Tiusbe pirau chigurrimbunø købigwan lata, srømbalasø chi købigwan lata katøle nøba katø tab kørømisrtraí martrab isuiɡ køn, nui Nusrkai kuruyu kwawa ani lusiitøga ambugurri igurri tab kønrrai marøb.

21 Pøs ñimbe merrabsrømbe Tiusweinukkurrimbe nøøø pønrrabelø tarømisrar, ñimui isubigwane ke kaiɡ marameløyugøba pasra tøgar kua, Tiuswane ashig kømui inchibelø købig køn.

22 Treeg købig kuigwan mømibe katøle ñim nøba tab kørømisrtraí kørømarig køn, Nusrkai nui asru kwaitøga nui merrab tabigweindø tarømariilø, kaiɡ mariitøga chillig incha kømeeleø, ñimbe øyeeɡ køn tainanrrabgailø pønrramig kønrrai martrab.

23 Pøs øyeeɡ kønrraimbe, tru isubigwan ñim Cristoinuutø pasra tøgagúigu truyutø pønrrabig pønrrab, katø mumaygucha kørønrabgailø tru Tiuswei tabig srø wamwan ñim møriɡu tru munig melaig pasrabigugurri tarømismø, melabig meløwabe kønrrun. Tru srø wamwane yu pirau maya misaameran mundøgucha eshka b kusrenanig køn. Inchen na Pablobe tru wamwan waminchib meɡanrrai pasrig kur.

Pablo Tiuswei tabig srø wamwan waminchai wesrawa pasrig

24 Na ñimuimburab chine kaiɡ nebuinab meɡaigwan mømibe nane kasrag køtan, Cristo nui asr, tru iglesiayasig chine kaiɡ nebuinab meɡaigu tru palabigwan nai asrutøwei kaiɡ indinab meɡaitøga nemarøb ya.

25 Nabe tru mayeelø nun kørebelayasig tru chiwandøgucha marøb meɡanrrai wesrawa pasrig kur, ñimuimburab tab kønrrai Tius nø karuig, nui wamwan maig kuigwan newan waminchib pasrønrrai,

26 tru manasrøngurri maya misagwan mungucha Tius kenamariimíɡ tøgagúigwan. Inchendø truiɡwane møí yasrømbe nui misaameran kenamaran.

27 Tru judíos kømø misaamerai utu tru mungucha kenamariimíɡ tøgagúigu tru tørguegwalmabigwei chigurrimbunø palømíɡ pønrrabigwan Tiusbe nømune asingarunrrab isuiɡ kuig køn. Truibe Cristo yandø ñimuinug pasraig, truiɡ køn, ñim munig melaig tørguegwalmabig.

²⁸ Nambe tru Criston eshka kusrenanøbelø ker, mundøgucha øyamay melønrrigay chib, kusrenanøb, maig kuigwan tab chigúi mørague, mu mis-aamerandøgucha Cristo Jesúsweinug newan tabig pønrrønrai Tiuswan kenamartrab.

²⁹ Treeg kønrraiwei na maya nebumburab truba truba mur tranrrab marøb megar, Cristoi maramburab marig tru nainug marøb pasrabiitøga.

2

¹ Pøs nabe ñimuimburappa, laodiceasreelaimburappa, katø mayeelø nan malaugue nebua ashmeelaimburappa, truba truba mur tranrrab marøb megaigwan ñim nebua asimbemab isutan.

² Undag købigu kanbalatø pønrramisra, nømui manrrømerayu tab kui mørøb kørromistrai inchib megabig kur, tru chigurrimbunø palømiig pasrabig tabigwan chigúi nebua mørøb ambamnegatig, tru mungucha kenamariimiig Tiuswei pasrabigwan ashmø kømø nebua ashchai, truike tru Criston.

³ Kaguende chigúi mørøb kusrebig kømiba, chigúi nebua asamiba, tru iig purø tabiibe kerriguba Cristoinuutø sørig pønrran.

⁴ Nabe øyeegwan øyeeg chippe, ñimun may wamincha kegørrøsrkømonrrai waminchar.

⁵ Nabe ñimui utu pasrømuingucha, nai isuigube ñimba pasrar, ñim maig købendiig kømø, maig amønamiigwan amønib, ñimui isubigwan Cristoinug pasra tøgagúigwane elachimø, tøga pønrrøben, nabe truigwan ashib, truba truba kasraarab.

Cristoba pønrraikkurri yandø chigucha iløsrkaig kømumig

⁶ Ñim Cristo Jesúswan ñimun nø asha karub pasrabig kui asha utamma, utig kuibe, nuinug treeg amønay,

⁷ umbusrø srøl keyatab lataitøwei, nuinug pølbasa kusrub marøb, ñimun maig kusrenanig køben, ñimui isubigwan Cristoinug pasra tøgagúigwane trumaytø tøgagøbig tøgagøb ambamigwan tøga, tru ungwa tamigwane katøguchinguen nuramburab nurab inrrai marøb.

⁸ Isua tab ashiptø melay, møguelø nørro kusreelø chi purugunrrabgailø ka kegørrøsrkamitø marøbiitøga, ñimun srua ambinab melønrrab kømø, tru kusreeløbe chi purugunrrabgailø, ka kegørrøsrkamitø marøbigwan. Truiløbe mis-aamera nøm merrabsrøngurri trendø isub amrruiløyugurrimba, katø chinetø yu pirau muba kuimburab mandø isua marøb kømig tøgagúiløyugurrimba arrubig køn, Cristoinug maig køben, treeg kømøtø.

⁹ Kaguen Tius maya nu nø kømburab kuibe, Cristoi asru pasran.

¹⁰ Inchawei ñimbe chigucha palømiig kerriguwan neilø pønrran, Cristoinube. Tru nøm asha karuigu lata, katø mugucha manchinrraingaig karuigu lata Cristobe nø pasrabig, chiyutøgucha nø asha karubig nø tur køn.

¹¹ Katø trendø trømbøig marøg kui inchib pasrabigwan ñimui asrugurri kerrab ñimbe nuinug mu kui asiilø kønrrai mariilø køn, tru møguelø tasiitøga asru circuncisiøn marig tøgagømøtø, tru mu kui ashchai kørromariibe Cristoinukkurri arrubiitøga.

¹² Ñimun piu umbu ulsrøben, Cristoba kegøtø søriilø lataig kuig køn. Incha tru piu umbu ulsraigurri kurrappe, ñimbe nøba kegøtø øsiirawa kurrig køn, Criston kwailai utugurri kusrubig Tiuswei maramburab marøbigu ñimui isubigwan truyu pasrikkurri.

13 Tru ñimui chigurrimbunø kaig mariiløyuba, ñimuinug trendø trømbøig marøg kui inçhib pasrabigwan kerrab tru asru circuncisiõnwan marøb lataitøwei chi mariimeelø ñim kwailø srø købenbatøwei, Tiusbe Cristoba kanbalatø øsig kømigwan ñimune tranig køn; namui kaig mariilan ulø paymø, kerriguwan pesannab.

14 Tru nam 'øyeeg, øyeeg ulø køn' cha kan kilgayu pøri lataitøwei købigwanba, katø tryutøwei 'øyeeg maramig køn' chib pøri latailø pønrrabigwanba, Criston tru kurusyu mesrøben tøgatø mesrøb lataig mara, Tiusbe chi asamig kaanrrai kerraig køn.

15 Incha katø tru kailø nøm asha karuigwanba, katø mugucha manch-inrraingaiç karuigwanba yandø truilane chigucha martrabgailø misrtrai kørømara, nømune mayeelø ashig kui ashçai marig køn, tru kurusyu kwawa, yandø nø kanawa pasramisra.

16 Inchawei chigøben mamimeran mutsamelan, chigøben fiesta marin kwalømmeran, srø pøl tsumisrin kwalømmeran, isrin kwalømmeran, øyeebe maig marøbelø køgue chib ñimun mugucha wamincha ashmønrrai maray.

17 Inchen øyeeg mariiløbe kerriguba tru wendøsrø attrabigwan øyeeg kønrrabig kuitamab asamig, iibe ka treetø køn. Inchen tru cierton maig kønrrabiibe, Cristo, nø køn.

18 Ñim ketig utamigwan mugøben utøbashmuinab pønrrønrrab kømø. Nømbe ka isatø, purø tabzhig misrøb, ánglesmeran køriibala tabig waminchib tømønrsrøb, truiløbe 'piab lataig kenamisrigu chigøben aser' chib wamin-damburab waminchib, nømui trendø kaig isub turyu ke purab nørreelø isumuinquenig isubelø køn,

19 tru asru Cristo turwane trag pulu trakkandø pønrrømøtø, ka nøørotø misra ambulub. Kaguen tru turwein køn, tru asr ørøba truba tabig chish-misrøb, katø asru truøø kønab pønrrabelanba, truyu ambulumay imay kandø kønrrai merrarrab srølmeranba asrwan kandø misrøb inrrai marøbiibe. Treebe Tius maig nurab inrrai inchen, trumay nurab yan.

Cristoba pønrraikkurri srøig peemay amønamiç tøgagøb

20 Tru chinetø marøb kømig yu pirau muba kuimburab mandø isua marøb kømig tøgagülan marøb kømønrrab, ñim Cristoba yandø kwawarbe, katøgucha yu pirauelø kua lata tru maig martrai wesrawa pønrsrailan, çchindimba tru kuindø marøb pønrrabelø køgue

21 tru øyeeg tailan: "Øigwane kusrawa ashmøta" tamba: "Iigwane mamøta" tamba: "Katøramøta" tamba indiilan?

22 Truiløbe ka katørab, srua kuinuutø pinønrrai mariilø køn, pøs øyeeg marameløbe møguelø nøm karua pønrsrailøygurrimbah, katø nøm isua kusrenanigugurrimbato arrubig kua.

23 Inchawei øyeelan marøb kuibe, ciertonwei purø may isua mari latailø asønana, tru nøm Tiuswan yangucha isub chib pønrraiba, chigucha kømeelø misrøb pønrraiba, nømui asrwardøweinguen murigu puraambingarub pønrraibabe. Inchendø tru nøm øyeeg marøb pønrrailøbe nømui asru tru kaig marøg købig arrubigwan kerramibe chiweingucha chi purugumüig køn.

3

1 Inchawei yandø ñimbe Cristoba øsiirawar kuig køppe, ñimbe srømbalasriigwan lamig køn, Cristo tru Tiuswei kusrmay waisreelan.

2 Ñimbe isuppe, srømbalasreelan isuy, yu pirauelan kømøtø.

³ Kaguende ñimbe yandø kwaig latailø kua, møyimbe ñimui øsig kømibe Cristoba Tiusweinug søra tøgagúig pønrran.

⁴ Inchen Cristo tru ñim øsig pønrraig kenamisrene, ñimgucha nõba torguegwalmabigu tøgatø kenamisrtrun.

Møin kwaløm amønaibe merrabsrø amønaig lataig kømøn

⁵ Inchawei ñim trendø kaig marøb kuig yu pirauig ñimuinug pasrabigwane patsøga pasray: ishuuba, møøba trømbøig kaig maramelanba, køsongønrraptiig maramelanba, ke chinsraatø inçhib trømbøig marøg købigwanba, chigøben kaig maramig isumelanba, parø indamigwanba (tru parø indiibe tius mara tøgagúi lataig køn).

⁶ Øyeelan marikkurriwei tru mørmeelaim pala arrubig køn Tiuswei namig købijbe.

⁷ Ñimgucha merrabsrømbe øyeelandøwei marøb amøñibelø købig køn.

⁸ Ñimbe møyimbe iilane kerriguh elatsay: trømbøig namig købig pasrabigwanba, ke chab srurrab namig købigwanba, katøganun kaig maramigwangøba isumigwanba, trømbøig wamamelanba, chine møramguengaig trømbøig wamamelanba elatsamig køn.

⁹ Ñimbe kanikkurri kanikkurri isa waminçhimøtay. Tru køllig ñim trendø kaigwan tøga kal-laig ñimui umbu pasrabigwan treetø treetø marøb tøgagúilanbañau ñimbe wesrua kutsig køn.

¹⁰ Incha ñimbe tru srøigwan kewa pønrran. Tius nõ marøbig maig køben treetøwein kønrrai marigwan, tru srøibe kerriguwan tab nebua asamnegatig srøitø srøitø yunømarøb arrun.

¹¹ Trube, møyimbe, griego køn tamig kawei, judío køn tamig kawei, asru circuncidaweig køn tamig kawei, circuncidaimiig køn tamig kawei, peg pirausriig køn tamig kawei, escitamera køn tamig kawei, karuindiig megabig køn tamig kawei, mu karuimiig nuimburab uñibig køn tamig kawein køn. Treeg kømøtø, Cristøbe chiyutøgucha kerriguwan nõtø køb, katø mayeelainug nõ pasran.

¹² Inchawei Tius lawa wesruilø, ñim newan tabig chishelø, trurrigu undaarailøbe iigwan kewa lataig pønrray: lastima ashibig kømigwan køben, larrø tab inçhibelø kømigwan køben, kørrøteelø kømigwan køben, larrø tammayig kømigwan køben, maig køben kuingucha tammay megabig kømigwan køben,

¹³ kanikkurri kanikkurri chigúingucha lata inçhimumigwan køben, mõkkøben 'øig øyeeg inndan' chib pønrramig tøgaguabe, kanikkurri kanikkurri chi ulø paymø, pesannab inçhibelø kømigwan købengue. Señor ñimun ulø paymø, mandø pesannaig køben, ñimbe treetøwei maray.

¹⁴ Inchen køben iilø kerrigu kømnetø tru palabø, undag købigwan itøguewa pønrramig køn, tru undag købiibe mumaytøgucha kanbalatø newan purø tabig pønrramig kønrrai marøbig køn.

¹⁵ Inchen Cristo tru chi isumgaig tab købiibe ñimui manrrau maig maramigwan nõ karub pasrønrrai inday. Kaguende ñim kan asrtø kuig køben, øyeegumay wamig køn. Ñimbe 'mayanguen ungwa, ungwa' chibelø kønrrigay.

¹⁶ Cristoi wambe ñimuinuube maya nu pasramburab pasrønrrai inday, purø tab isua asha, kanikkurri kanikkurri kusrenanøb 'øyeeg, øyeeg marøb melay' chib waminçhib. Tiuswan ñimui manrraugurri 'mayanguen ungwa, ungwa' chib nuyasig salmoswan, himnoswan, nuimburab cantailan cantab inçhigay.

17 Inchawei chigøben marøppe, wamindigu lata, chigøben mariiløyu lata, Señor Jesúswei munchiyu maray, nøgurri Tius Møskawan 'ungwa, ungwa' chib.

Tiuswei ureemera nømui yau maig kømigwan waminchibig

18 Sraløbe, kelø maig chiben treeg mørøb melamig køn, Señor nø maig martrai indig køben, trumay.

19 Keløbe, ñimui sralane undaguelø kømig køn, namikkølig inchib tsag inchimøtø.

20 Ureemerabe, chiyutøgucha nømui møskalane maig chiben møramig køn. Kaguende øyeeg mariibe Señorwane truba tabig asønan.

21 Møskaløbe, ñimui uregwane purø trømbøig inchib namig kui inchai marmøtay, chine isub kullaarai inchimønrrai.

22 Ñim karuindiig melabeløbe, yu piraelø ñimun karub pera købelane chiyutøgucha møramig køn. Møgeløba ka tab kørømisrtraptø marøbelø latawei nøm ñimun ashib pønrrøbendø martrab kømøtø, ñimui manrraugue tabigwan isua, Tiuswan køriibala maramig køn.

23 Chiwandøgucha marøppe, martrab isua maramig køn, møguelayasig kømøtø, Señorweyasig lataig marøb,

24 truburø ketig uta tøgagømigwan tranrrabiibe Señor nø tranrrab kui ashibeløbe. Kaguene ñim chi marøb pønrraibe Cristo tru Señorweiwian marøb pønrran.

25 Inchen møikkøben maig maramigwan marmøtø, kalø marøbigwane nui kalø marig maig køben truburø nøgucha treetøwei kaigwan utønrrun. Kaguende Tiusbe møigwane purømisrøb kandarøtø inchimig køn.

4

1 Ñim karub pera købeløgucha ñimui karuindiig melabelane sølgandø tabig marøb tøgaguy, ñimgucha srømbalårømbe ñimun Ashib Karub wabig tøgare kua mørabe.

2 Chu urastøgucha Tiusba wamindamigwane maikken elachimø melønrrigay, trunune marøppe, nøørotø isub palabinø kømø, tab isua marøb, Tiuswan 'ungwa, ungwa' chib.

3 Katø namuimburabgucha Tiuswan tøgatø miarrunrrigay, nui wamwan wamindamig nø kan yaskab kurtrai, Cristo, tru asiimig sørig pasrabigwan eshka wamindamig kønrrai. Pøs nabe trunun wamindikkurri kailan keeri yau pasrar.

4 Katø Tiuswan miarrunrrigay, nui wamwan waminchippe, na maig wamindamig køben tørgandø treeg waminchab.

5 Tiuswan ashmø misaamerai utube purø tab isua purø ashiptø amønamig køn, tabigwan maramdiig pubene, treegwan ka purainrraindø ashatø pønrrømøtø.

6 Ñim waminchibgucha tabig mørøptø purramdiig waminchibelø kømig køn, kan mamigu tre may larri lataig, chull møramdiikke, mundøgucha mandø løtamigwan tab løtabelø kønrrab ñim tøgagømig kønrrai.

Pablobe Tíquiconba, Onésimonba karua ørøb

7 Tíquico, namui undaarraig nuneg, Tiusweiwian maizhikken elachimø marøbig, Señorwei marameløyu naba lincha marøb megabig, naimburab chitø wamindamelane nø waminchun.

⁸ Nabe nune ñimuisrømay ørøppe, treeg isua ørar: namuimburab maitø pub arrigwan ñimun wammørøsrkønrraimba, katø ñimui manrrømeran chi isumø tab kønrrai martraimba.

⁹ Tiquicobe inrrab køn tru Onésimo namui undaaraig nuneg, maikkucha elachimø megabig, tru ñimui utuiba. Nømbe yu chitø pub arrigwan kerrigu waminchun.

'Ka amøñiguh' chib Pablo wam øriilø

¹⁰ Aristarco, tru kailan keeri yau naba lincha pasrabikkucha, ñimun 'tab ka amøñiguh' tan; katø Marcos Bernabéwei lenunekkucha. (Marcosweimburab na maig martrai eshkaigwan ñimbe wammøra kuinrrun, ñimuisrømay ibene, tab utønrrigay.)

¹¹ Katø Jesús, tru Justo cha wamig, truikkucha 'ka amøñiguh' tan. Tius nø ashib karub waigweimburabeløyu nan maram purugub melabelø, judiosmera kørebeløbe i pøneløtø kuig køn, nayasiibe truba truba tab kønrrai marøbelø.

¹² Katø Epafraskucha ñimun 'ka amøñiguh' tan, tru ñimui utuig Cristoi marøb megabig. Nøbe chu uraskucha ñimuyasig Tiuswan truba truba miab megabig køn, ñim kørrønrrabgaig tabig melabelø, Tiusweimbura-beløyu newan nørrørawar, Tius kerriguwan maig palai waben, chiyutøgucha palømíg, newanelø kønrrai.

¹³ Nøbe ñimuimburab maramigwan truba truba isuaig kui nabe ñimun eshkamønrrun, ñimuimburappa, laodiceasreelaimburappa, katø hierápolissreelaimburappa purø isua marøb megaigwan.

¹⁴ Lucas, tru mø marøbig undaaraig, truikkucha 'ka amøñiguh' tan, katø Demaskucha.

¹⁵ Katø namui nunelø Laodiceasrø warabelan chigucha 'ka warøgue' tan chirrunrrigay, Nimfaswanba, katø tru iglesia nui yau tulundzunabelanba.

¹⁶ I kilga pørigwan ñimui utu chab lebene, Laodiceasrø iglesiangucha lenrrai inchigay. Katø Laodicea iglesiasrøngurri kilga pørig pubigwan ñimgucha lenrrigay.

¹⁷ Ñim Arquipone trenchinrrigay: "Señor ñun chi martrai karua pasrigwane isuptø marøb megau tan cha, maig maramigwan mara kørrømartrab."

¹⁸ Iig 'ka amøñiguh' chib pøriibe, na Pablo nai taska pørig køn. Ñimbe pesannamø, isua kuy nabe kailan keeri yau pasrar. Tiuswei ka yandø tab indiibe ñimba pasrønrrun.

1 Tesalonicenses

Pablo 'ka amøñiguh' chib pørig

¹ Na Pabloba, Silasba, Timoteoba kanbalatø misra, Tesalónicasrø iglesian i kilgawan pørar, Tius Møskaimba, Señor Jesucristoba kanbalatø pønrrabelan. Tius nui ka yandø tab indiiba, chi isumgaig tab købiiba ñimba pasrønrrun.

Tiuswei ureemerasun Tiuswan 'ungwa' taig

² Chu uraskucha nambe Tiuswan 'ungwa, ungwa' chibelø ker ñim mayeelayasig. Katø chu uraskucha nam Tiusba wamindigube ñimuimburab tøga isuppatø melabelø ker.

³ Chu uraskucha nambe Tius namui Møskawei merrab maikken pesannamø isubelø ker, tru ñimui isubigwan Jesucristoinug pasra tøgagúikkurri chigøben marigwanba, tru undag købigwan tøga pønrraikkurri marigwanba, katø namui Señor Jesucristoinug muniiraikkurri maikken elachimø, melabig melaigwanba.

⁴ Namui nunelø, Tiuswei undaarailø, ñimune Tius lawa wesruilø kuin kui aser.

⁵ Pøs tru Tiuswei tabig srø wam ñimuinug pub urasma ka wamindiitø kømøtø, maramburab mariitøgaba, Espiritu Santotøgaba puig købig køn. Katø tru wamindiibe treeg kømønrrab kømøtø, nambe treeg kui ashawei wamindig købig køn. Ñimuyasiitøwei tab kønrrai, ñimui utu nam amønammay amønaig købigwan ñimbe ashibelø køn.

⁶ Ñimbe ñimuimburappe nam lataitøwei, katø Señor lataitøwei mandø amønamiwan treeg amøñibelø misrin køn, Espiritu Santogurri Tiuswei wamwan tranigwan truba kasraatø utab, chine purø trømbøig isuig melamig nebuingucha.

⁷ Øyamay ñimbe Macedonia pirauba, Acaya pirauba mayeelø Criston kørebelaimbe, truiløguen asha kusremdiig ñimbe treelø misrin køn.

⁸ Tru Señorwei wam ñimuinukkurri larrøbichib ibiibe, Macedonia pirautø kømøwei, Acaya pirautø kømøwei, chusrøndøgucha larrøbitsin køn. Katø trutø kømøtø, ñim isubigwan Tiusweinug pasra tøgagúigwan chigucha nebua asig misrin køn. Treekkurri namune yandø mas chi tamig palønrrabga lataig køtan.

⁹ Inchawei trusreeløtøweinguen nam ñimuinug kebammen, mandø tab wamab utig købigwan waminchibelø køn, katø tru øsig wab Tius ciertonigweiwam marøb pønrrønrrab, tru taska mari tiusmeran wendøbasra, Tiusweimay ñim mandø lliraigwanba,

¹⁰ katø Tius tru kwailai utugurri øsiirangaruig tru srømbalarøngurri nui Nusrkai arrumigwan muniiranrrab pønrramisrigwanba, tru Tiuswei purø trømbøig namig købig attrab pasrabigwan Jesús namun chi treeg kømønrrai marøbigwan.

2

Pablo Tesalónicasrø marøb uniilø

¹ Namui nunelø, ñimdøweinguen ashibelø køn, nam ñimuisrømay amrruibe, ka amrruitø webimuigwan.

² Pøs ñimbe yandø ashibelø kòn tru Filipossrømbe merrabwane chine purø trømbøig nebuinab, tsalø waminab melaig købigwan. Inchendø treeg kuingucha, namui Tius purugúitøgabe nui tabig srø wamwan chigucha chi kørig kuin kømø, eshkanrrab pønrramisrig købig kòn, marmønrrai namun yeeg trømbøig katingucha.

³ Kaguen nam ñimun 'øyeeg marøb meløgun' chib wamindiibe, peemaytø pella kusrenaniiløyugurri arrubig kømøwei, kabe chigøben trømbøig martrab isua wamindigugurri arrubig kømøwei, kabe nam chiyugøben isatø kegørrøsrkønrrab wamindigugurri arrubig kømøwein kuig kòn.

⁴ Treeg kømøtø, tru Tiuswei srø wamwan namun waminchai pønrsøppe, maig wamindamigwan waminchibelø kui Tius treelø kui asiilø købelø ker nambe. Inchawei nambe waminchippe, mu misaamera tab kui mørtrai tabzhig inchib pønrrønrrab kømøtø, Tiuswan tab kui mørøb wanrrai marøbelø ker, nø namui manrrømeran mailø køtashchab ashibigwan.

⁵ Pøs ñimbe ashibelø kòn, nambe manuguen chull mørtrai isatø tabzhig waminchimøwei, kabe chiwan køben parøgøb, chine isab truba tabzheelø misrøb amrrumøwei indigwan. Tiusbe iigwan asha pasran.

⁶ Nambe Cristo nøashib karua øriilø køppe, ñim namun tab inchai indamdigwein købendø, nambe manuguen misaamera tabelø kømab asha tab inchai lamuig kòn, ñim lata, katøganelø lata.

⁷ Masken treeg inchimøtø, nambe purø tammay inchibelø købig ker, kan usri nui shush uregwan maig køben inchimø ashib nørøranøb lataitøweingue.

⁸ Namui undag købigwan ñimuyasig purø nuig tøgagøptø, Tiuswei tabig srø wamwandø ñimun tranrrab inchimøtø, nam namashibguen øsig kuigwan tranamdiig kuig kòn, kaguende ñimbe namuimbe purø undag kømdeelø misrin køben.

⁹ Namui nunelø, ñimbe isua kuinrrun, nam øbøøba muraara, muraara marøb melailan, ñimui utu møikkøben namun chi palabigwan ka tranrraindø purrømønrrab, yem, kwaløm truba marøb melaig købig kòn, Tiuswei tabig srø wamwan ñimun eshkab kusrenanøb amønñippe.

¹⁰ Ñimbe ñimashib ashibelø køben, katø Tiuskucha asha pasran, nambe chishig newan tabig, sølgandø maig maramigwan marøb, katø muguen chi tamgaig amønnaig købigwan, ñim Criston kørebelai utu.

¹¹ Pøs ñimbe ashibelø kòn, nambe ñimun øigwandøgucha kan møskai nui uregwan waminchib lataitøwei,

¹² 'øyeeg marøb melamig kòn' chib, 'chigúingucha ka meløgun' chib, 'Tius wamabigwei ureesun amønay' chib, Tius nø ashib karub waisrømayba nui tørguegwalmabiisrømayba ñimun nø wamab wan.

Tiuswei uremeran kaig martrab kurrig

¹³ Inchawei nambe chu urastøgucha Tiuswan 'ungwa, ungwa' chibelø ker. Kaguen tru Tiuswei wamwan nam waminchen ñim mørøb uras, ka møguelø wamindig kui lataitø mara utømøtø, Tiuswei wam ciertonig kuitamab isua utig kòn ñimbe. Truibe tru ñim kørebelainuube ka pasrømøtø, marig misrøb pasran.

¹⁴ Kaguende ñim, nai nunelø, tru Judea pirausrø Tiuswei iglesiamera tru Cristo Jesúsweinug kanbalatø pønrrabelø lataitøwei nebuinab melaig kòn. Ñimungucha ñimuim pirau misaameratøwei truba truba kaig indinab melamig nebuig kòn, tru Judea pirauelan nøm judíosmera kaig indinab melab lataitøweingue.

¹⁵ Tru judíosmerabe Señor Jesúswan kweetsamba, tru Tius maig karuigwan eshkabelan kweetsamba, namune nòmuintukkurri webetamba indig kòbig kòn. Incha truilòbe Tiuswane tab kui wanrrai marmeelø, maya misaameran ashig kòmuingøba inchibelø kòn,

¹⁶ tru judíos kòmø misaameran kaigyugurri wesrailø kònrrai waminchab inchen, waminchamamønrrab namun merab. Øyamay nòmui kaig mariilane katøguchinguen katøguchinguen nemarøb ambubelø kòn. Inchendø Tiuswei namig kòbig arruppe, nòmuint pala purab nuig attrab kòn.

Pablo tesalónicasreelan katø ashchab inrrab isub

¹⁷ Namui nunelø, nam ñimba maya yana kòsrøn tarømisra, ashippe, ashmubendø, namui manrraube chu uraskucha ñimune pesannamø tøgä pønrrøwa, ñimun malaugue ashchab amrrug kòbiitø truba truba inchib melaig kòn.

¹⁸ Incha nambe amrrunrrab inchib melaig kòn. Na Pablobe, katø katø attrab inchib megaben, Satanásbe namun chigøben iløsrka pønrsøbig kòn.

¹⁹ Pøs tru nam tøgagønrrurmab isua munig melamiba, namui kasrag kòbiiba, katø Señor Jesucristo arruben, nui merrab nam kan corona lataig kanawa nam uta, purø tab kui mørøb pønrramibe ¿ñimwein kòmøtirru?

²⁰ Pøs ñimwein kòn tru nam maya nuguen tab kui mørøb pønrramiba, nam kasrag kui pønrramibabe.

3

Timoteowan ashchab inrrai karua ørig

¹ Inchawei treeg isuptø, treeg isuptø melømønrrab, Atenassrømbe trembe namdøgucha ka kørørrmisrta isuer.

² Incha namui nuneg Timoteo Jesucristoi tabig srø wamwan larrøbichib inrrai wamindameløyu Tiusweimburabelan marøb, namba lincha marøb megabigwan nambe ñimun ashchai ører, tru ñim kørørrrabgaig mur isua melønrraimba, ñimui isubigwan Jesucristoinug pønrsra tøgagúigwan elachimø, tøgagøbig tøgagønrrab isunrrai martraimba.

³ Øyeeg ñimun chine isumdeelo puben, ñim møitøgucha mandøguen kømuiltø melømønrrai isuer. Pøs ñimbe yandø ashibelø kòn, namune øyeeløyu puraambub melønrraiwei marigwan.

⁴ Inchawei nambe ñimba amøñippatøwei, øyeeg chine isumdiig puig melamig kønrrun cha, kanmaytø eshkaig kòbig kòn, truike mømibe ñimguen ashen treeg purebweindan.

⁵ Inchawei treeg isuptø, treeg isuptø megamønrrab ñimui isubigwan Jesucristoinuutø pasra pønrraigwan maig melaitashchab ashchai ørar. Inchippa Satanás, tru kebenørskønrrab inchibig ñimun kaigu kegørrørskøben, nam ñimuyasig chigøben mariibe ka yandiig chi mariimíig kui lataig kørørrmisrtaimab isua.

⁶ Inchendø katøle Timoteobe ñimuisrø uña, puppe, namuyasig tru tab wam wammørørskønrrab srua arrin kòn ñimui isubigwan Jesucristoinuutø pasra amønraigwanba, truba undaguelø kuigwanba. Katø ñimbe chu uraskucha namune pesannamø, tabig isub tøgagøbelø kuin kòn chib, namgurri ñimun asinrrabna kui melab lataitøwei ñimigucha treeg isub melabelø kuin kòn chib wamindan.

⁷ Inchawei treekkurri, namui nunelø, namun purø kaig nebuinab purø isuig melamig nebuigucha, ñimui isubigwan Jesucristoinug pasra amønraigu treeg tabig melan taig nam wammøriibe, namuimbe truike purø nu tab køtan.

⁸ Ñim Señorweinug tarømismrø melan tai wammørene, namune ke kan øsiirab lataig køtan.

⁹ Tiuswei merrab ñimgurri nam øyeeg kasrag pønrramig kuigwan, ¿nambe nun mandø incha ungwa tamburab newan ungwa chinrrab køh?

Tiusba wamindig

¹⁰ Nambe yem kwaløm Tiuswan miab melabelø ker, katøle ñimun malau-gue ashchab amrrua, ñimui isubigwan Cristoinug pasra tøgagúigu ñim ke truburab nebuimíig palabigwan nemartrab isua.

¹¹ Inchawei nam ñimun katøle ashchab amrrumig kønrrai, namui Møskai Tiusba, Señor Jesúsba namui maywan kura trattraimab isuer.

¹² Ñimui undag købig tøgagúigwan Señorbe truba truba nemarøb nurab inrrai martrun, ñim kangurrin kangurri undaarayamigwanba, katø mayeelan undaaramigwan chigucha, namgurri ñimun undaarab lataitøweingue.

¹³ Ñimui manrrømeran nøbe tab mur isua pønrrabelø kønrrai martrun tru newan tabigu, ñimun 'øyeeg marøbelø køn' tainanrrabgailø, Tius namui Møskawei merrab pønrramig kønrrai, tru namui Señor Jesús nuyasiitø tarømariilø mayeeløba arrub uras.

4

Tiuswei merrab kasrag kømdiig amøñib

¹ Møimbe yandø, namui nunelø, Tius tab kui wanrrai marøb llirab amønamig nam mandø kusrenanig køben, ñim treeg marøb amøñibeløbe, treegwane katøguchinguen katøguchinguen marøb melønrrai iigwan Señor Jesúswei munchiyu øyeeg melønrrigay chib, tiusmanda øyeeg martrurrinri-gay chinrrab inder.

² Ñimbe ashibelø køn, Señor Jesús treeg martrai karua pasriitøga maytø marøb kømigwan nam ñimun eshkaigwan.

³ Tiusbe treeg isua wan, ñim newan tabigweindø tarømisrar kønrrai: peg ishuuba, peg møøba trømbøig marmeelø.

⁴ Katø ñim møitøgucha ñimui asrwane isua møra tøgagøm kusremig køn, newan tabig, trømbøig marøb maig købash kømøtø.

⁵ Judíos kømeelø Tiuswan ashmø misaamera latawei trømbøig marøg købitø ke chinchimmøø inchib, truitø srua ambiilø pønrramig kømøn.

⁶ Inchawei øyeeløyube nui nunewiwan nuin kui lataig merrarrawa marmøwei, ke chi chimíig kønmaptø marmøwei indamig køn, Señorbe kerri-gu øyeeg trømbøig mariiløgurri nømune møra melønrrai martrun. Nambe kan-maytø ñimun eshkaig købig kuig køn, isuptø kønrrigay cha.

⁷ Kaguende Tiusbe namune wamappe, køsøngønrrapteelø marøbelø kønrrai wamømtø, masken newan tabig amøñibelø kønrrai wamig kuig køn.

⁸ Inchawei i kusrenaniilan kaashibiibe, mu møwan kashmøtø, Tiuswan kaasan, nui Espíritu Santon ñimun tranøbigwan.

⁹ Ñim nunelan tru undaguelø kømigweimburappe undaguelø kømig køn chib, ñimun pøramibe chi palømøn. Kaguende Tius kusrenanin køn, kangurrin kangurri ñim undaguelø kønrrai.

¹⁰ Masken ñimbe Macedonia pirau muba kuimburab nunelø warabelan mayeelanba undaguelø køn. Inchen køben, nambe, ñim Cristogurri nunelan 'øyeeg melønrrigay' chib wamindamønrrun, katøguchinguen undag købig nurab inrrai.

11 Warappe, ñimuimburab wasrøndaa tab waramigwan isumig kòn, mu mendaigweiwan kòmø, ñimuimburabigwan isub, ñimui taska ñimui maramelan marøb, nam ñimun maig martrain karuig treekke,

12 ñim treeg waraigwan menda misaamera tabikken kui asig kønrrai, mun chi miab warømønrrab.

Señor katø arrumig

13 Ñim, namui nunelan, tru kwawa ka kib lataitø warabelaimburabigwan mandø inçhab kuinguen mørmeelø kørromismønrrai nambe eshkanrrab inder, katøganelø tru isua muniiramigwan chigar lata ke chinsraatø isui inçhimønrrai.

14 Jesucristo kwawa, katø øsiiraigwanma nam køreibe, treetøwei tru Criston kørewa, kwawa, ka kib lataitø warabelane Tiusbe Jesucristoba pera attrab kui nambe kørewa ker.

15 Señor nø maig taig, nambe nø arrumnegatig nam ka øsig amøñibeløbe kwabeløguen ammøwatø nammerrig ambamibe kaanrrun cha trendamønrrun.

16 Kaguende Señorbe srømbalarøngurri wamab kørarruppe, nø wamigwane mørtraikandø wamab kørattrun, kan arcángel tru ángelesmeran nø karub pera pasrabigwei wamdøgaba, Tiuswei trompeta wanrrøbiitøgaba. Inçhen Criston kørewa kwabeløbe nømmerrig øsiirawa, katøle çhab kurrønrrun.

17 Inçhen nam ka øsig amøñibeløbe tru kwaig warøwa kiagasrabeløba kanbalatø wañiyu srua ambiilø kømønrrun Señorwan palasrø katønrrab. Øyamay nambe managatig Señorba purramig kønrrun.

18 Inçhawei kangurrin kangurri øyeeg wamindiiløtøga waminçhib puruguyay

5

Señor arrumigwane isuptø melamig kòn

1 Inçhen Señor chiwei arrumigwanba, katø mana arrumigwanbabe ñim, namui nunelan, na chi pøramig palømøn.

2 Tru Señor arrum kwalømbe kan niliig yem arrub lataitøwei punrrab kui ñimbe tab ashibelø kòn.

3 Misaamerabe 'ambumay imay tab waramdiig køb, møimbesi yandø chi isub melamikkaig tab waramdiig kòn' çhib købene, kagøppa, mõi mõi nømumim palabe pinisailø kømig attrab kòn, kan ishuumisag patsø kwanrriigwan kagøb, mõi mõi unø tammisrtrab pusrkwab arrub lataitøweingue. Inçhen tryugurrimbe mumaygucha wegørramibe kaanrrun.

4 Inçhendø ñim, namui nuneløbe, løstøyu pønrrømøn, tru kwaløm ñimun kan niliig arrub lataitøwei, ke chi isumø køben arrinab pønrrønrrain kømø.

5 Kaguende ñimbe mayeeløba tørwei ureemera, kwalømyuelø kòn. Nambe løstiigwei ureemera kømøwei, yemyuelø kømøwein ker.

6 Inçhawei treekkurri, nambe katøganelø lataitøwei kib lataig amøñimøtø, pesannamø purø isuptø meløgun, trurrigu tab isuamørague.

7 Kaguende tru kibeløbe yem kian. Inçhen mutsiirabeløbe yem mutsiiran.

8 Inçhen tru nam kwalømyueløbe, tab isuamøra amøñigun, isubigwan Jesucristoinug pasra tøgagüitøgaba, undag købiitøgaba, truigwane peçhuburab chinchimønrrai katabiitøga kasra lataig. Inçhen nam kaigyurri wesrailø kømig munig melaitøgabe petsamig kan tsandzøn casco lataig mara tøga pønrramig kòn.

9 Kaguende Tiusbe namune nui purø trømbøig kørig kømdiig namig købigwan utønrrai mara pønsrømtø, kaigyurri wesraig kømigwan nebua utønrRAIN kuig køn, namui Señor Jesucristogurri.

10 Nøbe namuyasig purøbasramisra kwaig kuig køn, nam øsig amønai lata, kabe nam kwaimbala lata nøba kanbalatø purramig kønrrai.

11 Inchawei kangurrin kangurri masken treeg melamigwan isunrraimba, katøguchinguen tab mur isua pønrramisrøb amrraimba kangurrin kangurri puruguyay, ñim chabguen yandø treeg marøb melaig køppe.

Pablo Cristoielan øyeeg martrigay cha waminchib

12 Katø ñim namui nunelan trenchinrrab inder, ñimui utu marøb, katø karub pønrrabelane maig købash inchimø, tiusmanda tab inchunrrigay cha, Señorweimburabeløyu tru pera marøb, maig maramigwan treeg marøb melamig køn chib waminchibelane.

13 Nømune maya nuguen tab inchib, undaguelø kømig køn, nømui maramelan marøb melaimburø. Kangurrin kangurri tab amønay.

14 Katø ñim, namui nunelan, trenchinrrab inder, chigøben marøg kømui inchib pøilane murba waminchigay cha, katø køríteelane treetø melømønrrai waminchib, katø chiyugøben purø kullaguelane purugub, mayeelanba larrø tammay inchurrunrrigay cha.

15 Møikkøben chigøben kaig marene, katøburø nungucha treetøwei marøb kømønrrab isuptø kuy. Masken chu uragucha ñimui utube kangurrin kangurri tab inchibelø kønrrab inday, katø mendailø mayeeløba chigucha.

16 Chu urastøgucha ñimbe kasraatø amøñib,

17 chu urastøgucha Tiusba wamindamigwane elachimø, nøba waminchib,

18 chi pub arrindøgucha, Tiuswane 'ungwa, ungwa' tamig køn; kaguende Tiusbe ñim øyeeg marøbelø kønrraiwei isua køn, Cristo Jesúsukurri.

19 Espiritu Santoi marøb pasraig kan nag lataitøwei ñimuinug pilab pasra-bigwane kwabashmøtay.

20 Katø 'chigøben pub attrun' chib Tius maig karuigwan waminchen kash-mumig køn.

21 Chiwandøgucha maig køtashchab isua ashibmerrig asamig køn. Incha chi tabigwane elachimø, marøb tøgagørrømisrøppe,

22 chigurrimbunø kaigwane marmumig køn.

23 Inchen Tius tru chi isungaig tab kønrrai marøbig, nøtøwei ñimune newan nuindø kønrrai tarømartrun. Ñimun kerrigu newan ñimui espíritu, ñimui møsigwan, ñimui asrwan kaig mariitøga chigucha chillig inchar kømeeelø, chishcheelø tøga pasønrrun, tru namui Señor Jesucristo arrumigweyasig.

24 Tru ñimun wamabiibe, nøbe maig taigwan treeg marøbig køn. Incha nøbe treegwan martrab kuinrrun.

'Ka amøñigueh' taiba, 'mayanguen tab kønrrain' taiba srabeig

25 Namui nunelø, namuyasig Tiuswan tøga miarrunrrigay.

26 Ñimbe namui nunelan mayeelan purø tab wamab, Tiuswei undag købitøga tasing tranøb 'ka amøñigueh' chinrrigay.

27 Señorwei merrab nabe ñimun karua pasramønrrun, i kilgayu na pørigwan namui maya nunelan lemønrrab kømø, lenrrai.

28 Namui Señor Jesucristoi ka yandø tab indiibe ñimba pasrønrrun.

2 Tesalonicenses

Pablo 'ka amõñiguh' chib pørig

¹ Na Pabloba, Silasba, Timoteoba kanbalatø misra, Tesalónicasrø iglesian i kilgawan pørar, namui Tius Møskaimba, Señor Jesucristoba kanbalatø pønrrabelan,

² Tius Møskaweinukkurimba, Señor Jesucristoinukkurimba tru ka yandø tab indiiba, chi isumgaig tab købiiba ñimba pasrønrrun.

Cristo katø arruben Tiusbe maig kønrrabigwan asha martrun

³ Chu uraskucha ñimuimburab Tiuswan 'ungwa' chib kømig køtan, namui nunelø, nam treeg marambuawei maramig søl kuimba. Kaguende ñimui isubigwan Jesucristoinug pasriibe maramburab katøguchinguen nurab iben, katø ñim møitøgucha kanikkurri kanikkurri undag købig tøgagúikkucha nurab yain køn.

⁴ Inchawei treekkurri nambe Tiuswei iglesiamerayu ñimuimburab truba tab kui waminchibelø ker, ñim melabig melaigwanba, isubigwan Jesucristoinug pasra melaigwanba, chine kaig indinab melamig arrubigu, ñim truba isuig puraambub melamig nebuindøgucha.

⁵ Pøs kerrigu iibe tru maig kønrrabigwan Tius nø asha mariibe, sølgandø maig maramigwan marøbig kui ashchai kenamaran, Tius nø ashib karub waisrø ñim kebamrrabgailø købigwan kebambamig kønrrai marøb. Treekkurri ñimbe truigweimburab mõi ya yeeg kaig indinab melan.

⁶ Tiusbe sølgandø tab asha marøbiibe ñimun kaig nebunrrai marøbelane, nømungucha treetøwei møra melønrrai martrun.

⁷ Incha ñim chine kaig nebui melabelan lata, katø namun lata isramig kønrrai tranrrun. Øyeeg puppe, Señor Jesús nui ángelesmera maramburab marøbeløba, srømbalasarøngurri naabaig arrua, kenamistrøb kwaløm treeg punrrun.

⁸ Tiuswan ashmeelanba, katø namui Señor Jesucristoi tabig srø wamwan mørøg kømui inchibelanba Tiusbe maig kønrrabigwan møra melønrrai martrab attrun.

⁹ Truilane tru manatagig pinisainug møra pønrrønrrai pønrrailø kønrrun. Incha Señorwei merrabgurrimba, tru nui maramburab marigwei tørguegwalmabigugurrimba webusriilø kønrrun,

¹⁰ tru nui misaamera nun maya nuguen tab indig kønrrappa, tru mayeelø nun kørebelø yeekkucha kønrrabmab kwaara asig kønrrappa arrub kwaløm. Inchen ñimgucha tru utu tøgga pønrrønrrun, kaguende nam maig eshkaib wamingdigwan ñim køreikkurri.

¹¹ Øyeeg punrraiwei nambe chu uraskucha ñimuyasig Tiuswan 'purugurra' cha miabelø ker, ñim treeg kønrrabgailø kuigwan Señor wamigwane nø wamiilø kui treeg mara tøgagønrrai. Incha nui maramburab mariitøga ñim chigøben tabig martrab isua tøgagúilanba, katø isubigwan Jesucristoinug pasra chigøben marøb kuigwanba newan treeg marig kørrømisrtrai,

¹² namui Señor Jesúswei munchiwan øyamaybe ñimgurri maya nuguen tab indig køben, ñimbe nøgurri maya nuguen tab indiiilø kønrrai miabelø ker, tru ka yandø tab indig namui Tiusweimba, Señor Jesucristoimba maig kønrrain køben treeg.

2

Señor katø arrumigwan tab eshkab

1 Pøs trube, Señor Jesucristo katø arrumigweimburappa, katø nam nõba tulundzunamigweimburappa, ñim namui nunelan,

2 tiusmanda ñim maig isua pønrraigwan ke mõi mõi peetø isub yunømarøb, ke chinsraatø inchib pønrrønrrai kwaarøsrainab pønrrønrrab kømø chinrrab inder: 'Tru arrum kwalømbe yandø pun' chib, 'Tius treeg wamindingarutan' chib wamindi lata, kabe 'treeg køn' chib eshkaig lata, kabe 'treeg kønrrun' chib 'nam kilga pørig køn' chib waminchib kui lata mørmønrrigay.

3 Ñimbe mumaygucha kegørrøsrkainab pønrrønrrab kømø, melay. Kaguende tru Señor arrum kwaløm pumøwatø, misaamera Tiusweimburabelan elacha, yandø wendøbasrøb, katø tru newan larrø kaig, tru managatig pinisaig kønrrabigu pasrønrrai pasrig kenamismøwatøbe treeg pumønrrun.

4 Tru møøbe tru chimerandøgucha 'tius køn' chib tøgagúilanba, katø chian køben køriibala tabig waminchib tøgagúilanba, ashig kømui inchib sètø pasramisrøb, purab nuig misrøb pasrønrrun. Incha treetø kønrrab kuindø, Tiuswei yauguen kebya wamisra, nõashibguen 'Tius kur' chib wanrrun.

5 ¿Na ñimba uñib uraswei na ñimun iigwan wamindigwan isumuitarru?

6 Tru kaig martrab møg treeg maramig puben tru uras kenamisrtrai tru merrarrab sètø pasrabiibe chi sètø pasrain kui ñimbe ashibelø køn.

7 Kaguende tru mu asiimíig purø kaig pasrabiibe chabguen marøbguen pasran. Inchendø tru treeg marmønrrai mõi ya merrarrab sètø pasrabiibe, sètø katab pasrabig pasrønrrun tru utugurri wesramnegatig.

8 Inchen yandø tru newan larrø kaibe kenamisrtrun. Inchen truigwan Señor Jesúsbe nui trigugurri urriitøgatø kweecha, tru nõ tørguegwalmabig arriitøga pinishinrrun.

9 Tru larrø kaig arrua mariibe, Satanás purugúitøga marøb attrun, marøppe, Satanás maramburab mariiløtøgaba, nõ pasrain kui ashchai mariilan mariitøgaba, tabig kømíitøga kwaara asha kønrrai marøb pasrailøtøgaba.

10 Incha tru kaigyu pønrramsrømay amrrabelan kegørrøsrkamig nõbe chigurrimbunø sølwan kømø, kaløwan marøb kaig martrai pønrsrønrrun, kaguende tru kaigyugurri wesrailø kønrrab tru newan ciertonigwan undaaramø, kaashibeløgurri.

11 Inchawei Tiusbe tru peløsrkøb kegørrøsrkøbigwan maramburab martrai ørtrun, isa wamindiilan kørenrrai,

12 katø tru newan ciertonigwan køremøtø, sølgandø tabigwan mariimeeløyu truba tab kui inchib marøb pønrrabelane mayeelanba kaigyu pønrrønrrai pønrsramig kønrrai.

Kaigyugurri wesrailø kønrrai lawa wesrailø

13 Inchendø nambe chu uraskucha Tiuswan ñimuimburab 'ungwa, ungwa' chib kømig køtan, Señor undaaraig nunelø. Kaguende srøsrøgurri kaigyugurri wesrailø kømig kønrrai Tiusbe ñimune lawa wesraig købig køn, Espiritu Santogurri tabig chishmarikkurrimba, katø ñimui isubigwan newan ciertonigu pasra tøgagúikkurrimba.

14 Tru øyeege kønrrai isuawei, Tiusbe ñimun wamig køn, tru tabig srø wamwan nam eshkab wamindiitøga, tru namui Señor Jesucristoi tørguegwalmabigwan ñimgucha nebua tøgagønrrai.

15 Treeg købene, namui nunelø, maig pønrrabeløbe truyutø tarømisrmø melay, namashib pønrrøwa kusrenaniilan lata, kabe kilgayu pørigwan kusrenaniilan lata truigwane elatchab kømø, tab tøga pønrray.

16 Namui Señor Jesucristo nøtøwei, namui Tius Møskaimba tru nø namun undaarawa, tru nui ka yandø tab indiitøga managatig chi isumig kaanraimba, munig melamig truba tabigwan tranøbiibe,

17 ñimui manrrømerayu purø tab kui pønrrønrraimab isub, ñimui chigurrimbunø tabig marigu lata, tabig wamindigu lata tabig marig kørørmisrtraï treeg martrun.

3

'Tiuswan namuyasig tøga miab kørrunrrigay' cha Pablo miaig

1 Pøs treeg købene, yandø møyimbe, namui nunelø, namuyasig Tiuswan miab melørrunrrigay chinrrab, Señorwei wam petø truøø larrøbichib inrrai, trurrigu tru wambe maya nuguen tabig kui mörøb utig kønrrai, tru ñimui utusø puben, utab lataitøweingue.

2 Katø trømbøig marøptø yandø mindiilø, larrø kaig møyuelai tasku nam kegørrab melamig kømønrrai tøga miarrunrrigay. Kaguende isubigwan Jesucristoinug pasra tøgagømigwane mayeeløbabe tøgagømøn.

3 Inchendø Señorbe chu uraskucha tarømisrmøig kua, nøbe ñimun kørørmø, mur pønrrønrrai purugub, Satanás, tru larrø kaigwei tasku kegørrømønrrai ashib tøga pasrønrrun.

4 Nambe Señorøgabe treeg kuitamab isua pønrrer, martrai nam karua pønsraigwan ñim møyi ya marøb melaigwan lata, katø maramigwan ñimbe marøbig martrab kui.

5 Tiuswei undag købigwanba, maig kuingucha yaandø, yaandø melamig Cristo tøgagúigwanba, Señorbe ñimui manrrømeran trunun nebua tøgagønrrai martraimab isur.

Maramigwane martrai waminchib

6 Namui nunelø, maramigwan treeg marøb melønrrigay chib, Señor Jesucristoi munchiyu, marmø kømø, treeg martrai ñimun karumønrrun, tru Cristogurri ñimui nunelø møyikkøben ke chigucha chi marmø, ka uñchabgøba inchib, nam ñimun maig kusrenanig køben treegwan møra marmíibabe linchimøtay cha.

7 Pøs ñimbe yandø ashibelø køn, nam mandø waraig købigwan ñimgucha treetøwei waramig kønrrai. Nambe ñimui utu warappe, chi marmø ka warønrrabgøba inchimøwei,

8 kabe namma møyigweiwan køben mappè, chi marmø ka purrøwatø mamøwei indig køn. Masken treeg kømøtø, namma maramigwane isua møra, muraara muraara yem kwaløm marøbelø ker, ñimun møyilan køben kagatø ka tranraindø munig purrømønrrappe.

9 Nambe mu mandamgaig maramig chigar kuagurri ñimun 'purugurra' chinrrab kaima pønrrømøtø, ñimguen namun asha kusrenrrai isua, øyeeg muraara marig købig køn.

10 Nambe ñimba amøñib urassrøweinguen øyeeg kønrrain cha iigwan karua pasrig købig køn: møyikkøben maramigwan chi marøg kømui inchibiibe, trube, mabgucha mamumig køn cha.

11 Nambe wammøra ker, møyiløgøben ñimui utuelø ke chigucha chi marmø ka amøñinrrabgøba inchibelø kuin kui, nømuimburab kømubendø, mendailaisrø ke ka neesha mörøb.

¹² Treeg inçhib misaamerane nambe Señor Jesucristoi munchiyu marmø kømø, martrai karua pasrer, maig maramigwan treeg marøb melønrrain cha, nambe nømun waminder: warappe, nømuiwan marøb wasrøndaa marøb kuy cha; mape, nømuiwan manrrab.

¹³ Inchen ñim, namui nuneløbe, chigøben tabig maramigwane muraarab melønrrab kømø, maray.

¹⁴ Møikkøben tru i kilgayu maig martrain cha trendaigwan mørmígwane ñimbe trunune trendø treeg kui yandø asha tøgaguy. Incha truibabe linçhibgucha linçhiumig køn, treenchene kwartrai.

¹⁵ Inçhendø kaig kønmab ashiptø ashig kømui inçhib treeg inçhib tøgagømøtø, nuneg kui ashabe, 'ashiptø megau cha; øyeebe marmumig køn' chib, eshkab wamindamig køn.

Tabig wamindiilø srabeig

¹⁶ Señor tru chi isumgaig tab købigwan tranøbig, nøtøwei manatøgucha maig kuindøgucha ñimun tru chi isumgaig tab købigwan tranrrun. Señorbe ñim mayeeløba pasrønrrun.

¹⁷ Na Pablo nai taska iigwan pørar, ñimun 'ka amøñiguh' chib. Kilgamera møitøgucha na pøriiløbe na pørig kønmab asamdeelø kønrrai, øyamay pørøbig kur.

¹⁸ Namui Señor Jesucristoi ka yandø tab indiiibe ñim mayeeløba kønrraimab isur.

1 Timoteo

'Ka amõñiguh' chib pørig

¹ Na Pablo Jesucristo nøashib karua ørig, Tius namui Kaigyurri Wesrabi-iba, Cristo Jesús, tru nam nundø isua munig melaig truiaba karua pasrig,

² nui isubigwan Jesucristoinug pasra tøgagig, tru cierton nai nusrkai lataig ñi Timoteowan i kilgawan pørar. Tius Møskaimba, Cristo Jesús namui Señorba nui ka yandø tab indigwan køben, lastima asigwan køben, chi isumgag tab købigwan køben ørtramab isua inchar.

Ashiptø kønrrai wamindig

³ Na Macedonia pirausrømay inrrab pasramisra, 'tiusmanda ñune Efeso kørrømisra' cha eshkaig købig kuig køn, tru møiløgøsrøn sølwan kømø, ke peemaytø kusrenaniiløtøga kusrenanøbelan treegwan kusrenanmønrrai merab ashib pasrønrraimba,

⁴ katø chi treeg kømubendø nõmdø isua wamindiilanba, katø nõmbe 'i misaamerainukkurri amrrubelø ker' chib, tru munchimera kan man-agen patsønrrabgag arrubigwanba, tru kuindø mörøb pønrrømønrrai ashib pasrønrraimba. Treeløbe ka kwayab waramigweindø køn, tru isubigwan Jesucristoinuutø pasra tru Tiusweimburabelan marøbig marøb ambamigwan purugunrrab kømøtø.

⁵ Inchen na iigwan martrai karua pasriibe iig køn: tru manrrau chishchigurrimba, isub kebachib pasrabigu chi kalø køn chibig chigaig, tabigugurrimba, katø isubigwan Jesucristoinuutø ka inchib kømø, cierton pasra tøgagúigugurrimba undag købig arrubiitøga undaaramig.

⁶ Inchawei møiløgøben truiløma øyeeg kømigwan yandø pella tarømisra, nõmuimburab ke ka chine wamincha mörøb kuiløyutø chab tarømisrin køn.

⁷ Tru maig maramigwan martrai Moisés pørigwane ke nõm kusrenanøbelø køg kui inchibelø køn, nõm wamindigwane nõmdøweinguen ni chigúinguen mörmøwei, katø 'iibe treeg kømønrrab kømø, treeg køn' chib wamindiilan chigucha chigúinguen mörmøwei inchendø.

⁸ Pøs tru maig maramigwan martrai Moisés pøriibe tabigwein kui ashibwei inchibelø ker, tru chiyuwei maramigwan treegweyasig merrarraa marene.

⁹ Inchawei tru maig maramigwan pøra warøppe, tru tabig sølwan marøbelain kømøtø pøra warig kui nambe ashibelø ker. Treeg kømøtø, tru larrø kailaimba, mörmeelaimba, chigucha Tiuska misaameraimba, kaig marøbelaimba, kaig maramigwane chi kørikkengaig marøb misaameraimba, Tiusweimburabelane ke ka kaigwan lataig inchibelaimba, usri møskalan kweechibelaimba, ka kweecha petaptø amõñibelaimba,

¹⁰ møguelø ishumburba nõmui asrtøga trømbøig marøbelaimba, katø møgueløbe møgueløasiyitø trømbøig marøbelaimba, misagwan karuindiig melønrrai nila yanøbelaimba, isa waminchipteelaimba: 'nabe si, isatø waminchimur' chibendø, isapteelaimba, tru tabig sølwan kusrenanigwan chigurrimbunø kaitøga itøøra pønrsøbelaimba køn,

¹¹ Tius mayanguen tabigwei tru tørbilabig tabig srø wam maig køben treetøwei kusrenanigwan. Truigwane na waminchib tøga pasrønrrai Tius nan tranig køn.

Tiuswan 'maya nuguen ungua' chib

¹² Cristo Jesús namui Señorwan na 'mayanguen ungwa, ungwa' chinrrab, muraaramø marøb megamig kørnrai tranøbigwan, kaguende tru nui marameløyu chi isungai marøb meganrraptiig kui asha nan pasrigwan.

¹³ Nabe merrabsrømbe nun purø trømbøig wamaptiig, katø Tiuswei uremeran kaig maramigwangøba lab, larrø namiguig maig købash inchiptiig købig kuingucha, nane lastima asig køn, kaguende nabe chigúinguen ashmiig køremíig kua, øyeeg marig kuikkurri.

¹⁴ Inchendø namui Señorwei tru ka yandø tab indiibe naim pala purab nuikken arrig køn, tru isubigwan nuinuutø pasra tøgagømiba, undag købiiba kanbalatø Cristo Jesúsweinug pasrabig.

¹⁵ Inchawei i trendaibe chi isungai isig kømøtø køn, mayeeløba chi kashmø, ka utamig: Cristo Jesúsbe piraumay arruppe, kaig marøbelan kaigyugurri wesranrrab arrig køben, tru truilai utu purab kaibe na kur.

¹⁶ Incha Tiusbe treeg køptøwei nane lastima asig køn, tru kaig marøbelai utu na mas larrø kaigwan Jesucristobe chugatikkucha nø nan tammay ka awentab wabig kuin kui kenamartrab, tru managatig øsig kømigwan tøgagønrab, tru wendøsrø nun kørenrrabelø nan øyeeg marigwan asha kørnrai.

¹⁷ Inchawei managurri managatig mayeelaim pala nø ashib wabigwan, managatig øsig wabigwan, kaptøgabe asiimíigwan, Tius nø kandø wabigwan managatig nun purø tab indig kørnraimba, maya nuguen tabig kørnraimba inchar. Treeg kørnrun.

¹⁸ Timoteo, nai nusrkai lataig, 'i maramigwan martrunrrig' cha na ñun karua pasrar. Tru ñi maig kørnrabig kuigwan merrabsrøwei ñuimburab Tius maig karuben eshkailan, truilan isua pasramisra, Señorweimburabelan elatchab kømø, may kwayanrrig.

¹⁹ isubigwan Jesucristoinug pasra tøgagúigwanba, isub kebachib pasrabigu 'chi kalø køn' chibig chigaig kømigwanbabe tindøgague. Pøs møiløma nømui isub kebachib pasrabigu 'kalø køn' chib kebati møndøgucha mørmøwa, tru nømui isubigwan Jesucristoinug pasra tøgagúigwane kan nubi itøgasrai lataig kørømisra, yandø trubisan.

²⁰ Truilai utube, Himeneoba, Alejandroba treeg melan. Inchawei nabe truilane Satanás nø asha martrai nui tasku pønsrar, Tiuswan purø trømbøig wamumum kusenrrai.

2

Tiusba mandø wamindamig

¹ Inchawei iilanmerrig marøb kørnrai eshkawa pasramønrnun: 'øyeeg, øyeeg palai meler' chib Tiuswan miab, katø Tiusba waminchib, katøganelayasig Tiuswan 'purugurra' cha miab, katø mu møguelayasiitøgucha Tiuswan 'ungwa, ungwa' tamig køn,

² reymerain køben, katø nørreelø misagwan ashib karub purrabelain køben. Masken chi isumø tab waramdiig, ambumay imay chigucha chi kuin kømø, Tiusweimburabelan tabig marøb, chiyutøgucha mu chi tamgaig waramig kørnrai.

³ Kaguende øyeebe tabig køn, Tius namui Kaigyugurri Wesrabiibe tab kuinguen asig.

⁴ Kaguende nøbe maya misaamera kaigyugurri wesrailø kørnrai indan, tru nui newan ciertonigwan nebua ashchai.

⁵ Kaguende Tiusbe kandø nøtø køben, katø Tiusba misaameraimba tøbøtag pasramisra purø waminchibikkucha kandø køn, Jesucristo møg.

⁶ Truibe nõashib maya misagwan kaigyurri wesranrrab nõ kwaitõga pagaraig kõn. Incha iigwane yandø ke treeg maramig puben, eshkaab wamindig kõbig kõn.

⁷ Inchawei õyeegeyasig nabe Señorwei wamwan waminchib kusrenanrrai wesrawa pasrig, katø Jesucristo nõashib karua õrig kur, judios kõmø misaameran tru isubigwan Jesucristoinug pasra tøgagømigwanba, newan ciertonigwanba kusrenanrrai. Iigwan nabe isa waminchimur.

⁸ Inchawei chutøgucha møgueløbe Tiusba waminchippe, chi kaig marig chigaig tasigwan chishig kusrub pønrramig kõn, truba namig kuim palatø kõmøwei, muba aleguiyawa kõmøweingue.

⁹ Katø ishumburmeragucha asru keppe, chull ashchai purab tabig kemu-mig kõn, maig kemigwan treetøgue. Pusrugwangucha tamarøppe, ke purø tabig tamarmøwei indamig kõn, orotøga, kabe tab sruuzheeløtøga. Katø keiløgucha ke purab nõrrøweyelø kemøwei indamig kõn.

¹⁰ Treeg kõmøtø, chigøben tabig mariiløyu tabig kõnrrab indamig kõn, ishumburmera Tiusweyasig tabiitø martrab pønrramisrøbelø maig kõmig øben treekke.

¹¹ Ishuumisaabe kusreb wappe, niløtø wamig kõn, trurrigu maig købendiig inchimø nõmun mørøb.

¹² Kaguende nabe kan ishuumisaabe kusrenanmønrrai inchar, katø mõwan ke nõ karunrrain kõmøweingue. Treeg kõmøtø, niløtø wamig kõn.

¹³ Kaguende Tiusbe srøsrø marøppe, Adánwanmerrig marig kõn, trugur-rimbe Evan.

¹⁴ Inchagucha isa waminchen truyu kebeñippe, Adán kõmøtø, Eva kebenig kõn. Incha yandø kaig srua irramaikkurrimbe, yandø kaigyu kebenig kõn.

¹⁵ Inchendøgucha ishuube ureg tøgagua, kaigyurri wesraig kõnrrun, tru isubigwan Jesucristoinuutø pasra tøgagøbig tøgagøb, undag købigwan tøgagøb, Tiusweyasiitø tarømarig, trurrigu maig kõmigwan tøgua uñabe.

3

Tiuswei ureemeran mandø pera pasramigwan wamindig

¹ Inchawei i trendaibe chi isumgaig isig kõmøtø kõn. Møikkøben Tiusweimburabelan ashib pera pasrønrrab isubiibe, tabigwan marøb meganrrab isun.

² Trube treeg købene, tru Tiusweimburabelan ashib pera pasrabiibe, mugøben 'ñibe õyeege kõn' tainanrrabgaig kõmig kõn. Kan sraindø tøgais, chigøben incha ashmøtø, maig pasramigwan pasrabig, maig unamigwan tab isa møra uñibig, katøganelø 'õyeege kõn' cha, chi tainanrrabgaig, katø mugøben nui yau pubelane, yaambumay wamønrrab muniitø wabig. Katø kusrenanrrab kaimabig kõmø, kusrennøbig,

³ vino menrra mucha mutsiiraptiig kõmøwei, kwayam lamig larrø chullig kõmøwei, treeg kõmøtø, purø tab inchibig, kwayamigwan kõmø, tab kõmigwangøba labig, anwan larrø chullig kõmøwei, treeg kõmig kõn.

⁴ Katø nui yaambu mandø maramigwan asam kusrebis, nui ureemeragucha nõ maig taigwan mørøbelø tøgais kõmig kõn, maig købash inchineeløgue.

⁵ Kaguende nui yaambugen mandø maramigwan asam kusremiibe, ¿Tiuswei iglesiayuelane kan mandø asha marøb pasraiasamø?

⁶ Tru Tiusweimburabelan asha marøb pasrabiibe, Tiusweiwan ke mõi srø nebua ashib megabigwan pasramig kõmøn, ke purab nuig kurmab inchib

kebya, inchippa tru nugwaimandzigwan mōra pasrōnrrai pasrinuutōwei kebeñib megamōnrrai.

⁷ Katō nōbe Tiuswan ashmō misaamera mendailō chi tamgaig chiyutōgucha sōlwan uñibig kōmig kōn, nōguen treeg kōmubendō, ka isatō inchib pasran tainab pasrōmōwei, katō nugwaimandzig chiyugōben kebeñchai pasrigu, truyu kebeñib megamōwei inchai.

Iglesiyau purugub pōnrrōnrrai pōnsrailan maig kōmigwan wamindig

⁸ Katō diáconosmera, tru iglesiayu purugunrrai wesrawa pōnsrailō chigucha, mugōben chine cha asinamō mōguelō kōmig kōn, chigōben martrab chippe, ka wamindiitō kōmō, martrab waminchibelō, katō vinon menrra mucha mutsiirapteelō kōnrrab kōmōweingue, maramgaigwan mara, ke chinha kōben an nōrrō katōramigwangōba lamōwei inchibelō.

⁹ Tru isubigwan Cristinug pasra tōgagūigwei sōrig pasrabigwane tin tōga pōnrramig kōn, nōmui isub kebachib pasrabigu chi kalō kōn chibig chigaig, chishchig tōgague.

¹⁰ Tru iglesiayu purugub pōnrrōnrrabelane maig kōtashchab ashberrig asiilō kōmig kōn. Inchen yandō 'chi kōn' tamgailō kuikkurrimbe, iglesiayu purugunrrab diáconosmera pōnrramisrtrun.

¹¹ Katō ishumburmera chigucha, mugōben chine cha asinameelō kōmig kōn, ambumay imay wam kusrab, wam niga llliramōwei, ka chigōbendō incha ashmōtō, maig pōnrramigwan pōnrrabelō, katō chiyutōgucha chi isumgaig pōnrrabelō, treelō kōmig kōn.

¹² Iglesiayu tru diáconosmerabe kan sraindō tōgar kōmig kōn, katō nōmui uremeran tab asam kusreb, nōmui yaambu chitō maramigwan asam kusreb inchibelō.

¹³ Kaguende tru diáconosmera nōmui maramigwan tabig marōb pōnrrabelōbe truba tab pera marōbelō kui asiilō kōb, katō tru nōmui isubigwan Cristo Jesúsweinug pasra tōgagūigwane masken chigucha chi kōrig isumō eshkab pōnrrōnrrun.

Purō nuig tabigwan mu nebua asiimīg pasrabig

¹⁴ Na iigwan ñun pōrar, petō ñun ashchab attrab isua.

¹⁵ Inchippa nan petō arrum nebumub chi inchene, trube, Tiuswei yaelai utu ñi mandō megamigwan tab isua pasramig kōnrrai inchar. Truibe ōsig wab Tiuswei iglesia, tru newan ciertonigweyasiibe pilar lataig, merrarrab pasrabig, truig kōn.

¹⁶ Inchawei mu 'treeg kōmōn' chib pōnrranga, nam Tiusweimburabelan marōb pōnrraig mu nebua asiimīg pasrabiibe, purō nuig kōn: Cristobe kan mōg lataig asrbaig kenamisrōb,

Espíritu nune chigucha kalō marmīg,

tabig kui kenamarig kōb,

katō nōbe ángelesmera asig kōb,

judíos kōmō misaamera wammōra kōnrrai wamindig kōb,

yu pirau misaamera nune kōrewa pōnrramisrig kōb,

katō nune srōmbalasarō tōrguegwalmabiisrō utig kōb kōn.

4

Tiusweimburabigwan elacha kaigwan marōb kurrabelan wamindig

¹ Pōs Espíritu Santobe tōrgandō kelarrab eshkan, srabe kwalōmmerawane mōilōgōben nōmui isubigwan Jesucristoinuutō pasra melōwa truyutō

melom̄ot̄, chab tar̄omisra, kwaimandziimera keḡorr̄sr̄k̄obelan tru kuind̄o m̄or̄ob, kat̄o kusrenaniil̄o kwaimandziimeraimburabigugurri arrubigwan m̄or̄ob kebamrrun cha.

² Treeg kusrenaniil̄obe tru pur̄o tr̄omb̄oig isa waminchibel̄o ka palat̄o tab inchib misaamerainukkurri arrubig k̄on, k̄orig t̄ogaḡonrrai tru n̄omui isub kebachib pasrabiibe yand̄o nasrkwail̄o t̄ogar, kan tsandz̄on pachibiit̄oga parri latail̄o.

³ Tru misaamerabe kasharam̄onrrai meramba, kat̄o m̄o mamimerane mam̄onrrai meramba inchun, tru newan ciertonigwan nebua asha k̄orebel̄o, 'truba ungua' chib manrrai Tius mara p̄onsrailan.

⁴ Kaguende chiwand̄ogucha, Tius n̄o mara p̄onsraibe kaig k̄om̄o, tabig k̄on. Inchawei Tiuswan 'mayanguen ungua, ungua' chib utigwane nambe chiwangucha kashmumig k̄on.

⁵ Kaguende Tiuswei wamgurrimba, Tiusba wamindikkurrimba tabig chishig k̄onrrai marig k̄on.

Jesucristo karua pasrigwan pur̄o tab mar̄ob megabig

⁶ Inchawei namui nunelan iilan kusrenan̄ob, kat̄o tru isubigwan Cristo Jesúsweinug pasra t̄ogaḡom wamd̄ogaba, pur̄o tabig kusrenanigu treegwan mar̄ob arriit̄ogaba chishkand̄o pasramig k̄onrrai marig pasr̄owabe, ñibe Cristo Jesúswei truba tab mar̄ob megabig k̄onrrabguen.

⁷ Chi treeg k̄omubend̄o, n̄om̄d̄o isua chugúinguen m̄ormubend̄o wamindilanba, ishumburmera k̄ollizheel̄o kagat̄o ka wamincha m̄oriilanba, m̄or̄ob pasr̄omumig k̄on.

Ñibe masken Tiuswei tabigut̄o mar̄obig mar̄ob meganrrab isu.

⁸ Asr chisht̄o k̄onrrai esheḡob luliima, mait̄oguen purugúibe, tru mas Tiusweimburabelan maikken elachim̄o mar̄ob megaig truibeguende, chiyut̄ogucha lut̄ogurri tab k̄onrrai purugubig k̄on. Kaguende yu m̄oi òsig waraigu lata, kat̄o wend̄o attrabigu lata, tabigwan tranrrab misrig t̄ogaiig k̄on.

⁹ I trendaibe chi isumgaig isig k̄om̄ot̄o k̄on, mayeel̄o treeg kuitamab isua chi kashm̄o utamig.

¹⁰ Incha òyeekkurriwei nambe i maramigwane ¡kat̄o! martrab isua mar̄ob, maig kuingucha kullaarab elachim̄o mar̄ob melabel̄o ker, kaguende nambe Òsig wab Tiuswan muniirab melabel̄o kuikkurri, tru mayeelan kaigyugurri Wesrabigwan, nun k̄orebelaneguende wesrabwei inchibigwan.

¹¹ Iilane ñibe maringarub kusrenanrrig.

¹² Ñi un̄otiig kuikkurri mugucha kaasiinab pasr̄onrrab k̄om̄ot̄o, masken ñibe Jesucriston k̄orebelayasiibe ñi chi wamindiil̄oyu lata, maig k̄oben k̄om̄o, tab isua unigu lata, undag k̄obigwan t̄ogagúigu lata, ñui isubigwan Jesucristoinug pasra t̄ogagúigu lata, kaig marm̄o chishig unigu lata, n̄om̄guen ñun asha kusrenrrai megamig k̄on.

¹³ Na arrumnegatiibe mayelai merrab, Tiuswei wamwan p̄origwan leb, 'maig melamigwan treeg mar̄ob melay' chib, kusrenan̄ob indamig k̄on.

¹⁴ Ñun Tius keta traniit̄oga chiḡoben mar̄obig kuigwane pesannab elachib pasr̄onrrab k̄om̄o, Tiusweimburabelan pera mar̄ob p̄onrrabel̄o n̄om̄ mayeel̄o misra n̄omui tasiimeran ñuim pala estsara, ñi chiḡoben mar̄obig k̄onrrun cha Tius maig karuben ñun eshkaig k̄obigwan.

¹⁵ Iiland̄o ñiguen tab isub kebya, truigwand̄o martrab pasramisr, Tiusweiwan ñi kat̄oguchinguen nebua ashib megabigwan mayeel̄o nebua ashchai.

¹⁶ Pøs maig kōmigwan ñiasiitø ñuimburaptøwei tab ashiptø megau, katø tru ñi kusrennøb megaigwan chigucha. Truigwane elachib pasrønrrab kōmø, kerriguba marøbig marøb megau. Ñi treeg marøb megawabe, ñiasiitøwei kaigyugurri webib, katø tru katøganelø ñun mørøbelan chigucha kaigyugurri wesrab inchabguen.

5

Tiuswei ureemeraba mandø kōmigwan waminchib

¹ Kōlli misagwane tsakkandø namig wamømøtø, masken tammaytø, wamindamig kōn, maig melamigwan treeg marøb megamig kōn chib, kan mōskawan lataitøwingue. Inchen ureeteelane ñui trag nunelø kui lataig indamig kōn.

² Inchen ishumbur kōllizheelane ñui usrin kui lataig inchippe, srusralmerane ñui trag nuchalø kui lataig indamig kōn, chigøben kaig isua kōmøtø, tabig chishigwan isuague.

³ Inchen piudamera kerriguwan nōmdø kōrrømisrar kerrigu mugucha ashchaptiig chigarwane tabig purugunrrig.

⁴ Inchen kan piuda nusrkalø kui, kabe awelumera kui tōgaig kōbene, trube, tru ureemerabe Tiusweimburabigu maig maramig kōben treeg marøb, trube, tru nusrkaløbe nōmui yaelai chi palabigwane nōmwei ashib purrønrrabelø kōn, nōmunma maig tabig marig kōbig kōben, kōlleelan treetøwei marøb. Kaguende øyeebe Tiuswei merrab truba tab kui asig kōn.

⁵ Inchen piuda tru kerriguwan nōtøzhig, yandø nōtø kōrrømisraibe, Tiustøwei purugunrraitamab isua pasramisra, yem kwaløm Tiusba waminchib, purugunrrig chib miab megabig megan.

⁶ Trune piuda tru nōtø kōrrømisrøbig nun maig marøg kōbendø marøb pasrabiibe, øsig uningucha nøbe kwaig lataig kōn.

⁷ Øyeege maramelangucha marmø kōmø, martrain karunrrig, mugøben 'kailø kōn' tainab pønrramig chigargønrrai.

⁸ Pøs mōikkøben nui nōmmisagwan lata, katø nui naachaguelandøwinguen isua ashmibe nui isubigwan Jesucristoinuutø pasra tōgagūigwan wendøbasraig, katøganelø Tiuswan kōremeelø lataguen kōmø, purab kaikken kōn.

⁹ Tru munchimeran pøra tōgagūigu kan piudai munchiwan keerøppe, sesenta aňskurrimbuniigwandø pøra keeramig kōn, trurriugu nui keebatø megabig kōbigwan.

¹⁰ Truibe chigøben tabig mariiløyu mu kui asig kōmig kōn: nui uregwan nōrrøranøbig, katø mugøben nui yau pubelan, yaambumay tab wamab wabig, katø Tiuswei misaamera yau puben, srøbmeran kwallibig, katø chine kaig nebulø melabelan purugub megabig, katø chine tabigwane marøb megabig treetke.

¹¹ Inchendø tru piudamera ureeteelø nōmdø kōrrømisrøbelane, tru munchimeran pøra tōgagūigu nōmungucha tōga kerbasamig kōmøn. Kaguende nōmui asru kaig marøg kōbig arrubiitø, Cristoinukkurri tarømarene, katø kasharag kui inchib mendabelø kōn.

¹² Inchabe tru Criston srøtø nebua asha tru nøba pønrrønrrab misrig kōbigwan treeg martrab kaima, kaigyu pønrsrailø kōnrrab pønrramisrøbelø kōn.

¹³ Inchagucha ke yamørig, yamørig llirab pønrraptø, yandø pøiløguen misrøbelø kōn. Trurriugu pøiløtø misrmøtø, katø ambumay imay wamniga

lliramba, katø chiyugøben kegalamørøb, chi wamindamgailan wamincha møramba inçhibelø køn.

¹⁴ Inchawei treekkurri piudamera ureeteelø nõmdø kørømisrarbe nabe ka kasharanrai inchar. Ureemera tøgagøb, katø nõmui yaambu mandø purramigwan asam kusreb inçhai, Satanás, tru ashig kømui inçhibig, chineto tainab põnrramig chigagønrrab.

¹⁵ Inchawei piudamera mõiløma, pella chab tarømisra, Satanáswei maywan wendautø chab ambubguen indin køn.

¹⁶ Kan ishug Jesucriston kørebig nui yau piudamera tøgaguabe, purugub nõ asamig køn, iglesia ke tranrraindø muniirab kømig kømønrrai. Øyamaybe tru piudamera kerriguwan mugucha ashchaptiig chigarwan, maig palabigwan ashib tøgagømig chi palømønrrun.

¹⁷ Iglesiayu maig køben kømønrrai truba tab ashib, Tiusweimburabelan pera marøb põnrrabelane nõm mandø tabig indig kønrrabelø køben treegwandø tab inçhimøtø, maya nuguen tab inçhib tøgagømig køn. Tru Tiuswei wamwan waminçhib eshkamiguba, kusrennamiguba, truigwandø truba martrab isua merrarawa põnrramisøbelan.

¹⁸ Kaguende Tiuswei wamwan pørigube trenchibig køn: “Kan wey, tirigun kwattraí itøbunab megabigwane, mabashig kømub pusalgutsamig kømøn” cha. Incha katø trenchibig køn: “Chi maramigwan marøb megabiibe tru nõ marøb megaimburø pagar utamigwein køn” cha.

¹⁹ Tiusweimburabigwan pera marøb pasrabigwane kaig køn tainab kemesrøb srua kønrrai inçhimumig køn, tru treeg marigwan kan pailø kui, põnelø kui nõmashib ashibelø treeg køn çhib eshkanrrabelø kaabene.

²⁰ Inchendø kaig maramigwan elachimø marøbig marøbelane ‘øyeeg marmumig køn’ cha, mayeelai merrab mur alegamig køn, katøganeløgucha treegwei marmønrrab køriimatønrrai.

²¹ Tiuswei merrappa, Jesucristoi merrappa, katø ángelesmeran Tius lawa wesrailai merrappa, iig øyeeg maramelan marmø kømø, ñi mar-trai karua pasrar, kabe mõigwane purømisrøb trugatøtø inçhab kømøwei, mõigwandøgucha lata asha maramig køn.

²² Chigøben marøb pasrønrrai wesrawa pasrtrab, ke mõi mõi tab ash-mubendøbe, mõigweim pala køben, ñui tasiimeran estsarmøta, nõmui kaig mariilan ñigucha tøgatø marøb pasraig webimønrraimbe. Chigucha kaig martrab kømø, tabig chishig pasrønrrig.

²³ Møingurrimbunøbe, tsøøbitø, tsøøbitø muchimøtø, katø lamøzhig vinogucha mutchig. Kaguende ñibe patsø tre tab kømuinab, kwanrrømeragucha chi kwanrrø køben katø katø webarrinabig køn.

²⁴ Kaig mariilø kan utu mõguelaimbe maig køtashchab asamig pumøwatø tørgandø kenamisøbguen indan. Inchen kaig mariilø katøganelaiwane tsøndatøsrø treeg kuin kui nebua asiilø køn.

²⁵ Katø treetøwei chigøben tabig mariiløgucha tru urastø tørgandø asamdiig kenamisran. Inchen tabig mariilø katø mõi mõi kenamismø põnrrabikkucha, asiimig treetø kørømisrmøtø, kenamisrøbig køn.

6

¹ Ñim mõitøgucha ka karua srua kuindiig melabeløbe ñimun karub pera købelane ka palabino inçhib maig købash inçhimø, tab indamig køn. Tiuswei munchiwanba, katø tru tabig kusrenaniilanba purø trømbøig wamindig kømønrrai.

² Inchen ñim mõiløgøben, ñimun karub pera købelø Jesucriston kørebeløtøwein tøgarbe, Cristogurri nunelø kønmaptø, maig køben palabinøtø indamig kømøn. Masken treeg kømøtø, purø tabguen mara tranøb melamig køn, kaguende nømui maramelan ñim mara traninabeløbe Jesucriston kørebelø undaaraig nunelø kuimba. Iigwane kusrenanøb, øyeege marøb kømig køn chib waminchig.

Chigurrimbunø palømig purø tabig ciertonig

³ Namui Señor Jesucristoi chigucha chi kalø kusrenaniimig tabiiba, katø Tiusweimburabelan nam marøb kømig kusrenaniiba truig maig køben treetøwein kømøtø, mõikkøben ka peemaytø chi tabig kømig kusrenanøbiibe,

⁴ nøasiitø purø kusrebig kurmab indan, chigucha chi kusremig købendø. Incha maig kø chib payib aleguiyamig, chigøben wamindiilan kwayam lab wamindamibe, kan kwanrrø lataig nigaig køn. Incha øyeekkurrindøwei truyugurri arruppe, katøgan chigøben tøgagøben pusrkwai asamig arrumba, kwayam lamig arrumba, katøganun trømbøig marøb tsalø wamamig arrumba, chigøben kemesra trømbøig isub amønamiig arrumba,

⁵ katø tru kaig maramig isubiitø nømui turmera mindiilø tøga misaameraba ke chi kømubendø ka kwayab kømig arrumba indan. Truiløbe tru newan ciertonigwane kerraig chiga misaamera, Tiusweimburabelan marøb tøgagúigwane nømbe trutøga an marøb pønrramiigweyasig tøgar køn.

⁶ Inchen nam maig tøgagúizhiitøgatø kasraatø melabelaimbe tru Tiusweimburabelan marøb tøgagúigugurri, chigurrimbunø tøgagømig arrubwei inchibig køn.

⁷ Kaguende nambe yu piraumayma, chigucha chigar yandiig amrruig køppe, katø treetøwei chigucha chigar ambamig kønrrun.

⁸ Inchawei nam mamig tøgagøb, asru kemig tøgagøb indinukkurrimbe, trutøgabe kasraatø amønamiig køn.

⁹ Kaguende pua misrøg kui inchibeløbe, chine tabig lataig kenamisrøb arruben, tregwan chull asha kegørran. Incha chine chine nebunrrab isuptø maramgaigwan mariiløyuba, katø ka trømbøig mincha pønrramiig kønrrai mariiløyuba kegørra pønrramisren, truiløbe møguelane yandø chindamikkuchagaig misra pønrrønrrai kegørrøsrkøb, managatiig kaigu kegørra pønrramiig kønrrai mara pønrran.

¹⁰ Kaguende chigurrimbunø kaig maramig arrubiibe, anwan ¡katø! ke kan chinchimmøø inchib chull indiiløyugurri arrubig køn. Inchawei mõiløgøbenma an tøgagug købiitø yandø pella, nømui isubigwan Jesucristoinuotø pasra tøgagúigugurri tarømisra, nømasiitøwei chine chine purø isumdiig puig melønrrab tøga pønrramisran.

Kørrømisrø ibig inrrai wamindiig

¹¹ Trune ñi Tiusweyasiitø pasrab møøbe treeg indameløyugurrimbe tarømisramig køn. Sølgandø tabig kømigwanba, Tiusweimburabeløyu tabig kømigwanba, isubigwan Jesucristoinug pasra tøgagømigwanba, undag købig tøgagømigwanba elachimø marøbøig marøb megamigwanba, katø maig købøndø inchimø, purø tammay megamigwanba, ilan martrig.

¹² Nui isubigwan Jesucristoinuotø pasra tøgagúigwane ñi tøga pasrønrrab isua kwayab, tru managatiig øsig kømig tøgagúigwane pachamørrab kømø tab tøga pasrau, Tius trunun tøgagønrrai wamøben, tru ñi truba yamelai merrab, purø tabig pasrønrrab waminchib pasraig købigwan.

¹³ Katø chigurrimbunø pønrrabigwan øsig kønrrai tranøb Tiuswei merrappa, katø Poncio Pilatoi merrab, purø tabig nø maig kuigwan 'nabe treeg kur' chib, waminchib eshkab pasrabig Cristo Jesúswei merrappa, nabe ñune karua pasrar:

¹⁴ tru martrai ñun karua pasrigwane kaig mariitøga chillig indig chigaig, katø chigøben 'kailø køn' tainab pasramig chigaig, treeg tøgagønrrai namui Señor Jesucristo kenamisramnegatig.

¹⁵ Yandø tru treeg maram kwalømmera puben, trunun nø kenamartrab kuinrrun, tru nø mayanguen tab indig, tru nøtø Mayeelaim Pala Pasrabig trurrigu maya reymeraim pala nø Rey, katø maya misagwan ashib karub pønrrabelaim pala Nø Karub Ashib Pasrabig.

¹⁶ Managuen kwanrrabig kømíig, muguen kemalamgaigu tørguegwalmabigu wabig, nune mu møkkuha asiimíig, katø mugucha nune ashchab kaimaig, Tius nøtø køn. Treegwan purø tab indiiba, managatig mayeelaim pala karub wamibabe nuyasig kønrrai inchar. Treeg kønrrun.

¹⁷ Møin kwaløm yu pirau pua misaamerane puarmera kermaptø, purab nørreelø kermab inchib, tru chigurrimbunø tøgagúilø treetø kønrraitamab isumgailøyu ke truyutø isua pønrrømønrrain karunrrig. Masken treeg inchimøtø, nam kasraatø tab kui warønrrai Tius tru chigucha palønrraingais tøgagømburab tøgagønrrai namun tranøbigweinug isua pønrrønrrai inchig.

¹⁸ Tabigwan marøbelø kønrrain karunrrig, truba puarmera misrøppe, nømui chigøben tabig mariiløyu puarmera misrtrai. Tøgagúigwane chigucha merø kui inchimø, lata pirishib purugunrrab muniitø købelø kønrrai.

¹⁹ Øyamaybe tru wendøsrø attrabigweyasig, tabig pølbasa marøb esegab kebamrrun, øsig kømíig, tru managatig cierton øsig kømigwan nebua tøgagømig kønrrai.

Timoteowan wamindiilø srabeig

²⁰ ¡Au! Timoteo, ñun chi martrai trana pasrigwane tabig isua mōra tøgagu, Tiuswane chigucha kømíig marøb wamindiilanba, ke ka wamincha mōriilanba, katø tru nømui nørro nebua ashib kusreb taig chi cierton kømíigwanba, treelan mōrøb pasrønrrab kømø meganrrig.

²¹ Pøs mōiløgøbenma trunun marøb kebamba, nømui isubigwan Jesucristoinuutø pasra tøgagúigugurrimbe yandø pella, chab tarømisran.

Tiuswei ka yandø tab indiibe ñimba pasrønrrun.

2 Timoteo

Timoteowan 'ka uñguh' cha, Pablo pørig

¹ Na Pablo, Tius nan trendø treeg kørnrain kuikkurri Jesucristo nøashib karua ørig, øsig kømigwan Cristo Jesúsweinug tranrrab misra kørømisrigwan eshkanrrai ørig,

² nai undaraig nusrkai lataig, ñi Timoteowan i kilgawan pørar. Tius Møskaweimba, namui Señor Cristo Jesúsweinba tru ka yandø tab indigwan køben, lastima asigwan køben, chi isumgaig tab købigwan køben ñuim pala kørnrai isur.

Cristoimburabigwan kørmo waminchib

³ Chu uraskucha pesannab elachimøtø nabe truigwan, yem kwaløm ñune tøga tøga isua miab megappe, Tiuswan 'mayanguen ungwa, ungwa' chibig kur, nai isub kebachib pasrabigu 'chi kalø kørn' cha kebachibig chigaig, na treeg marøb pasraig Tiuswan, tru merrabsrø nai kølli misaamera Tiusweyasig maig marøb melabelø køben treetøwei.

⁴ Ñi kappin kørøgaigwan isubene, nane katø malaugue asinrrabna køtan, na purø tab kui mørøb truba katø kasrag pasramig kørnrai.

⁵ Nabe katø katø isuinabig kørn, ñi ka isatø inchib kørmo, ñui isubigwan Jesucristoinug cierton pasra tøgagúigwan. Truigwane ñui awela Loidaba, ñui usri Euniceba truilømerrig pølbasa tøgagúig købig kørn. Incha mømibe ñuinukkucha truike pasrømø kørmo, pasraitamab isua pasrar.

⁶ Treekkurri na nai tasigwan ñuim pala estsaren, ñi chigøben marøbig kørnrai, Tius keta tranig tøgagúigwane pesannab elachib imørnrai, katøyug isunanrrab inchar.

⁷ Kaguende Tiusbe namune køríteelø kørnrain kørmo, chishkandø marøbig kørnrain tranig kørn, undag købigwan tøgar kørnraimba, asr mumay srua itanmaptø pønrrømeeelø kørnraimba.

⁸ Inchawei Señor Jesucristoimburabelan wamindamigwan kørig kui inchib pasrømøwei, namui Señorgurri kailan keeri yau na pasranmaptø kørig kui inchimøwei inchig. Masken treeg kørig kui inchimøtø, Tiuswei tabig srø wamgurri na maig kaig nebuig megaben, treetøwei meganrrab inchi, Tiuswei maramburab marøbig truig maig køben treeg.

⁹ Kaguende namun kaigyurri wesrawa, newan tabig chishig amøñinrai wamabiibe nøwein kørn, kabe nam chigøben mariiløgurri kørmo, nø trendø treeg martrab isuitøgaba, nui ka yandø tab indiitøgaba kørn. Tru iig ka yandø tab indigwane Tiusbe Cristo Jesúskurri tranig købig kørn, chigurrimbunø pønrrabikken kaabenbatøsrøwei.

¹⁰ Inchen mømibe Cristo Jesús namui Kaigyurri Wesrabig yandø kenamisren, tru ka yandø tab indig pasrabig købiibe kenamisran. Incha tru managatig kerrigwan kwamig kørnrai marøb pasrabigwane nøbe kerrigu pinisha, tru Tiuswei tabig srø wamgurri tru øsig kømig managuen patsømønrrabigwan tøryu wesrawa pasran.

¹¹ Inchen nabe truigwan eshka waminchibig kørnraimba, Jesucristo nøashib karua ørig kørnraimba, kusrenanøbig kørnraimba wesrawa pasrig kur.

¹² Incha øyeekkurri nabe øyeeg kaigu pureb megar. Treeg kuingucha øyeeg pasrarmaptø chi kørig kuim pasrømur. Kaguende nabe mun kørewa pasrarmab isua pasrar. Na tru srahe kwalømweyasig na nuinug esegawa

tøgagúigwane chi puraimønrrai ashib tōga pasramig, nōbe maramburab maramigwan tōgaig kui, nabe ashmø kømø, asha pasrar.

13 Tru chi kalø kømø tabig kusrenaniilø na wamindigwan ñi mørigwane, trunon merrarrowa treetøwei marøb yamig tōgagønrrig, isubigwan tru Cristoinug pasriguba, undag kōbigwan Cristo Jesúsweinug pasra tōgagúiguba.

14 Tru purø tabigwan ñun marøb tōgagønrrai tranigwane, tru namuinug pasrabig Espiritu Santo purugúitōga tab asha tōga pasrau.

15 Pøs ñibe asha kuinrrun mayeelø Asia pirausreeløma nan chab tarømisrigwan, truilai utube Figelo kōben, Hermógenes kōben tarømisrig kōn.

16 Onesíforoi yauelan Tius lastima tōgagønrraimab isur. Kaguende Onesíforobe katø katø nan chi isumø pishindø pasrønrrai purugubig kōn, katø nan kailan keeri yau pasranmaptø kōrig kui inchimøweingue.

17 Masken treeg inchimøtø, Romasrøma pub latatø, nan wetørramnegatig lawa, wetørrabig kōn.

18 Señor Onesíforon tru lastima asig kōmigwan nebua tōgagønrrai tranrrai isua inchar, tru srabe kwaløm puben. Ñibe yandø tsabø ashibig kōn Efe-sosrøma nōbe namun yeeg purugub megaig kōbigwan.

2

Jesucristoi kan tab suldau kōmig

1 Ñi nai nusrkai lataibe, tru ka yandø tab indig Cristo Jesúsweinug pasrabigu mur isua pasrau.

2 Truba yamelai malau na waminchen, ñui kalutōga ñi mørig kōbigwane katōganelan chi isumgaig martraptø mōguelan martrai karua pønsrø, nømgurringucha katōganelan kusrenanrrapteelan.

3 Chine isuig megamig pub arrubigu, ñibe namba treegu pureb meganrrab isu, Cristo Jesúswei kan purø tab suldau lataig.

4 Kan suldauma chi maramelan marøb meganrrab, truyu kebyaikkurrimbe, katōgan nøørø peg marameløyube kebya megamøn, nun suldau kōnrrai pasrøbigwan purø tab kui mørtrai martrab.

5 Katø mōig kanab luldashchab kan luløbig chigucha lulrrab pasramisra, luløbelø chitø maramig kōben treegwan marmøwabe, tru lulimburø coronan utønrrab kaimanrrun.

6 Katø kan kwallibig chigucha pøsra, pøsra kwallabe, ellmarig misrøbigwane nømerrig tulishinrrabigwein kōn.

7 Inchawei iig na ñun trendailane ñiguen chi chibig kuitashchab tab isu, pøs Señorbe chiwandøgucha ñi tab chigúi mōramigwan tranrrun.

8 Jesucristo rey Davidwei misagugurri arrubiibe kwawa, kwailai utugurri katøle kurrigwan ñibe pesannamø isuagu, tru Tiuswei tabig srø wamwan na maig eshkab kusrenanig, treegwan.

9 Inchawei tru wamgurri chinetø kaig nebuinab, kailan keeri yau pasramig nebutan, kan larrø kaig lataikke. Inchendø Tiuswei wambe merrarrowa kømøtø pasran.

10 Inchawei treekkurri chinetø kaig nebul arrubigwan treegwan kerigu ka pureb megar, Tius nø lawa wesrailayasig tab kōnrrai isua, tru kaigyugurri wesrailø kōmig Cristo Jesúsweinug pasrabigwanba, tru managuen patsønrrabgaig tōrguegwalmabigwanba nømgucha nebua tōgagønrrai.

11 Iig trendaibe chi isumgaig, isig kømøtø kōn:

Nam nõba kwawabe,
katø nõba øsig purramig kõnrrun.

12 Maya kaig nebub arringucha, melabig meløwabe,
katø nõ ashib karub waisrøn chigucha nõba ashib karub purramig
kõnrrun.

Nam nun 'ashmeelø ker' chibene,
namungucha nõbe 'ashmiig kur' chinrrun.

13 Nambe nõba maig pønrramigwan treeg pønrrømuingucha,
nøbe namba maig pasrabiibe chu uragucha treetø pasrabig kõn,
kaguende nõbe maig køppe, managucha treetø kua.

Sølwān marøbig kui asig kõnrrab inchi

14 Iilane pesannamønrrai isunanøppatø, isunanøppatø meganrrig, 'øyeeg martrigay' chib Tiuswei merrab karua pasrøb, ke kan chi wamindamgaigwan treetøgatø ke larrøbitsamburab larrøbichib, ambugurri igurri aleguiyab kõmønrrai. Treeg mariibe chi tabig purugumøtø, tru wamindigwan mørøbelane ka trømbøig mindishatø kõrrømarøbig kõn.

15 Nibe ñuimburappe Tiuswei merrab søl marøbig kui asig pasrønrrab, purø tab asha isuptø marøb meganrrig. Chi maramigwan marøb pasrabig, chiyugucha kõriimisra pasrønrrabgaig tru wam newan ciertonigwane, maig kõnrrabigwan sølgandø kusrenanøb pasrabig treeg kõnrrab.

16 Tiuswane chigucha kõmiig marøb wamindiilanba, ke ka wamincha møriilanba, treegwan martrab kõmø isua pasrønrrig. Kaguen treeg waminchibeløbe nõmui kaig mariiøyu mas kegørrab ambubelø kõn.

17 Inchen nõmui treeg wamindiiløbe kan pill-llab pisrø asrwan trerangarub larrøbichib ib lafatøwei martrun. Treeg marøb pønrrabelai utube Himeneoba, Filetoba kõn.

18 Pøs truiløma tru newan ciertonigugurri pella tarømisra, tru kwailø øsiiranrrun taibe yandø chab øsiirabguen indin kõn chib, trumay waminchib kebamba, mõilanma tru nõmui isubigwan Jesucristoinug pasra tøga melaigwane yandø mumaygucha kõmuielø melønrrai mindisha kõrrømarøb kebambin kõn.

19 Inchendø treeg kuingucha, Tius purø may tamara pølbasa pasriibe mugen kõnøgamgaig pasran. Truyube øyeeg chibig pørig tøgaig: "Señorbe mõiløtø nuielø kuigwan ashibig kõn" chibiiba; katø: "Møitøgucha 'Señorwei munchiyu uñibig kur' chib waminchibiibe kaig marigugurri tarømisramig kõn" chibiiba.

20 Kan nu yauma pasumera, køtsømera pønrrappe, orotøga mariiløtø pønrrømøwei, andøga mariiløtø pønrrømøwei indan. Treeg kõmøtø, tsitøga mariilø køben, pirøtøga mariilø køben pønrran. Møiløbe purø tabig marøbyutø katørab srua kõmig køben, mõiløbe ka chi marøbyu køben katørab srua kõmeelø kõn.

21 Inchawei mõikkøben øyeeg kaig mariiøyugurri chish misrabe, purø tabig maramigweyasig kan pasun lataig tøgagømig kõnrrun, tabigweyasiitø tarømarig, chiyutøgucha Señorweimbe tabig martrabig, chigøben tabig maramigweyasiibe kaima pasrønrrabgaikke.

22 Matsørelø chinetø kaig marøg kui indiiløyugurrimbe ñibe tarømisr. Incha tru sølgandø tabigwanba, isubigwan Cristoinuutø pasra tøgagømigwanba, undag købigwanba, ambugurri igurri tab unamigwanba ñibe tøga uñ, tru nõmui manrrømeran chishchiitøga Señorwan 'purugurra' chib wamab tabig waminchibeløba kanbalatø.

²³ Ke chi wamindamgailan aleguiyam lailøyugurrimba, chugúinguen mormubendø chinetø cha möriløyugurrimba tarømisr. Kaguende treeg indiibe ka kwayab kómigweyasiitø marig kørømisrøbig kui ñibe ashibig køn.

²⁴ Kaguende Señorweiwan marøb megabiibe kwayam laptiig kømøtø, masken mayeelan larrø tab inchibig, trurrigu may kusrenanøbig, chigøben pasrkwanrraptiig taingucha namig mörmiig kómig køn.

²⁵ Katø mörøg kømub chinetø cha mörøbelane, mõi mõi tsag wamømøtø, tammaytø sölwan isunrrai purugumig køn. Nømui kaig mariilan isua møra, Tiusweimay liramigwan inchipa Tius tranøbgunmab isua, tru newan ciertonigwan nøm tab chigúi mørtraí.

²⁶ Incha katøle tab isua møra, tru nugwaimandzig chinetø mara pønsra nømun kegørrøsrka, nø maig martrain køben, treeg marøb melønrrai merrarrawa tøgagúigugurri wegørrønrrai.

3

Srabe kwalømmerawan misaamera mailø kønrrabelan waminchib

¹ Katø ñibe iigwangucha isua asha kómig køn, srabe kwalømmerawane tabguen waramga kwalømmera attrab kui.

² Møguelø ka nømuimburaþtø tabig kønrrai inchibelø, anwane ke chinchimmøø inchib chull inchibelø, purø nørreelø misrøb waminchibelø, purab nørreelø misrøb katøganelane keeshaguen ashmeelø, trømbøig tsalø wamamba inchibelø, nømui møskalan larrø mørmeelø, chiwangucha ungwaguengar, Tius kaagúi lataig inchib misaamera kønrrun.

³ Ka trendø treeg undaguelø kómigwane chigucha chiga misaamera, namappe, chinchaguen tamaramgaig namabelø, wam kusrupteelø, trømbøig maramigwane ke treeg maratøweim puraambubelø, nømun kømøbashtø trømbøig mara petab misaamera, chigurrimbunø tabigwane larrø tsaleelø,

⁴ chi kømubendø tabelan kailai tasku purøøra pønsrøbelø, chi maramigwan tabguen isumubendø mõi mõi marøbelø, nørreelø kermab isubiitø ke chinsraatø inchibelø, chine tab kuimøøb maramigwangøba undaarabelø kønrrun, Tiuswan kømøtø.

⁵ Tiusweimburabigu truba tabig amøñib lataig inchendø, tru maramburab marøbig Tiusweiwane chigucha kómig mara tøgær køn. Øyeeg misaamerane tarømisr.

⁶ Kaguende tru treeg marøb møguelai utuelø møiløgøben køn, ishumburmera chiyu køben mur isua pønrrømøwa, chigurrimbunø kaig marøg købig arrubig srua ambiilø, kaig mariitø netsilai yamerayu kebamba, tru ishumburmeran kegørrøsrka treetø treetø melønrrai srua købelø.

⁷ Inchen tru ishumburmerabe chu uraskucha kusreb chib meløbendø, tru newan ciertonigwane managuen nebua ashchab kaiman.

⁸ Tru Janesba, Jambresba Moiséswan chi marmønrrai sötøluløbelø latawei, tru møgueløbe tru newan ciertonigwane treetøwei sötøluløbelø køn. Truiløbe nømui turyube trømbøig maramig isubiitø netsailø, isubigwan Jesucristoinug pasra tøgagúigugurri tarømisra misaamera køn.

⁹ Inchendø ke øyeetø, øyeetø kuimbe martrab kaimanrrun. Kaguende nøm chigúinguen mormubendørre marøb kuigwane mayeelai malau tøgandø tømrig kønrrun, tru pailø Janeswanba, Jambreswanba maig purayaig treetøweingue.

¹⁰ Inchendø ñibe ñuimburappe na maig kusrenaniilan tab ashibig kòn, na mandø unigwan, na maig martrab isuigwan, nai isubigwan Jesucristoinuutø pasra tøgagúigwan, maya chindingucha tammay megaigwan, undag købig tøgagúigwan, chine pub arringucha tarømisrmø, megabig megaigwan.

¹¹ Katø chine chine nan kaig marinab megaigwan chigucha, purø isuig megamig chinetø puigwan, Antioquíasrø Iconiosrø, Listrasrø nan yeeg trømbøig pui megaigwan. Øyeeg chine trømbøig puig isuig megaben, kerrigu øyeelø chine pub arrubigugurri Señorbe nan chi kømø ka purayamig kønrrai marig kòn.

¹² Inchawei mutøgucha Cristo Jesúsweimburabeløyu tabig amøñinrab inchi-beløbe, isa kømøtø, kaig indinab melamig kønrrun.

¹³ Trune tru larrø kaig møgueløba, katø tabzhig wamincha kaigyu kegørrøsrkøbeløbabe treetøguen kømø, purø kailøguen misrøb amrrun, nømguen may wamincha kegørrøsrkailøtøwein købendø, may wamincha katøganelan kegørrøsrkøb.

¹⁴ Trune ñibe tru ñi kusrewa tøgagúigu, truyutø megabig megau, tru ñi trunun treg kuitamab kørewa tøgagúigwan. Pøs ñibe isua kuinrrun ñun truigwan mumera kusrenanig købigwan.

¹⁵ Inchagucha ñibe unøgurri Tiuswei tru newan tab wam pøriilan yandø ashibig kòn, truiløbe ñune kusrebig kønrrai martrun, tru isubigwan Cristo Jesúsweinug pasrikkurri kaigyugurri wesraig kømig kønrrai.

¹⁶ Pøs Tiuswei wamwan pøriibe kerriguba Tius nui wamwan øyamay chinrrai isungaruben treg pøriilø kòn, trurrigu kusrenanamibe purø tabig, kalø marigwan nebua ashchai wamindamig lata, kalø maren sølwan martrai watsamig lata, tru sølgandø maramig kønrrai kusrenanamig lata,

¹⁷ Tiuswei møøbe chigurrimbunø tabig maramigweyasiibe chigucha palømig newanig kønrraingue.

4

Ñun maig martrai karua pasrigwane martrig

¹ Tiuswei merrappa, katø Cristo Jesús, katøle kenamisra arrua, tru nø ashib karub wamigwan nø tøgä pasamisra, tru øsiguelanba, kwaig warabelanba, maig kønrrabigwan nø asha martrabigwei merrappa, marmø kømø martrai ñun karua pasrar:

² Tiuswei wamwan eshkab kusrenanrig. Wamindamdiig kui lata, wamindamdiig kømui lata nui wamwane waminchab muniitø pasrabig kønrrig. Katø øyeeg maramig købig kuin kui nebua ashchai waminchib, kalø marmønrrai wachib, kullaaramø tranrønrrai purugub, trurrigu tsag inchimø, tammay Tiuswei wamwan kusrenanøb pasrønrrai pasrar, ñune.

³ Kaguende tru chi kalø kømø tabig kusrenanig Tiuswei wamwan misaamerabe mørøg kømui inchib pønrram kwalømmerra punrrab kòn. Nømbe ke chine peetø mørøg køb mendindø kuig køppe, nømui trømbøig isuiløyu maig køben tregwan marøb kømig, kusrenanøbelø srøitø srøitø tulishib truba nørro pera kønrrun, nøm chi mørøg kuin køben tregwan waminchabelø.

⁴ Incha tru newan ciertonigwane mørøg kømub tarømisra, chi treg kømubendø nømuinetø isua wamindiilan mørøb kønrrab chab lliranrrun.

⁵ Trune ñibe ñuimburappe chiyutøgucha maig pasramigwan tab asha pasrau, maya kaig pub arringucha treggu ka megab, Tiuswei tabig srø wam kaigyugurri wesrabigwan trusrøn trusrø waminchib llirab, Tiusweiwan ñi maig maramig tøgagúigwane newan martrig.

⁶ Kaguende nabe yandø naimburappe na øsig kuigwan Tiusweyasig keta tranrrab kweetsig kømig yandø ke lutau pasrøben, yandø na kwawa webya yamibe puim pasran.

⁷ Nabe nai kwayamigwane purø may kwayawa pasrar. Katø chu pum-srøngatig lulamigwane trusrøngatig lula, isubigwan Jesucristoinuutø pasra tøgagúigwane maig tøga pasrabig kuig treetø ka tøga pasrar.

⁸ Inchawei maig kørnrrabigwan sølgandø tabig marimburo utam corona esegaig tøgagur. Truigwane Señor, tru maig kørnrrabigwan sølgandø tabig marøbig, tru kwaløm nan tranrrun. Tranøbgucha nandø tranmøtø, katø mayeelø tru nø arrumigwan truba truba tab kui isub muniirabelane, may-eelanba tranrrab kuinrrun.

Timoteowan nunashib wamindiilø

⁹ Timoteo, petø nan ashchab attrab inchunrrig.

¹⁰ Kaguende Demasbe i pirauigwangøba undaarab kebya, yandø nane elachippa, Tesalónicasrømay yaig køn. Inchen Crescentebe Galacia pirausrømay iben, Titobe Dalmacia pirausrømay yaig køn.

¹¹ Yube ke Lucastøwei naba kørørrømisran. Marcoswane lawa, ñi pera attrunrrig. Kaguende nøbe tru nai marameløyu truba nu purugunrrautan.

¹² Inchen Tíquicone nabe Efeso ciudadsrømay ørig køn.

¹³ Incha ñi arruppe, Troassrø Carpoi yau tru na kørørrømarig, nai pala itøgueigwanba, kilgamera pøriilanba srua attrunrrig, katø trugurri tru katøgan kilgamera mas palønrabelane pesannanrrab kømø.

¹⁴ Alejandro, tru tsandzøndøga chigøben marøbiibe, nane chineto truba truba kaig marig køn, nø maig marigwan Señorbe truburo maig tranamigwan tranrrab kuinrrun.

¹⁵ Tru møwane ñigucha isuatø ashiptø uñchig. Kaguende Tiuswei wamwan nam waminchimønrrai truba truba sötøluløb kurrig køn.

¹⁶ Tru maig maramigwan asha marøb purrabelai merrab ke srøsrø nan payib srua kørnrrab pølbarendø, tru naimburab 'na treeg mara pasrømur' chib, megabenma, nane mugucha purugumøtø, masken nandø elacha, mayeeløba ke chab tarømisrøptindig købig køn. Nøm øyeg marigwan Tius isua ulø paymuimbe køn.

¹⁷ Treeg kuindøgucha, Señorbeguende naba pasrøwa, chigúingucha kullaaramø, mur pasrønrrai purugúig køn, Tiuswei wamwan nagurri eshka kusrenanig kørørrømisren, mayeelø judíos kømø misaamera truigwan truyu nebua mørig kønrrai. Incha nane Señorbe león lataigwein trigurri kerraig køn.

¹⁸ Katø Señorbe nane chine kaig nebunrrab pønrrabigurri chi kømø, ka purayamig kønrrai, chi indiimíg ashib tøgagønrrautan, srømbalasrø nø ashib karub waisrø tøga wamigweyasig. Tørguegwalmabiibe Tiuswein kønrrun man-agatig. Treeg kønrrun.

Tabig wamindiilø srabeig

¹⁹ Priscilanba, Aquilaswanba, Onesíforoi yauelanba 'tab ka amøñiguh' tan chirrunrrig.

²⁰ Erastobe Corintosrø kørørrømisren, Trófimone Miletosrø kwanrrø kørørrømarar.

²¹ Pishim pølmera kebimøwatø ñibe petø attrab inchig. Eubulo køben, Pudente køben, Lino køben, Claudia køben, katø nunelø mayeelø truilø chigucha ñun 'ka uñguh' chirrunrrig cha, øran.

²² Señor Jesucristobe ñiba pasrøben, nø ka yandø tab indikkucha ñimba pasrønrraimab isur.

Tito

Pablo Titon pørøb

¹ Na Pablo Tiusweiwan marøb megabig, Jesucristo nøashib karua ørig kur, Tius nø lawa wesruilan, tru isubigwan Jesucristoinuutø pasra pønrramigwanba, katø tru newan ciertonigwan nebua asamigwanba na purugub pasrønrrai, tru Tiusweimburab tabig amønami gumay amrrai marøb pasrabigwan.

² Tru isubigwan Jesucristoinug pasra tøgagúiba, tru maig kuigwan nebua ashib ambiibabe, tru managatig øsig kømigwan tøgagønrrurmba isua munig melaigu truyu pasran, Tius tru mana isa waminchimíg, chigurrimbunø købigwan marmøwatøsrøwei tru nø tranrrab misra kørørmisrigu.

³ Inchen mømimbe yandø truigwan maram kwalømmera pubene, Tius namui Kaigyugurri Wesrabig nan martrai karua pasren, trunun na eshkab kusrennen, nui wambe yandø truyu kenamisran.

⁴ I kilgwan ñi Titon pørar, nam pailøba namui isubigwan kanguelarrøtø Jesucristoinug pasra tøgag, ñi nai trag nusrkai lataigwan. Namui Tius Møskaimba, Cristo Jesús namui Kaigyugurri Wesrabiiba, nui ka yandø tab indigwan køben, chi isumgaig tab købigwan køben ñun tranrraimab isur.

Cretasrø chitø maramelø

⁵ Na ñun tru Cretasrø kørørmarøppe, trusrø tru chi maramelø lutø kørørmisriilan lutøgurri tab tamarøb kerrigu chab patsø kønrraimba, katø pueblomørig iglesiamerayu Tiusweiwan pera marøb pønrrønrrabelø wesrawa pønrsønrrai, ñune trusrø treeg kørørmari g køn, na ñun maig martrai karuigwan treeg martrai.

⁶ Tiusweiwan pera marøb pasrabiibe mugøben 'chi køn' tainanrrabgaig, kan sraindø tøgag, katø ureemeragucha Jesucriston kørebelø tøgag kømig køn, nømun 'maig marøb amønig køben amønibelø køn' chib wamindinabelø, kabe 'mørmeelø larrø kailø køn' chib wamindinabelø treeg ureg kømøtø.

⁷ Kaguende Tiusweimburabelan ashib pera pasrabiibe 'øyeeg køn' tainanrrabgaig kømig køn. Ke nø maig taigwandø, martrai inchibig kømøwei, kuchigurrindø ke chinsraatø inchib namabig kømøwei, mutsiiraptiig kømøwei, kwayam lamig larrø chullig kømøwei, ke maramgailan marøb, an nu katøramigwangøba chullig kømøwein kømig køn.

⁸ Masken treeg kømøtø, mugøben nui yau pubelane yaambumay wamønrrab muniitø wabig kømig køn. Tabigwane undaguig, maig unamigwan isua møra uñibig, sølgandø tabig marøbig, Tiusweimburabeløyu newan tabig uñibig, asr mumay srua itanmaptø uñmíg kømig køn.

⁹ Tiuswei wamwan chi isumgaig ciertonigwan maig kusrenanigwane, tindøga pasrabig kømig køn, chi kalø kømø tabig kusrenaniitøga katøganelan 'maig maramigwan treeg maray' chib wamindamiba, katø 'kalø maran' chibgøba waminchibelan, nømguen kalø marøbelø kuin kui nebua ashchai wamindamiba.

Tru peemaytø yunømara kusrenanøbelø

¹⁰ Kaguende nøm maig martrab chippe, ke purab purab pønrramisrøbelø køben, wamdø nigarmera køben, katø may wamincha ka kegørørsrøbelø køben truba nørø køn. Tru treeg inchibeløbe judíosmera tru asru circunci-dawarmera, truilørre mas inchibelø køn.

¹¹ Inchawei treelane waminchib kòmønrrai mera, nòmui trigwane kandø kasra pasramig søl køn. Kaguende chi maramíg mara an nørrø tøgamisrøg køb, ke yaba, yaba yandø mandøgucha kømuielø melønrrai mara kørømarøb amrrun, chi kusrenanamgailan kusrennøb.

¹² Tru Cretasrø kan møg nòmui utuig nòmui tiusmeraiwan waminchib-itøwei nøm tøgagúima trendaig købig køn: “Cretasrø misaamerabe chu uraskucha isa waminchiptø warabelø, animal lataitøguen kømø purab kailø, kan mabgucha ¡katø! mamburab mabelø, trurrigu pøgølelø køn” cha.

¹³ Truig trencha wamindiibe isa kømø, sølwei wamindig køn. Inchawei nømune waminchippe mørmø kømø, mørtraí mur waminchig, tru isubigwan Jesucristoinug pasra tøgagømigwan chi kaiba lindiimíg chishig tabig tøgagúigwane,

¹⁴ judíosmera ka nømdø isua wamindiilø tøgagúilan tru kuindø mørøb pønrrømøwei, katø møguelø tru newan ciertonigugurri tarømisar chi maramigwan nømdø pønrsailan tru kuindø marøb pønrrømøwei inchai.

¹⁵ Chi trømbøig isumeelø chishig tabig isubelaimbe chitøgucha tabig chishig køn. Trune Tiuswan chigucha køremeelø, larrø trømbøig isubelaimbe chigucha chi tabig chishiibe chi kaagøn. Kaguende nòmui turyu isubiiba, isub kebachib pasrabiiba truiløbagen larrø trømbøig mindiilø tøgar køn.

¹⁶ Tiuswei mayu amøñibelø ker chibendø, nòmui chigøben marøb amønaitøgabe chi ashmeelø kui lataitøweih marøbelø køn, ashikken kønrrabgaig køsongønrraptiig marøbelø, larrø mørmø misaamera, chigøben tabig maramigwane martrabga misaamera køn.

2

Chi kalø kømø tabig kusrenanigwan waminchib

¹ Trune ñibe waminchippe, tru chi kalø kømø tabig kusrenanig, truig maig køben treegwan waminchig.

² Møguelø kølleeløbe chigøben incha ashmø, maig pønrramigwan pønrrabelø kønrraimba, mugøben chine cha asinab pønrrømeelø kønrraimba, isua møra misaasun amøñibelø kønrraimba, isubigwan Jesucristoinug pasra tøgagúigwane chi kaiba lindiimíg chishig tabig tøgagønrraimba, undag købigwan tøgar kønrraimba, chine pub arringucha melabig melønrraimba waminchig.

³ Katø treetøwei ishumburmera kølleeløbe, Tiuswei ureemerason maig amønarnigwan amøñibelø kønrraimba, wam kusrab wamniga llirapteelø, vino mutsamigwan larrø chullelø kømønrraimba, tabigwane katøganelanguen kusrenanøbelø kønrraimba waminchig.

⁴ Øyamay nømbe tru keløbar ureetø ishumburmeran: isua møra misaasun amønarnigwan, nòmui kelan, nòmui uregwan undaguelø kømigwan,

⁵ tab isua møra amønarnigwan, chi kaig marmø chishig amønarnigwan, nòmui yaambu chi maramelan asha marøb purrabelø kømigwan, tab inchibelø kømigwan, nòmui kelø maig chiben treeg melarnigwan waminchibelø kønrrai, ‘Tiuswei wamwan chi tabig kømøn’ chib kaig wamindig kømønrraingue.

⁶ Katø matsørelan chigucha ‘øyeeg, øyeeg marøb kømig køn’ chib, isua møra amøñibelø kønrrai waminchig.

⁷ Ñi chiyutøgucha tabig mariiløyu nømguen trunun asha kusrenrrai marøb kenamar. Incha ñui kusrenanamigu ñibe kusrenanøppe, maig kusrenanamigwan isa kømø sølwan kusrenanøb, ka indzab marøb lataig kømøtø tab kusrenanøb,

⁸ katø waminchibgucha wamindamgailan waminchimøwei, mu 'øyeeg kalø køn' tamgaig waminchib kusrenanrrig. Tru namun tsalø kuin pønrrabeløguen namun møigwandøgucha chi chaguen kaig waminchab kaima, korig misraguen kørromisrrai.

⁹ Katø tru karuindiig melabeløbe, nømun karub pera købelø nøm maig karuben, 'chiyutøgucha treeg marøb melamig køn' chib waminchig, karub pera købelø tab kui mørøb purrønrrai marøbelø kønrraimba, katø trigu trigu lötapteelø kømønrraimba,

¹⁰ katø chigøben tsøgølinchipteelø kømø, masken newan chi isunggaig tabig marøbelø kui asiilø kønrraimba, Tius namui Kaigyugurri Wesrabigwei tabig kusrenanigwan nøm chi marigutøgucha purø tab kui asig kørromisrrai.

¹¹ Kaguende tru Tiuswei ka yandø tab indiibe maya misaamera ashchai kenamisrin køn, tru kaigyugurri webambamig kønrrai.

¹² Inchen tru ka yandø tab indiibe mõi ya nam øsig warain kwaløm, isua møra misaasun amønamiig kønrraimba, maig kønrrabigwan tabig sølgandø maramig kønrraimba, Tiuswan maikkucha pesannamø tabig amønamiig kønrraimba kusrenanøbig køn, Tiusweimburab trømbøig kaig maramelanba, chigøben ke trømbøig marøg køtanmaptø marmumigwanbabe yandø elachar kømig kønrrai,

¹³ Tru nam isua munig melaig mayanguen tabigwan muniirab melappe, Jesucristo tru namui purø nu Tius namun Kaigyugurri Wesrabigwei tørguegwalmabig kenamisramigwan muniirab.

¹⁴ Kaguene nøbe nøashib namuyasig kwaig køn, chigurrimbunø purø trømbøigugurri wesranrrappa, katø kerrigu newan chishelø, nui misag sötømera nuyasiitø kønrrai martrappa, katø tabig maramigwane marmø kømø martrab inchibelø kønrrai.

¹⁵ Ñibe iilan waminchig 'øyeeg, øyeeg marøb kømig køn' chib; 'øyeeg maramibe kalø køn chib; marmøtay' chib. Waminchippe, mu mandamgaig waminchig; ñun mu kaashib kønrrain kømøtøgue.

3

Jesucriston kørebelan mandø amønamiigwan waminchibig

¹ Misagwan ashib karub purrabelan lata, katø chi maramigwan martrai karub purrabelan lata, truilø maig chiben treeg melabelø kønrrai, isunanøb waminchig, chi karuben mørøbelø kønrraimba, chigøben tabig maramigwane martraptø pønrrabelø kønrraimba,

² mugøben katøganun chi kaig waminchimeelø kønrraimba, kwayam lapteelø kømøtø, masken tab inchibelø kønrraimba, maig købash inchimø, mu misaamerandøgucha tabig marøbelø kønrraimba.

³ Kaguende merrabsrømbe namgucha Tiusweimburabelane larrø chugúi mørmeelø, Tiuswan mørøg kømui inchibelø, pella amønibelø, chigurrimbunø trømbøig marøg købiiba kaig mara tab kui mørøb waramibatø srua ambiilø, kaig maramigwangøba isubelø, chigurrin køben katøganun pusrkwai ashib, namun katøganelø larrø tsalø asiilø, katøganelan namgurrin treetøwei tsalø ashib namba treeg amønibelø købig ker.

⁴ Inchen Tius namui Kaigyugurri Wesrabigwei tru ka yandø tab indiiba, nui undag købiiba maya misagweyasig yandø kenamisren,

⁵ nam chigøben sølgandø tabig marøbelø kuimba kømøtø, nøbe lastima asig maig køben, namun kaigyugurri wesraig køn. Treeg marøppe, srøilø kønrrai pillmaikkurrimba, Espiritu Santo namun peemayelø kønrrai srøig yunømarikkurrimba køn.

⁶ Nøbe Espiritu Santon tøgagømburab tøgagønrrai namuim pala ørig køn, namui Kaigyugurri Wesrabig Jesucristogurri.

⁷ Nui ka yandø tab indiitøga namune chi kaig kømeeleø lataig tabig kørømara, ketigwan utønrrab ureemera kønrrai kørømarig køn, nam tru managatig øsig kømigwan tøgagønrrurmab isua munig melaig truig maig køben treeg.

⁸ I trendaibe chi isumgaig isig kømøtø køn. Inchawei iigwan waminchippe marmø kømø, treeg martrai waminchig Tiuswan kørewa pønrrabeløbe chigøben tabig maramelangøba marøb melønrrab inchai. Kaguende tru iig tabig mariiløbe misagwan truba tabig purugunrrabig køn.

⁹ Inchen ke ka yandø kwayam lailanba, katø nambe i misaamerainukkurri amrrubelø ker chib wamindiilanba, kangurrin kangurri ke chab kemøriyab katø tru aleguiyam lailanba, maig maramigwan martrai Moisés pøriiløyu, øyeeg chibig køn chatø ambugurri igurri tru wamindiilanba, treelan tru kuindø mørøb pasrønrrab kømø. Øyeebe chi purugunrrabgailø waminchiminguen wamindiilø køn.

¹⁰ Møikkøben Tiuswei ureemeran nøøøø katøgan sətø marøb uñibigwane 'øyeebe maramig kømøn' chib kan pamaygatig wama wamincha, wamindigwan mørøg kømui inchene, yandø treeg mowane chi asamig kaanrrai tarømisramig køn.

¹¹ Kaguende øyeeg møøbe yandø nøasiitø tsabø minchaig, kaig marøbig, nui kaig mariitøgatøwei kaigyu kebeñaig køn.

Nunashib wamindiilø srabeig

¹² Artemaswan kui, kabe Tiquicon kui ñuimay na ørene, Nicópolisrømay nan ashchab, petø attrab inchunrrig. Kaguende nabe tru pishim pølmerawane trusrø tsunrrab inrrab isur.

¹³ Tru maig maramigwan martrai romasreelai pøriilan ne ashibig kusreb møg, Zenaswanba, Apoloswanba, nømui ambamigwan amrrai, chigucha palab punrrain kømø, purugunrrig.

¹⁴ Pøs chigøben ke purugumdiig pub arruben treegu purugunrrab, namuieløgucha tabig maramigwane kusreb ambamig køn, ke chigucha marmeelø kønrrab kømøtø.

Wamindiilø srabeig

¹⁵ Mayeeløba naba amøñibeløbe 'tab ka amøñigueh' cha wam øran. Nam lataitøwei nømui isubigwan Jesucristoinuutø pasra pønrrøwa namun un-daarabelan 'ka amøñigueh' tan chirrunrrig.

Tius nui ka yandø tab indiibe ñim mayeeløba pasrønrrun.

Filemón

Pablo Filemónwan pørøb

1 Na Pablo Cristo Jesúsweimburabelan marøb megaikkurri kailan keeri yau pasrabiibe, namui nuneg Timoteoba misra, ñi nai undaaraig namui maramigu lincha marøbig, Filemónwan køben,

2 katø namui nuchag Apian køben, trugurri Arquipo tru namui marameløyu, marig kørømisrtrai tranrrab megabigwan køben, katø tru iglesia ñui yau tulundzunabelan køben pørar.

3 Tius namui Møskaimba, Señor Jesucristoba nui ka yandø tab indigwan køben, chi isumgaig tab købigwan køben, ñimun tranrraimab isur.

Jesucristoinuutø pasra tøgagúiba, undag købiiba tøgagúig

4 Tiusba waminchippe, chu urastøgucha 'ungwa, ungwa' chibig kur ñun isub.

5 Kaguende ñui isubigwan Señor Jesúsweinug pasra tøga megaigwanba, katø Tiuswei misaameran ñibe truba undaguig køn taigwanba wammørikkurri.

6 Inchawei tru ñui isubigwan Jesucristoinug namba lata tøgagúig, truibe truba tabig purugub pasrønrrai Tiuswan miabig kur, tru Cristo Jesúsweinug nam chigurrimbunø purø tabig tøgagúigwan nebua ashchai.

7 Kaguende nane truba truba kasrag køb, truba tab kuig kuig køn, tru ñui undag købikkurri. Kaguende Tiuswei misaamerai manrrømerabe, ñigurri pishindø tab kuig kasraatø pønrrønrrai marin køn, ñi nai nuneg.

Pablo Onésimoyasig purøwaminchib

8 Inchawei nabe Cristogurri mu chi chinrraingai, ñi maig maramigwan treegwan martrai karua pasramig tøgagøbendø,

9 treeg inchibgunrriibe tammay undag købiitøga tiusmanda treeg martrur-runrig cha, ñun miawa pasrar, na Pablo, yandø køllig, na mõi ya Cristo Jesúsweiwan marøbig kuikkurri kailan keeri yau pasrabig.

10 Nai nusrkai lataig Onésimoyasig ñui merrab purøwaminchab inchar, na kailan keeri yau pasrøwa, nai unø lataig misra pasrabigweyasig.

11 Onésimobe merrappe chigucha kømíig købig kuig, mømibe ñuyasig lata, nayasig lata, chiyutøgucha ke nø purugub megabig misrin køn.

12 Incha nabe katøle nune ñuimay ørar, tru nai manrraugurri undaaraigwan.

13 Pøs naba kørømisrtrai nune, nabe kørømarømmørø isuig køn, Tiuswei tabig srø wangurri nan merrarrowa keerig pasrøben, ñi purugub megab lataitøwei nan purugub meganrrai.

14 Inchendø ñimerrig maig tainguen ashmøwatøbe, nabe ke treeg martrab inchimuiig køn. Tru na ñun øyeeg martrunrig taigwane, ke na ñun treeg maramne indig kømøtø, uyube ñi maig maramdiig køben treeg asha martrai inchar.

15 Onésimo kan maya yanagatig ñun øyeeg tarømisrøppe, katøle managatig ñi nun yandø tøgagørrømisramig kønrrab kua, øyeeg tarømisrig kuitamab isur.

16 Mømibe yandø nune karuindiig megabig kui lataig kømøtø, katøguchinguen tøgagømmay tøgagørrunrig, kan undaaraig nunewan lataikke, nøbe naimbe truba undaaraig køn. Trune ñibe treetøguen kømø,

katøguchinguen isua undaaramig køn, nø misag pasraigu lata, Señorweinug pasraigu lata.

¹⁷ Inchawei ñi naba lincha marøbig kuabe, trube, nune nan utab lataig uta tøgagørrunrig.

¹⁸ Inchippa ñun chigøben kalø mara kuin kui, kabe chigøben ulø misra kuin køb chigøbene, trube, trunun na ashchab, nan ulø payrrunrig.

¹⁹ Na Pablo naashib nai tasiitøga iigwan pørar: 'Ulø chigúin købene, trube, na purø waramønrrun' chib, ñuimburab ñitøweinguen Tiusweimburabeløyu nan truba nørrø ulø kuigwan truigwanguen chi kebachimøtø.

²⁰ Trube, nai nuneg, ñi Señorgurri øyeeg tabig nayasig marimbe køtan, nai manrrau chi isumø, tab kui pasramig kønrrai Cristoinug.

²¹ Na pørophe, na maig taigwan møra martraitamab isua pørar, katø na maig taigwandø kømøtø, katøguchinguen tabig martraitamab isuague.

²² Tru kømnetø katø na ñimuisrømay arrua, na chu pua kørømisramigwangucha tamarøb megarrunrig chinrrab inchar, na ñun ashchab arrumig kønrrai, ñim Tiuswan miab melaig treeg pubene, katøle ñimun ashchab arrumuitamab isua.

Wamindiilø srabeig

²³ Cristo Jesús kurri tru kailan keeri yau naba pasrabig Epafraskucha ñimun 'tab ka amøñiguh' cha øran.

²⁴ Katø Marcos køben, Aristarco køben, Demas køben, Lucas køben nai maramigu maram purugub melabelø, truilogucha 'tab ka amøñiguh' cha øran.

²⁵ Namui Señor Jesucristoi ka yandø tab indiibe ñimba kønrraimab isur.

Hebreos

Tius Nusrkaingurri wamindig

¹ Merrabsrømbe Tiusbe namui kølli misaamerane Tius maig karuigwan eshkabeløgurri, mumay køben, katø katø wamindig købig køn.

² Incha mõi i srabe kwalømmerawane nui Nusrkaingurri namun wamin-dan. Tru pirøwanba, katø srømbalasrø kerrigu chigurrimbunø købigwanbañau Tiusbe nøgurri mara pasrøb, katø nundøwei tru chigurrimbunø pønrrabigwan kerrigu keta, nø ashib tøgagønrrai kørromarig købig køn.

³ Nusrkaimbe Tius maig törguegwalmabig køben, treetøwei torig törguegwalmabig køn, chiyutøgucha Tius maig køben nø treetøwingue. Katø nøbe tru chigurrimbunø pønrrabigwane nui maramburab mari wamdøga trunun nø ashib tøga pasran. Incha nøbe misaamerai kaig mariilan chab chishmarabe, yandø srømbalasrø Tørbilabig Purø Nu Tiuswei kusrmaygatø wanrrab wamisrig køn.

Tiuswei Nusrkaimbe ángesmera lataguen kømø, purab nuig køn

⁴ Pøs øyamay Nusrkaimbe ángesmera lataguen kømø, purab nuig misrig køn, “Tiuswei Nusrkain” cha, wami munchin nø uta tøgagúibe, “ánges” cha wami munchi lataitøguen kømø, purab nuig utig køb lataitøwei.

⁵ Pøs Tiusbe kan mø ángelwan køben managuen øyeebe chimuig køn:

“Ñibe nai Nusrkain køn cha;
nabe mõi ñui Møskai misrar” cha.
Katø mø ángelwangucha øyee chimuig køn:
“Nabe nui Møskain køben,
nøgurrimbe nai Nusrkain kønrrun” cha.

⁶ Incha Tiusbe nui kandø Nusrkawan yu pirau kebattraí ørøb urasma katø trendaig købig køn:

“Tiuswei ángesmerabe mayeeløba nun køriibala tabig wamindamig køn” cha.

⁷ Inchen tru ángesmeraimburappe Tiusbe trenchibig køn:

“Nui ángesmerane kan isig ichibig latailø kønrrai maran cha,
katø nuiwan marøb melabelane nag pilabelø latailø kønrraingue.”

⁸ Trune Tius Møskaimbe tru Nusrkaweimburappe trenchibig køn:

“Ñi, Tius, ñi ashib karub wamisra waibe
managatig pasrabig pasrøben,
tru tabig sølgandø marøb tøgaweim pørtsiibe
ñi ashib karub wainug sølgandø marøb waig,
truig kønrrun cha.

⁹ Sølgandø tabigwane ñibe undaarawa,
kaigwane ashig kømui indig køn cha.

Incha trekkurri Tius, tru ñui Tiusbe,
tru ñui linchibelan lataguen kømø,
purab nuig kønrrai mara,
ñune aceite srølig køn cha
maya nuguen kasraaranrrai.”

¹⁰ Katø Tiusbe Nusrkawan trenchibig køn:

“Ñi Señorbe srøsrøzhiitø pirøwane
ñi mara pasrig køben,
srømbalamerabe kerriguba ñui tasiitøga mara

pønsrailø køn cha.

11 Inchen truiløbe kerriguba chab pinøben,
ñibe wabig wanrrun cha.

Srømbalamerabe kerriguba asru kewagúilø lataitøwei
chab kølliranrrun cha.

12 Ñibe tru srømbalamerane kan pala itø tsinigwan welan kitishib lataitøwei
kirra,

kewagúilan lataitøwei katøle peemay
srøig yunømartrun cha.

Trune ñibe chu uraskucha yunømarmø,
treetø treetø køben,

ñi øsig wamig pilamerabe managuen patsønrraamøn" cha.

13 Tiusbe mø ångelwan køben managuen trendaig kaagø:

"Nai kusrmaygatø wamisr cha,

ñun ashig kømui inçhib tsalø inçhibelan

ñi ñui srøbmeran truilaim pala nebuna

wamig kønrrai pønsramnegatig."

14 Ångelesmerabe mayamba espíritumera, Tius karuigwan marøb pønrrabelø,
kaigyugurri wesraig kømigwan ketig uta tøgagønrrabelan purugub pønrrønrrai
karua øriilø treelø kømuitarru?

2

Kaigyugurri wesraig tōga pønrraigwan chinchaindø elatsamig kømøn

1 Inchawei treeg købene, nam wamindi mørigwane mas tab møramig palan,
nam amønaig mayugurri inçhippa pella ambinabgunmb.

2 Kaguende Tius ångelesmeragurri wamindikken maig chippe, treeg kønrrain
kuig kua, tru maig taigwan mørog kømub itøbunabelanba, møra marmeeelanba
truburo møra melamigwan maig utamigwan utønrrai pønrraig købig køn.

3 ¿Namun kaigyugurri wesraig yeeg nuig tōga pønrraigwan nam chinchaindø
elacha, amøñabe, trube, nambe tru møra melamigugurrimbe, mandø in-
cha wegørrønrrab? Kaguende kaigyugurri wesraig kømig purø nuigwane
Señor Jesús nøashib nømerrig eshkaben, trugurrimbe tru nø wamindigwan
mørbelø, truigwane 'øyeeg køn' cha, namun eshkaig købig køn.

4 Katø Tiusbe nø pasrain kui ashchai mariiløtøgaba, kwaara asha kønrrai
mariiløtøgaba, maramburab mariiløtøgaba, Espiritu Santogurri peg, peg
marøbelø kønrrai nun maig tranamdiig køben pirisha keta traniitøgaba, tru
wamindigwan Tiusbe treeg kuin kui ashchai kenamarøb pasraig køn.

Jesucristo køn nam kaigyugurri webamba pønrramibe

5 Nam mõi tru waminçhib amrruigwan, waramig katøgan tru wendøsrø
srøig attrabigwane ångelesmera nøm karub tøgagønrrai, Tiusbe treeg marig
kømon.

6 Treeg kømøtø, kanbaløsrø Tiuswei wamwan pøriguma møikkøsrøn
Tiuswan trencha payig køn:

"¿Misaabe ñuimbe chi kønrrab køh cha,

ñi ya isunrraimbe?

¿Ka mowandø ñi truba isua ashib attraimbe,

nøbe chi køh cha?

7 Pøs kan maya yanagatiitø ångelesmera lataitøguen kømø,

møwane katøguchindø lamíig kønrrai mara,

nune maya nuguen tabig indiitøgaba,

purø tab indiitøgaba,
treetøga corona petsøsrøb lataig purø nuig kønrrai marig køn cha.

⁸ Incha kerriguba nui srøb umbu põnsraig køn” cha.

Incha kerriguba nui srøb umbu põnsrøppe, Tiusbe chiwan kørrømara kømøtø, kerriguba nø ashchai põnsraig køn. Treeg kuingucha, mõi yambatøbe kerrigubabe møg nø ashib tøgagømuin kui aser.

⁹ Inchendø Jesúswane, kan maya yanatø ángelesmera lataguen kømø, katøguchindø lamíig kønrrai marin kui aser, Tius tru ka yandø tab indikkurri mayeelayasig kwamigwan maig kuig mørøb pasramig kønrrai. Møimbe tru nø kwaikkurri tørguegwalmabiitøgaba, purø tab indiitøgaba, treetøga kan corona petsøsrøb lataig marig køn.

¹⁰ Pøs tru chigurrimbunø põnrrabigwan marøb, katø truilan nuyasitøwei põnrrønrri marøb inchib Tiusbe nui ureemeran truba nørrøwan nui tørguegwalmabiisrømay pera ippe, Tiusbe tru Jesucristo nømerrig nømun kaigyurri pera webibigwan tru chine kaig indinab pureb megaitøga chi palømíig newanig kønrrai maramig, Tiusbe søl kui asig køn.

¹¹ Kaguende Cristo tru Tiusweindø kønrrai tarømarøbig lata, katø Tiusweindø kønrrai tarømariilø lata, mayeeløba kan Møskaweyeløtø køn. Inchawei treekkurri Jesúbe nømune, “nai nunelø” cha, wamamig chi kørig kuim pasrømøn.

¹² Tiuswei wamwan pøriguma Cristobe Tius Møskawan trenchibig køn:

“Ñui munchiwan nabe nai nunelan wamindamønrrun cha.

Incha ñuielø tulundzuna kuinug mayanguen tabig waminchib cantamønrrun” cha.

¹³ Katø Cristobe treekkucha chibig køn:

“Nabe ke Tiuswandø isua pasramønrrun” cha.

Incha katø trendaig køn:

“Tius nan trani ureemeraba nabe yu pasrar” cha.

¹⁴ Pøs ureemerama asr tøgær, animbar kuig købene, Jesucristogucha treeg asrtøwei tøgæg kørrømisrig køn, nø kwaitøga tru kwamig kønrrai nugwaimandzig mu chindamgaig marøb pasrabigwan pinishib,

¹⁵ katø nømui øsig amønaigu chu urastøgucha tru kwamigwan kørig kuindø, kørig kuindø melabelan truyugurri wesrailø kønrrai marøb inchab.

¹⁶ Pøs nøbe purugumma, ángelesmeran purugumøtø, tru Abrahamweinkurri amrrub misaameran purugun.

¹⁷ Inchawei treekkurri chiyutøgucha nui nunelø Tiuswei misamera lataitøwein kømig kuig køn, kan maya Sacerdotesmeran Nø karub Sacerdote lastima ashibig kømigwanba, katø Tiuswei merrab maig maramigwan elachimø marøb pasrabig kømigwanba, treeg kønrrab, incha tru maya misagwei kaig mariilan chi ulø payamig kømønrrai kweetsigwan tranrrrab.

¹⁸ Pøs chiyugøben kebenøsrkønrrab indinab nøtøweinguen yeeg chine kaig indinab megabikkurri, chiyugøben kegørrønrrai indinab melabelan purugumig nøbe maramburab marøbig køn.

3

Jesucristobe Moisés lataitøguen kømø, mas nuig køn

¹ Inchawei treeg købene, ñim, nai nunelø, Tiusweindø tarømariilø, nø srømbalarøngurri wamigwan ñimgucha lata tøgagønrrai wamiiløbe, Jesúswan, Tius tru Nøashib Karua Ørig, katø tru Maya Sacerdotesmeran Nø Karub Sacerdoten tab isua asay, tru nam nun kørewa põnrrer taigu truyutø põnrraigwan.

² Pøs Jesúsbe nun wesra pasrøbig Tiuswan kerriguba maig taigwan møra marig køn, Tiuswei misag israelitasweimburab Moisés kerriguba chi maramelan elachimø, marøb pasrab lataitøweingue.

³ Inchendø Jesúsbe purabguen tab indig køn, Moisés lataguen kømø, kan ya marøbigwan mas tab indig køn, tru yawan lataguen kømø.

⁴ Pøs chi yatøgucha pasrappe, mugøben marigweim pasrainrun. Inchendø lutøgurri chiwandøgucha mara pønrsøbiibe, Tius køn.

⁵ Pøs Moisésbe maramigu marøb megabig køppe, israelitasmera Tiuswei misagweimburab kerriguba chi maramelan elachimø, marøb pasraig købig køn. Incha wendøsrø Tius wamindig kønrrabigwan nøbe kenamarøbig køn.

⁶ Trune Cristobe, nø Nusrkain kua, Tiuswei yau chi maramelan elachimø marøb pasran, kerriguwan nø ashib. Inchen tru yabe namdøwein ker, treetøgucha nam kullaaramø mur pønrramigwanba, nam truba tab kui mørøb isua munig melaigwanba elachimø, nam tøga pønrrabig pønrrøwabe kønrun.

Tiuswei ureemerabe israb purramig tøgar køn

⁷ Inchawei Tiuswei wamwan pørigu Espiritu Santobe øyeeg taig køn:

“Ñim møin kwaløm Tius maig taigwan mørabe,

⁸ mørøg kømui inchib ñimui manrrømeran mur marmøtay cha, tru mu misag warab waraimønug Tius maig taigwan ñim mørøg kømub namig inchib kurrab uras,

Tiuswan ke chinchibig køtashchab inchib lataitøwei,

⁹ tru ñimui merrabsrø kølli misaamera nan truyu ke chinchibig køtashchab lataig inchib namisainug,

tru cuarenta años ørøba na yeeg chigøben mariilan ashatøgucha.

¹⁰ Inchawei trekkurri tru uras misaameran nan namig køben, na trendaig købig køn: ‘Nømui manrraube chu uraskucha ka pellatø, pellatø pønrrabelø kua, nai maymeran ashmeelø kuig køn’ cha.

¹¹ Inchawei nabe nømun namig køben, jkatø! treg kønrun cha, trendaig kuig køn:

‘Isramig na tøgagúinug nømbe managuen kebamrraamøn’ ” cha.

¹² ¡Au, nai nunelø, ashiptø kuy! Ñimui utu møikkøben Tiuswan køremø kaig manrrø tøgag kua, Øsig Wab Tiuswan tarømisrøb megabgunmab.

¹³ Masken treg kømøtø, kangurrin kangurri øyamay meløgun chib kwalømmørig puruguyay, Tiuswei wamwan pørigu tru “Møin Kwaløm køn” taig truig pasrøbenbatø, pøs kaig maramibe ñimun truba tabig asønaben, ñim møitøgucha larrø mormíig misra pasrømønrrappe.

¹⁴ Kaguende Cristoba namgucha tøgatø melamigwan tøga pønrrer, treetøgucha tru srøtø ke truyu isua pønrraigwan srabegatig tøga pønrrøwabe kønrun.

¹⁵ Inchawei Tiuswei wamwan pøriguma trendan:

“Ñim møin kwaløm Tiuswei wamwan mørabe,

ñimui manrrømeran mur marmøtay cha,

Tius maig taigwan mørøg kømub itøbunab uras lataitøwei.”

¹⁶ ¿Inchen tru Tiuswei wamwan mørendø, Tius maig taigwan mørøg kømub itøbunabeløbe numera kuig køh? ¿Moisés tru Egipto piraugurri mayeelan pera webarrig, truilø kømuitarru?

¹⁷ ¿Inchen tru cuarenta años ørøba Tiusbe mumeranre tab kømui waig køh? ¿Tru kaig marøbelø mu misag warab waraimøsrø kwabelø, truilørrer namisaig kømuitarru?

18 Incha Tiusbe tru isramig nõ tōga wainug, “¡Katø! kebamrraamøn” cha. Trenchippe, pøs ¿mumeran kui trenchinrrab kø? Pøs tru mørmeelan nõmunwein kuig køn.

19 Inchawei nõmbe kebamrrab kaimaig kuin kui aser, kaguende kørenrrab inchimeelø kuikkurri.

4

1 Pøs treeg købene, tru isramig Tius nõ tōgagúinug nam kebambamigwan tōgagønrrun cha tranrrab misra kørømisrig pasrøbenbatø, trunune purø isuptø tōga amønamiig køn, inchippa ñim mõikkøben kebammbugunmab.

2 Kaguende tru misag warab waraimøsrø mørøg kømui inchibelan lataitøwei namungucha Tiuswei tabig srø wamwan wammørøsrkaig købig køn. Inchendø tru wamwan nõm wamindi møriibe chiweingucha chi purugumiig køn, kaguende tru mørøbeløbe isubigwan Tiusweinug pasra mormuikkurri.

3 Inchendø tru nam kørebelaimbeguende tru isramig Tius nõ tōgagúinug kebambubwei indamønrrun. Incha kua, Tiusbe trendaig køn:

“Nabe namig køben, ¡katø! treeg kønrrun cha,
trendaig kuig køn cha:

‘Isramig na tōgagúinuube nõmbe managuen kebamrraamøn’” cha,
nui chi marameløbe pirowan chi købigwanbañau chab mara, tru isramigwane tru urasrøngurri pasrig kuindøgucha.

4 Pøs Tiuswei wamwan pørigu kanbaløsrø tru kwalømmerra siete nemisrøbigweimbura trendaig køn:

“Nui chi maramelan chab mara, kwalømmerra siete nemisren Tiusbe isrig køn” cha.

5 Mira chab trendainuuma katø trenchibig køn:

“Isramig na tōgagúinuube nõmbe managuen kebamrraamøn” cha.

6 Inchen truilø kømøtø, katøganeløbe katøgucha isramig tru nõ tōgagúinug kebambamig palab melan. Tru tab wamwan tru srøsrø nõmunmerrig wammørøsrkainabeløbe mōra marmeelø kuikkurri kebammuig køn.

7 Incha treekkurri Moisés tsub uraskurri yandø yeeg yana purøguchen, Tiusbe katøle katøgan srøig “Møin Kwaløm” cha pasrig køn. Tiusbe Davidgurri øyeeg taig køn cha, tru mirawei na chab trendaim pala:

“Møin kwaløm ñim Tiuswei wamwan mōrabe,
mørøg kømui inchib ñimui manrrømeran
mur marmøtay” cha.

8 Kaguende Josué tru israelitasmeran Canaan pirausrø pera kebya, Tiuswei tru isramigwan tranig købig kuig kuimbe, trube, Tiusbe Josué uñib uras mas wendøsrø tru isramig Tius tōga waig katøgan kwalømigwan waminchimub-sruig kuinrrun.

9 Inchawei treeg købene, tru kwalømmerra siete nemisren, Tius tru isrin kwaløm lataitøwei isramig nui misaameraimbe katøgucha truike ka pasan.

10 Kaguende isramig Tius nõ tōgagúinug mõitøgucha kebibiibe nui chi maramelan israb wamisran, Tius nui chi maramelan chab mara israb wamisrøb lataitøwei.

11 Inchawei treeg købene, isramig Tius nõ tōgagúinug kebamrrab tranrrønrrab inchigun, inchippa mõikkøben tru mørmeelø marigwan asha, treegwandøwei marøb pønrrøwa, tru isramigu kebambamigwan kaimamønrrai.

12 Pøs kaguende Tiuswei wambe øsiguig kømba, ka pasrømø, marøb pasra-big kømba, treeg køn. Kan espada pinrrøba katsig lataitøguen kømø, purø

trøsrig lataikke, namui mōsiiba, namui espírituba pōnrraisrøngatig kebibig kōn; namui asru kōnabimørig, tsutsigu tutanumerasrønguen kelarrabgue. Incha chitø isua tøgagūilanba, katø manrrau chitø, chitø martrab isua tøgagūilanba tøgandø kelarrab kenamara pōnsrøbig kōn.

¹³ Chigurrimbunø kerrigu mara pōnsrailø pōnrrabiibe Tiuswei merrappe chigucha sōriibe pōnrrømøn. Treeg kōmøtø, tru nam chigøben mariilan eshkab pōnrramig Tiuswein kabyube chitøgucha kuragutsiilø tøguelarrø kena pōnrran.

Jesucristo, tru Maya Sacerdotesmeran Nø Karub Sacerdote

¹⁴ Pøs treeg kōbene, Jesús Tiuswei Nusrkai, tru Maya Sacerdotesmeran Nø Karub Sacerdote tru srømbalameranguen puraibig namuyasig purøwaminchibigwan nam tøgaguen pōnrraig kōppe, tru nam nuimburabigwan kōrewa pōnrrer taigu, truyutø tarømisrtrab kōmø, meløgun.

¹⁵ Pøs namui tru Maya Sacerdotesmeran Nø Karub Sacerdotebe nam kullaguelø kuigwan namun lastima ashibig kōn. Kaguende namun lataitøwei chiyugøben kebenøsrkōnrrab indinab megaig kōbig kua. Inchendø nōbe managuen kaig marmuig kōn.

¹⁶ Inchawei treeg kōbene, Tius nō ka yandø tab inchib wainug chi kōrig isumøtø kemallgun, tru nō namun lastima asigwan nebua tøgagønrrappa, katø nam chigøben ke palaig meløben tru nui ka yandø tab indiitøga purugumdiig kui asiilø kōnrrappa.

5

¹ Mø sacerdotetøgucha maya sacerdotesperan nō karub sacerdote yu pirauigwane mōguelai utugurri wesrawa pasrig kōn, Tiusweimburabeløyu misagweimburø nō marøb pasrønrrai, Tiuswan keta tranøb, katø misaamerai kaig mariilaimburø animal kweecha tranøb, treeg martrai.

² Inchen tru sacerdotetebe mayeelø lataitøwei chine nebuinabig kullaguig kuig kōppe, chugúi mōrmeelø pella amøñibelan maig kōbash kōmø, tab inchun.

³ Incha nøgucha treetøwei kullaguig kuikkurri animal kweecha Tiuswan tranamig kōbig kōn, misaamerai kaig mariilaimburøtø kōmøtø, tru kaig mariilø nuimburabigweiwan chigucha.

⁴ Pøs øyeeg purø nuig tabig indig sacerdote kōmigwane mugøben ka yandø nōasiitøbe tøgagønrraamøn, treeg kōmøtø, tru Aarōn latawei Tius wamitøwei trunue tøgagønrrun.

⁵ Katø treetøwei Cristogucha tru Maya Sacerdotesmeran Nø Karub Sacerdote kōnrrab nōasiitø purø nuig mismøtø, nōbe Tius øyeeg chibigweinukkurriuguen utig kōn:

“Ñibe nai Nusrkain kōben,
møin kwaløm nabe ñui Møskai misrar” chibigwan.

⁶ Katø katøganbaløsrøngucha Tiuswei wamwan pørigu nōbe Criston trendaig kōn:

“Ñibeguende managatigwei sacerdote kōn cha,
Melquisedec maig kōben, treetøweingue.”

⁷ Cristobe yu pirau nō uñippatø Tiusba waminchib kappin kōrrøgøb, isuig trashib truba miabig kōn, Tius tru kwamigugurri wesramø kōmø, wesrabigwan. Inchen nune Tiusbe mørig kuig kōn, maig taigwan nō kōriibala mōrøbig kuikkurri.

⁸ Cristo ya Tiuswei Nusrkain kōbenguen, chine, chine nebuinab purayaigu maig karuigwan mōramig kōbig kuin kui treegwan kusreig kōn.

⁹ Incha kerrigu newanig misrabe, tru mayeelø nun mørøbelaimbe managatig-wei kaigygurri wesraig kømigwane nøgurriin kønrrai, treeg misra pasramisrig køn.

¹⁰ Inchen Tiusbe nune maya sacerdotesperan nø karub sacerdote kønrrai wesrawa pasrig købig køn, tru Melquisedec maig køben treetøweingue.

Isubigwan Jesucristoinug pasra tøgagúigwan elachib melønrrab kømø, isuptø tøgaguy

¹¹ Pøs øyeegweimburab wamindamibe truba truba nu tøgaguer. Inchendø ñimun ni kan mandø chaguen øyeeg køn tamgailø køn, pøs ñim chi taig møramigwane purø tsøndailø kuikkurri.

¹² Pøs ñim kusreb melaibe yeeg yanaguen køben, ashene, ñimbe manawei kusrenanøbeløguen kønrrapteelø købendø, katøgucha ñimbe Tiuswei wamwan srøsrø mandø pølbasa kusrenanigwan katøle møikkøben trunundøwei srøig kusrenanamig palain køn. Ñimbe palain køppe, tranrrø mamig kømøtø, katøgucha pitsøbe palain køn.

¹³ Inchen møitøgucha pitsøtø muchibiibe katøgucha tru sølgandø tabig maram wamwane ni mandø kuinguen mørtrab kaimabig køn, katøgucha unøzhig lataig srø kua.

¹⁴ Inchen tru tranrrø mamibe tru Tiusweimburabigu yandø ne nørørawarwein køn, tru chi maramigwan yandø trendø mara ashibelø tru tabigwanba, kaigwanba maig kuigwan tab chigúi mørøbelai.

6

¹ Inchawei ke ne nørøramnegatig ambubig amgun, tru Cristoimburabig ke srøsrø pølbasa kusrenanig købelane nøøøø wemalsrøppa pønsra. Incha tru pølbasa kusrenaniilø: tru kaig marmønrrab isua møramigwanba, kwamigumay srua inrrabig kaig mariilan elachib amruigwanba, isubigwan Tiusweinug pasra tøgagúigwanba, treeg kusrenanigutø katøle truigwandøwein kusreptø warømugun,

² katø pitøga chishmarøb kømeeelan kusrenanigwanba, Tiuswei uremeraim pala tasiimeran estsaramigwanba, kwabelø katøle øsiiramigwanba, kaig marimburø tru managatig maig kønrrabigwan kørøramaramigwanba, katøle truilandøweih, truilandøwei waminchib.

³ Pøs Tius treeg kønrrain købene, trube, nørøram maywan amrrab inchab.

⁴ Kaguende yandø tru Tiuswei tørtrawa tørt mariilø, srømbalærøngurri ketigwan tab kui mørøb utarmera, katø Espiritu Santoiwan utarmera,

⁵ katø Tiuswei wamyu tabigwanba, tru wendøsrø attrabigu maramburab marøbelø truilanba nømbe purø tab kui mørøb inchibelø købendø,

⁶ Criston kerriguwan wendøbasra katøle kørørbene, nømune katøyuube nømui kaig mariilan isua møra, Tiusweimay lliranrrai indamibe kaimamdiig køn, kaguende nømdøwei Tiuswei Nusrkawan katøle kurusu mesrøb lataig maramba, misaamera nune kan chigucha kømíig kui lataig inchib ka indzatø mørtrai maramba inchibelø kua.

⁷ Kaguende sre puimørig tru piør sre piwan muchibiima tru kwallib melabelai tab kønrrai mamig tusrchig kønrrai tranene, Tiusbe tru piørzhigwane mayanguen tab inchun.

⁸ Inchen kal tusrmerabah, ka kaig kaubatø misrøb piør tru ellmarig chi misrmíibe, ke kaig puindø mørtrabig køn. Incha yandø srabebe parrig kønrrun.

⁹ Pøs nambe òyamay wamindindøgucha, nai undaarailø, ñimuimburappe mas tabig munig pasrain kui nambe asha pønrrer, tru kaigyugurri wesraig pønrrabigugurri arrubig.

¹⁰ Pøs kaguende Tiusbe kalø marøptiig kømøtø, sølgandø tabig kōppe, ñim chigøben marigwan pesannanrrab kømøwei, katø nui munchiwan ñim undaotøga kenamarigwan pesannanrrab kømøwein køn, Tiuswei misaameran ñim purugua, katøgucha purugubig purugub kuimba.

¹¹ Ñim mōitøgucha maig marøb melaigwan srabegatig treetø treetø kenamarøb melaimbemab isuer, tru ñim Cristoba tōrguegwalmabigu purrønrrab isua munig melaigwan ke treeg kōmnegatikke.

¹² Pøs nambe ñimun pøilø misrtrain kømøtø, tru nōmui isubigwan Jesu-cristoinug pasra tōgagūtøgaba, tammay melabig melaitøgaba Tius tru tranrrab kōrrømisrigwan utab pønrrabelø lataitøwein kōnrrai inder.

Tius tranrrab misrig chi isumgaig

¹³ Kaguende Tius tru Abrahamwan 'øyeeg martrab' cha kōrrømisrøb urasma, katøgan mas nuigwei merrab 'jkatø! marmø kømø, nabe maramønrrun' cha, trendamdiig mu katøgan kaabene, pøs Tiusbe nōasiitøwei pasramisra,

¹⁴ trendaig kōbig køn: "Isa kømø, cierton nabe ñun mayanguen tabig kōnrrai marøb, katø ñuinukkurri maya nu misag larrøbichib kōnrrai maramønrrun" cha.

¹⁵ Inchen Abrahambe tammay muniirabig muniirab megawa, Tius tru tranrrab misrigwan utig kōbig køn.

¹⁶ Pøs mōgueløbe nōm lataguen kømø, mas nuigwei merrab pønrramisra, martrai indigwan 'jkatø! marmø kømø, nabe maramønrrun' chib pønrrabelø køn. Inchen tru nuigwei merrab nōm trenchib pønrraigwane nōm trenchib pønrraitøwei treeg marig kōrrømisrtrai marøbig køn, yandø mas wamin-damikkaikke.

¹⁷ Inchawei tru tranrrab kōrrømisrigwan ketig utōnrrabelan Tiusbe nui isuigwane yunømartrab wamīg kuin kui ashchai tōrgandø kenamartrappe, nøbe, 'jkatø! marmø kømø, nabe maramønrrun' cha kōrrømisriitøga treeg kōnrrai mara pasrig køn.

¹⁸ Inchawei iig tru pabaløwane chinchaguen yunømaramgaig, tru tranrrab kōrrømisriitøgaba, tru 'jkatø! marmø kømø, nabe maramønrrun' taitøgaba marig kua, Tiusbe chinha isønrraamøn. Treeg kōbene, nambe kullaaramø, mas mur pønrrønrrab inchigun, tru Cristoba tōrguegwalmabigu purramigwan nam isua munig melamig namui merrab pasrabigwan ke tab tōga pønrramisra, Tius purømisrøb wainug nam kemendønrrab luløbeløbe.

¹⁹ Iig tru tōrguegwalmabiisrø purramigwan isub munig melaibe kan ancla piumbu ellgwawa barcon merrarrab pasrabig lataitøwei namui mōsiizhigwan yandø chi isumikkaig treeg pasrønrrai merrarrabigwan tōgaguer. Tru muniirab melaibe, tru "Kerriguba Tiusweindiig Kōnrrain" cha pasrinug tru tab llensuzhig kelarrab megai wendausrøngatig kebya pasran,

²⁰ tru yandø managatigweyasig, tru Melquisedec maig kōben treetøwei Jesùsbe Maya Sacerdotesmeran Nø Karub Sacerdote misra, tru namuyasig may kura trarrøb nōmerrig kebyaisrø.

¹ Iig tru Melquisedecbe tru Salem ciudayu rey køb, Tius Mayeelaim Pala Pasrabigwei sacerdote kuig køn. Incha Abraham tru kwayabyu reymeran nõ kanawa arruben, trube katønrrab webya, Abrahamwan 'mayanguen tab kønrrun' chibig køn.

² Inchen Abrahamgucha tru kwayabyu kanawa chitø srua arrigwan cienyu diez wesrawa, nun tranøbig køn. Tru Melquisedec munchibe: "Tabig sølgandø marøb rey køn" cha wamig køn. Katø nõbe Salem ciudayu rey kuig kua, tru Salem chippe: "Ambumay imay tab kønrrai marøbig køn" chibig kua, nõbe: "Chi isumgaig tab kønrrai maramigwan tøga rey køn" cha treeg munchigucha wamig købig køn.

³ Melquisedecbe mōskai usringawei, kølli misaamerai munchi pøra wari-løyu pørig kawei, nõ kal-laigwan wamindig kawei, katø kwaigwan wamindig kawayig køn. Kan managatigwei sacerdote købig kønrrabig kua, nõbe Tiuswei Nusrkai maig køben, treeg lataitøwein køn.

⁴ Pøs ñimguen isua asay, Melquisedecbe purø nuig køptø, tru namui merrabsrø kølli misag Abrahamguen tru kwayabyu kanawa chitø srua arrigwan cienyu diez wesrawa, nun tranig købig køn.

⁵ Pøs tru maig maramigwan martrai Moisés pøriibe treeg kønrrain købig køn, tru Leviwei misagugurri amrrubelø sacerdotēs kømigwan utabelaimbe tru cienyu diez wesraigwan israelitasmeran utamig, tru nõmui nunelandøwei, truiløbe Abrahamwei misagugurrindøwei amrrubelø kuindøgucha.

⁶ Inchendø Melquisedecbe Leviwei misagugurri arrumíikken, Abraham Tiusweyasig cienyu diez wesruigwan uta, Abraham Tius tru 'øyeelø maramønrrun' cha kørrømisriilan uta tøgaigwanguen tru Melquisedecbe 'mayanguen tab kønrrun' cha trendaig køn.

⁷ Pøs kan muguen treeg kømøn tamgaig køn, tru 'mayanguen tab kønrrun' cha, trenchibiibe, tru 'mayanguen tab kønrrun' tainabig lata kømø, mas nuig kui.

⁸ Tru Leviweinukkurri amrrub sacerdotēsmeraimburappe, tru cienyu diez wesruigwan utabeløbe mōguelø ka pinønrrabeløtø køben, trune tru utabig Melquisedecweimburappe, Tiuswei wamyube ka øsig wabig kui lataig, treeg waminchibig køn.

⁹ Pøs, øyeekken isumdiig kørre, tru Levi tru cienyu diez wesruilan nõ utabig købenguen, tru cienyu diez wesruilan Melquisedecwan Abrahamgurri tru Levi mu kaabenbatøsrøwei traniibe, tru Levi nõguen trani lataig købig kuin kui tru Melquisedecwan.

¹⁰ Pøs kaguende tru Melquisedec Abrahamwan katønrrab webarrub urasbe, Levi tru srøig kurrønrrabiibe nui kølli misag Abrahamwei asrugurri attrab srø købig køn.

¹¹ Inchawei misaamera Tiusba newan tabelø kømigwan tru levitas sacerdotēsmera Tiusweimburabigu marøb pønrraitøga nebua tøgagømig kønrrai marig kuig kuimbe, trube, chiwei sacerdote katøgan, tru Melquisedec maig køben, treeg tøgagømig srøig palømubsruinrrun, tru Aaróngurri amrrub sacerdotēsmerayugurri arruaig kømíig. (Pøs tru israelitasmerayasig maig maramigwan martrai Moisés pøriibe tru levitasmera Tiusweiwan marøb pønrraigugurri arrubig købig kuindøgucha).

¹² Kaguende tru sacerdotēsmera truyugurri amrrubelan yunømarene, trube, tru maig maramigwan martrai karuigwangucha srøig katøgan peemaytø yunømaramig køn.

13 Pøs tru Tiuswei wamyu Cristo øyeelan wamindinabiibe tru Levíwei misag sötømerayugurrin kòmötø, katøgan misag sötøyuig køben, tru misagugurrimbe muguen trunune tru altaryube marøb pasrømuig køn.

14 Kaguende trendø asig køn, namui Señor Jesucristobe Judáwei misag sötømerayugurrin kal-lawa arrig kui. Tru misaamerainburappe sacerdotess-mera kønrrun cha Moisésbe treebe chigucha waminchimuig køn.

15 Inchen iibe mas tørgandø asamdiikken køn, tru sacerdote katøgan ke-namisrøbig, Cristobe, tru Melquisedec lataitøwein kui.

16 Truibe tru nø sacerdote kømigwan tøgagøppe, tru karua pøra pasrig, 'ø misaamerainukkurri arrubiibe sacerdote kønrrun' cha, trendaitøga kòmötø, tru maramburab marig øsig kømig mana pinønrrabig kømítøga kuig køn.

17 Kaguende nuimburappe Tiuswei wamyu øyeegwein chibig køn:

“Ñibe managatig sacerdote køn cha,

Melquisedec maig køben, treetøweingue.”

18 Pøs tru maig maramigwan martrai pasrig merrabsriibe misaameran tabelø kønrrai chi martrabgawei, chi purugunrrabgaweyig køben, yandø menda mara pasrøppa, kagøbashiptindig køn,

19 kaguende tru maig maramigwan martrai Moisés pøriibe chiwangucha newanig kønrrai marmuig kua. Inchendø mõimbe nam isua munig melamig katøgan mas tabig tøgaignwan Tius namun tranen, truikkurri nambe nun kemaler.

Jesúswan Maya Sacerdotemeran Nø Karub Sacerdote kønrrai wamig

20 Inchen iigwan treeg kønrrai marøppe, 'jkatø! marmø kømø, nabe maramønrrun' cha, Tius trendaitøga marig køn. Inchen merrabsrø katøgan sacerdotessmerane 'jkatø! marmø kømø, nabe maramønrrun' cha, trendaitøga kòmötø, mariilø købig køn.

21 Trune Jesúswane sacerdote kønrrai neera wannøppe, 'jkatø! marmø kømø, nabe maramønrrun' taitøga treeg mara wannig køn, tru øyeeg chib uras:

“Señor Tiusbe 'jkatø! marmø kømø,

nabe maramønrrun' cha,

Tius nø treeg isuigwane yunømarig kønrraamøn cha:

‘Ñibe managatigwei sacerdote køn’ ” chib.

22 Incha øyeeg taikkurri, tru srøsrø acuerdo lataig kòmötø, mas purab tabig marigwan treeg kønrrai, Jesús nø purøbasramisrig køn.

23 Pøs tru merrab katøgan sacerdotessmerabe nørrø nemisrøb ambubig køn, kaguende nõmuimbe tru nõm marøb amrruigwan chu uraskatig marøbig marøb purrømötø kwamig kuikkurri.

24 Trune Jesúsbe managatig øsig wabig køppe, tru sacerdotessmera marøb amrruigwan nõbe managatig marøbig marøb wamig tøgagøn.

25 Inchawei treekkurri katø nøgurri Tiusweimay kemallibelane nõbe managatigwei kaigyugurri wesrabig køn, kaguende nõbe nõmuimburab purøwaminchib managatig øsig wabikkurri.

26 Kaguende Maya Sacerdotessmeran Nø Karub Sacerdote nambe øyeegweim palai melaig kuig køn, newan tabig kui asig, chigucha kaig marig chigaig, newan chishchig, kaig marøbelainukkurri tarømarig, purø pala srømbalamerasrønguen puraya wanrrai kusruig.

27 Tru katøganelø maya sacerdotessmeran nõm karub sacerdotessmera pønrrabeløbe mõitøgucha nõmui kaig marilaimburabigwanmerrig trana,

trugurrimbe tru maya misagweyasig kaig marimburo kwalømmørig animalmera kweecha, Tiuswan tranø pasramig, nøm lata Cristobe treeg maramig palain kømøn; kaguende nøbe nøasiitøwei tranøppe, kan pijitø managatigweyasig tranig køn.

²⁸ Tru maig maramigwan martrai Moisés pøriibe tru maya sacerdotemeran nøm karub sacerdotemerane møguelø newan tabig kømeeelan neera purrøniiilø køben, trune tru Moisés pørigwei wendau arrubig, Tius 'jkatø! marmø kømø, nabe maramønrrun' taig wambe, newan tabig kønrrai kørromari Nusrkawan managatigweyasig neera wannig køn.

8

Jesús namuyasig tru Maya Sacerdotemeran Nø Karub Sacerdote

¹ Tru nam møi waminchib amrruppe, øyeeg chibrre amrruer: Maya Sacerdotemeran Nø Karub Sacerdoten nambe tøgaguer cha, tru srømbalårø Tørbilabig Tius Purø Nuig wainug kusmaygatø wamisrøbigwan,

² tru santuario, tru ciertonig mu møg kusrua pasrig carpa ya kømøtø, Tius nø kusrua pasrigu marøb pasrabigwan.

³ Kaguende tru maya sacerdotemeran nø karub sacerdotebe møitøgucha Tiuswan ketiilø tranøb, animalmera kweecha tranøb indamig købig køben, tru sacerdote, Cristogucha chigøben tranamig købig køn.

⁴ Nø yu pirau unimbe, sacerdoteguen kømubsruinrrun. Kaguende Tiuswan ketamelan tru maig maramigwan Moisés pørigu maig tailan treeg marøb sacerdotemerabe købguen indan.

⁵ Inchen tru sacerdotemera nøm marøb pønrrainuube tru srømbalårø maig kuigwan øyeeg lataitøwein kuitamab asamibah, ka øyeeg kuitamab isumibatø køn. Moisés yandø tru Tiuswei carpa ya tabzhigwan pølbarrab inchib megabenma, Tiusbe trendaig køn: ¡Au! Tru tunbalårø maig martrai eshkaigwan trunun asha maramig køn cha, kerriguba treezhigweingue.

⁶ Inchen Jesúsbe sacerdotemera marøb amrruig mas purø tabigwan nebuiin køn. Kaguende tru purab nuig trannrrab misriilø purab nørreeløyugurri wesrawa, pønsrai tru srø acuerdon Jesúsbe misaamerai nø pasramisra marøb pasran.

⁷ Pøs tru srøsrø acuerdo Tius marig chi maramigwan newan martraptiig kuig kumibe, truigwan kørromara, katøgan srøig mara tøgagømig palømubsruinrrun.

⁸ Inchendø Tiusbe nui misagu kalø mariilø køn tamig wetørrawa, trendaig købig køn:

“Señor Tiusbe trendan cha: Kwalømmera attrun cha,

Israelwei misaameraba, Judåwei misaameraba, na nømba katøgan srøig acuerdo maramig.

⁹ Tru Egipto piraugurri nømun kwalyu kemøra wesrunrrab kwalø, tru na nømui møskaløba acuerdo marig lataig kømøtø maramønrrun cha.

Kaguende truiløma na acuerdo marigu pønrrømuikkurri, nabe nømune isua ashmuptindig køn” cha, Señorbe trendaig køn.

¹⁰ “Pøs na Israelwei misaameraba acuerdo maramibe iig køn cha, tru kwalømmerrawangurrimbunøbe,

Señorbe trendan cha.

Na maig martrai karua pønsrailane nømui isuiløyu na pønsrøb,

na nømui manrrømerayu pørøb inchen,

nagurri nōmuimbe Tius kōben,
nōmgurrimbe naimbe nai misaamera kōnrrun cha.

11 Mugucha chi kusrenanamig palōmōnrrun
nui mendaigwan lata,
nui nunewan lata: ‘Señorwan nebua ash’ chib,
kaguende mutōgucha nane nebua ashchun,
chigucha kōmōzhikkurrimbunō mas nuikkatikke.

12 Kaguende nabe nōm sōlgandō tabig marōb amrrumuilan lastima tōgagōb,
katō nōmui kaig mariilan katōle isua wanrrab kōmōwein kur” cha.

13 Inchawei iig tru srō acuerdon, “srōizhig” cha wamappe, tru srōtō marig
kōbigwane, “kōllig kōn” cha trendan. Inchen yandō tru kōllirab tru patsab
arrubiibe yandō ke pinamitō palab arrun.

9

Srōmbalasrō santuariobe yu pirauig lataig kōmōn

¹ Pōs trube, tru srōtō acuerdo mariibe Tiuswan kōriibala tabig waminchib
mandō maramelan nōōrō wesruigwanba, katō tru pirau Tiuswei carpa ya
tabzhigwanba waminchibig treeg tōgaig kōbig kōn.

² Tru carpa yabe ōyeeg marig kōbig kōn: tru umbu kebiyutō, tru
“Tiusweindiig Kōnrrain” tain kwartuyube, kandileruba, mishatsiiba,
Tiusweyasiitō tarōmarim pirrimeraba tōgaig.

³ Inchen tru katōgan tab llensuzhig mesraig wendau trusrōmbe, tru “Ker-
riguwan Tiusweindiig Kōnrrain” tain kwartu wamig, truig pasrabig kōn.

⁴ Inchen tru umbube incienso parri altar orotōga mariiba, tru acuerdo
mara kōrrōmarin caja kerriguba orotōga pinōbulig truibā pōnrrabig kōn.
Inchen tru cjayube tru kōtsō orotōga marigu tru mamig manā taigwan
pusriiba, Aarōnwei pōrōtsig tru ishiizhig weguchibig kōbiiba, katō Tius tru
acuerdo marigwan pōrig tōgaig tru tambal sruuzheelō kōben tōgaig treeg
pasrabig kōn.

⁵ Inchen tru caja palab querubinmera Tiuswei tru tōrguegwalmabig pasrai
asamig treeg pōnrrabelō kōn, tru israelitasmera kaig mariilan Tius nō ulō
payiimig kōnrrai marinug nōmui kwaldzariimeran trubalawan larrōbicha.
Kerrigu ōyeelane mōimbe lutōgurrimbe wamindamgaig kōn.

⁶ Mira maig taig tru ōyamay tamara pasrabe, sacerdotsmerabe Tiuswe-
imburabelan maramigwan martrab katō katō kebambubelō kōn, tru
“Tiusweindiig Kōnrrain” cha marin kwartuyu kebambubyutōbe.

⁷ Trune tru umbusrō tru “Kerriguwan Tiusweindiig Kōnrrain” cha marin
kwartuyube pilayutō kebyamig kōn, tru maya sacerdotsmeran nō karub
sacerdote nōtō aningaig kōmōtō, ani srua, trutōga nuyasiitōwei tranamiba,
katō chugūi mōrmōwa misaamera kaig mariilaimburō tranamibague.

⁸ Incha Espiritu Santobe namune ōyamay kuitamab isumig tōr maran, tru
santuario srōtiig ka pasrōbenbatōbe, tru “Kerriguwan Tiusweindiig Kōnrrain”
cha pasrinuumay misag umbusrō kebambam maybe kuriimig srō kōn cha.

⁹ Iig ōyeeg marig pasrabiibe tru mōi ōyan kwalōmwei ōyan kōnrrabig
kōn cha eshkanrrabig kuig kōn, Tiuswan tru keta tranōb, katō animal
kweecha Tiuswan tranōb, ōyamay nun kōriibala tabig waminchib marōbelane
nōmui isub kebachib pasrabigwan newan chish martrab kaimabig kuin kui
ashchai.

¹⁰ Tru mamimeran, mutsamelan, pitøga peemay peemay chish maramelan tru øyeelø karua pønrsrailøbe asru ka palaweindiig købig kua, srøig mandø maramigwan mara pasramnegatiitø kuig køn.

Cristo nø kwaitøga purab nuig marig

¹¹ Inchen tru chinetø purø tabig pønrrabigwei Cristo, tru Maya Sacerdotesmeran Nø Karub Sacerdote arruppe, tru merrab carpa ya lata kømø, purø nuig, trurrigu newan tabigu kebyaig køn, mu taska marig, yu pirauig kømfigu.

¹² Nøbe tru “Kerriguwan Tiusweindiig Kønrrain” cha marin kwartuyu kebippe, kan pijitø managatigweyasig kebyaig køn, møg cabramerai aniwana srua kømøwei, toro-ureemerai aniwana srua kømøweingue. Treeg kømøtø, nui anindøgatøwei kebya, øyamay nuielø kønrrai misagwan managatig kaigyugurri wesrabig køn.

¹³ Tru møg cabramerai aniwana kui, tru toro-ureemerai aniwana kui, ishug waara-unøzhigwan parri usrøwan kui, tru chish misramigweimburab Moisés maig martrai pørigwan trumay treeg chish misrmeelaim pala trunun witikken, tru nømui asru pala chish kørrømisrtraima treeg marøbig kuibe

¹⁴ treetøguen kømøtø jtru Espiritu Santo managatig pasrabig, truikkurri Cristo Tiuswei merrab newan chishchig nøashib tranøbigwei animbe namui isub kebachib pasrabigu kaig mariilø kwamyumay srua ibig pønrrabigwan chishmarmønrraitarru, nam Øsig Wab Tiusweyasig marøb pønrramig kønrrai

Møimbe øyeeg martrab cha wamindiig srøig

¹⁵ Inchawei øyeekkurri Jesucristobe tru srø acuerdo marigwan misagweimburø tru purøbasramisra marøbiibe nø køn, tru keta tranrrab misrig managatigweyigwan tru wamiiløbe utønrrai, tru merrab srøsrø acuerdo marigu pønrrøwa, tru nø kwaikkurri kaig mariiløyu melabelan nuielø kønrrai wesranrrab.

¹⁶ Pøs møikkøben kan testamento marigweimburabma, truigwan marøbig kwan cha kilgamerayu yandø treeg eshkaendøwei truyu pøriibe maig taig treeg pub attrun.

¹⁷ Inchawei yandø tru testamento mara kørrømariibe trunun mara kørrømarøbig kwabendøwei tru pøriibe maig taig treeg pub attrun, tru kwamøwatø kømøtø.

¹⁸ Pøs tru srøsrø marig acuerdoguen anindøga treeg kønrrai mara kørrømarig køn, aningaig marig kønrrab kømøtø.

¹⁹ Inchawei Moisésma tru maig maramigwan martrai maig karua pønrsrailan trumørig tru maya misaameran waminchib chab eshkaabe, toro-ureemerai aniwana, møg cabramerai aniwana, piba lindisha, trugurrimbe hisopo tusrchiiba, pigø isiizhiibamara, tru lindisaitøga tru maig martrai pørig kilga welan kirrigwanba, katø nui maya misaamerana itøsrøb,

²⁰ trenchibig køn: “I anin køn cha, tru acuerdo marigwan yandø treeg marig kørrømisrtrai marøbiibe, ñim martrai Tius nø karua pasrig.”

²¹ Incha katø treetøwei tru carpa yawan lata, Tiusweimburab marøb pønrraigu nøm chigøben marøb lutøgurri srua pønrrailan lata, tru anindøga itøsrøbig køn.

²² Kaguende tru maig maramigwan martrai Moisés pøriibe kerrigu lutauba anindøga chish marig kønrrain kua, chi ani lusha kømibe tru kaig marigwan ulø paymø, ka kørrømarig kømibe kaagøn.

Cristo kwawa traniibe kaig marigwan kerrabig kòn

²³ Inchawei iilø, tru srømbalårø pønrrabelø lataig asønabelanma animal kweecha trani anindøga chish maramig palaig kuibe, trune tru srømbalårøngue trendø truyu pønrrabelane tru purab nuig tabig kweecha keta traniiløtøga chish mariilø kømig kuig kòn, tru animal kweecha keta trani lataitøguen kømø.

²⁴ Kaguende Cristobe tru santuario ciertonig maig køben møguelø ka tre lataig asønabig mara pasrinuutø kebmøtø, nøbe srømbalårøngue kebyaig kòn, mõi ya namuyasig Tiuswei merrab purøwaminchib wanrrab.

²⁵ Tru maya sacerdotesteran nø karub sacerdote yu pirauibe pilayu kan pijitø tru “Kerriguwan Tiusweindiig Kønrrain” cha marin kwartuyu ani nuin kømigwan tranrrab srua kebiben, trune Cristobe katø katø nøasiitø tranrrab kømøtø kebyaig kòn.

²⁶ Incha Cristo tru sacerdotesteran lataitøwei maramig kui kuimbe, tru pirøwan mara pasrinukkurimbunø katø katø kwamig nebubsruig kuinrrun. Incha mõi ya kerriguwan srabe kwalømmerawan nøbe kan pijitø managatigwei kenamisrin kòn, tru nøashib kwaitøga kaig mariilan patsøga pasrtrab.

²⁷ Misaamerane kan pijitø kwamig kønrrai mara pasrig kòn. Inchen tru wendaube yandø maig kønrrabigwan asha kørømarig kømig, truig attrun.

²⁸ Katø treetøwei Cristogucha kwappe, nø purøbasramisra kan pijitø kweet-sig kwaig kòn, truba nu misagwei kaig mariilan nø kerranrrab. Incha katøle arruppe, chigøben kaig mariilan nø niirrab kømøtø, nø arrumigwan truba truba munig melabelane kaigyugurri wesranrrab attrab kòn.

10

Maig maramigwan martrai Moisés pøriibe newan marmuig

¹ Tru maig maramigwan martrai Moisés pøriibe tru wendøsrø ciertonig attrabigwan øyeeg kuitamab asamig ka tre lataig asønabiitø kuig kòn, ke truiløbe kømuidøgucha. Incha øyeekkurri chu urastøgucha katø pilamørig, pilamørig animal kweecha traniilø trutø trutø marøb melaitøgabe newan tabelø kønrraimbe managen treeg martrab kaimabig kòn, tru Tiuswan tabig waminchib øyamay mariiløtøga kemallibelane.

² Inchawei øyeeg mariitøga tru newan tabelø kønrrai marøbig kui kuimbe, tru kweecha tranamelan øyangatiitø tranøbsruig kuinrrun. Pøs tru øyamay Tiuswan køriibala tabig waminchibelø tru nømui kaig mariilan kan pijitø kerriguweyasig chish mariilø kui kuimbe, trube, tru kaig marigwan tøga pønrrermab isub pønrramig chigagøbsruig kuinrrun.

³ Inchendø tru animalmera kweecha pilayu tranøb kuiløbe kaig marigwan katøgucha tøgar kermab isungarubig kòn.

⁴ Kaguende toro-uremerai animba, møg cabramerai animbabe tru kaig mariilan chi kerranrrab kaimabig kòn.

Cristo nø kwaitøga kanmaytø newanig marig

⁵ Inchawei Cristo yu pirau arruabe, Tiuswan trenchibig kòn:

“Ñibe ketig traniilan lata, kweecha traniilan lata
utag kømui indig kòn cha.

Inchendø kan asr tøgagønrrai,
ñibe nayasig tamarig kòn cha.

⁶ Parra keta traniilanba,
kaig mariilaimburø traniilanba

chigucha chi tabig asønamuig køn cha.

7 Inchen nabe ñun trendaig køn cha:

‘Nabe yu pasrar cha, nai Tius,

ñi maig maramig palai waben, na trunun martrab,

tru libroyu naĩmburab maig pørig pasrøben, treeg.’ ”

8 Tru srøtø yu wendau chibgunrrig: “Ñibe kweecha traniilan lata, ketig traniilan lata, parra keta traniilan lata, kaig mariilaimburø traniilan lata utag kømui inchib, ñune chigucha chi tabig asønamuig køn” cha, (tru øyeelan traniiløbe tru maig maramigwan martrai Moisés pørig maig køben treeg traniilø kuingucha).

9 Inchabe katø trendaig køn: “Nabe yu pasrar cha, ñi maig maramig palai waben, na trunun martrab”. Tru animal kweecha tranøb kuig merrab-sriigwane Tiusbe tarømara pasrig køn, Cristo kwaitøga tru wendau srøig arrubigwan mara pasrtrab.

10 Tius tru maig kønrrain køben treegu nambe nuindø kønrrai tarømariilø ker, Jesucristo nui asrwan keta trana, treeg marikkurri, tru kan pijitø managatigweyasig kwaitøga.

11 Chi sacerdotetøgucha kwalømmørig, kwalømmørig Tiusweimburabelan marøb pasrappe, kweecha traniilø katø, katø, treetøweih, treetøwein tranøbig køn, tru kaig mariilan managuen kerranrrabgailan.

12 Trune Jesucristobe kaig mariilaimburø nø kwawa, kan pijitø managatigweyasig nui asrwan trana, Tiuswei kusrmaygatømay wamisrig køn.

13 Incha trugurrimbunøbe nui ashig kømui inchibelan nui srøbmeran truilaim pala nebuna wamig kønrrai Tius treeg maramnegatig, truigwan muni-irab wan.

14 Kaguende Cristobe kan pijitø keta traniitøgatø managatigwei newan tabelø marig køn tru Tiusweindø kønrrai tarømariilane.

15 Katø Espiritu Santogucha ‘treeg køn’ cha namun truigweimburab eshkawabe, øyeemerrig chibig køn:

16 Señorbe trendan cha:

“Tru na nømba acuerdo maramibe iig køn cha:

Tru kwalømmerrawangurrimbe na maig martrai karua pønsrailane nømui man-rrømerayu pønsrøb,

nømui isuiløyu trunun na pørøb indamønrrun” cha.

17 Incha katøgucha trenchibig køn:

“Nømui kaig mariilanba, larrø trømbøig mariilanba

nabe managuen katøle isub wanrrab kømur” cha.

18 Inchawei iilan yandø chi ulø payamig kømíg kørømarene, tru ka i mariilaimburøbe keta tranamig yandø chi palømøn.

Tiusweimay kemallgun

19 Inchawei, nai nunelø, santuario marinug srømbalasrø Señor Jesúswei aningurri chigucha chi kørig isumø kebambamig tøgaguer,

20 srø may tru managatig øsig køm maywan, tru tab llensuzhig kelarrab mesraiwan nø namuyasig kura trarrøb kebyaiwan. Tru tab llensuzhiibe nui asr køn.

21 Inchawei kan sacerdote purø nuig Tiuswei misaameran kerriguwan nø ashib pasrabig nam tøgar kuig køppe,

22 nambe namui manrraube chi søra kømø kandø isub Tiuswan kemallgun, isubigwan Cristoinug pasrigwan chi kørmø tøga, kaig isub kebachib pasrabig

tøga manrrømeran chishmartrab anindøga itøtsura, chish pizhiitøga namui asrwan chish marague.

23 Tru nam munig melaigwan treeg kørewa tøgagúigwane tab tøga pønrrøgun, amburay imay srua aminab kømøtø, kaguende tranamigwan Tius tranrrab misra kørrømisrøbiibe maig taigwan tranmø kømø, tranøbig køn.

24 Inchawei kanikkurri kanikkurri puruguyamigwan isua asiyagun, undag købigwan tøgagømig kønrrai martrappa, chigøben tabig maramig kønrrai martrappa.

25 Nambe kanbalatø linchib Tiusweiwan marøb tulundzunamigwane elachimugun, tru møiløgøben amrrug kømub elachib kebambubelø latawei. Treeg inchimøtø, kangurrin kangurri øyamay meløgun chib puruguyagun tru Cristo Arrum kwaløm yandø pub arri ashabe, masken traatø melab.

26 Pøs Cristoimburab tru newan ciertonig maig kuigwan nam nebua asigwan utappe, utøbendø, kaigwan ke ka marøg køppa marøb ufiene, tru kaig mariilaimburø chiwan kweecha Tiuswan keta tranøptamibe yandø chigagøn.

27 Treeg kømøtø, tru kørig kømddiig maig kønrrabigwan Tius asha marinab pønrramiba, katø tru Tiuswan ashig kømui inchibeløbe nag purø trømbøig naarabiitøga pinisailø kømiba, treegwandø muniirab pønrran.

28 Tru maig maramigwan martrai Moisés karua pasrigwan mørmø, kaashibigwanma pailø kui, pønelø kui 'kalø maran' chibelø werrubene, chigucha lastima asiimig truibe kwamig købig køn.

29 Inchawei Tiuswei Nusrkawan chi kømig kui lataig itøbunab, katø tru acuerdo marigwan Tiusweindø kønrrai nømun tarømarøb aniwana larrø trømbøig kui lataig mara tøgagøb, tru ka yandø tab inchib Espiritun tsalø wamamba inchibigwane kan treetøguen kømø, purø trømbøig møra meganrrai marøbwei inchimønrraitarru.

30 Kaguende nambe øyeeg chib Tiuswan ashibelø ker: "Kaig marøbigwan møra meganrrai maramigwane na maramig køben, truburø pagarwane na pagaramønrrun" chibigwan. Katø treekkucha taig køn: "Nui misagwan maig maramigwan asha kørrømarøppe, Señor nø asha kørrømartrun" cha.

31 Øsig wab Tiuswei tasku kebenamibe si, jpurø trømbøig kørig kømddiig køn!

32 Ñimguen tru merrab kwalømmerasriigwan katøle isumbala, Cristoi tru srø wam tabig ñimun kebiløbengurrimbunø, kwayamigu lataitøwei purø trømbøig nebuinab, isui pønrramig arruben, tru uras ñimbe ka melaig købigwan.

33 Ñimune kanmaymerawane maya misamerai merrab indza asamig chine marinab, kaig indinab, katøganelan katø øyeetøwei marøb srua køben, ñimgucha treegutøwei tøga puraambub lincha pønrrabelø køn.

34 Katø kailan keeri yau pønrrabelø lastima isuim pønrrøbene, ñimbe ñimun kui lataitøwei isub, ñimui chi tøgagúilan kerrailø melamig nebuingucha, treeg kasraatø ka melab inchibelø køn, kaguende mas purø tabig mana patsønrrabig kømliigwan tøgar kernab isua ñimbe asha melabelø kuikkurri.

35 Inchawei ñim ke Tiusweinuutø kemenda pønrraigwane elachippa amrrab kømø, kaguende truibe purø nuig tabig utamig kønrrabigwan tøgagig køn.

36 Pøs ñimbe chi isumø tammay melabig melay, Tius maig maramig palai waben trunun ñim chab marikkurrimbe, nø tranrrab misra kørrømisrigwan utamig kønrrai.

37 Kaguende Tiuswei wamwan pørigube trenchibig køn, pøs kan maya yanazhigutø,

"tru attrabiibe attrun cha. Chi srarrønrraamøn cha.

38 Inchendø tru sølgandø tabig naimbe

nui isubigwan nainuutø pasra tøgagúikkurri øsig uñchun cha.

Inchen nø kørriimata wendømay yabe,

trube, nøbe nane tab kui wanrrai martraamøn” cha.

³⁹ Inchendø nambe tru pinisailø kønrrab kørriimata tru wendømay ambupteeløgucha kømøtø, isubigwan Cristoinuutø pasra tøgarmera kaigyugurri wesrailø, truilø ker.

11

Merrab misamera nømui isubigwan Tiusweinuutø pasra tøgagúig

¹ Pøs isubigwan Tiusweinug pasra tøgagúibe tru munig melaigwan ke treeg kønrraitamab isua pønrramig køb, katø nam chi asiimigwan chabguen ke asha lataig pønrraig, treeg køn.

² Pøs isubigwan Tiusweinug pasra tøgagúikkurri namui merrabsrø misaamerabe Tius nømun tabig wamindinabelø køn.

³ Pøs isubigwan Tiusweinug pasra tøgagúikkurri kerrigu chi købigwane Tius nui wamdøga mara pasrig købig kuin kui wetøgørra pønrrer. Inchawei kaptøga asiibe chi asiimígugurri mara pasrig køn.

⁴ Isubigwan Tiusweinug pasra tøgagúikkurri Abelbe animal kweecha Tiuswan purø tabig tranig køn, Caín trani lataitøguen kømø. Abel nui isubigwan Tiusweinug pasra tøgagúikkurri nøbe sølgandø marøb møg køn cha Tius wamandinabig køn, tru nø keta tranigwan Tius kashmø utab uras. Isubigwan Tiusweinug pasra tøgagúikkurri Abelbe kwaig mu kaabendø, katøgucha nøbe wamindan.

⁵ Isubigwan Tiusweinug pasra tøgagúikkurri Enocwane yu piraugurri Tius srua iben, nøbe tru kwab tamigwane maig købig kui mørmuig køn. Incha nune wetørranrrab kaimaig købig køn, kaguende Tius srua yaig kua. Pøs nun srua yaig kømøwatø, nøbe wamindinabig køn, Tiuswan tab kui wanrrai marøb møg køn cha.

⁶ Inchawei isubigwan Tiusweinug pasra tøgagømwabe, Tiuswane ni chinchaguen tab kui mørtrai maramgaig køn. Kaguende Tiusweimay møikkøben kemallibiibe, Tiusbe øsig wabig kuin kui køreb, katø nun labelane nøbe tranamigwan tranøb inchibig kuin kui køreb indamig køn.

⁷ Isubigwan Tiusweinug pasra tøgagúikkurri Noéma chi asiimíg attrabigwan isua kønrrai Tius eshkabenma, nun truba kørriitøga arcan marøbig køn, nui yauelø kwamø, øsig webamrrai. Noébe tru øyeeg mariitøga pirau maya misagwan kailøgurri Tius møra pønrrønrrai mariilø købash cha kørømara, chi kaig kømíg lataig Tius tabig kørømarig kømigwan nøbe utig køn, tru isubigwan nuinug pasra tøgagúigugurri arrubigwan.

⁸ Abrahamma isubigwan Tiusweinug pasra tøgagúikkurri tru ketigwan wendø utamsrømay webya inrrai wamøben, nøbe møra, webya yaig købig køn, chumay yam kuinguen mørmubendø.

⁹ Nøbe isubigwan Tiusweinug pasra tøgagúikkurri nuin kønrrai tru tranrrab misrim pirau Abrahambe ka peesrøngurri arruatø lataig, kan peg pirau lataitø tsuig købig køn, nun keta tranigwandøwei utabelø tru Isaacba, Jacobpa, truilø lataitøwei kan carpa yameraywan.

¹⁰ Kaguende Abrahambe tru ciuda katsigwan niga pasrønrrabig tøgagig tru srømbalasriigwan muniirabig købig kua. Inchen tru ciuda maig kønrrabigwan treegwei unaasha wesrab, truigwan marøb inchibiibe, Tius nø køn.

11 Abrahambe nõbe yandø maya køllig kuatøgucha isubigwan Tiusweinug pasra tøgagúikkurri unøtiig latawei chish kømigwan utig købig køn unø mōskain kønrrab, (Sarabe ureg tøgagønrrab kaimabig kuindøgucha), kaguende tru tranrrab misrøbig Tiusbe tru tranrrab misrigwane tranmø kømø, tranrrab kui, Abrahambe treeg isua tōga pasraig kua.

12 Inchawei tru unø tøgagømigweimburappe yandø kwaig lataig kuig, tru kan mōweinukkurrindø ureemera srøig larrøbichib mendappe, nu køptø srømbalasrø estrellamera lataig, pi menda pisrum lataig købig køn, mu nebua mundzangaig.

13 Inchen i misaamerabe mayeeløba isubigwan Tiusweinug pasra tøgagúigutø amønaig køn nømui kwam kwalømgatig. Tius tru nømun tranrrab misra kørromisriilane utømuindøgucha, Tius tranrrab misrig nuisrø põnrrabelan yabsrøngurrindø ke kan asha lataig kasraarabelø køn, 'nambe srømbalasreelø, peesreelø kua, yu piraube ka petøweindø warer' chib, tōrgandø trenchib waminchib.

14 Inchen øyamay waminchibeløbe tru katøgan pirø nømuin kønrrabigwan lab ambubelø kui, nømbe tōrgandø asamig kenamaran.

15 Pøs tru nøm werrua amrruin pirøwan isub põnrraig kui kuimbe, katøle trusrømaytøwei llirawa ambimbe, ka ambamdiig købsruinrrun.

16 Inchendø nõmbe treeg marmøtø, waramig katøgan pirø mas purø tabigwan tøgagønrrab isub põnrraig køn, truipe tru srømbalasriigwan. Treekkurri Tiusbe chi kørig kuin kømøn 'nømui Tius køn' taig kømig, pøs nõbe nømuyasig kan ciuda tamarig kua.

17 Abrahambe isubigwan Tiusweinug pasra tøgagúikkurri Tius Abrahamwan maig inchibig kōtashchab marenma, nõbe Isaacwan tranig køn. Tius tru 'tranrrumøn' cha kørromisriilan utabig, tru Abrahambe, nui kandø nusrkai Isaacwan Tiuswan yandø ke kweecha tranamitø palabig køn

18 Abrahamwane: "Tru ñuinukkurri amrrub misaamerane Isaackurrin kønrrabelø køn" cha, Tiusbe øyeeg taig købig kuindøgucha.

19 Kaguende Abrahambe isua pasrabig køn, Tiusbe kwailai utugurringuen katøle kusrumig maramburab marøbig kui. Pøs kwailai utugurri katøle øsiirraig lataig kui mara Isaacwane treeg utig køn.

20 Isaache isubigwan Tiusweinug pasra tøgagúikkurri Jacobwanba, Esaúwanba nømune mayanguen tabig pub attrai marig køn tru wendøsrø attrabigwan.

21 Jacobma isubigwan Tiusweinug pasra tøgagúikkurri yandø kwanrrab wawa, Joséwei uregwan kanun kanun mayanguen tabig nebunrrai mara, nui pøtønain tsigwan pøtønawa pasramisra, Tiuswan køriibala tabig waminchibig køn.

22 Joséma isubigwan Tiusweinug pasra tøgagúikkurri yandø kwamig lutaaurab arruben, israelitasmera mayeeløba Egiptogurri wendøsrø webambamigwan wamincha, nui tsutsiimeran mandø indamigwan eshkab karua pasrig køn.

23 Isubigwan Tiusweinug pasra tøgagúikkurri Moiséswei mōskaløma Moiséswane larrø tab unøzhig kui asha, põn pøl ørøba nun sōra tøgagúig køn, tru Faraón Egipto pirau rey tru kwetchai karua pasrigwan chi køriimatømøtø.

24 Moisésma isubigwan Tiusweinug pasra tøgagúikkurri yandø kølig misrabe, tru Faraónwei nimbasrwei nusrkain køn cha wamig kømigwan kaasig køn.

²⁵ Moisésbe Tiuswei misaameraba larrø kaig indinab megamigwan isuig køn, tru kaig mariiløyu tab kui mørøb kan maya yanagatiitø kasraarabgunrriibe.

²⁶ Wendøsrø attrabig Cristoyasig chine trømbøig waminab megaibe, egipciosmera chigurrimbunø tøgagúilan kerrigu tøgagúi lataikken kømø, purø nuig kui isua pasrabig køn, kaguende nøbe tru wendøsrø truburø ketig utamigwan, trunun ashib pasrabig kua.

²⁷ Isubigwan Tiusweinug pasra tøgagúikkurri Moisésbe Egipto piraugurri webyaig køn, rey maya namikkølig waingucha. Inchen trunun kørmøtø, nøbe webya inrrab kandø isua pasraig køn, kaguende tru kaptøgabe nebua asiimø Tiuswan yandø ke asha lataikken pasraig køppe.

²⁸ Isubigwan Tiusweinug pasra tøgagúikkurri tru Pascua Fiesta taigwan mara, katø tru yaskappalamerawan anivan srølig køn, tru kwangarub ángel israelitasmerai mayor nusrkalane kweechimønrrai.

²⁹ Isubigwan Tiusweinug pasra tøgagúikkurri israelitasmerabe Mar Rojoyu kan trendø puryu lataig larraambig køn. Inchen egipciosmeragucha larramrrab inchen, pi katøle itøgasrøben, chab kwaig køn.

³⁰ Israelitasmera isubigwan Tiusweinug pasra tøgagúikkurri tru Jericó ciuda pøtøgatan sruubirøbanrrimerabe chab kegørrig køn, nøm tru pøtøgatanwan kwalømmera siete nemisramne lliraben.

³¹ Isubigwan Tiusweinug pasra tøgagúikkurri tru Rahab, nui asrwan anwei yanøb ishuuma, tru mørmø misaameraba kanbalatø nøgucha kwamuig køn, kaguende tru pailø israelitasmera maisrøn køtashchab nilø ashchab amrubelan tab wamab utikkurri.

³² ¿Masbe chiwan waminchab køh? Pøs nane Gedeónweimburab køben, Baracweimburab køben, Sansónweimburab køben, Jeptøweimburab køben, Davidweimburab køben, Samuelweimburab køben, katø Tius maig karuigwan eshkabelaimburab køben wamindamikken nebumøtan.

³³ Isubigwan Tiusweinug pasra tøgagúikkurri katøganelø nøm ashib karub tøgagúigwan nøm kanab, tabig sølgandø maig maramigwan marøb, Tius tranrrab misra kørørmisriilan nebua utab, leónmerai triimeran kasrøb indig køn.

³⁴ Nag kørig kømðiiig naarabelan naaramønrrai kweechib, espadatøga kweetsiilø kømigugurri wegørra ambub, truburab chi martrab kaimabelø købig kuig chisheelø misrøb, katø kwayabyugucha kwayamburab kwayabelø misra, peg pirausrøngurri amrrub suldaumerane luløsrkøb inchibelø køn.

³⁵ Isubigwan Tiusweinug pasra tøgagúikkurri ishumburmera nømui kwabelan katøle øsiiraniilø utabelø kuig køn. Inchen møiløbe kwamnegatig purø trømbøig marøb srua kuinabelø køn, elatchab indingucha, elatchamamøtø, kaguende nømbe katøle øsiirawa srømbalasrø purø tabigwan nebunrrab isubelø kua.

³⁶ Inchen katøganeløbe kaig marøb indza ashib srua kuinab, ichabetinab, cadenastøga lusrinab, kailan keeri yau merrarrowa keerinab melabelø køn.

³⁷ Inchen kaneløbe sruutøga peta kweetsinab, serruchotøga sølbinab para kweetsinab, espadatøga kweetsinab, amburab iburab ubisha kaluschibah cabra kaluschibatø kewar amøñibelø køn, larrø waachamera kømig nebuilø, isubiitø kappinbalatø amønarnamig nebuilø, katø larrø kaig indinab melamig nebuilø.

³⁸ Øyeeg tab misaameran yu pirau misaamera nømun tøgagømibe nømbe purø nu palabelø købig køn. Nømbe mu misag warab waraimøsrø, nørø

tunmerawansrø chu pumgúinguen mørmeelø amøñibelø køn, nørrø srug yaambumerasrø, lendegørrab pirørrabmerasrø, øyeesrø kebamba warab.

³⁹ Inchen nømbe isubigwan Tiusweinuutø pasra tøgagúigube tabig wamindiilø købendø, tru Tius tranrrab misra kørørmisriilane møikkucha tranig utomuig køn.

⁴⁰ Kaguende Tiusbe nømui lata kømø, namuyasiibe purø tabig tøgagúig kua, tru nømbe namba kanbalatø misratøwei tru newan tabig kønrrai indig kuig køn.

12

Maramga murelø amrruben, chi isumø, namgucha mur pønrramig

¹ Inchawei øyeeg købene, tru isubigwan Tiusweinug pasra tøgargøbelø nørrø køptø kan wañi lataig namuim pøtøgatan namun ashib purrabelan namgucha tøgagúig køppe, namun chiguen tab ambangaig chigøben kwatsi-iranøbelanba, tru kaig marøbig namun iløsrkøptø iløsrkønrrai marøb pasrabigwanba webetøgun. Incha tru nam luløb ambamig Tius namui merrab may trarrig tsubig nam tøga pønrraiwan maikkucha kørørmismø, luløbig lulgun,

² namui kaptøgabe Jesúsuan ashib, tru nømerrig treegwan pera marøb, katø tru namui isubigwan nuinug pasra tøgagúigwan newanig kønrrai marøb inchibigwan. Pøs Jesúsbe nø pumsrø kasrag kømddiig pasrabigwan asha pasraikkurri kurusyu mesraig kweetsig kwamigwan awentawa, tru kørøig marinab pasramigwan chi trunun isua ashmøtø, truyu puraya, Tius wamisra wainug kusrmaygatømay wamisrig køn.

³ Incha tru kaig marøb misamera Jesúsuan chine kaig maren, treegu ka awentab purayaigwan, trunun ñimguen isuy, ñim chi muraaramøwei, chi kaima kørørmismøwei indamig kønrrai.

⁴ Pøs tru kaig mariiba ñim kwayab melaigu, ñimbe katøgucha ñimui aniwand lusamnegatiibe mara pønrrømøn.

⁵ ¿Tius nui ureg kuimba tab wamdøga waminchib purugúigwan ñimbe yandø pesannabguen inda chindah?

“Nai nusrkai, ñi mur pasram kusenrrai Señor ñun murelan kusrennene, kagatørre inditamab treeg isua tøgagømøwei, Señor ñun isua mørtraia marene, truyutø kørørmismøwei indamig køn.

⁶ Kaguende tru nui undaaragwane

Señorbe nune mur pasram kusenrrai kusrennøb, mundøgucha nui nusrkain kuitamab isua tøgagúigwane nøbe kalø marigwan ølmartrab murba tranøbig køn” cha, trenchibig køn.

⁷ Maramga murig latalilø Señor ñun maringaruigwane mur pasram kusenrrai kusrenrrab inditamab isua awentau. Kaguende Tiusbe ñimune nui nusrkain kuimba øyee maran. ¿Kan nusrkawan møskai mur pasram kusenrrai kusrenniimig mu treeg nusrkai kø chinderah?

⁸ Inchen tru kanelø mayeelø mur pønrram kusenrrai kusrenniilø latawei ñimun kusrenniimeelø kuisruandøbe, trube, Tiuswei trag nusrkalø kømøtø, ka menda ureemera kuin kønrrun.

⁹ Inchagucha namma yu pirau namui møskalø namun mur pasram kusenrrai kusrennøbelø nambe tøgar kua, truilanma maig købash inchimøtø, tab inchib tøgagøbelø kuibe, ¿tru namui espíritumerai Møskai Tiuswane treetøguen kømø, masken maig taigwan tru kuindø mørøb meløwa, øsig kømigwan tøgagømig kømønrraitarru?

¹⁰ Namui mōskalōma nam mur pōnrram kusrenrrai nōmbe kan maya yana-gatiitō namun kusrenanōb tōgagōbelō kōbig kōn, nōmun maig maramdiig kōben, treeg. Trune Tiusbe nam mur pōnrram kusrenrrai kusrennōppe namunguen tab kōnrrai maran, nō newan tabig kuigwan namgucha tōgagōnrrai.

¹¹ Tru mur pōnrram kusrenrrai murigwan kusrenanene, ke kan tru urastōbe chiguen chi kasrag kōmdiig kōmōtō, mur kui mōrōb pasramibe kōbig kōn. Inchendō tru ōyawan kusrenaninab puraambubelaimbe tsōndatōbe sōlgandō tabig amōnamiba, chi isumgaig tab amōnamiba tōgaig arrubig kōn.

Tius wamindigwan kaasamibe kōrig kōmdiig kōn

¹² Inchawei ñimui kwalmera kullaarailan chishmisrtrai kōnōgōb, ñimui tōmmera itōnapteelan katōle mur misrtrai maray.

¹³ Katō ñim tab punab ambamig kōnrrai putur maymeran ōlmaray, tru ñimui kōrriindi srōb wetunshimō, tammisrtrai.

¹⁴ Ñimbe maya misaameraba ambugurri igurri lata tab kōmigwanba, katō Tiusweyasiitō tarōmisra tabig amōnamigwanba martrab inchib kuy. Kaguende Tiusweyasiitō tarōmisra tabig amōñimōwabe, muguen Señorwane ashchaamōn.

¹⁵ Ñimbe purō tab isua ashib amōnay Tiuswei tru ka yandō tab indigwan ñim mōikkōben wendōbasrōb pōnrrabgunmab, inchippa ñim mōigwan kōben kan mōb srōlgōlig lataig kal-lawa nurab ya, truig pesriig ilōsrkōnrrai maren, misag purō nuwan tru kaitōga mindisailō kōmōnrrai.

¹⁶ Mugucha mōg lata ishug lata trōmbōig marōb uñchab kōmōwei, kabe Tiusweimburabigwane chigucha kōmui lataig inchibig kōmōwein kuy, tru Esaú latawei. Truima kan mamig nindagweindō kan mayor nusrkai maig tōgagōmigwan yangig kōn.

¹⁷ Kaguende ñimbe yandō asiinrrun, Esaúbe mas wendōbe tru mayanguen tab indig kōnrrai keta tranigwan katōle mōskawan utōnrrab inchen, nune yandō ka taig kōbigwan. Tru mayanguen tab indig kōnrrai tranigwan tōgagōnrrab kappin kōrrōgōb lawa, yandō treeg kōnrrai chab marigwane ni chinchaguen lliskamgaig kuig kōn.

¹⁸ Pōs ñimbe, israelitasmera Sinaí Tunyu kemalla pōnrrab latawei, kan nu tun katōramdiigu nagurōmera naarabig tōgaigu kemalla kōmōwei, kabe lōstiig, tru purō trōmbō lōstiigu kemalla kōmōwei, kabe kōrig kōmdiig isig ichibigu kemalla kōmōwein kōn.

¹⁹ Katō ñimbe tru trompeta mur wanrrōbigu kemalla kōmōwei, kan wam wamindiilan mōrtrab kemallmōwei indig kōn. Inchen tru wam wamindiilan mōrōbelōma: “Tiusmanda yandō waminna” chibelō kōn,

²⁰ kaguende yandō mas awentawa pōnrrangaig kōben, Tius tru ōyeeeg karua pasren: “Kan animaldōguen tru tunwan kebachibiibe sruutōga peta kweetsig kōnrrabig kōn cha” trenchiben.

²¹ Inchen tru treeg pureb pasrabiibe purō trōmbōig kōrig kōmdiig kōben, Moisésbe trenchibig kōn: “Kwaarōsraig kōrig kōbiitō ke itōnab pasrar” cha.

²² Ñimbe treegu kemalla pōnrrōmōtō, mōimbe ñimuimburappe tru Sion Tun tainug, Ōsig wab Tiuswei ciudadsrō, srōmbala Jerusalénsrō, muguen mundzangaig āngesmera tulundzuna kasrag purraisrō, treegu kemalla pōnrran.

²³ Katō Tiuswei tru srōsrō kal-lawa uremera nōmui munchimeran srōmbalarō pōrig tōgarmera kanbalatō purraisrō, katō Tius tru manya misagwan maig maramigwan asha marōbig waisrō ñimbe kemalla pōnrrab, katō mayeelō sōlgandō tabig misaamerai espíritumera yandō newan tabelō kōnrrai kōrrōmariilō purraisrō kemalla pōnrran.

²⁴ Katø tru srø acuerdo marigwan misagweimburø purøbasramisrøbig Jesúswangucha kemalla pønrrab, katø tru Abelwei ani 'tru kaig marøbigwan ñi, Tius, ulø pay' chib, ani lataikken kømøtø, Jesúswei tru ani itøtsurig mas purø tabig 'tru kaig marøbigwan ulø paymø, ñi, Tius, pesannau' chib waminchib aniyu kemalla pønrran ñimbe.

²⁵ Inchawei tru waminchibigwan kaashib kønrrab kømø ashiptø kuy. Kaguende Tius Moiséskurri isuptø kønrrai wamindigwan kaashibeløma yu pirauguen chi indiimíg ka yandø wegørrømuibe, trube, tru srømbalarøngurri isuptø kønrrai waminchibigwan tarømisrabe, nambe truyugurrimbe ni chinchaguen wegørramgaig kønrrun.

²⁶ Tru Moisés tsub urassrøma Tiuswei wamdøgabe pirøwane kønøgagutsig kuisse, møyimbe øyamay maramønrrun cha kørømisrig køn: "Nabe katøle pirøwane kønøgagutsamønrrun cha, trurrigu pirøwandø kømøtø, srømbalameranbañau."

²⁷ Tru, "katøle kønøgagutsamønrrun" cha, tru trendaibe, tru ka mara pønrsraindeelø kønøgagutsiilane kerranrrab kui tøgandø eshkan, tru kønøgagutsamgailø, truiløtø pønrrabig pønrrønrrai.

²⁸ Inchawei tru nam ashib tøga purramig tru kønøgagutsamgaigwan nambe utab kuig købene, nambe 'mayanguen unywa, unywa' chigun, Tiuswan tab kui wanrrai marøppe, nun kørriibala tabig waminchib, kan yeeg tabig kønrrabmab isub.

²⁹ Kaguende namui Tiusbe kan nag lataig køn, chigucha kørømisraingaug parrøbig.

13

Cristoieløbe mandø amønami

¹ Ambugurri igurri undaarabig undaaray, kan trag nunelø lataitøwei.

² Ñimui yau asiimeelø pubelan tab wamab ya pebamigwane pesanamøtay. Kaguende møyiløma øyamay marøb meløwa, ángelesmeranguen ya pebøbelø køn, chi truilø kuitamab isumøtø.

³ Katø kailan keeri yau purrabelane ñimbe nømbe kanbalatø keerig purrøwa lataitøwei isub, katø kaig indinab melabelane ñimun treeg indi lataig isumig køn.

⁴ Kasharamibe purø tabig købig kui mayeeløba treeg isua tøgagøb, katø kasharawarmerabe nømui kiainuube mu pegwan pera kiamig kømøtø køn. Kaguende møg lata, ishug lata trømbøig marøbelanba, katø itøluløpteealanba, Tiusbe nømun maig kønrrabigwan asha martrab køn.

⁵ Ñim amønñippe, anwane ke chinchimmørø chull inchib amønñimøtø, ñim møyi maig tøgagüitøgatø tab kui mørøb kasraatø amønami køn. Kaguende Tiusbe trendaig kuig køn:

"Managuen ñundø elachimøwei,
chinchibgucha tsunrrai managuen ñun tarømisrmøwei indamønrrun"
cha.

⁶ Inchawei øyeeg taig købene, nambe treeg kønrraitamab isua, chi isumø trenchinrrun:

"Nan purugubiibe Señor nø køben,
nabe chigucha kørmmumønrrun cha.

¿Møøbe nane chigúi martrautah?" cha.

⁷ Tiuswei wamwan ñimun waminchib, ñimun pera marøb pønrrabelane isua kømig køn. Nømui tru tabig amønaiyu asha kusrenrrai mandø tabig kørømarig

købigwan tab isua asha, tru nòm isubigwan Jesucristoinug pasra mandø tøgagúigwane treetøweih tøgaguy.

⁸ Jesucristobe merrabsrø lata, møyian kwaløm lata, katø managatig nõbe yunømarmíig, treetø køn.

⁹ Chigøben peemaytø kusrenaniilø pesrøteeløtøga amburab iburab srua ambiilø kønrrab kømøtø kuy. Pøs namui manrrømera Tiuswei tru ka yandø tab indiitøga mur pønrramigwan utiibe tabig køn, tru chi mamimeran manrrai karua pønrrailan marøb megaig lata kømøtø, tru øyeelan mariibe chiwein-gucha chi purugumeelan.

¹⁰ Nambe kan altar tøgaguer tru Tiuswei carpa ya tabzhigu marøb pønrrab sacerdotemerabe tru altaryuigwane mamig kømíig.

¹¹ Pøs tru maya sacerdotemeran nõ karub sacerdote tru, “Kerriguwan Tiusweindiig Kønrrain” tannug tru animal kweetsilai aniwane tru kaig marilaimburø tranrrab umbusrø srua kebyaindøgucha, tru animal kwaigwei asrmerane nòm warainukkurri nõørsrø srua webamba, parrilø købig køn.

¹² Inchawei treetøwei Jesús-kucha ciuda yaskabyugurri wambig nõørsrø kwaig købig køn, nui anindøga Tiusweindø kønrrai misaameran chish mar-trab.

¹³ Inchawei namgucha nuimay nun katønrrab webamgun ciudadugurri wambig nõørsrø, nun maig trømbøig indinab megaigwan namgucha treetøwei kaig marinab melønrrab.

¹⁴ Kaguende nambe yu piraube kan ciuda managatig pasrab pasrønrrabig chigar kua, nambe tru attrabigwan lab ker.

¹⁵ Inchawei Señor Jesucristogurri chu urastøgucha Tiuswan nam animal kweecha lataig tranøppe, purø tabzhig wamindiilø trangun, nui munchiwan tabig wamindi wam tru trigugurri webarrubiiitøga.

¹⁶ Ñimbe tabig maramigwanba, ñim chi tøgagúigwan pirishib kømigwanbabe pesannanrrab kømø melay. Kaguende kweecha tranøb lataitøwei Tiuswan keta traniiilø øyeeg traniiiløbe nõ purø tab kui wanrrai marøbig, treg køn.

¹⁷ Ñimun pera marøb pønrrabelane maig karuigwan mørøb, nõm maig chiben tregwan melay. Kaguende ñimun chi kømønrrai chu uraskucha ashibeløbe nõmwein køn, nõmui chi mariilan nõm Tiuswan eshkaib pønrrønrrabelø kua. Nøm maramigwan marøb melappe, kasraatø, chi isuin kømøtø, marøb kønrrai inchigay. Kaguen tregømuisruandøbe, ñimune chiguen chi tabig kønrraamøn.

¹⁸ Namuimburab ñim Tiuswan miarrunrrigay. Pøs nambe namui isub kebachib pasrabigu chi ‘kalø køn’ chibig chigar pønrrab, katø chiyutøgucha nambe tabig marøb melønrrab isua meler.

¹⁹ Nabe ke tiusmanda Tiuswan miab kørrunrrigay chinrrab inchar, na peba ñimuisrømay katøle arrumig kønrrai.

Patsøgønrrab srabe wamindiilø

²⁰ Tru chi isungaiig tab købigwan tøga Tius, tru managatigwei acuerdo mari anindøga tru Ubishameran Ashibig purø nuig, namui Señor Jesús-wan kwailai utugurri kusrubiiibe

²¹ tru nõ maig maramig palai waigwan martrai chigurrimbunø tabig jalabigwan ñimun tranrrun, Tius nõ purø tab kui ashib wamig kønrrai Jesucristogurri namuinug nõ marøb pasraitøga. Jesucristone managatig tørguegwalmabig kønrrun. Treg kønrrun.

²² Na øyamay melamig køn chib wamindi wamwane, nai nunelan, tius-manda tammay utørrunrrigay chinrrab, pøs nabe landøtiig pørar.

²³ Namui nuneg Timoteobe kailan keeri yaugurri webyain kui ñim wammøra kørnrai inchar. Incha nø petø arrubene, nabe nøba ñimun ashchab arrumønrrun.

²⁴ Ñimun ashib pera pønrrabelø mayeelanba, katø mayeelø Tiuswei misaameranba 'tab ka amøñigüeh' tan chirrunrigay. Katø italiasreeløgücha ñimune 'tab ka amøñigüeh' cha øran.

²⁵ Tiuswei tru ka yandø tab indiibe ñim mayeeløba pasrønrrun.

Santiago

Israelwei misag truørø amba warabelan Santiago pørøb

¹ Na Santiago Tiusweimba, Señor Jesucristoimba marøb megabig Israelwei doce nusrkaløgurri misag nõrrø larrøbicha, pirau kan ørøtø amba warabelan 'ka amøñigueh' chinrrab inchar.

Tiuskurri kusrebig kømig

² Nai nunelø, chigøben, chigøben puig meløwabe, truba tab kui inchib, kasraaray,

³ kaguende ñimui isubigwan Jesucristoinuutø pasra tøgagúigwan maig køtashchab marigugurrimbe masken tammay melamig arrubig kui ñim ashibeløbe.

⁴ Inchendø ñim tru treeg tammay kullaaramø, ka melaibe, newanig kønrrai inday, chiyugucha neilø, chi isumgaig newan pønrrabelø, yandø chiyugucha palømø newanelø.

⁵ Ñimun mõigwan køben øyeeløyu tab asha maramigwan kusrebig kømig paløbene, Tiuswan miau, nõbe tranrrun. Kaguende nõbe mayeelan tranøppe, merøbalatø tranmøwei, katø chi miabene, namømøtø, tammay tranøbìg køn.

⁶ Inchendø miappe, ke Tiusbe tranrraitamab isua miamig køn, treeg kømuptinchaitamab maizhikken chi treeg isumøtøgue. Kaguende chi treeg kømønrrab kø chindermab isubiibe kan maryu pi welarwan isig ichibìg amburab, iburab srua yaig lataig køn.

⁷ Møikkøben treebe Señorwan chigøben utamuitamappe isumøta.

⁸ Kan møg mõindø øyeeg martrab isub, katøguen srønabe peetø isubiibe, chiyutøgucha mumayguen kømìg unan.

⁹ Kan truburab chiga nunezhigwan Tius nune truba nuig marene, purø tab kui møramig køn.

¹⁰ Inchen puaiibe purø tab kui møramig køn, Tius nune chigucha kømìg lataig marene. Kaguende puaiibe kaumerayu u lataig kua, pasrabìg pasrønrrab kaiman.

¹¹ Pøs pørr webarrua, purø mur pachene, kaube mul-laben, ube peñen, tru tabzhiibe yandø pinan. Øyeetøwei puaikkucha nui chigøben penab, yanøb uniiløyu pinønrrun.

Chinetø kaig pub arringucha treegu ka megab

¹² Chigøben pub arruben, tammay megabìg megabiibe mayanguen tab kuig køn. Kaguende treegu puraya pasramisrøppe, nun undaguelan Tius keta tranrrab kørømisrig tru øsig køm coronan utønrrun.

¹³ Møigwan køben chiyugøben kaigyu kebenamdiig mørørabene, Tius treeg isunandan chimøta. Kaguende Tiusbe mana kaigu kebenamdiig kuig mørørai wamøwei, ni katø mun kaigu kebenøsrkønrrab inchimøwei inchibìg køn.

¹⁴ Treeg kømøtø, mõigwandøgucha nui kaig isubeløtøwei srua iben, truiløtø yandø tabìg lataig asønangarua kebenøsrkaim pasran.

¹⁵ Inchen tru tømøbìg isuilø yandø umbu kebya, pasramisrikkurrimbe, kaig maramig kal-lan. Inchen tru kaibe yandø ne nurappe, kwamigwan kal-lanrrai mara pasran.

¹⁶ Nai undaaraig nunelø, ñimguen pella peemaytø isub pønrrømøtay,

17 chitøgucha tabig ketiiba, katø chigøben tabig newan marøbelø kønrrai ketiibabe srømbalårøngurri arrubig køn, tru srømbalårø chine pilab pønrrabigwan marøbig Tiusweinukkurri. Nøbe nø maig køppe, manatøgucha treetø kua, nuinuube løstørab lata inchib, tømrisrøb lata inchib, inchibiibe chigagøn.

18 Nun trendø treeg marøg kuikkurri, nui newan cierton wamdøga namune katøyug srøig kal-langaruig køn, nø kerrigu misagwan ellmara pønrrailai utu nammerrig ke srøsrø ellmarig misrig latailø kønrrai.

Kalutøga møriitø kømø, maramig køn

19 Nai undaaraig nunelø, iigwan isuy: ñim mayeeløba møramigwane muniitø purramig køn. Inchen wamindamigwanba, namamigwanbabe tsøndatø isuptø maramig køn.

20 Kaguende kan møg namig køtanmaptø mariibe Tiuswei sølgandø tabigwan marmøn.

21 Inchawei treeg købene, ñimbe ashikken kønrrabgaig marigwanba, chigøben kaig mariilø trutø netsaig tøgagüilanba webeta elacha, Tiuswei wamwan ñimui manrrau ellgwaigwane mur kurrashmø, tammay utay. Kaguende tru wam wamindiibe maramburab marøbig køn, ñimui møsigwan wesramig.

22 Pøs Tiuswei wamwane maig martrain taigwan ñimbe marøbelø kømig køn, ka møratø, møratø kønrrab kømøtø. Trengømuisruandøbe, chi mørmui lataitøwei ñimasiitø ka kegørrab pønrraig webinrrun.

23 Kaguende møikkøben Tiuswei wamwan mørøptø møra, tru maig taigwan møra marmíbe, kan møg nui maløwan espejoyu ashibig lataig køn,

24 nui malø maig kuigwan asha, katø llirawa, ippe, pesannab lataitøweingue.

25 Inchen møikkøben Cristo maig martrai karua pasrig newan sølgandiig, tru chi iløsrkaimíig kønrrai marøbigwan ke tab asha, truyu megabig megawa, tru martrai karuigwan pesannaptinchimøtø marøbigweimbe, nui mariiløyu mayanguen tab kuig kønrrun.

26 Ñim møikkøben, Tius martrai karua pønrrailøyu maizhikken purø punømø marøbig kurmba isubendø, nui niløtøgabe maig kurrøbashtø waminchibiibe nøasiitø kebeñib pasran. Inchen tru nø Tiusweiwan maizhikken purø punømø marøb pasrab taibe chi marmui lataitøwei webyan.

27 Tius Møskawei merrab tru nø karuilan maizhikken pinab marmø, chillig indiimíig mariibe, iig køn: usri møskai, peta kwailanba, kelø peta kwailanba chigøben isuig meløben isua ashchab ambub, katø yu pirau kaig trømbøig arrubiitøga chillig incha pønrrømøwei indamig.

2

Misaameran møilandøgucha lata wamamig

1 Ñim nai nunelø, ñimui isubigwan namui Señor Jesucristo tørguegwalmabigweinuutø tøga pønrrøwabe kanundø tab wamab inchimø, mundøgucha lata kømig køn.

2-3 Ñim tulundzuna purøbenma, kan truba pua møg oro surtigastiig, truba tabig keweig pubene, truba tabzhig wamab, ñimbe trenchinrrun: “Yu katøguchi tab wamdønug warra” cha. Inchen trunetø katøgan, kwa waacha,

truba shautøzhig chilliguig keweig pubene, ñimbe trunune trenchinrrun: “Ñibe øsrøndø, ka pasrau” cha; kabe: “Uyu pirau wamisr” cha.

⁴ ¿Treeg marøppe, ñimui utu ñimðweinguen kanune yandø nøøø marøbguen pønrrømøtirru? ¿Ñimbe kaig isuaguen treeg inchib pønrrømøtirru?

⁵ Nai undaaraig nunelø iigwan møray: ¿Tiusbe yamba yu pirau waachameranwei lawa wesruig kømuitarru? ¿Nømbe isubigwan Jesucristoinuutø pasra pønrraigwan tøgagømburab tøgagøb, katø nun undaguelan tru nø ashib karub waigwan Tius tranrrab misra kørøømisrigwan chigucha utønrrabeløbe nømwein kønrrai marig kømuitarru?

⁶ Trune ñimbe waachamerane chigucha kømíig marøb ka køríig maran. ¿Tru puarmerawein kømuitarru ñimune møra melønrrai marøb, katø misagwan ashib karub purrabelaimay ñimun uñchib waram srua ambubeløbe?

⁷ ¿Tru Cristoi purø tab munchiwan ñimun pasra wamigwan nømweinrre purø trømbøig wamabelø kømuitarru?

⁸ Tius tru martrai karua pasrig purø nuig, nui wam pørigu pasrabigwan, maig chibig køben ñim treeg møra marøb pønrrøwabe, søl marøb pønrrønrrabguen: “Tru mendaigwangucha, ñiasig lataitøwei undaarau” cha trendaigwan.

⁹ Inchen ñim kanune tab inchib, kanune maig købash inchib pønrrappe, ñimbe kaig marøb pønrran. Inchen tru maig maramigwan martrai pøra trarriitøwei ñimune ‘kalø marøb itøbunab pønrran’ cha ñimundøwei itøøra pasrtrun.

¹⁰ Kaguende tru maig maramigwan martrai Moisés pørigwan møikkøben kerriguh møra marøppe, marendø, tru utu kanundøguen kalø marøb itøbunikkurrimbe mayamba kalø mara pasraig kørøømisran.

¹¹ Kaguende: “Itølulamig kømøn” chibiitøwei, treekkucha taig køn: “Kweet-samig kømøn” cha. Inchawei møikkøben itølulmuingucha, kweechibiibe, tru maig maramigwan martrai Moisés pørigwane itøbunan.

¹² Ñimbe wamindiiløyu lata, amønailøyu lata tru maig maramig chilosrkaimig kønrrai marøbig nømun maig asha maramigwan marig kømig, ke yandø treeg maramig puim pønrrab misaamera lataig kømig køn.

¹³ Katøganelan lastimaguengaig marøbelane, nømungucha treetøwei lastimagaig marøb asha kørøømariilø kønrrun. Trune, tru lastimabaig marøbeløbe, kørømø, tab kui webamba pønrrønrrun, tru maig kønrrabigwan asha maren.

Insubigwan Jesucristoinuutø pasra kuiba, chigøben tabig mariiløba

¹⁴ Nai nunelø, ñim møikkøben ‘isubigwan ke Jesucristoinuutø tøga pasrabig kur’ chibendø, chigucha tabig marøb kenamarmubene, tru ‘isubigwan pasra tøgagur’ taibe, ¿chiwein kuin purugunrrab kø? ¿Kabe tru isubigwan Jesucristoinuutø tøga pasrab taig, truitø ñun kaigygurri wesranrrautah?

¹⁵ Kan nunewan kui, kabe kan nuchawan kui kemig truburab chigawei, kwalømmerawan chi mamig chigawei megamne,

¹⁶ ñimma møikkøben trendaimbeh: “Chi isumø, tab inrrig chib. Pachiiitø kønrrai tsitsø keb, øska mab, muchib uñchig” cha. Inchendø asru maig palain pasrøben chi tranmubendøbe, niløtø pasrainguen kønrrun.

¹⁷ Inchawei øyeetøwein køn, ‘isubigwan Jesucristoinuutø pasra tøgagur’ taig, chigøben mariilø chigaibe, nøasiitø kwaig køn.

¹⁸ Inchendøgucha møibe trenchinrrun: “Isubigwan Jesucristoinuutø ñibe tøga pasrøben, nabe chigøben tabig mariilø tøgagur cha. Ñui isubigwan

Jesucristoinuutø pasra tøgagúigwan chigucha tabig mariilø chigaig nan kenamartra cha. Inchen nai isubigwan Jesucristoinuutø pasra tøgagúigwane nabe chigøben tabig mariiløtøga ñun kenamartrumøn” cha.

¹⁹ Pøs Tiusbe kandø kønmab isub, ñi kørewa pasraibe, trumaybe sølwein køn. Inchendø kwaimandziimeragucha Tiusbe kandø kønmab kørewa, katø kørig køb itønab inçhibelø køn.

²⁰ Au, ñi chugúí mørmíig, nebua ashchab inchi, isubigwan Jesucristoinuutø pasra tøgagúig, chi tabig mariilø chigaig, ka yandiibe chigucha kømíig kuin kui.

²¹ ¿Namui merrabsrø møskai Abrahamma nui nusrkai Isaacwan tru altar marinug truyu Tiuswan trana, kwetchab trarren, nune chi kaig kømíig lataig tabig kørrømarig kømuitarru?

²² Inchawei, ¿Abrahamweimburabma ashmøtirru, nui isubigwan Tiusweinuutø pasra tøgagúibe tru chigøben mariiløba truba misra kanbalatø marøb pønrrabig kui? ¿Inchen nui isubigwan Tiusweinuutø pasra tøgagúibe tru mariiløgurri kerrigu newan marig kørrømisrmuitarru?

²³ Inchen Tiuswei wamwan pørigu øyeeg taibe nebuig køn: “Abrahambe Tiuswan køreikkurri Tiusbe nune sølgandø tabig kui asha tøgagúig køn” taig. Incha nune “Tiusba truba tab linchibig” cha, wamig købig køn.

²⁴ Inchawei ñimguen ashen, Tiusbe kan mowane nui tabig mariiløgurrimba chi kaig kømíig lataig tabig kørrømaran, isubigwan Jesucristoinug pasriitøgatø kømøtø.

²⁵ Katø treetøwein kuig køn, ¿tru Rahab, nui asrwan anwei yanøb ishuuma, tru maig køtasha asha wam sruamrrunrrab ambubelan nøbe ya pebamba, katøgan peg maywan amrrai eshkamba, øyeeg tabig marikkurri nune chi kaig kømíig lataig tabig kørrømarig kømuitarru?

²⁶ Kan asrma chi espíritugaibe kwaig køn; katø treetøwei isubigwan Jesucristoinuutø pasra tøgagøppe, tøgagøbendø, chi tabig mariilø chigaibe kwaitøwein køn.

3

Niløbe truba kaig marøbig køn

¹ Nai nunelø, ñimui utube mayeeløbabe kusrenanøbeløtø kønrrab isumøtay, nam kusrenanøbelane maig kønrrabigwan asha marøppe, ka palatiig kømø, martrab kui ashibelø kuig køppe.

² Kaguende nambe mayeeløba chiyugøben kalø marøb pellibelø ker. Inchen møikkøben nui wamindigu pellmíibe, tabigwan newan sølgandø marøb møg køn. Treebe nui asrwangucha kerriguba maig købash kømønrrab isua møra tøgagøñ.

³ Kaullimeranma nam trigu tsi muusrøppe, muwan inrrain kesruben mørtraí muusrøbelø ker, asr ørøba kønørramamø merrarramig.

⁴ Katø barcomeran chigucha asay. Yeeg nørreelø purø mur isig ichibig srua ambiilø kuingucha, barcon muba inrrai inçhib pasrabig kan lamøtiitøgatø truyu purrabeløbe nøm muwan ambug køben truwan øran.

⁵ Katø niløgucha øyeetøwein køn: Asru purø lamíig købendø purø nuig misrøb, chigøben purø nørreelø martrab waminçhibig køn. ¿Kan lamø naazhikkurrindø kan srønø tsibwan muba kuimburab parrøbig køn!

⁶ Inchawei niløbe kan nag lataig køn, namui asru kaitø netsaig, asr ørøba trømbøig marøb mindishibig pasrig tru niløbe. Tru møra melamnug

naarab pasrabiitogatoewei piløga pasrig køn. Incha nam øsig kuingurrimbunø kwamnegatig pilab pasrabig pasrønrrun.

⁷ Møøbe chigurrimbunø namig animalmeran køben, illimeran køben, ulmeran køben, maryu purrabelan køben kusrenanamdiig køn. Inchawei misaamerabe merrarraawa kusreezheelø marøbelø køn.

⁸ Inchendø niløwan kumbe mugucha kusrenanrrab kaiman. Purø kaig kua, chinchaguen treeg marmønrrai merrarraawa tøgagønrrab kaimaig, kweechib larrø trømbø møtø netsaig køn.

⁹ Nambe niløtøgabe namui Tius Møskawan tabig wamindamba, katø Tius nø lataitøwein kønrrai mari misaameran tru niløtøgatøwei trømbøig nebunrrai wamindamba inchibelø ker.

¹⁰ Tru trigugurrindøwei mayanguen tabig kønrrai wamindamba, trømbøig nebunrrain chib wamamba indan. Nai nunelø øyeebe maramig kømøn.

¹¹ ¿Kan pigabyugurrindøwei chish pi webarrumba, kaig pi webarrumba inchautah?

¹² Nai nunelø, ¿kan higuera tusr købendø, aceitunas niguen, katø kan uvas tusr købendø, higos niirrautah? Katø treetøwei kan tre pigabma truyutøwei tab pi weguchimøn.

Kusrebig kømigwane Tius tranøbig køn

¹³ Møikkøben ñimui utu truba kusrebig, trurrigu chiwan køben tab chigúi mørøbig kuabe, maig købash kømø, tammayig kuitøga kenamar, nuig kurmab inchimøtø, larrø tammay marøb unigu, truba kusrebig kuiyugurri arrubiitøga.

¹⁴ Inchen treeg kømøtø, katøganweimburab ñimui manrrau ke chinchimmørø inchib pusrkwai asiibah, chiyutøgucha ke nømerrig kønrrab indiibatø tøga pønrrøwabe, ñimbe truba nørreelø kusrebelø kermab inchimøwei, tru newan ciertonigwan isab pønrrømøwei inday.

¹⁵ Kaguende kusrebig kuig øyeebe Tiusweinukkurri arrumøtø, ka i piraugurrindø arrubig ka møwei isuiløyugurrimba, nugwaimandzigweinukkurrimbe arrubig køn.

¹⁶ Kaguende ke chinchimmørø inchib pusrkwai asiibah, chiyutøgucha møig kanab marøbig køtashchab indiibatø pønrrabnuube, ambumay imay ke mumay købashiiibah, katø chigurrimbunø ka trømbøig mariiløbatø pønrran.

¹⁷ Trune tru kusrebig kømig Tiusweinukkurri arrub iimerrig køn, chishig. Trugurrimbe ambugurri igurri tab kønrrai indamig, katøganelø chigøben indingucha tammayig kømig, tab kui mørøb kasraatø pønrrønrrai marøbig kømig, katøganun chigøben nebui megaben, truba truba lastima ashibig kømig, tabig marøbig kømig, kanelane ørø mara, kanelandø tab inchimlig kømig, ka treeg kønmab ashchaidø kømø, maig maramigwan marøbig kømig, treeg køn.

¹⁸ Inchen ambumay imay tab kømigwan tøgagønrrab tru ambumay imay tab købiitøga ellmarøbeløbe, sølgandø tabig ellmariilø tulishinrrun.

4

Pirauigwan tab kui inchib pønrrømumig

¹ Trømbøig kwayam lailøba, namishib chinetø cha møriiløbabe ñimui utube ¿chugurrinre arrubig køh? ¿Ñimui umbu trømbøig kaig isubelø ni kan mandøguen kømlig pønrraptø pønrrøwa, truyugurrinre arrubig kømuitarru?

² Ñimbe chigøben tøgagønrrab inchendø, tøgagønrrab kaiman. Kweetsamba, katøgane chi tøgagømønrrai ke chinsraatø indamba indan. Inchendø chin-chagucha tøgagønrrab kaiman. Incha ñimbe chinetø chib menda, trømbøig kwayan. Ñimbe chi tøgagønrrab isuigwan tøgagønrrab kaiman, kaguende Tiuswan miameeløgurri.

³ Kabe miappe, miabendøgucha, utønrrab kaiman, kaguende søl isua miamøtø, ka ñimui asrwan tab kønrrai kasraarab kømigwayasiitø miabelø kuikkurri.

⁴ ¡Ñim, Tiuswan itøluløptø misaamera! ¿I pirauigwan tab inchib chull inchibiibe Tiuswane ashig kømui inchibelø kui ashmeelø køtirru? Inchawei mõikkøben i pirauigwangøba tab kui mørøb llirabiibe, Tiuswane ashig kømui inchibig misran.

⁵ Kabe Tiuswei wamwan pøriiøyu øyah chippe, ¿ka trenchig køptø trendaitamab isutirru ‘tru espíritun Tius namui umbu pasrønrrai traniibe namune ¡katø! nuyasiitø kønrraimab undaaran’ chibigwan?

⁶ Inchen Tiusbe nui ka yandø tab inditøgabe namune katøguchinguen tranøbig køn. Incha nui wambe trenchibig køn:

“Nuinetø nuig mørørai inchibelane

Tiusbe sètøbasramisrøb kurrappe,
trune chigucha kømeeelø tammayelane

nui ka yandø tab indigwan Tiusbe tranøbig køn” cha.

⁷ Ñimbe Tius maig chiben nune tru kuindø mørøy. Trune nugwaimandzigwane mørømønrrab mur isua pønrrai, treeg pønrrøbene, ñimuinukkurrimbe lulr-un.

⁸ Ñim Tiusweimay kemallene, nøbe ñimuimay kemallchun. ¡Kaig marøbelø, ñimui tasigwan chish maray! ¡Ñim Tiuswan undaaranrrab indamba, katø tru urastø yu pirau chi købigwan undaaranrrab indamba inchib misaamerabe ñimui manrrømeran newan chish maray!

⁹ ¡Ñimbe truba isui inchib, chindimbarre nambe øyeeg kailø kermab truba isub, katø kishib inday! Ñimbe indzabgunrriibe kishib; kasraarabgunrriibe truba isui inday.

¹⁰ Ñim Tiuswei merrab utsøbasrene, nøbe ñimune nørreelø kønrrai martrun.

Maig maramigwan nai nunewan ke na asha marmumig

¹¹ Nai nunelø, kangurrin kangurri katøganun chigøben kaig wamincha ashmøtay. Møikkøben kan nunewan kaig waminchib, kabe ‘øyeeg søl marmig køn’ chib, waminchibiibe, tru maig maramigwan martrai Moisés pørigwan kaig waminchib ‘søl marmøn’ chib pasran. Inchen ñi tru Moisés pørigwan kaig kui marøb pasrøwabe, ñibe trunun møra marøbig kømøtø, ñiguen ‘øyeeg køn’ chib asha marøb pasran.

¹² Inchawei mu katøgane kaaben, Tius nøtø køn tru maig maramigwan martrai pøriilan tranøb, katø nøtøwei maig maramigwan sølgandø asha marøb inchibiibe. Truibe nø kaigyugurri wesruin kui, kabe kaigyu pasrin kui nø ashchabig køn. ¿Ñibe chigugu, katøganun ‘øyeeg søl marmig køn’ chib marøb pasrønrrappe?

Srøna kwalømbe chi punrrab kui asamgaig køn

¹³ Inchen ñim: “Møin kui, srøna kui, chugøben ciudasrømay amba, trusrø pila ørøba warøwa penamba, yanamba, an nørro maramba inchib warønrrab” chibeløbe, mõimbe iigwan mørrai:

14 Ñimbe srõna trumar ñimui øsig amønamigu ni chi punrrab kuinguen mormubendø treendan. Ñimbe ka wañi lataitø køn, møindø kenagúitø, katø yanayube kenamuptinchibig latailøgue.

15 Trembe ñim øyah tamikken søl kønrrun: “Señor treeg kønrrain købene, øsig warøwa, iilan marøb, øilan marøb waramønrrun” tamig.

16 Trune ñimbe nørreelø kermab isub, treetø isumøtø, truba nørreelø wamindan. Kan chiyutøgucha øyeeg nørreelø kermab isub wamindiiløbe purø kaig køn.

17 Møikkøben tabigwan maramig kui ashendø, marmuibe, yandø nuimbe kaig marig kørrømisran.

5

Puarmeran kaig attrabigwan isua kønrrai waminchib

1 ¡Au, ñim puarmera, iigwan møray! Chigøben yeeg trømbøig ñimun neub attrab pasrøben, kishib, trashib inday.

2 Ñimui chigurrimbunø pua misrøb tøgagúiløbe tterailø køben, ñimui keilane pullilla mailø køn.

3 Ñimui oroba, anbabe, mugusiain køn. Incha tru i mugusaiitøwei ñimune ‘øyeeg marøbelø køn’ chib, chi marmeelø kui kenamartrun. Tru tsamdzu-raibe kan nag lataitøwei ñimui asrwan pinishinrrun. Truba truba chigurrimbunø tulishib tunbønsrain køn ñimbe, mõi ya srabe kwalømmerawan.

4 Ñimui ellmariilan tulishib melabelan tru tulisaimburø ñim anwan pagaramø nili andøwei ñimune ‘øyeelø kømøgue’ chib, wamab trasan. Inchen Tius maramburab marøbiibe tru uløwan tranmuinabelø trashib wamigwan mørin køn.

5 Ñimbe yu piraube purø tabig warab, asr maig palai inchen, ñimuimbe treeg marøb waramig tōga, ñimbe waarameran lataig tsal-lana køn ñimui manrrømeran, kweetsam kwalømbe yandø punrrabguen køn.

6 Ñimbe tru sølgandø tabigwane kaig nebunrrai kørrømara, pasra, kweetsig køn, nøm maig martraindø nøbe chigucha inchimuig køn.

Tiusba wamindamiba, Señorwan munig megabig megamiba

7 Trune ñim nuneløbe namui Señor arrumnegatig tammay muniirab melamig køn. Kan ellmarøb kwallibiima ellmarabe, tru srø sre attrabzhigwanba, srabe sre attrabzhigwanba yaandø, yaandø, munig megan, tru pirau ellmarig misrizhigwan tulishinrrappe.

8 Ñimgucha treetøwei truba tammay muniirab, katø kørrønrrab kømø, mur pønrray. Kaguende Señor arrumibe luraurab pasran.

9 Nai nunelø, kangurrin kangurri chigøben ‘øyan køtan’ chib; ‘treeg inndan’ chib, waminchimøtay, ñimun marigwan asha, kaigyu kørrømara pønsrainab pønrrømønrrappe. ¡Au! Tru ñimun maig maramigwan asha martrabiibe yandø yaskabuguen pasran.

10 Au, nai nunelø, ñimgucha asha kusrewa tōga pønrrai tru merrabsreelø Tius maig karuigwan tru Señor Tiuswei munchiyu eshkabelø chigøben isumdiig nebuinabendø, yaandø, yaandø tammay melaigwan.

11 Pøø nambe mayanguen tab kuilø kui aser chigøben isumdiig puingucha, tru kullaaramø melapøtø melabelane. Jobwanma chigøben yeeg isumdiig nebuingucha, tammay ka megapøtø megaigwan ñimbe wammøøbelø kuinrrun, katø srabebe Señorbe Jobwane maig indigwan chigucha. Kaguende Señorbe lastima ashib, trurrigu tammay purugub inchibig køn.

¹² Nai nunelø, iigwane masken isua kuy: ñimbe srømbalawan, kabe pirowan kabe katøgan chigøben, pegwan truilai merrab pasramisra, '¡katø! marmø kømø, nabe maramønrrun' chib, pønrrømøtø, ñimbe 'treeg martrab' chippe, treeg maramig køn. Inchen 'marmønrrab' chippe, marmumig køn, Tius kaigyu pønsrailø kømønrrappe.

¹³ Møikkøben ñimui utu chigøben puben, isuig megawabe, Tiusba waminchi. Inchen møikkøben tab kasraatø wappe, Tiuswan tabig waminchib cantau.

¹⁴ Inchen møikkøben kwanrrø tsuabe, iglesiayu Tiusweimburabelan pera marøb pønrrabelan wamø, Señorwei munchiyu aceite srøla, nuyasig Tiuswan 'purugurra' chib mianrrai.

¹⁵ Inchen nømbe Tiusbe ke tamartraitamab isub, Señorba waminchene, kwanrrøbe puraiben, Señorbe tab uñchai kusranrrun. Inchen chigøben kalø marin købene, Señorbe truigwan pesannab ulø paymønrrun.

¹⁶ Inchawei kangurri kangurri ñimui kalø mariilan eshkayab, katø kangurri kangurri katøganweimburab Tiusba waminday, ñim tammsiriilø kønrrappe. Kan sølgandø marøb møg Tiusba wamindiibe truba nørreelø marøbig køn.

¹⁷ Tru Elías, Tius maig karuigwan eshkabiima, kan møg ka nam lataitøwein købig køn, tru sre pumønrraima, Tiuswan 'sre pumønrrai martrunrrig' chib nøba wamindiibe, pøn pila y tøbø pilaba srebe pirau pumuig købig køn.

¹⁸ Incha katø sre punrrai Tiusba katøle waminchen, srebe puben, piraube ellmariilø misrig købig køn.

¹⁹ Nai nunelø, ñimui utu ñim møikkøben Tiuswei newan ciertonigugurri pella, tarømisra iben,

²⁰ katø kalø marøbigwan nui pella yainukkurri lliskøbiibe nui møsig yandø kwanrrab pasraigwan truyugurri wesrub, katø truba nørro kaig mariilan kasrøb inchun.

1 San Pedro

'Ka amõñiguh' chib pørig

¹ Na Pedro Jesucristo nan nõashib karua ørig i kilgawan pørar misag nõmuim pirau kõmøtø, peesrø tru ørø amba warabelan, Ponto pirausrøn køben, Galacia pirausrøn køben, Capadocia pirausrøn køben, Asia pirausrøn køben, Bitinia pirausrøn køben,

² Tius Møskai tru manasrøwei nebua asha, nõ lawa wesrailan, tru Espiritu Santogurri ñimune tabigwei tarømarøb, Jesucristo karuulan møra marøb, katø Jesucristoi anindøga chishmarøb indiilan. Tius ka yandø tab indigwanba, chi isumgaig tab kõbigwanba uñcha tøgagønrreamab isur.

Tiuswan kasrag køb waminding

³ Namui Señor Jesucristoi Tius Møskaimbe mayanguen tab indig kõnrrain køn. Nøbe purø nu lastima tøgagua, namun katøyug srøig kal-langaruig køn, tru treeg kõnrraitamab isua munig melamig managucha patsønrrabig kõmigwan nam tøgagønrrai, tru Jesucristo kwabelai utugurri katøle øsiiraikkurri.

⁴ Tru patsønrrab kõmíg Tius namun keta tranamig tøgagúibe pinønrrabig kõmøwei, chigøben kaiba lynchabig kõmøwei, merguranrrabig kõmøwein køn, tru ñim tøgagønrrai srømbalasrø ñimuyasig esegaig pasrabig.

⁵ Ñim isubigwan Jesucristoinuutø pasra tøgagúikkurri Tiusbe nui maramburab mariitøga chinchimønrrai ashib tøga kuilø køn, yandø kerriguwan tru kaigyugurri wesraig kõmig tamara pasrig tru srabe kwaløm kenamarig kõnrrabigweyasig.

⁶ Øyeekkurri ñimbe truba kasrag kuilø køn, inchippa kan maya yanatø chigøben, chigøben nebuig isuig melamig punrraptiig kuindøgucha.

⁷ Kaguende isubigwan ñim Jesucristoinuutø pasra pønrraibe kan oro lataitøguen kõmø, purø tabig køn. Tru oronma managatig kõnrrabig kõmígwanguen maig køtashchab ashchappe, nagu parramig køn. Inchawei ñimui isubigwan Jesucristoinuutø pasra pønrraigwan maig køtashchab asha kørømarikkurrimbe Jesucristo kenamisrøb kwalømbe ñimune søl marig kui asamba, maya nugen tabig indamba, katø tabig kui asha tab indamba indiilø kõnrrun.

⁸ Ñimbe Jesucristone ashmuindøgucha, undaarabelø køn. Katø mõimbe nun kaptøga ashippe, ashmubendø, nun kørewa, purø nuig purø tabig kui møra, truba kasraaran, tab købiitø ni manchaguen chi tamgaikke,

⁹ pøs tru ñimui isubigwan Jesucristoinuutø pasra tøgagúig yandø tru nebumigan nebuben, tru ñimui mõsiimera kaigyugurri wesrailø kørørmisrig.

¹⁰ I kaigyugurri wesraig kõmigweimburappe Tius tru maig karuigwan eshabelø Tius tru ka yandø tab indigwan ñimuin kõnrrai nõm waminchibeløbe manasrøwei maig køtashchab ashchab, truba truba tab ashib, payib laig kõbig køn.

¹¹ Cristoi Espiritube truilan manawei eshkaig købig køn, tru Cristobe truba kaig indinab megamigwanba, katø tru wendaube tørguegwalmabig kõnrrabigwanba. Inchen nõmbe mu køtashchab ke ashimmørø inchib, katø treebe mana kõnrrermab indig købig køn, tru Espiritu nõmuginug pasrøwa eshkaigwan.

12 Inchen tru nøm eshkaib wamindigwane nømuyasig kørnrain kømõtø, ñimuin kørnrai, Tiusbe nømun kenamarig køn. Tru srømbalarøngurri Espiritu Santon ørig treeg maringaruitøga tru møin kwaløm srøig purø tabigwan ñimun eshkaibø kusrenaniibe, tru merrabsrø Tiuswei tabig srø wamwan waminchibølø wamindigwandøwei ñimune eshkan. Pøs tru øyeelane ångelesmeratøweinguen nebua asinrrabna nui indan.

13 Inchawei treeg købene, chi maramigwane kanmaytø tab isua, tab asha maray, tru Jesucristo kenamisrøb kwaløm Tius ka yandø tab indigwan keta tranamigwane ¡katø! truigwandø muniirab.

Tius namun wamappe, tabigweyasig tarømarilø kørnrai wamig

14 Maig karuigwan møra marøb nusrkalø latailø amønay, Tiuswan ashmeelø køb uras maig amøñig køben amøñib lataig kømõtø.

15 Treeg kømõtø, kaiba lindiimig chishig newan tabig amønay. Kaguende Tius nø wamabiima newan tabig køn.

16 Inchawei nui wamwan pøriiløyuma Tiusbe trenchibig køn: “Ñimbe newan tabelø kuy cha; nama newan tabig kur” cha.

17 Møigwandøgucha atsi marmøtø, nøm maig mariilan maig kørnrrabigwan marøb Tiuswan ñim: “Namui Møskain” cha, wamabeløbe, chu urastøgucha yu pirau managatig kømø, ka petø warabeløbe, nune køriibala amønamig køn.

18 Kaguende Tiusbe ñimune chi tabig marig kørromisrøtrabgaigwan marøb amønaigugurri wesraig køn, tru treegwane ñimui merrabsrø kølli misaamera marøb amønaigwan ñim tøga kørramisrig købigwan. Inchawei ñimbe tru øyeegugurri wesranrrab purø pagaraigwane tsabøtø ashibelø køn. Truigwane mana pinønrrabgaitøga purø tranig køn, kan oro lataitøga kømøwei, kabe an lataitøga kømøwei, treeg kømõtø.

19 Cristobe kwawa, nui purø tab anindøga ñimuyasig treeg marig køn, kan ubisha-unø chishchig, newan tabzhigwan kweetsi lataitøwei.

20 I pirøwan marmøwatø Cristone manawei wesrua pasrig købig køn øyeegweyasig. Incha møin kwalømmerawan kenamisran, ñimuyasig tab kørnrai.

21 Inchawei ñimbe nøgurri Tiuswan kørrewa pønrramisran, tru Criston kwaitai utugurri øsiirangarua, katø nune tørguegwalmabig kørnrai marøbigwan. Inchawei treeg købene, ñimui isubigwan Cristoinug pasra tøgagüigwanba, truba truba munig melamigwanba Tiusweinuutø pønra kørnrain køn.

22 Incha møimbe, tru newan ciertonigwan ñimbe møra marikkurri ñimui mõiimeran chish marin køn, nunelan ka undaaranmab ashchaidø kømõtø, undaaranrrab isua, undaarabelø kørnrrab. Inchawei kangurrin kangurri manrraugurri newan isua undaaramburab undaaray.

23 Pøs ñimbe katøyug kal-lawar køn, møskalø pinønrrabelainukkurin kømõtø, Tiuswei wam øsigui, managuen pinønrrabikkaig pasrabig pasrabigugurri.

24 Kaguende Tiuswei wamwan pøriiløyube trenchibig køn:

“Maya misaabe kan kau lataig køben,
nøm purø nørreelø tabig kuibe
kauyu kan u lataitø køn cha.

Tru kaube mul-laben, ube peñen,

25 Trune Señorwei wambe managatig kørnrrabig køn” cha.

Inchawei i tru wam ñimun eshkaibe tru tabig srø wam truig køn.

1 Inchawei treeg købene, chigurrimbunø kailan køben, katø chine may wamincha isilian køben, ka palatø tab indiilan køben, mendaigwan chigurrin køben pusrkwai asiilan køben, chigurrimbunø wam kusrub indiilan køben elatsay.

2 Kan srø kal-laig ureezheelø pitsø muchig kuinchib lataitøwei, tru Tiusweimburbig pitsø chi peebe lindisaimig lataigwan ñimbe ke chindamdø kui inchib lay, truiukurri norrørawa, kaigyugurri wesraig kømigwan tøgagønrrab.

3 Kaguende ñimbe yandø Señorwane purø tabig kuin kui tsabø ashibelø køn.

Cristobe tru ya marøbelø pølbasrtrab katsigu wayi srug lataig

4 Ñimbe Señorwan kemalay, tru Øsig Srugwan. Truigwane misaamera kaashippe, kaasig købendø, Tiusweimbe lawa wesruig, purø tab sruuzhig køn.

5 Inchawei ñim øsig sruumera Tiuswei yayu ñimgucha marø kusrunrrain kuy, sacerdotessmera Tiusweindø tarømariilø kua, Tiusweimburbig maramigu keta tranøb pønrramig kønrrai, Jesucristogurri Tiusweyasig chull indamdeelø.

6 Inchawei Tiuswei wamwan pørigube trenchibig køn:

“Sionsrø kan srug trarrar cha.

Truibe katsigu pølbasrtrab wayi srug,
lawa wesruig, purø tabzhig køn cha.

Trunundø isua pasramisrøbiibe
køriimisra kørrømisrtraamøn” cha.

7 Ñim nundø kørebelaimbe tru sruube purø nuig tabig køn. Inchen tru nundø køremeelaimburappe Tiuswei wamwan pøriiløyu øyah taibe nebun:

“Tru ya marøbelø kaasig sruube
niga pasrønrrai katsigu pølbasrtrab
wayig srukken misrig køn” taig.

8 Katø øyeekkucha chibig køn:

“Kan srug srurrengwangerumba,
katø penøsrkamba inchib srug køn” taig.

Pøs nømbe Tiuswei wamwan maig taigwan mømmeeløgurri srurrengwan. Nømune trendø øyeeg nebuig melønrrai marig købig køn.

9 Trune ñimbe Tius lawa wesruig misaamera, reywei sacerdotessmera, newan tab misag purø norrø, Tius tru nui truba tabig mariilan eshka misaamera kønrrai mariilø køn, tru ñimun purø løstøygurri nui purø tørigu pønrramig kønrrai wamabigweiwan.

10 Ñimbe merrappe Tiuswei misaamera kømuig køn. Trune mømibe si, nui misaamera køn. Merrappe ñimbe Tiuswei lastima asigwan utønrrab kaima kuig, mømibe lastima asigwan yandø ñimbe nebua uta pønrran.

Tiuswei karuig melabeløsun amønay

11 Nai undaarailø, yu piraube kan peg pirausrøngurri ka petø amrruatø latailan ñimun waminchar, ñimui møsigwan kwayab pasrabig tru ñimui asru kaig marøg købig arrubigwan tiusmanda marmøtay cha.

12 Judíos kømø misaamera Tiuswan ashmeelai utube nømguen ñimun asha kusrenrrai amønay, ñimune ke larrø kailø kui lataig wamindindøgucha, ñim tabig mariilan ashabe, mayeelan maig mariilan Tius payib kwaløm truiløbe Tiuswan truba tabig waminchai.

Misagwan asha karub purrabelan møramig

13 Ashib karub purrønrrai møguelø purrønriilane nøm maig chiben møray, namui Señorweyasig. Tru maya misagwan ashib karub wabig, reywan lata,

14 katø kubenadurmeran lata, kaguen truiløbe kailane mørøsrkøb, katø sølgandø marøbelane nømdøwei tabig waminchai Tius øriilø kuimba, treetøwei nømunne møramig køn.

15 Kaguende Tiusbe ñimune sølgandø martraiwei isun. Trumay marene, tru chugúnguen mørmubendø waminchibelø chineto wamindiilane ñimbe nu mandamgaig kasra pønsrønrrun.

16 Ñimbe amøñippe, chi iløsrkøbig chigaig ñimuimburab amøñibeløsun amønay. Inchendø 'chi iløsrkaimíig namuimburab amøñibelø ker' chiptø, trunune kaig maramigweyasig merrarrowa, marøb kømumig køn. Treeg kømøtø, Tiuswei maramigu marøb melabelø latailø tab isua amønay.

17 Mundøgucha maig købash inchimø, tab indamigwan treeg tab inchib, nunelan undaarab, Tiuswane køriibala amøñib inday. Katø tru reywan chigucha maig købash inchimub tab indamig køn.

Cristo maig købash indinab megaigwan nam asha kusrenrrai kørømarig

18 Karuindiig melabelø, ñimun karub pera købelane maig købendø inchimø, køriibala møramig køn. Tabelø chinchimeelandø kømøtø, martrain chippe, ke kandø kandø wamabelan chigucha treetøwei møramig køn.

19 Kaguende øyeebe tabig køn, møigwan køben isumdiig arruben treegu ka awentab, chi kaig marmubendø, maig købash puinab megamig kuindøgucha Tiuswan isua pasrabig kuikkurri.

20 Inchen ñimun chigøben kaig marikkurri ichabetøbene, ñim tammay ka melaptø melaindøgucha, ¿ñim treeg melaigwane Tiusbe chincha tabig kui ashchab kø? Inchen ñim sølgandø marikkurri maig købash indinab tammay melaptø melaibe, treebeguendø Tiusweimbe truba tabig køn.

21 Tiusbe ñimun wamappe, øyeeb nebunrraiwei wamig køn. Kaguende Cristogucha ñimuyasig truba kaig indinab megaig købig køn. Nøma maig uñibig køben, ñim treetøwei asha kusrenrrain kuig køn, ñim truwandøwei amøñibelø kønrrai.

22 "Nøma chigucha chi kaig marmøwei,
ni mana kwaløm mungucha may wamincha isømøwei inchibig køn."

23 Chigøben tsalø wamab trømbøig wamøbene, Cristobe treetøwei løtømuig køn. Nun chigøben truba isumdiig maringucha, nøgucha 'chigøben maramønrrun' chimøtø, maig kønrrabigwan Tius sølgandø asha marøbigwan nø asha martrain pasrøbig køn.

24 Namui kaig mariilane Cristo nøtøwei nui asru niga yaig køn, kuryu mesrøb uras, kaig maramigweimburappe nambe yandø kwailø latailø kørømisra, sølgandø tabig amønamigu øsiguelø kønrrai. Ñimbe Cristoi kørriindiiløtøga tamariilø kuig køn.

25 Kaguende ñimbe merrabsrømbe kan ubishamera pella, nøørotø amøñib latailø kuig, møimbe katøle Ubisha Ashibigweimay amrruin køn, tru ñimui møsiimeran chu uragucha chinchimønrrai Ashibigweimay.

3

Kasharawarmera mandø amønamiig

1 Inchawei treetøwei ñim sraløgucha ñimui kelan maig chiben tammay mørøb melay. Kelø møiløgøben Tiuswei wamwan køremeeløguen, kan tritøguen wamindamig palain kømø, ñim maig købash kømø, mandø tab melaigwan ashatø, Tiuswei mayu punrrai,

² tru ñim chishig tabig amønaigwanba, kōriibala melaigwanba nøm nebua asha.

³ Ñimui tabzhiibe asru pala tamarikkurrin kōnrrain kōmōtō kuy, pusrugwan purō tabig tamarōb, oromera tabzheelō pōnsrōb, purō nōrrōweyelō keb indiilōyu.

⁴ Treeg kōmōtō, ñimui manrrau kōnrrai inday; mana patsab minchabgaig, larrō kōrrōtiig kuiguba, larrō tammayig kuiguba kōnrrai. Inchen øyeebe si, Tiuswein kabyube purō tabzhiig kui asig kōn.

⁵ Pōs merrabsrōngucha øyeegein kōbig kōn, ishumburmera Tiusweyasig tarōmariilō tru tabzhiig nøm tōgagūibe. Nømbe Tiuswandō muniirabelō kua, nømui kelō chiben treeg melabelō kōbig kōn.

⁶ Inchawei Sarama treeg kuig kōn. Abrahamwan mōrōbig kōptō: “Ñi, nai ashib karub” cha wamabig kōn. Inchawei ñimbe Sarai nimbasrmera lataig misrin kōn, ñim treeg sōlgandō marabe, chiwangucha chi kōrig kui pōnrrabig chigar.

⁷ Katō ñim kelōgucha treetōwei ñimui sralane chugūi mōrmīg lataig kōmōtō, tab isua mōra pera kuy, nōmun maig tab tōgagōmig kōben, trumaygue, ishu-umisaabe mōg lata kōmō, mas kullaguig kuimba, kaguende nōmgucha ñimba kanguelarrōtō øsig amōnamigwan Tius keta tranig tōgar kuikkurri. Øyeege maray, ñim Tiusba waminchen, chiyugucha ilōsrkaimīg kōnrraimbe.

Tabig marendø chinetø puinab

⁸ Trube, mōimbe ñim mayeelōba kandō lataig isua lincha pōnrray. Chigōben kanelan nebubene, nan kui lataig isub, nunelō lataig undaarab, tab inchi-belō kōb, kōramgailō tammayelō kuy.

⁹ Mugōben chigōben kaig marene, lata treetōwei marmōwei, tsalō wamōbene, lata treetōwei lōtōmōwei inday ñimbe. Treeg kōmōtō, ñimgurrimbe ‘mayanguen tabig kōnrrun’ chinrrigay. Kaguende Tius wamappe, ñimun tabigwan utōnrrai wamig kōn.

¹⁰ Kaguende:

“Mōikkōben nui øsig tsumigwan tabig tōgagōb,

tab kwalōmmera tōgagug kōbene,

nui nilōwane isua mōra tōgagōmig kōn,

kaig waminchimōnrrab,

nui tritōga isa may wamincha kegōrrōsrkōmōweingue.

¹¹ Kaigyugurri wemallib, tabig sōlwan maramig kōn.

Ambugurri igurri tab kōnrrabigwan lab, truwan unamig kōn.

¹² Kaguende Señor Tiuswei kabmerabe sōlgandō tabelaim pala ashib pasrōben,

nui kalumerabe nōba wamindiilan mōrtrab muniitō pasrabig kōn.

Trune Señor Tiusbe kaig marōbelane nōmuingatō pasrōmōn.”

¹³ Ñim chu uragucha tabigwandō martrab inchi melōbene, ¿ñimune mu kui kaig martrautah?

¹⁴ Inchendō treeg sōlgandō tabig maramigwan marōb melaindōgucha, isumdiig nebubene, ñimbe mayanguen tab kuilō kōn. Tru kaig inchi belan kōrig kui inchimōwei, kwarmōwei inday.

¹⁵ Masken treeg kōmōtō, Cristone ñimui manrraube nō ashib karub pasrabig mara tōga pōnrray. Tru ñim Tiusweimburabigwan muniirab melaigwan mugōben: “¿Treete maig kō?” cha ñimun payene, mandō lōtamigwan chu urastōgucha isua pusra amōnay. Inchendō treeg marōppe, nōmune maig kōbash inchimōtō, kwa tammay maray.

¹⁶ Ñimbe ñimui isub kebachib pasrabigube chi 'kalø køn' chibig chigar kømig køn, ñim Cristoinug tabig amønaigwan ke ka indzatø ashibelø nømguen køriimisra kørrømisraingue.

¹⁷ Tius trendø treeg kønrrain købene, sølgandø marøb megawa, kaig indinab megamikken søl køn, kaig mara kømøtø.

¹⁸ Kaguende Cristotøweinguen, nøbe sølgandø tabig kuagucha, tru sølgandø tabig kømeelayasig kaig indinab megawa, kaig mariiløgurri kwaig køn, kanmaytø managatigweyasikke, katø, katø kwanrrab kømøtø, namun Tiusweimay pera inrrab. Nui asrwane kwangaruindøgucha, nui espíritune øsig kungaruig køn.

¹⁹ Incha nøbe espíritu kuig køppe, tru espíritumera merrarrawa, keeriilø pønrrabelan Tiusweimburabigwan eshkaib kusrenanig køn.

²⁰ Tru espíritumera trusrø pønrrabeløbe, merrabsrø tru Noé tsub kwalømmerawan mørøg kømui inchibelai espíritumera købig køn. Tiusbe tru uras nømmune truba tammay muniiraig købig køn, tru nu barcon marøb kømne. Tru barcoyu kebabba, piugurri øsig webambubeløbe mamdøzhiitø kuig køn, ochoeløtø.

²¹ Inchen tru pibe tru mõi ya piu umbu ulsra kaigyugurri wesrailø kømigwan eshkaibig kuig køn, Jesucristo kwawa, katøle øsiiraikkurri. Tru piu umbu ulsraibe asrwan chillig kømønrrai 'chishmarøbig køn' cha eshkaibig kømøtø, Tiusweimburab namui isub kebachib pasrabigu chi 'kalø køn' chibig chigaig møingurrimbe nøbatø pasramigwan eshkaibig kuig køn.

²² Incha nøbe mømibe srømbalsrømay ya, Tius Møskawei kusrmay waben, katø ångelesmera lata, nøm ashib karub pønrrabelø lata, maramburab marøbelø lata nø maig chiben mørøbelø køn.

4

Tius ñimun maig martrai traniiløbe trunun maray

¹ Inchawei Cristoma nui asru kaig indinab megaig købene, ñimungucha nø mariimaytøwei martrab tamara pønrray. Kaguende møikkøben asru maig købash indinabiibe tru kaig maramigwane yandø nøøøø mara pasran,

² katøguchi øsig unamig arrubigube yandø asr mumay srua iben, treeg uñchab kømøtø, Tius maig uñchain køben, treeg uñchab.

³ Tru judíos kømø misaamera Tiuswan ashmeelø maig marøbelø køben, merrabsrø ñim treegwei marøb amønaiibe yandø trutø tsabø køn. Pøs trømbøig kaig indiiløyu amøñib, trømbøig kailø martrab isub, mutsiirab, kaig fiestameray amøñib, katø tulundzuna mutsiiramburab mutsiirab, katø chiwangøben kan tius kui lataig inchibelø larrø kailø køn, nømbe.

⁴ Inchawei nømmune mømibe pesriig asonan yandø nømun ñim treetøwei nøm trømbøig marøb llirab pønrrainug lincha marøb pønrrømbene. Incha treekkurri ñimune trømbøig waminchibelø køn.

⁵ Inchendø nømbe Tius tru øsiguelan lata, kwabelan lata maig kuigwan paya ashib martrab tamara wabigwei merrab kemalla, chi mariilan eshkaibig kønrrun.

⁶ Inchawei treekkurri kwabelanguen Tiuswei tabig srø wamwan eshkaig købig køn, Tius øsig køb lataitøwei nømui espírituyu øsiguelø kønrrai, nømui asrwane misagwan maig asha maramig køben yu piraube treeg asha mara, kørrømarig kuindøgucha.

Misaameran mandø purugub kømig

⁷ Chitøgucha yandø patsønrrabig pumibe luturaab arrun. Inchawei ke tab asha, tab isua pønrray, Tiusba tab wamindamig kønrraimbe.

⁸ Ñimui utube undag købigwanmerrig masken tøgagømig køn. Kaguende undag købiibe purø nørø kalø mariilan chishtø kasrøbig køn.

⁹ Kangurrin kangurri ya pebay, chigøben cha mørmøtø.

¹⁰ Ñim møitøgucha Tiusweyasig marøbelø kønrrai ñimun Tius ketig utiitøgabe katøganelan tab kønrrai puruguy, Tius ka yandø tab indikkurri ñimun tru peg peg ketigwane kan chigøben købigwan tab asha marøb tøgagøbelø lataitøwei maray.

¹¹ Møikkøben waminchippe, tru wamindiibe Tius wamindigwandøwei waminchi. Møikkøben chiyu køben mara tranøppe, ñui asrwan Tius maya fuerzas traniitøga mara tranø. Chiwandøgucha marøppe, Jesucristogurri Tiusbe maya nuguen tabig indig kønrrai maray. Tørguegwalmabiiba, maramburab mariiba managatig nuiwein køn. Treeg kønrrai.

Chine puindøgucha ka pønrrab

¹² Nai undaarailø, kan maig inchibig køtashchab purø murig nag lataigu ñimun puraambamig nebubene, chindimbarre øyee kermab isumøwei, katø kan managuen treeg pumíg kui lataig isumøwei inday.

¹³ Treeg kømøtø, masken Cristoimburaab nøba treetøwei kaig nebuinab puraambub ambamig tøgaguabe, kasraaray, Cristo tørguegwalmabig kenamisren, ñim truba kasraaramig kønrraimbe.

¹⁴ Ñimbe mayanguen tab kuilø køn, ñimun Cristogurrindø mugøben tsalø wamøbene. Kaguende tørguegwalmab Espíritu, tru Tiuswei Espíritube ñimuim pala pasran.

¹⁵ Ñim møikkøben kweecha kui, kabe nila kui, kabe larrø kaig kua kui, kabe nuimburaab kømubendø, marøb kegala kui, treekkurri kaig nebuinab megabgun.

¹⁶ Treeg kømøtø, møikkøben Cristoin kua kaig nebuig megawabe, kørig kui inchimøta. Cristoi munchiwan ñimun pasra wamikkurri masken Tiuswan truba tabig wamindamig køn.

¹⁷ Pøs kaguende yandø treeg kønrrabiibe pubguen inchen, Tiuswei yaue-lainuutøwei maig kønrrabigwan Tius nø asha martrab pølbastrun. Tru namunmerrikken maig kønrrabigwan asha marøb pølbastriibe, trube, ¿tru Tiuswei tabig srø wamwan mørøg kømui inchibelane mas maig marttrerah?

¹⁸ Inchen,

“Sølgandø tabig pasrab møwanguen
kaigyugurri wesraig kømibe truba murig kuibe,
¿Tiuswan køriibala pønrrømeelaimba,
kaig marøbelaimbabe mas maig kønrrerah?”

¹⁹ Inchawei Tius maig kønrrain køben kaigyu puraambub melabeløbe sølgandø tabigwan marøbig marøb melamig køn, nømui møsiimeran Tius tru Chiwandøgucha Marøbigwei tasku pønrsøb. Pøs nøbe managucha elachimíg køn.

1 Mõimbe ñimui utu Tiusweimburabelan pera marøb pønrrabelan nabe mandø amønamiḡwan waminchab inchar, nagucha nõm lataitøwei Tiusweimburabelan pera marøb pasrabig, katø Jesucristo maig købash indinaben ashib, katø Cristo tørguegwalmabig kenamisren, nagucha truyu tøgatø pasrønrrabig.

2 Tius nui ubishameran ñim ashib tøgagønrrai nõ ñimun tranillane tab ashib tøgaguy, ke martrai inchendø kømøtø, ñimashib treeḡ martrab isua marøb, Tius maig palain køben, treeḡ. Katø ke anwandø chull inchimø, ñimui maramiḡwan marøppe, palabinø kømø, tab maramiḡ køn.

3 Ñim ashib tøgagønrrai ñimun tranillane ñimuielø kui lata, ke ñim karua srua kømøtø, ñim mandø amønaitøga nõmguen asha kusrenrrai maray.

4 Treeḡ marabe, tru Maya Ubisha Ashibelaim Pala Pasrabig kenamisrene, ñimbe corona tørguegwalmabzhiḡ managuen minchabgaigwan utønrrun.

5 Katø treetøwei ñim matsøreløḡucha tru Tiusweimburabelan pera marøb pønrrabelane maig chiben trunun mõray. Søteeløba kangurrin kangurri maig køben inchimøtø, tru tammayig kønrrai marøbiitøga truitø pinøgasrailø amønay. Kaguende:

“Nuietø nuig mõrørai inchibelane

Tiusbe sètøbasramisrøb kurrappe,
trune chigucha kømeelø tammayelane

nui ka yandø tab indigwan Tiusbe tranøbig køn” cha.

6 Tiuswei maramburab marøb tasig umbu nõrreelø misrøb pønrrømø, utsøbasray, yandø nõ treeḡ maramiḡ puben, ñimun nõrreelø martraimbe.

7 Ñim chigøben truba isub tøga pønrrailane Tiuswandø pønsray. Kaguende nõbe ñimuimburab tab kønrrai isua martrab wabig køn.

8 Mumayḡucha srua irramamø isuamøra amøñib, chu uragucha pesanamø, isuatø amønay, kaguende ñimun ashig kømui inchibig, tru nugwaimandziibe kan león pøtøgatanwan namig mullib uñib lataig unan, mõḡigwan køben manrrab lab.

9 Inchawei ñimui isubigwan Jesucristoinuutø pasra pønrraitøga truigwane kørtrab kømø, ñimbe mur isua pønrray, yu pirau chusrøndøḡucha ñimui nuneløḡucha treetøwei kaig nebuinab puraambub melai ashabe.

10 Inchendø kan maya yana køsrøndø ñim treeḡ kaig puraambub melaikkurrimbe tru chiyutøḡucha ka yandø tab inchib Tius managuen patsønrrabgaig tørguegwalmabiisrø Cristoba kanbalatø purramiḡ kønrrai wamabiibe, nõtøwei ñimune katøle tamara pønsrøb, chiyugucha kørrønrrabgailø marøb, katø trurriḡu kullaaramø murelø kønrrai marøb, yandø treeḡ pønrrønrrai kørrømarøb inchun.

11 Tius nõ ashib karub tøga pasraibe managatig nuin kønrrun. Treeḡ kønrrun.

Srabe wamindiilø

12 Silas, nai nuneg, chi isumgaig na tabig kui asigwan nabe nun landøtiig pøringarur, øyeeg, øyeeg amønay chinrappa, Tius tru ka yandø tab indig ciertoniiibe, iig køn cha, eshkanrappa. Inchawei truyu mur pønrray.

13 Tru iglesia Babiloniasrø ñimun latawei lawa wesruig pasrabiibe ñimun ‘ka warøḡueh’ cha øran, katø Marcos nai nusrkai lataikkucha.

14 Katø kangurrin kangurri undag købiitøga muchab ‘manguen ka amøñiḡueh’ tay.

Ñim Jesucristoieløbe mayeeløba chi isumgaig tab købigwan tøgagønrraimab isur.

2 San Pedro

'Ka amõñiguh' chib pørig

1 Na Simón Pedro, Jesucristoi marøb megabig, katø nõashib karua øriibe, tru namui Tius Kaigyugurri Wesrabig Jesucristo newan sølgandø tabig marikkurri, ñimui isubigwan Jesucristoinuutø purø tabzhig tøgagømigwan nam tøgagúigwandøwei nebua tøga pønrrabelan iigwan pørar.

2 Tiuswanba, namui Señor Jesucristonba nebua asikkurri nui ka yandø tab indig tranigwanba, chi isumgaig tab købigwanba ñim uñcha tøgagønrraimab isur.

Tiuswei ureg kømibe øyamayelø kømig køn

3 Tius nui maramburab mariitøga namun øsig waramigweyasig lutøgurri chi palabigwanba, nuyasiitø tabig amønamig kønrraimba namun tranig køn, nõ trendø tørguegwalmabig kuitøgaba, nõ purø tab indiitøgaba nõ namun nebua asingarua.

4 Tru øyeeløgurri Tiusbe truba nõrreelø, trurrigu purø tabelø namun tranrrab misriilan tranig køn. Incha tru traniløgurri ñimune Tiusbe, nõ maig køben, treeløwein kømigwan tøgagønrrai tranig køn, yu pirau tru køsongønrraptiig purø trømbøig marøg købig mindishib treranøb pasrabigugurri wegørrønrrai.

5 Inchawei treeg købene, iilan tøgagønrrab truba tranrramig køn: Tru isubigwan Jesucristoinuutø pasra tøgagúigwane iigwan nemaramig køn, maig køben inchimø, tabig amønaitøga. Tru tabig amønaitøga Tiuswan nebua asiitøga namaray.

6 Tiuswan nebua asigwane asr maig miaben tru kuindø marmuitøga namaray. Asr maig miaben tru kuindø marmuigwane chigúingucha tammay yandø, yandø melamitøga namaray. Tru tammay yandø, yandø melaigwane Tiuswan maikken tarømisrmø tabig amønaitøga namaray.

7 Tiuswan tarømisrmø amønaitøga trag nunelø lataig tab indiitøga namaray. Inchen yandø tru trag nunelø lataig tab indigwane undag købiitøga namaray.

8 Iilø ñimuinug kerrigu pønrrøwa larrøbichib nurabene, namui Señor Jesucriston ñim nebua asha tøgagúigube ñimbe chi marmø, ka amøñinrrab kømøwei, ke ka nebua asiitø kønrrain kømøwein kønrrabguen.

9 Inchen iilan chigaibe kan kabgaig lataig, kabe kan yab nebua ashchab kaimabig lataig køn, merrabsrø nui kaig mariilan chish marigwane yandø chab pesannaweig.

10 Inchawei treeg købene, nai nunelø, ñimun Tius wamigwanba, lawa wesrub indigwanbabe, ñimuinug tab pasrønrrai katøguchinguen kønrrab inday, kaguende iilan marabe, managuen srurrengwamønrrabguen.

11 Trumaybe si, namui Señor Jesucristo tru Kaigyugurri Wesrabigwei managuen patsønrrabgaig ashib karub wainug ñimuimbe kebambamig yask-abmerabe ke lendø kurim pønrrønrrun.

Mugucha mandamgaig kusrenaniilø

12 Tru iilan nabe ñimun chu uragucha isungaruppatø, isungaruppatø megamønrrun, tru newan ciertonigwan yandø ñimbe ashib elatchabgaig tøga pønrraindøgucha tru ñimun kusrenanig købigwan.

¹³ Na pirau øsig uñippatøbe øyeelø wamindiitøga isuptø melønrrai kuñappatø megamig søl kuitamab isur.

¹⁴ Namui Señor Jesucristo nane tørgandø eshkaben, nabe petø kwam kui mørar.

¹⁵ Katø nabe mumaytøgucha ñimuyasig maramdiigwane martrab inchar, na kwaimbala ñim chu uragucha ilan isub marøb kønrrai.

Nømui kaptøga ashibelø

¹⁶ Señor Jesucristoi maramburab marøbigwanba, nø arrumigwanba nam kusrenanøppe, misaamera ka nõmdø isua wesrua wamindiilan kusrenanmuig køn. Treeg kømøtø, nambe namui Señorwei purø nuig tabig purayaigwan namashib namui kaptøga asigwan eshkaab waminder.

¹⁷ Kaguende Tius Møskai nun truba tab indigwanba, tørguegwalmabigwanba utøben, tru Purø Nuig Tørguegwalmabiisrøngurrimbe kan wam arruppe: “Iibe nai undaraig Nusrkain køn cha. Nabe nøgurri truba kasrag war” cha, trenchiben,

¹⁸ nambe mørøbelø ker tru wam srømbalarøngurri nun øyeeg waminchen, Tius tru nuindø tarømara pasrin tunsrø Señorba nam pønrrøwa.

¹⁹ Inchen katø Tius maig karuigwan eshkabelø wamindiibe treetøguen kømø, maig taibe treeg kønrrabigwan tøgaguer. Ñim trunun tab asha pønrraibe tab køn, kan løstøyu tør kønrrai tør-rramnegatig pilabigwan lataig, katø tru løtsøzhig yemdø kal-lab estrella ñimui manrrømerayu kal-lanrrai.

²⁰ Trurrigu iigwane purø tab isua tøgagømig køn: Tius maig karuigwan eshkanrrai Tiuswei wam pørigu pønrrabelane ni mønundøgucha mugøben ka nuinetø isua, ‘øyamay køn’ chib pasramig kømíig kuin kui.

²¹ Kaguende Tius maig karuigwan eshkabeløma managuen ka nõmuimburaptø isuabe waminchimuig køn. Treeg kømøtø, møguelø waminchippe, Espíritu Santo maig wamindingaruben, treeg waminchibelø købig køn.

2

Maig kuigwan kømøtø, peetø kusrenanøbelø

¹ israelita misaamerai utuma ‘Tius maig karuigwan eshkabelø ker’ chibelø isapteelø kuig køn. Katø ñimui utugucha treetøwei isatø peemaytø kusrenanøbelø kønrrun, lliska nõmui isuitøga kusrenaniilø pinishinrrabigwan mu ashmøwatø treeg kusrenaniilø keera pønstrønrrabelø. Katø treetø kømøtø, Señor tru nõmun kaigyugurri wesranrrab penabigwanguen chigucha kømíig kui lataig mara kørrømaran, nõmuyasiitøwei møi møi pinisaig kømigwan lab.

² Inchen mõiløgøben truba nu treetøwei truilø nõmui køsøngønrraptiig marøb amønaigu marøb amøñinrrab kebamba, nõm treeg marikkurri tru newan ciertonig, Tiuswei maywane misaamerabe kaig waminchun.

³ An pareelø køptø, nõmdø isua, purø may isa wamincha, ñimune an wesrab srua kønrrun. Inchendø nõmun kaigyu pønrrønrrai manasrøwei pønraibe mu katømaig petø punrrun, kaguende nõmune pinisailø kønrrai pønrsailø køn.

⁴ Tiusbe tru ángelesmeran købenguen kaig marigwane ulø paymø kømø, ulø paya, tru møra melamnug kebeta, larrø løstøyu pønrrønrrai cadenastøga merrarrowa, keerøppa pønraig køn, Tius tru maig maramigwan asha marøb kwalømweyasig.

⁵ Katø merrabsrø yu pirau misaameran chigucha Tiusbe kaig marigwan treetø kørromisrtrain kømø, ulø payig købig køn. Inchendø tru sølgandø tabigwan eshkaab waminchibig Noëwanba, katøgan sieteealanbatø chinchimuig købig køn, yu pirau kaig misaameraim pala pi pulabigwan arringarub uras.

⁶ Katø Tiusbe Sodoma ciudawan lata, Gomorra ciudawan lata pinisaig kørnrai marig købig køn, usrø tuindø misramnegatig parra kørromarøb. Øyeeg marigwane wendøsrø kaig misaamera øsig warønrabelø trunundøguen isua asha kørnrai marig købig køn.

⁷ Inchendø Lotwan, tru sølgandø tabigwane wesraig køn. Tru Lotbe chu uragucha larrø kaig misaamera ashikken kørnraigag trømbøig marøb amøniben asha, truba isui inchib tab kømui megabig køn.

⁸ Inchen Lot, tru sølgandø tabig, nømui utu tsubiibe yeeg kaig maren, kwalømmørig, kwalømmørig nui sølgandø tab møsigube purø trømbøig kui megabig køn, tru nøm treeg trømbøig mari ashiptø.

⁹ Inchawei Señorbe nuyasiitø kørnrai pønramisra pønrrabelane, maig inchibig køtashchab asamig puin pønrrøben, truyugurri wesrappe, sølgandø tabig marmeelane esegappa pønrsøbig køn, tru maig kørnraigwan asha marøb kwaløm møra melønrrai maramig.

¹⁰ Asr purø trømbøigwan marøg kui inchen tru kuindø marøb, katø ashib karub pønrrabelan mundøgucha mørmø kaashib, øyeeg inchibelanwei treeg martrab køn. Iiløbe chine maram patsiilø, purø nørreelø kømmørø inchib, srømbalasarø ashib karub pønrrabelan nørreelanguen chigøben tsalø wamamig kørikkengar køn.

¹¹ Trune ángelesmera murelø kuigu lata, nømui maramburab maramig tøgagúigu lata, tru møguelø lataguen kømø, mas nørreelø købenguen truiløbe, tru srømbalasarø nørreelø karubelan Señorwei merrab tsalø wamømeelø køn, kaig nebuig møra pønrrøbash chib.

¹² Trune tru i møgueløbe chigúinguen mørmubendø, chigøben tsalø wamabelø køn. Kan animalmera købgunrriguelø, chugúinguen mørmeeelø, ka merrarrawa tøgagønrraimba, pinisailø kømigweyasiibatø kal-lawar køn, nømui kaig marøb pønrrainuutø chab pinønrrabelø.

¹³ Nømbe sølgandø tabig marmuimburøbe nømbe sølgandø tabig mariimíitøwei utønrrun. Kaguende nømbe kwalømguen nømui asr maig miaben, kaig marmelane, purø tabig mørørai inchib, kasrag marøbelø køn. Truiløbe køsøngønrrapteelø, chillig inchib mindishibelø treelø køn. Nøm ñimba lincha mab warainug, kaig kegørrøsrkøbigu purø tab kui mørøb nømbe warabelø køn.

¹⁴ Kan mun køben ashippe, ka yandø ashmøtø, truibia itølulrrab isua ashib, katø chigøben kaig maramigwane muraaraig mørmø marøbelø køn. Katø Tiusweimburabeløyu kullaateelane chull asingarua purø may kegørrøsrkøb, katø parø indamigwangucha neyu kusrebelø køn. Truiløbe kaig nebuig pønrrønrrai pønrsraig misaamera køn.

¹⁵ Sølgandø tabig amønaig mayugurri tarømisra, tru Beorwei nusrkai Balaam taig maig marøb unigwan merrarrawa amba pelig køn. Tru Balaamma kaig mara an pagaraig utamigwan undaaraben,

¹⁶ tru nø treeg marigwane nune mur namig køn. Kan mula waminchimíig købendø, møwei wamdøga wamincha, Tius tru maig karuigwan eshkaabig chugúinguen mørmø marigwan pasram merrarraig køn.

17 Tru treeg misaamerabe kan kòlòmò piguumerà chi pigaig, purgølig latailø kòn, kan wañimera mur isig icha srua ambi latailø. Truilane purø trømbø løstøyu pønrrønrrai pønrrailø kòn.

18 Nòmui wambe ke purab nørreelø ke ka waminchig kòptø wamincha, asr maig marøg kui inchen, tru kuindø trømbøig treeg mariiløtøga kegørrøsrkøbelø kòn, kailai utu meløwa, ke kaimabsrua tru kaig mayugurri wegørrarwan.

19 Nømbe katøganelan 'chi iløsrkaimig elatsiilø kønrrai martrumøn' chibelø kòn, nømdøweinguen trømbøig asanguengaig kòsøngønrraptiig mariiløyu truitø srua ambiilø kòbendø. Kaguende møitøgucha nø chi marøb pasrailø kanarramabiibe, yandø truitø srua yaim pasran.

20 Kaguende namui Señor Jesucristo tru Kaigyugurri Wesrabigwan nebua asha, i pirau kòsøngømdiig maramigugurri yandø wegørra, katøyg øyeeg kaig mariiløyutøwei iløsrka, truitø srua irramabeløbe, katøbe srøsrø lataguen kòmø, purø kailøguen kørørmisran.

21 Trembe tru sølgandø tabig amønnam maywan nebua ashmuig kuinguen søl kòbsruinrrun nòmumbe, yandø truigwan nebua asha, tru maig maramigwan martrai pasrig newan tabigugurri katøle tarømisra ibgunrriibe.

22 Inchendø nømune misaamera øyan taibe ciertonwei nebuin kòn: "Werabe nuña, katøle trunundøwei man" taig. Inchen: "Kuchibe chab pirendø, katøle chilligutøwei latøgusan" taig.

3

Señor katø arrumig

1 Nai undaarailø, na ñimun srøsrø pørig kømnetø katøgan na ñimun pørtrab inchar. Srøsrø pørigu lata, møim pørigu lata, øyeeg, øyeeg melønrrigay chib watchab inchar, ñimui tabig chishchig isuiløyu.

2 Katø Tiusweindø tarømariilø Tius maig karuigwan eshkabelø merrab-srøwei wamindigwanba, Jesucristo tru nøashib karua øriilø ñimun kusrenanig, Señor tru Kaigyugurri Wesrabig martrai karua pasrigwanba, ñim pesannamø isua kønrrai ñimun pørar.

3 Incha iigwanmerrig isua kuy: srabe kwalømmerawane misaamera Tiusweimburabigwane ka indzatø ashib, chigøben cha mørøbelø treeg inchib amrrunrrun, nòmui asr maig palai inchen treeg marøbelø.

4 Inchabe trenchinrrun: "Cristo tru katø attrab cha kørørmisriibe ¿mandiin-dah? cha. Chima tru merrabsrø namui kølli misaamera kwaikkurrimbunø, katø srøsrø pirøwan marikkurrimbunø maig kòbiibe trubato kagøn" cha.

5 Kaguende i misaamerabe iigwan nebua ashibelø kòbendø, ashmeelø misrøbelø kòn, tru srømbalaba, pirøbabe treeg kønrrai Tius trendaikkurri merrab manasrøwei pønrrabig kui. Inchen tru pirø pimerayugurri webarrubiibe, katø pitøgatøweim pasrabig kui.

6 Inchawei tru urassrø pirøwanma sre pua pi pulingarua, chab pinisaig købig kòn.

7 Inchen srømbalameraba, pirøba Tius treeg kønrrai nø trendaikkurrindøwei møin kwaløm pønrrabeløbe, naatøga parramig kønrrai esegain pønrran tru maig maramigwan Tius asha maram kwalømweimba, katø tru kaig misaameran pinisailø køm kwalømweimba.

8 Katøgucha iigwan isua kuy, nai undaarailø: Señorweimbe kan kwalømdø mil años lataig kòben, mil añosbe kan kwalømdø lataig kòn.

⁹ Señorbe nõ treeg martrab misra kõrrõmisrigwane, peguen marmõ ka pinapinchab kõmõtõ kõn, mõilõbe treeg martrab taigwan peguen marmõnmab isua tõgagũindõgucha. Treeg kõmõtõ, nõbe ñimun tammay muniitõ, muniitõ wabig kõptõ, mugucha ka pinõnrrain kõmõtõ, mayeelõba nõmui kaig mariilan isua mõra, Tiusweimay lliiranrrai indan.

¹⁰ Põs tru Señor arrum kwalõmbe kan niliig arrub latakõwei chi isumõ kõben attrun. Inchen srõmbalamerabe purõ trõmbõig kõrig kõmdiig wanrrõb nõõrõtõ misren, katõ truyu chine põnrrabelõbe naarab pill-llanrrun. Inchen pirõba, truyu chigurrimbunõ põnrrabelane kerrigu parra, pinisaig kõnrrun.

¹¹ Inchawei kerriguba õyeege kenaguen kõmõig chab mindishib pinisaig kõnrrabig kõbene, ¡Tiusweyasiitõ tarõmisra amõñib, katõ ke nundõ isub tabig lliirab amõnamig trurren palan!

¹² Tius tru arrum kwalõmwan muniirab, ke petõ punrraimab inday. Tru kwalõmbe srõmbalamerabe naarawa, chab pinõben, chigõben truyu põnrrabiibe tru naarabigu chab piranrrun.

¹³ Tius tru tranrrab misra kõrrõmisrigwan nambe munig meler, tru srõmbala srõigwanba, srõ pirõwanba truilõyube tru sõlgandõ tabig marig tõgaigwan.

¹⁴ Inchawei nai undaarailõ, tru iilan munig kõppatõ, chishchig, ñimbe mu mandamgailõ, nõba chi isumgaig nui merrab treeg põnrramigwandõ truba truba tranrrab muniiray.

¹⁵ Ñimbe iigwan isua asha tõgaguy, namui Señor truba tammay muniitõ, muniitõ waibe, nam kaigyugurri wesrailõ kõmigweyasig kui. Iigwandõwei namui undaariga nuneg Pablogucha põrin kõn ñimun, Tius nun maig kusrebig kõnrrai traniiitõga.

¹⁶ Nui põriilõyu trumõrig iilan nõbe ñimun wamindan, truilõyu kanbalõmerabe tab chigũinguen mõramgailõ kõben, truburab nebua ashmeelõba, tab põnrrõmeelõbabe Pabloi põriilan ke ka kalõ marõb, peemaytõ kusrenanan, Tiuswei wam põriilan katõganbalõmerasrõ latakõwei. Nõm treeg marõppe, nõmdõwei pinisailõ kõmigwan lab põnrran.

¹⁷ Inchawei nai undaarailõ, iigwan yandõ kanmaytõ chab wammõrarbe, tab asha amõnay, tru larrõ kailõ may wamindiitõga ñimun pelõsrka, ñim tabig mur põnrrainukkurri kõrrõsrkainab põnrrõmõnrrappe.

¹⁸ Masken ñimbe namui Señor Jesucristo tru Kaigyugurri Wesrabigwan katõguchinguen tab nebua ashib, katõ nui ka yandõ tab indigu nõrrõrab inday. Purõ nuig, purõ tõriibe, mõiya lata, managatig nuyasiitõ kõnrrun. Treeg kõnrrun.

1 San Juan

Øsig kømigwan tranøb wam

¹ Nambe ñimun iigwan pørøppe, tru srørøgurri købigwan tru nam mørigwan, namashib namui kaptøga asigwan; maig kõtashchab nam tab asigwan, namui tasiimeratøga katørab indigwan, tru Øsig køm wamweimburab pører.

² Tru øsig kømibe yandø ashchai kenamisren, nambe trunun asig køn. Incha nambe trunun øyeeg chib wammørørskøb eshker, tru managatig øsig kømigwan. Truibe Møskaimba pasrøwa, namun kenamisrig køn.

³ Nam ashib, nam mørøb indigwan, trunun nambe ñimungucha wammørørsker, ñimungucha namba kandø lataig kandø isua pønrrønrai. Inchen tru nam kandø lataig kandø isua pønrraibe, Møskaimba, nui Nusrkai Jesucristoba pønrraig, truig køn.

⁴ Itilan nambe ñimun pører, namui kasrag købigwan newan tøgagønrrab.

Tøryu amøñib

⁵ Jesucristo namun wammørørskøb kusrenanigwan mõi ñimun nam eshkaibe iig køn: Tiusbe tør køben, nuinuube chigucha løstiibe kaagøn cha trendaig.

⁶ Nambe nøba kanbalatø tab lincha pønrrer chibendø, nam løstøyutøwei amøñibene, nambe ka isatø indig webiben, tru newan ciertonig maig køben treeg amønaig kømøtø webinrrun.

⁷ Tius tøryu pasrab lataitøwei nam tøryu amøñibene, trumaybe nambe kangurri kangurri kandø isua lincha pønrrer. Inchen Tiuswei Nusrkai Jesucristoi animbe chigurrimbunø namui kaig marigwan chish maran.

⁸ Nambe ‘chi kaig marig chigar ker’ chib pønrrøwabe, namasiitøwei kegørrab pønrrøben, tru newan ciertoniibe namuinug pasrømøn.

⁹ Nam chigøben kaig mariilan ‘treeg marøbwei inchar’ cha Tiuswan eshkaibene, nøbe namui kaig mariilan ulø paymø pesannab, chigurrimbunø namui kaigwan chish marøb indamig nøbe chi isumgaig sølgandø marøbig køn.

¹⁰ Inchen nam ‘chigucha kaig mara kømeeelø ker’ chib pønrrøwabe, trube, nambe Tiuswane ka isaptiig kui mara tøgagøben, nui wambe namuinug pasrømøn.

2

Namuimburø purøwaminchibig Jesucristo

¹ Nai ureezheelø, iigwan ñimun pørar ñim chigøben kaig marmønrrai. Møikkøben kaig marindøgucha, namuimburab Møskawei merrab kan purøwaminchibig tøgaguer, Jesucristo tru sølgandø tabigwan.

² Namui kaig mariiløgurri Tiuswei namig købigwan nø uta pasramisra namuyasig nø kwaig køn, trurrigu namuiwandø kømøtø, yu pirau maya misaamerai kerriguelaimba.

³ Tius maig maramigwan martrai pønrrailan nam møra marabe si, trube, nam nun nebua ashibelø kermab asamig kønrrun.

⁴ Inchen møikkøben: “Nabe Tiuswan ashibig kur” chibendø, nø maig maramig martrai karuulan møra marmubene, trube isaptiig kui webiben, tru newan ciertoniibe nuinuube pasrømøn.

⁵ Trune Tiuswei wam maig karuigwan mōra marøbig, truiibe si, Tiuswan kerrigu newan tabig undaarabig misrin kōn. Trumaybe nambe nōba kanbalatø lincha pōnrrermab aser.

⁶ Møikkøben Tiusba kanbalatø lincha pasrar chibiibe, Jesucristo nō maig uñibig kōben, treetøwei unamig kōn.

Kan srøig martrai karua pasrig

⁷ Nai undaarailø, i maramigwan martrai karua pasrigwan na ñimun pøriibe srøig kōmøtø, tru ñim merrabsrøngurri trendø tøgagúig truitøwein kōn, tru martrai karua pasrig tru trendø merrabsrøngurri tøgagúig tru wamwan ñimbe mōra kōn.

⁸ Inchen kōben nabe ñimun martrai karua pasrig ñimun srøig pørar, nuinug lata, ñimuinug lata ciertonig. Kaguende tru løstiibe yandø pureb iben, tru tər newan ciertoniibe yandø pilabguen pasran.

⁹ Møikkøben 'tøryu pasrar' chibendø, nui nunewan tsalø inchibiibe katøgucha løstøyu srø pasran.

¹⁰ Inchen nui nunewan undaarabiibe tøryu pasran. Incha nuinuube srurrengwangerubiibe chigagōn.

¹¹ Inchen nui nunewan ashig kōmui inchibiibe løstøyu pasrab, katø løstøyu unan. Incha nōtøwei chumay ib pasrarmabguen ashmōn, kaguende løstiibe nui kabmeran ashmōnrrai kasrøben.

¹² Ñim ureezheelan, na ñimun pørar.

Kaguende Jesucristoi munchigurri ñimui kaig mariilan ulø paymōnrrab pesannaig kōn.

¹³ Na ñim mōskalan pørar,

kaguende srøsrøgurri manawei nō pasrabigwan ñim nebua ashibelø kuimba.

Na ñim matsørelan pørar,

kaguende Satanás, tru larrø kaigwan ñim kanaig kuimba.

Na ñimun ureezheelan pørig kōn,

kaguende Mōskawan ñim nebua ashibelø kuimba.

¹⁴ Na ñim mōskalan pørar,

kaguende nun srøsrøgurri manawei pasrabigwan ñim nebua ashibelø kuimba.

Na ñim matsørelan pørig kōn,

kaguende ñimbe kōrrømmø,

mur pōnrrabelø kuikkurri,

katø Tiuswei wam ñimui manrrau pasrøben,

Satanás, tru larrø kaigwan kanaig kuimba.

¹⁵ Yu pirauigwan purø undaaramøwei, katø yu pirau chi kōbigwangøba undaaramøwei indamig kōn. Møikkøben yu pirauigwangøba undaarabene, Tius Mōskawei undag kōbiibe nuinuube kaagōn.

¹⁶ Kaguende yu piraugurri arrubiibe, øyeeg kōn: asr maig marøg kōben mariilø, kaptøga chigōben chull asiilø, katø namui chigōben kōbiitøga truba nōreelø kōmmøø indiilø. Øyeeløbe Tius Mōskaweinukkurri arrumøtø, yu piraugurrindøwei arrubig kōn.

¹⁷ Inchendø pirøbe, katø truyu chigurrimbunø chull indiiløbañau patsab iben, trune Tius maig kōnrrain kōben treegwan marøbiibe managatig øsig kōnrrun.

Criston ashig kōmui inchibelø

¹⁸ Ureezheelø, yandø srabe kwalømmerra puin køn. Tru Criston ashig kømui inchibig attrab kui ñimbe wammøøbelø køn. Inchawei mõi yangucha tru 'Cristo ker' chibelø truba truba amrruin køn. Treekkurri nambe yandø srabe kwalømmerra kui aser.

¹⁹ Truiløbe namui utugurri webambuppe, webambubwei inchendø, namuielø kømuig køn. Pøs namuielø kui kuimbe, namba pønrrabig pønrrabsruig kuinrrun. Inchendø webambuppe, ke mayeeløbabe kerrigu namui utuelø kømuin kui tørgandø ashchain kuig køn.

²⁰ Inchendø ñimbe Espiritu Santoiwan itølusig tøgar kua, treekkurri ñimbe chiwandøgucha ashibelø køn.

²¹ Nabe ñimun pøøppe, newan ciertonigwan ashmeelø kuimba kømøtø, ñim ashibelø kuimba pørar. Katø ñimbe ashibelø køn, chitøgucha isatø indiibe tru newan ciertonigugurri arrumig kuin kui.

²² ¿Tru isaptiibe mu kerah? ¿Tru isaptiibe Jesúswan 'Cristo kømøn' chibig kømuitarru? Iig køn tru Criston ashig kømui inchibiibe, tru Møskawan lata, Nusrkawan lata 'Tius kømøn' chibig, truig.

²³ Mutøgucha Nusrkawan 'ashmíg kur' chibiibe Møskawangucha chigaig køn. Inchen møikkøben Nusrkaweimburab 'nøbe mu kui ashig kur' chibiibe, truiibe Møskawangucha treetøwei tøga pasran.

²⁴ Inchawei ñim srøsrøgurri wamindi mørigwane truyutø pønrrabig pønrrønrrab inday. Tru ñim srøsrøgurri wamindi møøø amrruig ñimuinug pasrabig pasrøbene, trube, ñimgucha Nusrkaweinuuba, Møskaweinuuba pønrrabig pønrrønrrabguen.

²⁵ Inchen Jesucristo tru namun tranrrab misra kørrømisriibe iig køn, tru managatig øsig kømig.

²⁶ Na ñimun iigwan pøøppe, isatø may wamincha ñimun kegørrøsrkønrrab inchibelaiburab pørar.

²⁷ Pøs ñimuimburappe, tru Espiritu Santoi itølusigwan ñim nun uta tøgagúig ñimui manrrau pasrabig pasraikkurri, ñimbe mu katøgane chi kusrennamig palain kømøn. Kaguende tru itølusiitøwei ñimune chiwandøgucha kerriguh kusrenanen, tru kusrenaniibe ciertonig, ka isatø indig kømøwein køben, nui Espiritu ñimun maig kusrenanen, trumay Cristoinug pønrrabig pønrray.

²⁸ Inchawei ureezheelø, møimbe nuinug kanbalatø pønrrabig pønrray, nø kenamisren, chi isumø, nui merrab pønrrab, katø, nø arruben, nui merrab kørig misra kørrømisramig kaanrrai.

²⁹ Jesucristobe sølgandø tabig kui ñim ashibelø kuabe, trube, mutøgucha sølgandø marøbelane Cristoinug kal-lawar kuin kui asamig køn.

3

Tiuswei ureemera

¹ ¡Au ñimguen asay! Tius nui undag købig namun yeeg nuig tranigwan, Tiuswei ureemera køn chaguen namun wamiilø kømnegatig. Pøs nambe treeløwein ker. Treekkurri pirau misaamerabe namune ashmeelø køn, kaguende nømbe Tiuswan ashmeelø kua.

² Nai undaarailø, yandø nambe Tiuswei ureemera ker. Incha namune møimbatøbe tru wendøsrø nam maig kømigwane kenamamø srø kuindøgucha, yandø Jesucristo kenamisrene, nø lataitøwein kømig kønrrab kui nambe asha ker. Kaguende nø maig kuigwan yandø truyube nam nebua asam kønrrab køn.

3 Møitøgucha nuinuube treeg punrraitamab isua munig megamig tøgaipe nõasiitø nui manrrøwan chishchig tøgagøn, Jesucristo chishchig køb lataitøwei.

4 Mutøgucha kaig marøbiibe tru maig maramigwan martrai Moisés pørigwane kalø marøb itøbunan. Kaguende tru kaig mariibe tru pørigwane itøbunig, treeg køn.

5 Ñimbe yandø ashibelø køn, Jesucristobe yu piraumay arruppe, namui kaig mariilan kerranrrab arrig kui. Katø nuinuube chigucha chi kaig mariibe kaagøn.

6 Mutøgucha nuinuutø pasrabig pasrabiibe kaigwan marøbig marmuben, katø mutøgucha kaigwan marøb uñibiibe nune ashmøwei, katø mu kui nebua ashmíig køn.

7 Ureezheelø, mugøben ñimun peløsrkainab pønrrønrrab kømø. Sølgandø marøb uñibiibe, sølgandø tabig køn, Cristo nõ newan sølgandø tabig køb lataitøwei.

8 Kaigwan marøb uñibiibe nugwaimandzigwein køn. Kaguende nugwaimandziima srøsrøgurri kaigwan marøbig køn. Inchawei Tiuswei Nusrkai kenamisrøppe, tru nugwaimandzig kaig mariilan pinishinrrabwein kenamisrig køn.

9 Mutøgucha Tiusweinug kal-labiibe kaigwane marøb uñmøn, kaguende tru øsig kømig Tiusweinug pasrabig nuinug pasrøben. Treekkurri kaigwane marøbig martrab kaiman, kaguende nõbe Tiusweinug kal-laweig kuikkurri.

10 Møilø Tiuswei uremera kuin kui, katø mõilø nugwaimandzigwei uremera kuin kui, øyeegu nebua asamdiig køn: mutøgucha maig kønrrabigwan sølgandø tabigwan marøb uñmøwei, katø nui nunewan undaaramøwei inchibiibe Tiuswein kømøn.

Kangurrin kangurri undaarayagun

11 Kaguende Tiuswei wamwan srøsrøgurri ñim wamindi møriibe iig køn: nam kangurrin kangurri undaarayamig.

12 Caín lataitøwein kømugun. Truima tru kwaimandzig, larrø kaigwein kua, nui nunewan kweetsig køn. ¿Nøbe chigurrin kweetsig køh? Kaguende Caín nõ mariiløbe kaig mariilø køben, nuneg mariiløbe sølgandø tabig mariiløgurriin kuig køn.

13 Nai nunelø, kan ¿øyebe chincharre? treeg kermab isumøtay, pirau misaamera ñimun ashig kømui inchene.

14 Nambe kwamigugurri øsig pønrrannuumay puraamba pønrrabrain kui, asha pønrrer, kaguende namui nunelan nam undaarabelø kuikkurri. Nunewan undaaramiibe kwamigugurri webimø, srø pasran.

15 Mutøgucha nui nunewan ashig kømui inchibgøba uñibiibe kweechiptiig køn. Ñimbe ashibelø kuinrrun kan kweechiptiibe tru managatig øsig kømigwane chigaig kui.

16 Jesucristobe nui øsig kuigwan namuyasig trana, kwaben, øyeeg marigu nui undag købigwan nambe truyu nebua aser. Inchawei namgucha treetøwei namui nunelayasig nam øsig pønrraigwan tranamig køn.

17 Inchen mõikkøben yu pirau chi palømíig tøgag købendø, nui nuneebe palaig megame trunun ashatøgucha merø kui inchib, purugumubene, trube ¿Tiuswei undag købiibe nuinuube chincha pasrønrrab kø?

18 Nai ureezheelø, undaarappe, ka wamdøgatø kømøwei, ka wamincha møriitøgatø kømøwei, ñimui mariiløtøga kenamarøb, cierton undaarayagun.

Tiuswei merrab chi isumø pønrramig

¹⁹ Nam øyamay marøb pønrrøwabe, newan ciertonigweimburabeløyu pønrrabelø købrain kui møra, yandø namui manrrømeran Tiuswei merrab chi isumø tøga pønrramig kønrrun.

²⁰ Namui manrrøguen namun chiwan køben kalø køn chib kebachib pasrøbene, Tiusbe namui manrrø lataitøguen kømø, purø nuig kui køppe, nøbe chiwandøgucha kerrigu ashibig køn.

²¹ Undaarailø, namui manrrø chiyu køben 'kalø køn' chib namun kebachimubene, nambe Tiuswei merrab chi isumø pønrramig tøgaguer.

²² Incha katø nam chigøben nun miawabe, nun utønrrun, kaguende marmø kømø, nui maig maramigwan martrai pønrrailan nambe møra marøb, katø chiwan køben nui merrab marøppe, nun kasrag kømdiig marøbelø kuikkurri.

²³ Inchen martrai tru nø karua pønrraibe iig køn: nui Nusrkai Jesucristoi munchiyu køreb, katø kangurrin kangurri nø maig karuig køben treeg undaarab indamig.

²⁴ Nui maig maramigwan martrain pønrrailan møra marøbeløbe Tiuswein-
uutø pønrrabig pønrrøben, katø treetøwei Tiusbe nømuiug pasrabig pasaran. Øyeekkurri Tiusbe namuiug pasrai asha ker, tru Espiritu Santon namun tranig truikkurri.

4

Espiritumeran Tiuswei Espiritu køtashchab tab asamig

¹ Nai undaarailø 'nambe Tiuswei Espiritutøga waminchibølø ker' chibelan mundøgucha ke chi tain kuindø køreb pønrrømøtay. Treeg kømøtø, nøm espiritu tøgagúigwan maig køtashchab ashibmerrig asamig køn. Tiuswei Espiritu kuin kui, kabe peg espiritu kuin kui. Kaguende yu piraube webambin køn ka isatø 'Tius maig karuigwan eshkabelø ker' chibelø.

² Nímbe Tiuswei Espiritun øyeegu ashchun: chi espiritutøgucha 'Jesucristobe møg misra arrig køn' chibiibe si, truiibe Tiusweinukkurri arrubig kuin kui.

³ Inchen chi espiritutøgucha 'Jesucristobe møg misra arrumig køn' chibiibe, truiibe Tiusweinukkurri arrubig kømøtø køn. Truiibe tru Jesucriston ashig kømui inchib tsalø inchibigwei espiritu køn, tru attrab køn taigwan ñim wammøra kuig. Incha nømímbe yandø chabguen yu pirau pasrabguen indan.

⁴ Nai ureezheelø, ñímbe Tiusweyelø kua, tru isa waminchipteelan ñímbe chinchamamø, kanawa puraambin køn. Kaguende ñimuiug pasrabiibe, pirau pasrabig lataig kømø, mas purø nuig køn.

⁵ Nømbe yu piraeløtø kua, yu pirau chi købigwan nøm waminchen, yu piraeløbe nømune ke tru kuindø møran.

⁶ Inchen nambe Tiusweyelø ker. Inchawei mutøgucha Tiuswan nebua ashibiibe namune møren, Tiuswan ashmíibe namune mørmøn. Øyeegu nambe aser, tru newan cierton Espiritunba, katø tru isa peløsrkøptø espiritunba.

Tiusbe tru undag købig køn

⁷ Nai undaarailø, kangurrin kangurri undaarayagun. Kaguende undag købiibe Tiusweinukkurri arrubig køn. Inchen mutøgucha undaguibe Tiusweinug kal-laweig køb, katø Tiuswan nebua ashib inchibig køn.

⁸ Undag købigwan chigaiibe Tiuswan nebua ashmíig køn, kaguende Tiusbe tru undag købig køben.

⁹ Tius nui undag købigwan namun kenamarøppe, øyamay kenamarig køn: tru nui kandø Nusrkawan yu piraumay øra, nøgurri nam srøig øsig kømigwan tøgagørrai.

¹⁰ Tru undag købiibe øyeeg marigu pasran: Tiuswan nam undaguelø kuig kuimba kømøtø, nø namun undaarawa, nui Nusrkawan nam kaig marilaimburø Tiuswei namig købigwan nø utab namuyasig kwanrrai ørigu.

¹¹ Nai undaarailø, Tiusma namune øyamay undaarraig købene, namgucha treetøwei kangurrin kangurri undaarayamig køn.

¹² Mugucha Tiuswane managuen asiibe kaagøn. Inchendø nam kangurrin kangurri undaarayabene, Tiusbe namuinug pasrabig pasrøben, nui undag købiibe namuinug kerrigu newan tabig pasramisrin køn.

¹³ Nambe nuinug nøba pønrrabig pønrrab, katø nøbe namba pasrabig pasranmab asamig kønrraimbe, nø namun nui Espiritun tranikkurrin køn.

¹⁴ Incha nambe namashib asha, maig kuigwan eshker, Tius Møskai nui Nusrkawan yu pirau misagwan Kaigyugurri Wesrabig kønrrai ørigwan.

¹⁵ Møikkøben 'Jesúsbe Tiuswei Nusrkain køn' chibiibe Tiusweinuutø pasrabig pasrøben, katø Tiusbe nuinug pasrabig pasran.

¹⁶ Tius nui undag købigwan namuimburab tøga pasraigwan nambe nebua ashib, køreb inder. Tiusbe tru undag købig køn. Inchen møikkøben undag købigwan tøga pasrabiibe Tiusweinug pasrøben, katø Tiusbe nuinug pasran.

¹⁷ Øyamaybe Tiuswei undag købiibe namuinug kerrigu newan tabig kørrømisran, Tius tru maig kuigwan asha marøb kwaløm nambe nun chi kørmø pønrramig kønrrai. Kaguende Jesucristo maig køben, nambe yu pirau treelø ker.

¹⁸ Inchawei undag købig pasrøbene, kørig købiibe chigagøn. Masken treeg kømøtø, undag købig kerrigu newan tabiibe kørig købigwane kerrigu tarømaran. Kaguende kørig købiibe tru purø trømbøig attrabigwan utam kønrrab kuimba køriiran. Møikkøben kørig købigwan tøgaibe katøgucha tru undag købigwan kerrigu newan tøgagømø, palab pasran.

¹⁹ Nambe undaarabelø ker, kaguende Tius nømerrig namun undaarraig kua.

²⁰ Møikkøben: "Nabe Tiuswan undaguig kur" chibendø, nui nunewan tsalø ashibiibe, truiibe treeg kømubendø, isaptiig køn. Kaguende nui nunewan nui kaptøga asigwanguen undaaramiibe mas Tiuswan kaptøga mana asimifigwane ¿chinha undaaranrrab kø?

²¹ Katø tru martrai Tius nø karua pasrig iigwan tøgaguer: Tiuswan undaguibe katø nui nunewangucha undaarau taigwan.

5

Isubigwan Jesucristoinuutø pasra tøgagúitøga chi arrubigutøgucha puraambub

¹ Mutøgucha Jesúsbe Cristo kuitamab kørebiibe Tiusweinug kal-laweig køn. Incha mutøgucha Møskawan undaarabiibe katø truigwei uregwangucha undaaran.

² Nambe øyamay tru Tiuswei uremeran undaguelø kermab wetøgørrer, Tiuswan nam undaarakkurrimba, katø nui tru maig maramigwan martrai pønrrailan møra marikkurrimba.

³ Tiuswan nam undaaraiibe nui tru maig maramigwan martrai pønrrailan nam møra marig, truig køn. Inchen tru martrai nø karua pønrrailøbe ke martrab kaimamdiibe kømøn.

⁴ Mutøgucha Tiusweinug srøig kal-lawaiibe yu pirau chine pureb arrubigu kebefimø, purayan. Tru namun pirau treegu kebefimø, kanawa purainrai marøbiibe tru namui isubigwan Jesucristoinuutø pasra tøgagüig, truig køn.

⁵ ¿Yu pirau chine pureb arrubigu kebefimø, kanawa puraibiibe mu køh? Jesúsbe tru Tiuswei Nusrkain kuitamab kørebíg, truitøwein køn.

Tiuswei Nusrkaweimburab maig kuigwan eshka

⁶ Tru pitøgaba, anindøgaba arrubiibe, tru i Jesucristo køn, pitøgatø kømøtø, pitøgaba, anindøgaba arrubíg. Tru treeg arrigwane Espíritu Santo eshkan, kaguende tru Espíritube tru newan ciertonig kua.

⁷ Inchawei pøn køn, tru 'treeg køn' cha eshkabeløbe.

⁸ Truiløbe Espíritu Santoba, piba, animba køn. Inchen tru pønbe chi pegwan waminchimøtø, trunundøwei wamindan.

⁹ Møguelø 'treeg køn' cha, eshkaigwanguen nam ka utiibe, Tius namun 'treeg køn' cha, eshkawa pasriibe treetøguen kømø, purø nuikken køn. Kaguende Tius 'treeg køn' cha, nø eshkawa pasrøppe, nui Nusrkaweimburab wamindig køn.

¹⁰ Tiuswei Nusrkawan kørebiibe, Tius nui Nusrkaweimburab 'treeg køn' cha, eshkaigwane nøasiitø nui manrrau tøga pasran. Trune Tius maig taigwan køremiibe Tiuswane ka isaptiig kui lataig maran, kaguende Tius tru nui Nusrkaweimburab 'treeg køn' cha, wamindigwane treeg kuitamab køremuikkurri.

¹¹ Inchen Tius tru 'treeg køn' cha, wamindiibe iig køn: 'Tru managatig øsig kømigwan Tius nø namun tranen, tru øsig kømibe nui Nusrkaweinug pasran' taig.

¹² Inchawei Nusrkawan tøgaiibe tru øsig kømigwan tøgagøben, Tiuswei Nusrkawan chigaibe tru øsig kømigwan chigaig køn.

Maig kømigwan srabe wamindiilø

¹³ Ñim Tiuswei Nusrkawei munchiyu kørewa pønrrabelan nabe ñimun iigwan pørar, managatig øsig kømigwan ñim tøgar kui ashchai.

¹⁴ Inchawei nambe Tiuswane chi kørmø kemalla miamdiig kui aser, kaguende nam nun chigøben miappe, nø maig kønrrain køben nam trumay miabene, nøbe namune mørøbig kuimba.

¹⁵ Trube, nam chigøben miailan nø mørøbig kui ashibelø kuig køppe, namun chigøben paløtan cha, nam miawa pønrrailane, trube, utabguen indermab isumig køn.

¹⁶ Møikkøben ñui nunewan kaig marøb pasrai asig, tru managatig møra pasramsromay srua inrrabgaig købene, nuyasig Tiuswan 'purugurra' cha miamig køn. Inchen truigwane Tiusbe nui øsig kuigwan tøgagønrrai tranrrun. Iibe kalø marig ke kwamigugatig srua inrrabgaigwan marøbelayasig køn. Kaig marig kwamigugatig srua inrrai marøbikkucha køn. Truigweimburappe, Tiuswan 'purugurra' cha, nabe miay chimur.

¹⁷ Chigurrimbunø sølgandø tabig mariimíibe kaig marig kørrømisran. Inchendøgucha tru kaig mariilø møiløbe tru managatig møra pasramsromay srua inrrabgailø køn.

¹⁸ Mutøgucha Tiusweinug kal-lawaiibe kaig maramigwan marøbig marøb uñmuin kui aser. Kaguende tru Tiuswei Nusrkai nune ashíb tøga pasrøben, tru kwaimandzig, larrø kaibe nune chinchab kaiman.

¹⁹ Nambé Tiusweyelø kermab asha pørrer. Inchen yu pirauigwane kerrigu mayamba tru kwaimandzig, larrø kaibe nø merrarrowa, nø ashib karub pasran.

²⁰ Katø Tiuswei Nusrkaimbe arrua, namune chigúi møramigwan tranin kui aser, tru newan ciertonigwan nebua ashchai. Incha nambé kanbalatø pørrer tru newan ciertoniguba, tru nui Nusrkai Jesucristoinuuba. Truibe tru cierton Tius køb, katø managatig øsiguig køb køn.

²¹ Nai ureezheelø, tru taska mari tiusmerane mendamisray.

2 San Juan

Ciertoniiba, undag kõiiba

¹ Na, Tiusweimburabelan pera marøb pasrabig i kilgawan pørar, Tius lawa wesrua tøgagúig ishuumisagwan nui ureemeranba, tru na newan ciertonigu undaarailan. Katø natø kømøtø, mayeeløba tru newan ciertonigwan nebua ashibeløbe truiløgucha ñimune undaaran.

² Nambe ñimun undaarappe, tru newan ciertonig namui manrrau pasraikkurrin køn. Inchen tru ciertoniibe namba managatig pasrønrrun.

³ Tius Møskaweimba, katø Señor Jesucristo, tru Møskawei Nusrkaweimba, nui ka yandø tab indig køben, namun lastima asig køben, chi isungag tab købig køben namuim pala pønrrønrrun, tru newan ciertoniguba, undag købiguba.

Undaguelø kømigwan karua pasrig

⁴ Nabe truba truba kasraarar ñimui uremerai utu møiløgøben Tiuswei newan ciertonigu amønain kuimba, Tius Møskai namun maig karua pasrig køben, treekke.

⁵ Ñi, ishug misagwan, na møi ñun pørigwan, martrai kan srøig karua pasra pørig kuig lataig inchimørrunrrig chinrrainchar. Treeg kømøtø, tru srøsrøgurri namun maig karua pasrigwan trunundøweim pørar, tru kangurrin kangurri undaarayagun taigwan.

⁶ Iig køn nam tru undag købigwan tøga pønrramibe, Tius tru maig maramigwan martrai pønrrailan trunun møra marøb amønaming. Inchen tru martrai karua pasrigwan ñim srøsrøgurri møriibe undag købigu amøñinrrain taig, truig kuig køn.

Namui isubigwan Cristoinug pønra amønaig

⁷ Pøs yu piraube isa may wamincha kegørrøsrkøbelø truba truba webambin køn 'Jesucristobe yu piraumay møg lataig misra arrumuig køn' chibelø. Øyeeg inchiibe tru may wamincha kegørrøsrkøbig, tru Criston ashig kømui inchiib tsalø ashibig, truig kønrrun.

⁸ Ñimasiitøwei tab asha melay, ñim chigøben tabig marøb melailan kaptøasha pønrrømønrrappe. Treeg kømøtø, ñimui utamigwan kerrigu newan utamig kønrrai melay.

⁹ Møikkøben Cristo kusrenanigutø pasrønrrab inchimøtø, nuinetø nemarøb purab kusrennrrab inchiibe, Tiuswane chigaig køn. Trune Cristo maig kusrenanigutø pasrabig pasrabiibe, truike si, Møskawanba, Nusrkawanba tøgag køn.

¹⁰ Møikkøben ñimuinug arrua, tru treeg kusrenanigwan kømø kusrenanene, ñimui yau 'amø' cha, kebermøwei, ni katø 'manguen arrin køn' tamig kømøwein køn.

¹¹ Kaguende 'manguen arrin køn' chibiibe tru nø kaig mariiløyu nøgucha tøgatø marøb pasran.

Srabe wamindiilø

¹² Nabe ñimun truba truba pøramig tøgagøbendø, kilgayu tintatøga pørmøtø, nabe ñimuimay attrab isur, malaugue ñimba waminchab namui kasrag købigwan newan tøgagønrrab.

¹³ Tru ñui lawa wesruig numøsrawei ureemerabe ñun ‘tab ka uñguh’ chib wam øran.

3 San Juan

Gayoimburab tab waminchib

¹ Na, Tiusweimburabelan pera marøb pasrabig, nai tab linchibig Gayon pørar, newan ciertonigu na undaaraigwan.

² Nai undaaraig, nabe ñuyasig Tiuswan miappe, ñui møsig Tiusweimburab tab køb lataitøwei, chiyutøgucha tab pub attraimba, katø ñui asrugucha kwanrrø kømø, tab unamig kønrraimba miabig kur.

³ Nabe truba truba kasraarar møiløgøsrøn namui nunelø amrrua, tru newan ciertonig maig køben ñibe truyutø pasrab, katø treegutø ñi maig unigwan nan eshkaben.

⁴ Tru newan ciertonig maig køben, nai ureemera treeg amønana taig wammøramibe, katøgan chi peg wammøri lataitøguen kømø, purø nu tab køtan.

⁵ Nai undaaraig, namui nunelan ñi tabig purugub pasraibe, ñi purø tabig marig køn, ñuimbe asiimeelø kuingucha katøguchinguen tabig marøb.

⁶ Truiløbe iglesiayulai merrab ñi treeg undaguig køn cha wamindan. Ñi nømui ambamigwan ambub amrrai puruguabe, Tiuswan kasrag kømdiig kønrrai, tabig martrabguen.

⁷ Kaguende nømbe Jesucristoi munchin undag køb webambamig køn, Tiuswan ashmø misaamerane chigucha chi purugúig utømø.

⁸ Inchawei treekkurri nambe treeg marøb møguelane purugub asamig nebunrrun, Tiuswei tru newan ciertonigweimburab namgucha purugúig kørrømisrtra.

Diótrefes søl marmø kaig marøb

⁹ Nabe iglesian kan kilga pørig kuig køn. Inchendø Diótrefesbe na karuilan mørmúig køn, kaguende nømui utu chiyutøgucha ke nø karub pasrønrrab inchibig kua.

¹⁰ Inchawei treekkurri nabe ippe, nø chi mariilan ñim isunrrai wamin-damønrrun, tru nø namun isa wamincha wam kusruigwan. Incha trutø kømøtø, nøbe nunelan utømøwei, katø utønrrab inchibelan meramba, iglesi-ayugurri webetamba inchibig køn.

¹¹ Nai undaaraig, kaig mariilan asha marmøtø, tabigwan asha mar. Tabig marøbiibe Tiuswein køn. Inchen kaig marøbiibe Tiuswane ashmúig køn.

¹² Mayeeløba Demetrioimburappe tabig waminchibelø køn. Tiuswei tru newan ciertoniitøweinguen nune treeg marøbig køn cha eshkan. Inchen namgucha truigweimburappe 'treegwein køn' chib eshkan waminder. Inchen nam 'treeg køn' cha wamindiibe, isa kømø trendaig kuig ñibe ashibig køn.

Srabe wamindiilø

¹³ Nabe ñun eshkamig truba truba tøgagøbendø kilgayu tintatøga pørog kømøtan.

¹⁴⁻¹⁵ Nabe maya yanayutø ñun ashchab attrab isur malaugue waminchab. Chi isumgaig tab købiibe ñiba pasrønrrai isur. Tru tab lincha amøñibeløbe ñune 'ka uñgu' tan. Katø ñigucha namui asiilan kanun kanun nømunashib treetøweih chirrunrig.

San Judas

¹ Na Judas, Santiagoi nuneg, Jesucristoi marøb megabiibe Tius Møskai wamiilø undaarailan, Jesucristobe chi kømønrrai ashib tøga pasrailan na pørar.

² Purø lastima asigwanba, chi isumgaig tab købigwanba, undag købigwanba ñim uncha tøgagønrraimab isur.

Isa peetø kusrenanøbelø

³ Nai undaarailø, ñim lata, na lata kanguelarrøtø tru nam kaigyugurri wes-raig pønrraigweimburab ñimun pørtrab truba truba isuig kuig køn. Inchendø truburab pørmøtø, 'øyeeg, øyeeg melay' chib waminchib pøramig truba palai ashar, tru Tiuswei misaameran Tiuswei tru tabig srø wamwan Jesucristoimburab managatigweyasig treetø kønrrai kanmaytø tranig købigwane mur tranrrab pønrrai chinrrab.

⁴ Kaguende møiløgøben mu ashmøwatø ñimui utu nilø kebambin køn. Truiløbe kaigyu pønrramig kønrrai manasrøwei treeg mariilø købig køn. Tru Tiuswan ashmeelø kaig møgueløbe namui Tiuswei ka yandø tab indigwane nømun maig marøg køben maramigweyasig merrarrowa tøgagøn. Katø, tru nøtø kandø Mayeelaim Pala Pasrabig, namui Señor Jesucristone nømbe 'ashmeelø ker' chibelø køn.

⁵ Ñimbe yandø ashibelø kuindøgucha, nabe katø isungarunrrab inchar, Israel misaameranma Egipto piraugurri Señorbe wesrappe, wesrabendø, wendøsrømbe nun tru køremeelane pinisaig købigwan.

⁶ Katø ánglesmeran chigucha nømune srøsrø chiyu pønrrønrrai pønrsøben, truyutø pønrrømøtø, trunun elachippa, tarømisrøbelane purø trømbø løstiigu pønrrønrrai Tiusbe managatig cadenastøga merrarrowa pønrsraig køn, tru maig maramigwan asha maramig purø nu kwalømweyasig.

⁷ Katø Sodoma misaameraba, Gomorra misaameraba, tru puluwan ciudameraba treetøwei, ishumburba, møgueløba trømbøig kaig marøb, katø møgueløbe nøm møgueløasiyaitø trømbøig marøb kømig, trutø srua ambilan managuen kwamø nagu møra melønrrai kebeta, pønrsraig køn, trunun katøganelø isua asha kømig kønrrai.

⁸ Katø øyeeg købenguen tru møguelø piaig lataigutø amøñibeløbe nømui asrwan kaig kønrrai marøb, katø ashib karub purrabelane mørmø, kaashib, katø tru srømbalasreelø truba nørreelanguen tsalø wamab inchibelø køn.

⁹ Trune tru arcángel Miguel købenguen, tru nugwaimandziiba Moiséswei asr cha aleguiyab kua, truiikken tsalø wamab kaig nebubash chinrrab inchimøtø: "Øyebe maramig kømøn chib, Señor ñun namubash" cha. Trutø taig købig køn.

¹⁰ Trune tru i møgueløbe nøm chigúinguen mørmubendø, tsalø wamabelø køn. Nømun tre lataig asønauitø nøm chigúi mørigwane, animalmera chugúi mørmelø lataig trømbøig marøbelø køn, nømasiitø minchib treramig.

¹¹ ¡Ay, nømuimbe maig kønrrerah! Kaguende nømbe Caínwei maywan merrarrowa amban. Nømbe an kanag købiitø Balaam kebeninuutøwei kegørra, katø mørmuikkurri Coréwan pinisailø lataitøwei pinisailø køn.

¹² Ñim Tiuswei undag købigwan tøga kasraatø lincha mab waramig tøgagúiløyube, nømbe ke ka trømbøig mindishibelø treelø køn. Nømbe chigucha kørikkar ka nømuimburab øska mab, øska muchibashtø inchibelø.

Nømbe wañimera chi pigarwan ambumay imay isig srua ambig latailø køn. Katø mamig nigamig puben, niimø tusrmera latailø, srølbafñau kitiilø, pamay kwailø køn.

¹³ Nømbe maryu pi welarmera namig latøgushib kurrab arrubigu, kan pichall weguchib latailø køn, tru nømui trømbøig ashikken kønrrabgaig mariiløbe. Estrellasmera nømui ambamwan kømø, pella ambub latailø køn. Truilaimbe purø trømbøig løstøyu managatig pønrrønrrai pønstramig tamariilø pønrran.

¹⁴ Adánweinukkurrimbunø misaamera srøig, srøig kurrab arrubig siete nemisren arrubig tru Enockucha, tru i kaig misagweimburab manawei trencha eshkawa pasrig købig køn: “Au, Señorbe nui tarømari ángelesmeran purø nørø sətø peraig arrun cha,

¹⁵ maya misaameran maig kønrrabigwan asha marøb, nøm chu pønrramigwan pønrrønrrai pønstrønrrab, tru larrø kailane nøm kailø kuimaytø larrø kaig mariilan mundøgucha treeg martrab. Katø tru larrø kailø chigurrimbunø mørøbguen møram kaig wamindi wammeratøga nun waminchibelan treeg kørrømartrappa arrun taig køn.”

¹⁶ Nømbe chiwandøgucha kaig køtangøba chib, chiwandøgucha søl marmø, kalø marangøba chib waminchibelø køn, nømui kaig isuilø maig køben, nømbe treeg amøñibelø kua. Katø nømui triitøgabe nømasiitø purø nørreelø misrøb wamindamba, katøganelane truba tabzhig misrøb wamindamba inchibelø køn, nømyasig chigøben tøgagug købiitø.

Tiuswei misaameran isuatø amøñinrrai waminchib

¹⁷ Trune ñim, nai undaarailøbe, namui Señor Jesucristo nøashib karua øriilø merrabsrøwei wamindigwan isua kuy.

¹⁸ Kaguende truiløbe ñimune øyeeg taig købig køn: “Yandø srabe kwalømmerawane misaamera tabigwane ke ka indzatø mørøbelø, nømun maig amøñig køben treeg trømbøig marøb amøñibelø kønrrun” taigwan.

¹⁹ Iiløwein køn, tru misaameran ka nørøtø marøb pirisha pønstrøbelø. Nømbe nømui asr maig palai inchen, treeg marøbelø, Tiuswei Espiritune chigar køn.

²⁰ Trune ñim, nai undaarailøbe, ñimui isubig newan chishchig Tiusweinutø tøga pønrraigu katøguchinguen nørørab ambay, Espiritu Santo maig wamindingaruben trumay Tiusba waminchib.

²¹ Ñimbe Tiuswei undag købigutø amøñippe, truyutø amønay, namui Señor Jesucristoi lastima asiitøga managatig øsig kømigwan tranrraitamab isua muniirab.

²² Møiløgøben treeg kuitamab isumba, katø treeg kømuitamab isumba inchibelane ñimbe lastima tøgaguy.

²³ Katøganelane nagurri wesrui, trumay kaigyurri wesrub. Inchen katøganelane lastima tøgagømig køn. Inchendø purø ashiptø maray, trømbøig marøg købigu nøm trømbøig mariiløtøga chillig inchib kewa llirab pønrrailanguen ashikken kømui inchib.

Tiuswan tabig wamindiilø srabeig

²⁴ Tru ñim kaigyu kørrømønrrai asamig maramburab maramig tøgagig, katø truba truba kasrag nui torguegwalmabiisrø chigucha chi tamgailø chishchig ñim kemalla pønrramig kønrrai tøga pasrabig,

²⁵ Tius kandø wabig, namun Kaigyugurri Wesrabigwan namui Señor Jesucristogurri tørguegwalmabiiba, purø nuig muguen nebua isumgaiba, mayeelaim pala asamburab ashib pasraiba, mugucha manchinraingaig karuiba, iilan nuin kønrrai inder, manasrøngurri, møiya lata, katø managatig. Treeg kønrrun.

El Apocalipsis

Jesucristo San Juanwan torgandø ashchai kenamarig

¹ Iibe Jesucriston Tius torgandø kenamarig køn, nø nui karuig melabelan kenamartrai, tru maya yanayutø purainrrabigwan. Jesucristobe nui marøb megabig Juanwan kan ångelwan øra, kenamarig køn.

² Inchen Juanbe nø maig asigwan kerrigu isa kømø, maig kuigwan wamin-dan, Tiuswei wamwanba, Jesucristo maig eshkaigwanba.

³ Mayanguen tab kuig køn, tru chinetø pub attrabig pørigwan lebigweimbe. Katø trunun leben møra, tru maig taigwan marøbelø chigucha maya nuguen tab kuilø køn. Kaguede yandø tru pub attrabiibe pub pasran.

Juan siete iglesiameran pøøb

⁴ Na, Juanbe, Asia pirau siete iglesiameran pørar. Ka yandø tab indigwanba, katø tru chi isumgaig tab købigwanba ñimuin kønrraimab isur, Tius tru mõi ya køb, merrabsrø køb, attrabig køb, truigweinukkurrimba, katø siete espíritumera, tru Tius wamisra karub waigwei merrab pønrrabelainukkurrimba,

⁵ katø Jesucristoinukkurrimba arrubigwan. Nøbe waminchippe, maig kuigwan eshkabig køb, katø tru maya kwabelai utu nømerrig øsiirabig køb, katø nøbe pirau maya reymeraim pala nø karub pasrabig køb indan. Trui-be namune undaarab, nambe kaig mārīløyu lusri latailø kuigwan nui anindøga elatsørka,

⁶ katø namune reymera latawei ashib karub pønrrønrrai mara pønsraig køn, sacerdotsmera Tius nui Møskaweyasig. ¡Tørguegwalmabiiba, maramburab mārīibabe nuin kønrrai managatig! Treeg kønrrai.

⁷ ¡Au! Cristobe wañiyu arrun.

Inchen mayeelø ashen,
katø nun tru kelarrab kwanøbeløguen ashchun.

Inchen pirau maya misaamerabe
truba isui inchib kishchun nun ashippe.
Øø, øyeeg kønrrun.

⁸ Tru Señor Tius, Newan Maramburab Marøbiibe trendan: “Srøstriiba, Srabeibabe na kur cha, Aba, Zetaba latawei, tru mõi ya køb, merrabsrø køb, katø attrabig.”

Juan kan piab lataigu Criston asig

⁹ Na Juan, ñimui nuneg, chigøben purø trømbøig puben isumdiigu lata, katø Tius nø ashib karub wainug lata, chigúindøgucha ñimba, Jesucristoba kanbalatø pasrabig pasrabig kur. Nan kan pi tøbøtag pirø pasrabig, Patmos tainug wanrrai kegutsig wabig kur, Tiuswei wamgurrimba, katø Jesucristoimbura-bigwan eshkaikkurrimba.

¹⁰ Kan isrin kwaløm Espiritu nan tøga pasramisren, nai wendaube kan wam kan trompeta wanrøb lataig nan truba mur trenchibig køn:

¹¹ —Ñi chi asigwan kan kilgayu pøra, tru siete iglesiameran ør cha, Efesomayba, Esmirnamayba, Pergamomayba, Tiatiramayba, Sardismayba, Filadelfiamayba, katø Laodiceamayba.—

¹² Inchen tru wam nan waminchibiibe muin køtashchab keesha ashene, truyube oro kandilerumera siete nørreelø pønrraptinchibig køn.

¹³ Inchene tru siete kandilerumerai tøbøtaabe kan mugøsrøn møg lataig pasraptinchibig køn, nui kewagúibe katsig søchi kørriig keweikke. Inchen nui pechoyu pørønaibe oro købig køn.

¹⁴ Turyu pusruube kan pulø isig lataig, wañi lataig puløzhig, nui kabmerabe kan nagurø lataig køben,

¹⁵ nui srøbmerabe broncen nagu pill-llanen tørbilabig lataig pilabig køben, nui wambe kan nu pi mullib wanrrøb lataig købig køn.

¹⁶ Nui kusrmay taskube estrellamera siete sruaig, nui trigugurrimbe kan espada pinrrøba purø trøsrig tøgagig webarrubig køn; nui maløbe nøsig tør køptø pilamburab pilab lataikke.

¹⁷ Inchen nabe nun ashippe, nui katsigu kwaig lataig peninabig køn. Inchen nøbe nui kusrmay tasiitøga nan trenchib estsarøbig køn:

—Chi korig kui inchimøta cha. Nabe Srøsrriiba, Srabeiba,

¹⁸ tru Øsig Wabig kur cha, kwain tsubig kua. Inchendø ash, chibig køn, øsiguig war cha, managatig. Nabe kwamigwei llavimeranba, katø tru kwabelø pønrrainug llavimeranba tøgagur cha.

¹⁹ Inchawei ñi chi asigwane pør chibig køn, mõi ya maig kuigwanba, katø wendøsrø maig kønrrabigwanba.

²⁰ Inchen tru estrellamera siete nai kusrmay tasigu ñi asigweimburappa, katø tru siete oro kandilerumeraimburappa tru mu asiimíig pasrabiibe øyeegwan eshkabig køn: tru siete estrellamerabe siete iglesiamerayu ánglesmera køben, tru siete kandilerumerabe tru siete iglesiameran eshkaig køn.

2

Efeso iglesian wam ørøb

¹ Efeso iglesiai ángelwan iigwan pør:

Tru siete estrellameran kusrmay tasigu srua pasrab, katø tru siete oro kandilerumerai utu uñib inchibiibe øyah tan cha:

² Nabe ñui chi mariilan ashar cha, ñui maramelan mur tranrrab megaigwanba, megabig megaigwanba. Katø ñibe kaig marøbelane ka tøgagømig awentanrrab kaimab, katø truilø kømubendø, ‘Cristo nøashib karua øriilø ker’ chibelan, nøm treeløwein kuitashchab ñi asha, ka isapteelø kuin kui merrarrab indi ashar.

³ Katø maya kaig nebuindøgucha ñibe megabig megab, nagurrindø treegu kørørmismø megain kui ashar.

⁴ Inchendø nabe ñun chiyu køsrøn kalø køn tamig tøgagur: ñibe srøsrøbe truba undaguig kuig, mømibe trunun elatsin køn.

⁵ Inchawei mandøgurri peñibrermab isu, tru srøsrø undag købigwan, ñui kaig mariilan isua møra, Tiusweimay llirawa, srøsrø marigwan mar. Treeg inchimuisruandøbe, nabe ñuimay arrua, ñui kandilerune pasrainukkurri kusramønrrun, ñi isua mørmubene.

⁶ Treeg kuindøgucha, ñibe ñuimburappe iigwan tøgagøn: Nicolaítasmera marigwane tsaliig køben, nagucha truilø marigwane tsaliig kur.

⁷ Kalubaibe mør Espiritu iglesiameran wamindigwan. Maig kuindøgucha truyu pureb ibigwane tru øsig køm tusryu mamigwan manrrai nabe tranamønrrun, Tius nø waisrø purø tabzhiisrø tru tøbøtag pasrabigwan.

Esmirna iglesian wam ørøb

⁸ Esmirna iglesiai ángelwan iigwan pør:

Tru Srøsrīg køb katø Srabeig køb, tru kwawa, katøyug øsiirab inchibiibe øyah tan cha:

⁹ Nabe ñi truba truba chigøben kaig nebuinab megaigwanba, ñi waacha kuigwanba ashar cha. Inchendø ñibe waacha kømøtø, puai g køn. Katø tru 'judíos ker' chibelø ñuimburab truba truba chigøben kaig waminchen ashar cha. Inchendø nømbe treelø kømøn, nømui tulundzuni yaueløbe mayamba nømbe Satanáswein køn.

¹⁰ Ñimbe kørīg kui inchimøtay, maya yana kømøwatø chigøben nebuinab pønrramigwan. Au, nugwaimandziibe møilan køben ñimui utugurri kailan keeri yau kebetønrrun, maig inchibelø køtashchab ashchab. Inchen ñimbe kwalømmøra diez nemisramne truba kaig indinab melamig nebunrurab Kwamnegatig megabig megau, nabe øsig køm coronan tranamønrrun cha.

¹¹ Kalubaibe mør Espiritu iglesiamera n wamindigwan. Maig kuindøgucha truyu pureb ibiibe katøle kwangarunrrabig mindisaig kønrraamøn cha.

Pergamo iglesian wam ørøb

¹² Pergamo iglesiai ángelwan iigwan pør:

Tru espada pinrøba purø trøsrīgwan srua pasrabiibe øyah tan cha:

¹³ Satanás nø wamisra merrarrowa karub wainug ñibe truyu pasrabig kui nabe ashar cha. Inchendø ñibe nai munchiwan pesannamø, tøgagøbig tøgagøb, ñui isubigwan nainuutø pasra tøgagúigwan elachib 'trugatiig kømur' chib pasrømøwei indig køn, tru Antipas nan elachimø pasrabig naimburab waminchibigwan kweechib kwalømmørawanguen Satanás nø marøb uninug.

¹⁴ Inchendø kan chigøsrøndø ñun kalø køn tamig tøgagur: møiløgøsrøn tru Balaam kusrenanigwan marøbelan ñibe truyu tøgagøn cha. Tru Balaambe Balacwan øyamay martrai kusrenanig køn, Israelwei misaamera srørrøngwangerub taska mari tiusmerayasi g kweetsi mamimera n mangarumba, katø møgueløba, ishumburmeraba trømbøig martrai karumba inchib.

¹⁵ Katø treetøwei ñigucha ñuinug tøgagøn møiløgøsrøn Nicolaítasmerai kusrenaniilan elachig kømui inchibelan.

¹⁶ Treeg købene, ñui kaig mariilan isua møra, Tiusweimay llirau. Treeg marmøwabe, nabe petø ñuimay arrua, nai trigu espadatøga truiløba kwayamønrrun.

¹⁷ Kalubaibe mør Espiritu iglesiamera n wamindigwan. Maig kuindøgucha truyu pureb ibigwane nabe tru mamig maná taig sorig pasrabigwan manrrai tranøb, katø kan pulø sruuzhig tranøb indamønrrun. Incha tru sruuzhigube kan munchi srøig pørig pasrønrrun, truigwane mugucha asiimíg tru utabiitøwei nebua ashchun.

Tiatira iglesian wam ørøb

¹⁸ Katø Tiatira iglesiai ángelwan iigwan pør:

Tiuswei Nusrkai, tru nui kabmerabe kan nagurø latailø tøgai g, katø nui srøbmerabe kan broncen chishtø pinømøren, tørbilabig lataig tøgai be øyah tan cha:

¹⁹ Nabe ñui chi mariilan ashar cha, ñui undag købigwan køben, ñui isubigwan nainuutø pasra tøgagúigwan køben, ñi marøb megaigwan køben, katø chigúingucha tammay megaigwan købengue. Incha katø mømbe srøsrø lata kømø, katøguchinguen marøb megai ashar.

20 Inchendø kan chigøsrøn ñun kalø køn tamig tøgagur: isatø 'Tius maig karuigwan eshkabig kur' chibig, tru ishug Jezabelwan ñibe tøgagømgai kuingucha ka tøgagøn cha, nøbe kusrenniitøgaba, katø chull asøska trømbøig isungaruitøgaba, tru nai marøb melabelan ishumburmeranba, møguelanba trømbøig maringarub, katø taska mari tiusmerayasig kweetsi mamimeran mangarub inchibigwan.

21 Nabe nune maya yana køsrøn muniiraig køn, nui kaig mariilan isua møra, Tiusweimay lliranrrai. Inchen nøbe nui trømbøig maramigwane treeg marmønrrab katøyug isua mørøg kømuindan.

22 Au, nabe nune camayu tsunrrai kwanrrø kutsamønrrun. Katø nøba itøluøpteelane nabe truba truba trømbøig nebuilø kønrrai maramønrrun, tru ishuubamisra nømui kaig mariilan nøm isua mørmuisruandøbe.

23 Incha katø tru mendig amøñib ureemerane nabe purø isumdiig mara, kweetsamønrrun. Nabe isuigwan lata, manrrøwan lata nabe tørguelarrab ashibig kuin kui maya iglesiamera nebua ashchun. Incha nabe ñimun møigwandøgucha ñimui mariilø maig køben, kanun kanun treeg tranamønrrun.

24 Trune ñim katøgan sətø Tiatirasrø warabelø tru kaig kusrenaniilan marmøwei, Satanaskurri purø nørø kusreb chib tøgagüilan nebua ashmøwei inchibelane nabe ñimune trenchar: Katøgan chi peg maramibe maskucha negwanmumønrrun cha.

25 Inchendø ñim tøgagøbguen indigwane na arrumnegatig elachimø, isua møra tøgaguy.

26 Maig kuindøgucha truyu pureb ibiibe, na maig martrai karuig køben trunun srabegatig marøbigwane chu pirausrøn køben misag nørø pønrrabelan truilaím pala mugucha mandamgaig karumigwan tøgagønrrai tranamønrrun,

27 nan nai Møskai martrai tranøb lataitøwei.

'Inchen tru treeg karumigwan utabiibe
tru misag nørø pønrrabelane

kan tsandzøn pørøtsiitøga mu kurraasamgaig karub martrun,
nømune kan pirø køtsømeran lataitø pusha petab.'

28 Incha katø tru tør-rrab arruben webarrub estrellan tranamønrrun.

29 Espiritu iglesiameran wamindigwan, kalubaibe mør.

3

Sardis iglesian wam ørøb

1 'Katø Sardis iglesiai ángelwan iigwan pør:

Tru Tiuswei siete espiritumeranba, siete estrellameranba tøgaipe øyah tan cha: Nabe ñui mariilan ashar cha. Ñibe øsiguig køn chib waminabig købendø, kwaig køn.

2 ¡Kiagasrø! Chiwan køben ke pinamitø palab pønrrabelane tamar. Kaguende nai Tiuswein kabuyu ñui mariiløbe newan tabig kømui ashar.

3 Inchawei kusrenaniilan ñi møra utigwane møra marøb, ñui kaig mariilan isua møra, Tiusweimay llirab inchi. Ñi kiagasrømuissruandøbe, kan niliig lataig nabe ñuimay arrumønrrun, ñi chu ura attrab kuinguen mørmøwatø.

4 Inchen køben misaamera Sardissrø kan mamdø køn nømui kewagüilan chillig incha kømeelø. Truiløbe naba amøñinrrun puløzheelan kewar, kaguende nømbe øyeegwanwei kenrrabelø køn.

5 Maig kuindøgucha truyu pureb ibiibe puløzheelø kenanig kønrrun. Incha nabe managatig øsig purrønrrabelai munchimeran pørig libroyugurri

nui munchiwan kerramumønrnun. Incha nabe nai Møskawei merrappa, nui ángelesmerai merrappa, øibe nain køn cha, nui munchiwan eshkamønrnun.

⁶ Kalubaibe mør Espíritu iglesiameran wamindigwan.

Filadelfia iglesian wam ørøb

⁷ Katø Filadelfia iglesiai ángelwan iigwan pør:

Tru Newan Tabig, Newan Ciertonig, tru rey Davidwei llaviwan sruaig, tru nø kurene, mugucha kasrønrrab kaimab, katø nø kasrøbene, mugucha kurtrab kaimab inchai marøbiibe, øyah tan cha:

⁸ Ñi chi mariilan kerrigu nabe ashar cha. Au, nabe ñui merrab kan yaskab kura pasrar, truigwane mugucha kasramgaig. Ke trengatig nebua marøppe, marmubendø, nai wamwan møra marøb, ñibe nai munchiwan 'ashmúig kur' chib isømøn.

⁹ Au, nabe Satanáswei tulundzuni yaelø 'Judíosmera ker' chibendø, judíos kømeeleø, ka isatø inchibelan, ñui merrab tømønnsrønrrai indamønrnun. Incha nabe ñiue undaguig kui nebua ashchun.

¹⁰ Kaguende na karuilan tammay marøbig marøb megaikkurri nagucha ñun asamønrnun chi kømønrrai pirau muba kuimburab warab misaameran maig inchibelø køtashchab asamig pirau ørøba yandø purø trømbøig puben.

¹¹ Nabe petø arrumønrnun. Ñi tabig tøgagúigwane elachimøta, ñui coronan mu katøgan merrarramønrnimbe.

¹² Maig kuindøgucha truyu pureb ibigwane nai Tiuswei yau kan pilar lataig maramønrnun. Inchen managuen nøbe truyugurrimbe webinrraamøn. Inchen nabe nuinuube nai Tiuswei munchiwan pørøb, nai Tiuswei ciuda, tru srø Jerusalén, nai Tiuswei srømbalarøngurri kørraarubigwei munchiwan pørøb, nai srø munchin pørøb indamønrnun.

¹³ Kalubaibe mør Espíritu iglesiameran wamindigwan.

Laodicea iglesian wam ørøb

¹⁴ Katø Laodicea iglesiai ángelwan iigwan pør:

Tru Amen, tru treeg køppe treeg, tru newan ciertonigwan eshkabig, tru Tius chiwandøgucha pølbasa maren, nømerrig trendø pasrabiibe iilan øyah tan cha:

¹⁵ Ñui chi mariilan ashar cha. Ñibe pishin kømøwei, pachibig kømøwein køn. Pishin kui, kabe pachibig kui, treeg kuikken søl købsruinrrun.

¹⁶ Inchawei pishin kømøwei, pachibig kømøwei, mørøtø kurag kuikkurri, nabe nai trigugurri wennamønrnun.

¹⁷ Ñibe trendan: "Nabe puaig, truba tøga misraig, chigucha yandø palaimúig kur" cha. Inchendø ñibe uñmuinguen uñib waacha, ñiguen øyeezhig misrin kønmab asamdiig, katø waacha chiguchagaig, ashchab kaimabig, køsaatiig, øyeeg købendø, ñibe ashmøn.

¹⁸ Inchawei nabe ñun øyeeg mar tamønrnun. Nagu parra purøørig oro chishchigwan naiwan penø cha, trutøgabe puaig kønrrig cha. Katø kemeløgucha naiwan puløzheelø penø cha, ñui asr køsaatiig kørig kømndiigwan kasrønrrappe. Katø ñi ashibig misramig kabyu srølamig møgucha naiwan penø.

¹⁹ Mayeelan na undaarailane øyeeg marmøta chib nabe namab, katø ichaguchib inchibig kur, søl martrai. Maig isuppe, treegwan martrab kandø isua, ñui kaig mariilan isua møra, Tiusweimay llirau.

²⁰ Au, nabe yaskabu wamab pasrar. Møikkøben nai wamwan møra, yaskabwan kurene, nuinug kebya, nabe nøba maben, nøbe naba manrrun.

²¹ Maig kuindøgucha truyu pureb ibigwane na wamisra karub wainug naba wanrrai tranamønrrun, maig kuindøgucha na truyu puraarrub arrua, nai Møskaimba nø wainug wamisrøb lataitøwei wamig kønrrai.

²² Kalubaiibe mør Espiritu iglesiameran wamindigwan.—

4

Tiuswan srømbalasreelø truba truba tabig waminchib

¹ Øyeelø chab puraiben, na ashene, kan yaskab srømbalasrø kurig pasraptinchibig køn. Inchen kan wam trompeta wanrrøb lataig srøtø tru na møriibe nan øyah waminchib trenchibig køn:

—Yusrø nebamø cha; iilai wendau purainrrabigwan na ñun kenamartrumøn— cha.

² Inchen tru urastø Espiritu nø nan tøga pasramisren, srømbalasrømbe tru karub wamisra wamig kan pasrig pasrai nabe ashibig kur. Inchen truyube kan mugøsrøn wabig køn.

³ Inchen truyu wabiibe kan jaspesruuba, cornalina sruuba lataig købig køn. Inchen tru nø waim pøtøgatanbe kan køshømbøtø kan esmeralda srug latazhig pasrabig køn.

⁴ Tru wamisra karub waim pøtøgatanbe wamisra karub purrailø katøgan veinticuatro pønrrai ashibig kur. Truiløyube kølli misaamera veinticuatro purrabelø køn, pulözheelø kewar, nømui turyube corona orotøga mariilø petsargue.

⁵ Inchen tru nø wamisra karub wainug truyugurrimbe sre pilabelø køben, wammera køben, palaig trashibelø køben webambubig køn. Katø tru karub waig merrappe lãmparamera nag pilabelø siete pilab pønrrabig køn, truiløbe tru Tiuswei siete espíritumera køn.

⁶ Inchen tru karub waig merrappe kan mar wabig køn, pigriu tørguelarrøzhig lataig.

Tru karub wainug pøtøgatanbe merrabmayba, wendaumayba, pinrrø mendamayba pibgatø øsiguelø pønrrabelø køn, truiløbe merrabmayba, wendaumayba kabmeratø netseelø.

⁷ Inchen tru øsiguig srøsrriibe kan león lataig køben, tru wendauibe kan toro lataig køben, katø tru wendauibe kan møwei malø lataig køben, tru pib kønrrabyuibe kan wasrø pala uñib lataig købig køn.

⁸ Inchen tru pibgatø øsigueløbe møitøgucha kwaldzariimera seisbatø tøgar, truiløbe wambiimay, umbumay kabmeratø netseelø, yem kwaløm øyah tamigwane pinømø, trenchibelø køn:

“Newan tabig, newan tabig, newan tabig

Señor Tius Newan Maramburab Marøbig;

tru købig, mõi ya wabig, tru attrabig” chib.

⁹ Tru managatig øsig wanrrabig, tru karub wainug wabigwan, tru pibgatø øsiguelø maya nuguen tab kønrrun chib, tabig kui asha tab inchib, ungwa, ungwa chibelø køn.

¹⁰ Incha trendaimørig tru kølli misaamera veinticuatroeløbe nui merrab tømønrsrøb sraløptø sraløbelø køn køriibala tabig waminchab tru managatig øsig wabigwan. Incha nømui coronameran tru nø karub wainug merrab trenchib pøtabelø køn:

¹¹ “Señor namui Tius,

ñibe maya nuguen tabigwanba,

tabig kui asha tab indigwanba,

maramburab maramigwanba
 utambuawei utønrrabiibe ñi kòn chib,
 kaguende chiwandøgucha kerrigu ñi marig kuimba,
 Ñi treeg kønrrai isuikkurri treeg mariiø,
 treeg pønrran” chib.

5

Ubisha-unø kilgawan kurøb

¹ Incha tru wamisra karub wainug wabigwei kusrmay taskube kan libro palamay umbumay pørigwan nabe srua wai ashibig kur, truiibe siete selløsta melsra kasraig.

² Inchen kan ángel maramburab maramig tøgag truba mur trenchib payibig kòn:

–Sellømeran kølsrøb, kilgawan kurøb, ¿treegwan martraptiig tabiibe mu kerah?– cha.

³ Inchendø ni srømbalasarø lata, pirau lata, pirø umbu lata tru libron kurtraptiibe mu kawei, katø tru umbu pørigwan maig køtashchab trawashchaptiibe mu kawein købig kòn.

⁴ Inchen nabe truba kishibig kur, kaguende tru libron kurtraptiibe mu kawei, katø tru umbumay pørigwan maig køtashchab trawashchaptiibe mu kawein køben.

⁵ Inchen møikkørørøn tru utuig kan kølli misaabe nane trenchibig kòn:
 –jKishmøta! cha. jAsh! cha. Tru León Judáwei misag sötøyugurriig, tru Davidwei misagurri arrubiibe nun tru ashig kømui inchibelan nømun kerriiguan chi inchaingag kanawa kørrømarøb pureb yaig kòn cha, sellømeran kølsrøb, kilgawan kurøb inchabig.–

⁶ Inchen tru karub wainuube kan ubisha-unø kweetsig købig lataig asønabendø, katøle kurra pasrai ashibig kur, tru pibgatø øsiguelaimba, kølli misaameraimba tøbøtaabe. Tru Ubisha-unøbe siete kigulmeraba, siete kabmeraba tøgag købig kòn. Inchen tru kabmerabe tru Tiuswei siete espíritumera købig kòn, tru pirau ørøba truørø øriiø.

⁷ Inchen nøbe arrua, tru karub wainug wabigwei kusrmay taskugurri libron utabig kòn.

⁸ Inchen nø libron utøbene, tru pibgatø øsigueløba, tru veinticuatro kølli misaamerababe tru Ubisha-unai merrab tømønørøb sraløptinchibelø kòn. Møitøgucha arpa sruartø, katø oro copamera may irrabzhiitø netsig sruar købig kòn. Tru may irrabzhiibe Tiuswei misaamera Tiusba wamindiilø truig købig kòn.

⁹ Katø kan cantaig srøig øyeeg cantabelø kòn trenchib:

“Libron uta, sellømeran kølsrøb inchabiibe
 ñitøwein kòn chib.

Kaguende ñibe kweetsig kua,

ñui anindøga namune Tiusweyasig ñi penig kòn chib,

chi misaamerandøgucha,

chi wam waminchibelandøgucha,

chi misag sötømerandøgucha,

misaamera nørø pønrrabelø

chu pirausreelandøgucha.

¹⁰ Incha ñibe nømune namui Tiusweyasig reymera latawei karub purrabelø kønrraimba,

sacerdotesmera kønrraimba mara purrønmen,

nømbe pirau karumburab karunrrun” chib.

¹¹ Incha katø na ashene, tru karub waim pøtøgatanbe ángelesmera truba nørrø pasrabigwei wamwanba, tru øsiguelai wamwanba, tru kølli misaam-erai wamwanba mørøbig kur. Truiløbe purø nørrø køptø, millones y millones købig køn.

¹² Incha truba truba mur trenchibelø køn:

“Tru Ubisha-unø kweetsig købiibe
 tru maramburab maramigwan køben,
 chiwandøgucha palømø, tøgagúigwan køben,
 muguen nebua kusremgaigwan køben,
 maramburab maramigwan køben,
 tabig kui asha tab indigwan køben,
 tørguegwalmabigwan køben,
 purø tabig wamindigwan køben,
 utambuawei utønrrabiibe ñitøwein køn” cha.

¹³ Incha katø tru srømbalasrø lata, pirau lata, pirø umbu lata, maryu lata tru chigurrimbunø Tius marig øsiguig pønrrabeløbe øyah taig mørøbig kur:

“Tru wamisra karub wainug wabigwanba,
 katø tru Ubisha-unanbabe,
 tru purø tabig wamindiiba,
 tabig kui asha tab indiiba,
 tørbilabiiba, maramburab maramibabe,
 managatig patsømfig nuin kønrrain” chib.

¹⁴ Inchen tru pibgatø øsigueløbe trenchibelø køn: “¡Treg kønrrun!” chib. Inchen tru kølli misaamerabe tømønrsrøb srala, køriibala Tiuswan tabig waminchibelø køn.

6

Tru siete sellosmera

¹ Inchen tru srøsrø sellon Ubisha-unø kølsra, kuren, na ashene, tru pibgatø øsiguelai utuig, møikkøsrøn kan wam palaig trashib lataig truba mur trendaig mørøbig kur:

—¡Amø!— chib.

² Inchen na ashene, kan pulø kaulli pasraptinchibig køn. Inchen trugwan itøgwana wabiibe nuí taskube kan arco sruaig købig køn. Inchen nune petsamig kan corona tranen, nun ashig kømui inchibelan kerriguwan chinchaingaug kanawa kørrømarøb pureb yaig køn, katø kanabig kananrrab.

³ Inchen Ubisha-unø tru pamay kønrrabyu sellon kølsra, kurene, tru øsiguig srøsrøigwei wendaube nane:

—¡Amø!— chibig køn.

⁴ Inchen katøgan kaulli webiptinchibig køn, piguiig. Inchen truyu itøgwana wabigwane pirau muba kuimburaib ambumay, imay tab waramigwan ker-ranrrai nune nu katønrraingaug tregwan martrai tranig køn, kangurri kangurri kwetchai. Katø nune kan truba nu espadagucha tranig køn.

⁵ Inchen Ubisha-unø tru pøn kønrrabyu sellon kølsra, kurene, tru pøn kønrrabyu øsiguiibe trendaig mørøbig kur:

—¡Amø!— cha.

Inchen na ashene, kan yalø kaulli pasraptinchibig køn. Inchen truyu itøgwana wabiibe tasigube palansa sruaig købig køn.

⁶ Inchene tru øsiguelai utube kan wam øyah taig nabe mørøbig kur: “Mawa, mawa marøb megaig anbe tirigu pa libra penam netø køben, katø mawa,

mawa marøb megaig anbe cebada seis libras penam netø kønrrun cha. Inchendø aceitenba, vinonbabe mindishinrrab kømø” cha.

7 Inchen Ubisha-unø tru pib kønrrabyu sellon kølsra, kurene, tru pib kønrrabyu øsiguiibe trendaig mørøbig kur:

—jAmø!— cha.

8 Inchen na ashene, kan pulø øskø kaulli pasraptinchibig køn. Inchen truyu itøgwana wabiibe, “Kwamig” cha wamig køben, tru wendaube, tru kwabelø pønrraig, “Hades” cha wamig, truig arrubig køn. Inchen tru i parwane maramburab marøb kweechib martrai traniilø købig køn espadatøga køben, parøtøga køben, kaig kwanrrømeratøga køben, kau umbu namig animalmeratøga køben pirø muba kuimbura pib millonesyube millonbatø, pib milyube milbatø, kwetchai.

Tratrøgatø kønrrabyu selloba, seis kønrrabyu selloba

9 Inchen Ubisha-unø tru tratrøgatø kønrrabyu sellon kølsra kuren, na ashene, tru Tiuswei wamgurrimba, Tiusweimburaeb eshkaikkurrimba kweetsilai mõsiimerane altar umbu ashibig kur.

10 Inchen truiløbe mur trashib trenchibelø køn: “Señor, Mayeelaim Pala Pasrabig, newan tabig, newan ciertonig, ¿tru pirau warab misaameran maig maramigwan asha marøb, namui ani lusigwan ulø payib indamigwane, chu uraskatig munugunrrab?” cha.

11 Inchen nømune kanun kanun kemig puløzheelø tranabe: “Maya yanatø katøguchi ka israb munuguy chibig køn, ñimui nunelø Cristoiwan ñim lataitøwei marøb melabelan treetøwei kweetsiilø nemisramnegatig.”

12 Inchen Ubisha-unø tru seis kønrrabyu sellon kølsra kuren, na ashene, purø trømbøbig mur pirø kønøben, pørrbe jkatø! yaliig misrøbig køn, kan yalø llensu lataikke. Inchen pølbe kerriguba ani lataig misrøbig køn.

13 Inchen estrellamerabe srømbalarøngurri pirausrø kørabelø køn, kan higuera tusr nui srabe higos niguiizheelan mur isig icha kørørskøb lataitøweingue.

14 Inchen srømbalabe kan kilga kirrøb lataitø pinøben, nørø tunmeraba, katø pi tøbøtag pønrrab pirømeraba truiløbe mayamba nøm pønrrainukkurri nørøsrø malsrailø købig køn.

15 Inchen pirau reymera køben, nørø kusreb møguelø køben, maya suldaumeraim pala ashib karub pønrrabelø køben, puarmera køben, mas nørriig marøbelø køben, karuindiig melabelø køben, karuindiig melømeelø køben, søteeløba pirø trabmerayuba, nørø tunmerayu tru nørø srug utuwanba trubabelø køn.

16 Incha tunmeranba, peñameranba trenchib trashibelø køn:

—jNamuim pala itøgørrørray! cha. Tru karub wainug wamisra wabigwei maløwanba, tru Ubisha-unai purø trømbøbig namig købigwanba ashmønrrab sørørray chib.

17 Kaguende tru purø trømbøbig kørig kømndiig nø namig wam kwaløm puin køn cha. ¿Kan treegube mu kuim pasramisra pasramdiig kønrrab kø?— chibelø køn.

7

Israel misaameran 144.000-wan Tiuswein kui asamdiig kønrrai marcailø

1 Øyeeg chab puraiben, nabe pibgatø ángelesmera pørr kal-labgatømay køben, pørr kebibgatømay køben, kandarøgatømaysrøn køben, imaygatømaysrøn køben, pirau pib palø pønrrai ashibig kur, tru pib

paløyugurri isig ichib webarrubigwan pirau lata, maryu lata, chi tusrmerandøgucha isig ichimønrrai katab.

² Inchen katøgan ángel, pørr kal-labgatøsrøngurri nebarri ashibig kur. Truibe Øsig Wab Tiuswei marcan sruaig tru pigbatø ángelesmera pirowanba, marwanba mindishinrrab maramburab maramigwan utabelan mur trashib trenchibig køn:

³ —Pirøwan lata, marwan lata, tusrmeran lata mindishimøtay cha, namui Tius tru marøb melabelan nuielø kui asamdiig kønrrai nømui kappalømerayu chab marcamnegatig.—

⁴ Inchen tru marcaillø mam køn chitamørtrab na mørene, 144.000 mil køn, chibig køn, tru doce nusrkalø Israelweinukkurri nørrø karrab misaamera,

⁵ Judáweinukkurri karrab misaamera 12.000 køben,

Rubénweinukkurri karrab misaamera 12.000 køben,

Gadweinukkurri karrab misaamera 12.000 køben,

⁶ Aserweinukkurri karrab misaamera 12.000 køben,

Neftaliweinukkurri karrab misaamera 12.000 køben,

Manasésweinukkurri karrab misaamera 12.000 køben,

⁷ Simeónweinukkurri karrab misaamera 12.000 køben,

Leviweinukkurri karrab misaamera 12.000 køben,

Isacarweinukkurri karrab misaamera 12.000 køben,

⁸ Zabulónweinukkurri karrab misaamera 12.000 køben,

Joséweinukkurri karrab misaamera 12.000 køben,

Benjaminweinukkurri karrab misaamera 12.000 køn taig mørøbig kur.

Truba truba nu misag sətø puliig kewar

⁹ Øyeeg chab purailben, na ashene, mømibe tru wamisra karub waigwei merrappa, tru Ubisha-unai merrappabe misag purø nu, muguen mundzangaig pønrrabelø køn, misaamera nørrø pønrrabig chu pirausreelø køben, nørrø kanbalatø warabelø chi misaamera køben, peg peg misag sətømera køben, peg peg wam waminchib misaamera købengue. Truiløbe puløzheelø kewar, tasigube palma ishiimera sruar,

¹⁰ mayeeløba trenchib mur trashibelø køn:

“Kaigyugurri wesraibe namui Tius,
tru wamisra karub wainug wabigweinkurrimba,
tru Ubisha-unainukkurrimba arrubig køn” chib.

¹¹ Inchen maya ángesmerabe tru karub wainuuba, kølli misaameraimba, tru pigbatø øsiguelaimba, truilaim pøtøgatan pønrrøwa, tru karub waigwei merrab piraugatig tømønørøb srala, Tiuswan køriibala tabig waminchib,

¹² trenchibelø køn:

“¡Treeg kønrrun! cha.
Purø tabig wamindiiba,
tørguegwalmabiiba,
muguen nebua kusremgaiba,
maya nuguen ungwa, ungwa taiba,
tabig kui asha tab indiiba,
maramburab mariiba,
mugucha chindamgaiba,

iiløbe managatig namui Tiuswein kønrrain chibelø køn.

Treeg kønrrun.”

¹³ Inchene møikkøsrøn kan kølli misag nan payibig køn:

—¿I puløzhig kewarbe mumera køh? cha. ¿Chugurri amrruh?— cha.

¹⁴ Inchene nabe:

–Nai Señor, ñibe asha pasrainrrabguen— chibene, nøbe nan trenchibig køn:
 –Iiløbe tru purø trømbøig isumdiigugurri purørruwar køn cha. Nømbe
 nømui keilan tsarar, Ubisha-unai anindøga puløzhig marar køn cha.

¹⁵ Treekkurri nømbe Tius tru wamisra karub wainug merrab pønrran cha.
 Yem, kwaløm nui tab yau nuyasig marøb pønrran cha.

Inchen tru karub wainug wabiibe,
 nømuim pala nø sətø pasraitøga
 nømun chinchimønrrai ashchun cha.

¹⁶ Yandø nømbe parøgwai mørmøwei,
 pimulgwai mørmøwei, pørr pati mørmøwei,
 kabe katøgan pekkurri pachig kui mørmøwei inchen cha.

¹⁷ Kaguende tru wamisra karub wain tøbøtag Ubisha-unø pasrabiibe
 nømune kan ubishameran lataig ashib pera pasrøwa,
 tru øsig kømigwan tranøb pigabmerasrømay pera inrrun cha.

Inchen Tiusbe nømui kabmerayu kappiwan pinømørtrun – cha,
 trenchibig køn.

8

Tru siete kønrrabyu sello

¹ Ubisha-unø tru siete kønrrabyu sellon kølsra kurene, srømbalasarømbe kan
 media ura wasrønzhig kørrømisrøbig køn.

² Inchene ángelesmera sieteeø Tiuswei merrab pønrrai ashibig kur. Inchen
 nømune siete trompetas tranøbig køn.

³ Inchen katøgan ángel arruabe, tru altar keta pasramisrøbig køn, truipe
 may irrabzheelø pusamig, orotøga marigwan mutaig. Inchen nune may
 irrabzheelø truba nu tranøbig køn, tru mayeelø Tiuswei misaamera Tiusba
 wamindiilan tru may irrabzhiibamara, tru wamisra karub waigwei merrab
 tru altar orotøga marig pasrabiibala tranrrai.

⁴ Inchen tru may irrabig patig naguishba, Tiuswei misaamera tru nøba
 wamindiiløbabe Tiuswei merrab nebibig køn tru ángelwei tasigugurri.

⁵ Inchen tru ángelbe tru may irrabzhig pusrigwan muta, tru altaryugurri
 trøsr naarøsrwan netsøgana, pirausrø pinøguchene, palaig trasamba, chi
 wanrringuen møramgaig wanrramba, sre pilamba, pirø kønamba inchibig
 køn.

Trompetamera siete

⁶ Inchen tru ángelesmera sieteeø tru siete trompetameran sruarbe
 urøønrrab yandø tamara pønrramisrøbelø køn.

⁷ Inchen tru srøsrø ángel nui trompetan urrøbene, sre srug naaba, animba
 lindsaig arruben, pirau trunun kørrøbetig købig køn. Inchen truørø pirøbe
 muba kuimburab tøbøtag lutau pachen, katø tusrmera treetøwei pirø muba
 kuimburab tøbøtag lutau pachen, katø mayam pumera pillizheelø chigucha
 chishtø pachibig køn.

⁸ Inchen tru ángel pagatø kønrrabyuig nui trompetan urrøbene, kan purø
 nu tun ørøba naarab lataigwan maryu keguchene, marbe tøbøtag lutau ani
 misren,

⁹ truyu øsig purrabeløbe tøbøtag lutau chab kwaben, katø tru maryu
 barcomera maya købiibe tøbøtag lutau chab pinabig køn.

¹⁰ Inchen tru ángel pøn kønrrabyuig nui trompetan urrøbene, kan truba nu
 estrella srømbalasarøngurri nu nag tulu lataig naarab peñippe, pimera kuimørig

nørrø pimeran køben, katø kølømo pi kal-labzheelan køben, mayamba pøngatøyu partø, partø ka kørømisren, kane itøbenig kørømisrøbig køn.

¹¹ Tru estrellabe Ajenjo munchi købig køn. Inchen pimeru tru pønyu kanun itøbenimburappe, larrø trømbø møbgølig misren, misaamerabe tru møb pimeragurri truba truba nørrø kwabelø køn.

¹² Inchen tru ángel pib kønrrabyuig nui trompetan urrøbene, nøsig lata, katø pøl lata tøbøtag lutau mindisailø kørømisren, katø estrellamera chigucha maya købig tøbøtag lutau mindisaig pilømeelø kørømisrøbig køn, yem lata, kwaløm lata pib urabatø purø løstiig kønrrai.

¹³ Inchen na møimbe ashene, kan wasrø srømbalawan llirab arri mørøbig kur, mur trashib, øyah chib: “¡Ay karrengucha kuita! ¡Ay karrengucha kuita! ¡Ay karrengucha kuita! ¡Pirau warab misag waachameran maig kønrrer! chib, tru katøgan pøngatø ángelesmera trompetan urrøbene.”

9

Tru trattrøgatø kønrrabyu trompeta

¹ Inchen tru ángel trattrøgatø kønrrabyuig nui trompetan urrøbene, kan estrella srømbalarøngurri pirausrø peni ashibig kur. Inchen tru estrellane tru purø trømbø umbu trabyu llaviwan tranig køn.

² Tru purø trømbø umbu trabwan kurene, truyugurrimbe naguish kan nu hornoyugurri lataig nebarrubig køn. Inchen nøsiiba, pala srønzhiig chishchig pasrabiibabe tru trabyu naguishkurri løstørabig køn.

³ Inchen tru naguishyugurrimbe chapullmera piraumay werruben, truilane pirau alacránmera lataitøwei mu chindamgaig martrai tranig køn.

⁴ Incha truilane pirau puwan lata, kauwan lata, chi tusrwandøgucha mindishimønrrain karuig køn, tru Tiuswei sellon kappaløyu chiga misaam-erandø mindishinraingue.

⁵ Inchendø kweechippe, kweechimøtø, trattrø pøl ørøba purø trømbøig pusrkwaig melønrrain købig køn. Inchen tru pusrkwabiibe misagwan kan alacrán kwanen pusrkwabig lataig købig køn.

⁶ Inchen tru kwalømmerawane misaamerabe kwamigwane labendø, chinchagucha kwanrrab kaimanrrun. Kwag kuimbe inchendø, kwamibe nømuinukkurrimbe tarømisrtrun.

⁷ Tru chapullmerabe kaullimera guerrayu kwayamig tamarilø lataig asønabelø købig køn. Nømui turyube orotøga marig latailø corona petsar købig køn. Inchen nømui maløbe kan misag malø latailøgue.

⁸ Inchen nømui pusruube ishuwei lataig køben, nømui trugulmerabe kan leónwein trugul lataig tøgar købig køn.

⁹ Nømui asrwan merramray chinchimønrrai katabig kan tsandzøn lataig tøgar, katø nømui kwaldzarig ichen wanrrøbiibe, kan guerrayu kwayanrrab carretillameran kaulli sötø srua lulen wanrrab lataig trømbøig wanrrabig køn.

¹⁰ Inchen tru mørømerabe kan alacránwei lataig køben, katø kalmera kwanøbig tøgar købig køn. Inchen nømui mørømerayube misaameran trattrø pøl ørøba maramburab marøb mindisamig tøgar købig køn.

¹¹ Inchen nømun ashib karub pera pasrabiibe, tru purø trømbø umbu trabyu ángel købig køn, hebreomaybe Abadon munchi køben, griegomaybe Apoliön munchi.

¹² Tru i trømbøig kørig kømndiig srøsrriibe chab puraiben, katøgucha trømbøig kørig kømndiig attrabig par palabig køn.

Seis kørnrrabyu trompeta

¹³ Inchen tru ángel seis kørnrrabyuig nui trompetan urrabig køn. Inchen Tiuswei merrab pasrabig orotøga mari altaryu, tru pibgatø kigulmerayugur-rimbe kan wam webarri mørøbig kur,

¹⁴ tru seis kørnrrabyuig trompeta srua ángelwane trenchib:

—Tru pibgatø ángelesmera Eufrates nu pi menda lusrig pønrrabelan lelachi—cha.

¹⁵ Inchen tru pibgatø ángelesmeran ke yandø treeg punweimba, tru kwalømweimba, tru pølweimba, tru pilaweimba treeg martrai tamariilø pønrrabelan pirau muba kuimburab maya misag pasrabigwan tres milyu milbatø kwetchai, tru ángelesmerane elatsiilø købelø køn.

¹⁶ Inchen tru suldaumera kaulli palartø doscientos millones køn taig mørøbig kur.

¹⁷ Pøs øyamay nan piab lataigu øyeeg kenamisren kaullimeran øyeeg ashar: tru itøgwanarbe nømui asrwan merrammay chinchimønrrai katabiibe, nag lata piguig køben, pillizhig køben, øskøig azufre lataig køben tøggar købig køn. Tru kaullimerai turmerabe leónmerain tur latailø køben, nømui trigugur-rimbe naaba, naguishba, azufreba webarrubig køn.

¹⁸ Inchen pirau muba kuimburab misaamera pøn millonyube millonbatø kwaben, pøn milyube milbatø kwabig køn, tru i pøngatø trømbøig naaba, naguishba, azufreba kaullimerai trigugurri webarruben.

¹⁹ Pøs tru kaullimera mu chindamgaig maramig tøgagúibe nømui triguba, mørryuba pasrabig køn. Kaguende nømui mørrmerabe ulmera latailø turmera tøggar købig køn, truiløtøga misaameran mindishibelø.

²⁰ Inchen misaamera tru i øyeeg trømbøig chab puraiben, kwamø kørørmisrøbeløbe øyeeg puraibenguen nømui taska mariilan treeg marmønrrab isua mørøb elachimeelø køn, tru kwaimandziimeran kørribala tabig wamindamigwan lata, nømui taska mari tiusmeran lata, tru nøm orotøga mariilan lata, tsandzøn andøga mariilan lata, broncetøga mariilan lata, sruutøga mariilan lata, tsiitøga mariilan lata, truilan elachig kømub, truiløbe ashmøwei, mørmøwei, ammøwei inchibelan.

²¹ Katø kweetsamigwan lata, misag wanna trømbø maramelan lata, møgueløba, ishumburmeraba trømbøig maramigwan lata, nilamigwan lata treeg marmønrrab isua møra, Tiusweimay llirameelø køn.

10

Angel kan libro-unan sruaig

¹ Inchen katøgan ángel maramburab marøbig srømbalarøngurri kørraarrubig køn. Truibe wañindøga pinøgasraig, tur palabe kan køshømbøtø tøggaig, nui maløbe kan nøsig lataig pilabig køben, nui srøbmerabe ølneb kan nag pilabig lataig købig køn.

² Taskube kan libro-unan kura sruaig pasrabig køn. Incha kusrmay srøbwane mar pala punappe, atsimay srøbwane pirau puna pasramisrøbig køn.

³ Inchabe truba mur trashibig køn, kan león trashib lataikke. Inchen tru trashibene, siete palaig trashibeløbe tru trasaigwan treetøweih trashib løtabelø køn.

⁴ Inchen tru siete palaig trashibelø chab waminchen, nabe pørtrab inchene, srømbalasnøngurri nane kan wam treeg mørø waminchibig køn:

—Tru siete palaig trashibelø wamindigwane pørmøtø, ñuinetø esegau—cha.

⁵ Inchen tru ángel mar palaba, pirø palaba na pasrai asiibe kusrmay tasigwan srømbalaneb kusrawabe, trenchibig køn:

⁶ “Srømbalawan lata, truyu pønrrabelan lata, pirøwan lata, tru pirau pønrrabelan lata, marwan lata, truyu chine purrabelan lata marøbig, tru managatig øsig wabikken ashen, truigwei merrab trendamønrrun cha: Yandø mas srarrønrraamøn cha.

⁷ Pøs tru ángel siete kønrrabyuig trompetan urram kwalømmera puben, urrab pølbasrene, Tiuswei chigøben maramig søriilø pønrrabeløbe yandø marig kørromistrun cha, tru nui marøb melabelø tru nø maig karuigwan eshkabelø maig eshkaig, treeg.”

⁸ Tru srømbalasnø wam na møriibe nan katøyug waminchib trenchibig køn: —Inrrø cha. Incha tru ángel mar palaba, pirø palaba puna pasrabig tasku libro-unø kura srua pasraigwan utø— cha.

⁹ Inchen nabe ángelweimay ya, tru libro-unan tranrra chibene:

—¡Cha! chibig køn. Inchabe, ¡Ma! chibig køn. Ñui trigube kuizhig miel lataig kua, ñui patsaube møbig misrtrun— cha.

¹⁰ Inchen nabe tru libro-unan ángelwan uta, mabene, nai trigube kan miel lataig kuizhig købendø, na chab mabene, nai patsaube larrø møbgølig misrøbig køn.

¹¹ Inchabe nane trenchibelø køn:

—Ñibe misaamera nørro kanbalatø warabelanba, misag nørro pønrrabelanba, peg peg wam waminchib misaameranba, reymeranba Tius maig eshkanrrai karuigwan treeg kønrrun chib katøyug eshkamig nebunrrun— cha.

11

Tiusweimburab maig kuigwan eshkabelø pailø

¹ Incha nane kan caña, unaasin tsig lataig tranabe, trenchibig køn:

—Kurra, Tiuswei yawanba, tru altarwanba unaasha, katø truyu Tiuswan køriibala tabig waminchibelan munchi cha.

² Inchendø Tiuswei yau, tru yawambigwane unashmøta cha. Kaguende judíos kømø misaamera Tiuswan ashmeelan tranig pasran cha. Truiløbe tru Tiusweindø tarø mari ciudadwane pøn pila y tøbø pilaba itølulrrab køn cha.

³ Inchen nabe pailø naimburab maig kuigwan waminchibelan øramønrrun cha, eshkanrrab amrrai. Truiløbe yaliig trøsrkøleelø kewar kwalømmera mil doscientos sesenta nemisramne naimburab eshka waminchun— cha.

⁴ I tru pailø naimburab maig kuigwan waminchibeløbe, tru pagatø olivo tusrmera køb, tru pagatø kandilerumera køb køn, Tius pirøwan nø ashib karub pasrabigwei merrab pønrrabelø.

⁵ Møikkøben chigøben nømun kaig martrab inchene, nømui trigugurrimbe nag webarringarua, nømun kerrigu chishtø parrøbelø køn. Møikkøben nømun mindishinrrab inchibeløbe øyeeg kwamig nebunrrun.

⁶ Tru Tiusweimburabigwan eshkabeløbe srømbalawan kasramig maramburab martrabelø køn, nøm Tiusweimburabigwan eshka amøñib kwalømmerawan sre pumønrrai. Katø treetøwei pimerangucha anim pimera misrtrai marøg købene, anim pimera martrabelø køn. Katø pirøwangucha

kaig nebunrrai, kaig kwanrrømera køben, kaig pølømmera mindishinrrabelø ørtrun, nømun mammay mindishig køben mindishinrrai.

⁷Yandø tru Tiusweimburabigwan maig kuigwan nøm chab eshkabene, tru purø trømbø umbu trabygurri animal purø trømbøgølig nebarrua nømbe kwayam lawa, nø kanawa, truilane kwetchun.

⁸Inchen kwailai asrmerabe ciudayu mayeelø llirai mayu waramistrun tru nømui Señorwan kurusyu mesraig nu ciudayu, truike Sodomaba, Egiptoba lataig asønabig køn cha waminug.

⁹Inchen misag nørrø kanbalatø warabeløba, peg peg misag sötømeraba, peg peg wam waminchibeløba, chu pirausreelø køben misag nørrø pønrrabeløba, truiløbe pøn kwaløm menrra tru kwailai asrmerane ashib kønrrun. Incha truilai asrmerane sörinrrabmerayu sørøbashmønrrun.

¹⁰Inchen misaamera pirau warabeløbe tru kwaig warabelaimburab truba truba kasraarawa, kasrag købiitø kangurri ketiilø ørtrun, kaguende tru pailø Tius maig karuigwan eshkabeløbe tru nømunemumaygucha kømīg ikatø! isua møra melønrrai marøbelø kuikkurri.

¹¹Indiibe pøn kwaløm menrrayube øsig kømīg Tiusweinukkurri arrubig nømuinug kebiben øsiiranrrai Tius nømun urrøben, katø kurra, pønrramisrøptinchen, mayeelø ashibelane purø trømbøig kørig købig arrubig køn.

¹²Inchene tru pailøbe srømbalårøngurri kan wam truba mur wamindi mørøbelø køn, trenchibig: “Yusrø nerruy” cha. Inchen nømun ashig kømui inchibeløbe ashibelø køn, nømbe kan wañiyu srømbalårømay nebamben.

¹³Inchen treeg puraibendø, kan truba mur pirø kønabig arruben, tru pirø kønabikkurri ciudayu yamerabe milmørig cienbatø kegørrabig køn. Inchen treegu misaamera siete mil kwabelø køn. Inchen kwamø kørømisrøbeløbe truba trømbøig kørig kuilø, Tius srømbalårø wabigwan truba truba tabig waminchibelø køn.

¹⁴Srøsiigwei wendauig trømbøig chab puraibendø, tru kørig kømdiig pøn kønrrabyuibe petø attrun.

Tru siete kønrrabyu trompeta

¹⁵Inchen tru ángel siete kønrrabyuig nui trompetan urrøbene, srømbalårømbe wammera purø mur trenchibelø køn:

“Pirau reymera nøm ashib karub tøgagüiløbe namui Señorweimba, nui Cristoimba misran cha.

Inchen nøbe managatig ashib karub wanrrun” cha.

¹⁶Inchen tru kølli misaamera veinticuatroelø tru nøm karub purrainug Tiuswei merrab purrabeløbe pirau tømønørøb srala, Tiuswan køriibala tabig waminchib,

¹⁷trenchibelø køn:

“Mayanguen ungwa, ungwa,

Señor Tius Newan Maramburab Marøbig,

møi ya pasrabig, katø manawei købig.

Kaguende ñui purø nuig maramburab mariitøga

ñibe ashib karub pølbasaran cha.

¹⁸Misaamera nørrø pønrrabeløbe truba truba namig kurrig køn cha.

Inchendø ñui purø trømbøig namig købig pub,

katø tru kwabelan maig kønrrabigwan asha maramikkucha yandø pub indin køn cha.

Inchen ñui marøb melabelø

tru ñi maig karuigwan eshkabelanba,

katø tru ñui misaameranba,
 ñui munchiwan kaig kui lataig maramigwan koriguelanba,
 norrø kusrebelanba, treeg komeelanba,
 truilan truburø ketamikkucha puin køn cha.

Trugurri pirøwan mindishib pinishibelangucha pinisamig puin køn”
 cha, trenchibelø køn.

¹⁹Inchen Tiuswei ya tru srømbalarø pasrabig kurene, tru israelitasmeraba Tius acuerdo marig, tru arcabe, truyu kena pasrabig køn. Inchen palaig pilabelø køben, wammera køben, palaig trashibelø køben, katø kan truba mur pirø kønabig køben, purø trømbøig sre srug pubig køben arrubig køn.

12

Ishuuba, dragonba

¹Inchene srømbalarømbe kan truba nuig chigøben kønrrab kuitamab asha kømig kenamisrøbig køn. Kan ishug nui asrwan pøsrøga pinøbuli lataig, srøb umbube pølwan tøgag, turyu corona estrellamera doce tøgag petsaig købig køn.

²Tru ishube kwanrriig kua, yandø unø tammisrtrab trømbøig pusrkwai inchib, truba trashibig køn.

³Inchene srømbalarømbe katøgan chigøben kønrrab kuitamab asha kømig kenamisrøbig køn. Kan dragon piguig purø nuig, turmerabe siete tøgag, katø kigulmera diez tøgag, turmørig tabzheelø petsartø købig køn.

⁴Incha srømbalarø estrellamerane kanbalø ørøba nui mørrtøga srua, tøbøtag lutau pirau pinøbetabig køn. Incha tru dragonbe tru unø tammisrtrab ishuweim pinrrøgue pasramisrøbig køn, tammisren latatø unan manrrab.

⁵Inchen tru ishube kan møg-unø tammisren, truike misag norrø pønrrabelan chuelandøgucha ashib karuppe, kan tsandzøn pørøtsigwan srua pasramisra mu kurraasamgaig karub martrabig købig køn. Inchendø nui nusrkawane kerrappa, Tiusweimayba, nø wamisra karub wainuumayba nune srua yaig køn.

⁶Inchen ishube mu misag warab waraimøsrømay luløbig køn, tru ishug tsumig Tius tamara pasriisrømay, kwalømmera mil doscientos sesenta nemisramne trusrø mannøb tøgagønrrai.

⁷Inchen trugurrimbe srømbalarømbe Miguel nui ángelesmeraba purø trømbøig kwayabelø køn tru dragonba. Inchen dragonbe nui kaig ángelesmeraba kwayabendø,

⁸chinchaguen kanab kwayanrrab kaimaben, yandø trugurri srømbalarømbe nømuimbe yandø chu pønrramikkaig patsabig køn.

⁹Inchen tru purø nu dragon, tru merrabsrø ulwane pinøgutsig køn, truigwane nugwaimandzig cha wamamba, Satanás cha wamamba indigwan, tru pirau maya misagwan kegørrøsrkøbigwan. Truigwane nui kaig ángelesmeranbañau pirau pinøbusrig køn.

¹⁰Inchen nabe srømbalarø kan wam truba mur trendaig mørøbig kur:

“Møimbe yandø kaigygurri wesraiba,

katø maramburab maramiba,

namui Tius nø ashib karub wamiba,

katø nui Cristo mu mandamgaig karub marøb wamiba puin køn cha.

Kaguende Satanás Tiuswei merrab yem, kwaløm

namui nunelan ‘yeeg kailø køn’ chib,

‘øyeeg marøbelø køn’ chib pasrabigwane pinøgutsin køn cha.

11 Namui nuneløbe tru Ubisha-unai aningurrimba,
nøm Tiuswei wamwan wamindikkurrimba
kanawa pønrramisran cha.

Kwamig nebubene, kwanrraptø pønrraig køn cha,
nømbe øsig kømigwangøba isumøtø.

12 Inchawei treekkurri, srømbalameraba,
katø kerrigu truyu pønrrabelø
chigucha truba kasraaray cha.

Inchendø jnusiamus, pirau chi øsig købelø lata,
marmerayu lata øsigueløbe chincer! cha.

Kaguende nugwaimandzig ñimui may
ke ne namig kuin kørrayan cha,

nui llirab unamibe yana unamig kømønrrab kuimba.”

13 Inchen dragon nune pirausrø pinøgutsi mørabe, tru ishug møg-unø
tøgagøbigwane pasraarøb mendøben,

14 tru ishuwane purø nu wasrøwei pagatø kwaldzariimeran tranig køn,
ulweim pulugurri purø yabsrø nø tsumsrømay pala kurra inrrai tru mu
misag warab waraimøsrømay. Tru pøn pila y tøbø pilaba nun mannøb
tøgagømsrømay.

15 Inchen ulbe ishuwan pasraarøb ya, nui triimay pi weguchibig køn, kan
nu piiburabig, tru ishuwan pi srua yaig kønrrai.

16 Inchendø pirøbe tru dragon trigugurri nu pi wegutsigwane anchippa
kerrigu piñiptinchibig køn, tru ishuwan purugunrrab.

17-18 Treenchene, dragonbe ishuwan purø trømbøig namaptø, tru
ishuweinukkurri katøburø amrrub misaameraba kwayam lanrrab ibig
køn, Tius tru maig maramigwan martrai karuigwan møra marøbelø,
Jesucristoimburabigwan tabigwan elachimø marøb tøgø pønrrabig
pønrrabeløba. Incha tru dragonbe tru mar menda pisrumyu pasramisrøbig
køn.

13

Pagatø animal trømbøgøleelø

1 Inchen maryugurrimbe kan animal purø trømbøgølig webarrubig køn,
turmera siete, kigulmera diez tøgøig, kigulmørig purø tabzhig petsargue.
Inchen turmørig munchi pøriibe Tiuswan purø trømbøig wamabig pørig tøgø
købig køn.

2 Inchen tru trømbøgøligwan na asiibe kan tiiri lataig købig køn, srøbmerabe
wig srøb lataig køben, nui triibe leónwein trig lataikke. Trunun tru drag-
onbe nui maramburab maramigwanba, nø wamisra karub waigwanba,
mu mandamgaig mayangatikkucha karug køben karub martrai tru animal
trømbøgøligwan tranøbig køn.

3 Inchen tru trømbøgøligwei turmerabe, mø tur køsrønbe purø trømbøig
kørrindig kwanrraptiig lataig købendø, tru treeg kørrindiibe tammisrin køben,
mayeelø yu piraueløbe truba kwaara ashib, tru wendautø ambubelø køn.

4 Incha misaamerabe tru dragonwan køriibala tabig waminchibelø køn,
kaguende dragonbe tru trømbøgøligwan nui karumburab karumigwan mar-
trai tranikkurri. Katø tru trømbøgøligwangucha treetøwei køriibala tabig
waminchib trenchibelø køn:

—¿Kan i trømbøgølig lataibe katøgane mu kuin kønrrab kø? chib. ¿Kan nøbabe
mu kuin kwayam lanrrautah?— chib.

⁵ Incha tru animal trømbøgøligwane katø kan trig tranig køn purab nuig misrøb wamindamba, purø trømbøig wamamba inchai, katø pøn pila y tøbø pilaba mu mandamgaig martraimba.

⁶ Inchen tru animal trømbøgøliibe nui trigwan kurøbig køn, Tiuswan purø trømbøig waminchab. Incha Tiuswei munchiwanba, nø pasraigwanba, srømbalasø purrabelanba purø trømbøig wamabig køn.

⁷ Incha tru Tiuswei misaameraba kwayabasha, nø ka kanabasig køn. Incha chi misag sötømeran køben, kanbalatø warabelø chi misaameran køben, peg peg wam waminchib misaameran køben, nørø misag pønrrabig chu pirausreelan køben, truilaim pala mu manchinrraingaig karumigwan tøgagønrraingucha tranig køn.

⁸ Tru animal trømbøgøligwane tru maya misag pirau warabeløbe køriibala tabig waminchibelø køn, tru chiwangurrimbunø marøb urassrøwei Ubisha-unø kweetsig kønrrabigwei libroyu tru managatig øsig purrønrrabelan pørigu nømui munchimeran truyu chigarbe.

⁹ Møikkøben kalubaibe mør.

¹⁰ Merrarrawa srua ambinanrrabelane,
merrarrawa srua amben,
espatatøga kweetsinanrrabelane,
espatatøga kwetchun.

Øyeelø pubene, tru Tiuswei misaamerabe chi arringucha ka melaptø melamiguba, katø isubigwan Jesucristoinuutø pasra tøga pønramiguba masken treegutø melabig melamitøwein kønrrun.

Tru animal purø trømbøgølig

¹¹ Inchen katøgan animal trømbøgølig piraugurri nebarri ashar. Truibe pagatø kigulmera ubisha-unai lataig asønabig tøgag købendø, waminchippe, dragon lataig waminchibig køn.

¹² Truibe tru animal trømbøgølig srøsriigwei mu manchinrraingaig marøb karuigwan nø tøga pasramisra, nui merrab treetøweih marøb karubig køn. Incha pirøwanba, pirau warab misaameranbabe tru animal trømbøgølig srøtiig tru purø trømbøig kørriindig tøgag købig, chi øsig kønrrabgaig kua, tammsraigwan køriibala tabig waminchai inchibig køn.

¹³ Incha katø nøgucha misaamera nui maramburab marigwan asha kønrrai chigøben truba nørreelø marøbig køn, misaamera ashen srømbalasrøngurringuen piraumay nag kørraarringarub.

¹⁴ Tru treeg asha kømig tru animal trømbøgølig srøsriigwei merrab marbasikkurri, nøbe pirau warabelan peløsrka chab kegørrøsrkøbig køn. Incha tru trømbøgølig srøsriibe tru espatatøga truba kørrø kørriindig købendø, kwamø, øsig købigwan tab inchab, trunun asha, treetøwei mara pasrtrai pirau misaameran karubig køn.

¹⁵ Incha tru trømbøgølig srøtiigwan treetøwei mara pasrigwane øsig kømigwan nøbe tranøbig køn, tru mara pasriibe waminchibig misra, nun køriibala tabig waminchimeelane mayeelan kwanrrai martrai.

¹⁶ Incha trutø kømøtø, nørø kusreb møguelan køben, treeg komeelan køben, puarmeran køben, waachameran køben, karuindiig melabelan køben, karuindiig melømeelan køben mayeelanba kusrmay tasigu kui, kappaløyu kui marcangarubig køn,

¹⁷ tru trømbøgøligwei munchin kui, numeron kui marcaig chigaibe mugucha yanmøwei, penømøwei inchai.

¹⁸ Yubesi chigúi ashchappe, purø nu isumig pasran. Tab chigúi mørøbiibe, tru trømbøgøligwei numeron maya trandashchab ash. Kaguende kan møwei numero køn. Tru numerobe 666 køn.

14

144.000-elø cantaig

¹ Inchen na ashene, Ubisha-unøbe Sion taig Tun pala pasrai ashibig kur. Inchen 144.000 tru nøba pønrrabeløbe Ubisha-unai munchiwanba, Møskawei munchiwanba nømui kappaløyu pørig tøgar pønrrabelø køn.

² Inchen srømbalærøngurrimbe kan wanrrøbig mørøbig kur, kan truba truba nu pi wanrrøb lataig, kabe kan palaig mur trashib mullib lataig, truba yamelø arpas kønabelø kønøben wanrrøb lataig wanrrøbig køn, truiibe.

³ Incha tru wamisra karub waigwei merrappa, tru pibgatø øsiguelai merrappa, kølli misaamerai merrappa tru 144.000-eløbe kerrigu srøig mana møriimøzhig cantabelø køn. Tru cantaigwane mugucha cantam kusrenrrab kaimabøn, pirau tru misaamerai utugurri 144.000 tru Tiuswein kønrrai wesruiløtøwei cantabelø køn, trunune.

⁴ Iiløbe ishumburmeraba trømbøig marmøwar, nømui asrwan trømbøig marøb mun katørameelø, chishelø køn. Iiløbe Ubisha-unø chu iben, chu uragucha elachimø, mendig amøfiibelø køn. Iiløbe maya misagwei utugurri nømune nuin kønrrai wesruilø køn, Tiusweyasiiba, Ubisha-unayasiiba nømunnerrig pølbasa traniiilø.

⁵ Nømui trigube chigucha isa wamindiibe chigar købig køn, mu mandamgaig chishelø.

Pøngatø ánglesmera eshka wamindiilø

⁶ Inchen katøgan ángel srømbalawan pala arri ashibig kur, Tiuswei tabig srø wam mana patsømigwan pirau warabelan eshkanrrab: chu pirausrøn køben misag nørø pønrrabelanba, chi misag sötømera køben warabelanba, peg peg waminchib misaameranba, kanbalatø warabelø chi misaameran køben truilanba.

⁷ Inchabe truba mur waminchib øyah chibig køn: “Tiuswane køriibala marøb, truba truba tabig wamindamig køn chib. Kaguende tru maig kønrrabigwan asha maramig yandø pun chib. Srømbalawanba, pirøwanba, marwanba, kølømø pimeranba marøbigwane køriibala tabig waminday” chib.

⁸ Inchen katøgan ángel tru wendau øyah chib, ibig køn: “¡Babilonia truba truba nuibe yandø penan, yandø penan! chib, truøø tru misag nørø pønrrabelan kerriguba nui trømbøig marøg købiitø keerøba chinchimmøø indi vinon mutsamne incha, mutsiiranøbig.”

⁹ Inchen tru wendau katøgan ángel tru pøn kønrrabyuibe truba mur øyah trenchib ibig køn: “Møikkøben tru trømbøgøligwanba, tru nø maig kuig treetøwei asha marigwanba køriibala tabig waminchib, katø nui marcan kappaløyu kui, tasku kui utab inchibiibe

¹⁰ nøgucha tru mumaygucha kømui møra melønrrai mari vinon Tiusweinukkurri arrubigwan mutchun cha, Tiuswei namig købigwan truigwandø tamara copayu usrigwan. Katø Tiusweindø tarømari ánglesmerai merrappa, Ubisha-unai merrappa naaba, azufrebaigu numaygucha kømui purø trømbøig kui meganrrun.

¹¹ Tru purø trømbøig kui melønrrai marøb naguishbe managatig nebarub pasrøben, nømuiibe yem kwaløm pishindø tab purramibe managuen kaagøn, tru trømbøgøligwanba, katø nundøwei asha treezhigwei marigwanba

køriibala tabig waminchibelaimba, katø tru nui munchitøga marcarrama-belaimba.”

¹² Incha øyeekkurriwei melabig melamig palan, tru Tiuswei misaamera Tius tru maig maramigwan martrai karuigwan møra marøb, Jesúswan tarømismø trag pulu melabelaimbe.

¹³ Inchen nabe srømbalårøngurri kan wam trendaig mørøbig kur:

—Iigwan pør cha: “Møingurrimbunøbe mayanguen tab kuilø køn cha, Señorwan kørewa kwabelaimbe.”—

“Øø, treegwein køn tan, Espiritu Santobe. Nømbe nømui muraara, muraara marøb melailøygurri isrønrrun. Kaguende nømui mariiløbe nømba lincha pasrabig pasrønrrun” cha.

Pirau ellmariilan tulishib

¹⁴ Inchen, na ashene, kan pulø wañi kenamisren, tru wañim palabe Møg Misra Arrubig lataig wamisra wabig køn, turyube orotøga marig kan corona petsaig, tasigube kan uses purø trøsrig sruaig.

¹⁵ Inchen katøgan ángel Tiuswei yaugurri webarrua, truba mur trashib, tru wañim pala wabigwane trenchibig køn: “Ñui usestøga parøb tulishi cha. Kaguende piraube paramig yandø srønø køben, parøb tulisamig nebun” cha.

¹⁶ Trenchibene, tru wañim pala wabiibe pirau ellmarigu nui usestøga parøb puraibene, tru pirau ellmariibe tulisaiig kørrømisrøbig køn.

¹⁷ Inchen katøgan ángel srømbalårø Tiuswei yaugurri webarruppe, trukucha kan uses truba trøsrig sruaig købig køn.

¹⁸ Inchen katøgan ángel webarrubig køn, altaryugurri trube nag piløgamigwan nø ashibig. Incha tru trøsr uses sruaigwane truba mur trenchib wamabig køn: “Ñui trøsr useswan srua, pirau uvas traamerayu, uvas lusrømeran parøb tulishi cha. Kaguende uvasmerabe yandø srønø køn” cha.

¹⁹ Inchen ángelbe useswan pirø palawan parøb, puraya, pirau tru uvas tusryu uvas lusrømeran parabe, tru uvas kwaramig marig pasrabigu kebusrøbig køn, uvas piwan wesraig kønrrai. Trube Tiuswei tru purø trømbøig kørig kømdiig namig købigwan eshkabig køn.

²⁰ Tru uvas pi wesraibe ciudadu kømøtø, wambig nørøsrøn pasrøben truyu piwan wesraben, truyugurri ani webarruppe, kaullimeran frenossrøngatig neguchibig webarrubig køn, trescientos kilómetros ørøba ani luløbikke.

15

Angelesmera tru srabe siete plagaswan sruar

¹ Srømbalårømbe katøgan chigøben kønrrab kuitamab asha kømig truba nuig ashibig kur kwaara asamdiig, siete ángelesmera siete chine kaig nebunrrai marøb amrrunrrabelø yandø srabeelan tøgar. Truiløtøga yandø tru Tiuswei namig købiibe truyu yandø newan patsøgaig kørrømisrøbig køn.

² Katø kan mar pigriu lataig naaba lindsaig ashibig kur. Tru animal trømbøgøligwanba, nundøwei tru treetøwei asha marigwanba, nui munchi numeronba utømø, treegu chinchamamø webambarbe tru mar tørguelarrøzhig pala Tius arpas traniiilan srua pønrrabelø køn.

³ Nømbe tru Moisés Tiuswei marøb megabig cantaigwanba, katø Ubishaunø cantaigwanba trenchib cantabelø køn: “Señor, purø nørreelø ñi chigøben mariiløbe, kwaara asamdeelø mariilø køn chib,

Señor Tius Newan Maramburab Marøbig.

Ñui maymerabe tabig sølgandeeł, newan ciertonelø køn chib.

¡Chusrøn køben misag purø nørrø pønrrabelai ñi Rey køn! chib.

⁴ ¡Ay Señor! ¿Ñun kørmíbe mu kuaasamø? chib.

¿Ñui munchiwan tabig waminchimiibe mu kua asamø? chib.

Newan tabig chishiibe ñitøwein køben, truørø tru misag nørrø pønrrabelø kerriguba ñui merrab amrrua køriibala tabig waminchun chib.

Kaguende mumaytøgucha ñui sølgandø tabig mariił kenamisran” chib cantabelø køn.

⁵ Øyeelø chab puraiben, na ashene, srømbalasrø Tiuswei yaambusrø tru Tius nø pasramig nuyasiitø tarømarig pasrabiibe kuri ashibig kur.

⁶ Inchen truyugurrimbe tru siete ángelesmera tru siete chine kaig nebunrrai marøb amrrunrrabelan sruar werrui ashibig kur. Truiløbe linotøga marig chishcheelø, tørbilabzheelø kewar, pøronaig orotøga marig pechoburab pøronawar købig køn.

⁷ Inchen møikkøsrøn tru pibgatø øsiguelai utuibe tru siete ángelesmeran oro copamera siete tranøbig køn, Tius tru managatig øsig wabig, nui namig købigwan truyu netsøganiilan.

⁸ Inchen Tiuswei tru tab yaube Tiuswei tørguegwalmabikkurrimba, maramburab marig pasraikkurrimba naguistø tinbuløben, mugucha kebamrrab kaimabelø køn truyube, tru ángelesmera siete tru chine kaig nebunrrai marøb amrrunrrabelan ángelesmera kan kan srua ambiił maig punrrabig chab purayamnegatig.

16

Copamera tiuswei namig købiitø netsailø

¹ Inchen kan wam truba mur wamindi mørøbig kur, Tiuswei purø tab yaugurri tru siete ángelesmeran trenchib:

“Ambay cha. Incha tru siete copas Tiusweinukkurri purø trømbøig kørig kømdiiig namig købig tøgagig arrubigwan pirau lushchigay” cha.

² Inchen tru srøsrø ångelbe ya, nui copan pirø palawan lushene, tru animal trømbøgøligwei marcan tøgarwanba, nun tru treetøwei asha marigwan køriibala tabig waminchibelanba kan pisrø purø trømbøig pusrkwab pillabig webarrubig køn.

³ Inchen tru ångel par kønrrabyuig nui copan mar pala lushene, maryu pibe kan kwaigwei ani lataig misrøbig køn. Inchen maryu chine øsiguig purrabeløbe mayamba chab kwabig køn.

⁴ Inchen tru ångel pøn kønrrabyuig nui copan nørrø pimerayuba, pigabmerayuba lushene, kerriguba anindø misrøbig køn.

⁵ Inchen tru pimeran ani misrtrai marøb pasrab ångelbe trendaig mørøbig kur:

“Ñi, Señor, tabig sølgandø marøbig, mõi ya køb, katø manasrøngurri købig, Tius Newan Tabig ñibe treeg køn cha.

Kaguende ñibe iilan maig kønrrabigwan asha maran cha.

⁶ Pøs tru pirau misaamerabe tru ñui misaameranba,

Tius maig karuigwan eshkabelanba

kweecha aniwan lusikkurri,

møimbe nømungucha ñibe ani mutsøsrain køn cha.

Kaguende nømune øyeeq maramigweim palaig kuig køn” cha.

⁷Inchen tru altaryugurri trendaig mørøbig kur:

“iØØ, treegwein køn cha,

kan ñi Señor Tius Newan Maramburab Marøbig.

Ñui maig maramigwan ñi asha mariibe,

ciertonig, sølgandø tabig mariilø køn!” chib.

⁸Inchen tru ángel pib kønrrabyuig nui copan nøsig pala itølushene, tru nøsiibe nui pachibiitøga misagwan parrøbig køn.

⁹Inchen misaamerabe tru purø trømbøig pachibiitøga parrig kørrømisra, Tiuswei munchiwan tsalø wamabelø køn, tru øyeeq chine kaig nebub attrai arringarub maram purab marøbigwan. Treeg kuindøgucha nømbe isua møra, Tiusweimay llirameelø køn, nun truba tabig waminchab.

¹⁰Inchen tru ángel trattrøgatø kønrrabyuig nui copan tru animal trømbøgølig wamisra karub waigwan itølushene, nø ashib karub tøga waibe kerriguba løstiaq kørrømisrøbig køn. Inchen misaamerabe pusrkwabiitø nilømeran ke tsachatø mørøbelø køn.

¹¹Incha tru srømbalasrø wab Tiuswan tsalø wamabelø køn, tru chine nømun pusrkwabeløgurrimba, katø trømbøig pill-llab pisrømeragurrimba. Treeg indingucha, nømui kaig mariilan isua møra Tiusweimay llirameelø køn.

¹²Inchen tru ángel seis kønrrabyuig nui copan tru Eufrates purø nu pi pala kelushene, tru pimerabe kølaptinchibig køn, pørr kal-labsrøngurri amrrub reymera puraambamig kønrrai may kura kørrømartrab.

¹³Inchen dragonwei trigugurrimba, tru animal trømbøgøligwei trigugurrimba, tru ka isatø ‘Tius maig karuigwan eshkabig kur’ chibigwei trigugurrimba pøngatø trømbøig marøb kwaimandziimera urututuumera lataig asønabelø werrubelø køn.

¹⁴Iløbe kwaimandziimerai møsiimera købig køn, nui maramburab marigwan kenamarøbelø. Truiløbe pirø ørøba maya reymeraisrømay webambubelø køn, kwayamig truilan tulundzuningarunrrab, Tius Newan Maramburab Marøbigwei tru purø nu kwaløm kwayamig.

¹⁵“Au, nabe kan niliq lataig arrumønrrun. Mayanguen tab kuig køn pesannamø, ashiptø megabigweimbe, nui keigwan tab asha tøgagøb, katø ñi køsaatiq uñen, ñui køsagwan misagasinab, kørig puraimønrrappe.”

¹⁶Incha truiløbe tru reymeran tru hebreomaybe Armagedón tainug tulundzuningarubelø køn.

¹⁷Inchen tru ángel siete kønrrabyuig nui copan tru chiguchagayu srønzhig pala lushene, srømbalasrø tru Tiuswei yau tru wamisra karub wainukkurrimbe kan wam truba mur trenchibig webarrubig køn:

—Yandø chab patsøgaig kørrømisran— cha.

¹⁸Inchen palaig pilabelø køben, sre mullibelø køben, palaig trashibelø køben arruben, pirøbe purø trømbøig kønabig køn, misaamera yu pirau srøtø warab urassrøngurri øyeeq lataibe managuen kønømuinrrunikke.

¹⁹Inchen tru purø nu ciudabe pønbalig misrøb lanrra, pirisaig kørrømisren, yu pirau ciudamera pønrrabeløbe kerrigu tuin pitis kegørrabelø køn. Inchen Tiusbe tru Babilonia purø nu ciudawan isua, tru nui copayu purø trømbøig namig købig tøgagwan mutsøsrøbig køn.

²⁰ Inchen tru pirø pi tøbøtag pønrabeløbe mayamba trubab chab lulen, katø nørø tunmera chigucha chab trubabelø køn.

²¹ Inchen srømbalarøngurrimbe misaameraim pala sre srug ibig køn, truba nørreelø, pib arroba lutau kuatsiguelø. Inchen møgueløbe tru treeg trømbøig srug kørrøben, Tiuswan tsalø wamabelø køn. Kaguende tru treeg kaig nebub arrubiibe ¡katø! purø trømbøig købig køn.

17

Tru trømbøig marøb ishuwan nø chu pasramnug pasrønrai pasrøb

¹ Inchen tru siete ánglesmera tru copas siete srua pønrabelai utuig kan ángel arruabe, nan trenchibig køn:

—Amø cha. Tru nørø pi palamerawan wabig tru nui asrwan møguelan anwei yanøb ishuwan nun chu pasrønrai pasramigwan eshkarrumøn cha.

² Pirau reymerabe tru ishuuba purø trømbøig maren, katø pirau warab misaamerabe mutsiirain køn cha, nø tru treeg trømbøig mariibe vino lataig køben trunun mucha.—

³ Inchen Espiritu nø nan tøga pasramisren, tru ángelbe mu misag warab waraimøsrømay nan srua iben, trusrømbe kan ishug kan animal piguiig trømbøgøligu itøgwana wai ashibig kur. Tru animalbe Tiuswan purø trømbøig wamabig munchimera pøriitø netsaig, truiibe turmera siete, kigulmera diez tøgäig købig køn.

⁴ Tru ishube piguiiba, yalø piguiiba keweig købig køn, orotøgagøben, tab sruzheeløtøgagøben, perlastøgagøben tabzhig tamaräig. Tasigube kan oro copa mutaig købig køn, tru møgueløba trømbøig marøptø køsongømdiig mariiba, ashikken kønrrabgäig mariibatø netsiigwan.

⁵ Katø nui kappaløyube kan munchi øyeebe mandø termab muguen nebua isumgäig pørig tøgäig købig køn:

Babilonia purø nuig,

møgueløba kaig marøptø warab ishumburweimba, pirau trømbøig køsongønrraptiig mariilaimba usrin køn.

⁶ Tru ishuwane mutsiigüig wai ashibig kur, Tiuswei misaamera kweetsilai aniwanba, katø Jesúsweimburab waminchibelan kweetsilai aniwanba mucha.

Inchen nabe ashippe, truba kørrø kwaarig kørrømisrinaben,

⁷ Tru ángelbe nan trenchibig køn:

—¿Chindimbarre kwargu? cha. Nabe ñune tru ishuweimburappa, tru animal trømbøgølig ishuwan niga pasrabig turmera siete, kigulmera diez tøgäigweimburappa, øyeebe mandø chibig kermab mu nebua isumgäigwan chi chibig kui eshkarrumøn cha.

⁸ Tru animal trømbøgølig ñi asiibe merrabsrømbe øsig købig yandø treeg kømøn cha. Inchendø tru purø trømbø umbu trabyugurri nebatrun cha, tru managatig møra pasramnuumay inrrab. Inchen chiwangurrimbunø marøb urassrøwei yu pirau warab misaamera nømui munchimeran tru managatig øsig purrønrrabelai pørig libroyu pørig chigarbe, tru animal trømbøgøligwan ke kwaara ashchun cha, srøtøbe øsig kua, møi yambe pinig mu kaagua, katøyug attrabig kui ashippe.

⁹ Iigwan tab mäig køtashchab ashchappe, yube purø may isubig kømig palønrrun: Tru siete turmerabe tru siete tunmera køn, tru ishug pøtø waig. Katø tru turmeratøwei siete reymerangucha eshkabig køn.

¹⁰ Tru siete reymerai utu trattrogatøbe chab kørrabguen inchen, kan møikkøsrøn truiløyuibe møin kwaløm ashib karub pasrøben, kane katøgucha arrumø, srø køn cha. Inchendø yandø truig arruabe, nune maya yanatø kørrømisramig nebunrrun.

¹¹ Tru animal trømbøgølig, merrabsrømbe øsig pasrabig købig, møi yambe øsig pasrømiibe, tru ocho kønrrabyu rey køn, tru sietelai utugurri webarrub reytøwei, truiibe tru managatig møra pasramnuumay inrrabig.

¹² Tru diez kigulmera ñi asiibe ashib karub purramigwan utømø srø pønrrab reymera køn cha. Inchendø tru animal trømbøgøliiba kegøtø, truiløbe reymera lataitøwei mugucha manchinrraingag karumigwan kan uratø tøgagømig utønrrun cha.

¹³ I tru reymera diezeløbe ke kandø isua pønrramisra, nømui maramburab maramig tøgagúigwanba, mugucha manchinrraingag karumig tøgagúigwanba tru animal trømbøgøligwan tranrrun cha.

¹⁴ Inchen nømbe Ubisha-unøba kwayaben, Ubisha-unøbe nømune kananrrun. Kaguende nøbe Maya Misagwan Karub Ashib Pønrrabelaim Pala Nø Karub Ashib Pasrabig, katø Maya Reymerai Nø Rey kua. Inchen nøba pønrrabeløbe Tius wamiilø, lawa wesruilø, nun elachimø melabelø købig køn – cha.

¹⁵ Katø ángelbe nane trenchibig køn:

–Møgueløba kaig marøptø tsub ishug wamisra wainug, tru pimera ñi asiibe, tru chi misaamera køben, misaamera purø nørrø pønrrabelø køben, misag nørrø pønrrabig køben, peg peg wam waminchibelø køben, truilø køn cha.

¹⁶ Inchen diez tru kigulmera ñi asiiba, tru animal trømbøgøliibabe tru ishug nui asrwan mõguelan anwei yanøbigwane ashig kømui inchib tsalø asha, nundø mu keesha asiimig tsunrrai mara, køsaatiig yandiig kørrømarabe, tru ishuwei yawwane ma, naatøga patrun chibig køn.

¹⁷ Kaguende Tiusbe nø maig martrab isuigwan trunun nøm isua martrai nømui manrrømerayu pasrin køn cha. Treeg punrraimbe nømbe kandø isua pønrramisra, tru animal trømbøgøligwan nømui ashib karub purraigwan tranøb inchai, Tius nø mandø wamindig treeg nebunnegatig.

¹⁸ Tru ishug ñi asiibe tru purø nu ciuda køn cha, pirau reymeran nø merrarraua karumburab karub tøga pasrabig.–

18

Babilonia purø nu ciuda yandø pinab

¹ Øyeech chab puraibene, katøgan ángel srømbalasarøngurri kørraarri ashibig kur, mu mandamgaig karub maramigwan purø nuig tøgaig. Inchen pirøbe tru ángelwei tørguegwalmabiitøga tørgwaløm kørrømisrøbig køn.

² Incha truba mur wamab trashib trenchibig køn:

“¡Tru purø nu ciuda Babiloniabe

yandø penan, yandø penan! chib.

Møimbe kwaimandziimera yandø nøm waramig nømui misrøb,

chigurrimbunø kaig mõsiimerai warain trab misrøb,

kaig illimera køsøngømdiig asamguengailai kanbalatø waraig le misrøb indin køn chib.

³ Kaguende misaamera nørrø pønrrabelø mayamba,

nø ke chinchimmøø inchib, mõgueløba trømbøig maringarub vinon mucha, mutsiirain køn cha.

Inchen pirau reymerabe tru ishuuba trømbøig maren,

pirau yanøb, penab inchibeløbe puarmera misrin køn cha, tru nun maig marøg køben trømbøig marøb pasrai anmeratøga.”

⁴ Inchen srømbalærøngurri katøgan wam trendaig mørøbig kur:

–Ñim nai misaamerabe tru ciudayugurri webambay cha, nø kaig mariiløyu ñimgucha treetøwei tøgatø marøb melømøwei, katø chine kaig nebunrrai marøb arrubig nebumøwei inchain chib.

⁵ Kaguende nui kaig mariiløtø srømbalærøngatig tunbasrig pasrøben, Tiusbe tru ishug sølgandø tabig marmuilan isua pasran cha.

⁶ Nø kanelan maig tranig, nungucha truburø treetøwei pamay tranay chib.

Mutsamig nø katøganelai tamarin copayutøwei nuimbe pamay mutsamigwan kandiig lindisha tamaray chib.

⁷ Nøbe maya nuguen tabigu wag køben wab, katø nø maig isuigwan maig købash tsuig købene, mømimbe treetøwei mandøguen kømui møra meganrraimba, kishib meganrraimba maray chib.

Kaguende nøbe nui manrraube trenchibig køn:

“Nabe yube kan reina lataig wamisra war cha.

Nabe keg kucha kwaitøguen kømøwei,

katø managuen isub kisamig chigawein kømønrrun” cha.

⁸ Inchawei treekkurri ke kan kwalømyutø chine kaig nebunrrai marøb amrrunrabeløbe itømaytø attrun cha:

kwamig køben, kisamig køben, parø arrubig købengue.

Nun naatøga patrun.

Kaguende Señor Tius Newan Maramburab Marøbiibe maig maramigwan truig nø asha maran cha, nune.

⁹ Inchen pirau reymera tru ishuuba larrø trømbøig marøb, chull køtanmaptø chine palømig purø tabigu nøba warabeløbe nun isub, truba truba wamab kishchun nun tru parrig naguishwan ashippe.

¹⁰ Nun øyeekkatig nebui meganrrai maren, nømbe trunun kørig køb yab-srøndøø pønrrabelø køn trenchib:

“¡Karrengucha kuita! ¡Karrengucha kuita!

¡Babilonia, kan yeeg purø nu ciuda, chigøben nørriig marøbig!

¡Ke kagøppa, ke kan urayutø ñune øyeeg pinisainab pasramig nebuita!” chib.

¹¹ Inchen pirau yanøb, penab inchibeløbe nun isub wamab kisan, kaguende yandø nømui yanamelan mugucha penønrrabig kaaben.

¹² Nømui chine nørro yanamelø, oro køben, an køben, tab sruuzheelø køben, perlas køben, linotøga marig purø tab llensuzheelø køben, yalø pigøzheelø køben, seda llensumera køben, pigø llensuzheelø køben, chine tsiimera may irrabzheelø køben, marfildøga mariilø køben, tab tsiizheeløtøga mariilø køben, broncetøga mariilø køben, hierrotøga køben, marmoldøga mariilø køben,

¹³ canela køben, chigøben may irrabzheelø køben, incienso køben, mirra køben, asru srøliilø may irrabzheelø køben, vino køben, aceite køben, purø tab harina køben, tirigu køben, niisrai animalmera køben, ubishamera køben, kaullimera køben, kaulli sruig karrumera køben, karuindiig melabelan køben, misaameran køben, øyeelan yandø mu penønrrabig kaaben.

¹⁴ Incha ciudawane trenchinrrun cha: “¡Ñi purø chull inchib lurra maig mamimerabe ñuyasiibe kaanrrai chab pinøben, katø ñi chull inchib mailø

mayzheelø trurrigu tabzheeløbe ñuyasiibe kaanrrai chab pinin køn chib, yandø managuen katøbe asamikkaikke!”

¹⁵ Inchen penab, yanøb inchibelø tru ciudayugurri pua misra købeløbe, ciudawan øyeekkatig trømbøig nebunrrai maren, kørig købiitø yabsrøndøø pønrrønrnun cha, truba truba wamab, kishib,

¹⁶ trenchib:

“¡Karrengucha kuita! ¡Karrengucha kuita!
 ¡Kan yeeg purø nu ciuda,
 kemig lino llensu purø tabiitøga marig,
 yalø pigøzheelø køben, pigøzheelø køben,
 orotøgaba, tab sruuzheeløtøgaba, perlastøgaba
 tabzhig tamarigwan keweig købig!

¹⁷ ¡Ke kagøppa, kan urayutø chigurrimbunø nørrø købig yeekkucha chab pinita!” chib.

‘Inchen mayeelø tru barcomeran srubeløba, mayeelø maryu amburab iburab misag llirabeløba, barcon ashib truyu purugub llirabeløba, tru maryu llirab an marøbeløba, truilø kerriguelø yabsrøndøø pønrrabelø køn cha.

¹⁸ Incha tru Babilonia ciuda parrig naguishwan ashabe, trenchib trashibelø køn cha: “¡Øyeeg nu ciudatøweimbe katøgane chuguen kaagüig køn!” chib.

¹⁹ Incha nømui tur pala usrø pusrøb, trenchib wamab kishibelø køn cha:

“¡Karrengucha kuita! ¡Karrengucha kuita!

¡kan yeeg purø nu ciuda chib,
 mayeelø maryu barcos tøgarmarabe truyu yeeg chine købiitøga puarmera misrig!

¡Møimbe ke kan urayutø chab pinisaig kørrømisrin køn! chib.

²⁰ ¡Inchen ñi, srømbalabe, tru ciuda øyeeg pinøben kasraarau! chib.

¡Ñim Tiuswei misaameraba,
 katø Cristo nøashib karua øriiløba,
 Tius maig karuigwan eshkabeløba kasraaray! chib.

Kaguende Tiusbe ciudawan øyeeg nebunrrai marøppe,
 ñimgurri øyeeg maramigwan asha mara pasrin køn.”—

²¹ Inchen kan ángel purø murig, kan tirigu kichib srug lataig, purø nuigwan kusrawa, muta, maryu trenchib keguchibig køn:

“Babilonia nu ciudawane øyeetøwei tsakkandø tranrra keguchen,
 katøbe managuen asamig kaanrrun cha.

²² Yandø ñuinuube arpas kønabelø kønøben møramig kawei,
 chigøben kønabelan tabzhig køni møramig kawei,
 lus urrabelø urri møramig kawei,
 trompetas urrabelø urri møramig kawei,
 katø taska chigøben tabzhig marøbelø mu kawei,
 tirigu kichib srug tirigun kichen
 katøbe managuen wanrri møramig kawein kønrrun chib.

²³ Katøbe managuen ñuinuube lámpara piløben,
 tru tørwan asamig kawei,

katø kasharabyu keg misrtrabiiba,
 srai misrtrabiiba kasrag waminchen,
 trunun møramig kawein kønrrun cha.
 Kaguende ñuinug penab, yanøb inchibeløbe
 yu pirau purø nørreelø købig køn chib.

Katø ñibe trømbø marøb piimailøtøga

pirau misag nørø pønrrabelan mayamba
chab kegørrøsrkaig køn cha.

²⁴ Babilonia ciudayube

Tius maig karuigwan eshkabelan kweetsiilai aniwanba,
Tiuswei misaameran kweetsiilai aniwanba,
katø yu pirau mayeelan kweetsiilai aniwanba

wetørraig køn.”

19

Srømbalasø cantailø

¹ Øyeelø chab puraihen, srømbalasømbe kan wam purø nu søteelai lataig
øyah chib kui mørøbig kur:

“jKan øyeebe maya nuguen tab køn! chib.

jKaigyugurri wesraiba, tørguegwalmabiiba,
maramburab maramibabe namui Tiuswein køn! chib.

² Kaguende maig maramigwan nø asha mariibe,
ciertonig, sølgandø tabig mariilø køn chib.

Kaguen nøbe tru møgueløba purø trømbøig marøb ishug
tru nui trømbøig mariiløtøga pirau mindishibigwan
møra pasrønrrai pasrin køn chib.

Katø Tiuswei karuindiig melabelan
nø ani lusingaruigwan

nungucha ulø payib treetøwei maran” chib.

³ Incha katøyug trenchibelø køn:

“jKan øyeebe maya nuguen tab køn! chib.

Tru ishuwei parrig naguishbe

managatig nebib pasrabig pasrønrrun” chib.

⁴ Inchen tru veinticuatro kølli misaameraba, tru pibgatø øsig purra-
beløbabe pirausrøngatig tømboønsrøb srala, tru wamisra karub wainug wabig,
Tiuswan køriibala tabig waminchib trenchibelø køn:
“jTreeg kønrrun! chib.

jKan øyeebe maya nuguen tab køn!” chib.

⁵ Inchen tru wamisra karub wainukkurrimbe kan wam mørø trenchibig
køn:

—jNim Tiusweiwan marøb melabelø mayeeløba,

katø Tiuswan køriibala pønrrabeløba,

tru nørreelø kusrebelø køben,

katø treeg kømeeelø køben,

namui Tiuswane purø tabig waminday!— chib.

Ubisha-unø kasharam kwalø

⁶ Inchen kan truba nu søteelai wammera lataig, kabe kan truba nu pi
wanrøb lataig, kabe kan palaig trashibelø lataig trendaig mørøbig kur:

—jKan øyeebe maya nuguen tab køn! chib.

Kaguende namui Tius Newan Maramburab Marøbiibe nø ashib karub
pasran chib.

⁷ Kasraarab, katø truba tab kui mørøb,

katø nune maya nuguen tabig waminchigun chib.

Kaguende mømibe Ubisha-unø kasharab kasraaramig pun cha.

Nui srain kønrrabiibe tamara pasran cha.

⁸ Incha srain kønrrabigwane lino llensu,

chishig tørbilabigwan kenrrai tranig køn— chib.

(Pøſ tru lino purø tab llensuzhiibe tru Tiuswei misaamera nøm sølgandø tabig mariilan eshkabig køn.)

⁹ Inchen ángelbe nan trenchibig køn:

–Igwán pør cha: “Tru Ubisha-unai kasharab yaumay manrrab linchab amrrunrrai eshkailøbe mayanguen tab kuilø køn”– cha.

Inchabe nane treekkucha chibig køn:

–Iiløbe Tius nø newan cierton wamindiilø køn– chib.

¹⁰ Inchen nabe ángelwei merrab tømboſnsra køriibala tabig waminchab inchene, ángelbe nane trenchiptinchibig køn:

–¡Au, øyeeg marmøta! cha. Ñiba, ñui nuneløba tru ciertonigwan Jesús kenamarigwan treetøwei elachimø, pønrrabelø lataitøwei, nagucha Tiuswei marøb megabiitøwein kur cha. ¡Tiuswane køriibala tabig waminchi! cha. Kaguende tru ciertonigwan Jesús kenamariibe Tius maig karuigwan eshkabelan Tius maig tamigwan isungarub pasrabig, truitøwein køn– cha.

Pulø kaulli itøgwanaig

¹¹ Inchen srømbalabe kurig pasrai ashiptindinaben, truyube kan kaulli puliig kenamisrøbig køn. Inchen truyu tru itøgwana wabigwane trencha wamig købig køn: “Nø maig køppe, Managucha Treetø Tabig, katø Newan Ciertonig” cha, treeg wamig, kaguende nøbe sølgandø tabig mariitøga maig maramigwan asha marøb, katø kwayab inchibig køn.

¹² Nui kabmerabe kan nagurø pilab lataig pilabelø køben, nui turyube coronamera truba yam petsaig, kan munchi pørig tøgaig købig køn, trunune chi chibig kuigwane nøtøwei asha købig køn.

¹³ Nui kewagúibe anindøga pisig keweig købig køn. Inchen nui munchibe “Tiuswei Wam” cha wamig købig køn.

¹⁴ Inchen tru nørrø søtø srømbalasreelø mayamba pasrabiibe lino llensuzheelø puløzhig chishcheelø kewar, pulø kaulli itøgwanar nui wendautø amrrubelø køn.

¹⁵ Inchen nui trigugurrimbe kan trøsr espada webarrubig køn, trutøga misaamera nørrø pønrrabelan kørrinchab. “Incha nøbe ashib karuppe, kan tsandzøn pørøtsiitøga karub lataig ashib karunrrun.” Incha katø nøbe tru uvaswan pi wesrunrrab kwarainug kebusra, Tius Newan Maramburab Marøbigwei purø trømbøig namig købiitøga tru uvas piwan wesrunrrab pusøbunørrun.

¹⁶ Incha nui kewagúiguba, srøptsimburappa øyeeg munchi pørig tøgaig købig køn:

Maya Reymeraim Pala Nø Rey;

Maya Misagwan Ashib Karub Pønrrabelaim Pala

Nø Karub Ashib Pasrabig, chibig.

Tru animal trømbøgøligwan chinchamamub

¹⁷ Inchen kan ángel nøsigu pasramisrabe, maya illimera srømbalawan llirab amøñibelan mur wamab trendai ashibig kur: “Amrrua, tulundzunay cha, mamig purø nørrø, Tius tamarigwan manrrab.

¹⁸ Reymerai yauwan køben, maya suldaumeran ashib pønrrabelai yauwan køben, chiwangucha kørmø kwayam møguelai yauwan køben, kaullimerai yauwan køben, tru itøgwanabelai yauwan køben, mayeelai yauwan, tru karuindiig melabelai yauwan køben, karuindiig melømeelai yauwan køben, kusreb møguelai yauwan køben, katø treeg kømeeelaiwan købengue.”

¹⁹ Inchen tru animal trømbøgøligwanba, pirau reymeranba, nømui suldau sətømeranba tulundzunin kui ashibig kur, truiløbe tru pulø kaulli itøgwanaiba, truiğwei suldaumeraba kwayanrrab.

²⁰ Inchen tru animal trømbøgøligwane merrarraig købig køn, tru isatø ‘Tius maig karuigwan eshkabig kur’ chibigwanbañau. Truipe tru trømbøgøligwei merrab tru maramburab mariilan asha kønrrai marøbig købig køn. Tru treeg mariitøga peløsrka chab kegørrøsrkaig købig køn, tru trømbøgøligwei marcatøga marcarramabelanba, katø tru trømbøgøligwan treezhigwei asha marigwan køriibala tabig waminchibelanba. Inchen tru animal trømbøgøligwanba, tru Tiusweinukkurri arrubig lataig marendø, peemaytø marøbøgøligwanba tru nag pisu lataig azufreba, naarabigu øsiiba kebusriilø købig køn.

²¹ Inchen tru katøganelø kørrømisrøbelane tru kaulli palaigwei trigugurri espada webarrubig chab kweecheen, maya illimerabe truilai yaumeran ke kaasha mabelø køn.

20

Tru mil años

¹ Inchen kan ángel tru purø trømbø umbu trabyu llaviwanba, truba nu cadenanba tasku sruaig srømbalásrøngurri kørraarri ashibig kur.

² Incha tru ángelbe tru dragon trømbøgølig, tru ul merrabsriig, tru nug-waimandzig, Satanás taigwane cadenatøga mil añoswei merrarrawa, lusra pasrøbig køn.

³ Incha tru purø trømbø umbu trabyu kegucha, yaskabwane muguen kurtraingaig kasra pasrøbig køn, misamera nørrø pønrrabelan peløsrkøb kegørrøsrkømnrrai tru mil años nebumnegatig. Yandø treeg chab puraiiben, katø kan maya yanatø picha, elatsamig kømig palønrrun.

⁴ Katø purramisra karub purrailø ashibig kur. Inchen truyube maig maramigwan asha marøb purramigwan utabeløbe purramisrøbelø køn. Katø Jesúsweimburabigwan eshkaikkurrimba, Tiuswei wamgurrimba nømui turmeran pariilø købelai møsiimerangucha ashibig kur. Truiløbe tru trømbøgøligwanba, tru nun treetøwei asha marigwanba køriibala tabig waminchimøwei, katø kappaløyu lata, tasigu lata, marcarramamøwei inchar købig køn. Incha truiløbe katøle øsiirawa, Cristoba mil años ashib karub purrabelø køn.

⁵ Inchen tru kwabelø katøganeløbe tru mil años purayamnegatig øsiirameelø køn. Iig køn, tru kwawa katøyug srøsrø øsiiraibe.

⁶ Mayanguen tab kuilø køn trurrigu Tiusweindø tarømariilø, tru kwawa katøyug srøsrø øsiirabelai utu øsiirabelaimbe. Yandø tru kwab kwanrrai katøle kwangarub arrubiibe nømune chigucha chi martrab kaimanrrun, nømbe masken Tiusweimba, Cristoimba sacerdotsmera kua, nøba mil años ashib karub purrønrrun.

Nugwaimandzigwan yandø kerriğwan kanawa kørrømarøb

⁷ Incha yandø tru mil años nebuben, tru Satanáswane tru merrarrawa keera wanninukkurri elachen,

⁸ nøbe pirau misamera nørrø pønrrabelan kegørrøsrkønrrab webinrrun, yu pirau walligurri, wagurri, ambugurri, igurri misag warabelan –tru Gog taigwanba, Magog taigwanba– kwayamig tulundzunønrrab. Inchen tru kwayanrrabeløbe nu køptø mar mendawan kan pisrum lataig købig køn.

9 Incha Tiuswei misaamera warainug tru pøtøgatanba, Tiuswei undaaraig ciuda pøtøgatanba pirau ørøba nømbe algønab amrrua tulsruben, nag srømbalarøngurri kørarruppe, chishtø parrøbig køn.

10 Inchen tru nugwaimandzig chine mara peløsrka nømun kegørrøsrkøbigwane tru nag pisu lataig azufreba naarabigu kegutsig købig køn, tru animal trømbøgøligwanba, tru isatø "Tius maig karuigwan eshkabig kur" chibigwanba kebetinug. Inchen truyube nømun yem, kwaløm managatig purø trømbøig kui møra melønrrai martrun.

Wamisra karub waig purø nuig kørandiig

11 Inchen kan wamisra karub waig puliig purø nuig pasrai ashibig kur, truyu wabigwanba. Inchen nui merrabgurrimbe pirøba, srømbalababe yandø kerrigu trubab chab lulen, nømuimbe chuguen pønrramig kaabig køn.

12 Katø truyube tru kwabelø nørrø kusreb misaamera køben, treeg kømø misaamera køben, Tiuswei merrab pønrrai ashibig kur. Inchen libromeran kuren, katøgan libro, tru managatig øsig purrønrrabelai munchimeran pøri librongucha kurøbig køn. Inchen tru kwabelane tru libromerayu maig pørig pønrrøben truyu asha, maig maramigwan treeg asha marøbig køn, nøm maig mariilø køben treekke.

13 Inchen marbe tru piyu kwaig purrabelø købelan tranen, katø tru kwangarubig taiba, tru kwabelø pønrraig "Hades" taiba, truilø chigucha nømuinug tru kwabelø pønrrabelan tranen, nømunø møigwandøgucha maig maramigwan treeg asha mariilø købig køn, nøm maig mariilø køben treekke.

14 Inchen tru kwangarubigwanba, tru kwabelø pønrraigwanbabe tru nag pisu lataigu kebetiilø købig køn. Inchen tru nag pisu lataibe tru srøsrø kwaig kømnetø katøyug kwamig, truig køn.

15 Inchen tru managatig øsig purrønrrabelai munchimeran pøri libroyu nømui munchimeran truyu wetørramuinabeløbe mutøgucha tru nag pisu lataigu kebetiilø købig køn.

21

Srømbalaba, pirøba srøizheelø

1 Incha katø kan srømbala srøiba, srø pirøba ashibig kur. Kaguende yandø srømbalaba, pirøba srøteelø købeløbe yandø chab pinøben, yandø mar chigucha pinin købig køn.

2 Inchen nabe tru ciuda Tiusweindø tarømarig, tru Jerusalén srøigwane srømbalarøngurri kørarri ashibig kur, Tiuswei merrabgurri. Tru ciudabe kan srai misrtrabig tabzhig keweig tamara pasrab lataig pasrabig køn nui keg kønrrabigweyasig.

3 Inchen tru wamisra karub wainukkurrimbe kan wam truba mur waminchib øyah taig mørøbig kur:

"¡Au! møimbe Tius nø pasraig yabe yandø misaameraba pasran cha.

Tiusbe nømbe pasrønrrab pasrøben,
nømgurrimbe nui misaamera kønrrun cha.

Inchen Tiustøwei nøashib truyu nømbe pasrøwa,
nømui Tius kønrrun chib.

4 Incha nøbe nømui kappimeran kerrigu pinømørtrun cha.

Inchen yandø kwamig kawei, kismig kawei,
wamab trasamig kawei, pusrkwabig kawein kønrrun chib.

Kaguende merrab chi købiibe chab purayan" cha.

⁵ Inchen tru wamisra karub wainug wabiibe trenchibig kòn: “Nabe chi-wangurrimbunø srøitø maramønrrun” cha. Inchabe katø nane trenchibig kòn:

—Pør cha. Kaguende i wambe maig taibe treeg køb, katø ciertonig køb kòn— cha.

⁶ Inchabe katø nan trenchibig kòn:

—Yandø chab marig kørromisran cha. Nabe Aba, Zetaba latawei, Srøstriiba, Srabeiba kur cha. Møikkøben pimulgwaigwane øsig kønrrai tranøb pi, tru kølømø pigabyu piwan, ka yandø ketig mutchai tranamønrrun cha.

⁷ Møikkøben chine nebingucha truyu pureb ibiibe iilan keta tranamig tøgagüigwan ketig utønrrun chibig kòn. Inchen nabe nui Tius køben, nøgurrimbe nai nusrkain kønrrun cha.

⁸ Inchen chigøben kaig puben kørab llirawa ambubeløba, chiweingucha køremeeløba, ashikken kønrrabgaig trømbøig marøbeløba, kweechipteeløba, møguelø ishumburba trømbøig marøbeløba, kwaimandzigweimburabelan marøb, trømbø marøb piimabeløba, chiwangøben kan tius kui lataig inchi-beløba, mayeelø isapteeløba, mayamba iiløbe nõmuimburappe tru nag pisu lataig azufreba naarabigumay ambamig kønrrun cha. Truike tru srøsrø kwaig kømnetø tru katøyug kwamig truig kòn— cha.

Tru srø Jerusalén

⁹ Inchen kan ángel tru sietelai utuig tru srabeig chine kaig nebunrrai marøb amrrunrrabelan tru siete copas netsiig mutarwei utuig arruabe, nan trenchibig kòn:

—Yusrø amø cha. Ubisha-unai srai misrtrabig, tru srawan eshkarrumøn— cha.

¹⁰ Inchen Espíritu nø nan tøga pasramisren ángelbe kan truba nu tun trurrigu pala tunsrømay pera ya, nane Jerusalén, tru ciuda Tiusweindø tarømarigwan kenamarøbig kòn, srømbalarøngurri, Tiusweinukkurri kørraarrubigwan.

¹¹ Tru ciudabe Tiuswei tørguegwalmabigwan tøgaig tørbilabig kørraarrubig kòn, kan purø tab sruuzhig, kan jasje srug tørbilabzhig lataig, kabe kan pigriu tørguelarrøzhig lataikke.

¹² Tru ciuda pøtøgatanbe srug pusrig lendiig trurrigu palaig kusraig købig kòn, yaskabmera doce tøgag. Tru yaskabmørig kan ángel pønrrøben, tru yaskabmerayube munchimera pøriilø pønrrabig kòn, Israelweinukkurri karrab misaamerai tru doceelai munchimeran.

¹³ Ciudayu tru yaskabmerabe pørr kal-labgatømay pøn, kandarøgatømay pøn, katøgandarøgatømay srø pøn, pørr pinebgatømay pøn købig kòn.

¹⁴ Inchen tru ciudayu pøtøgatan tru srug pusrig palaig kusruigwan niga pasrønrrabig pølsrugu pøtøburab doce warig tøgag købig kòn. Inchen trumørig tru Ubisha-unai tru doce nøashib karua øriilai munchimeran pøriilø købig kòn.

¹⁵ Incha tru naba waminchibiibe ciudawan køben, truyu yaskabmeran køben, tru sruutøga pusrig palaig marigwan køben unaasamig kan oro caña tsig sruaig købig kòn.

¹⁶ Tru ciudabe mumaytøgucha atsi kømíig latazhig købig kòn, lendømay lata, yamay lata. Angelbe tru ciudawan cañatøga unaashene, 2.200 kilómetros købig kòn. Yamay lata, lendømay lata, mumaytøgucha latazhig købig kòn.

¹⁷ Incha tru pøtøburab palaig marigwan palamay mayan køtashchab unaashene, 75 metrosig købig kòn, tru ángel misag unaasimay unaashen.

¹⁸ Tru pøtøburab palaig kusrub mariibe jaspe sruutøga marig køben, ciudabe orotøgatø marig kan pigriu tørguelarrøzhig lataig købig køn.

¹⁹ Inchen tru ciudayu palaig marigwan niga pasrønrrabig katsigwan pusri-løbe chi sruutøgagøben tabzheeløtøga purø tabzhig kønrrai marig købig køn:

Srøstriibe jaspøtøga marig køben,

tru wendauibe zafirotøga marig køben,

pøn kønrrabyuibe ágatatøga marig køben,

pib kønrrabyuibe esmeraldatøga marig køben,

²⁰ trattrøgatø kønrrabyuibe ónicetøga marig købig køn.

Inchen seis kønrrabyuibe cornalinatøga marig køben,

siete kønrrabyuibe crisólitotøga marig køben,

ocho kønrrabyuibe berilotøga marig køben,

nueve kønrrabyuibe topasiotøga marig køben,

diez kønrrabyuibe crisoprasatøga marig køben,

once kønrrabyuibe jacinto taig sruutøga marig køben,

srabeig doce kønrrabyuibe amatistatøga. Øyeeg sruumeratøga marig købig køn.

²¹ Tru doce yaskabmerabe doce perlas købig køn, yaskabmørig kan perlatøgatø marig kandiig kemesraimøzhikke. Inchen tru ciudayu mas lendiig llirainuube orotøgatø marig købig køn, ¡katø! kan pigriu tørguelarrøzhig lataikke.

²² Tru ciudayube Tiuswei yawane ashmur; kaguende Señor Tius Newan Maramburab Marøbiiba, Ubisha-unøba, nømashib tru ya købig køn.

²³ Tru ciudabe tør kønrrai pørr pilamig palain kømøwei, pøl pilamig palain kømøwein køn; kaguende Tiuswei tørguegwalmabiibe tru ciudawan kebiløben, tru ciudayu pilab pasrabiibe Ubisha-unø køn.

²⁴ Inchen misaamera purø nørrø pønrrabelø tru kaigyugurri wesrailøbe tru ciudawei tøryu amøñiben, pirau reymerabe nømui chigurrimbunø purø tabzheelø tøgagúilane srua amba, tranrrun.

²⁵ Kwalømbe chu uraskucha yaskabmerabe kurindø pønrrønrrun. Kaguende truyube yem misrøbiibe kaanrrun.

²⁶ Misag nørrø pønrrabelø nømui chigurrimbunø purø tabzheelø tøgagúigwanba, maya nuguen tab indigwanba ciudayumay srua amrrunrrun.

²⁷ Truyube chishig kømíig kaiba, katø ashikken kønrrabgaig marøbeløba, katø isapteeløbabe managuen kebamrraamøn. Truyu kebambuppe, tru Ubisha-unai libroyu managatig øsig purrønrrabelai munchimeran pørig tøgartøwei kebamrrun.

22

¹ Incha ángelbe kan nu pi chishchig, tru øsig kømíig tranøb piwan nan eshkabig køn. Truibe tørguegwalmabzhig kan pigriu lataig, tru Tiusweimba, Ubisha-unaimba wamisra karub wainukkurri webarrubig køn.

² Tru ciuda tøbøtagwan mas lendiig llirainuube, tru nu pi mendabe øsig kømíigwan tranøb tusr ambumay imay pinøgasrøbig pasrabig køn, truibe mamimera peg, peezhig doce nigabig køn, pølmørig, pølmørig lurramig. Inchen tru tusryu ishiimerabe misag nørrø pønrrabelai kwanrrømeran tamamigweyasig købig køn.

³ Tru ciudayube Tius kaig nebui warønrrun tainamig kaanrrun. Inchen Tiusweimba, Ubisha-unaimba wamisra karub waibe tru ciudayu pasrøben, nuiwan marøb melabeløbe truyu køriibala tabig waminchun.

4 Malaugue nun ashib, nui munchiwan nòmui kappalømerayu pørig tøgagøb inchun.

5 Truyube yandø yem misrtrabig kawei, tuyube tør kønrrai piløgamig palain kømøwei, nøsig pilam palain kømøweim purrønrrun. Kaguende Tius Señorbe nømune nø pilønrrun. Inchen nømbe managatig ashib karub purrønrrun.

Cristo arrumibe lutau køn

6 Angelbe katø nan trenchibig køn:

–I wamindiiløbe maig taiibe treeg køb, katø ciertonig køb køn cha. Señor, tru nø maig karuigwan eshkabelan nø maig tamigwan isungarub pasrab Tiusbe, nui ángelwan ørin køn cha, tru petø chigøben pureb attrabigwan nuiwan marøb melabelan eshkanrrai.—

7“¡Au! Nabe petø arrumønrrun tan. Chi pureb attrabigwan i libroyu pøriilan møra marøbigweimbe mayanguen tab kuig køn” tan.

8 Iigwan ashib, mørøb inchibiibe, Juan, na kur. Incha yandø tru chab ashib, chab mørabe, tru ángel nan kenamarøbigwei merrab nun køriibala tabig waminchab tømønrsøb sralene,

9 nøbe nane trenchiptinchibig køn:

–¡Øyeg marmøta! cha. Nagucha Tiuswei marøb megabiitøwein kur cha, ñiba, ñui nunelø, tru Tius maig karuigwan eshkabeløba, katø mayeelø i libroyu wamindiilan møra marøbeløba, truilø lataitøwingue. ¡Tiuswane køriibala tabig waminchi!— chibig køn.

10 Inchabe katø nane trenchibig køn:

–Chi pureb attrabigwan i kilgayu wamindig pønrrabelane kasrøppa, esgamøta cha. Kaguende tru treeg nebunrrabiibe yandø lutau pasran cha.

11 Sølğandø tabig marmiibe, trube, katøgucha treegwan ka marøb uñ cha. Trømbøig ashikken kønrrabgaig marøbiibe, trube, katøgucha treeg ka marøb uñ cha. Inchen sølgandø tabig marøbig kuabe, trube, katøgucha treeg marøbig marøb uñ cha. Inchen Tiusweyasiitø tarømarig kuabe, treetø pasrabig pasrau— cha.

12 “Au, na, Jesúsbe, petø arrumønrrun cha, nøm møitøgucha maig marig køben, truburo na tranamig tøgagúigwan tranrrab srua.

13 Nabe Aba, Zetaba lataig, Srøsriiba, Srabeiba, katø Pølbaserøbiiba, Patsabiiba, truiibe na kur cha.

14 ‘Mayanguen tab kuilø køn, nømui keilan tsarøbeløbe, tru øsig kømig tranøb tusryuigwan mu merønrraingag mamig tøgagøb, tru ciudayu yaskabmerawan kebambub indamig.

15 Trune tru wera lataig inchibeløba, trømbø marøb piimabeløba, møgueløba, ishumburba trømbøig marøbeløba, kweechipteeløba, chiwangøben kan tius kui lataig inchibeløba, mutøgucha isa wamindamigwane larrø chullelø ke chi tabig kui lataig isa waminchibeløba, iiløbe wambig kørømisrtrun.

16 ‘Na, Jesúsbe, nai ángelwan iigwan ñimun eshkanrrai ørar tru iglesi-amerayasig. David kønrrai tru srøl namerrig pasrabig kua, katø nabe Davidweinukkurrindøwei larrøbicha arrubig kur, tru løtsø tør-rram uras tørguegwalmab estrella.”

17 Inchen Espiritu Santoba, Ubisha-unai Sraimbabe: “¡Amø!” tan. Iigwan mørøbikkucha: “¡Amø!” chi. Inchen møikkøben pimulgwaibe, amø. Katø møikkøben mutchappe, tru øsig kømig tranøb piwan, ka yandø ketig, muchi.

18 Maig pub attrabigwan i libroyu pørigwan wamindi mørøbelane mundøgucha, isuptø martrai, nabe eshkar: Møikkøben iilan ka yandø

nemarøbigwane chine kaig nehub amrrunrabigwan nune Tiusbe nemartrun tru i libroyu pørig pønrrabelan.

¹⁹ Katø møikkøben i libroyu maig pub attrabigwan wamindiilan kerrabigwane tru øsig kømigwan tranøb tusrwanba, tru Tius nuindø tarø mari ciudawanba, Tiusbe nungucha kerranrrun, i libroyu truilaimburab chi pørig pønrrabigwan.

²⁰ Iilan maig kønrrabigwan waminchib eshkabiibe trendan: “Arrumø kømø, nabe petø arrumønrrun” cha.

Treeg kønrrun. Amø pøs, Señor Jesús.

²¹ Namui Señor Jesucristoi tru ka yandø tab indiibe mayeeløba pasrønrrun. Treeg kønrrun.